

New Testament

Logo Language

Logo - Bible - New Testament

Màtáyò	3
Márokò	78
Lúkà	125
Yòwánì	204
Tà 'òle dhi i	262
Rómàbhá i	332
1 Kòrítòbhá i	364
2 Kòrítòbhá i	395
Gàlàtíyàbhá i	415
Èfésòbhá i	426
Filipóyìbhá i	437
Kòlòsáyìbhá i	445
1 Tèsàlòníkèbhá i	452
2 Tèsàlòníkèbhá i	459
1 Tímòtéyò	463
2 Tímòtéyò	472
Títò	478
Filémónà	482
Èbérè i	484
Yákóbhò	507
1 Pétéró	515
2 Pétéró	524
1 Yòwánì	529
2 Yòwánì	537
3 Yòwánì	538
Yúdà	540
Tà tadhálé dhi i	543

Logo - Bible - New Testament

Màtayò

Màtayò 1

Yésu Krísto ni kómvó (À kònò kpà Lúkà 3:23-38)

- ¹ Yésu Krísto angá Dàwídì ni súrú lésè, ìndì Dàwídì angá ína Àbàramà ni súrú lésè. Kònìdhì Yésu Krísto ni tábhí kí tìma ni tà tisile dhi 'ì:
- ² Àbàramà ti tá Ìsákà, Ìsákà dré Yàkóbhò ni tìzo gò, Yàkóbhò dré Yúdà kí tìzo adrúpi ni íbe.
- ³ Yúdà i Tàmárà be dhi i dré Fàrésà kí tìzo Zárà be. Fàrésà dré Èsérómà ni tìzo, Èsérómà dré Àrámà ni tìzo.
- ⁴ Àrámà dré Àmìnàdábà ni tìzo, Àmìnàdábà dré Nàsónà ni tìzo, Nàsónà dré Sàlòmónà ni tìzo.
- ⁵ Sàlòmónà i Rábà be dhi i dré Bòwésà ni tìzo. Bòwésà i Rútà be dhi i dré Yòbédè ni tìzo. Yòbédè dré Yésè ni tìzo,
- ⁶ Yésè dré ópí Dàwídì ni tìzo. Dàwídì i Ùrýà ni tòkó be dhi i dré Sòlòmónò ni tìzo.
- ⁷ Sòlòmónò dré Ròbòwámà ni tìzo, Ròbòwámà dré Àbíyà ni tìzo, Àbíyà dré Àsáfà ni tìzo.
- ⁸ Àsáfà dré Yòsàfátà ni tìzo, Yòsàfátà dré Yòrámà ni tìzo, Yòrámà dré Òzíyà ni tìzo.
- ⁹ Òzíyà dré Yòwàtámà ni tìzo, Yòwàtámà dré Àkázà ni tìzo, Àkázà dré Èzékíyà ni tìzo.
- ¹⁰ Èzékíyà dré Mànásè ni tìzo, Mànásè dré Àmónà ni tìzo, Àmónà dré Yòsíyà ni tìzo.
- ¹¹ Yòsíyà dré Yèkònýà kí tìzo adrúpi ni íbe, lókyá Ìsérélè ànzì kí rùzo dòle Bàbìlónà na àdzú sè dhi 'á.
- ¹² Ayì nda kí dòma Bàbìlónà na dhi àmvolésè dhi, Yèkònýà dré Sàlàtiyélè ni tìzo, Sàlàtiyélè dré Zòròbàbélè ni tìzo.
- ¹³ Zòròbàbélè dré Àbíyúdà ni tìzo, Àbíyúdà dré Èliyàkímà ni tìzo, Èliyàkímà dré Àzórà ni tìzo.
- ¹⁴ Àzórà dré Sàdókà ni tìzo, Sàdókà dré Àkímà ni tìzo, Àkímà dré Èliyúdà ni tìzo.
- ¹⁵ Èliyúdà dré Èlèyàzárà ni tìzo, Èlèyàzárà dré Màtánà ni tìzo, Màtánà dré Yàkóbhò ni tìzo,

¹⁶Yàkóbhò dré Yòséfà ni tìzo. Yòséfà nda tá Màrìyà ni agó 'i. Dì Màrìyà nda dré Yésu, adrélé zile Mèsiyà dhi ni tìzo.

¹⁷Kidholé Àbàramà rú atsálé Dàwídì rú dhi, máti tá mudrí-drì-su. Kidholé Dàwídì rú atsálé Èsérélè ànzì kí dòma Bâbilónà na dhi rú dhi, máti kpà mudrí-drì-su. Kidholé àyi nda kí dòma rú atsálé Mèsiyà ni tìma rú dhi, máti kókpà mudrí-drì-su.

Yésu Krísto ni tìma

(À kònò kpà Lükà 2:1-7)

¹⁸Yésu Krísto ni tìma tá kònìnì: À zì tá Yésu ni andre, Màrìyà, Yòséfà dré tòko ró. Dì, drìdrì i dré ru amúzó dhi kandrá dhi, Màrìyà kisú tá ína 'a Tírí Lólo ni rinyí sè.

¹⁹Dì agó ni Yòséfà dré adrélé móndí gyägya 'i dhi sè dhi, lè tá kanyò fèle drá móndí i mi ko gò, dré kisùzoá dhi, i ni akodhi ni tayí kòlyà.

²⁰Dì dré tá adrérà'a tà nda ni kisù dhi 'á dhi, ángéló Míri àdhya dré agázó akodhi kandrá toróbí na, tàá drá dhi: «Yòséfà, Dàwídì ni mvá, mí ro Màrìyà ni dòma mòle dhi ko. Tako ko, 'a dré kisúlé kòdhi, kisú Tírí Lólo ni rinyí sè.

²¹A ni mváagó ti. Mí ni akodhi ni rú zi Yésu. Tako ko, akodhi ni áyi móndyá kí tìdrí àyi kí tàkonzì i lésè. »

²²Dì tà nda kòdhi i atsá tití kònìnì, kitswálé tà Míri dré tá longolé áyi pròfétà tí dhi i kò'oró ru be dhi bvó. Akodhi longó tá dhi:

²³«Mì nò rè ká! Kyánzi ago tà nilepi rè ko dhi ni 'a kisú gò, dré mváagó tìzo.

À ni rú ni ni zi Èmànùwélè. » Rú nda kòdhi adré lèá tâle dhi «Giká túmäní àma íbe».

²⁴Dì Yòséfà kòlaró dre dhi, dré Màrìyà nda ni dòzo mòle ngóró ángéló Míri àdhya dré tá tâle akodhi dré dhi tíni.

²⁵Dì, ayí ína akodhi be ko, tsàle lókyá dré mváagó tìzo dhi 'á. Gò dré mváagó nda ni rú zìzo Yésu.

Màtayò 2

Tògyabhá i` ali` Yésu ni kitó

¹À ti tá Yésu Bètélémè, bvò Yùdáyà àdhya lé dhi na, ópí Èródè ni lókyá 'á. Akodhi ni tìma àmvolésè dhi, tògyabhá bhìbhínyà tà ndabhá nile dhi i dré angázó kítú dré apfòrà lésè, alile atsálé Yèrúsalémà le.

²I dré lizízoá dhi: «Mvámva tìle Yùdà ànzì kí ópí ro dhi ángwà? Tako ko, mà nò tá akodhi ni bhìbhínyà kítú dré apfòrà lésè gò, mà dré alizo kitswálé akodhi ni lindrì bha. »

³Dì ópí Èródè kòyi tà nda dre dhi, akodhi ni drì dré abízó, ngóró móndyá tití Yèrúsalémà le dhi kya tíni.

⁴Dré Yùdà ànzì kí kòwánà kàdrì kí kimózó tátrítrí kúlì tadhábhá íbe gò, lizízoá àyi tí dhi: «Pròfétà i adré tá tàá dhi, à ni Mèsiyà ni ti ángolé ya? »

⁵Ì logó drá dhi: «Bètélémè, Yùdáyà le dhi na. Àngyá ko, pròfétà kí àlo tisì kònìnì:

⁶«Dì mi, Bètélémè bvò Yúdà àdhya lé ni,

ámì tà tsà bhàandre kàdrìkàdrì Yùdáyà le dhi kya i kòfalé ko. Tàko ko, ópí àlo dhi ni apfò mí lésè. A ni áma móndyá, Isérélè àanzi kí drì ko kábiligýà likílépi tíni. »»

⁷Èródè kòyi tà nda dre dhi, dré tògyabhá nda kí zìzo lùzu ró gò, àyi kí lizízó lókyá bhìbhínyà nda dré tá kídhózó apfòle dhi ni nìzo.

⁸Gò dré àyi kí mùzo Bètélémè na, tàzoá àyi dré dhi: «Mì kòlì móndyá kònàle dhi kí lizí, mvámvá nda ni tà nìzo dóro. Dì mì kòkisú akódhì dre dhi, mì kàmù kúlì má dré, má kòkítswáró kpà lìle akódhì ni lindrì bha be dhi bvó. »

⁹Dì tògyabhá nda i kòyi ópí nda ni kúlì dre dhi, i dré ngàzo lìle. Ì dré tá adrérà'a láti 'á dhi, bhìbhínyà i dré tá nòle kítú dré apfòrà lésè nda adré tá lìle àyi kandrána, tsàle áyi kikí àrà mvámvá nda dré tá adrészó dhi drile.

¹⁰Dì i kònò bhìbhínyà nda áyi kikírà'a dre dhi, i dré lenzézó lavúlé.

¹¹Ì kòfì dzó na dre dhi, i dré mvámvá nda ni nòzo andre ni Màrìyà be gò, i dré dhèzo àyi kí kórókó titì mvámvá nda kandrá, akódhì ni lindrì bhàzo. Dì i dré ngá làgí be kàdrì i dré adólé dhi kí kinzízó fèle drá. Ì fè tá órò, bénédélé, iñdì málásì ledélé mírè sè dhi be.

¹²Àmvolásà dhi, Gìká dré tà longózó àyi dri toróbí na tàzoá dhi, i kògò nzìle Èródè vélésè ko. Dì i dré láti àzya dòzo, nzìzo àyi kí bvò na.

Yòséfà i` lapá Èzèpétò na

¹³Tògyabhá nda i kòlì dre dhi, ángéló Míri àdhya dré agázó Yòséfà kandrá toróbí na, tàá drá dhi: «Mí nga mvámvá kòdhì ni do andre ni be, lapázó àyi íbe Èzèpétò na. Mì kàdré kònàle tsàle lókyá má dré dra tàzoá mí kàgò dhi 'á. Tàko ko, Èródè adré 'ole mvámvá nda ni nda pfùle dràle. »

¹⁴Dì Yòséfà dré ngàzo ngátsi kítogá sè mvámvá nda ni do andre ni be gò, lapázó àyi íbe Èzèpétò na.

¹⁵Ì dré adrészó kònàle tsàle lókyá Èródè dré dràzo dhi 'á. Tà nda kòdhì atsá kònìnì, kitswálé tà Míri dré tá longólé áyi pròfétà tí dhi kò'oró ru be dhi bvó. Akódhì longó tá dhi: «Má azí áma mváagó apfòle Èzèpétò lésè. »

Èródè 'o àanziàgo i tupfúlé todràle

¹⁶Èródè kònò dhi, tògyabhá nda i lití tá i dre dhi, akódhì ni togó dré aswázó tà tändi ró. Dì dré móndí kí mùzo lìle Bètélémè na iñdì bhà làgásà dhi i 'ásè, àanziàgo tití kóná íbe rì dhi kí tupfú todràle, túmäní àyi kóná tsabhá rè rì ko dhi íbe. Kí tá kóná nda kí bvó lókyá dré tá yile tògyabhá nda i vélésè dhi sè.

¹⁷Dì tà Míri dré tá longólé pròfétà Yèrèmíyà tí dhi dré ru 'òzo kònìnì. Akódhì longó tá dhi:

¹⁸«Kúlì adré angálé Rámà lésè.

À adré ngôle adrészó tongolé. Ràkélè adré áyi ànzimvá kí ngo nì. Adré lèá à kòtindri
áyi togó wà dhí ko,
ànzimvá nda ì dré adrélé vélé yó dhí sè. »

Yòséfà i` li` bhà mo Nàzàrétà na

¹⁹Èródè nì dràma àmvolésè dhí, ángéló Mírì àdhya dré agázó toróbí na Yòséfà kandrá
Ézépétò na, tàá drá dhí:

²⁰«Mí nga mvámvá do andre nì be, nzìzo àyi íbe Isérélè ànzi kí bvò na. Tàko ko,
móndyá adrébhá tá láti nda mvámvá nda nì 'ozo dràle dhí ì todrà akílé dre. »

²¹Dì Yòséfà dré ngàzo mvámvá nda nì do andre nì be gò, nzìzo àyi íbe Isérélè ànzi kí
bvò na.

²²Dì, dré yìzoá tâle dhí, Àrèkèlawò atsá tá ópí ro Yùdáyà drile áyi atá Èródè nì àrà 'a
dhí, dré ína adrészó ngá ro nzìma kònàle dhí sè. Di Gìká dré gòzo tà longó drá toróbí
na gò, ì dré lìzo bvò Gàliláyà àdhya na.

²³Ì kòtsa kònàle dre dhí, ì dré bhà mòzo adrészó bhàandre rú zile Nàzàrétà dhí na. Tà
nda kòdhí atsá kònìni, kitswálé tà longolé pròfétà ì tí dhí kò'oró ru be dhí bvó. Ì
longó tá dhí: «À nì akódhí nì zi Nàzàrétà mvá ro. »

Màtayò 3

Yòwáni` Bâtisimò fèlepi ledé láti Mírì Yésu dré

(À kònò kpà Márokò 1:1-8; Lükà 3:1-18; Yòwáni` 1:19-28)

¹Lókyá nda àmvolésè dhí, Yòwánì Bâtisimò fèlepi dré pfòzo adrélé Gìká nì kúlí
longó duku Yùdáyà àdhya na.

²Adré tá tàá dhí: «Mì kòladzà àmì kí togó agòzo Gìká vélé. Tàko ko, Òpì bhù àdhya
atsá ànyi dre. »

³Yòwánì nda tá dhya pròfétà Èsáyà dré tá tà nì nì tazo dhí 'i. Akódhí tà tá dhí: «Dhya
alo adré kúlí loyó duku na, adrészó tàá dhí: <Mì kòledé láti Mírì dré alìzo! Mì kòlotó
láti atsálé pyà akódhí dré! > »

⁴Yòwánì asó tá kítá ledélé kàmílò bhí sè dhí í rú, káfà ledélé kà'wá kíní sè dhí nì 'ízo
áyi kípílé 'á. Akódhí nì mányàngá tá kísa 'i, túmäní apé mbì na dhí be.

⁵Móndí zyandre dhí ì adré tá apfòle Yèrúsalémà lésè, bvò wáyi Yùdáyà àdhya lésè,
ìndì bvò wáyi Yòròdánè làgásè dhí lésè, alìle Yòwánì vélé.

⁶Ì adré tá àyi kí tàkonzì kí ta ngádra 'á gò, akódhí dré adrészó bâtisimò fe àyi dré
yìandre Yòròdánè àdhya na.

⁷Dì, akódhí kònò Fàrisayò i, Sàdùkáyò íbe bì dhí ì adrérà'a alìle kitswálé bâtisimò do
í vélé dre dhí, dré tazoá àyi dré dhí: «Àmì, nì àtrá kí àrèbhá nì i, àdhí tadhá àmì dré
dhí, mì kòlapá Gìká nì kombà adrélépi alìle dhí sîlésè dhí nì? »

⁸Lè mì kàdré tà adrébhá tadhá dhí, mì ladzà àmì kí togó dre dhí kí 'o kòdhya.

⁹Mì kòbhà àmì adrélé kisùá àmì léna dhi <Àma àmakya Àbàrámà ni ànzì 'i> dhi ko. Tàko ko, má adré tàá àmì dré dhi: Gìká rìnyí íbe kïtswázó ànzì 'o topfôle Àbàrámà dré kírà kònì i lésè.

¹⁰À ga kùbalú fa kómvó i rú dre. Dì à ni fa tití adrébhá lò'wa dóro 'a ko dhi kì togá lebhélé àtsí na.

¹¹Má adré mána bâtísimò fe àmì dré yì sè tadházóá dhi, mì ladzá àmì kì togó dre. Dì, dhya àlo áma lavulépi rìnyí sè dhi ni ína adhé má bvó. Má kïtswá akódhi nda ni lindrì sè ko. Má kïtswá ndindì akódhi ni kámokà tingí bwà ko. Akódhi ni bâtísimò fe àmì dré Tirí Lólo sè, ìndì àtsí sè.

¹²Akódhi ndàkpá íbe í drígá. Ásà dhi, a ni ngánò àngbó ína drìna dhi ni awá, lò'wa ni ni lomvózó dàle kòbhó na gò, kuyí ni ni kùzo zàle àtsí adrélépi adrálé ko dhi na. »

Yésu ni bâtísimò dòma

(À kònò kpà Márökò 1:9-11; Lükà 3:21-22)

¹³Lókyá nda sè dhi, Yésu dré angázó Gàllayà lésè alìle Yòwánì vélé kïtswálé bâtísimò do Yòròdánè na.

¹⁴Dì, Yòwánì lè tá ína bâtísimò fèle Yésu dré ko gò, dré tazoá drá dhi: «Adré tá lèá dhi, mí kòfè bâtísimò má dré mi. Dì, mí gò mína alìle bâtísimò do má vélé ngíningíní ro? »

¹⁵Dì Yésu logó drá dhi: «Mí kòka'i tà kòdhì kàdré kònìnì lókyá kònìdhì sè. Tàko ko, adré lèá dhi, mà kò'o tà gyägya tití Gìká dré adrélé lèle mà kò'o dhi i kïtswálé tití. » Dì Yòwánì dré bâtísimò ka'izo fèle drá.

¹⁶Yésu kòdo bâtísimò dre dhi, dré apfòzo yì lésè. Dì gbă kòdhwa, bhù dré ru lanzizó gò, Yésu dré Gìká ni Tirí nòzo asírà'a kòbhòlà tñi adhélé í dri.

¹⁷Gò kúlí dré apfòzo bhù lésè tàá dhi: «Kònìdhì áma Mváagó má dré lèle tò dhi 'i. Áma togó adré kinilé akódhi ni tà sè tò. »

Màtayò 4

Dzáborò tabhì Yésu ni lití'lé duku na

(À kònò kpà Márökò 1:12-13; Lükà 4:1-13)

¹Àmvolásà dhi, Tirí Lólo dré Yésu ni drìzo lìzo akódhi be duku na, Dzáborò kòtabhìrò akódhi litilé be dhi bvó.

²Kònàle dhi, Yésu dré tâbirí mvòzo kítú nyadhi-rì ìndì ngátsi nyadhi-rì gò, tâbirí dré akódhi ni 'òzo.

³Dì Dzáborò dré áyì kisizó ànyì akódhi làga, tàá drá dhi: «Mí kàdré Gìká ni Mváagó 'i bâti dhi, mí kòtà kírà kònì i dré dhi, i kòladzà ru atsálé mápà ro. »

⁴Dì, Yésu logó drá dhi: «Gìká ni Kúlí adré tàá dhi: <Móndí adré ngbà 'í adrélé lídrì íbe mápà sè ko. Be ró dhi, adré lídrì íbe kúlí tití adrébhá apfôle Gìká sîlésè dhi i sè. »»

⁵Gò Dzáborò dré akódhì ni drizo lìzo ába Yèrúsalémà, bhàandre lolo dhi na, akódhì ni bha tépelò ni drì kàkú na.

⁶Dré tàzoá drá dhi: «Mí kàdré Gìká ni Mváagó 'i báti dhi, mí wa dhèle bvò dri. Àngyá ko, Gìká ni Kúlí adré tàá dhi: «Gìká ni tòlí fe áyi ángéló i dré ámi tà sè.

Àyì nda kí ámi ko kító, mí kòdheró ámi pá si kírà dri ko. » »

⁷Dì Yésu gò logóá drá dhi: «Gìká ni Kúlí adré kókpà tàá dhi: «Lè mí kòtabhì Míri ámi Gìká ko. » »

⁸Gò Dzáborò dré gózo akódhì ni dri mbàzo ába kòngó àlo mvumvù lavulé dhi drìna, òpì wáyi bvò àdhya kí tadházó drá àyì kí rúku íbe.

⁹Dré tàzoá drá dhi: «Má ni òpì tití kòdhì kí fe mí dré, mí kàdhé ámi kórókó tití má kandrá áma lindrì bhàzo dhi. »

¹⁰Dì Yésu tà drá dhi: «Sàtánà, mí nga kònwasè! Tàko ko, Gìká ni Kúlí adré tàá dhi: «Lè mí kàdré ngbà 'i Míri ámi Gìká ni lindrì bha kòdhya. Mí kàdré kpà lìsámbò 'o ngbà 'i akódhì ni rú sè kalóma. » »

¹¹Dì Dzáborò dré ngàzo akódhì ni tayí. Gò ángéló i dré alìzo akódhì ni ledé.

Yésu kidhó Gìká ni kúlí longó

(À kònò kpà Márokò 1:14-15; Lükà 4:14-15)

¹²Àmvolásà dhi, Yésu dré yìzoá tâle dhi, à ru tá Yòwánì bhèle bădzó na gò, dré gózo gòle Gàliláyà na.

¹³Dré rè zyà tsàzo Nàzàrétà na gò, dré bhàandre nda ni tayízó lìzo bhà mo Kàpàrànàwumà na. Bhàandre nda tăpáríandre Gàliláyà àdhya mìle, bvò Zàbùlónà ànzì kya Nèfàtálì ànzì íbe dhi na. ¹⁴Tà nda kòdhì atsá kònìnì, kïtswálé tà longolé pròfétà Èsáyà tí dhi kò'oró ru be dhi bvó. Akódhì longó tá dhi:

¹⁵«Móndyá bvò Zàbùlónà ànzì kya Nèfàtálì ànzì íbe dhi na dhi i,
àyì adrébhá tăpáríandre mìle, ìndì Yòròdánè ni ta'á na dhi i,
àyì adrébhá Gàliláyà, bvò móndyá súrú twá ro dhi kya na dhi i,

¹⁶i adré tá lirílé tímivá na gò, i dré ngádra kàdrì dhi ni nòzo. i adré tá lirílé líndrí dràdrà àdhya zàle gò, ngádra dré apfòzo ngá kazá àyì kòfalé. »

¹⁷Kidholé lókyá nda sè dhi, Yésu dré ngàzo adrélé Gìká ni kúlí longó, adrészó tàá dhi: «Mì kòladzá àmì kí togó agòzo Gìká vélé. Tàko ko, Òpì bhù àdhya atsá ànyì dre! »

Yésu kidhó áyi lebèbhá kí azí

(À kònò kpà Márokò 1:16-20; Lükà 5:1-11)

¹⁸Kítú àlo, Yésu dré tá adrérà'a atsílé tăpáríandre Gàliláyà àdhya mìlésè dhi 'á dhi, nò tá móndí rì adrúpi ró dhi i. Àyi nda i tá Sìmónà adrélé kpà rú zìle Péteró dhi, túmání adrúpi ni Andréyà be dhi 'i. i adré tá kimbá bhe yí na. Tàko ko, àyi tá kosyá bhebhá 'i.

¹⁹Yésu dré tazoá àyi dré dhi: «Mì alì má vésè. Kìdhólé nyànomvá dhi, mì gò vélé adrélé kosoá bhebhá i ró ko. Má ni àmi kì 'o adrélé móndí ndabhá i ró. »

²⁰Dì gbă lókyá nda sè dhi, i dré àyi kì kimbá kì tayízó gò, i dré ngàzo adrélé akódhi ni lebè.

²¹Yésu kòlì drìdrì tsà dre dhi, dré móndí rì àruka adrébhá kpà adrúpi ró dhi kì nòzo. Àyi nda i tá Yàkóbhò i Yòwánì be, Zèbèdáyò ni ànzì 'i. I adré tá bwátù na túmäní àyi kì atá Zèbèdáyò be, adrélé àyi kì kimbá kì mì ledé. Gò Yésu dré àyi kì azizó.

²²Dì gbă kòdhwa, i dré àyi kì bwátù tayízó àyi kì atá be gò, i dré ngàzo adrélé akódhi ni lebè.

Yésu tatsí tà tadhábe, Rúbí Taní longóbe, i `ndi` dràbhá kì tidri` be (À kònò kpà Lúkà 6:17-19)

²³Àmvolásà dhi, Yésu dré ngàzo adrélé tatsílé bvò wäyi Gàlliláyà àdhya 'ásè, tà tadhábe Yúdà ànzì kì lísámbò dzó i 'ásè, Rúbí Taní Gìká ni Òpì àdhya ni longóbe, ìndì móndí kì tidríbe àyi kì drà tití i lésè.

²⁴Dì akódhi ni rúbí adré tá la'úlé bvò nda 'ásè tití, tsàle byá bvò Sìrýà àdhya na. À adré tá móndyá tití drà twátwa íbe ìndì ngáaswa twátwa íbe dhi kì adzí akódhi vélé, túmäní móndí tirí kònzi íbe dhi íbe, móndí àgilílí íbe dhi íbe, ìndì móndí pá be àbvo ro dhi íbe. Dì akódhi adré tá àyi kì tidrí tití.

²⁵Móndí zyandre angábhá Gàlliláyà lésè, bhàandre zile Mudrí dhi i lésè, Yérúsalémà lésè, Yùdáyà lésè, ìndì Yòròdánè ni ta'á lésè dhi i adré tá akódhi ni lebè.

Màtayò 5

Tà Yésu dré tadhálé kòngó drìna dhi i

¹Kítú àlo, Yésu kònò móndí zyandre adrébhá tá ru kímó dhi i dre dhi, dré mbàzo kòngó àlo drìna gò lirílé. Akódhi ni lebèbhá i dré àyi kì kisízó ànyì akódhi làga gò,

²dré kìdhózó adrélé àyi kì tadhá kònini:

Tà adrészó lenzélé ásà dhi i (À kònò kpà Lúkà 6:20-23)

³«Kólénzé móndyá adrébhá àyi kì no lemerè ro àyi kì togó na dhi i dré. Tàko ko, Òpì bhù àdhya àyikya 'i!

⁴Kólénzé móndyá adrébhá àwó ngo dhi i dré. Tàko ko, Gìká ni àyi kì togó tindrì!

⁵Kólénzé móndyá adrébhá àyi kì tà bha kìní mi dhi i dré. Tàko ko, i ni bvò Gìká dré lazilé dhi ni kisú tàyilé ro!

⁶Kólénzé móndyá adrébhá lovó íbe adrészó tà gyägya 'o dhi i dré. Tàko ko, Gìká ni tà i dré adrészó lovó ni íbe nda ni 'o kitswálé àyi dré tití!

⁷Kólénzé móndyá adrébhá àyi kì àzya kì kízà bha dhi i dré. Tàko ko, Gìká ni àyi kì tändi kì kízà bha!

⁸Kólénzé móndyá adrébhá togó lolo íbe dhi i dré. Tàko ko, i ni Gíká ni no!

⁹Kólénzé móndyá adrébhá tà kìdríkìdrí bha móndí i kòfalé dhi i dré. Tàko ko, à ni àyi kí zi Gíká ni ànzi i ro!

¹⁰Kólénzé móndyá adrélé mì pfòle i dré adrélé tà gyägya 'o dhi sè dhi i dré. Tàko ko, Òpì bhù àdhya àyikya 'i!

¹¹Kólénzé àmi dré, à kàdré àmi kí lodhá, adrészó àmi kí mì pfo, adrészó tà kònzi ta àmi rú kinzò sè áma tà sè dhi.

¹²Mì kàdré lenzélé, adrészó arí íbe tà nda i sè! Tàko ko, làgí mûrungú adré àmi ki letè bhù na. À pfo tá kpà pròfétà atú àmi kandrá dhi kí mì kònini. »

Tà tadhálé tà'í ni tà rú, i `ndi` tálà ni tà rú dhi i

(À kònò kpà Márökò 9:50; Lükà 14:34-35)

¹³Yésu gò tàá dhi: «Àmi tà'í bvò kònди àdhya 'i. Di, tà'í nda ni aswaaswa kòtì akílé lásà dhi, à ni kitswá logóá ngíni? Tà'í nda kitswá góle vélé tà àlo 'o ko. À adré kutúá gò, móndí i dré adrészó atóá àyi pálé.

¹⁴Àmi ngádra bvò kònди àdhya 'i. À kitswá bhàandre sile kòngó drìna dhi ni zu bwà ko.

¹⁵À dhi gà kpà tálà bhàle lìdrí zàna ko na. Be ró dhi, à adré dhiá bhàle zá kuru mísa drìna gò, dré adrészó ngá kazá móndyá tití adrébhá dzó lé dhi i dré.

¹⁶Di mì kàdré kókpà àmi kí ngádra tayí adrélé ngá kazá móndí i kòfalé kònini, i kàdréró tà dóro mì dré adrélé 'ole dhi kí no, adrészó àmi kí Atá bhù na dhi ni rú bha kùle. »

Tà tadhálé tátri` tri` kúlí ni tà dri dhi

¹⁷«Lè mì kòkisù ko tâle dhi, má alì kitswálé tátrítrí kúlí Mósè àdhya iñdì tà pròfétà i dré tisile dhi kí pfu dhi. Má alì tà nda kí pfu ko. Be ró dhi, má alì mána tà nda kí 'o kitswálé tití dhi bvó.

¹⁸Má adré tà bâti ta àmi dré: Tsàle bhù kí kùdù bvò be dhi na dhi, tátrítrí kúlí nda ni wárágà pá mvá tsà dhi 'i yà, kó ngalè tà mvá tsà tisile lána dhi 'i yà dhi kitswá tâdzí akílé ko, tsàle lókyá tà tití nda i dré dra ru 'òzo kitswálé tití dhi 'á.

¹⁹Di ásà dhi, dhya ángùdhi adrélépi tà mvá tsà àlo tátrítrí kúlí nda dré adrélé tâle à kò'o dhi ni ño gò, adrészó áyi àzya ni tadhá adrélé kpà 'oá kònini dhi, à ni akódhi nda ni zi móndí tàko ró lavulé móndyá tití Òpì bhù àdhya na dhi i rúsè. Di, dhya ángùdhi adrélépi tà tátrítrí kúlí nda dré adrélé tâle à kò'o dhi kí 'o gò, adrészó tà nda kí tadhá móndí i dré dhi, à ni akódhi nda ni zi móndí kàdrì ro Òpì bhù àdhya na.

²⁰Di, má adré tàá àmi dré dhi: Àmi kí tà gyägya kòlavú tátrítrí kúlí tadhábhá kya Fàrisáyò kya be ko dhi, mì kitswá tâdzí fîle Òpì bhù àdhya na ko. »

Tà tadhálé togóaswa ni tà dri dhi

²¹«Mì yi tâle dhi, à tâ tá àma kî tâbhí i dré dhi: <Lè mí kòpfu móndí drâle ko. Dhya ángùdhi móndí pfûlepi drâle dhi ni pfo áyi totó tâbvó tâlepi kandrá. >

²²Dì, má adré mána tâá àmí dré dhi: Dhya ángùdhi áyi togó tayílépi adrélé aswálé áyi adrúpi rú dhi ni pfo tâbvó tâlepi kandrá. Dhya ángùdhi adrélépi áyi adrúpi ni zi móndí tâko ró dhi ni pfo Yûdà ànzì kî bhâgo kâdrì i kandrá. Dhya ángùdhi adrélépi áyi adrúpi ni zi tirí kiza lîyí ro dhi kitswá ína lîle líferò ni àtsí na.

²³Dì ásà dhi, mí kâdré 'ole ngá fe Gîká dré àlètârì kandrá gò, tâ àmí kòfalé ámí adrúpi be dhi dré agázó mí léna dhi,

²⁴lè mí kòtayí ngá mína nda àlètârì kandrá. Mí kòlì rè zyà mì dré àmí kî kòfalé ledézó ámí adrúpi nda be 'iká, gò mí kâgòrò ngá nda ni fe Gîká dré ndò.

²⁵Mì kâdré lîle dhya adrélépi ámí asíkì dhi be tâbvó târâ na dhi, lè mì koyi ru mbèlè akódhi be mì dré rè dhu adrérâ'a láti 'á dhi 'á. Mí kò'o kònini ko dhi, akódhi ni ámí fe tâbvó tâlepi drîgá, tâbvó tâlepi nda dré ámí fèzo pôlísí drîgá gò, ámí bhèzo bâdzó na.

²⁶Má adré tâ bâti ta mí dré: Mí kitswá apfôle kònalésè ko, tsâle lókyá mí dré dra màri nda ni logózó akîlé tití dhi 'á. »

Tà tadhálé múná tâ dri dhi

²⁷«Mì yi tâle dhi, à tâ tá dhi: <Lè mí kò'o múná tâ ko. >²⁸Dì, má adré mána tâá àmí dré dhi: Dhya ángùdhi adrélépi tòkó àlo dhi ni no gò adrészó rûbhá lovó bha akódhi ni tâ sè dhi, 'o ína múná tâ tòkó nda be áyi togó na dre.

²⁹Ámí mì drîágó lésè dhi kâdré ámí 'o dhèle tâkonzi na nì dhi, lè mí kàngí ámí mì nda bhèle mí rûsè vwàvwà ro. Àngyá ko, mí dré ngá àlo mí rú dhi ni tayílé abîlé dhi dôro lavûlé, ámí rûbhá wâyi dhi ni bhèle líferò na dhi rûsè.

³⁰Ámí drîágó kâdré kó ámí 'o dhèle tâkonzi na nì dhi, lè mí kòli ámí drîágó nda bhèle mí rûsè vwàvwà ro. Àngyá ko, mí dré ngá àlo mí rú dhi ni tayílé abîlé dhi dôro lavûlé, ámí rûbhá wâyi dhi dré lîle líferò na dhi rûsè. »

Tà tadhálé tòkó tingama ni tâ dri dhi

(À kònò kpà Mâtayò 19:9; Márokò 10:11-12; Lûkà 16:18)

³¹«Mì yi tâle dhi, à tâ tá dhi: <Lè dhya adrélépi áyi tòkó ni le tingálé dhi kòfè drâ wárágà adrélépi tadhâ dhi, í tingá akódhi dre dhi. >³²Dì, má adré mána tâá àmí dré dhi: Kâdré ngbâ 'í ndótò tâ sè ko dhi, dhya ángùdhi áyi tòkó ni tingálépi dhi 'o ína akódhi atsâlé tòkó zâràbhù ro dhi ró. Kòdhi íbe dhi, dhya ángùdhi tòkó tingálé dre dhi ni adólépi môle dhi, adré kpà múná tâ 'o. »

Tà tadhálé mòndrà si` ma ni tâ dri dhi

³³«Mì yi kpà tâle dhi, à tâ tá àma kî tâbhí i dré dhi: <Lè mí kònò mòndrà mí dré sîle dhi ko. Dì, mí kâdré be mòndrà mì dré sîle Mírì kandrá dhi kî 'o tití. >³⁴Dì, má adré mána tâá àmí dré dhi: Lè mì kòsì mòndrà àlomvá ko. Mì kòsì mòndrà bhù ni rú sè ko. Tako ko, bhù nda Gîká ni lîrirâ adrészó opì nya dhi 'i.

³⁵Mì kòsì kpà mòn-drà bvò nì rú sè ko. Tàko ko, bvò nda àrà Gìká dré adrészó áyi pá bha drìá dhi 'i. Mì kòsì kpà mòn-drà Yérúsalémà nì rú sè ko. Tàko ko, bhàandre nda bhàandre Ópí kàdrì àdhya 'i.

³⁶Mí kòsì kpà mòn-drà ámi drì nì rú sè ko. Tàko ko, mí kitswá ndìndì ámi drìbhí àlo dhi nì ladzá atsálé kini yà, kó ngalè kemve yà dhi bwà ko.

³⁷Mì kàdré dì tà ka'i 'ole dhi, mì kòtà ngbà 'í «Ayíya» kòdhya. Mì kàdré tà ka'i 'ole ko dhi, mì kòtà ngbà 'í «Kóko» kòdhya. Tà àzya kitswálé bhàle kúlì nda i dri dhi, adrén'a angálé Dhya kònzi vélésè. »

Tà kònzi logoma tà kònzi 'ole dhi tí dhi

(À kònò kpà Lükà 6:29-30)

³⁸«Mì yi tâle dhi, à tà tá dhi: «Mì kí ru kisú mì be. Sí kí kpà ru kisú sí be. » ³⁹Dì, má adrén'a mána tâá àmi dré dhi: Dhya àlo kò'o tà kònzi àmi rú dhi, mì kògò ligílé akódhi rú ko. Be ró dhi, dhya àlo kosa ámi kóbhólé dríágó lésè dhi dhi, mí kògò mína àzya nì nì alá akódhi dré kpà sàle.

⁴⁰Dhya àlo kòlè ámi drile tâbvó tâlepi kandrá ámi kítá agá lésè dhi nì dòzo dhi, mí kòtayí kpà akódhi ámi kítá kidhì àdhya nì do.

⁴¹Dhya àlo kòru mì 'ole atsí to i be kìlôméterè àlo dhi, mì kòlì túmání akódhi be kìlôméterè rì.

⁴²Mì kàdré ngá fe dhya ángùdhi adrélépi ngá zi mí tí dhi dré. Dhya àlo kàdré ngá le zile mí tí màri ró dhi, mí kògà ngá nda ni fèma drá dhi ko. »

Dhyá kí kàribhá kí lèma

(À kònò kpà Lükà 6:27-28, 32-36)

⁴³«Mì yi tâle dhi, à tà tá dhi: «Lè mí kàdré ámi àzya nì le, adrészó ámi kàribhá nì ga.

⁴⁴Dì, má adrén'a mána tâá àmi dré dhi: Lè mì kàdré àmi kí kàribhá kí le. Mì kàdré kpà tà zi Gìká tí móndyá adrébhá àmi kí mì pfo dhi i dré.

⁴⁵Mì kàdré 'òá kònìnì dhi, mì nì adrén'a àmi kí Atá bhù na dhi nì ànzì i ró. Tàko ko, akódhi adrén'a kitú 'o kàle móndí kònzi i dri, ìndì móndí doro i dri. Adré kpà kozya 'o dhile móndí gyägya i dri, ìndì móndí gyägya ko dhi i dri.

⁴⁶Mì kàdré ngbà 'í móndyá adrébhá àmi kí le dhi kí le kòdhya dhi, mì nì àdho làgí kisú ásà? Ndìndì mèdáyí lagibhá i adrén'a 'òá kònìnì.

⁴⁷Mì kàdré ngbà 'í móndo fe àmi kí adrúpi i dré dhi, mì adrén'a àdho tà doro 'o móndí àruka kya kí lavú? Ndìndì pagánò i adrén'a 'òá kònìnì.

⁴⁸Adré dì lèá dhi, mì kàdré móndí doro kitswálé tití dhi i ró, ngóró àmi kí Atá bhù na dhi dré adrélé doro kitswálé tití dhi tini. »

Màtayò 6

Ngá fèma lemerèbhá i dré dhi

¹Yésu gò tàá dhí: «Mì kònò dóro, mì kàdréró ngbà 'í àmì kí tà gyägya kí 'o móndí i mi, i kàdréró àmì kí no dhí ko. Tàko ko, mì kàdré 'òá kònìnì dhí, mì kïtswá àmikya làgí kisú àmì kí Atá bhù na dhí vélésè ko.

²Mí kàdré dí ngá fe lemerèbhá i dré dhí, lè mí koyo tà nda drìdrì ngóró túrúpfúbhá i dré adrélé 'ole dhí tini ko. Tàko ko, àyi nda i adré gòká vo Yúdà àanzi kí lìsámbò dzó i 'ásè ìndì láti i 'ásè, móndí i kàdréró àyi kí tà bha kuru ngá i dré adrélé fèle dhí kí tà sè. Má adré tà bati ta àmì dré: i kisú àyikya làgí wäyi i dré kïtswálé kisulé dhí dre.

³Di, mi ró dhí, mí kàdré ngá fe lemerèbhá i dré dhí, mí kòtayí ámì lìdzí tà ámì dríágó dré adrélé 'ole dhí ni ni ko.

⁴Be ró dhí, mí kàdré mína ámì ngá fe lùzu ró. Di ámì Atá adrélépi tà adrélé 'ole lùzu ró dhí kí no dhí ni làgí mûrúngú fe mí dré. »

Tà zìma Gìká tí dhí (À kònò kpà Lükà 11:2-4)

⁵«Mì kàdré tà zi Gìká tí dhí, mì kò'o túrúpfúbhá kya tini ko. Tàko ko, àyi nda i adré tà le zile Gìká tí i dré adrérà'a àyi kí totó kuru lìsámbò dzó i 'ásè ìndì láti andre i 'ásè dhí 'á, móndí i kàdréró àyi kí no be dhí bvó. Má adré tà bati ta àmì dré: i kisú àyikya làgí wäyi i dré kïtswálé kisulé dhí dre.

⁶Di, mi ró dhí, mí kàdré tà le zile Gìká tí dhí, mí kòfí kalóma dzómavá na, dzóti asé mí vélé gò, adrészò tà zi ámì Atá tí lùzu ró. Di ámì Atá adrélépi tà adrélé 'ole lùzu ró dhí kí no nda ni làgí mûrúngú fe mí dré.

⁷Mì dré adrérà'a tà zi Gìká tí dhí 'á dhí, mì kàdré tà àlo ta rä pagánò kya tini ko. Àngyá ko, àyi nda i adré kisùá dhí, i kàdré kúlí ta bí dhí, Gìká ni àyi kí yi.

⁸Di mì kò'o tà àyikya tini ko. Tàko ko, àmì kí Atá ni tà mì dré adrélé lèle zile dhí i drìdrì, mì dré tà nda kí zirà'a tíá ko dhí 'á.

⁹Di ásà dhí, mì kàdré tà zi Gìká tí kònìnì: <Àma kí Atá bhù na dhí, lè móndyá wäyi dhí i kònì dhí, mi Gìká lolo 'í dhí be.

¹⁰Ámì Òpì kàtsá móndyá wäyi i kòfalé wà. Tà mí dré adrélé lèle 'ole dhí i kò'o ru kònwa bvò dri, ngóró dré adrélé 'ole bhù na dhí tini.

¹¹Mí kafè àma dré mápà kïtswálépi àma sè kítú ándró kònìdhí sè dhí wà.

¹²Mí kòtri àma kí tàkonzì i, ngóró mà dré kpà adrélé móndyá tàkonzì 'obhá àma rú dhí kya kí tri dhí tini.

¹³Mí kòtayí àma tà dré tabhile, àma kí 'òzo dhèle tàkonzì na dhí ko. Be ró dhí, mi kàpá àma Dhya kònzi drígásè. >

¹⁴Mí kàdré móndyá tàkonzì 'obhá àmì rú dhí kí tàkonzì tri dhí, àmì kí Atá bhù na dhí ni kókpà àmì kí tàkonzì tri.

¹⁵Di, mì kàdré àmikya móndí kí tàkonzì tri ko dhí, àmì kí Atá kïtswá kpà àmì kí tàkonzì tri ko. »

Tàbirí mvòma adrészó tà zi Gìká tí dhi

¹⁶«Mì kàdré tàbirí mvo adrészó tà zi Gìká tí dhi, mì kòtayí àmì kì mìbhalé adrélé kizà ro túrúpfúbhá kya tini dhi ko. Àngyá ko, àyi nda i adré àyi kì mìbhalé ladzá atsálé kizà ro tadházóá móndí i dré dhi, i adré tàbirí mvo. Má adré tà bati ta àmì dré: i kisú àyikya làgí wäyi i dré kitswálé kisúlé dhi dre.

¹⁷Dì, mì ró dhi, mí dré adrérà'a tàbirí mvo dhi 'á dhi, mì kàdré ámì mibhalé dzì, adrészó kpà dò da mí dri,

¹⁸dhya àlo kòniró ko tâle dhi, mí adré tàbirí mvo dhi. Ngbà 'í ámì Atá adrélépi tà adrélé 'ole lùzu ró dhi kì ni dhi ni niá nì. Dì ámì Atá adrélépi tà lùzu ró nda kì no nda ni làgí mûrúngú fe mí dré. »

Ngá làgí` be kàdrì` dhi kì lokoma bhù na dhi

(À kònò kpà Lükà 12:33-34)

¹⁹«Lè mì kònà ngá làgí be kàdrì dhi i lokólé àmì dré kònwa bvò dri ko. Tàko ko, bvò kònìdhi àrà óró dré adrészó ngá si, kìndrì dré adrészó ngá mbe, ìndì kùgú i dré adrészó file ngá kugù dhi 'i.

²⁰Dì, mì kàdré àmikya ngá làgí be kàdrì dhi kì nda lokólé àmì dré bhù na. Kònàle dhi, óró sì ngá ko na, kìndrì mbe ngá ko na, kùgú i fì kpà ngá kugù ko na.

²¹Tàko ko, àrà ángùdhi àmì kì ngá làgí be kàdrì dhi i dré adrészó lána dhi na dhi, àmì kì togó ni adré kókpà kònàle. »

Dhyá kì mì tálà rúbhá àdhya 'i

(À kònò kpà Lükà 11:34-36)

²²«Dhyá kì mì tálà adrélépi ngádra fe rúbhá dré dhi 'i. Ámì mì kàdré dóro dhi, ámì rúbhá wäyi dhi ni adré ngádra 'á.

²³Dì, ámì mì kàdré drà ro dhi, ámì rúbhá wäyi dhi ni ína adré tímivá na. Dì ngádra adrélépi mí léna dhi kàdré ína tímivá ro dhi, tímivá nda ni adré kàdrì lavulé! »

Gìká yà, kó ngalè làfa yà dhi

(À kònò kpà Lükà 16:13)

²⁴«Dhyá àlo kitswá mírì rì dhi kì tà 'o lókyá àlo sè bwà ko. Tàko ko, kàdré 'òá kònìni dhi, a ni àlo ni ni ga, adrészó àzya ni ni le. Kó ngalè, a ni tro àlo ni rú, adrészó àzya ni ni ayízè. Dì mì kitswá adrélé Gìká ni tà 'o, adrészó kpà làfa ni tà 'o àyi kì màrabà tini lókyá àlo sè bwà ko. »

Dhyá kì togó bhàma lanzile ko dhi

(À kònò kpà Lükà 12:22-31)

²⁵«Dì ásà dhi, má adré tàá ámì dré dhi: Mì kòbhà àmì kì togó adrélé lanzile àmì kì lídrì ni tà sè ko, ngalè mì ni dra àdho ngá nya ya, kó ngalè mì ni dra àdho ngá mvu ya dhi. Mì kòbhà kpà àmì kì togó adrélé lanzile àmì kì rúbhá ni tà sè ko, ngalè mì ni dra àdho asó àmì rú ya dhi. Àmì kì lídrì lavú tsì mánàyàngá ko? Àmì kì rúbhá lavú tsì kítá ko? »

²⁶Mì nò rè àrì i ká. Ì kidhí ngá ko na, ì akónà ngá ko na, ì lokó kpà ngá kòbhó na ko na. Dì, àmì kì Atá bhù na dhi adré ína ngá fe àyì dré tèle. Dì àmì kì tà lavú tsì àrì kya ko?

²⁷Àmì kòfalé dhi, àdhi nì kitswá áyì lídrì nì lókyá nì drì timbà tsà, dré adrélé áyì togó bha lanzile dhi sè bwà dhi nì?

²⁸Mì adré kpà àmì kì togó bha lanzile kítá nì tà sè àdho tà sè? Mì nò rè ngalè pfò mbì na dhi ì adré topfòle ngíni ya dhi ká. Ì 'o àzí ko na. Ì ledé kpà kítá ko na.

²⁹Dì, má adré mána tàá àmì dré dhi: Ndìndì ópí Sòlòmónò rúku nì íbe tití dhi asó tá kítá aveave pfò nda kì àlo àdhya tíni dhi ko.

³⁰Giká kàdré kó mbì adrélépi ándrò kònwa gò kìdrú dra bhèzoá àtsí na dhi kì tosó kònini be dhi, a nì dì vélé àmì kì tosó dóro àyì kì lavú ngíni? Àmì àmíkya móndí tà ka'ika'i íbe tsà dhi 'i!

³¹Mì kòbhà dì àmì kì togó adrélé lanzile, adrészó tàá dhi «Mà nì dra àdho ngá nya? › ya, «Mà nì dra àdho ngá mvu? › ya, kó ngalè «Mà nì dra àdho asó? › ya dhi ko.

³²Tàko ko, pagánò ì adré àyíkya ngá tití nda kì nda kòdhya landè àko ró. Àmì kì Atá bhù na dhi nì kpà tâle dhi, àmì lovó íbe ngá nda kì kisúzó dhi be.

³³Dì mì kàdré rè zyà Giká nì Òpì nda akódhi nì tà gyägya íbe 'íká, gò akódhi kòtimbáró kpà ngá nda i tití àmì dré ndò.

³⁴Dì ásà dhi, mì kòbhà àmì kì togó adrélé lanzile tà adrébhá alìle kìdrú dhi kì tà sè dhi ko. Àngyá ko, tà kìdrú àdhya kì kitswá kítú kìdrú nda sè. Kítú àlo àlo tití dhi kì kizà kitswá kítú nda sè. »

Màtayò 7

Móndí' kì tàbvó tâma ko dhi

(À kònò kpà Lükà 6:37-38, 41-42)

¹Yésu gò tàá dhi: «Mì kàdré móndí kì tàbvó ta ko, Giká kòtaró kpà àmì kì tàbvó ko dhi bvó.

²Tàko ko, Giká nì àmì kì tàbvó ta ngóró mì dré adrélé móndí kì tàbvó ta dhi tíni. A nì kpà àmì kì tà tabhì ngóró mì dré adrélé móndí kì tà tabhì dhi tíni.

³Mí adré mína kayísá kórónyá mvá ámì adrúpi mína dhi nì no gò, adrészó fa gú mí mína dhi nì atógyà ko àdho tà sè?

⁴Mí adré ámì 'o ngíni tàá ámì adrúpi dré dhi «Mí 'o má kàpéró kayísá kórónyá mvá mí mìlésè dhi, takò fa gú dré adrérà'a ámì tändí mína dhi 'á dhi?

⁵Mí túrúpfú líyí 'i! Mí kàpè rè zyà fa gú nda mí mìlésè 'íká, gò mí kògòrò ngá no dra kitswázó kayísá kórónyá mvá nda nì apè ámì adrúpi mìlésè ndò. »

Tà lólo fèma móndyá dra tà nda kì gabhá dhi i dré ko dhi

⁶«Mì kòfè tà lolo kòkí i dré ko, i kògòrò àyi kí alá àmí kí titsí ko sè. Mì kòbhe àmí kí màÿkà aveave dhi i tìgá i kandrá ko, i kàtóró àyi pálé ko sè. »

Tà zìma, ngá ndàma i `ndi` dzótì gàma

(À kònò kpà Lúkà 11:9-13)

⁷«Mì kàdré tà zi Gìká tí gò, kò'oró tà nda àmí dré. Mì kàdré ngá nda gò, mì kòkisúró. Mì kàdré dzótì ga gò, à kònziò àmí dré.

⁸Tàko ko, dhya ángùdhi adrélépi tà zi Gìká tí dhi adré kisúá. Dhya adrélépi ngá nda dhi adré kisúá. Dhya adrélépi dzótì ga dhi dré dhi, à adré kpà nzia.

⁹Àmí ànzì kí atá ro ni i, àmí kí mvá kàdré mápà zi àmí tí dhi, mì ni tsì kírà fe drá kòdhya?

¹⁰Àmí kí mvá kàdré kosyá zi àmí tí dhi, mì ni tsì nì fe drá kòdhya?

¹¹Dì àmí móndí kònzi ró ni i, mì kònì adrélé ngá dóro fe àmí kí ànzimvá i dré dhi be dhi, àmí kí Atá bhù na dhi ni ngá dóro fe dhya adrébhá ziá i tí dhi i dré tà tändi ró! »

Tà dóro 'òma móndí i dré dhi

¹²«Dì tà tití i sè dhi, mì kàdré tà 'o móndí i dré ngóró mì dré adrélé lèle i kò'o àmí dré dhi tini. Tàko ko, mì kàdré 'òá kònini dhi, mì adré tà tití Mósè ni tátrítrí kúlì ìndì pròfétà i dré adrélé tale à kò'o dhi kí 'o kòdhya. »

Fì `ma dzótì wàlepi ko dhi 'ásè dhi

(À kònò kpà Lúkà 13:24)

¹³«Mì kòlavú dzótì wàlepi ko dhi 'ásè fíle Gìká ni Òpì na. Tàko ko, dzótì adrézó fíle 'ásà ìndì láti adrézó lavúlé 'ásà lìle dràdrà kisú dhi wawà. Móndí zyandre dhi i adré fíle dzótì wawà nda 'ásè dhi àyi.

¹⁴Dì, dzótì adrézó fíle 'ásà ìndì láti adrézó lavúlé 'ásà lìle lídrì kisú dhi wa ína ko. Ngbà 'í móndí àlo àlo dhi i adré dzótì nda ni kisú àyi. »

Fa i lò'wa ni i be dhi

(À kònò kpà Lúkà 6:43-44)

¹⁵«Mì kàdré àmí kí likí pròfétà kinzò ro dhi kí tà sè. Àngyá ko, àyi nda i adré àyi kí ladzá alìle àmí vélé ngóró kábilígyà i tini. Tákò àyi léna dhi, àyi kàlagí àtrá 'i.

¹⁶Mì ni kítswá àyi kí ni lò'wa i dré adrélé 'ale dhi i sè. À adré tsì vínò lò'wa kí kùtsí sílé 'í? À adré kó fígi lò'wa kí áyìdhá sílé 'í? Tàdzí ko.

¹⁷Fa dóro tití dhi i adré lò'wa dóro 'a kòdhya. Dì, fa kònzi i adré àyikya lò'wa kònzi 'a kòdhya.

¹⁸Fa dóro kítswá lò'wa kònzi 'a bwà ko. Fa kònzi kítswá kpà lò'wa dóro 'a bwà ko.

¹⁹Fa tití adrébhá lò'wa dóro 'a ko dhi i, à adré togá lebhélé àtsí na.

²⁰Dì ngóró mì dré adrélé fa kí ni lò'wa i dré adrélé 'ale dhi i sè dhi tini dhi, mì ni kókpà pròfétà kinzò ro dhi kí ni, tà i dré adrélé 'ole dhi i sè.

Tà tâma i`ndi` tà 'òma
(À kònò kpà Lükà 13:25-27)

²¹Móndyá tití adrébhá áma zi «Míri, Míri!» dhi ì kitswá file Òpì bhù àdhya na ko. Ngbà í àyi adrébhá tà áma Atá bhù na dhi dré adrélé lèle à kò'o dhi ki 'o dhi ki fi lána àyi.

²²Kítú tâbvó tazo dhi tú dhi, móndí bî dhi ki tâa má dré dhi: «Míri, Míri, mà longó tâ tsì ámi kúlí pròfétà kya tíni ámi rú sè ko? Mà dro tâ tsì tirí kònzi i ámi rú sè ko? Mà 'o tâ tsì tâ líndrígá ró bî dhi i ámi rú sè ko?»

²³Dî, má nî go tâa àyi dré dhi: «Má nî àmi tâdzí ko! Àmi tà kònzi 'obhá nî i, mì nga má mîlésè! »»

Dzó sìma ki`rà dri dhi
(À kònò kpà Lükà 6:47-49)

²⁴«Dî dhya ángùdhi adrélépi áma kúlí kòdhî ki yi gò adrészó ka'íá 'ole dhi, sù ngóró agó tògya ró áyi dzó silepi kírà dri dhi tíni.

²⁵Kozya dré dhîzo, yî dré tîzo gò, lyă dré dzó nda nî vîzo dhi, dzó nda dré arízó ko, pá nî nî bhâle kírà dri dhi sè.

²⁶Dî, dhya ángùdhi adrélépi áma kúlí kòdhî ki yi gò adrészó ka'íá 'ole ko dhi, sù ngóró agó azaaza áyi dzó silepi sînyí dri dhi tíni.

²⁷Dî kozya dré dhîzo, yî dré tîzo gò, lyă dré dzó nda nî vîzo dhi, dzó nda dré arízó akîlé nyînyî. »

²⁸Yésu kòtâ tâ nda i akîlé dre dhi, móndyá zyandre ì dré adrészó vélé sîbhálé be ngbo tâ dré tadhálé nda ki tâ sè.

²⁹Tako ko, akôdhî ni kúlí i tá lanzilanzì ro. Adré tâ ína àyi ki tadhá ngóró àyi ki tâtrítrí kúlí tadhâbhá kya tíni ko.

Màtâyò 8

Yésu tidri` agó àlo kàri` dré rûle dhi
(À kònò kpà Márokò 1:40-45; Lükà 5:12-16)

¹Yésu kàsí kòngó nda drîlésè dre dhi, móndí zyandre lavûlé dhi ì dré ngàzo adrélé akôdhî ni lebè.

²Dî agó àlo kàri dré rûle dhi dré alîzo adhélé áyi kórókó titi Yésu kandrâ, tazoá drá dhi: «Míri, mí rînyí îbe kitswázó áma temvé tidrlé, mí kòlè dhi. »

³Dî Yésu dré áyi drîgá kidzîzo akôdhî ni tabè gò, tazoá drá dhi: «Má lè 'í. Mí kàdré kemve kpírikpíri wà! » Gbă kòdhwa, agó nda dré adrízó kàri drà nda lésè.

⁴Gò Yésu dré tazoá drá dhi: «Mí kònò dóro, mí kòlongóró tâ kòdhî dhya àlo dré ko. Be ró dhi, mí lì mína ámi tadhá kòwánà dré nôle, ìndî mí fè ngá Gîká dré ngóró Mósè ni tâtrítrí kúlí dré adrélé tâle dhi tíni, tadházóá móndí i dré dhi, mí adrí dre káyà dhi. »

Sòdá kí kàdrì` àlo dhi ka'ì Yésu báti
 (À kònò kpà Lúkà 7:1-10; Yòwáni` 4:43-54)

⁵Yésu kògò tsàle Kàpàrànwumà na dre dhi, Rómà kí sòdá kí kàdrì àlo dhi dré áyi kisizó ànyi akódhi làga, akódhi ni ti lizí

⁶tàzoá dhi: «Míri, áma mèrabbà adré ayilé drà be bhà na. Akódhi ni pá àbvo ro, ìndì rúbhá ni adré aswálé tò. »

⁷Yésu tà drá dhi: «Má ni li akódhi ni ti drí. »

⁸Di, sòdá kí kàdrì nda logó drá dhi: «Míri, má kítswá mána ámi lindrì sè ko. Má kítswá ndìndì mí dré fízo áma dzó na dhi ko. Di, mí kòtà ndíri kúlì àlo gò, áma mèrabbà nda kàdríró.

⁹Tako ko, áma tändì, ma áma kàdrì kí rinyí zàle. Ma kpà sòdá íbe má zàle. Má kàdré tákà àyi kí àlo dré dhi <Mí li!> dhi, adré lìle. Má kàdré tákà àzya ni dré dhi <Mí alà!> dhi, adré alìle. Má kàdré kó tákà áma mèrabbà dré dhi <Mí 'o tà kòdhì!> dhi, adré 'òá. »

¹⁰Di Yésu kòyi tà nda dre dhi, akódhi ni lindrí dré gàzo. Dré áyi alázó táká móndyá adrébhá áyi lebè dhi i dré dhi: «Má adré tà báti ta àmì dré: Má kisú rè dhya àlo adrélépi tà ka'ika'i íbe kònini dhi ìsérélè ànzì i kòfalé ko.

¹¹Má adré tákà àmì dré dhi: Móndí zyandre dhi kí angá kítú dré apfòrà lésè ìndì kítú dré ndírà lésè, lirilé mísa làgásè túmání Àbàramà íbe, ìsákà be, ìndì Yàkóbhò be Òpì bhù àdhyà na.

¹²Di, kàdré móndyá kítswábhá tá fíle Òpì nda na dhi kí tà sè dhi, à ni àyi kí bhe kívì na, àrà tímímvá ro dhi na. Kònàle dhi, à ni adré tongolé, adrészó kpà sítálándrá tsi. »

¹³Gò Yésu dré tàzoá sòdá kí kàdrì nda dré dhi: «Mí nzì mí bhàna. Táká kò'o ru mí dré ngóró mí dré adrélé ka'ile dhi tñi! » Di akódhi ni mèrabbà nda dré adrízó gbà lókyá nda sè.

Yésu ti drí` dràbhá bi` dhi i
 (À kònò kpà Márökò 1:29-34; Lúkà 4:38-41)

¹⁴Àmvolásà dhi, Yésu dré lìzo Pétéró ni dzó na gò, akódhi ni àdrá ni kisú lángá na, rúbhá ni dré tákà adrélé àtsi ró dhi sè.

¹⁵Di Yésu dré tòkó nda ni drígá tabèzo gò, rúbhá àtsi nda dré pfòzo rúásà. Gò tòkó nda dré ngàzo kidhólé ngá fe Yésu dré nyàle.

¹⁶Ìndró kàndri dre dhi, à dré móndí bí tirí kònzi íbe àyi léna dhi kí adzízó Yésu vélé. Di akódhi dré tirí kònzi nda kí dròzo topfòle àyi lésè kúlì sè. Dré kpà móndí drà íbe dhi kí ti drízó tití.

¹⁷Di tà longolé pròfétà Èsáyà tí dhi dré ru 'òzo kònini. Longó táká dhi: «Akódhi ni tändì do àma kí tà yàyà dhi i,

àma kí drà kí dòzo kpà í rú. »

Móndyá adrébhá Yésu ni le lebèle dhi i

(À kònò kpà Lúkà 9:57-62)

¹⁸Yésu kònò móndí zyandre ru kimóbhá i làgásè kúrú dhi i dre dhi, dré tázoo áyi lebèbhá i dré dhi, i kòzya tápáríandre ni ta'á na.

¹⁹Gò tátrítrí kúlí tadhábhá ki àlo dré áyi kisizó ànyi akódhi làga, tàá drá dhi: «Tadhálépi, má ni ámi lebè àrà tití ángùdhi mí dré adrészó lile dhi i 'ásè. »

²⁰Yésu logó drá dhi: «Kìlìwá i àyi ki bhú íbe. Àrí i kpà àyi ki bhà íbe. Di, Móndí ni Mvá ína àrà i dré kítswázó áyi drì la lovózó dhi àko. »

²¹Go Yésu ni lebèlepi àzya dhi dré tázoo drá dhi: «Míri, mí kòtayí rè zyà ma lile áma atá ni si 'iká. »

²²Di, Yésu logó drá dhi: «Mí lebè ma! Mí tayí móndí dràbhá dre dhi i àyi ki àbvò ki si. »

Yésu kiki' kàgùmá

(À kònò kpà Márökò 4:35-41; Lúkà 8:22-25)

²³Yésu i dré tombàzo bwátù na lebèbhá ni íbe gò, i dré kídhózó adrélé zyàle tápáríandre ni ta'á na.

²⁴Gbă kòdhwa, kàgùmá dré ngàzo adrélé vile tápáríandre nda mi gò, yí adrélépi longálé dhi dré adrészó lodàle bwátù na. Di, Yésu adré tá ína ayí ko.

²⁵Gò akódhi ni lebèbhá i dré àyi ki kisizó ànyi làgá, akódhi ni toró tázoo dhi: «Míri, mí tídrí àma wà! Mà adré dràle! »

²⁶Yésu logó àyi dré dhi: «Àmi tà ka'ika'i íbe tsà ni i, mì adré ngá ro àdho tà sè? » Di dré ngàzo liglé lyàandre nda i dri tápáríandre nda be gò, ngá dré gòzo bhùle ndiii.

²⁷Di àyi ki líndri dré gàzo bhwàbhwa gò, i dré adrészó lizíá àyi kòfalésè dhi: «Dhya kòndí tá ína móndí kárá be ngíni dhi 'i, ndíndì lyàandre i tápáríandre be dhi i dré adrészó akódhi ni kúlí ka'i 'ole ni? »

Yésu tidri' àgo rì tiri' kònzi i' be àyi léna dhi i

(À kònò kpà Márökò 5:1-20; Lúkà 8:26-39)

²⁸Yésu kòzya tápáríandre ni ta'á na tsàle bvò Gàdárà kya na dre dhi, àgo rì tiri' kònzi íbe àyi léna dhi i dré apfòzo mógo lésè alile ru kisú akódhi be. Àyi nda i dré tá adrélé móndí tòmbátòmba i ró tò dhi sè dhi, dhya àlo kitswá tá lavúlé àrà nda 'ásè bwà ko.

²⁹Gò i dré ngàzo loyóá kúlí 'u'ù sè dhi: «Gíká ni Mváagó, àma kòfalésè mí be dhi, àdho tà 'i? Mí alà tsì kònwa àma ki 'o kònzi lókyá bhàle dhi kandrá? »

³⁰Àyi làgana vwàvwà ro tsà dhi, tìgá ki pàrí andre adré tá ngá nya.

³¹Di tiri' kònzi nda i dré Yésu ni ti lizízó tázoo dhi: «Mí kàdré 'ole àma ki dro dhi, mí kòmù àma lile tifilé tìgá kòna i léna. »

³²Yésu tà àyi dré dhi: «Mì lì! » Dì ì dré topfòzo àgo rì nda i lésè, lìle tifflé tìgá nda i léna. Gbă kòdhwa, tìgá nda i dré ndìzo tití kòngó nda ni gòlòko 'ásè, ledhélé tâpâriandre na todràle.

³³Gò tìgá nda kí likibhá i dré ngàzo ràle tà tití lavúbhá nda kí rúbí longó bhàandre na. Ì longó tá kpà tà atsálépi àgo rì tá tirí kònzi íbe àyi léna nda i rú dhi.

³⁴Gò móndyá tití dhi i dré apfòzo bhàandre nda lésè alìle ru kisú Yésu be. Dì, i kònò akódhi dre dhi, i dré akódhi ni ti lizizó, kòngaró àyi kí bvò 'ásè be dhi bvó.

Màtayò 9

Yésu tiidrí agó àlo pá be àbvò ro dhi

(À kònò kpà Márökò 2:1-12; Lükà 5:17-26)

¹Àmvolásà dhi, Yésu dré mbàzo bwátù na góle zyàle tâpâriandre ni ta'á na, tsàle áyi tändi ni bhàandre na. ²Kònàle dhi, móndí àruka i dré agó àlo pá be àbvò ro dhi ni adózó kíndri dri alìzo ába akódhi vélé. Yésu kònò àyi kí tà ka'ika'i dre dhi, dré tâzoá agó pá be àbvò ro nda dré dhi: «Áma mvá, mí tsì togó! À trì ámi tâkonzì i dre! »

³Dì, tátrítrí kúlí tadhábhá àruka i dré dhèzo adrélé kisùá àyi léna dhi: «Dhya kònò adré ína Gíká ni dha kúlí kòdhì sè! »

⁴Yésu dré tà i dré tá adrélé kisùle nda ni nìzo kyá gò, tâzoá dhi: «Mì adré àmikya tà kònzi kisù àmi léna àdho tà sè? »

⁵Tà kitswálé tâle mbèlè agó pá be àbvò ro kònìdhi dré dhi, ángùdhi 'i: «À trì ámi tâkonzì i dre» dhi, kó ngalè, «Mí nga, mí kidhó atsí to» dhi?

⁶Má adré lèá mí kònì dhi, Móndí ni Mvá rìnyí íbe adrészó tâkonzì tri bvò dri. » Dì dré tâzoá agó pá be àbvò ro nda dré dhi: «Mí nga, mí do ámi kíndri, ìndì mí nzì mí bhàna! »

⁷Dì agó nda dré ngàzo nzìle i bhàna.

⁸Móndyá zyandre i kònò tà nda dre dhi, àyi kí togó dré gàzo tirì dré. Gò i dré ngàzo adrélé Gíká ni rú bha kùle, dré rìnyí mûrúngú afèle móndí i dré kònìnì dhi sè.

Yésu azí Mâtayò

(À kònò kpà Márökò 2:13-17; Lükà 5:27-32)

⁹Yésu kàpfò kònalsè gò adrélé lìle dre dhi, dré agó àlo rú be Mâtayò dhi ni no adrérà'a lirilé mèdáyì lagírà na. Dré tâzoá drá dhi: «Mí lebè ma! » Dì Mâtayò nda dré ngàzo adrélé Yésu ni lebè.

¹⁰Bvóá dhi, Yésu i dré lìzo lebèbhá ni íbe Mâtayò ni dzó na gò, i dré lirizó mísá làgásè adrélé ngá nya. Dì mèdáyì lagíbhá bì dhi i, ìndì móndí bì adrélé nòle tâkonzìbhá ro dhi íbe dhi i alì tá kpà lirilé mísá làgásè túmâni àyi íbe.

¹¹Dì Fàrisayò i kònò tà nda dre dhi, i dré ngàzo lizíá Yésu ni lebèbhá i tí dhi: «Àmi kí tadhálépi adré ngá nya túmâni mèdáyì lagíbhá íbe ìndì tâkonzìbhá íbe àdho tà sè? »

¹²Yésu kòyi tà lizilé nda dre dhi, dré tàzoá dhi: «Mónyá rúbhá be dóro dhi ì ndà gá kódzó ko na. Be ró dhi, móndyá drà ro dhi ì adré àyikya ndàá àyi.

¹³Dì, mì kòlì àmikya tà tisile Gíká ni Kúlí na kònìdhi ni àndu nda nile: «Má adré móndyá adrébhá àyi kí àzya kí kizà bha dhi kí nda kòdhya. Má adré mána mòbòmà adrélé fèle má dré dhi kí nda kòdhya ko. » Tako ko, má alì móndyá adrébhá àyi kí no gyägya dhi kí azí kòdhya ko. Be ró dhi, má alì mána tàkonzibhá kí azí kòdhya. »

À lizí Yésu tàbirí mvòma ni tà dri
(À kònò kpà Márökò 2:18-22; Lükà 5:33-39)

¹⁴Àmvolásà dhi, Yòwánì Bâtísimò fèlepi ni lebèbhá ì dré alìzo Yésu vélé lizia tíá dhi: «Àma Fàrisayò íbe dhi i, mà adré kó tàbirí mvo rä, adrézó tà zi Gíká tí dhi, ámi lebèbhá ì adré dí àyikya tàbirí mvo ko àdho tà sè? »

¹⁵Yésu logó àyi dré dhi: «Mónyá azilé gwányá làmó àdhya lé dhi kí kítswá tsì adrélé kizà ro, ì dré adrérà'a túmání tòkó líyí be dhi 'á? Tàdzí ko! Dì, lókyá adrélipi alìle dhi sè dhi, à ni tòkó líyí nda ni tingá àyi kòfalésè gò, ì dré kídhózó adrélé tàbirí mvo lókyá nda sè.

¹⁶Dhya àlo kàdré kítá àku ró lasilépi dhi íbe dhi, dhi kítá tídhi ro dhi kítá àku nda dri ko na. Tako ko, kò'o kònìnì dhi, kítá tídhi nda ni kítá àku nda ni asé gò, kítá àku nda dré gózo vélé lasilé lile drìdrì.

¹⁷Kòdhí íbe dhi, dhya àlo dà vínò tídhi ro dhi kíní dhile adrézó vínò likí, akùbhá dre dhi ì léna ko na. Tako ko, kò'o kònìnì dhi, vínò tídhi nda ni abhò kíní àku nda kí lasí gò, vínò dré kutúzó gò, kíní nda ì dré abízó tití. Ásà dhi, à adré vínò tídhi ro dhi ni da kíní tídhi ro dhi ì léna, adrézó ngá rì nda kí likí dóro. »

Yésu tiidri' tòkó àlo dhi, i`ndi` tingá mvátòkó àlo dhi dràdrà lésè
(À kònò kpà Márökò 5:21-43; Lükà 8:40-56)

¹⁸Yésu dré tá adrérà'a tà nda kí ta dhi 'á dhi, Yúdà ànzì kí kàdrì kí àlo dré alìzo adhélé àyi kórókó titì akódhí kandrá, tàzoá drá dhi: «Àma zapi drà nyànomvá kòndì. Dì, mí alì ámi drígá bha akódhí dri wà, kàdríró be dhi bvó! »

¹⁹Dì Yésu ì dré ngàzo lebèbhá ni íbe adrélé lile agó nda vésè.

²⁰Gbă lókyá nda sè dhi, tòkó àlo kàrì dré adrézó ràle rúásà kóná be mudrí-drì-rì dhi dré àyi kisizó ànyi Yésu àmvolésè gò, akódhí ni kítá ti tabè.

²¹Àngyá ko, adré tá ína kisùá dhi: «Má kòtabè ngbà 'í akódhí ni kítá ti kòdhya dhi, má ni adrí. »

²²Dì Yésu dré àyi alázó tòkó nda ni no gò, tàzoá dhi: «Àma zapi, mí tsì togó! Ámi tà ka'ka'i tiidri' mí dre. » Dì akódhí nda dré adrízó gbă lókyá nda sè.

²³Dì Yésu kòlì tsàle Yúdà ànzì kí kàdrì nda bhàna dre dhi, dré lärí tswabhá kí nòzo túmání móndí zyandre adrébhá tongolé dhi íbe.

²⁴Dré tàzoá àyi dré dhi: «Mì nga kònwasè. Tako ko, mvátòkó kòdhí drà ko. Adré ína ayí ko. » Gò ì dré dhèzo adrélé akódhí ni gu.

²⁵À kòdro móndyá zyandre nda i topfole kivì na dre dhi, Yésu dré fizo dzó nda na, mvátòkó nda ni drígá ru gò, akódhi dré ngàzo kuru.

²⁶Gò tà nda ni rúbí dré la'úzó bvò nda 'ásè tití.

Yésu tìdrì́ àgo rì mì kùdúkùdu ró dhi i

²⁷Yésu kàpfò dzó nda lésè adrélé lile dre dhi, àgo rì mì kùdúkùdu ró dhi i dré ngàzo adrélé akódhi ni lebè loyóába dhi: «Dàwídì ni Mvá, mí bhà àma kí kizà wà! »

²⁸Yésu kòtsa bhàna file dzó na dre dhi, àyi nda i dré àyi kí kisizó ànyi akódhi làga. Dì akódhi dré àyi kí lizizó tazoá dhi: «Mì adré ka'iá dhi, má ni kitswá àmi kí tìdrí bwà? » i logó drá dhi: «Àyíya, Míri. »

²⁹Gò Yésu dré àyi kí mì tabèzo, tazoá dhi: «Tà nda kò'o ru àmi dré ngóró mì dré adrélé ka'ile dhi tíni! »

³⁰Dì àyi kí mì dré ru nzizo adrélé ngá no. Gò Yésu dré àyi kí bí sèzo tazoá dhi: «Mì kònò dôro, mì kòlongóró tà kòdhì dhya àlo dré ko. »

³¹Dì, i kòpfò dzó nda 'ásè dre dhi, i dré àyikya lizo Yésu ni rúbí longóbe la'ulé bvò nda 'ásè tití.

Yésu tìdrì́ ábhä́ bhä́ àlo tirí kònzi í be dhi

³²I dré tá adrérà'a apfole dzó nda lésè dhi 'á dhi, à dré agó àlo tiri kònzi ibe i léna, adrélépi kpà ábhähä ro dhi ni adzizó Yésu vélé.

³³Dì Yésu dré tiri kònzi nda ni dròzo pfole ábhähä nda lésè dhi, dré kidhözó adrélé kúli ta. Móndyá zyandre kònàle dhi kí líndri dré gazzo bhwähwa gò, i dré adrészó tâa dhi: «À nò rè tâdzí tà 'ole lású be kònini dhi Isérélè 'a ko! »

³⁴Dì, Fàrisayò i adré tá àyikya tâa dhi: «Dhya kòdhì adré tiri kònzi kí dro topfole móndi i lésè, tiri kònzi kí kàdrì ni rinyí sè. »

Lanyá líyí ni ti lizima, kòmùró àzibhá i li` le áyi lanyá lokó dhi

³⁵Gò Yésu dré ngàzo adrélé tatsilé bhàandre tití i 'ásè iñdì bhà tití i 'ásè, tà tadhábe Yúdà ànzì kí lísámbò dzó i 'ásè, Rúbí Taní Giká ni Òpì àdhya ni longóbe, iñdì móndi kí tìdríbe àyi kí drà tití i lésè.

³⁶Dì dré tá adrérà'a móndi zyandre dhi kí no dhi 'á dhi, adré tá kizà do áyi togó na àyi kí tà sè. Tako ko, i adré tá landèle tò, iñdì tà adré tá àyi kí lavú. Àyi tá ngóró kabiligà adrébhá àyi kí liklépi àko dhi i tíni.

³⁷Dì dré tazoá áyi lebèbhá i dré dhi: «Lanyá ka amvú na lavulé dre. Dì, àzibhá adrébhá lanyá nda ni lokó dhi kí àbvò yókodhó.

³⁸Mì kàdré dì lanyá nda ni líyí ni ti lizí, kòmùró àzibhá i lile áyi lanyá lokó be dhi bvó. »

Màtayò 10

Yésu tibhù àpóstolò mudrí-drà-rì dhi i li` le àzí na

(À kònò kpà Márokò 3:13-19; 6:7-13; Lükà 6:12-16; 9:1-6)

¹Àmvolásà dhi, Yésu dré áyi lebèbhá mudrí-drì-rì dhi kí azízó gò, rinyí fèzo àyi dré kitswázó tirí kònzi kí dro móndí i lésè, ìndì kitswázó móndí kí tidrí àyi kí drà tití i lésè.

²Àpóstolò mudrí-drì-rì nda kí rú i tá: Sìmónà (adrélé kpà rú zile Péteró dhi), adrúpi ni Àndréyà, Yàkóbhò Zèbèdáyò ni mvá, adrúpi ni Yòwánì,

³Filípò, Bàràtòlòmáyò, Tòmá, Mátayò (mèdáyì lagílépi dhi), Yàkóbhò Àlafáyò ni mvá, Tàdáyò,

⁴Sìmónà (adrélápi àtsi ró áyi súrú ni tà sè dhi), ìndì Yùdásì Ìsikàriyótà (dra Yésu ni lefèlepi kàribhá i drígá dhi).

⁵Dì Yésu dré dhya mudrí-drì-rì nda kí tibhùzo, tà lazízó àyi dri kònìnì: «Mì lì móndyá súrú twá ro dhi i véna ko. Mì fí kpà bhàandre àlo Sàmàriyà kya na ko.

⁶Be ró dhi, mì lì àmikya Ìsérélè ànzì avìbhá kábilígyà i tíni dhi i véna.

⁷Mì dré adrérà'a lìle dhi 'á dhi, mì kàdré longóá móndí i dré dhi: «Òpì bhù àdhya atsá ànyì dre! »

⁸Mì kàdré dràbhá kí tidrí, adrészó móndí dràbhá dre dhi kí tingá dràdrà lésè, adrészó móndí kàrì dré rùle dhi kí tidrí, adrészó tirí kònzi kí dro topfòle móndí i lésè. Mì kàdré tà 'o móndí i dré àngyá, ngóró mì dré kisulé àngyá dhi tíni.

⁹Mì do óró 'í yà, àrezá 'í yà, kó ngalè làfa lò'wa mvá 'í yà dhi àmì rú ko.

¹⁰Mì kòdo kòmvò atsí sè dhi 'í yà, kítá agá lésè dhi ni àzya 'í yà, kámokà àzya 'í yà, kó ngalè kùtù fa 'í yà dhi ko. Tàko ko, adré lèá dhi, dhya àzí 'olepi dhi kònnya áyi landè.

¹¹Bhàandre ángùdhi yà, ngalè bhà tsà ángùdhi yà mì dré dra fízo lána dhi na dhi, mì kòndà rè zyà móndí kitswálépi àmì kí ka'i dòle dóro dhi 'íká gò, mì kàdréró ayílé akódhi nda bhàna tsàle kítú mì dré dra ngàzo àrà nda 'ásè dhi tú.

¹²Mì kàdré file dzó àlo dhi na dhi, mì kòtà dhi: «Tà kìdríkìdrí kàdré dzó kònìdhi 'á. »

¹³Móndyá dzó nda lé dhi i kàdré àmì kí ka'i dòle dóro dhi, tà kìdríkìdrí àmikya nda kàdré àyi dri. Dì, i kàdré àmì kí ka'i dòle dóro ko dhi, mì kò'o tà kìdríkìdrí àmikya nda agòle àmì vélé.

¹⁴Dzó ángùdhi yà, ngalè bhàandre ángùdhi yà dra àmì kí ka'ízo dòle lána dóro ko yà, kó ngalè àmì kí kúlì yízo ko yà dhi na dhi, mì kòpfò 'ásà, ìndì mì kòtowá tòpfulíndrì àmì pásè tadházóá dhi, mì tayí àyi kí tà tití dre.

¹⁵Má adré tà báti ta àmì dré: Kitú Gíká dré dra tòbvó tào dhi tú dhi, a ni tà ño móndyá bhàandre nda lésè dhi i dri, móndyá Sòdómà i lésè Gòmórà be dhi kya kí lavú. »

Kizà adrébhá ali `le dhi i

(À kònò kpà Márokò 13:9-13; Lükà 21:12-17)

¹⁶«Mì yi rè ká! Má adré àmì kí mu ngóró kábilígyà i tñi trú kàlagí i kòfalé. Ásà dhi, lè mì kàdré tògya ró ngóró nì i tñi, adrélé kpà tà àko àmì rú ngóró kòbhòlà i tñi.

¹⁷Mì kàdré àmì kí likí móndí kí tà sè. Tako ko, i ni àmì kí 'o topfole tàbvó tärà i 'ásè, adrészó àmì kí bhwa àyi kí lísámbò dzó i 'ásè.

¹⁸Áma tà sè dhi, à ni àmì kí tidrì topfözo àmì íbe gùvèrènérè i kandrásè ìndì ópí kàdrì i kandrásè, mì kòkítswáró áma tà mì dré nòle ìndì mì dré yile dhi kí longó àyi dré, ìndì móndyá súrú twá ro dhi i dré.

¹⁹Dì, à kàdré àmì kí dri tàbvó tåle dhi, mì kòbhà àmì kí togó adrélé lanzile tà mì dré dra tåle àmì rúsè yà, kó ngalè mì ni tà nda ni ta ngíni ya dhi dri dhi ko. Gíká ni tà mì dré kitswálé tåle dhi ni fe àmì dré gbă lókyá nda sè.

²⁰Àngyá ko, mì ni adré tà nda ni ta àmì ko. Be ró dhi, àmì kí Atá ni Tirí ni adré tåá àmì tí dhi ni.

²¹Móndí kí àyi kí adrúpi kí lefè todràle kàribhá i drígá. Ànzi kí atá kí kpà àyi kí ànzi kí lefè todràle. Ànzimvá kí ligí àyi kí tibhá i rú, adrészó àyi kí 'o todràle.

²²Móndyá tití dhi kí togó kònzi bha àmì rú áma tà sè. Dì, dhya adrélépi ína togó tsí, adrészó áyi totó tätä tsàle kùdù na dhi ni adrí.

²³À kàdré àmì kí mì pfo bhàandre àlo dhi na dhi, mì kòlapá lile àzya ni léna. Má adré tà báti ta àmì dré: Mì kitswá tädzí tatsílé bhàandre tití Isérélè ànzi kya i 'ásè drídri Móndí ni Mvá dré dra agòzo dhi kandrá ko.

²⁴Dhya adrélé tadhálé dhi lavú ína dhya adrélépi áyi tadhá dhi ko. Dhya adrélépi màrabà ro dhi lavú kpà áyi míri ko.

²⁵Adré lèá dhi, dhya adrélé tadhálé dhi kàtsá dhya adrélépi áyi tadhá dhi tñi. Adré kpà lèá dhi, màrabà kàtsá áyi míri tñi. À kàdré dzó líví zi Bèlèzèbùlè ro be dhi, à ni dí vélé móndyá akódhi ni dzó lé dhi kí lodhá ngíni? »

Dhya kitswálépi mi` dré rôle dhi (À kònò kpà Lükà 12:2-9)

²⁶«Dì mì kòro móndí àlomvá ko. Tako ko, à ni tà tití lùzu ró dhi kí tadhá ngádra 'á. À ni kpà tà tití zùle zùzù dhi kí 'o apfole móndí i dré nile dóro.

²⁷Dì tà má dré adrélé tåle àmì dré tñimvá na dhi i, mì kàdré tåá ngádra 'á. Tà adrélé tåle àmì bina kòyàyà sè dhi, mì kàdré longóá dzódrì i lésè.

²⁸Mì kòro dhya adrébhá móndí kí rúbhá kí tupfú todràle gò, i dré kítswázó àyi kí lídrì pfu bwà ko dhi i ko. Be ró dhi, mì kàdré àmikya Gíká kitswálépi móndí kí lídrì kí tupfú todràle àyi kí rúbhá íbe líferò na dhi ni ro kòdhya.

²⁹À adré zakó tsí kítsíkírnyà rì dhi kí lagí làfa lò'wa mvá àlo dhi sè? Dì tágba dré adrészó kònìnì dhi, àyi nda kí àlo kitswá dhèle kìní mi, Gíká àmì kí Atá dré tà nda ni àko ró ko.

³⁰Kàdré dì àmì kí tà sè dhi, akódhi nà ndìndì àmì kí dríbhí i tití nànà.

³¹Mì kàdré dì ngá ro ko. Àmì kì tà lavú kìtsìkírinyà zyandre dhi kya byá!

³²Dhya ángùdhi adrélépi tàá móndí i kandrá dhi i ka'i ma dre dhi, má ni kókpà tâá áma Atá bhù na dhi kandrá dhi, má ka'i akódhi nda dre.

³³Dì, dhya ángùdhi adrélépi ína áma ga móndí i kandrá dhi, má ni kókpà akódhi nda ni ga áma Atá bhù na dhi kandrá. »

Yésu ali` tà ru lanzi` zó dhi ni bha móndí` i kòfalé

(À kònò kpà Lükà 12:51-53; 14:26-27)

³⁴«Lè mì kòkisù ko tâle dhi, má alì kitswálé tà kìdríkìdri fe bvò dri dhi. Má alì kitswálé tà kìdríkìdri fe ko. Be ró dhi, má alì mána kitswálé àdzú so móndí i kòfalé.

³⁵Tàko ko, má alì mváagó kì kòfalé lanzí atá ni be. Má alì mvátòkó kì kòfalé lanzí andre ni be, adrészó kpà àdramvá kì kòfalé lanzí àdrá ni be.

³⁶Dhyá kì kàribhá kì adré móndí dhyá kì tândi ni dzó na dhi 'i.

³⁷Dhya ángùdhi adrélépi áyi atá 'i yà, kó ngalè áyi andre 'i yà dhi ni le áma lavú dhi, kitswá má sè ko. Dhya adrélépi áyi mváagó 'i yà, kó ngalè áyi mvátòkó 'i yà dhi ni le áma lavú dhi, kitswá má sè ko.

³⁸Dhya ángùdhi adrélépi áyi fa kípakipa do, adrészó áma lebè dhi ko dhi, kitswá kpà má sè ko.

³⁹Dhya ángùdhi adrélépi áyi lídrì likí áyi tândi dré dhi, ni áyi lídrì nda ni 'o avile. Dì, dhya adrélépi áyi lídrì fe áma tà sè dhi ni áyi lídrì nda ni kisú. »

Làgi` à dré dra kisúlé dhi

(À kònò kpà Márökò 9:41)

⁴⁰«Dhya ángùdhi adrélépi àmì kì ka'i dôle dóro dhi, adré áma tândi ni ka'i kòdhya. Dhya adrélépi áma ka'i dôle dóro dhi, adré dhya áma amùlepi dhi ni ka'i kòdhya.

⁴¹Dhya ángùdhi adrélépi pròfétà àlo dhi ni ka'i dôle dóro, dré adrélé pròfétà 'i dhi sè dhi, akódhi nda ni làgí adrélé fèle pròfétà i dré dhi ni kisú. Dhya adrélépi móndí àlo gyägya dhi ni ka'i dôle dóro, dré adrélé móndí gyägya 'i dhi sè dhi, akódhi nda ni làgí adrélé fèle móndí gyägya i dré dhi ni kisú.

⁴²Dì má adré tà bâti ta àmì dré: Dhya ángùdhi adrélépi ndìndì kópò àlo yì kìdrí àdhya ni fe áma ànzimvá kì àlo dré mvûle, dré adrélé áma lebèlepí 'i dhi sè dhi, akódhi nda ni làgí ína ni kisú bâti. »

Màtayò 11

Yòwánì` Bâtísímò fèlepi mù móndí` i Yésu véna

(À kònò kpà Lükà 7:18-35)

¹Yésu kòlazí tà nda i áyi lebèbhá mudrí-drì-rì dhi i dri akílé dre dhi, dré ngàzo adrélé tatslé tà tadhábe ìndì Gíká ni kúlì longóbe bhàandré bvò Galiláyà àdhya lé dhi i 'ásè.

²Dì Yòwánì Bâtísímò fèlepi, adrélépi tá bădzó na dhi kòyi tà Krísto dré tá adrélé 'ole dhi i dre dhi, dré áyi lebèbhá kì mùzo

³akódhi ní lizí tazoá dhi: «Mì Mèsiyà adrélépi tá alile dhi 'i? Kó ngalè, mà kàdré dhu rè dhya àzya ní letè kòdhya? »

⁴Yésu logó àyi dré dhi: «Mì gò tà mì dré adrélé yile, ìndì mì dré adrélé nôle kòni kí tití Yòwánì dré:

⁵Mì kùdúkùdu i adré ngá no, mèrèkpè i adré atsí to, móndí kàri dré rûle dhi i adré adrélé, móndí bíbhálé be kùdúkùdu ró dhi i adré tà yi, móndí dràbhá dre dhi i adré angálé dràdrà lésè, ìndì à adré Rúbí Taní longó lemerèbhá i dré.

⁶Kólénzé dhya ángùdhi dra dhèlepi áma tà sè ko dhi dré! »

⁷Dì Yòwánì ni lebèbhá nda i dré tá adrérà'a lile dhi 'á dhi, Yésu dré kidhózó adrélé Yòwánì ni tà ta móndyá zyandre i dré, adrészó tàá dhi: «Mì lì tá duku na àdho no? Mì lì kòzó lyă dré tá adrélé vîle dhi ní no?

⁸Mì lì tá àdho no? Mì lì móndí kítá aveave asólépi i rú dhi ní no? Mì yi rè ká! Móndyá adrébhá kítá aveave dhi kí tosó dhi i àyikya ópí kí dzó kàdrì i 'ásè be.

⁹Mì lì tá dì àdho no? Mì lì pròfétà ní no? Àyíya! Má adré tàá àmí dré dhi: Yòwánì nda lavú pròfétà byá.

¹⁰Tàko ko, akódhi dhya tà kònìdhi ní tisìzo tà ni dri Gìká ni Kúlì na dhi 'i: «Mí nò ká! Má ní dhya dra áma kúlì longolépi dhi ní mu lile mí kandrána. Akódhi nda ní láti ledé mí dré mí kandrána. »

¹¹Má adré tà bâti ta àmí dré: Móndyá tití tòkó dré tîle dhi i kòfalé dhi, dhya àlo kàdrì Yòwánì Bâtisimò fèlepi nda ní lavulépi dhi apfò rè tâdzí ko. Dì, tágba dré adrészó kònìnì dhi, dhya tàko lavulé Òpì bhù àdhyá na dhi lavú ína akódhi.

¹²Kidholé lókyá Yòwánì Bâtisimò fèlepi dré kidhózó Gìká ní kúlì longó dhi sè atsálé ándró kònìdhi dhi, à adré ru pfu Òpì bhù àdhyá be, ìndì móndí rìnyi ró dhi i adré láti nda topázóá.

¹³Tàko ko, pròfétà tití dhi i Mósè ní tátrítrí kúlì be dhi i longó tá Òpì nda ní tà, atsálé Yòwánì ni lókyá 'á.

¹⁴Mì kàdré áma kúlì le ka'ile dhi, Yòwánì nda Èlìyà adrélépi tá alile dhi 'i.

¹⁵Dhya ángùdhi adrélépi bíbhálé íbe tà yìzo dhi kòyi!

¹⁶Má ní kïtswá móndyá ándró kònì kí tà tadhá àdho ngá rú? Àyi nda i sù ngóró ànzimvá liribhá ngá lagírà na, adrélé kúlì loyó àyi kòfalésè dhi i tíni. I adré loyóá dhi:

¹⁷«Mà tswà lärí àmí dré wóyá, mì to àmikya lärí nda ko. Mà ngo àwó longó wóyá, mì tongó àmikya ko. »

¹⁸Tàko ko, Yòwánì nda dré alizo dhi, nya tá ngá ko, mvu kpà ngá ko gò, à dré adrészó tàá dhi: «Akódhi tirí kònzi íbe í léna. »

¹⁹Dì, ma, Móndí ní Mvá, má dré alizo dhi, má adré mána ngá nya, adrészó kpà ngá mvu gò, à dré adrészó tàá dhi: «Dhya kòdhì kòvongbolo líyí 'i, wá litsí líyí 'i, ìndì

mèdáyì lagíbhá kí arúpi tàkonzìbhá íbe dhi 'í! › Di, à adré Gìká ni tògyá no gyăgya, tà adrélé 'ole tògyá nda sè dhi i sè. »

Kizà bhàandre Yésu ni gabhá rè dhi kya

(À kònò kpà Lükà 10:13-15)

²⁰Gò Yésu dré ngàzo adrélé lawàle bhàandre í dré tá tà líndríga ró bí dhi kí 'òzo 'ásà dhi i dri, móndyá 'ásà dhi i dré àyi kí togó ladzálé ko dhi sè.

²¹Tà dhi: «Kizà àmí kí ngá 'í, àmí Kòràzínàbhá ro ni i! Kizà kpà àmí kí ngá 'í, àmí Bètèsàyídàbhá ro ni i! Àngyá ko, má kò'o tá tà líndríga ró má dré 'ole àmí véna dhi i Tírè na ìndì Sìdónà na dhi, kònò móndyá bhàandre nda i 'ásè dhi i asó tá kítá lirí àyi rú kínó, àyi kí drì pfòzo tópfó sè tadházóá dhi, i ladzá àyi kí togó káyà dhi dre.

²²Má adré di tàá àmí dré dhi: Kitú Gìká dré dra tòbvó tazo dhi tú dhi, a ni tà ño àmí dri móndyá Tírè i lésè Sìdónà be dhi kya kí lavú.

²³Dì àmí Kàpàrànàwúmàbhá ro ni i, mì adré tsì kisùá dhi, Gìká ni àmí kí tà tingá tsàle byá kurú na bhù na báti? Tàdzí ko! A ni àmí kí tà tirí tsàle byá móndyá dràbhá dre dhi kí àrà na. Àngyá ko, má kò'o tá tà líndríga ró má dré 'ole àmí véna dhi i Sòdómà na dhi, kònò bhàandre nda ni tá adré ngebú rè be atsálé ándrò kònìdhi.

²⁴Má adré di tàá àmí dré dhi: Kitú Gìká dré dra tòbvó tazo dhi tú dhi, a ni tà ño àmí dri móndyá Sòdómà lésè dhi kya kí lavú. »

Tà kí `dri` kí `dri kisuma Yésu véna dhi

(À kònò kpà Lükà 10:21-22)

²⁵Lókyá nda sè dhi, Yésu dré tazoá dhi: «Á! Tátá, Mírì bhù kya bvò be ni, má adré awoyà ta mí dré, mí dré tà kòdhí kí zùle tògyabhá i dré ìndì móndyá tà nibhá i dré gó, mí dré tà nda kí tadházó ànzimvá i dré dhi sè.

²⁶Àyíya, Tátá, tàko ko, tà mí dré 'ole nda tá dóro mí mìlésè.

²⁷Áma Atá tayí tà tití dhi i má drígá dre. Dhya àlo Gìká ni Mváagó nilepi báti dhi yókódhó, ngebà 'í Gìká Atá ni ni. Dhya àlo Gìká Atá nilepi báti dhi kpà yókódhó. Ngebà 'í akódhí ni Mváagó ni ni, ìndì dhya Mváagó nda dré adrészó áyi Atá ni le tadhálé àyi dré dhi i ni àyi.

²⁸Àmí tití adrébhá ngá lanzì do adrészó landèle ni i, mì alì má vélé wà, má kò'oró àmí adrélé lovólé be dhi bvó.

²⁹Mì kòtayí àmí má dré adrélé tindrile, mì kàdréró áma tà nda nile. Tako ko, áma togó yàyà ànzimvá kya tíni, ìndì mì ni tà kìdríkìdrí kisú àmí kí togó na.

³⁰Àngyá ko, àmí kí tayíma má dré adrélé tindrile dhi dóro, ìndì ngá má dré adrélé fèle àmí dré dòle dhi lanzì ko. »

Màtayò 12

Yésu Mírì sàbátù àdhya 'í

(À kònò kpà Márokò 2:23-28; Lükà 6:1-5)

¹Àmvolásà, sàbátù àlo dhì, Yésu ì adré tá lavúlé amvú ngánò àdhya i 'ásè. Tàbirí dré akódhi ni lebèbhá kì 'òzo gò, ì dré kidhózó adrélé ngánò lò'wa vu, adrészó tsìá.

²Fàrisayò ì kònò tà nda dre dhì, ì dré tázooá Yésu dré dhì: «Mí nò rè ká! Ámi lebèbhá ì adré àyikya tà àma kì tátrítrí kúlí dré adrélé logálé sàbátù tú dhì ni 'o! »

³Dì Yésu logó àyi dré dhì: «Mì nà rè tà Dàwídì dré tá 'ole ì dré adrérà'a tàbirí íbe akódhi ni arúpi íbe dhì 'á dhì ko?

⁴Akódhi fì tá Gìká ni dzó kàdrì na gò, ì dré mápà fèle Gìká dré dhì ni adózó nyàle arúpi ni íbe. Tákò àma kì tátrítrí kúlí adré tá ína mápà nda ni nyàma logá àyi dré. Ngbà 'í kòwánà kì tá kitswá nyàá dhì àyi.

⁵Mì nà rè kpà Mósè ni tátrítrí kúlí na ko tâle dhì, kòwánà ì adré àyikya àzí 'o tépelò na gba kàdré sàbátù tú gò, adrészó tà bha àyi dri ko dhì?

⁶Dì má adré tà bâti ta àmì dré: Dhya kàdrì tépelò nda ni lavúlépi dhì be kònwaré!

⁷Gìká ni Kúlí adré tâá dhì: «Má adré móndyá adrébhá àyi kì àzya kì kizà bha dhì kì nda kòdhyá. Má adré mána mòbòmà adrélé fèle má dré dhì kì nda kòdhyá ko. » Kònò mì kònì tá kúlí kòdhyi kì àndu be dhì, mì kitswá tá tà bha móndyá tà àko àyi rú dhì i dri ko.

⁸Tako ko, Móndí ni Mvá, Míri sàbátù àdhya 'i. »

Yésu tìdrí́ agó àlo dhì sàbátù tú

(À kònò kpà Márökò 3:1-6; Lükà 6:6-11)

⁹Yésu kòtayí àrà nda dre dhì, dré lìzo fîle Yúdà ànzì kì lìsàmbò dzó na.

¹⁰Kònale dhì, agó àlo drígá ni dré 'yòzo 'yo'yò dhì tá be. Fàrisayò àruka ì adré tá tà ì dré kitswázó Yésu ni asíkì ásà dhì ni nda gò, ì dré lizizóá tíá dhì: «Àma kì tátrítrí kúlí ka'i, à kàdré móndí kì tìdrí sàbátù tú dhì 'i? »

¹¹Akódhi logó àyi dré dhì: «Dhya àlo àmì kòfalé dhì kàdré kábilígyà àlo dhì íbe gò, kábilígyà nda dré dhèzo bhú na sàbátù tú dhì, dhya nda kitswá tsì aséá gbă kítú nda sè ko?

¹²Dì móndí kì tà lavú kábilígyà kya byá! Ásà dhì, àma kì tátrítrí kúlí adré tà dôro 'òma sàbátù tú dhì ni ka'i. »

¹³Dì Yésu dré tázooá agó nda dré dhì: «Mí kidzì ámì drígá. » Akódhi dré kidzìzoá gò, drígá ni nda dré adrízó atsálé dôro àzya ni tíni.

¹⁴Dì Fàrisayò nda ì dré pfòzo ru yi, kitswázó láti nda Yésu ni pfùzo dràle dhì bvó.

Yésu màrábà Gìká dré zì́ le dhì 'i

¹⁵Dì Yésu dré tà nda ni yìzo gò, àrà nda ni tayízó lìzo. Móndí zyandre lavúlé dhì ì dré ngàzo lìle akódhi vésè gò, dré àyi kì dràbhá tití dhì kì tìdrízo.

¹⁶Dré àyi kì logázó, ì kòtadháró móndí i dré i àdhì 'i ya dhì ko.

¹⁷Tà nda kòdhì atsá kònìnì, kïtswálé tà Gïká dré tá longólé pròfétà Èsáyà tí dhi kò'oró ru be dhi bvó. Akódhì longó tá dhi:

¹⁸«Kònìdhì áma adhemakandra má dré zìle dhi 'i. Akódhì dhya má dré adrélé lèle tò, ìndì áma togó dré adrészó kinilé tà ni ni sè dhi 'i. Má ni áma Tírì bha akódhì dri gò, dré áma tà gyägya longozó surú tití dhi i dré.

¹⁹Akódhì kïtswá lawàle móndí i be ko, kïtswá kpà trèlé ko. Kïtswá áyi kúlí loyó móndí i dré yìle láti i bhálésè ko.

²⁰Kïtswá kòzó bhèlebhéle dhi ni jo ko. Kïtswá kpà tálà adrélépi 'ole adrálé dhi ni avó adrálé ko, tsàle lókyá dré dra áma tà gyägya 'òzo tà kònzi lavú dhi 'á.

²¹Dì surú tití bvò dri dhi ki àyi ki mì bha akódhì véna. »

Yésu ni tà, tiri` kònzi ki kàdri` àdhyà be dhi

(À kònò kpà Márokò 3:22-30; Lükà 11:14-23)

²²Àmvolásà dhi, à dré agó àlo tiri kònzi i be i léna, adrélépi kpà mì kùdúkùdu ró ìndì ábhábhá ro dhi ni adzizó Yésu vélé. Dì Yésu dré akódhì nda ni tìdrizó gò, akódhì dré kidhözó adrélé kúlí ta, adrészó kpà ngá no.

²³Móndyá zyandre tití dhi ki líndrí dré gàzo bhwäbhwa gò, i dré adrészó tàá dhi: «Dhya kòdhì tsì Dàwídì ni Mvá, Mèsiyà ro dhi 'i ko? »

²⁴Dì, Fàrisayò i koyi kúlí nda dre dhi, i dré àyikya tazoá dhi: «Dhya kòdhì adréngebà 'í tiri kònzi ki dro topfòle móndí i lésè, Bèlèzèbùlè, tiri kònzi ki kàdrì ni rinyí sè. »

²⁵Dì, Yésu dré ína tà i dré tá adrélé kisùle nda ni nìzo kyá gò, tazoá àyi dré dhi: «Òpì ángùdhì móndyá zàlá dhi i dré adrészó ru lanzí àyi kòfalésè dhi, òpì nda ni tà ni akí tití. Bhàandre ángùdhì yà, kó ngalè dzó ángùdhì yà móndyá lana dhi i dré adrészó ru lanzí àyi kòfalésè dhi, kïtswá kpà áyi totó bwà ko.

²⁶Sàtánà kàdré Sàtánà ni dro dhi, adrénà ru pfu áyi tändi be. Akódhì ni òpì ni dì áyi totó ngíningíni ró?

²⁷Má kàdré mána tiri kònzi ki dro Bèlèzèbùlè ni rinyí sè dhi, àmi ki móndyá i adrénà dì àyi ki dro àdhi ni rinyí sè? Dì ásà dhi, àyi nda ki tà mì dré adrélé tâle nda ki bvó ta àyi.

²⁸Dì, má kàdré mána tiri kònzi ki dro Gïká ni Tírì ni rinyí sè dhi, kòdhì adrénà tadhá dhi, Gïká ni Òpì atsá àmi kòfalé dre káyà dhi.

²⁹Kòdhì i be dhi, dhya àlo kïtswá fîle agó kòmbá àlo dhi ni dzó na akódhì ni ngá wu bwà ko, kàdrò zyà rè kòmbá nda bă sè 'íká ko dhi. Dì kàdrò akódhì dre dhi, a ni kïtswá ngá tití akódhì ni dzó na nda ki wu.

³⁰Dhya ángùdhì adrélépi túmâní má be ko dhi adrénà ru pfu má be. Dhya adrélépi móndí ki kímó túmâní má be ko dhi, adrénà àyi ki lapé.

³¹Dì ásà dhi, má adré tàá àmì dré dhi: Gìká ni kítswá tàkonzi tití móndí ì dré adrélé 'ole dhi kí tri, túmání làdhá tití ì dré adrélé dhàle í rú dhi íbe. Dì, kítswá ína làdhá dhàle Tírí Lólo rú dhi ni tri ko.

³²Dhya ángùdhi adrélépi kúlí kònzi ta Móndí ni Mvá rú dhi, Gìká ni akódhi nda ni tàkonzi tri. Dì, dhya ángùdhi adrélépi ína kúlí kònzi ta Tírí Lólo rú dhi, à kítswá akódhi nda ni tàkonzi tri lókyá kònìdhi sè yà, kó ngalè lókyá adrélépi alile dhi sè yà dhi ko. »

Fa i lò'wa ni i' be dhi

(À kònò kpà Lúkà 6:43-45)

³³Yésu gò tàá dhi: «Fa kàdré doro dhi, lò'wa ni kí kókpà adré doro. Fa kàdré kó kònzi dhi, lò'wa ni kí kókpà adré kònzi. Tàko ko, à adré fa ni lò'wa ni i sè.

³⁴Àmì, ni àtrá kí àrèbhá ni i, àmì kó kònzi dhi, mì ni dì kítswá tà àlo doro dhi ni ta ngíningní ró? Àngyá ko, ti adré tà adrélépi gàle togó na dhi kí ta kòdhyá.

³⁵Dhya doro adré tà doro 'o apfôle tà doro tití dré zùle áyi togó na dhi i lésè. Dì, dhya kònzi adré ína tà kònzi 'o apfôle tà kònzi tití dré zùle áyi togó na dhi i lésè.

³⁶Má adré tàá àmì dré dhi: Kítú dra tòbvó tào dhi tú dhi, móndyá tití dhi kí kúlí tàko àlo àlo tití ì dré tòle dhi kí tà ta Gìká kandrá.

³⁷Tàko ko, kúlí mí dré tòle dhi kí tà sè dhi, a ni ámì tòbvó ta ngalè ámì nòzo gyägya yà, kó ngalè tà bhàzo mí dri yà dhi. »

Tà tadhálé pròfétà Yónà ni tà rú dhi

(À kònò kpà Márokò 8:11-12; Lúkà 11:29-32)

³⁸Àmvolásà dhi, Fàrisayò àruka i tátrítrí kúlí tadhábhá àruka íbe dhi ì dré tào dò Yésu dré dhi: «Tadhálépi, mà adré lèá dhi, mí kò'o tà líndríga ró dhi àma dré nòle. »

³⁹Dì Yésu dré logózóá àyi dré dhi: «Móndyá ándrò adrébhá kònzi ìndì zàràbhù ro dhi ì adré tà líndríga ró dhi ni nda nòle. Dì, à kítswá tà àzya líndríga ró dhi ni 'o àyi dré nòle dhi ko, kàdré ngbà 'í pròfétà Yónà àdhya 'í ko dhi.

⁴⁰Tàko ko, ngóró Yónà dré tà ayílé kítú na ìndì ngátsi na kósyá àgá léna dhi tíni dhi, Móndí ni Mvá ni kókpà ayí bvò na kítú na ìndì ngátsi na.

⁴¹Kítú dra tòbvó tào dhi tú dhi, Nínivèbhá kí nga tà bha móndyá ándrò ni i dri. Tàko ko, Nínivèbhá nda ì dré tà Yónà dré longolé àyi dré dhi ni yìzo dhi, ì ladzá tà àyikya àyi kí togó 'í. Dì mì nò rè ká! Dhya kàdrì Yónà nda ni lavulépi dhi be kònwaré!

⁴²Kòdhi íbe dhi, kítú dra tòbvó tào dhi tú dhi, ópí kàdrì tòko ró bvò tòbhù na dhi drile dhi ni nga tà bha móndyá ándrò ni i dri. Tàko ko, ópí nda angá tá ína làwú làvo lésè alile ópí Sòlòmónò ni tògyakúlì yi 'í. Dì mì nò rè ká! Dhya kàdrì Sòlòmónò nda ni lavulépi dhi be kònwaré! »

Tírí' kònzi ni gòma fi`le móndí' léna dhi

(À kònò kpà Lúkà 11:24-26)

⁴³Yésu gò tàá dhi: «Tirí kònzi àlo dhi kòpfò dhya àlo lésè dhi, adré anyálé àrà fà ro dhi i 'ásè, àrà i dré kïtswázó lovólé lána dhi ni ndabe. Dì, kòkïtswá kisúá bwà ko dhi,

⁴⁴adré tàá dhi: «Má ni go file áma dzó má dré apfòzo lásà dhi na. » Kògò tsàle dre dhi, adré kisúá dhi, dzó nda ngbo: À awá 'álé ni, ngá lána dhi kí tobhàzo kpákpa dre.

⁴⁵Dì adré lìle tirí kònzi áyi lavúbhá nzi-drì-rì dhi kí nda lìzo àyi íbe gò, i dré adrészó tifilé adrélé dhya nda léna. Dì dhya nda ni tà kùdù ro dhi vélé kònzi wáláká ni ni lavú. Dì tà nda ni adré kókpà kònini móndyá ándrò adrébhá kònzi ni i dré. »

Yésu ni andre i adrúpi ni i' be dhi

(À kònò kpà Márökò 3:31-35; Lükà 8:19-21)

⁴⁶Yésu dré tá adrérà'a tà ta móndyá zyandre i dré dhi 'á dhi, akódhi ni andre i adrúpi ni íbe dhi i dré atsázó adrélé àyi kí totó kivì na. Ì adré tá tà le tâle akódhi be.

⁴⁷Dhya àlo dré tâzoá Yésu dré dhi: «Ámì andre i ámì adrúpi íbe dhi i adré àyi kí totó kivì na. Ì adré tà le tâle mí be. »

⁴⁸Yésu logó dhya nda dré dhi: «Áma andre àdhi 'i? Áma adrúpi i àdhíbhá 'i? »

⁴⁹Dré drígá bhèzo áyi lebèbhá i véna, tâzoá dhi: «Mì nò rè áma andre i áma adrúpi íbe kònì i ká! »

⁵⁰Tàko ko, dhya ángùdhi adrélépi tà áma Atá bhù na dhi dré adrélé lèle à kò'o dhi kí 'o dhi ína áma adrúpi 'i, áma amvúpi 'i, ìndì áma andre 'i. »

Màtayò 13

Pi' dhi' gó agó kórì` ri` lepi dhi ni tà dri dhi

(À kònò kpà Márökò 4:1-9; Lükà 8:4-8)

¹Kítú nda sè dhi, Yésu dré apfòzo dzó lésè lìle lirílé tâpârìandre mìle.

²Mondí zyandre lavúlé dhi i dré ru kimólé akódhi làgásè kúrú dhi sè dhi, dré mbàzo lirílé bwátù na kïtswálé tà tadhá, móndyá zyandre tití nda i dré adrérà'a àyi kí totó yí mìle dhi 'á.

³Dì dré kïdhózó tà bì dhi kí tadhá àyi dré pídhígó sè, adrészó tàá dhi: «Mì yi rè ká! Kítú àlo dhi, agó àlo dhi pfò tà lìle kórì ri áyi amvú na.

⁴Dré tá adrérà'a kórì ri dhi 'á dhi, kórì àruka i ledhé tá láti mìle gò, àré i dré adàzo tetéá tití.

⁵Kórì àruka i ledhé tá bvò kírà ro adrélépi kìní íbe tsà dhi dri. Ì dré apfòzo mbèlè, kìní dré nzile ko dhi sè.

⁶Dì, kítú kòka dre dhi, dré àyi kí zàzo 'yole, àyi kí kídrì dré file kìní na dóro ko dhi sè.

⁷Kórì àruka i ledhé tá kùtsí kòfalé gò, kùtsí nda dré mbàzo àyi kí amó.

⁸Dì, kórì àruka i ledhé tá àyikya kìní dóro dri gò, i dré lò'wa 'àzo dóro. Àlo ni 'a lò'wa nyadhi-nzi, àzya ni nyadhi-na, àzya ni nyadhi-àlo-drì-mudrì. »

⁹Yésu gò tàá dhi: «Dhya ángùdhi adrélépi bíbhálé íbe tà yìzo dhi kòyi! »

Yésu ngi tà i' dré adrészó tà ta móndí' i dré pi' dhi' gó sè dhi ni àndu
(À kònò kpà Márökò 4:10-12; Lükà 8:9-10)

¹⁰Àmvolásà dhi, Yésu ni lebèbhá ì dré àyi kí kisizó ànyi akódhi làga, akódhi ni lizí tazoá dhi: «Mí adré tà ta móndí i dré pídhígó sè àdho tà sè? »

¹¹Dì Yésu logó àyi dré dhi: «Giká fè àmí dré tògyá Òpì bhù àdhyà ni tà lùzu ró dhi kí nízo. Dì, fè ína tògyá nda àyi dré ko.

¹²Tako ko, dhya ángùdhi tà nilepi bì dhi dré dhi, à ni tà dré nile nda kí drì timbà gò, akódhi dré adrészó vélé tà nini íbe bì lavulé. Dì, dhya ángùdhi tà nilepi ko dhi dré dhi, à ni ndindì tà tsà dré nile dhi ni tingá.

¹³Tà nda sè dhi, má adré tà ta àyi dré pídhígó sè. Tako ko, tágba ì dré adrészó ngá no dhi, ì adré ngá nda kí no dóro ko. Tágba ì dré adrészó tà yi dhi, ì adré tà nda kí yi dóro ko, adrészó kpà tà nda kí àndu ni ko.

¹⁴Dì tà Giká dré tá longolé prôfétà Èssayà tí dhi ì 'o ru àyi léna kònini. Akódhi longó tá dhi: «Mì ni adré tà yi 'í, dì, mì kítswá tà mì dré adrélé yile nda kí àndu ni tâdzí ko. Mì ni adré ngá no 'í, dì, mì kítswá ngá mì dré adrélé nôle nda kí atógyà tâdzí ko.

¹⁵Tako ko, móndyá kòdhi kí togó andíri dre. Ì tabhó àyi kí bíbhálé, àyi kí mì dròzo dròdrò. Ì kò'o tá kònini ko dhi, kònò ì ni tá ngá no àyi kí mì sè, adrészó tà yi àyi kí bíbhálé sè, adrészó tà ni àyi kí togó na, ì dré àyi kí togó adzázó má vélé gò, má dré àyi kí tîdrîzó. ›

¹⁶Dì, kólénzé ína àmí dré, àmí kí mì dré adrélé ngá no, ìndì àmí kí bíbhálé dré adrélé tà yi dhi sè!

¹⁷Má adré tà bâti ta àmí dré: Prôfétà bì dhi i móndí gyägya bì dhi íbe dhi i tá lovó íbe tò kítswázó tà mì dré adrélé nôle dhi kí no gò, ì dré àyikya nòzoá ko. Àyi tá kpà lovó íbe tò kítswázó tà mì dré adrélé yile dhi kí yi gò, ì dré àyikya yìzoá ko. »

Yésu ngi pi' dhi' gó agó kórì` ri`lepi dhi ni tà dri dhi ni àndu
(À kònò kpà Márökò 4:13-20; Lükà 8:11-15)

¹⁸«Dì mì yi rè pídhígó agó kórì rilepi dhi àdhyà nda adré lèá tâle ngíni ya dhi ká.

¹⁹Móndí àruka ì adré Giká ni kúlì ka'i ngóró kórì rile ledhélé láti mìle nda i tîni. Ì kòyi Giká ni Òpì ni tà dre dhi, ì adré àndu ni ni ko gò, Dhya kònzi dré adrészó atsâlé kórì rile nda ni tingí àyi kí togó lésè.

²⁰Móndí àruka ì adré Giká ni kúlì ka'i ngóró kórì rile ledhélé bvò kírà ro dhi dri nda i tîni. Ì kòyi kúlì nda dre dhi, ì adré ndirì ka'iyá arí sè.

²¹Dì, ì dré adrélé kúlì nda ni tayí adrélé tîle àyi kí togó na ko dhi sè dhi, ì adré ngbà 'í trôle rúá lókyá tsà sè. Dì kàdré tà ì dré adrészó kízà nya ásà dhi 'i yà, ngalè tà adrészó àyi kí mì pfo kúlì nda ni tà sè dhi 'i yà dhi, ì adré àyi kí tà ka'ika'i nda ni tayí mbèlè.

²²Móndí àruka i adré Gíká ni kúlí ka'i ngóró kórì rile ledhélé kùtsí kòfalé nda i tíni. I kòyi kúlí nda dre dhi, tà bvò kòndi àdhya adrébhá àyi ki togó 'o lanzile dhi i, iindì ngá lovó adrélépi àyi ki lití dhi ibe dhi i adré kúlí nda ni amó gò, dré adrézó lò'wa 'a ko.

²³Dì, móndí àruka i adré àyikya Gíká ni kúlí ka'i ngóró kórì rile ledhélé kìní dóro dri nda i tíni. Àyi nda i kòyi kúlí nda dre dhi, i adré àndu ni ni ni gò, i dré adrézó lò'wa 'a dóro. Àlo ni adré lò'wa 'a nyadhi-nzi, àzya ni nyadhi-na, àzya ni nyadhi-àlo-drì-mudrì. »

Pi' dhi' gó mbi` ngánò kòfalé dhi ni tà dri dhi

²⁴Yésu dré gòzo pídhígó àzya pi àyi dré, tazoá dhi: «Òpì bhù àdhya sù ngóró dhya àlo kórì dóro rilepi áyi amvú na dhi tíni.

²⁵Dì, móndyá tití dhi i dré tá adrérà'a ayí ko ngátsi sè dhi 'á dhi, akódhi ni kàribhá dré ína atsázó mbì kórì ri ngánò kòfalé gò lìzo.

²⁶Dì ngánò nda kòmba adrélé lò'wa 'a dre dhi, mbì nda dré kpà apfòzo.

²⁷Gò amvú lìyí nda ni màrabà i dré alìzo akódhi vélé tàá drá dhi: «Míri, mí ri tsì kórì dóro ámi amvú na kòdhyá ko? Mbì angá dì ína ángolésè? ›

²⁸Akódhi logó àyi dré dhi: «Kàribhá 'o tà kòdhi nì. › Dì màrabà nda i gò akódhi ni lizí: «Mí lè mà kòlì mbì nda ni akú? › ²⁹Akódhi logó àyi dré dhi: «Kóko! Mì kòlì mbì nda ni akú dhi, mì ni dra akúá túmäní ngánò ibe.

³⁰Mì tayí àyi rìti dhi i adrélé mbàle túmäní tsàle lókyá dra lànyá lokózó dhi 'á. Dì lókyá nda sè dhi, má ni tàá dhya dra lànyá lokóbhá dhi i dré dhi: Mì akú rè zyà mbì todrôle kitswálé zàle 'íká, gò mì kòlokóró ngánò tobhàle áma kòbhó na ndò. »»

Pi' dhi' gó mùtádì lò'wa ni tà dri dhi

(À kònò kpà Márokò 4:30-32; Lükà 13:18-19)

³¹Yésu dré gòzo pídhígó àzya pi àyi dré, tazoá dhi: «Òpì bhù àdhya sù ngóró mùtádì lò'wa dhya àlo dré dòle rile áyi amvú na dhi tíni.

³²Lò'wa nda konyókonyó mvá lavúlé lò'wa àruka tití dhi i rúsè. Dì, kàpfò dre dhi, dré ína mbàzo atsálé kàdrì ngá àruka tití kidhílé amvú 'á dhi ki lavú. Atsá fa tíni gò, àri i dré adrézó alìle bhà si kólá ni i drìna. »

Pi' dhi' gó tàkú ni tà dri dhi

(À kònò kpà Lükà 13:20-21)

³³Yésu dré gòzo pídhígó àzya pi àyi dré, tazoá dhi: «Òpì bhù àdhya sù ngóró tàkú mvá tsà tòkó àlo dré adólé amúlé fóndro kàdrì dhi be gò, tàkú nda dré fóndro nda ni 'òzo avólé tití dhi tíni. »

³⁴Dì Yésu tà tá tà nda kòdhi i tití móndyá zyandre i dré pídhígó sè. Tà tà àlo àyi dré pídhígó àko dhi ko,

³⁵kitswálé tà longolé pròfétà tí kònìdhi kò'oró ru be dhi bvó: «Má ni tà adó tâle àyi dré pídhígó sè. Má ni tà zùle kínó kidhólé bvò ni bhàma lésè dhi ki longó. »

Yésu ngi pi' dhi' gó mbi` ni tà dri dhi ni àndu

³⁶Àmvolásà dhi, Yésu dré móndyá zyandre nda kí tayízó gò, nzìzo bhàna. Akódhi ni lebèbhá ì dré àyi kí kisizó ànyi akódhi làga, tàá drá dhi: «Mí ngi àma dré pídhígó mbì amvú na dhi àdhya ni àndu wà. »

³⁷Akódhi logó àyi dré dhi: «Dhya kórì dóro rilepi nda, Móndí ni Mvá 'i.

³⁸Amvú nda bvò 'i. Kórì dóro nda, Giká ni ànzì akódhi ni Òpì na dhi 'i. Mbì nda, Dhya kònzi ni ànzì 'i.

³⁹Kàribhá mbì kórì rilepi nda, Dzáborò 'i. Lókyá lanyá lokozó nda, lókyá kùdù 'i. Dhya adrébhá lanyá lokó nda i, ángéló 'i.

⁴⁰Dì ngóró à dré adrélé mbì nda ni akú kitswálé zàle àtsí na dhi tini dhi, a ni kókpà adré kònini lókyá kùdù sè.

⁴¹Móndí ni Mvá ni áyi ángéló kí amù, tà tití adrébhá móndí kí 'o ledhélé tàkonzi na dhi kí akú túmání móndyá tití adrébhá tà kònzi 'o dhi íbe, àyi kí tingázó pfole Giká ni Òpì 'ásè.

⁴²Dì ángéló nda ì dré àyi kí bhèzo àtsí adrélépi adrálé ko dhi na. Kònale dhi, ì ni adré tongolé, adrészó kpà síkálándrá tsì.

⁴³Dì, móndyá gyägya dhi kí adré àyi kí Atá ni Òpì na. Dhya ángùdhi adrélépi bíbhálé íbe tà yìzo dhi kòyi! »

Pí' dhi' gó ngá làgi' kyàkyà zùle dhi ni tà dri dhi

⁴⁴«Òpì bhù àdhya sù ngóró ngá làgi kyàkyà zùle amvú àlo na dhi tini. Agó àlo dhi kisú tá ngá làgi kyàkyà nda gò, gózo zùá tódyá. Dì togó kìní dré dhi, dré lìzo áyi ngá tití dhi kí lagí gò, amvú nda ni gìzo í dré. »

Pí' dhi' gó màyi' kà làgi' kyàkyà dhi ni tà dri dhi

⁴⁵«Òpì bhù àdhya sù kpà ngóró agó àlo adrélépi tá màyi' kà aveave dhi kí nda dhi tini.

⁴⁶Akódhi kòkisú màyi' kà àlo làgi kyàkyà dhi dre dhi, dré lìzo áyi ngá tití dhi kí lagí gò, gìzoá. »

Pí' dhi' gó kimbá ni tà dri dhi

⁴⁷«Òpì bhù àdhya sù ngóró kimbá à dré bhèle yìandre na gò, dré kosyá kí kárá tití dhi kí turúzó dhi tini.

⁴⁸Kimbá nda kòga kosyá sè bì dre dhi, kosyá bhebhá ì dré asézóá apfole yì mìle. Dì ì dré lirizó kosyá dóro dhi kí kipè tobhàle kánzi i 'ásè gò, kosyá kònzi dhi kí bhèzo.

⁴⁹Tà nda ni kókpà adré kònini lókyá kùdù sè. Ángéló kí alì móndyá kònzi kí kòfalé lanzí móndyá gyägya íbe gò,

⁵⁰ì dré móndyá kònzi nda kí bhèzo àtsí adrélépi adrálé ko dhi na. Kònale dhi, ì ni adré tongolé, adrészó kpà síkálándrá tsì. »

Ngá làgi' be kàdri` ti' dhi' ro i` ndi` àku ró dhi i

⁵¹Dì Yésu lizí àyi tázooá dhi: «Mì yi tà kòdhì i tití, àndu ni kì nizo vélé? » Ì logó drá dhi: «Àyíya! »

⁵²Akódhì gò tàá àyi dré dhi: «Dì dhya ángùdhi adréléri tátrítrí kúlí tadhá gò Òpì bhù àdhya ni tà tadházó drá dhi, dhya nda ngóró bhà líví adréléri ngá làgí be kàdrì dhi íbe gò, dré adrészó ngá tídhí dhi kì adó lásà ngá àku dhi íbe dhi tíni. »

Nàzàrétàbhá i` ka'i Yésu ko (À kònò kpà Márokò 6:1-6; Lükà 4:16-30)

⁵³Yésu kòpi pídhígó nda i akílé dre dhi, dré àrà nda ni tayízó gò,

⁵⁴lizo tsàle bhàandre í dré tá mbàzo lána dhi na. Dì dré kídhozó adrélérà tadhá Yúdà ànzi kì lísámbò dzó na. Gò móndyá nda i dré adrészó akódhì ni yi sibhálé be ngbo, adrészó lizíá àyi kòfalésè dhi: «Dhya kòndi kisú ína tògyá kòdhì túmání rinyí adrészó tà líndríga ró dhi kì 'o dhi be dhi ángwà?

⁵⁵Akódhì kòndi tsì dhya adréléri fa ledé dhi ni mvá 'i ko? Andre ni ni rú tsì Màriyà ko? Adrúpi ni i tsì, Yàkóbhò, Yóséfà, Sìmónà tsàle Yúdà ko?

⁵⁶Amvúpi ni i tití àma kòfalé ko? Akódhì kisú dì tà kòdhì i tití dhi ángwà? »

⁵⁷Dì tà nda sè dhi, i kítswá tá Yésu ni ka'i bwà ko. Dì Yésu dré tázooá àyi dré dhi: «À adré ngbà 'í pròfétà ni líndri bha ko dhi akódhì ni tändi bha ìndi akódhì ni tändi ni dzó 'á. »

⁵⁸Dì akódhì 'o tá tà líndríga ró bì dhi i kònàle ko, i dré akódhì ni ka'ile ko dhi sè.

Màtayò 14

Yòwáni` Bâtisimò fèlepi ni dràma (À kònò kpà Márokò 6:14-29; Lükà 9:7-9)

¹Lókyá nda sè dhi, Èródè adréléri tá ópí ro bvò Gàliláyà àdhya drile dhi dré Yésu ni rúbí yìzo.

²Dré tázooá áyi màrabà i dré dhi: «Dhya kòdhì Yòwánì Bâtisimò fèlepi 'i! Angá ína dràdrà lésè ni. Ásà dhi, akódhì rinyí íbe adrészó tà líndríga ró dhi kì 'o. »

³Tako ko, Èródè nda 'o tá Yòwánì rûle adrôle, bhèle bădzó na dhi ni. 'O tá kònìnì áyi adrúpi Filípò ni tokó, Èródýà ni tà sè.

⁴Àngyá ko, Yòwánì adré tá tàá Èródè dré dhi: «Kítswá mí dré adrészó ámi adrúpi ni tokó íbe dhi ko. »

⁵Ásà dhi, Èródè adré tá Yòwánì ni le pfûle dràle. Dì, adré tá ína móndí zyandre dhi kì ro, i dré adrélérà Yòwánì ni no pròfétà ro dhi sè.

⁶Dì, kitú Èródè ni tizo ásà dhi sè dhi, Èródýà ni zapi dré apfòzo ngá to Èródè i kandrà móndyá dré azilé gwányá lé dhi íbe gò, tà nda dré Èródè ni togó 'òzo kínillé tò.

⁷Dì akódhì dré mòndrà sìzo tázooá dhi, i ni ngá ángùdhi mvátòkó nda dré lèle zile i tí dhi ni fe drá.

⁸Dì andre ní kòtà akódhì ní drì dre dhi, akódhì dré tazoá Èròdè dré dhi: «Mí kafè má dré Yòwánì Bâtisimò fèlepi ní drì kònwa sänì na. »

⁹Gò ópí nda ni togó dré kizà nyàzo tà nda sè. Dì, mòndrà dré tá sile móndyá azilé nda i kandrà dhi i sè dhi, dré ína tolí fèzo tà zile nda ní 'ozo gò,

¹⁰móndí mùzo lile Yòwánì ní drì li bădzó na.

¹¹Gò akódhì ní drì nda ní adózó sänì na alizo fèá mvátokó nda dré. Dì akódhì nda dré fèzoá áyi andre dré.

¹²Bvóá dhi, Yòwánì ní lebèbhá i dré tsazo akódhì ní àbvò do sile. Gò i dré lizo tà nda ní longó Yésu dré.

Yésu fè ngá nyàle móndí` ngùlù-nzi dhi i dré

(À kònò kpà Márokò 6:30-44; Lükà 9:10-17; Yòwánì ` 6:1-14)

¹³Yésu koyi rúbí nda dre dhi, dré mbàzo bwatù na kïtswálé lile kalóma àrà móndí àko dhi na dhi bvó. Dì, móndí zyandre dhi i koyi tà nda dre dhi, i dré ngàzo bhàandre bî dhi i lésè lile akódhì vésè pá sè, tâpáríandre milésè.

¹⁴Dì Yésu kàsí bwatù lésè dre dhi, dré móndyá zyandre lavulé nda kî nòzo, kizà dòzo áyi togó na àyi kî tà sè gò, dré àyi ki dràbhá kî tîdrizó.

¹⁵Indró kandrì dre dhi, akódhì ní lebèbhá i dré àyi kî kisizó ànyi akódhì làga, tàá drá dhi: «Kònìdhì àrà bhà àko dhi 'i, ìndì lókyá lavú dre. Mí kofè dì láti móndyá zyandre kònì i dré lizo mányàngá gi nyàle bhà àma làgásè dhi i 'asè wà. »

¹⁶Dì, Yésu logó àyi dré dhi: «Kïtswá i dré lizo dhi ko. Àmi kî tandi, mì kofè ngá àyi dré nyàle dhi àmi. »

¹⁷Dì, i logó drá dhi: «Àma ngbà 'í kònwa dhi mapà íbe nzi, ìndì kosyá íbe ri. »

¹⁸Yésu gò tàá dhi: «Mí alì ngá nda íbe má vélé. »

¹⁹Gò dré tazoá móndyá zyandre nda i dré dhi, i kòlirí mbì dri. Dì kàdò mapà nzi nda i kosyá ri nda íbe dre dhi, dré mì tingázó kurú na bhù na, tà taní zìzo Giká tí ngá nda i dri. Dré mapà nda kî tonjòzo lanzílé áyi lebèbhá i dré gò, i dré lanzízóá móndyá zyandre i dré.

²⁰Dì àyi tití nda i dré nyàzoá pizo. Gò akódhì ní lebèbhá i dré àmbí ní kî lokozó gale kánzì mudrí-dri-rì dhi i sè bibi.

²¹Ago ngá nda kî nyabhá dhi i tá ànyifanyi ngùlù-nzi. (À nà tá tokó i ànzimvá íbe ko.)

Yésu to atsí tâpáríandre drísè

(À kònò kpà Márokò 6:45-52; Yòwánì ` 6:15-21)

²²Gbä lókyá nda sè dhi, Yésu dré áyi lebèbhá kî 'ozo lile mbàle bwatù na, i kòzyaró dridri i kandrana tâpáríandre ni ta'á na. Tako ko, lè tá rè zyà láti fèle móndyá zyandre nda i dré lizo 'iká.

²³Kofè láti àyi dré dre dhi, dré mbàzo kalóma kòngó àlo drìna kïtswálé tà ta Giká be. Gò ngá dré anizó akódhì ní kî kònàle kalóma.

²⁴Dì, bwátù nda lì tá ína vwàle kìní rúsè vwàvwà ro. Lyǎandre adré tá vile sínýà dri rúá gò, yí adrélépi longálé dhi dré adrészó ru tswa rúá.

²⁵Dì ngátsi kítogá àmvolésè dhi, Yésu dré ngàzo adrélé atsí to tāpāríandre drísè, adrészó lile áyi lebèbhá nda i véna.

²⁶Ì kònò akódhi adrérà'a atsí to tāpāríandre drísè dre dhi, tirì dré gàzo àyi léna bǐ gò, i dré tàzoá dhi: «Kòdhì móndí líndrí 'i! » Gò i dré ngàzo adrélé tetrélé tirì dré.

²⁷Dì, gbă kòdhwa, Yésu dré tàzoá àyi dré dhi: «Mì tsì togó! Ma 'i. Mì ro ngá ko. »

²⁸Pétéró logó drá dhi: «Míri, kàdré mí 'i báti dhi, mí tà má dré má kòliró mí véna yí drísè wà. »

²⁹Yésu gò tàá drá dhi: «Mí alì! » Dì Pétéró dré pfòzo bwátù 'ásè gò, kidhólé atsí to yí drísè, adrészó lile Yésu véna.

³⁰Dì, kònò lyǎandre nda dre dhi, tirì dré akódhi ní 'òzo gò, dré kidhózó adrélé tandrûle. Dì dré loyózó dhi: «Míri, mí tindrí ma wà! »

³¹Gbă kòdhwa, Yésu dré áyi drígá kidzìzo akódhi ní ru gò, tàzoá drá dhi: «Mí tà ka'ika'i íbe tsà ní, mí kayí tà mí léna àdho tà sè? »

³²Ì kòmbà fîle bwátù na dre dhi, lyǎandre nda dré rìzo adrélé kíri.

³³Dì Yésu ní lebèbhá bwátù na nda i dré ledhézó àyi kí kórókó tití akódhi kandrá, tàzoá dhi: «Mí Gíká ní Mváagó 'i báti! »

Yésu tindrí' dràbhá i Gènèsàréte na

(À kònò kpà Márokò 6:53-56)

³⁴Ì kòzya tāpāríandre nda ní ta'á na dre dhi, i dré tsàzo bvò Gènèsàréte àdhyá na.

³⁵Móndyá kònàle dhi i kònò Yésu níle kyá dre dhi, i dré ngàzo akódhi ní rúbí 'o ayílé bvò wáyi nda 'ásè. Dì móndí i dré àyi kí dràbhá tití dhi kí adzizó akódhi vélé gò,

³⁶akódhi ní ti lizízo, kótayíró dràbhá nda i adrélé ngebà 'í áyi kítá ti tabè kòdhya. Dì àyi tití akódhi ní kítá nda ní tabèbhá dhi i dré adrízó.

Màtayò 15

Gíká ní kúlí bhèma adrészó móndí' kí labhi lebè dhi

(À kònò kpà Márokò 7:1-13)

¹Àmvolásà dhi, Fàrisáyò àruka i tátrítrí kúlí tadhábhá íbe dhi i dré angázó Yérúsalémà lésè alìle Yésu vélé gò, lizíá tíá dhi:

²«Ámi lebèbhá i adré àma kí tábhí kí labhi ño àdho tà sè? Àngyá ko, i adré àyikya ngá nya drígá dzì àko ró. »

³Yésu dré logózóá àyi dré dhi: «Ámi ró dhi, mì adré àmikya Gíká ní tolí ño, kitswázó àmí kí labhi likí àdho tà sè?

⁴Tako ko, Giká tà tá dhi: «Lè mí kàdré ámi atá ni lindrì bha ámi andre be. » Tà kpà dhi: «Dhya ángùdhi adrélépi tà kònzi ta áyi atá rú yà, kó ngalè áyi andre rú yà dhi, lè à kò'o akódhi nda dràle dràdrà. » ⁵Di, mì adré àmikya tàá dhi, dhya àlo kòtà áyi atá dré yà, kó ngalè áyi andre dré yà dhi, «Ngá má dré tá kitswálé fèle ámi ledé dhi, ngá má dré dra fèle Giká dré dhi 'i' dhi,

⁶adré di lèá vélé dhya nda kòbhà áyi atá ni lindrì áyi andre be ngá nda sè dhi ko. Di ásà dhi, mì adré àmikya Giká ni kúlí bhe gàrà dri, adrészò àmí kí tändi kí labhi lebè.

⁷Àmí túrúpfúbhá 'i! Pròfétà Èsáyà dré tá adrérà'a Giká ni kúlí longó àmí kí tà sè dhi 'á dhi, longó tá tà nda kyá tazoá dhi:

⁸«Mónyá kòdhi ì adré áma lindrì bha ngbà 'í ti sè. Di, àyi kí togó vwà ína má rúsè vwàvvà.

⁹Ì adré lísámbò 'o má dré woyá. Tako ko, ì adré tolí angábhá móndí ì vélésè dhi kí tadhá ngóró tolí nda ì angá tá má vélésè na tíni. » »

Tà adrébhá móndí¹ kí 'o atsálé ndí ró Giká mìlésè dhi i

(À kònò kpà Márökò 7:14-23)

¹⁰Gò Yésu dré móndá zyandre kònàle dhi kí azizó, tazoá àyi dré dhi: «Mí yi vo rè tà kònìdhi, àndu ni ni nizo ká!

¹¹Ngá adrélépi file móndí ni sibhalé 'ásè dhi adré akódhi ni 'o atsálé ndí ró dhi nì ko. Be ró dhi, tà adrélépi apfòle móndí sîlésè dhi adré ína akódhi ni 'o atsálé ndí ró dhi nì. »

¹²Gò Yésu ni lebèbhá ì dré àyi kí kisizó ànyi akódhi làga, tàá drá dhi: «Mí nì, tà mí dré tâle kòdhi dhe Fàrisayò i léna kònzi dhi be? »

¹³Akódhi logó àyi dré dhi: «Fa ángùdhi áma Atá bhù na dhi dré kidhilé nì ko dhi, à ni tingiá.

¹⁴Mí tayí àyi nda i. Àyi mì kùdükùdu kí drì kobhá mì kùdükùdu ró dhi 'i. Di mì kùdükùdu àlo dhi kàdré mì kùdükùdu àzya se drile dhi, àyi rìti nda kí ledhé bhú na. »

¹⁵Gò Péteró dré tazoá drá dhi: «Mí ngi kúlí alaala mí dré tâle nda ni àndu àma dré wà. »

¹⁶Di Yésu logó dhi: «Àmi, àmi dhu rè tà nìnì àko?

¹⁷Mí nì ko tâle dhi, ngá ángùdhi adrélépi file móndí ni sibhalé 'ásè dhi adré file akódhi ni 'a na gó, adrélé apfòle akódhi ni rúbhá lésè dhi?

¹⁸Di, tà ángùdhi adrélépi apfòle móndí sîlésè dhi adré ína angálé akódhi ni togó lésè. Tà nda ína tà adrélépi móndí 'o atsálé ndí ró dhi 'i.

¹⁹Tako ko, tà adrébhá apfòle móndí kí togó lésè dhi i, tà kònì 'i: tà kònzi kisule dhi i, móndí kí tupfuma ni tà, múná tà, ndotò tà, kugù tà, tà tâma móndí i rú kinzò sè dhi ni tà, ìndì móndí kí rú tâma kònzi dhi ni tà.

²⁰Tà nda kòdhì ì adré móndí kì 'o atsálé ndě ró dhi nì. Di, ngá nyàma drígá dzì àko ró dhi adré ína móndí kì 'o atsálé ndě ró ko. »

Tòkó àlo súrú twá ro dhi ka'ì Yésu báti (À kònò kpà Márökò 7:24-30)

²¹Àmvolásà dhi, Yésu dré àrà nda ni tayízó gò, lìzo tsàle bvò Tírè i làga Sìdónà be dhi na.

²²Di Kànánà tòkó àlo bvò nda lésè dhi dré alìzo akódhì vélé gò, kidhólé adrélé loyóá dhi: «Míri, Dàwídì ni Mvá, mí bhà áma kizà wà! Áma zapi tirí kònzi íbe í léna. Adré kizà nya lavulé. »

²³Di, Yésu logó ína kúlí drá ko. Gò akódhì ni lebèbhá ì dré àyi kì kisízó ànyi akódhì làga, tàá drá dhi: «Mí dro akódhì nzile. Tàko ko, akódhì adré tetrélé àma àmvolésè tò. »

²⁴Yésu logó dhi: «Giká amù ma ngbà 'í Isérélè ànzì avìbhá kabilígyà ì tñi dhi i vélé. »

²⁵Di, tòkó nda dré ína adhézó áyi kórókó titi akódhì kandrá, tazoá drá dhi: «Míri, mí ledé ma wà! »

²⁶Yésu gó logóá dhi: «Kitswá ànzimvá kì mápà dòzo bhèle kòkí ì dré dhi ko. »

²⁷Di, tòkó nda tà drá dhi: «Míri, kònini báti. Di, ndìndì kòkí ì adré àyikya mápà kórónyá adrébhá ledhélé àyi kì líyí ni misá zàle dhi kì nya kòdhya. »

²⁸Yésu logó drá dhi: «Á! Tòkó, mí tà ka'ika'ì íbe kàdrì! Tà nda kò'o ru mí dré ngóró mí dré adrélé lèle dhi tñi. » Di tòkó nda ni zapi dré adrízó gbă lókyá nda sè.

Yésu tìdrí' dràbhá bi' dhi i

²⁹Yésu kòtayí àrà nda dre dhi, dré lìzo tsàle tämpáriandre Gàlìlàyà àdhya làgana. Di dré mbàzo kòngó àlo drìna gó lirilé.

³⁰Gò móndí zyandre lavulé dhi ì dré alìzo túmäní mèrèkpè íbe, mí kùdükùdu íbe, móndí rúbhá be àbvò ro dhi íbe, ábhäbhä íbe, ìndì dràbhá àruka bì dhi íbe, àyi kì tobhà Yésu kandrá. Gò akódhì dré àyi kì tìdrízó titi.

³¹Di móndyá zyandre nda kì líndrí dré gázó bhwäbhwa. Tàko ko, ì nò tá ábhäbhä nda i adrérà'a kúlí ta, móndyá rúbhá be àbvò ro nda i adrérà'a adrílé, mèrèkpè nda i adrérà'a atsí to, ìndì mí kùdükùdu nda i adrérà'a ngá no. Gò ì dré Giká Isérélè ànzì kya ni rú bhàzo kùle.

Yésu fè ngá nyàle móndi' ngùlù-su dhi i dré (À kònò kpà Márökò 8:1-10)

³²Àmvolásà dhi, Yésu dré áyi lebèbhá kì azízó, tazoá àyi dré dhi: «Má adré kizà do áma togó na móndyá zyandre kònì kì tà sè. Tàko ko, àma túmäní àyi íbe kitú na, ìndì ngá ì dré kitswálé nyàle dhi vélé yókódhó. Di má lè àyi kì logolé nzile tòbirí be ko, i kòlandèrò ledhézó láti bhálé ko dhi sè. »

³³Dì akódhì ni lebèbhá ì logó drá dhi: «Àrà bhà àko kònìdhì 'á dhi, mà ni kitswá mápà kisú fèle móndyá zyandre kònì i dré nyàle pìzo ásà dhi ángwà? »

³⁴Yésu lizí àyi tí dhi: «Àmì mápà íbe ángopí? » Ì logó dhi: «Nzi-drì-rì, ìndì kosyá àruka tsàtsà dhi íbe. »

³⁵Gò Yésu dré tàzoá móndyá zyandre nda i dré dhi, i kòlirí bvò dri.

³⁶Dré mápà nzi-drì-rì nda kì adózó kosyá nda íbe, àwoyà fèzo Gìká dré gò, tonjòzoá lanzílé áyi lebèbhá i dré gò, i dré lanzízoá móndyá zyandre nda i dré.

³⁷Dì móndyá tití nda i dré nyàzoá pìzo. Gò akódhì ni lebèbhá i dré àmbí ni kì lokozó gàle kánzì nzi-drì-rì dhi i sè bïbi.

³⁸Àgo ngá nyabhá nda i tá ngùlù-su. (À nà tá tòkó i ànzimvá íbe ko.)

³⁹Gò Yésu dré láti fèzo móndyá zyandre nda i dré nzìzo. Dré mbàzo bwátù na gò, zyàle tsàle bvò Màngàdánà àdhya na.

Màtayò 16

Fàrisayò i Sàdùkáyò i' be dhi i` lizí Yésu tà àlo li' ndri' ga ró dhi ni 'o

(À kònò kpà Márokò 8:11-13; Lükà 12:54-56)

¹Àmvolásà dhi, Fàrisayò i Sàdùkáyò íbe dhi i dré àyi kì kisizó ànyi Yésu làga, kitswálé akódhì ni tabhi. Dì i dré akódhì ni ti lizizó, kò'oró tà àlo líndrígà ró angálépi Gìká vélésè dhi.

²Dì Yésu dré logozá àyi dré dhi: «Ìndró sè, bhù mìbhalé kàdré wà dhi, mì adré tàá dhi: <Kìdrú, kozya kitswá dhile ko. >

³Drùbhì sè, bhù mìbhalé kàdré ngbàràngbàrà ro dhi, mì adré tàá dhi: «Ándrò, kozya ni dhi. » Mì ni kó bhù mìbhalé ni lású lanzílé dhi be dhi, mì kitswá dì àmikya tà adrébhá lókyá twátwa dhi kì tadhá dhi kì ni lanzílé bwà ko àdho tà sè?

⁴Móndyá ándrò adrébhá kònzi ìndì zàràbhù ro dhi i adré tà líndrígà ró dhi ni nda nòle. Dì, à kitswá tà àzya líndrígà ró dhi ni 'o àyi dré nòle dhi ko, kàdré ngbà 'í pròfétà Yónà àdhya 'i ko dhi. » Gò Yésu dré àyi kì tayízó, lìzo.

Tàkú Fàrisayò kya Sàdùkáyò i' be dhi

(À kònò kpà Márokò 8:14-21)

⁵Yésu i lebèbhá ni íbe dhi i kòzya tâpáríandre ni ta'á na dre dhi, lebèbhá ni nda i dré atógyàzoá dhi, i tivì tá mápà dòma atsí na dhi.

⁶Gò Yésu dré tàzoá àyi dré dhi: «Mì kònò dóro, mì kàdréró àmì kì likí tàkú Fàrisayò kya Sàdùkáyò íbe dhi ni tà sè. »

⁷Dì akódhì ni lebèbhá i dré ngàzo adrélé tà kayí àyi kòfalésè adrészò tàá dhi: «Akódhì tà kònini, mà dré mápà adólé ko dhi sè. »

⁸Yésu dré tà ì dré adrélé tâle nda ní nízo kyá gò, tazoá àyi dré dhi: «Àmì tà ka'ika'i íbe tsà ní i, mì adré àmikya tà kayí àmì kòfalésè mì dré adrélé mápà àko dhi sè àdho tà sè?

⁹Mì ní vo dhu rè tà àlo ko? Mì tivì vo àmikya mápà nzi má dré lanzilé móndyá ngùlù-nzi dhi i dré dhi kì tà dre? Mì gò tá àmbí ní kì lokó gàle kánzì ángopí?

¹⁰Mì tivì kókpà àmikya mápà nzi-drì-rì má dré lanzilé móndyá ngùlù-su dhi i dré dhi kì tà dre? Mì gò tá àmbí ní kì lokó gàle kánzì ángopí?

¹¹Mì ní ko tâle dhi, má adré tá mápà tà ta àmì dré kòdhya ko dhi? Di, má tà tá mána dhi: «Mì kàdré àmì kì likí tâkú Fàrisáyò kya Sàdùkáyò íbe dhi ní tà sè. »»

¹²Gò lebèbhá ní i dré nízoá tâle dhi, akodhi adré tá tâá àyi dré dhi, i kàdré àyi kì likí tâkú mápà àdhya ní tà sè ko. Be ró dhi, i kàdré àyi kì likí tà Fàrisáyò i dré tá adrélé tadhálé Sàdùkáyò íbe dhi kì tà sè.

Pétéró tà ngádra 'á dhi, Yésu Mèsi' yà 'i

(À kònò kpà Márokò 8:27-30; Lükà 9:18-21)

¹³Amvolásà dhi, Yésu i dré lìzo tsâle bvò bhàandre Kàyìsàrýà Filípò àdhya làga dhi na. Gò akodhi dré lizizóá àyi tí dhi: «Móndí i adré tâá dhi, ma, Móndí ní Mvá àdhí 'i? »

¹⁴I logó drá dhi: «Móndí àruka i adré tâá dhi, mi Yòwánì Bâtísímò fèlepi 'i. Àruka ní i adré tâá dhi, mi Èlýà 'i. Àruka ní i adré kó tâá dhi, mi Yèrémíyà 'i yà, kó ngalè pròfétà kì àzya 'i yà dhi. »

¹⁵Yésu gò lizia àyi tí dhi: «Di àmì ró dhi, mì adré àmikya tâá dhi, ma àdhí 'i? »

¹⁶Simónà Pétéró logó dhi: «Mì mína Mèsíyà, Giká lídrì ro dhi ní Mváagó 'i. »

¹⁷Yésu gò tâá drá dhi: «Simónà, Yónà ní mvá, Giká bhà tà taní mí dri dre. Àngyá ko, móndí tadhá tà kòdhì mí dré ní ko. Be ró dhi, áma Atá bhù na dhi tadhá mí dré ní. »

¹⁸Má adré kpà tâá mí dré dhi: Mì Pétéró 'i. Má ní Èkélézyà mána ní si kírà kònìdhì dri. Ndìndì dràdrà ní rinyí kitswá ína Èkélézyà nda ní lavú ko.

¹⁹Má ní Òpì bhù àdhya ní lifungulà ànzì kì fe tayílé mí drígá. Tà ángùdhi mí dré dra 'ile kònwa bvò dri dhi, à ní kókpà tà nda ní 'i bhù na. Tà ángùdhi mí dré dra trìle bvò dri dhi, à ní kókpà tà nda ní trì bhù na. »

²⁰Gò Yésu dré áyi lebèbhá nda kì logázó, i kòtadháró dhya àlo dré dhi, i Mèsíyà 'i dhi ko.

Yésu longó áyi dràma ní tà, áyi ngàma dràdrà 'ásè dhi be

(À kònò kpà Márokò 8:31-9:1; Lükà 9:22-27)

²¹Kidholé lókyá nda sè dhi, Yésu dré kidholózó adrélé tadhá áyi lebèbhá i dré dhi, adré tâ lèá dhi, i kòlì Yérusalémà na kitswâlé kizà nya lavûlé Yúdà ànzì kì bhàgo i drígá, kowánà kàdrì i drígá ìndì tátrítrí kúlì tadhâbhá i drígá, à kòpfuró i drâle gò, kítú ní na sè dhi, Giká kòtingáró i dràdrà lésè.

²²Dì Pétéró dré Yésu ni drìzo gàrà dri gò, kidhózó adrélé tà ta akódhi dri, tazoá dhi: «Míri, Giká kòlikí mi! Tà nda kòdhì kitswá tòdzí atsálé mí rú ko! »

²³Dì, Yésu dré áyi alázó tòá Pétéró dré dhi: «Sàtánà, mí nga má milésè gòle má àmvona! Mí adré láti nda áma 'òzo dhèle. Tako ko, mí adré tà kisù Giká àdhyá tíni ko. Be ró dhi, mí adré mína tà kisù móndí kya tíni. »

²⁴Gò Yésu dré tazoá áyi lebèbhá i dré dhi: «Dhya àlo kàdré lèá alile má vésè dhi, lè akódhi nda kòtayí áyi tòndi ni tà, kàdó áyi fa kipakipa gò, kàdréró áma lebè.

²⁵Tako ko, dhya ángùdhi adrélépi áyi tòndi ni lídrì le tòdrílè dhi, a ni áyi lídrì nda ni 'o avile. Dì, dhya ángùdhi adrélépi ína áyi lídrì fe áma tà sè dhi, a ni áyi lídrì nda ni kisù.

²⁶Àngyá ko, dhya àlo kòkisú ngá bvò kòndi àdhyá i tití gò, áyi tòndi ni lídrì tayízó avile dhi, akódhi nda kisù ína àdho tà doro 'i? A ni go àdho ngá fe kòdhya kitswázó áyi lídrì nda ni kisù dhi?

²⁷Tako ko, Móndí ni Mvá ni agò áyi Atá ni mìlanzìlanzì na akódhi ni ángéló ibe gò, dré tà logozó móndí àlo àlo tití i dré, tà i dré 'ole dhi i tí.

²⁸Má adré tà báti ta àmí dré dhi: Móndí àruka adrébhá àyi kí totó kònwa ni i kitswá dràle drìdrì i dré dra Móndí ni Mvá ni nòzo alfrà'a áyi Òpì na dhi kandrá ko. »

Màtayò 17

Yésu ni lású ladzá ru atsálé lagulagu ró

(À kònò kpà Márokò 9:2-13; Lükà 9:28-36)

¹Kítú nzi-drì-àlo àmvolésè dhi, Yésu dré Pétéró kí drìzo Yàkóbhò ibe indi adrúpi ni Yòwáni be gò, i dré lìzo àyi pátí mbàle kòngó àlo mvumvù dhi drìna.

²Kònàle dhi, Yésu ni lású dré ngàzo ru ladzá àyi mìle. Akódhi ni mìbhalé dré kidhózó adrélé lagulé kítú tíni. Akódhi ni kítá i dré kpà atsázó kemve kpírikpíri ngádra tíni.

³Gbà kòdhwa, Mósè i Èlìyà be dhi i dré agázó àyi kandrá, adrélé tà ta Yésu be.

⁴Dì Pétéró dré tazoá Yésu dré dhi: «Míri, doro ni mà dré adrélé kònwa dhi. Mí kàdré lèá dhi, má ni wémà na dhi kí ledé kònwa: àlo ni mí dré, àlo ni Mósè dré, indi àlo ni Èlìyà dré. »

⁵Dré rè dhu adrérà'a tà ta dhi 'á dhi, ndùrùku lagulagu ró dhi dré apfòzo àyi kí asó rùkù gò, kúlí dré apfòzo lásà tòá dhi: «Kònìdhì áma Mváagó má dré lèlé tò dhi 'i. Áma togó adré kinílé akódhi ni tà sè tò. Mì kòyi akódhi! »

⁶Yésu ni lebèbhá i kòyi kúlí nda dre dhi, àyi kí togó dré gàzo tirì sè bì gò, i dré ledhézo àyi kí mìbhalé bha kìní mi.

⁷Dì, Yésu dré ína áyi kisizó ànyi àyi làga, àyi kí tabè gò, tazoá àyi dré dhi: «Mì nga! Mì ro ngá ko. »

⁸I kòtingá mì dre dhi, i dré gòzo vélé móndí àzya no ko, ngbà 'í Yésu 'i kalóma.

⁹Ì dré tá adrérà'a asilé kòngó nda drilésè dhi 'á dhi, Yésu dré lazizóá àyi dri dhi: «Mì kòlongó tà agálépi àmì mìle kòdhì dhya àlo dré ko, tsàle lókyá Gìká dré dra Móndí ni Mvá ni tingázó dràdrà lésè dhi 'á. »

¹⁰Gò akodhì ni lebèbhá nda ì dré akodhì ni lizizó tazoá dhi: «Tátrítrí kúlí tadhábhá ì adré taa dhi, lè Èlìyà kàlì rè zyà Mèsiyà kandrá 'iká àdho tà sè? »

¹¹Yésu logó àyi dré dhi: «Tà báti ró dhi, Èlìyà adré alìle tà tití dhi kí ledé.

¹²Dì, má adré mána taa àmì dré dhi: Èlìyà atsá dre. Dì, móndí ì ni tá àyikya akodhì àdhi 'í ya dhi ko. Gò ì dré akodhì ni 'ozo ngóró ì dré taa lèle dhi tíni. Dì Móndí ni Mvá ni kókpà kizà nya àyi drigá kònini. »

¹³Dì Yésu ni lebèbhá ì dré nizoá tale dhi, akodhì adré tá Yòwánì Bâtisimò fèlepi ni tà ta àyi dré kòdhya.

Yésu tìdrí` mváagó àlo tiri` kònzi i` be i` léna dhi

(À kònò kpà Márokò 9:14-29; Lükà 9:37-43a)

¹⁴Ì kògò tsàle móndyá zyandre ì véna dre dhi, agó àlo dhi dré alìzo adhélé áyi kórókó titi Yésu kandrá,

¹⁵tazoá dhi: «Míri, mí bhà áma mváagó ni kizà wà! Agililí adré akodhì ni lebhé, ìndì akodhì adré kizà nya tò. Vésè be bì, adré ledhélé àtsí na, kó ngalè yí na.

¹⁶Má drì tá akodhì lìzo ába àmì lebèbhá ì véna. Dì, ì kitswá tá àyikya akodhì ni tìdrí bwà ko. »

¹⁷Dì Yésu logó dhi: «Àmì, móndyá ándrò tà ka'ika'ì àko ìndì àmì kí tayibhá litlé ni i, mà ni adré vélé àmì íbe vwàle lókyá be ángopí? Má ni àmì kí tà mvo vwàle lókyá be ángopí? Mì adrì mvámvá nda alìzo ába má vélé. »

¹⁸Dì ì kàlì akodhì be dre dhi, Yésu dré ligizó tiri kònzi akodhì lé dhi be gò, dré dròzoá pfôle lásà. Dì mvámvá nda dré adrízó gbä lókyá nda sè.

¹⁹Àmvolásà dhi, Yésu ni lebèbhá ì dré àyi kí kisizó àyi pátí ànyi akodhì làga, akodhì ni lizí tazoá dhi: «Mà kitswá tá tiri kònzi nda kònàdhì ni dro bwà ko àdho tà sè? »

²⁰Yésu logó àyi dré dhi: «Mì kitswá tá bwà ko, mì dré adrélé tà ka'ika'ì íbe tsà dhi sè. Má adré tà báti ta àmì dré: Mì kàdré tà ka'ika'ì íbe tsàmvá ngóró mütadì lò'wa tíni dhi, mì ni kitswá taa kòngó kònìdhì dré dhi <Mí kisí mì kònwasé lìle kònàle> gò, kòngó nda dré áyi kisizó. Dì tà àlo mì dré kitswálé 'ole bwà ko dhi ni adré yókódhó. » [²¹]

Yésu gò áyi dràma ni tà longó, áyi ngàma dràdrà lésè dhi be

(À kònò kpà Márokò 9:30-32; Lükà 9:43b-45)

²²Kítú àlo dhi, Yésu ì lebèbhá ni íbe dhi ì kimó tá ru bvò Gàlliyà àdhyá na. Gò akodhì dré tazoá àyi dré dhi: «À ni Móndí ni Mvá ni lefè kàribhá ì drigá.

²³Ì dré akodhì ni pfùzo dràle gò, kítú ni na sè dhi, Gìká dré akodhì ni tingázó dràdrà lésè. » Dì kúlí nda sè dhi, akodhì ni lebèbhá kí togó dré gào kizà sè bì.

Mèdáyi` tépelò àdhyá ni gi` ma

²⁴Àmvolásà dhi, Yésu i lebèbhá ni íbe dhi i dré lìzo tsàle Kàpàrànàwumà na. Gò dhya adrébhá tá mèdáyì tépelò àdhya ni lagí dhi i dré alìzo Pétéró vélé lizá tia dhi: «Àmi kí tadhálépi adré mèdáyì tépelò àdhya ni gi? » ²⁵Pétéró logó àyi dré dhi: «Àyíya, akodhi adré giá. » Pétéró kogò file dzó na dre dhi, Yésu dré zyà kúlì dòzo tâle ni. Tà dhi: «Símónà, mí kisù mína ngini? Ópí bvò kòndi àdhya i adré àdhimbahá kí 'o adrélé mèdáyì gi dhi kòdhya: àyi kí tândi kí ànzì i, kó ngalè, móndi àruka àyi kí opì zâle dhi i? »

²⁶Pétéró logó dhi: «Móndi àruka i. » Yésu gò tâá drá dhi: «Kàdré dí kònini dhi, ópí kí ànzì nda i kitswá àyikya giá ko.

²⁷Dí, má lè mána móndyá kòna kí togó 'ole aswálé àma rú ko. Ásà dhi, mí lì kosyá bhe tâpáríandre na. Mí adó kosyá mí dré dra asélé drìdrì dhi, sibhálé ni ni nzìzo gò, làfa lò'wa àlo dhi ni kisúzó sîlâna. Dí mí do làfa lò'wa nda lìzo ába àyi véna mèdáyì gi àma dré mí be. »

Màtayò 18

Dhya kàdrì ` lavúlé Òpì ` bhù àdhya na dhi àdhì 'i?

(À kònò kpà Márokò 9:33-37; Lükà 9:46-48)

¹Lókyá nda sè dhi, Yésu ni lebèbhá i dré àyi kí kisizó ànyi akodhi làga, akodhi ni lizí tâzoá dhi: «Dhya kàdrì lavúlé Òpì bhù àdhya na dhi àdhì 'i? »

²Dí Yésu dré mvámvá àlo dhi ni azizó bhale àyi kí kító 'á gò,

³tâzoá dhi: «Má adré tà bâti ta àmi dré: Mì kòladzà àmi kí togó atsázó ànzimvá i tîni ko dhi, mì kitswá tâdzí file Òpì bhù àdhya na ko.

⁴Dí dhya ángùdhi adrélépi áyi tà bha kîní mi ngóró mvámvá kònìdhi àdhya tîni dhi, ni adré dhya kàdrì lavúlé Òpì bhù àdhya na dhi 'i.

⁵Kòdhì íbe dhi, dhya ángùdhi adrélépi mvámvá kònìdhi tîni dhi ni ka'i dôle dôro áma rú sè dhi, adré áma tândi ni ka'i kòdhya. »

Tà adrébhá móndi` kí 'o ledhélé tâkonzi` na dhi i

(À kònò kpà Márokò 9:42-48; Lükà 17:1-2)

⁶«Dí, dhya àlo kàdré ína ànzimvá adrébhá áma ka'i kònì kí àlo 'o dhèle tâkonzi na dhi, dôro ni tá kírà kàdrì 'ile akodhi nda kembé gò, akodhi ni bhèzo drâle yíandre ni tâlí na dhi.

⁷Kizà vo ngini bvò kòndi dri, tà adrébhá móndi kí 'o ledhélé tâkonzi na dhi kí tà sè dhi! Tà bâti ró dhi, tà nda kòdhì kí ngbú adré be. Dí, kizà ni adré kàdrì dhya ángùdhi adrélépi tà nda kí àndu bha dhi dré!

⁸Ámi drígá 'i yà, kó ngalè ámi pá 'i yà dhi kàdré ámi 'o dhèle tâkonzi na nì dhi, lè mí kòli akodhi nda bhèle mí rúsè vwàvvà ro. Àngyá ko, mí dré file lídrì kóná vésè kolyá dhi na ngbà 'i drígá be àlo yà, kó ngalè pá be àlo yà dhi dôro lavúlé, ámi bhèle atsí adrélépi adrálé ko dhi na drígá be rì ìndi pá be rì dhi rúsè.

⁹Ámì mì kàdré kó ámì 'o dhèle tàkonzì na nì dhì, lè mí kàngí mì nda bhèle mí rúsè vwàvwà ro. Àngyá ko, mí dré fîle lídrì na ngbà 'í mì be àlo dhì dôro lavûlé, ámì bhèle àtsí líferò àdhya na mì be rì dhì rúsè. »

Pi' dhì gó kâbilígyà avi` lepi dhì ni tà dri dhì

(À kònò kpà Lúkà 15:3-7)

¹⁰«Mì kònò dôro, mì kàdréró ànzimvá kònì kì àlo no móndí tâko ró ko. Tako ko, má adré tàá àmì dré dhì: Àyi nda kì ángéló ì adré ngbú áma Atá bhù na dhì nì mibhalé no. [¹¹] »

¹²Mì kisù àmikya ngíni? Agó àlo kàdré kâbilígyà íbe nyadhi-nzi gò àyi kì àlo dré avìzo dhì, a nì 'òá ngíni? A nì zakó tsì kâbilígyà nyadhi-su-drì-mudrì-drì-nzi-drì-su nda kì tayí kòngó drìna gò, lìzo akódhì avìlepi nda nì ndabe.

¹³Má adré tà bâti ta àmì dré: Kòkisú kâbilígyà nda dre dhì, a nì lenzé akódhì nì tà sè lavûlé, dré adrélé lenzélé kâbilígyà nyadhi-su-drì-mudrì-drì-nzi-drì-su avìbhá ko nda kì tà sè dhì rúsè.

¹⁴Kókpà kòdhì tíni, àmì kì Atá bhù na dhì adré lèá ko, ànzimvá kònì kì àlo dré avìle dhì. »

Ámì adrúpi tàkonzì ` 'olepi mí` rú dhì ni tà

¹⁵«Ámì adrúpi àlo dhì kò'o tàkonzì mí rú dhì, mí kòlì rè zyà kalóma akódhì véna, akódhì nì tàkonzì nda nì tadhá drá. Akódhì kòyi mí dhì, kòdhì mí gò ámì adrúpi nda nì kisú dre.

¹⁶Dì, kòyi ína mí ko dhì, mí kòdrì móndí àlo yà, ngalè rì yà dhì, mì kòlìrò akódhì véna, «kitswálé tà tití dhì kì bvó lanzí móndí rì yà kó ngalè na yà tà nda kì nobhá mí sè dhì kì kúlí sè. » ¹⁷Akódhì kògà àyi nda kì yìma rè dhì, mí kòlì tà nda nì ta Èkèlézyà kandrá. Kògà ndìndì Èkèlézyà nda nì kúlí yìma rè dhì, mí kàdré akódhì nì no pagánò tíni, kó ngalè mèdáyì lagílépi tíni.

¹⁸Má adré tà bâti ta àmì dré: Tà ángùdhì mì dré dra 'ile kònwa bvò dri dhì, à nì kókpà tà nda nì 'i bhù na. Tà ángùdhì mì dré dra trìle bvò dri dhì, à nì kókpà tà nda nì tri bhù na.

¹⁹Má adré kpà tàá àmì dré dhì: Mónđí rì àmì kòfalé bvò dri dhì ì kàdré ru yi, tà ángùdhì ì dré adrélé zìle áma Atá bhù na dhì tí dhì dri dhì, akódhì nì tà nda nì 'o àyi dré.

²⁰Àngyá ko, àrà ángùdhì móndí rì yà, ngalè na yà dhì ì dré adrészò ru kìmó áma rú sè dhì na dhì, ma kókpà túmâní àyi íbe. »

Tàkonzì ` trìma àma kòfalésè dhì

²¹Gò Pétéró dré áyi kisízó ànyi Yésu làga, akódhì nì lizí tàzoá dhì: «Míri, áma adrúpi kàdré tàkonzì 'o má rú dhì, má nì akódhì nì tàkonzì tri tsàle vésè be ángopí? Tsàle vésè be nzi-drì-ri? »

²²Yésu logó drá dhi: «Kóko! Má adré tàá mí dré dhi, tsàle vésè be nzi-drì-rì dhi ko. Be ró dhi, mí kàdré akódhi ni tàkonzì tri tsàle vésè be nyadhi-na-drì-mudrí vésè be nzi-drì-rì. »

Pi' dhi' gó màrabà áyi àzízí¹ ni kizà bhàlepi ko dhi ni tà dri dhi

²³«Tà nda sè dhi, Òpì bhù àdhyà sù ngóró tà kònìdhi tini: Ópì àlo dhi lè tá áyi màri áyi màrabà i rú dhi ki tà 'ole akílé.

²⁴Dì kòkidhó adrélé áyi màri nda ki tà 'o dre dhi, à dré màrabà àlo adrélépi tá màri kàdrì lavulé dhi íbe i rú dhi ni adrìzo alìzo ába akódhi vélè. Màri akódhi nda rú dhi tá làfa lò'wa ngùlù-mudrí. ²⁵Dì màrabà nda dré tá kitswálé ngá logó màri nda tí bwà ko dhi sè dhi, míri ni dré tolí fèzo tazoá dhi, à kòlagí akódhi, tòkó ni, ànzimvá ni i, tsàle akódhi ni ngá tití dhi íbe, kitswázó màri nda ni logó.

²⁶Dì màrabà nda dré dhèzo áyi kórökó titi áyi míri kandrá, tazoá drá dhi: «Mí tadhá ámi togó vwàvvà má vélè wà! Má ni ámi màri logó mí dré tití. »

²⁷Dì míri ni dré akódhi ni kizà bhàzo gò, màri nda ni tà tayízó, akódhi ni tändi ni tayízó kpà lile.

²⁸Dì, màrabà nda kòpfò dre dhi, dré ína lìzo áyi àzízì àlo áyi màri íbe làfa lò'wa nyadhi-nzi dhi ni kisú. Dré akódhi ni rùzo bèle kembe 'á, adrészó akódhi ni kizí, adrészó tàá dhi: «Mí logó áma màri mí rú dhi! »

²⁹Àzízì ni nda dré dhèzo áyi kórökó titi akódhi kandrá, akódhi ni ti lizízó tazoá dhi: «Mí tadhá ámi togó vwàvvà má vélè wà! Má ni ámi màri logó. »

³⁰Dì, màrabà nda ka'i tá kúlí nda ko. Be ró dhi, lì ína áyi àzízì nda ni 'o bhèle bădzó na, kòlogoró màri i rú nda akílé tití be dhi bvó.

³¹Dì màrabà àruka i kònò tà nda dre dhi, àyi ki togó dré kizà nyàzo tò. Gò i dré lìzo tà tití lavúbhá nda ki tití àyi ki míri dré.

³²Dì míri nda dré màrabà nda ni azízó, tazoá drá dhi: «Mí màrabà kònzi ni, má tayí tá áma màri mí rú dhi, mí dré áma ti lizilé dhi sè.

³³Adré dì tá kpà lèá dhi, mí kòbhà ámi àzízì ni kizà, ngóró má dré ámi kizà bhàle dhi tini. »

³⁴Dì togóaswa dré dhi, míri ni dré akódhi ni fèzo bădzó likibhá i drígá, i kàdréró akódhi ni rúbhá 'o aswálé, tsàle lókyá dré màri i rú nda ni logorà'a akílé tití dhi 'á. »

³⁵Yésu gò tàá dhi: «Áma Atá bhù na dhi ni kókpà àmì àlo àlo tití dhi ki 'o kònìnì, mì kàdré àmì ki adrúpi ki tàkonzì tri togó wäyi sè ko dhi. »

Màtayò 19

Yésu tadhá tà tòkó tingama ni tà dri

(À kònò kpà Márökò 10:1-12)

¹Yésu kòtà tà nda i akílé dre dhi, dré ngàzo Gàlliyà lésè, lile bvò Yùdáyà àdhyà na, Yòròdánè ni ta'á na.

²Móndí zyandre lavúlé dhi i dré akódhi ni lebèzo gò, dré àyi kí dràbhá kí tidrizó.

³Gò Fàrisayò àruka i dré àyi kí kisizó ànyi akódhi làga, kítswálé akódhi ni tabhì litilé. Dì i dré lizizóá tíá dhi: «Àma kí tátrítrí kúlí ka'i, agó kòtingá áyi tòkó tà ángùdhi dré adrészó akódhi ni le tingálé ásà dhi sè dhi 'i? »

⁴Yésu logó dhi: «Mì nà rè Gíká ni Kúlí na ko tâle dhi, ngá tití dhi kí kídhoma 'á dhi, «Gíká ngá tití dhi kí bhalepi dhi bhà tá àyi agó i tòkó be» dhi? ⁵Gíká tà tá kpà dhi: «Ásà dhi, agó ni áyi atá ni tayí áyi andre be, ru amúzó áyi tòkó be gò, àyi rìti nda i dré atsázó rúbhá àlo ró. » ⁶Dì i gò vélé adrélé rì ko. Be ró dhi, àyi ngá àlo 'i. Ásà dhi, lè móndí i kòlanzí ngá Gíká dré amulé nì dhi ko. »

⁷Fàrisayò nda i gò lizia tíá dhi: «Kàdré kònini dhi, Mósè fè tá di tòlì tazoá dhi, agó adrélépi áyi tòkó ni le tingálé dhi kòfè wárágà drá akódhi ni tingázó gò, mùzoá nzile dhi àdho tà sè? »

⁸Dì Yésu logó àyi dré dhi: «Mósè ka'i tá ína àmì kí tòkó kí tingama, àmì kí togó dré adrélé tòmbátòmba dhi sè. Dì, tà nda tá ína kònini kídhoma lésè ko.

⁹Má adré tâá àmì dré dhi: Kàdré ngbà 'í ndòtò tà sè ko dhi, agó ángùdhi áyi tòkó ni tingalépi gò gòzo tòkó àzya adó môle dhi, adré ína múná tà 'o. »

¹⁰Yésu ni lebèbhá i dré tazoá drá dhi: «Agó ni tà tòkó ni be dhi kàdré kònini dhi, doro ni làmò môle ko dhi. »

¹¹Yésu logó àyi dré dhi: «Móndyá tití dhi i kítswá kúlí kòdhì ni ka'i bwà ko. Ngbà 'í àyi Gíká dré rinyí fèzo àyi dré dhi kí kítswá ka'ia dhi àyi.

¹²Tako ko, tà twátwa àgo i dré adrészó làmò mo ko dhi i be. Àruka ni i, à ti àyi adrélé làmò lovó àko gò i dré atsázó ùníkì i ró. Àruka ni i, móndí 'o àyi atsálé ùníkì i ró dhi nì. Àruka ni i gá kó làmò atsázó ùníkì i ró, adrélé àyi kí fe Gíká ni Òpì ni tà 'o. Dhya ángùdhi kítswálépi kúlí nda ni ka'i dhi, kàdré ka'ia! »

Yésu zi tà taní Gíká tí ànzimvá i dri (À kònò kpà Márokò 10:13-16; Lükà 18:15-17)

¹³Àmvolásà dhi, móndí i dré àyi kí ànzimvá kí adrìzo alìzo àyi íbe Yésu vélé, kòbhàró drígá àyi dri, tà zizo Gíká tí àyi dré be dhi bvó. Dì, akódhi ni lebèbhá i dré àyikya lawàzo móndyá nda i dri tà nda sè.

¹⁴Dì, Yésu dré tazoá dhi: «Mì tayí ànzimvá kònì i alìle má vélé. Mì logá àyi ko. Àngyá ko, Òpì bhù àdhyá móndyá adrébhá àyi nda i tini dhi i dré. »

¹⁵Dré drígá bhàzo àyi dri, tà taní zizo àyi dré gò, lìzo.

Yésu i kàdhúrà àlo ngá líyí ro dhi be dhi (À kònò kpà Márokò 10:17-31; Lükà 18:18-30)

¹⁶Àmvolásà dhi, kàdhúrà àlo dhi dré àyi kisizó ànyi Yésu làga, akódhi ni lizí tazoá dhi: «Tadhálépi, lè má kò'o àdho tà doro kòdhya kítswázó lídrì kóná vésè kólyá dhi ni kisú dhi? »

¹⁷Yésu logó drá dhi: «Mí adré áma lizí tà dóro ní tà dri àdho tà sè? Dhya adrélisépi dóro dhi ngbà 'í àlo kwákwá. Dí, mí kàdré lídrì kóná vésè kólyá dhi ní le kisulé dhi, lè mí kàdré tà tátrítrí kúlí dré adrélisépi tâle à kò'o dhi kí 'o. »

¹⁸Kàdhúrà nda gò lizíá dhi: «Tà ángùdhi? » Yésu gò logóá dhi: «Lè mí kòpfu móndí dràle ko. Mí kò'o múná tà ko. Mí kòkugù ngá ko. Mí kòtà tà móndí rú kinzò sè ko.

¹⁹Mí kàdré ámi atá ní líndrì bha ámi andre be. Mí kàdré ámi àzya ní le ngóró mí dré adrélisépi tândi ní le dhi tíni. » ²⁰Kàdhúrà nda tà drá dhi: «Má líkí tolí nda kòdhí i tití. Lè dí má kògò àdho tà 'o kòdhya? »

²¹Dí Yésu logó drá dhi: «Mí kàdré lèá ámi tà kàdré dóro kitswálé tití Gíká milésè dhi, mí lì ámi ngá tití dhi kí lagí gò, làfa ní ni lanzízó lemerèbhá i dré, mí kàdréró ngá làgí be kàdrì dhi íbe bhù na. Dí mí alì adrélisépi áma lebè. »

²²Kàdhúrà nda kòyi kúlí nda i dre dhi, dré ngàzo lile kizà be tò, dré tà adrélisépi ngá íbe zyandre ró dhi sè.

²³Gò Yésu dré tâzoá áyi lebèbhá i dré dhi: «Má adré tà bâti ta àmi dré: Ngá lîyí ní fîma Òpì bhù àdhya na dhi kòkóròko.

²⁴Má adré góle tâá àmi dré dhi: Ngá lîyí ní fîma Gíká ní Òpì na dhi ína kòkóròko lavûlé, kàmílò dré lavûlé sindánì ní bhâlé 'ásè dhi rûsè. » ²⁵Dí akodhi ní lebèbhá i kòyi tà nda dre dhi, àyi kí líndrì dré gâzo bhwâbhwa gò, i dré adrészó lizíá àyi kòfalésè dhi: «Kàdré kònini dhi, àdhi ní kitswá lídrì kóná vésè kólyá dhi ní kisú nñ? »

²⁶Yésu dré àyi kí nòzo dìi gò, tâzoá àyi dré dhi: «Móndí i milésè dhi, tà nda kòdhí tà kitswálé 'ole bwà ko dhi 'i. Dí, Gíká milésè dhi, tà àlo kitswálé 'ole bwà ko dhi yókôdhó. »

²⁷Gò Pétéró dré tâzoá drá dhi: «Mí nò rè ká! Mâ tayí tà tití dhi i adrészó ámi lebè. Mâ ní dí àdho tà dóro kisú ásà kòdhya? »

²⁸Yésu gò logóá dhi: «Má adré tà bâti ta àmi dré: Bvò tídhí ro dhi na dhi, lókyá Móndí ní Mvá dré dra lirízó áyi lirírâ òpì àdhya mìlanzìlanzi ro dhi dri dhi tú dhi, àmi áma lebèbhá ní kí kókpà lirí lirírâ mudrí-drì-rì adrészó òpì nya dhi i drîsè, adrélisépi ànzi kí súrú mudrí-drì-rì dhi kí tâbvo ta.

²⁹Dhya ángùdhi áyi dzó i 'i yà, áyi adrúpi i 'i yà, áyi amvúpi i 'i yà, áyi atá 'i yà, áyi andre 'i yà, áyi ànzi i 'i yà, kó ngalè áyi amvú i 'i yà dhi kí tayílépi áma tà sè dhi, a ní ngá nda kí vúdrì kisú tsâle vésè be nyadhi-nzi. Kòdhí íbe dhi, a ní kókpà lídrì kóná vésè kólyá dhi ní kisú tâyilé ro.

³⁰Dí, móndí bî adrêbhá drìdrì nyànomvá dhi kí go adrélisépi bvólé ro. Móndí bî adrêbhá bvólé ro nyànomvá dhi kí go adrélisépi drìdrì. »

Màtâyò 20

Pi' dhi' gó àzí 'obhá vínò amvú na dhi kí tà dri dhi

¹Yésu gò tàá dhi: «Òpì bhù àdhya sù ngóró tà kònìdhi tñi: Amvú líyí àlo dhi pfò tá drùbhì kínó kitswálé móndí kí nda dôle àzí 'o áyi vínò amvú na.

²Kòkisú móndí àruka i dre dhi, ì dré ru yìzo àyi íbe, akódhi kòfèrò làfa lò'wa àlo àlo àyi àlo àlo tití i dré àzí 'ole kítú àlo sè dhi tí. Dré àyi kí mùzo lìle àzí 'o áyi vínò amvú na.

³Sáà nzi-drì-su drùbhì àdhya sè dhi, dré gòzo pfòle ngá lagírà na, móndí àruka kí no adrérà'a àyi kí totó àngyá gò,

⁴dré tazoá àyi dré dhi: «Àmi, mì lì kókpà àzí 'o áma vínò amvú na. Má ni go làgí gyágya dhi ni fe àmì dré. »

⁵Dì ì dré ngàzo lìle. Kítú rírí sè, ìndì sáà na kítú rírí àmvolésè dhi sè dhi, amvú líyí nda dré gòzo pfòle 'òá kònìnì.

⁶Sáà nzi ìndró àdhya sè dhi, dré gòzo tódyá pfòle móndí àruka kí kisú adrérà'a àyi kí totó àngyá gò, dré tazoá àyi dré dhi: «Mì adré àmì kí totó kònwa àngyá kítú ndile àdho tà sè? »

⁷Ì logó drá dhi: «Àma kònwa, à dré àma kí zile àzí 'o ko dhi sè. » Dì akódhi tà àyi dré dhi: «Àmi, mì lì kókpà àzí 'o áma vínò amvú na. »

⁸Ìndró kàndrì dre dhi, amvú líyí nda dré tazoá dhya adrélépi tá áyi àzí 'obhá kí drì ko dhi dré dhi: «Mí azí àzí 'obhá i, làfa fèzo àyi dré àyi kí àzí sè. Mí kidhó rè zyà àyi dôle kùdù ro dhi i vélésè 'íká, gò mí kògòrò lavulé àyi dôle drìdrì dhi i véna ndò. »

⁹Àzí 'obhá dôle sáà nzi ìndró àdhya sè nda ì kàtsá dre dhi, àyi àlo àlo tití dhi ì dré làfa lò'wa kisúzó àlo àlo.

¹⁰Dì àyi dôle drìdrì nda ì kàtsá dre dhi, ì adré tá kisùá dhi, ì ni tá làfa kisú bì lavulé. Dì, àyi àlo àlo tití dhi ì dré kpà làfa lò'wa kisúzó àlo àlo.

¹¹Ì kòkisú làfa lò'wa nda i dre dhi, ì dré dhèzo adrélé amvú líyí nda ni ndri,

¹²adrézó tàá dhi: «Dhya dôle kùdù ro kòdhì ì 'o àzí ngbà 'í sáà àlo. Dì, mí fè mína làfa àyi dré ngóró mí dré afèle àma dré dhi pí, tágba mà dré àzí 'òzo landèzo kítú àtsí sè kítú ndile dhi! »

¹³Dì, amvú líyí nda logó àyi kí àlo dré dhi: «Áma arúpi, má 'o mi kònzi ko. Mì yi tá tsì ru mí be, mí kò'oró àzí làfa lò'wa àlo sè dhi ko?

¹⁴Mí do dì làfa mína lìzo ába. Má adré mána làfa le fèle dhya dôle kùdù ro dhi ì dré ngóró má dré fèle mí dré dhi pí.

¹⁵Má kitswá mána tà má dré adrélé lèle 'ole áma làfa sè dhi ni 'o ko? Mí adré kó mína áma no mi kònzi sè, má dré adrélé móndí kí 'o doro dhi sè? »»

¹⁶Dì Yésu go tàá dhi: «Mónyá adrébhá bvólé ro dhi kí go adrélé drìdrì. Mónyá adrébhá drìdrì dhi kí go adrélé bvólé ro. »

Yésu gò tódyá áyi dràma ni tà longó, áyi ngàma dràdrà 'ásè dhi be

(À kònò kpà Márökò 10:32-34; Lükà 18:31-34)

¹⁷Yésu ì dré tá adrérà'a mbàle Yèrúsalémà na dhì 'á dhì, akódhì dré àyi lebèbhá mudrí-drì-rì dhì kì drìzo gàrà dri gò, tàzoá àyi dré dhì:

¹⁸«Mì yi rè ká! Mà adré mbàle Yèrúsalémà na. Kònàle dhì, à ni Móndí ni Mvá ni lefè kòwánà kàdrì i drígá tátrítrí kúlí tadhábhá íbe. È dré tà ñòzo akódhì dri kitswálé dràdrà sè gò,

¹⁹akódhì ni fèzo pagánò i drígá. Àyi nda ì dré akódhì ni gùzo, tswàzoá gò, tidízóá dràle fa kipakipa dri. Dì kitú ni na sè dhì, Giká dré akódhì ni tingázó dràdrà lésè. »

Tà Yàkóbhò kì andre Yòwáni` be dhì dré zile Yésu tí dhì

(À kònò kpà Márokò 10:35-45)

²⁰Àmvolásà dhì, Zèbèdáyò ni tòkó i ànziàgo ni íbe dhì ì dré àyi kì kisizó ànyi Yésu làga. Gò tòkó nda dré dhèzo àyi kórókó titì akódhì kandrá, kitswázó tà zi tíá be dhì bvó.

²¹Yésu tà drá dhì: «Mí adré àdho tà le zile má tí? » Akódhì logó drá dhì: «Mí kòlazí kúlí tayílé, áma ànziàgo rì ni ì kòliríró mí làga ámi Òpì na: àlo ni ámi dríágó lésè, àzya ni ámi lìdzí lésè. »

²²Yésu logó àyi dré dhì: «Mì ni tà mì dré adrélé zile kòdhì ko. Mì ni kitswá tsì kópò kizà àdhyà má dré adrélé 'ole mvùle dhì ni mvu bwà? » È logó drá dhì: «Mà ni kitswá. »

²³Dì Yésu tà àyi dré dhì: «Tà báti ró dhì, mì ni kópò mána ni mvu. Dì, kàdré ína móndí dra bhàle lirílé áma dríágó lésè yà, kó ngalè áma lìdzí lésè yà dhì kì tà sè dhì, tà nda kòdhì nò ma ko. Áma Atá ledé lirírà nda i dhya dré kipèle kitswálé lirílé driá dhì ì dré. »

²⁴Yésu ni lebèbhá mudrí àruka i kòyi tà zile nda dre dhì, àyi kì togó dré aswázó adrúpi rì nda i rú.

²⁵Dì Yésu dré àyi kì azizó tití gò, tàzoá àyi dré dhì: «Mì ni tâle dhì, móndyá bvò kòndí àdhyà kì kàdrì i adré àyikya òpì nya àyi dri rìnyí sè dhì be. Àyi kì dhya kàdrìkàdrì dhì i adré kpà tà 'o adrészó àyi kì rìnyí tadhá àyi dré.

²⁶Dì, adré lèá dhì, tà nda kàdré kònìnì àmi kòfalé ko. Be ró dhì, lè dhya ángùdhi adrélépi lèá atsálé kàdrì àmi kòfalé dhì, kàdré àmi kì mårábà ro.

²⁷Lè kpà dhya ángùdhi adrélépi lèá adrélé drìdrì àmi kòfalé dhì, kàdré àmi kì mårábà ro.

²⁸Kókpà kòdhì tini, Móndí ni Mvá alì bvò dri, móndí i kàdréró tà 'o i dré dhì bvó ko. Be ró dhì, alì ína kitswálé tà 'o móndí i dré dhì bvó. Alì kpà kitswálé áyi lídrì fe ngóró làgí kàdrì fèle móndí zyandre dhì kì apázó tàkonzi lésè dhì tini. »

Yésu tidri` àgo rì mì kùdúkùdu ró dhì i

(À kònò kpà Márokò 10:46-52; Lükà 18:35-43)

²⁹Yésu ì dré tá adrérà'a apfòle bhàandre Yèríkò àdhyà lésè dhì 'á dhì, móndí zyandre lavulé dhì i adré tá alìle akódhì vésè.

³⁰Dì àgo rì mì kùdúkùdu ró liríbhá láti làga dhi ì kòyi Yésu adré tá lavúlé dhi dre dhi, ì dré ngàzo adrélé loyóá dhi: «Míri, Dàwídì ni Mvá, mí bhà àma kí kizà wà! »

³¹Móndyá zyandre nda ì dré adrészó tetrélé àyi dri, ì kòtayíró kúlí adrészó kíri. Dì, ì dré gòzo vélé adrélé kúlí loyó wáláká ni ni lavú: «Míri, Dàwídì ni Mvá, mí bhà àma kí kizà wà! »

³²Gò Yésu dré áyi kikízó, àyi kí azí lizízóá àyi tí dhi: «Mì adré lèá má kò'o àmí dré àdho tà kòdhya? »

³³Ì logó drá dhi: «Míri, àma kí mì kònzi ru adrélé ngá no! »

³⁴Dì Yésu dré kizà dòzo áyi togó na àyi kí tà sè gò, dré àyi kí mì tabèzo. Gbă kòdhwa, ì dré kidhózó adrélé ngá no gò, ì dré ngàzo adrélé akódhi ni lebè.

Màtáyò 21

Yésu fi Yérusalémà na ópí tí ni

(À kònò kpà Márokò 11:1-11; Lükà 19:28-40; Yòwáni 12:12-19)

¹Yésu ì dré tá adrérà'a 'ole tsàle Yérusalémà na dhi 'á dhi, ì dré tsàzo ànyi bhà rú zile Bètèfágè dhi kandrá, ànyi kòngó Òlívè fa kya làga. Gò Yésu dré áyi lebèbhá rì dhi kí mùzo lìle drìdrì,

²tazoá àyi dré dhi: «Mì lì bhà àmí kandrá kònàdhí léna. Kònàle dhi, mì ni ndiri púndà 'ile dhi kí kisú, mvámvá ni be. Mì atrì àyi, alìzo àyi íbe má vélé.

³Dhya àlo kòlizí tà àmí tí dhi, mì kòtà drá dhi: «Míri adré lèá nì. » Dì akódhi ni ndiri púndà nda kí tayí mì dré alìzo àyi íbe. »

⁴Tà nda kòdhí atsá kònìnì, kítswálé tà longólé pròfétà tí dhi kò'oró ru be dhi bvó. Akódhi longó tá dhi:

⁵«Mì kòtà zapi Sìyónà àdhya dré dhi: «Mí nò ká! Ámí ópí adré alìle mí vélé. Akódhi ni togó yàyà, ìndì lirí ína púndà dri, púndà ni mvámvá dri. » »

⁶Gò Yésu ni lebèbhá rì nda ì dré lìzo 'òá ngóró dré tâle àyi dré dhi tini.

⁷Ì kàsé púndà nda ì mvámvá ni be atsázó àyi íbe Yésu vélé dre dhi, ì dré àyi kí kítá bhèzo àyi dri gò, akódhi dré mbàzo lirílé drìá.

⁸Gò móndí zyandre lavúlé dhi ì dré àyi kí kítá kí lasézó láti mísè. Àyi kí àruka ì dré fa bí kí tonjòzo lebhélé láti mísè, Yésu kòlavúró drìásà be dhi bvó.

⁹Dì móndí zyandre nda ì dré adrészó lìle akódhi kandrána ìndì akódhi vésè, adrélé loyóába dhi: «Òsánà kàdré Dàwídì ni Mvá dré! Tà taní kàdré dhya adrélépi alìle Míri ni rú sè dhi dri!

Òsánà kàdré Gíká kurú na bhù na dhi dré! »

¹⁰Yésu kòfì Yérusalémà na dre dhi, móndí títí bhàandré nda lé dhi ì dré adrészó lyàle lyàlyà, adrészó lizíá àyi kòfalésè dhi: «Dhya kòdhí àdhi 'í? »

¹¹Dì móndyá zyandre adrébhá lile Yésu íbe nda ì adré tá logóá dhi: «Akódhi Yésu 'í, pròfétà angálépi Nàzàrétà, Gàliláyà na dhi lésè dhi 'í. »

Yésu dro móndyá adrébhá ngá lagí¹ dhi i topfòle tépelò 'ásè

(À kònò kpà Márökò 11:15-19; Lükà 19:45-48; Yòwáni` 2:13-22)

¹²Àmvolásà dhi, Yésu dré fízo tépelò na gò, móndyá tití adrébhá tá ngá lagí ìndì ngá gi kònàle dhi ki dro topfòle 'ásà. Dré mísá móndyá adrébhá tá làfa topfó dhi kya ki lebhézó bvò dri, túmání gbólókó móndyá adrébhá tá kòbhòlà lagí dhi kya íbe.

¹³Gò dré tázoo àyi dré dhi: «Gíká ni Kúlí adré tàá dhi: <À ni áma dzó zi dzó adrészó tà ta má be dhi ró. > Dì, mì gò àmíkya dzó nda ni bha adrélé àrà kùgubhá ì dré adrészó àyi ki zu dhi ró! »

¹⁴Gò móndí mì kùdúkùdu ró dhi i móndí mèrèkpè ro dhi íbe dhi ì dré àyi ki kisizó ànyi Yésu làga tépelò na gò, akódhi dré àyi ki tidrizó.

¹⁵Dì kòwánà kàdrì i tátrítrí kúlí tadhábhá íbe dhi ì nò tá tà líndrígá ró Yésu dré 'ole nda i. Ì yi tá kpà ànzimvá adrérà'a kúlí loyó tépelò na adrészó tàá dhi: «Òsánà kàdré Dàwídì ni Mvá dré! » Dì àyi ki togó dré aswázó Yésu rú gò,

¹⁶Ì dré lizizóá tíá dhi: «Mí adré tà ànzimvá ni ì dré adrélé tâle kòdhí ni yi? » Yésu logó àyi dré dhi: «Àyíya! Mì nà rè Gíká ni Kúlí na ko tâle dhi, <Mí 'o ànzimvá i ànzí kùrì íbe dhi i adrélé ámi rú bha kùle> dhi? » ¹⁷Dì Yésu dré àyi ki tayízó gò, pfòzo bhàandre 'ásè lile ayílé Bètànýà na.

Yésu tatri¹ fígi fa lò'wa 'àlepi ko dhi

(À kònò kpà Márökò 11:12-14, 20-24)

¹⁸Drùbhì kínó, Yésu dré tá adrérà'a gòle Yérúsalémà na dhi 'á dhi, tâbirí dré akódhi ni 'òzo.

¹⁹Akódhi dré fígi fa àlo dhi ni nòzo láti mìle. Dì, a ni li tsàle ànyi làgá dhi, kisú ína lò'wa ni àlomvá ko. Kisú ngbà 'í bí ni i kòdhya. Dì dré tázoo fígi fa nda dré dhi: «Mí kògò vélé lò'wa 'a tâdzí ko! » Gbă kòdhwa, fa nda dré 'yòzo.

²⁰Akódhi ni lebèbhá ì kònò tà nda dre dhi, àyi ki líndrì dré gàzo gò, ì dré akódhi ni lizizó tázoo dhi: «Fígi fa kònìdhi 'yo ína mbèlè kònìnì ngíningíni ró? »

²¹Yésu logó àyi dré dhi: «Má adré tà bâti ta àmi dré: Mì kàdré tà ka'ika'í íbe gò, adrészó tà kayí àmi léna ko dhi, mì ni kókpà kítswá tà lású be kònìnì dhi ki 'o, túmání tà kàdrì dra tà nda ki lavúbhá dhi íbe. Mì ni kítswá ndìndì tàá kòngó kònìdhi dré dhi, <Mí nga kònwasè lile dhèle yíandre na! > gò, tà nda dré ru 'òzo.

²²Tà ángùdhi mì dré dra zile Gíká tí, adrészó ka'ia dhi akódhi ni 'òá dhi, mì ni tà nda ni kisú. »

À lizí Yésu tí ngalè akódhi ni rinyí angá ángolésè ya dhi

(À kònò kpà Márökò 11:27-33; Lükà 20:1-8)

²³Àmvolásà dhi, Yésu dré gòzo file tépelò na gò, kídhólé adrélé tà tadhá móndí i dré. Gò kòwánà kàdrì i bhàgo íbe dhi i dré alìzo akódhì vélé lizíá tíá dhi: «Rinyí mí dré adrészó tà kòdhì kí 'o dhi angá ína ángolésè? Àdhi fè rinyí nda mí dré nì? »

²⁴Yésu logó àyi dré dhi: «Má nì kókpà tà àlo dhi ni lizí àmì tí. Mì kòlogó kúlí má tí dhi, má nì kpà tàá àmì dré ngalè rinyí má dré adrészó tà kòdhì kí 'o dhi angá ángolésè ya dhi.»

²⁵Bàtísimò Yòwánì dré fèle dhi angá tá ína ángolésè: Giká vélésè, kó ngalè móndí i vélésè? » Gò i dré dhèzo adrélé tà kayí àyi kòfalésè, adrészó tàá dhi: «Mà kòtà dhi <Bàtísimò nda angá Giká vélésè> dhi, akódhì ni go lizíá àma tí dhi: «Mì ka'i di Yòwánì ko àdho tà sè? »

²⁶Dì, mà kòtà kó dhi <Bàtísimò nda angá móndí i vélésè> dhi, mà nì go móndyá zyandre dhi kí ro. Tako ko, àyi tití nda i adré ka'íá dhi, Yòwánì tá ína pròfétà 'i. »

²⁷Dì i dré logozóá Yésu dré dhi: «Mà nì ko. » Yésu gò tàá àyi dré dhi: «Kàdré kònini dhi, má kitswá kókpà tàá àmì dré ngalè rinyí má dré adrészó tà nda kí 'o dhi angá ángolésè ya dhi ko. »

Pi' dhi' gó ànziàgo rì dhi kí tà dri dhi

²⁸Yésu gò tàá dhi: «Mì kisù àmikya tà kònìdhì dri ngíni? Agó àlo dhi tá ànziàgo íbe rì. Dré lìzo mváagó ni àlo véna tàá drá dhi: <Áma mvá, mí lì ándrò àzí 'o vínò amvú na. »

²⁹Dì mváagó nda logó drá dhi: <Kóko. Má lè lile ko. > Dì, dré gòzo áyi tà kisùle nda nì ladzá gò, lìzo àzí 'o.

³⁰Agó nda dré kpà lìzo mváagó ni rì véna, tàá drá lású be kònini. Mváagó nda dré logozóá drá dhi: <Àyíya, atálágó, má nì li. > Dì, dré ína lìzo ko.

³¹Àyi rìti nda i kòfalé dhi, àdhi 'o tà áyi atá dré tá lèle dhi nì? » I logó drá dhi: «Mváagó ni àlo 'i. » Yésu gò tàá àyi dré dhi: «Má adré tà báti ta àmì dré: Mèdáyì lagíbhá i tòkó zàràbhù ro dhi íbe dhi kí fì Giká ni Òpì na dridrì àmì kandrána.

³²Tako ko, Yòwánì alì tá láti tà gyägya àdhya ni tadhá àmì dré gò, mì dré àmikya akódhì ni ka'ízo ko. Dì, mèdáyì lagíbhá i tòkó zàràbhù ro dhi íbe dhi i ka'i tá àyíkyá akódhì 'i. Tágba mì dré tá áyi nda kí tà ka'íka'i nòzo dhi, mì gò àmì kí togó ladzá akódhì ni ka'i ko. »

Pi' dhi' gó vínò likí' bhá kònzi dhi kí tà dri dhi

(À kònò kpà Márökò 12:1-12; Lükà 20:9-19)

³³«Mì yi rè pídhígó àzya ká. Amvú lítí àlo dhi bhe tá vínò áyi amvú na. Dré gàrà ni kí tobhazo kírà sè, bhú gázó kitswázó vínò lò'wa zwa gò, dzó mvumvù dhi ni sizo kitswázó amvú nda ni likí. Dré amvú nda ni tayízó vínò likíbhá àruka i drígá gò, lìzo atsí na làwú làvo na.»

³⁴Lókyá vínò lò'wa kízo dhi kòkitswá dre dhi, dré áyi màrabà kí mùzo kitswálé lò'wa ína tímì dhi ni adó vínò likíbhá nda i véna.

³⁵Di, vínò likíbhá nda i dré àyikya màrábà nda kí turúzó, àlo ni ni tswàzo, àzya ni ni pfùzo dràle gò, àzya ni ni lebhézó dràle kírà sè.

³⁶Gò amvú lítí nda dré gòzo màrábà àruka bí wáláká ni kí lavúbhá dhi kí mu lile. Di, vínò likíbhá nda i dré kpà àyi kí 'ozo ngóró i dré tá 'ole drìdrì dhi tíni.

³⁷Kùdù ro dhi, amvú lítí nda dré áyi mváagó ni mùzo lile àyi véna. Adré tá kisùá dhi: «È ni áma mváagó ni lindri bha! »

³⁸Di, vínò likíbhá nda i kònò mváagó nda adrérà'a alile dre dhi, i dré tazoá àyi kòfalésè dhi: «Kònàdhi dhya dra amvú kònàdhi ni kisulépi tàyilé ro dhi 'i. Mà kòlì akódhi ni pfu dràle, amvú dré tá kitswálé kisulé tàyilé ro nda ni dòzo àma dré! »³⁹Di i dré ngàzo akódhi ni ru bhèle amvú nda 'ásè kivì na gò, pfùzoá dràle. »

⁴⁰Yésu gò lizíá dhi: «Lókyá amvú lítí nda dré dra agòzo dhi tú dhi, a ni 'òá ngíni vínò likíbhá nda kí tà sè dhi? »

⁴¹I logó drá dhi: «A ni drìkònzibhá nda kí tupfú todràle gò, gòzo amvú nda ni tayí vínò likíbhá àruka i drígá, i kòlogoró i dré vínò lò'wa ína tini dhi lókyá lò'wa nda ni kízo dhi sè. »

⁴²Yésu gò tàá àyi dré dhi: «Mì nà rè tà tisile kònàdhi Gíká ni Kúlí na ko? «Kírà dzó sibhá i dré gále gágà dhi, gò atsálé kírà agogó dzó nda dré adrészó áyi totó driá dhi ró. Kòrìdhi tà Míri dré 'ole ni dhi 'i. Di tà nda lindri gáro àma milésè! »

⁴³Má adré di tàá àmi dré dhi: Gíká ni áyi Òpì tingá àmi drígásè gò, fèzoá móndyá dra Òpì nda ni lò'wa 'abhá dhi i dré.

⁴⁴Dhya ángùdhi dra dhèlepi kírà nda dri dhi ni ño. Kòdhí ibe dhi, kírà nda ni dhya ángùdhi i dré dra adhézó driá dhi ni kinyí. »

⁴⁵Kòwánà kàdrì i Fàrisayò ibe dhi i kòyi pídhigó Yésu dré píle nda i dre dhi, i dré nizoá tali dhi, akódhi tà tá nda i àyi rú dhi be.

⁴⁶Gò i dré ngàzo adrélé láti nda kitswázó akódhi ni ru. Di, i adré tá àyikya móndyá zyandre dhi kí ro, àyi nda i dré tá adrélé Yésu ni no pròfétà ro dhi sè.

Màtayò 22

Pi' dhi' gó gwányá làmò àdhya ni tà dri dhi (À kònò kpà Lükà 14:15-24)

¹Gò Yésu dré gòzo tódyá tà tadhá àyi dré pídhigó sè, tazoá dhi:

²«Òpì bhù àdhya sù ngóró tà kònàdhi tini: Ópì àlo dhi adré tá gwányá làmò àdhya ni 'o áyi mváagó dré.

³Dré áyi màrábà ki mùzo lile móndyá dré tá azilé gwányá nda lé dhi kí azí ngá nya. Di, àyi nda i dré àyikya gàzo rè.

⁴Dì ópí nda dré gòzo màrabà àruka kí mu lìle kúlí kòní kí ta móndyá azilé nda i dré: «Mì yi rè ká! Má 'o ngá tití dhí i ladhlé áma gwányá sè dhí dre. Má 'o áma tíago i tililé, áma tí ngbòlò dò ro dhí íbe. Tà tití dhí i kitswá dre. Mì alì gwányá lé wà! »

⁵Dì, móndyá azilé nda i dré àyikya tà nda ni nòzo tà tákó ró. Gò i dré lìzo àyi kí tà 'obe kòdhya. Àlo ni lì tá áyi amvú na. Àzya ni lì ína áyi azí làfa àdhya kí tà 'obe.

⁶Àyi kí àruka i dré màrabà nda kí turúzó, àyi kí 'ozo kònzi gó, àyi kí tupfúzó todràle.

⁷Dì ópí nda ni togó dré aswázó tà nda sè. Dré áyi sòdá zyandre dhí kí mùzo lìle móndyá kàrì kutúbhá nda kí tupfú todràle gó, bhàandré àyikya ni zàzo vèle.

⁸Gò dré tázoo áyi màrabà i dré dhí: «Gwányá làmò àdhya gànzi ró. Dì, móndyá má dré azilé nda i kitswá tá àyikya gwányá nda sè ko.

⁹Dì ásà dhí, mì lì láti andre i 'ásè, móndyá tití mì dré dra kisulé dhí kí azí alìle gwányá lé. »

¹⁰Dì màrabà nda i dré lìzo láti i 'ásè, móndyá tití i dré kisulé dhí kí kimó alìzo àyi íbe, tágba àyi nda i kàdré tá móndí doro 'i yà, kó ngalè móndí kònzi 'i yà dhí. Gò dzó làmò gwányá àdhya dré gázó móndyá azilé nda i sè bì.

¹¹Dì, ópí nda kàfí móndyá azilé nda kí no dre dhí, dré agó àlo kítá làmò gwányá àdhya ni asólépi ko dhí ni nòzo.

¹²Dré lizízoá tíá dhí: «Áma arúpi, mí afí kònwa kítá làmò gwányá àdhya àko ngíningíni ró? » Agó nda tá kúlí logolé dhí àko.

¹³Dì ópí nda dré tázoo áyi màrabà i dré dhí: «Mì adrò akódhí ni pá i drígá ni íbe, akódhí ni bhèzo kivì na, àrà tímímvá ro dhí na. Kònale dhí, à ni adré tongolé, adrészó kpà síkálándrá tsí. »

¹⁴Tákó ko, à adré móndí zyandre dhí kí azí. Dì, à adré ngbà 'i móndí àlo àlo dhí kí kipè kòdhya. »

Kàyísárà, Rómà kí ópí` kàdri` ni mèdáyi` gi` ma

(À kònò kpà Márökò 12:13-17; Lükà 20:20-26)

¹⁵Àmvolásà dhí, Fàrisayò i dré ngàzo ru yi, kitswázó Yésu ni 'o la'ile kúlí dré tá adrélé tálé dhí i sílé dhí bvó.

¹⁶Dì i dré àyi kí lebèbhá kí mùzo móndí àruka ópí Èródè àdhya íbe lìle Yésu véna táká drá dhí: «Tadhálépi, mà ni tálé dhí, mí adré trôle tà báti rú dhí be. Mí adré Gíká ni tà tadhá tà báti sè. Mí adré kpà móndí kí lindrí ni tà kisù ko, mí dré adrélé àyi kí no twátwa ko dhí sè.

¹⁷Dì mí tà rè àma dré tà mí dré adrélé kisùle tà kònìdhí dri dhí ká: «Àma kí tátrítrí kúlí ka'i, mà kàdré Kàyísárà ni mèdáyi` gi` dhí 'í? Kó ngalè, ka'i ko? »

¹⁸Dì, Yésu dré ína tà kònzi i dré tá adrélé lèle 'ole nda ni nizo kyá gó, logózóá àyi dré dhí: «Àmi túrúpfúbhá ni i, mí adré áma tabhì litilé àdhó tà sè? »

¹⁹Mì tadhá má dré làfa lò'wa adrészó mèdáyì gi ásà dhì. » Dì ì dré dènári àlo dhì ni fèzo drá. ²⁰Gò dré lizízóá àyi tí dhì: «Mónđí líndrí kònìdhì tsàle rú tisile drià kònìdhì be dhì, àdhì àdhya 'i? »

²¹Ì logó drá dhì: «Kàyìsárà àdhya 'i. » Dì Yésu tà àyi dré dhì: «Mì kàdré dì ngá Kàyìsárà àdhya ni fe Kàyìsárà dré, adrészó kpà ngá Gìká àdhya ni fe Gìká dré. »

²²Ì kòyi akódhì ni kúlì nda dre dhì, àyi kí líndrí dré gàzo gò, ì dré akódhì ni tayízó lìzo.

Tà lizilé ngangà dràdrà 'ásè dhì ni tà dri dhì

(À kònò kpà Márokò 12:18-27; Lükà 20:27-40)

²³Kítú nda sè dhì, Sàdùkáyò àruka ì dré alìzo Yésu vélé kïtswálé tà lizí tíá. (Àyi nda ì adré tàá dhì, ngangà dràdrà 'ásè dhì yókódhó.) Dì ì tà drá dhì:

²⁴«Tadhálépi, Mósè tisì àma dré dhì: «Agó àlo adrélépi mvá àko dhì kòdrà áyi tòkó ni tayí dhì, lè adrúpi ni kòdo tàyítòkó nda mòle, kïtswázó ànzi ti áyi adrúpi dràlepi nda dré. » ²⁵Dì àma kòfalé dhì, àgo nzi-drì-rì adrúpi ró dhì i tá be. Àyi kí kàyo dré tòkó àlo dhì ni mòzo gò, dràzo. Dré tá adrélé mvá àko dhì sè dhì, dré áyi tòkó nda ni tayízó áyi adrúpi i bvó dhì dré.

²⁶Tà nda dré kpà ru 'òzo kònìni adrúpi ni ni rì rú, adrúpi ni ni na rú, tsàle byá adrúpi ni ni nzi-drì-rì rú.

²⁷Kùdù ro dhì, tòkó nda dré kpà dràzo.

²⁸Dì kítú móndí ì dré dra ngàzo dràdrà 'ásè dhì tú dhì, adrúpi nzi-drì-rì nda i kòfalé dhì, tòkó nda ni adré tsítsì dhì àdhì dré? Àngyá ko, àyi tití nda i do tá akódhì mòle áyi dré tòko ró. »

²⁹Yésu logó àyi dré dhì: «Mì lití àmi kí tandí i dre, mì dré Gìká ni Kúlì i rìnyí ni íbe dhì kí nile ko dhì sè.

³⁰Kítú móndí ì dré dra ngàzo dràdrà 'ásè dhì tú dhì, i gò adrélé ru mo ko. Ì gò kpà adrélè àyi kí ànzi kí fe mòle ko. Be ró dhì, i ni àyikya adré ngóró ángéló bhù na dhì i tití.

³¹Dì kàdré ína ngangà dràdrà 'ásè dhì ni tà sè dhì, mì nà rè tà Gìká dré tâle àmi dré dhì ko? Akódhì tà dhì:

³²«Ma Gìká Àbàrámà àdhya 'i, Ísákà àdhya 'i, ìndì Yàkóbhò àdhya 'i. » Dì Gìká nda Gìká àbvò kya 'i ko. Be ró dhì, akódhì ína Gìká móndyá lídrì ro dhì kya 'i. »

³³Dì móndyá zyandre kònàle dhì i kòyi tà nda dre dhì, àyi kí líndrí dré adrészó gàle tà Yésu dré adrélé tadhálé dhì i sè.

Tòlí` kàdrí` lavúlé dhì

(À kònò kpà Márokò 12:28-34; Lükà 10:25-28)

³⁴Fàrisáyò i kòyi, Yésu kíkí tá Sàdùkáyò kí kúlì dre dhì, i dré gòzo ru kímó akódhì làga.

³⁵Gò àyi kí àlo Mósè ni tátrítrí kúlí nilepi doro lavulé dhí dré tà kònìdhí ni lizizó akódhí tí, kitswázó akódhí ni tabhí:

³⁶«Tadhálépi, Mósè ni tátrítrí kúlí na dhí, tòlì kàdrì lavulé dhí ángùdhi 'í? »

³⁷Dí Yésu logó drá dhí: «Lè mí kàdré Míri ámi Gìká ni le ámi togó sè wäyi, ámi lídrì sè wäyi, ìndì ámi tà kisùkisù sè wäyi. » ³⁸Kòdhí tòlì drìdrì dhí 'í, ìndì tòlì kàdrì lavulé dhí 'í.

³⁹Tòlì ni rì adrélépi kpà kàdrì àlo ni tñi dhí, kònìdhí 'í: «Lè mí kàdré ámi àzya ni le ngóró mí dré adrélé ámi tändì ni le dhí tñi. » ⁴⁰Tà tití Mósè ni tátrítrí kúlí ìndì pròfétà ì dré adrélé tadhálé dhí ì adré àyi kí totó tòlì rì nda kòdhí ì dri. »

Mèsí yà i Dàwídì be dhí

(À kònò kpà Márokò 12:35-37; Lükà 20:41-44)

⁴¹Fàrisayò ru kimóbhá nda ì dré rè dhu adrérà'a Yésu làga dhí 'á dhí, akódhí dré lizizóá àyi tí dhí:

⁴²«Mì kisù àmikya Mèsiyà ni tà sè ngíni? Akódhí àdhi ni mvá 'í? » Ì logó drá dhí: «Akódhí Dàwídì ni mvá 'í. »

⁴³Dí Yésu tà àyi dré dhí: «Kàdré kònì dhí, Dàwídì dré tá adrérà'a tà ta Tírí Lolo ni rinyí sè dhí 'á dhí, zi ína Mèsiyà nda àyi Míri ro ngíni? Àngyá ko, Dàwídì tà tá dhí:

⁴⁴«Míri Gìká tà áma Míri dré dhí: Mí alì lirilé áma dríágó lésè, tsàle lókyá má dré dra ámi kàribhá ki bhàzo adrélé ámi pá zàle dhí 'á. »

⁴⁵Dí Dàwídì kòzi Mèsiyà àyi Míri ro dhí, Mèsiyà nda ni kïtswá kpà adrélé akódhí ni mvá ro ngíningíni ró? »

⁴⁶Dí dhya àlo àyi kòfalé kitswálépi kúlí logó Yésu tí dhí tá yókódhó. Kìdhólé kítú nda sè dhí, dhya àlo dré gòzo vélé tà tabhí lizilé akódhí tí ko.

Màtayò 23

Yésu tà tà tátrí trí́ kúlí tadhábhá i rú Fàrisayò í be àyi kí túrúpfú tà sè

(À kònò kpà Márokò 12:38-40; Lükà 11:39-52; 20:45-47)

¹Gò Yésu dré tazoá móndyá zyandre i dré àyi lebèbhá íbe dhí:

²«À tayí àzí tátrítrí kúlí tadhábhá i drígá Fàrisayò íbe, ì kàdréró Mósè ni tátrítrí kúlí ni tà tadhá móndí i dré. ³Adré dí lèá dhí, mì kàdré àyi nda kí kúlí yi, adrészò tà tití ì dré adrélé tâle àmí dré dhí kí ka'ì 'ole. Dí, mì kàdré àmikya tà ì dré adrélé 'ole dhí kí 'o kòdhya ko. Tàko ko, ì adré tà ì dré adrélé tadhálé dhí kí 'o kòdhya ko.

⁴Ì adré àyikya ngá lanzìlanzi kitswálé dòle bwà ko dhí kí todrà tobhàle móndí i dri gò, ì dré adrészò ndìndì drígambílí le sòle àyi kí ledézó dhí ko.

⁵Tà tití ì dré adrélé 'ole dhí i, ì adré 'òá móndí i kàdréró àyi kí no be dhí bvó. Ì adré àyi kí kpukúbhú tsàtsà adrészò wárágà Gìká ni Kúlí tisìzo drìà dhí kí tobhà lána dhí kí kiwá, adrészò kpà àyi kí kánzò kí ti 'o atsálé kàtswa. ⁶Ì adré lèá lirilé mísá lindrì

àdhya gwányá i 'ásè dhi i làgásè, adrészó kpà lèá lirílé àrà lindrì àdhya lísámbò dzó i 'ásè dhi i 'ásè.

⁷Ì adré lèá dhi, à kàdré mòdo fe àyi dré lindrì sè ngá lagírà i 'ásè, adrészó kpà àyi kí zi <Rábbì>.

⁸Dì, àmì ró dhi, mì kòtayí àmì adrélé zile Rábbì ro ko. Àngyá ko, àmì kí tadhálépi ngbà 'í àlo kwákwá, ìndì àmì tití dhi i adrúpi 'i.

⁹Mì kàdré kpà dhya àlo bvò dri dhi ni zi àmì kí Atá ro ko. Àngyá ko, àmì kí Atá ngbà 'í àlo kwákwá. Akódhi àmì kí Atá bhù na dhi 'i.

¹⁰Mì kòtayí kpà àmì adrélé zile móndí kí drì kòlepi ró ko. Àngyá ko, àmì kí drì kòlepi ngbà 'í àlo kwákwá. Akódhi Mèsíyà 'i.

¹¹Adré lèá dhi, dhya kàdrì lavúlé àmì kòfalé dhi kàdré àmì kí màrabà ro.

¹²Tàko ko, dhya ángùdhi adrélépi áyi tà bha kuru dhi, Gíká ni akódhi nda ni tà tirí kíní mi. Dì, dhya ángùdhi adrélépi áyi tà bha kíní mi dhi, Gíká ni akódhi nda ni tà tingá kuru.

¹³Àmì, tátrítrí kúlí tadhábhá i Fàrìsáyò íbe ni i, kízà àmì kí ngá 'i. Àmì túrúpfúbhá 'i! Tàko ko, mì adré àmikya láti kíkí móndí i dré, i kòfiró Òpì bhù àdhya na ko. Àmì kí tändí, mì adré file lana ko gó, mì dré adrészó móndyá adrébhá lèá file lana dhi kí tayí file ko. [¹⁴]

¹⁵Àmì, tátrítrí kúlí tadhábhá i Fàrìsáyò íbe ni i, kízà àmì kí ngá 'i. Àmì túrúpfúbhá 'i! Mì adré àmikya tatsílé bvò drísè ìndì yí mísè, kitswálé móndí àlo dhi ni 'o togó ladzá àmì kí Gíká ni ka'i. Dì, akódhi nda kònì dra ka'i dhi, mì adré akódhi ni 'o atsálé mvá líferò àdhya ró, adrélé kònzi àmì kí lavú vwàvwà ro.

¹⁶Àmì móndí kí drì kobhá mì kùdúkùdu ró ni i, kízà àmì kí ngá 'i! Mì adré àmikya tàá dhi, dhya àlo kàdré mònträ si tépelò ni rú sè dhi, mònträ nda tà tàko 'i. Dì, dhya àlo kàdré ína mònträ si óró tépelò le dhi ni rú sè dhi, lè akódhi kàdré mònträ dré sile nda ni likí.

¹⁷Àmì móndí azaaza mì kùdúkùdu ró dhi 'i! Ngá kàdrì lavúlé dhi ángùdhi 'i: óró nda 'i, kó ngalè, tépelò adrélépi óró nda ni 'o atsálé lolo nda 'i?

¹⁸Mì adré kpà tàá dhi, dhya àlo kàdré mònträ si àlètárì ni rú sè dhi, mònträ nda tà tàko 'i. Dì, dhya àlo kàdré ína mònträ si ngá fèle àlètárì nda dri dhi ni rú sè dhi, lè akódhi kàdré mònträ nda ni likí.

¹⁹Àmì mì kùdúkùdu 'i! Ngá kàdrì lavúlé dhi ángùdhi 'i: ngá fèle nda 'i, kó ngalè, àlètárì adrélépi ngá nda ni 'o atsálé lolo nda 'i?

²⁰Dì dhya ángùdhi adrélépi mònträ si àlètárì ni rú sè dhi, adré siá àlètárì nda ni rú sè, ìndì ngá tití drìá dhi kí rú sè.

²¹Dhya ángùdhi adrélépi mònträ si tépelò ni rú sè dhi, adré siá tépelò nda ni rú sè, ìndì Gíká adrélépi adrélé lana dhi ni rú sè.

²²Dhya ángùdhi adrélépi mòn-drà sì bhù nì rú sè dhi, adré sìá Gìká nì lirírà òpì àdhya nì rú sè, ìndì akódhi adrélépi lirílé drìá dhi nì rú sè.

²³Àmì, tátrítrí kúlí tadhábhá i Fàrìsáyò íbe nì i, kizà àmì kì ngá 'i. Àmì túrúpfúbhá 'i! Mì adré ngá nzì tsàtsà tití mì dré adrélé lokólé àmì kì amvú na, lanzílé 'a be mudrí dhi kì àlo fe Gìká dré: ndìndì àmì kì ménétè, àmì kì fènúwì, tsàle àmì kì kúmè. Di, mì adré àmikya tà kàdrì lavúlé tátrítrí kúlí dré adrélé tadhálé dhi kì bhe gàrà dri: tà gyágya 'òma, móndí kì kizà bhàma, ìndì Gìká nì ka'ima. Adré tá lèá dhi, mì kàdré tà nda kòdhì kì 'o, ngá fèma Gìká dré dhi nì tivì àko ró.

²⁴Àmì móndí kì drì kobhá mì kùdúkùdu ró dhi 'i! Mì adré àmikya njöñó kogá àmì kì yí lésè gò, adrészó kàmílò te kòdhya!

²⁵Àmì, tátrítrí kúlí tadhábhá i Fàrìsáyò íbe nì i, kizà àmì kì ngá 'i. Àmì túrúpfúbhá 'i! Mì adré àmikya kópò kì rúbhá dzi sàni kya íbe gò, àyì kì 'a dré adrészó gàle ngá lovó sè bì, ìndì lovó kònzi sè bì.

²⁶Mì, Fàrìsáyò mì kùdúkùdu ró nì, mí kòdzì rè zyà kópò nì 'álé 'íká, gò rúbhá nì kògoró kpà atsálé ndì àko ndò.

²⁷Àmì, tátrítrí kúlí tadhábhá i Fàrìsáyò íbe nì i, kizà àmì kì ngá 'i. Àmì túrúpfúbhá 'i! Àmì ngóró mógo rúbhá tswàle kemve dhi i tíni. Kìvì lésè dhi, mógo nda kì rúbhá avé tò. Di, àyì kì 'a ga ína àbvò kì fà sè bì, ìndì ngá tití ndì ró dhi i sè bì.

²⁸Tà nda kòdhì kókpà kònini àmì kì tà sè. Kìvì lésè dhi, móndí i adré àmì kì no ngóró móndí gyágya dhi i ró. Tákò, àmì kì togó na dhi, mì ga túrúpfú tà sè bì, ìndì tà kònzi sè bì.

²⁹Àmì, tátrítrí kúlí tadhábhá i Fàrìsáyò íbe nì i, kizà àmì kì ngá 'i. Àmì túrúpfúbhá 'i! Mì adré àmikya mógo kì tobhà pròfétà i dré, adrészó kpà mógo móndyá gyágya dhi kya kì ledé avélé tò.

³⁰Mì adré kpà tàá dhi: «Kònò mà kàdré tá àma kì tábhí kì lókyá 'á be dhi, mà kìtswá tá ru amú àyì íbe adrészó pròfétà kì kàrì kutú dhi ko. »

³¹Ásà dhi, mì adré àmikya tadhá dhi, àmì dhya pròfétà kì tupfúbhá todràle dhi kì ànzì 'i.

³²Mì kògò di adrélé tà kònzi àmì kì tábhí i dré kìdhólé 'ole dhi kì 'o kitswálé tití.

³³Àmì nì 'i, ìndì nì àtrá kì àrèbhá 'i! Mì nì àmikya lapá Gìká nì tábvo tàma sílésè ngíningíni ró, mì dré kitswázó fíle líferò na ko dhi?

³⁴Di mì yi rè ká! Má nì pròfétà kì tibhù tògyabhá íbe ìndì tà tadhábhá íbe lìle àmì véna. Di, mì nì àyì kì àruka kì tupfú todràle, adrészó àruka nì kì tidí fa kípakipa i drísè, adrészó àruka nì kì tswa àmì kì lìsámbò dzó i 'ásè, adrészó àruka nì kì ladró bhàandre àlo àlo dhi i 'ásè.

³⁵Di ásà dhi, móndyá gyágya tití dhi kì kàrì kutúlé bvò dri dhi nì ngo àmì dri. Kìdhólé Àbélè adrélépi tá gyágya dhi rú, tsàle Zàkàrìyà, Bàràkìyà nì mvá mì dré pfùle dràle tépelò i kòfalé àlètárì be dhi rú dhi, àyì kì kàrì nì ngo àmì dri.

³⁶Má adré tà báti ta àmì dré: Tà nda kòdhì kí atsá tití móndyá ándrò ní i rú. »

Yésu ngo Yérusalémà ní tà sè

(À kònò kpà Lükà 13:34-35)

³⁷«Á! Yérusalémà, Yérusalémà, mi adrélépi pròfétà kí tupfú todràle, adrészó kpà dhya Giká dré adrélé amùle mí vélé dhi ki lebhé todràle kírà sè ní! Tsàle vésè be ángopí, má lè tá ámì ànzi kí kimólé má zàle, ngóró tà'u dré adrélé áyi ànzimvá kí kimó áyi kupfú zàle dhi tini dhi? Di, mì lè tá àmikya ko.

³⁸Di mì yi rè ká! À tayí àmì kí dzó ngbo dre.

³⁹Tako ko, má adré tàá àmì dré dhi: Kidhólé nyànomvá dhi, mì gò vélé áma no ko, tsàle lókyá mì dré dra tazoá dhi <Tà taní kàdré dhya adrélépi alìle Míri ní rú sè dhi dri! > dhi 'á. »

Màtayò 24

Yésu longó tépelò ní pfùma ní tà

(À kònò kpà Márökò 13:1-2; Lükà 21:5-6)

¹Yésu kàpfò tépelò lésè gò adrélé lile dre dhi, akódhi ní lebèbhá i dré àyi kí kisizó ànyi làgá, akódhi ní 'o tépelò nda ní dzó kàdrì dhi kí no.

²Di, Yésu dré tazoá àyi dré dhi: «Mí nò tsì dzó kàdrì kònì i tití 'í? Má adré tà báti ta àmì dré: Lókyá adrélépi alìle dhi sè dhi, à gò vélé àyi kí kírà kí àlo kisú àzya ní dri ko. À ni kírà nda kí lebhé tití kìnì mi. »

Tà dra ru 'obhá lókyá kùdù ní tà tadházó dhi i

(À kònò kpà Márökò 13:3-13; Lükà 21:7-19)

³Àmvolásà dhi, Yésu i dré lizo mbàle kòngó Òlívè fa kya drina gò, akódhi dré lirizó. Di akódhi ní lebèbhá i dré àyi kí kisizó àyi pátí ànyi làgá, akódhi ní lizí tazoá dhi: «Mí tà rè àma dré, tà nda kòdhì kí atsá ángutú ya dhi ká? Àdho tà ni ru 'o dridrì tadházó dhi, ámì agòma ànyi, ìndì lókyá kùdù ànyi káyà dhi ní? »

⁴Yésu logó àyi dré dhi: «Mí kàdré àmì kí likí doro, dhya àlo kòlitíró àmì ko.

⁵Tako ko, móndí bì dhi kí alì áma rú sè adrélé tàá dhi, <Ma Mèsiyà 'í! > gò, i dré móndí zyandre dhi kí litizó.

⁶Mí ni àdzú kí kpòrò yi ànyi, adrészó kpà àdzú kí rúbí yi làwú làvo na. Di, mì kònò doro, mì kòtayíró àmì kí togó adrélé gàle ásà dhi ko. Tako ko, adré lèá dhi, tà nda kòdhì i kò'o rè zyà ru 'iká. Di, lókyá kùdù atsá rè ko.

⁷Súrú kí àdzú bhu súrú àruka íbe. Òpì kí kpà àdzú bhu òpì àruka íbe. Kàrábhò ní dhe, ìndì kàdikàdi ní bvò kosé àrà twátwa i 'ásè.

⁸Di, tà tití nda kòdhì kí ngbà 'í adré ngóró tokó ní mváaswa ní kidhoma tini.

⁹Lókyá nda sè dhi, à ni àmì kí lefè kàribhá i drígá gò, i dré adrészó àmì kí mì pfo, adrészó àmì kí tupfú todràle. Súrú tití bvò dri dhi kí togó kònzi bha àmì rú áma tà sè.

¹⁰Móndí bì dhi kí kpà àyi kí tà ka'ika'i tayí, adrészó ru lefè, adrészó ru ga àyi kòfalésè.

¹¹Pròfétà kinzò ro dhi kí apfò bí adrélé móndí zyandre dhi kí lití.

¹²Tà kònzi dré dra atsálé kàdrì lavúlé dhi sè dhi, móndí bí dhi kí lèle ni kídrí.

¹³Dí, dhya ángùdhi adrélépi togó tsí, adrészó áyi totó tätä tsàle kùdù na dhi ni ína adrí.

¹⁴À ni Rúbí Tani Gíká ni Òpì àdhya kòdhí ni longó bvò wáyi 'ásè, tà ni ni tadházó súrú tití i dré 'íká, gò lókyá kùdù dré gòzo atsálé ndò. »

Kizà kàdrì ` lavúlé dhi

(À kònò kpà Márökò 13:14-23; Lükà 21:20-24)

¹⁵«Dí mì ni ngá adrélé gàle gàgà adrélépi ngá lolo dhi kí kízà dhi ni no adrérà'a áyi totó àrà lolo dhi na, ngóró longólé pròfétà Dànyélè tí dhi tíni. (Lè dhya adrélépi tà kòdhí ni na dhi kàdré àndu ni ni dóro.)

¹⁶Lókyá nda sè dhi, lè móndyá dra adrébhá bvò Yùdáyà àdhya na dhi i kòlapá ràle kòngó i drìna.

¹⁷Lè kpà dhya dra adrélépi áyi dzó drìna dhi kàsí fíle dzó na, áyi ngá kí do lapázó ába dhi ko.

¹⁸Dhya dra adrélépi amvú na dhi kògò nzìle i bhàna áyi kítá kídhì àdhya ni do lapázó ába dhi ko.

¹⁹Kítú nda i tú dhi, kizà ni adré kàdrì tòkó 'a íbe dhi i dré, ìndì tòkó adrébhá bà fe ànzimvá i dré dhi i dré.

²⁰Mì kàdré tà zi Gíká tí, àmí kí lapama nda kàdréró kídhì lókyá sè yà, kó ngalè sàbátù tú yà dhi ko. ²¹Tàko ko, kizà kítú nda kya ni adré kàdrì lavúlé. À nò rè kízà kárá be kònini nda ko, kídhólé bvò bhàrà lésè atsálé ándrò kònìdhí. À kítswá kpà góle vélé nòá tàdzí ko.

²²Kònò Gíká kòkí tá kítú nda kí bvó ko dhi, dhya àlo bvò dri dhi kítswá tá adrílé bwà ko. Dí, Gíká ni ína kítú nda kí bvó kí móndyá i dré zìle dhi kí tà sè.

²³Lókyá nda sè dhi, à kàdré tàá àmí dré dhi «Mì nò rè ká, Mèsiyà kònwa! » dhi, mì kòka'ì ko. À kàdré kó tàá dhi «Akódhí kònàle! » dhi, mì kòka'ì ko.

²⁴Tàko ko, mèsiyà kinzò ro dhi kí apfò pròfétà kinzò ro dhi íbe adrélé tà kàdrì líndríga ró adrébhá àyi kí rìnyí tadhá dhi kí 'o, kòkítswá dhi, i dré ndìndì móndyá Gíká dré zìle dhi kí litízó.

²⁵Mì yi rè ká! Má longó tà nda kòdhí i dridrì àmí dré.

²⁶Dí à kàdré tàá àmí dré dhi «Mì nò rè ká, Mèsiyà kònàle duku na! » dhi, mì kòlì kònàle ko. À kàdré kó tàá dhi «Akódhí kònwa dzó 'á! » dhi, mì kòka'ì ko.

²⁷Tàko ko, ngóró bhù dré adrélé lagúlé ngá kazá kítú dré apfòrà lésè tsàle kítú dré ndírà na dhi tíni dhi, Móndí ni Mvá ni agòma ni adré kókpà kònini.

²⁸Àrà ángùdhi àbvò dré adrészó lána dhi drìle dhi, àrí àgáàga dhi kí kókpà ru kímó kítswálé àbvò nda ni te. »

Móndí' ni Mvá ni agòma
 (À kònò kpà Márokò 13:24-27; Lúkà 21:25-28)

29 «Gbă kizà kàdrì kítú nda kya àmvolésè dhi, **kítú ni mì ni atsá tímivá ro, mbă gò vélé mvèle ko, bhibhinyà kí ledhé bhù lésè, ìndì rinyí bhù na dhi kí ru kizí.** »

30 Dì lókyá nda sè dhi, tà dra Móndí ni Mvá ni agòma tadhálépi dhi ni agá bhù mìbhalé 'á gò, súrú tití bvò dri dhi ì dré tongozó. Dì ì dré Móndí ni Mvá ni nòzo adrérà'a alile ndùrùku i drisè, rinyí kàdrì be ìndì mìlanzìlanzì kàdrì be.

31 Gò akódhì dré áyi ángéló kí mùzo gòká kúlì 'u'u be, lìle áyi móndyá ì dré zìle dhi kí kimó bvò ni pá su dhi ì lésè, kidhólé bhù ni kùdù àlo lésè, tsàle byá àzya ni na. »

Tà tadhálé fígi fa ni tà rú dhi
 (À kònò kpà Márokò 13:28-31; Lúkà 21:29-33)

32 «Lè mì kàdré tà tadhálé fígi fa ni tà rú dhi ni àndu ni dóro. Fígi fa ni dríti kàdré atsálé mìlimáli gò, bí ni dré adrészò rôle dhi, mì ni tâle dhi, yigú ànyi dhi be.

33 Kókpà kòdhì tini, lókyá mì dré dra tà tití nda kòdhì kí nòzo adrérà'a ru 'o dhi tú dhi, lè mì kònì tâle dhi, Móndí ni Mvá láti 'á, ndìndì àmi kí dzó tí káyà dhi.

34 Má adré tà bâti ta àmi dré: Móndyá dra adrébhá lídrì íbe lókyá nda sè dhi ì kitswá dràle tití drìdrì tà tití nda ì dré dra ru 'òzo dhi kandrà ko.

35 Bhù ì bvò be dhi kí akí. Dì, áma kúlì ì kitswá àyikya tàdzí akílé ko. »

Gíká ni ngbà 'í lókyá kùdù ni
 (À kònò kpà Márokò 13:32-37; Lúkà 17:26-30, 34-36)

36 «Dì, dhya àlo ni ína kítú 'i yà, kó ngalè sáà 'i yà tà nda ì dré dra ru 'òzo dhi ko. Ndìndì ángéló bhù na dhi 'i yà, kó ngalè Gíká ni Mváagó 'i yà dhi, ì ni ko. Gíká Atá ni ngbà 'í ni kalóma.

37 Lókyá Móndí ni Mvá dré adrérà'a 'ole agòle dhi 'á dhi, tà kí adré ngóró Nówè ni lókyá 'á dhi tini.

38 Tako ko, kítú yí liti andre kandrà dhi ì sè dhi, móndí ì adré tá àyikya ngá nya, adrészò ngá mvu, adrészò ru mo, adrészò àyi kí ànzì kí fe mòle, tsàle kítú Nówè dré firà'a bwátù kàdrì na dhi 'á.

39 Àyi nda ì ni tá tà adrélépi tá 'ole atsálé dhi àlomvá ko, tsàle yí dré tirà'a àyi kí wu tití dhi 'á. Tà nda kòdhì kí adré kókpà kònìni kítú Móndí ni Mvá dré dra agòzo dhi tú.

40 Ago rì dhi kí adré àzí 'o amvú na. À ni àlo ni ni do, àzya ni ni tayí.

41 Tòkó rì dhi kí adré ngá 'i. À ni àlo ni ni do, àzya ni ni tayí.

42 Mì kàdré dì támìga dri. Àngyá ko, mì ni kítú ángùdhi àmi kí Míri dré dra agòzo dhi ko.

43 Dì, adré lèá dhi, mì kònì tà kònìdhi dóro: Dzó líyí kònì tá lókyá ángùdhi ngátsi sè kùgú dré kitswázó atsálé ásà dhi be dhi, kònò a ni tá adré támìga dri, kòtayíró kùgú nda áyi dzóti jo ko.

⁴⁴Dì àmì ró dhi, mì kàdré kókpà gànzi ró. Tàko ko, Móndí nì Mvá nì atsá sáà mì dré adrélé kisùle ko dhi sè. »

Màrábà tògya ró mírì nì dré kitswálé ka'ile dhi

(À kònò kpà Lúkà 12:41-48)

⁴⁵«Màrábà tògya ró mírì nì dré kitswálé ka'ile dhi, àdhi 'i? Akódhi nda, dhya mírì nì dré bhàle áyi màrábà àruka áyi dzó lé dhi i drile, kitswálé mányàngá fe àyi dré nyàle lókyá kitswálépi dhi sè dhi 'i.

⁴⁶Màrábà nda nì mírì kàtsá akódhi nì kisú adrérà'a 'òá kònìnì dhi, kólénzé nì adré akódhi dré!

⁴⁷Má adré tà báti ta àmì dré: Akódhi nì mírì nì akódhi nì bha adrélé áyi ngá tití dhi i drile.

⁴⁸Dì, màrábà nda kàdré ína kònzi gò adrélé kisùá i léna dhi «Áma mírì adré gile agòma sè» gò,

⁴⁹dré kidhózó adrélé áyi àzízì kì tswa, adrészó ngá nya, adrészó ngá mvu, adrészó kpà wá tsi dhi,

⁵⁰akódhi nì mírì nì atsá kítú dré adrélé letèle ko dhi tú, ìndì sáà dré adrélé nile ko dhi sè.

⁵¹Dì a nì akódhi nì togá, akódhi nì tà bhàzo adrélé túmäní túrúpfúbhá kya be. Kònàle dhi, à nì adré tongólé, adrészó kpà sítálándrá tsi. »

Màtayò 25

Pi' dhi' gó kyánzi mudrí dhi kì tà dri dhi

¹Yésu gò tàá dhi: «Dì Òpì bhù àdhya nì adré ngóró tà kònìdhi tíni: Kyánzi mudrí dhi i do tá àyi kì tálà, topfòzo ába kitswálé tòkó líyí nì dri letè.

²Àyi nda i kòfalé dhi, nzi dhi i tá azaaza ró, ìndì nzi dhi i tá tògya ró.

³Àyi azaaza ró nda i do tá àyi kì tálà 'í, di, i do tá dò ko.

⁴Dì, àyi tògya ró nda i do tá àyi kì tálà 'íbe.

⁵Tòkó líyí nda dré tá adrélé gile dhi sè dhi, kyánzi nda i dré landèzo tití gò, i dré ledhézó ayí be adrélé ayí ko.

⁶Ngátsi kítogá sè dhi, à dré ngàzo kúlì yo tázoo dhi: «Mì nò rè ká! Tòkó líyí adré alìle! Mì pfò lìle ru kisú akódhi be! ›

⁷Gò kyánzi tití nda i dré larozó, àyi kì tálà kì ledé.

⁸Dì kyánzi azaaza ró nda i dré tázoo àyi tògya ró nda i dré dhi: «Mì afè àma dré àmì kì dò ni àruka wà. Àngyá ko, àma kì tálà adré adrélé. ›

⁹Dì, àyi tògya ró nda i logó dhi: «Kóko! Dò nda kítswá àma dré àmì íbe ko. Mì kòlì be già àmì dré móndí adrébhá dò lagí dhi i véna. ›

¹⁰Dì, ì dré tá adrérà'a lìle già dhi 'á dhi, tòkó lìyí dré atsázó. Dì kyánzi adrébhá gànzi ró nda ì dré fìzo akódhi be dzó làmò gwányá àdhya na gò, dzóti asézó.

¹¹Àmvolásà dhi, kyánzi àruka nda ì dré agòzo atsálé gò, tàá dhi: «Míri, míri, mí nzi àma dré dzóti wà! »

¹²Dì, tòkó lìyí nda logó dhi: «Má adré tà báti ta àmì dré: Má nì mána àmì ko. »»

¹³Yésu gò tàá dhi: «Dì mì kàdré támìga dri! Tàko ko, mì nì kítú 'í yà, kó ngalè sáà 'í yà má dré dra agòzo dhi ko. »

Pi' dhi' gó màrábà na dhi ki tà dri dhi

(À kònò kpà Lükà 19:11-27)

¹⁴«Òpì bhù àdhya nì kókpà adré ngóró tà kònìdhi tíni: Agó àlo dhi adré tá 'òle lìle atsí na. Dì dré áyì màrábà kí azizó, áyì ngá kí tayízó àyì drígá, ì kàdréró àzí 'o ásà be dhi bvó.

¹⁵Àlo nì dré dhi, fè tá làfa lò'wa rú zile tálétà dhi i nzi. Àzya nì dré dhi, fè tá tálétà rì. Àzya nì dré dhi, fè tá tálétà àlo. Lanzí tá tálétà nda i àyì àlo àlo dhi i dré, ngóró ì dré kitswálé àzí 'o ásà bwà dhi tíni. Gò dré lìzo atsí na.

¹⁶Gbă lókyá nda sè dhi, dhya tálétà nzi dhi kí kisúlépi nda dré lìzo àzí 'o ásà gò, tálétà nzi àruka kí kisúzó bhàle driá.

¹⁷Dhya tálétà rì dhi kí kisúlépi nda dré kpà 'ozoá kònìni gò, tálétà rì àruka kí kisúzó bhàle driá.

¹⁸Dì, dhya tálétà àlo dhi nì kisúlépi nda dré ína lìzo bhú dhi kìní na, áyì míri nì làfa nda nì zùzo.

¹⁹Lókyá kòlavú vwàvwà ro dre dhi, màrábà nda kí míri dré agòzo àyì kí azí, ì kòtáró ì dré dhi ì 'o tá àzí áyì làfa sè ngíni ya dhi.

²⁰Dì dhya tálétà nzi dhi kí kisúlépi nda dré atsázó ába túmäní tálétà nzi àruka íbe, tàá dhi: «Míri, mí tayí tá má drígá tálétà nzi kònì i. Mí nò ká, má kisú tálétà nzi àruka i bhàle driá dre. »

²¹Dì Míri nì tà drá dhi: «Áma màrábà dóro má dré kitswálé ka'ile nì, mí 'o dóro! Mí tadhá dhi, mí kitswá má dré ka'ile tà mvá tsà tayílé mí drígá dhi sè. Dì ásà dhi, má nì ámì bha adrélé tà kàdrìkàdrì i drile. Mí alì lenzélé ámì míri vélé! »

²²Gò dhya tálétà rì dhi kí kisúlépi nda dré kpà atsázó tàá dhi: «Míri, mí tayí tá má drígá tálétà rì kònì i. Mí nò ká, má kisú tálétà rì àruka i bhàle driá dre. »

²³Dì Míri nì tà drá dhi: «Áma màrábà dóro má dré kitswálé ka'ile nì, mí 'o dóro! Mí tadhá dhi, mí kitswá má dré ka'ile tà mvá tsà tayílé mí drígá dhi sè. Dì má nì ámì bha adrélé tà kàdrìkàdrì i drile. Mí alì lenzélé ámì míri vélé! »

²⁴Gò dhya tálétà àlo dhi nì kisúlépi nda dré kpà atsázó tàá dhi: «Míri, má nì tá tâle dhi, mí agó tòmbá 'í dhi be. Mí adré mína ngá akónà àrà mí dré ngá kidhízó ko dhi na, adrészó kpà ngá lokó àrà mí dré kórì rìzo ko dhi na.

²⁵Dì má adré tá ngá ro gò, má dré lìzo làfa mína ní zu kìní na. Mí nò ká, ngá mína kònìdhì. ›

²⁶Dì, mírì ní tà drá dhi: «Mì, màrabà kònzi ìndì tòbvo ró dhi 'i! Mí ní tá tâle dhi, má adré ngá akónà àrà má dré ngá kidhízó ko dhi na, adrészó kpà ngá lokó àrà má dré kórì rìzo ko dhi na dhi be.

²⁷Adré dì tá lèá dhi, mí kòbhà tá làfa mána dzó adrészó làfa 'o lendrélé dhi na, kònò má kònì agò dhi, má ní tá làfa mána ní adó àmupi ní be. ›

²⁸Dì mírì nda gò tâá dhi: «Mì do tâlétà kòdhì akódhì drígásè, fèle dhya adrélépi ába mudrí dhi dré.

²⁹Tàko ko, dhya ángùdhi adrélépi ngá íbe dhi dré dhi, à ní akódhì ní ngá nda kí drì timbà gò, akódhì dré adrészó vélé ngá íbe bì lavúlé. Dì, kàdré ína dhya adrélépi ngá àko dhi ní tà sè dhi, à ní ndìndì ngá mvá tsà dré adrészó ába dhi ní do drígásà.

³⁰Kàdré màrabà tàko ró kòdhì ní tà sè dhi, mì bhe akódhì kívì na, àrà tímímvá ro dhi na. Kònàle dhi, à ní adré tongólé, adrészó kpà síkálándrá tsì. »»

Tàbvó tâma kùdù ro dhi

³¹Yésu gò tâá dhi: «Lókyá Móndí ní Mvá dré dra agòzo áyi mìlanzìlanzì na ángéló íbe tití dhi sè dhi, a ní lirí áyi lirírà mìlanzìlanzì ro òpì àdhyà dri.

³²Dì à ní móndyá tití súrú tití i lésè dhi kí kimó akódhì kandrá gò, dré àyi kí kòfalé lanzízó ngóró kábilígyà likílépi dré adrélé kábilígyà kí kòfalé lanzí ndrì íbe dhi tíni.

³³A ní kábilígyà nda kí bha áyi dríágó lésè gò, ndrì nda kí bhàzo áyi lìdzí lésè.

³⁴Dì ópí kàdrì nda ní tâá àyi adrébhá áyi dríágó lésè nda i dré dhi: «Àmì áma Atá dré tâ taní bhàzo àmì dri ní i, mì alì wà! Mì kòkisú òpì áma Atá dré ledélé àmì dré kínó bvò ní bhàma lésè dhi tàyilé ro.

³⁵Tàko ko, ma tá tâbirí íbe gò, mì dré ngá afèzo má dré nyàle. Ma tá yì lovó íbe gò, mì dré yì afèzo má dré mvùle. Ma tá móndí twá 'i gò, mì dré áma ka'ìzo dòle àmì véna.

³⁶Ma tá kítá asólé dhi àko gò, mì dré kítá tosózó má rú. Ma tá drà ro gò, mì dré alìzo áma lomí. Ma tá bădzó na gò, mì dré alìzo áma no. ›

³⁷Dì móndyá gyägya nda kí go logóá drá dhi: «Mírì, mà nò tá mì adrérà'a tâbirí íbe gò, mà dré ngá fèzo mí dré nyàle yà, kó ngalè mà nò tá mì adrérà'a yì lovó íbe gò, mà dré yì fèzo mí dré mvùle yà dhi ángutú?

³⁸Mà nò tá mì adrérà'a móndí twá ro gò, mà dré ámì ka'ìzo dòle àma vélé yà, kó ngalè mà nò tá mì adrérà'a kítá àko gò, mà dré kítá tosózó mí rú yà dhi ángutú?

³⁹Mà nò tá mì adrérà'a drà ro yà, kó ngalè bădzó na yà gò, mà dré lìzo ámì no dhi ángutú? ›

⁴⁰Dì ópí kàdrì nda ní logóá àyi dré dhi: «Má adré tâ bâti ta àmì dré: Tà ángùdhi mì dré tâ 'ole áma adrúpi tàko lavúlé kònì kí àlo dré dhi, mì 'o tâ nda áma tândì dré. ›

⁴¹Dì ópí kàdrì nda nì tàá àyi adrébhá áyi lìdzí lésè nda i dré dhi: «Àmi tátrítrí íbe àmi dri nì i, mì nga àmikya má mìlésè, lìle àtsí adrélépi adrálé ko, Gìká dré ledélé Dzaborò dré ángéló ni íbe dhi na.

⁴²Tàko ko, ma tá tòbirí íbe gò, mì dré ngá afèzo má dré nyale dhi ko. Ma tá yì lovó íbe gò, mì dré yì afèzo má dré mvùle dhi ko.

⁴³Ma tá móndí twá 'i gò, mì dré áma ka'izo dòle àmi véna ko. Ma tá kítá asólé dhi àko gò, mì dré kítá tosózó má rú ko. Ma tá drà ro ìndì bădzó na gò, mì dré alìzo áma no ko. »

⁴⁴Dì àyi nda kì kókpà go logóá drá dhi: «Mírì, mà nò tá mì adrérà'a tòbirí íbe yà, yì lovó íbe yà, móndí twá ro yà, kítá àko yà, drà ro yà, kó ngalè bădzó na yà dhi gò, mà dré tà 'òzo mì dré ko dhi ángutú? »

⁴⁵Dì ópí kàdrì nda nì logóá àyi dré dhi: «Má adré tà báti ta àmi dré: Tà ángùdhi mì dré tá 'ole dhya tåko lavúlé kònì kì àlo dré ko dhi, mì 'o kókpà tà nda má dré ko. »

⁴⁶Dì àyi nda kì lì tà ñòle àyi dri kóná vésè kólyá dhi ni kisú. Dì, móndyá gyägya nda kì àyikya li lídrì kóná vésè kólyá dhi ni kisú. »

Màtayò 26

Yúdà ànzì kì kàdrì ` i` yi ru kitswázó Yésu nì pfu dràle (À kònò kpà Márökò 14:1-2; Lükà 22:1-2; Yòwáni ` 11:45-53)

¹Yésu kòtà tà nda i akílé tití dre dhi, dré tàoá áyi lebèbhá i dré dhi:

²«Ngóró mì dré nile be dhi tíni dhi, tayí kítú rì gwányá Pásikà àdhya dré atsázó. Dì à adré 'ole Móndí nì Mvá nì lefè kàribhá i drígá, i kòtidíró akódhi dràle fa kipakipa dri be dhi bvó. »

³Lókyá nda sè dhi, Yúdà ànzì kì kòwánà kàdrì i àyi kì bhàgo íbe dhi i dré ru kímózó kòwánà kì kàdrì rú be Kàyáfà dhi ni dzó kàdrì na.

⁴Gò i dré ru yìzo kitswázó Yésu nì ru túrúpfú sè, pfùle dràle.

⁵Dì, i adré tá tàá dhi, i kò'o tà nda gwányá Pásikà àdhya tú ko, móndyá zyandre dhi i kòligíró àyi íbe ko sè.

Tòkó àlo dhi dà mìlásì ` Yésu dri (À kònò kpà Márökò 14:3-9; Yòwáni ` 12:1-8)

⁶Àmvolásà dhi, Yésu lì tá Bètànýà na, file Sìmónà atú kàré dré tá rùle dhi nì dzó na gò, dré lirízó mísá làga kitswálé ngá nya.

⁷Gò tòkó àlo dhi dré afízó mòlàngì mvá ledélé àlabbásterè sè, gàlepi mìlásì làgí kyàkyà dhi sè bì dhi be. Dré áyi kisízó mòlàngì nda be ànyi Yésu làga gò, mìlásì nda nì da akódhi dri.

⁸Akódhi nì lebèbhá i kònò tà nda dre dhi, àyi kì togó dré aswázó gò, i dré adrészó tàá àyi kòfalésè dhi: «À kizá tsì mìlásì kòdhì àdho tà sè?

⁹Kònò à ní tá kítswá lagíá làgí be kàdrì gò, làfa ní ní fèzo lemerèbhá i dré! »

¹⁰Yésu dré tà i dré adrélé tâle nda ni nízo kyá gò, tâzoá àyi dré dhi: «Mì adré tòkó kònìdhì ní drì kízá àdho tâ sè? Tà dré 'ole má dré kòdhì, tâ avélépi tò dhi i.

¹¹Àngyá ko, mì adré ngbú adrélé lemerèbhá íbe àmì kòfalé. Di, mì kítswá ngbú adrélé túmání má be ko.

¹²Akódhì dà málásì kònìdhì má rú drìdrì, kítswázó áma rúbhá ledé bhàle mógo na dhi bvó.

¹³Má adré tâ bâti ta àmì dré: Àrà tití bvò wáyi 'ásè à dré dra Rúbí Tani kòdhì ni longozó dhi i 'ásè dhi, à ní kókpà tâ tòkó kònìdhì dré 'ole kòdhì ní tití, akódhì ní tâ kisùzo. »

Yùdásì` i` yi ru kòwánà kàdrì` i` be, kòlefèrò Yésu àyi dri` gá

(À kònò kpà Márökò 14:10-11; Lükà 22:3-6)

¹⁴Àmvolásà dhi, Yésu ní lebèbhá mudrí-drì-rì dhi kí àlo, rú be Yùdásì Ísikàriyótà dhi dré ngàzo lile kòwánà kàdrì i véna,

¹⁵àyi kí lizí tâzoá dhi: «Mì ní àdho ngá afè má dré, má kòlefèrò Yésu àmì drígá be dhi bvó dhi? » Di i dré làfa lò'wa ledélé àrezá sè dhi kí nàzo nyadhi-àlo-drì-mudrí, fèle drá.

¹⁶Di kidhólé lókyá nda sè dhi, Yùdásì dré kidhózó adrélé lókyá dóro Yésu ní lefèzo àyi drígá dhi ní nda.

Yésu i` nya gwányá Pásikà àdhya lebèbhá ni i` be

(À kònò kpà Márökò 14:12-21; Lükà 22:7-14, 21-23; Yòwáni` 13:21-30)

¹⁷Gwányá Mápà tákú àko dhi àdhya ni kítú ní àlo sè dhi, Yésu ní lebèbhá i dré àyi kí kisizó ànyi akódhì làga, akódhì ní lizí tâzoá dhi: «Mì adré lèá dhi, mà kòladhí ngá mí dré gwányá Pásikà àdhya ni nyàzo dhi ángwà? »

¹⁸Di Yésu logó àyi dré dhi: «Mì lì bhàandre na agó dra tadhálé àmì dré dhi véna. Mì kòtà drá dhi: <Dhya tâ tadhálépi dhi adré tâá dhi: Lókyá mána atsá ànyi. Mà ní Pásikà nya áma lebèbhá íbe ámì dzó na. »»

¹⁹Di akódhì ní lebèbhá nda i dré 'òzoá ngóró dré tâ lazilé àyi dri dhi tini. Gò i dré ngá ladhízó kítswázó gwányá Pásikà àdhya ni nya.

²⁰Ìndró kàndrì dre dhi, Yésu i dré tsàzo lirilé mísa làgásè túmání akódhì ní lebèbhá mudrí-drì-rì dhi íbe.

²¹I dré tâ adrérà'a ngá nya dhi 'á dhi, Yésu dré tâzoá dhi: «Má adré tâ bâti ta àmì dré: Àmì kí àlo ní áma lefè kàribhá i drígá. »

²²Di kízà dré àyi kí 'òzo lavulé gò, àyi àlo àlo tití dhi i dré kidhózó adrélé tâá drá dhi: «Míri, zakó ína ma 'i ko? »

²³Akódhì logó dhi: «Dhya drígá sòlepi má be sănì àlo na dhi ní áma lefè nì.

²⁴Tà bâti ró dhi, Mónđi nî Mvá nî lî drâle ngóró tisile akódhi nî tà dri Gîká nî Kúlî na dhi tíni. Di, kizà nî ína adré kâdrì dhya dra Mónđi nî Mvá nda nî lefèlepi dhi dré! Dóro nî tá dhya nda nî tîle ko dhi. »

²⁵Gò Yùdásì adrélépi tá 'ole akódhi nî lefè nda dré tâzoá dhi: «Râbbi, zakó tsì ma 'i ko? » Yésu logó drá dhi: «Ámi tândi mí tà dre. »

Mírì nî rúbhá i kârì` nî be dhi

(À kònò kpà Márokò 14:22-26; Lûkà 22:14-20; 1 Kôrítòbhá i 11:23-25)

²⁶I dré tá adrérâ'a ngá nya dhi 'á dhi, Yésu dré mápà adózó, tà tanî zizo driá Gîká tí gò, ñòzoá fèle áyi lebèbhá i dré gò, tâzoá dhi: «Mì do nyâle. Kònìdhî áma rúbhá 'i. »

²⁷Dré kpà kópò adózó, àwoyà tâzo Gîká dré gò, fèzoá àyi dré gò, tâzoá dhi: «Ámi tití, mì mvu.

²⁸Kònìdhî áma kârì adrélépi tà Gîká dré bhâle ru yîzo móndi íbe dhi nî 'o kîtswâlé tití dhi 'i. Kârì nda nî kutú móndi zyandre i dré, Gîká kôtriró àyi kî takonzì ásà be dhi bvó. ²⁹Má adré tâá àmî dré dhi: Má gò vélé vínò kòdhî tíni dhi nî mvu ko, tsâle kîtú mà dré dra vínò tídhî ro dhi nî mvùzo àmî íbe áma Atá nî Òpì na dhi tú. »

³⁰Di i dré longó ngòzo lenzézó Gîká nî rú sè gò, i dré pfòzo lîle mbâle kòngó Òlívè fa kya drîna.

Yésu longó dhi, Pétéró nî áyi ga

(À kònò kpà Márokò 14:27-31; Lûkà 22:31-34; Yòwâni ` 13:36-38)

³¹Gò Yésu dré tâzoá àyi dré dhi: «Ngâtsi kònìdhî sè dhi, àmî tití mì nî áma tayí adrélé kalóma. Tako ko, Gîká nî Kúlî adré tâá dhi: «Má nî kâbilígyà likilépi nî tsâle drâle gò,

à dré kâbilígyà nda kî pârì 'òzo ayîlé. »

³²Di, má kònga mána drâdrâ 'ásè dre dhi, má nî lî drîdrî àmî kandrâna Gàllilâyà na. »

³³Di Pétéró tà drá dhi: «Tágba móndyá tití dhi i kòtayí mì yà dhi, má kîtswâ mána ámî tayí tâdzí ko! »

³⁴Yésu logó drá dhi: «Má adré tà bâti ta mí dré: Ndîndi ngâtsi ándrò kònìdhî sè, drîdrî àgólòwa dré dra tsírà bhèzo dhi kandrâ dhi, mí nî áma ga vésè be na. »

³⁵Di, Pétéró logó drá dhi: «Tágba kòkîtswâ mà dré drâzo túmâni mí be yà dhi, má kîtswâ tâdzí ámî ga ko. » Gò Yésu nî lebèbhá àruka tití dhi i dré kókpà tâzoá kònìnî.

Yésu zi tà Gîká tí Gètèsémánì na

(À kònò kpà Márokò 14:32-42; Lûkà 22:39-46)

³⁶Àmvolásà dhi, Yésu i dré lîzo lebèbhá nî íbe tsâle àrà rú zile Gètèsémánì dhi na. Gò dré tâzoá àyi dré dhi: «Mì lîrì kònwa, má kòlîrò adrélé tà zi Gîká tí kònâle. »

³⁷Dré Pétéró kî drîzo Zèbèdâyò nî ànzì rì dhi íbe í vésè. Gò akódhi nî togó dré kîdhózó adrélé kizà nya, adrészó lanzile lavûlé.

³⁸Dì dré tazoá àyi dré dhi: «Áma togó adré ñole kizà dré, tsàle ndìndì dràdrà mìle. Mì kàdré kònwa, adrélé tàmìga dri má be. »

³⁹Kòlì vwàle àyi rúsè tsà dre dhi, dré dhèzo áyi mìbhalé bha kìní mi gò, tà zìzo Gìká tí kònini: «Áma Atá, kòkitswá mí mìlésè dhi, mí kòdo kópò kizà àdhya kòdhi má vélésè wà. Dì, mí kò'o ngóró má dré adrélé lèle dhi tíni ko. Be ró dhi, mí kò'o ngóró mí dré adrélé lèle dhi tíni. »

⁴⁰Gò dré gòzo áyi lebèbhá nda i véna, àyi kí kisú ayí na. Dré tazoá Pétéró dré dhi: «Mì kitswá tá tsì adrélé tàmìga dri má be ngbà 'í sàà àlo bwà ko? »

⁴¹Lè mì kàdré tàmìga dri, adrélé kpà tà zi Gìká tí, kòtayíró àmì tà dré tabhile, àmì kí 'òzo dhèle tàkonzi na dhi ko. Bàti, dhyá kí togó àtsi ró adrészò tà dóro 'o. Dì, dhyá kí rúbhá ína yàyà. »

⁴²Gò dré gòzo lìle vésè ni rì sè, tà zi Gìká tí kònini: «Áma Atá, kòkitswá mí dré kópò kòdhi ni dòzo má vélésè má dré mvùá àko ró dhi ko dhi, mí kò'o tà mí dré adrélé lèle 'ole dhi kòdhyá. »

⁴³Gò dré gòzo tódhyá góle àyi kí kisú ayí na, àyi kí mì dré tá adrélé ayí ro dhi sè.

⁴⁴Dì dré àyi kí tayízó gò, gòzo lìle vésè ni na sè tà zi Gìká tí ngóró dré tá zìle drìdrì dhi tíni.

⁴⁵Gò dré gòzo góle áyi lebèbhá nda i véna, tàá àyi dré dhi: «Mì adré dhu rè ayí ko, adrészò lovólé? Mì nò rè ká! Lókyá kitswá dre. À adré 'ole Móndí ni Mvá ni lefè tàkonzi bhá i drígá. »

⁴⁶Mì nga, mà kòlìrò! Dhya adrélépi áma lefè dhi atsá dre! »

Yésu ní rùma

(À kònò kpà Márokò 14:43-50; Lükà 22:47-53; Yòwáni ` 18:3-12)

⁴⁷Gbă kòdhwa, Yésu dré rè dhu adrérà'a tà ta dhi 'á dhi, Yùdásì, akódhi ni lebèbhá mudrí-drì-rì dhi kí àlo dré atsázó. Adrà tá i vésè móndí zyandre angábhá kòwánà kàdrì i vélésè ìndì bhàgo i vélésè dhi i be. Àyi nda i ru tá sápí i fa íbe àyi drígá.

⁴⁸Yùdásì adrélépi 'ole Yésu ni lefè nda tà tá àyi dré dhi, i ni akódhi àdhi 'í yà dhi ni tadhá àyi dré dhi kònini: «Dhya má dré dra kamúlé dhi, akódhi 'í. Mì kòru dì akódhi, lìzo ába. »

⁴⁹Dì Yùdásì nda dré ndíri áyi kisízó ànyi Yésu làga, tàá drá dhi: «Rábbì, módo mí dré! » Dré akódhi ni kamúzó.

⁵⁰Dì Yésu dré logózóá drá dhi: «Áma arúpi, mí 'o tà mí dré alìzo 'òá dhi. » Gò móndyá nda i dré dhèzo Yésu dri, akódhi ni ru.

⁵¹Gbă kòdhwa, dhya adrébhá tá túmání Yésu be dhi kí àlo dré ngàzo áyi sápí asé gò, kòwánà kí kàdrì ni màrabà ni bí bvwàzo kíle.

⁵²Dì, Yésu dré tazoá drá dhi: «Mí logó sápí mína àrà ni na. Àngyá ko, móndyá tití adrébhá sápí ru àyi drígá dhi kí todrà sápí sè. »

⁵³Mí nì ko tâle dhì, má nì tá kitswá áma Atá nì ti lizí gò, akódhì dré ángéló zyandre lavúlé dhì kì amùzo àma kì likí dhì?

⁵⁴Dì, má kò'o tá kònìnì dhì, tà tisile Gìká nì Kúlí na adrébhá tâá dhì, tà kòdhì kì ru 'o kònìnì dhì kì tá dì ru 'o ngíni? »

⁵⁵Gò Yésu dré tâzoá móndyá zyandre nda i dré dhì: «Ma vo kùgú 'i gò, mì dré adrész alìle sápí ibe ìndì fa ibe kitswálé áma ru nì? Kitú àlo àlo tití i sè dhì, má adré tá lirilé tà tadhá tépelò na dhì, mì ru tá ma ko.

⁵⁶Dì, tà kòdhì i atsá tití kònìnì, kitswálé tà prôfétà i dré tisile dhì i kò'oró ru be dhì bvó. » Gò akódhì nì lebèbhá tití dhì i dré akódhì nì tayízó lapázó.

Yésu pfò kòwánà kì kàdrì` i kandrá bhàgo kàdrì` i` be

(À kònò kpà Márokò 14:53-65; Lükà 22:54-55, 63-71; Yòwáni` 18:13-14, 19-24)

⁵⁷Dhya Yésu nì rubhá nda i dré akódhì nì drìzo lìzo ába Kàyáfà, kòwánà kì kàdrì bhàna. Kònàle dhì, tátrítrí kúlí tadhábhá i bhàgo ibe dhì i kímó tá ru.

⁵⁸Dì Pétéró ro dhì, lebè tá ína Yésu lárá ro, tsàle byá kòwánà kì kàdrì nda nì bhà'álé na. Dré fízo lirilé tépelò likíbhá i kòfalé, kitswálé nòá ngalè tà nda nì kùdù nì adrénigíni ya dhì.

⁵⁹Kòwánà kàdrì i bhàgo kàdrì nda ibe tití dhì i adré tá tà adrélé tâle Yésu rú kinzò sè dhì kì nda, kitswázó akódhì nì 'o dràle dhì bvó.

⁶⁰Dì, i kisú tá àyikya tà àlo ko, tágba móndí bì dhì i dré apfòzo tà ta akódhì rú kinzò sè dhì. Kùdù ro dhì, móndí rì dhì i dré apfòzo

⁶¹tâá dhì: «Dhya kònìdhì tà dhì: «Má nì kitswá tépelò Gìká àdhya nì pfu gò, gózo siá kitú na àmvolésè. »»

⁶²Gò kòwánà kì kàdrì dré ngàzo áyi totó lizíá Yésu tí dhì: «Mí logó mína kúlí tà dhyá kònì i dré adrélé tâle mí rú kòdhì i sè ko? »

⁶³Dì, Yésu adré tá ína kíri. Gò kòwánà kì kàdrì nda dré tâzoá drá dhì: «Má adré ámi kodzó Gìká lídrì ro dhì nì rú sè, mí kòsìró móndrà tâzoá àma dré ngalè mí Mèsíyà, Gìká nì Mváagó 'i yà dhì. »

⁶⁴Yésu logó drá dhì: «Ámi tändì mí tà dre. Dì, má adré mána tâá àmì dré dhì: Mì nì Móndí nì Mvá nì no adrérà'a lirilé Gìká rìnyí líyí nì dríágó lésè. Mì nì kpà akódhì nì no adrérà'a agòle ndùrùku bhù na dhì i drísè. »

⁶⁵Dì kòwánà kì kàdrì nda dré áyi kítá lasízó kízà dré gò, tâzoá dhì: «Akódhì dha Gìká dre! Má nì dì go vélé móndí àruka kitswábhá tà ta akódhì rú dhì kì nda àdho tà sè? Mì nò rè ká! Mì yi làdhá dré dhàle Gìká rú kòdhì àmì kí bíbhálé sè dre.

⁶⁶Mì adré dì kisùá ngíni? » Dì i logó dhì: «Akódhì kitswá dràdrà sè! »

⁶⁷Gò i dré tûsú lufúzó akódhì mi, akódhì nì tisìzo. Áyi kì àruka i dré akódhì nì mi tosázó,

⁶⁸adrézó tàá dhi: «Mèsiyà, mí tà rè àma dré pròfétà ro dhi, ngalè àdhi sa mi nì ya dhi ká! »

Pétéró gà Yésu rè

(À kònò kpà Márokò 14:66-72; Lúkà 22:56-62; Yòwáni ` 18:15-18, 25-27)

⁶⁹Lókyá nda sè dhi, Pétéró adré tá ína lirilé kívì na, bhà'lé nda na. Gò mvátòkó àlo màrabbà ro dhi dré áyi kisizó ànyi akódhi làga, tàá drá dhi: «Mi tá kókpà túmání Yésu Gàliláyà lésè dhi be. »

⁷⁰Dì, Pétéró dré ína tà nda ni gázò rè móndyá tití i kandrá, tázooá dhi: «Má nì ngalè mí adré àdho tà ta ya dhi ko. »

⁷¹Gò dré ngázò pfôle bhà'lé nda 'ásè, áyi totó ànyi dzotí làga. Mvátòkó àzya dhi dré akódhi ni nòzo gò, tázooá móndyá adrébhá tá akódhi làga dhi i dré dhi: «Dhya kòndi tá túmání Yésu Nàzàréta lésè dhi be. »

⁷²Dì Pétéró dré gòzo tódyá tà nda ni ga gò, mòndrà sìzo tázooá dhi: «Má nì agó kòdhì ko! »

⁷³Gí ko, móndyá kònàle nda i dré àyi kí kisizó ànyi Pétéró làga, tàá drá dhi: «Mi àyi kí àlo 'i báti! Ámi kúlí kómvo adré tadhá dhi, mí angá ángolésè ya dhi nì. »

⁷⁴Dì Pétéró dré ngázò mòndrà si, tázooá dhi: «Tátrítrí kàdré má dri, má kàdré kinzò ta dhi! Má nì agó kòdhì ko! » Gbà kòdhwa, àgólòwa dré tsírà bhèzo.

⁷⁵Gò kúlí Yésu dré tá tâle dhi dré agázó Pétéró léna. Tà tá dhi: «Drìdrì àgólòwa dré dra tsírà bhèzo dhi kandrá dhi, mí ni áma ga vésè be na. » Dì Pétéró dré pfòzo kívì na gò, ngole ka'ilé ka'ika'i kízà dré.

Màtayò 27

À drì Yésu li` zo ába Pìlátò véna

(À kònò kpà Márokò 15:1; Lúkà 23:1-2; Yòwáni ` 18:28-32)

¹Ngá kòwa dre dhi, kòwánà kàdrì i bhàgo íbe dhi i dré ru yìzo tití, kítswázó Yésu ni 'o dràle dhi bvó.

²Dì i dré akódhi ni adròzo gò, drìzoá lìzo fèá Pìlátò, Rómà kí gùvèrènérè drígá.

Yùdásí` ni dràma

(À kònò kpà Tà 'ole dhi i 1:18-19)

³Dì Yùdásí Yésu ni lefèlepi nda kàtogyà à ñò tá tà Yésu dri kítswálé dràdrà sè dhi dre dhi, akódhi ni togó dré atsázó kízà ro lavulé tà dré tá 'ole dhi ni tà sè. Gò dré làfa lò'wa nyadhi-àlo-drì-mudrì nda kí dòzo, lìzo kítswálé logóá kòwánà kàdrì i véna bhàgo íbe,

⁴tázooá dhi: «Má 'o tàkonzi dre. Tàko ko, má lefè móndí adrélépi tá tà àlo àko i rú dhi kàribhá i drígá, i kò'oró akódhi dràle. » Dì, i logó drá dhi: «Tà kòdhì nò àma ko. Nò mí kòdhya! »

⁵Dì Yùdásí dré làfa lò'wa nda kí bhèzo tépelò na gò, lìzo áyi i dràle.

⁶Kòwánà kàdrì nda ì dré làfa lò'wa nda kí kudhúzó, tázoo dhi: «Àma kí tátrítrí kúlí adré làfa kònìdhí ní bhàma túmání làfa tépelò na dhi íbe dhi ní logá. Tàko ko, kònìdhí làfa fèlé kàrí kutúzó dhi 'i. »

⁷Dí ì dré ru yìzo gò, làfa nda ní dòzo lìdrí rùlepi àlo dhi ní amvú gi, amvú nda kàdréró àrà adrészó móndí alìalì dhi kí àbvò si lána dhi ró.

⁸Tà nda sè dhi, à adré amvú nda ní zi «Amvú kàrí àdhya» atsálé ándrò kònìdhí.

⁹Dí tà longolé pròfétà Yèrémíyà tí dhi dré ru 'òzo kònìni. Akódhi longó tá dhi: «Ì do làfa lò'wa nyadhi-àlo-dri-mudrí ledélé àrezá sè dhi i. Kòdhí tá làgí Isérélè ànzí ì dré bhàle akódhi ní tà sè dhi 'i.

¹⁰Làfa nda sè dhi, ì dré amvú lìdrí rùlepi àdhya ní gìzo, ngóró Míri dré tá tâle má dré dhi tini. »

Yésu pfò Pìlátò kandrá

(À kònò kpà Márokò 15:2-5; Lükà 23:3-5; Yòwáni ` 18:33-38)

¹¹Lókyá nda sè dhi, Yésu dré pfòzo áyi totó Pìlátò, gùvèrènérè nda kandrá. Gò Pìlátò dré lizízóá tíá dhi: «Mí, mí ópí Yúdà ànzí kya 'i? » Yésu logó drá dhi: «Ámi tändí mí tà dre. »

¹²Kòwánà kàdrì i bhàgo íbe dhi ì kàsíkì akódhi dre dhi, dré kúlí logozó ko.

¹³Dí Pìlátò dré lizízóá tíá dhi: «Mí yi tà tití ì dré adrélé tâle mí rú kòdhí i ko? »

¹⁴Dí, Yésu logó ína kúlí àlo ko. Gò gùvèrènérè nda ní líndrí dré gàzo ásà.

À ñò tà Yésu dri kitswálé dràdrà sè

(À kònò kpà Márokò 15:6-15; Lükà 23:13-25; Yòwáni ` 18:39-19:16)

¹⁵Kóná àlo àlo tití, gwányá Pásikà àdhya tú dhi, gùvèrènérè nda adré tá dhya ángùdhi bădzó na, móndí zyandre dhi ì dré adrélé kipèle dhi ní tri àyi dré.

¹⁶Lókyá nda kònàdhí sè dhi, agó àlo rú be Yésu Bárabà, tà ní ní nízo dóro dhi tá bădzó na.

¹⁷Dí móndí zyandre dhi ì kòkímó ru dre dhi, Pìlátò dré àyi kí lizízó tázoo dhi: «Mí adré lèá dhi, má kòtrì àmí dré dhya ángùdhi kòdhya: Yésu Bárabà, kó ngalè, Yésu adrélé zile Mèsiyà ro kònìdhí? »

¹⁸Lizí tá àyi kònìni tàko ko, ní tá tâle dhi, ì fè tá Yésu í drígá ngbà 'í dirèma sè dhi be.

¹⁹Pìlátò dré tá adrérà'a lirílé tàbvó tárà na dhi 'á dhi, akódhi ní tòkó dré móndí mùzo tâá drá dhi: «Mí kò'o agó tà àko í rú kòdhí kònzi ko. Àngyá ko, ándrò kònìdhí, má abì toróbí akódhi ní tà dri gò, áma drì dré adrészó abílé tà nda sè tò. »

²⁰Dí kòwánà kàdrì i bhàgo íbe dhi ì dré móndí zyandre nda kí kodzozó, ì kòziró Pìlátò tí kòtriró Bárabà gò, Yésu ní 'òzo dràle.

²¹Gò Pìlátò dré gózo lizíá àyi tí dhi: «Mí adré lèá dhi, má kòtrì àmí dré dhya ángùdhi àyi rí kònì i kòfalé dhi kòdhya? » Dí ì logó dhi: «Bárabà! »

²²Pilátò gò lizíá dhi: «Má ni dì àdho 'o Yésu adrélé zile Mèsiyà ro kònìdhì sè? » Dì àyi tití nda i logó dhi: «Mí tidí akódhì fa kipakipa dri! »

²³Pilátò gò lizíá dhi: «Akódhì 'o àdho tà kònzi i? » Dì i dré gòzo adrélé tetrélé rinyí sè, adrészó loyóá dhi: «Mí tidí akódhì! »

²⁴Pilátò dré nòzoá dhi, i kítswá tá vélé tà àlo 'o bwà ko, be ró dhi, móndyá zyandre nda i adré tá 'ole liglé i be. Dì dré yi adozó, áyi drigá dzizo àyi tití i mi gò, tàzoá dhi: «Ma tà àlo àko má rú dhya kònìdhì ni kàrì ni tà sè! Akódhì ni kàrì ni ngo àmi dri! »

²⁵Dì móndyá zyandre tití nda i dré logozóá dhi: «Akódhì ni kàrì kàdré ngôle àma dri, àma ki ànzì ibe wà! »

²⁶Gò Pilátò dré Bárabà ni trizo àyi dré. Dré Yésu ni 'òzo bhwale gò, akódhì ni fèzo kitswálé tidilé fa kipakipa dri dhi bvó.

Sòdá i` gu Yésu

(À kònò kpà Márokò 15:16-20; Yòwáni` 19:2-3)

²⁷Gò Pilátò ni sòdá i dré Yésu ni drizo fizo ába gùvèrénérè nda ni dzó kàdrì na. I dré sòdá àruka tití dhi ki azizó ru amú àyi ibe akódhì làgásè.

²⁸Gò i dré akódhì ni kítá ki tuvùzo rúásà, kánzò kă asozó rúá.

²⁹I dré fanzì kùtsi ró dhi ni pàzo kùla ró asolé driá gò, kòzó bhàzo dríagó ni lésè. Dì i dré àyi ki kórókó titizo akódhì kandrá adrészó akódhì ni gu, adrészó tàá dhi: «Mòdo mí dré, ópí Yúdà ànzì kya ni! »

³⁰I dré adrészó túsú lufú rúá gò, i dré kòzó nda ni adozó adrészó akódhì ni drì tswa ásà.

³¹I kògu akódhì kònini dre dhi, i dré kánzò nda ni avùzo rúásà, gòzo akódhì ni kítá ki tosó rúá. Gò i dré akódhì ni drizo lìzo ába, kítswálé tidilé fa kipakipa dri dhi bvó.

Yésu ni tidima fa kipakipa dri dhi

(À kònò kpà Márokò 15:21-32; Lükà 23:26-43; Yòwáni` 19:17-27)

³²I dré tá adréra'a apfòle kònalsè dhi 'á dhi, i dré drì sizo agó àlo rú be Símónà, angálépi Kíréne lésè dhi be. Dì i dré akódhì nda ni 'òzo rinyí sè adrélé fa kipakipa Yésu àdhya ni do.

³³Gò i dré lìzo Yésu be tsàle àrà rú zile Gòlògótà dhi na. (Rú nda kòdhì adré lèá tali dhi «Àrà drifà àdhya».)

³⁴Kònàle dhi, i dré vínò amulé àlòkò kùdzí dhi be dhi ni fèzo akódhì dré mvùle. Dì, akódhì kòtabhì ngá nda dre dhi, dré ína gàzoá rè.

³⁵Dì i dré akódhì ni tidizó fa kipakipa dri gò, akódhì ni kítá ki lanzizó àyi kòfalésè dzégé sè. ³⁶Gò i dré lirizó adrélé tà likí akódhì làgásè.

³⁷À tisì tá tà àyòzo akódhì dri dhi wárágà dri gò, wárágà nda ni dìzo akódhì drile. À tisì tá dhi: «Kònìdhì Yésu, ópí Yúdà ànzì kya 'i. »

³⁸À tidí tá kpà kùgubhá rì dhí i fa àruka i drísè akódhi làgásè: àlo ni dríágó ni lésè, àzya ni lìdzí ni lésè.

³⁹Móndyá adrébhá tá lavúlé àrà nda 'ásè dhí i adré tá akódhi ni lodhá, adrészó àyi ki drí ya,

⁴⁰adrészó tàá dhí: «Mí tá kítswálépi tépelò pfu gózo siá kítú na àmvolésè ni, mí tídri dí ámi tändi wà! Mí kàdré Gíká ni Mváagó 'i báti dhí, mí así fa kípakípa kòdhí drilésè wà! »

⁴¹Kòwánà kàdrí i, tátrítrí kúlí tadhábhá i bhàgo íbe dhí i adré tá kpà akódhi ni gu kònìnì, adrészó tàá dhí:

⁴²«Akódhi tídri móndí àruka i 'í. Di, kítswá ína áyi tändi ni tídri bwà ko! Kàdré ópí ìsérélè ànzì kya 'i báti dhí, kásí nyànomvá fa kípakípa drilésè gò, mà kòka'iró akódhi!

⁴³Bhà tá áyi tà ka'lka'i Gíká léna, adrészó tàá dhí: «Ma Gíká ni Mváagó 'i. » Gíká kàdré dí akódhi ni le báti dhí, kápá akódhi nyànomvá dràdrà lésè. »

⁴⁴Kùgubhá tidílé akódhi be nda i adré tá kpà akódhi ni lodhá kònìnì.

Yésu ni dràma

(À kònò kpà Márökò 15:33-41; Lúkà 23:44-49; Yòwáni ` 19:28-30)

⁴⁵Kidholé kítú rírí sè dhí, tímímvá dré bvò ni mì dòzo wáyi, tsàle sáà na kítú rírí àmvolésè dhí na.

⁴⁶Anyíanyí sáà na sè dhí, Yésu dré liyízó kúlí 'u'ù sè tázóá dhí: «Èlóyì, Èlóyì, lémà sàbàkàtánì? » Kòdhí adré lèá tálé dhí: «Áma Gíká, áma Gíká, mí tayí ma àdho tà sè? »

⁴⁷Móndí àruka adrébhá tá kònàle dhí i kòyi kúlí nda dre dhí, i dré tázóá dhí: «Akódhi adré Èlíyà ni zi. »

⁴⁸Gò àyi ki àlo dré ràzo mbèlè ngá vòdhovódho dhí ni adó, vìnègári dàzo lána, dròzoá kòzó sile gò, tingázóá kuru fèle Yésu dré mvùle.

⁴⁹Di, àyi ki àruka i dré tázóá dhí: «Mí tayí rè akódhi, mà kònòró ngalè Èlíyà ni atsá akódhi ni tídri yà dhí. »

⁵⁰Yésu dré gózo tódyá trèlé kúlí 'u'ù sè gò, áyi lídrí tayízó lile.

⁵¹Gbà lókyá nda sè dhí, kítá 'ile tépelò ni 'a lakízó dhí dré lasízó 'a be rì, kidholé drí lésè tsàle pá na. Bvò dré ru kosézó gò, kírà i dré togázó.

⁵²Moggó i dré ru lanzízó gò, móndí lolo Gíká àdhya bí dràbhá dre dhí ki rúbhá i dré ngàzo dràdrà 'ásè.

⁵³Àyi nda i kòpfò moggó i lésè dre dhí, i dré tifizó Yèrúsalémà na Yésu ni ngàma dràdrà 'ásè dhí àmvolésè gò, i dré agázó móndí bí dhí i mi.

⁵⁴Rómà kí sòdá kí kàdrì i sòdá ní íbe adrébhá Yésu ní líkí dhi i kònò kàdikàdi nda túmání tà tití ru 'obhá nda íbe dre dhi, tìrì dré gàzo àyi léna bǐ. Dì i dré tàzoá dhi: «Dhya kòdhí tá ína Gíká ní Mváagó 'i bàti! »

⁵⁵Tòkó bǐ dhi i tá kpà kònàle, adrélè tà nda kí no lárá ro. Àyi nda i lebè tá Yésu Gàliláyà lésè, adrészò tà 'o drá.

⁵⁶Àyi kòfalé dhi tá: Màríyà Mágàdàlénè, Màríyà Yakóbhò kí andre Yòséfà be dhi, tsàle Zèbèdáyò ní ànzi kí andre.

Yésu ní rúbhá bhàma mógo na dhi

(À kònò kpà Márokò 15:42-47; Lükà 23:50-56; Yòwáni ` 19:38-42)

⁵⁷Indró kàndrì dre dhi, agó àlo rú be Yòséfà dhi dré lìzo Pìlátò véna. Akódhi nda tá ngá líyí angálépi Àrimàtayà lésè dhi 'i. Atsá tá kpà Yésu ní lebèlepi ró.

⁵⁸Dì akódhi kòtsa Pìlátò véna dre dhi, dré Yésu ní rúbhá zìzo tíá. Gò Pìlátò dré tàzoá dhi, à kòfè rúbhá nda drá.

⁵⁹Dì Yòséfà dré lìzo rúbhá nda ní do lambélé kítá kemve dóro dhi sè gò,

⁶⁰lìzo bhàá áyi tändi ní mógo tídhí i dré tá 'ole gàle kírà na dhi na. Dré kírà kàdrì dhi ní alízó bhàle mógo nda tí gò, lìzo.

⁶¹Màríyà Mágàdàlénè i Màríyà àzya be dhi i lirí tá mógo nda kandrá, adrélè tà nda kí no.

À bhà sòdá i kítswálé mógo líki'

⁶²Kítú bvóá dhi sè, kòdhí adré tàá dhi, kítú adrészò tà ledé dhi àmvolésè dhi, kòwánà kàdrì i Fàrisayò íbe dhi i dré lìzo Pìlátò véna,

⁶³táá drá dhi: «Atálágó, tà àlo dhya móndí ki lítílépi kòdhí dré tá tâle dré adrérà'a lídrì íbe dhi 'á dhi agá ína àma léna dre. Akódhi tà tá dhi: «Kítú na àmvolésè dhi, má ní nga dràdrà 'ásè. »

⁶⁴Dì ásà dhi, mí kòfè tolí adrészò akódhi ní mógo líki tsàle kítú ní na tú. À kò'o kònìnì ko dhi, akódhi ní lebèbhá kí kítswá lìle akódhi ní rúbhá kugù, gózo tâá móndí i dré dhi, akódhi nga dràdrà 'ásè dre. Dì tà nda ní go vélé móndí ki lítí wáláká ní ní lavú. »

⁶⁵Pìlátò logó àyi dré dhi: «Sòdá i be kònwárè. Mì kòdrì àyi lìzo àyi ki bha adrélè mógo nda ní líkí ngóró mì dré nile 'ole dhi tíni. »

⁶⁶Dì i dré lìzo kírà mógo nda tí dhi ní kíkpà gò, i dré sòdá nda kí bhàzo adrélè líkiá.

Màtayò 28

Yésu ní ngàma dràdrà 'ásè dhi

(À kònò kpà Márokò 16:1-10; Lükà 24:1-12; Yòwáni ` 20:1-10)

¹Sàbátù àmvolésè, kítú ní àlo pósò àdhya sè dhi, Màríyà Mágàdàlénè i Màríyà àzya be dhi i dré ngàzo drùbhì kínó lìle Yésu ní mógo no.

²Gbă kòdhwa, bvò dré ru kosézó rìnyí sè gò, ángéló Míri àdhya dré asízó bhù lésè alìle kírà li mógo nda tísè gò, dré lirízó kírà nda dri.

³Akódhi ni làsú tá lagulagu ró, ìndì akódhi ni kítá i tá kemve kpírikpíri.

⁴Dì sòdá adrébhá tá mógo nda ni likí dhì i dré lyàzo kwàkwà tirì dré gò, i dré ledhézó kíní mi atsálé àbvò i tíni.

⁵Dì, ángéló nda dré tàzoá tòkó nda i dré dhì: «Mì ro ngá ko! Má ni tâle dhì, mì adré Yésu tidílé fa kipakipa dri dhì ni nda kòdhya dhì be.

⁶Akódhi kònwa yókódhó. Nga ína dràdrà 'ásè ngóró dré tá tâle dhì tíni. Mì alì àrà tá rúbhá ni ni bhàzo dhì ni no.

⁷Dì mì lì mbèlè tâá akódhi ni lebèbhá i dré dhì: «Akódhi nga dràdrà 'ásè dre. Adré lìle àmì kandrána Gàliláyà na. Kònale dhì, mì ni akódhi ni no. » Nyànomvá dhì, má longó tâ nda kòdhì i àmì dré dre! »

⁸Dì tòkó nda ki togó dré gàzo tirì sè bì ìndì arí sè bì gò, i dré ngàzo mógo nda lésè, ràle kitswálé rúbí nda ni longó Yésu ni lebèbhá i dré.

⁹Gbă kòdhwa, i dré ru kisúzó Yésu be gò, dré tâzoá dhì: «Mòdo àmì dré! » Dì i dré ayì ki kisízó ànyì akódhi làga, ledhélé akódhi ni pá ru, akódhi ni lindrì bhàzo.

¹⁰Dì Yésu dré tâzoá àyì dré dhì: «Mì ro ngá ko! Mì lì tâá áma adrúpi i dré dhì, i kòlì Gàliláyà na. Kònale dhì, i ni áma no. »

Tà sòdá mógo likí` bhá dhì i` dré longolé dhì

¹¹Tòkó nda i dré tá adrérà'a láti 'á dhì, sòdá adrébhá tá mógo nda ni likí dhì ki àruka i dré lìzo bhàandre na, tâ tití lavúbhá nda ki longó kòwánà kàdrì i dré.

¹²Dì kòwánà kàdrì nda i kòkímó ru bhàgo íbe dre dhì, i dré ru yìzo gò, làfa fèzo bì sòdá nda i dré,

¹³tâzoá àyì dré dhì: «Lè mì kòtà dhì: «Akódhi ni lebèbhá i atsá tá ngátsi sè akódhi ni rúbhá kugù, mà dré tá adrérà'a ayí ko dhì 'á. »

¹⁴Dì tâ nda ni rúbí kòlì dhèle gùvèrènérè bína dhì, mà ni àmì ki tará ga akódhi kandrá, tâ àlo kònzi dhì kàtsáró àmì rú ko dhì bvó. »

¹⁵Dì sòdá nda i dré làfa nda ni dòzo gò, i dré 'òzoá ngóró tâle àyì dré dhì tíni. Dì tâ nda kòdhì dré la'úzó Yúdà ànzì i kòfalé, lìle drìdrì atsálé ándrò kònìdhì.

Yésu tayí` àzí kàdri` àyì lebèbhá i drí` gá

(À kònò kpà Márökò 16:14-18; Lükà 24:36-49; Yòwáni` 20:19-23; Tà 'ole dhì i 1:6-8)

¹⁶Gò Yésu ni lebèbhá mudrí-drì-àlo dhì i dré ngàzo lìle Gàliláyà na, mbàle kòngó Yésu dré tá tadhálé àyì dré dhì drìna.

¹⁷Dì i kòtsa akódhi ni no dre dhì, i dré ledhézó àyì ki kórókó titì akódhi kandrá, akódhi ni lindrì bhàzo. Dì, àyì ki àruka i kayí tâ àyikya tâ nda àyì léna.

¹⁸Gò Yésu dré áyi kisízó ànyi àyi tití dhì i làga, tàá àyi dré dhì: «Gìká afè má dré rìnyí adrészó tà tití bhù na ìndì bvò dri dhì i drìle dhì dre.

¹⁹Dì ásà dhì, mì lì móndí súrú tití i 'ásè dhì kì 'o atsálé áma lebèbhá i ró, bàtísimò fèzo àyi dré Gìká Atá ni rú sè, Mváagó ni rú sè ìndì Tírí Lólo ni rú sè.

²⁰Mì kòtadhá tà tití má dré tâle mì kò'o dhì i àyi dré adrélé 'ole. Dì mì yi rè ká! Má ni ngbú adré túmãní àmì íbe, tsâle byá lókyá kùdù na. »

Márokò

Márokò 1

Yòwánì` Bâtísímò fèlepi ledé láti Mírì Yésu dré

(À kònò kpà Màtayò 3:1-12; Lükà 3:1-18; Yòwánì` 1:19-28)

¹Kònìdhì Rúbí Tanì, Yésu Krísto, Gìká nì Mváagó nì tà dri dhi 'i.

²Ngóró pròfétà Èsáyà dré tisile Gìká nì Kúlì na dhi tíni dhi, Gìká tà tá dhi: «Mí nò ká! Má nì dhya dra áma kúlì longólépi dhi ni mu lìle mí kandrána. Akódhì nda nì láti ledé mí dré.

³Akódhì dhya adrélépi kúlì loyó duku na dhi 'i. Adré tàá dhi: «Mì kòledé láti Mírì dré alìzo! Mì kòlotó láti atsálé pyà akódhì dré! »

⁴Dì Yòwánì Bâtísímò fèlepi pfò tá duku na gò, kidhólé adrélé bâtísímò fe móndí i dré. Adré tá longoá àyi dré dhi, i kòladzà àyi kí togó gò, bâtísímò dòzo, Gìká kòtriró àyi kí tàkonzi i be dhi bvó.

⁵Dì móndí zyandre dhi i adré tá apfòle bvò wäyi Yùdáyà àdhya lésè ìndì Yèrusalémà lésè, alìle Yòwánì vélé. I adré tá àyi kí tàkonzi kí ta ngádra 'á gò, akódhì dré adrészò bâtísímò fe àyi dré yíandre Yòròdánè àdhya na.

⁶Yòwánì asó tá kítá ledélé kàmílò bhí sè dhi í rú, káfà ledélé kà'wá kíní sè dhi nì 'ízo àyi kípílé 'á. Adré tá kísa nya, adrészò kpà apé mbì na dhi nì mbe.

⁷Adré tá longoá móndí i dré dhi: «Dhya àlo áma lavulépi rinyí sè dhi nì adhé má bvó. Má kitswá akódhì nda nì lindrì sè ko. Má kitswá ndìndì tandile akódhì nì kámokà bă tri bwà ko.

⁸Má adré mána bâtísímò fe àmí dré yí sè. Dì, akódhì nì ína bâtísímò fe àmí dré Tíri Lólo sè. »

Yésu ni bâtísímò dòma, i`ndi` akódhì ni tabhìma duku na dhi

(À kònò kpà Màtayò 3:13-4:11; Lükà 3:21-22; 4:1-13)

⁹Lókyá nda sè dhi, Yésu dré angázó Nàzàrétà Gàliláyà le dhi lésè, alìle bâtísímò do Yòwánì vélé Yòròdánè na.

¹⁰Dì gbà lókyá Yésu dré tá adrérà'a apfòle yí lésè dhi 'á dhi, dré bhù nòzo ru lanzírà'a gò, Tíri Lólo nòzo asírà'a kòbhòlà tíni adhélé í dri.

¹¹Gò kúlì dré apfòzo bhù lésè tàá dhi: «Mí áma Mváagó má dré lèle tò dhi 'i. Áma togó adré kinílé ámi tà sè tò. »

¹²Gbà lókyá nda sè dhi, Tíri Lólo dré Yésu ni drìzo lìzo ába duku na.

¹³Kònàle dhi, Sàtánà dré akódhì ni tabhìzo lítílé kítú nyadhi-rì. Akódhì adré tá adrélé kà'wá mbì na dhi íbe, ìndì ángéló i adré tá akódhì ni ledé.

Yésu kidhó áyi lebèbhá kí azí

(À kònò kpà Màtayò 4:12-22; Lükà 4:14-15; 5:1-11)

¹⁴Yòwánì ní rùma bhèle bădzó na dhì àmvolésè dhì, Yésu dré lìzo bvò Gàliláyà àdhya na gò, kìdhólé adrélé Rúbí Tani angálépi Giká vélésè dhì ní longó móndí i dré.

¹⁵Adré tá longóá dhì: «Lókyá kitswá dre. Giká ní Òpì atsá ànyì dre. Mì kòladzà àmi kì togó agòzo Giká vélé! Mì kòka'i Rúbí Tani! »

¹⁶Kítú àlo, Yésu dré tá adrérà'a atsílé tăpăriandre Gàliláyà àdhya mìlésè dhì 'á dhì, nò tá Símónà i adrúpi ní Andréyà be, adrérà'a àyi kì kimbá bhe yí na. Àngyá ko, àyi tá kosyá bhebhá 'í.

¹⁷Yésu dré tăzoá àyi dré dhì: «Mì alì má vésè. Kìdhólé nyànomvá dhì, mì gò vélé adrélé kosyá bhebhá i ró ko. Má ní àmi kì 'o adrélé móndí ndabhá i ró. »

¹⁸Dì gbă lókyá nda sè dhì, i dré àyi kì kimbá kì tayízó gò, i dré ngàzo adrélé akódhì ní lebè.

¹⁹Yésu kòlì vwàle tsà dre dhì, dré Yàkóbhò i adrúpi ní Yòwánì be, Zèbèdáyò ní ànzì i ró dhì kì nòzo, adrérà'a àyi kì kimbá kì mì ledé bwátù na.

²⁰Gbă kòdhwa, Yésu dré àyi kì azízó gò, i dré àyi kì atá Zèbèdáyò ní tayízó àzibhá ní ibe bwátù na, alìzo Yésu vésè.

Yésu dro tiri' kònzi agó àlo dhì lésè

(À kònò kpà Lúkà 4:31-37)

²¹Àmvolásà dhì, Yésu i dré lìzo lebèbhá ní ibe tsàle bhàandre Kàpàrànàwúmà àdhya na. Sàbátù kàtsá dre dhì, Yésu dré fízo Yúdà ànzì kì lìsámbò dzó na gò, kìdhólé adrélé àyi kì tadhá.

²²I adré tá akódhì ní yi sibhálé be ngbo, tà dré adrélé tadhálé dhì kì tà sè. Tàko ko, akódhì ní kúlí i tá lanzílanzì ro. Adré tá ína àyi kì tadhá ngóró tátrítrí kúlí tadhábhá kya tíni ko.

²³Gbă kòdhwa, agó àlo àyi kì lìsámbò dzó nda 'á adrélépi tiri' kònzi ibe í léna dhì dré ngàzo trèle,

²⁴yòzoá dhì: «Á! Yésu Nàzàrétà lésè ní, tsítsì àma kòfalésè mí be dhì, àdho tà 'í? Mì alì àma kì tà 'o akílé? Má ní mí àdhi 'í ya dhì be. Mì Dhya lólo Giká àdhya 'í! »

²⁵Gò Yésu dré ngàzo ligílé tiri' kònzi nda be, tăzoá dhì: «Mí atsú ámi ti! Mí pfò agó kònìdhì lésè! »

²⁶Dì tiri' nda dré agó nda ní kizízó rinyí sè, trèzo kúlí 'u'ù sè gò, pfòzo lásà lìle.

²⁷Móndyá tití kònàle nda kì líndrí dré gàzo bhwàbhwa gò, i dré adrészó liziá àyi kòfalésè dhì: «Kònìnì ní àdho tà 'í? Mì yi rè tà tídhì akódhì dré adrélé tadhálé kúlí lanzílanzì i sè dhì i ká! Adré ndìndì tolí fe tiri' kònzi i dré gò, i dré adrészó akódhì ní kúlí ka'i 'ole. »

²⁸Dì Yésu ní rúbí dré la'úzó mbèlè bvò wâyi Gàliláyà àdhya 'ásè.

Yésu tidri' dràbhá i, móndi' tiri' kònzi i' be àyi léna dhì i' be

(À kònò kpà Màtayò 8:14-17; Lúkà 4:38-41)

²⁹Yésu ì kàpfò lìsámbò dzó nda lésè dre dhi, ì dré lìzo Yàkóbhò íbe ìndì Yòwánì be tsàle Sìmónà kì dzó Àndréyà be dhi na.

³⁰Dì, Sìmónà ni àdrá adré tá ína ayílé lángá na, rúbhá ni dré tá adrélé àtsi ró dhi sè. Gò tà nda ni tázò Yésu dré.

³¹Dì dré áyi kisízó ànyi tòkó nda làga, akódhi ni drígá ru, akódhi ni tingázó kuru gò, rúbhá àtsi nda dré pfòzo rúásà. Gò tòkó nda dré kidhózó ngá fe àyi dré nyàle.

³²Ìndró sè, kitú kònđì dre dhi, à dré dràbhá tití dhi kì adzízó túmäní móndyá tití tirí kònzi íbe àyi léna dhi íbe Yésu vélé.

³³Móndyá tití bhàandre nda 'á dhi ì kìmó tá ru adrélé dzó nda tí.

³⁴Dì Yésu dré móndí bì adrébhá tá drà twátwa íbe dhi kì tindrízó. Dré kpà tirí kònzi bì dhi kì dròzo topfòle móndí i lésè. Dì, adré tá ína kúlí logá tirí kònzi nda i dré, ì dré nile akódhi àdhi 'ì ya dhi be dhi sè.

Yésu tatsí Gìká ni kúlí longóbe bvò Gàlìlàyà àdhya 'ásè

(À kònò kpà Lükà 4:42-44)

³⁵Drùbhì kínó, ngá pfùnipfùni sè dhi, Yésu dré pfòzo lìle àrà móndí àko dhi na gò, kidhólé adrélé tà ta Gìká be.

³⁶Sìmónà i arúpi ni íbe dhi ì dré ngàzo adrélé akódhi ni nda.

³⁷Ì kòkisú akódhi dre dhi, ì dré tázòá drá dhi: «Móndyá tití dhi ì adré ámi nda. »

³⁸Dì akódhi logó àyi dré dhi: «Mà kòlì bhà àma làgásè dhi i 'ásè, má kòlongóró kpà Gìká ni kúlí kònàle be dhi bvó. Tako ko, tà nda tà má dré alìzo 'òá dhi 'ì. »

³⁹Gò dré ngàzo tatsílé bvò wâyi Gàlìlàyà àdhya 'ásè, Gìká ni kúlí longóbe Yúdà ànzì kì lìsámbò dzó i 'ásè, ìndì tirí kònzi kì drobe topfòle móndí i lésè.

Yésu tidrí agó àlo kàrí dré rùle dhi

(À kònò kpà Mâtayò 8:1-4; Lükà 5:12-16)

⁴⁰Kitú àlo dhi, agó àlo kàri dré rùle dhi alì tá adhélé áyi kórókó tití Yésu kandrá, akódhi ni ti lizízó tázòá dhi: «Mí rìnyí íbe kítswázó áma temvé tindrílé, mí kòlè dhi. »

⁴¹Dì Yésu dré kízà dòzo áyi togó na akódhi ni tà sè gò, drígá kidzìzo akódhi ni tabè, tázòá drá dhi: «Má lè 'ì. Mí kàdré kemve kpírikpíri wà! »

⁴²Gbă kòdhwa, kàri drà nda dré ngàzo agó nda rúsè gò, dré adrízó.

⁴³Gbă lókyá nda sè dhi, Yésu dré láti fèzo akódhi dré lìzo, tà lazízó drià kònìnì:

⁴⁴«Mí kònò dóro, mí kòlongóró tà kòdhì dhya àlo dré ko. Be ró dhi, mí lì mína ámi tadhá kòwánà dré nôle, ìndì mí fè ngá mòbòmà ro Gìká dré ámi temvema sè ngóró Mósè ni tátrítrí kúlí dré adrélé tâle dhi tíni, tadházóá móndí i dré dhi, mí adrí dre káyà dhi. »

⁴⁵Dì, agó nda kòlì dre dhi, dré ína kidhózó adrélé tà atsálépi í rú nda ni longó ngádra 'á, adrézó rúbí ni ni 'o la'ulé. Ásà dhi, Yésu kitswá tá góle vélé fíle bhàandre àlo dhi

na ngádra 'ásè bwà ko. Be ró dhi, adré tá ína adrélé àrà móndí àko dhi i 'ásè. Di, tágba kònìnì dhi, móndí zyandre dhi i adré tá angálé àrà tití i lésè alile akódhi vélé.

Márokò 2

Yésu tiidrí agó àlo pá be àbvò ro dhi

(À kònò kpà Mátayò 9:1-8; Lúkà 5:17-26)

¹Kítú àruka i kòlavú dre dhi, Yésu dré gòzo gòle Kàpàrànwumà na gò, à dré yìzoá tèle dhi, akódhi i bhàna.

²Di móndí zyandre lavulé dhi i dré alìzo ru kímó gale dzó nda léna bì. Àrà adrészó dhyá ki totó ndindì kivì na dzó nda tí dhi tá vélé yókódhó. Yésu dré tá adréra'a Gìká ni kúlì longó àyi dré dhi 'á dhi,

³móndí àruka i dré atsázó agó àlo pá be àbvò ro, àyi ki su i dré adrélé adólé kíndri dri dhi be.

⁴Di, móndyá zyandre nda ki tà sè dhi, i kítswá tá àyikya láti kisú fízo ába Yésu véna bwà ko. Di i dré ngàzo mbàle ába dzó nda drìna gò, dzó nda ni drì awú. I kòlò láti dre dhi, i dré akódhi ni tirizó sile kíndri dré adrészó ayilé driá dhi dri, Yésu kandrá.

⁵Di Yésu kònò àyi ki tà ka'ika'i dre dhi, dré tazoá agó pá be àbvò ro nda dré dhi: «Áma mvá, à trì ámi tàkonzi i dre. »

⁶Di, tátrítrí kúlì tadhábhá àruka adrébhá tá lirilé kònàle dhi i dré dhèzo adrélé kisùá àyi léna dhi:

⁷«Dhya kòndi adré tà ta kònìnì àdho tà sè? Adré ína Gìká ni dha! Àdhi ni kítswá tàkonzi tri ni, kàdré ngba 'í Gìká 'i kalóma ko dhi? »

⁸Gbà kòdhwa, Yésu dré tà i dré adrélé kisùle nda ni nìzo kyá gò, tazoá àyi dré dhi: «Mì adré àmikya tà kisù kònìnì àdho tà sè?

⁹Tà kítswálé tèle mbèlè agó pá be àbvò ro kònìdhi dré dhi, ángùdhi 'i: «À trì ámi tàkonzi i dre» dhi, kó ngalè, «Mì nga, mí do ámi kíndri, ìndi mí kìdhó atsí to» dhi?

¹⁰Má adré lèá mì kònì dhi, Móndí ni Mvá rìnyí ibe adrészó tàkonzi tri bvò dri. » Di dré tazoá agó pá be àbvò ro nda dré dhi:

¹¹«Má adré tåá mí dré dhi: Mì nga, mí do ámi kíndri, ìndi mí nzì mí bhàna! »

¹²Gbà kòdhwa, agó nda dré ngàzo áyi kíndri do, pfòzo lìle móndyá tití i misè. Di àyi tití nda ki líndri dré gàzo bhwàbhwa gò, i dré ngàzo adrélé Gìká ni rú bha kùle, adrészó tåá dhi: «Mà nò rè tädzí tà lású be kònìnì dhi ko! »

Yésu azí Lévi

(À kònò kpà Mátayò 9:9-13; Lúkà 5:27-32)

¹³Amvolásà dhi, Yésu dré gòzo tódhyá pfòle tâpáríandre Gàliláyà àdhya làgana. Móndí zyandre lavulé dhi i adré tá alile akódhi vélé gò, dré adrészó àyi ki tadhá.

¹⁴Dré tá adrérà'a lavúlé tâpâriandre nda mîlésè dhi 'á dhi, dré Lévi Àlàfáyò ni mvá ni nòzo adrérà'a lirílé mèdáyì lagírà na. Dré tâzoá drá dhi: «Mí lebè ma! » Di Lévi nda dré ngàzo adrélé akódhi ni lebè.

¹⁵Bvóá dhi, Yésu ì dré lîzo lebèbhá ni íbe Lévi ni dzó na gò, ì dré lirízó mísá làgásè adrélé ngá nya túmâni mèdáyì lagíbhá íbe bî, ìndì móndí adrélé nôle tàkonzìbhá ro dhi íbe bî. Tako ko, móndí bî lású be kònìnì dhi ì adré tá Yésu ni lebè.

¹⁶Di, tátrítrí kúlí tadhâbhá àruka adrébhá tá kpà Fàrisayò ro dhi ì kònò akódhi adrérà'a ngá nya túmâni móndí lású be kònìnì dhi íbe dre dhi, ì dré ngàzo lizíá akódhi ni lebèbhá i tí dhi: «Akódhi adré ngá nya túmâni mèdáyì lagíbhá íbe ìndì tàkonzìbhá íbe àdho tà sè? »

¹⁷Yésu koyi tà lizilé nda dre dhi, dré tâzoá àyi dré dhi: «Móndyá rúbhá be dóro dhi ì ndà gà kódzó ko na. Be ró dhi, móndyá drà ro dhi ì adré àyikya ndàá àyi. Má alì móndyá adrébhá àyi kî no gyägya dhi kî azí kòdhya ko. Be ró dhi, má alì mána tàkonzìbhá kî azí kòdhya. »

À lizí Yésu tàbirí mvòma ni tà dri

(À kònò kpà Mâtayò 9:14-17; Lükà 5:33-39)

¹⁸Kítú àlo dhi, Yòwánì Bâtisimò fèlepi ni lebèbhá i Fàrisayò íbe dhi ì adré tá tàbirí mvo. Di móndí àruka ì dré alîzo lizíá Yésu tí dhi: «Yòwánì ni lebèbhá i Fàrisayò kya íbe dhi ì adré kó tàbirí mvo, adrészó tà zi Gïká tí dhi, ámi lebèbhá ì adré dì àyikya tàbirí mvo ko àdho tà sè? »

¹⁹Yésu logó àyi dré dhi: «Móndyá azilé gwányá làmó àdhyá lé dhi kî kïtswá tsì tàbirí mvo, ì dré adrérà'a túmâni tòkó lîyí be dhi 'á? Tàdzí ko! Ì dré rè dhu adrérà'a tòkó lîyí nda be àyi kòfalé dhi 'á dhi, ì kïtswá tàbirí mvo ko.

²⁰Di, lókyá adrélépi alîle dhi sè dhi, à ni tòkó lîyí nda ni tingá àyi kòfalésè gò, ì dré kïdhôzó adrélé tàbirí mvo lókyá nda sè.

²¹Dhya àlo kâdré kítá àku ró lasilépi dhi íbe dhi, dhi kítá tîdhí ro dhi kítá àku nda dri ko na. Tako ko, kò'o kònìnì dhi, kítá tîdhí nda ni kítá àku nda ni asé gò, kítá àku nda dré gózo vélé lasilé lîle drîdrî.

²²Kòdhí íbe dhi, dhya àlo dà vînò tîdhí ro dhi kíní dhîle adrészó vînò lîkî, akùbhá dre dhi i léna ko na. Tako ko, kò'o kònìnì dhi, vînò tîdhí nda ni abhò kíní àku nda kî lasí gò, vînò i kíní nda íbe dhi ì dré abîzó tití. Ásà dhi, à adré vînò tîdhí ro dhi ni da kíní tîdhí ro dhi i léna. »

Yésu Míri sàbátù àdhyá 'i

(À kònò kpà Mâtayò 12:1-8; Lükà 6:1-5)

²³Sàbátù àlo dhi, Yésu ì adré tá lavúlé amvú ngánò àdhyá i 'ásè gò, akódhi ni lebèbhá ì dré kïdhôzó adrélé ngánò lò'wa vu. ²⁴Gò Fàrisayò ì dré tâzoá Yésu dré dhi: «Mí nò rè ká! Ámi lebèbhá ì adré àyikya tà àma kî tátrítrí kúlí dré adrélé logálé sàbátù tú dhi ni 'o àdho tà sè? » ²⁵Di Yésu logó àyi dré dhi: «Mì nà rè tàdzí tà Dàwídì dré tá 'ole ì dré adrérà'a lemerè ro ìndì tàbirí íbe akódhi ni arúpi íbe dhi 'á dhi ko?

²⁶Kòwánà kí kàdrì, Àbìyàtárà ní lókyá 'á dhi, Dàwídì nda fí tá Gìká ní dzó kàdrì na, mápà fèle Gìká dré dhi ní adó nyàle gò, dré kpà fèzoá áyi arúpi i dré nyàle. Tákò àma kí tátrítrí kúlí adré tá ína mápà nda ní nyàma logá àyi dré. Ngbà 'í kòwánà kí tá kitswá nyàá dhi àyi. »

²⁷Yésu gò tàá àyi dré dhi: «Gìká bhà móndí i adrélé sàbátù dré ko. Be ró dhi, bhà ína sàbátù adrélé móndí i dré. »

²⁸Dí ásà dhi, Móndí ni Mvá Mírì 'í, ndìndì Mírì sàbátù àdhya 'í. »

Márokò 3

Yésu tìdrí` agó àlo dhi sàbátù tú

(À kònò kpà Mátayò 12:9-14; Lükà 6:6-11)

¹Sàbátù àzya tú dhi, Yésu dré gòzo fíle Yúdà ànzì kí lìsámbò dzó na. Kònàle dhi, agó àlo drígá ní dré 'yòzo 'yo'yo dhi tá be.

²Fàrisáyò àruka i adré tá tà i dré kitswázó Yésu ní asíkì ásà dhi ní nda. Dí i adré tá akódhi ní mì ga, nòzoá ngalè akódhi ní agó nda ní tìdrí sàbátù tú yà dhi.

³Dí Yésu dré tàzoá agó drígá be à'yo ró nda dré dhi: «Mí nga ámi totó móndyá tití dhi kí kító 'á. »

⁴Gò dré lizízóá àyi tití nda i tí dhi: «Àma kí tátrítrí kúlí adré tà ángùdhi ní ka'i sàbátù tú dhi kòdhya: adrélé tà dóro 'o dhi, kó ngalè adrélé tà kònzi 'o dhi? Adrélé móndí tìdrí dhi, kó ngalè adrélé móndí pfu dràle dhi? » Dí, i logó àyikya kúlí ko.

⁵Yésu dré móndyá i làgásè kúrú nda kí nòzo tití togóaswa sè. Dí, akódhi ní togó tá kpà kízà ro, i dré àyi kí togó 'ole tombálé dhi sè. Gò dré tàzoá agó nda dré dhi: «Mí kidzì ámi drígá. » Akódhi dré kidzìzoá gò, drígá ní nda dré adrízó.

⁶Gbà lókyá nda sè dhi, Fàrisáyò nda i dré pfòzo ru yi móndyá ópí Èródè àdhya íbe, kitswázó láti nda Yésu ni pfùzo dràle dhi bvó.

Móndí` zyandre lavúlé dhi i` lebè Yésu

⁷⁻⁸Àmvolásà dhi, Yésu i dré àyi kí vùzo lyà lebèbhá ní íbe lìle tâpâriandre Gàliláyà àdhya làgana. Dí móndí zyandre lavúlé dhi i dré akódhi ní lebèzo. Àyi nda i yi tá tà tití akódhi dré adrélé 'ole dhi i gò, i dré angázó bvò Gàlláyà àdhya lésè, bvò Yùdáyà àdhya lésè, Yérusalémà lésè, bvò Ídùmáyà àdhya lésè, Yòròdánè ní ta'a lésè, i ndì bvò Tírè i làga Sídónà be dhi lésè, alìle akódhi vélé.

⁹Dí Yésu dré tàzoá áyi lebèbhá i dré dhi, i kòkisí bwátù bhàle ànyi i làga adrélé gànzi ró i dré, móndyá zyandre nda i kòkipiró i ko dhi bvó.

¹⁰Tákò ko, akódhi tìdrí tá móndí bǐ dhi i gò, móndí drà twátwa íbe dhi i dré adrészò adàle akódhi vélé, kitswálé akódhi ní tabè dhi bvó.

¹¹Dí àyi tìrí kònzi íbe àyi léna dhi i kàdré akódhi ní no dhi, i adré tá adhélé akódhi kandrá, adrélé tetrélé, adrészò tàá dhi: «Mí Gìká ní Mváagó 'í! »

¹²Dí, Yésu adré tá ína àyi kí logá, i kòtadháró móndí i dré i àdhi 'í ya dhi ko.

Yésu bhà móndí` mudrí-drì-rì dhi i twá adrélé àpóstolò i ró

(À kònò kpà Mátayò 10:1-4; Lükà 6:12-16)

¹³Àmvolásà dhi, Yésu dré lìzo mbàle kòngó àlo drìna. Dré móndí i dré lèle azilé dhi kí azizó gò, i dré alìzo akódhi vélé.

¹⁴Dì dré móndyá mudrí-drì-rì nda kí bhàzo twá, àyi kí zìzo àpóstolò i ró, i kàdréró túmání i be, ìndì i kàdréró àyi kí tibhù Rúbí Tani longó be dhi bvó.

¹⁵Dré kpà rìnyí fèzo àyi dré kitswázó tirí kònzi kí dro topfòle móndí i lésè.

¹⁶Àyi mudrí-drì-rì dré bhàle twá nda i tá: Símónà (dré rú zile Pétéró dhi),

¹⁷Yàkóbhò Zèbèdáyò ni mvá, adrúpi ni Yòwánì be (Yésu dré àyi kí rú zìzo Bwànérégè dhi i; rú nda kòdhì adré lèá tâle dhi «Bhù ni tadima ni ànziàgo i»),

¹⁸Andréyà, Filípò, Bàràtòlòmáyò, Mátayò, Tòmá, Yàkóbhò Àlafayò ni mvá, Tàdáyò, Símónà (adrélépi àtsi ró áyi súrú ni tà sè dhi),

¹⁹ìndì Yùdásì Ìsikàriyótà (dra Yésu ni lefèlepi kàribhá i drigá dhi).

Yésu ni tà, tirí` kònzi kí kàdrí` àdhyá be dhi

(À kònò kpà Mátayò 12:22-32; Lükà 11:14-23; 12:10)

²⁰Àmvolásà dhi, Yésu dré gózo nzile i bhàna gò, móndí zyandre dhi i dré gózo tódyá ru kímó kònàle. Tà nda sè dhi, akódhi i lebèbhá ni íbe dhi i kitswá tá ndindì ngá nya bwà ko.

²¹Akódhi ni aró i kòyi tà nda dre dhi, i dré alìzo kitswálé akódhi ni dri sùzo rúá dhi bvó. Tako ko, i adré tá tâá dhi, akódhi ni drì abí vélé dre.

²²Dì, tátrítrí kúlí tadhábhá angábhá Yérúsalémà lésè dhi i adré tá àyikya tâá dhi: «Akódhi Bélèzèbùlè íbe i léna! Adré tirí kònzi kí dro topfòle móndí i lésè, tirí kònzi kí kàdrí ni rìnyí sè! »

²³Dì Yésu dré àyi nda kí azizó gò, tazoá àyi dré kúlí alaala sè dhi: «Sàtánà ni kitswá Sàtánà ni dro pfòle móndí lésè ngíningíni ró?

²⁴Opì ángùdhi móndyá zàlá dhi i dré adrész ru lanzí àyi kòfalésè dhi, opì nda kitswá áyi totó bwà ko.

²⁵Dzó ángùdhi móndyá lá dhi i dré adrész ru lanzí àyi kòfalésè dhi, dzó nda kitswá kpà áyi totó bwà ko.

²⁶Kókpà kòdhì tíni, móndyá Sàtánà ni rìnyí zàle dhi i kàdré ru lanzí adrész ru pfu àyi kòfalésè dhi, akódhi ni rìnyí nda kitswá áyi totó bwà ko. Be ró dhi, tà ni ni akí tití.

²⁷Kòdhì íbe dhi, dhya àlo kitswá file agó kòmbá àlo dhi ni dzó na akódhi ni ngá wu bwà ko, kàdrò zyà rè kòmbá nda bă sè 'iká ko dhi. Dì kàdrò akódhi dre dhi, a ni kitswá ngá tití akódhi ni dzó na nda kí wu.

²⁸Má adré tà bati ta àmi dré: Giká ni kitswá tákonzì tití móndí i dré adrélé 'ole dhi kí tri, túmání làdhá tití i dré adrélé dhale i rú dhi íbe.

²⁹Dì, dhya ángùdhi adrélépi ína làdhá dha Tírí Lólo rú dhi, à kítswá akódhi nda ni tàkonzi tri tàdzí ko. Be ró dhi, tàkonzi nda ni adré akódhi dri kóná vésè kólyá. »

³⁰Yésu tà tá tà nda kònini, ì dré tá adrélé tâle dhi «Akódhi tirí kònzi íbe í léna» dhi sè.

Yésu ni andre i adrúpi ni i' be dhi i

(À kònò kpà Mâtayò 12:46-50; Lükà 8:19-21)

³¹Lókyá nda sè dhi, Yésu ni andre i adrúpi ni íbe dhi ì dré atsázó adrélé àyi kí totó kivì na. Gò ì dré móndí mùzo fîle Yésu ni azí.

³²Móndí zyandre dhi ì lirí tá adrélé akódhi làgásè kûrú. Gò tâzoá drá dhi: «Ámi andre, ámi adrúpi i, ámi amvúpi íbe dhi ì adré ámi letè kivì na. »

³³Dì Yésu logó àyi dré dhi: «Áma andre i áma adrúpi íbe dhi ì àdhibbhá 'i? »

³⁴Dré móndyá liríbhá í làgásè kûrú nda kí nòzo tití gò, tâzoá dhi: «Mì nò rè áma andre i áma adrúpi íbe kònì i ká! »

³⁵Tako ko, dhya ángùdhi adrélépi tà Giká dré adrélé lèle à kò'o dhi kí 'o dhi ína áma adrúpi 'i, áma amvúpi 'i, ìndì áma andre 'i. »

Márokò 4

Pi' dhi' gó agó kórì` ri` lepi dhi ni tà dri dhi

(À kònò kpà Mâtayò 13:1-9; Lükà 8:4-8)

¹Àmvolásà dhi, Yésu dré gózo tódhyá adrélé tà tadhá tâpârìandre Gàlìlâyà àdhyà làga. Móndí zyandre lavúlé dhi ì dré ru kimólé akódhi làgásè kûrú dhi sè dhi, dré mbàzo lirílé bwátù adrélépi yí mìle dhi na, móndyá zyandre tití nda ì dré adrérà'a tâpârìandre mìle dhi 'á.

²Dì dré kîdhózó tà bî dhi kí tadhá àyi dré pîdhígó sè, adrészó tàá dhi:

³«Mì yi rè ká! Kitú àlo dhi, agó àlo dhi pfò tá lîle kórì ri áyi amvú na.

⁴Dré tá adrérà'a kórì ri dhi 'á dhi, kórì àruka ì ledhé tá láti mìle gò, àrí ì dré adàzo tetéá tití.

⁵Kórì àruka ì ledhé tá bvò kírà ro adrélépi kìní íbe tsà dhi dri. Ì dré apfòzo mbèlè, kìní dré nzile ko dhi sè.

⁶Dì, kitú kòka dre dhi, dré àyi kí zàzo 'yole, àyi kí kídrì dré fîle kìní na dóro ko dhi sè.

⁷Kórì àruka ì ledhé tá kùtsí kòfalé. Kùtsí nda dré mbàzo àyi kí amó gò, ì dré lò'wa 'àzo ko.

⁸Dì, kórì àruka ì ledhé tá àyikya kìní dóro dri gò, ì dré apfòzo mbàlé lò'wa 'a dóro. Àlo ni 'a lò'wa nyadhi-àlo-drì-mudrì, àzya ni nyadhi-na, àzya ni nyadhi-nzi. »

⁹Yésu gò tàá dhi: «Dhya ángùdhi adrélépi bíbhálé íbe tà yìzo dhi kòyi! »

Yésu ngi tà i' dré adrészó tà ta móndi' i dré pi' dhi' gó sè dhi ni àndu

(À kònò kpà Mâtayò 13:10-17; Lükà 8:9-10)

¹⁰Àmvolásà dhi, Yésu dré tá adrérà'a kalóma dhi 'á dhi, akódhì ni lebèbhá mudrì-drì-rì dhi i túmāní móndyá adrébhá tá àyi kí kimó akódhì làga dhi íbe dhi, i dré alìzo akódhì ni lizí pídhígó dré adrélé pìle dhi kí tà sè.

¹¹Dì dré logózóá àyi dré dhi: «Giká fè àmi dré tògyá áyi Òpì ni tà lùzu ró dhi ni nìzo. Dì, móndyá kivì na dhi i dré dhi, má adré tà tití dhi kí ta pídhígó sè,

¹²kitswálé: «à kàdré gba ngá no yà dhi, à kàdréró ngá i dré adrélé nòle nda kí atógyà ko, ìndì i kàdré gba tà yi yà dhi, à kàdréró tà i dré adrélé yile nda kí àndu ni ko. Kònò kàdré tá kònini ko dhi, i ni tá àyi kí togó adzá má vélé gò, má dré àyi kí tàkonzi trìzo! »»

Yésu ngi pi' dhi' gó agó kórì` ri` lepi dhi ni tà dri dhi ni àndu

(À kònò kpà Mátayò 13:18-23; Lükà 8:11-15)

¹³Dì Yésu gò tàá àyi dré dhi: «Mì ni tsì pídhígó kòdhì ni àndu ko? Mì ni dì pídhígó àruka tití dhi kí àndu ni ngíningíní ró?

¹⁴Agó adrélépi kórì ri nda adré Giká ni kúlì ri kòdhya.

¹⁵Móndí àruka i adré kúlì nda ni ka'i ngóró kórì rìle ledhélé láti mìle nda i tíni. I kòyi kúlì nda dre dhi, Sàtánà adré ndirì atsálé kúlì rìle nda ni tingá àyi kí togó lésè.

¹⁶Móndí àruka i adré Giká ni kúlì ka'i ngóró kórì rìle ledhélé bvò kírà ro dhi dri nda i tíni. I kòyi kúlì nda dre dhi, i adré ndirì ka'íá arí sè.

¹⁷Dì, i dré adrélé kúlì nda ni tayí adrélé tìle àyi kí togó na ko dhi sè dhi, i adré ngbà 'í tròle rúá lókyá tsà sè. Dì kàdré tà i dré adrészó kízà nya ásà dhi 'í yà, ngalè tà adrészó àyi kí mì pfo kúlì nda ni tà sè dhi 'í yà dhi, i adré àyi kí tà ka'íka'i nda ni tayí mbèlè.

¹⁸Móndí àruka i adré Giká ni kúlì ka'i ngóró kórì rìle ledhélé kùtsí kòfalé nda i tíni. I kòyi kúlì nda dre dhi,

¹⁹tà bvò kònò àdhya adrébhá àyi kí togó 'o lanzile dhi i, ngá lovó adrélépi àyi kí lití dhi, ìndì lovó kònzi twátwa dhi i adré file àyi kí togó na kúlì nda ni amó gò, dré adrészó lò'wa 'a ko.

²⁰Dì, móndí àruka i adré àyikya Giká ni kúlì ka'i ngóró kórì rìle ledhélé kìní dòro dri nda i tíni. Àyi nda i kòyi kúlì nda dre dhi, i adré ka'íá gò, i dré adrészó lò'wa 'a dòro. Àlo ni adré lò'wa 'a nyadhi-àlo-drì-mudrì, àzya ni nyadhi-na, àzya ni kó nyadhi-nzi. »»

Tà tadhálé tálà ni tà rú dhi

(À kònò kpà Lükà 8:16-18)

²¹Yésu gò tàá àyi dré dhi: «À adré gà tsì tálà dhi bhàle lìdrí zàna yà, kó ngalè lángá zàna yà dhi be? Tàdzí ko! À adré zakó dhiá bhàle zá kuru mísa drìna.

²²Tako ko, à ni tà tití zùle zùzù dhi kí tadhá ngádra 'á. À ni kpà tà tití lùzu ró dhi kí 'o apfòle ngádra 'á.

²³Dhya ángùdhi adrélépi bíbhálé íbe tà yìzo dhi kòyi! »

²⁴Gò tàá àyi dré dhi: «Lè mì kàdré tà mì dré adrélé yile dhi kì kisù doro! Mì kàdré tà yi doro dhi, Giká ni àmì kì fe adrélé tà nda kì àndu ni doro lavulé. A ni ndindì tà mì dré nile nda kì drì timbà.

²⁵Tàko ko, dhya ángùdhi tà nilepi bì dhi dré dhi, à ni tà dré nile nda kì drì timbà. Di, dhya ángùdhi tà nilepi ko dhi dré dhi, à ni ndindì tà tsà dré nile dhi ni tingá. »

Tà tadhálé kóri` adrélépi mbàle áyi tändi sè dhi ni tà rú dhi

²⁶Yésu gò tàá dhi: «Giká ni Òpì sù ngóró kóri dhya àlo dré rile bvò dri dhi tíni.

²⁷Dhya nda kàdré ayilé ngátsi sè ya, kó ngalè kàdré ngale kitú sè ya dhi, kóri nda adré apfòle mbàle, tágba dhya nda dré nizoá ngalè tà nda adré ru 'o ngíni ya dhi ko dhi.

²⁸Bvò nda ni tändi adré kóri nda ni 'o adrélé lò'wa 'a dhi nì. Kóri nda adré rè zyà apfòle mbì ro gò, drì ni dré adrészó pfòle gò, dré adrészó lò'wa 'a.

²⁹Lò'wa nda ì kòka dre dhi, dhya nda adré méngerè adó adrészó lwàá. Tàko ko, lókyá adrészó lò'wa nda kì akónà dhi kítswá dre. »

Tà tadhálé mütádì lò'wa ni tà rú dhi

(À kònò kpà Mátayò 13:31-32, 34; Lúkà 13:18-19)

³⁰Yésu gò tàá dhi: «Má ni kítswá Giká ni Òpì ni tà tadhá àdho ngá rú? Kó ngalè, má ni tà ni ni tadhá kúlí alaala ángùdhi sè?

³¹Òpì nda sù ngóró mütádì lò'wa tíni. Lò'wa nda konyókonyó mvá lavulé lò'wa àruka tití adrélé rile bvò dri dhi i rúsè.

³²Di, à kàdré lò'wa nda ni ri dhi, adré ína apfòle mbàle atsálé kàdrì ngá àruka tití adrélé kidhílé amvú 'á dhi kì lavú. Adré mbàle áyi kólá kì lebhé i rúsè kàdrìkàdrì gò, arí ì dré adrészó bhà si drilána líndrì ni ni tà sè. »

³³Di Yésu adré tá Giká ni kúlí tadhá àyi dré kúlí alaala bì lású be kònìnì dhi i sè, tsàle ì dré kítswázó tà nda kì àndu ni bwà ko dhi na.

³⁴Adré tá tà àlo tadhá àyi dré kúlí alaala àko dhi ko. Di, ì dré adrérà'a lebèbhá ni íbe àyi pátí dhi 'á dhi, adré tá ína tà tití nda kì àndu ngi àyi dré.

Yésu kíki` lyà andre

(À kònò kpà Mátayò 8:23-27; Lúkà 8:22-25)

³⁵Kítú nda ni ìndró sè dhi, Yésu dré tazoá áyi lebèbhá i dré dhi: «Mà kòzya tâpáríandre ni ta'á na. »

³⁶Di akódhi ni lebèbhá nda ì kòtombà bwátù dré tá adrészó lána dhi na dre dhi, ì dré móndyá zyandre nda kì tayízó gò, kidhózó adrélé zyale ta'á na. Bwátù àruka ì adré tá kpà zyale túmání àyi íbe.

³⁷Gbă kòdhwa, lyàandre gú dhi dré ngàzo adrélé vile tâpáríandre nda mi. Yí adrélépi longálé dhi dré adrészó lodàle bwátù na gò, bwátù nda dré adrészó 'ole arilé.

³⁸Dì, Yésu adré tá ína ayí ko àmvòràmvò kùsé dri. Gò akódhì ni lebèbhá nda i dré akódhì ni torozó, tazoá drá dhi: «Tadhálépi, mà adré dràle! Tà nda tsì tà tåko 'i mí dré? »

³⁹Dì Yésu dré ngàzo ligílé lyăandre nda dri, tazoá tăpăríandre nda dré dhi: «Mí kikí mi adrélé kíri! » Lyăandre nda dré rìzo adrélé kíri gò, ngá dré gòzo bhùle ndiii.

⁴⁰Dì Yésu dré tazoá áyi lebèbhá i dré dhi: «Mì adré ngá ro àdho tà sè? Ami dhu rè tà ka'ika'i àko? »

⁴¹Tiri dré gàzo àyi léna bǐ gò, i dré adrészó lizíá àyi kòfalésè dhi: «Dhya kòndi tá ína àdhi 'i, ndìndì lyăandre i tăpăríandre be dhi i dré adrészó akódhì ni kúlí ka'i 'ole ni? »

Márokò 5

Yésu tiđrí agó àlo tirí kònzi í be í léna dhi

(À kònò kpà Mátayò 8:28-34; Lükà 8:26-39)

¹I kòzya tăpăríandre nda ni ta'á na dre dhi, i dré tsàzo bvò Gérásà kya na. ²Yésu kàsí bwátù lésè dre dhi, agó àlo tiri kònzi ibe i léna dhi dré apfòzo ngbō ró mógo lésè kitswálé ru kisú akódhì be.

³Agó nda adré tá ína ayílé mógo 'ásè. Dhya àlo kitswá tá vélé akódhì ni ru 'ile ndìndì nyirì sè bwà ko.

⁴Tako ko, vésè be bǐ, à adré tá akódhì ni pá kí ti'í kómvè sè, adrészó akódhì ni drígá kí ti'í nyirì sè. Dì, akódhì adré tá ína nyirì nda kí tikí, adrészó kómvè nda kí tonjò. Dhya àlo kitswálépi akódhì ni bha áyi rinyí zàle bwà dhi tá yókodhó.

⁵Kítú sè ìndì ngátsi sè dhi, akódhì adré tá tatsílé tetrébe mógo 'ásè ìndì kòngó i drísè, adrészó áyi rúbhá tisì kírà sè.

⁶Dì akódhì kònò Yésu vwàvvà ro dre dhi, dré ngàzo arálé adhélé áyi kórókó titi akódhì kandrá.

⁷Dré yòzoá kúlí 'u'u sè dhi: «Yésu, Gíká kurú na dhi ni Mváagó, àma kòfalésè mí be dhi, àdho tà 'i? Má adré ámi ti lizí Gíká ni rú sè, mí kò'oró ma kònzi ko! »

⁸Tà tá kònini tåko ko, Yésu tà tá drá dhi: «Tiri kònzi, mí pfò agó kònìdhì lésè! »

⁹Gò Yésu dré lizízóá tíá dhi: «Ámi rú àdhi? » Akódhì logó drá dhi: «Áma rú <Zyandre>. Àngyá ko, àma agó kòndi léna dhi bǐ. »

¹⁰Dì tiri kònzi nda dré dhèzo adrélé ngòle Yésu rú, kòmùrò àyi pfòle bvò nda 'ásè ko dhi bvó.

¹¹Àyi làgana kònani dhi, tìgá kí pàrì andre adré tá ngá nya kòngó drìna.

¹²Dì tiri kònzi nda i dré Yésu ni ti lizízó tazoá dhi: «Mí kòmù àma lìle tìgá kòna i véna wà, mà kòtiffró àyi léna be dhi bvó. »

¹³Yésu dré ka'izoá. Di tirí kònzi nda i dré topfòzo agó nda lésè, lile tifilé tigá nda i léna. Gò tigá ànyiànyi ngùlù-rì nda i dré ndizo tití kòngó nda ni gòlòko 'ásè, ledhélé tápáríandre na, yi mvu gò, todràzo.

¹⁴Gò tigá nda ki likibhá i dré ngàzo ràle tà lavulépi nda ni rúbí longóbe bhàandre na indi gbàbhú 'ásè. Di móndi zyandre dhi i dré apfòzo tà nda ni no.

¹⁵I kàtsá Yésu vélé dre dhi, i dré agó tá tirí kònzi zyandre ibe i léna nda ni nòzo adrérà'a lirilé Yésu làga. Akódhi tá kítá ibe i rú, indi tà kisükisù ibe dóro. Di tirí dré ayi ki 'ozo lavulé.

¹⁶Gò dhya tà nda ki nobhá mì sè dhi i dré tà atsábhá agó tá tirí kònzi ibe nda rú, indi tigá i rú dhi ki titizó àyi dré.

¹⁷Di ayi nda i dré ngàzo Yésu ni ti lizí, kongaró àyi ki bvò 'ásè be dhi bvó.

¹⁸Yésu dré tá adrérà'a mbàle bwátù na dhi 'á dhi, agó tá tirí kònzi ibe i léna nda dré akódhi ni ti lizizó, i kòliró túmání.

¹⁹Di, Yésu dré akódhi ni logázó, tazoá drá dhi: «Mí nzí mí bhàna, amí surú na. Mí tití ayi dré tà tití Míri dré 'ole mí dré dhi i, indi akódhi bhà amí kizà ngini ya dhi. »

²⁰Di agó nda dré ngàzo lile tà tití Yésu dré 'ole i dré dhi ki longóbe bhàandre zile Mudrí dhi i 'ásè. Di móndyá tití dhi i adré tà akódhi ni yi sibhálé be ngbo.

Yésu tidri` tokó àlo dhi, i`ndi` tingá Yàyírò ni mvátòkó dràdrà lésè

(À kònò kpà Mâtayò 9:18-26; Lükà 8:40-56)

²¹Yésu kògò azyálé tápáríandre nda ni ta'á lésè bwátù sè dre dhi, móndi zyandre lavulé dhi i dré ru kimozó akódhi làgásè kúrú tápáríandre mìle.

²²Yúdà ànzi ki lísambò dzó ni kàdrì ki àlo rú be Yàyírò dhi dré kpà atsázó kònàle. Di kònò Yésu dre dhi, dré adhézó akódhi pá,

²³akódhi ni ti lizí tà tändi ró tazoá dhi: «Áma zapi ànyiànyi dràdrà mìle. Mí alì amí drígá bha akódhi dri wà, kàdriró adrélè lídri be! »

²⁴Di Yésu i dré ngàzo adrélè lile akódhi be. Móndyá zyandre lavulé nda i dré kpà adrészó akódhi ni lebè, adrészó ayi ki tri rúásà.

²⁵Di ayi nda i kòfalé dhi, tokó àlo kàrì dré adrészó ràle rúásà kóná be mudrí-drì-rì dhi tà be.

²⁶Akódhi nda nya tá kizà lavulé kódzó bì dhi i drígá. Kizá tá ngá i drígásè akílé tití woyá. Di, kàrì nda adré tà vélé ràle rúásà lile drìdrì.

²⁷Di kòyi Yésu ni tà dre dhi, dré lavúzó móndyá zyandre nda i kòfalésè, atsálé ànyi Yésu àmvolésè gò, akódhi ni kítá ti tabè.

²⁸Àngyá ko, adré tà ína kisùá dhi: «Má kòtabè ngbà 'í akódhi ni kítá ti kòdhya dhi, má ni adrì. »

²⁹Gbă kòdhwa, kàrì adrélépi ràle rúásà nda dré akízó gò, dré atógyàzoá í rú dhi, í adrí áyi kizà nda lésè dre.

³⁰Gbă lókyá nda sè dhi, Yésu dré kpà atógyàzoá í rú dhi, rinyí pfò tá í lésè dre. Dré áyi alázó móndyá zyandre nda i kòfalé gò, lizíá dhi: «Àdhi tabè kítá mána nì? »

³¹Akódhi ni lebèbhá ì logó drá dhi: «Mí nò zakó móndyá zyandre kòni i adrérà'a àyi kì tri mí rúsè dhi 'í! Mí adré dì lizíá dhi, «Àdhi tabè ma nì» ya dhi ngíni? »

³²Dì, Yésu dré gòzo vélé adrélé móndyá í làgásè nda kì no, nízoá ngalè àdhi 'o tà nda nì ya dhi.

³³Tòkó nda kàtogyà tà atsálépi í rú dhi dre dhi, dré alízo lyabe tirì dré adhélé akódhi pá gò, tà í dré 'ole nda ni ta drá ngádra 'á.

³⁴Dì Yésu dré tàzoá drá dhi: «Áma zapi, ámi tà ka'ika'i tìdrí mi dre. Mí lì togó be kìdríkìdrí. Mí adrí kizà mína lésè dre. »

³⁵Yésu dré rè dhu adrérà'a tà ta dhi 'á dhi, móndí àruka angábhá Yàyírò, lìsámbò dzó ni kàdrì nda bhàlésè dhi ì dré atsázó tàá drá dhi: «Ámi zapi drà dre. Tà adrészó gòle dhya tà tadhálépi dhi ni lagù ásà dhi àdho tà 'í? »

³⁶Dì, Yésu dré ína kúlí nda ni ka'izo yile ko. Gò dré tàzoá Yàyírò dré dhi: «Mí ro ngá ko. Mí kòka'i ngbà 'í ka'ika'i. »

³⁷Dì dré móndí àzya ka'izo lìle í vésè ko, ka'i ngbà 'í Pétéró, Yàkóbhò, tsàle adrúpi ni Yòwánì be dhi i kòdhya.

³⁸Ì kòtsa Yàyírò bhàna dre dhi, Yésu dré nòzoá dhi, móndyá tití dhi kì drì abíabí gò, ì dré adrészó àwó ngo, adrészó tongolé lúlú be.

³⁹Dì kòfí dzó nda na dre dhi, dré tàzoá àyi dré dhi: «Àmi kì drì abíabí gò, mì dré adrészó àwó ngo àdho tà sè? Mvámva kòdhì drà ko. Adré ína ayí ko. »

⁴⁰Gò ì dré dhèzo adrélé akódhi ni gu. Dì Yésu dré àyi kì 'òzo pfòle tití kivì na. Dré mvámva nda ni atá kì drìzo andre ni íbe, ìndì áyi lebèbhá na nda íbe gò, fízo àyi íbe àrà mvámva nda dré adrészó dhi na.

⁴¹Dré akódhi ni drígá rùzo, tàzoá drá dhi: «Tàlítà kúmì! » (Kòdhì adré lèá tâle dhi: «Mvátòkó, má tà mí dré dhi, mí nga! »)

⁴²Gbă kòdhwa, mvátòkó adrélépi tá kóná íbe mudrí-drì-rì nda dré ngàzo kídhólé atsí to. Dì àyi kì líndrì dré gàzo bhwàbhwa.

⁴³Gò Yésu dré àyi kì kodzozó tà tändi ró tàzoá dhi, ì kòlongó tà nda dhya àlo dré ko. Dré tàzoá dhi, ì kòfè ngá mvámva nda dré nyàle.

Márokò 6

Nàzàrétàbhá i` ka'i Yésu ko
(À kònò kpà Mâtayò 13:53-58; Lükà 4:16-30)

¹Yésu kòtayí àrà nda dre dhi, dré lìzo tsàle bhàandre í dré tá mbàzo lána dhi na. Akódhi ni lebèbhá ì lì tá kpà túmání akódhi be.

²Sàbátù kàtsá dre dhi, dré kidhózó adrélé tà tadhá Yúdà ànzì ki lìsámbò dzó na. Gò móndyá zyandre nda ì dré adrészó akódhi ni yi sibhálé be ngbo, adrészó lizia àyi kòfalésè dhi: «Dhya kòndi kisú ína tà kòdhì i ángwà? Tògyá fèle drá kònìnì ni àdho tògyá 'i? Kisú kpà rinyí adrészó tà líndrígà ró dhi ki 'o áyi tändi ni drígá sè dhi ángwà?

³Akódhi kòndi tsì dhya adrélépi fa ledé dhi 'i ko? Akódhi tsì Màriyà ni mvá 'i ko? Adrúpi ni i tsì Yàkóbhò, Yósè, Yúdà tsàle Símónà ko? Amvúpi ni i àma kòfalé ko? » Dì tà nda sè dhi, ì kítswá tá Yésu ni ka'ì bwà ko.

⁴Dì Yésu dré tázoo àyi dré dhi: «À adré ngbà 'í pròfétà ni líndrì bha ko dhi akódhi ni tändi bha, akódhi ni surú 'á, ìndi akódhi ni dzó 'á. »

⁵Dì akódhi kítswá tá tà àzya líndrígà ró dhi ni 'o kònàle ko, bhà ngbà 'í áyi drígá dràbhá àruka i dri, àyi ki tidrizó dhi kòdhya.

⁶Dì akódhi ni líndrì adré tá gàle, ì dré tá adrélé tà ka'ika'ì àko dhi sè.

Yésu tibhù áyi lebèbhá mudrí-drì-rì dhi i li` le àzí na

(À kònò kpà Màtayò 10:5-15; Lükà 9:1-6)

Àmvolásà dhi, Yésu dré ngàzo adrélé tatsilé tà tadhábe bhà àlo àlo tití bvò nda lé dhi ì 'ásè.

⁷Dré áyi lebèbhá mudrí-drì-rì dhi ki azizó, rinyí fèzo àyi dré kítswázó tirí kònzi ki bha àyi pálé gò, dré kidhózó àyi ki tibhù lìle rì rì àzí 'o.

⁸Dré tá adrérà'a àyi ki tibhù dhi 'á dhi, lazí tà àyi dri kònìnì: «Mì do ngá àlo dhi atsí sè ko, ngbà 'í kùtù fa kòdhya. Mì kòdo mápà 'i yà, kòmvò 'i yà, kó ngalè làfa 'i yà dhi àmi rú ko.

⁹Mì asó kámókà, dì, mì kòdo kítá agá lésè dhi ni àzya ko.

¹⁰Dzó ángùdhi mì dré dra fízo lána dhi, mì kàdré ayílé kònàle tsàle kítú mì dré dra ngàzo bhà nda 'ásè dhi tú.

¹¹Bhà ángùdhi dra àmi ki ka'izo dòle lána dóro ko yà, kó ngalè àmi ki kúlì yìzo ko yà dhi na dhi, mì kòpfò 'ásà, ìndi mì kòtowá tòpfulíndrì àmi pásè tadházóá dhi, mì tayí àyi ki tà tití dre. »

¹²Dì Yésu ni lebèbhá nda ì dré ngàzo lìle longóába móndí i dré dhi, ì kòladzà àyi ki togó agòzo Gìká vélé.

¹³Ì adré tá tirí kònzi bì dhi ki dro móndí i lésè, adrészó dò da dràbhá bì dhi i dri, adrészó àyi ki tidrì.

Yòwáni` bátísímò fèlepi ni dràma

(À kònò kpà Màtayò 14:1-12; Lükà 9:7-9)

¹⁴Dì ópí Èródè dré tà nda kí rúbí yìzo. Tàko ko, Yésu ní rúbí la'ú tá bvò nda 'ásè tití. Móndí àruka ì adré tá tàá dhi: «Yòwánì Bâtisimò fèlepi angá ína dràdrà lésè nì! Ásà dhi, akódhì rìnyí íbe adrészó tà líndriga ró dhi kí 'o. »

¹⁵Àruka ní ì adré tá tàá dhi: «Akódhì Èlýà 'i. » Àruka ní ì adré kó tàá dhi: «Akódhì pròfétà 'i, ngóró pròfétà atú dhi kí àlo tini. »

¹⁶Dì, Èródè kòyi tà adrélé tâle nda i dre dhi, dré ína tâzoá dhi: «Yòwánì má dré drì 'ole lile kòdhì angá ína dràdrà lésè nì. »

¹⁷Tàko ko, Èródè nda 'o tá Yòwánì rùle adrôle, bhèle bădzó na dhi nì. 'O tá kònini áyi adrúpi Filípò ní tòkó, Èròdýà, í dré tá dòle mòle tòko ró dhi ní tà sè.

¹⁸Àngyá ko, Yòwánì adré tá tàá Èródè dré dhi: «Kitswá mí dré adrészó ámi adrúpi ní tòkó íbe dhi ko. »

¹⁹Ásà dhi, Èròdýà nda adré tá togó kònzi bha Yòwánì rú. Adré tá akódhì ni le pfûle drâle, di, kitswá tá ína tà 'o bwà ko.

²⁰Tàko ko, Èródè ní ína tâle dhi, Yòwánì tá móndí gyägya ìndì lolo dhi 'i dhi be. Dì adré tá akódhì ní ro, adrészó sùle rúá. Adré tá kpà akódhì ní kúlí le yile, tágba akódhì ní drì dré tá adrészó abílé tò kúlí nda i sè dhi.

²¹Dì, lókyá Èròdýà dré kitswázó tà 'o bwà dhi dré atsázó. Kitú Èródè ní tizo ásà dhi sè dhi, akódhì dré gwányá 'òzo áyi àzibhá kí kàdrì i dré, sòdá kí kàdrì i dré, ìndì móndí kàdrì àruka Gàllayà àdhya i dré.

²²Gò Èròdýà ní zapi dré apfòzo ngá to Èródè i kandrá móndyá dré azilé gwányá nda lé dhi íbe, àyi kí togó 'òzo kínílé tò. Dì ópí nda dré tâzoá mvátòkó nda dré dhi: «Mí zi ngá ángùdhi mí dré adrélé lèle dhi má tí, má kòferó mí dré. »

²³Dré móndrà sìzo tâzoá drá dhi: «Ngá ángùdhi mí dré dra zile má tí dhi, má ní fèá mí dré, kàdré gba áma òpì lanzílé 'a be rì dhi ní àlo 'i yà dhi. »

²⁴Gò mvátòkó nda dré pfòzo lizíá áyi andre tí dhi: «Má kòzi àdho ngá kòdhya ya? » Andre ni logó dhi: «Mí kòzi Yòwánì Bâtisimò fèlepi ni drì kòdhya. »

²⁵Dì mvátòkó nda dré gózo tsàle mbèlè ópí nda véna, tàá drá dhi: «Má lè mí kàfè má dré Yòwánì Bâtisimò fèlepi ni drì kònwa sănì na. »

²⁶Gò ópí nda ní togó dré kizà nyàzo lavulé tà nda sè. Dì, móndrà dré tá sile móndyá azilé nda i kandrá dhi i sè dhi, lè ína tà zile i tí nda gàle ko.

²⁷Dré ndiri sòdá kí àlo mùzo lile kitswálé Yòwánì ní drì li, kògòró agòle ába be dhi bvó. Dì sòdá nda dré lìzo Yòwánì ní drì li bădzó na gó,

²⁸drì nda ní adózó sănì na, alìzo fèá mvátòkó nda dré. Gò akódhì nda dré fèzoá áyi andre dré.

²⁹Dì Yòwánì ní lebèbhá i kòyi tà nda dre dhi, i dré tsàzo akódhì ní àbvò do lìzo bhàá mógo na.

Yésu fè ngá nyàle móndí[‘] ngùlù-nzi dhi i dré

(À kònò kpà Màtayò 14:13-21; Lükà 9:10-17; Yòwáni ` 6:1-14)

³⁰ Àpóstolò Yésu dré tá tibhùle nda i kàgò dre dhi, i dré àyi kí kimózó akódhi làga, tà tití i dré 'ole iñdì tadhálé dhi kí tití drá.

³¹ Gò Yésu dré tázoo áyi dré dhi: «Mí alì, mà kòliró àma pátí lovólé tsà àrà móndí àko dhi na. » Tà tá kònini tako ko, móndí zyandre dhi i dré tá alìle, adrélé gòle gò, Yésu i dré ndindí adrészó lókyá ngá nyàzo dhi íbe ko.

³² I dré dí tombàzo bwátù na kítswálé lile àyi pátí àrà móndí àko dhi na dhi bvó.

³³ Di, móndí bí àyi kí nobhá lirà'a dhi i nì tá àrà i dré tá adrészó lile lána dhi be. Gò móndí zyandre dhi i dré ngàzo bhàandré tití dhi i lésè, ràle pá sè tsale àrà nda na drìdrì Yésu i kandrána.

³⁴ Di Yésu kàsí bwátù lésè dre dhi, dré móndyá zyandre lavúlé nda kí nòzo gò, kizà dòzo áyi togó na àyi kí tà sè. Tako ko, àyi tá ngóró kábilígyà adrébhá àyi kí likilépi àko dhi i tíni. Di dré kidhózó adrélé tà bí dhi kí tadhá àyi dré.

³⁵ Iñdró kandrì dre dhi, akódhi ni lebèbhá i dré àyi kí kisízó ànyi akódhi làga, tàá drá dhi: «Kònìdhi àrà bhà àko dhi 'i, iñdì lókyá lavú dre.

³⁶ Mí kòfè di láti móndyá zyandre kònì i dré lìzo mányàngá gi nyàle gbàbhú 'ásè iñdì bhà àma làgásè dhi i 'ásè wà. »

³⁷ Di, Yésu logó àyi dré dhi: «Àmì kí tändì, mì fè ngá àyi dré nyàle dhi àmì. » I go tàá drá dhi: «Mà kòlì tsì làfa lò'wa kámá-rì dhi kí kízá ngbà, mápà gízo kítswálé fèle àyi tití dhi i dré nyàle? » ³⁸ Di Yésu lizí àyi tí dhi: «Àmì mápà íbe ángopí? Mí lì nòá. » I kòlì nòá dre dhi, i dré tázoo dhi: «Àma mápà íbe nzi, iñdì kosyá íbe rì. »

³⁹ Di Yésu dré tázoo àyi dré dhi, i kòtukù móndyá tití nda i lirílé mbìlídri drísè.

⁴⁰ Gò àyi nda i dré lirízó ngbungbu nyadhi-nzi, iñdì nyadhi-rì-drì-mudrì.

⁴¹ Di Yésu kàdó mápà nzi nda i kosyá rì nda íbe dre dhi, dré mì tingázó kurú na bhùna, tà tanì zìzo Giká tí ngá nda i dri. Dré mápà nda kí tojòzo lanzílé áyi lebèbhá i dré, i kòlanzíró móndyá zyandre nda i dré. Dré kpà kosyá rì nda kí lanzízó àyi tití dhi i dré.

⁴² Di àyi tití nda i dré nyàzoá pízo.

⁴³ Gò akódhi ni lebèbhá i dré mápà nda kí àmbí kosyá íbe dhi kí lokózó gàle kánzì mudrì-drì-rì dhi i sè bïbi.

⁴⁴ Ago ngá nda kí nyabhá dhi i tá ngùlù-nzi.

Yésu to atsí tâpâríandre drísè

(À kònò kpà Màtayò 14:22-33; Yòwáni ` 6:15-21)

⁴⁵ Gbà lókyá nda sè dhi, Yésu dré áyi lebèbhá kí 'òzo lile mbàle bwátù na, i kòzyaró drìdrì i kandrána tâpâríandre ni ta'á na, Bètèsàyídà na. Tako ko, lè tá rè zyà láti fèle móndyá zyandre nda i dré lìzo 'íká.

⁴⁶ Kòlazí àyi tí dre dhi, dré mbàzo kòngó àlo drìna kítswálé tà ta Giká be.

⁴⁷Ngá kàní dre dhi, Yésu ni lebèbhá i tá bwátù na tāpáríandre nda ni kítogá na. Di, akódhí tá ína kalóma bvò dri.

⁴⁸Dré nòzoá dhi, áyi lebèbhá nda i adré tá ru lagù kápí sè kitswálé bwátù zi lile drìdrì, lyàandre dré adrélé vile sinyà dri àyi rú dhi sè. Di ngátsi kítogá àmvolésè dhi, dré ngàzo adrélé atsí to tāpáríandre drisè, adrészó lile áyi lebèbhá nda i véna, adrélé 'ole àyi ki lavú.

⁴⁹Ì kònò akódhí adrérà'a atsí to tāpáríandre drisè dre dhi, i dré kisùzoá dhi, kòdhí tá móndí líndrì 'i gò, i dré ngàzo tetrélé.

⁵⁰Tàko ko, àyi tití dhi i nò tá akódhí gò, tirì dré gàzo àyi léna bǐ. Di, gbă kòdhwa, Yésu dré tazoá àyi dré dhi: «Mì tsì togó! Ma 'i. Mì ro ngá ko! »

⁵¹Dré mbàzo bwátù na àyi véna gò, lyàandre nda dré rìzo adrélé kíri. Di àyi ki líndrì dré gàzo bhwäbhwa.

⁵²Àngyá ko, tà líndríga ró Yésu dré 'ole mápà ni tà sè nda fí tá dhu rè àyi drìna ko, àyi ki togó dré tá adrélé tòmbátòmba dhi sè.

Yésu tidri' dràbhá i bvò Gènèsàréte àdhya na

(À kònò kpà Mâtayò 14:34-36)

⁵³Ì kòzya tāpáríandre nda ni ta'á na dre dhi, i dré tsàzo bvò Gènèsàréte àdhya na.

⁵⁴Ì dré tá adrérà'a apfòle bwátù lésè dhi 'á dhi, móndyá kònàle dhi i dré ndirí Yésu ni nòzo nile kyá.

⁵⁵Di i dré ngàzo tatsílé bvò nda 'ásè tití, adrélé dràbhá ki adó ká'yá i dri, adrészó alìle àyi íbe àrà ángùdhi i dré yìzoá akódhí lána dhi lé.

⁵⁶Di àrà tití Yésu dré adrészó lile dhi i 'ásè dhi, gba kàdré bhàandre 'i yà, bhà 'i yà, kó ngalè gbàbhú 'i yà dhi, móndí i adré tá àyi ki dràbhá ki adó alìzo àyi íbe àrà adrészó ngá lagí dhi i 'ásè. Di i adré tá akódhí ni ti lizí, kòtayíró dràbhá nda i adrélé ngbà 'i àyi kítá ti tabè kòdhya. Di àyi tití adrébhá tabèá nda i adré tá adrílé.

Márokò 7

Gìká ni kúlí bhèma adrészó móndí' ki labhí lebè dhi

(À kònò kpà Mâtayò 15:1-9)

¹Kítú àlo dhi, Fàrisayò i tátrítrí kúlí tadhábhá àruka angábhá Yèrúsalémà lésè dhi i alì tá ru kimó Yésu làga.

²Gò i dré nòzoá dhi, akódhí ni lebèbhá ki àruka i adré tá ngá nya drígá be ndí ró. Kòdhí adré tåá dhi, i adré tá ngá nya drígá dzi àko ró.

³(Tàko ko, Fàrisayò i Yúdà ànzì àruka tití dhi íbe dhi, i adré rè ngbú àyi ki drígá dzi dóro 'iká, gò adrészó ngá nya ndò, i dré adrélé trôle àyi ki tábhí ki labhí i rú dhi sè.

⁴Ì kàdré nzìle àrà adrészó ngá lagí dhi lésè dhi, i adré ngbú àyi ki temvé yí sè 'iká, gò adrészó ngá nya ndò. Ì adré kpà labhí àruka bǐ dhi ki lebè, adrészó kópò ki dzi lìdrí íbe ìndì sàni íbe.)

⁵Di Fàrisayò nda i tátrítrí kúlí tadhábhá nda íbe dhi i dré lizízóá Yésu tí dhi: «Ámi lebèbhá i adré àma kí tábhí kí labhí lebè ko àdho tà sè? Tako ko, i adré àyikya ngá nya drígá be ndí ró. »

⁶Yésu logó àyi dré dhi: «Pròfétà Èsáyà dré tá adrérà'a Gíká ni kúlí longó àmi túrúpfúbhá i ró ni kí tà sè dhi 'á dhi, longó tà nda kyá tázoo dhi: «Móndyá kòdhí i adré áma lindrì bha ngbà 'í ti sè. Di, àyi kí togó vwà ína má rúsè vwàvvà. »

⁷I adré lísambò 'o má dré wóyá. Tako ko, i adré tolí angábhá móndí i vélésè dhi kí tadhá ngóró tolí nda i angá tá má vélésè na tíni. »

⁸Mì tayí àmikya tolí Gíká àdhyá i, adrészó trôle labhí móndí kya i rú. »

⁹Gò tàá àyi dré dhi: «Mì ni àmikya adrélé Gíká ni tolí kí bhe gára dri, adrészó àmi kí tändí kí labhí kí likí dhi dóro. »

¹⁰Tako ko, Mósè tà tá dhi: «Lè mí kàdré ámi atá ni lindrì bha ámi andre be. » Tà kpà dhi: «Dhya adrélépi tà ta kònzi áyi atá rú yà, kó ngalè áyi andre rú yà dhi, lè à kò'o akódhí nda dràle dràdrà. » ¹¹Di, mì adré àmikya tàá dhi, dhya àlo ni kitswá tàá áyi atá dré yà, kó ngalè áyi andre dré yà dhi: «Ngá má dré tá kitswálé fèle ámi ledé dhi kòròbán'i, kòdhí adré tàá dhi, ngá fèle Gíká dré dhi 'í. »

¹²Akódhí nda kòtà kònini dhi, mì adré dì vélé akódhí ni tayí tà 'o atá ni dré yà, kó ngalè andre ni dré yà dhi ko.

¹³Di ásà dhi, mì adré àmikya Gíká ni kúlí bhe gára dri, àmi kí labhí mì dré kisúlé àmi kí tábhí i véna dhi kí tà sè. Mì adré kpà tà bí dhi kí 'o kònini. »

Tà adrébhá móndí' kí 'o atsálé ndí ró Gíká mìlésè dhi i (À kònò kpà Mátayò 15:10-20)

¹⁴Gò Yésu dré gózo móndyá zyandre kònàle dhi kí azí, tázoo àyi dré dhi: «Àmi tití, mì yi vo rè tà kònidihi, àndu ni ni nízo ká!

¹⁵Ngá adrélépi file móndí léna dhi kitswá akódhí ni 'o atsálé ndí ró bwà ko. Be ró dhi, tà adrélépi apfòle móndí lésè dhi adré ína akódhí ni 'o atsálé ndí ró dhi nì. » [¹⁶]

¹⁷Yésu kòtayí móndyá zyandre nda i dre dhi, dré nzízo bhàna gò, akódhí ni lebèbhá i dré kúlí alaala nda ni àndu lizízó tíá.

¹⁸Akódhí dré tázoo àyi dré dhi: «Àmi, àmi kókpà tà nínì àko? Mì ni ko tâle dhi, ngá adrélépi file móndí léna dhi kitswá ína akódhí ni 'o atsálé ndí ró bwà ko dhi?

¹⁹Tako ko, ngá nda adré file akódhí ni togó na ko. Be ró dhi, adré ína file akódhí ni 'a na gó, adrélé apfòle akódhí ni rúbhá lésè. » (Kúlí nda kòdhí sè dhi, Yésu adré tà táá dhi, mányàngá tití dhi i dóro Gíká mìlésè.)

²⁰Yésu gó tàá dhi: «Tà adrélépi apfòle móndí ni togó lésè dhi ína tà adrélépi akódhí ni 'o atsálé ndí ró dhi 'í.

²¹Tako ko, tà adrébhá apfòle móndí kí togó lésè dhi i, tà kòn'i 'í: tà kònzi kisùle dhi i, ndòtò tà, kugù tà, móndí kí tupfuma ni tà,

²²múná tà, ngá lovó ní tà, togó kònzi ní tà, móndí kí lítima ní tà, tà swà, lovó kònzi bhàma móndí i rú dhí ní tà, móndí kí rú tama kònzi dhí ní tà, drìkàdrì ní tà, ìndì tà azaaza.

²³Tà kònzi nda kòdhí i adré tití apfòle móndí kí togó lésè gò, adrélé àyi kí 'o atsálé ndí ró. »

Tòkó àlo súrú twá ro dhí ka'i Yésu báti

(À kònò kpà Mâtayò 15:21-28)

²⁴Àmvolásà dhí, Yésu dré àrà nda ní tayízó gò, lìzo tsàle bvò Tírè làga dhí na. Kònàle dhí, dré fízo dzó àlo na lùzu ró. Lè tá à kònì i kònàle dhí ko. Dí, kitswá tá ína tà nda ní zu móndí i dré bwà ko.

²⁵Dí tòkó àlo zapi ní dré adrészó tirí kònzi íbe í léna dhí kòyi Yésu ní rúbí dre dhí, dré ndíri alízo adhélé akódhí pá.

²⁶Tòkó nda tá ína móndí súrú twá ro tile bvò Fòwinikè àdhyà Sírýà le dhí na dhí 'í. Dí dré ngàzo adrélé Yésu ní ti lizí, kòdroró tirí kònzi nda áyi zapi lésè be dhí bvó.

²⁷Yésu dré tázooá drá dhí: «Mí tayí rè zyà ànzimvá i ngá nya pìzo 'íká. Tako ko, kitswá ànzimvá kí mápà dòzo bhèle kòkí i dré dhí ko. »

²⁸Dí, tòkó nda logó drá dhí: «Míri, tágba kònini dhí, ndìndì kòkí mísá zàle dhí i adré àyikya mápà kórónyá ànzimvá i dré adrélé tayílè ledhélé dhí kí nya kòdhya. »

²⁹Dí Yésu tà drá dhí: «Kúlí mí dré logolé kòdhí sè dhí, mí kitswá nzile. Tirí kònzi nda pfò ámi zapi lésè dre. »

³⁰Dí tòkó nda kònzi i bhàna dre dhí, dré áyi zapi nda ní kisúzó adrérà'a ayilé lángá dri. Tirí kònzi nda pfò tá lásà dre.

Yésu tidri' agó àlo bíbhálé be kùdúkùdu ró adrélépi kpà ábhä' bhä' ro dhí

³¹Àmvolásà dhí, Yésu dré bvò Tírè làga nda ní tayízó gò, lìzo lavulé Sidónà 'ásè, ìndì bvò zile bhàandre Mudrí i ró dhí 'ásè, góle tsàle tâpârìandre Gàllayà àdhyà làgana.

³²Kònàle dhí, à dré agó àlo bíbhálé be kùdúkùdu ró adrélépi kpà ábhä'bhä' ro dhí ní adzízó Yésu vélé, akódhí ní ti lizízó, kòbhàró drígá agó nda dri, akódhí ní tidrizó be dhí bvó.

³³Dí Yésu dré akódhí nda ní drìzo lìzo ába gàrà dri móndí zyandre i rúsè gò, áyi drígá ànzì kí sòzo akódhí bina. Dré tûsú fùzo áyi drígambílì dri gò, akódhí ní làdra tabèzo ásà.

³⁴Dré mì tingázó kurú na bhù na gò, la'ázó fèèè, tázooá dhí: «Èfátà! » (Kòdhí adré lèá tâle dhí: «Mí nzì ru! »)

³⁵Gbă kòdhwa, agó nda ní bíbhálé dré fùzo, akódhí ní làdra dré ru nzìzo gò, dré kidhözó adrélé tà ta dóro.

³⁶Gò Yésu dré móndyá kònàle dhi kí kodzózó tázoo dhi, i kòlongó tà nda ni rúbí dhya àlo dré ko. Di, kàdré vélé áyi rúbí ni longoma logá móndí i dré dhi, i adré vélé rúbí nda ni longó lìzo ába drìdrì.

³⁷Di móndí kí líndrì adré tá vélé gàle bhwâbhwa gò, i dré adrészó tâa dhi: «Tà tití akódhi dré adrélé 'ole dhi i dóro! Adré ndìndì móndí bíbhálé be kùdúkùdu ró dhi kí 'o adrélé tà yi, i ndì móndí ábhâbhâ ro dhi kí 'o adrélé tà ta. »

Márokò 8

Yésu fè ngá nyàle móndí́ ngùlù-su dhi i dré (À kònò kpà Mâtayò 15:32-39)

¹Àmvolásà dhi, móndí zyandre lavulé dhi i dré gòzo ru kimó Yésu làga. Àyi nda i dré tá adrélé ngá nyàle dhi àko dhi sè dhi, Yésu dré áyi lebèbhá kí azizó, tázoo àyi dré dhi:

²«Má adré kízà do áma togó na móndyá zyandre kònì kí tà sè. Tako ko, áma túmâni àyi íbe kítú na, i ndì ngá i dré kitswâlé nyàle dhi vélé yókodhó.

³Má kòlogó àyi nzile bhàna tâbirí be dhi, i ni landè ledhézó láti bhâlé. Àngyá ko, àyi kí àruka i angá làwú làvo lésè. »

⁴Di akódhi ni lebèbhá i logó drá dhi: «Àrà bhà àko kònìdhi 'á dhi, à ni kitswâ mápà kisú fèle àyi dré nyàle pìzo ásà dhi ángwà? »

⁵Yésu lizí àyi tí dhi: «Àmi mápà íbe ángopí? » i logó dhi: «Nzi-drì-rì. »

⁶Gò Yésu dré tázoo móndyá zyandre nda i dré dhi, i kòlirí bvò dri. Di kàdó mápà nzi-drì-rì nda i dre dhi, dré àwoyà fèzo Giká dré gò, tonjòzoá lanzílé áyi lebèbhá i dré gò, i dré lanzízóá móndyá zyandre nda i dré.

⁷Àyi tá kpà kosyá àruka tsàtsà dhi íbe. Di Yésu dré kpà tà taní zìzo Giká tí kosyá nda i dri gò, tázoo áyi lebèbhá i dré dhi, i kòlanzí móndyá nda i dré.

⁸Di móndyá tití nda i dré ngá nda kí nyàzo pìzo. Gò akódhi ni lebèbhá i dré àmbí ni kí lokozó gàle kánzì nzi-drì-rì dhi i sè bibi.

⁹Móndyá ngá nyabhá nda i tá ànyiànyi ngùlù-su. Gò Yésu dré láti fèzo àyi dré nzìzo.

¹⁰Gbă lókyá nda sè dhi, Yésu i dré tombàzo bwátù na lebèbhá ni íbe gò, i dré lìzo tsàle bvò Dàlámànútà àdhya na.

Fàrisayò i` lizí Yésu tà àlo li` ndri` ga ró dhi ni 'o (À kònò kpà Mâtayò 16:1-4)

¹¹Gò Fàrisayò i dré alìzo Yésu vélé, adrélé tà kayí akódhi be. I adré tá akódhi ni le tabhile gò, i dré akódhi ni ti lizizó, kò'oró tà àlo líndrígà ró angálépi Giká vélésè dhi.

¹²Di Yésu dré ngàzo la'álé fèèè gò, tázoo dhi: «Móndyá ándrò kònì i adré tà líndrígà ró dhi ni nda nòle àdho tà sè? Má adré tà bàti ta àmi dré: À kitswâ tà àlo líndrígà ró dhi ni 'o àyi dré nòle dhi ko. »

¹³Gò dré àyi kí tayízó, gòzo mbàle bwátù na kitswálé zyàle tápáríandre ní ta'á na.

Tàkú Fàrìsáyò kya i` ndi` Èródè àdhya

(À kònò kpà Mátáyò 16:5-12)

¹⁴Dì Yésu ní lebèbhá ì tivì tá mápà dòma atsí na dhi. Àyi tá ngbà 'í mápà íbe àlo bwátù na.

¹⁵Gò Yésu dré àyi kí kodzozó tázoo dhi: «Mì kònò dóro, mì kàdréró àmì kí likí tàkú Fàrìsáyò kya ìndì Èródè àdhya kí tà sè. »

¹⁶Dì akódhi ní lebèbhá ì dré ngàzo adrélé tà kayí àyi kòfalésè adrészó táká dhi, akódhi tà tá kònìnì ì dré tá adrélé mápà àko dhi sè.

¹⁷Yésu dré tà ì dré adrélé tâle nda ní nízo kyá gò, tázoo àyi dré dhi: «Mì adré àmikya tà kayí mì dré adrélé mápà àko dhi sè àdho tà sè? Mì atógyà dhu rè àmikya tà àlo ko? Mì ní dhu rè tà àlo ko? Àmì kí togó tsì tòmbátòmba bâti? »

¹⁸Àmì mì íbe gò, mì dré adrészó ngá no ko? Àmì bíbhálé íbe gò, mì dré adrészó tà yi ko? Mì tivì vo tà má dré 'ole dhi ì dre? »

¹⁹Má dré tá mápà nzi dhi kí toñozo lanzaillé móndyá ngùlù-nzi dhi ì dré dhi, mì gò àmbí ní kí lokó gâle kánzì ángopí? » Ì logó drá dhi: «Mudrí-drì-rì. »

²⁰Yésu gò lizíá dhi: «Má dré tá kó mápà nzi-drì-rì dhi kí toñozo lanzaillé móndyá ngùlù-su dhi ì dré dhi, mì gò àmbí ní kí lokó gâle kánzì ángopí? » Ì logó dhi: «Nzi-drì-rì. »

²¹Dì Yésu dré tázoo àyi dré dhi: «Mì ní vo dhu rè tà àlo ko? »

Yésu tidri` agó àlo mì kùdükùdu ró dhi

²²Àmvolásà dhi, ì dré lìzo tsàle bhàandré rú zile Bètèsayídà dhi na. Kònàlé dhi, à dré agó àlo mì kùdükùdu ró dhi ní adzízó Yésu vélé, akódhi ní ti lizízó, kòtabèrò agó nda, akódhi ní tîdrízó be dhi bvó.

²³Dì Yésu dré mì kùdükùdu nda ní drígá rùzo, akódhi ní sèzo pfòzo ába bhà nda 'ásè kívì na. Dré tûsú fùzo akódhi mi, drígá bhàzo driá gò, akódhi ní lizízó tázoo dhi: «Mí adré ngá no? »

²⁴Agó nda dré mì bhèzo gò, tázoo dhi: «Má adré móndí kí no ngóró fa i tîni, di, ì adré atsí to. »

²⁵Yésu dré gózo tódhyá áyi drígá bha agó nda mi. Dì akódhi nda dré gózo mì nzi kàdrì gò, mì ní dré adrízó adrélé ngá tití dhi kí no dóro.

²⁶Gò Yésu dré akódhi ní logózó nzìle bhàna, tázoo drá dhi: «Mí kògò fîle bhà kòdhì na ko. »

Pétéró tà ngádra 'á dhi, Yésu Mèsi` yà 'í

(À kònò kpà Mátáyò 16:13-20; Lükà 9:18-21)

²⁷Àmvolásà dhi, Yésu i lebèbhá ni íbe dhi ì dré ngàzo adrélé lavulé bhà tsàtsà bhàandre Kàyìsàrìyà Filípò àdhya làgásè dhi i 'ásè. Látí 'á dhi, akódhì dré lizizóá àyi tí dhi: «Móndí ì adré tàá dhi, ma àdhì 'í? »

²⁸Ì logó drá dhi: «Móndí àruka ì adré tàá dhi, mi Yòwánì Bâtísímò fèlepi 'í. Àruka ni ì adré tàá dhi, mi Èlìyà 'í. Àruka ni ì adré kó tàá dhi, mi pròfétà kí àlo 'í. »

²⁹Yésu gò lizia àyi tí dhi: «Dì àmì ró dhi, mì adré àmikya tàá dhi, ma àdhì 'í? » Pétéró gò logoa drá dhi: «Mì mína Mèsiyà 'í. »

³⁰Gò Yésu dré àyi kí logázó, ì kòlongóró tà nda dhya àlo dré ko.

Yésu longó áyi dràma ni tà, áyi ngàma dràdrà 'ásè dhi be

(À kònò kpà Mâtayò 16:21-28; Lükà 9:22-27)

³¹Gò Yésu dré kidhózó adrélé tadhá àyi dré dhi, adré tá leá dhi, Móndí ni Mvá konya kizà lavulé, ìndì Yúdà ànzì kí bhàgo i, kowánà kàdrì i, ìndì tátrítrí kúlí tadhábhá íbe dhi ì kògà akódhì rè. Adré tá kpà leá dhi, à kòpfu akódhì dràle gò, kitú na àmvolésè dhi, kòngaró dràdrà 'ásè.

³²Yésu adré tá tà nda ni ta àyi dré ngádra 'á. Dì Pétéró dré akódhì ni drìzo gàrà dri gò, kidhózó adrélé tà ta akódhì dri tà nda sè.

³³Dì, Yésu dré áyi alázó áyi lebèbhá kí no gò, lawàzo Pétéró dri tazoá drá dhi: «Sàtánà, mí nga má milésè gòle má àmvona! Mí adré tà kisù Giká àdhya tini ko. Be ró dhi, mí adré mína tà kisù móndí kya tini. »

³⁴Gò Yésu dré móndyá zyandre kònàle dhi kí azizó áyi lebèbhá íbe, tazoá àyi dré dhi: «Dhya àlo kàdré leá alìle má vésè dhi, lè akódhì nda kòtayí áyi tändi ni tà, kàdó áyi fa kipakipa gò, kàdréró áma lebè.

³⁵Tako ko, dhya ángùdhi adrélépi áyi tändi ni lídrì le tindrile dhi, a ni áyi lídrì nda ni 'o avile. Dì, dhya ángùdhi adrélépi ína áyi lídrì fe áma tà sè ìndì Rúbí Tani ni tà sè dhi, a ni áyi lídrì nda ni tindrí.

³⁶Àngyá ko, dhya àlo kòkisú ngá bvò kòndi àdhya i tití gò, áyi tändi ni lídrì tayízó avile dhi, akódhì nda kisú ína àdho tà doro 'í?

³⁷A ni go àdho ngá fe kòdhya kíswázó áyi lídrì nda ni kisú dhi?

³⁸Dhya àlo kàdré kanyò ro áma tà sè ìndì áma kúlí kí tà sè móndyá ándrò zàràbhù ro ìndì takonzibhá ro ni i kòfalé dhi, Móndí ni Mvá ni kókpà adré kanyò ro akódhì nda ni tà sè, lókyá í dré dra agòzo áyi Atá ni mìlanzilanzì na ángéló lolo dhi íbe dhi tú. »

Márokò 9

¹Yésu gò tàá àyi dré dhi: «Má adré tà báti ta àmì dré: Móndí àruka adrébhá àyi kí totó kònwa ni ì kíswá dràle drìdrì ì dré dra Giká ni Òpì nòzo atsárà'a rinyí be dhi kandrá ko. »

Yésu ni lású ladzá ru atsálé lagulagu ró

(À kònò kpà Mâtayò 17:1-13; Lükà 9:28-36)

²Kítú nzi-drì-àlo àmvolésè dhi, Yésu dré Pétéró kí drìzo Yàkóbhò íbe ìndì Yòwánì be gò, ì dré lìzo àyi pátí mbàle kòngó àlo mvumvù dhi drìna. Kònàle dhi, Yésu ni làsú dré ngàzo ru ladzá àyi mìle.

³Akódhi ni kítá ì dré kpà atsázó kemve kpírikpíri, adrélé lagulé kítá móndí bvò dri dhi ì dré kitswálé temvélé bwà dhi kya ni lavú.

⁴Gò Èlýà i Mósè be dhi ì dré agázó àyi kandrá, adrélé tà ta Yésu be.

⁵Dì Pétéró dré tazoá Yésu dré dhi: «Rábbi, dóro ni mà dré adrélé kònwa dhi. Mà kòledé wémà na dhi i kònwa: àlo ni mí dré, àlo ni Mósè dré, ìndì àlo ni Èlýà dré. » ⁶(Akódhi tà tá kònini, dré tá nile í kitswá àdho tà ta kòdhya ya dhi ko dhi sè. Tako ko, tirì ga tá àyi léna bì.)⁷Gò ndùrùku dré apfòzo àyi kí asó rùkù gò, kúlí dré apfòzo lásà tàá dhi: «Kònìdhi áma Mváagó má dré lèle tò dhi 'ì. Mì kòyi akódhi! »

⁸Gbà kòdhwa, ì kònò ngá àyi làgásè dre dhi, ì dré gòzo vélé móndí àzya no àyi íbe ko, ngbà 'í Yésu 'ì kalóma.

⁹Ì dré tá adrérà'a asilé kòngó nda drilésè dhi 'á dhi, Yésu dré àyi kí kodzozó tazoá dhi, ì kòtití tà ì dré nôle nda dhya àlo dré ko, tsàle lókyá Móndí ni Mvá dré ngarà'a dràdrà 'ásè dhi 'á.

¹⁰Dì ì dré tà nda ni zùzo tayílé àyi léna, adrészó lizíá àyi kòfalésè ngalè kúlí «ngàma dràdrà 'ásè» nda adré tá lèá tâle ngíni ya dhi.

¹¹Gò ì dré Yésu ni lizízó tazoá dhi: «Tátrítrí kúlí tadhábhá ì adré tàá dhi, lè Èlýà kàlì rè zyà Mèsiyà kandrá 'íká àdho tà sè? »

¹²Yésu logó àyi dré dhi: «Tà báti ró dhi, Èlýà adré alìle drìdrì tà tití dhi kí ledé. Dì, Giká ni Kúlí adré kókpà tàá dhi, lè Móndí ni Mvá konya kizà lavulé, ìndì à kògà akódhi rè dhi àdho tà sè?

¹³Dì, má adré mána tàá àmí dré dhi, Èlýà atsá dre. Gò móndí ì dré àyikya akódhi ni 'òzo ngóró ì dré tá lèle dhi tíni, ngóró tisile akódhi ni tà dri Giká ni Kúlí na dhi tíni. »

Yésu tidrí' mváagó àlo tiri' kònzi í be i' léna dhi

(À kònò kpà Mâtayò 17:14-21; Lükà 9:37-43a)

¹⁴Yésu ì kògò tsàle akódhi ni lebèbhá àruka nda i véna dre dhi, ì dré móndí zyandre ru kímóbhá àyi nda i làgásè kúrú dhi kí nòzo, túmání tátrítrí kúlí tadhábhá adrébhá tà kayí àyi íbe dhi íbe.

¹⁵Gbà lókyá móndyá zyandre nda ì dré Yésu ni nòzo dhi sè dhi, àyi kí líndrí dré gagà gò, ì dré arázó mòdo fe drá.

¹⁶Gò Yésu dré lizízóá áyi lebèbhá nda i tí dhi: «Mì adré tà kayí àyi íbe àdho tà dri? »

¹⁷Dì agó àlo móndyá zyandre nda i kòfalé dhi dré logózóá drá dhi: «Tadhálépi, má adrì áma mváagó alizo ába mí vélé. Tako ko, akódhi tiri' kònzi akódhi ni 'olepi atsálé ábhähbhá ro dhi íbe í léna.

¹⁸Tirí nda kàdré akódhi ni ru dhì, adrè akódhi ni abhé kìní mi, kápfùtrá dré adrészó apfòle sélásà gò, dré adrészó sítálándrá tsì, adrészó áyi kidzì sì adrélé tòmbátòmba. Má lizí tá ámi lebèbhá kì ti, ì kòdroró tirí nda ká. Di, ì kítswá tá àyikya bwà ko. »

¹⁹Di Yésu logó àyi dré dhì: «Àmi, móndyá ándrò tà ka'ika'ì àko ni i, mà ni adrè vélér àmi íbe vwàle lókyá be ángopí? Má ni àmi kì tà mvo vwàle lókyá be ángopí? Mì adrè mvámvá nda alìzo ába má vélér. »

²⁰Ì dré di alìzo ába. Di gbà lókyá tirí nda dré Yésu ni nòzo dhì sè dhì, dré ngàzo adrélé mvámvá nda ni kízì rinyí sè. Akódhi nda dré dhèzo kìní mi, adrélé áyi lilí gò, kápfùtrá dré adrészó apfòle sélásà.

²¹Di Yésu dré akódhi ni atá ni lizizó tázoo dhì: «Tà kòdhì 'o akódhi kònini vwàle ángopí? » Atá ni logó dhì: «Kidholé akódhi ni anzì lésè.

²²Vésè be bì, tirí nda lebhé akódhi àtsí na yà, kó ngalè yì na, kítswázó akódhi ni pfu dràle dhì bvó. Di mí kòkítswá dhì, mí kòbhà áma kì kizà áma kì ledézó wà! »

²³Di Yésu tà drá dhì: «Mì adrè tákà dhì, má kòkítswá yà dhì? Gíká rinyí íbe kítswázó tà tití dhì kì 'o dhya adrélépi áyi ka'ì dhì dré. »

²⁴Gbà kòdhwa, mvámvá nda ni atá dré yòzo dhì: «Má adrè ka'ia! Di, mí kòledé ma, áma tà ka'ika'ì nda dré adrélé yàyà dhì sè! »

²⁵Yésu kònò móndyá zyandre nda ì adrè tá arálé àyi vélér dhì dre dhì, dré ligizó tirí kònzi nda be, tázoo dhì: «Mi, tirí adrélépi móndí 'o atsálé ábhábhá ro ìndì bíbhálé íbe kùdúkùdu ró ni, má adrè tákà mí dri dhì, mí pfò mvámvá kònìdhì lésè! Mì kògò tàdzí file lána ko! »

²⁶Di tirí nda dré trèzo, mvámvá nda ni kízizó rinyí sè gò, pfòzo lásà lìle. Móndyá nda ì kònò mvámvá nda adrérà'a ayilé àbvò tímì dre dhì, àyi kì àruka ì dré tázoo dhì: «Drà dre. »

²⁷Di, Yésu dré akódhi ni drígá rùzo tingázóá gò, akódhi dré áyi totózó áyi pá dri.

²⁸Bvóá dhì, Yésu ì kònzi bhàna lebèbhá ni íbe adrélé àyi pátí dre dhì, ì dré akódhi ni lizizó tázoo dhì: «Mà kítswá tá tirí kònzi nda kònàdhì ni dro bwà ko àdho tà sè? »

²⁹Yésu logó àyi dré dhì: «À kítswá ngbà 'í tirí kònzi kárá be kònini dhì kì dro pfòle tà zìma Gíká tí dhì sè. »

Yésu gò áyi dràma ni tà longó, áyi ngàma dràdrà 'ásè dhì be (À kònò kpà Mátayò 17:22-23; Lükà 9:43b-45)

³⁰Ì kòtayí àrà nda dre dhì, ì dré ngàzo adrélé lavulé bvò Gàliláyà àdhyà 'ásè. Yésu lè tà à kònì àyi tá kònàle dhì ko.

³¹Tako ko, adrè tá tadhá áyi lebèbhá ì dré, adrészó tákà dhì: «À ni Móndí ni Mvá ni lefè kàribhá ì drígá. Ì dré akódhi ni pfòzo dràle gò, kítú na àmvolésè dhì, dré ngàzo dràdrà 'ásè. »

³²Dì, kúlí nda kí àndu fí tá ína àyi drìna ko. Ì adré tá kpà ngá ro tà nda ní lizima Yésu tí dhi sè.

Dhya kàdri` lavúlé dhi àdhi 'í?

(À kònò kpà Mâtayò 18:1-5; Lükà 9:46-48)

³³Gò ì dré lìzo tsàle Kàpàràñawúmà na. Ì dré tá adrérà'a dzó na dhi 'á dhi, Yésu dré lizizóá áyi lebèbhá i tí dhi: «Láti 'á dhi, mì adré tá tà kayí àmí kòfalésè àdho tà dri? »

³⁴Dì, ì dré kúlí logózó ko. Tàko ko, ì adré tá àyikya tà kayí nízoá ngalè dhya kàdri lavúlé àyi kòfalé dhi àdhi 'í ya dhi.

³⁵Dì Yésu kòlirí dre dhi, dré áyi lebèbhá mudrí-drì-rì nda kí azízó, tàzoá àyi dré dhi: «Dhya àlo kàdré lèá adrélé drìdrì móndí i kòfalé dhi, lè akódhi nda kàdré dhya bvólé ro àyi tití dhi i kòfalé, ìndì màrabà àyi tití dhi kya ró. »

³⁶Gò dré mvámvá àlo dhi ní adózó bhàle àyi kí kító 'á. Kàdó akódhi nda rùle í drígá dre dhi, dré tàzoá àyi dré dhi:

³⁷«Dhya ángùdhi adrélépi mvámvá kònìdhi tití dhi ní ka'ì dòle dóro áma rú sè dhi, adré áma tändi ní ka'ì kòdhya. Dhya ángùdhi adrélépi áma ka'ì dòle dóro dhi, adré ngbà 'í áma ka'ì kòdhya ko, adré kókpà dhya áma amùlepi dhi ní ka'ì kòdhya. »

Dhya adrélépi ru pfu àma i` be ko dhi, àma kí àlo 'í

(À kònò kpà Lükà 9:49-50)

³⁸Gò Yòwánì dré tàzoá Yésu dré dhi: «Tadhálépi, mà nò tá agó àlo dhi adrérà'a tirí kònzi kí dro ámí rú sè. Dì mà dré akódhi nda ní logázó, dré tá adrélé àma kí àlo 'í ko dhi sè. »

³⁹Dì, Yésu logó dhi: «Mì logá akódhi ko. Tàko ko, dhya àlo tà líndríga ró dhi ní 'olepi áma rú sè dhi, kitswá ndírì gòle áyi alá tà ta kònzi má rú bwà ko.

⁴⁰Àngyá ko, dhya ángùdhi adrélépi ru pfu àma íbe ko dhi, àma kí àlo 'í.

⁴¹Má adré tà báti ta àmí dré: Dhya ángùdhi adrélépi ndìndì kópò yí àdhya ní fe àmí dré mvùle, mì dré adrélé móndyá Krísto àdhya 'í dhi sè dhi, akódhi nda ní làgí ína ní kisú báti. »

Tà adrébhá móndí` kí 'o ledhélé tàkonzi` na dhi i

(À kònò kpà Mâtayò 18:6-9; Lükà 17:1-2)

⁴²«Dì, dhya àlo kàdré ína ànzimvá adrébhá áma ka'ì kònì kí àlo 'o dhèle tàkonzi na dhi, dóro ni tá kírà kàdrì 'ile akódhi nda kembé gò, akódhi ní bhèzo dràle yiandre na dhi.

⁴³Ámí drígá kàdré ámí 'o dhèle tàkonzi na nì dhi, lè mí kòli ámí drígá nda. Àngyá ko, mí dré file lídrì kóná vésè kólyá dhi na ngbà 'í drígá be àlo dhi dóro lavúlé, mí dré lìle líferò àtsí ní dré adrészó adrálé ko dhi na drígá be rì dhi rúsè. [⁴⁴]

⁴⁵Ámí pá kàdré ámí 'o dhèle tàkonzi na nì dhi, lè mí kòli ámí pá nda. Àngyá ko, mí dré file lídrì na ngbà 'í pá be àlo dhi dóro lavúlé, ámí bhèle líferò na pá be rì dhi rúsè. [⁴⁶]

⁴⁷ Ámì mì kàdré kó ámì 'o dhèle tàkonzì na nì dhì, lè mí kàngí ámì mì nda. Àngyá ko, mí dré file Gìká ni Òpì na ngbà 'í mì be àlo dhì dòro lavulé, ámì bhèle líferò na mì be rì dhì rúsè.

⁴⁸ Kònàle dhì, «kùbhú adrébhá àbvò nya dhì ì todrà ko na, ìndì àtsí adrélépi kòle dhì adrà kpà ko na. »

⁴⁹ À nì móndyá tití dhì kì tà ka'ika'i tabhì àtsí sè, ì kàdréró tà'í íbe àyi léna.

⁵⁰ Tà'í ngá dòro 'í. Dì, tà'í nì aswaaswa kòtì akilé lásà dhì, mì nì kitswá logóá ngíni? Lè mì kàdré tà'í íbe àmì kì tändi i léna, adrészó kpà tà kìdríkìdrí íbe àmì kòfalé. »

Márokò 10

Yésu tadhá tà tòkó tingama ni tà dri

(À kònò kpà Mátayò 19:1-12; Lükà 16:18)

¹ Yésu kòtayí àrà nda dre dhì, dré lìzo bvò Yùdáyà àdhya na gò, zyàle tsàle Yòròdánè nì ta'a na. Móndí zyandre dhì ì dré gòzo ru kimó akódhì làga gò, dré kidhózó adrélé àyi kì tadhá, ànzyà gà dré adrélé 'ole dhì tíni.

² Gò Fàrisayò àruka ì dré àyi kì kisizó ànyi akódhì làga, kitswálé akódhì nì tabhì litílé. Dì ì dré lizizóá tíá dhì: «Àma kì tátrítrí kúlì ka'lì, agó kòtingá áyi tòkó dhì 'í? »

³ Akódhì logó àyi dré dhì: «Mósè fè tolí àmì dré 'òzoá ngíni? »

⁴ Ì logó drá dhì: «Mósè ka'lì tá dhì, agó kòtisì wárágà áyi tòkó nì tingázó gò, mùzoá nzile. »

⁵ Yésu logó àyi dré dhì: «Mósè tisì tá ína tolí nda kòdhì àmì dré, àmì kì togó dré adrélé tòmbátòmba dhì sè.

⁶ Dì, ngá tití dhì kì bhàma nì kidhoma 'á dhì, «Gìká bhà tá àyi agó i tòkó be. » ⁷ Ásà dhì, agó nì áyi atá nì tayí áyi andre be, ru amúzó áyi tòkó be gò,

⁸ àyi rìti nda ì dré atsázó rúbhá àlo ró. » Dì ì gò vélé adrélé rì ko. Be ró dhì, àyi ngá àlo 'í.

⁹ Ásà dhì, lè móndí ì kòlanzí ngá Gìká dré amulé nì dhì ko. »

¹⁰ Amvolásà, ì kòfì dzó na dre dhì, akódhì nì lebèbhá ì dré gòzo akódhì nì lizí tà nda dri.

¹¹ Akódhì logó àyi dré dhì: «Agó ángùdhi áyi tòkó nì tingálépi gò gòzo tòkó àzya adó mòle dhì, adré ína múná tà 'o tòkó nì àlo nda rú.

¹² Kòdhì íbe dhì, tòkó ángùdhi áyi agó nì taylépi gò gòzo agó àzya mo dhì, adré kókpà múná tà 'o. »

Yésu zi tà taní Gìká tí ànzimvá i dri

(À kònò kpà Mátayò 19:13-15; Lükà 18:15-17)

¹³Kítú àlo dhi, móndí i adré tá àyi kí ànzimvá kí adrì alìzo àyi íbe Yésu vélé, kòtabèró àyi, tà taní zìzo Gìká tí àyi dri be dhi bvó. Dì, akódhi ni lebèbhá i dré àyikya lawàzo móndyá nda i dri tà nda sè.

¹⁴Yésu kònò tà nda dre dhi, akódhi ni togó dré aswázó gò, dré tazoá àyi dré dhi: «Mí tayí ànzimvá kònì i alile má vélé. Mì logá àyi ko. Àngyá ko, Gìká ni Òpì móndyá adrébhá àyi nda i tñi dhi i dré.

¹⁵Má adré tà bati ta àmì dré: Dhya ángùdhi adrélépi Gìká ni Òpì ka'ì ànzimvá kya tñi ko dhi, kïtswá tìdzí fîle lána ko. »

¹⁶Gò dré ànzimvá nda kí adózó rûle i drígá, áyi drígá bhàzo àyi àlo àlo tití dhi i dri, tà taní zìzo àyi dré.

Yésu i agó àlo ngá lìyí ro dhi be dhi

(À kònò kpà Mâtayò 19:16-30; Lükà 18:18-30)

¹⁷Yésu kònga adrélé lìle láti 'ásè dre dhi, agó àlo dhi dré arázó adhélé áyi kórókó titì akódhi kandrá, akódhi ni lizizó tazoá dhi: «Dhya doro adrélépi tà tadhá ni, lè má kò'o àdho tà kòdhya kïtswázó lídrì kóná vèsè kólyá dhi ni kisú dhi? »

¹⁸Yésu logó drá dhi: «Mí adré áma zi dhya doro dhi ró àdho tà sè? Dhya adrélépi doro dhi yókódhó, ngbà 'í Gìká 'í kalóma.

¹⁹Mí ni tà tátrítrí kúlí dré adrélé tâle à kò'o dhi i be: «Lè mí kòpfu móndí dràle ko. Mí kò'o múná tà ko. Mí kòkugù ngá ko. Mí kòtâ tà móndí rú kinzò sè ko. Mí kòdo móndí kí ngá túrúpfú sè ko. Mí kàdré ámi atá ni lindrì bha ámi andre be. »»

²⁰Dì agó nda tà drá dhi: «Tadhálépi, má lìkí tolí nda kòdhì i tití, kidhólé má dré tá adrérà'a kàdhúrà ro dhi 'á. »

²¹Yésu dré akódhi ni nòzo lèle sè wë gò, tazoá drá dhi: «Tayí ngbà 'í mí dré tà àlo kòdhya: Mí lì ámi ngá tití dhi kí lagí, làfa ni ni lanzizó lemerèbhá i dré gò, mí kàdréró ngá làgí be kàdrì dhi íbe bhù na. Dì mí alì adrélé áma lebè. »

²²Agó nda kòyi kúlí nda i dre dhi, akódhi ni mìbhalé dré atsázó kízà ro. Gò dré ngàzo lìle kízà be tò, dré tá adrélé ngá íbe zyandre ró dhi sè.

²³Yésu dré áyi alázó áyi lebèbhá kí no gò, tazoá àyi dré dhi: «Ngábhá kí fíma Gìká ni Òpì na dhi kòkóròko! »

²⁴Gò akódhi ni lebèbhá nda kí líndrì dré gàzo gagà kúlí nda sè. Dì, Yésu dré gòzo tàá dhi: «Áma ànzi i, fíma Gìká ni Òpì na dhi kòkóròko!

²⁵Ngá lìyí ni fíma Gìká ni Òpì na dhi ína kòkóròko lavulé, kàmílò dré lavulé sìndánì ni bhálé 'ásè dhi rúsè! » ²⁶Dì akódhi ni lebèbhá nda kí líndrì dré gàzo vélé wáláká ni ni lavú gò, i dré adrészó lizíá àyi kòfalésè dhi: «Kàdré kònìnì dhi, àdhi ni kïtswá lídrì kóná vèsè kólyá dhi ni kisú nì? »

²⁷Yésu dré àyi kí nòzo dìi gò, tazoá àyi dré dhi: «Móndí i mìlésè dhi, tà nda kòdhì tà kïtswálé 'ole bwà ko dhi 'í. Dì, Gìká adré ína tà nda ni no kònìnì ko. Akódhi mìlésè dhi, tà àlo kïtswálé 'ole bwà ko dhi yókódhó. »

²⁸Gò Pétéró dré tazoá drá dhi: «Mí nò rè ká! Mà tayí tà tití dhi i adrészó ámi lebè. »

²⁹Dì Yésu logó àyi dré dhi: «Má adré tà báti ta àmí dré: Dhya ángùdhi áyi dzó 'i yà, áyi adrúpi i 'i yà, áyi amvúpi i 'i yà, áyi andre 'i yà, áyi atá 'i yà, áyi ànzi i 'i yà, kó ngalè áyi amvú i 'i yà dhi kí tayílépi áma tà sè ìndi Rúbí Tani ni tà sè dhi,

³⁰a ni ngá nda kí vúdrì kisú tsale vésè be nyadhi-nzi lókyá kònìdhì sè. A ni dzó kí kisú, adrúpi íbe, amvúpi íbe, andre íbe, ànzi íbe, amvú íbe, túmání tà adrészó áyi mì pfo dhi íbe. Kòdhì íbe dhi, a ni kókpà lídrì kóná vésè kólyá dhi ni kisú lókyá adrélépi alìle dhi sè.

³¹Dì, móndí bì adrébhá drìdrì nyànomvá dhi kí go adrélé bvólé ro. Móndí bì adrébhá bvólé ro nyànomvá dhi kí go adrélé drìdrì. »

Yésu gò tódhyá áyi dràma ni tà longó, áyi ngàma dràdrà 'ásè dhi be

(À kònò kpà Mâtáyò 20:17-19; Lükà 18:31-34)

³²Ì dré tá adréra'a mbàle Yérusalémà na dhi 'á dhi, Yésu adré tá lìle áyi lebèbhá i kandrána. Àyi nda ki togó adré tá gàle tirì dré. Mónyá adrébhá lìle àyi vésè dhi i adré tá kpà ngá ro. Dì Yésu dré gòzo tódhyá áyi lebèbhá mudrí-drì-rì nda kí dri gàrà dri gò, kidhózó adrélé tà adrébhá 'ole atsálé i rú dhi kí ta àyi dré.

³³Tà dhi: «Mì yi rè ká! Mà adré mbàle Yérusalémà na. Kònàle dhi, à ni Móndí ni Mvá ni lefè kòwánà kàdrì i drígá tátrítrí kúlì tadhábhá íbe. Ì dré tà ñòzo akódhì dri kitswálé dràdrà sè gò, akódhì ni fèzo pagánò i drígá.

³⁴Ayi nda i dré akódhì ni gùzo, túsú lufúzó miá, tswàzoá gò, pfùzoá dràle. Dì kitú na àmvolésè dhi, dré ngàzo dràdrà 'ásè. »

Tà Yàkóbhò i Yòwánì` be dhi i` dré zìle Yésu tí dhi

(À kònò kpà Mâtáyò 20:20-28)

³⁵Gò Yàkóbhò i Yòwánì be, Zèbèdáyò ni ànzi i ró dhi, i dré àyi kí kisízó ànyi Yésu làga, tàá drá dhi: «Tadhálépi, mà adré lèá mí kò'o tà mà dré dra zìle mí tí dhi àma dré. »

³⁶Yésu tà àyi dré dhi: «Mì adré lèá má kò'o àmí dré àdho tà kòdhya? »

³⁷Ì logó drá dhi: «Ámí Òpì mìlanzìlanzì ro dhi na dhi, mí kòbhà àma lirílé mí làga: àlo ni ámí dríágó lésè, àzya ni ámí lìdzí lésè. »

³⁸Dì Yésu tà àyi dré dhi: «Mì ni tà mì dré adrélé zìle kòdhì ko. Mì ni kitswá tsì kópò kizà àdhya má dré adrélé 'ole mvùle dhi ni mvu bwà? Mì ni kpà kitswá bátísímò kizà àdhya má dré adrélé 'ole dòle dhi ni do bwà? »

³⁹Ì logó drá dhi: «Mà ni kitswá. » Dì Yésu tà àyi dré dhi: «Tà báti ró dhi, mì ni kópò má dré dra mvùle dhi ni mvu, adrészó kpà bátísímò má dré dra dòle dhi ni do.

⁴⁰Dì, kàdré ína móndí dra bhàle lirílé áma dríágó lésè yà, kó ngalè áma lìdzí lésè yà dhi kí tà sè dhi, tà nda kòdhì nò ma ko. Gìká ledé lirírà nda i dhya dré kipèle kitswálé lirílé drìá dhi i dré. »

⁴¹Yésu ni lebèbhá mudrí àruka dhi i kòyi tà zile nda dre dhi, àyi ki togó dré aswázó Yàkóbhò i rú Yòwánì be.

⁴²Dì Yésu dré àyi ki azízó tití gò, tazoá àyi dré dhi: «Mì nì tâle dhi, dhya adrélé nôle móndyá bvò kòndi àdhya ki kàdrì i ró dhi i adré àyikya opì nya àyi dri rinyí sè dhi be. Àyi ki dhya kàdrìkàdrì dhi i adré kpà tà 'o adrészó àyi ki rinyí tadhá àyi dré.

⁴³Dì, adré lèá dhi, tà nda kàdré kònini àmi kòfalé ko. Be ró dhi, lè dhya ángùdhi adrélépi lèá atsálé kàdrì àmi kòfalé dhi, kàdré àmi ki mårábà ro.

⁴⁴Lè kpà dhya ángùdhi adrélépi lèá adrélé drìdrì àmi kòfalé dhi, kàdré àmi tití dhi ki mårábà ro.

⁴⁵Tako ko, Móndí ni Mvá alì bvò dri, móndi i kàdréró tà 'o i dré dhi bvó ko. Be ró dhi, alì ína kitswálé tà 'o móndi i dré dhi bvó. Alì kpà kitswálé áyi lídrì fe ngóró làgí kàdrì fèle móndi zyandre dhi ki apázó tàkonzi lésè dhi tíni. »

Yésu tidri` Bàràtìmáyò mi kùdúkùdu ró dhi

(À kònò kpà Màtayò 20:29-34; Lükà 18:35-43)

⁴⁶Gò Yésu i dré tsàzo Yèrikò na lebèbhá ni íbe. I dré tá adrérà'a apfòle bhàandre nda lésè móndi zyandre íbe dhi 'á dhi, agó àlo mi kùdúkùdu ró rú be Bàràtìmáyò, Tímáyò ni mvá ro dhi, lirí tá láti làga adrélé ngá zi móndi i tí.

⁴⁷Akódhi nda kòyi Yésu Nàzàrétà lésè dhi adré tá lavúlé dhi dre dhi, dré ngàzo adrélé loyóá dhi: «Yésu, Dàwídì ni Mvá, mí bhà áma kizà wà! »

⁴⁸Móndí bì dhi i dré adrészó tetrélé akódhi dri, kòtayíró kúlí adrészó kíri. Dì, dré gózo vélé adrélé kúlí loyó wáláká ni ni lavú: «Dàwídì ni Mvá, mí bhà áma kizà wà! »

⁴⁹Gò Yésu dré áyi kikízó tàá dhi: «Mì azí akódhi. » Dì i dré mi kùdúkùdu nda ni azízó, tazoá drá dhi: «Mí tsì togó! Mí nga! Akódhi adré ámi zi. »

⁵⁰Dì akódhi dré áyi kítá bhèzo gàrà dri, áyi totozó pá dri gò, alìle Yésu vélé.

⁵¹Yésu dré akódhi ni lizízó tazoá dhi: «Mí adré lèá má kò'o mí dré àdho tà kòdhya? » Mi kùdúkùdu nda logó drá dhi: «Rábbi, má lè ngá nôle! »

⁵²Dì Yésu tà drá dhi: «Mí lì! Ámi tà ka'ika'i tidri mi dre. » Gbà kòdhwa, akódhi dré kidhózó adrélé ngá no gò, dré ngàzo adrélé Yésu ni lebè láti 'ásè.

Márokò 11

Yésu fi Yèrúsalémà na ópi` ti` ni

(À kònò kpà Màtayò 21:1-11; Lükà 19:28-40; Yòwánì` 12:12-19)

¹Yésu i dré tá adrérà'a 'ole tsàle Yèrúsalémà na dhi 'á dhi, i dré tsàzo ànyi bhà rú zile Bètèfágè ìndi Bètànýà dhi i kandrá, ànyi kòngó Òlívè fa kya làga. Gò Yésu dré áyi lebèbhá rì dhi ki mùzo lìle drìdrì,

²tazoá àyi dré dhi: «Mì lì bhà àmi kandrá kònàdhi léna. Mì kòfì lana dre dhi, mi ni ndiri púndà mvá 'ile, à dré dhu rè mbàzo drìá ko dhi ni kisú. Mì atrì akódhi, alìzo ába má vélé.

³Dhya àlo kòlizí àmì tí dhi, «Mì adré 'òá kònìnì àdho tà sè? » ya dhi, mì kòtà drá dhi: «Míri adré lèá nì. A nì dra akódhi nì logó kònwa mbèlè. »»

⁴Dì ì dré lìzo púndà mvá nda nì kisú. À 'ì tá akódhi láti làga, dzó àlo dhi tí. Ì dré tá adrérà'a akódhi nì atrì dhi 'á dhi,

⁵mónđí àruka kònàle dhi ì dré lizízóá àyì tí dhi: «Mì adré púndà mvá kòdhì nì trì àdho tà sè? »

⁶Dì ì dré kúlí logózó àyì dré ngóró Yésu dré tá tâle àyì dré dhi tñi gò, móndyá nda ì dré àyì kì tayízó lìle ába.

⁷Ì kàsé púndà mvá nda atsázó ába Yésu vélé dre dhi, ì dré àyì kì kítá bhèzo drià gò, akódhi dré mbàzo lirílé drià.

⁸Gò móndí zyandre dhi ì dré àyì kì kítá kì lasézó láti mísè. Àyì kì àruka ì dré fa bí kì tonjòzo amvú ì 'ásè, lebhézóá láti mísè, Yésu kòlavúró driásà be dhi bvó.

⁹Dì móndyá zyandre nda ì dré adrészó lìle akódhi kandrána ìndì akódhi vésè, adrélé loyóába dhi: «Òsánà! Tà taní kàdré dhya adrélépi alìle Míri nì rú sè dhi dri!

¹⁰Tà taní kàdré òpì àma kì tâbhí Dàwídì àdhya adrélépi alìle dhi dri!

Òsánà kàdré Gìká kurú na bhù na dhi dré! »

¹¹Dì Yésu dré tsàzo Yèrúsalémà na gò, lìle fîle tépelò na, ngá tití lâna dhi kì no. Dì ìndró dré andrìle dre dhi sè dhi, ì dré pfòzo bhàandre nda lésè akódhi nì lebèbhá mudrí-drì-rì dhi íbe, góle lìle Bètàníyà na.

Yésu tatrí fígi fa lò'wa 'àlepi ko dhi

(À kònò kpà Mâtayò 21:18-19)

¹²Kítú bvóá dhi sè, ì dré tá adrérà'a apfòle Bètàníyà lésè dhi 'á dhi, tâbirí dré Yésu nì 'òzo.

¹³Akódhi dré fígi fa àlo dhi nì nòzo bí nì íbe vwàvvà ro gò, dré lìzo nòá ngalè í nì kitswá lò'wa kisú drìlâna bwà yà dhi. Dì, a nì lì tsàle ànyì làgá dhi, kisú ína lò'wa nì àlomvá ko. Kisú ngbà 'í bí nì ì kòdhya. Tàko ko, lókyá nda tá lókyá adrészó fígi lò'wa kì dhi 'í ko.

¹⁴Gò dré tâzoá fígi fa nda dré dhi: «Dhya àlo kògò vélé lò'wa kisú nyâle mí drìna tâdzí ko! » Dì akódhi nì lebèbhá ì yi kúlí dré tá tâle nda 'í.

Yésu dro móndyá adrébhá ngá lagí́ dhi i topfòle tépelò 'ásè

(À kònò kpà Mâtayò 21:12-17; Lükà 19:45-48; Yòwání 2:13-22)

¹⁵Ì kòtsa Yèrúsalémà na dre dhi, Yésu dré fízo tépelò na gò, dré ngàzo móndyá adrébhá tá ngá lagí ìndì ngá gí kònàle dhi kì dro topfòle 'ásà. Dré mísá móndyá adrébhá tá làfa topfó dhi kya kì lebhézó bvò dri, túmâní gbólókó móndyá adrébhá tá kòbhòlà lagí dhi kya íbe.

¹⁶Dré kpà ka'izoá dhi, dhya àlo kàdré ngá do lavúzó ába tépelò 'ásè dhi ko.

¹⁷Gò dré ngàzo adrélé móndí kí tadhá, adrészó tàá dhi: «Gìká ní Kúlí adré tàá dhi: <À ní áma dzó zi dzó súrú tití dhi ì dré adrészó tà ta má be dhi ró. > Dí, mì gò àmikya dzó nda ní bha adrélé

àrà kùgubhá ì dré adrészó àyi kí zu dhi ró! »

¹⁸Kòwánà kàdrì i tátrítrí kúlí tadhábhá íbe dhi ì kòyi tà Yésu dré tá 'ole nda dre dhi, ì dré ngàzo adrélé láti nda kitswázó akódhi ní pfu dràle dhi bvó. Àngyá ko, ì adré tà àyikya akódhi ní ro, móndyá zyandre tití dhi ì dré tá adrélé tà dré adrélé tadhálé dhi kí yi sibhálé be ngbo dhi sè.

¹⁹Indró kàndrì dre dhi, Yésu ì dré pfòzo bhàandre nda lésè lebèbhá ní íbe.

Tà tadhálé fígi fa 'yolepi dhi ní tà dri dhi
(À kònò kpà Mátayò 21:20-22)

²⁰Drùbhì kínó, ì dré tá adrérà'a lavúlé láti 'ásè dhi 'á dhi, ì dré nòzoá dhi, fígi fa nda 'yo tá tsàle kómvó ní na dre.

²¹Dí tà Yésu dré tá tâle dhi dré agázó Pétéró léna gò, dré tâzoá drá dhi: «Rábbi, mí nò rè ká! Fígi fa mí dré tatrílé kònìdhi 'yo dre! »

²²Dí Yésu dré tâzoá áyi lebèbhá ì dré dhi: «Mì kàdré Gìká ní ka'ì bâti!

²³Má adré tà bâti ta àmi dré: Dhya àlo kàdré tàá kòngó kònìdhi dré dhi, «Mí nga kònwasé lile dhèle yìandre na» gò, dré adrészó tà kayí í léna ko, dí, adrészó ína ka'ìa dhi tà í dré adrélé tâle nda ní ru 'o káyà dhi, Gìká ní tà nda ní 'o drá.

²⁴Ásà dhi, má adré tàá àmi dré dhi: Tà ángùdhi mì dré adrélé zile Gìká tí dhi, lè mì kàdré ka'ìa dhi, mì kisú tà nda dre dhi, dí mì ní kisúá bâti.

²⁵Kòdhi íbe dhi, mì kàdré àmi kí totó adrélé tà zi Gìká tí gò, mì dré adrészó tà íbe móndí àlo rú dhi, lè mì kòtrì akódhi nda ní tákonzì gò, àmi kí Atá bhù na dhi kòtrirò kókpà àmi kí tákonzì be dhi bvó. » [²⁶]

À lizí Yésu tí ngalè akódhi ní rìnyí angá ángolésè ya dhi
(À kònò kpà Mátayò 21:23-27; Lúkà 20:1-8)

²⁷Ì dré gòzo tódyá tsàle Yèrúsalémà na. Dí Yésu dré tá adrérà'a atsílé tépelò ní bhà'álé 'ásè dhi 'á dhi, kòwánà kàdrì i tátrítrí kúlí tadhábhá i tsàle bhàgo íbe dhi ì dré alìzo akódhi vélé

²⁸lizíá tíá dhi: «Rìnyí mí dré adrészó tà kòdhi kí 'o dhi angá ína ángolésè? Àdhi fè mí dré rìnyí adrészó tà nda kí 'o dhi nì? »

²⁹Yésu logó àyi dré dhi: «Má ní kókpà tà àlo dhi ní lizí àmi tí. Mì kòlogó kúlí má tí dhi, má ní kpà tàá àmi dré ngalè rìnyí má dré adrészó tà kòdhi kí 'o dhi angá ángolésè ya dhi.

³⁰Mì tà rè má dré ká! Bâtísímò Yòwánì dré fèle dhi angá tá ína ángolésè: Gìká vélésè, kó ngalè móndí i vélésè? »

³¹Gò ì dré dhèzo adrélé tà kayí àyi kòfalésè, adrészó tàá dhi: «Mà kòtà dhi <Bàtísimò nda angá Gìká vélésè> dhi, akódhi ni go lizíá àma tí dhi: <Mì ka'ì dì Yòwánì ko àdho tà sè? >

³²Dì, mà ni kitswá tsì tàá dhi <Bàtísimò nda angá móndí i vélésè> yà dhi? » (Ì tà tá kònìnì, ì dré tá adrélé móndyá zyandre dhi kí ro dhi sè. Tàko ko, àyi tití nda ì adré tá ka'íá dhi, Yòwánì tá ína pròfétà 'i.)

³³Dì ì dré logozóá Yésu dré dhi: «Mà nì ko. » Yésu gò tàá àyi dré dhi: «Kàdré kònìnì dhi, má kitswá kókpà tàá àmì dré ngalè rinyí má dré adrészó tà nda kí 'o dhi angá ángolésè ya dhi ko. »

Márokò 12

Pí' dhi' gó víñò likí' bhá kònzi dhi kí tà dri dhi

(À kònò kpà Mátayò 21:33-46; Lükà 20:9-19)

¹Gò Yésu dré kidhózó adrélé tà tadhá àyi dré pídhígó sè, adrészó tàá dhi: «Agó àlo dhi bhe tá víñò áyi amvú na. Dré gàrà ni kí tobhàzo kírà sè, bhú gàzo kitswázó víñò lò'wa zwa gò, dzó mvumvù dhi ni sizo kitswázó amvú nda ni likí. Dré amvú nda ni tayízó víñò likíbhá àruka i drígá gò, lìzo atsí na làwú làvo na.

²Lókyá víñò lò'wa kízo dhi kòkitswá dre dhi, dré áyi mårábà kí àlo mùzo kitswálé lò'wa ína tñi dhi ni adó víñò likíbhá nda i véna.

³Dì, ì dré àyikya mårábà nda ni rùzo tswàle gò, logozóá nzile drígálé sè.

⁴Gò amvú líyí nda dré mårábà àzya mùzo lìle àyi véna. Dì, ì dré akódhi nda ni drì tswàzo, kanyò fèzo drá.

⁵Amvú líyí nda dré gòzo mårábà ni na mu lìle gò, ì dré akódhi nda ni pfùzo dràle. Dré gòzo mårábà àruka bí dhi kí mu gò, ì dré àruka ni kí tswàzo, àruka ni kí tupfúzó todràle.

⁶Tayí tá ngbà 'í amvú líyí nda ni mváagó dré lèle tò dhi kòdhya. Dì kùdù ro dhi, dré kpà akódhi nda ni mùzo lìle àyi véna. Adré tá kisùá dhi: <Ì ni áma mváagó ni lindrì bha! >

⁷Dì, víñò likíbhá nda ì dré tazoá àyi kòfalésè dhi: <Kònàdhi dhya dra amvú kònìdhì ni kisulépi tàyilé ro dhi 'í. Mà kòlì akódhi ni pfu dràle, amvú dré tá kitswálé kisulé tàyilé ro nda kàdréró àma dré! >

⁸Dì ì dré ngàzo akódhi ni ru pfûle dràle gò, àbvò ni ni bhèzo amvú nda 'ásè kivì na. »

⁹Yésu gò lizíá dhi: «Mì adré kisùá dhi, amvú líyí nda ni 'òá ngíni? Akódhi ni tsa víñò likíbhá nda kí tupfú todràle gò, gòzo amvú víñò àdhya nda ni tayí móndí àruka i drígá.

¹⁰Mì nà rè tà tisile Gìká ni Kúlí na kònìdhì ko? <Kírà dzó sibhá ì dré gâle gâgâ dhi, gò atsálé kírà agógó dzó nda dré adrészó áyi totó driá dhi ró. »

¹¹Kòrìdhì tà Míri dré 'ole nì dhi 'í. Dì tà nda lindríga ró àma mìlésè! »

¹²Gò Yúdà ànzi kí kàdrì ì dré gòzo adrélé láti nda kïtswázó Yésu ní ru dhi bvó. Àngyá ko, ì ní tá tâle dhi, akódhi pí tá pídhígó nda àyi rú dhi be. Dí, ì dré tá adrélé móndyá zyandre dhi kí ro dhi sè dhi, ì dré akódhi ní tayízó gò, lìzo.

Kàyìsárà, Rómà kí ópi` kàdrì` ni mèdáyì` gi` ma

(À kònò kpà Mâtayò 22:15-22; Lükà 20:20-26)

¹³Àmvolásà dhi, ì dré Fàrisayò àruka kí mùzo móndí àruka ópi Èródè àdhyá íbe lile Yésu véna, kïtswálé akódhi ní 'o la'ile kúlí dré tá adrélé tâle dhi i sile dhi bvó.

¹⁴Àyi nda ì dré tâzoá drá dhi: «Tadhálépi, mà ní tâle dhi, mí adré trôle tà bâti rú dhi be. Mí adré kpà móndí kí lindrì ní tà kisù ko, mí dré adrélé àyi kí no twátwa ko dhi sè. Mí adré kpà Giká ní tà tadhá tà bâti sè. Dí mí tà rè àma dré ká: Àma kí tâtrítrí kúlí ka'i, à kâdré Kàyìsárà ní mèdáyì gi dhi 'i? Kó ngalè, ka'i ko? Lè mà kâdré giá, kó ngalè mà kâdré giá ko? »

¹⁵Dí, Yésu dré ína àyi kí túrúpfú tà nízo kyá gò, logózóá àyi dré dhi: «Mì adré áma tabhì litílé àdho tà sè? Mì afè dènári àlo dhi má dré nòle. » ¹⁶Dí ì dré làfa lò'wa nda ní fèzo drá. Gò dré lizízóá àyi tí dhi: «Móndí lindrì kònìdhi tsâle rú tisile driá kònìdhi be dhi, àdhi àdhyá 'i? » Ì logó drá dhi: «Kàyìsárà àdhyá 'i. »

¹⁷Dí Yésu tà àyi dré dhi: «Mì kâdré dí ngá Kàyìsárà àdhyá ní fe Kàyìsárà dré, adrészó kpà ngá Giká àdhyá ní fe Giká dré. » Ì koyi akódhi ní kúlí nda dre dhi, àyi kí lindrì dré gàzo bhwâbhwa akódhi ní tà sè.

Tà lizilé ngangà dràdrà 'ásè dhi ní tà dri dhi

(À kònò kpà Mâtayò 22:23-33; Lükà 20:27-40)

¹⁸Àmvolásà dhi, Sàdùkayò àruka ì dré alìzo Yésu vélé kitswálé tà lizí tíá. (Àyi nda ì adré tâá dhi, ngangà dràdrà 'ásè dhi yókodhó.) Dí ì tà drá dhi:

¹⁹«Tadhálépi, Mósè tisì àma dré dhi: «Agó àlo adrélépi mvá àko dhi kòdrà áyi tòkó ní tayí dhi, lè adrúpi ní kodo tâytòkó nda môle, kïtswázó ànzi ti áyi adrúpi drâlepi nda dré. » ²⁰Dí àgo nzi-drì-rì adrúpi ró dhi i tá be. Àyi kí kâyo dré tòkó àlo dhi ní mózo gò, dràzo tólò mvá ti àko ró.

²¹Adrúpi ní ní rì dré tòkó nda ní dòzo môle gò, dré kpà dràzo tólò mvá ti àko ró. Tà nda dré kpà ru 'ozo kònìni adrúpi ní ní na rú,

²²tsâle byá adrúpi ní ní nzi-drì-rì rú. Àyi tití nda ì todrà mvá ti àko ró. Kùdù ro dhi, tòkó nda dré kpà dràzo.

²³Dí kítú móndí ì dré dra ngàzo dràdrà 'ásè dhi tú dhi, adrúpi nzi-drì-rì nda i kòfalé dhi, tòkó nda ní adré tsitsì dhi àdhi dré? Àngyá ko, àyi tití nda ì do tá akódhi môle àyi dré tòko ró. »

²⁴Yésu logó àyi dré dhi: «Mì lití àmi kí tândi i dre, mì dré Giká ní Kúlí i rînyí ní íbe dhi kí nile ko dhi sè.

²⁵Kítú móndí ì dré dra ngàzo dràdrà 'ásè dhi tú dhi, ì gò adrélé ru mo ko. Ì gò kpà adrélé àyi kí ànzi kí fe môle ko. Be ró dhi, ì ní àyi kya adré ngóró ángéló bhù na dhi i tini.

²⁶Dì, kàdré ína ngangà dràdrà 'ásè dhì nì tà sè dhì, mì nà rè Mósè nì bùkù na, tà Gìká dré tá tâle drá fanzì adrélépi kòle àtsì ró dhì na dhì ko? Akódhì tà tá dhì: «Ma Gìká Àbàrámà àdhya 'i, ḥsákà àdhya 'i, ìndì Yàkóbhò àdhya 'i. » ²⁷Dì Gìká nda Gìká àbvò kya 'i ko. Be ró dhì, akódhì ína Gìká móndyá lídrì ro dhì kya 'i. Mì lití àmì tà tândì ró dre. »

Tòlì́ kàdrì́ `lavúlé dhì

(À kònò kpà Mâtayò 22:34-40; Lükà 10:25-28)

²⁸Tátrítrí kúlí tadhábhá kì àlo kòyi àyì nda i tà kayírà'a àyì kòfalésè dre dhì, dré atógyàzoá dhì, Yésu logó kúlí àyì dré kyá. Dì dré áyì kisízó ànyì akódhì làga, akódhì nì lizí tâzoá dhì: «Tòlì tití dhì i kòfalé dhì, tòlì kàdrì lavúlé dhì ángùdhì 'i? »

²⁹Yésu logó drá dhì: «Tòlì kàdrì lavúlé dhì, kònìdhì 'i: «Isérélè ànzì i, mì yi rè ká! Míri àma kì Gìká, Míri 'i kalóma.

³⁰Lè mí kàdré Míri ámì Gìká ni le ámì togó sè wáyi, ámì lídrì sè wáyi, ámì tà kisùkisù sè wáyi, ìndì ámì rinyí sè wáyi. » ³¹Tòlì nì rì, kònìdhì 'i: «Lè mí kàdré ámì àzya nì le ngóró mí dré adrélé ámì tândì nì le dhì tíni. » Tòlì àzya kàdrì tòlì rì kòdhì kì lavúlépi dhì yókódhó. »

³²Dì tátrítrí kúlí tadhálépi nda tà drá dhì: «Tadhálépi, tà mí dré tâle kòdhì, tà bâti 'i. Mí tà kyá tâle dhì, Gìká ngbà 'i àlo kwákwá, ìndì àzya nì akódhì rúsè dhì yókódhó.

³³Adrélé Gìká nì le togó wáyi sè, tà nìnì wáyi sè ìndì rinyí wáyi sè dhì, ìndì adrélé dhyá kì àzya nì le dhyá kì tândì tíni dhì kàdrì lavúlé, kà'wá tití adrélé zâle móbòmà ro dhì i rúsè, ìndì ngá tití adrélé fèle Gìká dré móbòmà ro dhì i rúsè. »

³⁴Dì Yésu kònò akódhì logó tá kúlí tògyá sè dhì dre dhì, dré tâzoá drá dhì: «Mí vwàvvà ro Gìká nì Òpì rúsè ko. » Dì kidhólé lókyá nda sè dhì, dhya àlo dré gòzo vélé tà tabhì lizílé akódhì tí ko.

Mèsì́ yà i Dàwídì be dhì

(À kònò kpà Mâtayò 22:41-46; Lükà 20:41-44)

³⁵Yésu dré tá adrérà'a tà tadhá móndí i dré tépelò na dhì 'á dhì, dré lizízóá dhì: «Tátrítrí kúlí tadhábhá i adré tàá dhì, Mèsiyà Dàwídì nì mvá 'i dhì ngíni? »

³⁶Tàko ko, Dàwídì nì tândì tà tá Tírí Lólo nì rinyí sè dhì: «Míri Gìká tà áma Míri dré dhì: Mí alì lirílé áma dríágó lésè, tsâle lókyá má dré dra ámì kàribhá kì bhàzo adrélé ámì pá zâle dhì 'á. »

³⁷Kòdhì Dàwídì nì tândì adré Mèsiyà nì zi áyì Míri ro. Dì Mèsiyà nda nì kîtswá kpà adrélé akódhì nì mvá ro ngíningíni ró? » Dì móndyá zyandre lavúlé nda i adré tá akódhì nì yi lovó sè.

Yésu se móndí kí bí tátrí trí kúlí tadhábhá kì tà sè

(À kònò kpà Mâtayò 23:1-36; Lükà 20:45-47)

³⁸Yésu dré rè dhu adrérà'a àyì kì tadhá dhì 'á dhì, dré tâzoá dhì: «Mì kàdré àmì kì likí tátrítrí kúlí tadhábhá kì tà sè. Àngyá ko, àyì nda i adré kánzò kàtswákàtswa dhì kì le

asólé àyi rú, adrészó tatsílé ába móndí i kòfalésè. Ì adré lèá dhi, à kàdré módo fe àyi dré lindrì sè ngá lagírà i 'ásè.

³⁹Ì adré lèá lirílé àrà lindrì àdhya lísámbò dzó i 'ásè dhi i 'ásè, adrészó kpà lèá lirílé míssá lindrì àdhya gwányá i 'ásè dhi i làgásè.

⁴⁰Ì adré tàyítòkó kí ngá kí kärí tití. Ì adré kpà tà zi Gìká tí vwàvwà ro, à kònòrò àyi be dhi bvó. Dì kitú dra tåbvó tåzo dhi tú dhi, à ni tà njo àyi dri tà tåndi ró. »

Ngá tàyí́ tòkó àlo lemerè ro dhi dré fèle Gìká dré dhi

(À kònò kpà Lükà 21:1-4)

⁴¹Àmvolásà dhi, Yésu dré lirízó tépelò na, àrà adrészó làfa fe Gìká dré dhi kandrá, adrélé móndí zyandre dhi kí no adréra'a àyi kí làfa bhe kpukúbhú adrészó làfa likí dhi na. Ngábhá bí dhi i adré tá làfa bhe lána bí.

⁴²Gò tàyítòkó àlo lemerè ro dhi dré kpà alizo làfa lò'wa nzí tsàtsà rì làgí be tsà dhi kí bhe lána.

⁴³Dì Yésu dré áyi lebèbhá kí azízó, tåzoá àyi dré dhi: «Má adré tà báti ta àmí dré: Tàyítòkó lemerè ro kòdhi bhà ína kpukúbhú na làfa kàdrì, móndyá àruka tití dhi kya kí lavú.

⁴⁴Tako ko, àyi tití nda i adó àyikya àyi kí ngá kí drì fèle kòdhyá. Dì, tòkó lemerè ro nda adó ína ngá tití i dré tá adrészó ába kitswázó adríléné ásà dhi i fèle kòdhyá. »

Márokò 13

Yésu longó tépelò ni pfùma ni tà

(À kònò kpà Mátayò 24:1-2; Lükà 21:5-6)

¹Yésu dré tá adréra'a apfòle tépelò lésè dhi 'á dhi, akódhi ni lebèbhá kí àlo dré tåzoá drá dhi: «Tadhálépi, mí nò rè dzó kàdrì gú kònì i, àyi kí kírà íbe ká! »

²Dì Yésu logó drá dhi: «Mí nò tsì dzó kàdrì kònì i 'í? Lókyá adrélépi alile dhi sè dhi, à gó vélé àyi kí kírà kí àlo kisú àzya ni dri ko. À ni kírà nda kí lebhé tití kìní mi. »

Tà dra ru 'obhá lókyá kùdù ni tà tadházó dhi i

(À kònò kpà Mátayò 24:3-14; Lükà 21:7-19)

³Àmvolásà dhi, Yésu i dré lizo mbàle kòngó Òlívè fa kya drìna gó, akódhi dré lirízó àrà kitswázó tépelò no lásà bwà dhi na. Gò Pétéró, Yàkóbhò, Yòwánì, tsàle Andréyà be dhi i dré akódhi ni lizízó àyi pátí, tåzoá dhi:

⁴«Mí tà rè àma dré, tà nda kòdhi kí atsá ángutú ya dhi ká? Àdho tà ni ru 'o drìdrì tadházóá dhi, tà tití nda i adré 'ole ru 'o káyà dhi ni? »

⁵Yésu logó àyi dré dhi: «Mí kàdré àmí kí likí dóro, dhya àlo kòlitíró àmí ko.

⁶Tako ko, móndí bí dhi kí alí áma rú sè adrélé tåá dhi, «Ma Mèsiyà 'í! » gó, i dré móndí zyandre dhi kí litízó.

⁷Mì ni àdzú kì kpòrò yi ànyi, adrészó kpà àdzú kì rúbí yi làwú làvo na. Di, mì kòtayí àmì kì togó adrélé gàle ásà dhi ko. Tàko ko, adré lèá dhi, tà nda kòdhì i kò'o rè zyà ru 'iká. Di, lókyá kùdù atsá rè ko.

⁸Súrú kì àdzú bhu súrú àruka íbe. Òpì kì kpà àdzú bhu òpì àruka íbe. Kàdikàdi ni bvò kosé, ìndì kàrábhò ni dhe àrà twátwa i 'ásè. Di, tà nda kòdhì kì ngbà 'í adré ngóró tòkó ni mváaswa ni kidhoma tíni.

⁹Di àmì ró dhi, mì kàdré àmì kì likí dóro. Tàko ko, à ni àmì kì 'o topfòle tòbvó tárà i 'ásè, adrészó àmì kì bhwa lísámbò dzó i 'ásè. Áma tà sè dhi, mì ni àmì kì totó gùvèrènérè i kandrá ìndì ópí kàdrì i kandrá, mì kòkítswáró áma tà mì dré nòle ìndì mì dré yile dhi kì longó àyi dré be dhi bvó.

¹⁰Tàko ko, adré lèá dhi, à kòlongó rè zyà Rúbí Taní súrú tití i dré 'iká.

¹¹Di, à kàdré àmì kì dri tòbvó tâle dhi, mì kòbhà àmì kì togó adrélé lanzile tà mì dré dra tâle àmì rúsè dhi dri dhi ko. Be ró dhi, mì kàdré ndiri tà Gíká dré dra fèlè àmì dré tâle lókyá nda sè dhi ni ta kòdhyá. Àngyá ko, mì ni adré tà nda ni ta àmì ko. Be ró dhi, Tírí Lólo ni adré tâá ni.

¹²Móndí kì àyi kì adrúpi kì lefè todràle kàribhá i drígá. Ànzi kì atá kì kpà àyi kì ànzi kì lefè todràle. Ànzimvá kì ligí àyi kì tibhá i rú, adrészó àyi kì 'o todràle.

¹³Móndyá tití dhi kì togó kònzi bha àmì rú áma tà sè. Di, dhya adrélépi ína togó tsì, adrészó áyi totó tâtä tsâle kùdù na dhi ni adrí. »

Kizà kàdrì `lavúlé dhi

(À kònò kpà Màtayò 24:15-28; Lúkà 21:20-24)

¹⁴«Di mì ni *ngá adrélé gàle gágà adrélépi ngá lolo dhi kì kizá dhi*» ni no adrérà'a áyi totó àrà kítswálépi tá kàdré lána ko dhi na. (Lè dhya adrélépi tà kòdhì ni na dhi kàdré àndu ni ni ni dóro.) Lókyá nda sè dhi, lè móndyá dra adrébhá bvò Yùdáyà àdhyá na dhi i kòlapá ràle kòngó i drìna.

¹⁵Lè kpà dhya dra adrélépi áyi dzó drìna dhi kàsí file dzó na, áyi ngá kì do lapázó ába dhi ko.

¹⁶Dhya dra adrélépi amvú na dhi kògò nzìle i bhàna áyi kítá kìdhì àdhyá ni do lapázó ába dhi ko.

¹⁷Kítú nda i tú dhi, kizà ni adré kàdrì tòkó adrébhá 'a íbe dhi i dré, ìndì tòkó adrébhá bà fe ànzimvá i dré dhi i dré.

¹⁸Mì kàdré tà zi Gíká tí, àmì kì lapama nda kàdréró kìdhì lókyá sè ko. ¹⁹Tàko ko, kizà kítú nda kya ni adré kàdrì lavúlé. À nò rè kizà kárá be kònini nda ko, kìdhólé Gíká dré bvò bhàrà lésè atsálé ándrò kònìdhì. À kítswá kpà góle vélé nòá tâdzí ko.

²⁰Kònò Míri kòki tá kítú nda kì bvó ko dhi, dhya àlo bvò dri dhi kítswá tá adrílé bwà ko. Di, Míri kì ína kítú nda kì bvó móndyá i dré zìle dhi kì tà sè.

²¹Lókyá nda sè dhi, à kàdré tâá àmì dré dhi «Mì nò rè ká, Mèsiyà kònwa! › dhi, mì kòka'i ko. À kàdré kó tâá dhi «Akódhì kònàle! › dhi, mì kòka'i ko.

²²Tàko ko, mèsiyà kinzò ro dhi kí apfò pròfétà kinzò ro dhi íbe adrélé tà kàdrì líndríga ró adrébhá àyi kí rinyí tadhá dhi kí 'o, kòkítswá dhi, ì dré ndìndì móndyá Giká dré zile dhi kí litízó.

²³Má longó àmì dré tà nda kòdhi i tití drìdrì. Dì mì kàdré támìga dri. »

Móndì[’] ni Mvá ni agòma

(À kònò kpà Mâtayò 24:29-31; Lúkà 21:25-28)

²⁴«Kitú nda i tú, kizà kàdrì nda àmvolésè dhi, *«*kítú ni mì ni atsá tímivá ro, mbă gò vélé mvèle ko,

²⁵bhìbhínyà kí ledhé bhù lésè, ìndì rinyí bhù na dhi kí ru kizí. »

²⁶Dì lókyá nda sè dhi, móndyá tití dhi kí Móndì ni Mvá ni no adrérà'a alìle ndùrùku i 'asè, rinyí kàdrì be ìndì mìlanzilanzì kàdrì be.

²⁷Gò akódhi dré áyi ángéló kí mùzo lìle áyi móndyá í dré zile dhi kí kimó bvò ni pá su dhi i lésè, kídhólé bvò ni kùdù lésè, tsàle byá bhù ni kùdù na. »

Tà tadhálé fígi fa ni tà rú dhi

(À kònò kpà Mâtayò 24:32-35; Lúkà 21:29-33)

²⁸«Lè mì kàdré tà tadhálé fígi fa ni tà rú dhi ni àndu ni dóro. Fígi fa ni dríti kàdré atsálé mìlimálì gò, bí ni dré adrészò rôle dhi, mì ni tâle dhi, yígú ànyi dhi be.

²⁹Kókpà kòdhi tíni, lókyá mì dré dra tà nda kòdhi kí nòzo adrérà'a ru 'o dhi tú dhi, lè mì kònì tâle dhi, Móndì ni Mvá láti 'á, ndìndì àmì kí dzó tí káyà dhi.

³⁰Má adré tà bâti ta àmì dré: Móndyá dra adrébhá lídrì íbe lókyá nda sè dhi i kítswá dràle tití drìdrì tà tití nda i dré dra ru 'òzo dhi kandrá ko.

³¹Bhù i bvò be dhi kí akí. Dì, áma kúlí i kítswá àyíkyà tâdzí akílé ko. »

Giká ni ngbà 'í lókyá kùdù ni[’]

(À kònò kpà Mâtayò 24:36-44)

³²«Dì, dhya àlo ni ína kitú 'i yà, kó ngalè sáà 'i yà tà nda i dré dra ru 'òzo dhi ko. Ndìndì ángéló bhù na dhi 'i yà, kó ngalè Giká ni Mváagó 'i yà dhi, i ni ko. Giká Atá ni ngbà 'í ni kalóma.

³³Adré dì lèá dhi, mì kàdré àmì kí likí, adrészò támìga dri! Tàko ko, mì ni ngalè lókyá nda ni atsá ángutú ya dhi ko.

³⁴Tà nda kòdhi ngóró agó àlo adrélépi 'ole lìle atsí na dhi àdhya tíni. Akódhi nda adré rinyí fe áyi màrabà àlo àlo tití dhi i dré adrészò àyi kí àzí 'o gò, dré adrészò tàá dhya adrélépi dzóti likí dhi dré dhi, kàdré támìga dri. Dì dré adrészò dzó nda ni tayí lizo.

³⁵Mì kàdré dì támìga dri. Àngyá ko, mì ni lókyá ángùdhi dzó lìyí nda dré dra agòzo ásà dhi ko, gba kàdré ìndró sè yà, ngátsi kítogá sè yà, àgólòwa dré tsírà bherà'a yà, kó ngalè drùbhì sè yà dhi.

³⁶Dì akódhi kàgò ngbò ró dhi, mì kòtayí àmì akódhi dré kisúlé adrérà'a ayí ko dhi ko.

³⁷Tà má dré adrélè tèle àmì dré kònìdhì, má adré kpà tàá móndyá tití i dré: Mì kàdré támìga dri! »

Márokò 14

Yúdà ànzi ki kàdrì` i` ndà láti Yésu ni rùzo pfùle dràle

(À kònò kpà Mátayò 26:1-5; Lükà 22:1-2; Yòwáni` 11:45-53)

¹Tayí tá kítú rì gwányá Pásikà àdhya i Mápà tákú àko dhi àdhya be dhi i dré atsázó. Kòwánà kàdrì i tátrítrí kúlì tadhábhá íbe dhi i adré tá láti nda kitswázó Yésu ni ru túrúpfú sè, pfùle dràle.

²Dì, i adré tá táká dhi, i kò'o tà nda gwányá Pásikà àdhya tú ko, móndyá zyandre dhi i kòligíró àyi íbe ko sè.

Tòkó àlo dhi dà málásì` Yésu dri

(À kònò kpà Mátayò 26:6-13; Yòwáni` 12:1-8)

³Lókyá nda sè dhi, Yésu lì tá Bètànýà na, file Sìmónà atú kàré dré tá rûle dhi ni dzó na gó, dré lirízó mísa làga kitswálé ngá nya. Gò tòkó àlo dhi dré afízó mòlàngì mvá ledélé àlábásterè sè, gàlepi málásì làgí kyàkyà dhi sè bì dhi be. À ladhí tá málásì nda tsérèle náradà sè. Dì tòkó nda dré mòlàngì nda ni ti ñòzo gó, málásì nda ni dàzo Yésu dri.

⁴Mondí àruka adrébhá tá dzó nda 'á dhi i kònò tà nda dre dhi, àyi ki togó dré aswázó gó, i dré adrészó táká àyi kòfalésè dhi: «À kizá tsì málásì kòdhì àdho tà sè?

⁵Kònò à ni tá kitswá lagíá làfa lò'wa kámá-na sè gó, làfa nda ni fèzo lemerèbhá i dré! » Dì i dré adrészó tòkó nda ni ndri tà tändi ró.

⁶Dì, Yésu dré tákó àyi dré dhi: «Mì tayí tòkó kònìdhì. Mì adré akódhì ni drì kizá àdho tà sè? Tà dré 'ole má dré kòdhì, tà avélépi tò dhi 'ì.

⁷Àngyá ko, mì adré ngbú adrélè lemerèbhá íbe àmì kòfalé, ìndì mì kitswá àyi ki ledé lókyá ángùdhì mì dré adrélè lèle dhi sè. Dì, mì kitswá ngbú adrélè túmání má be ko.

⁸Tòkó kònìdhì 'o tà dré tá kitswálé 'ole dhi kòdhya. Dà málásì má rú drìdrì, kitswázó áma rúbhá ledé bhàle mógo na dhi bvó.

⁹Má adré tà báti ta àmì dré: Àrà tití bvò wáyi 'ásè à dré dra Rúbí Taní longózó dhi i 'ásè dhi, à ni kókpà tà tòkó kònìdhì dré 'ole kòdhì ni tití, akódhì ni tà kisùzo. »

Yùdásì` i` yì ru kòwánà kàdrì` i` be, kòlefèrò Yésu àyi dri` gá

(À kònò kpà Mátayò 26:14-16; Lükà 22:3-6)

¹⁰Àmvolásà dhi, Yùdásì Ìsìkàriyótà, Yésu ni lebèbhá mudrí-drì-rì dhi ki àlo dré ngàzo lile tà ta kòwánà kàdrì íbe, kitswázó Yésu ni lefè àyi drígá dhi bvó.

¹¹Àyi nda i kòyi tà dré tèle nda dre dhi, i dré lenzézó ásà gó, i dré lazízóá dhi, i ni làfa fe drá. Dì Yùdásì dré kidhózó adrélè lókyá dóro Yésu ni lefèzo àyi drígá dhi ni nda.

Yésu i` nya gwányá Pásikà àdhya lebèbhá ni i` be

(À kònò kpà Mátayò 26:17-25; Lükà 22:7-14, 21-23; Yòwáni` 13:21-30)

¹²Gwányá Mápà tàkú àko dhì àdhya ni kítú ni àlo adrészó kábilígyà mvá Pásikà àdhya ni pfu dràle mòbòmà ro dhì sè dhì, Yésu ni lebèbhá i dré akódhì ni lizízó tazoá dhì: «Mì adré lèá dhì, mà kòlì ngá ladhí mí dré gwányá Pásikà àdhya ni nyàzo dhì ángwà? »

¹³Dì Yésu dré áyi lebèbhá rì dhì kì mùzo, tazoá àyi dré dhì: «Mì lì bhàandre na. Mì ni drì si agó àlo adrélépi yì do lìdrí na dhì be. Mì dhe akódhì nda bvó.

¹⁴Dzó dré dra fizo lána dhì na dhì, mì kòtà dzó nda ni liyí dré dhì: «Dhya tà tadhálépi dhì adré ámi lizí: Dzó 'a kile mà dré kitswázó Pásikà nya áma lebèbhá íbe dhì ángwà? »

¹⁵Dì akódhì nda ni dzó 'a kile kàdrì kurú na dhì ni tadhá àmi dré. À tobhà mísá i ngá àruka íbe tayílé lána gànzi ró. Mì kòladhí ngá àma dré kònàle. »

¹⁶Dì akódhì ni lebèbhá nda i dré lìzo bhàandre na gò, i dré tà tití nda kì kisúzó ngóró dré tá tâle àyi dré dhì tñi. Gò i dré ngá ladhízó kitswázó gwányá Pásikà àdhya ni nya.

¹⁷Indró kàndrì dre dhì, Yésu i dré tsàzo lirílé mísá làgásè túmäní akódhì ni lebèbhá mudrí-drì-rì dhì íbe.

¹⁸I dré tá adrérà'a ngá nya dhì 'á dhì, Yésu dré tazoá dhì: «Má adré tà bâti ta àmi dré: Àmi kì àlo adrélépi ngá nya túmäní má be dhì ni áma lefè kàribhá i drígá. »

¹⁹Dì kizà dré àyi kì 'òzo gò, àyi àlo àlo tití dhì i dré kidhózó adrélé tâá drá dhì: «Zakó ína ma 'i ko? »

²⁰Akódhì logó àyi dré dhì: «Akódhì nda àmi mudrí-drì-rì ni kì àlo 'i. Akódhì dhyà adrélépi mápà so má be sănì àlo na dhì 'i.

²¹Tà bâti ró dhì, Móndí ni Mvá ni lì dràle ngóró tisile akódhì ni tà dri Gìká ni Kúlí na dhì tñi. Dì, kizà ni ína adré kàdrì dhya dra Móndí ni Mvá nda ni lefèlepí dhì dré! Dóro ni tá dhya nda ni tìle ko dhì. »

Míri ni rúbhá i kàri' ni be dhì

(À kònò kpà Mátayò 26:26-30; Lükà 22:14-20; 1 Kòritòbhá i 11:23-25)

²²I dré tá adrérà'a ngá nya dhì 'á dhì, Yésu dré mápà adózó, tà taní zìzo driá Gìká tí gò, ñòzoá fèle áyi lebèbhá i dré gò, tazoá dhì: «Mì do nyàle. Kònìdhì áma rúbhá 'i. »

²³Dré kpà kópò adózó, àwoyà tazo Gìká dré gò, fèzoá àyi dré. Dì àyi tití nda i dré mvùzoá.

²⁴Dré tazoá àyi dré dhì: «Kònìdhì áma kàri adrélépi tà Gìká dré bhàle ru yìzo móndí íbe dhì ni 'o kitswálé tití dhì 'i. Kàri nda ni kutú móndí zyandre i dré. ²⁵Má adré tà bâti ta àmi dré: Má gò vélé vínò mvu ko, tsàle kítú má dré dra vínò tídhì ro dhì ni mvùzo Gìká ni Òpì na dhì tú. »

²⁶Dì i dré longó ngòzo lenzézó Gìká ni rú sè gò, i dré pfòzo lìle mbàle kòngó Òlívè fa kya drìna.

Yésu longó dhi, Pétéró ni áyi ga

(À kònò kpà Mätáyò 26:31-35; Lükà 22:31-34; Yòwánì 13:36-38)

²⁷Gò Yésu dré tázoo àyi dré dhi: «Àmì tití, mì ni áma tayí adrélé kalóma. Tako ko, Gíká ni Kúlí adré tázoo dhi: «Má ni kábilígyà liklépi ni tswa dràle gò, à dré kábilígyà nda kí 'òzo ayílé. »

²⁸Dì, má kònga mána dràdrà 'ásè dre dhi, má ni lì drìdrì àmì kandrána Gàliláyà na. »

²⁹Dì Pétéró tà drá dhi: «Tágba móndyá tití dhi ì kòtayí mí ya dhi, má kitswá mána ámi tayí tázoo ko! »

³⁰Yésu logó drá dhi: «Má adré tà báti ta mí dré: Ndìndì ngátsi ándrò kònìdhi sè, drìdrì àgólòwa dré dra tsírà bhèzo vésè be rì dhi kandrá dhi, mí ni mína áma ga vésè be na. »

³¹Dì, Pétéró gò logóá drá rinyí sè dhi: «Tágba kòkitswá mà dré dràzo túmání mí be ya dhi, má kitswá tázoo ámi ga ko. » Gò Yésu ni lebèbhá àruka tití dhi ì dré kókpà tázoo kònìnì.

Yésu zi tà Gíká tí Gètèsémánì na

(À kònò kpà Mätáyò 26:36-46; Lükà 22:39-46)

³²Àmvolásà dhi, Yésu ì dré lìzo lebèbhá ni íbe tsàle àrà rú zile Gètèsémánì dhi na. Gò dré tázoo àyi dré dhi: «Mì lirí kònwa, má kòlìró adrélé tà zi Gíká tí. »

³³Dré Pétéró kí drìzo Yàkóbhò íbe ìndì Yòwánì be í vésè. Gò akódhi ni togó dré kihózó adrélé kízà nya, adrészó lanzile lavulé.

³⁴Dì dré tázoo àyi dré dhi: «Áma togó adré ñole kízà dré, tsàle ndìndì dràdrà mìle. Mì kàdré kònwa, adrélé támiga dri. »

³⁵Kòlì vwàle àyi rúsè tsà dre dhi, dré dhèzo kíní mi adrélé tà zi Gíká tí, kòkitswá milásà dhi, lókyá kízà àdhya nda kóngaró í rúsè be dhi bvó.

³⁶Adré tá tázoo dhi: «Ábbà, Tátá, mí rinyí íbe kitswázó tà tití dhi kí 'o. Mí kòdo kópò kízà àdhya kòdhi má vélésè wà. Dì, mí kò'o tà má dré adrélé lèle dhi kòdhyà ko. Be ró dhi, mí kò'o tà mí dré adrélé lèle dhi kòdhyà. »

³⁷Gò dré gòzo áyi lebèbhá nda i véna, àyi kí kisú ayí na. Dré tázoo Pétéró dré dhi: «Símónà, mí adré ayí ko? Mí kitswá tá tsì adrélé támiga dri ngebà í sáà àlo bwà ko?

³⁸Lè mí kàdré támiga dri, adrélé kpà tà zi Gíká tí, kòtayíró àmì tà dré tabhile, àmì kí 'òzo dhèle tákonzì na dhi ko. Báti, dhyá kí togó àtsi ró adrészó tà dóro 'o. Dì, dhyá kí rúbhá ína yàyà. »

³⁹Yésu dré gòzo tódhyá lìle tà zi Gíká tí ngóró dré tá zile drìdrì dhi tíni.

⁴⁰Gò dré gòzo tódhyá gòle àyi kí kisú ayí na, àyi kí mí dré tá adrélé ayí ro dhi sè. Dì i ni tá vélé i ni kúlí logó drá ngínì ya dhi ko.

⁴¹Bvóá dhi, dré gòzo gòle áyi lebèbhá nda i véna vésè ni na sè, tàá àyi dré dhi: «Mì adré dhu rè ayí ko, adrészó lovólé? Kitswá dre. Lókyá atsá dre. Mì nò rè ká! À adré 'ole Móndí ni Mvá ni lefè tàkonzibhá i drígá.

⁴²Mì nga, mà kòliró! Dhya adrélipi áma lefè dhi atsá dre! »

Yésu ni rùma

(À kònò kpà Mátayò 26:47-56; Lükà 22:47-53; Yòwáni ` 18:3-12)

⁴³Gbă kòdhwa, Yésu dré rè dhu adrérà'a tà ta dhi 'á dhi, Yùdásì, akódhi ni lebèbhá mudrí-drì-rì dhi kí àlo dré atsázó. Adrì tá i vésè móndí zyandre angábhá kòwánà kàdrì i, tátrítrí kúlí tadhábhá i ìndì bhàgo i vélésè dhi i be. Àyi nda i ru tá sápí i fa íbe àyi drígá.

⁴⁴Yùdásì adrélipi 'ole Yésu ni lefè nda tà tá àyi dré dhi, i ni akódhi àdhi 'i yà dhi ni tadhá àyi dré dhi kònìnì: «Dhya má dré dra kamúlé dhi, akódhi 'i. Mì kòru di akódhi, drizoá lìzo ába, adrészó likiá doro. »

⁴⁵Di Yùdásì nda dré ndiri áyi kisizó ànyi Yésu làga, tàá drá dhi: «Rábbì! » Dré akódhi ni kamúzó.

⁴⁶Gò móndyá nda i dré dhèzo Yésu dri, akódhi ni ru.

⁴⁷Di, dhya adrébhá tá Yésu làga dhi kí àlo dré ngàzo áyi sápí asé gò, kòwánà kí kàdrì ni mårábà ni bí bvwàzo kile.

⁴⁸Yésu dré tazoá àyi dré dhi: «Ma vo kùgú 'i gò, mì dré adrészó alìle sápí íbe ìndì fa íbe kitswálé áma ru ni?

⁴⁹Kítú àlo àlo tití i sè dhi, má adré tá àmì kòfalé, adrélé tà tadhá tépelò na dhi, mì ru tá ma ko. Di, tà kòdhì iatsá kònìnì, kitswálé tà tisìle áma tà dri Gìká ni Kúlí na dhi i kò'oró ru be dhi bvó. »

⁵⁰Gò akódhi ni lebèbhá tití dhi i dré akódhi ni tayízó lapázó.

⁵¹Kàdhúrà àlo kítá asólépi i rú ngbà 'í àlo dhi dré ngàzo adrélé Yésu ni lebè. À adré tá 'ole akódhi ni ru ká,

⁵²di, dré lapázó ràle bvólílí ro, kítá ína ni tayí.

Yésu pfò kòwánà kí kàdrì ` i kandrá bhàgo kàdrì ` i ` be

(À kònò kpà Mátayò 26:57-68; Lükà 22:54-55, 63-71; Yòwáni ` 18:13-14, 19-24)

⁵³Gò i dré Yésu ni drizo lìzo ába kòwánà kí kàdrì bhàna. Di kòwánà kàdrì i, bhàgo i ìndì tátrítrí kúlí tadhábhá íbe dhi i dré ru kímózó tití kònàle.

⁵⁴Di Péteró ro dhi, lebè tá ína Yésu lárá ro, tsàle byá kòwánà kí kàdrì nda ni bhà'álé na. Dré fízo lirílé tépelò likibhá i kòfalé, adrélé àtsí yo àyi íbe.

⁵⁵Kòwánà kàdrì nda i bhàgo kàdrì nda íbe tití dhi i adré tá tà adrélé tâle Yésu rú dhi kí nda, kitswázó akódhi ni 'o dràle dhi bvó. Di, i kisú tá àyikya tà àlo ko.

⁵⁶Móndí bì dhi i adré tá tà ta akódhi rú kinzò sè. Di, tà i dré adrélé tâle nda i kisú tá ru ko.

⁵⁷Gò móndí àruka ì dré ngàzo tà ta akódhì rú kinzò sè kònìnì:

⁵⁸«Mà yi akódhì adrérà'a tàá dhi: «Má nì tépelò móndí ì dré sile nì kònìdhì nì pfu, gòzo àzya nì móndí ì dré sile nì ko dhi nì si kítú na àmvolésè. »»

⁵⁹Dì, ndìndì tà ì dré tâle akódhì rú nda kisú ína ru ko.

⁶⁰Gò kòwánà kì kàdrì dré ngàzo áyi totó àyì kandrá, lizía Yésu tí dhi: «Mí logó mína kúlí tà dhya kònì ì dré adrélé tâle mí rú kòdhì i sè ko? »

⁶¹Dì, Yésu adré tá ína kíri, kúlí logó àko ró. Gò kòwánà kì kàdrì nda dré gòzo lizía tíá dhi: «Mí Mèsiyà, Gìká kïtswálépi rúku sè dhi nì Mváagó 'ì? »

⁶²Yésu logó drá dhi: «Ma 'ì. Dì mì nì Móndí nì Mvá nì no adrérà'a lirilé Gìká rìnyí lìyí nì dríágó lésè. Mì nì kpà akódhì nì no adrérà'a agôle ndùrùku bhù na dhi i 'ásè. »

⁶³Dì kòwánà kì kàdrì nda dré áyi kítá lasízó kízà dré gò, tâzoá dhi: «Mà nì dì go vélé móndí àruka kïtswábhá tà ta akódhì rú dhi kì nda àdho tâ sè?

⁶⁴Mì yi làdhá dré dhàle Gìká rú kòdhì àmì kì bïbhálé sè dre. Mì adré dì kisùá ngíni? » Dì àyì tití nda ì dré tâ njòzo akódhì dri kïtswálé dràdrà sè.

⁶⁵Gò àyì kì àruka ì dré ngàzo adrélé tûsú lufú akódhì mi. Ì dré akódhì nì mì dròzo gò, adrészó akódhì nì tisi, adrészó tàá drá dhi: «Mí longó rè tâ pròfétà ro ká! » Gò tépelò likibhá ì dré kpà akódhì nì dòzo, adrélé mì tosálé.

Pétéró gà Yésu rè

(À kònò kpà Mâtayò 26:69-75; Lükà 22:56-62; Yòwáni` 18:15-18, 25-27)

⁶⁶Lókyá nda sè dhi, Pétéró tá ína tâbhu na, bhà'lé nda na. Gò mvátòkó àlo kòwánà kì kàdrì nì mårábà ro dhi dré atsázó

⁶⁷Pétéró nì no adrérà'a àtsí yo. Dré akódhì nì nòzo dìí gò, tâzoá dhi: «Mí tá kókpà túmäní Yésu Nàzàréta lésè dhi be. »

⁶⁸Dì, Pétéró dré ína tâ nda nì gào rè, tâzoá dhi: «Má nì ngalè mí adré àdho tâ ta ya dhi ko. » Gò dré ngàzo pfòle bhà'lé nda 'ásè, áyi totó láti adrészó afílé dhi 'á. Gbà kòdhwa, àgólòwa dré tsírà bhèzo.

⁶⁹Mvátòkó nda kònò akódhì kònàle dre dhi, dré gòzo tàá móndyá adrébhá tá akódhì làga dhi i dré dhi: «Dhya kònì àyì kì àlo 'ì! »

⁷⁰Dì Pétéró dré gòzo tódhyá tà nda nì ga rè. Gí ko, àyì adrébhá tá Pétéró làga nda ì dré tâzoá drá dhi: «Mí àyì kì àlo 'ì bâti! Tâko ko, mí kókpà móndí angálépi Gàliláyà lésè dhi 'ì. »

⁷¹Dì Pétéró dré ngàzo móndrà sì, tâzoá dhi: «Tátrítrí kàdré má dri, má kàdré kinzò ta dhi! Má nì agó mì dré adrészó tâ nì nì ta kòdhì ko! »

⁷²Gbà kòdhwa, àgólòwa dré gòzo tsírà bhe vésè ni rì sè. Gò kúlí Yésu dré tâ tâle Pétéró dré dhi dré agázó lána. Tâ tâ dhi: «Dridrì àgólòwa dré dra tsírà bhèzo vésè be rì dhi kandrá dhi, mí nì áma ga vésè be na. » Gò Pétéró dré dhèzo adrélé ngòle.

Márokò 15

Yésu pfò Pilátò kandrá

(À kònò kpà Mâtayò 27:1-2, 11-14; Lükà 23:1-5; Yòwáni ` 18:28-38)

¹Ngá kòwa dre dhi, kòwánà kàdrì i, tátrítrí kúlí tadhábhá i túmáñí bhàgo kàdrì íbe tití dhi i dré ru yìzo Yésu dri. Dì i dré akódhi ni adròzo gò, drìzoá lìzo fèá Pilátò, Rómà ki gùvèrènérè drígá.

²Gò Pilátò dré lizízóá Yésu tí dhi: «Mì, mi ópí Yúdà ànzì kya 'i? » Yésu logó drá dhi: «Ámi tändi mí tà dre. »

³Gò kòwánà kàdrì nda i dré dhèzo adrélé Yésu ni asíkì tà bì dhi i sè.

⁴Dì Pilátò dré gòzo lizíá tíá dhi: «Mí logó mína kúlí ko? Mí yi rè tà tití i dré adrélé tâle mí rú dhi i ká! »

⁵Dì, Yésu logó vélé ína kúlí ko. Gò Pilátò ni líndré dré gàzo ásà.

À ñò tà Yésu dri kitswálé dràdrà sè

(À kònò kpà Mâtayò 27:15-26; Lükà 23:13-25; Yòwáni ` 18:39-19:16)

⁶Kóná àlo àlo tití, gwányá Pásikà àdhya tú dhi, Pilátò adré tá dhya ángùdhi bădzó na, móndí zyandre dhi i dré adrélé zile i tí dhi ni tri àyi dré.

⁷Lókyá nda kònàdhì sè dhi, agó àlo rú be Bárabà dhi tá bădzó na móndí àruka íbe, i dré tá móndí ki kodzólé ligílé dhi sè, ìndì i dré tá móndí pfûle drâle dhi sè.

⁸Dì móndí zyandre dhi i kòmbà tsàle Pilátò véna dre dhi, i dré kidhózó adrélé akódhi ni ti lizí, kò'oró ànzyà gà dré tá adrélé 'ole àyi dré dhi tíni.

⁹Dì Pilátò dré àyi ki lizízó tazoá dhi: «Mì adré lèá dhi, má kòtrì àmi dré ópí Yúdà ànzì kya kònìdhì? »

¹⁰Lizí tá àyi kònìnì tâko ko, ni tá tâle dhi, kòwánà kàdrì i fè tá Yésu i drígá ngbà 'í dîrèma sè dhi be.

¹¹Dì, kòwánà kàdrì nda i dré móndyá zyandre nda ki 'a tifízó, i kòziró Pilátò tí kòtrìrò Bárabà àyi dré kòdhya.

¹²Gò Pilátò dré lizízóá àyi tí dhi: «Mì adré di lèá dhi, má kò'o dhya mì dré adrélé zile ópí Yúdà ànzì kya ró kònìdhì sè ngíni? »

¹³Dì i dré kúlí yòzo tazoá dhi: «Mì tidí akódhi fa kipakipa dri! »

¹⁴Pilátò gò lizíá dhi: «Akódhi 'o àdho tà kònzi 'i? » Dì i dré gòzo adrélé tetrélé rinyí sè, adrészó loyóá dhi: «Mì tidí akódhi! »

¹⁵Pilátò adré tá móndyá zyandre nda ki togó le 'ole kinílé. Dì dré Bárabà ni trìzo àyi dré. Dré Yésu ni 'òzo bhwale gò, akódhi ni fèzo kitswálé tidílé fa kipakipa dri dhi bvó.

Sòdá i ` gu Yésu

(À kònò kpà Mâtayò 27:27-31; Yòwáni ` 19:2-3)

¹⁶Gò sòdá ì dré Yésu ni drìzo fìzo ába gùvèrènérè nda ni dzó kàdrì ni bhà'álé na. Ì dré sòdá àruka tití dhì kí azízó ru amú àyi íbe akódhì làgásè.

¹⁷Gò ì dré kánzò kă asózó rúá, fanzì kùtsi ró dhì ni pàzo kùla ró asólé driá.

¹⁸Dì ì dré ngàzo adrélè mòdo fe drá, adrézó tàá dhì: «Mòdo mí dré, ópí Yúdà ànzì kya ni! »

¹⁹Ì adrë tá akódhì ni drì tswa kòzó sè, adrézó tûsú lufú rúá. Ì adrë tá kpà kórókó titì akódhì kandrá, sùle ngóró ì adrë tá akódhì ni lindrì bha na tíni.

²⁰Ì kògu akódhì kònini dre dhì, ì dré kánzò kă nda ni avùzo rúásà, gózo akódhì ni kítá kí tosó rúá. Gò ì dré akódhì ni drìzo pfòzo ába, kitswálé tidilé fa kipakipa dri dhì bvó.

Yésu ni tidima fa kipakipa dri dhì

(À kònò kpà Màtayò 27:32-44; Lükà 23:26-43; Yòwáni` 19:17-27)

²¹Ì dré tá adrérà'a apfòle kònalésè dhì 'á dhì, ì dré agó àlo rú be Sìmónà, angálépi Kírenè lésè dhì ni nòzo adrérà'a agòle amvú lésè. Akódhì nda tá Àlìgìzandrè kí atá Rúfù be dhì 'i. Dì ì dré akódhì ni 'òzo rinyí sè adrélè fa kipakipa Yésu àdhya ni do.

²²Gò ì dré Yésu ni drìzo lìzo ába tsàle àrà rú zile Gòlògótà dhì na. (Rú nda kòdhì adrë lèá tâle dhì «Àrà drifà àdhya».)

²³Kònàle dhì, ì dré vínò amulé àlòkò rú zile mîrè dhì be dhì ni fèzo akódhì dré mvùle. Dì, dré ína gázoa rè.

²⁴Dì ì dré akódhì ni tidizó fa kipakipa dri gó, dzègé vùzo nìzoá ngalè ì ni akódhì ni kítá kí lanzí àyi kòfalésè ngíni ya dhì. ²⁵Lókyá akódhì ni tidizó nda tá sáà nzi-drì-su drùbhì sè dhì 'i.

²⁶À tìsì tá tâ tâ ñòzo akódhì dri dhì wárágà dri kònini: «Ópí Yúdà ànzì kya».

²⁷À tidí tá kpà kùgubhá rì dhì i fa àruka i drìsè akódhì làgásè: àlo ni dríágó ni lésè, àzya ni lìdzí ni lésè. [²⁸]

²⁹Mónyá adrébhá tá lavulé àrà nda 'ásè dhì ì adrë tá akódhì ni lodhá, adrézó àyi kí drì ya, adrézó tàá dhì: «Á! Mí tá kitswálépi tépelò pfu gózo siá kítú na àmvolésè ni,

³⁰mí así dì fa kipakipa kòdhì drilésè ámi tândi ni tidri wà! »

³¹Kòwánà kàdrì i tátrítrí kúlí tadhábhá íbe dhì ì adrë tá kpà akódhì ni gu kònini, adrézó tàá àyi kòfalésè dhì: «Akódhì tidri móndí àruka i 'i. Dì, kitswá ína áyi tândi ni tidri bwà ko!

³²Adré lèá dhì, Mèsiyà, ópí Isérélè ànzì kya kòdhì kàsí nyànomvá fa kipakipa drilésè, mà kònòró tâ nda akódhì ni ka'izo be dhì bvó! » Kùgubhá tidilé akódhì be nda ì adrë tá kpà akódhì ni lodhá kònini.

Yésu ni dràma

(À kònò kpà Màtayò 27:45-56; Lükà 23:44-49; Yòwáni` 19:28-30)

³³Kítú rírí sè dhi, tímivá dré bvò nì mì dòzo wäyi, tsàle sáà na kítú rírí àmvolésè dhi na.

³⁴Dì sáà na nda sè dhi, Yésu dré liyizó kúlí 'u'ù sè tázoo dhi: «Èløyì, Èløyì, lémà sàbàkàtánì? » Kòdhi adré lèá tâle dhi: «Áma Giká, áma Giká, mí tayí ma àdho tà sè? »

³⁵Mondí àruka adrébhá tá kònàle dhi ì koyi kúlí nda dre dhi, ì dré tázoo dhi: «Mì yi rè ká! Akódhi adré Èløyà ni zi. »

³⁶Gò àyi kí àlo dré ràzo mbèlè ngá vòdhovódho dhi ni adó, vinègári dàzo lana, dròzoá kòzó sílé, tingázoo kuru fèle Yésu dré mvùle gò, tázoo dhi: «Mà kòtayí rè akódhi, nòzoá ngalè Èløyà ni atsá akódhi ni tirí fa kipakipa drilésè yà dhi. »

³⁷Dì, Yésu dré trèzo kúlí 'u'ù sè gò, dràzo.

³⁸Gbă lókyá nda sè dhi, kítá 'ile tépelò ni 'a lakízó dhi dré lasízó 'a be ri, kidhólé drì lésè tsàle pá na.

³⁹Rómà kí sòdá kí kàdrì adrélépi áyi totó Yésu kandrá dhi kònò akódhi drà tá ngíni ya dhi dre dhi, dré tázoo dhi: «Dhya kòdhi tá ína Giká ni Mváagó 'i báti! »

⁴⁰Tòkó àruka i tá kpà kònàle, adrélé tà nda kí no lárá ro. Àyi kòfalé dhi tá: Màrìyà Mágadálénè, Màrìyà Yákóbhò kàdhúrà ro dhi kí andre Yósè be dhi, tsàle Sàlómè.

⁴¹Àyi nda ì adré tá Yésu ni lebè Gàlliyà na, adrészó tà 'o drá. Tòkó àruka bí alibhá akódhi be Yérusalémà le dhi i tá kpà kònàle be.

Yésu ni rúbhá bhàma mógo na dhi

(À kònò kpà Mátayò 27:57-61; Lükà 23:50-56; Yòwáni 19:38-42)

⁴²Kítú nda tá kítú adrészó tà ledé sàbátù kandrá dhi 'i. Dì ìndró kàdrì dre dhi,

⁴³agó àlo rú be Yóséfà angálépi Àrimàtayà lésè dhi dré lìzo Pìlátò véna. Akódhi nda tá Yúdà ànzì kí bhàgo kàdrì kí àlo rúku ró dhi 'i. Adré tá kpà ína Giká ni Òpì letè nòle. Dì akódhi kòtsa Pìlátò véna dre dhi, dré Yésu ni rúbhá zìzo tíá tirí àko.

⁴⁴Pilátò koyi Yésu drà dre dhi dre dhi, akódhi ni líndré dré gàzo. Dré sòdá kí kàdrì azízó, lizízoo tá ngalè akódhi drà dre báti yà dhi.

⁴⁵Koyi tà nda tá kònini dhi sòdá kí kàdrì nda tí dre dhi, dré láti fèzo Yóséfà dré rúbhá nda ni dòzo.

⁴⁶Dì Yóséfà dré kítá kemve gízo lìzo ába gò, dré rúbhá nda ni tirízó fa kipakipa drilésè, lambézoo kítá nda sè gò, lìzo bhàá mógo àlo gàle kírà na dhi na. Dré kírà kàdrì dhi ni alízó bhàle mógo nda tí.

⁴⁷Màrìyà Mágadálénè i Màrìyà Yósè ni andre ró dhi be dhi, ì nò tá àrà rúbhá nda ni bhàzo dhi 'i.

Márokò 16

Yésu ni ngàma dràdrà 'ásè dhi

(À kònò kpà Mâtayò 28:1-10; Lükà 24:1-12; Yòwáni ` 20:1-18)

¹Sàbátù kòlavú dre dhi, Màrýà Mágàdàlénè, Màrýà Yàkóbhò ni andre, ìndì Sàlómè be dhi ì dré dò tàdzí be dóro dhi ni gízo, kitswázó lile dàá Yésu ni rúbhá rú dhi bvó.

²Dì kítú ni àlo pósò àdhya sè, ngá kòwa dre dhi, ì dré ngàzo drùbhì kínó láti do adrészó lile mógo na.

³Láti 'á dhi, ì adré tá lizíá àyi kófalésè dhi: «Àdhi ni kírà li mógo tísè mà dré kitswázó fíle lána bwà dhi nì? »

⁴Dì, ì kòtingá mì dre dhi, ì dré nòzoá dhi, à li kírà kàdrì gú nda mógo tísè dre.

⁵Ì kòfí mógo nda na dre dhi, ì dré kàdhúrà àlo kánzò kemve asólépi í rú dhi ni nòzo, adrérà'a lirílé mógo nda na dríágó lésè. Gò àyi ki togó dré gàzo tirì dré.

⁶Dì, akódhi dré tázooá àyi dré dhi: «Mì tayí àmì ki togó adrélé gàle tirì dré ko. Mì adré Yésu Nàzàréta lésè, tidilé fa kipakipa dri dhi ni nda kòdhya. Akódhi kònwa yókódhó. Nga ína dràdrà 'ásè dre! Mì nò rè àrà tá rúbhá ni ni bhàzo ni ká.

⁷Dì mì li tàá akódhi ni lebèbhá ì dré túmání Pétéró be dhi: «Akódhi adré lile àmì kandrána Gàliláyà na. Kònale dhi, mì ni akódhi ni no ngóró dré tá tâle àmì dré dhi tíni. »»

⁸Dì tòkó nda ki líndrí dré gàzo bhwàbhwa, ì dré kpà adrészó lyàle lyàlyà gò, ì dré ngàzo lapálé mógo nda lésè. Dì, ì tà tá àyikya tà àlo dhya àlo dré ko, ì dré tá adrélé ngá ro dhi sè.

Márokò ni búkù ni kùdù

(À kònò kpà Mâtayò 28:9-20; Lükà 24:13-53; Yòwáni ` 20:11-23; Tà 'ole dhi i 1:6-11)

⁹[Yésu kònga dràdrà 'ásè drùbhì kínó kítú ni àlo pósò àdhya sè dre dhi, dré rè zyà agázó Màrýà Mágàdàlénè í dré tá tirí kònzi nzi-dri-rì dhi ki dròzo lásà dhi kandrá.

¹⁰Gò akódhi nda dré ngàzo lile rúbí nda ni longó dhya adrébhá tá túmání Yésu be gò, ì dré adrészó àwó ngo, adrészó tongolé akódhi ni tà sè dhi ì dré.

¹¹Dì, àyi nda ì koyi tâle dhi, Yésu lídrì ro, ìndì Màrýà nò akódhi dre dhi dre dhi, ì dré àyikya ka'izoá ko.

¹²Àmvolásà dhi, Yésu dré gòzo áyi tadhá lású be twá áyi lebèbhá rì dhi ì dré, ì dré tá adrérà'a lile gbàbhú na dhi 'á.

¹³Dì àyi nda ì dré gòzo rúbí nda ni longó àyi ki arúpi ì dré gò, àyi nda ì dré kpà àyi ki kúlì ka'izo ko.

¹⁴Kùdù ro dhi, Yésu dré gòzo áyi tadhá dhya mudrí-dri-àlo nda ì dré, ì dré tá adrérà'a lirílé mísa làgásè dhi 'á. Gò dré tà tázooá àyi dri, àyi ki tà ka'ika'i dré tá adrélé yàyà dhi sè, ìndì àyi ki togó dré tá adrélé tòmbátòmba dhi sè. Tàko ko, ì ka'i tá àyikya dhya akódhi ni nobhá mì sè akódhi ni ngàma dràdrà 'ásè dhi àmvolésè dhi ki kúlì ko.

¹⁵Gò dré tázooá àyi dré dhi: «Mì li bvò wáyi 'ásè Rúbí Taní longóbe móndyá tití Gìká dré bhàle dhi ì dré.

¹⁶Dhya ángùdhi dra Rúbí Tani nda ní ka'ilepi gò, bátísímò dòzo dhi ní adrí. Di, dyha ángùdhi Rúbí Tani nda ní ka'ilepi ko dhi, Gìká ní tà bha akódhi nda dri.

¹⁷Gìká ní tà twátwa líndríga ró kònì kí fe móndyá ka'ibhá dhi i dré adrélé 'ole dhi kòdhya: Áma rú sè dhi, i ni tirí kònzi kí dro topfòle móndí i lésè. I ni ti twátwa tídhí ro dhi kí ta.

¹⁸I ní ní kí ru àyi drígá. Di i kòmvu lòmà yà dhi, lòmà nda kítswá àyi kí 'o kònzi àlomvá ko. I ni kpà drígá tobhà dràbhá i rú gò, àyi nda i dré gòzo adrélé. »

¹⁹Di Míri Yésu kòtà tà nda i àyi dré dre dhi, Gìká dré akódhi ní dòzo bhù na gò, akódhi dré lirízó Gìká ní dríágó lésè.

²⁰Di akódhi ní lebèbhá nda i dré ngàzo lìle Rúbí Tani longóbe àrà tití bvò dri dhi i 'ásè. Míri adré tá tà 'o àyi íbe, adrészó tadhá dhi, àyi kúlí i dré tá adrélé longólé nda tà báti 'i, tà líndríga ró dré fèle àyi dré adrélé 'ole dhi i sè.]

Lúkà

Lúkà 1

Tà Lúkà dré Rúbí Taní tisi` zo ásà dhi

¹ Atálágó Tèyòfílè, ngóró mí dré nile be dhi tíni dhi, móndí bí dhi ì tabhì tà ru 'obhá àma kòfalé dhi kí tisile.

² Ì tisi ngóró dhya tà nda kí nobhá mì sè kidhoma ni lésè gò, ì dré atsázó Gíká ni kúlì longóbhá i ró dhi ì dré titílé tayílé àma dré dhi tíni.

³ Di, atálágó, má dré tà tití nda kí ndàle nile kyá àyi kí kidhoma lésè dhi sè dhi, má mìlésè dhi tá kpà dóro má dré tà nda kí tisile mí dré mìbhalé tí dhi.

⁴ Má adré 'òá kònìnì, mí kòkitswáró niá tâle dhi, tà tadhálé mí dré dhi ì tà bàti 'í dhi be.

Ángéló longó Yòwáni` ni tìma ni tà

⁵ Lókyá Èródè dré tá adrérà'a ópí ro bvò Yùdáyà àdhya drile dhi 'á dhi, kòwánà àlo rú be Zàkàríyà dhi tá be. Akodhi nda tá kòwánà angábhá Àbíyà ni súrú lésè dhi kí àlo 'í. Akodhi ni tòkó rú be Èlizàbétè dhi angá tá kpà Árónà atú adrélépi kòwánà kí kàdrì ro dhi ni súrú lésè.

⁶ Àyi rìti dhi kí tà tá gyägya Gíká mìlésè. Ì adré tá tà tití Míri ni tátrítrí kúlì dré adrélé tâle à kò'o dhi kí 'o, tà àlo tivì àko ró.

⁷ Di, àyi tá àyikya mvá àko. Tako ko, Èlizàbétè tá kondó 'í, ìndì àyi rìti dhi kí kóná lavú tá dre.

⁸ Kítú àlo dhi, Zàkàríyà nda adré tá àzí 'o kòwánà ro Gíká kandrá. Àngyá ko, lókyá nda tá lókyá kòwánà akodhi ni súrú lésè dhi ì dré adrészó àzí 'o dhi 'í.

⁹ Anzyà gá kòwánà ì dré adrélé 'ole dhi tíni dhi, ì kipè tá akodhi dzègé sè, file bénédélé za Míri ni tépelò na dhi kòdhyá.

¹⁰ Di akodhi dré tá adrérà'a bénédélé za dhi 'á dhi, móndyá zyandre tití dhi ì adré tá tà zi Gíká tí kivì na.

¹¹ Gò ángéló Míri àdhya dré ngàzo agálé Zàkàríyà kandrá, àyi totó adrélé alètárì adrészó bénédélé za dhi ni dríágó lésè.

¹² Zàkàríyà kònò akodhi dre dhi, akodhi ni drì dré abízó nyinyi gò, tirì dré gàzo akodhi léna bì.

¹³ Di, ángéló nda dré ína tazoá drá dhi: «Zàkàríyà, mí ro ngá ko! Tako ko, Gíká yi tà mí dré zile í tí dhi dre. Ámi tòkó Èlizàbétè ni mváagó ti mí dré gò, mí dré rú ni ni zizo Yòwáni.

¹⁴ Akodhi ni arí fe mí dré kólénzé íbe. Móndí bí dhi kí kókpà lenzé akodhi ni tìma sè.

¹⁵Tàko ko, akódhì ni tà ni adré kàdrì Mírì milésè. Akódhì kitswá tàdzí vínò 'i ya, kó ngalè wá àtsí 'i ya dhi ni mvu ko. A ni ga Tírì Lólo sè bǐ, kídhólé í dré adrérà'a áyi andre lé dhi 'á.

¹⁶A ni ìsérélè ànzì bǐ dhi kí adrì agòle Mírì àyì kí Gíká vélé.

¹⁷A ni adhé alìle Mírì kandrá, Tírì Lólo atú adrélépi pròfétà Èlýà le dhi ni rinyí sè, kitswálé ànzì kí atá kí togó adzá àyì kí ànzì i vélé, ìndì móndyá adrébhá ligilé dhi kí togó adzá móndyá gyägya kí tògyá vélé, kitswázó móndí kí tívó adrélé gànzi ró Mírì dré be dhi bvó. »

¹⁸Di, Zàkàrìyà dré ángéló nda ni lizízó tàzoá dhi: «Má ni niá ngalè tà kòdhì ni ru 'o bàti dhi ngíni? Àngyá ko, ma málìga 'i, ìndì áma tòkó ni kóná lavú dre. »

¹⁹Ángéló logó drá dhi: «Ma Gàbèrèyélè 'i. Má adré áma totó Gíká kandrá, adrélé akódhì ni àzí 'o. Akódhì amù ma alìle mí vélé, rúbí taní kòdhì ni longó mí dré.

²⁰Di, mí yi rè ká! Mí ni adré ábhábhá ro tà ta àko ró, tsàle kítú tà nda dré dra ru 'òzo dhi tú. Tàko ko, mí ka'i mína áma kúlí i ko, tágba kúlí nda i dré dra ru 'òzo àyì kí lókyá sè dhi. »

²¹Lókyá nda sè dhi, móndyá zyandre nda i adré tá Zàkàrìyà ni letè gò, àyì kí líndrí dré adrészó gàle, dré tá adrélé gile tépelò na tò dhi sè.

²²Di, kàpfò lásà dre dhi, kitswá tá ína tà ta àyì véna bwà ko. Gò i dré atógyàzoá dhi, ngá agá tá akódhì mi toróbí tini tépelò na dre. Àngyá ko, akódhì atsá tá ína ábhábhá ro, adrélé tà ta àyì dré drígá sè.

²³Akódhì ni lókyá adrészó àzí 'o tépelò na dhi kákí dre dhi, dré nzìzo í bhàna.

²⁴Àmvolásà dhi, akódhì ni tòkó Èlìzàbétè dré 'a kisúzó gò, dré áyì zùzo 'a nda be mbă nzi. Adré tá kisùá i léna dhi:

²⁵«Mírì 'o má dré tà adrélépi dóro i milésè dhi kòdhya. Lókyá kònìdhì sè dhi, tingá má rúsè tà adrélépi tá kanyò fe má dré móndí i mi dhi dre. »

À longó Yésu ni tìma ni tà

²⁶Èlìzàbétè ni mbă ni nzi-drì-àlo sè dhi, Gíká dré ángéló Gàbèrèyélè ni mùzo lìle bhàandre rú zìle Nàzàrétà bvò Gàllílàyà àdhya lé dhi na,

²⁷kyánzì àlo rú be Màrìyà, àgo tà nilepi rè ko dhi véna. À zì tá Màrìyà nda agó àlo rú be Yòséfà, angálépi ópí Dàwídì ni súrú lésè dhi dré tòko ró.

²⁸Ángéló nda kòfì Màrìyà véna dre dhi, dré tàzoá dhi: «Mi Mírì dré áyì togó taní bhàzo mí rú ni, mòdo mí dré! Mírì túmäní mí be! »

²⁹Di Màrìyà ni drì dré abízó nyïnyì kúlí nda sè gò, dré adrészó kisùá i léna ngalè mòdo nda tá àdho mòdo kárá 'i ya dhi.

³⁰Di, ángéló nda dré ína tàzoá drá dhi: «Màrìyà, mí ro ngá ko! Tàko ko, mi Gíká ni togó taní ibe mí rú.

³¹Mí yi rè ká! Mí ni 'a kisú gò, mí dré mváagó tizo, rú ni ni zizo Yésu.

³²Akódhi ni tà ni adré kàdrì, ìndì à ni akódhi ni zi Gìká kurú na bhù na dhi ni Mváagó ro. Míri Gìká ni akódhi ni bha adrélé ópí kàdrì ro, ngóró akódhi ni tábhí Dàwídì tíni.

³³Akódhi ni opì nya ḥsérélè ànzì i dri kóná vésè kólyá. Bàti, akódhi ni opì ni adré kùdù àko. »

³⁴Dì Màrýà dré ángéló nda ni lizízó tazoá dhi: «Tà kòdhì ni ru 'o ngíni? Tàko ko, má ni rè agó àlo ni tà ko. »

³⁵Dì ángéló nda logó drá dhi: «Tírí Lólo ni así mí dri gò, Gìká kurú na bhù na dhi ni rinyí dré ámì asózó. Ásà dhi, à ni mvámvá lólo mí dré dra tile nda ni zi Gìká ni Mváagó ro.

³⁶Dì mí yi rè ká! Ámì aró Èlizàbétè kisú ína 'a dre. Adré mváagó letè, tágba dré adrészó málìga 'i dhi. Kònìdhì, akódhi tá adrélé zile kondó ro nda ni mbă ni nzi-drì-alo dhi 'i.

³⁷Tàko ko, Gìká milésè dhi, tà àlo kitswálé 'ole bwà ko dhi yókódhó. »

³⁸Dì Màrýà gò tàá dhi: «Ma Míri ni marrábà 'i. Tà nda kò'o ru má dré ngóró mí dré tâle dhi tíni. » Gò ángéló nda dré akódhi ni tayízó.

Màrí yà li` Èlizàbétè ni no

³⁹Lókyá nda sè dhi, Màrýà dré ngàzo lìle sírí bhàandre àlo bvò kòngo ró Yùdáyà àdhya lé dhi na.

⁴⁰Dré tsàzo fíle Zàkàrýà ni dzó na gò, módo fe Èlizàbétè dré.

⁴¹Dì Èlizàbétè dré Màrýà ni módo nda ni yirà'a dhi, mvámvá dré ngàzo lána gò, Èlizàbétè dré gàzo Tírí Lólo sè bì.

⁴²Dré yòzoá kúlí 'u'u sè dhi: «Gìká bhà tà taní mí dri tòkó àruka tití dhi kí lavú dre. Bhà kókpà tà taní mvámvá mí dré dra tile dhi dri dre.

⁴³Ma tá àdhi 'i, áma Míri ni andre dré alízo má vélé ni?

⁴⁴Mí nò rè ká! Ámì módo ni kúlí dré adhéra'a má bílé dhi 'á dhi, mvámvá nga má léna arí dré.

⁴⁵Kólénzé mí dré, mí dré ka'ile tâle dhi, Míri ni dra tà i dré tâle mí dré dhi ni 'o káyà dhi sè. »

Longó Màrí yà àdhya

⁴⁶Dì Màrýà dré tazoá dhi: «Má adré áma Míri ni tà bha kuru.

⁴⁷Áma togó adré lenzélé Gìká áma tìdrílépi dhi ni rú sè.

⁴⁸Tàko ko, akódhi bhe mí áyi marrábà tâko ni ni no. Kìdhólé nyànomvá dhi, móndyá lókyá tití i sè dhi kí áma zi kólénzé líyí ro.

⁴⁹Angyá ko, Gìká rinyí líyí ro dhi 'o tà kàdrì lavulé dhi má dré dre. Akódhi ni rú lólo.

⁵⁰Adré áyi togó doro tadhá móndyá lókyá tití i sè adrébhá áyi ro dhí i dré.

⁵¹O tà kàdrì i áyi drígá rinyi ró dhí sè dre. Lapé móndyá tà kisùkisù íbe drìkàdrì ro dhí i.

⁵²Tirí ópí kàdrì i àyi kí lirírà adrészó òpí nya dhí i drìlésè gò, móndyá tàko kí tingázó kuru.

⁵³Fè ngá doro i móndyá tòbirí íbe dhí i dré nyàle gò, ngábhá kí logózó nzile drígálé sè.

⁵⁴⁻⁵⁵Alì áyi màrábà, ìsérélè ànzi kí ledé. Tívì kpà áyi togó doro tadhama Àbàramà i dré ànzi ni íbe kóná vésè kólyá dhí ko, ngóró dré tá lazílé àma kí tábhí i dré dhí tíni. »

⁵⁶Màriyà dré adrészó Èlizàbétè bhàna mbă na gò, dré gózo nzile i bhàna.

Yòwáni` ni tìma

⁵⁷Èlizàbétè ni lókyá tìzo dhí kòkitswá dre dhí, dré mváagó tìzo.

⁵⁸Akódhí ni bhàzí i aró ni íbe dhí i kòyi tâle dhí, Míri tadhá tá áyi togó doro drá dhí dre dhí, i dré ngàzo adrélé lenzélé túmäní akódhí be.

⁵⁹Mvámva nda ni kítú ni nzi-drì-na akódhí ni tìma àmvolésè dhí sè dhí, i dré lìzo akódhí ni 'o lwàle. Móndí i adré tá 'ole akódhí ni atá, Zàkàriyà ni rú fe drá ká.

⁶⁰Dì, andre ni dré ína tàzoá dhí: «Kóko, à ni akódhí ni rú zi Yòwáni. »

⁶¹I tà drá dhí: «Móndí rú be kònìnì dhí ámi súrú na dhí yó. »

⁶²Gò i dré mvámva nda ni atá ni lizízó drígá sè, nìzoá ngalè akódhí lè à kòzi mvámva nda ni rú àdhi ya dhí.

⁶³Dì Zàkàriyà dré ngá adrészó ngá tìsì drìá dhí ni zìzo gò, tìsìzoá dhí: «Akódhí ni rú Yòwáni. » Gò àyi tití dhí kí lìndrí dré gàzo tà nda sè.

⁶⁴Gbă kòdhwa, Zàkàriyà ni kúlí dré fùzo gò, dré kidhözö adrélé tà ta, adrészó Gìká ni rú bha kùle.

⁶⁵Dì tìri dré gàzo àyi kí bhàzí tití dhí i léna bì. Gò à dré adrészó tà nda kí tití bvò kòngo ró Yùdáyà àdhya 'ásè wáyi.

⁶⁶Móndyá tití tà nda kí yibhá dhí i adré tá tà nda kí kisù, adrészó lizíá àyi kòfalésè dhí: «Mvámva kòdhí ni atsá àdhi ró? » Tàko ko, Míri ni rinyi tá mvámva nda íbe báti.

Longó Zàkàri` yà àdhya

⁶⁷Zàkàriyà, mvámva nda ni atá dré gàzo Tírí Lolo sè bì gò, dré ngàzo Gìká ni kúlí longó pròfétà àdhya tití kònìnì:

⁶⁸«Rúku kàdré Míri, ìsérélè ànzi kí Gìká dré, dré alìle áyi móndyá kí lomí, àyi kí apázó dhí sè.

⁶⁹Tàko ko, akódhí 'o dhya rinyi ró dra àma kí tiindrílépi dhí apfole,

áyi màrabà Dàwídì ni súrú lésè dre.

⁷⁰O kònìnì ngóró dré tá lazílé kínó lésè,
áyi pròfétà lolo dhi i tí dhi tíni.

⁷¹Lazí tá dhi, í ni àma kí tidrí àma kí kàribhá i drígásè, ìndì móndyá tití adrébhá togó kònzi bha àma rú dhi i drígásè.

⁷²Ásà dhi, tadhá áyi togó dóro àma kí tábhí i dré dre. Tívì kpà tà lolo í dré bhàle ru yízo móndyá ína íbe dhi ko.

⁷³Tàko ko, sì tá móndrà lazízóá àma kí tábhí Àbàramà dré dhi,

⁷⁴í ni àma kí apá àma kí kàribhá i drígásè, mà kàdréró áyi tà 'o tirì àko,

⁷⁵ngóró móndí lolo ìndì gyägya í milésè dhi i tíni, àma kí lókyá wáyi sè.

⁷⁶Dí mi, áma mvá ro ni, à ni ámi zi Gíká kurú na bhù na dhi ni pròfétà ro.

Àngyá ko, mí ni dhe lile Míri kandrána, kitswálé láti ledé akódhi dré.

⁷⁷Mí ni longóá akódhi ni móndyá i dré dhi, akódhi ni àyi kí tàkonzi kí tri, àyi kí tídrixó.

⁷⁸Àma kí Gíká ni 'òá kònìnì áyi togó dóro ìndì yàyà dhi sè.

Ásà dhi, a ni ngádra amù àma dré bhù lésè ngóró kítú ni apfòapfò tíni,

⁷⁹kitswálé ngá kazá móndyá adrébhá lirilé tímivá na dhi i dré, ìndì àyi adrébhá lirilé líndrí dràdrà àdhya zàle dhi i dré, kitswálé kpà àma kí tidrí láti tà kídríkídrí àdhya 'ásè. »

⁸⁰Dí mvámvá nda adré tá mbàle rúbhá sè ìndì tògyá sè. Adré tá adrélé duku na tsàle lókyá dré apfòrà'a lsérélè ànzì i kandrá dhi 'á.

Lúkà 2

Yésu ni tìma

(À kònò kpà Mátáyò 1:18-25)

¹Lókyá nda sè dhi, Rómà kí ópí kàdrì, Kàyisárà Àwùgústò dré tolí fèzo tazoá dhi, à kòtisi móndyá wáyi Rómà kí opì zàle dhi kí rú búkù na.

²Rú tísima drídri nda tá lókyá Kíriníyò dré tá adrérà'a gùvèrènérè ro bvò Síriyà àdhya drile dhi 'á.

³Gò móndí àlo àlo tití dhi i dré ngàzo lile àyi kí rú 'o tísile àyi kí tändi kí bhàandre i 'ásè.

⁴Dí Yòséfà dré kpà ngàzo bhàandre Nàzàrétà àdhya bvò Gàliláyà àdhya lé dhi lésè, lile bhàandre ópí Dàwídì àdhya rú zile Bètélémè, bvò Yùdáyà àdhya lé dhi na. Tàko ko, angá tá ína Dàwídì ni súrú lésè.

⁵I lì tá kònàle àyi kí rú 'o tísile túmání Máríyà, tokó zile akódhi dré mòle dhi be. Máríyà nda tá 'a be.

⁶Ì dré tá adrérà'a Bètèlémè na dhi 'á dhi, Màrìyà ni lókyá tìzo dhi dré kitswázó.

⁷Dì dré áyi mváagó kàyo ró dhi ni tìzo, akódhi ni lambézó kítá sè, làle ayílé àrà kà'wá ì dré tá adrészó ngá nya lána dhi na. Tàko ko, àrà ì dré kitswázó ayílé kùmú ki dzó na dhi tá yókódhó.

Ángéló agá kábilígyà likí` bhá i kandrá

⁸Bvò nda na dhi, kábilígyà likíbhá àruka ì adré tá ayílé mbì na, adrélé àyi ki kábilígyà ki likí ngátsi sè.

⁹Dì ángéló Míri àdhya dré ngàzo agálé àyi kandrá, Míri ni lagulagu dré ngá kazázó àyi làgásè kúrú gò, ì dré lyàzo kwàkwà tìri dré.

¹⁰Dì, ángéló nda dré tàzoá àyi dré dhi: «Mì ro ngá ko! Mì yi rè ká! Má alì rúbí taní longó àmi dré. Dì móndyá tití dhi ki lenzé ásà tò.

¹¹Ándrò, ngátsi kònìdhi sè dhi, à ti àmi dré dhya dra móndí ki tìdrílépi dhi bhàandre Dàwídì àdhya na dre. Akódhi nda Mèsíyà 'i, ìndì Míri 'i.

¹²Mì ni akódhi ni ni tà kònìdhi sè: Mì ni mvá kùrí kă lambélé kítá sè dhi ni kisú, adrérà'a ayílé àrà kà'wá ì dré adrészó ngá nya lána dhi na. »

¹³Gbă kòdhwa, ángéló lìzolìzo bhù lésè dhi ì dré agázó ángéló nda làga, adrélé Gìká ni rú bha kùle, adrészó tàá dhi:

¹⁴«Milanzìlanzi kàdré Gìká dré kurú na bhù na! Tà kìdríkìdrí kàdré kpà bvò dri móndyá akódhi ni togó dré adrészó kinlé ásà dhi ì dré! »

Kábilígyà likí` bhá i` li` Bètèlémè na

¹⁵Ángéló ì kònga kábilígyà likíbhá nda i vélésè gòle bhù na dre dhi, àyi nda ì dré tàzoá àyi kòfalésè dhi: «Mà kòlì dì Bètèlémè na, tà ru 'olepi gò Míri dré tà ni ni longozó àma dré kòdhí ni no wà! »

¹⁶Dì ì dré ngàzo lìle sírí Bètèlémè na gò, ì dré Màrìyà ki kisúzó Yòséfà íbe, ìndì mvá kùrí kă adrélépi tá ayílé àrà kà'wá ì dré adrészó ngá nya lána dhi na nda be.

¹⁷Ì kònò mvámvá nda dre dhi, ì dré ngàzo tà ángéló dré tá tâle àyi dré akódhi ni tà sè dhi ni tití móndí bì dhi ì dré.

¹⁸Móndyá tití tà nda ni yibhá dhi ki líndrí dré gàzo, tà kábilígyà likíbhá nda ì dré tâle àyi dré dhi ni tà sè.

¹⁹Dì, Màrìyà dré ína tà tití nda ki zùzo áyi togó na, adrészó àyi ki kisù.

²⁰Gò kábilígyà likíbhá nda ì dré gòzo gòle, Gìká ni mì bhabe lanzile, ìndì akódhi ni rú bhabe kùle, tà tití ì dré yile ìndì nòle ngóró tá longolé àyi dré dhi tíni dhi ki tà sè.

Yésu ni fèma Gìká dré dhi

²¹Mvámvá nda ni kítú ni nzi-drì-na akódhi ni tìma àmvolésè dhi sè dhi, à dré akódhi ni lwàzo gò, akódhi ni rú zìzo Yésu, ngóró ángéló dré tá tâle àkò akódhi ni andre kisù rè 'a ko dhi 'á dhi tíni.

²²Gò Yòséfà i Màrìyà be dhi ì dré àyi kí temvézó mvámvá nda ni tìma àmvolésè, ngóró Mósè ni tátrítrí kúlí dré adrélé tâle dhi tíni. Lókyá nda kákí dre dhi, ì dré mvámvá nda ni dòzo lìzo ába Yèrúsalémà na, kítswálé akódhi ni fe Mírì dré dhi bvó.

²³Tàko ko, Mírì ni tátrítrí kúlí adré tâá dhi: «Lè à kàdré ànziàgo tití kàyo ró dhi kí fe adrélé lólo Mírì dré. » ²⁴Kòdhi íbe dhi, ì lì kítswálé ngá fe Mírì dré, ngóró akódhi ni tátrítrí kúlí dré adrélé tâle dhi tíni: «À kàdré kòbhòlà rì dhi 'i yà, kó ngalè kòbhòlà ngbòlò rì dhi 'i yà dhi kí fe. »

Sìmèyonà longó kúlí pròfétà àdhya ti' ni

²⁵Lókyá nda sè dhi, agó àlo rú be Sìmèyonà dhi tá Yèrúsalémà na. Akódhi nda tá móndí gyágya, adrélèpi trôle Gíká ni tà rú dhi 'i. Adré tá Mèsiyà ni letè alile Ìsérélè ànzi kí tiidri. Akódhi tá kpà Tírí Lólo íbe í dri.

²⁶Tírí Lólo nda longó tá drá dhi, kítswá rè drâle drìdrì dré Mírì ni Mèsiyà ni nòzo dhi kandrá dhi ko.

²⁷Dì kítú nda sè dhi, Tírí Lólo drì tá akódhi lìle file tépelò na. Yésu ni tibhá ì kàfí kítswálé akódhi ni fe Gíká dré ngóró tátrítrí kúlí dré adrélé tâle dhi tíni dre dhi,

²⁸Sìmèyonà dré mvámvá nda ni adózó í drígá gò, Gíká ni rú bhàzo kùle, tâzoá dhi:

²⁹«Mírì rúku ró ni, nyànomvá dhi, mí ni kítswá ámi màrábà ni tayí drâle tà kídríkídrí na, ngóró mí dré tá lazilé má dré dhi tíni.

³⁰Tàko ko, má nò dhya mí dré dra móndí kí tiidrizó ni áma mi sè dre.

³¹Mí bhà tá akódhi ni tà drìdrì, kòkítswáró ámi tà 'o móndyá tití i mi.

³²Akódhi ngádra dra ámi 'olepi súrú tití dhi ì dré nile dhi 'i. A ni kpà ámi mìlanzìlanzì tadhá ámi súrú Ìsérélè ànzi i dré. »

³³Mvámvá nda ni atá i andre ni be dhi kí lìndrì dré gàzo, tà tâle akódhi ni tà dri nda kí tà sè.

³⁴Dì Sìmèyonà dré tà taní zìzo Gíká tí àyi dri gò, tâzoá Màrìyà, Yésu ni andre dré dhi: «Mí nò rè ká! Mvámvá kònìdhi atsá kítswálé Ìsérélè ànzi bì dhi kí 'o ledhélé, ìndì àyi bì dhi kí 'o ngàle. Akódhi ni tà ni kpà adré tà adrészò tà ta rúá kònzi dhi 'i,

³⁵kítswálé tà móndí zyandre dhi ì dré adrélé kisùle dhi ì kàpfòrò ngádra 'á be dhi bvó. Dì mi ró dhi, kízà ni kpà ámi tândi ni togó so ngóró sápí tíni. »

Ánà ni kúlí pròfétà àdhya ti' ni dhi

³⁶Lókyá nda sè dhi, pròfétà àlo tòko ró rú be Ánà dhi tá kpà tépelò na. Akódhi nda tá Fànùwélè, Àsérà ni súrú lésè dhi ni zapi 'i. Akódhi agà tá tà tândi ró. ì gi tá agó dré tá mòle áyi kyanzì lókyá 'á dhi be ngbà 'í kóná nzi-drì-ri.

³⁷Agó ni ni dràma àmvolésè dhi, adré tá ngbú tàyítòko ró tsàle áyi kóná dré tsarà'a nyadhi-su-drì-su dhi 'á. Adré tá ngbú adrélé tépelò na, adrélé Gíká ni lìndrì bha, adrészò tâbirí mvo, adrészò tà zi akódhi tí kítú vésè, ìndì ngátsi vésè.

³⁸Dì lókyá Yésu ni tibhá ì dré tá adrérà'a akódhi ni fe Gìká dré dhi 'á dhi, Ánà nda dré áyi kisizó ànyi àyi làga gò, kidhólé adrélé àwoyà fe Gìká dré mvámvá nda ni tà sè. Dì dré ngàzo adrélé akódhi ni tà ta móndyá tití adrébhá tá Yèrúsalémà ni apama letè dhi ì dré.

Yòséfà i` nzì Nàzàréta na

³⁹Yòséfà i Màriyà be dhi ì kò'o tà tití Míri ni tátrítrí kúlí dré adrélé tâle à kò'o dhi ì akilé dre dhi, ì dré gòzo nzìle Yésu be bvò Gàliláyà àdhya na, tsàle àyi ki bhàandre Nàzàréta na.

⁴⁰Kònàle dhi, mvámvá nda adré tá mbàle rìnyí sè, adrélé kpà li'wálé tògyá na. Akódhi tá kpà Gìká ni togó taní íbe í rú.

Yésu mvámvá ro dhi tépelò na

⁴¹Kóná àlo àlo tití dhi ì sè dhi, Yésu ni tibhá ì adré tá lìle Yèrúsalémà na gwányá Pásikà àdhya ni tà sè.

⁴²Dì Yésu ni kóná kòtsa mudrí-drì-rì dre dhi, ì dré ngàzo lìle akódhi be gwányá nda na, ànzyà gà ì dré adrélé 'ole dhi tíni.

⁴³Gwányá nda kàkí dre dhi, ì dré láti dòzo nzìzo. Dì, Yésu mvámvá ro nda gò ína adrélé Yèrúsalémà na, áyi tibhá ì dré atógyà àko ró.

⁴⁴Ì adré tá àyikya kisùá dhi, Yésu tá àyi ki atsíamu i kòfalé. Ì kòto atsí kítú ndile dre dhi, ì dré kidhózó akódhi ni nda àyi ki aró i kòfalé, àyi ki arúpi íbe.

⁴⁵Dì, ì kòndà akódhi tí dre dhi, ì dré gòzo àyi ki tapí góle akódhi ni nda Yèrúsalémà na.

⁴⁶Kítú na àmvolésè dhi, ì dré akódhi ni yi sibhálé be ngbo, akódhi ni tògyá ni tà sè, ìndì kúlí dré tá adrélé logolé dhi ki tà sè.

⁴⁷Àyi tití nda ì adré tá akódhi ni yi sibhálé be ngbo, akódhi ni tògyá ni tà sè? Mí nò rè ká! Àma ámi atá be dhi, mà adré tá ámi nda togó be lanzìlanzi. »

⁴⁸Dì, Yésu logó àyi dré dhi: «Mì adré tá áma nda àdhho tà sè? Mì ni tá ko tâle dhi, lè tá má kàdré áma Atá ni dzó na dhi? »

⁴⁹Dì, tà dré tâle nda ni àndu dré ína fízo àyi drìna ko.

⁵⁰Gò Yésu ì dré gòzo nzìle túmäní àyi íbe Nàzàréta na. Kònàle dhi, akódhi adré tá áyi bha àyi ki rìnyí zàle. Dì andre ni adré tá ína tà tití nda ki zu tayílé áyi togó na.

⁵¹Yésu adré tá mbàle rúbhá sè ìndì tògyá sè, adrélé lìle drìdrì. Akódhi ni tà tá kpà dóro Gìká mìlésè ìndì móndí i mìlésè.

Lúkà 3

Yòwáni` Bâtisimò fèlepi ledé láti Míri Yésu dré

(À kònò kpà Mátayò 3:1-12; Márokò 1:1-8; Yòwáni` 1:19-28)

¹Kàyásará Tibèrýò ni kóná ni mudrí-drì-nzi adrészó Rómà kí ópí kàdrì ro dhi sè dhi, Pòtítò Pilátò tá gùvèrénérè bvò Yùdáyà àdhya drile dhi 'i. Èródè tá ína ópí bvò Gàliláyà àdhya drile dhi 'i. Akódhì ni adrúpi, Filípò tá ína ópí bvò Ìtùráyà àdhya drile ìndì Tràkònítì àdhya drile dhi 'i. Lìsàníyà tá ína ópí bvò Àbìlénè àdhya drile dhi 'i.

²Dì lókyá Ánà i Kàyáfà be dhi i dré tá adrérà'a kòwánà kí kàdrì i ró dhi 'á dhi, Gìká ni kúlì dré tsàzo Yòwáni, Zàkàrífà ni mvá véna duku na.

³Gò akódhì nda dré ngàzo tatsílé bvò wáyi Yòròdánè làgásè dhi 'ásè longóába móndí i dré dhi, i kòladzá àyì kí togó gò, bâtisimò dòzo, Gìká kòtriró àyì kí tàkonzì i be dhi bvó.

⁴Dì tà nda kòdhì 'o tá ru ngóró pròfétà Èsáyà dré tá tísile áyì bükù na dhi tíni: «Dhya àlo adré kúlì loyó duku na, adrészó tàá dhi: «Mì kòledé láti Míri dré alìzo! Mì kòlotó láti atsálé pyà akódhì dré!

⁵À ni yábhù tití dhi kí lutú, kòngó tití kàdrìkàdrì ro ìndì tsàtsà ro dhi kí lasézo.

À ni láti gòdhögòdho dhi kí lotó atsálé pyà, láti bhúrobhúro dhi kí lutúzó atsálé kpàkpà.

⁶Dì móndyá tití dhi kí tà Gìká dré 'ole àyì kí tindrízó dhi ni no. »»

⁷Dì Yòwáni adré tá tàá móndyá zyandre adrébhá apfòle bâtisimò do i vélé dhi i dré dhi: «Àmi, ni àtrá kí àrèbhá ni i, àdhi tadhá àmì dré dhi, mì kòlapá Gìká ni kombà adrélépi alìle dhi sílésè dhi ni? »

⁸Lè mì kàdré tà adrébhá tadhá dhi, mì ladzá àmì kí togó dre dhi kí 'o kòdhya. Mì kòbhà àmì adrélé kisùá àmì léna dhi «Àma àmakya Àbàramà ni ànzì 'i» dhi ko. Tàko ko, má adré tàá àmì dré dhi: Gìká rìnyí íbe kitswázó ànzì 'o topfòle Àbàramà dré kírà kònì i lésè.

⁹À ga kùbalú fa kómvó i rú dre. Dì à ni fa tití adrébhá lò'wa dóro 'a ko dhi kí togá lebhélé àtsí na. »

¹⁰Dì móndyá zyandre nda i adré tá lizíá akódhì tí dhi: «Lè mà kàdré dì àdho tà 'o kòdhya? »

¹¹Dì Yòwáni adré tá logóá àyì dré dhi: «Lè dhya adrélépi kítá agá lésè dhi íbe rì dhi kòfè àlo ni dhya àkoá dhi dré. Dhya adrélépi mányàngá íbe dhi kàdré kpà lanzíá móndí tàbirí íbe dhi i dré be. »

¹²Mèdáyì lagíbhá i dré kpà alìzo bâtisimò do gò, i dré akódhì ni lizízó tazoá dhi: «Tadhálépi, mà kàdré àmakya àdho tà 'o kòdhya? »

¹³Yòwáni logó àyì dré dhi: «Mì kòzi móndí kí làfa mèdáyì sè làgí ñòle dhi ni lavú dhi ko. »

¹⁴Gò sòdá àruka i dré kpà akódhì ni lizízó tazoá dhi: «Mà kàdré di àmakya àdho tà 'o? » Akódhì logó àyi dré dhi: «Mì kòtopá dhya àlo ni làfa ko. Mì kàsíkì kpà dhya àlo kinzò sè ko. Àmi ki togó kàdré kinlé làfa adrélé fèle àmi dré àmi ki àzí sè dhi sè. »

¹⁵Móndyá tití nda i adré tá Yòwánì ni tà letè nôle, adrészó lizíá àyi léna ngalè akódhì tá ína Mèsiyà 'i yà dhi.

¹⁶Di Yòwánì dré tazoá àyi tití i dré dhi: «Má adré mána bátisimò fe àmi dré yi sè. Di, dhya àlo áma lavulépi rinyí sè dhi adré ína alile. Má kitswá akódhì nda ni lindrì sè ko. Má kitswá ndindì akódhì ni kámokà bă trí bwà ko. Akódhì ni ína bátisimò fe àmi dré Tirí Lólo sè, ìndì àtsí sè.

¹⁷Akódhì ndàkpá íbe i drígá kitswázó ngánò awá áyi àngbó drìna, lò'wa ni ni lomvózó dàle áyi kòbhó na gò, kuyí ni ni kùzo zàle àtsí adrélépi adrálé ko dhi na. »

¹⁸Yòwánì adré tá kpà Rúbí Taní longó móndyá nda i dré, adrészó àyi ki kodzó kúlì àruka i sè bī.

¹⁹Kòdhì íbe dhi, Yòwánì adré tá ópí Èródè ni ndri, dré tá adrúpi ni ni tokó Èròdýà ni dòle mòle dhi sè, ìndì dré tá tà kònzi àruka bī dhi ki 'ole dhi sè.

²⁰Gò Èródè dré ína tà kònzi kònìdhì ni bhàzo áyi tà kònzi àruka tití dhi i dri: 'o Yòwánì rùle bhèle bădzó na.

Yésu ni bátisimò dòma

(À kònò kpà Mátayò 3:13-17; Márokò 1:9-11)

²¹Yòwánì ni rùma kandrá, akódhì dré tá adrér'a bátisimò fe móndyá tití i dré dhi 'á dhi, Yésu dré kpà alìzo bátisimò do. Dré tá adrér'a tà zi Giká tí dhi 'á dhi, bhù dré ru lanzizó gò,

²²Tirí Lólo dré asízó rúbhá be sùle kòbhòlà àdhya tini adhélé akódhì dri. Gò kúlì dré apfòzo bhù lésè tåá dhi: «Mì áma Mváagó má dré lèle tò dhi 'i. Áma togó adré kinlé amì tà sè tò. »

Yésu ni kómvo

(À kònò kpà Mátayò 1:1-17)

²³Lókyá Yésu dré áyi àzí kidhözó dhi sè dhi, akódhì ni kóná tá ànyìanyì nyadhì-àlodrà-mudrì. À adré tá akódhì ni ni Yóséfà ni mvá ro. Yóséfà tá ína Éli ni mvá 'i,

²⁴Éli, Mátátà ni mvá 'i, Mátátà, Lévi ni mvá 'i, Lévi, Mèlíkì ni mvá 'i, Mèlíkì, Yànayì ni mvá 'i, Yànayì, Yóséfà ni mvá 'i,

²⁵Yóséfà, Mátatíyà ni mvá 'i, Mátatíyà, Àmósà ni mvá 'i, Àmósà, Nàwumà ni mvá 'i, Nàwumà, Èsílì ni mvá 'i, Èsílì, Nàgáyì ni mvá 'i,

²⁶Nàgáyì, Mátà ni mvá 'i, Mátà, Mátatíyà ni mvá 'i, Mátatíyà, Sèmèyínà ni mvá 'i, Sèmèyínà, Yósékà ni mvá 'i, Yósékà, Yódà ni mvá 'i,

²⁷Yódà, Yòwànanà ni mvá 'i, Yòwànanà, Résà ni mvá 'i, Résà, Zòrobàbelè ni mvá 'i, Zòrobàbelè, Sàlâtìyélè ni mvá 'i, Sàlâtìyélè, Nérì ni mvá 'i,

- ²⁸Nérì, Mèlíkì ní mvá 'i, Mèlíkì, Ádì ní mvá 'i, Ádì, Kòsámà ní mvá 'i, Kòsámà, Èlámàdámà ní mvá 'i, Èlámàdámà, Érè ní mvá 'i,
- ²⁹Érè, Yòsúwà ní mvá 'i, Yòsúwà, Èlìyèzérè ní mvá 'i, Èlìyèzérè, Yòrímà ní mvá 'i, Yòrímà, Mátátà ní mvá 'i, Mátátà, Lévi ní mvá 'i,
- ³⁰Lévi, Sìmèyonà ní mvá 'i, Sìmèyonà, Yúdà ní mvá 'i, Yúdà, Yoséfà ní mvá 'i, Yoséfà, Yònámà ní mvá 'i, Yònámà, Èliyákímà ní mvá 'i,
- ³¹Èliyákímà, Mèléyà ní mvá 'i, Mèléyà, Ménà ní mvá 'i, Ménà, Mátátà ní mvá 'i, Mátátà, Nàtánà ní mvá 'i, Nàtánà, Dàwidì ní mvá 'i,
- ³²Dàwidì, Yésè ní mvá 'i, Yésè, Yòbédè ní mvá 'i, Yòbédè, Bòwésà ní mvá 'i, Bòwésà, Sálà ní mvá 'i, Sálà, Nàsónà ní mvá 'i,
- ³³Nàsónà, Àminàdábà ní mvá 'i, Àminàdábà, Àdímínà ní mvá 'i, Àdímínà, Àrínì ní mvá 'i, Àrínì, Èsérómà ní mvá 'i, Èsérómà, Fàrésà ní mvá 'i, Fàrésà, Yúdà ní mvá 'i,
- ³⁴Yúdà, Yàkóbhò ní mvá 'i, Yàkóbhò, Ìsákà ní mvá 'i, Ìsákà, Àbàramà ní mvá 'i, Àbàramà, Tárà ní mvá 'i, Tárà, Nàkórà ní mvá 'i,
- ³⁵Nàkórà, Sèrukà ní mvá 'i, Sèrukà, Ràgawù ní mvá 'i, Ràgawù, Fàlékà ní mvá 'i, Fàlékà, Èbérè ní mvá 'i, Èbérè, Sálà ní mvá 'i,
- ³⁶Sálà, Kàyìnámà ní mvá 'i, Kàyìnámà, Àràfàkàsádà ní mvá 'i, Àràfàkàsádà, Sémè ní mvá 'i, Sémè, Nówè ní mvá 'i, Nówè, Làmékè ní mvá 'i,
- ³⁷Làmékè, Mátúsalà ní mvá 'i, Mátúsalà, Ènókà ní mvá 'i, Ènókà, Yàréta ní mvá 'i, Yàréta, Málélélè ní mvá 'i, Málélélè, Kàyìnámà ní mvá 'i,
- ³⁸Kàyìnámà, Ènósà ní mvá 'i, Ènósà, Sétè ní mvá 'i, Sétè, Àdámà ní mvá 'i, àndì Àdámà tá ína Gìká ní mvá 'i.

Lúkà 4

Dzáborò tabhì Yésu ní liti' lé duku na

(À kònò kpà Mátayò 4:1-11; Márokò 1:12-13)

- ¹Àmvolásà dhi, Yésu gàlepi Tírí Lólo sè dhi dré agòzo Yòròdánè lésè. Gò Tírí nda dré akódhi ní drìzo lìzo ába duku na.
- ²Kònàle dhi, Dzáborò dré akódhi ní tabhìzo litílé kítú nyadhi-rì. Lókyá nda sè dhi, Yésu nya ngá àlomvá ko. Di kítú nda è kòlavú dre dhi, tàbirí dré akódhi ní 'òzo.
- ³Gò Dzáborò nda dré tàzoá drá dhi: «Mí kàdré Gìká ní Mváagó 'i báti dhi, mí kòtà kírà kònìdhì dré dhi, kòladzá ru atsálé mápà ro. »
- ⁴Di, Yésu logó drá dhi: «Gìká ní Kúlí adré tàá dhi: «Móndí adré ngbà 'í adrélé lídrì íbe mápà sè ko. » »
- ⁵Gò Dzáborò dré akódhi ní drìzo mbàzo ába àrà kurú na dhi na, òpì wáyi bvò àdhyà kí tadházó drá gbă lókyá nda 'á.

⁶Dré tazoá drá dhi: «Má ní rinyí fe mí dré rúku íbe adrészó òpì kòdhí i drile tití. Àngyá ko, à tayí tà nda kòdhí i má drígá, má kòkítswáró fèá dhya ángùdhi má dré adrészó lèá fèle drá dhi dré.

⁷Dí mí kòtití ámi kórókó má kandrá áma lindrí bhàzo dhi, tà nda kí adré tití mí dré. »

⁸Yésu gò logóá drá dhi: «Gíká ní Kúlí adré tåá dhi: «Lè mí kàdré ngbà 'í Míri ámi Gíká ní lindrí bha kòdhya. Mí kàdré kpà lísambò 'o ngbà 'í akódhí ní rú sè kalóma. » »

⁹Gò Dzáborò dré akódhí ní drizo lizo ába Yérusalémà na, akódhí ní bha tépelò ní drì kákú na. Dré tazoá drá dhi: «Mí kàdré Gíká ní Mváagó 'í báti dhi, mí wa dhèle bvò dri.

¹⁰Àngyá ko, Gíká ní Kúlí adré tåá dhi: «Gíká ní tolí fe áyi ángéló i dré ámi tà sè, i kàdréró sùle mí rú be dhi bvó.

¹¹Áyi nda kí ámi ko kító, mí kòdheró ámi pá si kírà dri ko. » »

¹²Dí Yésu gò logóá drá dhi: «Gíká ní Kúlí adré kókpà tåá dhi: «Lè mí kòtabhí Míri ámi Gíká ko. » »

¹³Dí Dzáborò kòtabhí Yésu litílé láti tití i sè kpi dre dhi, dré ngàzo akódhí ní tayí, adrészó lókyá àzya dré kítswázó tà 'o dhi ní letè.

Yésu kídhó áyi àzí 'òle bvò Gàlliláyà àdhya na

(À kònò kpà Mátayò 4:12-17; Márokò 1:14-15)

¹⁴Amvolásà dhi, Yésu dré gózo góle bvò Gàlliláyà àdhya na Tírí Lólo ní rinyí be wě. Dí akódhí ní rúbí dré la'uzó bvó wáyi nda 'ásè.

¹⁵Akódhí adré tá tatsílé tà tadhábe Yúdà ànzi kí lísambò dzó i 'ásè gò, móndyá tití dhi i dré adrészó akódhí ní rú bha kùle.

Nàzàrétabhá i` gá Yésu rè

(À kònò kpà Mátayò 13:53-58; Márokò 6:1-6)

¹⁶Gò Yésu dré lizo tsàle Nàzàréta, bhàandre í dré tá mbàzo lána dhi na. Sàbátù kàtsá dre dhi, dré fízo Yúdà ànzi kí lísambò dzó na, ànzyà gá dré adrélé 'òle dhi tini. Dré ngàzo áyi totó kítswálé Gíká ní Kúlí na móndí i kandrá dhi bvó.

¹⁷Gò búkù pàle pròfétà Èsáyà àdhya ní fèzo drá. Akódhí kòkinzí búkù nda dre dhi, dré kúlí tisile kònì kí kisúzó nàle:

¹⁸«Tírí Míri àdhya má dri. Tako ko, akódhí zì ma alìle Rúbí Taní longó móndyá lemerè ro dhi i dré. Amù ma longóá móndyá bădzó na dhi i dré dhi, a ní àyi kí tri, ìndì móndyá mì kùdükùdu ró dhi i dré dhi, a ní àyi kí mì nzi. Amù ma móndyá adrélé mì pfôle dhi kí apá,

¹⁹ìndì longóá móndyá tití i dré dhi, kóná Míri dré dra áyi togó dóro tadházó dhi atsá dre. »

²⁰Yésu kònà tà nda i dre dhi, dré búkù nda ní pàzo logólé lísambò dzó nda ní tà likílépi drígá gò, lirizó. Móndyá tití dzó nda 'á dhi kí mì tá akódhí dri.

²¹Dì dré ngàzo tàá àyì dré dhi: «Ándrò kònìdhì, tà tisile kònì ì 'o ru, mì dré tà nda kì yirà'a dre. »

²²Àyì tití nda ì adré tá kúlí kìníkìnì dré tá adrélé tâle dhi kì yi sibhálé be ngbo, adrészó akódhì ni tà ta dóro. Ì adré tá kpà liziá àyì kòfalésè dhi: «Dhya kòndi tsì Yòséfà ni mvá 'ì ko? »

²³Dì Yésu dré tâzoá àyì dré dhi: «Má ni dóro tâle dhi, mì ni tògyakúlì kònìdhì ni ta má dré: <Kódzó, mí kòtidri ámi tândi. > Mì ni kpà tâá má dré dhi: <Mí kò'o tà tití mà dré yile mí dré 'ole Kàpàràñawúmà na dhi i kònwa ámi tândi bha. >

²⁴Dì má adré tà bâti ta àmì dré: À ka'ì gà pròfétà àlo dhi dòle dóro akódhì ni tândi bha ko na.

²⁵Tà bâti ró dhi, pròfétà Èlîyà ni lókyá 'á dhi, lókyá Gìká dré kozya kikízó kóná na tâlì sè gò, kàrábhò dré dhèzo bvò wáyi 'ásè dhi sè dhi, tâyítòkó ì ga tá Ìsérélè ànzì kì bvò na bî.

²⁶Dì, tágba dré tá adrészó kònìni dhi, Gìká mù tá Èlîyà lìle àyì nda i véna ko. Mù akódhì lìle ngbà 'í tâyítòkó àlo Sàrepátà na, bvò Sìdónà àdhya na dhi véna. ²⁷Kòdhì ìbe dhi, pròfétà Èlísà ni lókyá 'á dhi, móndí kàrì dré rûle Ìsérélè ànzì kì bvò na dhi i tá be bî. Dì, tágba kònìni dhi, Gìká tîdrí tá àyì nda kì àlo ko. Tîdrí ngbà 'í Nàmánà angálépi bvò Sìrîyà àdhya lésè dhi kòdhya. »

²⁸Dì móndyá tití lìsambò dzó nda 'á dhi i kòyi tà nda i dre dhi, àyì kì togó dré aswázó tà tândi ró.

²⁹Gò ì dré ngàzo akódhì ni dro bhàandre nda 'ásè. Ì dré drìzoá lìzo ába kòngó bhàandre nda ni mózo driá dhi ni gòlòko na, kitswálé akódhì ni tikpó dhèle tâbhu ni na dhi bvó.

³⁰Dì, Yésu dré ína lavúzó àyì kòfalésè lyà gò, lìle.

Yésu dro tîrì́ kònzi agó àlo dhi lésè (À kònò kpà Márökò 1:21-28)

³¹Àmvolásà dhi, Yésu dré lìzo tsale Kàpàràñawúmà, bhàandre àlo Gàlîlâyà le dhi na. Sàbâtù kàtsá dre dhi, dré kîdhózó adrélé móndyá kònâle dhi kì tadhá àyì kì lìsambò dzó na.

³²Ì adré tá akódhì ni yi sibhálé be ngbo, tà dré adrélé tadhálé dhi kì tà sè. Tàko ko, akódhì ni kúlí i tá lanzañi ro.

³³Lìsambò dzó nda 'á dhi, agó àlo tîrì kònzi ìbe i léna dhi tá be. Dì dré ngàzo trèle, yòzoá kúlí 'u'u sè dhi:

³⁴«Á! Yésu Nàzàréta lésè ni, tsítsì àma kòfalésè mí be dhi, àdho tà 'ì? Mí alì àma kì tà 'o akílé? Má ni mi àdhi 'ì ya dhi be. Mí Dhya lolo Gìká àdhya 'ì! »

³⁵Gò Yésu dré ngàzo liglé tîrì kònzi nda be, tâzoá dhi: «Mí atsú ámì ti! Mí pfò agó kònìdhì lésè! » Dì tîrì nda dré agó nda ni bhèzo kìní mi móndyá tití i kòfalé gò, pfòzo lásà akódhì ni tayí líná.

³⁶Móndyá tití nda kí líndrí dré gàzo bhwäbhwa gò, ì dré adrészó tàá àyi kòfalésè dhi: «Kònini ni àdho kúlí lanzilanzi ìndì rinyi ró dhi 'i? Akódhi adré ndìndì tòlì fe tirí kònzi i dré gò, ì dré adrészó topfòle! »

³⁷Dì Yésu ni rúbí dré la'uzó bvò wáyi nda 'ásè.

Yésu tiđrī` dràbhá bī` dhi ī

(À kònò kpà Mátayò 8:14-17; Márokò 1:29-34)

³⁸Yésu kàpfò lísambò dzó nda lésè dre dhi, dré lìzo Sìmónà ni dzó na. Dì, Sìmónà ni àdrá adré tá ína kizà nya, akódhi ni rúbhá dré tá adrélé àtsí ró lavulé dhi sè. Gò Yésu ni ti lizízó, kòtìdriró tòkó nda be dhi bvó.

³⁹Dì dré tandìzo akódhi drile, ligilé rúbhá àtsí nda dri gò, rúbhá àtsí nda dré pfòzo rúásà. Gbă kòdhwa, tòkó nda dré ngàzo kidhólé ngá fe àyi dré nyàle.

⁴⁰Kítú kòndì dre dhi, à dré dràbhá tití drà twátwa íbe dhi kí adzízó Yésu vélé. Dì akódhi dré drígá bhàzo àyi àlo àlo tití dhi ī dri, àyi kí tiđrizó.

⁴¹Tirí kònzi ī dré kpà topfòzo móndí bí dhi ī lésè, adrélé loyóába dhi: «Mí Giká ni Mváagó 'i! » Dì, akódhi adré tá ína ligilé àyi íbe, adrészó kúlí logá àyi dré, ì dré nile akódhi Mèsiyà 'i dhi be dhi sè.

Yésu longó Giká ni kúlí Yúdà ànzì kí lī` sámbò dzó ī 'ásè

(À kònò kpà Márokò 1:35-39)

⁴²Ngá kòwa dre dhi, Yésu dré pfòzo lile àrà móndí àko dhi na. Móndí zyandre dhi ī dré kidhózó adrélé akódhi ni nda gò, ì dré akódhi ni kisúzó. Ì adré tá akódhi ni le kikilé, kòtayiró àyi ko.

⁴³Dì, Yésu dré tazoá àyi dré dhi: «Adré lèá dhi, má kòlongó kpà Rúbí Tani Giká ni Òpì àdhya bhàandre àruka tití dhi ī 'ásè be. Tako ko, tà nda tà Giká dré áma amùzo 'oá dhi 'i. »

⁴⁴Gò dré gózo adrélé tatsílé Giká ni kúlí longóbe Yúdà ànzì kí lísambò dzó àyi kí bvò le dhi ī 'ásè.

Lúkà 5

Yésu kídhó áyi lebèbhá kí azí

(À kònò kpà Mátayò 4:18-22; Márokò 1:16-20)

¹Kítú àlo dhi, Yésu totó tá ī adrélé Giká ni kúlí longó tâpáríandre Gènèsàrétè àdhya mìle. Móndí zyandre àyi kí kimóbhá akódhi làgásè kúrú dhi ī adré tá àyi kí tribe rúásà, ì kòkitswáró Giká ni kúlí yi be dhi bvó.

²Yésu dré mì bhèzo kòlóngbò rì dhi kí no yìandré nda mìle. Kosyá bhebhá ì así tá kòlóngbò nda ī lésè, adrélé àyi kí kimbá kí mì dzì.

³Gò Yésu dré mbàzo kòlóngbò nda kí àlo adrélépi Sìmónà àdhya ró dhi na gò, tàá drá dhi, kòkisi kòlóngbò nda vwàle tsà yì gàrà rúsè. Dré lirizó lána gò adrélé móndyá zyandre nda kí tadhá.

⁴Kòtà tà akílé dre dhi, dré tázooá Símónà dré dhi: «Mí kisí kòlóngbò tálí na, mí kòbheró àmí kí kimbá i kosyá rùzo. »

⁵Símónà logó drá dhi: «Míri, mà bhe kimbá i ngá wàle tà wóyá, mà kisú ngá àlo ko. Di, mí dré tâle mí dhi sè dhi, má ní go kimbá nda kí bhe tódhyá. »

⁶Di i kòbhe dre dhi, i dré kosyá rùzo zyandre ró gò, kimbá nda i dré kidhózó adrélé tikkilé.

⁷Gò i dré àyi kí arúpi kòlóngbò àzya na dhi kí agózó, i kàliró drígá bha àyi vélé. I kàtsá dre dhi, àyi tití dhi i dré kosyá lomvózó gàle kòlóngbò rì nda i sè bibi, tsàle kòlóngbò nda i dré adrész'ole arílé na tíni ká.

⁸Símónà Pétéró kònò tà nda dre dhi, dré adhézó áyi kórókó titi Yésu kandrá, tázooá dhi: «Míri, mí kisí mí má làgásè. Ma tàkonzi líyí 'í! »

⁹Tà tá kònini tâko ko, àyi arúpi ni íbe dhi kí líndrí ga tá gagà, kosyá zyandre i dré tá rûle dhi kí tà sè.

¹⁰Tà nda tá kókpà kònini akódhí ni àzizé, Yàkóbhò i Yòwánì be, Zèbèdáyò ni ànzí i dré. Di, Yésu dré tázooá Símónà dré dhi: «Mí ro ngá ko. Kidhólé nyànomvá dhi, mí gò vélé adrélé kosyá ru ko. Mí ni go adrélé móndí kí nda kòdhya. »

¹¹Di i dré àyi kí kòlóngbò nda kí logózó yí gára 'a, àyi kí ngá wáyi dhi kí tayízó gò, i dré ngàzo adrélé Yésu ni lebè.

Yésu tidri' agó àlo kàri' dré rûle dhi

(À kònò kpà Mâtayò 8:1-4; Márokò 1:40-45)

¹²Kítú àlo, Yésu dré tá adrérà'a bhàandre àlo na dhi 'á dhi, agó àlo kàri' dré rûle lavúlé dhi atsá tá àrà nda 'á. Kònò Yésu dre dhi, dré adhézó áyi mìbhalé bha kíní mi gò, akódhí ni ti lizízó tázooá dhi: «Míri, mí rinyí íbe kitswázó áma temvé tidrílé, mí kòlè dhi. »

¹³Di Yésu dré áyi drígá kidzízo akódhí ni tabè gò, tázooá dhi: «Má lè 'í. Mí kàdré kemve kpírikpíri wà! » Gbă kòdhwa, kàri' drà nda dré ngàzo rúásà.

¹⁴Gò Yésu dré lazízóá driá dhi: «Mí kòlongó tà kòdhí dhya àlo dré ko. Be ró dhi, mí lì mína ámi tadhá kòwánà dré nòle, iñdì mí fè ngá mòbòmà ro Giká dré ámi temvema sè ngóró Mósè ni tátrítrí kúlí dré adrélé tâle dhi tíni, tadházóá móndí i dré dhi, mí adrí dre káyà dhi. »

¹⁵Di, Yésu ni rúbí adré tá ína la'ulé lile drídri. Móndí zyandre lavúlé dhi i adré tá alile akódhí ni kúlí yi, kòtidríró kpà àyi àyi kí drà i lésè be dhi bvó.

¹⁶Di, vésè be bí, Yésu adré tá ína pfòle kalóma, kitswálé tà ta Giká be àrà móndí àko dhi na.

Yésu tidri' agó àlo pá be àbvò ro dhi

(À kònò kpà Mâtayò 9:1-8; Márokò 2:1-12)

¹⁷Kítú àlo, Yésu dré tá adrérà'a móndí kí tadhá dzó àlo na dhi 'á dhi, Fàrisayò i tátrítrí kúlí tadhábhá íbe dhi i lirí tá adrélé akódhí làga. Àyi nda i angá tá bhà tití bvò

Gàlìlàyà àdhya lé dhi i lésè, bvò Yùdáyà àdhya lésè, ìndì Yèrúsalémà lésè. Yésu tá rinyí Míri àdhya kïtswázó dràbhá ki tidrí dhi íbe.

¹⁸Dì móndí àruka i dré agó àlo pá be àbvò ro dhi ni adózó kíndri dri alìzo ába. Ì adré tá láti nda kïtswázó fîle ába dzó nda na, akódhi ni bha Yésu kandrá dhi bvó.

¹⁹Dì, móndyá zyandre nda ki tà sè dhi, i kïtswá tá àyikya láti kisú fîzo ába bwà ko. Dì i dré ngàzo mbàle ába dzó nda drîna gò, dzó nda ni drî awú, akódhi ni tirizó sile kíndri dri Yésu kandrá móndyá zyandre nda i kòfalé.

²⁰Dì Yésu kònò àyi ki tà ka'lkà'i dre dhi, dré tazoá agó pá be àbvò ro nda dré dhi: «Áma arúpi, à trì ámi tàkonzì i dre. »

²¹Gò Fàrisayò nda i tâtrítrí kúlí tadhábhá nda íbe dhi i dré dhèzo adrélé kisùá àyi léna dhi: «Dhya kondi tá àdhi 'i, adrélé Gïká ni dha kònini ni? Àdhi ni kïtswá tàkonzì tri ni, kàdré ngbà 'i Gïká 'i kalóma ko dhi? »

²²Yésu dré tà i dré adrélé kisûle nda ni nìzo kyá gò, tazoá dhi: «Mì adré àmikya tà kisù kònini àdho tà sè?

²³Tà kïtswálé tâle mbèlè agó pá be àbvò ro kònìdhi dré dhi, ángùdhi 'i: «À trì ámi tàkonzì i dre» dhi, kó ngalè, «Mì nga, mí kïdhó atsí to» dhi?

²⁴Má adré lèá mì kònì dhi, Móndí ni Mvá rinyí íbe adrészó tàkonzì tri bvò dri. » Dì dré tazoá agó pá be àbvò ro nda dré dhi: «Má adré tâá mí dré dhi: Mì nga, mí do ámi kíndri, ìndì mí nzì mí bhàna! »

²⁵Gbă kòdhwa, agó nda dré ngàzo móndyá tití i misè, àyi kíndri i dré tá ayízó drìá dhi ni do gò, nzìzo i bhàna Gïká ni rú bhabe kùle.

²⁶Dì móndyá tití nda ki líndri dré gàzo bhwâbhwa gò, i dré ngàzo adrélé Gïká ni rú bha kùle. Àyi ki togó adré tá kpà gâle tiri sè bî gò, i dré adrészó tâá dhi: «Ándrò, mà nò tà líndriga ró dhi i dre! »

Yésu azí Lévi

(À kònò kpà Mâtayò 9:9-13; Márokò 2:13-17)

²⁷Amvolásà dhi, Yésu dré pfòzo gò, mèdáyì lagílépi àlo rú be Lévi dhi ni no adrérà'a lirilé mèdáyì lagírà na. Dré tazoá drá dhi: «Mì lebè ma! »

²⁸Dì Lévi nda dré ngàzo àyi ngá tití dhi ki tayí gò, kïdhózó adrélé Yésu ni lebè.

²⁹Bvóá dhi, Lévi dré gwányá kàdrì dhi ni 'òzo Yésu dré àyi dzó na. Gò i dré lirizó mísá làgásè adrélé ngá nya túmâni mèdáyì lagíbhá zyandre dhi íbe, ìndì móndí àruka íbe.

³⁰Dì, Fàrisayò i túmâni tâtrítrí kúlí tadhábhá Fàrisayò ro dhi íbe dhi i dré dhèzo adrélé kúlí ti Yésu ni lebèbhá i rú, adrészó tâá àyi dré dhi: «Mì adré ngá nya adrészó ngá mvu túmâni mèdáyì lagíbhá íbe ìndì tàkonzìbhá íbe àdho tà sè? »

³¹Dì Yésu dré logózóá àyi dré dhi: «Móndyá rúbhá be dóro dhi i ndà gâ kódzó ko na. Be ró dhi, móndyá drà ro dhi i adré àyikya ndàá àyi.

³²Má alì móndyá adrébhá àyi kí no gyägya dhí kí azí kòdhya ko. Be ró dhí, má alì mána tàkonziòbhá kí azí kòdhya, ì kòladzáró àyi kí togó agòzo Gìká vélé. »

À lizí Yésu tòbirí mvòma ní tà dri
(À kònò kpà Mâtayò 9:14-17; Márokò 2:18-22)

³³Gò Fàrisayò nda ì dré tàzoá Yésu dré dhí: «Yòwánì ní lebèbhá i Fàrisayò kya íbe dhí ì adré tòbirí mvo rä, adrészó tà zi Gìká tí. Di, ámi lebèbhá ì adré àyikya ngá nya, adrészó ngá mvu. »

³⁴Yésu logó àyi dré dhí: «Mì ní kitswá tsì móndyá azilé gwányá làmò àdhya lé dhí kí 'o tòbirí mvo, ì dré adrérà'a túmání tòkó lìyí be dhí 'á? Tàdzí ko!

³⁵Di, lókyá adrélépi alile dhí sè dhí, à ní tòkó lìyí nda ní tingá àyi kòfalésè gò, ì dré kidhózó adrélé tòbirí mvo lókyá nda sè. »

³⁶Yésu dré kpà adrészó tà ta àyi dré kúlí alaala sè, adrészó tàá dhí: «Dhya àlo kàdré kítá àku ró lasílépi dhí íbe dhí, asì kigá kítá tídhí ro dhí rúsè, kítá àku nda ní lebhézó ásà ko na. Tako ko, kò'o kònini dhí, lasí kítá tídhí nda dre, ìndì kítá tídhí ní kigá nda kitswá ína ru amú kítá àku nda be doro ko.

³⁷Kòdhí íbe dhí, dhya àlo dà vínò tídhí ro dhí kíní dhile adrészó vínò likí, akùbhá dre dhí i léna ko na. Tako ko, kò'o kònini dhí, vínò tídhí nda ní abhò kíní àku nda kí lasí gò, vínò dré kutúzó, gò kíní nda ì dré abízó tití.

³⁸Ásà dhí, à adré vínò tídhí ro dhí ní da kíní tídhí ro dhí i léna.

³⁹Túmání ába dhí, dhya àlo vínò àku ró dhí ní mvùlepi dhí gò ína vínò tídhí ro dhí ní le mvùle ko na. Àngyá ko, adré tàá dhí: «Vínò àku ró dhí adré kínílé tídhí ro dhí ní lavú. »»

Lükà 6

Yésu Míriù sàbátù àdhya 'í
(À kònò kpà Mâtayò 12:1-8; Márokò 2:23-28)

¹Sàbátù àlo dhí, Yésu ì adré tá lavulé amvú ngánò àdhya i 'ásè. Di akódhí ní lebèbhá ì dré kidhózó adrélé ngánò lò'wa vu, adrészó nyìá àyi drígá, adrészó tsìá.

²Gò Fàrisayò àruka ì dré tàzoá àyi dré dhí: «Mì adré àmikya tà àma kí tátrítrí kúlí dré adrélé logálé sàbátù tú dhí ní 'o àdho tà sè? »

³Di Yésu logó àyi dré dhí: «Mì nà rè tòdzí tà Dàwídì dré tá 'ole ì dré adrérà'a tòbirí íbe akódhí ní arúpi íbe dhí 'á dhí ko?

⁴Akódhí fí tá Gìká ní dzó kàdrì na, mápà fèlé Gìká dré dhí ní adó nyàle gò, dré kpà fèzoá áyì arúpi i dré nyàle. Tákò àma kí tátrítrí kúlí adré tá ína mápà nda ní nyàma logá àyi dré. Ngbà 'í kòwánà kí tá kitswá nyàá dhí àyi. »

⁵Di Yésu gò tàá àyi dré dhí: «Móndí ní Mvá, Míriù sàbátù àdhya 'í. »

Yésu tidri' agó àlo dhí sàbátù tú
(À kònò kpà Mâtayò 12:9-14; Márokò 3:1-6)

⁶Sàbátù àzya tú dhi, Yésu dré fízo Yúdà ànzì kí lísámbò dzó na gò, adrélé móndí kí tadhá. Kònàle dhi, agó àlo dríágó ní dré 'yòzo 'yo'yò dhi tá be.

⁷Fàrisayò i tátrítrí kúlí tadhábhá íbe dhi i adré tá tà i dré kitswázó Yésu ní asíkì ásà dhi ní nda. Dí i adré tá akódhi ní mì ga, nòzoá ngalè akódhi ní agó nda ní tiidri sàbátù tú yà dhi.

⁸Dí, Yésu dré ína tà i dré tá adrélé kisùle nda kí nìzo kyá gò, tazoá agó drígá be à'yo ró nda dré dhi: «Mí nga ámi totó móndyá tití dhi kí kító 'á. » Dí akódhi nda dré ngàzo àyi totó.

⁹Gò Yésu dré tazoá àyi dré dhi: «Má adré lizíá àmí tí dhi: Àma kí tátrítrí kúlí adré tà ángùdhi ní ka'i sàbátù tú dhi kòdhya: adrélé tà dóro 'o dhi, kó ngalè adrélé tà kònzi 'o dhi? Adrélé móndí tiidri dhi, kó ngalè adrélé móndí pfu dràle dhi? »

¹⁰Dí Yésu dré móndyá í làgásè kúrú nda kí nòzo tití gò, tazoá agó nda dré dhi: «Mí kidzì ámi drígá. » Akódhi dré kidzìzoá gò, drígá ní nda dré adrízó.

¹¹Dí àyi nda kí togó dré aswázó lavulé gò, i dré ngàzo adrélé tà ta àyi kòfalésè, nìzoá ngalè i ní 'òá Yésu ní tà sè ngíni ya dhi.

Yésu kipè móndí́ mudrí-drì-rì dhi i adrélé àpóstolò i ró

(À kònò kpà Mátayò 10:1-4; Márokò 3:13-19)

¹²Kítú nda kí àlo sè dhi, Yésu dré lìzo mbàle kòngó àlo drìna gò, tà ta Giká be ngá wàle tà.

¹³Ngá kòwa dre dhi, dré àyi lebèbhá kí azízó gò, móndí mudrí-drì-rì dhi kí kipèzo àyi kòfalé, àyi kí zìzo àpóstolò i ró.

¹⁴Ayi nda i tá: Símónà (dré rú zile Pétéró dhi), adrúpi ní Andréyà, Yàkóbhò, Yòwáni, Filípò, Báràtòlòmáyò,

¹⁵Mátayò, Tòmá, Yàkóbhò Àlafayò ní mvá, Símónà (adrélé zile dhya àtsi ró àyi súrú ní tà sè dhi ró dhi),

¹⁶Yùdásì Yàkóbhò ní mvá, ìndì Yùdásì Ísikàràyótà (dra Yésu ní lefèlepi kàribhá i drígá dhi).

Yésu tiidrí móndí́ zyandre dhi i gò, tà tadházó àyi dré

(À kònò kpà Mátayò 4:23-25)

¹⁷Yésu i kàsí àyi nda íbe kòngó nda drilésè dre dhi, akódhi dré àyi kikízó àrà kpàkpà na. Móndí zyandre lavulé adrébhá akódhi ní lebè dhi i tá kònàle, túmání móndí lizolízo angábhá bvò wáyi Yùdáyà àdhya lésè, Yérusalémà lésè, ìndì bvò yíandre mile, Tírè i làga Sídónà be dhi lésè dhi íbe.

¹⁸I alà tá kitswálé Yésu ní yi, kòtidríró kpà àyi àyi kí drà i lésè be dhi bvó. Móndí tirí kònzi i dré tá adrélé lagùle dhi i alà tá kpà gò, Yésu dré adrézó àyi kí tiidri.

¹⁹Dí móndyá zyandre tití nda i adré tá láti nda kitswázó akódhi ní tabè. Tàko ko, rinyí adré tá apfòle lásà, adrélé àyi kí tiidri tití.

Tà adrészó lenzélé ásà dhi i

(À kònò kpà Mátayò 5:1-12)

²⁰Gò Yésu dré mì bhèzo áyi lebèbhá i véna, tazoá dhi: «Kólénzé àmi adrébhá lemerè ro ni i dré. Tako ko, Giká ni Òpì àmikya 'i!

²¹Kólénzé àmi adrébhá tòbirí íbe nyànomvá ni i dré. Tako ko, mì ni ngá nya pìzo! Kólénzé àmi adrébhá àwó ngo nyànomvá ni i dré. Tako ko, mì ni arí gu!

²²Kólénzé àmi dré, móndí i kàdré togó kònzi bha àmi rú, adrészó àmi kí ga, adrészó àmi kí lodhá, adrészó àmi kí rú ta kònzi Móndí ni Mvá ni tà sè dhi.

²³Mì kàdré lenzélé lókyá nda sè, adrészó ngá to arí sè! Tako ko, làgí mûrungú adré àmi kí letè bhù na. Àyi kí tábhí i adré tá kpà pròfétà atú dhi kí 'o kònzi kònini. »

Tà adrészó kizà ro ásà dhi i

²⁴«Dì, kizà àmi kí ngá 'i, àmi ngábhá ró ni i. Tako ko, mì kisú àmikya tà àmi kí togó tindrilepi dhi dre!

²⁵Kizà àmi kí ngá 'i, àmi adrébhá ngá nya pìzo nyànomvá ni i. Tako ko, mì ni adré tòbirí íbe! Kizà àmi kí ngá 'i, àmi adrébhá arí gu nyànomvá ni i. Tako ko, mì ni àwó ngo, adrészó tongolé!

²⁶Kizà àmi kí ngá 'i, móndyá tití dhi i kàdré àmi kí rú ta doro dhi. Tako ko, àyi kí tábhí i adré tá kpà pròfétà atú kinzò ro dhi kí rú ta doro kònini! »

Dhyá kí kàribhá kí lèma

(À kònò kpà Mátayò 5:38-48; 7:12a)

²⁷«Dì, má adré mána tàá àmi adrébhá áma yi ni i dré dhi: Lè mì kàdré àmi kí kàribhá kí le. Mì kàdré móndyá adrébhá togó kònzi bha àmi rú dhi kí 'o doro.

²⁸Mì kàdré kpà tà taní zi Giká tí móndyá adrébhá àmi kí tatrí dhi i dri. Mì kàdré kpà tà zi Giká tí móndyá adrébhá àmi kí 'o kònzi dhi i dré.

²⁹Dhya àlo kòsa ámi kóbhólé àlo dhi dhi, mí kògò àzya ni ni alá akódhí dré kpà sàle. Dhya àlo kòtopá ámi kítá kidhì àdhyá dhi, mí kòtayí kpà akódhí ámi kítá agá lésè dhi ni do.

³⁰Mí kàdré ngá fe dhya ángùdhi adréléri ngá zi mí tí dhi dré. Dhya àlo kòkäri ámi ngá dhi, mí kògò zìá tíá ko.

³¹Mí kàdré tà 'o móndí i dré ngóró mì dré adréléri lèle i kò'o àmi dré dhi tini.

³²Mí kàdré ngbà 'í móndyá adrébhá àmi kí le dhi kí le kòdhya dhi, mì ni àdho tà doro kisú ásà kòdhya? Ndìndì tàkonzi bhá i adré móndyá adrébhá àyi kí le dhi kí le.

³³Mí kàdré ngbà 'í tà doro 'o móndyá adrébhá tà doro 'o àmi dré dhi i dré dhi, mì ni àdho tà doro kisú ásà? Ndìndì tàkonzi bhá i adré 'òá kònini.

³⁴Mí kàdré ngbà 'í ngá fe màri ró móndyá kîtswâbhá màri nda ni logó àmi dré dhi i dré dhi, mì ni àdho tà doro kisú ásà? Ndìndì tàkonzi bhá i adré ngá fe màri ró tàkonzi bhá àruka i dré, àyi nda i kògoró màri nda ni logó tití àyi dré be dhi bvó.

³⁵Dì, mì kàdré àmìkyà àmì kì kàribhá kì le, adrészó tà dório 'o àyi dré. Mì kàdré ngá fe àyi dré màri tà kisù àko ró. Dì mì ni làgí mûrúngú kisú ásà. Mì ni kpà adré Gìká kurú na bhù na dhì ni ànzì i ró. Tàko ko, akódhì adré áyi togó dório tadhá móndyá àwoyà nibhá tâle i dré ko dhì i dré, ìndì móndyá adrébhá tà kònzi 'o dhì i dré.

³⁶Mì kàdré dì móndí kì kizà bha, ngóró àmì kì Atá dré adrélè àmì kì kizà bha dhì tíni.
»

Mónđí ki tâbvó tâma

(À kònò kpà Mâtayò 7:1-5)

³⁷«Mì kàdré móndí kì tâbvó ta ko, Gìká kòtârò kpà àmì kì tâbvó ko. Mì kàdré tà bha móndí i dri ko, Gìká kòbhârò kpà tà àmì dri ko. Mì kàdré móndí kì tâkonzì tri, Gìká kàdrérô kpà àmì kì tâkonzì tri.

³⁸Mì kàdré ngá fe móndí i dré, Gìká kàdrérô kpà ngá fe àmì dré. A ni ngá ko, mùzoá, kosézóá gâle bî gò, dàzoá àmì kì kánzì na. Tàko ko, Gìká ni ngá ko fêle àmì dré, koma mì dré adrészó ngá ko fêle móndí àruka i dré ásà dhì sè. »

³⁹Yésu dré kpà tà àzya tâzo àyi dré kúlì alaala sè, tâzoá dhì: «Mì kùdúkùdu àlo dhì ni kîtswá tsì mì kùdúkùdu àzya se drile bwà? Kò'o kònini dhì, àyi rìti nda kì zakó tsì ledhé bhú na?

⁴⁰Dhya adrélè tadhálé dhì lavú dhya adrélèpi áyi tadhá dhì ko. Dì, dhya ángùdhi tà tadhálé i dré dhì kì nilepi tití dhì ni atsá ína dhya áyi tadhálèpi dhì tíni.

⁴¹Mí adré mína kayísá kórònyá mvá ámì adrúpi mína dhì ni no gò, adrészó fa gú mí mína dhì ni atógyà ko àdho tà sè?

⁴²Mí adré ámì 'o ngíni tâá ámì adrúpi dré dhì ‹Áma adrúpi, mí 'o má kàpéró kayísá kórònyá mvá mí milésè› dhì, tágba mí dré adrészó fa gú ámì tândi mína dhì ni no ko dhì? Mí túrúpfú lîyí 'i! Mí kàpè rè zyà fa gú nda mí milésè 'íká, gò mí kògòrò ngá no dra kîtswázó kayísá kórònyá mvá nda ni apè ámì adrúpi milésè ndò. »

Fa i lò'wa ni í be dhì

(À kònò kpà Mâtayò 7:16-20; 12:33-35)

⁴³«Fa dório 'a gâ lò'wa kònzi ko na. Fa kònzi 'a gâ lò'wa dório ko na.

⁴⁴À adré fa àlo àlo tití dhì kì ni àyi kì tândi kì lò'wa sè. À kì figì lò'wa kùtsí sîlé ko na. À kì kpà vínò lò'wa áyìdhá sîlé ko na.

⁴⁵Dhya dório adré tà dório 'o apfôle tà dório tití i dré zûle áyi togó na dhì i lésè. Di, dhya kònzi adré ína tà kònzi 'o apfôle tà kònzi tití i dré zûle áyi togó na dhì i lésè. Àngyá ko, akódhì ni ti adré tà adrélèpi gâle akódhì ni togó na dhì kì ta kòdhya. »

Dzó ni pá bhàma kí́ rà dri dhì

(À kònò kpà Mâtayò 7:24-27)

⁴⁶«Mì adré áma zi ‹Míri, Míri!› gò, adrészó tà má dré adrélè tâle àmì dré dhì kì 'o ko àdho tà sè?

⁴⁷ Má ní tadhá àmì dré ngalè dhya adrélépi alìle má vélé áma kúlí yi gò adrészó ka'íá 'ole dhi, sù àdhi tíni ya dhi.

⁴⁸ Akódhi nda sù ngóró agó àlo adrélépi tá dzó si gò, bhú ní ni dhìzo fìle fìfì, pá ní ni bhàzo kírà dri dhi tíni. Yí dré tìzo áyi tswa dzó nda rú dhi, kitswá ína dzó nda ní wu bwà ko, à dré sile tätä dhi sè.

⁴⁹ Di, dhya adrélépi áma kúlí yi gò adrészó ka'íá 'ole ko dhi, sù ngóró agó àlo dzó silepi bvò mònýá dri, pá ní ni bha àko ró kírà dri dhi tíni. Yí dré tìzo áyi tswa dzó nda rú dhi, dzó nda dré ndíri arízó aríarí gò, tà ní dré akízó nyínyí. »

Lúkà 7

Sòdá kí kàdrì ` àlo dhi ka'í Yésu báti

(À kònò kpà Mâtayò 8:5-13)

¹ Yésu kòtà tà nda i móndí zyandre i dré akílé dre dhi, dré gòzo lìle Kàpàràñàwúmà na.

² Kònàle dhi, Rómà kí sòdá kí kàdrì àlo dhi ni màrábà dré lèle tò dhi tá drà ro ànyíanyí dràdrà mìle.

³ Di sòdá kí kàdrì nda kòyi Yésu ni rúbí dre dhi, dré Yúdà ànzi kí bhàgo àruka kí mùzo Yésu ni ti lizí, kàliró áyi màrábà nda ni tìdrí.

⁴ Àyi nda i kòtsa Yésu véna dre dhi, i dré akódhi ni ti lizízó tà tändi ró, tázoo dhi: «Agó kòdhì kitswá mí dré lìzo akódhi ni màrábà tìdrí.

⁵ Tako ko, akódhi lè àma kí súrú tò. 'O kpà àma kí lìsámbò dzó sile dhi nì. »

⁶ Di Yésu dré ngàzo adrélé lìle àyi íbe. Dré adréra'a 'ole tsàle dhi 'á dhi, sòdá kí kàdrì nda dré áyi arúpi kí mùzo tàá drá dhi: «Míri, mí lagù mí ko. Má kitswá mána ámi lìndrì sè ko. Má kitswá ndìndì mí dré afízó áma dzó lé dhi ko.

⁷ Má nò tá kpà dhi, má kitswá tá lìle mí véna ko. Di, mí kòtà ndíri kúlí àlo gò, áma màrábà kàdriró.

⁸ Tako ko, áma tändi, ma áma kàdrì kí rìnyí zàle. Ma kpà sòdá íbe má zàle. Má kàdré tàá àyi ki àlo dré dhi <Mí lì!> dhi, adré lìle. Má kàdré tàá àzya ni dré dhi <Mí alì!> dhi, adré alìle. Má kàdré kó tàá áma màrábà dré dhi <Mí 'o tà kòdhì!> dhi, adré 'òá. »

⁹ Di Yésu kòyi tà nda dre dhi, akódhi ni líndrì dré gàzo agó nda ní tà sè. Dré áyi alázó tàá móndí zyandre adrébhá áyi lebè dhi i dré dhi: «Má adré tàá àmì dré dhi: Má kisú rè dhya àlo adrélépi tà ka'ika'i íbe kònini dhi ìsérélè ànzi i kòfalé ko. »

¹⁰ Di dhya mûle nda i kògò tsàle bhà na dre dhi, i dré kisúzóá dhi, màrábà nda adrí dre.

Yésu tingá tàyí` tòkó àlo dhi ni mvá dràdrà lésè

¹¹ Àmvolásà dhi, Yésu dré ngàzo adrélé lìle bhàandre àlo rú be Nayínà dhi na. Akódhi ni lebèbhá i móndí zyandre lavúlé dhi íbe dhi i adré tá lìle túmání akódhi be.

¹²Ì kòtsa ànyi bhàandre nda ni zèribàti dre dhi, à adré tá àbvò àlo dhi ni adó apfòzo ába lile mógo na. Dhya dràlepi nda tá tàyítòkó àlo dhi ni mváagó àlo kwákwá dhi 'i. Móndí zyandre lavulé bhàandre nda lésè dhi ì adré tá alile túmání tòkó nda be.

¹³Dì Míri kònò akódhi dre dhi, dré kizà dòzo áyi togó na akódhi ni tà sè gò, tazoá drá dhi: «Mí tayí àwó. »

¹⁴Dré áyi kisízó ànyi sereké tabè. Gò dhya adrébhá tá àbvò nda ni adó dhi ì dré àyi ki kikízó. Dré tazoá dhi: «Kàdhúrà, má adré tåá mí dré dhi, mí nga kuru! »

¹⁵Dì dhya dràlepi nda dré ngàzo lirilé gò, kidhólé tà ta. Gò Yésu dré akódhi ni logózó andre ni drígá.

¹⁶Dì tirì dré móndyá tití nda ki rùzo gò, ì dré ngàzo adrélé Gìká ni rú bha kùle, adrészó tåá dhi: «Pròfétà kàdrì dhi apfò àma kòfalé dre! Gìká atsá ína áyi móndyá ki lomí! »

¹⁷Gò Yésu ni rúbí nda dré la'úzó bhà tití àyi làgásè dhi ì 'ásè, ìndì Yúdà ànzì ki bvò wáyi 'ásè.

Yòwáni` Bâtísímò fèlepi amù móndi` i Yésu vélé

(À kònò kpà Màtayò 11:2-19)

¹⁸Àmvolásà dhi, Yòwáni ni lebèbhá ì dré tà tití Yésu dré tá adrélé 'ole nda ki titízó drá. Gò Yòwáni dré áyi lebèbhá rì dhi ki azízó¹⁹ mûle lile Míri véna, kitswálé akódhi ni lizí tazoá dhi: «Mí Mèsiyà adrélépi tá alile dhi 'i? Kó ngalè, mà kàdré dhu rè dhya àzya ni letè? »

²⁰Dì àyi nda ì kàtsá Yésu vélé dre dhi, ì dré tazoá drá dhi: «Yòwáni Bâtísímò fèlepi amù àma ámi lizí: «Mí dhya adrélépi tá alile dhi 'i. Kó ngalè, mà kàdré dhu rè dhya àzya ni letè kòdhya? »»

²¹Gbà lókyá nda sè dhi, Yésu dré móndí bì dhi ki tindrízó àyi ki drà ì lésè, ìndì àyi ki rúbháaswa ì lésè. Dré kpà tirí kònzi ki dròzo topfòle móndí bì dhi ì lésè. Dré kókpà mi kùdükùdu bì dhi ki mi nzìzo.

²²Gò dré logózóá dhya amùle nda ì dré dhi: «Mí gò tà mi dré nôle ìndì mi dré yile kònì ki tití Yòwáni dré: Mí kùdükùdu ì adré ngá no, mèrèkpè ì adré atsí to, móndí kàrì dré rùle dhi ì adré adrílé, móndí bíbhálé be kùdükùdu ró dhi ì adré tà yi, móndí dràbhá dre dhi ì adré angálé dràdrà lésè, ìndì à adré Rúbí Tani longó lemerèbhá ì dré.

²³Kolénzé dhya ángùdhi dra dhèlepi áma tà sè ko dhi dré! »

²⁴Dhya Yòwáni dré amùle nda ì kòlì dre dhi, Yésu dré kidhózó adrélé Yòwáni ni tà ta móndyá zyandre ì dré, adrészó tåá dhi: «Mí li tá duku na àdho no? Mí li kòzó lyà dré tå adrélé vile dhi ni no?

²⁵Mí li tá àdho no? Mí li móndí kítá aveave asólépi ì rú dhi ni no? Mí yi rè ká! Móndí adrébhá kítá làgí be kàdrì dhi ki tosó, adrészó ngá dò nya dhi ì àyikya ópí ki dzó kàdrì ì 'ásè be.

²⁶Mì lì tá dì àdho no? Mì lì pròfétà ni no? Àyíya! Má adré tàá àmì dré dhi: Yòwánì nda lavú pròfétà byá.

²⁷Tàko ko, akódhì dhya tà kònìdhì ni tisìzo tà ni dri Gìká ni Kúlí na dhi 'i: «Mí nò ká! Má ni dhya dra áma kúlí longolépi dhi ni mu lìle mí kandrána. Akódhì nda ni láti ledé mí dré mí kandrána. »

²⁸Má adré tàá àmì dré dhi: Móndyá tití tòkó dré tìle dhi i kòfalé dhi, dhya àlo kàdrì Yòwánì nda ni lavulépi dhi yókódhó. Dì, tágba dré adrészó kònìnì dhi, dhya tàko lavulé Gìká ni Òpì na dhi lavú ína akódhì.

²⁹Móndyá tití, ndìndì mèdáyì lagíbhá, Yòwánì ni kúlí yibhá dhi i nò tá Gìká ni tà nda gyägya gò, i dré bátísímò dòzo Yòwánì véna.

³⁰Dì, Fàrisayò i tátrítrí kúlí tadhábhá íbe dhi i gá tá àyikya tà Gìká dré tá lèle 'ole àyi dré dhi gò, i dré kpà bátísímò dòma Yòwánì véna dhi ni gázo.

³¹Dì má ni kítswá móndyá ándrò kònì kí tà tadhá àdho ngá rú? Àyi nda i sù àdhibhá i tíni?

³²I sù ngóró ànzimvá liríbhá ngá lagírà na, adrélé kúlí loyó àyi kòfalésè dhi i tíni. I adré loyóá dhi: «Mà tswà lärí àmì dré wóyá, mì to àmikya lärí nda ko. Mà ngo àwó longó wóyá, mì ngo àmikya àwó ko. »

³³Tàko ko, Yòwánì Bátísímò fèlepi nda dré alìzo dhi, nya tá mápà ko, mvu kpà vínò ko gò, mì dré adrészó tàá dhi: «Akódhì tirí kònzi íbe i léna. »

³⁴Dì, ma, Móndí ni Mvá, má dré alìzo dhi, má adré mána ngá nya, adrészó kpà ngá mvu gò, mì dré adrészó tàá dhi: «Dhya kòdhì kòvongbolo líyí 'i, wá lìtsí líyí 'i, iindì mèdáyì lagíbhá kí arúpi tàkonzìbhá íbe dhi 'i! »

³⁵Dì, à adré Gìká ni tògyá no gyägya, móndyá adrébhá tògyá nda ni ka'i dhi i rú. »

Tòkó àlo zàràbhù ro dhi dà málásì` Yésu pá

³⁶Kítú àlo dhi, Fàrisayò kí àlo zi tá Yésu lìle ngá nya i bhàna. Yésu dré tsàzo fíle Fàrisayò nda ni dzó na gò, lirílé míssá làga.

³⁷Dì tòkó àlo tàkonzì líyí ro adrélépi bhàandre nda 'á dhi kòyi Yésu adré tá ngá nya Fàrisayò nda bhàna dhi dre dhi, dré alìzo mòlàngì mvá ledélé àlábásterè sè, gàlepi málásì sè bì dhi be.

³⁸Dré áyi kisizó ànyi Yésu àmvolésè akódhì ni pá làga. Gò dré ngàzo adrélé ngòle, adrélé mìndra da akódhì pá, adrészó pá ni kí atrì áyi drìbhí sè, adrészó pá nda kí kamú gò, adrészó málásì da driá.

³⁹Dì Fàrisayò Yésu ni azilépi nda kònò tà nda dre dhi, dré dhèzo adrélé kisùá i léna dhi: «Kònò dhya kònìdhì kàdré tá pròfétà 'i báti dhi, a ni tá nià ngalè tòkó adrélépi áyi tabè ni àdhi 'i ya, iindì adré atsílé ngíni ya dhi be. Àngyá ko, akódhì tàkonzì líyí 'i. »

⁴⁰Gò Yésu dré tazoá Fàrisáyò nda dré dhi: «Sìmónà, ma tà íbe tâle mí dré. » Sìmónà nda tà dhi: «Tadhálépi, mí tà wà. »

⁴¹Dì Yésu tà dhi: «Móndí rì dhi ì do tá làfa agó àlo adrélépi làfa fe màri ró dhi véna. Àlo ni tá màri íbe làfa lò'wa kámá-nzi agó nda véna. Àzya ni tá màri íbe làfa lò'wa nyadhi-rì-drì-mudrì.

⁴²Àyi riti nda ì dré kitswálé màri nda kí logó bwà ko dhi sè dhi, agó nda dré màri àyi rú dhi kí tà tayízó. Dì àyi kòfalé dhi, dhya ángùdhi ní agó nda ní le lavulé dhi nì? »

⁴³Sìmónà logó drá dhi: «Má adré kisùá dhi, dhya adrélépi tá màri kàdrì lavulé dhi íbe í rú gò, agó nda dré tà ní ní tayízó dhi 'ì. » Yésu tà drá dhi: «Mí kisù kyá. »

⁴⁴Gò dré àyi alázó tòkó nda vélé gò, tàá Sìmónà dré dhi: «Mí adré tòkó kònìdhi ní no? Má dré afízó ámi dzó 'á dhi, mí afè tá má dré yí áma pá dzìzo dhi ko. Dì, akodhì dzì ína áma pá áyi mìndra sè gò, àyi kí atrìzo áyi drìbhí sè.

⁴⁵Mí kamú tá ma ko. Dì, kidhólé má dré afírà lésè dhi, akodhì tayí ína áma pá kí kamuma ko.

⁴⁶Mí dà tá dò má dri ko. Dì, akodhì dà ína mìlásì má pá.

⁴⁷Dì má adré tàá mí dré dhi: À trì akodhì ni tàkonzì zyandre dhi ì dre. Ásà dhi, adré àyi lèle kàdrì dhi ní tadhá má dré. Dì, dhya ángùdhi tàkonzì ní ní trizo tsà dhi adré ína áyi lèle tadhá tsà. »

⁴⁸Gò Yésu dré tazoá tòkó nda dré dhi: «À trì ámi tàkonzì ì dre. »

⁴⁹Dì móndyá adrébhá tá mísá làgásè túmání akodhì be dhi ì dré dhèzo adrélé tàá àyi kòfalésè dhi: «Dhya kòndi tá àdhi 'ì, adrélé ndìndì tàkonzì tri nì? »

⁵⁰Dì, Yésu dré gòzo tàá tòkó nda dré dhi: «Ámi tà ka'ika'ì tìdrí mí dre. Mí lì togó be kìdríkìdrì. »

Lúkà 8

Tòkó adrébhá tá Yésu ní lebè dhi ì

¹Àmvolásà dhi, Yésu dré ngàzo adrélé tatsílé bhàandre ì 'ásè ìndì bhà tsàtsà ì 'ásè, Rúbí Tani Gíká ni Òpì àdhya ni longóbe móndí i dré. Akodhì ni lebèbhá mudrì-drì-rì dhi ì tá kpà túmání akodhì be.

²Tòkó àruka dré tá tìrì kònzi kí dròzo àyi lésè dhi ì, ìndì àyi dré tá tìdrílé drà lésè dhi ì tá kpà túmání akodhì be. Àyi nda i tá: Màríyà (adrélé zìle Màríyà Mágàdàlénè, dré tìrì kònzi nzi-drì-rì dhi kí dròzo topfòle lásà dhi),

³Yòwánà (Kúzà, ópí Èródè ni dzó ní tà kí likílépi dhi ní tòkó), Sùsánà, tsàle tòkó àruka bì dhi íbe. Ì adré tá Yésu ní ledé akodhì ní lebèbhá íbe àyi kí ngá sè.

Pí` dhi` gó agó kóri` ri` lepi dhi ní tà dri dhi
(À kònò kpà Mátáyò 13:1-9; Márokò 4:1-9)

⁴Kítú àlo dhi, móndí zyandre lavúlé angábhá bhàandre twátwa i lésè dhi i alì tá ru kímó Yésu làga gò, akódhì dré pídhígó kònìdhì ni pìzo, tazoá dhi:

⁵«Kitú àlo dhi, agó àlo dhi pfò tá lile kórì rì áyi amvú na. Dré tá adrérà'a kórì rì dhi 'á dhi, kórì àruka i ledhé tá láti mìle gò, atozóá gò, arí i dré tetézóá tití.

⁶Kórì àruka i ledhé tá kírà dri gò, i dré apfòzo ndiri 'yole, àyi ki kídrì dré yí kisulé ko dhi sè.

⁷Kórì àruka i ledhé tá kùtsí kòfalé gò, kùtsí nda dré mbàzo ába àyi ki amó.

⁸Di, kórì àruka i ledhé tá àyikya kìní dóro dri gò, i dré apfòzo mbàle lò'wa 'a dóro. Àyi àlo àlo tití dhi i 'a lò'wa nyadhi-nzi. » Yésu kòtà tà nda dre dhi, dré yòzoá dhi: «Dhya ángùdhi adrélipi bíbhálé íbe tà yìzo dhi koyi. »

Yésu ngi tà i` dré adrészó tà ta móndi` i dré pi` dhi` gó sè dhi ni àndu

(À kònò kpà Mátayò 13:10-17; Márokò 4:10-12)

⁹Àmvolásà dhi, Yésu ni lebèbhá i dré lizizóá akódhì tí, ngalè pídhígó nda adré tá lèá tâle ngíni ya dhi.

¹⁰Di dré logozóá àyi dré dhi: «Giká fè àmi dré tògyá áyi Òpi ni tà lùzu ró dhi ki nìzo. Di, móndyá àruka tití i dré dhi, má adré tà ta pídhígó sè kítswálé: «i kàdré gba ngá no yà dhi, i kàdréró ngá nda ki no dóro ko, indì i kàdré gba tà yi yà dhi, i kàdréró tà nda ki àndu ni ko. » »

Yésu ngi pi` dhi` gó agó kórì` ri` lepi dhi ni tà dri dhi ni àndu

(À kònò kpà Mátayò 13:18-23; Márokò 4:13-20)

¹¹Di Yésu gò tàá àyi dré dhi: «Pídhígó nda ni àndu kònìdhì 'i: Kórì rile nda, Giká ni kúlì 'i.

¹²Móndí àruka i adré kúlì nda ni ka'i ngóró kórì rile ledhélé láti mìle nda i tini. I kòyi kúlì nda dre dhi, Dzáborò adré ndiri atsálé kúlì nda ni tingá àyi ki togó lésè, i kòka'iró adrízó ko dhi bvó.

¹³Móndí àruka i adré Giká ni kúlì ka'i ngóró kórì rile ledhélé kírà dri nda i tini. I kòyi kúlì nda dre dhi, i adré ndiri ka'íá arí sè. Di, i dré adrélé kúlì nda ni tayí adrélé tìle àyi ki togó na ko dhi sè dhi, i adré ngbà 'í ka'íá lókyá tsà sè. Lókyá tà dré adrészó àyi ki tabhì dhi kàtsá dre dhi, i adré àyi ki tà ka'íka'i nda ni tayí.

¹⁴Móndí àruka i adré Giká ni kúlì ka'i ngóró kórì rile ledhélé kùtsí kòfalé nda i tini. I kòyi kúlì nda dre dhi, gí ko, tà adrébhá àyi ki togó 'o lanzile dhi i, ngá lovó, indì lovó kònzi twátwa lídrì kònđi àdhya i adré kúlì nda ni amó gò, i dré adrészó li'wálé ko, adrészó kpà lò'wa 'a ko.

¹⁵Di, móndí àruka i adré àyikya Giká ni kúlì ka'i ngóró kórì rile ledhélé kìní dóro dri nda i tini. Àyi nda i adré kúlì nda ni yi togó be gyägya indì dóro, adrészó trôle rúá gò, adrészó lò'wa 'a dóro landè àko ró. »

Tà tadhálé tálà ni tà rú dhi

(À kònò kpà Márokò 4:21-25)

¹⁶Yésu gò tàá dhi: «À dhì gà tálà bhàle lìdrí zàna yà, kó ngalè lángá zàna yà dhi ko na. Be ró dhi, à adré dhiá bhàle zá kuru mísa drìna, kitswálé móndyá tití adrébhá afilé dzó lé dhi ì kàdréró ngádra no be dhi bvó.

¹⁷Tàko ko, à ni tà tití zùle zùzù dhi kí 'o apfòle ngádra 'á. À ni kpà tà tití lùzu ró dhi kí 'o móndí ì dré nile doro.

¹⁸Dì ásà dhi, lè mì kàdré àmi kí likí adrélé tà yi doro. Ángyá ko, dhya ángùdhi tà nilepi bì dhi dré dhi, à ni tà dré nile nda kí drì timbà. Dì, dhya ángùdhi tà nilepi ko dhi dré dhi, à ni ndindì tà tsà dré kisùle nile dhi ni tingá. »

Yésu ni andre i adrúpi ni i' be dhi

(À kònò kpà Mátayò 12:46-50; Márokò 3:31-35)

¹⁹Gò Yésu ni andre i adrúpi ni i'be dhi ì dré alìzo kitswálé akodhi ni no dhi bvó. Dì, móndí zyandre dhi kí tà sè dhi, ì kitswá tá atsálé rúá bwà ko.

²⁰Gò tazoá drá dhi: «Ámi andre i ámi adrúpi i'be dhi ì adré àyi kí totó kivì na. Ì adré ámi le nôle. »

²¹Dì, Yésu dré logozóá dhi: «Áma andre i áma adrúpi i'be dhi i, dhya adrébhá Giká ni kúlì yi gò ì dré adrészó ka'iá 'ole dhi 'i. »

Yésu kíki' lya' andre

(À kònò kpà Mátayò 8:23-27; Márokò 4:35-41)

²²Kítú àlo dhi, Yésu tà tá áyi lebèbhá ì dré dhi: «Mà kòzya tápáríandre ni ta'a na. » Dì ì dré tombàzo bwátù na gò, ì dré kidhózó adrélé zyàle.

²³Ì dré tá adrérà'a zyàle dhi 'á dhi, Yésu dré dhèzo adrélé ayí ko. Gbă kòdhwa, lyàandre gú dhi dré ngàzo adrélé vile tápáríandre nda mi. Yí dré ngàzo adrélé gàle bwátù na gò, bwátù nda dré adrészó 'ole arilé. Àyi tá ànyiànyi dràdrà mìle.

²⁴Gò akodhi ni lebèbhá nda ì dré àyi kí kisizó ànyi làgá, akodhi ni toró tazoá dhi: «Míri, Míri, mà adré dràle! » Dì Yésu dré ngàzo ligílé lyàandre nda dri yí adrélépi ru kägbá nda be gò, ì dré rìzo gò, ngá dré gózo bhùle ndiii.

²⁵Dì Yésu dré áyi lebèbhá kí lizizó tazoá dhi: «Àmi kí tà ka'ika'i ángwà? » Tirì dré gàzo àyi léna bì gò, àyi kí líndrí dré gàzo bhwàbhwa. Dì ì dré adrészó lizíá àyi kòfalésè dhi: «Dhya kòndi tá ína àdhi 'i, adrélé ndindì tolí fe lyàandre i dré yìandre be gò, ì dré adrészó akodhi ni kúlì ka'i 'ole ni? »

Yésu tìdrí' agó àlo tiri' kònzi i' be i' léna dhi

(À kònò kpà Mátayò 8:28-34; Márokò 5:1-20)

²⁶Ì kòzya tápáríandre nda ni ta'a na dre dhi, ì dré tsàzo bvò Gérásà kya na. Bvò nda bvò Gàlliyà àdhya tápáríandre nda ni ta'a lésè dhi kandrá.

²⁷Yésu kàsí bwátù lésè dre dhi, agó àlo tiri' kònzi i'be i' léna dhi dré alìzo kitswálé ru kisú akodhi be. Akodhi nda angá tá bhàandre àlo ànyi àyi làga dhi lésè. Dì, lókyá be vwàvwà ro dhi, asó tá vélé kítá ko, ayí kpà vélé dzó na ko. Adré tá ína ayílé mógo 'ásè.

²⁸Dì kònò Yésu dre dhi, dré ngàzo trèle, adhézó akódhi pá gò, yòá kúlí 'u'ù sè dhi: «Yésu, Gìká kurú na dhi ní Mváagó, àma kòfalésè mí be dhi, àdho tà 'i? Má adré ngôle mí rú, mí kò'oró ma kònzi ko! »

²⁹Tà tá kònini tåko ko, Yésu tà tá tirí kònzi nda dri dhi, kòpfò agó nda lésè. Àngyá ko, vésè be bï, tirí kònzi nda adré tá akódhi ní ru. Tágba à kàdré akódhi ní drígá kí ti'í pá ní íbe nyìri sè, adrészó akódhi ní likí dóro yà dhi, akódhi adré tá nyìri nda kí tikí gò, tirí kònzi nda dré adrészó akódhi ní tikpó lile duku na.

³⁰Gò Yésu dré lizízoá tíá dhi: «Ámi rú àdhi? » Akódhi logó drá dhi: «Áma rú «Zyandre». » Tà tá kònini tåko ko, tirí kònzi zyandre dhi i tifí tá akódhi léna.

³¹Dì tirí kònzi nda i dré dhèzo adrélé ngôle Yésu rú, kòmùró àyi lile bhú kùdù àko dhi na ko.

³²Àyi làgana kònani dhi, tìgá kí pârí andre adré tá ngá nya kòngó drîna. Dì tirí kònzi nda i dré Yésu ní ti lizízo, kòtayíró àyi lile tiflé tìgá nda i léna. Gò Yésu dré ka'izoá.

³³Dì tirí kònzi nda i dré topfôzo agó nda lésè, lile tiflé tìgá nda i léna. Gò tìgá nda i dré ndîzo tití kòngó nda ní gòloko 'ásè, ledhélé tâpârìandre na, yi mvu gò, todràzo.

³⁴Dì tìgá nda kí likibhá i kònò tà lavûlépi nda dre dhi, i dré ngàzo râle rúbí ní ní longóbe bhâandre na ìndì gbâbhú 'ásè.

³⁵Gò móndí zyandre dhi i dré apfôzo tà lavûlépi nda ní no. I kàtsá Yésu vélé dre dhi, i dré agó tirí kònzi kí dròzo topfôle lásà nda ní kisúzó, adrérà'a lirilé Yésu làga. Akódhi tá kítá íbe i rú ìndì tà kisükisù íbe dóro. Dì tiri dré àyi kí 'ozo lavûlé.

³⁶Gò dhya tà nda ní nobhá mì sè dhi i dré agó tá tirí kònzi íbe nda adrí tá ngíni ya dhi ní titízo àyi dré.

³⁷Dì móndí zyandre tití bvò Gèrásà kya nda 'á dhi i dré Yésu ní ti lizízo, kòngaró àyi kí bvò 'ásè, tiri dré gâle àyi léna bï dhi sè. Dì Yésu dré mbâzo bwâtù na kîtswâlé lile dhi bvó.

³⁸Gò agó tirí kònzi kí dròzo topfôle lásà nda dré Yésu ní ti lizízo, i kòlîrò túmâni. Dì, Yésu dré ìna akódhi ní logózó, tâzoá drá dhi:

³⁹«Mí nzi mí bhâna, ìndì mí tití tà tití Gìká dré 'ole mí dré dhi i móndí i dré. » Dì agó nda dré ngàzo lile tà tití Yésu dré 'ole i dré dhi kí longóbe bhâandre nda 'ásè tití.

Yésu tidri' tokó àlo dhi, i`ndi` tingá Yàyírò ní mvátokó dràdrà lésè

(À kònò kpà Mâtayò 9:18-26; Márokò 5:21-43)

⁴⁰Yésu kâzyá tâpârìandre nda ní ta'á lésè agôle dre dhi, móndí zyandre adrêbhá tá akódhi ní letè dhi i dré akódhi ní ka'izo dôle àyi kòfalé dóro.

⁴¹Gò agó àlo rú be Yàyírò, Yûdà ànzì kí lîsâmbò dzó ní kâdrì kí àlo ró dhi, dré alîzo adhélé Yésu pá akódhi ní ti lizí, kòlîrò i bhâna.

⁴²Tàko ko, akódhì ni mvátòkó àlo kwákwá, adrélépi kóná íbe ànyíànyí mudrí-drì-rì dhì tá ànyí dràdrà mìle. Di Yésu ì dré tá adrérà'a lìle dhì 'á dhì, móndí zyandre dhì ì adré tá akódhì ni amó, adrészó àyi kì tribe rúásà.

⁴³Di àyi nda i kòfalé dhì, tòkó àlo kàrì dré adrészó ràle rúásà kóná be mudrí-drì-rì dhì tá be. Akódhì nda kizá tá ngá í drígásè akilé tití kódzó ì dré wóyá. Di, dhya àlo kitswá tá akódhì ni tìdrí bwà ko.

⁴⁴Di dré áyi kisízó ànyí Yésu àmvolésè gò, akódhì ni kítá ti tabè. Gbă kòdhwa, kàrì adrélépi ràle rúásà nda dré akízó.

⁴⁵Gò Yésu dré lizízóá dhì: «Àdhì tabè ma nì? » Di móndyá tití nda ì dré adrészó tàá dhì, ì 'o tá tà nda àyi ko. Gò Pétéró dré tázooá dhì: «Míri, móndyá zyandre kònì ì adré ámi gàrà kì kúrú, adrészó àyi kì tribe mí rúsè. »

⁴⁶Di, Yésu gò ína tàá dhì: «Dhya àlo tabè ma 'í. Tàko ko, má atógyà má rú dhì, rinyí pfò má lésè dre. »

⁴⁷Di tòkó nda kònò, í kitswá vélé áyi zu bwà ko dhì dre dhì, dré alìzo lyabe tirì dré adhélé Yésu pá. Dré titízóá móndyá tití i kandrá dhì, í tabè tá akódhì àdho tà sè ya, ìndì í adrí gbă lókyá nda 'á ngíni ya dhì.

⁴⁸Di Yésu dré tázooá drá dhì: «Áma zapi, ámi tà ka'ika'i tìdrí mi dre. Mí lì togó be kìdríkìdrí. »

⁴⁹Yésu dré rè dhu adrérà'a tà ta dhì 'á dhì, dhya àlo angálépi Yàyírò, lìsámbò dzó ni kàdrì nda bhàlésè dhì dré atsázó tàá drá dhì: «Ámi zapi drà dre. Mí kògò adrélé dhya tà tadhálépi dhì ni lagù ko. »

⁵⁰Di, Yésu kòyi tà nda dre dhì, dré tázooá Yàyírò dré dhì: «Mí ro ngá ko. Mí kòka'i ngbà 'í ka'ika'i gò, akódhì kàdríró. »

⁵¹Yésu kòtsa Yàyírò bhàna dre dhì, dré móndí àzya ka'izo file í be dzó nda na ko. Ka'ì ngbà 'í Pétéró, Yòwánì, Yákóbhò, tsàle mvátòkó nda ni atá i andre ni be dhì i kòdhya.

⁵²Móndyá tití dzó nda 'á dhì ì adré tá àwó ngo, adrészó tongólé mvámvá nda ni tà sè. Di, Yésu dré tázooá àyi dré dhì: «Mí tayí àwó. Àngyá ko, akódhì drà ko. Adré ína ayí ko. »

⁵³Gò ì dré dhèzo adrélé akódhì ni gu, ì dré nìle mvámvá nda drà tá báti dhì sè.

⁵⁴Di, Yésu dré akódhì ni drígá rùzo gò, tázooá kúlì 'u'u sè dhì: «Mvámvá, mí nga! »

⁵⁵Gbă kòdhwa, akódhì ni lídrì dré agòzo gò, dré ngàzo kuru. Gò Yésu dré tázooá dhì, ì kòfè drá ngá nyàle.

⁵⁶Di mvámvá nda ni atá i andre ni be dhì kì líndrì dré gàzo bhwàbhwa. Di, Yésu dré lazízóá àyi dri dhì, ì kòlongó tà ru 'olepi nda dhya àlo dré ko.

Lúkà 9

Yésu tibhù áyi lebèbhá mudrí-drì-rì dhi i li`le àzí na

(À kònò kpà Màtayò 10:5-15; Márokò 6:7-13)

¹Àmvolásà dhi, Yésu dré áyi lebèbhá mudrí-drì-rì dhi kí azizó gò, rinyí fèzo àyi dré kitswázó tirí kònzi tití dhi kí dro móndí i lésè, ìndí kitswázó móndí kí tidrí àyi kí drà i lésè.

²Dré àyi kí tibhùzo lile Gìká ni Òpì ni tà longóbe, ìndí dràbhá kí tidríbe,

³tazoá àyi dré dhi: «Mì do ngá àlo atsí sè dhi ko. Mì kòdo kùtù fa 'i yà, kòmvò 'i yà, mápà 'i yà, làfa 'i yà, kó ngalè kítá agá lésè dhi ni àzya 'i yà dhi àmì rú ko.

⁴Dzó ángùdhi mì dré dra fízo lána dhi, mì kàdré ayílé kònàle tsàle kítú mì dré dra ngàzo bhà nda 'ásè dhi tú.

⁵Bhàandre ángùdhi dra àmì kí ka'izo dòle lána dóro ko dhi na dhi, mì kòpfò 'ásà, ìndí mì kòtowá tòpfulíndri àmì pásè tadházóá dhi, mì tayí àyi kí tà tití dre. »

⁶Gò Yésu ni lebèbhá nda i dré ngàzo adrélé tatsílé bhà àlo àlo i 'ásè, Rúbí Taní longóbe, ìndí móndí kí tidríbe àrà tití i 'ásè.

Ópi` Èródè ni drì abi` Yésu ni tà sè

(À kònò kpà Màtayò 14:1-12; Márokò 6:14-29)

⁷Lókyá nda sè dhi, Èródè adrélèpi tá ópí ro bvò Gàliláyà àdhya drìle dhi dré tà tití adrébhá ru 'o nda kí rúbí yìzo gò, akódhí ni drì dré adrézó abílé ásà. Tàko ko, móndí àruka i adré tá táká dhi, Yòwánì Bâtisimò fèlepi angá ína dràdrà lésè nì.

⁸Àruka ni i adré tá táká dhi, Èlìyà agá móndí i kandrá nì. Àruka ni i adré kó tá táká dhi, pròfétà atú dhi kí àlo angá dràdrà lésè nì.

⁹Di, Èródè dré tazoá dhi: «Áma tändi, má 'o Yòwánì ni drì lile dhi 'i. Di dhya má dré adrézó rúbí ni ni yi kòdhí àdhi 'i? » Gò dré adrézó Yésu ni nda nòle.

Yésu fè ngá nyàle móndí` ngùlù-nzi dhi i dré

(À kònò kpà Màtayò 14:13-21; Márokò 6:30-44; Yòwánì `6:1-14)

¹⁰Apóstolò Yésu dré tá tibhùle nda i kàgò dre dhi, i dré tà tití i dré 'ole dhi kí titízó drá. Gò akódhí dré àyi kí drìzo lìzo àyi pátí tsàle bhàandre rú zìle Bètèsàyídà dhi na.

¹¹Di, móndí zyandre dhi i kòyi tà nda dre dhi, i dré ngàzo lile akódhí vésè. I kòtsa akódhí véna dre dhi, dré àyi kí ka'izo dòle dóro gò, kìdhózó adrélé Gìká ni Òpì ni tà àyi dré, adrézó àyi adrébhá tá drà íbe dhi kí tidrí.

¹²Ìndró kàtsá ànyi dre dhi, akódhí ni lebèbhá mudrí-drì-rì dhi i dré àyi kí kisízó ànyi akódhí làga, táká drá dhi: «Áma àrà bhà àko dhi 'á. Mí kòfè di láti móndyá zyandre kònì i dré lìzo mányàngá nda àrà ayízó dhi íbe, bhà àma làgásè dhi i 'ásè ìndí gbàbhú 'ásè. »

¹³Di, Yésu logó àyi dré dhi: «Àmì kí tändi, mì fè ngá àyi dré nyàle dhi àmì. » I gò logóá dhi: «Áma ngbà 'i mápà íbe nzi ìndí kosyá íbe ri. Mí adré lèá dhi, àma kí tändi, mà kòlì mányàngá gi móndyá zyandre kònì i dré tití? »

¹⁴(Àngyá ko, àgo i tá ànyiànyi ngùlù-nzi àrà nda 'á.) Dì Yésu dré tázoo áyi lebèbhá i dré dhi: «Mì tukù àyi lirilé ngbungbu nyadhi-rì-drì-mudrí. »

¹⁵Dì lebèbhá ni i dré 'ozoá kònini gò, móndyá nda i dré lirizó tití.

¹⁶Dì Yésu kàdó mápà nzi nda i kosyá rì nda íbe dre dhi, dré mi tingázó kurú na bhùna, tà taní zizo Giká tí ngá nda i dri. Dré ngá nda ki toñozo lanzílé áyi lebèbhá i dré, i kòlanzíró móndyá zyandre nda i dré.

¹⁷Dì àyi tití nda i dré nyàzoá pízo. Gò akodhi ni lebèbhá i dré àmbí ni ki lokozó gàle kánzì mudrì-drì-rì dhi i sè bibi.

Pétéró tà ngádra 'á dhi, Yésu Mèsí́ yà 'í

(À kònò kpà Mátayò 16:13-20; Márokò 8:27-30)

¹⁸Kítú àlo dhi, Yésu adré tá tà ta Giká be kalóma. Akodhi ni lebèbhá i tá ngebà 'í akodhi làga àyi. Gò dré lizizóá àyi tí dhi: «Móndí zyandre dhi i adré ták dhi, ma àdhí 'í? »

¹⁹I logó drá dhi: «Móndí àruka i adré ták dhi, mi Yòwánì Bâtisimò fèlepi 'í. Àruka ni i adré ták dhi, mi Èlìyà 'í. Àruka ni i adré kó ták dhi, mi prôfétà atú dhi ki àlo angálépi dràdrà lésè dhi 'í. »

²⁰Yésu gò lizia àyi tí dhi: «Dì àmi ró dhi, mi adré àmikya ták dhi, ma àdhí 'í? » Pétéró gò logóá dhi: «Mì Mèsiyà Giká dré amùle dhi 'í. »

²¹Gò Yésu dré àyi ki logázó tà tändi ró, i kòlongóró tà nda dhya àlo dré ko.

²²Dré tázoo dhi: «Adré lèá dhi, Móndí ni Mvá kónya kizà lavulé, ìndì Yúdà ànzì ki bhàgo i, kòwánà kàdrì i, ìndì tátrítrí kúlí tadhábhá íbe dhi i kògà akodhi rè. Adré kpà lèá dhi, à kòpku akodhi dràle gò, kítú ni na sè dhi, Giká kòtingáró akodhi dràdrà lésè. »

Yésu ni lebèma

(À kònò kpà Mátayò 16:24-28; Márokò 8:34-9:1)

²³Bvóá dhi, Yésu dré tázoo móndyá tití dhi i dré dhi: «Dhya àlo kàdré lèá alile má vésè dhi, lè akodhi nda kòtayí áyi tändi ni tà, kàdré áyi fa kípakipa adó kítú àlo àlo tití gò, kàdréró áma lebè.

²⁴Tako ko, dhya ángùdhi adrélépi áyi tändi ni lídrì le tídrlé dhi, a ni áyi lídrì nda ni 'o avile. Dì, dhya ángùdhi adrélépi ína áyi lídrì fe áma tà sè dhi, a ni áyi lídrì nda ni tídri.

²⁵Àngyá ko, dhya àlo kòkisú ngá bvò kòndi àdhya i tití gò, áyi tändi ni tayizó avile dhi, akodhi nda kisú ína àdho tà doro 'í?

²⁶Dhya àlo kàdré kanyò ro áma tà sè ìndì áma kúlí ki tà sè dhi, Móndí ni Mvá ni kókpà adré kanyò ro akodhi nda ni tà sè, lókyá i dré dra agòzo áyi mìlanzilanzì na, áyi Atá ni mìlanzilanzì na, ìndì ángéló lolo kya na dhi tú.

²⁷Má adré tà bati ta àmì dré: Móndí àruka adrébhá àyi ki totó kònwa ni i kitswá dràle drìdrì i dré dra Giká ni Òpì nòzo dhi kandrá ko. »

Yésu ni lású ladzá ru atsálé lagulagu ró

(À kònò kpà Mátayò 17:1-8; Márokò 9:2-8)

²⁸Ànyiànyi kítú nzi-drì-na kúlí nda i àmvolésè dhi, Yésu dré Pétéró ki drìzo Yòwánì ìbe ìndì Yàkóbhò be, lìzo àyi ìbe mbàle kòngó àlo drìna, kitswálé tà ta Giká be.

²⁹Dì dré adrérà'a tà ta Giká be dhi 'á dhi, akodhi ni mìbhalé ni lású dré ngàzo ru ladzá. Akodhi ni kítá i dré kpà atsázó kemve kpírikpíri lagulagu ró.

³⁰⁻³¹Gbă kòdhwa, àgo rì, Mósè i Èlìyà be dhi i dré agázó lású be lagulagu ró àyi kandrá, adrélé tà ta Yésu be. I adré tá Yésu ni àzí lìzo dràle Yèrúsalémà na dhi ni akí ngíni ya dhi ni tà ta.

³²Pétéró i arúpi ni ìbe dhi ki mì adré tá ayí ro. Dì i kòlaró dre dhi, i dré Yésu ni nòzo lagulagu ró túmání àgo rì adrébhá àyi ki totó akodhi làga nda ìbe.

³³Àgo nda i dré tá adrérà'a 'ole Yésu ni tayí dhi 'á dhi, Pétéró dré tàzoá drá dhi: «Míri, doro ni mà dré adrélé kònwa dhi. Mà kòledé wémà na dhi i kònwa: àlo ni mí dré, àlo ni Mósè dré, ìndì àlo ni Èlìyà dré. » (Akodhi ni tá tà i dré adrélé tâle dhi ko.)

³⁴Dré rè dhu adrérà'a tà ta dhi 'á dhi, ndùrùku dré apfòzo àyi ki asó rùkù. Dì Yésu ni lebèbhá nda i dré tá adrérà'a fîle ndùrùku nda na dhi 'á dhi, tirì dré àyi ki 'òzo.

³⁵Gò kúlí dré apfòzo ndùrùku nda lésè tàá dhi: «Kònìdhi áma Mváagó má dré zìle dhi 'i. Mì kòyi akodhi! »

³⁶À kòtà tà nda dre dhi, i dré nòzoá dhi, Yésu tá ína kalóma. Gò akodhi ni lebèbhá nda i dré tà nda ki zùzo tayílé àyi léna. Lókyá nda sè dhi, i tití tá tà i dré nòle nda i dhya àlo dré ko.

Yésu tidrí' mváagó àlo tiri' kònzi i' be i' léna dhi

(À kònò kpà Mátayò 17:14-18; Márokò 9:14-27)

³⁷Kítú bvóá dhi sè, Yésu i kàsí kòngó nda drìlésè lebèbhá ni ìbe dre dhi, móndí zyandre lavúlé dhi i dré alìzo ru kisú akodhi be.

³⁸Gò agó àlo móndyá zyandre nda i kòfalé dhi dré ngàzo kúlí yo tâzoá dhi: «Tadhálépi, má adré ámi ti lizí, mí kòbheró mì áma mváagó véna. Tàko ko, akodhi áma mvá àlo kwákwa dhi 'i.

³⁹Tirí kònzi àlo dhi adré akodhi ni ru rä gò, dré adrészó trèle ngbò ró. Tirí nda dré adrészó akodhi ni kizí rìnyí sè gò, kápfùtrá dré adrészó apfòle sìlásà. Adré ngbà 'í akodhi ni tayí lókyá tsà gò, gòzo adrélé akodhi ni ató i pálé.

⁴⁰Má lizí tá ámi lebèbhá ki ti, i kòdroró tirí nda ká. Dì, i kitswá tá àyikya bwà ko. »

⁴¹Dì Yésu logó dhi: «Ámi, móndyá ándrò tà ka'ika'i àko ìndì àmi ki tayíbhá litílé ni i, mà ni adré vélé àmi ìbe vwàle lókyá be ángopí? Má ni àmi ki tà mvo vwàle lókyá be ángopí? Mí adrì ámi mvá nda alìzo ába má vélé. »

⁴²Mvámva nda dré tá adrérà'a alìle Yésu vélé dhi 'á dhi, tirí kònzi nda dré akodhi ni bhèzo kìní mi gò, kizízóá rìnyí sè. Dì, Yésu dré ína ligízó tirí kònzi nda be, mvámva nda ni tidrízó gò, logózóá atá ni véna.

⁴³Dì móndyá tití nda kí líndrí dré gàzo bhwăbhwa Giká ní tà kàdrì sè.

Yésu gò áyi dràma ní tà longó

(À kònò kpà Mátayò 17:22-23; Márokò 9:30-32)

Móndyá tití nda ì dré tá adrérà'a sibhálé be ngbo tà tití Yésu dré adrélé 'ole dhi kí tà sè dhi 'á dhi, dré tazoá áyi lebèbhá ì dré dhi:

⁴⁴«Mì koyi tà má dré adrélé tâle àmì dré kònìdhì doro: À ní Móndí ní Mvá ní lefè kàribhá ì drígá. »

⁴⁵Dì, kúlí nda fí tá ína àyi drìna ko. Àndu ní zù tá i zùzù àyi dré, ì kòkitswáró niá bwà ko. Ì adré tá kpà ngá ro tà nda ní lizima Yésu tí dhi sè.

Dhya kàdrì ` lavúlé dhi àdhi 'í?

(À kònò kpà Mátayò 18:1-5; Márokò 9:33-37)

⁴⁶Àmvolásà dhi, Yésu ní lebèbhá ì dré dhèzo adrélé tà kayí àyi kòfalésè, nízoá ngalè dyha kàdrì lavúlé àyi kòfalé dhi àdhi 'í ya dhi.

⁴⁷Yésu dré tà ì dré adrélé kisùle nda ní nízo kyá gò, mvámvá àlo dhi ní adózó bhale ì lága,

⁴⁸tazoá àyi dré dhi: «Dhya ángùdhi adrélépi mvámvá kònìdhì tini dhi ní ka'ì dòle doro áma rú sè dhi, adré áma tändi ní ka'ì kòdhya. Dyha ángùdhi adrélépi áma ka'ì dòle doro dhi, adré dyha áma amùlepi dhi ní ka'ì kòdhya. Tako ko, dyha tako lavúlé àmi tití i kòfalé dhi ína dyha kàdrì lavúlé dhi 'í. »

Dhya adrélépi ru pfu àmì i` be ko dhi àmì kí àlo 'í

(À kònò kpà Márokò 9:38-40)

⁴⁹Gò Yòwánì dré tazoá Yésu dré dhi: «Míri, mà nò tá agó àlo dhi adrérà'a tirí kònzi kí dro ámì rú sè. Dì mà dré akódhi nda ní logázó, dré tá adrélé àma kí àlo 'í ko dhi sè. »

⁵⁰Dì, Yésu logó drá dhi: «Mì logá akódhi ko. Àngyá ko, dyha ángùdhi adrélépi ru pfu àmì i` be ko dhi, àmì kí àlo 'í. »

Bhà àlo Sàmàri` yà kya gà Yésu rè

⁵¹Lókyá Yésu ní dòzo bhù na dhi kàtsá ànyi dre dhi, akódhi dré ína togó tsìzo lìzo Yérusalémà na.

⁵²Dì dré móndí kí mùzo lìle drìdrì ì kandrána gò, ì dré lìzo tsàle bhà àlo Sàmàriyà kya na kitswálé àrà ledé akódhi dré.

⁵³Dì, móndyá kònàle dhi ì dré àyi kya akódhi ní ka'ìma gàzo rè, dré tá adrélé lìle Yérusalémà na dhi sè.

⁵⁴Akódhi ní lebèbhá, Yàkóbhò ì Yòwánì be dhi ì kònò tà nda dre dhi, ì dré tazoá dhi: «Míri, mí adré lèá dhi, mà kàzí àtsí asilé bhù lésè, àyi kí za vèle nyňyí? »

⁵⁵Dì, Yésu dré ína áyi alázó, lawàle àyi dri.

⁵⁶Gò ì dré lìzo bhà àzya na.

Móndyá adrébhá Yésu ní le lebèle dhi i

(À kònò kpà Màtayò 8:19-22)

⁵⁷Ì dré tá adrérà'a lavúlé láti 'ásè dhi 'á dhi, agó àlo dhi dré tàzoá Yésu dré dhi: «Má ní ámi lebè àrà tití ángùdhi mí dré adrészó lile dhi i 'ásè. »

⁵⁸Yésu logó drá dhi: «Kìlìwá i àyi kí bhú íbe. Àrí i kpà àyi kí bhà íbe. Di, Móndí ní Mvá ína àrà dré kitswázó áyi drì la lovózó dhi àko. »

⁵⁹Gò Yésu dré tàzoá agó àzya dré dhi: «Mí lebè ma. » Di, agó nda tà drá dhi: «Míri, mí kòtayí rè zyà ma lile áma atá ní si 'íká. »

⁶⁰Yésu logó drá dhi: «Mí tayí móndí dràbhá dre dhi i àyi kí àbvò kí si. Di, mí ró dhi, mí lì mína Gíká ní Òpì ní tà longóbe. »

⁶¹Gò agó àzya dhi dré tàzoá dhi: «Míri, má ní ámi lebè. Di, mí kòtayí rè zyà ma lile lazilé bhà na 'íká. »

⁶²Di, Yésu logó drá dhi: «Dhya ángùdhi kíbhó dòlepi kitswázó amvú 'a gò, gòzo áyi alá ngá no í àmvolé dhi kitswá ína Gíká ní Òpì sè ko. »

Lükà 10

Yésu tibhù áyi lebèbhá àruka nyadhi-na-drì-mudrì-drì-rì dhi i àzí 'o

¹Àmvolásà dhi, Míri Yésu dré áyi lebèbhá àruka nyadhi-na-drì-mudrì-drì-rì dhi kí kipèzo gò, àyi kí tibhùzo lile rì rì drìdrì í kandrána bhàandre wáyi, ìndì àrà wáyi í dré tá adrészó 'ole lile dhi i 'ásè.

²Dré tá adrérà'a àyi kí tibhù dhi 'á dhi, tà àyi dré dhi: «Lányá ka amvú na lavúlé dre. Di, àzibhá adrébhá lanyá nda ní lokó dhi kí àbvò yókódhó. Mì kàdré di lanyá nda ní líyí ní ti lizí, kòmùró àzibhá i lile áyi lanyá lokó be dhi bvó.

³Mì lì! Mì nò rè ká! Má adré àmi kí mu ngóró kábilígyà ànzi i tíni trú kàlagí i kòfalé.

⁴Mì kòdo làfa 'í yà, kòmvò 'í yà, kó ngalè kámókà àzya 'í yà dhi atsí sè ko. Láti bhálésè dhi, mì kòfè mòdo dhya àlo dré ko.

⁵Dzó ángùdhi mì dré dra fízo lána dhi na dhi, mì kòtà rè zyà dhi: «Tà kìdríkìdrì kàdré dzó kònìdhi 'á. »

⁶Dhya àlo adrélépi trôle tà kìdríkìdrì rú dhi kàdré kònàle be dhi, tà kìdríkìdrì mì dré zìle nda ní adré akódhi dri. Di, dhya kònìnì dhi kàdré yó dhi, tà kìdríkìdrì nda ní agò àmi vélé.

⁷Mì kàdré ayílé dzó nda na, adrélé ngá i dré dra fèle àmi dré dhi kí nya ìndì mvùá. Tako ko, adré lèá dhi, dhya àzí 'olepi dhi konya áyi landè. Di mì kòlavú dzó àlo àlo i 'ásè, àrà ayízó dhi kí ndabe ko.

⁸Bhàandre ángùdhi móndyá lána dhi i dré dra àmi kí ka'ízo dòle dóro dhi na dhi, mì kàdré ngá i dré dra bhàle àmi kandrá dhi kí nya.

⁹Mì kàdré dràbhá kònàle dhi kí tidrí, adrészó tàá móndyá nda i dré dhi: «Gìká ni Òpì atsá ànyi àmì kòfalé dre. »

¹⁰Dì, bhàandre ángùdhi mì dré dra fízo lána gò, àmì kí ka'izo dòle dóro ko dhi na dhi, mì kòpfò bhà nda ni láti andre bhálé, tàá àyi dré dhi:

¹¹«Mà adré ndìndì àmì kí bhàandre ni tòpfulíndrí tròlepi àma pá dhi ni towá tadházóá dhi, mà tayí àmì kí tà tití dre. Dì, lè mì kònì tòl dhi, Gìká ni Òpì atsá ànyi dre. »

¹²Má adré tàá àmì dré dhi: Kìtú Gìká dré dra tòbvó tòzo dhi tú dhi, a ni tà ño móndyá bhàandre nda lésè dhi i dri, móndyá Sòdómà lésè dhi kya kí lavú. »

Kizà bhàandre Yésu ni gabhá rè dhi kya

(À kònò kpà Mátayò 11:20-24)

¹³Yésu gò tàá dhi: «Kizà àmì kí ngá 'i, àmì Kòràzínàbhá ro ni i! Kizà kpà àmì kí ngá 'i, àmì Bètèsàyídàbhá ro ni i! Àngyá ko, má kò'o tá tà líndrígá ró má dré 'ole àmì véna dhi i Tírè na ìndì Sìdónà na dhi, kònò móndyá bhàandre nda i 'ásè dhi i asó tá kítá lirí àyi rú kínó, lirizó àyi kí dri pfo tópfó sè tadházóá dhi, i ladzá àyi kí togó káyà dhi dre.

¹⁴Ásà dhi, kìtú Gìká dré dra tòbvó tòzo dhi tú dhi, a ni tà ño àmì dri móndyá Tírè i lésè Sìdónà be dhi kya kí lavú.

¹⁵Dì àmì Kàpàrànàwúmàbhá ro ni i, mì adré tsì kisùá dhi, Gìká ni àmì kí tà tingá tsàle byá kurú na bhù na báti? Tàdzí ko! A ni àmì kí tà tirí tsàle byá móndyá dràbhá dre dhi kí àrà na. »

¹⁶Yésu gò tàá áyi lebèbhá i dré dhi: «Dhya ángùdhi adrélépi àmì kí kúlì yi dhi, adré áma kúlì yi kòdhya. Dhya ángùdhi adrélépi àmì kí ga dhi, adré áma ga kòdhya. Dhya ángùdhi adrélépi áma ga dhi, adré dhya áma amùlepi dhi ni ga kòdhya. »

Móndyá nyadhi-na-drì-mudrì-drì-rì dhi kí agòma

¹⁷Àmvolásà dhi, móndyá nyadhi-na-drì-mudrì-drì-rì nda i dré agòzo arí be Yésu vélé, tàá dhi: «Mírì, ndìndì tirí kònzi i adré tà mà dré adrélé tòl àyi dri ámì rú sè dhi kí 'o, adrészó àyi kí bha àma zàle. »

¹⁸Dì Yésu logó àyi dré dhi: «Má nò Sàtánà adhérà'a bhù lésè ngóró bhù lagulagu tíni.

¹⁹Mì yi rè ká! Má fè rìnyí àmì dré kítswázó ni kí ató dàpáyà íbe, ìndì kítswázó àmì kí kàribhá, Sàtánà ni rìnyí wáyi dhi ni lavú. Dì tà àlo kítswá góle àmì kí 'o kònzi ko.

²⁰Dì, tágba dré adrészó kònini dhi, mì kòlenzé tirí kònzi i dré adrélé àyi kí bha àmì zàle dhi sè ko. Be ró dhi, mì kàdré àmikya lenzélé Gìká dré àmì kí rú tisile bhù na dhi sè. »

Yésu fè àwoyà Gìká dré

(À kònò kpà Mátayò 11:25-27; 13:16-17)

²¹Lókyá nda sè dhi, Yésu gàlepi Tírí Lolo ni arí sè bí dhi dré tòzoá dhi: «Á! Tátá, Mírì bhù kya bvò be ni, má adré àwoyà ta mí dré, mí dré tà kòdhí kí zùle tògyabhá i

dré ìndì móndyá tà nibhá i dré gò, tà nda ki tadházó ànzimvá i dré dhi sè. Àyíya, Tátá, tàko ko, tà mí dré 'ole nda tá dóro mí mìlésè.

²²Áma Atá tayí tà tití dhi i má drígá dre. Dhya àlo nilepi Gìká ni Mváagó àdhi 'i ya dhi yókódhó, ngbà 'í Gìká Atá ni nì. Dhya àlo nilepi Gìká Atá àdhi 'i ya dhi kpà yókódhó. Ngbà 'í akódhi ni Mváagó ni nì, ìndì dhya Mváagó nda dré adrézó áyi Atá ni le tadhálé àyi dré dhi i nì àyi. »

²³Gò Yésu dré áyi alázó tàá ngbà 'í áyi lebèbhá i dré dhi: «Kólénzé àmi adrébhá tà mì dré adrélé nôle dhi kí no ni i dré!»

²⁴Àngyá ko, má adré tàá àmi dré dhi: Pròfétà bì dhi i ópí bì dhi íbe dhi i lè tá tà mì dré adrélé nôle dhi kí nôle tò gò, i dré àyikya nòzoá ko. I lè tá kpà tà mì dré adrélé yile dhi kí yile tò gò, i dré àyikya yìzoá ko. »

Pí dhi gó Sàmàrí yà agó dóro dhi ni tà dri dhi

²⁵Àmvolásà dhi, dhya àlo Mósè ni tátrítrí kúlí nilepi dóro lavulé dhi dré alìzo tà kònìdhí ni lizí Yésu tí, kitswázó akódhi ni tabhì: «Tadhálépi, lè má kò'o àdho tà kòdhyá kitswázó lídrì kóná vésè kólyá dhi ni kisú dhi? »

²⁶Yésu logó drá dhi: «Mósè ni tátrítrí kúlí adré tàá ngíni? Mí adré tátrítrí kúlí nda ni na ngíni? »

²⁷Dì tátrítrí kúlí tadhálépi nda logó dhi: «Lè mí kàdré Mírì ámi Gìká ni le ámi togó sè wäyi, ámi lídrì sè wäyi, ámi rìnyí sè wäyi, ìndì ámi tà kisùkisù sè wäyi. Lè kpà mí kàdré ámi àzya ni le ngóró mí dré adrélé ámi tändì ni le dhi tini. »²⁸Yésu gò tàá drá dhi: «Mí logó kyá. Mí kò'o kònìnì dhi, mí ni lídrì nda ni kisú. »

²⁹Dì, tátrítrí kúlí tadhálépi nda lè tá ína áyi bhàle adrélé gyägya gò, dré lizízoá Yésu tí dhi: «Áma àzya nda ína àdhi 'i? »

³⁰Yésu gò logóá dhi: «Kitú àlo dhi, agó àlo dhi adré tá sile Yèrúsalémà lésè lìle Yèrikò na gò, dré tsàzo fìle trú kùgubhá i kòfalé. I dré akódhi ni ngá wäyi dhi kí topázó, akódhi ni bhwàzo gò, tayízoá ànyíànyí dràdrà mìle.

³¹Kòwánà àlo dhi adré tá kpà asilé láti nda 'ásè bágí ro. Kònò agó nda dre dhi, dré ína ngá kízo làgásà gò lìzo.

³²Bvóá dhi, agó àlo Lévi ni súrú lésè dhi dré kpà atsázó agó nda ni no gò, dré kpà ngá kízo làgásà gò lìzo.

³³Dì, Sàmàríyà agó àlo dhi adré tá kpà asilé láti nda 'ásè gò, dré atsázó àrà nda 'á. Kònò agó nda dre dhi, dré ína kizà dòzo áyi togó na akódhi ni tà sè.

³⁴Dré áyi kisízo ànyí akódhi làga, dò kí da víno be akódhi ni làzí i mi gò, làzí nda kí lambézó. Dré akódhi ni dòzo bhàle áyi tändì ni púndà dri, lìzo ába tsàle kùmú kí dzó na gò, akódhi ni limvùzo kònàle.

³⁵Kitú bvóá dhi sè dhi, dré làfa lò'wa rì dhi kí adózó fèle dzó nda ni lìyí dré, tázó dhi: «Mí kòlikí agó kònìdhí dóro. Làfa ángopí ya mí dré dra kizálé làfa kònì dhi akódhi ni tà sè dhi, má ni mána logóá mí dré, má dré dra agörà'a kònwásè dhi 'á. »»

³⁶Gò Yésu dré tátrítrí kúlí tadhálépi nda ní lizízó tázoo dhi: «Mí mìlésè dhi, dhya na nda i kòfalé dhi, dhya ángùdhi atsá ína agó filepi trú kùgubhá i kòfalé nda ní arúpi ró ní? »

³⁷Dí tátrítrí kúlí tadhálépi nda logó dhi: «Dhya akódhi ní kizà bhàlepi dhi 'i. » Dí Yésu tà drá dhi: «Mí lì, mí kàdréró kókpà 'òá kònini. »

Yésu tsa Màrátà i bhàna Màrí 'yà be

³⁸Yésu i dré tá adrérà'a lile lebèbhá ni íbe láti 'ásè dhi 'á dhi, i dré tsàzo bhà àlo na gó, tòkó àlo rú be Màrátà dhi dré akódhi ní ka'izo dòle dóro i bhàna.

³⁹Míri kòfí dzó nda na dre dhi, tòkó nda ní amvúpi rú be Màriyà dhi dré lirízó akódhi ní pá làga, adrélé akódhi ní kúlí yi.

⁴⁰Dí, Màrátà adré tá ína landulé àzí wáyi dré adrélé 'ole mányàngá tà sè dhi i sè. Dré áyi kisízó ànyi Yésu làga tàá drá dhi: «Míri, áma amvúpi dré áma tayílé adrélé àzí wáyi dhi kí 'o kalóma ni, tà nda tà tako 'i mí mìlésè? Mí kòtà di drá dhi, kàlì drígá bha má vélé wà. »

⁴¹Dí, Míri logó drá dhi: «Màrátà, Màrátà, mí adré mína ámi togó bha lanzile, adrészó kpà bhàá kuru tà bì dhi i sè.

⁴²Dí, tà kitswálépi à kò'o dhi ngbà 'í àlo kwákwá. Màriyà kipè ína tà doro lavulé dhi kòdhya. À kitswá kpà tà nda ní tingá vélásà bwà ko. »

Lúkà 11

Yésu tadhá tà zìma Gìká tí dhi ní tà (À kònò kpà Mátayò 6:9-13; 7:7-11)

¹Kítú àlo dhi, Yésu adré tá tà zi Gìká tí àrà àlo dhi na. Kòzi tà akílé dre dhi, akódhi ní lebèbhá kí àlo dré tázoo dhi: «Míri, mí kòtadhá àma dré tà zìma Gìká tí dhi, ngóró Yòwánì dré tadhálé áyi lebèbhá i dré dhi tíni. »

²Dí Yésu tà àyi dré dhi: «Mí dré adrérà'a tà zi Gìká tí dhi 'á dhi, mí kàdré tàá dhi: «Àma kí Atá, lè móndyá wáyi dhi i kònì dhi, mí Gìká lolo 'i dhi be.

Ámi Òpì kàtsá móndyá wáyi i kòfalé wà.

³Mí kàfè àma dré mápà kitswálépi àma sè kítú àlo àlo tití i sè dhi wà.

⁴Mí kòtrì àma ki tàkonzi i. Tako ko, àma kí tändi mà adré kpà móndyá wáyi adrébhá tàkonzi 'o àma rú dhi kya kí tri. Mí kòtayí àma tà dré tabhile, àma kí 'òzo dhèle tàkonzi na dhi ko. »»

⁵Yésu gò tàá àyi dré dhi: «Àruka ni, dhya àlo àmi kòfalé dhi ní kitswá lile áyi arúpi véna ngátsi kítogá sè, tàá drá dhi: «Àma arúpi, mí afè má dré mápà na.

⁶Àngyá ko, àma arúpi àlo dhi alì làwú làvo lésè atsálé má vélé. Dí, ma ngá àlo má dré kitswálé fèle drá dhi àko. ⁷Dí akódhi ní arúpi dzó nda lé dhi ní go logóá drá dhi: «Mí lagù ma ko. Má asé dzóti dre. Àma áma ànzi íbe dhi, mà ayí dre. Má kitswá ngàle ngá fe mí dré bwà ko. »

⁸Di, má adré mána tàá àmí dré dhi: Gba dhya dzó nda lé nda kàdré ngàle ngá fe akódhi dré, dré adrélé áyi arúpi 'í dhi sè ko yà dhi, a ní nga ngá tití dré adrélé lèle dhi kí fe drá, dré adrélé zìá landè àko ró dhi sè.

⁹Má adré dí tàá àmí dré dhi: Mì kàdré tà zi Gìká tí gò, kò'oró tà nda àmí dré. Mì kàdré ngá nda gò, mì kòkisúró. Mì kàdré dzóti ga gò, à kònziro àmí dré.

¹⁰Tako ko, dhya ángùdhi adrélépi tà zi Gìká tí dhi adré kisúá. Dhya adrélépi ngá nda dhi adré kisúá. Dhya adrélépi dzóti ga dhi dré dhi, à adré kpà nzìá.

¹¹Àmí ànzi kí atá ro ní i, àmí kí mvá kàdré kosyá zi àmí tí dhi, mì ní tsì ní fe drá kòdhya?

¹²Kó ngalè, àmí kí mvá kàdré tà'ú bhú zi àmí tí dhi, mì ní tsì dàpáyà fe drá kòdhya?

¹³Dí àmí móndí kònzi ró ní i, mì kònì adrélé ngá dóro fe àmí kí ànzimvá i dré dhi be dhi, àmí kí Atá bhù na dhi ní Tirí Lolo fe dhya adrébhá zìá i tí dhi i dré tà tändí ró! »

Yésu ni tà, tirí kònzi kí kàdrí` àdhya be dhi

(À kònò kpà Mátayò 12:22-30; Márokò 3:22-27)

¹⁴Kítú àlo dhi, Yésu adré tá tiri kònzi dro agó àlo ábhábhá ro dhi lésè. Tirí kònzi nda kòpfò lásà dre dhi, ábhábhá nda dré kídhózó adrélé kúlí ta gò, móndí zyandre kònàle dhi kí líndrí dré gázó bhwábhwa.

¹⁵Di, àyi kí àrukabhá i dré àyikya tazoá dhi: «Dhya kòdhí adré tiri kònzi kí dro topfòle móndí i lésè, Bélèzèbùlè, tiri kònzi kí kàdrí ní rinyí sè. »

¹⁶Àyi kí àruka i adré tá akódhi ní le tabhile gò, i dré akódhi ní ti lizízó, kò'oró tà àlo líndríga ró angálépi Gìká vélésè dhi.

¹⁷Di, Yésu dré ína tà i dré adrélé kisùle nda ní nízo kyá gò, tazoá àyi dré dhi: «Òpì ángùdhi móndyá zàlá dhi i dré adrészó ru lanzí àyi kòfalésè dhi, òpì nda ní tà ní akí tití. Dzó ángùdhi móndyá lá dhi i dré adrészó ru lanzí àyi kòfalésè dhi, dzó nda ní arí nyinyí.

¹⁸Kókpà kòdhí tíni, móndyá Sàtánà ní rinyí zàle dhi i kàdré ru lanzí àyi kòfalésè dhi, akódhi ní òpì ní kítswá áyi totó ngíningíni ró? Má adré tà kòdhí ní ta, mì dré adrélé tàá dhi, má adré tiri kònzi kí dro Bélèzèbùlè ní rinyí sè dhi sè.

¹⁹Má kàdré mána tiri kònzi kí dro Bélèzèbùlè ní rinyí sè dhi, àmí kí lebèbhá i adré dí àyi kí dro àdhi ní rinyí sè? Di ásà dhi, àyi nda kí tà mì dré adrélé tâle nda kí bvó ta àyi.

²⁰Di, má kàdré mána tiri kònzi kí dro Gìká ní tändí ní rinyí sè dhi, kòdhí adré tadhá dhi, Gìká ní Òpì atsá àmí kòfalé dre káyà dhi.

²¹Agó kòmbá àlo àdzú ngá íbe bí dhi kàdré áyi dzó likí dhi, akódhi ní ngá tití dhi i lína.

²²Dì, dhya àzya rìnyi ró akódhì ni lavúlépi dhi kàtsá àdzú bhu akódhì be gò, lavúzóá dhi, dhya nda ni akódhì ni àdzú ngá dré áyi togó bhàzo drìá dhi kí tingá, akódhì ni ngá tití dhi kí topázó lanzílé.

²³Dhya ángùdhi adrélépi túmání má be ko dhi, adré ína ru pfu má be. Dhya adrélépi móndí kí kimó túmání má be ko dhi, adré ína àyi kí lapé. »

Tiri' kònzi ni agòma fi` le móndi' léna dhi

(À kònò kpà Mâtayò 12:43-45)

²⁴Yésu gò tàá dhi: «Tiri' kònzi àlo dhi kòpfò dhya àlo lésè dhi, adré anyálé àrà fà ro dhi i 'ásè, àrà i dré kítswázó lovólé lána dhi ni ndabe. Dì, kòkitswá kisúá bwà ko dhi, adré tàá dhi: <Má ni go file áma dzó má dré apfòzo lásà dhi na. >

²⁵Kògò tsàle dre dhi, adré kisúá dhi, à awá dzó nda ni 'álé, ngá lána dhi kí tobhàzo kpákpa dre.

²⁶Dì adré lile tiri' kònzi áyi lavúbhá nzi-drì-rì dhi kí nda lìzo àyi íbe gò, i dré adrészó tifilé adrélé dhya nda léna. Dì dhya nda ni tà kùdù ro dhi vélé kònzi wálaká ni ni lavú. »

Kólénzé móndyá adrébhá Gìká ni kúlì ka'i 'ole dhi i dré

²⁷Yésu dré tá adrérà'a tà nda kí ta dhi 'á dhi, tòkó àlo móndí zyandre i kòfalé dhi dré kúlì yòzo tàzoá drá dhi: «Kólénzé tòkó ámi todolépi i léna gò, bà fèzo mí dré ndrôle dhi dré! »

²⁸Dì, Yésu logó dhi: «Lavúlé dhi, kólénzé ína móndyá adrébhá Gìká ni kúlì yi gò, i dré adrészó ka'iá 'ole dhi i dré! »

Tà tadhálé pròfétà Yónà ni tà rú dhi

(À kònò kpà Mâtayò 12:38-42)

²⁹Móndí zyandre lavúlé dhi i dré tá adrérà'a ru kímó Yésu làga dhi 'á dhi, akódhì dré ngàzo tàá dhi: «Móndyá ándrò kònì i kònzi. I adré àyikya tà líndríga ró dhi ni nda nòle. Dì, à kítswá tà àzya líndríga ró dhi ni 'o àyi dré nòle dhi ko, kàdré ngbà i pròfétà Yónà àdhyá 'i ko dhi.

³⁰Tako ko, ngóró Gìká dré tá áyi tà tadhálé Yónà rú Ninívèbhá i dré dhi tini dhi, a ni kókpà áyi tà tadhá Móndí ni Mvá rú móndyá ándrò ni i dré.

³¹Kítú dra tàbvó tazo dhi tú dhi, ópí kàdrì tòko ró bvò tàbhu na dhi drìle dhi ni nga tà bha móndyá ándrò ni i dri. Tako ko, ópí nda angá tá ína làwú lavo lésè alìle ópí Sòlòmónò ni tògyakúlì yi 'í. Dì mì nò rè ká! Dhya kàdrì Sòlòmónò nda ni lavúlépi dhi be kònwaré!

³²Kòdhi íbe dhi, kítú dra tàbvó tazo dhi tú dhi, Ninívèbhá kí nga tà bha móndyá ándrò ni i dri. Tako ko, Ninívèbhá nda i dré tá tà Yónà dré longolé àyi dré dhi ni yìzo dhi, i ladzá tá àyikya àyi kí togó 'í. Dì mì nò rè ká! Dhya kàdrì Yónà nda ni lavúlépi dhi be kònwaré! »

Tà tadhálé tálà ni tà rú dhi

(À kònò kpà Mâtayò 5:15; 6:22-23)

³³«À dhì gà tálà bhàle àrà lùzu ró dhì na yà, kó ngalè lìdrí zàna yà dhì ko na. Be ró dhì, à adré dhìá bhàle zá kuru mísá drìna, kitswálé móndyá tití adrébhá afflé dzó lé dhì i kàdréró ngádra no be dhì bvó.

³⁴Ámi mì, tálà adrélépi ngádra fe ámi rúbhá dré dhì 'i. Ámi mì kàdré dóro dhì, ámi rúbhá wáyi dhì ngádra 'á. Di, ámi mì kàdré ína drà ro dhì, ámi rúbhá wáyi dhì tínimvá na.

³⁵Mí kònò dì dóro, ngádra mí léna dhì kàdréró tínimvá ro ko.

³⁶Dì ásà dhì, ámi rúbhá wáyi dhì kàdré ngádra 'á gò, rúbhá nda ní kìgá àlo dhì dré adrészóna ko dhì, ámi rúbhá nda ní adré rùkù ngádra kító na, ngóró tálà ní ngádra dré adrélé ngá kazá mí dré dhì tíni. »

Yésu tà tà Fàrisayò i rú tátri' tri' kúlí tadhábhá i' be

(À kònò kpà Mátayò 23:1-36; Márokò 12:38-40)

³⁷Yésu kótà tà nda i akílé dre dhì, Fàrisayò àlo dhì dré akódhì ní zìzo ngá nya i bhàna. Yésu dré dì lìzo fíle dzó nda na gò, lirílémísá làga.

³⁸Di, Fàrisayò nda dré ína nòzoá dhì, Yésu dzì drígá drìdrì ngá nyàma kandrá ko gò, líndrì ní dré gàzo tà nda sè.

³⁹Gò Míri dré tázooá drá dhì: «Àmi Fàrisayò ro ní i, mì adré àmikya kópò kí rúbhá dzi sănì kya íbe gò, àmi léna dhì, mì dré adrészóna gàle ngá lovó sè bǐ, ìndì tà kònzi sè bǐ.

⁴⁰Àmi móndí azaaza ró dhì 'i! Gíká ngá kí rúbhá ledélépi dhì, ledé kókpà ngá kí 'álé ko?

⁴¹Dì mì kòfè ngá àmi kí kópò na ìndì àmi kí sănì na dhì i lemerèbhá i dré gò, ngá tití dhì i kàtsáró ndí àko àmi dré.

⁴²Àmi Fàrisayò ro ní i, kizà àmi kí ngá 'i! Mì adré ngá nzí tsàtsà tití mì dré adrélé lokólé àmi kí amvú na, lanzílém'a be mudrí dhì kí àlo fe Gíká dré: ndìndì àmi kí ménetè, àmi kí rúwè, tsàle ngábí twátwa mì dré adrélé kidhílè dhì íbe. Di, mì adré àmikya tà gyágya 'òma ìndì Gíká ní lèma dhì kí tà tivì. Adré tá lèá dhì, mì kàdré tà nda kòdhì kí 'o, ngá fèma Gíká dré dhì ní tivì àko ró.

⁴³Àmi Fàrisayò ro ní i, kizà àmi kí ngá 'i! Mì adré lèá lirílém'a be mudrí dhì kí àlo fe Gíká dré: ndìndì àmi kí ménetè, àmi kí rúwè, tsàle ngábí twátwa mì dré adrélé kidhílè dhì íbe. Di, mì adré àmikya tà gyágya 'òma ìndì Gíká ní lèma dhì kí tà tivì. Adré tá lèá dhì, mì kàdré tà nda kòdhì kí 'o, ngá fèma Gíká dré dhì ní tivì àko ró.

⁴⁴Kizà àmi kí ngá 'i! Àmi ngóró mógo rabhá akílé gò, adrészóna gàle ngá nya i bhàna. Mì adré lèá lirílém'a be mudrí dhì kí àlo fe Gíká dré: ndìndì àmi kí ménetè, àmi kí rúwè, tsàle ngábí twátwa mì dré adrélé kidhílè dhì íbe. Di, mì adré àmikya tà gyágya 'òma ìndì Gíká ní lèma dhì kí tà tivì. Adré tá lèá dhì, mì kàdré tà nda kòdhì kí 'o, ngá fèma Gíká dré dhì ní tivì àko ró.

⁴⁵Gò tátrítrí kúlí tadhábhá kí àlo dré tázooá Yésu dré dhì: «Tadhálépi, mí kàdré tà kòdhì kí ta dhì, mì adré kókpà àma kí lodhá. »

⁴⁶Dì Yésu logó dhì: «Àmi tátrítrí kúlí tadhábhá ro ní i, kizà kókpà àmi kí ngá 'i! Mì adré àmikya ngá lanzílanzí kitswálé dòle bwà ko dhì kí tobhà móndí i dri gò, mì dré adrészóna gàle ngá nya i bhàna. Mì adré lèá lirílém'a be mudrí dhì kí àlo fe Gíká dré: ndìndì àmi kí ménetè, àmi kí rúwè, tsàle ngábí twátwa mì dré adrélé kidhílè dhì íbe. Di, mì adré àmikya tà gyágya 'òma ìndì Gíká ní lèma dhì kí tà tivì. Adré tá lèá dhì, mì kàdré tà nda kòdhì kí 'o, ngá fèma Gíká dré dhì ní tivì àko ró.

⁴⁷Kizà àmì kì ngá 'i! Mì adré mógo kì tobhà pròfétà i dré, tágba àmì kì tábhí i dré àyi kì tupfúzó todràle àyi dhi.

⁴⁸Ásà dhi, mì adré àmikya tadhá dhi, mì ka'i tà àmì kì tábhí i dré tá 'ole nda i. Tàko ko, i tupfú tá àyikya pròfétà nda i gó, mì dré àmikya adrészó àyi kì mógo kì tobhà.

⁴⁹Tà nda sè dhi, Gìká tà tá áyi tògyá sè dhi: «Má ni pròfétà kì tibhù àpóstolò íbe lile àyi véna. Di, i ni ayi kì àruka kì tupfú todràle, adrészó àruka ni kì mì pfo. »

⁵⁰Di ásà dhi, Gìká ni pròfétà tití kìdhólé tupfúlē todràle bvò bhàrà lésè atsálé ándrò dhi kì kàrì ni tà zi móndyá ándrò ni i tí,

⁵¹kìdhólé Àbélè ni kàrì rú, atsálé Zàkàrìyà pfûle dràle àlètárì i kòfalé àrà lolo be dhi ni kàrì rú. Àyíya, má adré tâa àmì dré dhi: Gìká ni ayi tití nda kì kàrì ni tà zi móndyá ándrò ni i tí.

⁵²Àmì tátrítrí kúlí tadhábhá ro ni i, kizà àmì kì ngá 'i! Mì kikí láti adrészó Gìká ni tà ni dhi dre. Àmì kì tändi, mì fì láti nda 'ásè ko gó, mì dré kpà móndyá adrébhá tá lèá fîle dhi kì logázó. »

⁵³Yésu kòtayí àrà nda dre dhi, Fàrisayò nda i tátrítrí kúlí tadhábhá nda íbe dhi i dré ngàzo adrélé ligílé akódhi be rinyí sè, adrészó akódhi ni lizí tà bì dhi i sè,

⁵⁴kitswázó akódhi ni 'o la'ile kúlí dré tá adrélé tâle dhi i sîlé dhi bvó.

Lúkà 12

Yésu kodzó áyi lebèbhá i tà twátwa i sè

(À kònò kpà Mâtayò 10:26-33)

¹Lókyá nda sè dhi, móndí lizolizo lavulé dhi i kímó tá ru, tsale i dré adrérà'a àyi kì pá ató àyi kòfalésè dhi 'á. Gò Yésu dré zyà kìdhózó tà ta áyi lebèbhá i dré, tazoá dhi: «Mì kàdré àmì kì likí tákú Fàrisayò kya ni tà sè. Tàkú nda àyi kì túrúpfú tà 'i.

²Tà bâti ró dhi, à ni tà tití lùzu ró dhi kì tadhá ngádra 'á. À ni kpà tà tití zùle zùzù dhi kì 'o afôle móndí i dré nile dóro.

³Di ásà dhi, tà mì dré tâle tímivá na dhi i, à ni yìá ngádra 'á. Tà mì dré tâle àmì kì àzya bîna kòyàyà sè dzó kì 'a kile dhi i 'ásè dhi i, à ni longóá dzôdrì i lésè.

⁴Áma arúpi i, má adré tâa àmì dré dhi: Mì kòro dhya adrébhá móndí kì rúbhá kì tupfú todràle gó, i dré kitswázó tà àzya 'o bwà ko dhi i ko.

⁵Má ni dhya kitswálépi mì dré rôle dhi ni tadhá àmì dré: Mì kàdré Gìká, móndí kì rúbhá kì tupfuma àmvolésè, adrélépi rinyí íbe kitswázó àyi kì bhe líferò na dhi ni ro kòdhya. Àyíya, má adré tâa àmì dré dhi: Mì kàdré akódhi nda ni ro kòdhya.

⁶À adré zakó tsì kîtsikírinyà nzi dhi kì lagí làfa lò'wa nzì rì dhi i sè? Di tágba dré adrészó kònìnì dhi, Gìká adré àyi nda kì àlo ni tà tivì ko.

⁷Kàdré di àmì kì tà sè dhi, akódhi nà ndindì àmì kì drìbhí i tití nànà. Di mì kòro ngá ko. Àmì kì tà lavú kîtsikírinyà zyandre dhi kya byá!

⁸Má adré tàá àmí dré dhi: Dhya ángùdhi adrélépi tàá móndí i kandrá dhi i ka'i ma dre dhi, Móndí ni Mvá ni kókpà tàá Gìká ni ángéló i kandrá dhi, i ka'i akódhi nda dre.

⁹Dì, dhya ángùdhi adrélépi ína áma ga móndí i kandrá dhi, má ni kókpà akódhi nda ni ga Gìká ni ángéló i kandrá.

¹⁰Dhya ángùdhi adrélépi kúlí kònzi ta Móndí ni Mvá rú dhi, Gìká ni akódhi nda ni tákonzì tri. Dì, dhya adrélépi ína làdhá dha Tírì Lólo rú dhi, à kitswá akódhi nda ni tákonzì tri ko.

¹¹À kàdré àmí kí dri tàbvó tâle lísámbò dzó kí kàdrì i kandrásè, ópí i kandrásè ìndí móndí kàdrì i kandrásè dhi, mì kòbhà àmí kí togó adrélé lanzìle tà mì dré dra tâle àmí rúsè yà, kó ngalè mì ni tà nda ni ta ngíni ya dhi dri dhi ko.

¹²Àngyá ko, Tírì Lólo ni tà mì dré kitswálé tâle dhi ni tadhá àmí dré gbă lókyá nda sè dhi nì. »

Pi' dhi' gó ngá líyí azaaza ró dhi ni tà dri dhi

¹³Gò dhya àlo móndyá zyandre nda i kòfalé dhi dré tâzoá Yésu dré dhi: «Tadhálépi, mí kòtà áma adrúpi dré dhi, kòlanzì ngá àma kí atá dré tayílé dhi i àma dré túmání i be. »

¹⁴Dì, Yésu logó drá dhi: «Arúpi, àdhi bhà ma adrélé tà àmí kòfalé dhi kí bvó lanzí dhi nì? »

¹⁵Gò tàá móndyá tití dhi i dré dhi: «Mì kònò dóro, mì kàdréró àmí kí likí ngá lovó kárá be tití dhi kí tà sè. Àngyá ko, dhyá kí lídrì adré ína áyi totó dhyá kí ngá i dri ko, gba à kàdré ngá íbe zyandre ró yà dhi. »

¹⁶Gò dré pídhígó kònìdhi ni pízo àyi dré, tâzoá dhi: «Ngá líyí àlo dhi ni amvú ka tá lanyá dóro.

¹⁷Dì akódhi dré ngàzo adrélé kisùá i léna dhi: «Má ni 'òá ngíni? Àrà má dré adrészó áma lanyá bha likílé dhi kitswá ko. »

¹⁸Gò tàá dhi: «Má ni 'òá kònìni: Má ni áma kòbhó kí awú, àruka ni kàdrì àyi kí lavúbhá dhi kí sizo gò, áma lanyá wäyi bhàzo likílé lana, áma ngá àruka íbe.

¹⁹Dì má ni go tàá má léna dhi: Ma ngá dóro má dré lokólé dhi íbe bì. Ngá nda kí kitswá áma ledé kóná bì. Nyànomvá dhi, má ni rè lovó, adrélé ngá nya, adrészó ngá mvu, adrészó lenzélé. »

²⁰Dì, Gìká gò ína tàá drá dhi: «Mì móndí azaaza 'í! Ándrò, ngátsi kònìdhi sè dhi, à ni ámí lídrì tingá. Dì ngá mí dré lokólé mí dré dhi kí go adrélé àdhi dré? »»

²¹Yésu gò tàá dhi: «Tà nda ni adré kókpà kònìni dhya ángùdhi adrélépi ngá lokó áyi tändi dré gò, adrészó lemerè ro Gìká véna dhi dré. »

Dhyá kí togó bhàma lanzìle ko dhi

(À kònò kpà Màtayò 6:25-34)

²²Gò Yésu dré tázooá áyi lebèbhá i dré dhí: «Tà nda sè dhí, má adré tázooá amí dré dhí: Mì kòbhà àmí kí togó adrélé lanzile àmí kí lídrì ni tà sè ko, ngalè mì ni dra àdho ngá nya ya dhí. Mì kòbhà kpà àmí kí togó adrélé lanzile àmí kí rúbhá ni tà sè ko, ngalè mì ni dra àdho asó àmí rú ya dhí.

²³Tàko ko, àmí kí lídrì lavú mányàngá byá. Àmí kí rúbhá lavú kpà kítá byá.

²⁴Mì nò rè àrì i ká. Ì kidhí ngá ko na. Ì akónà kpà ngá ko na. Àyi kúkú àko, ìndì kòbhó àko. Di, Giká adré ína ngá fe àyi dré tèle. Di àmí kí tà lavú tsì àrì kya ko?

²⁵Àmí kòfalé dhí, àdhi ni kítswá áyi lídrì ni lókyá ni drí timbà tsà, dré adrélé áyi togó bha lanzile dhí sè bwà dhí nì?

²⁶Di mì kòkitswá tà mvá tsà kòdhí ni 'o bwà ko dhí, mì adré di àmí kí togó bha adrélé lanzile tà àruka i sè àdho tà sè?

²⁷Mì nò rè ngalè pfò mbì na dhí i adré topfòle ngíni ya dhí ká. Ì 'o àzí ko na. Ì ledé kpà kítá ko na. Di, má adré mána tázooá amí dré dhí: Ndìndì ópí Sòlòmónò rúku ni íbe tití dhí asó tá kítá aveave pfò nda kí àlo àdhyá tíni dhí ko.

²⁸Giká kàdré kó mbì adrélépi ándró kònwa gò, kídrú dra bhèzoá àtsí na dhí kí tosó kònini be dhí, a ní dí vélé àmí kí tosó doro àyi kí lavú ngíni? Àmí àmikya móndí tà ka'ika'i íbe tsà dhí 'i!

²⁹Mì kòbhà àmí kí togó adrélé lanzile, adrészó ndàá níle ngalè mì ni dra àdho ngá nya ya, kó ngalè mì ni dra àdho ngá mvu ya dhí ko.

³⁰Tàko ko, pagánò tití bvò kòndì àdhyá i adré àyi kya ngá nda kí nda kòdhya landè àko ró. Àmí kí Atá ní kpà tâle dhí, àmí lovó íbe ngá nda kí kisúzó dhí be.

³¹Di, mì kàdré àmikya Giká ni Òpí nda kòdhya gò, akódhí kòtimbàrò kpà ngá nda i àmí dré.

Ngá làgí` be kàdrí` dhí kí lokoma bhù na dhí

(À kònò kpà Mátayò 6:19-21)

³²Àmí pârì mvá pabhá má làgásè ní i, mì kòro ngá ko. Tàko ko, àmí kí Atá mìlésè dhí doro áyi Òpí fèzo àmí dré.

³³Di mì kòlagí àmí kí ngá, làfa ní ní fèzo lemerèbhá i dré. Mì kòledé àmí dré tsùngà kítswábhá akùle bwà ko dhí i. Mì kòlokó àmí dré ngá làgí be kàdrí, kítswábhá akílé bwà ko dhí i bhù na. Kònàle dhí, kùgú fí gá ko na. Óró sì kpà gá ngá ko na.

³⁴Tàko ko, àrà ángùdhí àmí kí ngá làgí be kàdrí dhí dré adrészó lána dhí na dhí, àmí kí togó ni adré kókpà kònàle. »

Màrábhà adrébhá támìga dri dhí i

³⁵«Mì kàdré gànzi ró, adrélé àmí kí káfà 'ile àmí kí kípílé 'á dhí íbe, ìndì àmí kí tálà dhíle adrélé kòle dhí íbe.

³⁶Mì kàdré ngóró màrábhà adrébhá àyi kí míri ní letè anzírà'a gwányá làmò àdhyá lésè, kònì dra atsá dzóti ga dhí, i kònzhírò akódhí dré be dhí i tíni.

³⁷Kólénzé ní adré màrábà àyi kí míri dré dra atsázó àyi kí kisú adrérà'a tàmìga dri dhi i dré! Má adré tà báti ta àmí dré: Akódhi ní kítá àzí àdhya ní asó i rú, àyi kí 'òzo lirilé mísá làgásè gò, ngá fèzo àyi dré nyàle.

³⁸Kólénzé ní adré àyi dré, àyi kí míri kòkisú àyi adrérà'a tàmìga dri, gba kàtsá ngátsi kítogá sè yà, kó ngalè ngátsi kítogá àmvolésè yà dhi!

³⁹Dì, lè mì kònì tà kònìdhi dóro: Dzó líyí kònì tá lókyá ángùdhi kùgú dré kítswázó atsálé dhi be dhi, kònò kítswá tá akódhi ní tayí áyi dzóti ño ko.

⁴⁰Dì àmí ró dhi, mì kàdré kókpà gànzi ró. Tàko ko, Móndí ní Mvá ní atsá sáà mì dré adrélé kisùle ko dhi sè. »

Màrábà tògya ró míri ní dré kítswálé ka'ile dhi

(À kònò kpà Mátáyò 24:45-51)

⁴¹Gò Pétéró dré akódhi ní lizízó tázoo dhi: «Míri, mí adré ngbà 'í kúlí alaala kòdhi ní ta àma dré àma pátí? Kó ngalè, mí adré tàá móndyá tití i dré? »

⁴²Dì Míri logó dhi: «Màrábà tògya ró míri ní dré kítswálé ka'ile dhi, àdhi 'i? Akódhi nda, dhya míri ní dré dra bhàle áyi màrábà àruka i drile, kítswálé mányàngá fe àyi dré nyàle lókyá kítswálépi dhi sè dhi 'i.

⁴³Màrábà nda ní míri kàtsá akódhi ní kisú adrérà'a 'òá kònìnì dhi, kólénzé ní adré akódhi dré!

⁴⁴Má adré tà báti ta àmí dré: Akódhi ní míri ní akódhi ní bha adrélé áyi ngá tití dhi i drile.

⁴⁵Dì, màrábà nda kàdré ína kisùá i léna dhi ‹Áma míri adré gile agòma sè› gò, dré kídhózó adrélé màrábà àgo ró ìndì tòko ró dhi kí tswa, adrészó ngá nya, adrészó ngá mvu, adrészó kpà wá tsi dhi,

⁴⁶akódhi ní míri ní atsá kitú dré adrélé letèle ko dhi tú, ìndì sáà dré adrélé nile ko dhi sè. Dì a ní akódhi ní togá, akódhi ni tà bhàzo adrélé túmání móndyá Gíká ní ka'ibhá ko dhi kya íbe.

⁴⁷Màrábà ángùdhi adrélépi tà áyi míri dré adrélé lèle dhi kí ni gò, adrészó tà nda kí 'o ko, adrészó kpà gànzi ró ko dhi, à ní akódhi nda ní bhwa vésè be bì.

⁴⁸Dì, màrábà ángùdhi adrélépi tà nda kí ni ko gò, adrészó tà kítswábhá à kòbhwà akódhi ásà dhi kí 'o dhi, à ní akódhi nda ní bhwa vésè be tsà. Tàko ko, dhya ángùdhi tà bì dhi kí fèzo drá dhi tí dhi, à ní tà bì dhi kí zi kòdhya. Dhya ángùdhi tà bì dhi kí bhàzo drígá dhi tí dhi, à ní tà bì lavulé dhi kí zi kòdhya. »

Yésu ali` tà ru lanzi` zó dhi ní bha móndi` i kòfalé

(À kònò kpà Mátáyò 10:34-36)

⁴⁹«Má alì kítswálé àtsí so bvò dri. Má lè tá dhi, àtsí nda kòko dre!

⁵⁰Dì, adré lèá dhi, má kòdo rè zyà bátlisimò kízà àdhya. Áma togó adré kízà nya tò, tsàlé lókyá tà nda dré dra ru 'òzo kítswálé tití dhi 'á.

⁵¹Mì adré kisùá dhi, má alì bvò dri kitswálé tà kìdríkìdri fe kòdhya? Kóko! Be ro dhi, má adré tàá àmì dré dhi: Má alì mána kitswálé tà ru lanzízó dhi ni bha móndí i kòfalé kòdhya!

⁵²Tàko ko, kìdhólé nyànomvá dhi, móndí nzi dzó àlo na dhi kì ru lanzí àyi kòfalésè: na dhi kì àyi kì alá rì dhi i rú, ìndì rì dhi kì àyi kì alá na dhi i rú.

⁵³I nì ru lanzí: Atá nì áyi alá áyi mváagó rú, ìndì mváagó nì áyi alá áyi atá rú. Andre nì áyi alá áyi mvátòkó rú, ìndì mvátòkó nì áyi alá áyi andre rú. Àdrá nì áyi alá áyi àdramvá rú, ìndì àdramvá nì áyi alá áyi àdrá rú. »

Lókyá nìma lanzi le dhi

(À kònò kpà Màtayò 16:2-3)

⁵⁴Yésu gò tàá móndyá zyandre nda i dré dhi: «Mì kàdré ndùrùku no adrérà'a angálé kítú dré ndírà lésè dhi, mì adré tàá dhi: «Gí ko, bhù nì dra dhi» gò, bhù nda dré dhizo báti.

⁵⁵Lyă kàdré avílé tàbhu lésè dhi, mì adré tàá dhi «Kítú nì dra ka» gò, dré kàzo báti.

⁵⁶Àmì túrúpfúbhá 'i! Mì nì kó bvò kì lású bhù mìbhalé be dhi lanzílé dhi be dhi, mì kitswá dì àmikya lókyá ándrò kòndi nì tà ni lanzílé bwà ko àdho tà sè? »

Mì ` lotó àmì kì tà tòbvó tòma kandrá

(À kònò kpà Màtayò 5:25-26)

⁵⁷«Mì kitswá adrélé tà kì kòfalé ni lanzílé, adrészó tà gyägya kipè 'ole dhi bwà ko àdho tà sè?

⁵⁸Mì kàdré lìle dhya adrélépi ámì asíkì dhi be tòbvó tárà na dhi, lè mí kònà láti mì dré kítswázó ru yi akódhi be drìdrì mì dré tsàzo dhi kandrá. Mí kò'o kònìnì ko dhi, akódhi nì ámì dri tòbvó tòlepi kandrá, tòbvó tòlepi nda dré ámì fèzo pòlísì drígá gò, akódhi nda dré ámì bhèzo bádzó na.

⁵⁹Má adré tàá mí dré dhi: Mí kitswá apfòle kònalésè ko, tsàle lókyá mí dré dra màri nda nì logózó akílé tití dhi 'á. »

Lúkà 13

Dhyá kì togó ladzama

¹Lókyá nda sè dhi, móndí àruka i dré alìzo Yésu vélé, móndí àruka Gàlìlàyà lésè dhi kì tupfuma nì tà longó drá. Pilátò 'o tá àyi nda i tupfûlé todràle, i dré tá adrérà'a móbòmà fe Giká dré dhi 'á.

²Dì Yésu dré logózóá àyi dré dhi: «Mì adré kisùá dhi, dhya Gàlìlàyà lésè nda i 'o tá tákonzì móndyá àruka tití Gàlìlàyà na dhi kya kì lavú, i dré kizà nyâle todràzo lású be kònìnì dhi sè? »

³Kóko! Dì, má adré mána tàá àmì dré dhi: Mì kòladzà àmì kì togó ko dhi, mì nì kókpà todrà akílé tití àyi nda i tíni.

⁴Kàdré ngalè dhya mudrí-drì-nzi-drì-na dzó mvumvù Sìlòwámà àdhya dré tá arízó àyi drì àyi kí tupfú dhì kí tà sè dhì, mì adré kisùá dhì, àyi nda i 'o tá tàkonzì móndyá àruka tití adrébhá Yérúsalémà na dhì kya kí lavú?

⁵Kóko! Di, má adré mána tàá àmì dré dhì: Mì kòladzá àmì kí togó ko dhì, mì ni kókpà todrà akilé tití àyi nda i tíni. »

Pí' dhì' gó fígi fa lò'wa 'alepi ko dhì ni tà dri dhì

⁶Yésu gò pídhígó kònìdhì ni pi àyi dré, tazoá dhì: «Agó àlo dhì bhe tá fígi fa áyi amvú vínò àdhya na. Bvóá dhì, dré lìzo lò'wa nda sílá ká, di, dré kisúzóá ko.

⁷Gò dré tazoá amvú nda ni likílépi dré dhì: «Mí nò rè ká! Kóná na, má landú lò'wa nda kíle fígi fa kònìdhì sílé ká, di, má dré kisúzóá ko. Mí ga di akódhì. Adré bvò kikí àngyá àdho tà sè? »

⁸Di, amvú likílépi nda gò logóá drá dhì: «Míri, mí gò rè tayíá kóná kònìdhì sè ká. Má ni kìní zálá dhì ni agá kúrú gò, mbì ànjwá dàzo driá.

⁹Àruka ni, a ni go lò'wa 'a kóná adrélépi alìle dhì sè. Di, kò'a ko dhì, mí ni kítswá 'òá gàle. »»

Yésu tiidri' tòkó àlo dhì sàbátù tú

¹⁰Sàbátù àlo dhì, Yésu adré tá tà tadhá Yúdà ànzì kí lìsámbò dzó kí àlo na.

¹¹Di tòkó àlo tirí kònzi dré rúbhá ni ni 'òzo adrélé drà ro dhì tá kpà kònàle. Tirí nda 'o tá akódhì ni amvò atrulé vwàle kóná be mudrí-drì-nzi-drì-na gò, akódhì dré kítswázó áyi kidzì bwà ko.

¹²Di Yésu kònò tòkó nda dre dhì, dré akódhì ni azízó, tazoá drá dhì: «Tòkó, à atrì mi ámì drà lésè dre! »

¹³Dré drígá bhàzo akódhì dri gò, gbă kòdhwa, akódhì dré áyi kidzìzo gò kidhólé adrélé Gíká ni rú bha kùle.

¹⁴Di, lìsámbò dzó nda ni kàdrì ni togó dré aswázó Yésu rú, dré móndí tiidrilé sàbátù tú dhì sè. Gò dré tazoá móndyá zyandre kònàle dhì i dré dhì: «Kítú adrészó àzí 'o ásà dhì i nzi-drì-àlo. Lè mì kàdré di alìle àmì kí 'o tiidrilé kítú nda i sè, kítú sàbátù àdhya sè ko. »

¹⁵Di, Míri logó drá dhì: «Àmì tûrúpfúbhá 'i! Sàbátù tú dhì, àmì àlo àlo tití dhì i, mì adré àmì kí tí 'i yà, kó ngalè àmì kí púndà 'i yà dhì kí atrì àrà i dré adrészó ngá nya dhì lésè, adrészó àyi kí se lìle yí mvu dhì ko?

¹⁶Adré di tá lèá ko, à kàtrì tòkó Àbàrámà ni zapi ró Sàtánà dré tá 'ile vwàle kóná be mudrí-drì-nzi-drì-na kònìdhì sàbátù tú dhì? »

¹⁷Yésu kòtà tà nda dre dhì, akódhì ni kàribhá tití dhì i adré tá vélé kanyò ro. Di, móndyá zyandre tití dhì i adré tá àyikya lenzélé, tà tití líndriga ró dré tá adrélé 'ole dhì kí tà sè.

Tà tadhálé mütádì lò'wa ni tà rú dhì

(À kònò kpà Mâtayò 13:31-32; Márokò 4:30-32)

¹⁸Gò Yésu dré tazoá dhi: «Gìká ni Òpì sù ngóró àdho tíni? Má ni tà ni ni tadhá àdho ngá rú?

¹⁹Òpì nda sù ngóró mütadì lò'wa dhya àlo dré dôle rile áyi amvú na dhi tíni. Lò'wa nda dré apfozo mbàle atsálé fa tíni gò, àré i dré bhà sizo kólá ni i drìna. »

Tà tadhálé tàkú ni tà rú dhi

(À kònò kpà Mâtayò 13:33)

²⁰Yésu gò tàá dhi: «Má ni kitswá Giká ni Òpì ni tà tadhá àdho ngá rú?

²¹Òpì nda sù ngóró tàkú mvá tsà tòkó àlo dré adolé amulé fóndro kàdrì dhi be gò, tàkú nda dré fóndro nda ni 'òzo avolé tití dhi tíni. »

Fì `ma dzóti wàlepi ko dhi 'ásè dhi

(À kònò kpà Mâtayò 7:13-14, 21-23)

²²Yésu dré tá adrérà'a lìle Yèrúsalémà na dhi 'á dhi, adré tá lavulé tà tadhábe bhàandre i 'ásè ìndì bhà tsàtsà i 'ásè.

²³Gò móndí àruka i dré akodhi ni lizízó tazoá dhi: «Míri, móndyá dra lídrì kóná vésè kólyá dhi ni kisúbhá dhi ki ngbà 'í adré tsà? » Di Yésu logó àyi dré dhi:

²⁴«Mì kàdré àmi ki rinyí fe tití fízo Giká ni Òpì na dzóti wàlepi ko dhi 'ásè. Tako ko, má adré tàá àmi dré dhi: Móndí zyandre dhi ki láti nda kitswázó tá file lána ká. Di, i kitswá àyikya file bwà ko.

²⁵Lókyá dzó lìyí dré dra ngàzo dzóti asé dhi tú dhi, a ni àmi ki ki kivì na. Gò mì dré kihózó adrélé dzóti ga, adrészó tàá dhi: «Míri, mí nzì àma dré dzóti wà! » Di, a ni logóà àmi dré dhi: «Má ni àmi ko. Má ni ngalè mì angá ángolésè ya dhi ko. »

²⁶Di mì ni tàá dhi: «Mà nya tá ngá, ìndì mà mvu tá ngá túmäní mí be. Mí tadhá tá kpà tà àma ki láti andre i 'ásè. »

²⁷Di, dzó lìyí nda ni go logóà àmi dré dhi: «Má ni àmi ko. Má ni ngalè mì angá ángolésè ya dhi ko. Àmi tà kònzi 'obhá tití ni i, mì nga má mìlésè! »

²⁸Di mì ni Àbàramà ki no, Isákà íbe, Yàkóbhò be, ìndì pròfétà tití dhi íbe Giká ni Òpì na gò, àmi ki bhèzo kivì na. Kònàle dhi, à ni adré tongolé, adrészó kpà sikkálandrá tsì.

²⁹Móndí ki alì kitú dré apfòrà lésè, kitú dré ndirà lésè, kurú lésè, ìndì tàbhu lésè gò, lirilé mísá làgásè Giká ni Òpì na.

³⁰Di, mì yi rè ká! Móndí àruka adrébhá bvólé ro nyànomvá dhi ki go adrélé drìdrì. Móndí àruka adrébhá drìdrì nyànomvá dhi ki go adrélé bvólé ró. »

Yésu ngo Yèrúsalémà ni tà sè

(À kònò kpà Mâtayò 23:37-39)

³¹Lókyá nda sè dhi, Fàrisayò àruka i dré àyi ki kisizó ànyi Yésu làga, tàá drá dhi: «Mí nga kònwasè lìle àrà àzya na! Tako ko, Èródè adré ína ámi le pfûle dràle. »

³²Dì Yésu logó àyi dré dhi: «Mì lì tàá kìlìwá kòdhì dré dhi: <Ándrò tsàle kìdru dhi, má ní tìrí kònzi kì dro topfole móndí i lésè, adrészó móndí kì tìdrí àyi kì drà i lésè. Kitú ní na sè dhi, má ní áma àzí 'o akílé tití. >

³³Dì, ándrò, kìdru, tsàle kitú bvóá dhi tú dhi, adrë leá dhi, má kògò adrélé lìle drìdrì. Tako ko, kìtswá à kòpfu pròfétà àlo dràle àrà twá Yèrúsalémà rúsè dhi na dhi ko.

³⁴Á! Yèrúsalémà, Yèrúsalémà, mi adrélépi pròfétà kì tupfú todràle, adrészó kpà dhyà Gìká dré adrélé amùle mí vélé dhi ki lebhé todràle kírà sè ni! Tsàle vésè be ángopí, má lè tá ámi ànzì kì kìmólé má zàle, ngóró tà'u dré adrélé áyi ànzimvá kì kìmó áyi kupfú zàle dhi tíni dhi? Dì, mí lè tá àmikya ko.

³⁵Dì mì yi rè ká! À tayí àmì kì dzó ngbo dre. Má adrë tåá àmì dré dhi: Mì gò vélé áma no ko, tsàle lókyá mí dré dra tåzoá dhi <Tà taní kàdré dhyà adrélépi alìle Míri ní rú sè dhi dri! > dhi 'á. »

Lükà 14

Yésu tìdrí' agó àlo dhi sàbátù tú

¹Sàbátù àlo dhi, Yésu lì tá ngá nya Fàrisayò kì kàdrì kì àlo bhàna. Mónyá kònàle dhi i adrë tá akodhi ní mí ga.

²Gò agó àlo rúbhá tovólépi dhi dré alìzo áyi totó Yésu kandrá.

³Dì Yésu dré lizízóá Fàrisayò i tí tátrítrí kúlí tadhábhá íbe dhi: «Àma kì tátrítrí kúlí ka'lì, à kàdré móndí kì tìdrí sàbátù tú dhi 'í? Kó ngalè, ka'lì ko? »

⁴Dì, i dré àyikya adrészó kíri. Dì Yésu dré drígá bhàzo agó nda dri, akodhi ní tìdrízó gò, láti fèzo drá dré lìzo.

⁵Dré gózo lizíá àyi tí dhi: «Dhyà àlo àmì kòfalé dhi kàdré mvámvá íbe yà kó ngalè tí àlo dhi íbe yà gò, dré dhèzo bhú na sàbátù tú dhi, dhyà nda kìtswá tsì aséá gbà kitú nda sè ko? »

⁶Dì, i kìtswá tá àyikya kúlí logó tà nda dri bwà ko.

Dhyá kì tà bhàma kìní mi dhi

⁷Gò Yésu dré atógyàzoá dhi, móndyá azílé ngá nya nda i adrë tá àyikya lìrìrà lìndrì àdhya kì kipè kòdhya. Dì dré tà tadházó àyi dré kònìnì:

⁸«À kàdré ámi zi gwányá làmó àdhya na dhi, mí kòlirí àrà lìndrì àdhya na ko. Tako ko, àrukà ní, dhyà ámi zilepi nda zi kpà móndí àzya ámi lavúlépi lìndrì sè dhi 'í.

⁹Kàdré kònìnì dhi, a ní alì tåá mí dré dhi: <Mí tayí lìrìrà kònìdhì dhyà kòdhì dré. > Dì kanyò ní ámi 'o, mí dré adrérà'a lìle lìrìlé àrà kùdù ro dhi na dhi 'á.

¹⁰Dì, à kàdré ámi zi ngá nya dhi, mí kòlirí mína àrà kùdù ro dhi na, kìtswálé dhyà ámi zilepi nda kònì atsá dhi, kòtaró mí dré dhi: <Áma arúpi, mí nga lìle lìrìlé àrà

lindrì àdhyà na! › Dì tà nda ni lindrì fe mí dré móndyá tití mì dré adrészó lirílé mísá làgásè túmání àyi íbe dhi i mìlésè.

¹¹Tàko ko, dhya ángùdhi adrélépi áyi tà bha kuru dhi, Gìká ni akódhi nda ni tà tirí kìní mi. Dì, dhya adrélépi áyi tà bha kìní mi dhi, Gìká ni akódhi nda ni tà tingá kuru. »

¹²Gò Yésu dré tázoo dhya áyi azilépi nda dré dhi: «Mí kàdré gwányá 'o móndí i dré dhi, gba kàdré kitú rírì sè yà, kó ngalè ìndró sè yà dhi, mí kòzi ámi arúpi i 'i yà, ámi adrúpi i 'i yà, ámi aró i 'i yà, kó ngalè ámi bhàzì ngábhá ro dhi i 'i yà dhi ko. Tàko ko, mí kàdré 'òá kònini dhi, àyi nda kì go kpà ámi zi ngá nya, tà mí dré 'ole àyi dré nda ni vúdrì logozó mí dré.

¹³Dì, mí kàdré gwányá 'o dhi, mí kòzi mína lemerèbhá i, móndí rúbhá be yàyà dhi i, mèrèkpè i, ìndì mì kùdükùdu íbe kòdhyà.

¹⁴Dì Gìká ni tà taní bha mí dri ásà. Tàko ko, àyi nda ngá àko logolé mí dré. Dì, Gìká ni ína tà mí dré 'ole nda ni vúdrì logó mí dré, kitú móndyá gyágya dhi i dré dra ngàzo dràdrà 'ásè dhi tú dhi nì. »

Pi' dhi' gó gwányá kàdri` ni tà dri dhi

(À kònò kpà Màtayò 22:1-10)

¹⁵Móndyá adrébhá tá mísá làgásè túmání Yésu be dhi kì àlo kòyi tà nda dre dhi, dré tázoo drá dhi: «Kólénzé ni adré dhya dra gwányá nyabhá Gìká ni Òpì na dhi i dré! »

¹⁶Gò Yésu dré tázoo drá dhi: «Agó àlo dhi adré tá gwányá kàdrì dhi ni 'o gó, dré móndí zyandre dhi kì azizó kitswálé ngá nya.

¹⁷Lókyá gwányá nda ni nyàzo dhi kòkitswá dre dhi, dré áyi màrabà ni mùzo lìle tàá móndyá i dré tá azilé nda i dré dhi: «Mì alì wà! Tà tití dhi i gànzi ró. »

¹⁸Dì, àyi àlo àlo tití nda i dré ngàzo adrélé tázoo dhi, à kòdo àyi kònzi ko. Tà logá àyi nì. Dhya drìdrì dhi tà tá dhi: «Má gi mána amvú. Adré lèá dhi, má kòlì nòá. Má adré ámi ti lizí, mí kòdoró ma kònzi ko! »

¹⁹Àzya ni tà tá dhi: «Má gi mána tí mudrí dhi i. Má adré lìle tí nda kì tabhì. Má adré ámi ti lizí, mí kòdoró ma kònzi ko! »

²⁰Àzya ni tà tá dhi: «Má mo rè tokó nyànomvá. Ásà dhi, má kitswá lìle kònàle bwà ko. »

²¹Gò màrabà nda dré agòzo ta nda kì longó áyi míri dré. Dì dzó líyí nda ni togó dré aswázó gó, dré tázoo áyi màrabà nda dré dhi: «Mí lì mbèlè bhàandre ni láti andre i 'ásè ìndì láti tsàtsà i 'ásè. Mí adrì lemerèbhá i, móndí rúbhá be yàyà dhi i, mì kùdükùdu i, tsàle mèrèkpè íbe, alìzo àyi íbe kònwa. »

²²Gò màrabà nda dré gózo agòle tázoo dhi: «Míri, má 'o tà mí dré tázoo dhi dre. Dì, àrà àngyá dhi dhu rè be. »

²³Dì dzó líví nda dré tàzoá áyi màrabà nda dré dhi: «Mí lì láti gbàbhú na dhi i 'ásè, ìndì láti amvú làga dhi i 'ásè. Mí 'o móndí i afilé rinyí sè áma dzó lé, áma dzó kògaró móndí i sè bǐ be dhi bvó.

²⁴Tàko ko, má adré tàá àmí dré dhi: Dhya má dré tá azilé drìdrì nda kí àlo kitswá ína áma gwányá tabhì nyàle ko. »»

Tà tití dhi kí gáma adrészó Yésu ni lebè dhi

(À kònò kpà Mâtayò 10:37-38)

²⁵Móndí zyandre lavulé dhi i adré tá lile túmání Yésu be láti 'ásè. Gò akodhì dré áyi alázó tàá àyì dré dhi:

²⁶«Dhya ángùdhi adréléri alile má vélé gò, dré adrészó áma le áyi atá ní lavú, áyi andre ní lavú, áyi tòkó ní lavú, áyi ànzì kí lavú, áyi adrúpi kí lavú, áyi amvúpi kí lavú, ìndì áyi tändi ní lídrì lavú ko dhi, dhya nda kitswá adréléri áma lebèlepi ró ko.

²⁷Dhya ángùdhi adréléri áyi fa kipakipa do, adrészó alile má vésè dhi ko dhi, kitswá kpà adréléri áma lebèlepi ró ko.

²⁸Dhya àlo àmí kòfalé dhi kàdré dzó mvumvù le sile dhi, adré zakó rè zyà lirílé làfa i dré dra dzó nda ní sizo ásà dhi ní nda nile 'íká, nòzoá ngalè i làfa íbe kitswázó dzó nda ní si akílé tití bwà yà dhi?

²⁹Tàko ko, kòbhà dzó nda ní pá gò, kitswázó siá akílé bwà ko dhi, móndyá tití dra dzó nda ní nobhá dhi kí akodhì ní gu,

³⁰adrészó tàá dhi: «Mí nò ká! Agó kòdhì kídhò tá dzó sile gò, dré kitswázó siá akílé bwà ko! ›

³¹Kó ngalè, ópí àlo dhi kàdré 'ole lile àdzú bhu ópí àzya be dhi, adré zakó rè zyà lirílé kisùá 'íká ngalè àyì áyi sòdá ngùlù-mudrì dhi íbe dhi kí kitswá ópí àzya i sòdá ní ngùlù-nyadhi-àlo dhi íbe adrébhá alile dhi kí lavú bwà yà dhi?

³²Akodhì kònò i kitswá ko dhi, adré móndí kí mu lile ópí àzya nda véna, dré rè dhu adrérà'a vwàvwà ro dhi 'á, akodhì ní ti lizí àdzú kàdrérò àyì kòfalésè yó.

³³Kókpà kòdhì tití, dhya ángùdhi àmí kòfalé, áyi ngá tití dhi kí gálepi ko dhi, kitswá ína adréléri áma lebèlepi ró ko.

³⁴Tà'í ngá doro 'í. Dì, tà'í ní aswaaswa kòtì akílé lásà dhi, à ní kitswá logóá ngíni?

³⁵Akodhì ní àzí vélé kìní dré yà, kó ngalè kòròsò àjwá dré yà dhi yó. À adré vélé ndirì kutúákutua. Dhya ángùdhi adréléri bíbhálé íbe tà yìzo dhi kòyi! »

Lúkà 15

Pi' dhi' gó kábilígyà avi` lepi dhi ni tà dri dhi

(À kònò kpà Mâtayò 18:12-14)

¹Kítú àlo dhi, mèdáyì lagibhá bǐ dhi i ìndì móndí bǐ adréléri nòle takonzibhá ro dhi íbe dhi i adré tá àyì kí kisí ànyì Yésu làga kitswálé akodhì ní kúlì yi.

²Dì Fàrisayò i tátrítrí kúlí tadhábhá íbe dhi i dré dhèzo adrélé Yésu ní ndri, adrészó tàá dhi: «Dhya kòdhì adré ína tàkonzìbhá kí ka'ì, adrészó ngá nya túmání àyi íbe! »

³Dì Yésu dré pídhígó kònìdhi ní pìzo àyi dré, tàzoá dhi:

⁴«Dhya àlo àmì kòfalé dhi kàdré kábilígyà íbe nyadhi-nzi gò, àyi kí àlo dré avìzo dhi, a ní 'òá ngíni? A ní zakó tsì kábilígyà nyadhi-su-drì-mudrì-drì-nzi-drì-su nda kí tayí ngálángba 'á gò, lìzo akódhi avìlepi nda ní ndabe, tsàle lókyá dré dra kisúzóá dhi 'á.

⁵Dì kòkisú kábilígyà nda dre dhi, a ní adóá abhélé í kembé,

⁶nzìzo ába í bhàna arí sè. Kòtsa dre dhi, a ní áyi arúpi kí azí áyi bhàzí íbe, tàzoá àyi dré dhi: «Mà kòlenzé túmání àmì íbe wà! Àngyá ko, má kisú kábilígyà mána avìlepi ní dre. »

⁷Má adré tàá àmì dré dhi: Kókpà kòdhì tíni, arí adré gàle bhù na bì tàkonzì lìyí àlo áyi togó ladzálépi dhi ní tà sè, arí móndí gyägya nyadhi-su-drì-mudrì-drì-nzi-drì-su avìbhá ko dhi kí tà sè dhi ní lavú. »

Pí́ dhí gó làfa lò'wa avi`lepi dhi ní tà dri dhi

⁸«Kó ngalè, tòkó àlo dhi kàdré làfa lò'wa íbe mudrì gò àlo ní dré avìzo dhi, a ní 'òá ngíni? A ní zakó tsì tálà dhi, adrészó áyi dzó 'álé awá tití adrészó làfa lò'wa nda ní nda, tsàle lókyá dré dra kisúzóá dhi 'á.

⁹Dì kòkisú dre dhi, a ní áyi arúpi kí azí áyi bhàzí íbe, tàzoá àyi dré dhi: «Mà kòlenzé túmání àmì íbe wà! Àngyá ko, má kisú làfa lò'wa mána avìlepi ní dre. »

¹⁰Má adré tàá àmì dré dhi: Kókpà kòdhì tíni, arí adré gàle ángéló Gìká àdhya i kòfalé bì, tàkonzì lìyí àlo áyi togó ladzálépi dhi ní tà sè. »

Pí́ dhí gó mváagó avi`lepi dhi ní tà dri dhi

¹¹Yésu gò pídhígó kònìdhi ní pi, tàzoá dhi: «Agó àlo dhi tá ànziàgo íbe rì.

¹²Gò mvá tùgu ró dhi dré tàzoá áyi atá dré dhi: «Tátá, mí afè má dré ngá má dré kitswálé kisúlé ámì tàyilé ro dhi i. » Dì akódhi ní atá dré tàyilé nda ní lanzízó àyi dré kàyo ní be.

¹³Gí ko, mvá tùgu nda dré áyi ngá tití nda kí lagízó, làfa ní ní dòzo lìzo ába làwú làvo na. Kònàle dhi, dré ngàzo tatsílé tà swà 'obe, làfa ína ní kizázó.

¹⁴Kòkizá ngá nda akílé tití dre dhi, kàrabhò dré dhèzo bvò nda na gò, ngá dré kitswálé nyàle dhi dré vélé adrészó yókódhó.

¹⁵Dì dré ngàzo lìle àzí lizí 'ole bhàmvá àlo bvò nda lé dhi véna. Gò bhàmvá nda dré akódhi ní mùzo lìle áyi amvú na adrélé áyi tìgá kí likí.

¹⁶Mvá tùgu nda tá lovó íbe tò mányàngá tìgá nda i dré tá adrélé nyàle dhi kí adózó nyàle. Dì, à fè tá drá ngá àlo dré kitswálé nyàle dhi ko.

¹⁷Tà nda kòfì akódhi rú dre dhi, dré ngàzo kisùá í léna dhi: «Áma atá ní àzibhá ángopí dhi i mányàngá íbe bì gò, má dré mána adrészó dràle tâbirí dré dhi? »

¹⁸Má ní nga nzìle áma atá bhàna gò, tàá drá dhi: Tátá, má 'o tàkonzì Gìká rú, ìndì mí rú.

¹⁹Kitswá vélé mí dré gòzo adrélé áma zi ámi mvá ro dhi ko. Mí kòdo vélé ma ngóró ámi àzibhá kí àlo tíni. ›

²⁰Gò dré ngàzo láti do nzìzo áyi atá bhàna. Dré rè dhu adrérà'a vwàvvà ro bhà rúsè dhi 'á dhi, atá ní dré akódhí ní nòzo, kizà dòzo áyi togó na akódhí ní tà sè gò, ràzo dhèle agá akódhí ní kamú.

²¹Gò mvá tûgu nda dré tàzoá drá dhi: <Tátá, má 'o tàkonzì Gìká rú, ìndì mí rú. Kitswá vélé mí dré gòzo adrélé áma zi ámi mvá ro dhi ko. ›

²²Dí, atá ní dré ína tàzoá áyi màrabà i dré dhi: <Mí adó kánzò avélépi lavúlé dhi asólé akódhí rú mbèlè. Mí adó trónjo asólé drígá, kámokà kí adózó kpà tosólé pá. ›

²³Mí asé tí ngbòlò dò ro dhi lile, mà konyaró gwányá lenzézó lavúlé.

²⁴Tàko ko, áma mvá kònìdhí drà tá ína dràdrà gò, dré gòzo adrílé! Avì tá ína avìavì gò, má dré gòzo kisúá! › Dí i dré kidhózó adrélé gwányá 'o.

²⁵Lókyá nda sè dhi, agó nda ní mvá kàyo tá amvú na. Dré tá adrérà'a anzilé atsálé ànyi bhà làga dhi 'á dhi, dré lärí yìzo longó íbe.

²⁶Dí dré màrabà kí àlo azízó gò, lizizóá tíá ngalè kònàle àdho tà 'i ya dhi.

²⁷Màrabà nda dré logozóá drá dhi: <Ámi adrúpi anzí ní gò, ámi atá dré tí ngbòlò dò ro dhi ní 'òzo lile, dré gòle akódhí ní kisú líná dhi sè. ›

²⁸Dí mvá kàyo nda ní togó dré ngàzo aswálé gò, dré ína fíma dzó na dhi ní gàzo rè. Atá ní koyi tà nda dre dhi, dré apfozo akódhí ní ti lizí, kòfiró be dhi bvó.

²⁹Dí, mvá kàyo nda dré ína logozóá áyi atá dré dhi: <Mí nò rè ká! Kóná bí, má 'o àzí mí dré ámi màrabà tíni, ámi tolí kí àlo ño àko ró. Dí, mí afè ndìndì má dré ndri mvá àlo dhi, mà konyaró lenzézó túmäní áma arúpi íbe dhi ko. ›

³⁰Dí, ámi mváagó ámi ngá tití dhi kí kizálépi akílé tokó zàràbhù kí tà dri kòdhí kànzi dre dhi, mí dré mína tí ngbòlò dò ro dhi ní 'òzo lile drá! ›³¹ Atá ní gò tàá drá dhi: <Áma mvá, àma ngbú túmäní mí be. Ngá tití mána i, mína i. ›

³²Dí, adré tá lèá dhi, mà kò'o gwányá lenzézó. Àngyá ko, ámi adrúpi kòdhí drà tá ína dràdrà gò, dré gòzo adrílé! Avì tá ína avìavì gò, mà dré gòzo kisúá! »»

Lükà 16

Pí' dhi' gó dhya ngá likí' lépi tògyá sè dhi ní tà dri dhi

¹Gò Yésu dré pídhígó kònìdhí ní pìzo áyi lebèbhá i dré, tàzoá dhi: «Ngá líyí àlo dhi bhà tá dhya àlo adrélé áyi ngá kí likí. Gò à dré akódhí nda ní asíkizo ngá líyí nda véna, tàzoá dhi: <Akódhí adré ámi ngá kí kizá. ›

²Dì ngá líyí nda dré akódhì ni azízó, lizízóá tíá dhi: «Tà má dré adrélé yile ámi tà dri kòdhì, àdho tà 'i? Mí tà rè má dré, mí 'o àzí bhàle mí drígá dhi ngíni ya dhi ká! Àngyá ko, mí kítswá vélé adrélé áma ngá likílépi ró ko. »

³Dì ngá likílépi nda dré ngàzo kisùá í léna dhi: «Má ni 'oá ngíni? Tako ko, áma míri adré 'ole àzí kòndi ni tingá má drígásè. Áma rinyí kitswá ína má dré amvú 'azo dhi ko. Ngá zizi ni tá kpà adré má dri kanyò ro. »

⁴Má ni tà má dré dra 'ole dhi be, à kònì dra àzí kòndi ni tingá má drígásè dhi, móndi i kòka'iró ma dòle àyi véna dóro. »

⁵Dì dré ngàzo móndyá áyi míri ni mìri íbe àyi rú dhi kí azí àlo àlo tití. Gò dré lizízóá dhya drídri dhi tí dhi: «Áma míri ni mìri mí rú dhi ángopí? »

⁶Akódhì nda logó dhi: «Dò olivè àdhya tsímangóro nyadhi-nzi. » Dì ngá likílépi nda tà drá dhi: «Mí adó ámi wárágà, lirízó mbèlè tisiá dhi: nyadhi-rì-drì-mudrì. »

⁷Gò dré lizízóá àzya ni tí dhi: «Mí, áma míri ni mìri mí rú dhi ángopí? » Akódhì logó dhi: «Ngánò sákì nyadhi-nzi. » Dì ngá likílépi nda tà drá dhi: «Mí adó ámi wárágà tisiyoá dhi: nyadhi-su. »

⁸Àmvolásà, míri nda kòyi tà áyi ngá likílépi gyägya ko nda dré 'ole dhi dre dhi, dré akódhì ni tà bhàzo kuru, dré tá tà 'ole tògyá sè dhi sè. Tako ko, móndyá bvò kòndi àdhya i adré àyikya tà 'o tògyá sè àyi kòfalésè, móndyá ngádra àdhya kí lavú.

⁹Má adré dì tàá àmi dré dhi: Mí kàdré móndi kí 'o adrélé àmi kí arúpi i ró làfa bvò kòndi àdhya sè, kítswálé làfa nda kònì dra akí dhi, à kòka'iró àmi file bhà dra adrébhá kóná vésè kólyá dhi i 'ásè be dhi bvó.

¹⁰Dhya ángùdhì kítswálépi adrélé ka'ile tà tsà sè dhi, a ni kókpà kítswá adrélé ka'ile tà kàdrì sè. Dì, dhya adrélépi tà 'o gyägya tà tsà sè ko dhi, a kítswá kókpà tà 'o gyägya tà kàdrì sè ko.

¹¹Dì mì kòkítswá adrélé ka'ile ngá bvò kòndi àdhya sè ko dhi, àdhi ni àmi kí ka'i, ngá tändi bhù àdhya kí tayízó àmi drígá dhi nì?

¹²Mí kòkítswá kpà adrélé ka'ile ngá móndi àzya àdhya sè ko dhi, àdhi ni ngá fe àmi dré adrélé àmikya ró dhi nì?

¹³Màrabà àlo dhi kítswá míri rì dhi kí tà 'o lókyá àlo sè bwà ko. Tako ko, kàdré 'oá kònini dhi, a ni àlo ni ni ga, adrészó àzya ni ni le. Kó ngalè, a ni tro àlo ni rú, adrészó àzya ni ni ayízè. Dì mì kítswá adrélé Gíká ni tà 'o, adrészó kpà làfa ni tà 'o àyi kí màrabà tini lókyá àlo sè bwà ko. »

¹⁴Fàrisayò adrébhá tá làfa le tò dhi i kòyi tà nda i tití dre dhi, i dré dhèzo adrélé Yésu ni gu.

¹⁵Dì akódhì dré tazoá àyi dré dhi: «Mí adré àmikya àmi kí bha gyägya móndi i kandrá dhi àmi. Dì, Gíká ni ína àmi kí togó be. Àngyá ko, tà móndi i dré adrélé bhàle kuru àyi kòfalé dhi, tà gàle gàgà dhi 'i Gíká milésè. »

Tà àzya Yésu dré tadhálé dhi i

(À kònò kpà Màtayò 11:12-13; 5:31-32; Márokò 10:11-12)

¹⁶ «À longó tá tà tisile Mósè ni tátrítrí kúlì na ìndì pròfétà kí búkù i 'ásè dhi i, tsàle Yòwáni Bâtisimò fèlepi ni lókyá 'á. Di kidholé lókyá nda sè dhi, à adré Rúbí Tani Giká ni Òpì àdhya ni longó kòdhya gò, móndyá tití dhi i dré adrészó àyi kí rinyí fe fízo lána.

¹⁷ Di, tágba dré adrészó kònini dhi, bhù i bvò be dhi kí kitswá akílé mbèlè lavulé tà mvá tsà tisile tátrítrí kúlì nda léna dhi rúsè.

¹⁸ Dhya ángùdhi áyi tokó ni tingálépi gò gózo tokó àzya adó mòle dhi, adré ína múná tà 'o. Kòdhí íbe dhi, dhya ángùdhi tokó tingálé dre dhi ni adólépi mòle dhi, adré kpà múná tà 'o. »

Pi' dhi' gó ngá líyí i Lázárò be dhi kí tà dri dhi

¹⁹ Yésu gó tàá dhi: «Agó àlo ngá líyí ro dhi tá be. Adré tá kítá aveave làgí kyàkyà dhi kí asó í rú, adrészó ngá dóro nya, adrészó kpà lenzélé kitú àlo àlo tití i sè.

²⁰ Di, akódhí nda ni bhà'álé tí dhi, à la tá agó àlo lemerè ro rú be Lázárò, adrélépi làzí íbe bí í rú dhi.

²¹ Akódhí nda tá lovó íbe tò kitswázó ngá kórónyá adrébhá tá ledhélé ngá líyí nda ni mísá drilésè dhi kí nya ká. Di, kitswá tá ína bwà ko. Kòkí i adré tá ndindì alile akódhí ni làzí kí mi lembé.

²² Kùdù ro dhi, agó lemerè ro nda dré dràzo gò, ángéló i dré akódhí ni dòzo lìzo bhàá ànyi Àbàramà làga. Ngá líyí nda dré kókpà dràzo gò, sizoá.

²³ Akódhí kòkisú i adrérà'a rúbhá aswálé dràbhá kí àrà na dre dhi, dré mi tingázó Àbàramà kí no làwú làvo na, túmání Lázárò ànyi làgá dhi be.

²⁴ Di dré kúlì yòzo tázoo dhi: «Tátá Àbàramà, mí bhà áma kizà wà! Mí amù Lázárò áyi drígámbílì so yí na, tìle áma làdra dri. Àngyá ko, áma rúbhá adré aswálé atsí kònìdhí 'á tò. »

²⁵ Di, Àbàramà logó drá dhi: «Áma mvá, mí kisù rè ngá dóro tití mí dré tá kisulé mí dré adrérà'a lídrì be dhi 'á dhi i ká. Di, Lázárò kisú tá ngbà 'í tà kònzi dhi i kòdhya. Nyànomvá dhi, à adré di akódhí ni togó tindrì kònwa. Di, ámi rúbhá adré ína aswálé.

²⁶ Kòdhí íbe dhi, à bhà yábhù andre àma kí kòfalé 'á àmi íbe dre. Ásà dhi, dhya adrélépi lèá lavulé àmi véna dhi kitswá lavulé bwà ko. À kitswá kpà azyálé kònalésè àma vélé dhi bwà ko. »

²⁷ Di ngá líyí nda tà dhi: «Tátá, kàdré kònini dhi, má adré ámi ti lizí, mí kòmùró Lázárò lìle áma atá ni dzó na,

²⁸ kòlongóró tà áma adrúpi nzi dhi i dri, i kàlìrò kpà àrà rúbháaswa àdhya kònìdhí lé ko. »²⁹ Abàramà logó drá dhi: «Ayí tà Mósè i dré tisile pròfétà íbe dhi íbe. I koyi tà nda i kòdhya. »

³⁰Di, ngá líví nda tà dhi: «Kóko, Tátá Àbàrámà! Di, dhya àlo ngàlepi dràdrà 'ásè dhi kòlì ína àyi véna dhi, ì ní àyi kí togó ladzá. »

³¹Di, Àbàrámà tà drá dhi: «È kòyi Mósè ni kúlí pròfétà kya íbe dhi i ko dhi, tágba dhya àlo kònga dràdrà lésè yà dhi, ì kitswá kpà dhya nda ni kúlí yi ka'izoá bwà ko. »»

Lúkà 17

Tàkonzi` i tàkonzi` trìma be dhi

(À kònò kpà Mátáyò 18:6-7, 21-22; Márokò 9:42)

¹Yésu gò tàá áyi lebèbhá i dré dhi: «Tà báti ró dhi, tà kitswábhá móndí kí 'o ledhélé tàkonzi na dhi kí dra atsá. Di, kizà ni adré kàdrì dhya ángùdhi adrélépi tà nda kí àndu bha dhi dré!

²Akódhí nda kàdré ndìndì ànzimvá kònì kí àlo 'o dhèle tàkonzi na dhi, dóro ni tá kírà kàdrì 'ile akódhí kembé gò, akódhí ni bhèzo dràle yiandre na dhi.

³Di mì kàdré àmi kí likí be!

Ámi adrúpi kí àlo kò'o tàkonzi mí rú dhi, mí kòtadhá akódhí ni tàkonzi nda drá. Akódhí kòladzá áyi togó tà nda sè dhi, mí kòtrì akódhí ni tàkonzi.

⁴Gba kò'o tàkonzi mí rú vésè be nzi-drì-rì kitú àlo sè gò, dré adrészó agòle mí vélé vésè àlo àlo tití nda i sè adrélé tàá dhi «Má ladzá áma togó dre» dhi, mí kòtrì akódhí ni tàkonzi nda i tití. »

Tà ka'ika'i ni tà

⁵Àpóstolò ì tà Mírì Yésu dré dhi: «Mí kòtimbà àma kí tà ka'ika'i wà. »»

⁶Di Mírì logó dhi: «Mí kàdré tà ka'ika'i íbe tsàmvá ngóró mütádì lò'wa tíni dhi, mì ni kitswá tàá fa kàdrì kònìdhi dré dhi «Mí ngi mi lìzo ámi bhe tìle yiandre na» gò, fa nda dré àmi kí kúlí ka'izo 'ole. »»

Tà kitswálépi màrábà dóro dhi dré 'ole dhi

⁷«Dhya àlo àmi kòfalé dhi kàdré màrábà adrélépi amvú 'a yà, kó ngalè adrélépi kábilígyà likí yà dhi íbe gò, akódhí nda dré agòzo amvú lésè dhi, dhya nda adré tàá drá ngíni? Adré tsì tàá drá dhi: «Mí afí mbèlè lirílé ngá nya»?

⁸Kóko! Di, adré be ína tàá dhi: «Mí ladhí ngá má dré kitswálé nyàle. Mí topfó ámi kítá, ngá bhàzo má dré nyàle ìndì má dré mvùle 'íká, gò mí kògòró mína ni nya, ìndì mína ni mvu ndò. »

⁹Bvóá dhi, mírì nda adré tsì àwoyà ta màrábà nda dré, dré tà tâle í dré dhi kí 'ole dhi sè 'í? Kóko!

¹⁰Di tà nda kòdhí kókpà kònìni àmi dré. Mì kò'o tà tití tâle àmi dré dhi i dre dhi, mì kàdré tàá dhi: «Àma màrábà tâko dhi 'í. Mâ 'o ngbà 'í tà kitswábhá mà dré 'ole dhi i kòdhya. »»

Yésu tìdri` móndi` mudrí kàri` dré rùle dhi i

¹¹Yésu dré tá adrérà'a lìle Yèrúsalémà na dhi 'á dhi, adré tá lavulé bvò Gàliláyà àdhyà kí bvó Sàmàrýà àdhyà be dhi 'ásè.

¹²Dré tá adrérà'a fíle bhà àlo na dhi 'á dhi, móndí mudrí kàré dré rùle dhi ì dré alìzo kitswálé ru kisú ába. Àyi nda ì dré àyi kí kikizó vwàvvà ro tsà gò,

¹³kúlí loyó tázoo dhi: «Yésu, Míri, mí bhà àma kí kizà wà! »

¹⁴Yésu kònò àyi dre dhi, dré tázoo dhi: «Mì lì àmì kí rúbhá kí tadhá kòwánà ì dré. » Dì ì dré adrérà'a lìle dhi 'á dhi, ì dré adrízó.

¹⁵Dì àyi ki àlo kònò í adrí dre dhi dre dhi, dré agòzo Gíká ni rú bhabe kùle kúlí 'u'ù sè.

¹⁶Dré adhézó Yésu pá, áyi mì bha kíní mi gò, àwoyà tázoo drá tà dré tá 'ole í dré nda ni tà sè. Dì akódhi nda tá ína Sàmàrýà agó 'í.

¹⁷Gò Yésu dré lizizóá móndí í làga dhi ì tí dhi: «Àyi adríbhá kòdhí ì tá tsì mudrí ko? Dì àruka ni nzi-drì-su nda í ángwà?

¹⁸Dhya àlo àyi kofalé agòlepi Gíká ni rú bha kùle dhi yókodhó, ngbà 'í agó súrú twá ro kònìdhí 'í? »

¹⁹Gò dré tázoo agó nda dré dhi: «Mí nga lìle. Ámì tà ka'ika'ì tìdrí mi dre. »

Gíká ni Òpì` ni atsama

(À kònò kpà Mâtayò 24:23-28, 37-41)

²⁰Kítú àlo dhi, Fàrisayò ì lizí tá Yésu tí dhi: «Gíká ni Òpì ni atsá ángutú? » Dì Yésu logó àyi dré dhi: «Gíká ni Òpì adré ína alìle ngóró móndí ì dré adrélé ngá letè nòle dhi tini ko.

²¹À kitswá kpà tàá dhi «Mì nò ká, Gíká ni Òpì kònwa! » yà, kó ngalè «Gíká ni Òpì kònàle! » yà dhi ko. Tako ko, Gíká ni Òpì àmì kofalé be. »

²²Dré gòzo tàá áyi lebèbhá ì dré dhi: «Lókyá adrélépi alìle dhi sè dhi, mì ni adré lovó íbe tò kitswázó ndìndí Móndí ni Mvá ni kítú ki àlo no. Dì, mì kitswá àmikya nòá ko.

²³Móndí kí tákà àmì dré dhi «Mì nò ká, akódhi kònàle! » yà, kó ngalè «Akódhi kònwa! » yà dhi. Dì, mì lì àmikya ràle àyi vésè ko.

²⁴Tako ko, kítú Móndí ni Mvá dré dra agòzo dhi tú dhi, a ni agò ngóró bhù dré adrélé lagulé ngá kazá bhù mìbhalé ni bvó àlo lésè tsàle bvó ni àzya na dhi tini.

²⁵Dì, adré lèá dhi, akódhi konya rè zyà kizà lavulé, ìndí móndyá ándrò kònì ì kògà rè zyà akódhi.

²⁶Lókyá Móndí ni Mvá dré adrérà'a 'ole agòle dhi 'á dhi, tà kí adré ngóró Nówè ni lókyá 'á dhi tini.

²⁷Móndí ì adré tá àyikya ngá nya, adrészó ngá mvu, adrészó ru mo, adrészó àyi kí ànzì kí fe mòle, tsàle kítú Nówè dré firà'a bwátù kàdrì na dhi 'á. Gò yí lìti andre dré atsázó ngbò ró àyi kí tupfú todràle tití.

²⁸Tà nda kí adré kpà ngóró Lótò ní lókyá 'á dhí tíni. Móndí i adré tá àyíkya ngá nya, adrészó ngá mvu, adrészó ngá gi, adrészó ngá lagí, adrészó ngá kidhí, adrészó kpà dzó si.

²⁹Dí, kitú Lótò dré apfòzo Sòdómà lésè dhí sè dhí, àtsí i bàrúti íbe dhí i dré adàzo ngbó ró bhù lésè àyi kí tupfú todràle tití.

³⁰Tà nda kòdhí kí adré kókpà kònini kitú Móndí ní Mvá dré dra apfòzo dhí tú.

³¹Kítú nda sè dhí, lè dhya dra adrélépi áyi dzó drìna dhí kàsí file dzó na, áyi ngá kí do lapázó ába dhí ko. Kókpà kòdhí tíni, dhya dra adrélépi amvú na dhí kògò nzile i bhàna ko.

³²Mì kisù rè tà atsálépi Lótò ní tòkó rú dhí ká!

³³Dhya ángùdhí adrélépi áyi tändi ní lídrì le liklé dhí, a ní áyi lídrì nda ní 'o avile. Dí, dhya ángùdhí adrélépi ína áyi lídrì fe dhí, a ní áyi lídrì nda ní likí.

³⁴Má adré tåá àmí dré dhí: Ngátsi nda sè dhí, móndí rí dhí kí adré ayilé lángá àlo dri. À ní àlo ní ní do, àzya ní ní tayí.

³⁵Tòkó rí dhí kí adré ngá 'i túmání. À ní àlo ní ní do, àzya ní ní tayí. » [³⁶] [³⁷] Yésu ní lebèbhá i gò lizia dhí: «Míri, tà nda kí ru 'o ángolé? » Dí Yésu logó àyi dré dhí: «Àrà ángùdhí ábvò dré adrészó lana dhí drile dhí, àrí àgáàga dhí kí kókpà ru kímó kitswálé ábvò nda ní te. »

Lúkà 18

Pi' dhí' gó tayí' tòkó i tàbvó tâlepi be dhí kí tà dri dhí

¹Gò Yésu dré pídhígó kònìdhí ní pìzo, tadházóá áyi lebèbhá i dré dhí, lè i kàdré tà zi Gíká tí landè àko ró ngíni ya dhí.

²Tà dhí: «Tàbvó tâlepi àlo dhí tá bhàandre àlo dhí na. Adré tá ína Gíká ní ro ko, adrészó kpà móndí kí tà kisù ko.

³Dí tayítokó àlo bhàandre nda 'á dhí adré tá ína alile akodhí vélé rä, adrélé tåá dhí: «Mí lanzí rè tà àma kòfalé áma kàribhá be dhí ní bvó, tà gyägya 'òzo má dré dhí ká! »

⁴Lókyá be vwàvwà ro dhí, tàbvó tâlepi nda adré tá tà nda ni ga rè. Dí, kùdù ro dhí, dré ína kisùzoá í léna dhí: «Gba má dré adrészó Gíká ní ro ko yà, adrészó kpà móndí kí tà kisù ko yà dhí,

⁵má ní tà gyägya 'o tayítokó kòdhí dré, dré adrélé áma lagù tò dhí sè. Tako ko, má kò'o kònini ko dhí, akodhí ní ngbú adrélé alile áma drì kizá. »»

⁶Dí Míri gò tåá dhí: «Mí yi rè tà tàbvó tâlepi gyägya ko nda dré tâle dhí ká.

⁷Dí Gíká kitswá tsì tà gyägya 'o móndyá í dré zile gò i dré adrészó liyilé í rú kítú vésè ìndì ngátsi vésè dhí i dré ko? A ní tsì lókyá tigí àyi kí ledézó?

⁸Má adré tàá àmì dré dhi: A ní tà gyägya 'o àyi dré mbèlè. Di, lókyá Móndí ní Mvá dré dra agòzo dhi tú dhi, a ní tsì móndyá adrébhá áyi ka'i báti dhi kí kisú bvò dri dhi 'í? »

Pi' dhi' gó Fàrìsáyò i mèdáyì` lagí` lépi be dhi kí tà dri dhi

⁹Gò Yésu dré pídhígó kònìdhi ní pìzo móndyá adrébhá tá àyi kí no gyägya gò, adrészó móndyá àruka tití dhi kí ayízè dhi i dré.

¹⁰Tà dhi: «Àgo rì dhi i mbà tá tépelò na kitswálé tà ta Gìká be. Àlo ní tá Fàrìsáyò 'í. Àzya ní tá mèdáyì lagílépi 'í.

¹¹Di Fàrìsáyò nda totó tá i adrélé tà ta Gìká be i léna kònìnì: «Á! Gìká, má adré àwoyà ta mí dré, má dré adrélé móndyá àruka tití dhi i tñi ko dhi sè. Àyi nda i ngá lovó bhabhá 'í, tà kònzi 'obhá 'í, iñdì múná tà 'obhá 'í. Má adré kpà àwoyà ta mí dré, má dré adrélé mèdáyì lagílépi kòdhí tñi ko dhi sè.

¹²Má adré mána tòbirí mvo, adrészó tà zi mí tí vésè be rì pósò àlo sè. Má adré kpà ngá tití má dré adrélé kisúlé, lanzílé 'a be mudrí dhi kí àlo fe mí dré. »

¹³Di, mèdáyì lagílépi nda totó tá ína i lárá ro, adrélé ndìndì áyi mi le tingálé kurú na bhù na ko. Adré tá áyi agá di kizà dré, adrészó tàá dhi: «Á! Gìká, ma tòkonzi líyí 'í. Mí bhà áma kizà wà! »

¹⁴Má adré tàá àmì dré dhi: Mèdáyì lagílépi nda gò ína nzile i bhàna móndí Gìká dré bhàle gyägya dhi ró dhi nì. Di, Fàrìsáyò nda nzí ína kònìnì ko. Tako ko, Gìká ní dhya ángùdhi adrélépi áyi tà bha kuru dhi ní tà tñi kìní mi. Di, a ní dhya adrélépi áyi tà bha kìní mi dhi ní tà tingá kuru. »

Yésu zi tà taní Gìká tí ànzimvá i dri

(À kònò kpà Màtayò 19:13-15; Máròkò 10:13-16)

¹⁵Àmvolásà dhi, móndí i adré tá àyi kí ànzimvá kí adó alìzo àyi ibe Yésu vélé, kòtabéró àyi, tà taní zìzo Gìká tí àyi dri be dhi bvó. Akodhí ní lebèbhá i kònò tà nda dre dhi, i dré dhèzo adrélé lawàle móndyá nda i dri tà nda sè.

¹⁶Di, Yésu dré ína ànzimvá nda kí azizó i vélé gò, tazoá áyi lebèbhá i dré dhi: «Mì tayí ànzimvá kònì i alile má vélé. Mì logá àyi ko. Àngyá ko, Gìká ní Òpì móndyá adrébhá àyi nda i tñi dhi i dré.

¹⁷Má adré tà báti ta àmì dré: Dhya ángùdhi adrélépi Gìká ni Òpì ka'i ànzimvá kya tñi ko dhi, kitswá tòdzí file lána ko. »

Yésu i agó àlo ngá líyí ro dhi be dhi

(À kònò kpà Màtayò 19:16-30; Máròkò 10:17-31)

¹⁸Àmvolásà dhi, Yúdà ànzì kí kàdrì kí àlo dré alìzo Yésu vélé akodhí ní lizí, tazoá dhi: «Dhya dóro adrélépi tà tadhá ní, lè má kò'o àdho tà kòdhya kitswázó lídrì kóná vésè kólyá dhi ní kisú dhi? »

¹⁹Yésu logó drá dhi: «Mí adré áma zi dhya dóro dhi ró àdho tà sè? Dhya adrélépi dóro dhi yókódhó, ngbà 'í Gìká 'í kalóma.

²⁰Mí nì tà tátrítrí kúlí dré adrélé tâle à kò'o dhî i be: «Lè mí kò'o múná tà ko. Mí kòpfu móndí dràle ko. Mí kòkugù ngá ko. Mí kòtâ tà móndí rú kinzò sè ko. Mí kàdré ámi atá nì lindrì bha ámi andre be. »»

²¹Dî agó nda tà drá dhî: «Má likí tolí nda kòdhî i tití, kidhólé má dré tâ adrérà'a kàdhûrà ro dhî 'á. »

²²Yésu kòyi tà nda dre dhî, dré tâzoá drá dhî: «Tayí rè dhu mí dré tâ àlo kòdhya: Mí lì ámi ngá tití dhî kî lagí, làfa nì ni lanzizó lemerèbhá i dré gò, mí kàdréró ngá làgí be kàdrì dhî íbe bhù na. Dî mí alì adrélé áma lebè. »

²³Agó nda kòyi tà nda dre dhî, kizà dré akódhî nì 'òzo lavulé, dré tâ adrélé ngá íbe zyandre ró dhî sè.

²⁴Yésu kònò akódhî tâ kizà ro dhî dre dhî, dré tâzoá dhî: «Ngábhá kî fîma Giká nì Òpì na dhî kòkóròko!

²⁵Ngá lîyí nì fîma Giká nì Òpì na dhî ína kòkóròko lavulé, kàmîlò nì fîma lavulé sindânì nì bhálé 'ásè dhî rúsè! » ²⁶Gò móndyá kúlí nda kî yibhá dhî i dré lizizóá dhî: «Kàdré kònìnì dhî, àdhi nì dî kitswá lídrì kóná vésè kólyá dhî nì kisú nì? »

²⁷Yésu logó dhî: «Tà kitswálé 'ole bwà ko móndí i milésè dhî, tà Giká dré kitswálé 'ole nì dhî 'i. »

²⁸Gò Pétéró dré tâzoá drá dhî: «Mí nò rè ká! Mâ tayí àma kî ngá tití dhî i adrézó ámi lebè. »

²⁹Dî Yésu logó àyi dré dhî: «Má adré tâ bâti ta àmî dré: Dhya ángùdhî áyi dzó 'i yà, áyi tokó 'i yà, áyi adrúpi i 'i yà, áyi tibhá i 'i yà, kó ngalè áyi ànzì i 'i yà dhî kî tayílépi Giká nì Òpì nì tà sè dhî,

³⁰a nì ngá nda kî vúdrì kisú tsâle vésè be bî lókyá kònìdhî sè. Kòdhî íbe dhî, a nì kókpà lídrì kóná vésè kólyá dhî nì kisú lókyá adrélépi alîle dhî sè. »

Yésu gò tódyá áyi dràma nì tà longó, áyi ngàma dràdrà 'ásè dhî be

(À kònò kpà Mâtayò 20:17-19; Márokò 10:32-34)

³¹Àmvolásà dhî, Yésu dré áyi lebèbhá mudrí-drì-rì dhî kî drìzo gârâ dri gò, tâzoá àyi dré dhî: «Mì yi rè ká! Mâ adré mbâle Yèrusalémà na. Kònâle dhî, tâ tití prôfétâ i dré tisile Móndí nì Mvá nì tà dri dhî kî ru 'o.

³²À nì akódhî nì lefè pagánò i drígá. Àyi nda i dré akódhî nì gùzo, lodházóá, tùsú lufúzó miá,

³³tswàzoá gò, pfùzoá dràle. Dî kitú nì na sè dhî, dré ngàzo dràdrà 'ásè. »

³⁴Dî, tà Yésu dré tâle nda kî àlo fî tâ ína àyi drìna ko. Tà nda kî àndu zù tâ i zùzù àyi dré. Dî i nì ngalè Yésu adré tâ àdho tâ ya dhî ko.

Yésu tiidri' agó àlo mì be kùdúkùdu ró dhî

(À kònò kpà Mâtayò 20:29-34; Márokò 10:46-52)

³⁵Yésu dré tá adrérà'a tsàle ànyi Yèríkò làga dhi 'á dhi, agó àlo mì kùdúkùdu ró dhi lirí tá láti làga adrélé ngá zi móndí i tí.

³⁶Akódhi nda kòyi móndí zyandre i adrérà'a lavulé dre dhi, dré lizizóá ngalè tà nda àdho tà 'i ya dhi.

³⁷Gò logozóá drá dhi: «Yésu Nàzàréta lésè dhi adré lavulé nì. »

³⁸Kòyi tà nda dre dhi, dré ngàzo adrélé loyóá dhi: «Yésu, Dàwídì ni Mvá, mí bhà áma kizà wà! »

³⁹Móndyá adrébhá lavulé drìdrì dhi i dré adrészó tetrélé akódhi dri, kòtayíró kúlí adrészó kíri. Di, dré gòzo vélé adrélé kúlí loyó wáláká ni ni lavú: «Dàwídì ni Mvá, mí bhà áma kizà wà! »

⁴⁰Gò Yésu dré áyi kikizó tàá dhi, à kàdrì agó nda alìzo ába í vélé. Akódhi nda kàtsá ànyi dre dhi, Yésu dré lizizóá tíá dhi:

⁴¹«Mí adré lèá má kò'o mí dré àdho tà kòdhya? » Akódhi logó dhi: «Míri, má lè ngá nòle! »

⁴²Di Yésu tà drá dhi: «Mí kònò ngá. Ámi tà ka'ika'i tìdrí mi dre. »

⁴³Gbà kòdhwa, akódhi dré kidhózó adrélé ngá no. Gò dré ngàzo adrélé Yésu ni lebè adrészó Gìká ni rú bha kùle. Móndyá tití dhi i kònò tà nda dre dhi, i dré kpà adrészó Gìká ni rú bha kùle.

Lükà 19

Yésu i Zàkáyò be dhi

¹Yésu dré fízo Yèríkò na gò adrélé lavulé bhàandre nda 'ásè.

²Di agó àlo rú be Zàkáyò, adrélipi mèdáyì lagibhá kí kàdrì ro ìndì ngá lìyí ro dhi tá kpà bhàandre nda na be.

³Akódhi nda adré tá lèá nòle ngalè Yésu àdhi 'i ya dhi. Di, móndí zyandre dhi kí tà sè dhi, kitswá tá ína nòá bwà ko, dré tá mbàle tali dhi sè.

⁴Gò dré ràzo drìdrì mbàle fa rú be sìkòmórò dhi drìna, kitswálé Yésu ni no dhi bvó. Tako ko, akódhi nda adré tá 'òle lavulé láti nda 'ásè.

⁵Yésu kàtsá àrà nda 'á dre dhi, dré mì tingázó Zàkáyò ni no gò, tazoá drá dhi: «Zàkáyò, mí así mbèlè. Àngyá ko, adré lèá dhi, má kàyí ándrò mí bhàna. »

⁶Di Zàkáyò dré asízó mbèlè gò, dré Yésu ni ka'izo dòle í bhàna arí sè.

⁷Móndyá tití tà nda ni nobhá dhi i adré tá Yésu ni ndri, adrészó tàá dhi: «Dhya kòdhí lì ína file ayílé tàkonzi lìyí ni dzó na! »

⁸Di, Zàkáyò dré ngàzo áyi totó Míri kandrá tàá drá dhi: «Míri, mí nò rè ká! Má ni áma ngá tití lanzílé 'a be rì dhi kí àlo fe lemerèbhá i dré. Kòdhí íbe dhi, má kòkäri

mónđí ni làfa túrúpfú sè dhi, má ni làfa nda ni logó drá, àzya ni ni bhàzo drià vésè be na. »

⁹Dì Yésu tà drá dhi: «Ándrò, tà tìdrizó dhi afi dzó kònìdhì lé dre. Tàko ko, dhya kònìdhì kókpà Àbàramà ni ànzì kì àlo 'i.

¹⁰Àngyá ko, Mónđí ni Mvá alì kitswálé móndyá avìbhá dhi kì nda, àyi kì tìdrizó dhi bvó. »

Pi' dhi' gó màrabà mudrí dhi kì tà dri dhi

(À kònò kpà Mátayò 25:14-30)

¹¹Mónđyá zyandre nda ì dré tá adrérà'a Yésu ni yi dhi 'á dhi, dré gòzo pídhígó àlo dhi ni pi àyi dré. Tàko ko, akódhì tá ànyi Yèrusalémà làga, ìndì ì adré tá àyikya kisùá dhi, Gíká ni Òpì ni atsá gbă lókyá nda sè.

¹²Dì tà àyi dré dhi: «Agó àlo ópí kì súrú lésè dhi adré tá 'ole lìle bvò vwàvvà ro dhi na, à kòbhàró i adrélé ópí ro gò, í kàgòrò adrélé áyi òpì nya be dhi bvó.

¹³Dì dré áyi màrabà mudrí dhi kì azízó, làfa lò'wa mudrí dhi kì lanzaízó àlo àlo àyi drígásè gò, tazoá àyi dré dhi: «Mì kàdré àzí 'o làfa kònìdhì sè adrészó timbàá, tsàle lókyá má dré dra agòzo dhi 'á. »

¹⁴Dì, móndyá akódhì ni bvò nda lé dhi ì adré tá àyikya togó kònzi bha akódhì rú. Gò ì dré móndí mùzo lìle akódhì vésè tàá dhi: «Mà adré lèá dhi, dhya kòdhì konya òpì àma dri dhi ko. »

¹⁵Dì, tágba kònini dhi, à dré akódhì ni bhàzo ópí ro gò, dré agòzo. Dré màrabà mudrí í dré tá làfa tayízó àyi drígá nda kì azízó gò, àyi kì lizízó nizoá ngalè ì timbà tá áyi làfa ni dri ángopí ya dhi.

¹⁶Dhya drìdrì dhi kàtsá dre dhi, dré tazoá dhi: «Míri, má 'o àzí làfa lò'wa mína sè gò, làfa lò'wa mudrí àruka kì kisúzó bhàle drià. »

¹⁷Dì ópí nda tà drá dhi: «Áma màrabà dóro ni, mí 'o dóro! Mí dré kitswálé má dré ka'ile tà mvá tsà sè dhi sè dhi, má ni ámì bha adrélé bhàandre mudrí dhi i drile. »

¹⁸Gò màrabà ni rì dré atsázó tàá dhi: «Míri, má 'o àzí làfa lò'wa mína sè gò, làfa lò'wa nzi àruka kì kisúzó bhàle drià. »

¹⁹Dì ópí nda tà drá dhi: «Má ni ámì bha adrélé bhàandre nzi dhi i drile. »

²⁰Gò màrabà ni na dré atsázó tàá dhi: «Míri, làfa lò'wa mína kònìdhì. Má zù tá làfa nda tayílè kítá na.

²¹Má adré tá ámì ro, mí dré adrélé agó tòmbá 'i dhi sè. Mí adré mína ngá mí dré bhàle ko dhi kì do, adrészó kpà ngá mí dré kidhílé ko dhi kì akónà. »

²²Dì ópí nda tà drá dhi: «Mì, màrabà kònzi ni, má ni ámì tòbvó ta ámì tändi ni kúlí sè. Mí ni tá tåle dhi, ma agó tòmbá 'i dhi be. Má adré ngá má dré bhàle ko dhi kì adó, adrészó ngá má dré kidhílé ko dhi kì akónà.

²³Mí bhà dì tá làfa mána dzó adrészó làfa 'o lendrélé dhì na ko àdho tà sè? Kònò má nì tákitswá làfa nda nì adó àmupi nì be. ›

²⁴Gò dré tázoo móndí í làga dhì i dré dhì: «Mì do làfa lò'wa kòdhì akódhì drígásè, fèle dhya adrélépi ába mudrí dhì dré. ›

²⁵Dì i tà drá dhì: «Míri, akódhì nda làfa lò'wa íbe mudrí! ›

²⁶Akódhì logó àyi dré dhì: «Má adré tàá àmi dré dhì: Dhya ángùdhì adrélépi ngá íbe dhì dré dhì, à nì akódhì nì ngá nda kì drì timbà. Dì, kàdré ína dhya adrélépi ngá àko dhì nì tà sè dhì, à nì ndindì ngá mvá tsà dré adrészó ába dhì nì do drígásà.

²⁷Dì, kàdré áma kàribhá lèbhá tá má kónya òpì àyi dri ko nda kì tà sè dhì, mì adrì àyi alízo àyi kì tilí todràle má kandrá. »»

Yésu fi Yérusalémà na ópi' ti' ni'

(À kònò kpà Mátayò 21:1-11; Márokò 11:1-11; Yòwáni 12:12-19)

²⁸Yésu kòtà tà nda i dre dhì, dré gózo láti do adrészó mbàle Yérusalémà na.

²⁹Kòtsa ànyi bhà rú zile Bètèfágè ìndì Bètànýà dhì i kandrá, ànyi kòngó Òlívè fa kya làga dre dhì, dré áyi lebèbhá rì dhì kì mùzo lìle drìdrì,

³⁰tázoo àyi dré dhì: «Mì lì bhà àmi kandrá kònàdhì léna. Mì kòfì lána dre dhì, mì nì púndà mvá 'ile, à dré dhu rè mbàzo driá ko dhì nì kisú. Mì atrì akódhì, alízo ába má vélé.

³¹Dhya àlo kòlizí àmi tí dhì: «Mì adré triá àdho tà sè? » ya dhì, mì kòtà drá dhì: «Míri adré lèá nì. »»

³²Dì dhya mûle nda i dré lìzo tà nda nì kisú ngóró Yésu dré tá tâle àyi dré dhì tíni.

³³I dré tá adrérà'a púndà mvá nda nì atrì dhì 'á dhì, púndà nda nì líyí i dré lizízóá àyi tí dhì: «Mì adré púndà mvá kòdhì nì tri àdho tà sè? »

³⁴I logó dhì: «Míri adré lèá nì. »

³⁵Gò i dré púndà mvá nda nì asézó atsázó ába Yésu vélé. I dré àyi kì kítá bhèzo driá gó, Yésu nì 'òzo lirilé driá.

³⁶Dì akódhì dré tá adrérà'a lìle dhì 'á dhì, móndí zyandre dhì i adré tá àyi kì kítá kì lasé láti mísè, kòlavúró driásà be dhì bvó.

³⁷I kòtsa ànyi Yérusalémà làga láti adrélépi sile kòngó Òlívè fa kya drilésè dhì 'á dre dhì, akódhì ni lebèbhá zyandre tití dhì i dré ngàzo adrélé lenzélé lúlúgyá be, adrészó Gíká nì rú bha kùle tà tití línndriga ró i dré nôle dhì kì tà sè.

³⁸I adré tá tàá dhì: «Tà taní kàdré ópí adrélépi alìle Míri nì rú sè dhì dri! Tà kìdríkìdrì kàdré bhù na, ìndì rúku kàdré Gíká kurú na bhù na dhì dré! »

³⁹Gò Fàrisayò àruka móndyá zyandre nda i kòfalé dhì i dré tázoo Yésu dré dhì: «Tadhálépi, mí kòlawà ámi lebèbhá nì i dri, i kòtayíró kúlí! »

⁴⁰Dì Yésu logó dhi: «Má adré tàá àmi dré dhi: ì kòtayí kúlí dhi, kírà kí lúlúgyá ga ní! »

Yésu ngo Yèrúsalémà ní tà sè

⁴¹Yésu kòtsa ànyí Yèrúsalémà làga bhàandre nda ní no dre dhi, dré ngàzo ngòle tà ní sè,

⁴²tàzoá dhi: «Á! Yèrúsalémà, kònò mí kònì tá tà kitswálépi tá tà kídríkídrí fe mí dré lókyá ándró kònìdhi sè dhi be dhi! Dì, nyànomvá dhi, tà nda zù i zùzù mí dré.

⁴³Tàko ko, lókyá ní atsá ámi kí gò, ámi kàribhá ì dré ámi gàrà kízo kúrú, ngá tobhàzo kitswázó àdzú bhu mí rú gò, ì dré àdzú bhùzo mí be ámi gàrà tití dhi i 'ásè.

⁴⁴Ì ní àmi kí bhe kinyílé kíní mi, ámi ànzí mí lé dhi íbe. Ì kitswá kírà kí àlo tayí àzya ní dri ko. Àngyá ko, mí ní tá mína lókyá Gíká dré alízo kitswálé ámi tidrí dhi ko. »

Yésu dro móndyá adrébhá ngá lagí́ dhi i topfòle tépelò 'ásè

(À kònò kpà Màtayò 21:12-17; Márokò 11:15-19; Yòwáni` 2:13-22)

⁴⁵Amvolásà dhi, Yésu dré fízo tépelò na gò, dré ngàzo móndyá adrébhá tá ngá lagí kònàle dhi kí dro topfòle 'ásà.

⁴⁶Dré tàzoá àyi dré dhi: «Gíká ní Kúlí adré tàá dhi: <Áma dzó ní adré dzó adrészó tà ta má be dhi i.› Dì, mì gò àmikya dzó nda ní bha adrélé àrà kùgubhá ì dré adrészó àyi kí zu dhi ró! »

⁴⁷Kítú àlo àlo tití i sè dhi, Yésu adré tá tà tadhá tépelò na. Kòwánà kàdrí i, tátrítrí kúlí tadhábhá ì tsàle Yúdà ànzí kí drì kobhá íbe dhi, ì adré tá láti nda kitswázó akódhi ní pfu dràle.

⁴⁸Dì, ì kitswá tá àyikya láti kisú bwà ko. Àngyá ko, móndyá tití dhi ì adré tá akódhi ní kúlí yi lovó sè.

Lükà 20

À lizí Yésu tí ngalè akódhi ní rìnyí angá ángolésè ya dhi

(À kònò kpà Màtayò 21:23-27; Márokò 11:27-33)

¹Kítú àlo dhi, Yésu adré tá móndí kí tadhá tépelò na, adrészó Rúbí Taní longó àyi dré. Gò kòwánà kàdrí i, tátrítrí kúlí tadhábhá ì ìndí bhàgo íbe dhi ì dré alízo akódhi vélé,

²lizíá tíá dhi: «Mí tà rè àma dré ká: Rìnyí mí dré adrészó tà kòdhí kí 'o dhi angá ína ángolésè? Àdhí fè rìnyí nda mí dré nì? »

³Yésu logó àyi dré dhi: «Má ní kókpà tà àlo dhi ní lizí àmi tí. Mì tà rè má dré ká!

⁴Bàtísimò Yòwáni dré fèle dhi angá tá ína ángolésè: Gíká vélésè, kó ngalè móndí i vélésè? »

⁵Gò ì dré dhèzo adrélé tà kayí àyi kòfalésè, adrészó tàá dhi: «Mà kòtà dhi <Bàtísimò nda angá Gíká vélésè> dhi, akódhi ní go lizíá àma tí dhi: <Mì ka'i dì Yòwáni ko àdho tà sè? ›

⁶Di, mà kòtà kó dhi <Bàtísimò nda angá móndí i vélésè> dhi, móndyá tití dhi kí àma kí lebhé todràle kírà sè. Àngyá ko, i adré ka'íá dhi, Yòwánì tá ína pròfétà 'i. »

⁷Di i dré logozóá drá dhi: «Mà ní ngalè bàtísimò nda angá ángolésè ya dhi ko. »

⁸Yésu gò tàá àyi dré dhi: «Kàdré kònìni dhi, má kitswá kókpà tàá àmí dré ngalè rinyí má dré adrészó tà nda kí 'o dhi angá ángolésè ya dhi ko. »

Pí` dhi` gó vínò liki` bhá kònzi dhi kí tà dri dhi

(À kònò kpà Mátayò 21:33-46; Márokò 12:1-12)

⁹Gò Yésu dré pídhígó kònìdhi ní pízo móndí i dré, tázoo dhi: «Agó àlo dhi bhe tá vínò áyi amvú na. Dré amvú nda ní tayízó vínò likíbhá àruka i drígá gò, lízo atsí na lókyá be vwàvvà ro.

¹⁰Lókyá vínò lò'wa kízo dhi kòkitswá dre dhi, dré áyi màrabà kí àlo mùzo lile vínò likíbhá nda i véna, i kòféró i dré lò'wa ína tini dhi be dhi bvó. Di, vínò likíbhá nda i dré àyikya màrabà nda ní tswàzo gò, logozóá nzile drígálé sè.

¹¹Gò amvú lítí nda dré màrabà àzya mùzo lile àyi véna. Di, i dré kpà akódhi nda ní tswàzo, kanyò fèzo drá gò, logozóá drígálé sè.

¹²Dré gózo màrabà ní na mu lile gò, i dré akódhi nda ní pfùzo bí ibe gò, dòzoá bhèle amvú 'ásè kívi na.

¹³Di amvú lítí nda kòyi tà nda dre dhi, dré kisùzoá i léna dhi: «Má ní 'òá ngíni? Má ní áma mváagó má dré lèle tò dhi ní mu kòdhya. Àruka ní, i ní akódhi ní lindrì bha. »

¹⁴Di, vínò likíbhá nda i kònò mváagó nda adrérà'a alile dre dhi, i dré tázoo àyi kòfalésè dhi: «Kònàdhi dhya dra amvú kònìdhi ní kisúlépi tàyilé ro dhi 'i. Mà kòpfu akódhi dràle, amvú dré tá kitswálé kisúlé tàyilé ro nda kàdréró àma dré! »

¹⁵Di i dré ngàzo akódhi ní ru bhèle amvú nda 'ásè kívi na gò, pfùzoá dràle. » Yésu gò lizíá dhi: «Mì adré kisùá dhi, amvú lítí nda ní 'òá ngíni àyi kí tà sè dhi? »

¹⁶Akódhi ní tsa vínò likíbhá nda kí tupfú todràle gò, gózo amvú vínò àdhya nda ní tayí móndí àruka i drígá. » Di móndyá zyandre nda i kòyi tà nda dre dhi, i dré tázoo dhi: «Tà nda kòdhí i kò'o ru tâdzí ko! »

¹⁷Di Yésu dré àyi kí nòzo díi gò, tázoo dhi: «Tà tisile Gíká ní Kúlí na kònìdhi adré dí lèá tâle ngíni? <Kírà dzó sibhá i dré gâle gâgâ dhi, gò atsálé kírà agógó dzó nda dré adrészó áyi totó driá dhi ró. »

¹⁸Dhya ángùdhi dra dhèlepi kírà nda dri dhi ní ño. Kòdhí ibe dhi, kírà nda ní dhya ángùdhi i dré dra adhézó driá dhi ní kinyí. »

¹⁹Gbà lókyá nda sè dhi, tátrítrí kúlí tadhábhá i kòwánà kàdrí ibe dhi i dré láti ndàzo kitswázó Yésu ní ru. Àngyá ko, i ní tâ tâle dhi, akódhi pi tá pídhígó nda àyi rú dhi be. Di, i dré tá adrélé móndyá zyandre dhi kí ro dhi sè dhi, i dré akódhi ní tayízó.

Kàyìsárà, Rómà kí ópi` kàdri` ni mèdáyi` gi` ma

(À kònò kpà Mátayò 22:15-22; Márokò 12:13-17)

²⁰Dì ì dré ngàzo adrélé Yésu nì mì ga gò, móndí àyi kì 'obhá adrélé móndí gyägya ró dhi kì mùzo lùzu ró lìle Yésu véna. Àyi nda ì adré tá akódhi nì le 'ole la'ile kúlí dré tá adrélé tâle dhi ì sîlé, ì kòkitswáró akódhi nì fe Rómà kì gùvèrènérè drígá.

²¹Dì ì dré akódhi nì lizízó tâzoá dhi: «Tadhálépi, mà nì tâle dhi, tà mí dré adrélé tâle ìndì tadhálé dhi ì gyägya dhi be. Mí adré móndí kì no twátwa ko. Mí adré kpà Gìká nì tà tadhá tà bâti sè.

²²Dì mí tà rè àma dré ká: Àma kì tátrítrí kúlí ka'ì, mà kàdré Kàyísárà nì mèdáyì gi dhi 'í? Kó ngalè, ka'ì ko? »

²³Dì, Yésu dré ína àyi kì túrúpfú tà nìzo kyá gò, logozóá àyi dré dhi:

²⁴«Mì afè dènári àlo dhi má dré nòle. » Ì kòfè làfa lò'wa nda drá dre dhi, dré lizízóá dhi: «Móndí líndrí kònìdhi tsàle rú tisile driá kònìdhi be dhi, àdhi àdhya 'í? » Ì logó drá dhi: «Kàyísárà àdhya 'í. »

²⁵Dì Yésu tà àyi dré dhi: «Mì kàdré dì ngá Kàyísárà àdhya nì fe Kàyísárà dré, adrészó kpà ngá Gìká àdhya nì fe Gìká dré. »

²⁶Dì ì kitswá tá akódhi nì 'o la'ile kúlí dré tá tâle móndí ì kandrá dhi ì sîlé bwà ko. Be ró dhi, àyi kì líndrí ga tá kúlí dré logólé nda sè gò, ì dré kúlí tayízó adrészó kíri.

Tà lizilé ngangà dràdrà 'ásè dhi nì tà dri dhi

(À kònò kpà Màtayò 22:23-33; Márokò 12:18-27)

²⁷Àmvolásà dhi, Sàdùkáyò àruka ì dré alìzo Yésu vélé kitswálé tà lizí tíá. (Àyi nda ì adré tâá dhi, ngangà dràdrà 'ásè dhi yókódhó.) Dì ì tà drá dhi:

²⁸«Tadhálépi, Mósè tisì àma dré dhi: «Agó àlo adrélépi mvá àko dhi kòdrà áyi tòkó nì tayí dhi, lè adrúpi nì kòdo tàyítòkó nda mòle, kitswázó ànzì ti áyi adrúpi dràlepi nda dré. » ²⁹Dì àgo nzi-drì-rì adrúpi ró dhi ì tá be. Àyi kì kàyo dré tòkó àlo dhi nì mòzo gò, dràzo tòlò mvá ti àko ró.

³⁰Adrúpi nì nì rì dré tòkó nda nì dòzo mòle gò, dré kpà dràzo tòlò mvá ti àko ró.

³¹Tà nda dré kpà ru 'òzo kònìni adrúpi nì nì na rú, tsàle byá adrúpi nì nì nzi-drì-rì rú. Àyi tití nda ì todrà mvá ti àko ró.

³²Kùdù ro dhi, tòkó nda dré kpà dràzo.

³³Dì kítú móndí ì dré dra ngàzo dràdrà 'ásè dhi tú dhi, adrúpi nzi-drì-rì nda ì kòfalé dhi, tòkó nda nì adré tsitsì dhi àdhi dré? Àngyá ko, àyi tití nda ì do tá akódhi mòle àyi dré tòko ró. »

³⁴Yésu logó àyi dré dhi: «Móndyá ándrò kònì ì adré ru mo, adrészó kpà àyi kì ànzì kì fe mòle.

³⁵Dì, lókyá adrélépi alìle dhi sè dhi, móndyá kitswábhá Gìká mìlésè ì kòngaró dràdrà 'ásè dhi ì gó adrélé ru mo ko, adrélé kpà àyi kì ànzì kì fe mòle ko.

³⁶Ì kitswá kpà gòle dràle ko. Àngyá ko, ì nì àyikya adré ngóró ángéló ì tini. Àyi Gìká nì ànzì 'í, ànzì ngabhá dràdrà 'ásè dhi 'í.

³⁷Dì, kàdré ína ngangà dràdrà 'ásè dhi ni tà sè dhi, ndìndì Mósè tadhá tá ngádra 'á dhi, móndyá dràbhá dre dhi kí nga dràdrà 'ásè dhi 'í. Tàko ko, dré tá fanzí adrélépi kòle àtsi ró dhi ni tà tisìzo dhi, zi Míri ‹Giká Àbàramà àdhyà, Giká ìsákà àdhyà, ìndì Giká Yàkóbhò àdhyà. › ³⁸Dì Giká nda Giká àbvò kya 'í ko. Be ró dhi, akódhi ína Giká móndyá lídrì ro dhi kya 'í. Àngyá ko, akódhi milésè dhi, àyi tití nda i lídrì ro. »

³⁹Dì tatrítrí kúlí tadhábhá kí àruka i logó drá dhi: «Tadhálépi, mí tà tà kòdhi kyá! »

⁴⁰Dì dhya àlo dré gòzo vélé tà tabhì lizilé akódhi tí ko.

Mèsí́ yà i Dàwídì be dhi

(À kònò kpà Mátayò 22:41-46; Márokò 12:35-37)

⁴¹Gò Yésu dré tazoá àyi dré dhi: «À adré tàá dhi, Mèsiyà Dàwídì ni mvá 'í dhi ngíni?

⁴²Tàko ko, Dàwídì ni tändì tà tá búkù Yúdà ànzì kí Longó kya na dhi: ‹Míri Giká tà áma Míri dré dhi: Mí alì lirilé áma dríágó lésè,

⁴³tsàle lókyá má dré dra ámi kàribhá kí bhàzo adrélé ámi pá zàle dhi 'á. ›

⁴⁴Kòdhi Dàwídì adré Mèsiyà ni zi áyi Míri ro. Dì Mèsiyà nda ni kitswá kpà adrélé akódhi ni mvá ro ngíningíni ró? »

Yésu se áyi lebèbhá kí bí tátrí trí kúlí tadhábhá kí tà sè

(À kònò kpà Mátayò 23:1-36; Márokò 12:38-40)

⁴⁵Mónyá zyandre tití dhi i dré tá adrérà'a Yésu ni yi dhi 'á dhi, dré tazoá áyi lebèbhá i dré dhi:

⁴⁶«Mì kàdré àmi kí likí tatrítrí kúlí tadhábhá kí tà sè. Àngyá ko, àyi nda i adré kánzò kàtswákàtswa dhi kí le asólé àyi rú, adrészó tatsilé ába móndí i kòfalésè. I adré lèá dhi, à kàdré mòdo fe àyi dré lindrì sè ngá lagírà i 'ásè. I adré lèá lirilé àrà lindrì àdhyà lissambò dzó i 'ásè dhi i 'ásè, adrészó kpà lèá lirilé míssá lindrì àdhyà gwányá i 'ásè dhi i làgásè.

⁴⁷I adré tàyítòkó kí ngá kí kärí tití. I adré kpà tà zi Giká tí vwàvwà ro, à kònòrò àyi be dhi bvó. Dì kítú dra tòbvó tazo dhi tú dhi, à ni tà ño àyi dri tà tändì ró. »

Lükà 21

Ngá tàyí́ tòkó àlo lemerè ro dhi dré fèle Giká dré dhi

(À kònò kpà Márokò 12:41-44)

¹Yésu dré tá adrérà'a tépelò na dhi 'á dhi, dré mì tingázó ngábhá kí no adrérà'a àyi kí làfa bhe kpukúbhú adrészó làfa likí dhi na.

²Dré kpà tàyítòkó àlo lemerè ro dhi ni nòzo làfa lò'wa nzé tsàtsà rì dhi kí bherà'a lána.

³Gò Yésu dré tazoá dhi: «Má adré tà báti ta àmi dré: Tàyítòkó lemerè ro kòdhi bhà ína làfa kàdrì, móndyá àruka tití dhi kya kí lavú.

⁴Tàko ko, àyi tití nda i adó àyikya àyi kí ngá kí drì fèle kòdhyà. Dì, tòkó lemerè ro nda adó ína ngá tití i dré tá adrészó ába kitswázó adrílé ásà dhi i fèle kòdhyà. »

Yésu longó tépelò ni pfùma ni tà
 (À kònò kpà Mátayò 24:1-2; Márokò 13:1-2)

⁵Yésu ni lebèbhá àruka i adré tá tépelò ni tà ta, kírà aveave tépelò nda ni sìzo ásà dhi íbe, ìndì ngá fèle Giká dré tépelò nda ni 'ozo avélé ásà tò dhi íbe. Di, Yésu dré ína tázaoá dhi:

⁶«Kàdré ngá mì dré adrélè nôle kònì ki tà sè dhi, lókyá adrélépi alìle dhi sè dhi, à gò vélé kírà kònì ki àlo kisú àzya ni dri ko. À ni kírà nda ki lebhé tití kìní mi. »

Tà dra ru 'obhá lókyá kùdù ni tà tadházó dhi i
 (À kònò kpà Mátayò 24:3-14; Márokò 13:3-13)

⁷Gò i dré Yésu ni lizízó tázaoá dhi: «Tadhálépi, tà kòdhì ki atsá ángutú? Àdho tà ni ru 'o drìdrì tadházóá dhi, tà nda i adré 'ole ru 'o káyà dhi ni? »

⁸Yésu logó dhi: «Mì kàdré àmì ki likí dóro, à kòlitíró àmì ko. Tako ko, móndí bì dhi ki alì áma rú sè adrélè táká dhi: «Ma Mèsiyà 'i! » ìndì «Lókyá kitswá dre! » Di, mì kòlì àmikya àyi vésè ko.

⁹Mì ni àdzú ki rúbí yi, móndí ki ligima àyi ki ópí íbe dhi ki rúbí be. Di, mì kòtayí àmì ki togó adrélè gàle tirì dré ko. Tako ko, adré lèá dhi, tà nda kòdhì i kò'o rè zyà ru 'iká. Di, lókyá kùdù kitswá ína atsálé mbèlè ko. »

¹⁰Gò táká àyi dré dhi: «Súrú ki àdzú bhu súrú àruka íbe. Òpì ki kpà àdzú bhu òpì àruka íbe.

¹¹Kàdikàdi ni bvò kosé rinyí sè, ìndì kàrabhò ni dhe drà kònzi íbe àrà twátwa i 'ásè. Tà dra tirì febhá dhi ki ru 'o, ìndì tà kàdrì líndríga ró dhi ki agá bhù mìbhalé 'á.

¹²Di, tà tití nda i kandrá dhi, à ni àmì ki turú adrélè mì pfòle. À ni àmì ki lefè tábvo tâle lísámbò dzó i 'ásè, adrészó àmì ki lebhé bădzó i 'ásè. Áma tà sè dhi, à ni àmì ki tindrì topfòzo àmì íbe ópí kàdrì i kandrásè ìndì gùvèrènérè i kandrásè.

¹³Tà nda ni láti nzi àmì dré kitswázó áma tà mì dré nôle ìndì mì dré yile dhi ki longó àyi dré.

¹⁴Di ásà dhi, mì kòbhà àmì ki togó adrélè lanzìle, adrészó mì ni tà ta àmì rúsè ngíni ya dhi ni kisú drìdrì dhi ko.

¹⁵Tako ko, má ni mána kúlí fe àmì dré kitswálé logólé togyá sè àmì ki kàribhá i tí, i kòkitswáró kayíá ko, ìndì i kòkitswáró tà ta rúásà twá ko dhi ma.

¹⁶Ndìndì àmì ki tibhá i, àmì ki adrúpi i, àmì ki aró i, tsàle àmì ki arúpi íbe dhi ki àmì ki lefè kàribhá i drígá gò, àmì ki àruka ki tupfúzó todràle.

¹⁷Móndyá tití dhi ki togó kònzi bha àmì rú áma tà sè.

¹⁸Di, tágba kònini dhi, àmì ki drìbhí ki àlo kitswá ína tavìle ko.

¹⁹Mì kàdré togó tsì, adrészó àmì ki totó tätä dhi, mì ni lídrì kisú. »

Yésu longó Yèrusalémà ni pfùma ni tà
 (À kònò kpà Mátayò 24:15-21; Márokò 13:14-19)

²⁰«Mì kònò sòdá zyandre dhi i adrérà'a Yèrúsalémà nì gàrà kì kúrú dre dhi, mì nì niá tâle dhi, bhàandre nda nì pfùma atsá ànyi dre dhi be.

²¹Lókyá nda sè dhi, lè móndyá dra adrébhá bvò Yùdáyà àdhya na dhi i kòlapá ràle kòngó i drìna, àyi adrébhá Yèrúsalémà na dhi i kàpfò lásà, ìndì àyi adrébhá gbàbhú 'ásè dhi i kòfì bhàandre nda na ko.

²²Tàko ko, kítú nda kòna kì adré kítú tà ñòzo móndí i dri dhi 'i, kítswálé tà tití tísile Gìká nì Kúlí na dhi i kò'oró ru be dhi bvó.

²³Kítú nda i tú dhi, kizà nì adré kàdrì tòkó adrébhá 'a íbe dhi i dré, ìndì tòkó adrébhá bà fe ànzimvá i dré dhi i dré. Kizà nì adré kàdrì lavulé bvò nda na, ìndì Gìká nì kombà nì adré kàdrì surú nda rú.

²⁴À nì àyi kì àruka kì tupfú todràle sápí sè, àruka nì kì turúzó lìzo àyi íbe bvò tití surú twá ro dhi i 'ásè. Gò móndyá surú twá ro dhi i dré Yèrúsalémà nì atózó àyi pálé, tsàle móndyá surú twá ro nda kì lókyá dré akírà'a tití dhi 'á. »

Móndì' nì Mvá nì agòma

(À kònò kpà Màtayò 24:29-31; Márokò 13:24-27)

²⁵«Tà twátwa líndrígá ró dhi kì agá kítú mi, mbă mi, ìndì bhìbhínyà i mi. Dì surú tití bvò dri dhi kì togó kì adré kizà ro lavulé, àyi kì drì dré adrészó abílé, yìandre dré dra adrélè ru kägbä adrélè kpòrò 'o lavulé dhi sè.

²⁶Móndì kì dra tirì dré, i dré adrérà'a tà adrébhá alìle bvò dri dhi kì letè dhi 'á. Àngyá ko, rinyí bhù na dhi kì ru kizí.

²⁷Dì lókyá nda sè dhi, móndyá tití dhi kì Móndì nì Mvá nì no adrérà'a alìle ndùrùku i 'ásè, rinyí kàdrì be ìndì mìlanzìlanzì kàdrì be.

²⁸Dì tà nda kòdhi i kòkìdhó adrélè ru 'o dre dhi, mì kòtotó àmì àmì kì drì tingá kuru, adrészó gànzi ró. Tàko ko, lókyá Gìká dré dra àmì kì apázó dhi atsá ànyi dre. »

Tà tadhálé fígi fa nì tà rú dhi

(À kònò kpà Màtayò 24:32-35; Márokò 13:28-31)

²⁹Gò Yésu dré tà kònìdhì nì tàzo àyi dré kúlí alaala sè, tàzoá dhi: «Mì nò rè fígi fa túmání fa àruka tití dhi íbe dhi i ká!

³⁰Mì kàdré àyi kì bí no adrérà'a rôle dhi, mì nì tâle dhi, yìgú ànyi dhi be.

³¹Kókpà kòdhi tíni, lókyá mì dré dra tà nda kòdhi kì nòzo adrérà'a ru 'o dhi tú dhi, lè mì kònì tâle dhi, Gìká nì Òpì ànyi káyà dhi.

³²Má adré tà bâti ta àmì dré: Móndyá dra adrébhá lídrì íbe lókyá nda sè dhi i kítswá dràle tití drìdrì tà tití nda i dré dra ru 'òzo dhi kandrá ko.

³³Bhù i bvò be dhi kì akí. Dì, áma kúlí i kítswá àyikya tâdzí akílé ko.

³⁴Mì kònò dóro, mì kòbhàró àmì kì togó adrélè lanzìle gwányá 'òma nì tà sè, wá tsìma nì tà sè, ìndì tà bvò kònì àdhya kì kisùma nì tà sè ko, kítú tâbvó tâzo nda kòkîrò àmì ngbò ró ko.

³⁵Tàko ko, kítú nda ni atsá móndyá tití bvò dri dhì i dré.

³⁶Lè mì kàdré di támiga dri, adrélé tà zi Gìká tí lókyá wáyi sè, mì kòkitswáró tà tití adrébhá alìle nda ki lavú, kitswázó àmi ki totó kanyò àko Móndí ni Mvá kandrá. »

³⁷Kítú àlo àlo tití i sè dhì, Yésu adré tá tà tadhá tépelò na gó, ngátsi sè dhì, dré adrészó pfôle mbàle ayillé kòngó Òlívè fa kya drìna.

³⁸Dì drùbhì kínó, móndyá tití dhì i adré tá lìle akódhì ni yi tépelò na.

Lúkà 22

Yùdásì ` i ` yi ru kòwánà kàdrì ` i ` be, kòlefèrò Yésu àyi dri ` gá

(À kònò kpà Mátayò 26:14-16; Márokò 14:10-11)

¹Yúdà ànzì ki gwányá Mápà tákú àko dhì àdhya, adrélé kpà rú zile Pásikà dhì adré tá atsálé ànyi.

²Kòwánà kàdrì i tátrítrí kúlí tadhábhá íbe dhì i adré tá láti nda kitswázó Yésu ni pfu dràle lùzu ró. Tàko ko, i adré tá àyikya móndyá zyandre dhì ki ro.

³Dì Sàtánà dré fízo Yùdásì adrélé kpà rú zile ìsìkàriyótà dhì na. Akódhì nda tá Yésu ni lebèbhá mudrí-drì-rì dhì ki àlo 'i.

⁴Gò dré ngàzo lìle tà ta kòwánà kàdrì íbe ìndì tépelò likíbhá ki kàdrì íbe, i ni Yésu ni lefè àyi drígá ngíni ya dhì ni tà dri.

⁵Àyi nda i dré lenzézó tà nda sè gó, i dré lazízóá dhì, i ni làfa fe drá.

⁶Dì Yùdásì dré ka'izoá gó, kidhózó adrélé lókyá doro Yésu ni lefèzo àyi drígá dhì ni nda, móndyá zyandre dhì i kòniró ko.

À ledé tà Yésu i dré gwányá Pásikà àdhya ni nyàzo lebèbhá ni i ` be

(À kònò kpà Mátayò 26:17-25; Márokò 14:12-21; Yòwáni ` 13:21-30)

⁷Gwányá Mápà tákú àko dhì àdhya tú dhì, kítú adrészó kábilígyà mvá Pásikà àdhya ni pfu dràle mòbòmà ro dhì dré atsázó.

⁸Dì Yésu dré Pétéró ki mùzo Yòwáni be, tázooá dhì: «Mì lì ngá ladhi áma dré gwányá Pásikà àdhya ni nyàzo. »

⁹I lizí akódhì tázooá dhì: «Mì adré lèá dhì, mà kòlì ladhiá ángwà? »

¹⁰Dì Yésu logó àyi dré dhì: «Mì kòfì bhàandre na dre dhì, mì ni drì si agó àlo adrélépi yí do lìdrí na dhì be. Mì dhe akódhì nda bvó, tsàle dzó dré dra fízo lana dhì na.

¹¹Mì kòtà dzó nda ni líyí dré dhì: «Dhya tà tadhálépi dhì adré ámi lizí: Dzó 'a kìle mà dré kitswázó Pásikà nya áma lebèbhá íbe dhì ángwà? » ¹²Dì akódhì nda ni dzó 'a kìle kàdrì kurú na dhì ni tadhá ámi dré. À tobhà mísá i ngá àruka íbe tayillé lana dre. Mì kòladhi ngá áma dré kònàle. »

¹³Dì i kòlì dre dhì, i dré tà tití nda ki kisúzó ngóró Yésu dré tá tâle àyi dré dhì tíni. Gò i dré ngá ladhiázó kitswázó gwányá Pásikà àdhya ni nya.

Mírì ní rúbhá i kàri` ni be dhi

(À kònò kpà Màtayò 26:26-30; Márokò 14:22-26; 1 Kòritòbhá i 11:23-25)

¹⁴Lókyá kòkitswá dre dhi, Yésu ì dré tsàzo lirílé mísá làgásè túmání akódhi ni àpóstolò mudrí-drì-rì dhi íbe.

¹⁵Gò dré tàzoá àyì dré dhi: «Ma tá lovó íbe tò atsálé nyànomvá dhi, mà konyaró Pásikà kònìdhi túmání àmi íbe áma kizà nyàma kandrá.

¹⁶Tàko ko, má adré tàá àmi dré dhi: Má gò vélé nyàá ko, tsàle lókyá tà ní ni dré dra ru 'òzo kïtswálé tití Gìká ni Òpì na dhi 'á. »

¹⁷Dì dré kópò adózó, àwoyà fèzo Gìká dré gò, tàzoá dhi: «Mì do vínò kópò kònìdhi lé ní lanzílé àmi kòfalésè.

¹⁸Tàko ko, má adré tàá àmi dré dhi: Má gò vélé vínò mvu ko, tsàle lókyá Gìká ni Òpì dré dra atsázó dhi 'á. »

¹⁹Dré mápà adózó, àwoyà fèzo Gìká dré gò, ñòzoá fèle áyì lebèbhá i dré gò, tàzoá dhi: «Kònìdhi áma rúbhá má dré adrélé fèle àmi kì tà sè dhi 'ì. Mì nya, ìndì mì kàdré 'òá kònìnì adrészó áma tà kisù. »

²⁰Ngá nyàma àmvolésè dhi, dré kókpà 'òzoá kònìnì kópò sè. Adó kópò nda, tàzoá dhi: «Kópò kònìdhi adré tà tídhí Gìká dré bhàle ru yìzo móndí íbe áma kàri kutulépi àmi dré dhi sè dhi ni tà tadhá.

²¹Dì, mì yi rè ká! Dhya adrélépi 'ole áma lefè kàribhá i drígá dhi adré lirílé túmání má be mísá kònìdhi làga.

²²Tà báti ró dhi, Móndí ni Mvá ni lì dràle ngóró Gìká dré tá tà ní ni bhàle drìdrì dhi tíni. Dì, kizà ni ína adré kàdrì dhya dra Móndí ni Mvá nda ni lefèlepí dhi dré! »

²³Dì i dré kidhözó adrélé lizíá àyì kòfalésè, ngalè àdhi àyì kòfalé dhi ni tà nda ni 'o ni ya dhi.

Dhya kàdrì` lavúlé dhi àdhi 'ì?

²⁴Gò Yésu ni lebèbhá nda i dré dhèzo adrélé tà kayí àyì kòfalésè, nízoá ngalè dhya kàdrì lavúlé àyì kòfalé dhi àdhi 'ì ya dhi.

²⁵Dì Yésu dré tàzoá àyì dré dhi: «Móndyá bvò kòndì àdhyà kì ópí i adré àyikya òpì nya àyì dri rìnyí sè. Dhya kàdrìkàdrì àyì drìle dhi i adré kpà àyì kì tändì kì zi móndí kì ledébhá i ró.

²⁶Dì, adré lèá dhi, àmi kì tà kàdré kònìnì ko. Be ró dhi, lè dhya kàdrì lavúlé àmi kòfalé dhi kàdré àmi kì tûgumvá tíni. Lè kpà dhya adrélépi àmi kì drì ko dhi kàdré tà 'o àmi kì mårábà tíni.

²⁷Àngyá ko, mì adré kisùá dhi, dhya kàdrì lavúlé dhi àdhi 'ì: dhya adrélépi ngá nya mísá na dhi, kó ngalè, dhya adrélépi ngá bha nyàle dhi? Zakó tá dhya adrélépi ngá nya mísá na dhi 'ì? Dì, ma mána àmi kòfalé dhi ngóró dhya adrélépi tà 'o àmi dré dhi tíni.

²⁸Àmì ró dhi, àmì tá ngbú dhya adrébhá túmání má be tà dré adrérà'a áma tabhì dhi 'á dhi 'i.

²⁹Dì má adré àmì kì bha adrélé òpì nya, ngóró áma Atá dré áma bhàle adrélé òpì nya dhi tíni,

³⁰mì kàdréró ngá nya ìndì ngá mvu áma mísá làgásè áma Òpì na. Kònàle dhi, mì ni lirí lirirà adrészó òpì nya dhi i drisè, adrélé ìsérélè ànzì kì surú mudrí-drì-rì dhi kì tàbvó ta. »

Yésu longó dhi, Pétéró ni áyi ga

(À kònò kpà Màtayò 26:31-35; Márokò 14:27-31; Yòwáni` 13:36-38)

³¹Yésu gò tàá dhi: «Sìmónà, Sìmónà, mí yi rè ká! Sàtánà zi tà Gìká tí, kòfèrò láti i dré àmì kì tabhizo, ngóró à dré adrélé ngánò kiyá dhi tíni.

³²Dì, má zi mána tà Gìká tí mí dré, mí kòtayíró ámì tà ka'ika'i ko dhi bvó. Dì mí kògò agòle má vélé dre dhi, mí kòtimbà ámì adrúpi i àyì kì tà ka'ika'i na. »

³³Dì, Pétéró tà drá dhi: «Míri, ma gànzi ró lìle bă nya, ìndì lìle dràle túmání mí be. »

³⁴Yésu logó drá dhi: «Pétéró, má adré tàá mí dré dhi: Ándrò drìdrì àgólòwa dré dra tsírà bhèzo dhi kandrá dhi, mí ni áma ga vésè be na tàzoá dhi, mí ni ma ko. »

Yésu tà áyi lebèbhá i dré dhi, i` kòlotó àyi kitswálé àdzú bhu

³⁵Yésu gò lizá àyì tí dhi: «Lókyá má dré tá àmì kì mùzo lìle làfa àko, kòmvò àko, ìndì kámókà àzya àko dhi sè dhi, ngá àlo dhi pi tá àmì vélé? » I logó dhi: «Kóko. »

³⁶Akódhi tà àyì dré dhi: «Di, nyànomvá dhi, dhya adrélépi làfa íbe dhi, kòdo làfa nda be. Dhya adrélépi kòmvò íbe dhi, kòdo kpà be. Dhya adrélépi sápí àko dhi, kòlagí áyi kítá kidhì àdhya kitswázó sápí gi i dré.

³⁷Tako ko, má adré tàá àmì dré dhi: Lè tà tisile áma tà dri Gìká ni Kúlí na kònìdhì kàtsá má rú: «À amú akódhi nàle tátrítrí kúlí ñobhá íbe. » Tà bati ró dhi, tà tisile áma tà dri kòdhì adré 'ole ru 'o. »

³⁸Akódhi ni lebèbhá i gò tàá dhi: «Míri, sápí ri dhi i be kònìdhì. » Akódhi logó àyì dré dhi: «Kòdhì kitswá dre. »

Yésu zi tà Gìká tí kòngó Òlívè fa kya drìna

(À kònò kpà Màtayò 26:36-46; Márokò 14:32-42)

³⁹Yésu kàpfò kònalsè dre dhi, dré lìzo mbàle kòngó Òlívè fa kya drìna, ànzyà gà dré adrélé 'ole dhi tíni. Akódhi ni lebèbhá i dré kpà akódhi ni lebèzo.

⁴⁰I kòtsa àrà nda na dre dhi, dré tàzoá àyì dré dhi: «Mì kàdré tà zi Gìká tí, kòtayíró ámì tà dré tabhile, àmì kì 'òzo dhèle tàkonzì na dhi ko. »

⁴¹Gò dré lìzo vwàle àyì rúsè ànyìanyì ngóró kírà vîle dhi dré adrélé lìle adhélé dhi pi. Dré dhèzo áyì kórökó titì, tà zìzo Gìká tí kònìni:

⁴²«Tátá, mí kòlè dhì, mí kòdo kópò kizà àdhya kòdhì má vélésè wà. Di, mí kò'o tà má dré adrélé lèle dhì kòdhya ko. Be ró dhì, mí kò'o tà mí dré adrélé lèle dhì kòdhya. » [⁴³Gò ángéló àlo bhù lésè dhì dré agázó akódhì kandrá, rìnyí fe drá.

⁴⁴Yésu ní togó dré adrélé kizà ro lavúlé dhì sè dhì, dré gòzo adrélé tà zi Gìká tí togó wäyi sè. Gò kúrì adrélépi apfòle rúásà dhì dré atsázó kàrì tñi, adrélé titile kíní mi.]

⁴⁵Akódhì kòzi tà nda akílé dre dhì, dré ngàzo gòle áyi lebèbhá nda i véna, àyi kí kisú adrérà'a ayí ko kizà dré.

⁴⁶Di dré tázooá àyi dré dhì: «Mì adré ayí ko àdho tà sè? Mì nga adrélé tà zi Gìká tí, kòtayíró àmì tà dré tabhile, àmì kí 'òzo dhèle tàkonzi na dhì ko. »

Yésu ní rùma

(À kònò kpà Mâtayò 26:47-56; Márokò 14:43-50; Yòwáni` 18:3-11)

⁴⁷Gbă kòdhwa, Yésu dré rè dhu adrérà'a tà ta dhì 'á dhì, móndí zyandre dhì i dré atsázó. Di dhya rú zile Yùdásì, Yésu ní lebèbhá mudrí-drì-rì dhì kí àlo dhì adrì tá ína àyi nì. Gò dré áyi kisízó ànyí Yésu làga, kitswálé akódhì ní kamú.

⁴⁸Di, Yésu dré tázooá drá dhì: «Yùdásì, mí adré tsì Móndí ní Mvá ní kamú, kitswázó akódhì ní lefè kàribhá i drígá báti? »

⁴⁹Yésu ní lebèbhá i kònò tà adrélépi 'ole ru 'o nda dre dhì, i dré akódhì ní lizízó: «Míri, mà kòtogá àyi sápí sè wà? »

⁵⁰Gò àyi kí àlo dré kòwánà kí kàdrì ní mårábà ní bí dríágó lésè dhì ní bvwàzo kile.

⁵¹Di, Yésu dré ína tázooá dhì: «Mì tayí! Kòdhì kitswá dre! » Dré agó nda ní bí tabèzo, akódhì ní tindrízó.

⁵²Gò Yésu dré tázooá kòwánà kàdrì i, tépelò likibhá kí kàdrì i ìndì bhàgo atsábhá áyi ru dhì i dré dhì: «Ma vo kùgú 'i gò, mì dré adrészó alile sápí ibe ìndì fa ibe kitswálé áma ru nì? »

⁵³Kítú àlo àlo tití i sè, má adré tá àmì kòfalé tépelò na dhì, mì bhà tá drígá má rú ko. Di, lókyá kònìdhì àmikya 'i, ìndì dhya adrélépi áyi rìnyí tadhá tímímvá na dhì àdhya 'i. »

Pétéró gà Yésu rè

(À kònò kpà Mâtayò 26:57-58, 69-75; Márokò 14:53-54, 66-72; Yòwáni` 18:12-18, 25-27)

⁵⁴Gò i dré Yésu ní rùzo, drízoá lìzo ába kòwánà kí kàdrì ní dzó na. Di Pétéró adré tá ína àyi kí lebè lárá ro.

⁵⁵Àyi kí àruka i turú tá àtsí bhà'álé nda ní kító 'á gò, i dré lirízó làgásà. Di Pétéró dré kpà lirízó àyi kòfalé.

⁵⁶Gò mvátòkó àlo mårábà ro dhì dré akódhì ní nòzo adrérà'a lirilé àtsí mìle. Dré mì tingbözö drìá gò, tázooá dhì: «Dhya kòndì tá kókpà túmání Yésu be. »

⁵⁷Di, Pétéró dré ína tà nda ní gào rè, tázooá dhì: «Tòkó, má nì akódhì ko. »

⁵⁸Gí ko, dhya àzya dré akódhi nì nòzo gò, tazoá dhi: «Mí kókpà àyi kí àlo 'í. » Dí Pétéró logó dhi: «Kóko, ma 'í ko! »

⁵⁹Anyiànyi sáà àlo àmvolésè dhi, dhya àzya dré gòzo tàá rinyí sè dhi: «Bàti, dhya kòndi tá túmání Yésu be! Àngyá ko, akódhi kókpà móndí angálépi Gàliláyà lésè dhi 'í. »

⁶⁰Dí Pétéró logó dhi: «Agó, má nì ngalè mí adré àdho tà ta ya dhi ko! » Gbă lókyá dré adrérà'a tà ta dhi 'á dhi, àgólòwa dré tsírà bhèzo.

⁶¹Gò Míri Yésu dré áyi alázó Pétéró ni no díi. Dí kúlì Míri dré tá tale Pétéró dré dhi dré agázó lána. Tà tá dhi: «Ándrò, drìdrì àgólòwa dré dra tsírà bhèzo dhi kandrá dhi, mí nì áma ga vésè be na. »

⁶²Dí Pétéró dré pfòzo kivì na gò, ngole ka'ílé ka'ika'i kizà dré.

À gu Yésu, akódhi nì tswàzo

(À kònò kpà Mátayò 26:67-68; Márokò 14:65)

⁶³Dí dhya adrébhá Yésu nì likí dhi ì adré tá akódhi nì gu, adrészó akódhi nì tswa.

⁶⁴Ì dré akódhi nì mì dròzo gò, adrészó tàá drá dhi: «Mí tà rè àma dré pròfétà ro dhi, ngalè àdhi sa mì nì ya dhi ká! »

⁶⁵Dí ì adré tá akódhi nì lodhá kanyò kúlì àruka bǐ dhi ì sè.

Yésu pfò kòwánà kí kàdrì` i kandrá bhàgo kàdrì` i` be

(À kònò kpà Mátayò 26:59-66; Márokò 14:55-64; Yòwáni` 18:19-24)

⁶⁶Ngá kòwa dre dhi, Yúdà ànzì kí bhàgo kàdrì i, kòwánà kàdrì ì ìndì tátrítrí kúlì tadhábhá íbe dhi, ì dré ru kimozó kònale. Gò Yésu nì drìzo pfòle àyi nda i kandrá.

⁶⁷Dí ì dré tazoá drá dhi: «Mí kàdré Mèsiyà 'í bàti dhi, mí tà rè àma dré ká! » Yésu logó àyi dré dhi: «Má kòtà tà nda àmì dré dhi, mì kítswá ka'íá ko.

⁶⁸Má kòlizí kpà tà àmì tí dhi, mì kítswá tàdzí kúlì logó ko.

⁶⁹Dí, kidhólé nyànomvá dhi, Móndí nì Mvá nì lirí adrélé Gìká rinyí líyí nì dríágó lésè. »

⁷⁰Dí àyi tití nda ì lizí tíá dhi: «Mí dí mína Gìká nì Mváagó 'í? » Yésu logó àyi dré dhi: «Àmì kí tändi mì tà kyá tale dhi, ma 'í dhi. »

⁷¹Dí ì tà dhi: «Mà nì dí go vélé móndí àruka kítswábhá tà ta akódhi rú dhi kí nda àdho tà sè? Àma kí tändi, mà yi kúlì apfòlepi akódhi nì tändi sílésè dhi dre! »

Lúkà 23

Yésu pfò Pìlátò kandrá

(À kònò kpà Mátayò 27:1-2, 11-14; Márokò 15:1-5; Yòwáni` 18:28-38)

¹Gò àyi tití ru kimóbhá nda ì dré ngàzo Yésu nì dri lìzo ába Pilátò, Rómà kí gùvèrènérè kandrá.

²Gò ì dré dhèzo adrélè Yésu ni asíki, adrészó tāá dhi: «Mà kisú dhya kònìdhì adrérà'a àma kí surú ni kodzó liglé. Akódhì adré ína Kàyìsárà ni mèdáyì gìma logá móndí i dré. Adré kpà áyi tändi ni zi Mèsiyà ro, ìndì ópí ro. »

³Dì Pìlátò dré lizízóá Yésu tí dhi: «Mi, mi ópí Yúdà ànzì kya 'i? » Yésu logó drá dhi: «Ámi tändi mí tà dre. »

⁴Gò Pilátò dré tāzoá kòwánà kàdrì i dré, móndyá zyandre íbe dhi: «Má kisú mána tà àlo tà bhàzo agó kònìdhì dri dhi ko. »

⁵Dì, ì gó àyikya tāá rìnyí sè dhi: «Akódhì adré móndí zyandre dhi kí kodzó liglé tà dré adrélè tadhálé dhi i sè. Adré 'óá kònìnì Yúdà ànzì kí bvò 'ásè tití, kìdhólé Gàliláyà lésè atsálé kònwa Yèrúsalémà 'a. »

⁶Pilátò kòyi tà nda dre dhi, dré lizízóá ngalè Yésu móndí angálépi Gàliláyà lésè dhi 'i yà dhi.

⁷Kòyi tāle dhi, akódhì tá ópí Èródè ni rìnyí zàle dhi dre dhi, dré akódhì ni mùzo Èródè véna. Àngyá ko, akódhì nda tá Yèrúsalémà 'a lókyá nda sè.

Yésu pfò Èródè kandrá

⁸Èródè kònò Yésu dre dhi, dré lenzézó lavulé. Tàko ko, yi tá Yésu ni rúbí kínó gó, adrészó akódhì ni le nôle tò. Adré tá mi bha kítswálé akódhì ni no tà àlo líndríga ró dhi ni 'orà'a.

⁹Dì dré akódhì ni lizízó tà bǐ dhi i sè. Dì, Yésu logó ína drá kúlí àlo ko.

¹⁰Kòwánà kàdrì i tátrítrí kúlí tadhábhá íbe dhi i totó tá àyi kònàle adrélè akódhì ni asíki rìnyí sè.

¹¹Dì Èródè i sòdá ni íbe dhi i dré kpà akódhì ni ayízèzo, adrészó akódhì ni gu. Gò ì dré kánzò aveave asózó rúá, gózo akódhì ni mu Pìlátò véna.

¹²Dì kítú nda sè dhi, Èródè i Pìlátò be atú adrébhá tá kàribhá ro dhi i, i dré atsázó vélé arúpi ró.

À ñò tà Yésu dri kítswálé dràdrà sè

(À kònò kpà Màtayò 27:15-26; Márökò 15:6-15; Yòwáni` 18:39-19:16)

¹³Gò Pilátò dré kòwánà kàdrì kí azízó, Yúdà ànzì kí drì kobhá íbe, ìndì móndyá zyandre íbe,

¹⁴tāzoá àyi dré dhi: «Mì adrì àmikya agó kònìdhì alìzo ába má vélé tāzoá dhi, adré móndí kí kodzó liglé. Dì, mi yi rè ká! Má lizí tá akódhì àmì kandrá gó, má dré mána tà mi dré adrészó akódhì ni asíki ásà dhi ni kisúzó vélana ko.

¹⁵Èródè kisú kpà tà àlo vélana ko. Àngyá ko, logó akódhì àma vélé. Dì dhya kònìdhì 'o tà àlo kítswálépi dràdrà sè dhi ko.

¹⁶Ásà dhi, má ni akódhì ni 'o bhwàle gó, trìzoá lìle. » [¹⁷]

¹⁸Dì àyi tití nda i dré ngàzo kúlí loyó tāzoá dhi: «Mí kò'o dhya kòdhì dràle! Mì kàtri àma dré Bàràbà kòdhya! »

¹⁹(À bhe tá Bàrabà nda bădzó na, móndí kí kodzoma ligílé bhàandre nda 'á dhí ni tà sè, ìndí móndí pfùma ni tà sè.)

²⁰Pilátò dré gòzo tódhyá tàá àyi dré dhí, í lè tá ína Yésu ni trile.

²¹Dí i dré ngàzo adrélé tetrélé, adrészó loyoá dhí: «Mí tidí akódhí fa kipakipa dri! Mí tidí akódhí! »

²²Pilátò dré gòzo tàá àyi dré vésè ni na sè dhí: «Akódhí 'o àdho tà kònzi 'i? Má kisú mána tà àlo kitswálépi dràdrà sè dhí vélana ko. Ásà dhí, má ni akódhí ni 'o bhwale gò, trìzoá lile. »

²³Dí, i dré àyikya gòzo tetrélé rìnyí sè tazoá dhí, à kòtidí akódhí fa kipakipa dri gò, àyi kí kúlí dré lavúzó.

²⁴Dí Pilátò dré tà i dré adrélé zile nda ni ka'izo 'ole àyi dré.

²⁵Dré Bàrabà, bhèle tá bădzó na móndí kí kodzoma ligílé dhí ni tà sè ìndí móndí pfùma ni tà sè nda ni trìzo, ngóró i dré adrélé zile dhí tíni. Dré Yésu ni fèzo àyi drígá, i kò'oró ngóró i dré adrélé lèle dhí tíni.

Yésu ni tidima fa kipakipa dri dhí

(À kònò kpà Mátayò 27:32-44; Márokò 15:21-32; Yòwáni ` 19:17-27)

²⁶I dré tá adrérà'a Yésu ni dri lìzo ába dhí 'á dhí, i dré agó àlo rú be Sìmónà angálépi Kíréne lésè dhí ni nòzo adrérà'a agòle amvú lésè. Dí i dré akódhí nda ni rùzo, fa kipakipa bhàzo driá gò, akódhí ni 'ozo fa nda ni do lìzo ába Yésu vésè.

²⁷Móndí zyandre lavulé dhí i adré tá lile Yésu vésè. Àyi nda i kòfalé dhí, tòkó àruka i adré tá àwó ngo, adrészó tongolé Yésu ni tà sè.

²⁸Dí Yésu dré áyi alázó tàá àyi dré dhí: «Àmi ànzitòkó Yèrúsalémà àdhya ni i, mì kòngo má sè ko. Be ró dhí, mì kàdré àmikya ngòle àmi kí tändi i sè, ìndí àmi kí ànzí i sè.

²⁹Àngyá ko, lókyá adrélépi alile dhí sè dhí, à ni tàá dhí: «Kólénzé tòkó kondó ro tibhá ko, ìndí bà febhá ànzimvá i dré ko dhí i dré! »

³⁰Lókyá nda sè dhí, móndí kí tàá kòngó kàdríkàdrí i dré dhí: «Mì kàdhé àma dri wà! » adrészó kpà tàá kòngó tsàtsà i dré dhí: «Mì kàbvù àma wà! »

³¹Tako ko, à kàdré 'òá kònini fa lídrì ro dhí rú dhí, àdho tà ni dí vélé atsá fa à'yo ró dhí rú dhí nì? »

³²À adri tá kpà àgo rì dríkònzibhá ro dhí i pfûle dràle túmäní Yésu be.

³³I kòtsa àrà adrélé zile Drifà ro dhí na dre dhí, i dré Yésu ni tidizó fa kipakipa dri. I dré kpà dríkònzibhá rì nda kí tidizó fa àruka i drisè, àlo ni Yésu ni dríágó lésè, àzya ni lìdzí ni lésè.

³⁴Gò Yésu dré tazoá dhí: «Tátá, mí kòtrì àyi kí takonzì. Àngyá ko, i ni tà i dré adrélé 'ole dhí ko. » Gò sòdá i dré akódhí ni kítá kí lanzízó àyi kòfalésè dzégé sè.

³⁵Móndyá zyandre nda ì totó tá àyi adrélé tà nda ni no. Yúdà ànzi kí kàdrì ì adré tá àyi kya Yésu ni gu, adrészó tàá dhi: «Akódhì tìdrí móndí àruka i 'í. Di kàdré Mèsiyà Giká dré zìle dhi 'i báti dhi, kòtìdrí áyi tändi wà! »

³⁶Sòdá ì adré tá kpà akódhì ni gu. Ì kisí tá àyi ànyi akódhì làga, vìnègári fe drá,

³⁷tàzoá dhi: «Mí kàdré ópí Yúdà ànzi kya 'i báti dhi, mí tìdrí ámi tändi wà! »

³⁸À di tá wárágà tà tisìzo driá dhi akódhì drile. À tisì tá dhi: «Kònìdhì ópí Yúdà ànzi kya 'i. »

³⁹Drìkònzibhá tidílé Yésu làga nda kí àlo adré tá kpà akódhì ni lodhá, adrészó tàá dhi: «Mí mína Mèsiyà 'i ko? Mí tìdrí dí àma túmäní ámi tändi be wà! »

⁴⁰Di, drìkònzibhá àzya dré ína lawàzo driá, tàzoá dhi: «À ñò kó tà kìtswálépi dràdrà sè dhi mí dri akódhì àdhya tini dhi, mí adré dí mína Giká ni ro ko àdho tà sè? »

⁴¹Ama ró dhi, à ñò tà àma dri gyägya. Mà adré àmakya tà kìtswálépi tà mà dré 'ole dhi i sè dhi ni kisú. Di, dhya kònìdhì 'o ína tà kònzi àlo dhi ko. »

⁴²Gò dré tàzoá dhi: «Yésu, lókyá mí dré dra fízo ámi òpì na dhi tú dhi, mí kòtivì ma ko. »

⁴³Yésu logó drá dhi: «Má adré tà báti ta mí dré: Ándrò, mà ni adré túmäní mí be pàràdísò na. »

Yésu ni dràma

(À kònò kpà Màtayò 27:45-56; Márokò 15:33-41; Yòwáni ` 19:28-30)

⁴⁴Ànyiànyi kítú rírí sè dhi, tímivá dré bvò ni mì dòzo wäyi, tsàle sáà na kítú rírí àmvolésè dhi na.

⁴⁵Tako ko, kítú tayí tá ína ngá kazama. Gò kítá 'ile tépelò ni 'a lakízó dhi dré lasízó 'a be ri.

⁴⁶Gò Yésu dré liyízó kúlí 'u'ù sè tàzoá dhi: «Tátá, má tayí áma lídrì mí drígá. » Kòtà tà nda dre dhi, dré dràzo.

⁴⁷Rómà kí sòdá kí kàdrì kònò tà tití lavúbhá nda i dre dhi, dré Giká ni rú bhàzo kùle, tàzoá dhi: «Dhya kòdhì tá ína móndí gyägya 'i báti! »

⁴⁸Móndyá zyandre tití ru kímóbhá tà nda ni no dhi i kònò tà lavúbhá nda i dre dhi, i dré ngàzo nzìle àyi kí agá dibe kizà dré.

⁴⁹Di, móndyá tití Yésu ni nibhá dhi i túmäní tòkó akódhì ni lebèbhá Gàliláyà lésè dhi i be dhi i totó tá àyi adrélé tà nda kí no lará ro.

Yésu ni rúbhá bhàma mógo na dhi

(À kònò kpà Màtayò 27:57-61; Márokò 15:42-47; Yòwáni ` 19:38-42)

⁵⁰⁻⁵¹Yúdà ànzi kí bhàgo kàdrì i kòfalé dhi, agó àlo rú be Yoséfà angálépi Àrimàtayà, bhàandre àlo Yùdáyà le dhi lésè dhi tá be. Di, akódhì nda ka'i tá ína tà bhàgo àruka tití dhi i dré ru yìzo 'ozoá dhi ko. Akódhì tá móndí doro ìndì gyägya, adrélépi Giká ni Òpì letè nòle dhi 'i.

⁵²Dì dré lìzo Pilátò véna Yésu ni rúbhá zi tíá.

⁵³Pilátò kòka'i dre dhi, Yóséfà dré lìzo rúbhá nda ni tirí fa kipakipa drilésè, lambézóá kítá kemve sè gò, lìzo bhàá mógo àlo gàle kírà na, àbvò bhàzo lána rè ko dhi na.

⁵⁴Kítú nda tá kítú adrészó tà ledé sàbátù kandrá dhi 'i. Dì sàbátù adré tá 'ole kidhólé.

⁵⁵Tòkó alibhá tá Gàliláyà lésè túmání Yésu be nda i lebè tá Yóséfà gò, i dré mógo nda ni nòzo, ìndì à bhà Yésu ni rúbhá lána ngíni ya dhi ni nòzo.

⁵⁶Dì i dré gózo nzile gò, dò tàdzí be dóro amulé málásì be dhi ni ladhí. Dì sàbátù tú dhi, i dré lovózó ngóró tátrítrí kúlí dré adrélé tâle à kò'o dhi tíni.

Lúkà 24

Yésu ni ngàma dràdrà 'ásè dhi

(À kònò kpà Mátayò 28:1-10; Márokò 16:1-8; Yòwáni ` 20:1-10)

¹Kítú ni àlo pósò àdhya sè dhi, tòkó nda i dré ngàzo drùbhì kínó dò tàdzí be dóro i dré tá ladhílé nda ni do lìzo ába mógo na.

²I kòtsa dre dhi, i dré kisúzóá dhi, à li kírà mógo nda tísè dre.

³Dì, i dré fízo lána dhi, i kisú àyikya Míri Yésu ni rúbhá ko.

⁴Àyi kí drì dré adrérà'a abílé tà nda sè dhi 'á dhi, àgo rì kítá lagulagu ró dhi kí asóbhá dhi i dré agázó àyi kandrá.

⁵Dì tirì dré gàzo tòkó nda i léna bì gò, i dré tandìzo mìbhalé bha kìní na ró. Dì, àgo nda i dré tàzoá àyi dré dhi: «Mì adré dhya lídrì ro dhi ni nda àbvò i kòfalé àdho tà sè?

⁶Akódhi kònwa yókódhó. Nga ína dràdrà 'ásè dre! Mì kisù rè tà dré tá tâle àmì dré, dré rè dhu adrérà'a Gàliláyà na dhi 'á dhi ká.

⁷Akódhi tà tá dhi: «Adré lèá dhi, à kòlefè Móndí ni Mvá tákonzìbhá i drígá, akódhi ni tidízó dràle fa kipakipa dri gò, kítú ni na sè dhi, akódhi dré ngàzo dràdrà 'ásè. »»

⁸Dì kúlí dré tá tâle nda i dré agázó àyi léna.

⁹Dì i kàgò mógo lésè dre dhi, i dré tà tití nda kí titízó àpóstolò mudrí-drì-àlo dhi i dré, móndyá àruka tití dhi íbe.

¹⁰Tòkó nda i tá: Máríyà Mágadálénè, Yòwánà, Máríyà Yákóbhò ni andre, tsàle tòkó àruka i.

¹¹Dì, tà i dré titílé nda i sù tá ngóró kúlí azaaza i tíni àpóstolò nda i bína gò, i dré ka'izoá ko.

¹²Dì, Pétéró dré ína ngàzo ràle mógo na. Kòtsa tandile ngá no dre dhi, dré ngbà 'í kítá kàtswákàtswa dhi kí nòzo kòdhya. Dì akódhi ni líndrì dré gàzo gò, dré gózo nzile í bhàna, adrélé lizíá í léna ngalè àdho tà 'o tá ru ni ya dhi.

Yésu ni lebèbhá rì dhi i Èmáwù ni láti na

(À kònò kpà Márokò 16:12-13)

¹³Gbă kítú nda sè dhi, Yésu ni lebèbhá kí rì dhi ì adré tá lile bhà àlo rú be Èmáwù dhi na. Bhà nda vwà tá Yérusalémà rúsè dhi ànyíanyí kílôméterè mudrí-drì-àlo.

¹⁴Ì adré tá tà tití lavúbhá Yérusalémà na dhi ki tití.

¹⁵Ì dré tá adrérà'a tà ta ìndì tà kayí àyi kòfalésè dhi 'á dhi, Yésu ni tändi dré áyi kisízó ànyí àyi làga gò, ì dré adrészó lile túmání àyi íbe.

¹⁶Dì, à kíkí tá àyi kí mì, ì kòkitswáró niá akódhi àdhi 'í ya dhi ko.

¹⁷Yésu dré àyi kí lizízó tázooá dhi: «Mì adré tá àdho tà tití àmì kòfalésè, mì dré adrérà'a atsí to dhi 'á dhi? » Dì ì dré àyi kí kíkízó gò, àyi kí mìbhalé dré adrészó kízà ro lavúlé.

¹⁸Àyi kí àlo rú be Kèlèyópà dhi dré logózooá drá dhi: «Móndyá tití adrébhá tá Yérusalémà na dhi i kòfalé dhi, mì ngbà 'í móndí àlo tà lavúbhá kònàle kítú kònì i sè dhi kí nilepi ko dhi 'í? »

¹⁹Yésu lizí dhi: «Àdho tà 'í? » Ì logó drá dhi: «Tà atsábhá Yésu, Nàzàrétà lésè dhi rú dhi 'í. Akódhi tá pròfétà rìnyi ró kúlí tama sè ìndì tà 'òma sè Gíká kandrá ìndì móndya tití i kandrá dhi 'í.

²⁰Dì, kòwánà kàdrì i àma kí drì kobhá íbe dhi ì lefè tá àyikya akódhi, à kòbhàró tà akódhi dri kitswálé dràdrà sè. Gò ì dré akódhi ni tidízó fa kípakipa dri.

²¹Mà adré tá àmakya mì bha kisùzoá dhi, kònò akódhi ni tá Ísérélè ànzì kí apá nì. Kòdhí íbe dhi, ándrò kònìdhi, kítú ni na tà tití lavúbhá nda i àmvolésè dhi 'í.

²²Dì tòkó àruka àma kòfalé dhi ì tigá àma kí líndrí tà tändi ró. Ì lì tá drùbhì kínó mógo na.

²³Dì, ì kisú àyikya akódhi ni rúbhá ko. Gò ì dré agòzo longóá àma dré dhi, ángéló ì agá tá àyi kandrá tákà àyi dré dhi, Yésu be lídrì ro.

²⁴Dì àma kí arúpi àruka ì dré lìzo mógo na gò, ì dré tà nda ni kisúzó ngóró tòkó nda ì dré tá tâle dhi tíni. Dì, ì nò àyikya akódhi ko. »

²⁵Dì Yésu tà àyi dré dhi: «Á! Àmì móndí azaaza ró ni i, mì adré tà tití pròfétà ì dré longolé dhi kí ka'lì mbèlè ko!

²⁶Adré tá lèá dhi, Mèsiyà kònya kízà lású be kònìni gò, kòfiró áyi mìlanzìlanzi na dhi ko? »

²⁷Gò Yésu dré tà tití tisile áyi tà dri Gíká ni Kúlí na dhi kí àndu ngìzo àyi dré, kídhólé Mósè ni búkù i lésè pròfétà tití dhi kya íbe.

²⁸Ì kòtsa ànyí bhà ì dré tà adrészó lile lána dhi làga dre dhi, Yésu dré áyi 'òzo ngóró i adré tá lavúlé na tíni.

²⁹Dì, ì dré akódhi ni ti lizízó tà tändi ró tázooá dhi: «Mì kàdré rè túmání àma íbe. Kítú ndì dre, ìndì ngá adré anilé. » Dì dré fízo dzó na adrélé àyi íbe.

³⁰Ì kòlirí túmání mísá làgásè dre dhi, Yésu dré mápà adózó, tà taní zìzo drià Gìká tí gò, ñòzoá adrélé fèle àyi dré.

³¹Gbă kòdhwa, àyi kí mì dré ru nzìzo gò, ì dré akódhi ni nìzo. Di, dré ína tavìzo àyi milésè.

³²Gò ì dré tàzoá àyi kòfalésè dhi: «Àma kí togó adré tá zakó àtsì ró, dré tá adrérà'a tà àma dré láti na, adrészò tà Gìká ni Kúlí na dhi kí àndu ngì àma dré dhi 'á! »

³³Gbă lókyá nda sè dhi, ì dré ngàzo gòle Yèrúsalémà na. Ì kòtsa dre dhi, ì dré Yésu ni lebèbhá mudrí-drì-alo ru kímóbhá móndí àruka íbe dhi kí kisúzó.

³⁴Àyi nda ì dré tàzoá dhi: «Bàti, Míri nga dràdrà 'ásè dre! Agá ína Pétéró kandrá! »

³⁵Gò àyi rìti nda ì dré tà tití lavúbhá láti na dhi kí titízó àyi dré. Ì tití tá kpà, ì nì tá Yésu àdhi 'i ya dhi, dré tá adrérà'a mápà ño dhi 'á.

Yésu agá áyi lebèbhá i kandrá

(À kònò kpà Màtayò 28:16-20; Márokò 16:14-18; Yòwáni ` 20:19-23; Tà 'ole dhi i 1:6-8)

³⁶Ì dré rè dhu adrérà'a tà nda kí ta dhi 'á dhi, Yésu ni tändi dré agázó áyi totó àyi kòfalé gò, tàá àyi dré dhi: «Tà kìdríkìdrí kàdré àmi íbe! »

³⁷Di àyi kí líndrí dré gàzo tirì dré gò, ì dré adrészò kisùá dhi, ì adré móndí líndrí no kòdhya.

³⁸Di, Yésu dré tàzoá àyi dré dhi: «Àmi kí drì adré abílé àdho tà sè? Mì adré kpà tà kayí àmi léna àdho tà sè?

³⁹Mì nò rè áma drígá i áma pá íbe ni i ká. Kònìdhi áma tändi 'i! Mì tabè ma atógyàzoá dhi, móndí líndrí ză íbe ìndì fà íbe, ngóró mì dré adrélé nòle má dré adrészò ába kòndi tíni dhi ko. »

⁴⁰Kòtà tà nda dre dhi, dré áyi drígá kí tadházó áyi pá íbe àyi dré.

⁴¹Di, ì kitswá tá àyikya tà nda ni ka'i dhu rè ko togó kìní dré ìndì líndríga dré. Di Yésu dré lizízóá dhi: «Àmi ngá nyàle dhi íbe kònwa? »

⁴²Di ì dré kosyá ì dré libhílé dhi ni àmbí fèzo drá.

⁴³Gò dré dòzoá nyàle àyi mi.

⁴⁴Di dré tàzoá àyi dré dhi: «Mà dré tá adrérà'a túmání àmi íbe dhi 'á dhi, má tà tá tà kònì i àmi dré: «Adré lèá dhi, tà tití tísile áma tà dri Mósè ni tátrítrí kúlí na, pròfétà kí búkù i 'ásè, ìndì Yúdà ànzì kí Longó i 'ásè dhi ì kò'o ru. »»

⁴⁵Gò dré àyi kí tògyá nzìzo, ì kònìró tà tísile Gìká ni Kúlí na dhi kí àndu be dhi bvó.

⁴⁶Dré tàzoá àyi dré dhi: «À tísì tá tà kònì i: Mèsiyà ni kizà nya dràzo gò, kítú ni na sè dhi, dré ngàzo dràdrà 'ásè.

⁴⁷À tísì kpà dhi, à ni kúlí longó akódhi ni rú sè surú tití i dré kìdhólé Yèrúsalémà na tàzoá dhi, ì kòladzá àyi kí togó, Gìká kòtriró àyi kí tàkonzì i be dhi bvó.

⁴⁸Àmì dhya tà nda kòdhì kì nobhá mì sè, ìndì yibhá bíbhálé sè dhì 'ì.

⁴⁹Mì yi rè ká! Má nì mána Tírí Lólo áma Atá dré lazilé dhì nì amù àmì dré. Dì àmì ró dhì, mì kàdré adrélé bhàandre 'á, tsàle lókyá rìnyí apfòlepi bhù lésè nda dré dra àmì kì asózó dhì 'á. »

Yésu mbà bhù na àyì lebèbhá i misè

(À kònò kpà Márokò 16:19-20; Tà 'ole dhì i 1:9-11)

⁵⁰Gò Yésu dré àyì kì drìzo lìzo àyì íbe tsàle ànyì Bètànìyà làga. Dré drígá tingázó kurú na, tà tanì zìzo Gìká tí àyì dri.

⁵¹Dì dré adrérà'a tà tanì zi àyì dri dhì 'á dhì, dré àyì kì tayízó gò, Gìká dré akódhì nì dòzo bhù na.

⁵²Dì è dré àyikya ledhézó àyì kì kórókó titì akódhì nì lìndrì bhàzo gò, è dré gòzo Yérusalémà na kólénzé be bì.

⁵³Dì kítú àlo àlo tití i sè dhì, è adrélé tá tépelò na, adrélé Gìká nì rú bha kùle landè àko ró.

Yòwánì

Yòwánì 1

Yésu Krísto, Gìká ni Kúlí 'í

¹Ngá wáyi dhi kí bhàma kandrá dhi, Kúlí tá be. Kúlí nda tá túmání Gìká be, ìndì Kúlí nda tá Gìká 'í.

²Akódhi tá túmání Gìká be drìdrì ngá wáyi dhi kí bhàma kandrá.

³Gìká 'o tá akódhi ngá wáyi dhi kí bha dhi kòdhya. Dí ngá àlo bhàle akódhi àko dhi yókódhó.

⁴Lídri tá akódhi léna, ìndì lídri nda tá ngádra 'í móndí i dré.

⁵Ngádra nda adré kòle tínimvá na, ìndì tínimvá kitswá akódhi ni lavú bwà ko.

⁶Gìká amù tá dhya àlo rú be Yòwánì dhi.

⁷Akódhi nda alì ngádra nda ni tà longó, móndyá wáyi dhi i kòka'iró ásà be dhi bvó.

⁸Yòwánì ni tändi tá ngádra nda 'í ko. Dí, akódhi alì ína ngádra nda ni tà longó.

⁹Tako ko, ngádra báti adrélépi ngá kazá móndyá wáyi i dré dhi, adré tá alìle bvò le.

¹⁰Dí dhya adrélépi Kúlí 'í nda alì tá adrélé bvò le. Dí, tágba Gìká dré akódhi ni 'òzo bvò nda ni bha dhi, móndyá bvò nda àdhya i nì akódhi ko.

¹¹Akódhi atsá áyi tändi ni móndyá i vélé. Dí, móndyá akódhi àdhya nda i ka'i àyíkyá akódhi ko.

¹²Tágba kònìnì dhi, móndyá wáyi akódhi ni ka'ibhá, akódhi ni dòzo àyi kí togó na dhi i dré dhi, akódhi fè rinyí i dré atsázó Gìká ni ànzi i ró.

¹³À ti ànzi nda i ngóró móndí i dré adrélé ànzi ti dhi tini ko, ngóró móndí i dré adrélé tà le 'ole dhi tini ko, ìndì agó dré adrélé tà le 'ole dhi tini ko. Be ró dhi, Gìká ti àyi atsálé áyi ànzi i ró dhi nì.

¹⁴Dhya adrélépi Kúlí 'í nda atsá tá móndí ro gó, dré bhà mòzo àma kòfalé adrészó túmání àma íbe. Mà nò akódhi ni mìlanzìlanzì 'í. Mìlanzìlanzì nda, mìlanzìlanzì Gìká ni Mváagó àlo kwákwa nda dré kisulé áyi Atá véna dhi 'í. Akódhi ga togó taní sè bǐ, ìndì tà báti sè bǐ.

¹⁵Dí Yòwánì longó tá akódhi nda ni tà ngádra 'á móndí i dré. Akódhi loyó kúlí tázoo dhi: «Kònìdhi dhya má dré tá tà ni ni tázoo dhi 'í. Má tà tá dhi: «Dhya adrélépi adhélé má bvó dhi kàdrì áma lavú. Tako ko, áma tirà ko dhi 'á dhi, akódhi tá ína be.»»

¹⁶Akódhi nda ni togó taní kàdrì lavúlé dhi sè dhi, àma tití, mà kisú tà taní tà taní àzya dri.

¹⁷Tako ko, Gìká longó tá áyi tátrítrí kúlí Mósè tí. Dí, fè Yésu Krísto áyi togó taní tadhá áyi tà báti be dhi kòdhya.

¹⁸Dhya àlo nò tàdzí Gìká ko. Dì, akódhì ni Mváagó àlo kwákwá adrélépi ína Gìká ro, ìndì adrélépi áyi Atá làga nda, 'o Gìká móndí ì dré nile dhi ni.

Yòwáni` Bâtisimò fèlepi longó Yésu ni tà

(À kònò kpà Mâtayò 3:1-12; Márokò 1:1-8; Lükà 3:1-18)

¹⁹Yúdà ànzì ki kàdrì Yèrusalémà na dhi ì dré kòwánà ki mùzo Lévi íbe lìle Yòwánì véna dhi, àyi nda ì lizí tá akódhì tí dhi: «Mí àdhi 'i? »

²⁰Dì akódhì gà kúlí logoma àyi tí dhi ko. Dì, tà ína ngádra 'á dhi: «Ma Mèsiyà 'i ko. »

²¹Ì gò lizíá tíá dhi: «Mí dì mína àdhi 'i? Mi Èlífayà 'i? » Akódhì logó dhi: «Kóko, ma Èlífayà 'i ko. » Ì gò lizíá dhi: «Mí Pròfétà tá tà ni ni longozó dhi 'i? » Akódhì logó dhi: «Kóko. »

²²Ì gò tàá drá dhi: «Mí dì mína àdhi 'i, mà kòkítswáró kúlí logó dhya àma ki amùbhá dhi ì dré? Mí adré tàá ámi tändi ni tà sè ngíni? »

²³Dì Yòwánì logó kúlí ngóró pròfétà Èsáyà dré tá tâle kínó dhi tíni: «Ma dhya adrélépi kúlí loyó duku na dhi 'i. Má adré tàá dhi: <Mí kòlotó láti atsálé pyà Míri dré! »

²⁴Dhya mûle nda ki àruka i tá Fàrisayò 'i.

²⁵Dì àyi nda ì gò Yòwánì ni lizí: «Mí kàdré mína Mèsiyà 'i yà, Èlífayà 'i yà, kó ngalè Pròfétà 'i yà dhi ko dhi, mí adré dì bâtisimò fe àdho tà sè? »

²⁶Yòwánì logó àyi dré dhi: «Má adré mána bâtisimò fe yí sè. Dì, dhya àlo mì dré nile ko dhi ína kònwa àmi kòfalé.

²⁷Akódhì nda adré adhélé má bvó dhi ni. Má kitswá mána akódhì ni lindrì sè ko. Má kitswá ndìndì akódhì ni kámókà bă tri bwà ko. »

²⁸Tà tití nda kòdhì ì 'o tá ru Bètaníyà na, Yòròdánè ni ta'á na, àrà Yòwánì dré tá adrészò bâtisimò fe dhi na.

Yésu, Kabilígyà Mvá Gìká àdhya 'i

²⁹Kítú bvóá dhi sè dhi, Yòwánì dré Yésu ni nòzo adrérà'a alìle í vélé gò, dré tâzoá dhi: «Mí nò rè Kabilígyà Mvá Gìká àdhya adrélépi móndyá bvò àdhya ki tàkonzì tingá dhi ká!

³⁰Kònìdhì dhya má dré tá tà ni ni tâzo dhi 'i. Má tà tá dhi: <Agó adrélépi adhélé má bvó dhi kàdrì áma lavú. Tako ko, áma tirà ko dhi 'á dhi, akódhì tá ína be. >³¹Áma tändi, má ni tá akódhì àdhi 'i ya dhi ko. Dì, má alì mána bâtisimò fe yí sè, Gìká kòtadháró akódhì ìsérélè ànzì ì dré be dhi bvó. »

³²Yòwánì gò tàá dhi: «Má nò Tirí Lolo asírà'a bhù lésè kòbhòlà tíni adhélé adrélé akódhì dri.

³³Áma tändi, má nì tá akódhi àdhi 'i ya dhi ko. Dì, Gìká áma amùlepi bátísimò fe yí sè dhi tà tá má dré dhi: «Dhya mí dré dra Tírí Lólo nòzo asíra'a adhélé adrélé driá dhi, akódhi nda nì bátísimò fe Tírí Lólo sè nì. »

³⁴Dì áma tändi, má nò tà nda áma mì sè gò, má dré adrészó longóá ngádra 'á dhi, akódhi nda Gìká nì Mváagó 'i. »

Yésu kidhó áyì lebèbhá kí azí

³⁵Kítú bvóá dhi sè dhi, Yòwánì i lebèbhá nì íbe rì dhi ì dré gòzo tódyá adrélé àrà nda na.

³⁶Akódhi dré Yésu nì nòzo adrérà'a lavulé dhi, dré tázoo dhi: «Mì nò rè Kábilígyà Mvá Gìká àdhyá ká! »

³⁷Akódhi ni lebèbhá rì nda ì kòyi akódhi ni kúlí nda dre dhi, ì dré ngàzo adrélé Yésu nì lebè.

³⁸Dì Yésu dré áyì alázó àyì kí no adrérà'a áyì lebè gò, dré àyì kí lizízó tázoo dhi: «Mì adré àdho nda? » Ì tà drá dhi: «Rábbì, mí adré adrélé ángolé? » (Rú «Rábbì» nda kòdhì adré lèá tâle dhi «Tà tadhálépi».)

³⁹Akódhi logó àyì dré dhi: «Mì alì, mì nì nòá. » Dì ì dré lìzo àrà dré tâ adrészó adrélé dhi nì no. Gò ì dré adrészó túmání akódhi be kítú nda nì àmbí sè tití. Lókyá nda tâ anyíanyì sáà su kítú rírí àmvolésè dhi 'i.

⁴⁰Àyì rì Yòwánì ni kúlí yibhá gò ì dré Yésu ni lebèzo nda kí àlo tâ Àndréyà, Sìmónà Pétéró ni adrúpi 'i.

⁴¹Dì akódhi nda dré zyà ngàzo lìle áyì adrúpi Sìmónà nì kisú gò, tázoo drá dhi: «Mà kisú Mèsíyà dre. » (Rú «Mèsíyà» nda kòdhì adré lèá tâle dhi «Krísto».)

⁴²Dré Sìmónà nda nì drìzo lìzo ába Yésu véna. Dì Yésu dré akódhi nì nòzo dìí gò, tázoo dhi: «Mi, Sìmónà, Yòwánì nì mvá 'i. À nì ámi rú zi Kéfà. » (Rú nda kòdhì adré lèá tâle dhi «Pétéró».)

Yésu azí Filípò i Nàtànàyélè be

⁴³Kítú bvóá dhi sè dhi, Yésu lè tá lìle bvò Gàlìlàyà àdhyá na gò, dré láti dòzo lìzo. Dré Filípò ni kisúzó gò, tázoo drá dhi: «Mí lebè ma! »

⁴⁴Filípò nda angá tâ Bètèsayídà, bhàandre Àndréyà kya Pétéró be dhi lésè.

⁴⁵Dì Filípò dré ngàzo lìle Nàtànàyélè nì kisú gò, tázoo drá dhi: «Mà kisú dhya Mósè dré tâ nì ni tisìzo búkù tátrítrí kúlí àdhyá léna, ìndì pròfétà ì dré kpà tâ nì ni longozó dhi dre. Akódhi nda, Yésu, Yòséfà nì mvá Nàzàréta lésè dhi 'i. »

⁴⁶Dì Nàtànàyélè nda tâ drá dhi: «Ngá dóro nì kítswá apfòle Nàzàréta lésè bwà? » Filípò logó drá dhi: «Mì alì nòá. »

⁴⁷Yésu kònò Nàtànàyélè adrérà'a alìle í vélé dre dhi, dré tázoo akódhi nì tâ sè dhi: «Mì nò rè ìsérélè mvá báti kònìdhì. Túrúpfú tâ akódhi léna yókódhó. »

⁴⁸Dì Nàtànàyélè dré Yésu nì lizízó tázoo dhi: «Mí nì ma ngíni? » Yésu logó drá dhi: «Drìdrì Filípò dré ámi azízó, mí dré tá adrérà'a fígi kómvo dhi 'á dhi, má nò tá mí 'í. »

⁴⁹Dì Nàtànàyélè tà drá dhi: «Rábbi, mí Gíká nì Mváagó 'í báti! Mí Ìsérélè ànzì kí Ópí 'í! »

⁵⁰Dì Yésu logó drá dhi: «Mí adré áma ka'i, má dré tâle mí dré dhi má nò tá mí figi kómvo dhi sè? Mí nì tà kàdrìkàdrì dra tà kòdhi nì lavúbhá dhi kí no! »

⁵¹Gò tâá dhi: «Má adré tà báti ta àmí dré: Mí nì bhù no ru lanzírà'a, adrészó kpà Gíká nì ángéló kí no adrérà'a tombàle ìndì tisílé Móndí nì Mvá drísé! »

Yòwánì 2

Yésu ladzá yí atsálé vínò ro

¹Kítú rì àmvolésè dhi, à adré tá gwányá làmò àdhya nì 'o bhàandre Kánà àdhya Gàliláyà le dhi na. Yésu nì andre tá kònàle be.

²À zi tá kpà Yésu i lebèbhá nì íbe lìle gwányá nda na.

³Dì vínò dré akízó gò, Yésu nì andre dré tázoo drá dhi: «Vínò àyi dré vélé yó. »

⁴Dì Yésu logó drá dhi: «Áma andre, mí adré áma so tà kòdhi léna àdho tà sè? Lókyá mána kítswá rè ko. »

⁵Dì, andre nì dré tázoo màrábà i dré dhi: «Mí kò'o tà ángùdhi akódhi dré dra tâle àmí dré dhi kòdhyá. »

⁶Àrà nda 'á dhi, lìdrí nzi-drì-àlo ledélé kírà sè dhi i tá be. Lìdrí lású be kònìnì nda i sè dhi, Yúdà ànzì i adré tá yí tokó adrészó àyi kí temvé ásà. Lìdrí àlo àlo nda kí 'a adré tá yí do ànyíanyí líterè nyadhi-nzi.

⁷Dì Yésu dré tázoo màrábà nda i dré dhi: «Mí tokó yí todàle gàle lìdrí kònì i 'ásè. » Gò i dré tokózóá todàle gàle àyi 'ásè bïbi.

⁸Yésu dré gózo tâá àyi dré dhi: «Mí ko nyànomvá lìzo ába gwányá líyí dré. » Dì i dré 'òzoá kònìnì.

⁹Gwányá líyí nda nì yí tabhì dhi, àkò yí nda ladzá ru atsálé vínò ro dre. Akódhi nì tá ngalè vínò nda angá ángolésè ya dhi ko. Dì, màrábà yí nda nì kobhá dhi i nì àyikya be. Dì gwányá líyí nda dré dhya tòkó mòlepi dhi nì azízó,

¹⁰tázoo drá dhi: «Móndyá wäyi dhi i adré gà vínò doro lavúlé dhi nì fe mvùle 'íká. Dì à kòmvu tà tändì ró dre dhi, i dré gózo adrélé vínò doro wäyi ko dhi nì fe mvùle ndò. Dì, mí zù mína vínò doro lavúlé dhi gò afèzoá nyànomvá. »

¹¹Kòrìdhi, tà líndriga ró Yésu dré 'ole drìdrì dhi 'í. 'O tá tà nda Kánà, bvò Gàliláyà àdhya lé dhi na. 'O kònìnì kítswázó áyi mìlanzìlanzì tadhá gò, akódhi nì lebèbhá i dré akódhi nì ka'ízo ásà.

¹²Àmvolásà dhi, Yésu ì dré lìzo andre ni íbe, adrúpi ni íbe ìndì lebèbhá ni íbe, tsàle bhàandre Kàpàrànàwumà àdhya na. Gò ì dré adrészó kònàle gile lókyá be vwàvwà ro tsà.

Yésu dro móndyá adrébhá ngá lagí¹ dhi i topfòle tépelò 'ásè

(À kònò kpà Mátayò 21:12-13; Márökò 11:15-17; Lükà 19:45-46)

¹³Yúdà ànzì ki gwányá Pásikà àdhya atsá tá ànyi gò, Yésu dré mbàzo Yérusalémà na.

¹⁴Kòfí tépelò ni bhà'álé na dre dhi, dré móndí adrébhá tá tí ki lagí kabilígyà íbe ìndì kòbhòlà íbe dhi ki kisúzó, túmäní móndí liribhá adrélé làfa topfó mísá i làgásè dhi íbe.

¹⁵Dì dré ngàzo fímbò ledé bă sè gò, àyi ki ladrózó topfòle tití tépelò nda 'ásè, àyi ki tí íbe ìndì àyi ki kabilígyà íbe. Dré móndyá adrébhá tá làfa topfó nda ki làfa arízó, mísá àyikya ki lebhézó kíní mi.

¹⁶Gò dré tazoá móndyá adrébhá tá kòbhòlà lagí nda i dré dhi: «Mì nga kònwasè àmi ki ngá kòdhi íbe tití! Mì kòbhà áma Atá ni dzó atsálé àrà adrészó ngá lagí dhi ró ko! »

¹⁷Dì tà tisile Giká ni Kúlí na kònìdhi dré agázó akódhi ni lebèbhá i léna: «Áma togó àtsi ró ámi dzó ni tà sè dhi ni áma za vèle. »

¹⁸Gò Yúdà ànzì ki kàdrì ì dré lizízóá Yésu tí dhi: «Mí ni àdho tà lindríga ró dhi ni 'o tadházóá àma dré dhi, Giká fè mí dré rinyí adrészó tà kòdhi ki 'o ni dhi? »

¹⁹Dì Yésu logó àyi dré dhi: «Mì kòpfu tépelò kònìdhi dhi, má ni go tingáá kítú na àmvolésè. »

²⁰Yúdà ànzì nda i gó tàá dhi: «Tépelò kònìdhi ni sìzo dhi do tá kóná nyadhi-rì-drì-nzi-drì-alo. Mí ni dì go siá kítú na sè ngíningíni ró? »

²¹Dì, tépelò Yésu dré tá adrészó tà ni ni ta dhi ína akódhi ni rúbhá 'i.

²²Akódhi ni ngàma dràdrà 'ásè dhi àmvolésè dhi, kúlí dré tá tâle nda kòdhi dré gòzo agálé akódhi ni lebèbhá i léna. Dì ì dré tà tisile Giká ni Kúlí na dhi ki ka'izo, kúlí Yésu dré tá tâle dhi íbe.

Yésu nì tà adrélépi móndí¹ ki togó na dhi be

²³Yésu dré tá adrérà'a Yérusalémà na gwányá Pásikà àdhya ni tà sè dhi 'á dhi, móndí zyandre dhi ì dré tà lindríga ró dré adrélé 'ole dhi ki nòzo gò, ì dré akódhi ni ka'izo.

²⁴Dì, Yésu ka'lì tá ína àyi nda ki tà ko. Tako ko, nì móndyá tití dhi ki tà be.

²⁵Lè tá à kòtà móndí ki tà akódhi dré dhi ko. Àngyá ko, nì ína tà adrélépi móndí ki togó na dhi be.

Yòwánì 3

Yésu tadhá tà Nìkòdémò dré

¹Fàrlisyò i kòfalé dhi, agó àlo rú be Nìkòdémò dhi tá be. Akódhi tá kpà Yúdà ànzì ki kàdrì ki àlo 'i.

²Ngátsi àlo sè dhì, alì tá Yésu vélé gò, tàá drá dhì: «Rábbì, mà nì tâle dhì, Gìká amù mí adrélé áyi tà tadhálépi ró nì dhì be. Àngyá ko, dhya àlo kitswá tá tà líndríga ró mí dré adrélé 'ole dhì kí 'o bwà ko, Gìká kàdré tá túmâni akódhì be ko dhì. »

³Yésu logó drá dhì: «Má adré tà bâti ta mí dré: Dhya àlo kitswá Gìká nì Òpì no bwà ko, kòtayí i gòle tile tódyá ko dhì. »

⁴Dì Nikòdémò lizí tíá dhì: «Móndí agàlepi dre dhì nì áyi tayí gòle tile tódyá ngíningíni ró? A nì kitswá gòle fîle áyi andre lé gò, gòzo akódhì nì ti vésè be rì bwà? »

⁵Yésu gò logóá drá dhì: «Má adré tà bâti ta mí dré: Dhya ángùdhì tile yí sè ìndì Gìká nì Tírì sè ko dhì kitswá ína fîle Gìká nì Òpì na bwà ko.

⁶Dhya móndí dré tile nì dhì, akódhì nda lídrì rúbhá àdhya íbe. Dì, dhya Gìká nì Tírì dré tile nì dhì, akódhì nda lídrì Tírì àdhya íbe.

⁷Lè ámi líndrí kàdré gâle, má dré tâle mí dré dhì «Lè mí kòtayí mí gòle tile tódyá dhì sè ko.

⁸Lyă adré vîle àrà ángùdhì dré adrészó lèle vîle dhì 'ásè. Gba mí kàdré kpòrò nì nì yi yà dhì, mí kitswá niá ngalè lyă nda angá ángolésè ya, kó ngalè adré lîle ángolé ya dhì ko. Dì tà nda kòdhì kókpà kònini dhya ángùdhì Gìká nì Tírì dré tile dhì nì tâ sè. »

⁹Nikòdémò gò lizíá tíá dhì: «Tà kòdhì nì kitswá ru 'o ngíningíni ró? »

¹⁰Yésu logó drá dhì: «Mí tà tadhálépi kàdrì Isérélè ànzì i kòfalé dhì 'i. Dì, mí nì mína tà kòdhì ko?

¹¹Má adré tà bâti ta mí dré: Mà adré tà mà dré nîle dhì kí ta, adrészó tà mà dré nôle dhì kí longó kòdhya. Dì, mí lè àmikya tà mà dré adrélé longólé nda kí ka'ile ko.

¹²Gba má dré adrészó tà bvò kòndì àdhya kí ta àmì dré dhì, mí adré àmikya tà nda kí ka'ile ko. Dì má kògò adrélé tà bhù àdhya kí ta àmì dré dhì, mí nì dì tà nda kí ka'ile ngíningíni ró?

¹³Dhya àlo mbàlepi bhù na dhì tâdzí yókódhó, ngbà 'í Móndí nì Mvá asilépi bhù lésè dhì 'i.

¹⁴Ngóró Mósè dré tá nì ledélé aya sè asólé fa sîlé dhì nì tingálé kuru duku na dhì tîni dhì, adré kpà lèá dhì, à kòtingá Móndí nì Mvá kuru kònini,

¹⁵kitswálé móndyá wâyi akódhì nì ka'ibhá dhì i kàdréró lídrì kóná vésè kólyá dhì íbe. ¹⁶Tako ko, Gìká dré móndyá wâyi bvò àdhya kí lèle tò dhì sè dhì, afè áyi Mváagó àlo kwákwá dhì, kitswálé dhya ángùdhì adrélépi akódhì nì ka'ile dhì kòdraró nyo ko, be ró dhì, kàdréró lídrì kóná vésè kólyá dhì íbe.

¹⁷Àngyá ko, Gìká amù áyi Mváagó bvò kònidihi lé kitswálé tà bha móndyá bvò àdhya i dri ko. Be ró dhì, amù akódhì kitswázó móndyá bvò àdhya kí tîdrí akódhì sè dhì bvó.

¹⁸Dhya ángùdhi adrélépi Mváagó nda ní ka'ì dhi, Giká kítswá tà bhà akódhi dri ko. Di, dhya ángùdhi adrélépi Mváagó nda ní ka'ì ko dhi, Giká bhà tà akódhi dri dre. Tako ko, akódhi nda ka'ì Giká ní Mváagó àlo kwákwá dhi ko.

¹⁹Tà Giká dré adrészó móndí kí tábvo ta ásà dhi, tà kònìdhì 'í: Ngádra atsá bvò 'a dre. Di, móndyá bvò àdhya ì lè àyíkyá tínímvá, ngádra nda ní lavú. Àngyá ko, tà ì dré adrélé 'ole dhi ì kònzi.

²⁰Dhya ángùdhi adrélépi tà kònzi 'o dhi adré ngádra nda ní ga. Dhya nda adré kpà alìle ngádra nda vélé ko, akódhi ní tà kònzi ì kàpfòrò ngádra nda 'á ko.

²¹Di, dhya ángùdhi adrélépi tà báti ka'ì 'ole dhi adré alìle ngádra nda vélé, à kòkítswáró nòá dhi, akódhi adré tà 'o ngóró Giká dré adrélé lèle dhi tíni. »

Yòwáni` Bâtisimò fèlepi longó Yésu ni tà ngádra 'á

²²Àmvolásà dhi, Yésu ì lebèbhá ní ìbe dhi ì dré gòzo lìle bvò Yùdáyà àdhya na. Ì adré tá túmání kònàle lókyá be tsà gò, akódhi dré adrészó bâtisimò fe móndí ì dré.

²³Yòwánì adré tá kpà bâtisimò fe Àyìnónà na, ànyì Sàlímà làga, yì dré tá adrélé kònàle tò dhi sè. Móndí ì adré tá lìle akódhi véna gò, dré adrészó bâtisimò fe àyi dré.

²⁴Àngyá ko, à ru tá rè Yòwánì bhèle bădzó na dhi ko.

²⁵Kítú àlo dhi, Yòwánì ni lebèbhá ì kidhó tá adrélé tà kayí àyi kòfalésè Yúdà mvá àlo dhi be, tà adrészó móndí kí temvé dhi ní tà dri.

²⁶Di ì dré lìzo Yòwánì véna tàá drá dhi: «Rábbi, dhya mì dré tá adrészó ába Yòròdánè ní ta'á na gò mí dré tà ní ní longozó dhi adré kpà ína bâtisimò fe. Di nyànomvá dhi, móndyá wäyi dhi ì adré lìle vélana. »

²⁷Di Yòwánì logó dhi: «Dhya àlo kítswá tà àlo kisú bwà ko, Giká kòfè tà nda drá ní ko dhi.

²⁸Àmi kí tändi, mì yi ma tärà'a ngádra 'á dhi: «Ma Mèsíyà 'í ko. Di, Giká amù ma alìle drìdrì akódhi nda kandrá. »

²⁹Dhya adrélépi tòkó mo dhi, tòkó líyí 'í. Di, tòkó líyí nda ní arúpi adré ína áyi totó ànyì làga, adrélé akódhi ní yi. Kòyi akódhi ní kúlí dre dhi, adré lenzélé tò. Di ma ró dhi, má adré lenzélé kònini, ìndì áma kólénzé nda kàdrì lavulé.

³⁰Adré lèá dhi, akódhi ní tà kàdré lìle drìdrì, di, mána kàdré agòle bvólé ro. »

Dhya apfòlepi bhù lésè dhi

³¹«Dhya apfòlepi kurú lésè dhi, móndyá wäyi dhi ì drile. Di, dhya apfòlepi bvò kònìdhì lésè dhi ína móndí bvò àdhya 'í. Akódhi nda adré tà bvò àdhya kí ta kòdhya. Dhya apfòlepi bhù lésè nda móndyá wäyi dhi ì drile.

³²Akódhi adré tà í dré nòle mì sè ìndì í dré yile bíbhálé sè dhi kí longó kòdhya. Di, dhya àlo adré tà akódhi dré adrélé longolé nda kí ka'i ko.

³³Dhya tà longolé nda kí ka'ilépi dhi adré tadhá dhi, Giká adré tà báti ta.

³⁴Tàko ko, dhya Gìká dré amùle nda adré Gìká ni kúlí ta kòdhya. Àngyá ko, Gìká fè akódhi gàle áyi Tírí sè bì.

³⁵Gìká Atá adré áyi Mváagó ni le. Tayí kpà tà tití dhi i akódhi drígá.

³⁶Dhya ángùdhi adrélépi Mváagó nda ni ka'i dhi, akódhi nda lídrì kóná vésè kólyá dhi íbe. Di, dhya adrélépi Mváagó nda ni ga dhi kítswá ína lídrì nda ni kisú ko. Be ró dhi, Gìká ni kombà ni adré akódhi dri nyo. »

Yòwánì 4

Yésu tà tà Sàmàrì́ yà tòkó àlo dhi be

¹⁻³Fàrisayò i yi tá tâle dhi, Yésu adré tá móndí bì dhi ki 'o atsálé áyi lebèbhá i ró, adrészó kpà bátísimò fe àyi dré, ìndì adré tá 'òá kònìnì Yòwánì àdhya ni lavú. (Tà bâti ró dhi, Yésu ni tândì adré tá bátísimò fe àyi dré nì ko. Be ró dhi, akódhi ni lebèbhá i adré tá fèá àyi.) Di Yésu kòyi tà adrélé tâle áyi tà dri nda dre dhi, dré angázó bvò Yùdáyà àdhya lésè gò, láti do gòzo bvò Gàliláyà àdhya na.

⁴Adré tá lèá dhi, akódhi kòlavú bvò Sàmàrìyà àdhya 'ásè.

⁵Di dré lìzo tsàle bhàandre àlo Sàmàrìyà le, rú zile Sìkárà dhi na, ànyi amvú Yàkóbhò dré tá fèle áyi mvá Yòséfà dré dhi làga.

⁶Kóró Yàkóbhò àdhya tá kònàle be. Yésu dré landèle atsí dré dhi sè dhi, dré tsàzo lirílé ànyi kóró nda làga, ànyiànyi kítú rírí sè.

⁷Di Sàmàrìyà tòkó àlo dhi dré alìzo yí ko gò, Yésu dré tâzoá drá dhi: «Mí afè má dré yí mvûle. »

⁸(Akódhi ni lebèbhá i lì tá bhàandre na, kitswálé ngá gi àyi dré nyàle.)

⁹Di Sàmàrìyà tòkó nda gò tâá akódhi dré dhi: «Mí kàdré kó Yùdà mvá i dhi, mí adré dì yí zi mvûle ma, Sàmàrìyà tòko ró ni tí ngíningíni ró? » (Akódhi tà tá kònìnì tàko ko, Yùdà ànzì i adré gâ ru su Sàmàrìyà íbe ko.)

¹⁰Di Yésu logó drá dhi: «Mí kònì tá kó rè tà Gìká dré adrélé fèle mí dré dhi be, ìndì dhya adrélépi yí zi mí tí dhi be dhi, kònò mí ni tá yí zi má tí gò, má dré yí adrélépi lídrì fe dhi ni fèzo mí dré. »

¹¹Tòkó nda tà drá dhi: «Míri, mí ngá yí akózó dhi àko, ìndì kóró alú lavúlé. Mí ni yí adrélépi lídrì fe nda ni kisú ángwà?

¹²Mí adré kisùá dhi, mí mína kàdrì àma ki tâbhí Yàkóbhò ni lavú? Akódhi nda tayí kóró kònìdhi àma dré nì. Akódhi ni tândì mvu tá yí kònwa, túmâní ànzì ni íbe, ìndì kà'wá ni íbe. »

¹³Di Yésu logó drá dhi: «Dhya ángùdhi adrélépi yí kònìdhi ni mvu dhi, yí lovó ni go akódhi ni 'o tódyá.

¹⁴Dì, dhya ángùdhi yì má dré dra fèle í dré dhi nì mvùlepi dhi, yì lovó kïtswá gòle vélé akódhi nì 'o ko. Bàti, yì má dré dra fèle akódhi dré nda nì atsá akódhi léna kidri adrélépi sèle ko ìndì adrélépi lídrì kóná vésè kólyá dhi nì fe dhi ró. »

¹⁵Dì tòkó nda tà drá dhi: «Mírì, mí afè má dré yì nda kòdhya, yì lovó kògoró vélé áma 'o ko, ìndì má kògoró vélé alile yì ko kònwa ko. »

¹⁶Yésu tà drá dhi: «Mí lì ámi agó nì azí, mì kàgoró túmäní kònwa. »

¹⁷Tòkó nda logó drá dhi: «Ma agó àko. » Dì Yésu tà drá dhi: «Mí tà kyá tâle dhi, mí agó àko dhi. »

¹⁸Àngyá ko, mì tá àgo íbe nzi, ìndì agó mí dré adrészó ába áandrò nì, mína 'i ko. Tà mí dré tâle nda, tà bàti 'i. »

¹⁹Dì tòkó nda tà drá dhi: «Mírì, má adré nòá dhi, mì pròfétà 'i. »

²⁰Àma kì tâbhí í adré tá Giká nì líndrì bha kòngó kònìdhi dri. Dì, àmi Yúdà ànzì ró dhi i, mì adré tâá dhi, àrà adrészó Giká nì líndrì bha dhi ngbà 'í Yérusalémà na. »

²¹Dì Yésu logó drá dhi: «Tòkó, mí ka'i vo rè áma kúlí ká! Lókyá adrélépi alile dhi sè dhi, mì gò vélé Giká Atá nì líndrì bha kòngó kònìdhi dri ya, kó ngalè Yérusalémà na ya dhi ko. »

²²Àmi, Sàmàriyà ro nì i, mì adré àmikya Giká nì líndrì bha akódhi nì nì àko ró. Dì, àma Yúdà ànzì ró dhi i, mà adré àmakya Giká mà dré nile be dhi nì líndrì bha kòdhya. Àngyá ko, tà adrészó móndí kì tîdrí dhi angá Yúdà ànzì i vélésè. »

²³Lókyá adré alile, atsá kpà dre, móndyá adrébhá Giká Atá nì líndrì bha bàti dhi kì líndrì nì nì bha Tírí na, ìndì tà bàti na. Tako ko, Giká Atá adré móndyá adrébhá ayí líndrì bha kònìnì dhi kì nda kòdhya. »

²⁴Giká Tírí 'i. Adré di lèá dhi, móndyá adrébhá akódhi nì líndrì bha dhi í kàdré líndrì nì nì bha Tírí na ìndì tà bàti na. »

²⁵Tòkó nda gò tâá drá dhi: «Má nì tâle dhi, Mèsiyà adré alile dhi be. À adré kpà akódhi nì rú zi Krísto. Akódhi kàtsá dre dhi, a nì tà tití dhi kì àndu ngi àma dré. »

²⁶Dì Yésu dré tâzoá drá dhi: «Ma adrélépi tà ta mí be nì, ma akódhi nda 'i. »

Yésu nì lebèbhá i` agò akódhi vélé

²⁷Gbă lókyá nda sè dhi, Yésu nì lebèbhá í dré agòzo gò, àyi kì líndrì dré gàzo, í dré akódhi nì kisulé adrérà'a tà ta tòkó àlo be dhi sè. Dì, tágba kònìnì dhi, àyi kì àlo lizí tá ko tâle dhi «Mí adré àdho nda? » ya, kó ngalè «Mí adré tà ta akódhi be àdho tà sè? » ya dhi. »

²⁸Dì tòkó nda dré áyi lídrí adrészó yì akó ásà dhi nì tayízó gò, gòzo bhàandre nda na, tâá móndyá kònàle dhi i dré dhi:

²⁹«Mí alì agó tà tití má dré 'ole dhi kì tâlepi má dré dhi nì no! Kònò akódhi nda tsì Mèsiyà 'i ko? »

³⁰Dì àyi nda ì dré apfòzo bhàandre nda lésè adrélé alile Yésu vélé.

³¹Lókyá nda sè dhi, Yésu ni lebèbhá ì dré akódhi ni ti lizízó tazoá dhi: «Rábbi, mí kónya ngá wà! »

³²Dì, akódhi logó àyi dré dhi: «Ma mána ngá nyàle mì dré nile ko dhi íbe. »

³³Dì akódhi ni lebèbhá nda ì dré kihdzózó adrélé liziá àyi kòfalésè dhi: «Kònò móndí atsá ngá adzí akódhi dré nyàle dre? »

³⁴Dì Yésu tà àyi dré dhi: «Áma mányàngá ína adrema tà dhya áma amùlepi dhi dré adrélé lèle má kò'o dhi ki 'o, adrészó akódhi ni àzí 'o akílé tití dhi i.

³⁵Mì adré zakó tàá dhi: «Tayí rè dhu mbă su kitswázó lanyá akónà amvú i 'ásè. » Dì, má adré tàá àmí dré dhi: Mì kòtingá mì adrélé amvú ki no wà! Lanyá ka àyi 'ásè kitswálé akónale dhi dre.

³⁶Ndindì nyànomvá dhi, dhya adrélépi lanyá akónà dhi adré áyi landè nya. Adré kpà lò'wa lokó lídrì kóná vésè kólyá dhi dré, kitswálé dhya adrélépi kórì rì dhi, indì dhya adrélépi lanyá akónà dhi be dhi ì kàdréró lenzélé túmání be dhi bvó.

³⁷Togyakúlì adrélépi tàá dhi «Dhya àlo adré kórì rì gò, àzya ni dré adrészó lokóá» dhi, tà báti i.

³⁸Má mù àmí adrélé lanyá mì dré àzí 'òzo ásà ko dhi ni akónà. Móndí àruka ì 'o tá àzí nda landèzo àyi gò, mì dré adrészó àyi ki landè nya. »

Móndí́ zyandre Sàmàrí yà ro dhi i` ka'i Yésu

³⁹Dì móndí zyandre Sàmàriyà ro angábhá bhàandre nda lésè dhi ì dré Yésu ni ka'izo, tà tòkó nda dré tâle akódhi ni tà dri dhi sè. Àngyá ko, tòkó nda tà tá dhi: «Akódhi tà má dré tà tití má dré 'ole dhi i. »

⁴⁰Dì àyi nda ì kàtsá Yésu vélé dre dhi, ì dré akódhi ni ti lizízó, ì kàdréró rè dhu túmání àyi íbe. Dì akódhi dré adrészó kònale kítú rì.

⁴¹Gò móndí àruka zyandre dhi ì dré kpà akódhi ni ka'izo, kúlí dré tâle àyi dré dhi i sè.

⁴²Àyi nda ì dré tazoá tòkó nda dré dhi: «Mà adré vélé akódhi ni ka'i ngbà 'í tà mí dré tâle akódhi ni tà dri dhi sè ko. Tako ko, mà yi vélé akódhi ni kúlí áma ki tändi ki bíbhálé sè. Mà ni tâle dhi, akódhi nda dhya adrélépi móndyá bvò àdhya ki tindrí dhi i báti dhi be. »

Yésu tindrí́ dhya kàdrí` dhi ni mváagó

⁴³Kítú rì nda ì àmvolésè dhi, Yésu dré àrà nda ni tayoízó gò, lìzo bvò Gàliláyà àdhya na.

⁴⁴Akódhi ni tändi tà tá dhi: «À bhà gà pròfétà ni lindrì akódhi ni tändi ni bvò 'a ko na. »

⁴⁵Dì, tágba kònìnì dhi, akódhì kòtsa Gàliláyà na dre dhi, móndyá kònàle dhi ì dré akódhì nì ka'ìzo dòle àyi kòfalé dóro. Àngyá ko, ì lì tá kpà Yèrúsalémà na gwányá Pásikà àdhya nì tà sè gò, ì dré tà tití akódhì dré tá 'ole kònàle dhi kì nòzo.

⁴⁶Dì Yésu dré gòzo tódyá lìle Kánà, Gàliláyà le dhi na, àrà dré tá yì ladzázó atsálé vínò ro lána dhi na. Kònàle dhi, dhya kàdrì àlo adrélépi Rómà kì opì nì tà 'o dhi tá be. Akódhì nda nì mváagó tá drà ro Kàpàrànàwúmà na.

⁴⁷Dì kòyi tâle dhi, Yésu angá tá Yùdáyà lésè agòle Gàliláyà le dhi dre dhi, dré lìzo vélana akódhì nì ti lizí, kòlìró Kàpàrànàwúmà na áyi mváagó adrélépi dràdrà mìle nda nì tiidri be dhi bvó.

⁴⁸Yésu tà drá dhi: «Mì kitswá àmikya áma ka'i bwà ko, mì kàdré tà líndríga ró adrébhá Giká nì rìnyí tadhá dhi kì no ko dhi! »

⁴⁹Dhya kàdrì nda tà drá dhi: «Míri, mí alì áma mvá dré dràrà ko dhi 'á wà! »

⁵⁰Dì Yésu logó drá dhi: «Mí nzi mí bhàna. Ámi mvá adrí dre! » Dì dhya nda dré kúlí Yésu dré tâle nda nì ka'ìzo gò, ngàzo nzìle.

⁵¹Dré tá adréra'a láti 'á dhi, akódhì nì màrabà ì dré arázó atsálé vélá tâá drá dhi: «Ámi mvá adrí dre! »

⁵²Dì dré àyi kì lizízó ngalè áyi mvá nda nì rúbhá atsá tá doro lókyá ángùdhi sè ya dhi. Ì dré logozóá drá dhi: «Rúbhá àtsí nda nga rúásà agyá, sáà àlo kítú rírí àmvolésè dhi sè. »

⁵³Dì atá nì nda dré nìzoá tâle dhi, lókyá nda tá lókyá Yésu dré tâzo í dré dhi «Ámi mvá adrí dre» dhi 'í dhi be. Dì akódhì i móndyá wäyi akódhì nì dzó lé dhi íbe dhi ì dré Yésu nì ka'ìzo.

⁵⁴Kòridhì, tà líndríga ró Yésu dré 'ole áyi angama Yùdáyà lésè alìle Gàliláyà le dhi àmvolésè dhi nì rì 'í.

Yòwánì 5

Yésu tiidri' mèrèkpè agó àlo dhi

¹Àmvolásà dhi, Yésu dré gòzo lìle Yèrúsalémà na, Yúdà ànzì kì gwányá kì àlo nì tà sè.

²Bhàandre nda 'á, ànyi zéríbàti adrélé zile Kábilígyà kya ró dhi làga dhi, yì àlo ledélé bómà tíni, adrélé rú zile Èbérè ti sè Bètèzátà dhi be. Yì nda làgásè kúrú dhi, à ledé tá àrà dzó kògbo tíni dhi i nzi.

³Kònàle dhi, dràbhá zyandre lavúlé dhi ì adré tá ayílé. Àyi kòfalé dhi tá mì kùdükùdu i, mèrèkpè i, tsàle móndí pá be àbvò ro dhi íbe. ⁵Àyi nda i kòfalé dhi, agó àlo ayílépi drà be kóná nyadhi-aló-drì-mudré-drì-nzi-drì-na dhi tá be.

⁶Yésu kònò akódhì nda adréra'a ayílé kònàle dre dhi, dré nìzoá tâle dhi, akódhì ayí tá drà be vwàvwà ro dhi be. Dì dré tâzoá drá dhi: «Mí lè adrílé? »

⁷Dì dràbhá nda logó drá dhi: «Mírì, dhya àlo kítswálépi áma ledé bwà dhi yókódhó. Àngyá ko, lókyá yí dré adrérà'a ru kägbä dhi 'á dhi, dhya àlo kítswálépi áma do bhèle yí na má kàdríró ásà dhi yó. Má kàdré 'ole sile dhi, dhya àzya adré lavúlé sile má kandrána. »

⁸Dì Yésu tà drá dhi: «Mí nga, mí do ámi kíndri, ìndì mí kídhó atsí to! »

⁹Gbä kòdhwa, agó nda dré adrízó. Dré áyi kíndri dòzo gò kídhózó adrélé atsí to. Kítú tà nda dré ru 'òzo dhi tá sàbátù 'í.

¹⁰Dì Yúdà ànzì kí kàdrì ì dré agó adrílépi nda ní nòzo gò, ì dré tázoo drá dhi: «Ándrò kònìdhí, sàbátù 'í. Áma kí tátrítrí kúlí adré ámi kíndri dòma sàbátù tú dhi ní logá. »

¹¹Dì, akódhí logó àyi dré dhi: «Dhya áma tídrlépi dhi tà má dré dhi: «Mí do ámi kíndri, ìndì mí to atsí. »»

¹²Ì gò lizíá tíá dhi: «Àdhi tà mí dré dhi, mí kòdo ámi kíndri, ìndì mí kòto atsí dhi nì? »

¹³Dì, agó adrílépi nda ní ína ngalè dhya áyi tídrlépi nda àdhi 'í ya dhi ko. Tàko ko, Yésu lavú tá móndí zyandre kònàle dhi i kòfalésè lyà.

¹⁴Àmvolásà dhi, Yésu dré agó nda ní kisúzó tépelò na gò, tázoo drá dhi: «Mí nò rè ká! Mí adrí nyànomvá dre. Adré dì lèá dhi, mí kòtayí tákonzì 'òma, tà kòkóròko lavúlé dhi kàtsáró mí rú ko dhi bvó. »

¹⁵Gò agó nda dré ngàzo lìle longóá Yúdà ànzì kí kàdrì ì dré dhi, Yésu tídrlépi tá i nì.

Yésu tadhá ngádra 'á dhi, i Gíká ní Mváagó 'í dhi

¹⁶Dì Yúdà ànzì kí kàdrì nda ì dré dhèzo adrélé Yésu ní mì pfo, dré tá adrélé tà nda kí 'o sàbátù tú dhi sè.

¹⁷Dì, Yésu dré tázoo àyi dré dhi: «Áma Atá adré ngbú adrélé àzí 'o atsálé ándrò kònìdhí. Dì ma ró dhi, má adré kpà àzí 'o. »

¹⁸Dì kúlí nda sè dhi, Yúdà ànzì kí kàdrì nda ì dré gòzo vélé adrélé láti nda, kítswázó akódhí ní pfu dràle dhi bvó. Tàko ko, akódhí adré tá ngbà 'í tolí sàbátù àdhya ní ño kòdhya ko. Adré tá kpà Gíká ní zi áyi tändi ní Atá ro, adrészó áyi bha adrélé díri Gíká be.

¹⁹Dì Yésu dré logózóá àyi dré dhi: «Má adré tà báti ta àmi dré: Gíká ní Mváagó kítswá tà àlo 'o áyi drí sè bwà ko. Adré ngbà 'í tà áyi Atá dré adrélé 'ole gò i dré adrészó nòá dhi kí 'o kòdhya. Tà ángùdhi Gíká Atá dré adrélé 'ole dhi, akódhí ní Mváagó adré kókpà 'òá kònìnì.

²⁰Tàko ko, Gíká Atá adré áyi Mváagó ní le gò, adrészó tà tití i dré adrélé 'ole dhi kí tadhá drá. Tà báti ró dhi, a ní tà kàdrì dra tà kòdhí kí lavúbhá dhi kí tadhá áyi Mváagó nda dré 'ole gò, àmi kí líndrí dré gàzo ásà bhwäbhwa.

²¹Àngyá ko, ngóró Gíká Atá dré adrélé móndí dràbhá dre dhi kí tingá dràdrà lésè adrészó lídrì fe àyi dré dhi tíni dhi, akódhi ni Mváagó adré kókpà lídrì fe dhya ángùdhi í dré adrészó lèá fèle drá dhi dré.

²²Kòdhì íbe dhi, Gíká Atá adré dhya àlo ni tábvo ta ko. Be ró dhi, tayí ína rinyí wáyi adrészó móndí kí tábvo ta dhi áyi Mváagó drígá.

²³O kònini kitswálé móndyá wáyi dhi i kàdréró áyi Mváagó nda ni lindrì bha, ngóró i dré adrélé áyi tändi ni lindrì bha dhi tíni. Dhya ángùdhi adrélépi Gíká ni Mváagó ni lindrì bha ko dhi, adré kókpà Gíká Atá akódhi ni amùlepi dhi ni lindrì bha ko.

²⁴Má adré tà báti ta àmí dré: Dhya ángùdhi adrélépi áma kúlì yi gò adrészó dhya áma amùlepi dhi ni ka'i dhi, akódhi nda lindrì kóná vésè kólyá dhi íbe. Gíká kitswá tà bha akódhi nda dri ko. Be ró dhi, akódhi nda apfò dràdrà lésè afilé lídrì le dre.

²⁵Má adré tà báti ta àmí dré: Lókyá adré alìle, atsá kpà dre, móndyá dràbhá dre dhi kí Gíká ni Mváagó ni kúlì yi. Di àyi dra akódhi nda ni kúlì yibhá dhi kí adrí.

²⁶Tako ko, ngóró Gíká Atá dré adrélé rinyí adrészó lídrì fe dhi íbe áyi tändi léna dhi tíni dhi, fè kpà rinyí adrészó lídrì fe nda áyi Mváagó dré adrészó ába i léna.

²⁷Fè kókpà rinyí adrészó móndí kí tábvo ta dhi áyi Mváagó nda dré, akódhi dré adrélé Móndí ni Mvá i dhi sè.

²⁸Lè àmí kí lindrí kàdré gàle tà kòdhì sè ko. Àngyá ko, lókyá adrélépi alìle dhi sè dhi, móndyá wáyi dràbhá dre gò i dré adrészó ayílé mógo i 'ásè dhi kí Gíká ni Mváagó ni kúlì yi gò,

²⁹i dré topfòzo mógo nda i lésè. Àyi tà dóro 'obhá dhi kí nga dràdrà 'ásè adrílé. Di, àyi tà kònzi 'obhá dhi kí àyikya nga dràdrà 'ásè, Gíká kòbhàró tà àyi dri be dhi bvó.

³⁰Má kitswá mána tà àlo 'o áma drì sè ko. Má adré ngbà 'í tábvo ta ngóró má dré adrélé yile Gíká vélésè dhi tíni. Di tábvo má dré adrélé tâle nda gyägya. Tako ko, má adré tà má dré adrélé lèle dhi kí nda 'ole kòdhya ko. Be ró dhi, má adré mána tà dhya áma amùlepi dhi dré adrélé lèle dhi kí nda 'ole kòdhya. »

Tà adrébhá Yésu ni tà longó dhi i

³¹«Kònò má kàdré tá áma tändi ni tà longó ma dhi, áma kúlì kitswá tá adré lanzilanzì ko.

³²Di, dhya àzya adré áma tà longó ni. Má ni tâle dhi, tà dré adrélé longólé áma tà dri dhi, tà báti i dhi be.

³³Mì mù tá móndí i lile Yòwánì véna àmí, di tà dré longólé áma tà dri dhi tá tà báti i.

³⁴Má adré mána áma totó tà móndí i dré adrélé longólé áma tà dri dri dhi dri ko. Di, má adré tà kòdhì ni ta, mì kòkitswáró adrílé ásà be dhi bvó.

³⁵Yòwánì nda tá tálà adrélépi kòle, adrélépi ngá kazá móndí i dré dhi i. Di mì ka'i tá lenzélé akódhi ni ngádra nda 'á lókyá tsà sè.

³⁶Dì, ma mána tà kàdrì àruka adrébhá áma tà longó dório lavúlé Yòwánì àdhya rúsè dhi íbe. Tà nda i, tà áma Atá dré afèle má dré 'ole akílé tití dhi 'i. Tà má dré adrélé 'ole nda i adré áma tà longó, adrészó tadhá dhi, Gíká Atá amù ma nì.

³⁷Kòdhi íbe dhi, Gíká Atá áma amùlepi nda adré kpà ína áma tà longó. Mì yi tàdzí akódhi ni kúlí ko. Mì nò kpà tàdzí akódhi ni mìbhalé ko.

³⁸Mì adré kpà akódhi ni kúlí likí àmì léna ko. Tàko ko, mì adré àmikya dhya dré amùle dhi ni ka'i ko.

³⁹Mì adré tà tití tisile Gíká ni Kúlí na dhi kí àndu nda nile kòdhya. Àngyá ko, mì adré kisùá dhi, mì ni lídrì kóná vésè kólyá dhi ni kisú Kúlí nda sè. Dì Kúlí nda kòdhì adré áma tà longó nì.

⁴⁰Tágba kònìnì dhi, mì lè àmikya alile má vélé lídrì kisú ko!

⁴¹Má adré mána rúku nda kisúlé móndí i vélésè ko.

⁴²Dì, má nì àmì be. Má nì, àmì Gíká ni lèle àko àmì kí togó na dhi be.

⁴³Má alì mána áma Atá ni rú sè gò, mì dré áma ka'ízo dôle àmì kòfalé ko. Dì, dhya àzya kàdré alìle áyi tändi ni rú sè dhi, mì adré àmikya akódhi nda ni ka'i dôle dório.

⁴⁴Mì adré rúku nda kisúlé àmì kòfalésè. Dì, mì adré àmikya rúku adrélépi angálé Gíká àlo kwákwa dhi vélésè dhi ni nda kisúlé kòdhya ko. Mì ni dì àmikya áma ka'i ngíniningíni ró?

⁴⁵Lè mì kòkisù ko tâle dhi, má nì àmì kí asíkì áma Atá tí ma dhi. Dhya dra àmì kí asíkilepi dhi, Mósè mì dré adrészó mì bha vélána dhi 'i.

⁴⁶Kònò mì kàdré tá Mósè ni ka'i bâti dhi, mì ni tá kpà adré áma ka'i. Àngyá ko, akódhi tisí tá áma tà kòdhya.

⁴⁷Dì mì adré kó tà dré tisile nda kí ka'i ko dhi, mì ni dì àmikya áma kúlí ka'i ngíniningíni ró? »

Yòwánì 6

Yésu fè ngá nyàle móndí¹ ngùlù-nzi dhi i dré

(À kònò kpà Mátáyò 14:13-21; Márökò 6:30-44; Lükà 9:10-17)

¹Àmvolásà dhi, Yésu i dré gòzo lebèbhá ni íbe Gàliláyà na gò, i dré zyàzo tâpârìandre Gàliláyà àdhya ni ta'a na. (À adré kpà tâpârìandre nda ni rú zi, tâpârìandre Tíbèrìyà àdhya.) ²Móndí zyandre lavúlé dhi i adré tá Yésu ni lebè, i dré tá adrélé tà líndríga ró dré adrélé 'ole adrészó dràbhá kí tîdrí dhi kí no dhi sè.

³Dì Yésu i dré mbàzo lebèbhá ni íbe kòngó àlo drìna gò, i dré lirizó.

⁴Yúdà ànzì kí gwányá Pásikà àdhya tá ànyi.

⁵Dì Yésu kòtingá mì móndyá zyandre lavúlé nda kí no adrérà'a alìle i vélé dre dhi, dré tâzoá Filípò dré dhi: «Mà ni mápà kisú gile móndyá wäyi kòni i dré nyàle dhi ángolé? »

⁶Tà tá kònìnì kïtswázó Filípò ni tà ka'ika'i tabhì. Tàko ko, ni tá ína tà i dré adrélé 'ole dhi be.

⁷Dì Filípò logó drá dhi: «Tágba mà kàdré tá làfa lò'wa kámá-rì dhi íbe yà dhi, mà kitswá tá mápà gi móndyá àlo àlo tití ni i dré kitswálé ndìndì mvá tsà ni ni kisú nyàle dhi bwà ko. » ⁸Yésu ni lebèbhá kì àzya, Àndréyà, Sìmónà Pétérò ni adrúpi tà drá dhi:

⁹«Mvágó àlo kònwanò. Akódhi mápà ladhlé órezè sè dhi íbe nzi, ìndì kosyá íbe rì. Dì, ngá kònì kì àdho 'o móndyá zyandre kònìnì ni i dré dhi? »

¹⁰Dì Yésu gò tâá áyi lebèbhá i dré dhi: «Mì 'o móndyá kònì i lirílé. » Àrà nda 'á dhi, mbì tá bì. Dì móndyá nda i dré lirizó. Ago i tá ànyiànyi ngùlù-nzi. ¹¹Dì Yésu dré mápà nda kì adozó, àwoyà tazo Giká dré gò, lanzizóá móndyá tití nda i dré, ngóró i dré tá lèle nyàle dhi tíni. Dré kpà kosyá nda ki lanzizó àyi dré kònìnì.

¹²Dì àyi tití nda i kònì pìzo dre dhi, dré tazoá áyi lebèbhá i dré dhi: «Mì lokó àmbí ni, kórónyá ni àlo kàbíró ko. »

¹³Dì i dré mápà nzi móndyá i dré nyàle nda kì àmbí kì lokózó gàle kánzì mudrí-drì-rì dhi i sè bìbi.

¹⁴Dì móndyá nda i kònò tà lìndrìga ró Yésu dré 'ole nda dre dhi, i dré ngàzo adrélé tàá dhi: «Bàti, dhya kòdhi Pròfétà adrélépi tá alìle bvò le dhi 'i! »

¹⁵Dì Yésu kònò, i adré tá 'ole alìle áyi bha ópí ro rinyí sè dhi dre dhi, dré gòzo áyi vuya, mbàle kalóma kòngó nda drìna.

Yésu to atsí tâpâriandre drísè

(À kònò kpà Mâtayò 14:22-33; Márokò 6:45-52)

¹⁶Ìndró kàndrì dre dhi, Yésu ni lebèbhá i dré ngàzo sile tâpâriandre làgana.

¹⁷I kònò, ngá aní dre, ìndì Yésu atsá rè àyi vélé ko dhi dre dhi, i dré tombàzo bwátù na gò, kïdhólé adrélé zyàle tâpâriandre ni ta'á na, kïtswálé lìle Kàpàrànàwumà na.

¹⁸Lyâandre adré tá vîle tâpâriandre nda mi gò, yì dré adrészó ru kägbâ.

¹⁹Dì i kòlì vwàle ànyiànyi kïlôméterè nzi yà, ngalè nzi-drì-àlo yà dhi dre dhi, i dré Yésu ni nòzo adrérà'a atsí to tâpâriandre drísè, adrészó alìle àyi vélé. Gò tirì dré àyi kì 'òzo lavûlé.

²⁰Dì, Yésu dré ína tazoá àyi dré dhi: «Ma 'i! Mì ro ngá ko! »

²¹I adré tá akódhi ni le dòle bwátù na. Dì gbă lókyá nda sè dhi, i dré tsàzo tâpâriandre nda ni ta'á na, àrà i dré tá adrészó lìle dhi na.

Móndi' zyandre dhi i` ndà Yésu

²²Kítú bvóá dhi sè dhi, móndyá zyandre tayílé ta'á lésè nda i dré nòzoá dhi, Yésu ni lebèbhá i tombà tá bwátù àlo dhi na lìle àyi pátí. I ni tá kpà tâle dhi, Yésu mbà tá ína bwátù nda na ko dhi be.

²³Lókyá nda sè dhi, bwátù àruka angábhá bhàandre Tìbèrìyà àdhya lésè dhi ì dré atsázó ànyí àrà móndyá nda ì dré tá mápà nyàzo Míri ni àwoyà tama àmvolésè nda làga.

²⁴Dì móndyá zyandre nda ì kònò Yésu i lebèbhá ni íbe dhi i tá yó dhi dre dhi, ì dré tombàzo bwátù nda i 'ásè gò, zyàle Kàpàràñawúmà na kitswálé Yésu ni nda.

Yésu mápà adrélépi li' drí` fe dhi 'i

²⁵Dì ì kòkisú Yésu tápáriandre nda ni ta'á na dre dhi, ì dré lizízóá tíá dhi: «Rábbi, mí atsá kònwa ángutú? »

²⁶Yésu logó àyi dré dhi: «Má adré tà báti ta àmì dré: Mì adré áma nda, mì dré tà líndríga ró má dré 'ole dhi kí nòle dhi sè ko. Be ró dhi, mì adré àmikya áma nda, mì dré mápà nyàle pízo ásà dhi sè.

²⁷Dì, adré lèá dhi, mì kàdré àzí 'o mányàngá adrélépi ñwàle ñwañwà dhi sè ko. Be ró dhi, mì kàdré àmikya àzí 'o mányàngá dra adrélépi kóná vésè kólyá dhi sè. Ma, Móndí ni Mvá, má ni mányàngá nda ni fe àmì dré. Tako ko, Gíká Atá lwà áyi àngì má rú tadházóá dhi, i ka'i ma káyà dhi. »

²⁸Dì ì lizí tíá dhi: «Lè mà kò'o àdho tà kòdhya kitswázó Gíká ni àzí 'o dhi? »

²⁹Yésu logó àyi dré dhi: «Àzí Gíká dré adrélé lèle mì kò'o dhi, kònìdhi 'i: Mì kàdré dhya dré amùle dhi ni ka'i. »

³⁰Dì ì gò lizíá tíá dhi: «Mí ni àdho tà líndríga ró dhi ni 'o kòdhya, mà kònòró gò ámi ka'izo? Mí ni àdho tà 'o?

³¹Àma kí tábhí ì nya tá mánnà duku na. Ngóró tísile Gíká ni Kúlí na dhi tíni: «Akódhi fè mápà asílépi bhù lésè dhi àyi dré nyàle. » »

³²Dì Yésu tà àyi dré dhi: «Má adré tà báti ta àmì dré: Mósè fè mápà asílépi bhù lésè dhi àmì dré nì ko. Dì, áma Atá adré ína mápà tändi asílépi bhù lésè dhi ni fe àmì dré nì.

³³Tako ko, mápà tändi Gíká dré adrélé fèle nda, dhya asílépi bhù lésè adrélé lídrì fe móndyá bvò àdhya i dré dhi 'i. »

³⁴Dì ì tà drá dhi: «Míri, mí kàdré ngbú mápà kòdhì ni afè àma dré wà! »

³⁵Yésu gò tàá àyi dré dhi: «Ma mána mápà adrélépi lídrì fe dhi 'i. Dhya ángùdhi adrélépi alìle má vélé dhi, tòbirí kitswá tòdzí góle akódhi ni 'o ko. Dhya ángùdhi adrélépi áma ka'i dhi, yí lovó kitswá tòdzí góle akódhi ni nde ko.

³⁶Dì, ngóró má dré tâle àmì dré dre dhi tíni dhi, tágba mì dré áma nòzo 'í dhi, mì ka'i àmikya ma ko.

³⁷Móndyá wáyi áma Atá dré adrélé afèle má dré dhi kí alì má vélé. Dì dhya ángùdhi adrélépi alìle má vélé dhi, má kitswá tòdzí akódhi ni dro ko.

³⁸Àngyá ko, má así bhù lésè kitswálé tà má dré adrélé lèle dhi kí 'o kòdhya ko. Be ró dhi, má así mána tà dhya áma amùlepi dhi dré adrélé lèle dhi kí 'o kòdhya.

³⁹Dì tà dhya áma amùlepi nda dré adrélé lèle dhi, kònìdhi 'i: Adré lèá dhi, má kòtayí dhya dré afèle má dré dhi kì àlo avìle ko. Adré kpà lèá dhi, má kòtingá àyi nda i tití dràdrà lésè kítú kùdù sè.

⁴⁰Bàti, tà áma Atá dré adrélé lèle dhi, kònìdhi 'i: Adré lèá dhi, dhya ángùdhi adrélépi áyi Mváagó ni no gò adrészó akódhi ni ka'ì dhi, dhya nda kàdré lídrì kóná vésè kólyá dhi íbe. Dì má ni akódhi ni tingá dràdrà lésè kítú kùdù sè. »

⁴¹Dì Yúdà ànzì nda i dré dhèzo adrélé Yésu ni ndri, dré tá tâle dhi «Ma mápà asilépi bhù lésè dhi 'i» dhi sè.

⁴²I adré tá tâá àyi kòfalésè dhi: «Kòdhi tsì Yésu, Yoséfà ni mvá 'i ko? Mà ni akódhi ni atá, andre ni be dhi be. Dì akódhi 'o i ngíni adrélé tâá nyànomvá dhi, í así bhù lésè dhi? »

⁴³Dì Yésu logó àyi dré dhi: «Mì tayí adrema làndrì ndri àmì kòfalésè dhi.

⁴⁴Dhya àlo kitswá ína alìle má vélé ko, áma Atá áma amùlepi dhi kàsé akódhi ni togó ni ko dhi. Dì má ni akódhi nda ni tingá dràdrà lésè kítú kùdù sè.

⁴⁵Ngóró prôfétâ i dré tisìle Gìká ni Kúlí na dhi tíni: «Gìká ni àyi tití dhi kì tadhá. » Dì dhya ángùdhi adrélépi Gìká Atá ni yi gò, adrészó tà dré adrélé tadhálé dhi kì kisú dhi, akódhi nda adré alìle má vélé.

⁴⁶Kòdhi adré lèá ko tâle dhi, dhya àlo nò Gìká Atá dhi. Ngbà 'í ma angálépi Gìká Atá nda vélésè dhi, má nò akódhi ma.

⁴⁷Má adré tà bàti ta àmì dré: Dhya ángùdhi adrélépi áma ka'ì dhi, akódhi nda lídrì kóná vésè kólyá dhi íbe.

⁴⁸Ma mápà adrélépi lídrì fe dhi 'i.

⁴⁹Àmì ki tâbhí i nya tá mánnà duku na gò, i dré todràzo.

⁵⁰Dì, kònìdhi ína mápà asilépi bhù lésè dhi 'i. Dhya adrélépi nyàá dhi kitswá dràle ko.

⁵¹Ma mápà lídrì ro asilépi bhù lésè dhi 'i. Dhya ángùdhi adrélépi mápà nda ni nya dhi, ni adré lídrì íbe kóná vésè kólyá. Mápà nda kòdhi, áma rúbhá má dré dra fèle móndyá bvò àdhya i dré adrízó dhi 'i. »

⁵²Dì Yúdà ànzì nda i dré ngàzo adrélé tà kayí àyi kòfalésè, adrészó tâá dhi: «Dhya kòdhi ni kitswá áyi rúbhá afè àma dré nyàle ngíningíni ró? »

⁵³Dì Yésu gò tâá àyi dré dhi: «Má adré tà bàti ta àmì dré: Mì konya Móndí ni Mvá ni rúbhá ko, ìndì mì kòmvu akódhi ni kàrì ko dhi, mì kitswá àmìkyà adrélé lídrì íbe àmì léna ko.

⁵⁴Dhya ángùdhi adrélépi áma rúbhá nya, adrészó kpà áma kàrì mvu dhi, akódhi nda lídrì kóná vésè kólyá dhi íbe. Dì má ni akódhi ni tingá dràdrà lésè kítú kùdù sè.

⁵⁵Tako ko, áma rúbhá ngá tândì adrélé nyàle dhi 'i, ìndì áma kàrì ngá tândì adrélé mvùle dhi 'i.

⁵⁶Dhya ángùdhi adrélépi áma rúbhá nya, adrészó kpà áma kàrí mvu dhi, akódhi nda adré adrélé má léna, ìndì má adré kpà adrélé akódhi léna.

⁵⁷Ngóró áma Atá lídrì ro dhi dré áma amùle dhi tíni, ìndì ngóró má dré adrélé lídrì íbe akódhi nda sè dhi tíni dhi, dhya ángùdhi adrélépi áma nya dhi ni adré kókpà lídrì íbe má sè.

⁵⁸Ma kònìdhi, mápà asilépi bhù lésè dhi 'i. Àmi kì tábhí ì nya tá mánnà gò, ì dré todràzo. Di, dhya adrélépi mápà kònìdhi ni nya dhi ni ína adré lídrì íbe kóná vésè kólyá. »

⁵⁹Yésu tà tá tà nda i Kàpàrànàwúmà na, dré tá adrérà'a tà tadhá Yúdà ànzì kì lìsámbò dzó na dhi 'á.

Yésu ni lebèbhá bì dhi i` tayí` akódhi

⁶⁰Di Yésu ni lebèbhá ì kòyi tà nda i dre dhi, àyi ki àruka bì dhi ì dré tazoá àyi kòfalésè dhi: «Tà dré adrélé tadhálé kòdhi kòkóròko. Àdhi ni kitswá yiá ka'ile dhi ni? »

⁶¹Yésu dré nizoá tâle dhi, áyi lebèbhá nda ì adré tá ländri ndri tà nda sè dhi be gò, dré tazoá àyi dré dhi: «Tà kòdhi adré tsì àmì kì 'o ledhélé nì bâti?

⁶²Mì ni dì kisùá ngíni, lókyá mì dré dra Móndí ni Mvá ni nòzo mbárà'a àrà dré tá adrészó wáláká dhi léna dhi tú dhi?

⁶³Gíká ni Tirí adré lídrì fe ni. Tà rúbhá àdhya adré ína tà àlo 'o ko. Kúlì má dré tâle àmì dré kòdhi i kúlì Tirí àdhya 'i, ìndì kúlì adrébhá lídrì fe dhi 'i.

⁶⁴Di, tágba kònìni dhi, móndí àruka àmì kòfalé dhi ì ka'i àyikya ma ko. » Yésu tà tá kònìni tâko ko, nì tá kínó lésè ngalè àdhíbhá ì kitswá áyi ka'i ko ya dhi be. Nì tá kpà, àdhi ni áyi lefè kàrìbhá ì drígá nì ya dhi be.

⁶⁵Akódhi gò tàá dhi: «Tà kòdhi sè dhi, má tà tá àmì dré dhi, dhya àlo kitswá ína alìle má vélè ko, áma Atá kòfè láti akódhi dré alìzo nì ko dhi. »

⁶⁶Kidholé lókyá nda sè dhi, Yésu ni lebèbhá bì dhi ì dré akódhi ni tayízó gò, ì dré gózo vélè atsílé túmání akódhi be ko.

⁶⁷Di Yésu dré lizízóá áyi lebèbhá mudrí-drì-rì dhi i tí dhi: «Àmi ró dhi, mì lè kókpà lìle àyikya tíni? »

⁶⁸Di, Sìmónà Pétéró logó drá dhi: «Míri, mà ni li àdhi véna? Mì mína kúlì adrébhá lídrì kóná vésè kólyá dhi ni fe dhi íbe.

⁶⁹Àma, mà ka'i bâti, ìndì mà nì tâle dhi, mi Dhya lólo Gíká àdhya 'i dhi be. »

⁷⁰Di Yésu logó àyi dré dhi: «Má kípè zakó tsì àmì mudrí-drì-rì ni i ma? Di, tágba kònìni dhi, àmì kì àlo ína dzáborò 'i! »

⁷¹Adré tá Yùdásì, Sìmónà ìsìkàràyótà ni mvá ni tà ta kòdhyá. Tâko ko, akódhi nda, áyi mudrí-drì-rì nda ki àlo ró dhi, adré tá ína 'ole Yésu ni lefè kàrìbhá ì drígá dhi ni.

Yòwánì 7

Yésu ní adrúpi i` ka'ì akódhì ko

¹Àmvolásà dhi, Yésu dré gòzo adrélé tatsílé bvò Gàliláyà àdhya 'ásè. Adré tá lèá tatsílé bvò Yùdáyà àdhya 'ásè ko, Yúdà ànzì kí kàdrì kònàle dhi i dré tá adrélé láti nda akódhì ní pfùzo dràle dhi sè.

²Yúdà ànzì kí gwányá tábérénákolò kya atsá tá ànyi. ³Dí Yésu ní adrúpi i dré tázooá drá dhi: «Lè mí kònga kònwasé lìle Yùdáyà na, ámi lebèbhá wáyi dhi i kònòró kpà tà líndrígá ró mí dré adrélé 'ole dhi i be dhi bvó.

⁴Dhya àlo kàdré áyi le 'ole móndí i dré nile dhi, adré tá 'o lùzu ró ko. Mí dré adrélé tà nda kòdhì kí 'o dhi sè dhi, mí tadhá dí rè mí móndyá wáyi dhi i dré nòle! »

⁵Akódhì ní adrúpi nda i tà tá kònìnì tákó ko, i adré tá ndindì akódhì ní ka'ì ko.

⁶Dí Yésu dré tázooá àyi dré dhi: «Lókyá mána kitswá rè ko. Di, àmi dré dhi, lókyá ángùdhì mì dré adrészó lèle lìle kònàle dhi ína dóro.

⁷Móndyá bvò kòndi àdhya i kitswá togó kònzi bha àmi rú ko. Di, i adré àyikya togó kònzi bha má rú, má dré adrélé tadhá ngádra 'á dhi, tà i dré adrélé 'ole dhi i kònzi dhi sè.

⁸Àmi, mì lì gwányá na. Má kitswá rè mána lìle kònàle ko. Tákó ko, lókyá mána kitswá rè ko. »

⁹Kótà tà nda dre dhi, dré gòzo adrélé Gàliláyà na.

Yésu li` gwányá tábérénákolò kya na

¹⁰Di, Yésu ní adrúpi i kòlì gwányá nda na dre dhi, akódhì dré kpà ngàzo lìle kònàle. Di, lì tá ngádra 'ásè ko. Be ró dhi, lì ína lùzu ró.

¹¹Gwányá nda 'á dhi, Yúdà ànzì kí kàdrì i adré tá akódhì ní nda, adrészó lizíá dhi: «Dhya kòdhì ángwà? »

¹²Móndí zyandre kònàle dhi i kòfalé dhi, à adré tá ngùrùngùrù ta akódhì ní tà sè. Áyi kí àruka i adré tá tákó dhi: «Akódhì móndí dóro 'í. » Àruka ní i adré kó tákó dhi: «Kóko, adré ína móndí zyandre dhi kí lítí. »

¹³Di, dhya àlo adré tá tákó dhi i kòfalé dhi, à adré tá ngádra 'á ko, i dré tá adrélé tití Yúdà ànzì kí kàdrì kí ro dhi sè.

¹⁴Gwányá nda kòtsa kítogá ní na dre dhi, Yésu dré lìzo tépelò na gó, kídholé adrélé tà tadhá.

¹⁵Yúdà ànzì i adré tá akódhì ní yi sibhálé be ngbo, adrészó lizíá àyi kòfalésè dhi: «Dhya kòdhì ndà kó tákó dhi, kisú dí tògyá adrészó Gíká ní tákó ni kònìnì dhi ngíni? »

¹⁶Di Yésu dré logózooá àyi dré dhi: «Tákó nda kòdhì i, tákó ní kònìnì dhi ngíni? »

¹⁷Dhya ángùdhi adrélépi tà Gìká dré adrélé lèle dhi kí nda 'ole dhi, akódhí nda ní niá ngalè tà má dré adrélé tadhálé nda ì angá Gìká vélésè yà, kó ngalè áma tändi vélésè yà dhi.

¹⁸Dhya adrélépi tà adrébhá angálé áyi tändi drilésè dhi kí tà ta dhi, adré rúku nda kisúlé áyi tändi dré. Di, dhya adrélépi dhya áyi amùlepi dhi ni rúku nda bhàle dhi, adré ína tà báti ta. Tà àlo kinzò ro akódhí léna dhi yókódhó.

¹⁹Mósè fè tá tsì tátrítrí kúlí àmí dré ko? Di, dhya àlo àmí kòfalé dhi adré tà tátrítrí kúlí nda dré adrélé tálé dhi kí 'o ko. Mì adré àmikya láti nda kitswázó áma pfu dràle àdho tà sè? »

²⁰Di móndyá zyandre nda ì logó drá dhi: «Mì tirí kònzi íbe mí léna! Àdhi adré láti nda kitswázó ámí pfu dràle dhi nì? »

²¹Di Yésu logó àyi dré dhi: «Má 'o ngbà 'í tà líndríga ró àlo dhi sàbátù tú gò, àmí tití dhi kí líndrí dré adrészó gále ásà.

²²Di, àmí ró dhi, mì adré kókpà àzí 'o sàbátù tú. Tako ko, Mósè fè àmí dré tolí adrészó àmí kí ànziàgo kí lwa gò, mì dré adrészó àyi kí lwa, gba kàdré sàbátù tú yà dhi. (Tà báti ró dhi, tolí nda angá tá Mósè vélésè ko. Be ró dhi, angá ína àma kí tábhi i vélésè drìdrì Mósè ni lókyá kandrá.)

²³Di mì kàdré àmí kí ànziàgo kí lwa sàbátù tú kitswázó Mósè ni tátrítrí kúlí likí dhi, àmí kí togó adré di aswálé má rú, má dré agó àlo dhi ni tìdrílé wáyi sàbátù tú dhi sè àdho tà sè?

²⁴Lè mì kàdré móndí kí tàbvó ta ngbà 'í tà adrélé nòle mì sè dhi i sè ko. Be ró dhi, mì kàdré àmikya tàbvó ta gyägya. »

Yésu Mèsí́ yà 'í báti?

²⁵Lókyá nda sè dhi, móndyá Yérúsalémà 'a dhi kí àruka i adré tá tåá àyi kòfalésè dhi: «Dhya kòdhí tsì dhya àma kí kàdrì i dré adrészó láti nda pfùzoá dràle dhi 'í ko? »

²⁶Di, mì nò rè ká! Akódhí adré tà ta ngádra 'á gò, i dré adrészó tà àlo ta drá ko! I nì àyikya tálé dhi, akódhí Mèsíyà 'í báti dhi be?

²⁷Di, lókyá Mèsíyà dré dra atsázó dhi sè dhi, dhya àlo kitswá àrà dré angázó lásà dhi ni ni ko. Mà nì àmakya àrà dhya kòdhí dré angázó lásà dhi be. »

²⁸Di Yésu dré rè dhu adrérà'a tà tadhá tépelò na dhi 'á dhi, dré ngàzo kúlí yo tåzoá dhi: «Mì nì tsì ma be? Mì nì àrà má dré angázó lásà dhi be? Má alì mána áma drì sè ko. Di, dhya áma amùlepi dhi adré ngbú adrélé tà báti ta. Mì nì àmikya akódhí ko.

²⁹Di, má nì mána akódhí be. Tako ko, má angá akódhí vélésè, ìndì akódhí amù ma nì. »

³⁰Gò Yúdà ànzi kí kàdrì i dré ngàzo adrélé láti nda kitswázó akódhí ni ru. Di, àyi kí àlo so drígá akódhí rú ko, lókyá ni dré tá rè kitswálé ko dhi sè.

³¹Dì, móndyá zyandre nda i kòfalé dhi, móndí bì dhi i dré akódhì ni ka'ìzo. Ì adré tá tàá dhi: «Lókyá Mèsiyà dré dra atsázó dhi sè dhi, akódhì ni tsì tà líndríga ró dhi kì 'o dhya kòdhì àdhyá kì lavú? »

Fàrìsáyò i` mù móndí` i kítswálé Yésu nì ru

³²Fàrìsáyò i dré móndyá zyandre nda kì yìzo adrérà'a ngùrùngùrù ta Yésu ni tà dri dhi 'í. Dì àyi túmání kòwánà kàdrì íbe dhi, i dré tépelò likíbhá kì àruka kì mùzo kítswálé akódhì ni ru.

³³Gò Yésu dré tazoá dhi: «Ma dhu rè túmäní àmi íbe lókyá tsà sè. Àmvolásà dhi, má ni go lìle dhya áma amùlepi dhi véna.

³⁴Mì ni áma nda gò, mì dré àmikya kítswázó áma kisú ko. Àngyá ko, mì kítswá lìle àrà má dré adrészó lìle lána dhi na bwà ko. »

³⁵Dì Yúdà ànzì kì kàdrì nda i dré lizízóá àyi kòfalésè dhi: «Dhya kòdhì adré 'ole lìle ángolé, mà dré kítswázó akódhì ni kisú bwà ko dhi? A ni li Gírikì kì bvò Yúdà ànzì i dré ayízó dhi i 'ásè, kítswálé Gírikì kì tadhá? »

³⁶Adré lèá tâle ngíni dré adrérà'a tàá dhi: «Mì ni áma nda gò, mì dré àmikya kítswázó áma kisú ko, » ìndì «Mì kítswá lìle àrà má dré adrészó lìle lána dhi na bwà ko» dhi? »

Yíandré adrélépi li` dři` fe dhi

³⁷Gwányá nda ni kítú kùdù, adrélépi kàdrì kítú àruka tití nda kì lavú dhi sè dhi, Yésu dré ngàzo kúlì yo tazoá dhi: «Dhya àlo kàdré yì lovó íbe dhi, akódhì kàlì má vélé adrélé yì mvu wà.

³⁸Dhya ángùdhi adrélépi áma ka'i dhi, yíandré adrélépi lídrì fe dhi ni adí apfòle akódhì ni togó lésè, ngóró Gíká ni Kúlì dré adrélé tâle dhi tíni. »

³⁹Kòdhì Yésu adré tá Tíri Lólo móndyá áyi ka'ibhá dhi i dré adrélé 'ole kisúlé dhi ni tà ta kòdhya. Tako ko, Tíri Lólo nda atsá tá rè ko, Yésu dré tá rè fíle áyi mìlanzìlanzì na ko dhi sè.

Mónđí` i` lanzi` ru Yésu ni tà sè

⁴⁰Móndyá zyandre nda i kòyi Yésu ni kúlì nda i dre dhi, àyi kì àruka i dré adrészó tàá dhi: «Dhya kòdhì Pròfétà 'i báti! »

⁴¹Àruka ni i adré tá tàá dhi: «Akódhì Mèsiyà 'i! » Dì, àruka ni i adré kó àyikya tàá dhi: «Mèsiyà ni kítswá tsì angálé Gàliláyà lésè? »

⁴²Gíká ni Kúlì adré zakó tsì tàá dhi, Mèsiyà ni angá ópí Dàwídì ni súrú lésè, ìndì Bètèlémè, bhàandre Dàwídì dré angázó lásà dhi lésè! » ⁴³Dì móndyá zyandre nda i dré ru lanzízó Yésu ni tà sè.

⁴⁴Àyi kì àruka i adré tá lèá dhi, à kòru akódhì. Dì, dhya àlo so drígá akódhì rú ko.

Yúdà ànzì kì kàdrì` i` 'o àyi kì togó tombálé Yésu rú

⁴⁵Gò tépelò likíbhá nda ì dré gòzo kòwánà kàdrì i véna Fàrisayò íbe. Di àyi nda ì dré lizizóá àyi tí dhi: «Mì adrì dhya kòdhì agòzo ába ko àdho tà sè? »

⁴⁶Di tépelò likíbhá nda ì logó dhi: «Dhya àlo adrélépi tà ta dhya kòdhì àdhya tini dhi tadtzí yókódhó. »

⁴⁷Di Fàrisayò nda ì gò lizia àyi tí dhi: «Mì tayí kókpà àmì akódhì nda dré litlé dre? »

⁴⁸Dhya àlo Yúdà ànzì kì kàdrì i kòfalé yà, kó ngalè Fàrisayò i kòfalé yà akódhì ni ka'ilepi dhi tsì be?

⁴⁹Koko! Di, móndyá zyandre kòdhì ì ni àyikya Mósè ni tátrítrí kúlì ko. Giká ni tátrítrí àyi dri! »

⁵⁰Fàrisayò nda i kòfalé dhi, Nikòdémò atú lilepi Yésu véna ngátsi sè dhi tá be. Di akódhì dré tazoá àyi dré dhi:

⁵¹«Àma kì tátrítrí kúlì ka'i tsì tà bhale dhya àlo dri akódhì ni yi àko ró, indì tà dré 'ole dhi ni ni àko ró dhi 'í? »

⁵²Di ì logó drá dhi: «Mi kókpà móndí angálépi Gàliláyà lésè dhi 'í? Mi vwa rè tà Giká ni Kúlì dré adrélé tali dhi i ká. Mi ni nòá dhi, pròfétà àlo angálépi Gàliláyà lésè dhi yókódhó. »

[⁵³Gò àyi àlo àlo titi dhi ì dré ngàzo nzile àyi bhà'ásè.

Yòwánì 8

Tòkó àlo rùle múná tà 'orà'a dhi

¹Di Yésu dré lizo mbàle kòngó Òlivè fa kya drìna.

²Ngá kòwa dre dhi, dré gòzo lile tépelò na gò, móndyá wáyi dhi ì dré alìzo ru kímó akódhì làga. Akódhì dré lirizó gò kìdhólé adrélé àyi kì tadhá.

³Di tátrítrí kúlì tadhábhá i Fàrisayò íbe dhi, ì dré tòkó àlo dhi ni adrìzo alìzo bhàá móndyá wáyi i kandrá. Ì ru tá akódhì nda adrérà'a múná tà 'o agó àlo dhi be.

⁴Di ì dré tazoá Yésu dré dhi: «Tadhálépi, à kì tòkó kònìdhì adrérà'a múná tà 'o agó àlo be dhi 'á.

⁵Mósè fè tá tolí tátrítrí kúlì na tazoá àma dré dhi, mà kàdré tòkó tà 'obhá kònìni dhi kì lebhé todràle kírà sè. Di mí adré mína tåá tà kòdhì sè ngíni? »

⁶Ì lizí tá akódhì kònìni kitswázó akódhì ni tabhì litlé, ì kòkitswáró akódhì ni asíkì be dhi bvó. Di, Yésu dré ína tandizo gò, kìdhólé adrélé ngá tisì drígámbílì sè kìní mi.

⁷Ì dré rè dhu adrérà'a akódhì ni lizí dhi 'á dhi, dré ngàzo áyi totó gò, tåá àyi dré dhi: «Dhya tàkonzi 'olepi tadtzí ko dhi kàdré àmì kòfalé be dhi, akódhì nda kòkìdhò rè zyà tòkó kònìdhì ni lebhélé kírà sè dhi nì. »

⁸Di dré gòzo tódhyá tandile adrélé ngá tisì kìní mi.

⁹Dì ì kòyi kúlí nda dre dhi, ì dré ngàzo topfòle àlo àlo kidhólé màiiga i rú, Yésu kí tayí tòkó nda adrélépi áyí totó akódhi kandrá dhi be.

¹⁰Dì Yésu dré ngàzo áyí totó lizíá tíá dhi: «Tòkó, àyí nda i ángwà? Dhya àlo tà bhàlepi mí dri dhi yókódhó? »

¹¹Akódhi logó dhi: «Mírì, dhya àlo yó. » Dì Yésu tà drá dhi: «Má bhà kókpà tà mí dri ko. Dì mí lì, ìndì kidhólé nyànomvá dhi, mí kògò vélé tàkonzì 'o ko. »]

Yésu ngádra bvò àdhya 'i

¹²Yésu dré gòzo tàá móndyá zyandre i dré dhi: «Ma ngádra adrélépi ngá kazá móndyá bvò àdhya i dré dhi 'i. Dhya ángùdhi adrélépi áma lebè dhi kitswá tâdzí atsílé tínimvá na ko. Be ró dhi, a ní adré ngádra lídrì àdhya íbe. »

¹³Dì, Fàrisayò i dré ngàzo tàá drá dhi: «Mí adré mína ámi tândi ní tà longó mi. Tà mí dré adrélé tâle dhi i, tà bâti 'i ko. »

¹⁴Dì Yésu logó àyí dré dhi: «Gba má dré adrészó áma tândi ní tà longó dhi, tà má dré adrélé tâle dhi i, tà bâti 'i. Tako ko, má ní, má angá ángolésè ya, ìndì má adré lîle ángolé ya dhi be. Dì, mí ní àmikya ngalè má angá ángolésè ya, kó ngalè má adré lîle ángolé ya dhi ko.

¹⁵Mí adré àmikya áma tâbvó ta ngóró móndyá bvò kòndi àdhya i dré adrélé tâle dhi tîni. Dì, má adré mána dhya àlo ní tâbvó ta ko.

¹⁶Kònò má kàdré tá tâbvó ta dhi, tâbvó má dré kitswálé tâle nda ní tá adré gyăgya. Àngyá ko, má adré tà àlo 'o kalóma ko. Be ró dhi, áma Atá áma amûlepi dhi túmání má be.

¹⁷À tisì tá àmí kí tândi kí tátrítrí kúlí na tâle dhi, móndi rì tà nobhá mí sè dhi i kàdré tà àlo dhi ní longó kòdhya dhi, tà i dré adrélé longolé nda, tà bâti 'i. ¹⁸Ma, má adré áma tândi ní tà longó. Kòdhì íbe dhi, áma Atá áma amûlepi dhi adré kókpà áma tà longó. »

¹⁹Dì i lizí tíá dhi: «Ámi Atá ángwà? » Yésu gò logóá àyí dré dhi: «Mí ní ma àdhi 'i yà dhi ko, ìndì mí ní áma Atá àdhi 'i yà dhi ko. Kònò mí kònì tá ma be dhi, mí ní tá kpà áma Atá ní ni. »

²⁰Yésu tà tá kúlí nda i, dré tá adrérà'a tà tadhá tépelò na, ànyí àrà adrészó ngá fèle Gìká dré dhi kí likí dhi làga dhi 'á. Dì, dhya àlo ru tá akódhi ko, lókyá ní dré tá rè kitswálé ko dhi sè.

Yésu dhya Gìká Atá dré amûle dhi 'i

²¹Yésu dré gòzo tàá àyí dré dhi: «Má adré 'ole lîle. Mí ní áma nda gò, mí dré àmikya todràzo àmí kí tàkonzì na. Mí kitswá lîle àrà má dré adrészó lîle lána dhi na bwà ko. »

²²Dì Yúdà ànzi i lizí àyí kòfalésè dhi: «Akódhi adré 'ole áyi pfu dràle? Kòdhì vo tà dré adrészó tàá dhi: «Mí kitswá lîle àrà má dré adrészó lîle lána dhi na bwà ko» dhi 'i? »

²³Dì Yésu logó àyi dré dhi: «Mì angá àmikya bvò kòndi lésè. Dì, má angá mána kurú lésè. Àmi móndí bvò kòndi àdhya 'i. Dì, ma mána móndí bvò kòndi àdhya 'i ko.

²⁴Ásà dhi, má tà tá àmi dré dhi, mì ni todrà àmi kì tàkonzì na. Tako ko, mì kòka'i, ma Dhya adrélépi be dhi 'i ko dhi, mì ni dra todrà àmi kì tàkonzì na. » ²⁵Dì ìлизí tíá dhi: «Mì mína àdhi 'i? » Yésu gò logóá àyi dré dhi: «Ma dhya má dré adrészó tàá kínó lésè dhi, ma akódhi 'i nda 'i.

²⁶Ma dhu rè tà íbe bì tâle àmi kì tà dri. Ma kpà tà íbe bì tâle àmi kì tâbvó tâzo. Dì, dhya áma amùlepi dhi adrélè ngbú adrélè tà bâti ta. Má adré ngbà 'i tà má dré yile akódhi nda vélésè dhi kì ta móndyá bvò kòndi àdhya i dré kòdhya. »

²⁷Dì, ì nì tá ko tâle dhi, Yésu adré tá áyi Atá nì tà ta kòdhya dhi.

²⁸Dì Yésu gò tàá àyi dré dhi: «Lókyá mì dré dra ma, Móndí ni Mvá ni tingázó kuru dhi sè dhi, mì ni nìá tâle dhi, ma Dhya adrélépi be nda 'i dhi be. Mì ni kpà nìá tâle dhi, má adré tà àlo 'o áma drì sè ko dhi be. Dì, má adré ngbà 'i tà áma Atá dré tadhálé má dré dhi kì ta kòdhya.

²⁹Dhya áma amùlepi dhi túmání má be. Tayí ma kalóma ko. Àngyá ko, má adré ngbú tà akódhi ni togó dré adrészó kínílé ásà dhi kì 'o kòdhya. »

³⁰Dì Yésu dré tá adrérà'a tà nda kì ta dhi 'á dhi, móndí bì dhi ì dré akódhi ni ka'izo.

Mì ` ni adré móndí` tri`le bâti dhi i ró

³¹Dì Yésu dré tâzoá Yûdà ànzi áyi ka'ibhá nda i dré dhi: «Mì kàdré trôle tà má dré adrélè tadhálé dhi i rú dhi, mì ni adré áma lebèbhá 'i bâti.

³²Dì mì ni tà bâti ni gò, tà bâti nda dré àmi kì trìzo wâyi. »

³³Ì logó drá dhi: «Àma, àma Àbàrámà ni súrú 'i. Mà atsá rè tâdzí dhya àlo ni mårábà ro ko. Dì mí adré mína tâá dhi, à ni àma kì tri dhi ngíni? »

³⁴Dì Yésu logó àyi dré dhi: «Má adré tà bâti ta àmi dré: Dhya ángùdhi adrélépi tàkonzì 'o dhi, akódhi nda tàkonzì ni mårábà 'i.

³⁵Mårábà adré ína adrélè súrú 'á nyko. Dì, mváagó adré ína adrélè súrú 'á nyko.

³⁶Dì Gíká ni Mváagó kòtrì àmi dhi, mì ni adré móndí trìle bâti dhi i ró.

³⁷Má nì tâle dhi, àmi Àbàrámà ni súrú 'i dhi be. Dì, mì adré àmikya láti nda kîtswázó áma pfu drâle, mì dré adrélè áma kúlí ka'i dòle àmi kì togó na ko dhi sè.

³⁸Má adré mána tà áma Atá dré tadhálé má dré dhi kì ta kòdhya. Dì, mì adré àmikya tà mì dré yile àmi kì atá vélésè dhi kì 'o kòdhya. »

³⁹Ì gò logóá drá dhi: «Àma kì atá, Àbàrámà 'i. » Dì Yésu tà àyi dré dhi: «Mì kàdré tà Àbàrámà ni ànzi 'i bâti dhi, kònò mì ni tá adré tà Àbàrámà dré 'ole dhi kì 'o kòdhya.

⁴⁰Dì, nyànomvá dhi, mì adré àmikya láti nda kïtswázó áma pfu dràle, má dré tà bâti má dré yile Giká vélésè dhi ni tâle àmi dré dhi sè. Àbàramà 'o tá ína tà lású be kònini dhi ko.

⁴¹Dì, mì adré àmikya tà 'o ngóró àmi kî atá dré adrélé 'ole dhi tíni. » Dì ì logó drá dhi: «Àma, àma ànzì tile swà ro dhi 'i ko! Àma kî Atá, Giká 'i kalóma. »

⁴²Yésu gò tâá àyì dré dhi: «Giká kâdré tá àmi kî Atá 'i bâti dhi, kònò mì ni tá adré áma le. Àngyá ko, má angá Giká vélésè gò, má dré adrészó kònwa akódhi ni rú sè. Má alì mána áma drì sè ko. Be ró dhi, akódhi amù ma nì.

⁴³Tà má dré adrélé tâle kòdhi ì adré fîle àmi drìna ko àdho tà sè? Ì adré fîle ko, mì dré kitswálé áma kúlí yi bwà ko dhi sè.

⁴⁴Àmi àmikya àmi kî atá Dzáborò ni ànzì 'i. Mì adré àmi kî atá nda ni lovó le 'ole kòdhya. Kidholé kidhoma lésè dhi, akódhi nda dhya adrélépi móndí kî tupfú todràle dhi 'i. Adré kpà trôle tà bâti rú ko, tà bâti dré adrélé akódhi léna àlomvá ko dhi sè. Dré adrérà'a kinzò ta dhi 'á dhi, adré áyì tândi ni ti ta kòdhya. Tako ko, akódhi kinzò líyí 'i, ìndì kinzò ni atá 'i.

⁴⁵Dì, má dré mána adrélé tà bâti ta dhi sè dhi, mì adré áma ka'i ko.

⁴⁶Àmi kòfalé dhi, àdhi ni kïtswá tsì tâkonzì àlo tadhá má rú dhi nì? Dì má kâdré tà bâti ta kòdhya dhi, mì adré áma ka'i ko àdho tà sè?

⁴⁷Dhya adrélépi Giká àdhya ró dhi adré ína Giká ni kúlí yi. Dì, mì adré àmikya áma kúlí yi ko, mì dré adrélé Giká àdhya ró ko dhi sè. »

Yésu i Àbàramà be dhi

⁴⁸Dì Yûdà ànzì nda ì gò logóá drá dhi: «Mà adré zakó tâá kyá tâle dhi, mi mína Sàmàrýà agó 'i, ìndì mi tirí kònzi íbe mí léna dhi! »

⁴⁹Dì Yésu logó àyì dré dhi: «Tirí kònzi má léna yókódhó. Be ró dhi, má adré mána lindrì fe áma Atá dré. Dì, mì adré àmikya kanyò fe má dré.

⁵⁰Má adré mìlanzìlanzì nda kisúlé áma tândi dré ko. Dì, dhya adrélépi milanzìlanzì le fèle má dré dhi be. Akódhi nda kpà dhya adrélépi tâbvó ta gyägya dhi 'i.

⁵¹Má adré tà bâti ta àmi dré: Dhya ángùdhi adrélépi áma kúlí ka'i 'ole dhi kïtswá tâdzí dràle ko! »

⁵²Dì Yûdà ànzì nda ì gò tâá drá dhi: «Nyànomvá, mà ni tâle dhi, mi tirí kònzi íbe mí léna kâyà dhi be! Àbàramà drà dre. Pròfétà ì todrà kókpà dre. Dì, mí adré mína tâá dhi, dhya adrélépi ámi kúlí ka'i 'ole dhi kïtswá tâdzí dràle ko.

⁵³Mí adré kisùá dhi, mi mína kâdrì áma kî atá Àbàramà ni lavú? Akódhi drà dre. Pròfétà ì todrà kókpà dre. Mí adré dì kisùá dhi, mi tá mína àdhi 'i? »

⁵⁴Dì Yésu gò logóá dhi: «Má kâdré tá mìlanzìlanzì nda kisúlé áma tândi dré dhi, kònò áma mìlanzìlanzì nda ni tá adré tà tâko ró. Dì, áma Atá adré ína áma mì bha lanzile dhi nì. Akódhi nda, dhya mì dré adrészó tâá dhi, akódhi àmi kî Giká 'i dhi 'i.

⁵⁵Mì nì àmikya akódhì ko. Di, má nì mána akódhì be. Kònò má kòtà tá dhì, má nì akódhì ko dhì, má nì tá adré kinzò líyí 'ì àmì tíni. Di má nì akódhì be, ìndì má adré akódhì nì kúlí ka'ì 'ole.

⁵⁶Àmì kì atá Àbàrámà lenzé tá tò, dré tá kítú má dré alìzo dhì nì nòle dhì sè. Akódhì nò kítú nda 'í gò, dré lenzézó ásà. »

⁵⁷Di Yúdà ànzì nda ì tà drá dhì: «Ámì kóná kòtsa kó rè nyadhi-rì-drì-mudrì ko dhì, mí 'o mi ngíni tàá dhì, mí nò Àbàrámà 'í dhì? »

⁵⁸Di Yésu logó àyi dré dhì: «Má adré tà báti ta àmì dré: Àbàrámà nì tirà ko dhì 'á dhì, ma tá mána be! »

⁵⁹Di kúlí nda sè dhì, ì dré ngàzo kírà kudhú, kitswázó akódhì ni lebhé dràle ásà. Di, Yésu dré ína áyì zùzo gò, pfòle lyà tépelò 'ásè.

Yòwánì 9

Yésu tidri' agó àlo tìle mì kùdúkùdu ró dhì

¹Yésu ì dré tá adrérà'a lìle láti 'ásè dhì 'á dhì, akódhì dré mì bhèzo agó àlo tìle mì kùdúkùdu ró dhì nì no.

²Di akódhì ni lebèbhá ì dré lizízóá dhì: «Rábbi, àdhì 'o tàkonzi agó kònìdhì nì tìzo mì kùdúkùdu ró dhì nì? Akódhì 'o nì, kó ngalè akódhì nì tibhá ì 'o kó àyi? »

³Yésu logó dhì: «À ti akódhì kònìnì akódhì nì tàkonzi sè yà, kó ngalè akódhì nì tibhá kì tàkonzi sè yà dhì ko. Be ró dhì, à ti akódhì kònìnì, à kòkitswáró tà Gíká dré adrélè lèle 'ole akódhì léna dhì nì no be dhì bvó.

⁴Adré lèá dhì, mà kàdré dhya áma amùlepi dhì nì àzí 'o kítú dré adrérà'a be dhì 'á. Ngátsi adré ína alìle. Lókyá nda sè dhì, dhya àlo kitswá àzí 'o bwà ko.

⁵Má dré adrérà'a bvò kònìdhì lé dhì 'á dhì, ma ngádra adrélèpi ngá kazá móndyá bvò àdhya ì dré dhì 'ì. »

⁶Yésu kòtà tà nda dre dhì, dré túsú fùzo kíní mi, kùrú anzwázó túsú nda sè gò, agó mì kùdúkùdu ró nda nì mì ndryàzo ásà.

⁷Dré tàzoá drá dhì: «Mí lì ámì mì dzi yì ledélé rú zìle Sìlòwámà dhì na. » (Rú Sìlòwámà nda kòdhì adré lèá tâle dhì «Mùle dhì».) Di agó nda dré lìzo áyì mì dzi kònàle gò, dré nzìzo adrélè ngá nobe.

⁸Di akódhì ni bhàzì ì, túmání móndyá atú akódhì ni nobhá adrérà'a ngá zi dhì ìbe dhì, ì dré ngàzo adrélè lizíá àyi kòfalésè dhì: «Agó kònìdhì tsì dhya adrélèpi tá lirilé adrélè ngá zi dhì 'ì ko? »

⁹Àyì kì àruka ì dré adrészó tàá dhì: «Akódhì 'ì. » Àruka nì ì adré kó tàá dhì: «Kóko. Akódhì 'ì ko. Di, sù akódhì tíni. » Di, agó nda dré ína adrészó tàá dhì: «Ma 'ì! »

¹⁰Di ì lizí tíá dhì: «Ámì mì nzì di ru adrélè ngá no ngíningíni ró? »

¹¹ Akódhi logó àyi dré dhi: «Agó rú zile Yésu dhi anzwá tá kùrú, áma mì ndryàzo ásà gò, tazoá dhi, má kòlì áma mì dzì yì Sìlòwámà àdhya na. Dì má kòlì áma mì dzì kònàle dre dhi, má dré ngàzo adrélé ngá no! »

¹² Ì gò lizíá tíá dhi: «Agó kòdhi ángwà? » Gò logóá dhi: «Má nì ko. »

Fàrisayò i` lizí tà agó adri` lépi dhi tí

¹³ Gò ì dré agó adrélépi tá mì kùdükùdu ró nda nì drìzo, lìzo ába Fàrisayò i véna.

¹⁴ Kitú Yésu dré tá kùrú anzwázó gò, agó nda nì mì nzìzo dhi tá sàbátù 'i.

¹⁵ Dì Fàrisayò nda ì dré kpà lizízóá akódhi tí, ngalè akódhi nì mì nzì tá ru adrélé ngá no ngínì ya dhi. Akódhi dré logozóá àyi dré dhi: «Agó àlo dhi ndryà tá áma mì kùrú sè. Dì má kòdzì áma mì dre dhi, má dré kìdhózó adrélé ngá no. »

¹⁶ Fàrisayò nda kì àruka ì gò adrélé tàá dhi: «Dhya tà nda nì 'olepi kòdhi angá ína Giká vélésè ko. Tako ko, adré sàbátù nì tolí likí ko. » Dì, àruka nì ì adré kó tàá dhi: «Tàkonzì lìyí kitswá ína tà líndrígá ró lású be kònìnì dhi kì 'o bwà ngíningínì ró? » Dì ì dré ru lanzízó tà nda sè.

¹⁷ Ì dré gòzo lizíá agó adrélépi tá mì kùdükùdu ró nda tí dhi: «Mì ró dhi, mí adré mína tàá agó ámi mì nzilepi nda nì tà sè ngínì? » Akódhi logó dhi: «Akódhi nda pròfétà 'i. »

¹⁸ Dì, Yúdà ànzì kì kàdrì nda ì ka'ì tá rè ko tâle dhi, agó nda tá mì kùdükùdu 'i gò, dré gòzo adrélé ngá no dhi. Ásà dhi, ì dré akódhi nì tibhá kì azízó gò,

¹⁹ lizízóá àyi tí dhi: «Agó kònìdhì àmi kì mvá 'i? Mì adré tàá dhi, mì ti tá akódhi mì kùdükùdu ró? Adré dì ngá no nyànomvá ngíningínì ró? »

²⁰ Dì akódhi nì tibhá nda ì logó àyi dré dhi: «Mà nì tâle dhi, kònìdhì àma kì mvá 'i, ìndì apfò tá mì kùdükùdu ró dhi be. »

²¹ Dì, mà nì ngalè adré nyànomvá ngá no ngínì ya dhi ko. Mà nì kpà ngalè àdhì nzì akódhi nì mì nì ya dhi ko. Mì kòlizí akódhi kòdhya. Atsá kàdrì dre. A nì kitswá áyi tändì nì tà ta bwà. »

²² Akódhi nì tibhá nda ì tà tá kònìnì, ì dré tá adrélé Yúdà ànzì kì kàdrì kì ro dhi sè. Tako ko, àyi nda ì yi tá ru tazoá dhi, ì nì dhya ángùdhi adrélépi ka'ìá tâle dhi, Yésu Mèsiyà 'i dhi nì dro àyi kì lìsámbò dzó lésè.

²³ Tà nda sè dhi, akódhi nì tibhá nda ì tà tá dhi: «Atsá kàdrì dre. Mì kòlizí akódhi kòdhya. »

²⁴ Dì Fàrisayò nda ì dré gòzo tódhýá agó adrélépi tá mì kùdükùdu ró nda nì azí gò, ì dré tazoá drá dhi: «Mì fè lìndrì Giká dré. Mà nì tâle dhi, agó kòdhi tàkonzì lìyí 'i dhi be. »

²⁵ Gò logóá dhi: «Akódhi nda kàdré ína tàkonzì lìyí 'i bâti dhi, má nì ko. Má nì ngbà 'i tà àlo kònìdhì: Ma tá mì kùdükùdu ró. Dì, nyànomvá dhi, má adré ngá no! »

²⁶ Dì ì gò lizíá tíá dhi: «Akódhi nda 'o mì ngínì? Nzì ámi mì ngínì? »

²⁷Gò logóá àyi dré dhi: «Má tà tá àmì dré dre. Di, mì yi ma ko. Mì adré tà nda ni le yile tódhyá àdho tà sè? Mì adré kpà lèá atsálé akódhi ni lebèbhá i gó? »

²⁸Di i dré akódhi ni dhàzo tázoo dhi: «Mi mína dhya kòdhì ni lebèlepi 'i! Àma àmakya Mósè ni lebèbhá 'i!

²⁹Mà nì tâle dhi, Giká tà tá tà Mósè be dhi be. Di, kàdré ína dhya kòdhì ni tà sè dhi, mà nì ngalè akódhi angá ángolésè ya dhi ko. »

³⁰Di agó nda logó àyi dré dhi: «Tà kòdhì tà kitswálépi dhyá kí líndri tigá dhi 'i! Mì nì àmikya ngalè akódhi angá ángolésè ya dhi ko, tágba dré áma mì nzizo nì dhi!

³¹Mà nì tâle dhi, Giká adré tàkonzibhá kí yi ko dhi be. Di, adré ína móndyá adrébhá trôle áyi tà rú, adrébhá tà i dré adrélé lèle dhi kí 'o dhi kí yi kòdhya.

³²À yi rè tâdzí ko tâle dhi, dhya àlo nzì móndí tîle mì kùdúkùdu ró dhi nì mì dhi.

³³Kònò agó kòdhì kàngá tá Giká vélésè ko dhi, kitswá tá tà àlo 'o bwà ko. »

³⁴Di i logó drá dhi: «À ti mi trú tàkonzi na bâti! Mí 'o mi ngíni, adrélé àma kí tadhá dhi? » Di i dré akódhi ni dròzo àyi kí lísambò dzó lésè.

³⁵Yésu kòyi tâle dhi, i dro tá agó nda dhi dre dhi, dré akódhi ni kisúzó gó, lizízóá tíá dhi: «Mí adré Móndí ni Mvá ni ka'i? »

³⁶Agó nda logó dhi: «Míri, mí tà rè má dré, akódhi nda àdhi 'i ya dhi ká, má kòkitswáró akódhi ni ka'i be dhi bvó. »

³⁷Yésu tà drá dhi: «Mí nò akódhi dre. Akódhi dhya adrélépi tà ta mí be ni 'i. »

³⁸Di agó nda tà drá dhi: «Míri, má ka'i dre! » Gò dré adhézó áyi kórókó titi Yésu kandrá, akódhi ni líndri bhàzo.

Àdhibhá i mì kùdúkùdu 'i bâti?

³⁹Di Yésu dré gózo tâá dhi: «Má alà mána bvò kòndi lé kitswálé tâbvó kònìdhi ni ta: Má alà kitswálé dhya mì kùdúkùdu ró dhi i kòkitswáró ngá no, ìndi dhya adrébhá ngá no dhi i kâtsáró mì kùdúkùdu i gó. »

⁴⁰Fàrisayò àruka adrébhá Yésu làga dhi i kòyi kúlì nda dre dhi, i dré lizízóá tíá dhi: «Àma tsì kókpà mì kùdúkùdu 'i? »

⁴¹Di Yésu logó àyi dré dhi: «Kònò mì kàdré tá mì kùdúkùdu 'i bâti dhi, à kitswá tá tà bha àmì dri àmì kí tàkonzi kí tà sè ko. Di, mì dré adrélé tâle dhi mì adré ngá no dhi sè dhi, àmì kí tàkonzi i dhu rè àmì dri be. »

Yòwánì 10

Kábilígyà líki' lépi i kábilígyà ni i' be dhi

¹Yésu gò tâá dhi: «Má adré tà bâti ta àmì dré: Dhya adrélépi fîle kábilígyà kí gíri na ti ni 'ásè ko, di, adrélépi ína fîle láti twá 'ásè dhi, akódhi nda kùgú 'i, ìndi ngá kärílépi 'i.

²Di, dhya adrélépi file gírí nda ni ti 'ásè dhi, kábilígyà likílépi 'i.

³Gírí ni ti likílépi adré ti nda ni nzi akódhì dré gò, kábilígyà i dré adrészó akódhì ni kúlí yi. Akódhì adré áyi tändi ni kábilígyà ki azí àyi ki rú sè gò, adrészó àyi ki dri pfòzo àyi ibe kivì na.

⁴Kò'o àyi pfôle tití dre dhi, adré dhèle àyi kandrá. Gò kábilígyà nda i dré adrészó lile vásà, i dré kúlí ni ni nile be dhi sè.

⁵Di, kábilígyà nda i kítswá tázdi lile móndi twá i dré nile ko dhi vésè ko. Be ró dhi, i ni lapá rale akódhì nda kandrásè, i dré kúlí ni ni nile ko dhi sè. »

⁶Yésu tà tá tà nda àyi dré kúlí alaala sè. Di, tà dré adrélé tâle nda ki àndu fi ína àyi drina ko.

⁷Di Yésu dré gózo tâá dhi: «Má adré tà bâti ta àmì dré: Ma gíriti kábilígyà i dré dhi 'i.

⁸Móndyá wáyi alibhá drìdrì má kandrá dhi i tá kùgubhá 'i, ìndi káribhá 'i. Di, kábilígyà nda i yi tá àyi ko.

⁹Ma gíriti 'i. Dhya ángùdhi adrélépi afilé má 'ásè dhi ni adrí. Akódhì nda ni adré afilé, adrélé pfôle, adrélé kpà ngá kisú nyale.

¹⁰Kùgú adré ngbà 'i alile kítswálé ngá kugù, kítswálé móndi ki tupfú todràle, ìndi kítswálé tà kízâ. Di, má alì mána móndi i kàdréró lídrì ibe, ìndi lídrì nda kògaró àyi léna gagà.

¹¹Ma kábilígyà likílépi dóro dhi 'i. Kábilígyà likílépi dóro nda adré áyi lídrì fe áyi kábilígyà i dré.

¹²Di, kàdré dhya adrélépi ngbà 'i àzí 'o làfa sè dhi ni tà sè dhi, akódhì nda kábilígyà likílépi 'i bâti ko. Kábilígyà nda i kpà akódhì ni tändi àdhyá 'i ko. Akódhì kònò kàlagí adrérà'a alile dhi, adré ína kábilígyà nda ki tayí lapázó. Gò kàlagí nda dré adrészó kábilígyà nda ki turú, adrészó àyi ki lapé.

¹³Dhya nda adré lapálé, dré adrélé ngbà 'i àzí 'o làfa sè dhi sè, ìndi dré adrélé kábilígyà nda ki tà kisù ko dhi sè.

¹⁴Ma kábilígyà likílépi dóro dhi 'i. Má ni áma kábilígyà i be, ìndi áma kábilígyà nda i ni kpà ma be,

¹⁵ngóró áma Atá dré áma nile be dhi tíni, ìndi má dré kpà áma Atá ni nile be dhi tíni. Má adré áma lídrì fe áma kábilígyà nda i dré.

¹⁶Ma kókpà kábilígyà àruka adrébhá gírí kònìdhì 'á ko dhi ibe. Adré lèá dhi, má kàdrì àyi nda i afizó àyi ibe be. I ni kpà áma kúlí yi gò, kábilígyà tití nda i dré adrészó pârì àlo ró, àyi ki likílépi dré kpà adrészó àlo kwákwa.

¹⁷Áma Atá adré áma le tò, má dré adrélé áma lídrì fe kítswázó gòle dòá tódhyá dhi sè.

¹⁸Dhya àlo kitswá áma lídrì tingá bwà ko. Di, má adré mána fèá ngóró má dré adrélé lèle 'ole dhi tíni. Ma rinyí íbe kitswázó fèá, ìndì ma kpà rinyí íbe kitswázó gòle dòá. Kòrìdhi, tòlì má dré kisúlé áma Atá vélésè dhi 'i. »

¹⁹Yésu ni kúlí nda i sè dhi, Yúdà ànzì i dré gòzo tódhyá ru lanzí.

²⁰Àyi kí àruka bí dhi i adré tá tàá dhi: «Akódhì tirí kònzi íbe í léna! Ngá kizá akódhì ni dré dre! Mì adré akódhì ni yi àdho tà sè? »

²¹Di, àruka ni i adré kó tàá dhi: «Dhya adrélépi tirí kònzi íbe í léna dhi adré ína kúlí ta kònini ko. Tirí kònzi ni kitswá tsì móndí mì kùdükùdu ró dhi kí mì nzi bwà? »

Yúdà ànzì kí àruka i` gà Yésu rè

²²Lókyá kidhì àdhya sè dhi, Yúdà ànzì i adré tá gwányá adrészó tépelò ni bhàma twá Giká dré dhi ni tà kisù dhi ni 'o Yérusalémà na.

²³Di Yésu dré tá adrérà'a atsílé tépelò ni kògbo zile Sòlòmónò àdhya ró dhi 'ásè dhi 'á dhi,

²⁴Yúdà ànzì i dré ru kímózó akódhì làgásè kúrú gò, tàá drá dhi: «Mí ni tà kòdhì ni losó vwàle lókyá be ángopí? Mí kàdré Mèsiyà 'i báti dhi, mí tà rè àma dré ngádra 'á ká. »

²⁵Di Yésu logó àyi dré dhi: «Má tà tá tà nda àmi dré dre. Di, mì ka'i àmikya ma ko. Tà líndriga ró má dré adrélé 'ole áma Atá ni rú sè dhi i adré tadhá ngádra 'á dhi, ma àdhi 'i ya dhi ni.

²⁶Di, mì ka'i àmikya ma ko, mì dré adrélé áma kábilígyà 'i ko dhi sè.

²⁷Áma kábilígyà i adré áma kúlí yi. Má ni kpà àyi be gò, i dré adrészó áma lebè.

²⁸Má adré lídrì kóná vésè kólyá dhi ni fe àyi dré gò, i dré kitswázó tàdzí dràle ko. Dhya àlo kitswá kpà àyi kí topá má drígásè bwà ko.

²⁹Áma Atá àyi kí afelepi má dré dhi kàdrì ngá wáyi dhi kí lavú. Di dhya àlo kitswá àyi kí topá áma Atá nda drígásè bwà ko.

³⁰Áma áma Atá be dhi i àlo 'i. »

³¹Gò Yúdà ànzì nda i dré gòzo tódhyá kírà kudhú kitswázó Yésu ni lebhé dràle ásà.

³²Di Yésu dré tázoo àyi dré dhi: «Má 'o tà líndriga ró dóro bí angábhá áma Atá vélésè dhi i àmi dré nòle dhi 'i. Di tà nda i kòfalé dhi, mì adré 'ole áma lebhé kírà sè tà ángùdhi sè? »

³³Di Yúdà ànzì nda i logó dré dhi: «Mà adré ámi lebhé kírà sè tà dóro nda kí àlo sè ko. Be ró dhi, mà adré àmikya ámi lebhé kírà sè, mí dré adrélé Giká ni lodhá dhi sè. Ángyá ko, mí móndí ro ni, mí adré mína ámi 'o adrélé Giká ro! »

³⁴Di Yésu logó àyi dré dhi: «À tisì zakó tsì àmi kí tátrítrí kúlí na dhi, Giká tà tá dhi: <Àmi giká 'i! > ³⁵Mà ni tâle dhi, à kitswá tà àlo tisile Giká ni Kúlí na dhi ni bhe gàrà dri bwà ko dhi be. Di Giká kòzi kó móndyá áyi Kúlí kisúbhá dhi i giká i ró dhi,

³⁶mì adré dì àmikya tàá dhi, má adré Gìká ni lodhá, má dré tâle dhi ma Gìká ni Mváagó 'i dhi sè dhi ngíni? Tà bâti ró dhi, Gìká Atá nda bhà ma twá adrélé ína ró gò, áma amùzo bvò kònìdhi lé dhi nì.

³⁷Má kàdré tà áma Atá dré adrélé 'ole dhi kì 'o kòdhya ko dhi, mì kòka'i ma ko.

³⁸Dì, má kàdré tà nda kì 'o 'í dhi, gba mì kàdré áma ka'i ko yà dhi, mì kàdré tà líndrìga ró má dré adrélé 'ole nda kì ka'i kòdhya, mì kòniró tâle dhi, áma Atá má léna, ìndì ma áma Atá léna dhi be. »

³⁹Dì ì dré gózo adrélé láti nda kitswázó akódhi ni ru. Dì, akódhi dré ína ngàzo pfòle lyà àyi kòfalésè.

⁴⁰Àmvolásà dhi, Yésu dré gózo lìle zyale Yòròdánè ni ta'á na, àrà Yòwánì dré tá adrészó bâtísímò fe drìdrì dhi na. Dré adrészó kònàle gile lókyá be vwàvvà ro tsà gò,

⁴¹móndí zyandre dhi ì dré alìzo akódhi vélé. Ì adré tá tàá dhi: «Yòwánì 'o tá ína tà àlo líndrìga ró dhi ko. Dì, tà tití dré tá tâle agó kòdhì ni tà dri dhi ì tá tà bâti 'i. »

⁴²Dì móndí zyandre dhi ì dré Yésu ni ka'izo kònàle.

Yòwánì 11

Làzárò ni dràma

¹Agó àlo rú be Làzárò dhi tá drà ro Bètànìyà na. Bètànìyà nda tá kpà bhà akódhi ni amvúpi i, Màrìyà i Màrátà be dhi kya 'i.

²Màrìyà nda kòdhì tá tòkó málásì dàlepi Mírì Yésu pá gò, pá ni kì atrìzo áyi drìbhí sè dhi 'i. Dì adrúpi ni, Làzárò nda tá drà ro.

³Gò akódhi ni amvúpi rì nda ì dré móndí mùzo lìle tàá Yésu dré dhi: «Mírì, ámi arúpi mí dré lèle tò dhi drà ro. »

⁴Yésu kòyi rúbí nda dre dhi, dré tâzoá dhi: «Làzárò ni drà kòdhì kitswá akódhi ni 'o dràle nyo ko. Be ró dhi, drà nda atsá ína akódhi rú Gìká kòkisúró mìlanzìlanzì ásà, ìndì kòbhàró kpà áyi Mváagó ni mì lanzile ásà be dhi bvó. »

⁵Yésu lè tá Màrátà i, amvúpi ni Màrìyà be, ìndì Làzárò be tò.

⁶Dì, kòyi tâle dhi, Làzárò nda tá drà ro dhi dre dhi, dré gózo ína adrélé àrà ì dré tá adrészó dhi na kítú rì.

⁷Gò dré tâzoá áyi lebèbhá i dré dhi: «Mà kògò lìle Yùdáyà na. »

⁸Dì, akódhi ni lebèbhá nda ì tà drá dhi: «Rábbì, gí dhu rè ko, Yùdà ànzi ì dré tá adrészó láti nda kitswázó ámi lebhé dràle kírà sè dhi. Dì, mí adré mína 'ole gòle kònàle? »

⁹Yésu logó àyi dré dhi: «Kítú adré kàle sáà mudrí-drì-rì ko? Dhya ángùdhi adrélépi atsílé kítú sè dhi adré dhèle ko, dré adrélé ngádra bvò kònìdhi àdhya ni no dhi sè.

¹⁰Dì, kàdré ína atsílé ngátsi sè dhi, adré dhèle, dré adrélé ngádra àko ì léna dhi sè. »

¹¹Kòtà tà nda dre dhi, dré gòzo tàá àyi dré dhi: «Àma kí arúpi Lázárò ko ayí dre. Di, má adré mána lìle akódhì ni toró. »

¹²Di lebèbhá ni ì tà drá dhi: «Míri, akódhì kàdré ayí ko dhi, a ni adrí. »

¹³Ì adré tá àyikya kisùá dhi, Yésu adré tá Lázárò ni ayí kòma ni tà ta kòdhyá. Tákò, Yésu adré tá ína akódhì ni dràma ni tà ta kòdhyá.

¹⁴Di Yésu dré tázooá àyi dré ngádra 'á dhi: «Lázárò drà dre.

¹⁵Di àmi kí tà sè dhi, má adré lenzélé má dré tá adrélé kònale yó dhi sè, mi kòkítswáró áma ka'ì báti be dhi bvó. Mà kòlì di akódhì véna. »

¹⁶Di Tòmá, adrélé kpà rú zile Látí dhi dré tázooá Yésu ni lebèbhá àruka tití dhi i dré dhi: «Mà kòlì kókpà be, mà kòdraró túmání akódhì be! »

Yésu dhya adrélépi móndí` kí tingá dràdrà lésè dhi 'i, i`ndí` dhya adrélépi li`dri` fe dhi 'i

¹⁷Yésu kòtsa Bètaníyà na dre dhi, dré yìzoá tâle dhi, à bhà tá Lázárò ayílé mógo na kítú su dre.

¹⁸Bètaníyà nda tá ànyi Yérusalémà làga, ànyiànyi kílôméterè na.

¹⁹Di Yúdà ànzi bì dhi i alì tá Márátà i vélé Máríyà be, kitswálé àyi kí togó tindrì àyi kí adrúpi ni dràdrà ni tà sè.

²⁰Di Márátà kòyi tâle dhi, Yésu adré tá alìle dhi dre dhi, dré ngàzo lìle ru kisú ába. Di, Máríyà lirí tá ína adrélé dzó na.

²¹Márátà dré tázooá Yésu dré dhi: «Míri, kònò mí kàdré tá kònwa be dhi, áma adrúpi kitswá tá dràle ko!

²²Di, ndìndì nyànomvá dhi, má ni tâle dhi, Gíká ni tà ángùdhi mí dré dra zile i tí dhi ni fe mí dré dhi be. »

²³Yésu tà drá dhi: «Ámi adrúpi ni angá dràdrà lésè. »

²⁴Di Márátà logó drá dhi: «Má ni tâle dhi, a ni nga dràdrà 'ásè kítú kùdù móndí i dré dra ngàzo dràdrà 'ásè dhi tú dhi be. »

²⁵Di Yésu tà drá dhi: «Ma dhya adrélépi móndí kí tingá dràdrà lésè dhi 'i, ìndì dhya adrélépi lídrì fe àyi dré dhi 'i. Dhya ángùdhi adrélépi áma ka'ì dhi, tágba kòdrà yà dhi, a ni adrí.

²⁶Kòdhi íbe dhi, dhya ángùdhi adrélépi lídrì íbe ìndì adrélépi áma ka'ì dhi, kitswá tâdzí dràle kóná vésè kólyá ko. Mí ka'ì tà kòdhì vélé? »

²⁷Di Márátà logó drá dhi: «Àyíya, Míri, má adré ka'íá dhi, mi Mèsíyà 'i, Gíká ni Mváagó 'i, ìndì dhya adrélépi tá alìle bvò le dhi 'i. »

²⁸Márátà kòtà tà nda dre dhi, dré ngàzo lìle áyi amvúpi Máríyà ni azí gò, tázooá drá kòyàyà sè dhi: «Dhya tà tadhálépi dhi kònwanò. Adré ámi zi. »

²⁹Màrìyà kòyi rúbí nda dre dhi, dré ngàzo mbèlè lìle Yésu véna.

³⁰Yésu fí tá rè bhà nda na ko. Di, adré tá dhu rè àrà ì dré ru kisúzó Márátà be dhi na.

³¹Di Yúdà ànzi adrébhá tá Márìyà làga dzó na adrélé akódhi ni togó tindrì nda, ì kònò akódhi ngarà'a pfôle mbèlè dre dhi, ì dré kpà ngàzo akódhi ni lebè. Ì adré tá àyikya kisùá dhi, adré lìle ngòle mógo drìna.

³²Márìyà kòtsa àrà Yésu dré tá adrészó dhi na akódhi ni no dre dhi, dré dhèzo akódhi pá gó, taá drá dhi: «Míri, kònò mí kàdré tá kònwa be dhi, áma adrúpi kitswá tá dràle ko! »

³³Di Yésu kònò Márìyà nda i adrérà'a ngòle túmání Yúdà ànzi alibhá ába dhi íbe dre dhi, akódhi ni togó dré njòzo, adrélé lanzile tò.

³⁴Dré lizízóá dhi: «Mí bhà akódhi ni rúbhá ángwà? » Ì logó drá dhi: «Míri, mí alì nòá. »

³⁵Yésu dré ngòzo.

³⁶Di Yúdà ànzi nda i dré tázoo dhi: «Mí nò rè dré akódhi ni lèle ngíni ya dhi ká! »

³⁷Di, móndí àruka àyi kòfalé dhi i dré tázoo dhi: «Dhya kòdhí nzì tá kó agó mí kùdükùdu ró dhi ni mí 'í dhi, kitswá tá tsì tà 'o Lázárò dré dràzo ko dhi bwà ko? »

Yésu tingá Lázárò dràdrà lésè

³⁸Yésu ni togó dré gózo tódyá njòle gó, dré lizo tsale mógo na. Mógo nda tá gó 'í. À kírá kàdrì bhàle tíá.

³⁹Di Yésu dré tázoo dhi: «Mí zì kírá tíásà. » Di, Márátà, dhya dràlepi nda ni amvúpi tà drá dhi: «Míri, kònđi tâdzí ni vélè tò. Àngyá ko, akódhi ayí mógo na kítú su dre! »

⁴⁰Yésu logó drá dhi: «Má tà tá mí dré dhi, mí kòka'i dhi, mí ni Gíká ni mìlanzilanzì no dhi ko? »

⁴¹Di i dré kírá nda ni zìzo. Gò Yésu dré mí tingázó kurú na, tázoo dhi: «Tátá, má adré àwoyà ta mí dré, mí dré áma yile dre dhi sè.

⁴²Má nì, mí adré ngbú adrélé áma yi dhi be. Di, má tà mána tà kòdhí móndyá zyandre má làga kònì kí tà sè, i kòkitswáró ka'iá dhi, mí amù ma mí. »

⁴³Kòtà tà nda dre dhi, dré ngàzo kúlí yo tázoo dhi: «Lázárò, mí apfò kònalsè! »

⁴⁴Di dhya tá dràlepi nda dré ngàzo apfôle. À lambé tá drígá ni i, pá ni íbe kítá kàtswákàtswa dhi i sè, drì ni ni lambézó kítá àzya sè. Di Yésu dré tázoo àyi dré dhi: «Mí tri akódhi, tayízóá lìle. »

Yúdà ànzi i` yi ru kitswázó Yésu ni pfu dràle (À kònò kpà Mátayò 26:1-5; Márokò 14:1-2; Lükà 22:1-2)

⁴⁵Di Yúdà ànzi alibhá tá Márìyà vélè nda i kònò tà Yésu dré 'ole nda dre dhi, àyi kí àruka bì dhi i dré akódhi ni ka'izo.

- ⁴⁶Dì, àruka nì ì dré àyikya lìzo Fàrisayò i véna, tà Yésu dré 'ole nda nì tití àyi dré.
- ⁴⁷Gò kòwánà kàdrì i Fàrisayò íbe dhi ì dré bhàgo kàdrì kì kimózó tití gò, ì dré tàzoá dhi: «Mà nì 'òá ngíni? Tàko ko, agó kòdhì adré vélé tà línndríga ró dhi kì 'o bì!
- ⁴⁸Mà kòtayí akódhì adrélè tà 'o kònìnì dhi, móndyá wäyi dhi kì akódhì nì ka'ì. Dì Rómà kì kàdrì kì àma kì tépelò 'o pfùle, túmäní àma kì súrú íbe. »
- ⁴⁹Dì, àyi kì àlo rú be Kàyáfà, adrélépi tá kòwánà kì kàdrì ro kóná kònàdhì sè dhi, dré ngàzo tàá àyi dré dhi: «Àmi, mì nì àmikya tà àlo ko!
- ⁵⁰Mì nì ko tâle dhi, dóro nì àmi dré dhi, dhya àlo dré dràle móndyá wäyi i dré dhi, àmi kì súrú wäyi dhi kòdraró nyo ko dhi? »
- ⁵¹Akódhì tà tâ nda áyi drì sè ko. Dì, dré tá adrélè kòwánà kì kàdrì ro kóná nda sè dhi sè dhi, longó tá ína tà nda pròfétà àdhya tíni tâzoá dhi, Yésu nì dra Yúdà ànzì kì súrú nì tâ sè.
- ⁵²Dì, kitswá tá ngbà 'í dràle súrú nda nì tâ sè ko, a nì kókpà dra kitswálé Gìká nì ànzì ayíbhá àrà tití i 'ásè dhi kì kimó adrélè súrú àlo ró.
- ⁵³Dì kidhólé kitú nda sè dhi, Yúdà ànzì kì kàdrì nda ì dré ru yìzo kitswázó Yésu nì pfu dràle.
- ⁵⁴Dì ásà dhi, Yésu dré gózo vélé adrélè atsílé Yúdà ànzì i kòfalésè ngádra 'ásè ko. Dì, dré ína lìzo àrà ànyi duku làga dhi na, bhàandré rú zile Èfàràyímà dhi na gò, ì dré adrészó kònàle túmäní lebèbhá nì íbe.
- ⁵⁵Yúdà ànzì kì gwányá Pásikà àdhya kàtsá ànyi dre dhi, móndí zyandre dhi ì dré ngàzo gbàbhú lésè lìle Yérusalémà na, kitswálé àyi kì temvé drìdrì gwányá nda kandrá.
- ⁵⁶Dì ì adré tá Yésu nì nda, adrészó tàá àyi kòfalésè tépelò na dhi: «Mì kisù ngíni? Akódhì kitswá tsì alìle gwányá lé ko? »
- ⁵⁷Dì, kòwánà kàdrì i Fàrisayò íbe dhi ì fè tá tolí tâzoá dhi, dhya àlo kònì àrà Yésu dré tâ adrészó lána dhi be dhi, kòtadhá àrà nda àyi dré, ì kòkitswáró akódhì nì ru be dhi bvó.

Yòwánì 12

Màrí yà dà màlásì́ Yésu pá

(À kònò kpà Mâtayò 26:6-13; Márokò 14:3-9)

- ¹Tayí tá kitú nzi-drì-àlo gwányá Pásikà àdhya kandrá gò, Yésu dré lìzo Bètànìyà na, bhà Lázárò àdhya na. Lázárò nda tá dhya Yésu dré tingálé dràdrà lésè dhi 'ì.
- ²Dì kònàle dhi, à dré ngá ladhlízó Yésu dré nyàle. Màrátà adré tá ngá bha móndí i kandrá. Lázárò tá kpà móndyá liríbhá mísa làgásè túmäní Yésu be dhi i kòfalé.
- ³Dì Màriyà dré màlásì làgí kyàkyà ladhlílé tsèrèlè náradà sè dhi nì adózó, alìzo ába líterè àlo nì kítogá 'ásè. Dré màlásì nda nì dàzo Yésu pá gò, pá nì kì atrìzo áyi drìbhí sè. Gò màlásì nda nì tâdzí dré dzó nda nì 'a dòzo wäyi.

⁴Dì Yùdásì ḥsikàrìyótà, Yésu ni lebèbhá kí àlo tá kpà kònàle. Akódhì nda tá dhya adrélépi 'ole Yésu ni lefè kàribhá i drígá dhi 'í. Dì kònò tà Màriyà dré 'ole nda dre dhi, dré ína tázaoá dhi:

⁵«À kítswá tá málásì kòdhì ni lagí, làfa ni ni fèzo lemerèbhá i dré ko àdho tà sè? À ni tá kítswá làfa lò'wa kámá-na dhi kí kisú ásà. »

⁶Tà tá kònìnì dré tá adrélé lemerèbhá kí tà kisù dhi sè ko. Be ró dhi, tà ína tà nda dré tá adrélé kùgú 'í dhi sè. Tako ko, akódhì tá dhya adrélépi kòmvò adrészó làfa bha lána dhi ni likí dhi 'í. Dì, adré tá ína ngá bhàle lána dhi ni do áyi tändi dré.

⁷Gò Yésu dré tázaoá drá dhi: «Mí tayí tòkó kònìdhì, kàdréró tà dré 'ole kòdhì ni likí áyi togó na tsàle kítú dra áma rúbhá bhàzo mógo na dhi tú!

⁸Mì adré ngbú adrélé lemerèbhá íbe àmì kòfalé. Dì, mì kítswá ngbú adrélé túmání má be ko. »

Yúdà ànzì i` yi ru kítswázó Lázárò ni pfu dràle

⁹Yúdà ànzì zyandre dhi i koyi tâle dhi, Yésu tá Bètànìyà na dhi dre dhi, i dré kpà lìzo kònàle. I lì tá ngbà 'í Yésu ni tà sè ko. I lì kókpà kítswálé Lázárò Yésu dré tingálé dràdrà lésè dhi ni no dhi bvó.

¹⁰Dì kowánà kàdrì i dré kpà ru yìzo kítswázó Lázárò ni pfu dràle.

¹¹Tako ko, akódhì nda ni tà sè dhi, Yúdà ànzì zyandre dhi i adré tá àyi kí tayí, adrészó Yésu ni ka'i.

Yésu fì Yèrúsalémà na ópi` ti` ni

(À kònò kpà Mátayò 21:1-11; Márokò 11:1-11; Lükà 19:28-40)

¹²Kítú bvóá dhi sè dhi, móndí zyandre alibhá gwányá Pásikà àdhya lé nda i dré yìzoá tâle dhi, Yésu adré alile Yèrúsalémà le.

¹³Dì i dré mbíra bí kí dòzo, topfòzo ába kítswálé ru kisú akódhì be. I adré tá loyoá dhi: «Ósánà! Tà taní kàdré dhya adrélépi alile Míri ni rú sè dhi dri! Tà taní kàdré ópi ìsérélè ànzì kya dri! »

¹⁴Dì Yésu dré púndà mvá àlo dhi ni kisúzó gó, mbàzo lirílè driá, ngóró tísile Gíká ni Kúlí na dhi tñi:

¹⁵«Mì, zapi Siyónà àdhya ni, mí kòro ngá ko. Mí nò rè ká! Ámì ópí adré alile, lirí ína púndà mvá dri. »

¹⁶Lókyá nda sè dhi, tà nda kòdhì kí àndu fì tá dhu rè Yésu ni lebèbhá i drìna ko. Dì Yésu kònga dràdrà 'ásè fìle áyi mìlanzìlanzì na dre dhi, i dré nìzoá tâle dhi, à tísì tá tà nda i Yésu ni tà dri gó, à dré tà nda kí 'ozo akódhì dré dhi be.

¹⁷Móndyá zyandre tá Yésu ni nobhá Lázárò ni azírà'a angálé dràdrà lésè, iñdì apfòle mógo lésè nda i adré tá tà nda ni tití.

¹⁸Dì móndí àruka zyandre dhi i koyi tà líndriga ró Yésu dré tá 'ole nda ni rúbí dre dhi, i topfò tá kítswálé ru kisú akódhì be.

¹⁹Dì Fàrisayò ì dré tázoo àyi kòfalésè dhi: «Mì nò rè ká! Mà kitswá àmakya tà àlo 'o bwà ko. Móndyá wäyi bvò àdhya ì adré lìle akódhi vésè! »

Yésu longó áyi dràma ni tà

²⁰Móndyá alibhá Yérúsalémà le kitswálé Gíká ni lindrì bha gwányá nda tú dhi ì kòfalé dhi, Gírikì àruka i tá be.

²¹Dì àyi nda ì dré alizo Filípò angálépi tá Bètèsayídà, Gàlliyà le dhi lésè dhi vélé gò, lizíá tíá dhi: «Atálágó, mà adré Yésu ni le nôle. »

²²Dì Filípò dré lìzo tà nda ni ta Àndréyà dré gò, ì dré lìzo rìti tàá Yésu dré.

²³Yésu dré logozóá àyi dré dhi: «Lókyá Móndí ni Mvá dré dra mìlanzìlanzi kisúzó dhi kitswá dre.

²⁴Má adré tà báti ta àmì dré: Ngánò lò'wa kòdhe dràle kíní na ko dhi, a ni ngbú adré kalóma. Dì, lò'wa nda kòdhe ína dràle dhi, a ni lò'wa àruka ki 'a bì.

²⁵Dhya ángùdhi adrélépi trôle áyi tändi ni lídrì rú dhi, a ni áyi lídrì nda ni 'o avile. Dì, dhya adrélépi áyi lídrì bvò kòndi dri dhi ni ga dhi, a ni áyi lídrì nda ni likí adrélé kóná vésè kólyá.

²⁶Dhya ángùdhi adrélépi áma tà le 'ole áma marrábà tñi dhi, lè akódhi nda kàdré áma lebè. Àrà ángùdhi má dré adrészó lána dhi na dhi, áma marrábà nda ni adré kókpà be. Dì áma Atá ni lindrì fe dhya adrélépi áma tà 'o nda dré.

²⁷Nyànomvá dhi, áma togó adré lanzile tò. Dì má ni tàá ngíni? Má ni tsì tàá dhi, ‹Tátá, mí tìdrí ma lókyá kizà àdhya kònìdhi sè› dhi? Kóko, má atsá mána kitswálé kizà nya lókyá kònìdhi sè.

²⁸Tátá, mí kòbhà ámì rú kùle wà! » Yésu kòtà tà nda dre dhi, kúlí dré apfòzo bhù lésè tàá dhi: «Má bhà áma rú kùle dre. Má ni kpà go tódyá rú nda ni bha kùle. »

²⁹Dì móndyá zyandre adrébhá tá kònàle dhi ì kòyi kúlí nda dre dhi, ì dré adrészó tàá dhi: «Kòdhi bhù tadí nì! » Àruka ni ì adré kó tàá dhi: «Ángéló àlo dhi tà drá nì! »

³⁰Dì, Yésu dré tázoo àyi dré dhi: «Kúlí kòdhi apfò áma tà sè ko. Dì, apfò ína àmì ki tà sè.

³¹Nyànomvá kònìdhi, lókyá bvò kònìdhi ni tòbvó tázoo dhi 'i. Nyànomvá dhi, à ni ópí bvò kònìdhi àdhya ni dro pfòle. ³²Dì ma ró dhi, à kòtingá ma kurú na bvò 'ásè dre dhi, má ni móndyá wäyi dhi ki asé má vélé. »

³³Yésu tà tá tà nda tadházoo dhi, í ni dra dràdrà kárá ángùdhi sè ya dhi.

³⁴Dì móndyá zyandre nda ì logó drá dhi: «Mà yi tâle dhi, tâtrítrí kúlí adré tàá dhi, Mèsiyà ni adré kóná vésè kólyá dhi 'i. Mí adré dì mína tàá dhi, lè à kòtingá Móndí ni Mvá bvò 'ásè dhi ngíni? Móndí ni Mvá nda àdhi i? »

³⁵Dì Yésu gò tàá àyi dré dhi: «Àmì dhu rè ngádra íbe àmì kòfalé dhi lókyá tsà sè. Lè mi kàdré atsílé mi dré adréra'a ngádra nda íbe dhi 'á, tñimvá kòkiró àmì ko dhi bvó. Àngyá ko, dhya adrélépi atsílé tñimvá na dhi ni ína ngalè i adré lìle ángolé ya dhi ko.

³⁶Mì dré adrérà'a ngádra iбе dhì 'á dhì, mì kàdré ngádra nda ni ka'ì, mì kàtsáró ànzì ngádra àdhya i рó be dhì bvó. » Yésu kòtà tà nda i dre dhì, dré ngàzo lìle áyi zu àyi rúsè.

Yúdà ànzì i` ka'ì Yésu ko

³⁷Tágba Yésu dré tá tà líndríga ró bì dhì kì 'òzo àyi mi dhì, i ka'ì tá àyikya akódhì ko.

³⁸Dì tà nda kòdhì atsá kònìnì, kitswálé kúlí pròfétà Èsáyà dré tá tisile kònì i kò'oró ru be dhì bvó: «Míri, àdhì ka'ì kúlí mà dré longolé dhì nì?

Àdhì nò tà Míri dré tadhálé áyi drígá rìnyi ró dhì sè dhì nì? »

³⁹Dì móndí i kitswá tá Yésu ni tà ka'ì bwà ko. Àngyá ko, Èsáyà nda tà tá kpà dhì:

⁴⁰«Giká 'o àyi kì mì adùle,

àyi kì togó 'òzo tombálé, i kònòró ngá àyi kì mì sè ko, i kònìrò tà àyi kì togó na ko, i kàdzáró àyi kì togó má vélé gò, má dré àyi kì tidrízó dhì ko. »

⁴¹Èsáyà tà tá tà nda kònìnì tåko ko, nò tá ína Yésu ni mìlanzìlanzì gò, dré akódhì ni tà tåzo.

⁴²Tágba kònìnì dhì, móndí zyandre dhì i ka'ì tá Yésu. Ndìndì Yúdà ànzì kì kàdrì kì àruka i ka'ì 'í. Dì, i adré tá àyi kì tà ka'ika'ì nda ni tà ta ngádra 'á ko. Àngyá ko, i adré tá ngá ro, Fàrisáyò kì dra àyi kì dro lìsámbò dzó i lésè dhì sè.

⁴³Tåko ko, i adré tá àyikya rúku le kisúlé móndí i véna, rúku kisúlé Giká véna dhì ni lavú.

Kúlí Yésu dré tåle dhì kì móndí` kì tåbvó ta ni`

⁴⁴Àmvolásà dhì, Yésu dré kúlí yòzo tåzoá móndyá zyandre i dré dhì: «Dhya ángùdhi adrélépi áma ka'ì dhì, adré ngbà 'í áma ka'ì kòdhya ko, adré kókpà dhya áma amùlepi dhì ni ka'ì.

⁴⁵Dhya ángùdhi adrélépi áma no dhì, adré dhya áma amùlepi dhì ni no kòdhya.

⁴⁶Má alì mána bvò kònìdhì lé adrélé ngádra ró, kitswálé dhya ángùdhi adrélépi áma ka'ì dhì kògòró vélé adrélé tñimvá na ko.

⁴⁷Dhya àlo kàdré áma kúlí yi gò, adrészó ka'ia 'ole ko dhì, má adré akódhì nda ni tåbvó ta ma ko. Tåko ko, má alì bvò kònìdhì lé kitswálé móndyá bvò àdhya kì tåbvó ta ko. Be ró dhì, má alì mána kitswálé móndyá bvò àdhya kì tidrí.

⁴⁸Dì, dhya adrélépi áma ga gò adrészó áma kúlí ka'ì ko dhì, akódhì nda ni tåbvó tålepi be. Kúlí má dré tåle dhì kì akódhì ni tåbvó ta kítú kùdù sè dhì nì.

⁴⁹Tåko ko, má tà tá mána kúlí nda i áma drì sè ko. Be ró dhì, áma Atá áma amùlepi dhì fè ína tolí tåzoá má dré dhì, má kòtà àdho tà 'í ya dhì, iñdì má kòtà tà nda ngíni ya dhì nì.

⁵⁰Dì má nì tâle dhi, akódhì nì tòlì nda adré móndí kì adrì lídrì kóná vésè kólyá dhi nì kisú dhi be. Ásà dhi, tà ángùdhi má dré adrélé tâle dhi, má adré tâá ngóró áma Atá dré tâle má kòtà dhi tíni. »

Yòwánì 13

Yésu dzi` áyi lebèbhá kì pá

¹Gwányá Pásikà àdhya kandrá dhi, Yésu nì tá tâle dhi, lókyá í dré ngàzo bvò kònìdhì 'ásè lìle áyi Atá véna dhi kitswá dre dhi be. Lè tá ngbú áyi lebèbhá bvò dri dhi i tò. Dì gò adrélé àyi kì le tsale kùdù na.

²Ìndró sè dhi, Yésu i lebèbhá nì íbe dhi i adré tá ngá nya. Dì Dzáborò bhà tá tà Yùdásì ìsikàriyótà, Sìmónà nì mvá nì togó na, kòleféró Yésu kàribhá i drígá.

³Yésu nì tá tâle dhi, áyi Atá tayí tá tà tití dhi i í drígá, í angá tá Gìká vélésè, ìndì i adré 'ole góle Gìká véna dhi be.

⁴Dì dré ngàzo mísá làgásè, kítá í dré tá asólé kítá àzya dri dhi nì avù gó, kítá àzya adózó drôle áyi kípílé 'á.

⁵Dré yí adózó dàle kòtá na gó, kídhozó adrélé áyi lebèbhá àlo àlo dhi kì pá dzi, adrészó pá nda kì atrì kítá í dré tá drôle áyi kípílé 'á nda sè.

⁶Kòtsa Sìmónà Pétéró rú dre dhi, akódhì nda dré tâzoá drá dhi: «Mírì, mí nì tsì áma pá dzi báti? »

⁷Yésu logó drá dhi: «Tà má dré adrélé 'ole kònìdhì, mí nì rè nyànomvá ko. Dì, mí nì go tà nda nì àndu ni ndò. »

⁸Pétéró tà drá dhi: «Kóko! Mí kitswá áma pá dzi tâdzí ko! » Yésu logó drá dhi: «Má kòdzì mì ko dhi, mí kitswá vélé adrélé áma lebèlepi ró ko. »

⁹Dì Sìmónà Pétéró tà drá dhi: «Mírì, kàdré kònìni dhi, mí kòdzì ngbà 'í áma pá kòdhya ko, mí kòdzì kókpà áma drígá i áma drì be! »

¹⁰Dì Yésu logó drá dhi: «Adré lèá dhi, dhya áyi dzilepi dre dhi kògò ngbà 'í áyi pá dzi kòdhya. Dì akódhì nì rúbhá wäyi dhi nì adré ndò àko. Àmì, áma lebèbhá nì i, àmì kemve kpírikpíri. Dì, àmì tití ko. »

¹¹Tà tá kònìni, dré tá nile àdhi adré tá 'ole áyi lefè kàribhá i drígá nì ya dhi be dhi sè. Ásà dhi, tà tá dhi: «Àmì tití nì i kemve ko. »

¹²Dì Yésu kòdzì àyi kì pá i akílé tití dre dhi, dré gòzo áyi kítá asó, gòzo lirilé mísá làga. Dré tâzoá àyi dré dhi: «Mì nì tsì tà má dré 'ole àmì dré kòdhì nì àndu be?

¹³Mì adré àmikya áma zi tà tadhálépi ró, ìndì Mírì ro. Mì adré tà nda nì ta kyá, tàko ko, ma kònìni báti.

¹⁴Dì ngóró ma, àmì kì Mírì ro ìndì àmì kì tadhálépi ró nì, má dré àmì kì pá dzile dhi tíni dhi, lè mì kàdré kókpà àmì ki adrúpi kì pá dzi àmì kòfalésè.

¹⁵Tàko ko, má 'o tà kòdhì àmì dré nôle, mì kàdréró kókpà 'òá ngóró má dré 'ole àmì dré dhi tíni.

¹⁶Má adré tà báti ta àmì dré: Dhya adrélépi màrabà ro dhi lavú áyi míri ko. Dhya mûle dhi lavú kpà dhya áyi mûlepi dhi ko.

¹⁷Nyànomvá dhi, mì nì tà nda kòdhì i be. Di mì kàdré tà nda kí 'o dhi, Gìká nì tà taní bha àmì dri.

¹⁸Má adré àmì wäyi dhi kí tà ta kòdhya ko. Má nì mána dhya má dré kipèle dhi i dôro. Di, adré lèá dhi, tà tisile Gìká nì Kúlí na kònìdhì kò'o ru: «Dhya mà dré áma mápà nyàzo túmání ába dhi alá ína i má rú nì. » ¹⁹Má adré tà kòdhì nì ta àmì dré drìdrì tà nda nì atsama kandrá, tà nda kònì dra ru 'o dhi, mì kòka'iró dhi, ma Dhya adrélépi be dhi 'i.

²⁰Má adré tà báti ta àmì dré: Dhya ángùdhi adrélépi móndí má dré mûle dhi nì ka'i dôle dôro dhi, adré áma tändi nì ka'i kòdhya. Dhya ángùdhi adrélépi áma ka'i dôle dôro dhi, adré dhya áma amùlepi dhi nì ka'i kòdhya. »

Yésu longó dhi, Yùdásì` ni áyi lefè kàribhá i dri` gá

(À kònò kpà Màtayò 26:20-25; Márokò 14:17-21; Lükà 22:21-23)

²¹Yésu kòtà tà nda i dre dhi, akódhì nì togó dré lanzìzo tò gò, dré tázooá ngádra 'á dhi: «Má adré tà báti ta àmì dré: Àmì kí àlo nì áma lefè kàribhá i drígá. »

²²Di akódhì nì lebèbhá i dré adrészó ru no, adrélé lizíá àyi kòfalésè ngalè adré tá àdhi nì tà ta ya dhi.

²³Akódhì nì lebèbhá nda kí àlo dré lèle tò dhi, lirí tá adrélé akódhì làga.

²⁴Di Símónà Pétéró dré akódhì nda nì agózó drígá sè, kòlizíró Yésu nízoá ngalè adré tá àdhi nì tà ta ya dhi.

²⁵Di akódhì nda dré áyi bhèzo Yésu agá lizíá tíá dhi: «Míri, dhya nda àdhi 'i? »

²⁶Yésu logó drá dhi: «Akódhì nda dhya má dré dra mápà kìgá kònìdhì nì sòzo súpù na fèzoá drá dhi 'i. » Di kòso mápà kìgá nda súpù na dre dhi, dré fèzoá Yùdásì ìsìkàriyótà, Símónà nì mvá dré.

²⁷Yùdásì kòdo mápà kìgá nda dre dhi, Sàtánà dré ndiri fízo akódhì léna. Di Yésu dré tázooá drá dhi: «Tà mí dré adrélé 'ole kòdhì, mí kò'o mbèlè. »

²⁸Di, dhya àlo àyi adrébhá tá mísá làgásè nda i kòfalé dhi nì ngalè Yésu tà tá tà nda drá àdho tà sè ya dhi ko.

²⁹Yùdásì dré tá adrélé làfa likí nì dhi sè dhi, àyi kí àruka i adré tá kisùá dhi, kònò Yésu adré tá tàá drá dhi, kòlì ngá gi àyi dré gwányá nì tà sè yà, kó ngalè, kòlì ngá fe lemerèbhá i dré yà dhi.

³⁰Di Yùdásì kòdo mápà kìgá nda dre dhi, dré ngàzo pfole kivì na. Lókyá nda tá ngátsi 'i.

Yésu fè tòli` ti` dhi` ro dhi

³¹Dì Yùdásì kòpfò dre dhi, Yésu dré tàzoá dhi: «Nyànomvá dhi, Gìká ni Móndí ni Mvá ni mì bha lanzile. A ni kpà áyi mìlanzìlanzì tadhá akódhi nda rú.

³²Dì Gìká kàdré áyi mìlanzìlanzì tadhá akódhi rú dhi, a ni kókpà áyi Mvá nda ni mì bha lanzile áyi tändi léna. Bàti, a ni akódhi ni mì bha lanzile nyànomvá.

³³Áma ànzì i, ma dhu rè àmì íbe ngbà 'í lókyá tsà sè. Mì ni áma nda. Dì, ngóró má dré tá tâle Yúdà ànzì i dré dhi tíni dhi, má adré kpà tâá nyànomvá àmì dré dhi: Mì kitswá lîle àrà má dré adrészó lîle lána dhi na bwà ko.

³⁴Má adré tolí tídhí ro kònìdhi ni fe àmì dré kòdhya: Mì kàdré ru le àmì kòfalésè. Ngóró má dré àmì kí lèle tò dhi tíni dhi, àmì, mì kàdré kókpà ru le àmì kòfalésè tò.

³⁵Mì kàdré ru le àmì kòfalésè kònìnì dhi, móndyá wáyi dhi kí nìá tâle dhi, àmì áma lebèbhá 'í bàti dhi be. »

Yésu longó dhi, Pétéró ni áyi ga

(À kònò kpà Mátayò 26:31-35; Márokò 14:27-31; Lükà 22:31-34)

³⁶Gò Sìmónà Pétéró dré tâzoá drá dhi: «Míri, mí adré lîle ángolé? » Dì Yésu logó drá dhi: «Àrà má dré adrészó lîle lána dhi, mí kitswá áma lebè lîzo lána nyànomvá bwà ko. Dì, mí ni go mína áma lebè lîzo lána ndò. »

³⁷Pétéró tà drá dhi: «Míri, má kitswá ámi lebè nyànomvá bwà ko àdho tà sè? Ma gànzi ró áma lídrì fe dràzo mí dré! »

³⁸Dì Yésu logó drá dhi: «Mí ni tsì ámi lídrì fe dràzo má dré bàti? Má adré tà bàti ta mí dré: Drìdrì àgólòwa dré dra tsírà bhèzo dhi kandrá dhi, mí ni áma ga vésè be na. »

Yòwánì 14

Yésu tindrì ` áyi lebèbhá kí togó

¹Yésu gò tâá àyì dré dhi: «Mì kòtayí àmì kí togó adrélé lanzile ko. Mì kàdré Gìká ni ka'ì, adrészó kpà áma ka'ì.

²Áma Atá ni dzó na dhi, àrà adrészó lána dhi i be bì. Má adré lîle kònàle kitswálé àrà ledé àmì dré. Kàdré tá kònìnì ko dhi, kònò má kitswá tâá àmì dré ko.

³Dì má kòlì àrà ledé àmì dré dre dhi, má ni agò àmì kí do lîzo àmì íbe má bhàna, mì kàdréró túmání má be àrà má dré adrészó lána dhi na.

⁴Mì ni láti lîzo àrà má dré adrészó lîle lána dhi na dhi be. »

Yésu láti li ` zo áyi Atá véna dhi 'i

⁵Tòmá tà drá dhi: «Míri, mà ni ngalè mí adré lîle ángolé ya dhi ko. Mà ni kitswá láti nda ni ni ngíni? »

⁶Dì Yésu logó drá dhi: «Ma láti 'i, tà bàti 'i, ìndì lídrì 'i. Dhya àlo kitswá lîle áma Atá véna ko, kàdré lîle má 'ásè ko dhi.

⁷Mì kònì ma be dhi, mí ni kókpà áma Atá ni ni be. Kìdhólé nyànomvá dhi, mí ni akódhi be. Mì nò kókpà akódhi dre. »

⁸Filípò tà drá dhì: «Míri, mí tadhá àma dré Gìká Atá wà! Kòdhì ni kitswá àma dré. »

⁹Dì Yésu logó drá dhì: «Filípò, ma àmi íbe kínó lésè gò, mí dré rè áma nìzo ko? Dhya ángùdhi áma nòlepi dhì nò áma Atá dre. Mí adré di mína tàá dhì <Mí tadhá àma dré Gìká Atá wà! > dhì ngíni?

¹⁰Mí adré tsì ka'íá dhì, ma áma Atá léna, ìndì áma Atá má léna dhì ko? Kúlí má dré adrélé tâle àmi dré kònì i, má adré tâá áma drì sè ko. Be ró dhì, áma Atá adrélépi adrélé má léna dhì adré áyì àzí 'o nì.

¹¹Lè mì kàdré tà má dré adrélé tâle kònì kì ka'í: Ma áma Atá léna, ìndì áma Atá má léna. Mì kàdré tà nda ni ka'í áma kúlí sè ko dhì, mì kàdré di ka'íá tâ líndrígá ró má dré adrélé 'ole dhì kì tâ sè.

¹²Má adré tà bâti ta àmi dré: Dhya ángùdhi adrélépi áma ka'í dhì ni kpà ína tâ má dré adrélé 'ole dhì kì 'o. A ni ndìndì tâ kàdrì dra tâ nda kì lavúbhá dhì kì 'o, má dré adrélé lîle áma Atá véna dhì sè.

¹³Má ni tâ ángùdhi mì dré dra zile áma rú sè dhì ni 'o, áma Atá kòkisúró mìlanzìlanzì áyì Mváagó sè be dhì bvó.

¹⁴Bâti, tâ ángùdhi mì dré dra zile má tí áma rú sè dhì, má ni 'òá. »

Yésu lazí dhì, áyì Atá ni Tirí Lólo amù

¹⁵Yésu gò tâá dhì: «Mì kàdré áma le dhì, mì ni kókpà áma tòlì kì ka'í 'ole.

¹⁶Má ni tâ zi áma Atá tí, kòféró dhya àzya dra àmi kì drì tâlepi dhì, kàdréró túmâni àmi íbe kóná vésè kólyá.

¹⁷Akódhì nda, Tirí Lólo adrélépi tà bâti Gìká àdhya ni tadhá dhì 'i. Móndyá bvò kòndì àdhya ì kitswá akódhì ni kisú bwà ko, ì dré akódhì ni nòle ko dhì se, ìndì ì dré akódhì ni nile ko dhì sè. Dì, àmi ró dhì, mì ni àmikya akódhì be, dré adrélé àmi íbe dhì sè, ìndì dré dra adrélé àmi léna dhì sè.

¹⁸Má kitswá àmi kì tayí adrélé kìmvoànzì i ró ko. Má ni dra agò àmi vélé.

¹⁹Tayí ngbà 'í lókyá tsà, móndyá bvò kòndì àdhya ì dré gòzo vélé áma no ko. Dì, àmi ró dhì, mì ni àmikya áma no. Má dré adrélé lídrì íbe dhì sè dhì, mì ni kókpà adré lídrì íbe.

²⁰Kítú nda kònàdhì tú dhì, mì ni niá tâle dhì, ma áma Atá léna, àmi má léna, ìndì ma àmi léna dhì be.

²¹Dhya ángùdhi adrélépi áma tòlì íbe gò, adrészó ka'íá 'ole dhì, akódhì nda adré áma le nì. Áma Atá ni dhya adrélépi áma le nda ni le. Dì má ni kókpà akódhì ni le, adrészó áma tadhá drá. »

²²Yùdásì, ìsikàriyótà ro ko dhì, lizí tíá dhì: «Míri, mí ni ngbà 'í ámi tadhá àma dré gò, ámi tadházó móndyá bvò àdhya ì dré ko àdho tâ sè? »

²³Dì Yésu logó drá dhi: «Dhya ángùdhi adrélépi áma le dhi ni tà má dré adrélé tadhálé dhi kí ka'i 'ole. Áma Atá ni akódhi nda ni le. Dì mà ni li àma kí bhà mo akódhi véna, adrészó túmání akódhi be.

²⁴Dì, dhya adrélépi áma le ko dhi kitswá ína tà má dré adrélé tadhálé dhi kí ka'i 'ole ko. Kúlí mì dré adrélé yile kòdhí i, kúlí mána 'i ko. Be ró dhi, kúlí nda i angá áma Atá áma amùlepi dhi vélésè.

²⁵Má tà tà kòdhí i àmí dré, má dré rè dhu adrérà'a àmí íbe dhi 'á.

²⁶Dì, áma Atá ni Dhya dra àmí kí drì tâlepi dhi ni amù áma rú sè. Akódhi nda, Tírí Lólo 'i. Kàtsá dre dhi, a ni tà tití dhi kí tadhá àmí dré gò, adrészó tà tití má dré tâle àmí dré dhi kí 'o agálé àmí léna dhi nì.

²⁷Má adré tà kídríkídrí tayí àmí dré. Má adré áma tà kídríkídrí fe àmí dré kòdhya. Má adré fèá ngóró bvò kònídhi dré adrélé fèle dhi tíni ko. Dì mì kòtayí àmí kí togó adrélé lanzaile ko. Mì kàdré kpà ngá ro àlomvá ko.

²⁸Mì yi tá ma târà'a àmí dré dhi: «Má adré lìle, ìndì má ni dra agò àmí vélé. » Mì kàdré tá áma le bàti dhi, kònò mì ni tá lenzé má dré adrélé lìle áma Atá véna dhi sè. Tàko ko, áma Atá nda kàdrì áma lavú.

²⁹Má tà tà kòdhí i àmí dré drìdrì tà nda kí atsama kandrá, kítswálé tà nda i kònì dra ru 'o dhi, mì kòka'iró be dhi bvó.

³⁰Má kitswá góle tà ta àmí íbe vwàvwà ro ko. Àngyá ko, ópí bvò kònídì àdhya adré alìle. Akódhi nda rinyí àko má drìle.

³¹Dì, adré lèá dhi, móndyá bvò kònídì àdhya i kònì tâle dhi, má adré áma Atá ni le, ìndì má adré tà tití dré tâle má kò'o dhi kí 'o káyà dhi. Mì nga, mà kòlìrò kònwasè! »

Yòwánì 15

Vínò fa i kólá ni i' be dhi

¹Àmvolásà dhi, Yésu dré gózo tâá dhi: «Ma víñò fa bàti dhi 'i. Áma Atá, víñò fa nda ni likílépi 'i.

²Adré kólá ángùdhi má rú adrélépi lò'wa 'a ko dhi ni ga sèle. Dì, kàdré ína kólá adrélépi lò'wa 'a dhi ni tà sè dhi, adré kólá nzí rúá dhi kí si, kólá nda kògoró vélé adrélé lò'wa 'a wáláká ni ni lavú.

³Àmí ró dhi, mì atsá kemve kpírikpíri, kúlí má dré tâle àmí dré dhi i sè dre.

⁴Lè mì kàdré adrélé má léna, ngóró má dré adrélé àmí léna dhi tíni. Vínò fa ni kólá àlo dhi kitswá ína lò'wa 'a áyi tândi sè bwà ko, kàdré adrélé víñò fa rú ko dhi. Kókpà kòdhí tíni, mì kitswá àmíkyá lò'wa 'a bwà ko, mì kàdré adrélé má léna ko dhi.

⁵Ma víñò fa 'i, ìndì àmí kólá ni 'i. Dhya ángùdhi adrélépi adrélé má léna gò má dré adrészó lána dhi, akódhi nda ni lò'wa 'a bì. Tàko ko, mì kàdré má rúsè lárá ro dhi, mì kitswá àmíkyá tà àlo 'o bwà ko.

⁶Dhya àlo kàdré adrélé má léna ko dhi, à ni akódhì nda ni bhe gàrà dri ngóró adrélé kólá bhe dhi tñi gò, dré adrészó 'yole. À adré kólá lású be kònìnì nda kí lomvó dàle àtsí na gò, ì dré adrészó vèle.

⁷Di, mì kàdré àmikya adrélé má léna gò, áma kúlì ì dré adrészó àmì léna dhi, mì ni kitswá tà ángùdhi mì dré adrélé lèlé dhi ni zi gò, mì dré tà nda ni kisúzó.

⁸Mì kàdré lò'wa 'a bì dhi, kòdhì mì adré tadhá dhi, àmì áma lebèbhá 'ì báti gò, mì dré adrészó áma Atá ni rú bha kùle ásà.

⁹Ngóró áma Atá dré adrélé áma le dhi tñi dhi, má adré kókpà àmì kí le. Lè mì kàdré dì adrélé áma lèlé nda na.

¹⁰Mì kàdré áma tòlì kí ka'i 'ole dhi, mì ni adré áma lèlé na, ngóró má dré adrélé áma Atá ni tòlì kí ka'i 'ole, adrészó kpà akódhì ni lèlé na dhi tñi.

¹¹Má tà tà kòdhì i àmì dré, mì kàdréró áma kólénzé i be àmì léna, ìndì àmì kí kólénzé kògaró kitswálé tití.

¹²Tòlì má dré adrélé fèlé àmì dré dhi, tòlì kònìdhì 'ì: Lè mì kàdré ru le àmì kòfalésè, ngóró má dré adrélé àmì kí le dhi tñi.

¹³Lèlé kàdrì lèlé àruka tití dhi kí lavúlépi dhi, kònìdhì 'ì: À kòfè dhyá kí lídrì dhyá kí arúpi kí tà sè.

¹⁴Àmì áma arúpi 'ì, mì kàdré tòlì má dré adrélé fèlé dhi kí 'o dhi.

¹⁵Má adré gòlé vélè àmì kí zi mårábà i ró ko. Àngyá ko, dhya adrélépi mårábà ro dhi nì ína tà áyì mírì dré adrélé 'ole dhi i ko. Di, má adré mána àmì kí zi arúpi i ró, má dré tà tití má dré yile áma Atá vélésè dhi kí tadhálé àmì dré dhi sè.

¹⁶Mì kipè tá ma àmì ko. Be ró dhi, má kipè àmì ma, àmì kí bhàzo adrélé lìlé lò'wa 'abe, àmì kí lò'wa nda i kàdréró nyo. Di ásà dhi, áma Atá ni tà ángùdhi mì dré dra zile i tí áma rú sè dhi ni fe àmì dré.

¹⁷Tòlì mána, tòlì kònìdhì 'ì: Mì kàdré ru le àmì kòfalésè. »

Móndyá bvò àdhya i` bhà togó kònzi Yésu i rú, lebèbhá ni i` be

¹⁸«Móndyá bvò àdhya i kàdré togó kònzi bha àmì rú dhi, mì kòtivì ko tâle dhi, àyì nda i bhà tá zyà togó kònzi má rú 'íká.

¹⁹Mì kàdré tá bvò kòndì àdhya ró dhi, kònò móndyá bvò kòndì àdhya kí tá adré àmì kí le móndì àyikya i ró. Di, má kipè mána àmì apfòle bvò kòndì lésè gò, mì dré adrészó vélè bvò kòndì àdhya ró ko. Ásà dhi, móndyá bvò kòndì àdhya i adré togó kònzi bha àmì rú.

²⁰Lè mì kàdré kúlì má dré tá tâle àmì dré kònìdhì ni kisù: <Dhya adrélépi mårábà ro dhi lavú áyì mírì ko. > Móndì i kòpfo áma mì 'í dhi, i ni kókpà àmì kí mì pfo. I kòka'i áma kúlì 'ole 'í dhi, i ni kókpà àmì kí kúlì ka'i 'ole.

²¹I ni tà nda kòdhì kí 'o àmì rú áma tà sè, i dré dhya áma amùlepi dhi ni nile ko dhi sè.

²²Kònò má kàlì tá tà ta àyì dré ko dhi, à kìtswá tá tà bha àyì dri àyì kì tàkonzì sè ko. Di, nyànomvá dhi, àyì àyikya tà àlo i dré kìtswázó àyì kì tará ga àyì kì tàkonzì sè dhi àko.

²³Dhya ángùdhi adrélépi togó kònzi bha má rú dhi, adré kókpà bhàá áma Atá rú.

²⁴Kònò má kò'o tá tà líndríga ró dhya àzya dré 'ole tàdzí ko dhi i àyì kòfalé ko dhi, à kìtswá tá tà bha àyì dri àyì kì tàkonzì sè ko. Di, nyànomvá dhi, i nò tà líndríga ró nda i 'í gò, i dré àyikya togó kònzi bhàzo má rú, iindì áma Atá rú.

²⁵I 'o kònini kitswálé tà tisile àyì kì tárítrí kúlí na kònìdhì kò'oró ru be dhi bvó: «È bhà togó kònzi má rú tà àndu àko. »

²⁶Má ni Dhya dra àmì kì drì tâlepi dhi ni amù àmì dré áma Atá vélésè. Akódhì nda, Tirí Lólo adrélépi tà bâti tadhá, iindì adrélépi angálé Gìká vélésè dhi 'i. Di kàtsá dre dhi, a ni áma tà longó àmì dré ni.

²⁷Àmì ró dhi, mì ni kókpà áma tà longó móndí i dré. Tako ko, àmì túmání má be kîdhólé áma àzí ni kîdhoma lésè. »

Yòwánì 16

¹«Má tà tà kòdhì i àmì dré, mì kòkìtswáró àmì kì tà ka'ika'i tayí ko.

²Tako ko, à ni àmì kì dro lìsámbò dzó i lésè. Lókyá adré ndìndì alìle, móndyá dra àmì kì tupfúbhá todràle dhi kì kisùá dhi, i dré àyikya tà 'o Gìká dré.

³I ni 'òá kònini, i dré Gìká Atá ni nile ko dhi sè, iindì i dré áma nile ko dhi sè.

⁴Má tà tà kòdhì i àmì dré, kitswálé lókyá i dré dra tà nda kì 'òzo dhi kònì atsá dhi, tà má dré tâle àmì dré nda i kàgáró àmì léna be dhi bvó. »

Tiri' Lólo ni àzí

«Má tà tá tà nda i àmì dré drìdrì ko, má dré tá dhu rè adrélé àmì i be dhi sè.

⁵Nyànomvá dhi, má adré lìle dhya áma amùlepi dhi véna. Di, dhya àlo àmì kòfalé dhi adré lizíá má tí ngalè má adré lìle ángolé ya dhi ko.

⁶Be ró dhi, kizà adré ína gâle àmì kì togó na, tà má dré tâle àmì dré nda i sè.

⁷Di, má adré mána tà bâti tà àmì dré: Doro ni àmì dré dhi, má dré lìle dhi. Àngyá ko, má kòlì ko dhi, Dhya dra àmì kì drì tâlepi dhi kìtswá alìle àmì vélé ko. Di, má kòlì dhi, má ni mána akódhì nda ni amù àmì vélé.

⁸Akódhì kàtsá dre dhi, a ni móndyá bvò kòndì àdhya kì tàkonzì tadhá àyì dré, adrészó Gìká ni tà gyágya tadhá àyì dré, adrészó kpà tâbvó Gìká dré dra tâle dhi ni tadhá àyì dré.

⁹A ni àyì kì tàkonzì tadhá, i dré adrélé áma ka'i ko dhi sè.

¹⁰A ni Gìká ni tà gyágya tadhá, má dré adrélé lìle áma Atá véna gò, mì dré gòzo vélé áma no ko dhi sè.

¹¹A ní tābvó Giká dré dra tāle dhí ni tadhá, Giká dré ópí bvò kondi àdhya ni tābvó tāle dre dhí sè.

¹²Ma dhu rē tā ibe bī tāle àmi dré. Di, nyànomvá dhí, mì kitswá rē tā nda kī mvo bwà ko.

¹³Di, Tirí tā bāti àdhya nda kātsá dre dhí, a ní àmi kī tidri tā bāti wāyi dhí léná. Àngyá ko, kitswá ína tā ta áyi drì sè ko. Be rō dhí, a ní ngbà 'í tā i dré dra yile dhí kī ta àmi dré kòdhya. A ní kókpà tā dra atsábhá dhí kī longó àmi dré.

¹⁴A ní mìlanzilanzì fe má dré. Tako ko, a ní tā i dré dra kisúlé má vélé dhí kī do longolé àmi dré.

¹⁵Tā tití áma Atá àdhya i kókpà mána 'i. Di ásà dhí, má tā tá dhí, Tirí nda ní tā i dré dra kisúlé má vélé dhí kī do longolé àmi dré. »

Yésu ni lebèbhá kī kizà ni ru ladzá atsálé kólénzé ro

¹⁶Yésu gò tāá dhí: «Tayí lókyá tsà, mì dré gòzo vélé áma no ko. Àmvolásà dhí, gí ko, mì dré gòzo áma no. »

¹⁷Di akódhi ni lebèbhá kī àruka i dré lizízóá àyi kòfalésè dhí: «Adré lèá tāle ngíni? Tā tā dhí: <Tayí lókyá tsà, mì dré gòzo vélé áma no ko. Àmvolásà dhí, gí ko, mì dré gòzo áma no. > Tā tā kpà dhí: <Má adré lìle áma Atá véna. >¹⁸Adré lèá tāle ngíni, dré adrérà'a tāá dhí <lókyá tsà> dhí 'á dhí? Mà ní ngalè adré àdho tā ta ya dhí ko. »

¹⁹Yésu dré nìzoá tāle dhí, i adré tā tā le lizílē i tí tā nda dri dhí be gò, dré tāzoá àyi dré dhí: «Mì adré lizíá àmi kòfalésè ngalè tā má dré tāle nda i adré lèá tāle ngíni ya dhí? Má tā tā dhí: <Tayí lókyá tsà, mì dré gòzo vélé áma no ko. Àmvolásà dhí, gí ko, mì dré gòzo áma no. >²⁰Má adré tā bāti ta àmi dré: Mì ní àmikya àwó ngo adrészó tongolé. Di, móndyá bvò kondi àdhya kī àyikya lenzé. Àmi kī togó ní kizà nya. Di, kizà nda ní ína ru ladzá atsálé kólénzé ro.

²¹Tòkó adrélépi 'ole tīle dhí adré kizà nya, akódhi ni lókyá tīzo dhí dré atsálé ànyi dre dhí sè. Di, kòti dre dhí, adré gòle vélé áyi kizà nda ní tā kisù ko. Àngyá ko, adré lenzélé dré mvá tīle apfòle bvò dri dre dhí sè.

²²Tā nda kòdhí kókpà kònini àmi kī tā sè. Nyànomvá dhí, àmi kī togó adré gàle kizà sè. Di, má ní go àmi kī no gò, àmi kī togó dré gòzo adrélé lenzélé. Di dhya àlo kitswá kólénzé nda ní tingá àmi kī togó lésè bwà ko.

²³Kidholé lókyá nda kònàdhí sè dhí, mì kitswá gòle vélé tā àlo lizí má tī ko. Má adré tā bāti ta àmi dré: Áma Atá ní tā ángudhi mì dré dra zile i tā áma rú sè dhí ní fe àmi dré.

²⁴Atsálé nyànomvá kònàdhí dhí, mì zi rē tā àlo áma rú sè dhí ko. Lè mì kàdré tā zi áma rú sè gò, mì kòkisúró tā nda, àmi kī kólénzé kògaró kitswálé tití be dhí bvó. »

Yésu lavú bvò kònì` dhí

²⁵«Má tà tà kòdhì i àmì dré kúlí alaala sè. Di, lókyá adrélépi alìle dhì sè dhì, má kitswá gòlé vélé tà ta àmì dré kònìnì ko. Be ró dhì, má ni mána áma Atá ni tà ta àmì dré ngádra 'á.

²⁶Lókyá nda sè dhì, mì ni adré tà zi áma Atá tí áma rú sè. Má adré tàá ko tâle dhì, má ni tà nda kì zi áma Atá tí àmì dré ma dhì.

²⁷Tàko ko, áma Atá ni tândì adré àmì kì le, mì dré adrélé áma le dhì sè, ìndì mì dré ka'ile dhì má angá akódhì vélésè dhì sè.

²⁸Bàti, má angá áma Atá vélésè alìle bvò kònìdhì lé. Di nyànomvá dhì, má adré bvò kònìdhì ni tayí, gózo áma Atá véna. »

²⁹Di akódhì ni lebèbhá i tà drá dhì: «Nyànomvá dhì, mí adré vélé tà ta ngádra 'á, kúlí alaala sè ko.

³⁰Nyànomvá dhì, mà ni tâle dhì, mí ni tà tití dhì i be. Lè kpà à kògò tà àlo lizí mí tí dhì ko. Di ásà dhì, mà ka'i tâle dhì, mí angá Gìká vélésè káyà dhì. »

³¹Di Yésu logó àyi dré dhì: «Mì adré tsì áma ka'i nyànomvá?

³²Mì yi rè ká! Lókyá adré alìle, atsá kpà dre, à ni àmì kì lapé ràle àmì àlo àlo tití dhì kì dzó i 'ásè. Mì ni áma tayí adrélé kalóma. Di, má kitswá mána adrélé kalóma ko, áma Atá dré adrélé túmání má be dhì sè.

³³Má tà tà kòdhì i àmì dré, mì kàdréró adrélé tà kìdríkìdrì íbe, mì dré adrélé má léna dhì sè. Bvò kònìdhì lé dhì, mì ni adré kízà nya tò. Di, mì kàdré àmikya togó tsì! Má lavú mána bvò nda dre! »

Yòwánì 17

Yésu zi tà áyi Atá tí áyi tândì dré

¹Yésu kòtà tà nda i dre dhì, dré mì tingázó kurú na bhù na, tâzoá dhì: «Tátá, lókyá kitswá dre. Mí bhà ámì Mváagó ni mì lanzìle wà, ámì Mváagó kòbhàró kókpà ámì mì lanzìle be dhì bvó.

²Tàko ko, mí afè rinyí akódhì dré adrészó móndyá wäyi i drìle, kòfèrò lídrì kóná vésè kólyá dhì móndyá wäyi mí dré afèle i dré dhì i dré.

³Lídrì kóná vésè kólyá nda, tà kònì 'i: adrélé mí, Gìká bàti àlo kwákwá dhì ni ni dhì, ìndì adrélé Yésu Krísto mí dré amùle dhì ni ni dhì.

⁴Má tadhá ámì mìlanzìlanzì móndyá bvò dri dhì i dré nòle dre. Àngyá ko, má 'o àzí mí dré afèle má dré 'ole dhì akílé dre.

⁵Di nyànomvá dhì, Tátá, mí bhà áma mì lanzìle mí làga, mìlanzìlanzì má dré tá adrészó ába mí làga drìdrì bvò ni bhàma kandrá dhì sè wà. »

Yésu zi tà áyi Atá tí áyi lebèbhá i dré

⁶«Má tadhá mí móndyá mí dré adólé bvò kònì lésè afèle má dré dhì i dré dre. Àyi nda i tá mína 'i. Di mí afè tá àyi má dré gò, i dré ámì kúlí ka'izo 'ole.

⁷Nyànomvá dhi, ì nì tâle dhi, tà títí mí dré afèle má dré dhi ì angá mí vélésè dhi be.

⁸Tako ko, má fè àyi dré kúlí mí dré afèle má dré dhi i gò, ì dré kúlí nda kí ka'izo. Di ì nì bâti tâle dhi, má apfò mí vélésè dhi. Ì ka'i kpà tâle dhi, mí amù ma mi.

⁹Má adré tà zi mí tí àyi nda i dré. Má adré tà zi móndyá bvò àdhya i dré ko. Be ró dhi, má adré mána tà zi àyi mí dré afèle má dré nda i dré. Àngyá ko, àyi mína 'i.

¹⁰Ngá wáyi mána i kókpà mína 'i. Ngá wáyi mína i kókpà mána 'i. Di má kisú milanzilanzì àyi nda i sè dre.

¹¹Nyànomvá dhi, má adré mána lile mí véna. Má gò vélé adrélé bvò kònìdhi lé ko. Di, àyi nda i dhu rè àyikya bvò kònìdhi lé. Áma Atá lolo ni, mí kàdré àyi kí likí ámi rú mí dré afèle má dré dhi ni rinyí sè, ì kàdréró ngá àlo ró, ngóró mà dré adrélé mí be ngá àlo ró dhi tíni.

¹²Má dré tá adrérà'a àyi íbe dhi 'á dhi, má adré tá àyi kí likí ámi rú mí dré afèle má dré nda ni rinyí sè. Má su tá àyi rú gò, àyi kí àlo dré avìzo ko, kàdré ngbà 'í mvá adrélépi tá lile dràdrà kisú dhi 'i ko dhi. Tà nda kòdhí atsá kònìni, kítswálé tà tisile ámi Kúlí na dhi ì kò'oró ru be dhi bvó.

¹³Nyànomvá dhi, má adré lile mí véna. Di má adré tà kòdhí kí ta má dré rè dhu adrérà'a bvò kònìdhi lé dhi 'á, ì kàdréró adrélé áma kólénzé íbe, ìndì kólénzé nda kògaró àyi léna kítswálé tití.

¹⁴Má fè àyi dré ámi kúlí gò, móndyá bvò kònìdhi àdhya ì dré togó kònzi bhàzo àyi rú, ì dré adrélé bvò kònìdhi àdhya ró ko dhi sè, ngóró mà dré kpà adrélé bvò kònìdhi àdhya ró ko dhi tíni.

¹⁵Má adré tà zi mí tí, mí kòtingáró àyi bvò kònìdhi 'ásè dhi ko. Be ró dhi, má adré mána tà zi, mí kàdréró àyi kí likí Dhya kònzi ni tà sè.

¹⁶Àyi nda i móndí bvò kònìdhi àdhya 'i ko, ngóró mà dré kpà adrélé móndí bvò kònìdhi àdhya 'i ko dhi tíni.

¹⁷Mí kòbhà àyi twá adrélé móndyá lolo mína i ró tà bâti sè. Ámi kúlí, tà bâti nda 'i.

¹⁸Ngóró mí dré áma amùle bvò kònìdhi lé dhi tíni dhi, má adré kókpà àyi kí mu lile bvò nda 'ásè.

¹⁹Àyi nda kí tà sè dhi, má adré áma tândi ni fe adrélé ámi tà 'o, ì kâtsáró móndyá lolo mína i ró tà bâti sè. »

Yésu zi tà áyi Atá tí móndyá wáyi dra áyi ka'ibhá dhi i dré

²⁰«Má adré ngbà 'í tà zi mí tí àyi nda i dré ko. Má adré kókpà tà zi móndyá dra áma ka'ibhá àyi nda kí kúlí sè dhi i dré.

²¹Tátá, má adré tà zi, àyi tití nda i kàdréró ngá àlo ró, ngóró mí dré adrélé má léna dhi tíni, ìndì má dré adrélé mí léna dhi tíni. Lè i kàdré kókpà àma léna, móndyá bvò kònìdhi àdhya i kòka'iró dhi, mí amù ma mi.

²²Má fè àyi dré mìlanzìlanzì mí dré afèle má dré dhì, ì kàdréró ngá àlo ró, ngóró mà dré adrélé mí be ngá àlo ró dhì tñi:

²³ma àyi léna, ìndì mí má léna. Lè ì kàdré kókpà ngá àlo ró kitswálé tití, móndyá bvò kòndì àdhya ì kòniró tâle dhì, mí amù ma mi, ìndì mí adré àyi kí le ngóró mí dré adrélé áma le dhì tñi.

²⁴Tátá, má adré lèá dhì, móndyá mí dré afèle má dré nda ì kàdré túmání má be àrà má dré adrészó lána dhì na, ì kàdréró áma mìlanzìlanzì no be dhì bvó. Mí afè má dré mìlanzìlanzì nda, mí dré tá áma lèle drìdrì bvò ni bhàma kandrá dhì sè.

²⁵Áma Atá gyägya ní, tágba móndyá bvò kòndì àdhya ì dré ámi nìzo ko dhì, má nì mána mi be. Móndyá áma ka'ibhá nda ì nì kpà tâle dhì, mí amù ma mi dhì be.

²⁶Má 'o mi àyi nda ì dré nile. Má nì kpà go adrélé ámi 'o ì dré nile, kitswálé lèle mí dré adrészó áma le ásà dhì kàdréró àyi léna, ìndì áma tändì má kàdréró àyi léna. »

Yòwánì 18

Yésu ní rùma

(À kònò kpà Mâtayò 26:47-56; Márokò 14:43-50; Lükà 22:47-53)

¹Yésu kòtà tà nda ì dre dhì, ì dré ngàzo lìle lebèbhá ní íbe zyale yábhù rú zìle Kèdrónà dhì nì ta'á na. Gò ì dré fízo amvú àlo òlívè fa kya na.

²Dì Yùdásì adrélépi tá 'ole akódhì ní lefè kàribhá ì drígá dhì nì tá kpà àrà nda be. Àngyá ko, Yésu ì lebèbhá ní íbe dhì ì adré tá ru kímó kònàle rä.

³Dì Yùdásì nda dré Rómà kí sòdá zyandre dhì kí adrìzo í vésè, túmání tépelò likibhá àruka angábhá kòwánà kàdrì ì vélésè ìndì Fàrisáyò ì vélésè dhì íbe, alízo àyi íbe. Àyi nda ì ru tá atsí i, tálà i, ìndì àdzú ngá íbe àyi drígá.

⁴Dì Yésu nì tá tà tití adrébhá 'ole atsálé í rú dhì i be gò, dré áyi kisízó àyi nda i véna, lizíá àyi tí dhì: «Mì adré àdhì ní nda? »

⁵Ì logó drá dhì: «Yésu Nàzàréta lésè dhì. » Dì Yésu tà àyi dré dhì: «Ma 'i. » Yùdásì adrélépi akódhì ní lefè àyi drígá nda totó tá i àyi kòfalé.

⁶Dì Yésu kòtà dhì «Ma 'i» àyi dré dre dhì, ì dré gòzo bvólé ro ledhélé kìní mi.

⁷Gò Yésu dré gòzo tódyá lizíá àyi tí dhì: «Mì adré àdhì ní nda? » Ì tà dhì: «Yésu Nàzàréta lésè dhì. »

⁸Dì Yésu logó dhì: «Má tà tá àmì dré dhì, ma 'i dhì dre. Mì kàdré áma nda kòdhya dhì, mì tayí dì móndyá kònì i lìle. »

⁹Tà nda kòdhì atsá tá kònìni, kitswálé kúlí Yésu dré tá tâle kònìdhì kò'oró ru: «Má tayí dhya mí dré afèle má dré dhì kí àlo avìle ko. »

¹⁰Gò Sìmónà Péteró adrélépi tá sápí íbe dhì, dré ngàzo sápí nda ní asé gò, kòwánà kí kàdrì ní màrabà ní bí dríágó lésè dhì ní bvwàzo kìle. Màrabà nda ní rú tá Màlókò.

¹¹Di, Yésu dré tazoá Pétéró dré dhi: «Mí logó sápí mína àrà ní na. Adré lèá má kòmvu tsì kópò kizà àdhya áma Atá dré afèle má dré mvùle ní ko? »

Yésu pfò Ánà kandrá

¹²Gò Rómà kí sòdá nda i, àyi kí kàdrì, tsale Yúdà ànzì kí tépelò likibhá nda íbe dhi, i dré Yésu ní rùzo adrôle.

¹³I dré zyà akódhi ní drizo lìzo ába Ánà, Kàyáfà ní andrì bhàna. Kàyáfà nda tá kòwánà kí kàdrì 'i kóná nda kònàdhì sè.

¹⁴Akódhi nda tá dhya tâlepi Yúdà ànzì i dré dhi «Dóro ní, dhya àlo dré dràle móndyá wáyi i dré dhi» dhi 'i.

Pétéró gà Yésu rè

(À kònò kpà Mâtayò 26:69-70; Márokò 14:66-68; Lükà 22:55-57)

¹⁵Símónà Pétéró i Yésu ní lebèlepi àzya dhi be dhi, i adré tá lìle Yésu vésè. Kòwánà kí kàdrì ní tá Yésu ní lebèlepi nda be go, à dré akódhi ní tayízó fîle Yésu vésè kòwánà kí kàdrì nda ní bhà'álé na.

¹⁶Di, Pétéró totó tá ína i adrélé kivì na dzóti làga. Di Yésu ní lebèlepi, kòwánà kí kàdrì dré tá nile be nda dré pfozo tà ta mvátòkó adrélépi tá dzóti nda ní likí dhi be gó, dré Pétéró ní 'òzo fîle.

¹⁷Gò mvátòkó adrélépi dzóti likí nda dré lizízóá Pétéró tí dhi: «Mí tsì dhya kòdhì ní lebèbhá kí àlo 'i ko? » Di, Pétéró logó dhi: «Koko, ma 'i ko. »

¹⁸Àrà nda dré tá adrélé kidhì ro dhi sè dhi, marrábà i tépelò likibhá íbe dhi i turú tá àtsí gó, i dré àyi kí totózó làgásà adrélé yòá. Di Pétéró dré kpà áyi totózó adrélé àtsí yo àyi kofalé.

Kòwánà kí kàdrì ` lizí tà Yésu tí

(À kònò kpà Mâtayò 26:59-66; Márokò 14:55-64; Lükà 22:66-71)

¹⁹Dzó nda na dhi, kòwánà kí kàdrì dré Yésu ní lizízó akódhi ní lebèbhá kí tà sè, ìndì tà dré adrélé tadhálé dhi kí tà sè.

²⁰Di Yésu dré logozóá drá dhi: «Má tà tá mána tà ngádra 'á móndyá wáyi dhi i kandrá. Vésè wáyi, má tadhá tá tà lísámbò dzó i 'ásè ìndì tépelò na, àrà Yúdà ànzì wáyi dhi i dré adrészó ru kimó nda i 'ásè. Má tà tá tà àlo dhi lùzu ró ko.

²¹Mí adré di tà lizí má tí àdho tà sè? Lè mí kòlizí tà móndyá áma kúlí yibhá dhi i tí. Àyi nda i ní tà má dré tâle dhi i doro. »

²²Yésu kòtà tà nda dre dhi, tépelò likibhá kí àlo adrélépi tá ànyi làgá dhi dré akódhi ní mí sazo gó, tazoá drá dhi: «Mí adré kúlí logó kòwánà kí kàdrì tí kònìn? »

²³Di Yésu logó drá dhi: «Má kòtà tà kònzi dhi, lè mí kòtadhá tà kònzi nda àma dré. Di, má kòtà tà bâti kòdhya dhi, mí adré di áma si àdho tà sè? »

²⁴Gò Ánà dré Yésu ní mùzo bă akódhi ní adròzo ásà dhi íbe í rú lìle Kàyáfà, kòwánà kí kàdrì véna.

Pétéró gò tódyá Yésu ní ga rè

(À kònò kpà Mätáyò 26:71-75; Márokò 14:69-72; Lükà 22:58-62)

²⁵Dì Símónà Pétéró adré tá ína àtsí yo kivì na. Gò lizízóá tíá dhi: «Mì tsì akódhi ní lebèbhá kì àlo 'i ko? » Dì Pétéró dré tà nda ní gázoré, tázoré dhi: «Kóko, ma 'i ko. »

²⁶Gò kòwánà kì kàdrì ní màrabà àlo, adréléri tá dhya Pétéró dré tá bí bvwàle dhi ní aró ro dhi, dré tázoré dhi: «Má nò tsì mi túmání akódhi be amvú olivè fa kya na ko? »

²⁷Dì Pétéró dré gòzo tódyá tà nda ní ga rè. Gbă lókyá nda sè dhi, àgólòwa dré tsírà bhèzo.

Yésu pfò Pìlátò kandrá

(À kònò kpà Mätáyò 27:1-2, 11-14; Márokò 15:1-5; Lükà 23:1-5)

²⁸Ngá kòwa dre dhi, i dré Yésu ní drizo Kàyáfà bhàlésè, lìzo ába Rómà kì gùvèrènérè ní dzó kàdrì na. Dì, Yúdà ànzì Yésu ní dribhá nda i fí tá àyikya dzó kàdrì nda na ko, i kàtsaró ndí ró ko, i kòkítswáró gwányá Pásikà àdhya ní nya be dhi bvó.

²⁹Gò Pìlátò dré apfòzo àyi vélé, lizíá àyi tí dhi: «Mì adré agó kònìdhi ní asíkì àdho tà sè? »

³⁰I logó drá dhi: «Akódhi kàdré tá drìkònzi líyí 'i ko dhi, kònò mà kítswá tá alìle akódhi ní fe mí drígá dhi ko. »

³¹Pìlátò tà àyi dré dhi: «Àmi ki tändi mì kodo akódhi tàbvó tâle, ngóró àmi kí tátrítrí kúlí dré adrélé lèle dhi tñi. » Dì Yúdà ànzì nda i logó drá dhi: «À adré móndí pfùma drâle dhi ní logá àma dré. »

³²Tà nda kòdhí atsá tá kònìni, kítswálé kúlí Yésu dré tá tâle i ní ngalè dra dràdrà kárá ángùdhí sè ya dhi kò'oró ru be dhi bvó.

³³Dì Pìlátò dré gòzo fîle áyi dzó kàdrì na gò, dré Yésu ní azízó, lizízóá tíá dhi: «Mì, mí ópí Yúdà ànzì kya 'i? »

³⁴Yésu logó dhi: «Tà mí dré lizilé kòdhí angá ámi tändi drìlésè? Kó ngalè, dhya àzya tà áma tà mí dré nì? »

³⁵Dì Pìlátò logó dhi: «Ma dhu Yúdà mvá 'i bàti? Ámi tändi ní súrú i kòwánà kàdrì i be dhi, i afè mí má drígá àyi. Mí 'o àdho tà 'i? »

³⁶Yésu logó dhi: «Áma òpì, òpì bvò kònìdhi àdhya 'i ko. Áma òpì kàdré tá òpì bvò kònìdhi àdhya 'i dhi, kònò áma màrabà i pfu tá làpfú, má dré dhèzo Yúdà ànzì i drígá ko dhi dre. Dì, áma òpì ína òpì kònwa dhi 'i ko. »

³⁷Pìlátò lizí tíá dhi: «Mì dì mína ópí 'i? » Dì Yésu logó dhi: «Mí tà kyá tâle dhi, ma ópí 'i dhi. À ti ma ìndi má alì bvò kònìdhi lé kítswálé tà bàti longó móndí i dré. Dhya ángùdhí adréléri trôle tà bàti rú dhi adré áma kúlí yi. »

³⁸Dì Pìlátò tà drá dhi: «Tà bàti nda àdho 'i? »

À ñò tà Yésu dri kítswálé dràdrà sè

(À kònò kpà Mätáyò 27:15-31; Márokò 15:6-20; Lükà 23:13-25)

Pìlátò kòtà tà nda dre dhì, dré gòzo pfòle kivì na Yúdà ànzì i véna gò, tåá àyi dré dhì: «Má kisú mána tà àlo tà bhàzo akódhì dri dhì ko.

³⁹Dì, gwányá Pásikà àdhya tú dhì, mì adrè àkodrà áma ti lizí, má kòtrìrò àmì dré móndì àlo 'ile bădzó na dhì. Mì adrè dì lèá dhì, má kòtrì àmì dré ópí Yúdà ànzì kya kòdhì? »

⁴⁰Dì i dré ngàzo trèle, yòzoá kúlì 'u'u sè dhi: «Akódhì ko! Mí kàtrì àma dré Bàrábà kòdhya! » Dì Bàrábà nda tá ína móndì kì kodzolépi ligilé àyi kì kàdrì i rú dhì i.

Yòwánì 19

¹Dì Pìlátò dré Yésu nì tayízó drile bhwàle.

²Gò sòdá i dré fanzì kùtsi ró dhì nì pàzo kùla ró asólé akódhì dri gò, kánzò kă asózó rúá.

³Dì i dré adrèzó alile akódhì vélé adrélè tåá dhì: «Mòdo mí dré, ópí Yúdà ànzì kya ni! » Ì adrè tá kpà akódhì nì mì tosá.

⁴Gò Pìlátò dré gòzo tódhyá pfòle kivì na, tåá Yúdà ànzì i dré dhì: «Mì nò rè ká! Má adrè akódhì nì 'o apfòle àmì kandrá, mì kònirò dhì, má kisú mána tà àlo tà bhàzo akódhì dri dhì ko. »

⁵Dì Yésu dré apfòzo kivì le kùlá ledélé kùtsí sè dhi be i dri, ìndì kánzò kă be i rú. Pìlátò dré tazoá àyi dré dhì: «Mì nò rè agó kònìdhì ká! »

⁶Dì kòwánà kàdrì i tépelò likibhá íbe dhì i kònò akódhì dre dhì, i dré ngàzo adrélè tetrélé, adrèzó loyoá dhi: «Mí tidí akódhì fa kipakipa dri! Mí tidí akódhì! » Dì, Pìlátò logó àyi dré dhì: «Àmì kì tändi, mì do akódhì tidilé fa kipakipa dri àmì. Ma ró dhì, má kisú mána tà àlo tà bhàzo akódhì dri dhì ko. »

⁷Yúdà ànzì i logó drá dhi: «Àma, àma tátrítrí kúlì íbe. Dì tátrítrí kúlì nda adrè lèá dhì, akódhì kòdràdrà dré áyi zile Gìká nì Mváagó ro dhì sè. »

⁸Pìlátò kòyi tà nda dre dhì, tirì dré gòzo vélé akódhì nì 'o lavulé.

⁹Dì dré gòzo Yésu nì dri fízo ába áyi dzó kàdrì na gò, lizizóá tíá dhì: «Mí angá ángolésè? » Dì, Yésu logó ína kúlì ko.

¹⁰Pìlátò gò tåá drá dhi: «Mí adrè tsì kòdhì agilé má tí? Mí nì ko tåle dhì, ma rinyí íbe ngalè ámì trìzo yà, kó ngalè ámì 'òzo tidilé fa kipakipa dri yà dhì? »

¹¹Dì Yésu logó drá dhi: «Kònò Gìká kòfè tá rinyí nda mí dré ko dhì, mí kítswá tá tà àlo 'o má rú ko. Ásà dhì, dhya áma lefèlepí mí drígá dhì nì tåkonzì kàdrì mína nì lavú. »

¹²Kìdhólé lókyá nda sè dhì, Pìlátò dré kìdhózó adrélè láti nda Yésu nì trìzo. Dì, Yúdà ànzì i dré kúlì yòzo tazoá dhì: «Mí kòtrì agó kòdhì dhì, mí Kàyìsárà nì arúpi 'i ko. Tako ko, dhya ángùdhì adrélèpi tåá dhì, i ópí 'i dhì, adrè ína ligilé Kàyìsárà rú. »

¹³Dì Pìlátò kòyi kúlí nda dre dhi, dré Yésu ni 'òzo apfòle kívì le. Gò dré lirízó lirírà adrészó móndí ki tábvo ta dhi dri, àrà rú zile Bhà'álé kírà sè dhi na. (Àrà nda ni rú Èbérè ti sè dhi «Gàbátà».)

¹⁴Lókyá nda tá ànyiányi kítú rírí, kítú adrészó tà ledé gwányá Pásikà àdhya dré dhi 'i. Pìlátò dré tázooá Yúdà ànzi i dré dhi: «Mì nò rè àmi ki ópi kònìdhì ká! »

¹⁵Dì i dré gózo adrélér tetrélér, adrészó loyoá dhi: «Akódhì kòdràdrà! Kòdràdrà! Mí tidí akódhì fa kipakipa dri! » Pìlátò lizí àyi tí dhi: «Má kòtidí tsì àmi ki ópi fa kipakipa dri? » Dì kòwánà kàdrì i logó dhi: «Àma ki ópi àzya yókódhó, ngbà 'i Kàyìsára 'i kalóma. »

¹⁶Gò Pìlátò dré Yésu ni fèzo àyi drígá, i kòtidíró akódhì fa kipakipa dri be dhi bvó.

Yésu ni tidima fa kipakipa dri dhi

(À kònò kpà Mátayò 27:32-44; Márokò 15:21-32; Lükà 23:26-43)

Dì i dré Yésu ni drizo lìzo ába.

¹⁷Akódhì dré áyi tändi ni fa kipakipa dòzo lìzo pfole ába tsàle àrà adrélér zile Drifà ro dhi na. (À adré àrà nda ni rú zi Èbérè ti sè dhi «Gòlògótà».)

¹⁸Kònàle dhi, i dré akódhì ni tidízó fa kipakipa nda dri. I dré kpà móndí ri àruka ki tidízó fa àruka i drisè, àlo ni Yésu ni drágó lésè, àzya ni lidzí ni lésè, Yésu ni tändi kítogá 'á.

¹⁹Pìlátò 'o tá wárágà tísile gò, dízoá fa kipakipa nda dri. À tísì tá drìá dhi: «Yésu Nàzàréta lésè dhi, ópi Yúdà ànzi kya. »

²⁰Yúdà ànzi zyandre dhi i dré wárágà nda ni nàzo. Tako ko, àrà Yésu ni tidízó fa dri nda tá ànyi bhàandre làga, ìndì à tísì tá wárágà nda Èbérè ti sè, Lâtínò ti sè, ìndì Gírikì ti sè.

²¹Dì ásà dhi, Yúdà ànzi ki kòwánà kàdrì i dré lìzo tâá Pìlátò dré dhi: «Mí kòtisì <Ópi Yúdà ànzi kya> dhi ko. Be ró dhi, mí kòtisì mína dhi: <Agó kònìdhì tà tá dhi, i ópi Yúdà ànzi kya 'i. >>

²²Dì, Pilátò dré logozóá dhi: «Tà má dré tísile kòdhì, má tísì dre. »

²³Sòdá i kòtidí Yésu fa kipakipa dri dre dhi, i dré akódhì ni kítá ki dòzo lanzílé àyi su dhi i kòfalésè àlo àlo. Dì tayí tá ngbà 'i kítá kàtswa adrélér asólé kítá àzya i zàle dhi kòdhya. À dhi tá kítá nda ngá àlo ró, kìdhólé dri lésè tsàle pá na.

²⁴Dì i dré tázooá àyi kòfalésè dhi: «Mà kòlasí ko. Be ró dhi, mà kòvù dzégé sè, nòzoá ngalé a ni adré àdhi dré ya dhi. » Tà nda kòdhì atsá tá kònìni, kitswálér tâ tísile Gíká ni Kúlí na kònìdhì kò'oró ru: «I lanzí áma kítá i àyi kòfalésè, i vù kítá mána dzégé sè. » Dì tâ kòdhì tâ sòdá nda i dré 'ole dhi 'i.

²⁵Ànyi Yésu ni fa kipakipa nda làga dhi, akódhì ni andre i adré tâ àyi ki totó, túmání andre ni ni amvúpi be, Màriyà Kòlópà ni tòkó be, ìndì Màriyà Mágàdàlénè be.

²⁶Dì Yésu kònò áyi andre túmání áyi lebèlepi í dré lèlè tò dhi be dre dhi, dré tàzoá áyi andre dré dhi: «Tòkó, ámi mvá kònìdhi. »

²⁷Dré kpà tàzoá áyi lebèlepi nda dré dhi: «Ámi andre kònìdhi. » Dì kidhólé lókyá nda sè dhi, Yésu ni lebèlepi nda dré akódhi ni dòzo likilé í bhàna.

Yésu ni dràma

(À kònò kpà Mátayò 27:45-56; Márokò 15:33-41; Lükà 23:44-49)

²⁸Àmvolásà dhi, Yésu kònì, tà tití dhi ì 'o tá ru akílé dhi dre dhi, dré tàzoá dhi: «Yí lovó adré áma 'o. » Tà tá kònìní kítswálé tà tísile Gìká ni Kúlí na dhi kò'oró ru be dhi bvó. ²⁹Lìdrí àlo gàlepi vìnègári sè dhi tá kònàle. Dì sòdá nda ì dré ngá vòdhovódho dhi ni adózó sòle vìnègári nda léna, dròzoá fanzí rú zile ìsopè dhi sílé gò, tingázóá kuru bhàle Yésu tí.

³⁰Dì Yésu kòmvu vìnègári nda dre dhi, dré tàzoá dhi: «Tà tití dhi ì 'o ru akílé dre. » Dré drì abhézó gò, áyi lídrí tayízó lìle.

³¹Kítú nda tá kítú adrészó tà ledé sàbátù kandrá dhi 'i. Dì Yúdà ànzì kí kàdrì ì lè tá àyikya, sàbátù nda dré àbvò nda kí kíle fa kípakipa i dri dhi ko. Tako ko, sàbátù nda tá ína kàdrì, dré dhèle Pásikà tú dhi sè. Ásà dhi, ì dré Pilátò ni ti lizízó, kò'oró dhya tidilé fa i dri nda kí pá toñole, ìndì àyi kí àbvò tirilé fa nda i drilésè.

³²Dì sòdá ì dré lìzo dhya àlo tidilé túmání Yésu be dhi ni pá kí toñò. Gò ì dré kpà dhya àzya tidilé dhi ni pá kí toñòzo.

³³Dì, ì kòtsa Yésu rú dre dhi, ì dré kisúzóá dhi, drà dre. Ì toñò dì pá ni i ko.

³⁴Dì, sòdá nda kí àlo dré ína Yésu ni sòzo gàrànzì 'á dìlì sè gò, gbă kòdhwa, kàrì dré apfòzo yi be.

³⁵Dhya tà nda kòdhì kí nòlepi mì sè dhi adré tà nda kí longó ni. Dì tà dré adrélé longolé nda i, tà báti 'i. Akódhi nda ni tâle dhi, í adré tà báti ta dhi be. Adré tà nda kí longó, mì kòka'iró kpà tà nda i be dhi bvó.

³⁶Tà nda kòdhì atsá kònìní, kítswálé tà tísile Gìká ni Kúlí na kònìdhi kò'oró ru: «À kítswá akódhi ni fà kí àlo ño ko. »

³⁷Tà àzya Kúlí nda na dhi adré kpà tàá dhi: «Ì ni dhya ì dré sòle dhi ni no. »

Yésu ni rúbhá bhàma mógo na dhi

(À kònò kpà Mátayò 27:57-61; Márokò 15:42-47; Lükà 23:50-56)

³⁸Àmvolásà dhi, agó àlo rú be Yòséfà angálépi Árimàtayà lésè dhi dré lìzo Pilátò ni ti lizí, kòféró láti í dré Yésu ni rúbhá dòzo bhàle mógo na. Yòséfà nda tá Yésu ni lebèbhá kí àlo 'i. Dì, adré tá ína akódhi ni lebè lùzu ró, dré tá adrélé Yúdà ànzì kí kàdrì kí ro dhi sè. Dì Pilátò dré tà nda ni ka'izo gò, Yòséfà dré lìzo rúbhá nda ni do.

³⁹Nikòdémò atú lìlepi Yésu véna ngátsi sè dhi dré kpà lìzo Yòséfà be. Akódhi nda do tá dò tâdzí be dóro ledélé mírè sè ìndì àlówè sè dhi ànyiànyi kíló nyadhi-àlo-drì-mudrì. ⁴⁰Dì àyi rìti nda ì dré Yésu ni rúbhá dòzo, lambélé kítá kàtswákàtswa dhi i sè gò, dò nda ni dàzo rúá, ànzyà gá Yúdà ànzì ì dré adrélé 'ole àbvò sìzo dhi tíni.

⁴¹ Amvú àlo dhi tá ànyi àrà Yésu ni tidízó fa kipakipa dri nda làga. Amvú nda na dhi, à ga tá mógo tídhí dhi kírà na. À bhà tá rè móndí lána ko.

⁴² Dì kítú nda dré tá adrélé kítú adrészó tà ledé sàbátù kandrá dhi 'i sè dhi, ìndì mógo nda dré tá adrélé ànyi dhi sè dhi, ì dré Yésu ni rúbhá bhàzo kònàle.

Yòwánì 20

Yésu ni ngàma dràdrà 'ásè dhi

(À kònò kpà Mátayò 28:1-8; Márokò 16:1-8; Lükà 24:1-12)

¹ Drùbhì kínó ngá pfùnìpfùnì, kítú ni àlo pósò àdhyà sè dhi, Màrìyà Mágàdàlénè dré ngàzo lile mógo na. Dré nòzoá dhi, à tingá kírà mógo nda tísè dre.

² Dì dré ràzo Símónà Pétéró ki kisú túmání Yésu ni lebèlepi àzya dré lèle tò dhi be gò, tazoá àyi dré dhi: «À do Míri mógo lésè lìzo ába dre. Mà ni ngalè à bhà akódhí ángolé ya dhi ko! »

³ Dì Pétéró i Yésu ni lebèlepi àzya nda be dhi ì dré ngàzo láti do lìzo mógo na.

⁴ Àyi rìti nda ì adré tá ràle rarà. Dì, Yésu ni lebèlepi àzya nda dré ína ràzo sírí tsàle mógo na drìdrì Pétéró kandrána.

⁵ Dré tandìzo kítá kàtswákàtswa tayílé dhi ki no mógo na. Dì, fí tá ína lána ko.

⁶ Símónà Pétéró adrélépi tá arálé akódhí vésè dhi dré kpà atsázó gò, file ndiri mógo na. Dré kítá kàtswákàtswa tayílé nda ki nòzo,

⁷ kítá tá Yésu ni drì ndràzo ásà dhi be. À pa tá kítá nda bhàle gàrà dri, àrà twá kítá kàtswákàtswa nda kya rúsè dhi na.

⁸ Dì Yésu ni lebèlepi àzya atsálépi tá drìdrì nda dré kpà fízo mógo na. Dré tà nda ni nòzo gò, ka'izoá.

⁹ (Tàko ko, atsálé kònàdhí dhi, tà tisile Gìká ni Kúlí na dhi fí tá dhu rè àyi drìna ko. Dì ì ni tá rè ko tâle dhi, lè tá Yésu kònga dràdrà 'ásè dhi.)

¹⁰ Gò akódhí ni lebèbhá nda ì dré gózo nzile àyi bhàna.

Yésu agá Màrí yà Mágàdàlénè kandrá

(À kònò kpà Mátayò 28:9-10; Márokò 16:9-11)

¹¹ Dì, Màrìyà totó tá ína i adrélé ngòle kívì na mógo nda làga. Dré tá adrérà'a ngòle dhi 'á dhi, dré tandìzo ngá no mógo na gò,

¹² ángéló rì kítá kemve asóbhá àyi rú dhi ki nòzo. Àyi nda ì lirí tá àrà tá Yésu ni rúbhá bhàzo dhi 'á, àlo ni àrà drì ni ni bhàzo dhi lésè, àzya ni àrà pá ni ni bhàzo dhi lésè.

¹³ Dì ì dré lizízóá tíá dhi: «Tòkó, mí adré ngòle àdho tà sè? » Akódhí logó àyi dré dhi: «À do áma Míri dre. Má ni ngalè à bhà akódhí ángolé ya dhi ko. »

¹⁴ Kòtà tà nda dre dhi, dré áyi alázó Yésu ni no adrérà'a áyi totó kònàle. Dì, ni tá ína tâle dhi, Yésu 'i dhi ko.

¹⁵Yésu dré lizízóá tíá dhi: «Tòkó, mí adré ngôle àdho tà sè? Mí adré àdhi ní nda? » Màrìyà adré tá ína kisùá dhi, akódhi nda tá amvú likílépi 'i. Dré dí tázooá drá dhi: «Atálágó, mí kòdo akódhi mí dhi, mí tà má dré mí bhà akódhi ángolé ya dhi, má kòlhró akódhi ní adó. »

¹⁶Yésu tà drá dhi: «Màrìyà! » Dí Màrìyà dré áyi alázó akódhi vélé, tàá drá Èbérè ti sè dhi: «Ràbbuni! » (Rú nda kòdhi adré lèá tâle dhi «Tà tadhálépi».)¹⁷Dí Yésu tà drá dhi: «Mí ru ma ko. Tako ko, má mbà rè áma Atá véna ko. Dí, mí lì mína áma adrúpi i véna tàá áyi dré dhi, má adré mbàle áma Atá adrélépi kpà àmi kí Atá ro dhi véna. Má adré mbàle áma Giká adrélépi kpà àmi kí Giká ro dhi véna. »

¹⁸Dí Màrìyà Màgàdàlénè dré lìzo longóá akódhi ní lebèbhá i dré dhi: «Má nò mána Míri dre! » Gò dré tà akódhi dré tá tâle i dré dhi kí longozó àyi dré.

Yésu agá áyi lebèbhá i kandrá

(À kònò kpà Mátayò 28:16-20; Márökò 16:14-18; Lükà 24:36-49)

¹⁹Kítú ni àlo pósò àdhya nda ní ìndró sè dhi, Yésu ni lebèbhá i kímó tá ru dzó àlo na, dzótí kí atsúzó gágä, i dré tá adrélé Yúdà ànzi kí kàdrì kí ro dhi sè. Dí Yésu dré alìzo áyi totó àyi kí kítogá 'á gò, tàá àyi dré dhi: «Tà kìdríkìdrì kàdré àmi íbe! »

²⁰Kòtà tà nda dre dhi, dré áyi drígá kí tadházó àyi dré áyi gàrànzí be. Dí akódhi ní lebèbhá nda i dré lenzézó tò, i dré àyi kí Míri nda ní nòle dhi sè.

²¹Dí Yésu dré gózo tódhyá tàá àyi dré dhi: «Tà kìdríkìdrì kàdré àmi íbe! Ngóró áma Atá dré áma amùle dhi tñi dhi, má adré kókpà àmi kí mu. »

²²Kòtà tà nda dre dhi, dré la'a vòzo àyi dri gò, tázooá àyi dré dhi: «Mí kòkisú Tírí Lolo wà!

²³Dhya ángùdhi mì dré dra tàkonzì ní ní trizo dhi, Giká ní kókpà akódhi nda ní tàkonzì tri. Dhya ángùdhi mì dré dra tàkonzì ní ní trizo ko dhi, Giká kïtswá kókpà akódhi nda ní tàkonzì tri ko. »

Yésu tadhá i Tòmá dré

²⁴Dí, Tòmá, adrélé kpà rú zile Látí, Yésu ni lebèbhá mudrí-drì-rì dhi kí àlo dhi, tá ína àyi kòfalé yókódhó Yésu dré tá alírà'a.

²⁵Dí Yésu ni lebèbhá àruka nda i dré tázooá drá dhi: «Má nò Míri dre! » Dí, akódhi logó àyi dré dhi: «Má kònò nárì kí fúdrì akódhi ní drígálé 'á, áma drígámbílí sòzo lána gò, áma drígá sòzo akódhi ní gàrànzí na ko dhi, má kïtswá mána ka'íá bwà ko! »

²⁶Dí kítú nzi-drì-na àmvolésè dhi, Yésu ni lebèbhá i dré gózo tódhyá ru kímó dzó nda na. Tòmá tá ína àyi kòfalé be. Tágba à dré tá dzótí nda kí atsúzó dhi, Yésu dré alìzo áyi totó àyi kí kítogá 'á gò, tàá àyi dré dhi: «Tà kìdríkìdrì kàdré àmi íbe! »

²⁷Gò dré tázooá Tòmá dré dhi: «Mí so ámi drígámbílí kònwa. Mí nò áma drígá i. Mí so kpà ámi drígá áma gàrànzí na. Mí kòtayí tà kayima gò, adrészó áma ka'í! »

²⁸Dí Tòmá tà drá dhi: «Áma Míri, áma Giká! »

²⁹Gò Yésu dré tàzoá drá dhi: «Mí adré áma ka'ì, mí dré áma nòle dre dhi sè. Di, kólénzé ína móndyá adrébhá áma ka'ì áma no àko ró dhi i dré! »

Tà búkù kònì `dhi ni tisi` zo dhi

³⁰Yésu 'o tá tà líndríga ró àruka bì dhi i áyi lebèbhá i mi. À tisi tà nda i búkù kònìdhi léna ko.

³¹Di, à tisi tà kòdhì i, mí kòka'iró dhi, Yésu Mèsiyà 'i, ìndì Gìká ni Mváagó 'i gò, àmì ki tà ka'ika'ì nda sè dhi, mí kàdréró lídrì íbe akódhi léna be dhi bvó.

Yòwánì 21

Yésu tadhá i áyi lebèbhá nzi-drì-rì dhi i dré

¹Àmvolásà dhi, Yésu dré gózo tódyá áyi tadhá áyi lebèbhá i dré tápáríandre Tìbèrìyà àdhyá mìle. Tà nda 'o ru kònini:

²Sìmónà Pétéró, Tòmá adrélé kpà rú zile Látí dhi, Nàtànàyélè angálépi Kánà Gàliláyà le dhi lésè dhi, Zèbèdáyò ni ànziàgo i, tsale Yésu ni lebèbhá rì àruka íbe dhi i tá túmání tápáríandre nda mìle.

³Di Sìmónà Pétéró dré tàzoá àyi dré dhi: «Má adré lìle kosyá bhe. » Ì tà drá dhi: «Mà ni kpà li túmání mí be. » Di i dré tombàzo bwátù na gò, lìle kosyá bhe yí ni tálí na. Di, ngátsi nda sè dhi, i kisú tá àyikya ngá àlo ko.

⁴Ngá kòwa dre dhi, Yésu totó tá i adrélé tápáríandre nda mìle. Di, akódhi ni lebèbhá i ni tá àyikya tâle dhi, dhya nda Yésu 'i dhi ko.

⁵Di Yésu dré kúlí yòzo tàzoá àyi dré dhi: «Áma ànzì i, mí ru tsì kosyá 'i? » Ì logó drá dhi: «Kóko. »

⁶Di Yésu tà àyi dré dhi: «Mí kòbhe àmì ki kimbá bwátù ni dríágó lésè gò, mí kòkisúró kosyá. » Ì dré di bhèzoá gò, i dré kíswázó kimbá nda ni asé bwà ko, kosyá dré gâle lána zyandre ró dhi sè.

⁷Di Yésu ni lebèlepi dré lèle tò dhi dré tàzoá Pétéró dré dhi: «Míri 'i! » Sìmónà Pétéró kòyi akódhi târ'a dhi «Míri 'i» dre dhi, dré kítá i dré tá ngìle i rúsè kíswázó kosyá bhe dhi ni adózó asólé i rú gò, áyi bhèzo yí na.

⁸Yésu ni lebèbhá àruka nda i dré kpà gózo bwátù be, adrélé kimbá gâlepi kosyá sè bì nda ni se àmvòràmvò. Àngyá ko, i vwà tá yí mìlésè ko, ngbà 'i ànyiànyì méterè nyadhi-nzi.

⁹Ì kòtsa sile kìnì mi dre dhi, i dré àtsí turúlé dhi ni nòzo, túmání kosyá tobhàle drìá dhi íbe, ìndì mápà be.

¹⁰Di Yésu dré tàzoá àyi dré dhi: «Mí alì kosyá àruka mí dré rùle dhi íbe. »

¹¹Di Sìmónà Pétéró dré mbàzo bwátù na gò, kimbá nda ni asé apfòle kìnì mi. Kimbá nda ga tá kosyá kàdríkàdrí kámá-àlo-drì-nyadhi-ri-drì-mudrì-drì-na dhi i sè. Di, tágba kosyá nda i dré tá adrészó zyandre ró dhi, kimbá nda tìkí tá ko.

¹²Yésu dré tazoá àyi dré dhi: «Mì alì ngá nya. » Akódhì ni lebèbhá nda kì àlo lizí tá ngalè akódhì àdhi 'i ya dhi ko. Tako ko, ì nì tâle dhi, akódhì Míri 'i káyà dhi be.

¹³Dì Yésu dré áyi kisízó ànyi àyi làga, mápà nda ni adó lanzílé àyi dré. Dré kpà 'òzoá kònìnì kosoá nda i sè.

¹⁴Dì kòrìdhì, vésè ni na Yésu dré áyi tadházó áyi lebèbhá i dré, áyi ngàma dràdrà 'ásè dhi àmvolésè dhi 'i.

Yésu i Pétéró be dhi

¹⁵Ì kónya ngá dre dhi, Yésu dré tazoá Sìmónà Pétéró dré dhi: «Sìmónà, Yòwánì ni mvá, mí adré áma le bâti àyi kònì kya kì lavú? » Akódhì logó drá dhi: «Àyíya, Míri, mí nì tâle dhi, má adré ámi le dhi be. » Dì Yésu tà drá dhi: «Mí kàdré áma kábilígyà ànzì kì likí. »

¹⁶Yésu gò akódhì ni lizí vésè ni rì sè tazoá dhi: «Sìmónà, Yòwánì ni mvá, mí adré áma le bâti? » Akódhì logó drá dhi: «Àyíya, Míri, mí nì tâle dhi, má adré ámi le dhi be. » Dì Yésu tà drá dhi: «Mí kàdré áma kábilígyà kì likí. »

¹⁷Yésu gò akódhì ni lizí vésè ni na sè tazoá dhi: «Sìmónà, Yòwánì ni mvá, mí adré áma le? » Kizà dré Pétéró ni 'òzo, Yésu dré tá lizílé tíá vésè ni na sè dhi «Mí adré áma le? » ya dhi sè. Dì Pétéró dré logózóá drá dhi: «Míri, mí nì mína tà tití dhi i be. Mí nì tâle dhi, má adré ámi le dhi be! » Dì Yésu tà drá dhi: «Mí kàdré áma kábilígyà kì likí. »

¹⁸Má adré tà bâti ta mí dré: Mí dré tá adrérà'a kàdhúrà ro dhi 'á dhi, mí adré tá ámi tândì ni káfà 'i ámi kípílé 'á gò, mí dré adrészó lîle àrà ángùdhí mí dré adrészó lèle lîle lána dhi na. Dì, mí kònì dra atsá málìga ró dhi, mí nì mína ámi drígá kì kidzì gò, dhya àzya dré ámi káfà 'i zo ámi kípílé 'á, ámi drìzo lìzo mí be àrà mí dré lèzo lîle lána ko dhi na. »

¹⁹Yésu tà tá kònìnì tadházóá dhi, Pétéró ni dra dràdrà kárá ángùdhí sè ya dhi, ìndì akódhì ni dràdrà nda ni lindrì fe Giká dré ngíni ya dhi. Dì Yésu kòtà tà nda dre dhi, dré tazoá drá dhi: «Mí kàdré áma lebè! »

Yésu i akódhì ni lebèlepi dré lèle tò dhi be dhi

²⁰Gò Pétéró dré áyi alázó, Yésu ni lebèlepi dré lèle tò dhi ni no adrérà'a alìle àyi vésè. (Akódhì nda tá dhya áyi bhèlepi Yésu agá mísá làga gò, lizíá tíá dhi «Míri, àdhi ni ámi lefè kàribhá i drígá nì? » ya dhi 'i.) ²¹Dì Pétéró kònò akódhì nda dre dhi, dré lizízóá Yésu tí dhi: «Míri, kàdré dì dhya kònìdhì ni tà sè dhi, tà ni ni adré ngíni? »

²²Yésu logó drá dhi: «Má kòlè akódhì kàdré lídrì íbe tsàle lókyá má dré dra agòzo dhi 'á dhi, kòdhì ámi tà 'i? Mi, mí kàdré mína áma lebè! »

²³Dì tà nda sè dhi, rúbí dré la'úzó Yésu ni ka'ibhá i kòfalé tàá dhi, akódhì ni lebèlepi nda kitswá ína dràle ko. Tákò, Yésu tà tá dhi, dhya nda kitswá dràle ko dhi ko. Be ró dhi, tà tá ína dhi: «Má kòlè akódhì kàdré lídrì íbe tsàle lókyá má dré dra agòzo dhi 'á dhi, kòdhì ámi tà 'i? »

²⁴Yésu ni lebèlepi nda, dhya tà nda kòdhì ki nòlepi mì sè gò, dré adrészó tà nda ki longó, adrészó tisiá wárágà kònìdhì léna dhi 'i. Mà nì tâle dhi, tà dré adrélé longolé nda i tà bâti 'i dhi be.

²⁵Yésu 'o tá kpà tà àrukà i bì. Má adré kisùá dhi, kònò à kòtisì tá tà nda i àlo àlo tití búkù i léna dhi, àrà búkù nda ki tobhàzo bvò kònìdhì lé dhi ni tá adré yókódhó.

Tà 'òle dhi i

Tà 'òle dhi i 1

Yésu lazí áyi ka'ibhá i dré dhi, i` ni Tiri` Lolo kisú

¹Atálágó Tèyòfílè, áma bükù drìdrì dhi léna dhi, má tisì tá tà tití Yésu dré 'òle ìndì tadhálé, kidhólé áyi àzí ni kidhoma lésè,

²tsàle kitú áyi dorà'a bhù na dhi 'á dhi i. Drìdrì akódhi ni dòzo dhi kandrá dhi, lazí tá tà àpóstolò í dré tá kipèle dhi i dri Tiri Lolo ni rinyí sè.

³Tako ko, akódhi ni dràma àmvolésè dhi, tadhá tá áyi tändi vésè be bǐ àyi nda i kandrá gò, dré tà bǐ dhi ki 'ozo tadházóá ngádra 'á dhi, i lídrì íbe káyà dhi. Agá tá àyi kandrá tà ta àyi dré Gíká ni Òpì ni tà dri kitú nyadhi-ri.

⁴Kitú alò, Yésu dré tá adrérà'a ngá nya àyi íbe dhi 'á dhi, lazí tá tà àyi dri kònìnì: «Lè mì kònga Yèrúsalémà 'ásè ko. Be ró dhi, mì kàdré tà áma Atá dré lazilé gò, má dré tà ni ni tazo àmì dré dhi ni letè.

⁵Tako ko, Yòwánì fè tá ína bátísimò móndí i dré dhi yí sè. Di, tayí ngbà 'í lókyá tsà, mì dré àmikya bátísimò kisúzó Tiri Lolo sè. »

Gíká do Yésu bhù na

⁶Apóstolò nda i kòkimó ru Yésu làga dre dhi, i dré lizízóá tíá dhi: «Mírì, mí ni go ìsérélè ànzì ki òpì bha áyi totó tódyá gbă lókyá kònìdhi sè? »

⁷Di Yésu logó àyi dré dhi: «Lókyá ìndì kitú áma Atá dré bhàle áyi tändi ni rinyí sè dhi ki nima, àmì ki tà i ko.

⁸Di, lókyá Tiri Lolo dré dra asízó àmì ki asó dhi tú dhi, mì ni rinyí kisú. Gò mì dré áma tà mì dré nòle ìndì mì dré yile dhi ki longózó kidhólé Yèrúsalémà 'a, bvò Yùdáyà àdhya na, bvò Sàmàriyà àdhya na, tsàle byá bvò ni kùdù na. »

⁹Yésu kòtà tà nda i dre dhi, Gíká dré akódhi ni dòzo bhù na àyi misè gò, ndùrùku dré akódhi ni kimozó.

¹⁰Di dré tá adrérà'a mbàle, ìndì i dré adrérà'a ngá no bhù na dhi 'á dhi, àgo rì kítá kemve asóbhá àyi rú dhi i dré agázó ngbò ró àyi mìle gò,

¹¹táá àyi dré dhi: «Àmi móndyá Gàliláyà àdhya ni i, mì totó àmì adrélé ngá no bhù na àdho tà sè? Yésu dòle àmì vélèsè bhù na kòdhi ni agò lású be ngóró mì dré akódhi ni nòle mbärà'a bhù na dhi tíni. »

À zi` Màti` yà àzí do Yùdási` ni àrà 'a

¹²Gò àpóstolò nda i dré sìzo kòngo Òlívè fa kya drìlésè, atsí kitswálé tole sàbátù tú bwà dhi ni to gózo Yèrúsalémà na. ¹³I kòtsa bhàandre nda na dre dhi, i dré fízo mbàle dzó 'a kile kurú na i dré tá adrészó adrélé lána dhi na. Àyi nda i tá: Pétéró, Yòwánì, Yákóbhò, Andréyà, Filípò, Tòmá, Bàràtòlòmáyò, Mátáyò, Yákóbhò

(Àlafayò ni mvá), Sìmónà (dhya adrélépi tá àtsi ró áyi súrú ni tà sè dhí), tsàle Yùdásì (Yákóbhò ni mvá).

¹⁴Àyi nda i adré tá ru kimó tití, adrélé tà ta Gìká be togó àlo sè landè àko ró. Ì adré tá 'óá kònini túmání tòkó àruka íbe, Màriyà Yésu ni andre be, ìndì adrúpi ni íbe.

¹⁵Kítú nda kòna ki àlo sè dhí, Yésu ni ka'ibhá ànyiànyi kámá-àlo-drì-nyadhi-àlo dhí i kimó tá ru. Gò Pétéró dré ngàzo áyi totó àyi kòfalé tàá dhí:

¹⁶«Áma adrúpi i, adré tá lèá dhí, tà Tirí Lólo dré tá longolé Dàwídì tí Yùdásì ni tà dri gò, tisízoá Gìká ni Kúlí na dhí kò'o ru. Yùdásì nda fè tá ína i dhya Yésu ni lebhá rûle dhí ki adrì dhí nì.

¹⁷Akódhi tá àma ki àlo 'i, ìndì Míri tayí tá àzí kònìdhí àma drígá akódhi be.

¹⁸Làfa akódhi dré kisulé tà kònzi í dré 'ole nda sè dhí sè dhí, gi tá amvú gò, dhèzo amvú nda na tsilitsili ró, 'a lafúlé gò, fí ni i dré adàzo tití kìnì mi.

¹⁹Mónyá tití Yèrúsalémà 'a dhí i yi tá tà nda ni rúbí 'í. Ásà dhí, i dré amvú nda ni rú zízo àyi ki bhàti sè «Akèlèdámà». Rú nda adré lèá tâle dhí «Amvú kàrì àdhya». ²⁰Tàko ko, à tisì tá búkù Yúdà ànzì ki Longó kya na dhí: «Lè akódhi ni bhà kàtsá tandró ro. Lè kpà dhya àlo kòmo bhà àrà nda na ko. »

À tisì kpà dhí: «Lè móndí àzya kòdo akódhi ni àzí akódhi ni àrà 'a. »

²¹⁻²²Ásà dhí, lè mà kòkipè móndí àzya àzí do Yùdásì ni àrà 'a, móndyá adrébhá tá túmání àma íbe lókyá wáyi mà dré tá adrérà'a tatsilé Míri Yésu be dhí 'á dhí i kòfalé. Àyi nda i tá àma kòfalé kidholé Yòwánì dré bâtisimò fèzo Yésu dré dhí sè, atsálé kítú akódhi ni dorà'a àma vélésè dhí 'á. Adré lèá dhí, dhya dra kipèle nda kàmú i àma Míri ni tà nobhá mi sè ni íbe, mà kàdréró Míri ni ngàma dràdrà 'ásè dhí ni tà longó túmání akódhi be móndí i dré. »

²³Dì i dré móndí rì dhí ki bhàzo àyi kandrá: Yoséfa adrélé kpà rú zile Bárásábà, rú àzya be Yúsitò dhí, ìndì Mátíyà be.

²⁴Gò i dré tà zízo Gìká tí kònini: «Míri, mí ni mína móndyá tití dhí ki togó be. Mí tadhá àma dré dhya mí dré kipèle àyi rì kònì i kòfalé dhí kòdhya,

²⁵akódhi nda kòdoró àzí àma adrébhá àpóstolò ro ni i kòfalé Yùdásì ni àrà 'a. Tàko ko, Yùdásì tayí ína àzí nda lìzo àrà kitswálépi i dré dhí na. »

²⁶Gò i dré dzègé vùzo àyi rì nda ki rú sè. Mátíyà dré lavúzó, gò i dré akódhi ni bhàzo àpóstolò mudrí-drì-àlo nda i rú.

Tà 'ole dhí i 2

Tirí Lólo así adhélé Yésu ni ka'ibhá i drísè

¹Kítú gwányá Pàtékótè àdhya dré atsázó dhí sè dhí, Yésu ni ka'ibhá i kimó tá ru adrélé tití àrà àlo dhí na. ²Gbà kòdhwa, kpòrò dré ndròzo bhù lésè ngóró lyàandre gú dhí dré adrélé avilé dhí tini gò, kpòrò nda dré afizó gàle dzó i dré tá adrészó lirílé lana dhí léna.

³Gò ì dré ngá ngóró àtsí làdra tíni dhi ní nòzo ru lanzírà'a asílé lirílé àyi àlo àlo tití dhi ì drísè.

⁴Dì àyi tití dhi ì dré gàzo Tírí Lolo sè gò, ì dré ngàzo adrélé ti twátwa kí ta, ngóró Tírí nda dré adrélé bhàle àyi tí dhi tíni.

⁵Lókyá nda sè dhi, móndí zyandre Yúdà ànzi ró angábhá súrú tití bvò drì dhi ì lésè, adrébhá kpà trôle Gíká ní tà rú dhi ì adré tá adrélé Yérusalémà 'a.

⁶Dì ì kòyi kpòrò nda dre dhi, ì dré ru kímózó zyandre ró gò, àyi kí drì dré abízó, àyi àlo àlo tití dhi ì dré adrélé àyi nda kí yi adrérà'a àyi kí tändi kí ti ta dhi sè.

⁷Dì àyi kí líndrí dré gàzo bhwäbhwa gò, ì dré adrészó tàá dhi: «Móndyá tití adrébhá tà ta kòni i tsí móndí Gàliláyà lésè dhi 'í ko?

⁸Dì àma àlo àlo tití dhi i, mà adré àyi kí yi adrérà'a àma kí tändi kí ti ta ngíningíni ró?

⁹Àma kòfalé dhi, móndí àruka ì angá bvò Pàrùtýà àdhya lésè, Mèdýà àdhya lésè, Èlámà àdhya lésè, Mèsòpòtämýà àdhya lésè, Yùdáyà àdhya lésè, Kàpàdòkýà àdhya lésè, Pótò àdhya lésè, Àsíyà àdhya lésè,

¹⁰Firigiyà àdhya lésè, Pàfiliyà àdhya lésè, Èzèpétò àdhya lésè, àrà ànyi Kìréne làga bvò Libiyà àdhya na dhi lésè, bhàandre Rómà àdhya lésè,

¹¹tùrù Kùrétè àdhya lésè, ìndì bvò Àràbíyà àdhya lésè. Àma kí àruka i Yúdà ànzi 'í. Àruka ní i kó móndí súrú twá ro Yúdà ànzi kí Gíká ní ka'ibhá dhi 'í. Dì àma tití, mà adré àyi kí yi adrérà'a tà kàdríkàdrí Gíká dré 'ole dhi kí tà ta àma kí tändi kí ti sè! »

¹²Dì àyi tití nda kí líndrí adré tá gàle bhwäbhwa, àyi kí drì dré kpà adrészó abílé gò, ì dré adrészó lizíá àyi kòfalésè dhi: «Tà kòdhí adré lèá tâle ngíni? »

¹³Dì, àyi kí àruka ì adré tá àyikya Yésu ní ka'ibhá nda kí gu, adrészó tàá dhi: «Ì adré dràle wá litsí dré! »

Pétéró longó Gíká ní kúlí móndí¹ zyandre i dré

¹⁴Dì Pétéró i àpóstolò mudrí-drì-àlo àruka nda íbe dhi, ì dré ngàzo àyi kí totó móndyá zyandre nda i kandrá gò, akódhí dré kúlí yòzo tâzoá àyi dré dhi: «Ami Yúdà ànzi ró ní i, ìndì àmí tití adrébhá adrélé Yérusalémà 'a ní i, mì ga rè bíbhálé má vélé ká! Lè mì kòni tà adrélépi lavúlé kòdhí dório.

¹⁵Wá adré móndyá kòni kí tsi ní ngóró mì dré adrélé kisùle dhi tíni ko. Tàko ko, dhu rè tìdzí 'í.

¹⁶Be ró dhi, tà kòdhí ína tà pròfétà Yòwélè dré tá longolé dhi 'í:

¹⁷«Gíká tà dhi: Lókyá kùdù sè dhi, má ní áma Tírí kutú móndyá tití i dri. Dì àmí kí ànziàgo i àmí kí ànzitòkó íbe dhi kí tà longó pròfétà kya tíni.

Àmí kí kàdhúrà kí ngá dra agábhá àyi mi toróbí tíni dhi kí no, ìndì àmí kí málìga kí toróbí twátwa dhi kí abi.

¹⁸Lókyá nda sè dhi, má ní áma Tírí kutú áma màrábà àgo ró ìndì tòko ró dhi i dri gò, ì dré adrészó tà longó pròfétà kya tíni.

¹⁹Má ní tà líndríga ró dhi ki 'o agálé bhù mìbhalé 'á, adrészó tà adrébhá áma rìnyí tadhá dhi ki 'o agálé bvò dri: kàré ní kutú, àtsí ní ko, ìndì àtsíkà ní sa tátá.

²⁰Kítú ní ru ladzá atsálé tímivá ro, ìndì mbă ní liká kàré tíni 'íká, gò Míri ní kítú mûrungú ìndì rúku ró dhi dré atsázó ndò.

²¹Dì móndyá tití dra liyíbhá Míri rú dhi ki adrí. > »

²²Pétéró gò tàá dhi: «Àmi ìsérélè ànzi ní i, mì yi rè áma kúlí ní i ká! Gìká tadhá àmi dré ngádra 'á dhi, Yésu Nàzàrétà lésè dhi tá dhya í dré amùle ní dhi 'í, tà twátwa líndríga ró í dré fèle Yésu nda dré 'ole àmi kòfalé dhi i sè, ngóró àmi ki tändi mì dré nile be dhi tíni.

²³À lefè tá akódhi nda àmi drígá, ngóró Gìká dré tá tà ní ni bhàle nìzoá drìdrì dhi tíni gò, àmi túmání móndí kònzi dhi íbe dhi, mì dré akódhi ní tidízó dràle fa kipakipa dri.

²⁴Dì, Gìká dré ína akódhi ní tingázó dràdrà lésè, akódhi ní apázó ngáaswa dràdrà àdhya lésè. Àngyá ko, dràdrà ní rìnyí kitswá tá ína akódhi ní ru bwà ko.

²⁵Dàwídì tà tá akódhi ní tà dri dhi: «Má adré tá ngbú Míri Gìká ní no má kandrá.

Àngyá ko, akódhi áma dríágó lésè, má kòlyàró tirì dré àlomvá ko.

²⁶Dì ásà dhi, áma togó adré gàle arí sè bì, ìndì áma làdra adré lenzélé.

Áma rúbhá ní kpà adré lídrì íbe, má dré adrélè mì bha Míri véna dhi sè.

²⁷Tako ko, mí kitswá mína áma tayí móndyá dràbhá dre dhi ki àrà na ko, ìndì mí kitswá ámi Dhya lolo dhi ní tayí ñwàle mógo na ko.

²⁸Mí 'o ma láti lídrì àdhya ki ni dre. Dì mí ní áma fe gàle arí sè bì mà dré adrélè túmání mí be dhi sè. >

²⁹Áma adrúpi i, má kitswá tàá àmi dré ngádra 'á dhi: Áma ki tábhí Dàwídì drà tá ína sile gò, akódhi ní mógo dré adrészó áma kòfalé be atsálé ándrò kònìdhi.

³⁰Dì, akódhi nda tá pròfétà 'í. Ní tá kpà tà Gìká dré tá lazilé í dré mòn-drà sè tâle dhi, Gìká ní áyi toyó ki àlo bha adrélè ópí kàdrì ro í tíni dhi be.

³¹Dì kònò tà adrélèpi tá alìle dhi drìdrì dre dhi, dré Mèsiyà ní ngàma dràdrà 'ásè dhi ní tà longozó tázoo dhi, Gìká kitswá akódhi ní tayí móndyá dràbhá dre dhi ki àrà na ko, ìndì kitswá akódhi ní rúbhá tayí ñwàle mógo na ko.

³²Dì Gìká tingá Yésu nda dràdrà lésè dre. Áma tití kònì i, dhya tà nda ní nobhá mì sè dhi 'í.

³³Dì Gìká kòtingá akódhi nda kurú na bhàle áyi dríágó lésè dre dhi, akódhi dré Tírí Lolo áyi Atá dré tá lazilé dhi ní kisúzó gò, dré Tírí nda ní kutúzó áma dri, ngóró mì dré adrélè nòle ìndì yile ándrò kònìdhi tíni.

³⁴Tàko ko, Dàwídì mbà tá ína bhù na nì ko. Di, tà tá ína dhì: «Míri Gìká tà áma Míri dré dhì: Mí alì lirilé áma dríágó lésè,

³⁵tsàle lókyá má dré dra ámi kàribhá ki bhàzo adrélé ámi pá zàle dhì 'á. »

³⁶Adré dì lèá dhì, súrú wäyi Isérélè ànzì kya ì kònì tà kònìdhì dóro: Gìká bhà Yésu mì dré tá tidilé fa kípakipa dri nda kòdhì adrélé Míri ro, ìndì Mèsiyà ro! »

³⁷Móndyá nda ì kòyi tà nda i dre dhì, àyi ki togó dré ñòzo kizà dré gò, ì dré lizizóá Pétéró i tí àpóstolò àruka íbe dhì: «Àma ki adrúpi i, adré dì lèá dhì, mà kò'o ngíni? »

³⁸Pétéró logó àyi dré dhì: «Àmi àlo àlo tití ni i, mì kòladzà àmi ki togó gò, bátisimò dòzo Yésu Krísto ni rú sè, Gìká kòtriró àmi ki tàkonzì i be dhì bvó. Di mì ni Tíri Lólo Gìká dré dra fèle àmi dré àngyá dhì ni kisú.

³⁹Tàko ko, tà Gìká dré lazilé kòdhì àmi dré, àmi ki ànzì i dré, ìndì móndyá tití adrébhá làwú làvo 'ásè dhì i dré. Tà báti ró dhì, lazikulí nda móndyá tití Míri àma ki Gìká dré dra azilé dhì i dré. »

⁴⁰Di Pétéró dré kúlì àruka bì dhì ki tazo àyi dré, àyi ki kodzozó tazoá dhì: «Mì kòtidri àmi lapázó móndyá ándrò gòdhögòdho ni i kòfalésè wà. »

⁴¹Di àyi Pétéró ni kúlì ka'ibhá dhì i dré bátisimò dòzo. Gò móndí ànyiànyi ngùlù-na dhì i dré ru amúzó Yésu ni ka'ibhá nda íbe kítú nda sè.

Yésu ni ka'ibhá ki adrema ngá àlo ró dhì

⁴²Di Yésu ni ka'ibhá nda i adré tá àyi ki fe adrélé tà àpóstolò i dré tá adrélé tadhálé dhì ki yi, adrészó ngá àlo ró àyi kòfalésè. I adré tá ngá nya túmání, adrészó tà ta Gìká be landè àko ró.

⁴³Àyi tití dhì ki líndri adré tá gàle bhwäbhwa, Gìká dré tá adrélé àpóstolò nda ki 'o adrélé tà twátwa líndriga ró dhì ki 'o bì dhì sè.

⁴⁴Móndyá ka'ibhá tití nda i adré tá ru amú adrélé ngá àlo ró, adrélé àyi ki ngá ki lanzí àyi kòfalésè.

⁴⁵I adré tá àyi ki amvú ki lagí àyi ki ngá íbe, adrészó làfa ni ni lanzí àyi kòfalésè, ngóró àyi ki àruka ki lemerè dré adrélé dhì tíni.

⁴⁶Kítú àlo àlo tití i sè dhì, i adré tá ru kímó togó àlo sè tépelò na. I adré tá kpà mányàngá do nyàle àyi ki dzó i 'ásè, adrészó nyàá arí sè togó ànzimvá kya tíni dhì be. ⁴⁷I adré tá kpà Gìká ni rú bha kùle. Àyi ki tà tá dóro móndyá tití i mìlésè. Di kítú àlo àlo tití i sè dhì, Míri adré tá móndí àruka i dré tá adrélé tindrillé dhì ki amú túmání àyi íbe.

Tà 'ole dhì i 3

Pétéró tidri' agó àlo tìle mèrèkpè ro dhì

¹Kítú àlo dhì, Pétéró i Yòwánì be dhì i adré tá mbàle tépelò na sáà na kítú ríri àmvolésè dhì sè, lókyá ànzyà gà adrészó tà zi Gìká tí dhì sè.

²Lókyá nda sè dhi, à adré tá agó àlo tile mèrèkpè ro dhi ni adó bhàle tépelò nda ni zèribàti zile Aveave ró dhi làga, ànzyà i dré adrélé 'ole kítú àlo àlo tití i sè dhi tíni, kàdréró ngá zi móndí adrébhá fîle tépelò na dhi i tí.

³Dì akódhi nda kònò Pétéró i Yòwánì be adrérà'a 'ole fîle dre dhi, dré kidhózó adrélé làfa zi àyi tí.

⁴Pétéró i Yòwánì be dhi i dré akódhi ni nòzo dìí gò, Pétéró dré tâzoá drá dhi: «Mí nò rè àma ká! »

⁵Dì agó nda dré adrészó àyi kí no adrészó kisùá dhi, í ni ngá kisú àyi drígásè.

⁶Dì, Pétéró dré tâzoá drá dhi: «Ma làfa ledélé àrezá sè yà, kó ngalè órò sè yà dhi àko. Di, ngá má dré adrészó ába dhi, má adré mána fêá mí dré: Yésu Krísto Nàzàréta lésè dhi ni rú sè, mí nga, mí kidhó atsí to! »

⁷Gò Pétéró dré akódhi ni dríágó rùzo, akódhi ni 'òzo ngàle dhi bvó. Gbă kòdhwa, akódhi ni pá i kìlìkpo ni íbe dhi i dré tombázó gò,

⁸dré ngàzo áyi totó trà pá dri gò, kidhólé atsí to. Dì dré adrészó lìle lowábe, adrélé Giká ni rú bhabe kùle. Gò i dré fîzo akódhi be tépelò na.

⁹Móndyá tití dhi i kònò akódhi adrérà'a atsí to, adrészó kpà Giká ni rú bha kùle dre dhi,

¹⁰i dré nízoá tâle dhi, akódhi tá mèrèkpè agó adrélépi tá lirílé adrélé ngá zi tépelò ni zèribàti zile Aveave ró dhi làga dhi i dhi be. Dì àyi kí líndrí dré gàzo bhwâbhwa gò, i dré adrészó sibhálé be ngbo tà atsálépi akódhi nda rú dhi sè.

Pétéró longó Giká ni kúlí tépelò na

¹¹Agó nda dré rè dhu adrérà'a trôle Pétéró i rú Yòwánì be dhi 'á dhi, móndyá zyandre tití nda i dré arázó líndríga be afilé àyi vélé tépelò ni kògbo zile Sòlòmónò àdhya ró dhi lé.

¹²Pétéró kònò tà nda dre dhi, dré tâzoá móndyá nda i dré dhi: «Isérélè ànzi ni i, àmi kí líndrí adré gale tà kòdhí sè àdhya tà sè? Mí adré kpà àma kí no, ngóró mà 'o tá àmakya agó kònìdhi atsí to àma kí tändí kí rinyí sè yà, kó ngalè mà dré adrélé trôle Giká ni tà rú dhi sè yà dhi na tíni àdhya tà sè?

¹³Giká Àbàramà àdhya, Isákà àdhya, ìndì Yàkóbhò àdhya, Giká àma kí tâbhí kya nda bhà áyi adhemakandra Yésu ni mi lanzile tà kòdhí sè dhi ni. Mí lefè tá àmikya Yésu nda kîtswâlé drâle gò, akódhi ni tà gàzo rè Pilátò kandrâ, tâgba Pilátò nda dré tá ína akódhi ni lèzo trile dhi.

¹⁴Dì mi gâ tá àmikya Dhya lolo ìndì gyâgya nda gò, móndí pfûlepi àlo dhi ni zìzo trile àmi dré kòdhya.

¹⁵Dì mi pfu tá dhya láti nzilepi móndí i dré adrízó nda drâle gò, Giká dré ína akódhi ni tingázó drâdrâ lésè. Àma dhya tà nda kí nobhá mi sè dhi 'i.

¹⁶Agó mì dré adrélé nôle ìndì nile kònìdhì bhà ína áyi tà ka'ika'ì Yésu ni rú na gó, rú nda dré akódhì ni 'òzo tombálé. Tàko ko, Yésu ni rú nda i túmání tà ka'ika'ì bhàle rú nda léna dhì be dhì, i 'o agó kònìdhì adrílé wáyi, ngóró àmì tití mì dré adrélé nôle dhì tíni.

¹⁷Áma adrúpi i, má ni tâle dhì, tà mì dré 'ole àmì kì kàdrì íbe Yésu rú nda i, mì 'o tá tâ nìma ko na dhì be.

¹⁸Di, láti nda sè dhì, Giká 'o tà i dré tá longolé drìdrì áyi pròfétà tití dhì i tí dhì kitswálé tití. Longó tá dhì, áyi Mèsiyà ni kizà nya. ¹⁹Adré dì lèá dhì, mì kòladzà àmì kì togó agòzo Giká vélé, kòtrirò àmì kì takonzì i be dhì bvó.

²⁰Mì kò'o kònìnì dhì, mì ni lókyá adrészó àmì kì togó tìndrì dhì ni kisú Míri véna. Akódhì ni kpà Mèsiyà i dré zìle àmì dré drìdrì dhì ni amù. Akódhì nda Yésu 'i.

²¹Di, adré lèá dhì, akódhì nda kàdré dhu rè bhù na, tsàle lókyá Giká dré dra tà tití dhì kì 'òzo atsálé tìdhì ro dhì 'á, ngóró dré longolé kínó lésè áyi pròfétà lolo dhì i tí dhì tíni.

²²Tàko ko, Mósè tà tá dhì: «Míri àmì kì Giká ni pròfétà àlo má tñi dhì ni 'o apfòle àmì kì tändì kì súrú lésè amùle àmì dré. Adré lèá dhì, mì kàdré tà tití dré dra tâle àmì dré dhì kì yi.

²³Di, dhya ángùdhì dra pròfétà nda ni yilepi ko dhì, Giká ni akódhì nda ni tingá móndyá ína i kòfalésè gó, akódhì ni tà 'òzo akilé. »

²⁴Tà bâti ró dhì, kidhólé Sàmùwélè rú dhì, pròfétà àlo àlo tití kúlì longóbhá dhì i longó tá tà adrébhá ru 'o ándrò kònì i kòdhyá.

²⁵Àmì ró dhì, àmì ànzì adrébhá tà pròfétà i dré longolé nda kì kisú tàyilé ro dhì 'i. Mì adré kókpà tà Giká dré bhàle ru yìzo àmì kì tâbhì íbe dhì ni kisú tàyilé ro. Tàko ko, Giká lazí tá Àbàramà dré dhì: «Má ni tà taní bha súrú tití bvò àdhyá i dri àmì ànzì i sè. » ²⁶Di Giká kò'o áyi adhemakandra Yésu nda apfòle dre dhì, dré rè zyà akódhì ni amùzo àmì, Isérélè ànzì i vélé 'íká, kàdrirò àmì àlo àlo tití dhì i àmì kì tà kònzi lésè, tà taní bhàzo àmì dri be dhì bvó. »

Tà 'ole dhì i 4

Pétéró i Yòwáni` be dhì i` pfò Yúdà ànzì kì bhàgo kàdrì` i kandrá

¹Pétéró i Yòwáni be dhì i dré rè dhu adrérà'a tà ta móndyá zyandre nda i dré dhì 'á dhì, kòwánà i, tépelò likibhá kì kàdrì, ìndì Sàdùkáyò íbe dhì i dré atsázó àrà nda 'á.

²Àyi kì togó adré tá aswálé àpóstolò nda i rú, i dré tá adrélé tà tadhá móndí i dré dhì sè. Àngyá ko, i adré tá Yésu ni ngàma dràdrà 'ásè dhì ni tà longó, adrészó kpà longóá dhì, móndyá Yésu ni ka'ibhá dhì kì kókpà nga dràdrà 'ásè.

³Di i dré Pétéró kì rùzo Yòwáni be bhèle bădzó na ngá wàle tà. Tàko ko, kítú ndì dre.

⁴Di, móndí àruka bì àyi kì kúlì yibhá dhì i ka'ì tá Yésu gó, móndyá tití Yésu ni ka'ibhá dhì i dré lizozó tsàle ànyíanyì ngùlù-nzi.

⁵Ngá kòwa dre dhi, Yúdà ànzì kí drì kobhá i, àyi kí bhàgo i ìndì tatrítrí kúlí tadhábhá íbe dhi, i dré ru kímózó Yèrúsalémà 'a.

⁶Àyi kòfalé dhi tá: kòwánà kí kàdrì rú zile Ánà dhi, Kàyáfà, Yòwánì, Àlìgìzandrè, tsàle móndí àruka kòwánà kí kàdrì ni súrú lésè dhi íbe.

⁷Dì i dré Pétéró kí 'òzo apfòle Yòwánì be àyi kandrá gò, i dré lizízóá àyi tí dhi: «Mì 'o àmíkyà tà kòdhí àdhí ni rinyí sè ya, kó ngalè àdhí ni rú sè ya dhi? »

⁸Dì Pétéró gàlepi Tírí Lólo ni rinyí sè dhi dré logózóá àyi dré dhi: «Àmì, Yúdà ànzì kí kàdrì i bhàgo íbe ni i,

⁹ándrò kònìdhí, à adré àma kí lizí tà dóro 'ole mèrèkpè agó àlo dhi dré dhi ni tà sè, ìndì akódhí nda adrí ngíni ya dhi ni tà sè.

¹⁰Adré dì lèá dhi, àmì túmání Ìsérélè ànzì íbe tití dhi i, mì kònì tà kònìdhí dóro: Agó kònìdhí adré áyi totó rúbhá be dóro àmì kandrá, Yésu Krísto Nàzàréta lésè dhi ni rú ni rinyí sè. Mì tidí tá Yésu nda dràle fa kípakipa dri gò, Gíká dré ína akódhí ni tingázó dràdrà lésè.

¹¹Akódhí nda ni tà sè dhi, Gíká ni Kúlí adré tàá dhi: «Kírà àmì dzó sibhá i mì dré gàle gágà dhi, gò atsálé kírà agógó dzó nda dré adrészó áyi totó drìá dhi ró. »

¹²À adré tà tìdrízó dhi ni kisú móndí twá Yésu nda rúsè dhi na ko. Tako ko, rú àzya Gíká dré afèle móndyá bvò dri dhi i dré kítswázó adrílé ásà dhi yókódhó. »

¹³Dì Yúdà ànzì kí bhàgo kàdrì nda i kònò Pétéró i Yòwánì be adrérà'a tà ta tìrì àko dre dhi, àyi kí líndrì dré gàzo bhwàbhwa. Àngyá ko, i nò tá dhi, àyi nda i tá móndí tako tà ndabhá nile ko dhi 'i. Dì, i ni kpà tâle dhi, àyi móndí adrébhá tá túmání Yésu be dhi 'i dhi be.

¹⁴Dì, i dré tá adrélé mèrèkpè agó adrílépi nda ni no adrérà'a áyi totó àyi làga dhi sè dhi, i kítswá tá àyíkyà kúlí logó àyi tí bwà ko.

¹⁵Dì i dré Pétéró kí 'òzo pfòle Yòwánì be àyi kandrasè kívì na gò, i dré tà nda ni 'a nyàzo àyi kòfalé

¹⁶tàzoá dhi: «Mà ni 'òá àgo kòdhí kí tà sè ngíni? Tako ko, móndyá tití adrébhá Yèrúsalémà 'a dhi i ni tâle dhi, àyi nda i 'o àyíkyà tà líndrígá ró dhi 'í dhi be. Mà kítswá àmakyà kayíá bwà ko.

¹⁷Dì, adré lèá dhi, mà kòlogá àyi tàzoá dhi, i kògò vélé tà ta dhya àlo dré agó kòdhí ni rú sè ko, tà kòdhí ni rúbí kògoró la'ulé móndí i kòfalésè lìle drìdrì ko dhi bvó. »

¹⁸Dì i dré gòzo àyi nda kí azí gò, tà tâma ìndì tà tadhama Yésu ni rú sè dhi ni logázó àyi dré tà tândi ró.

¹⁹Dì, Pétéró i Yòwánì be dhi i dré logózóá àyi tí dhi: «Mì lanzí rè tà kònìdhí ni bvó ká: Adrélé Gíká ni kúlí ga 'ole, kítswázó àmì kí kúlí ka'i 'ole dhi, tsì dóro Gíká milésè?

²⁰Tàko ko, mà kïtswá àmakya tà mà dré nòle mì sè ìndì mà dré yile bïbhálé sè dhi kí longoma tayí bwà ko. »

²¹Dì bhàgo kàdrì nda i dré gòzo kúlí aswaaswa kí ta àyi dri gò, i dré àyi kí tayízó lìle. Ì kisú tá àyikya tà àlo tà njozo àyi dri dhi ko. Tàko ko, móndyá tití dhi i adré tá Gïká ní rú bha kùle tà ru 'olepi nda ni tà sè.

²²Àngyá ko, mèrèkpè agó adrïlépi lïndrïga ró nda ni kóná lavú tá ína nyadhi-rì.

Yésu ni ka'ibhá i` zi tà Gïká tí

²³À kòtayí Pétéró i Yòwánì be dre dhi, i dré gòzo àyi kí arúpi Yésu ni ka'ibhá dhi i véna, tà tití kòwánà kàdrì i bhàgo íbe dhi i dré tâle àyi dré dhi kí tití.

²⁴Àyi nda i kòyi tà nda i dre dhi, i dré ngàzo kúlí yo togó àlo sè tâzoá Gïká dré dhi: «Míri rúku ró bhù kí bhàlepi bvò be, yïandre be, ìndì ngá tití àyi lé dhi íbe ni,

²⁵mí longó tá kúlí ámi marrábà, àma kí tâbhí Dàwídì tí Tîrî Lôlo ní rînyí sè mi, tâzoá dhi: <Sûrû tití dhi kí togó aswá àdho tà sè? Móndyá bvò àdhya i yi ru kïtswázó tà àngyá 'o àdho tà sè?

²⁶Ópí kàdrì bvò àdhya i lotó àyi, ìndì móndí kí kàdrì i kîmó ru, kïtswázó ru pfu Míri Gïká rú, ìndì akódhi ni Mèsiyà rú. >

²⁷Tà bâti ró dhi, bhàandre kònìdhi 'á dhi, Èródè i Pòtîyò Pilátò be dhi i amú tá ru túmâni móndí surú twá ro dhi íbe ìndì Isérélè ànzì íbe, kïtswázó tà 'o ámi adhemakandra lolo, Yésu mí dré zile dhi rú. ²⁸I 'o kònìni, kïtswâlé tà mí dré kisùle 'ole kínó lésè ámi rînyí sè dhi i kò'oró ru be dhi bvó.

²⁹Dì nyànomvá dhi, Míri, mí kòyi kúlí aswaaswa i dré adrélé tâle àma rú dhi i. Mí kòfè rînyí àma ámi marrábà i dré, adrészó ámi kúlí longó tirì àko.

³⁰Mí kòkidzì kpà ámi drígá rînyi ró dhi, adrészó móndí kí tîdrí àyi kí drà i lésè, adrészó kpà tà lïndrïga ró adrébhá ámi rînyí tadhá dhi kí 'o, ámi adhemakandra lolo, Yésu ni rú sè. »

³¹Ì kòzi tà nda i Gïká tí akílé dre dhi, àrà i dré ru kîmózó lâna nda dré ru kizízó. Dì i dré gàzo tití Tîrî Lôlo ní rînyí sè gò, i dré ngàzo adrélé Gïká ní kúlí longó móndí i dré tirì àko.

Yésu ni ka'ibhá i` lanzi` àyi kí ngá i àyi kòfalésè

³²Móndyá tití Yésu ni ka'ibhá dhi i amú tá ru adrélé ngá àlo ró àyi kí togó na ìndì àyi kí tà kisùkisù na. Dhya àlo àyi kòfalé adrélépi tàá dhi, ngá ína ngbà 'í i dré kalómâ dhi tá yókódhó. Be ró dhi, i adré tá àyi kí ngá tití dhi kí lanzi àyi kòfalésè.

³³Apóstolò i adré tá Míri Yésu ni ngàma dràdrà 'ásè dhi ni tà longó rînyí kàdrì sè. Dì àyi tá Gïká ní togó taní íbe àyi rú.

³⁴Dhya àlo lemerè ro àyi kòfalé dhi tá yókódhó. Àngyá ko, àyi tití adrébhá amvú íbe yà, kó ngalè dzó íbe yà dhi i adré tá ngá nda kí lagí, adrészó làfa ni ni adó alìzo

³⁵bhàá àpóstolò i kandrá. Dì à adré tá làfa nda ni lanzí móndí àlo àlo i dré ngóró àyi ki lemerè dré adrélé dhi tíni.

³⁶Agó àlo rú be Yòséfà angálépi Lévi ni súrú lésè, tile türù Kìpírò àdhya na dhi tá àyi kòfalé. Àpóstolò i fè tá drá rú Bárànábà. (Rú nda kòdhì adré lèá tâle dhi «Mvá adrélépi móndí ki togó tîmbà dhi».)³⁷ Akódhì nda tá amvú àlo dhi íbe gò, dré lagízóá, làfa ni ni adózó alìzo bhàá àpóstolò i kandrá.

Tà 'ole dhi i 5

Ànàní yà i Sàfírà be dhi

¹Agó àlo rú be Ànànyà dhi i tòkó ni Sàfírà be dhi i tá kpà amvú àlo dhi íbe gò, i dré lagízóá.

²Dì, Ànànyà nda dré ína làfa ni àruka tingázó zùle áyi tândi dré gò, àmbí ni ni dòzo lìzo bhàá àpóstolò i kandrá. Dì akódhì ni tòkó ni tá kpà tà nda dôro.

³Gò Pétéró dré tâzoá drá dhi: «Ànànyà, mí tayí mína Sàtánà file ámi togó na àdho tà sè? Mí tà kinzò Tírí Lolo dré gò, amvú kòdhì ni làfa àruka tingázó zùle ámi tândi dré.

⁴Drìdrì mí dré amvú nda ni lagízó dhi kandrá dhi, amvú nda tá mína 'i ko? Mí dré lagízóá dhi àmvolésè dhi, làfa nda tá mí drígá gò, mí dré tá kitswázó tà ángùdhi mí dré lèle 'ole dhi ni 'o ásà dhi ko? Mí 'o dì mi ngíni tà kòdhì ni kisù 'ole kònini dhi? Mí tà kinzò móndí i dré ko. Be ró dhi, mí tà mína kinzò Gíká dré. »

⁵Ànànyà kòyi kúlí nda i dre dhi, dré dhèzo dràle. Dì tirì dré móndyá tití tà nda ni yibhá dhi ki 'òzo lavúlé.

⁶Gò kàdhúrà àruka i dré alìzo akódhì ni àbvò do lambélé gò, i dré pfòzo siá.

⁷Ànyíanyí saà na àmvolésè dhi, Ànànyà ni tòkó dré afízó Pétéró i vélé, tà lavúlépi nda ni ni àko ró.

⁸Pétéró dré lizízóá tíá dhi: «Mí tà rè má dré ká: Mì lagí amvú kòdhì làgí be kòdhòpi bâti? » Tòkó nda logó dhi: «Àyíya, kòdhì làgí nda 'i. »

⁹Dì Pétéró tà drá dhi: «Mí 'o àmi ngíni ru yi ámi agó be kitswázó Míri ni Tírí tabhì litílé dhi? Mí nò rè ká! Dhya ámi agó ni sibhá dhi i dzó tí. Ì ni kókpà ámi do pfòzo mí be. »

¹⁰Gbà kòdhwa, tòkó nda dré dhèzo dràle Pétéró kandrá. Gò kàdhúrà nda i dré afízó akódhì ni àbvò kisú. Ì dré dòzoá, pfòzo siá agó ni làga.

¹¹Dì tirì dré móndyá tití Èkélézyà le dhi ki 'òzo lavúlé, túmäní móndyá tití tà nda ni yibhá dhi íbe.

Àpóstolò i ` 'o tà li` ndri` ga ró dhi i bì

¹²Àpóstolò ì adré tá tà líndríga ró adrébhá Gíká ni rinyí tadhá dhi kí 'o bí móndí i kòfalé. Mónyá ka'ibhá tití dhi ì adré tá ru kímó togó àlo sè tépelò ni kògbo zile Sòlòmónò àdhyá ró dhi na.

¹³Dì, móndí àruka ì adré tá tabhile ru amú àyi íbe ko, tágba móndí tití dhi ì dré tá adrészó àyi kí rú ta dóro dhi.

¹⁴Tágba kònini dhi, móndí zyandre àgo ró ìndì toko ró dhi ì adré tá Míri Yésu ni ka'i, adrészó ru amú móndí ka'ibhá nda íbe adrélé lile drìdrì.

¹⁵Ásà dhi, à adré tá dràbhá kí do tobhàle lángá i dri ìndì kíndri i dri láti i bhálésè, kitswálé Pétéró kònì dra lavú dhi, ndìndì akódhi ni líndrí kòlavúró àyi nda kí àruka i drísè gò, ì kàdríró be dhi bvó.

¹⁶Mónyá zyandre angábhá bhàandre ànyi Yèrúsalémà làgásè dhi i lésè dhi ì adré tá kpà dràbhá kí adó, móndí tirí kònzi ì dré adrélé mì pfòle dhi íbe, alízo àyi íbe. Gò àyi tití nda ì dré adrészó adrilé.

À pfo àpóstolò kí mì

¹⁷Dì kòwánà kí kàdrì túmání móndí tití akódhi làga adrébhá Sàdùkáyò i ró dhi íbe dhi, ì adré tá lovó kònzi bha àpóstolò nda i rú.

¹⁸Gò ì dré àyi kí rùzo bhèle bădzó móndí tití i dré dhi na.

¹⁹Dì, ngátsi sè dhi, ángéló Míri àdhyá dré ína bădzó nda ni ti kí tinzìzo, àyi kí adrìzo apfòzo àyi íbe gò, tazoá àyi dré dhi:

²⁰«Mì lì àmì kí totó tépelò na, adrélé lídri tídhí ro kòdhí ni rúbí longó móndí i dré. »

²¹Dì drùbhì kínó, ì dré lìzo tépelò na gò, kidhólé adrélé móndí kí tadhá, ngóró ángéló nda dré tá tâle àyi dré dhi tíni. Kòwánà kí kàdrì nda i móndí akódhi làga dhi íbe dhi ì kòtsa dre dhi, ì dré lìsérélè ànzì kí bhàgo kàdrì kí kímázó tití. Gò ì dré móndí kí mùzo kitswálé àpóstolò nda kí adrì bădzó lésè.

²²Dì, dhya mûle nda ì kòtsa dre dhi, ì kisú tá àyi nda i bădzó na ko. Dì ì dré gózo góle tà nda ni longó bhàgo kàdrì nda i dré, tazoá dhi:

²³«Mà dré tsàzo kònàle dhi, mà kisú tá dhi, à atsú tá bădzó ni ti i gâgä. Mà kisú kpà bădzó likíbhá i adrérà'a àyi kí totó dzóti nda i kandrá. Dì, mà kònzi dzóti nda i dre dhi, mà dré àmakya dhya àlo kisúzó ko. »

²⁴Dì tépelò likíbhá kí kàdrì, kòwánà kàdrì íbe dhi ì kòyi tà nda dre dhi, àyi kí drì dré abízó gò, ì dré adrészó lizíá àyi kòfalésè ngalè àdho tà 'o tá àpóstolò nda i nì ya dhi.

²⁵Dì dhya àlo dré atsázó longóá àyi dré dhi: «Mì yi rè ká! Ágo mì dré tá bhèle bădzó na dhi ì totó àyi tépelò na, adrélé móndí kí tadhá. »

²⁶Gò tépelò likíbhá kí kàdrì nda ì dré ngàzo lile móndí ni íbe, àpóstolò nda kí adrì alízo àyi íbe. Dì, ì adrì tá àyi rinyí sè ko, ì dré tá adrélé ngá ro, móndí zyandre dhi kí dra àyi kí lebhé todràle kírà sè dhi sè.

²⁷Ì kàdrì àyi dre dhì, ì dré àyi kì 'òzo apfòle bhàgo kàdrì nda i kandrá gò, kòwánà kì kàdrì dré àyi kì lizízó tazoá dhì:

²⁸«Mà logá tá àmì dré tà tadhama agó kòdhì ni rú sè dhì ko? Di, mì nò rè ká! Mì 'o àmikya tà mì dré adrélé tadhálé kòdhì ayilé Yérusalémà 'ásè tití dre. Mì adré kpà agó kòdhì ni kàrì le bhàle àma dri. »

²⁹Gò Péteró i àpóstolò àruka nda íbe dhì ì dré logozóá dhì: «Adré lèá dhì, mà kàdré Gìká ni kúlì ka'i 'ole dhì kòdhya, móndí kya ko.

³⁰Gìká àma kì tábhí kya tingá Yésu mì dré tá àmikya tidilé dràle fa kipakipa dri dhì dràdrà lésè.

³¹Di Gìká dré akódhi nda ni tingázó kurú na bhàle áyi dríágó lésè adrélé ópí kàdrì ro ìndì móndí kì tindrillépi ró, kòfèró láti Ìsérélè ànzì i dré àyi kì togó ladzázó, Gìká kòtriró àyi kì takonzì i be dhì bvó.

³²Àma dhya tà nda kì nobhá mì sè dhì 'i, ngóró Tirí Lolo Gìká dré afèle móndyá adrébhá áyi kúlì ka'i 'ole dhì i dré dhì dré kpà adrélé dhì tíni. »

³³Bhàgo kàdrì nda i kòyi tà nda i dre dhì, àyi kì togó dré aswázó tà tändi ró gò, i dré adrészó àyi kì le 'ole todràle.

³⁴Fàrisáyò àlo rú be Gàmàlìyélè dhì tá àyi nda i kòfalé. Akódhi nda tá tárítrí kúlì tadhálépi lìndri ro móndyá tití i mìlésè dhì 'i. Di dré ngàzo áyi totó bhàgo kàdrì nda i kòfalé táká dhì, à kò'o rè àgo nda i pfòle kivì na lókyá tsà sè.

³⁵Gò dré tazoá bhàgo nda i dré dhì: «Ìsérélè ànzì ni i, mì kàdré àmì kì likí, tà mì dré adrélé lèle 'ole àgo kòdhì i rú dhì sè.

³⁶Gí rè lavulé ko, Tèwúdà apfò tá ína táká dhì, i móndí kàdrì 'i. Gò móndí ànyiànyi kámá-su dhì i dré ru amúzó akódhi be. Di, akódhi ni pfùzo dràle gò, akódhi ni lebèbhá nda kì lapézó tití gò, àyi kì tà dré akízó nyinyi.

³⁷Àmvolásà dhì, Yùdásì angálépi Gàlìlàyà lésè dhì dré kpà apfòzo lókyá à dré tá adrérà'a móndí kì na dhì 'á gò, dré móndí zyandre dhì kì sèzo i vésè. Di, akódhi ni pfùzo kpà dràle gò, akódhi ni lebèbhá nda kì lapézó tití.

³⁸Di nyànomvá, má adré táká àmì dré dhì: Mì kòtro àgo kòdhì kì tà rú ko. Mì tayí àyi lìle. Tako ko, tà i dré adrélé lèle 'ole dhì kàngá móndí i vélésè dhì, a ni dra akílé.

³⁹Di, tà nda kàngá ína Gìká vélésè dhì, mì kitswá àmikya àyi kì kikí bwà ko. Mì kàdré di àmì kì likí, mì kòkisúró àmì adrérà'a ru pfu Gìká be ko! » Di bhàgo kàdrì nda i dré Gàmàlìyélè ni kúlì ka'izo.

⁴⁰Gò i dré àpóstolò nda kì azízó, àyi kì 'òzo bhwàle gò, lazízóá àyi dri dhì, i kògò vélé tà ta Yésu ni rú sè ko. Gò i dré àyi kì tayízó lìle.

⁴¹Di àpóstolò nda i dré apfòzo bhàgo kàdrì nda i vélésè lenzébe lavulé, Gìká dré tá ka'ile i konya kanyò Yésu ni rú ni tà sè dhì sè.

⁴²Dì kítú àlo àlo tití i sè dhì, i adré tá tà tadhá tépelò na ìndì móndí kì dzó i 'ásè, adrészó Rúbí Tani longó, adrészó tadhá dhì, Yésu Mèsiyà 'i káyà dhì.

Tà 'ole dhì i 6

À kipè àgo nzi-drì-rì dhì i kitswálé àpóstolò kì ledé

¹Lókyá nda kònàdhì sè dhì, Yésu ni ka'lbhá i adré tá lizolé lìle drìdrì. Dì, àyi nda i kòfalé dhì, Yúdà ànzì adrébhá Gírikì ti ta dhì i dré ngàzo adrélé kúlì ti Yúdà ànzì adrébhá Èbérè ti ta dhì i rú. I adré tá tàá dhì, à adré tá àyi kì tàyítokó kì tà tivì, à dré tá adrérà'a mányàngá lanzí móndí i dré kítú àlo àlo i sè dhì 'á.

²Dì àpóstolò mudrí-drì-rì dhì i dré móndyá ka'lbhá tití dhì kì kímózó gò, tàoá àyi dré dhì: «Kitswá mà dré Gíká ni kúlì tadhama tayízó, kitswázó mányàngá ni tà 'o dhì ko.

³Dì àma kì adrúpi i, lè mì kòkipè àmi kòfalé àgo nzi-drì-rì gabhá Tirí Lolo sè ìndì tògyá sè, àyi kì tà dré adrészó doro móndí i milésè dhì i, mà kòtayíró àzí nda àyi drígá.

⁴Dì àma ró dhì, mà ni àma kì fe tití adrélé tà ta Gíká be, adrészó kpà akódhì ni kúlì tadhá. »

⁵Dì móndyá zyandre tití nda i dré tà nda ni ka'izo. Gò i dré Sètèfánò, adrélépi tà ka'ika'i íbe kàdrì ìndì gàlepi Tirí Lolo sè dhì kì kipèzo, túmání Filípò íbe, Pòròkórò be, Níkànórà be, Tímónà be, Pàrùménà be, tsale Níkòlá angálépi Àtiyòkíyà lésè, Yúdà ànzì kì Gíká ni ka'ilepi dhì be.

⁶Gò i dré àyi nda kì bhàzo àpóstolò i kandrá. Dì àyi nda i dré tà zìzo Gíká tí àyi dré, drígá bhàzo àyi àlo àlo tití i dri, Gíká kòbhàró tà taní àyi dri be dhì bvó.

⁷Dì Gíká ni kúlì adré tá ayílé lìle drìdrì. Móndyá ka'lbhá Yèrúsalémà na dhì i adré tá lizolé lavulé. Àyi nda i kòfalé dhì, kòwánà zyandre dhì i ka'i tá Yésu gò, adrészó trôle akódhì ni tà rú.

À ru Sètèfánò

⁸Sètèfánò nda tá Gíká ni togó taní íbe i rú, ìndì rinyí ni íbe bì gò, dré adrészó tà kàdrì líndríga ró adrébhá Gíká ni rinyí tadhá dhì kì 'o móndí i kòfalé.

⁹Dì, móndí àruka angábhá lìsámbò dzó zile «Màrabà trile dhì kya» ró dhì lésè dhì, i dré ngàzo ligílé Sètèfánò rú, adrészó tà kayí tíá. Àyi nda i tá Yúdà ànzì angábhá Kíréne lésè, Àlìgìzàndríyà lésè, bvò Kilikíyà àdhya lésè, ìndì bvò Àsíyà àdhya lésè dhì 'i.

¹⁰Dì, i kitswá tá àyikya Sètèfánò ni lavú bwà ko. Àngyá ko, adré tá tà ta tògyá sè ìndì Tirí Lolo ni rinyí sè.

¹¹Gò i dré làfa fèzo lùzu ró móndí àruka i dré, i kòtaró kinzò sè dhì: «Mà yi Sètèfánò adrérà'a làdhá dha Mósè rú, ìndì Gíká rú. »

¹²Dì ì dré móndí zyandre dhi i, bhàgo i, ìndì tátrítrí kúlí tadhábhá íbe dhi ki 'a tifizó ligílé Sètèfánò rú. Gò àyi nda ì dré akódhí ni rùzo, drizoá lìzo ába Yúdà ànzì ki bhàgo kàdrì i kandrá.

¹³Dì ì dré móndí àruka ki 'òzo pfôle tàá kinzò sè dhi: «Agó kòdhí adrélè tà ta kònzi àma ki tépelò lolo dhi rú, ìndì Mósè ni tátrítrí kúlí rú.

¹⁴Tako ko, mà yi akódhí adrérà'a tàá dhi, Yésu Nàzàréta lésè kòdhí ni tépelò nda ni pfu gò, labhí Mósè dré tayílé àma dré dhi ki ladzázó. »

¹⁵Dì bhàgo kàdrì tití ru kimóbhá nda ki mi tá Sètèfánò dri gò, ì dré nòzoá dhi, akódhí ni mìbhalé tá ángéló àdhya tíni.

Tà 'òle dhi i 7

Sètèfánò logó kúlí Yúdà ànzì ki bhàgo kàdrì` i dré

¹Gò kòwánà ki kàdrì dré lizízóá Sètèfánò tí dhi: «Tà tâle mí rú kòdhí i tà bâti 'í? »

²Dì Sètèfánò dré logózóá dhi: «Áma adrúpi i áma atá íbe ni i, mi yi rè áma kúlí ká! Giká milanzilanzì ro dhi agá tá àma ki tábhí Àbàrámà kandrá, akódhí dré tá adrérà'a bvò Mèsòpòtämíyà àdhya na dhi 'á, drìdrì dré bhà mòzo bvò Kàránà àdhya na dhi kandrá.

³Giká dré tâzoá drá dhi: «Mí tayí ámi bvò i ámi súrú be, lìzo bvò má dré dra tadhálé mí dré dhi na. » ⁴Dì Àbàrámà dré bvò Kàlàdáyò kya ni tayízó gò, lìzo bhà mo Kàránà na. Akódhí ni atá ni dràma àmvolésè dhi, Giká dré akódhí ni amùzo alìle bvò mi dré adrészó adrélè ándrò kònìdhí lé.

⁵Dì, Giká fè tá akódhí dré bvò tayílé ro dhi kònwràre ko. Fè tá ndìndì àrà dré kitswázó pá bha lána dhi ko. Dì, lazí tá ína dhi, i ni dra bvò nda ni fe akódhí dré, ìndì bvò nda ni adrélè akódhí ni toyó i dré tayílé ro, tágba dré rè dhu adrészó mvá áko dhi.

⁶Giká tà drá dhi: «Ámi toyó ki adrélè móndí twá i ró móndí àruka ki bvò na. À ni àyi ki bha adrélè mårábà i ró, adrészó àyi ki mi pfo kóná kámá-su.

⁷Dì, má ni mána tà bha súrú dra àyi ki bhàlepi adrélè mårábà i ró dhi dri. Àmvolásà dhi, i ni angá bvò nda lésè, agòle adrélè áma lìndrì bha àrà kònìdhí 'á. » ⁸Gò Giká dré tà bhàzo ru yìzo Àbàrámà be tâzoá dhi, i kòlwà àyi ki ànziàgo i tití, tà ru yìzo nda ni tadházó. Gò Àbàrámà dré ìsákà ni tìzo gò, akódhí ni lwàzo kítú ni nzi-drì-na sè. Ìsákà dré Yàkóbhò ni tìzo gò, Yàkóbhò nda dré àma ki tábhí mudrí-drì-rì dhi ki tìzo.

⁹Àmvolásà dhi, àma ki tábhí i dré lovó kònzi bhàzo àyi ki tûgumvá Yòséfà rú gò, i dré akódhí ni lagízó adrélè mårábà ro bvò Èzèpétò àdhya na. Dì, Giká tá ína túmání akódhí be gò,

¹⁰dré akódhí ni apázó akódhí ni kizà tití i lésè. Tako ko, fè tá tògyá akódhí dré, akódhí ni tà 'òzo adrélè dôro Fàráwò, ópí kàdrì Èzèpétò drìle dhi mîlésè. Dì Fàráwò nda dré Yòséfà ni bhàzo adrélè ópí ro i bvò Èzèpétò drìle, ìndì tà tití áyi dzó kàdrì na dhi i drìle.

¹¹Gò kàrábhò dré dhèzo bvò wäyi Èzèpétò àdhya 'ásè, ìndì Kànánà àdhya 'ásè. Kizà tákàdrì lavulé gò, àma kí tábhí i dré kitswázó mányàngá kisú bwà ko.

¹²Dì Yàkóbhò kòyi ngánò tá Èzèpétò na be dhi dre dhi, dré àma kí tábhí kí mùzo lile kònàle vésè ni àlo sè.

¹³Dì vésè ni rì sè dhi, Yòséfà dré áyi 'òzo áyi adrúpi nda i dré nile gò, Yòséfà ni surú tadházó Fàrawò dré.

¹⁴Gò Yòséfà dré móndí mùzo lile áyi atá Yàkóbhò kí adrì áyi surú ibe tití. Áyi nda i tá móndí nyadhi-na-drì-mudrí-drì-nzi.

¹⁵Dì Yàkóbhò i dré lizo àma kí tábhí ibe Èzèpétò na gò, i dré todràzo kònàle.

¹⁶Bvóá dhi, àyi kí abvò kí dòzo lizo bhàá mógo àlo Sikémè le dhi na. Àbàramà gi tá mógo nda làfa sè Èmórà ni ànzì i drígá.

¹⁷Lókyá Giká dré tá adrérà'a 'ole tà i dré tá lazilé Àbàramà dré dhi ni 'o dhi 'á dhi, móndyá àmakya i lizó tá zyandre ró Èzèpétò na.

¹⁸Gò ópí kàdrì àzya Yòséfà ni tà nilepi ko dhi dré ngazo adrélé opì nya Èzèpétò dri.

¹⁹Akódhi nda dré àma kí surú kí litizó, àma kí tábhí kí mi pfòzo, àyi kí 'òzo àyi kí ànzì kùrì kí labhé tayílé, i kòtodoraró be dhi bvó.

²⁰Dì lókyá nda sè dhi, Mósè ni tizo. Akódhi ni tà avé tá Giká mìlésè tò. À dré akódhi ni likízó atá ni ni dzó na mbà na.

²¹Dì à kòlabhé akódhi tayílé dre dhi, Fàrawò ni zapi dré akódhi ni kisúzó gò, dòzoá likílé áyi tändi ni mvá ro.

²²Gò Mósè nda ni tadházó tògyá wäyi Èzèpétò kya sè gò, dré mbàzo atsálé rìnyi ró kúlí tama sè ìndì tà 'oma sè.

²³Mósè ni kóná kòtsa nyadhi-ri dre dhi, dré kisùzoá dhi, i ni li áyi adrúpi Isérélè ànzì kí no.

²⁴Gò dré Èzèpétò agó àlo dhi ni nòzo adrérà'a Isérélè mvá àlo dhi ni mi pfo. Dì dré fízo dhya adrélé mi pfòle nda ni tará ga gò, Èzèpétò agó nda ni pfùzo dràle.

²⁵Mósè adré tá ína kisùá dhi, áyi adrúpi Isérélè ànzì kí tá niá tâle dhi, Giká amù i kitswálé àyi kí apá dhi be. Dì, i ni tá àyikya tà nda ko.

²⁶Kítú bvóá dhi sè dhi, Mósè dré tsàzo Isérélè ànzì ri dhi kí kisú adrérà'a ru pfu. Lè tá àyi kí 'ole ru amú tódyá àyi kòfalésè gò, dré tâzoá àyi dré dhi: «Áma arúpi i, àmi kó adrúpi i ró dhi, mi adré dì àmikya ru 'o kònzi àdho tà sè? »

²⁷Dì, dhya adrélépi tá áyi adrúpi ni mi pfo dhi dré ína Mósè ni gbòzo, tâzoá dhi: «Àdhi bhà mi adrélé ópí ro ìndì tâbvó tâlepi ró àma drile dhi ni? »

²⁸Mí adré mína áma le pfûle dràle, ngóró mí dré Èzèpétò agó kònàdhi ni pfûle dràle agyá dhi tíni? ²⁹Mósè kòyi kúlí nda dre dhi, dré lapázó bvò nda lésè, lile atsálé móndí twá ro bvò Màdiyánà àdhya na. Gò dré àanziago ri dhi kí tizo kònàle.

³⁰Kóná nyadhi-rì àmvolésè dhi, ángéló àlo dhi dré agázó Mósè kandrá fanzí adrélépi tákole àtsi ró dhi na, duku ànyi kòngó Sìnáyì àdhya làga dhi na.

³¹Dì Mósè kònò tà nda dre dhi, akódhi ni líndrí dré gàzo bhwäbhwa ngá dré adrélé nôle nda ni tà sè. Dré tá adrérà'a áyi kisí ànyi ngá nda ni no dhi 'á dhi, dré Míri ni kúlí yìzo tàá dhi:

³²«Ma Gìká ámi tábhí kya 'i, Gìká Àbàrámà àdhya, Ìsákà àdhya ìndì Yakóbhò àdhya 'i. » Mósè dré ngàzo adrélé lyale gò, dré gózo ngá nda ni tabhì nôle ko tirì dré.

³³Dì Míri dré tazoá drá dhi: «Mí tuvù ámi kámokà i mí pásè. Tako ko, àrà mí dré adrészó ámi totó 'á kònìdhi, àrà lolo dhi 'i.

³⁴Má nò kizà áma móndyá i dré adrélé nyale Èzèpétò na dhi, àyi ki tongotongo ki yìzo dre. Dì má así kitswálé àyi ki apá dhi bvó. Mí alì dì nyànomvá, má kòmùró mi lile Èzèpétò na. »

³⁵Mósè kòdhi, dhya Ìsérélè ànzi i dré tá gàle tazoá drá dhi, «Àdhi bhà mi adrélé ópí ro ìndì tábvo tålepi ró áma drile dhi nì? » nda 'i. Dì, Gìká mù tá ína akódhi nda adrélé àyi ki ópí ro ìndì àyi ki apálépi ró dhi kòdhya. Mù tá akódhi ángéló agálépi akódhi kandrá fanzí adrélépi tákole dhi na dhi sè.

³⁶Dì Mósè nda adrì tá Ìsérélè ànzi i apfözo àyi íbe Èzèpétò lésè dhi nì. 'O tá tà líndríga ró adrébhá tá Gìká ni rinyí tadhá dhi i Èzèpétò na, yìandre Kika mìle, ìndì duku na kóná nyadhi-rì.

³⁷Mósè kòdhi, dhya tá tålepi Ìsérélè ànzi i dré dhi, «Gìká ni pròfétà àlo má tíni dhi ni 'o apföle ámi ki tändi ki surú lésè amùle ámi dré» nda 'i. ³⁸Akódhi nda tá túmání áma ki móndyá ru kimóbhá duku na dhi íbe. Totó tá i áma ki tábhí ki kòfalé 'á, ángéló adrélépi tákole i be kòngó Sìnáyì àdhya drìna dhi be. Kisú tá kúlì líndri àdhya i gò, kúlì nda ki longozó tayílé áma dré.

³⁹Dì, áma ki tábhí nda i lè tá àyikya akódhi ni kúlì ka'ile 'ole ko. Be ró dhi, i gá tá àyikya akódhi. Àyi ki togó na dhi, i lè tá gòle Èzèpétò na.

⁴⁰Gò i dré tazoá Àrónà dré dhi: «Mí ledé áma dré gíká kitswábhá áma ki drì ko dhi i wà. Àngyá ko, kàdré ína Mósè áma ki adrilepi apföle Èzèpétò lésè kòdhi ni tà sè dhi, mà ni ngalè àdho tákole 'o akódhi nì ya dhi ko. »

⁴¹Dì i dré tí ngbòlò líndri ledézó, ngá fèzo drá mòbòmà ro gò, gwányá 'òzo lenzézó ngá líndri i dré tá ledélé àyi ki drígá sè nda ni tà sè.

⁴²Dì, Gìká dré ína àmvò alázó àyi rú gò, àyi ki tayízó adrélé líndri fe bhìbhínyà bhù na dhi i dré, ngóró tísile búkù pròfétà kya na dhi tíni: «Ìsérélè ànzi ni i, mì alì tá tsì kà'wá pfule dhi ki afè má dré mòbòmà àruka íbe, mì dré tá adrérà'a duku na kóná nyadhi-rì dhi 'á dhi 'i? »

⁴³Kóko! Mì todó tá àmikya ngá líndri mì dré tá ledélé kitswázó líndri fe drá dhi i kòdhya: wémà Mòlókò àdhya i bhìbhínyà líndri àmi ki gíká Ràyífánà àdhya be. Dì ásà dhi, má ni àmi ki mu adrélé móndí twá i ró bvò Bábilonà àmvona dhi na. »

⁴⁴Àma kí tábhí nda i todó tá kpà tábérénákolò adrélépi Gíká ni adrema ni tà tadhá dhi duku 'ásè. À ledé tá tábérénákolò nda lású be ngóró Gíká dré tá tâle Mósè dré dhi tíni, ìndì ngá líndrí dré tá tadhálé drá dhi tíni.

⁴⁵À kòtayí tábérénákolò nda àma kí tábhí i dré Yòsúwà be dre dhi, àyi nda i dré dòzoá lizo ába bvò súrú twá Gíká dré drôle àyi kandrásè dhi kya na. Gò tábérénákolò nda dré adrészó bvò nda lé tsale ópí Dàwídì ni lókyá 'á.

⁴⁶Dàwídì nda ni tà tá dôro Gíká mîlésè gò, dré Gíká ni ti lizízó, kòtayíró i dzó kàdrì si Gíká Yàkóbhò àdhya dré. ⁴⁷Dì, Dàwídì ni mvá Sòlòmónò dré ína dzó kàdrì nda ni sîzo drá nì.

⁴⁸Dì, Gíká kurú na bhù na dhi adrélé dzó móndí i dré adrélé sile dhi i 'ásè ko. Ngóró prôfétà dré adrélé tâle dhi tíni:

⁴⁹«Míri tà dhi: Bhù àrà má dré adrészó lîrîlé adrélé òpí nya 'á dhi 'i, ìndì bvò àrà má dré adrészó áma pá bha driá dhi 'i. Mì ni dì dzó kárá be ngíni dhi ni si má dré kòdhyá? Àrà má dré dra lovózó lána dhi ni adré ángolé?»

⁵⁰Àma drígá ledé ngá kòdhi i tití nì ko? »

⁵¹Àmi àmi kí togó 'obhá tombálé, ìndì àmi kí bíbhálé tabhóbhá adrészó ligílé Gíká rú ni i, àmi ngóró àmi kí tábhí nda i tíni: Mì adré ngbú adrélé Tírí Lolo ni kúlí kayikayi!

⁵²Prôfétà àlo àmi kí tábhí i dré mì pfôle ko dhi tsì be? I tupfú tá ndìndì prôfétà adrébhá tá Dhya gyágga dhi ni alîma ni tà longó dhi i todrâle. Dì nyànomvá dhi, mì lefè àmîkyâ akódhi nda kàribhá i drígá gò, mì dré akódhi ni pfûzo drâle.

⁵³Mì kisú tá Gíká ni tátrítrí kúlí dré longólé ángéló i tí dhi gò, mì dré àmîkyâ tà tátrítrí kúlí nda dré adrélé tâle dhi kí ka'ízo 'ôle ko! »

À lebhé Sètèfánò drâle kí' rà sè

⁵⁴Bhàgo kàdrì nda i kòyi tà nda i dre dhi, àyi kí togó dré aswázó Sètèfánò rú gò, i dré adrészó sîkálândrá tsì bvóá.

⁵⁵Dì, Sètèfánò gâlepi Tírí Lolo sè nda dré ína mì tingázó kurú na bhù na Gíká ni mîlanzilanzì no, ìndì Yésu ni no adrérâ'a áyi totó Gíká ni dríágó lésè.

⁵⁶Dré tâzoá dhi: «Mì nò rè ká! Má adré nòá dhi, bhù lanzí ru dre. Dì má adré Mónđí ni Mvá ni no adrérâ'a áyi totó Gíká ni dríágó lésè! »

⁵⁷I kòyi tà nda sè dhi, i dré àyi kí bíbhálé tabhózó gò, tetrézó kúlí 'u'u sè. Dì i dré dhèzo Sètèfánò dri,

⁵⁸akódhi ni se pfôzo ába bhàandre 'ásè kívì na gò, i dré kidhózó adrélé akódhi ni lebhé kírâ sè. Dì akódhi ni asíkibhá nda i tuvù tá àyi kí kítâ kidhì àdhya i lebhélé kàdhûrà àlo rú zile Sàwûlò dhi pá. ⁵⁹I dré tá adrérâ'a Sètèfánò ni lebhé dhi 'á dhi, adré tá liyílé Míri rú adrészó tâá dhi: «Míri Yésu, mí do áma lídrì wà! »

⁶⁰Dì dré dhèzo áyi kórökó titì gò, yòzoá dhi: «Míri, mí bhà tákonzì kònìdhi àyi dri ko. » Kòtâ tà nda dre dhi, dré drâzo.

Tà 'òle dhi i 8

¹Dì Sàwúlò nda ka'i tá kpà dhi, à kòpfu Sètèfánò dràle wà dhi 'í.

À pfo móndyá Èkèlézyà le dhi kí mì lavúlé

Kidhólé kitú nda sè dhi, à dré kidhózó adrélé móndyá Èkèlézyà Yérusalémà àdhya lé dhi kí mì pfo lavúlé. Dì àyi tití nda i dré lapázó ayibe bvò Yùdáyà àdhya 'ásè ìndì Sàmàrýà àdhya 'ásè. Tayí tá ngbà 'í àpóstolò i Yérusalémà 'a kòdhya.

²Àgo àruka adrébhá tá trôle Gìká ni tà rú dhi i dré Sètèfánò ni àbvò dòzo, lìzo siá. Gò i dré akódhi ni ngòzo tà tändi ró.

³Dì, Sàwúlò ro dhi, dré ína ayibe fèzo kitswálé Èkèlézyà ni tà pfu. Adré tá tatsílé Yésu ni ka'ibhá kí ndabe dzó àlo àlo i 'ásè, adrészó àgo kí turú tòkó ibe, adrészó àyi kí 'o lebhélé bădzó na.

Filípò longó Rúbí Tani Sàmàrýà na

⁴Móndyá ka'ibhá ayibhá nda i adré tá Rúbí Tani longó àrà tití i dré adrészó lavúlé dhi i 'ásè.

⁵Dì Filípò lì tá ína bhàandre àlo bvò Sàmàrýà àdhya lé dhi na gó, kidhólé adrélé Mèsíyà ni tà longó móndí i dré kònàle.

⁶Móndyá zyandre nda i kòyi tà Filípò dré adrélé tâle dhi i, ìndì i kònò tà líndríga ró dré adrélé 'ole dhi i dre dhi, i dré adrészó bíbhálé ga akódhi ni kúlí yi lovó sè.

⁷Tirí kònzi bě dhi i adré tá topfòle móndí i lésè tetrébe. Móndí bě mèrèkpè ro, ìndì pá be àbvò ro dhi i adré tá kpà adrílé.

⁸Tà nda sè dhi, arí adré tá gâle bhàandre nda léna bě.

Sìmónà kódzogó ro dhi ka'i Yésu

⁹Bhàandre nda 'á dhi, agó àlo rú be Sìmónà dhi adré tá làndrí ndri lókyá be vwàvvà ro, adrészó móndyá tití Sàmàrýà le dhi kí líndrí tigá. Adré tá tâa dhi, i ína móndí kàdrí 'i.

¹⁰Móndyá tití kidhólé àyi tâko i rú tsâle àyi kàdríkàdrí i rú dhi i adré tá akódhi ni yi lovó sè, adrészó tâa dhi: «Dhya kòdhí, rinyí angálépi Gìká vélésè rú zile <Rinyí kàdrí> dhi 'i. »

¹¹I adré tá trôle akódhi rú, dré tá adrélé àyi kí líndrí tigá áyi làndrí tà sè lókyá be vwàvvà ro dhi sè.

¹²Dì, i kòyi Rúbí Tani Filípò dré adrélé longolé Gìká ni Òpì ni tà dri ìndì Yésu Krísto ni tà dri dhi dre dhi, àyi àgo ró ìndì tòko ró dhi i dré Rúbí nda ni ka'izo gó, i dré bâtísimò dòzo.

¹³Sìmónà ni tändi dré kpà ka'izoá gó, bâtísimò dòzo. Dré ngàzo adrélé trôle Filípò rú, adrészó tà kàdrí líndríga ró dré adrélé 'ole dhi kí no gó, akódhi ni líndrí dré adrészó gâle ásà.

¹⁴Àpóstolò Yèrúsalémà na dhi ì kòyi tâle dhi, móndyá Sàmàríyà le dhi ì ka'ì tá Gìká ni kúlí dhi dre dhi, ì dré Pétéró kí amùzo Yòwánì be àyi vélé.

¹⁵Àyi nda ì kàtsá dre dhi, ì dré tà zìzo Gìká tí móndyá ka'ibhá nda ì dré, ì kòkisúró Tirí Lolo be dhi bvó.

¹⁶Tako ko, Tirí Lolo nda asó tá rè dhu àyi ko. Ì kisú tá ngbà 'í bâtísimò Míri Yésu ni rú sè dhi kòdhyá.

¹⁷Dì Pétéró i Yòwánì be dhi ì dré drígá bhàzo àyi àlo àlo tití nda ì dri gò, ì dré Tirí Lolo kisúzó.

¹⁸Dì Sìmónà nda kònò, móndí ì adré tá Tirí Lolo kisú àpóstolò kí drígá bhàma àyi dri dhi sè dhi dre dhi, dré làfa lèzo fèle Pétéró i dré Yòwánì be,

¹⁹tàzoá dhi: «Mí afè kókpà rinyí kòdhi má dré wà, kîtswálé dhya ángùdhi má dré dra drígá bhàzo drìá dhi kòkisúró Tirí Lolo be dhi bvó. »

²⁰Dì, Pétéró logó drá dhi: «Mí kòdrà túmâni ámi làfa be! Tako ko, mí kisù tá mína dhi, mí ni tá tà Gìká dré adrélé afèle àngyá dhi ni gi làfa sè.

²¹Mí tà àko Gìká ni àzí kòdhi léna, ámi togó dré adrélé gyägya Gìká kandrá ko dhi sè.

²²Lè mí kòladzá dì ámi togó tà kònzi mí dré kisùle 'ole kòdhi ni tà sè. Mí zi kpà tà Míri tí, kòtriró ámi tà kònzi nda be dhi bvó.

²³Tako ko, má nò dhi, ámi togó ga tà kùdzí sè bì, ìndì mi móndí 'ile tàkonzi sè dhi 'i.
»

²⁴Dì Sìmónà logó dhi: «Àmi kí tändi, mí kòzi tà Míri tí má dré àmi, tà mí dré tâle kòdhi kí àlo kàtsáró má rú ko dhi bvó. »

²⁵Àmvolásà dhi, Pétéró i Yòwánì be dhi ì dré Míri Yésu ni tà ì dré nòle ìndì ì dré yile dhi kí longozó, akódhi ni kúlí tadházó móndyá kònale dhi ì dré. Gò ì dré gòzo gòle Yèrúsalémà na, Rúbí Taní longóbe bhà bì Sàmàríyà kya i 'ásè.

Filipò longó Rúbí Taní Ètiyòpíyà agó àlo dhi dré

²⁶Àmvolásà dhi, ángéló Míri àdhya dré tàzoá Filipò dré dhi: «Mí nga lile tâbhu na láti silepi Yèrúsalémà lésè lile Gázà na duku 'ásè dhi 'ásè. »

²⁷Dì Filipò dré ngàzo lile. Láti 'á dhi, ì dré drì sìzo Ètiyòpíyà agó àlo dhi be. Akódhi nda tá ùníkì 'i, ìndì móndí kàdrì Kàndákè, Ètiyòpíyà kí ópí kàdrì toko ró dhi zàle, adrélépi làfa ni ni likí tití dhi 'i. Akódhi lì tá Yèrúsalémà na kîtswálé Gìká ni lindrì bha.

²⁸Dré tá adrérà'a nzile dhi 'á dhi, lirí tá áyi tâmàmbírì dòngí dré adrélé sèle ni dhi na, adrélé búkù prôfétà Èsáyà àdhya ni na kúlí be drâdra.

²⁹Gò Tirí Lolo dré tàzoá Filipò dré dhi: «Mí kisí mi ànyi tâmàmbírì kòdhi làga, mí kòliró túmâni agó kòdhi be. »

³⁰Dì Filípò dré ràzo tsàle ànyi tàmàmbíri nda làga gò, agó nda ni yi adrérà'a búkù pròfétà Èsáyà àdhya ni na. Dré lizízóá tíá dhi: «Mí ni tà mí dré adrélé nàle kòdhì ni àndu be? »

³¹Dì agó nda logó dhi: «Má ni kitswá niá ngíni dhya àlo kòngi àndu ni má dré ko dhi? » Dì dré Filípò ni zizo mbàle lirílé í làga tàmàmbíri na.

³²Tà Gíká ni Kúlí na dré tá adrélé nàle dhi tá tà kònìdhì 'i: «À drì tá akódhì ànzyà gà à dré adrélé kábilígyà se lìzo ába àrà adrészó liá dhi na dhi tíni. Ngóró kábilígyà mvá dré adrélé kíri dhya adrélépi áyi bhí re dhi kandrá dhi tíni dhi, akódhì nzì ti ko.

³³À nò tá akódhì móndí tåko ró gò, akódhì ni tàbvó tåzo gyägya ko.

Àdhi ni kitswá akódhì ni ànzimvá ki tà tití dhi nì? Tåko ko, à tingá akódhì ni lídrì bvò drísè dre. »

³⁴Gò Ètiyòpíyà agó nda dré lizízóá Filípò tí dhi: «Mí tà rè má dré ká: Pròfétà kòdhì adré àdhi ni tà ta kòdhya? Adré áyi tändi ni tà ta, kó ngalè móndí àzya ni tà ta kòdhya? »

³⁵Dì kidhólé tà dré tá adrélé nàle nda rú dhi, Filípò dré Rúbí Taní Yésu ni tà dri dhi ni longozó drá.

³⁶Ì dré tá adrérà'a lìle láti 'ásè dhi 'á dhi, ì dré tsàzo ànyi àrà àlo yí be dhi làga. Dì Ètiyòpíyà agó nda dré tåzoá dhi: «Mí nò rè ká! Yí kó be kòdhì dhi, tà má dré kitswázó bátisimò do bwà ko dhi àdho tà 'i? » [³⁷]

³⁸Dì dré tåzoá dhi, à kòkikí tàmàmbíri. Gò Filípò i agó nda be dhi ì dré sìzo fíle yí na gò, Filípò dré bátisimò fèzo drá.

³⁹Dì ì kàpfò yí nda lésè dre dhi, Mírì ni Tírì dré ndírì Filípò ni dòzo. Ètiyòpíyà agó nda gò vélé akódhì ni no ko. Dì dré gózo adrélé lìle lenzébe.

⁴⁰Dì Filípò ro dhi, dré gózo áyi kisú bhàandre rú zile Àzótò dhi na. Dì dré ngàzo láti do lìzo Kàyisàriyà na, Rúbí Taní longóbe bhàandre àlo àlo tití dhi i 'ásè.

Tà 'ole dhi i 9

Sàwúlò ladzá áyi togó Yésu ni ka'ì
(À kònò kpà Tà 'ole dhi i 22:6-16; 26:12-18)

¹Lókyá nda kònàdhì sè dhi, Sàwúlò gò ína adrélé lalílé Mírì Yésu ni ka'ibhá i bvó, adrészó dràdrà kúlí ta àyi ki tà sè. Dì dré ngàzo lìle kòwánà ki kàdrì véna

²akódhì ni lizí, kòtisiró wárágà i Yúdà ànzì ki lìsámbò dzó ki kàdrì Dàmàsékè na dhi i dré, í kònì tsa móndí àgo ró ìndì tòko ró adrébhá Yésu ni láti lebè dhi ki kisú dhi, í kòturúró àyi agòzo àyi íbe Yèrúsalémà le be dhi bvó.

³Dì dré tá adrérà'a láti 'á, adrélé tsàle ànyi Dàmàsékè làga dhi 'á dhi, ngádra bhù lésè dhi dré kòzo ngbò ró ngá kazá akódhì làgásè kúrú.

⁴Dì dré dhèzo kìní mi gò, kúlí yi tárà'a i dré dhi: «Sàwúlò, Sàwúlò, mí adré áma mì pfo àdho tà sè? »

⁵Sàwúlò lizí dhi: «Míri, mí àdhi 'í? » Dì kúlí nda logó drá dhi: «Ma Yésu mí dré mína adrélé mí pfôle dhi 'í.

⁶Dì mí nga file bhàandre na. Kònàle dhi, à ni tà kitswálépi mí dré dra 'ole dhi ni ta mí dré. »

⁷Móndyá adrébhá tá atsí to túmání Sàwúlò be dhi ì kikí tá àyi, adrélé tà nda ni no sibhalé be ngbo. Ì yi tá kúlí nda 'í, dì, ì nò àyikya dhya àlo ko.

⁸Gò Sàwúlò dré ngàzo kìní misè. Dì, dré mí nzìzo dhi, kitswá tá ína ngá no bwà ko. Dì à dré akódhi ni drígá rùzo, akódhi ni sèzo fízo ába Dàmàsékè na.

⁹Gò dré adrészó kònàle kítú na ngá no àko ró, ngá nya àko ró ìndì ngá mvu àko ró.

¹⁰Dàmàsékè na dhi, Yésu ni ka'ilepi àlo rú be Ànàníyà dhi tá be. Dì ngá dré agázó akódhi mi toróbí tini gò, Míri dré tàzoá drá dhi: «Ànàníyà! » Akódhi logó dhi: «Míri, ma kònìdhì. »

¹¹Dì Míri tà drá dhi: «Mí nga lìle láti andre rú zile Pyà dhi na, agó àlo rú be Yùdásì dhi bhàna. Kònàle dhi, mí lizí agó rú zile Sàwúlò angálépi Tàrúsò lésè dhi ni tà. Akódhi nda adré tà zi má tí lókyá kònìdhì sè.

¹²Ngá agá akódhi mi toróbí tini gò, dré agó àlo rú be Ànàníyà dhi ni nòzo firà'a drígá bha ì dri, ì kògòró ngá no be dhi bvó. »

¹³Dì, Ànàníyà logó dhi: «Míri, má yi móndí bì dhi ì tí tà kònzi tití agó kòdhì dré 'ole ámi móndyá lolo Yérusalémà na dhi ì rú dhi ì 'í.

¹⁴Atsá kpà kònwa rìnyí ì dré kisulé kòwánà kàdrì i véna dhi be, kitswálé móndyá tití adrébhá ámi zi àyi kí Míri ro dhi kí turú dhi bvó. »

¹⁵Dì, Míri tà Ànàníyà dré dhi: «Mí lì! Tako ko, agó kòdhì dhya má dré zile adrélé áma àzí 'o dhi 'í. A ni lì áma tà longó móndyá súrú twá ro dhi ì dré, àyi kí ópí ì dré, ìndì Isérélè ànzi ì dré.

¹⁶Má ni kizà kàdrì kitswálépi dré dra nyàle áma tà sè dhi ni tadhá drá. »

¹⁷Gò Ànàníyà dré lìzo file Sàwúlò ni kisú dzó nda na. Dré drígá bhàzo akódhi dri, tàzoá dhi: «Áma adrúpi Sàwúlò, Míri Yésu agálépi mí kandrá láti bhálé dhi amù ma ntì, mí kògòró ngá no, ìndì mí kògaró Tirí Lólo sè be dhi bvó. »

¹⁸Gbà kòdhwa, ngá ngóró kosyá kobhó tini dhi dré adhézó Sàwúlò mìlésè gò, dré gózo adrélé ngá no. Dì dré ngàzo bátísímò do.

¹⁹Bvóá dhi, dré ngá nyàzo gò, gózo rìnyí kisú.

Sàwúlò longó Rúbí Taní Dàmàsékè na

Gò Sàwúlò dré adrészó Yésu ni ka'ibhá Dàmàsékè le dhi i véna lókyá be vwàvvà ro tsà.

²⁰Gbà lókyá nda sè dhi, dré ngàzo adrélé Yésu ni tà longó Yúdà ànzi kí lìsámbò dzó i 'ásè, adrészó tadhá dhi, Yésu nda Gìká ni Mváagó 'i káyà dhi.

²¹Móndyá tití adrébhá akódhí ni yi dhi kí líndrí adré tá gàle bhwäbhwa gò, ì dré adrészó lizíá àyi kófalésè dhi: «Agó kòdhí tsì dhya adrélépi tá móndyá adrébhá Yésu kòdhí ni ka'ì Yérusalémà na dhi kí mì pfo lavúlé dhi 'ì ko? Atsá kònwa kitswálé àyi nda kí turú lìzo àyi íbe kòwánà kàdrì i véna ko? »

²²Dì, Sàwúlò adré tá ína atsálé rìnyi ró adrélé lìle drìdrì. Adré tá tadhá ngádra 'á dhi, Yésu Mèsiyà 'ì káyà dhi gò, Yúdà ànzì Dàmásékè le dhi ì dré kitswázó kúlí logó tíá bwà ko.

²³Lókyá kòlavú vwàle dre dhi, Yúdà ànzì nda ì dré ngàzo ru yi kitswázó Sàwúlò ni pfu dràle dhi bvó.

²⁴Dì, Sàwúlò dré ína tà nda ni yìzo. Kítú vésè ìndì ngátsi vésè dhi, ì adré tá rìle akódhí bvó bhàandre nda ni zéríbàti i 'ásè, kitswálé akódhí ni pfu dràle.

²⁵Dì ngátsi àlo sè dhi, akódhí ni lebèbhá ì dré akódhí ni bhàzo kánzì na gò, akódhí ni tirízó zéríbà drísè kívì na gò, dré lapázó.

Sàwúlò tsa Yérusalémà na

²⁶Gò Sàwúlò dré lìzo Yérusalémà na. Kòtsa dre dhi, dré áyi tabhizo amúlé Yésu ni ka'ibhá íbe. Dì, àyi tití nda ì adré tá àyikya akódhí ni ro. Tàko ko, ì ka'ì tá ko tâle dhi, akódhí atsá Yésu ni ka'ilepi ró bâti dhi.

²⁷Dì, Bárànábà dré ína akódhí ni drìzo lìzo ába àpóstolò i véna. Gò dré Sàwúlò nò tá Míri Yésu láti 'á, ìndì Míri tà tá akódhí dré ngíni ya dhi kí titízó àyi dré. Dré kpà Sàwúlò longó tá Yésu ni tà tìrì àko Dàmásékè na ngíni ya dhi ni titízó.

²⁸Dì ì dré Sàwúlò ni ka'ìzo dòle adrélé túmáni àyi íbe. Akódhí adré tá tatsílé Yérusalémà 'ásè, Míri ni tà longóbe tìrì àko.

²⁹Adré tá kpà tà ta ìndì tà kayí Yúdà ànzì adrébhá Gírikì ti ta dhi íbe. Dì, àyi nda ì dré ngàzo adrélé láti nda kitswázó akódhí ni pfu dràle.

³⁰Dì Sàwúlò ni adrúpi Yésu ni ka'ibhá dhi ì kòyi tà nda dre dhi, ì dré akódhí ni drìzo lìzo ába Kàyìsàrìyà na gò, mùzoá lìle Tàrúsò na.

³¹Dì Yésu ni ka'ibhá tití bvò Yùdáyà àdhya na, Gàliláyà àdhya na, ìndì Sàmàrìyà àdhya na dhi i tá tà kìdríkìdrì íbe àyi kófalé móndí àruka íbe. Gíká adré tá àyi kí tìmbà àyi kí tà ka'ika'ì na. Ì adré tá lizolé, adrélé tà 'o Míri ni ròma na, ìndì Tírì Lólo ni rìnyí sè, adrészó lìle ába drìdrì.

Pétéró 'o tà li' ndri' ga ró dhi i Lídà na i` ndi` Yópè na

³²Pétéró dré tá adrérà'a tatsílé àrà twátwa i 'ásè dhi 'á dhi, tsa tá Yésu ni ka'ibhá bhàandre Lídà àdhya na dhi kí no.

³³Kònàle dhi, dré agó àlo rú be Àyìnéyà, adrélépi pá be àbvò ro dhi ni kisúzó. Akódhí nda ayí tá lángá na kóná nzi-drì-na.

³⁴Dì Pétéró dré tàzoá drá dhi: «Àyìnéyà, Yésu Krísto tidrí mi dre! Mí nga ámi kíndri pa! » Gbă kòdhwa, akódhí nda dré ngàzo trà kuru.

³⁵Dì móndyá tití adrébhá tá Lídà le ìndì Sàrónà le dhi i dré akódhì ni nòzo gò, i dré àyi ki togó adzázó Míri vélé.

³⁶Ànyi àrà nda làgana, bhàandre Yópè àdhya na dhi, tòkó àlo Yésu ni ka'ilepi, rú be Tàbítà dhi tá be. (Rú nda kòdhì adré lèá tâle Gírikì ti sè dhi «Dòrukà».) Akódhì nda adré tá ngbú adrélé tà doro 'o, adrészó kpà ngá fe lemerèbhá i dré.

³⁷Dì lókyá nda sè dhi, dré dhèzo drà be gò, dré dràzo. Dì akódhì ni rúbhá dzìzo gò, dòzoá bhàle dzó àlo dhi ni 'a kile kurú na dhi na.

³⁸Yópè nda ànyi Lídà làga. Dì Yésu ni ka'ibhá Yópè le dhi i koyi Pétéró tá Lídà na dhi dre dhi, i dré àgo rì dhi ki mùzo akódhì ni ti lizí, tazoá dhi: «Mí kàlì mbèlè àma vélé wà! »

³⁹Dì Pétéró dré ngàzo lile túmání àyi íbe. Kòtsa dre dhi, i dré akódhì ni drìzo mbàzo ába dzó 'a kile kurú na nda na. Tayítòkó tití dhi i dré ngàzo àyi ki totó ànyi akódhì làgásè adrélé àwó ngo, adrészó kítá twátwa Tàbítà nda dré tá dhile dré rè dhu adrérà'a túmání àyi íbe dhi 'á dhi ki tadhá drá.

⁴⁰Gò Pétéró dré móndyá tití nda ki 'òzo pfòle kivì na. Dré áyi kórókó titìzo, tà zìzo Giká tí gò, áyi alázó àbvò nda vélé tâá dhi: «Tàbítà, mí nga! » Dì akódhì nda dré mi nzìzo Pétéró ni no gò, ngàzo lirilé.

⁴¹Pétéró dré akódhì ni drígá rùzo gò, akódhì ni tingázó kuru. Dré Yésu ni ka'ibhá ki azizó tayítòkó íbe, Tàbítà nda ni tadházó àyi dré lídrì ro.

⁴²Dì tà nda ni rúbí dré la'uzó bhàandre wáyi Yópè àdhya 'ásè gò, móndí zyandre dhi i dré Míri Yésu ni ka'izo.

⁴³Gò Pétéró dré adrészó Yópè na lókyá be vwàvwà ro, agó àlo rú be Sìmónà, kíní nyilepi dhi bhàna.

Tà 'ole dhi i 10

Kòrùnèlìyò zi Pétéró i' bhàna

¹Agó àlo rú be Kòrùnèlìyò dhi tá bhàandre Kàyisàrìyà àdhya na. Akódhì nda tá Rómà ki sòdá adrélé zile Ìtálíyà àdhya ró dhi ki kàdrì 'i. ²Akódhì i móndyá tití akódhì ni dzó lé dhi íbe dhi, i adré tá trôle Giká ni tà rú, adrészó kpà akódhì ni ro. Adré tá ngá fe rä móndí lemerè ro dhi i dré, adrészó kpà tà ta Giká be landè àko ró.

³Kítú àlo, ànyiànyi sáà na kítú rírí àmvolésè dhi sè dhi, ngá agá tá akódhì mi toróbí tini. Akódhì nò ángéló àlo Giká àdhya ngádra 'á afírà'a i vélé, tâá i dré dhi: «Kòrùnèlìyò! »

⁴Dì dré ángéló nda ni nòzo dhi tirì dré gò, lizizóá tíá dhi: «Míri, àdho tâ 'i? » Ángéló nda logó drá dhi: «Tà mí dré zile Giká tí dhi i túmání ngá mí dré fèle lemerèbhá i dré dhi íbe dhi i mbà tsàle Giká kandrá gò, akódhì dré ámi tà kisùzo.

⁵Dì nyànomvá dhi, mí mù móndí lile Yópè na, agó rú be Sìmónà adrélé kpà rú zile Pétéró dhi ni azí.

⁶Akódhi nda adré ayílé kíní nyilepi àlo rú be Sìmónà dhi bhàna, yìandre mìle. »

⁷Dì ángéló tà tâlepi akódhi dré nda kòlì dre dhi, Kòrùnèlìyò dré áyi màrabà rì dhi kí azizó túmání sòdá àlo adrélépi tá tà 'o í dré, adrélépi kpà trôle Gìká nì tà rú dhi be.

⁸Dré tà tití lavúbhá nda kí titízó àyi dré gò, àyi kí mùzo lìle Yópè na.

Ngá agá Pétéró mi toróbí́ tí ni

⁹Kítú bvóá dhi sè, ànyiányi kítú rírí sè, dhya mûle nda i dré tá adrérà'a láti 'á ànyi Yópè làga dhi 'á dhi, Pétéró dré mbàzo dzó drì be kpàkpà dhi drìna, adrélé tà ta Gìká be. ¹⁰Tàbirí dré akódhi nì 'òzo gò, dré adrészó ngá le nyale. À dré tá adrérà'a ngá ladhí drá dhi 'á dhi, ngá dré afízó akódhi dri toróbí tíni.

¹¹Akódhi dré nòzoá dhi, bhù lanzí ru dre gò, dré ngá ngóró kítá pìpì gú rùle ti nì su dhi i 'ásè dhi tíni dhi nì nòzo adrérà'a asilé bvò dri.

¹²Kítá nda na dhi tá kà'wá pá be su dhi kí kárá twátwa dhi i, túmání kà'wá adrébhá àyi kí se agáti sè dhi kí kárá twátwa dhi íbe, ìndì àrì kí kárá twátwa dhi íbe.

¹³Gò kúlí àlo dhi dré tâzoá drá dhi: «Pétéró, mí nga àyi kí tupfú nyale! »

¹⁴Dì, Pétéró logó dhi: «Míri, tâdzí ko! Tako ko, má nya ngá ndí ró tátrítrí kúlí dré adrélé logálé dhi kí àlo tâdzí ko. » ¹⁵Dì kúlí nda dré gòzo tâá drá dhi: «Mí zi mína ngá Gìká dré temvélé dre dhi ndí ró ko. »

¹⁶Tà nda dré ru 'òzo kònìní vésè be na gò, kítá nda ni dòzo bhù na.

¹⁷Dì Pétéró nì drì dré abízó tà nda sè gò, dré adrészó lizíá i léna ngalè ngá i dré nòle nda adré tá lèá tâle ngíni ya dhi. Gbă lókyá nda sè dhi, dhya Kòrùnèlìyò dré tá mûle nda i dré Sìmónà nì bhà lizízó, atsázó dzó nda tí.

¹⁸Gò i dré kúlí yòzo, lizízóá ngalè Sìmónà adrélé kpà rú zile Pétéró dhi adré ayílé dzó nda na yà dhi.

¹⁹Dì Pétéró dré rè dhu adrérà'a ngá i dré nòle nda ni tà kisù dhi 'á dhi, Tirí Lólo dré tâzoá drá dhi: «Mí yi rè ká! Ago na dhi i adré ámi nda.

²⁰Dì mí nga sile àyi véna, mì kòlìrò túmání àyi íbe tà kayí àko ró. Àngyá ko, má mù àyi ma. »

²¹Dì Pétéró kòsi dzó nda drilésè dre dhi, dré tâzoá àgo nda i dré dhi: «Ma kònìdhi dhya mì dré adrélé ndàle dhi 'i. Mì alì kònwa àdho tà sè? »

²²Dì i logó drá dhi: «Sòdá kí kàdrì rú be Kòrùnèlìyò dhi amù àma nì. Akódhi nda móndí gyägya, adrélépi Gìká nì ro dhi 'i. Yúdà ànzì tití dhi i adré akódhi nì rú ta dôro. Àngéló lólo Gìká àdhyà tà drá dhi, kòzi mì i bhàna ámi kúlí kí yìzo dhi bvó. »

²³Dì Pétéró dré àyi kí azizó ayílé dzó nda lé.

Pétéró li` Kòrùnèlìyò bhàna

Drùbhì sè dhi, Pétéró i dré ngàzo lìle àyi íbe túmání Yésu nì ka'ibhá àruka Yópè lésè dhi íbe.

²⁴Kítú bvóá dhi sè dhi, ì dré tsàzo Kàyìsàrìyà na. Kòrùnèlìyò kímó tá áyi aró i áyi arúpi kákà dhi íbe gò, ì dré adrészò àyi kí letè.

²⁵Dì Pétéró dré tá adrérà'a file bhà'álé nda na dhi 'á dhi, Kòrùnèlìyò dré alìzo adhélé akódhi pá, kitswálé akódhi ni lindrì bha.

²⁶Dì, Pétéró dré ína akódhi ni tingázó, tazoá drá dhi: «Mí nga. Áma tändi, ma kókpà móndí 'i mí tíni. »

²⁷Dì Pétéró ì dré tà titízó akódhi be gò, dré fízo móndyá zyandre ru kímóbhá nda kí kisú dzó na.

²⁸Gò dré tazoá àyi dré dhi: «Àmì tití, mì nì tâle dhi, Yúdà ànzì kí tátrítrí kúlí adré ru súma móndí súrú twá ro dhi íbe dhi ni logá àyi dré dhi be. Tátrítrí kúlí nda adré kpà fíma àyi bhàna dhi ni logá. Dì, Gíká tadhá ína má dré dhi, má kòzi dhya àlo ndí ró yà, kó ngalè móndí temvélé ko dhi ró yà dhi ko.

²⁹Ásà dhi, mì dré áma azízó dhi, má alì ndíri tà kayí àko ró. Má adré dì àmì kí lizí, mì azí ma àdho tà sè? »

³⁰Dì Kòrùnèlìyò logó dhi: «Lavú dre kítú na, sáà na kítú rírí àmvolésè dhi sè dhi, má adré tá tà ta Gíká be áma dzó kònìdhì 'á. Gbă kòdhwa, agó àlo kítá íbe lagulagu ró dhi dré agázó má kandrá,

³¹táá má dré dhi: «Kòrùnèlìyò, Gíká yi tà mí dré zile í tí dhi i 'í. Tivì kpà ngá mí dré fèlé lemerèbhá i dré dhi i ko.

³²Dì mí mù móndí lìle Yópè na, Sìmónà adrélé kpà rú zile Pétéró dhi ni azí. Akódhi nda adré ayílé Sìmónà kíní nyilepi dhi bhàna, yìandre mìle. »

³³Dì gbă lókyá nda sè dhi, má dré móndí mùzo lìle ámì azí. Mí 'o dóro alìzo. Dì nyànomvá dhi, àma tití ni i Gíká kandrá, kitswálé tà tití Mírì dré tâle mí kòtà àma dré dhi kí yi. »

Pétéró longó Rúbí Taní móndí́ súrú twá ro dhi i dré

³⁴Gò Pétéró dré ngàzo tàá àyi dré dhi: «Nyànomvá dhi, má nì tâle dhi, Gíká adré móndí kí no twátwa ko dhi be.

³⁵Be ró dhi, adré ína móndí súrú tití i lésè adrébhá áyi ro, adrébhá kpà tà gyăgya 'o dhi kí ka'ì kòdhya.

³⁶Gíká nda amù Rúbí Taní àma, Ìsérélè ànzì i vélé longózóá àma dré dhi, mà nì kitswá adrélé tà kìdríkìdrí íbe àma kòfalé í be Yésu Krísto sè. Yésu Krísto nda móndyá tití dhi kí Mírì 'í.

³⁷Àmì kí tändi, mì nì tâle tití ru 'obhá Yùdáyà na kidhólé Gàlìlàyà lésè, batísimò Yòwánì dré tá longolé dhi àmvolésè dhi i be.

³⁸Mì nì tâle dhi, Gíká zì tá Yésu Nàzàrétà lésè nda gò, Tírí Lólo fèzo drá rinyí be dhi be. Dì Yésu nda dré tatsízó tà dóro 'obe ìndì móndyá tití Dzáborò dré tá atolé í pálé dhi kí tidríbe. Tako ko, Gíká tá túmání akódhi be.

³⁹Àma dhya tà tití akódhì dré 'ole Yúdà ànzì kì bvò na ìndì Yèrúsalémà na nda kì nobhá mì sè dhi 'ì. À tidí tá akódhì dràle fa kípakipa dri.

⁴⁰Dì, kítú nì na sè dhi, Gìká dré ína akódhì nì tingázó dràdrà lésè gò, akódhì nì 'òzo móndí i dré nòle.

⁴¹Móndyá tití dhi i nò tá akódhì ko. Ngbà 'í àma Gìká dré tá zìle drìdrì kitswálé tà nda kì no dhi i, mà nò akódhì àma. Akódhì nì ngàma dràdrà 'ásè dhi àmvolésè dhi, mà nya ngá ìndì mà mvu ngá túmání akódhì be dhi àma.

⁴²Dì akódhì lazí tà àma dri tázoo dhi, mà kàdré áyi tà longó móndí i dré adrészó tadhá dhi, i dhya Gìká dré bhàle adrélé móndyá tití lídrì ro ìndì dràbhá dre dhi kì tábvo tâlepi ró dhi 'ì.

⁴³Pròfétà tití dhi i longó tá akódhì nì tà tázoo dhi, Gìká nì móndyá tití dra akódhì nì ka'ibhá dhi kì tákonzì tri akódhì nì rú sè. »

Móndí súrú twá ro dhi i` kisú Tírí Lólo

⁴⁴Pétéró dré rè dhu adrérà'a tà nda kì ta dhi 'á dhi, Tíri Lólo dré asízó móndyá tití adrébhá akódhì nì yi nda kì asó.

⁴⁵Dì móndyá ka'ibhá Yúdà ànzì ró alibhá tá túmání Pétéró be dhi i kònò, Gìká kutú tá kókpà Tíri Lólo móndí súrú twá ro dhi i dri dhi dre dhi, àyi kì líndrí dré gàzo bhwàbhwa.

⁴⁶Tako ko, i yi tá àyi nda i adrérà'a ti twátwa kì ta, adrészó Gìká nì rú bha kùle dhi 'í. Gò Pétéró dré tázoo dhi:

⁴⁷«Àdhi nì kitswá bátísímò dòma yí sè dhi nì logá móndyá kònì i dré dhi nì? Àngyá ko, i kisú àyikya Tíri Lólo àmakya tíni. »

⁴⁸Dì dré tázoo dhi, à kòfè bátísímò àyi dré Yésu Krísto nì rú sè. Gò i dré Pétéró nì ti lizizó, kàdréró dhu rè àyi véna lókyá tsà sè.

Tà 'ole dhi i 11

Pétéró ngi tà i` dré 'ole dhi kì àndu

¹Gò àpóstolò i móndyá ka'ibhá Yùdáyà na dhi i be dhi i dré yìzoá tâle dhi, móndí súrú twá ro dhi i kisú kókpà Gìká nì kúlì dre.

²Dì Pétéró kòli tsale Yèrúsalémà na dre dhi, móndyá ka'ibhá Yúdà ànzì ró dhi i dré dhèzo adrélé akódhì nì ndri,

³adrészó tâá dhi: «Mí fì mína móndí lwàle ko dhi i bhàna gò, mí dré ngá nyàzo túmání àyi i be! »

⁴Dì Pétéró dré ngàzo tà tití lavúbhá nda kì tití àyi dré mìbhalé tí, tázoo dhi:

⁵«Má tá mána bhàandre Yópè àdhya na. Kítú àlo, mà dré tá adrérà'a tà ta Gìká be dhi 'á dhi, ngá dré afízó mà dri toróbí tíni. Má nò tá ngá ngóró kítá pìpì gú rûle ti nì su dhi i 'ásè dhi tíni dhi adrérà'a asilé bhù lésè atsálé mà vélé.

⁶Má kòbhe mì ngá kítá nda léna dhí kí no dre dhí, má dré kà'wá pá be su dhí kí kárá twátwa dhí kí nòzo, túmání kà'wá mbì lésè dhí íbe, kà'wá adrébhá àyi kí se agáti sè dhí íbe, tsàle àrí íbe.

⁷Gò má dré kúlí yìzo tàá má dré dhí: «Pétéró, mí nga àyi kí tupfú nyàle! »

⁸Dí má dré logozóá dhí: «Míri, tàdzí ko! Tako ko, ngá ndí ró àma kí tátrítrí kúlí dré adrélé logálé dhí kí àlo afí rè má sile tàdzí ko. »

⁹Dí kúlí nda dré gòzo tàá bhù lésè dhí: «Mí zi mína ngá Giká dré temvélé dre dhí ndí ró ko. »

¹⁰Tà nda dré ru 'ozo kònini vésè be na gó, ngá tití nda kí dòzo bhù na.

¹¹Gbă lókyá nda sè dhí, àgo na tá amùle má vélé Kàyisàrýà lésè dhí ì dré àyi kí kikízó dzó mà dré tá adrészó lána dhí tí.

¹²Gò Tirí Lólo dré tázooá má dré dhí, mà kòlì túmání àyi íbe tà kayí àko ró. Dhya ka'ibhá nzi-drì-àlo kònì ì dré kpà lìzo túmání má be gó, mà dré fízo agó àlo rú be Kòrùnèlýò dhí ni dzó na.

¹³Gò akódhí nda dré í nò tá ángéló agárà'a í kandrá áyi dzó lé ngíni ya dhí ni titízó àma dré. Tà dhí, ángéló nda tà tá í dré dhí: «Mí mù móndí lile Yópè na Símónà adrélé kpà rú zile Pétéró dhí ni azí.

¹⁴A ni kúlí longó àmi dré móndyá tití ámi dzó lé dhí íbe gó, mì dré lídrì kóná vésè kólyá dhí ni kisúzó kúlí nda sè. »

¹⁵Dí má dré kidhórà'a tà ta Kòrùnèlýò nda í dré dhí 'á dhí, Tirí Lólo dré asízó àyi kí asó ngóró dré tá asilé àma kí asó kítú Pàtékotè àdhyá tú dhí tini.

¹⁶Gò kúlí Míri dré tá tâle dhí dré agázó má léna. Akódhí tà tá dhí: «Yòwánì fè tá ína bâtísimò yí sè. Dí, mì ni àmikya bâtísimò kisú Tirí Lólo sè. » ¹⁷Dí Giká fè kó àyi dré Tirí Lólo àlo nda í dré afèle àma Míri Yésu Krísto ni ka'ibhá í dré dhí kòdhyá dhí, ma dí tá mána àdhi 'í, kítswálé tà Giká dré tá lèle 'ole dhí ni kikí dhí? »

¹⁸Dí ì kòyi tà nda í dre dhí, ì dré kúlí tayízó gó, ì dré Giká ni rú bhàzo kùle, tázooá dhí: «Kàdré kònini dhí, Giká nzí dí kókpà láti móndyá surú twá ro dhí ì dré, ì kòladzáró àyi kí togó lídrì kóná vésè kólyá dhí ni kisú. »

Èkélézyà Àtiyòkíyà na dhí

¹⁹Móndyá ka'ibhá ayíbhá àyi kí mì pfòma Sètèfánò ni dràma àmvolésè dhí ni tà sè dhí, ì lì tá byá bvò Fòwínikè àdhyá na, tûrù Kípírò àdhyá na, ìndì bhàandre Àtiyòkíyà àdhyá na. Àyi nda í adré tá ngbà 'í Giká ni kúlí longó Yúdà ànzí ì dré.

²⁰Dí, àyi kí àruka angábhá Kípírò lésè ìndì Kirénè lésè dhí ì dré àyikya lìzo Àtiyòkíyà na gó, kidhólé adrélé tà ta móndí surú twá ro dhí ì dré, adrészó Rúbí Tani Míri Yésu ni tà dri dhí ni longó àyi dré. ²¹Giká ni rinyí tá túmání àyi íbe gó, móndí zyandre dhí ì dré àyi kí togó adzázó Míri vélé, akódhí ni ka'i.

²²Móndyá Èkèlézyà Yérúsalémà àdhya lé dhi ì kòyi rúbí nda dre dhi, ì dré Bàrànbà ni mùzo lìle Àtiyòkíyà na.

²³⁻²⁴Akódhi nda tá móndí doro gàlepi Tírí Lólo sè, adrélépi kpà tà ka'ika'i íbe kàdrì dhi 'i. Dí kòtsa Àtiyòkíyà na dre dhi, dré nòzoá dhi, Giká bhà tá áyi togó taní móndyá ka'ibhá nda i rú dre gò, dré lenzézó ásà. Gò dré àyi kí kodzozó tití tazoá dhi, ì kàdré trôle Míri ni tà rú togó wáyi sè. Dí móndí zyandre lavulé dhi ì dré Míri Yésu ni ka'izo gò, ì dré ru amúzó móndyá ka'ibhá kònàle nda íbe.

²⁵Àmvolásà dhi, Bàrànbà dré lìzo Sàwulò ni nda Tàrúsò na.

²⁶Kòkisú akódhi dre dhi, dré akódhi ni adrìzo agòzo ába Àtiyòkíyà le. Dí àyi nda ì dré adrészó ru kímó móndyá zyandre Èkèlézyà le dhi íbe, adrészó àyi kí tadhá kóná àlo. Àtiyòkíyà nda 'á dhi, à kídhó tá adrélé Yésu ni lebèbhá kí zi Krísto ni ka'ibhá i ró.

²⁷Lókyá nda sè dhi, pròfétà àruka ì dré angázó Yérúsalémà lésè atsálé Àtiyòkíyà 'a.

²⁸Àyi kí àlo rú be Àgábò dhi dré ngàzo longoá Tírí Lólo ni rinyí sè dhi, kàrábhò kàdrì dhi ni dhe bvò wáyi Rómà kí opí zàle dhi 'ásè. (Dí Kàrábhò nda dhe tá Rómà kí opí kàdrì, Kàlàwùdýò ni lókyá 'á báti.)

²⁹Dí móndyá ka'ibhá Àtiyòkíyà le dhi ì dré ru yìzo tazoá dhi, ì ni àyi kí ngá lokó ngóró àyi àlo àlo tití dhi ì dré kítswálé 'ole dhi tñi gò, mùzoá àyi kí adrúpi Yésu ni ka'ibhá Yùdáyà na dhi kí ledé.

³⁰Gò ì dré 'òzoá kònìnì. Ì dré Bàrànbà kí mùzo Pólò be ngá nda kí adzí Èkèlézyà Yérúsalémà na dhi ni bhàgo i véna.

Tà 'ole dhi ì 12

À pfu Yàkóbhò dràle, i`ndi` à ru Pétéró bhèle ba`dzó na

¹Lókyá nda kònàdhì sè dhi, opí Èródè Àgùrípà dré kídhózó adrélé Yésu ni ka'ibhá àruka kí mì pfo. ²Dré Yàkóbhò, Yòwánì ni adrúpi ni 'òzo pfûle dràle sápí sè.

³Kònò tà nda 'o tá Yúdà ànzì kí togó adrélé kinílé dhi dre dhi, dré kpà Pétéró ni 'òzo rùle. 'O tá tà nda gwányá Mápà tàkú àko dhi àdhya tú.

⁴Dí kò'o akódhi rùle dre dhi, dré akódhi ni bhèzo bădzó na gò, sòdá mudrí-drì-nzi-drì-àlo tukùle su su dhi kí bhàzo adrélé akódhi ni likí. Adré tá kisùá dhi, í ni akódhi ni 'o apfòle tàbvó tâle móndyá tití i kandrá gwányá Pásikà àdhya àmvolésè.

⁵Dí, à dré tá adrérà'a Pétéró ni likí bădzó na dhi 'á dhi, móndyá ka'ibhá dhi ì adré tá ayíkya tà zi Giká tí togó wáyi sè akódhi dré.

Míri 'o Pétéró apfòle bădzó lésè li`ndri` ga ró

⁶Kítú Èródè dré tá adrészó 'ole Pétéró ni tàbvó ta dhi ni ngátsi sè dhi, Pétéró adré tá ayí ko sòdá rì dhi ì kòfalé bădzó na. À adrò tá akódhi nyìrì rì dhi ì sè. Sòdá àruka ì adré tá àyi kí totó bădzó nda tí, adrélé bădzó likí.

⁷Gbă kòdhwa, ángéló Míri àdhya dré agázó Pétéró kandrá gò, ngádra dré kòzo ngá kazá dzó 'a kile nda na. Ángéló nda dré akódhi ni gbúlú sàzo akódhi ni torozó ayí lésè gò, tazoá drá dhi: «Mí nga mbèlè! » Gò nyìri dré adàzo akódhi drígásè.

⁸Dí ángéló nda dré tazoá drá dhi: «Mí 'ì ámi kafà ámi kípílé 'á, ámi kámokà ki tosózó. » Dí Pétéró dré 'òzoá ngóró tâle i dré dhi tíni. Gò ángéló dré tazoá drá dhi: «Mí asó ámi kítá kidhì àdhya, mí kàliró má vésè. »

⁹Dí Pétéró dré dhèzo akódhi bvó adrélé akódhi ni lebè. Nì tá ko tâle dhi, tà ángéló nda dré adrélé 'ole dhi tá tà tändi i dhi. Adré tá ína kisùá dhi, ngá agá tá i mi torobí tíni.

¹⁰I dré àrà ni àlo ìndi ri ni sòdá i dré tá adrészó bădzó likí dhi kí lavúzó gò, i dré tsàzo dzóti kàdrì aya ró adrészó pfòle 'ásà bhàandre na dhi kandrá. Dí dzóti nda dré ru nzìzo áyi tà sè àyi dré, gò i dré pfòzo. I kòlì láti 'ásè vwàle tsà dre dhi, ángéló nda dré ndiri Pétéró ni tayízó.

¹¹Kùdù ro dhi, Pétéró dré ína tà nda ni atógyàzo, tazoá dhi: «Nyànomvá dhi, má ni báti tâle dhi, Míri amù áyi ángéló áma apá Èròdè drígásè, ìndi tà tití Yúdà ànzì i dré tá lèle 'ole má rú dhi i lésè dhi dre dhi. »

¹²Dí tà nda kòfí Pétéró drìna dre dhi, dré lìzo Màrìyà, Yòwánì Márokò ni andre ni dzó na. Kònàle dhi, móndí zyandre dhi i kímó tá ru adrélé tà zi Giká tí.

¹³Akódhi kòga dzóti adrészó fîle kivì lésè dhi dre dhi, mvátòkó àlo marrábà ro rú be Ródà dhi dré áyi kisizó ànyi dzóti nda làga.

¹⁴Kòyi Pétéró ni kúlí nile kyá dre dhi, dré áyi tapízó râle dzó na dzóti nzi àko ró togó kíní dré gò, dré longozóá móndyá tití dzó lé dhi i dré dhi: «Pétéró kivì na dzó tí. »

¹⁵I logó drá dhi: «Ngá kizá mi nì! » Dí, gò tâá rìnyí sè dhi: «Tà báti 'i! » I gò tâá dhi: «Kòdhì akódhi ni líndri 'i. »

¹⁶Dí, Pétéró dré ína gózo adrélé dzóti ga. I kònzi akódhi ni no dre dhi, àyi kí líndri dré gàzo bhwâbhwa.

¹⁷Dí Pétéró dré drígá bhàzo kuru àyi kí kúlí kikizó gò, dré Míri 'o tá i apfòle bădzó lésè ngíni ya dhi ni titizó àyi dré. Gò tazoá dhi: «Mí longó tà kòdhì Yàkóbhò i dré áma kí adrúpi àruka tití dhi íbe be. »Gò dré pfòzo lile àrà àzya na.

¹⁸Ngá kòwa dre dhi, sòdá adrébhá tá bădzó likí nda kí drì dré abízó nyïnyi gò, i dré adrészó lizíá àyi kòfalésè ngalè àdho tà 'o tá Pétéró ni ya dhi.

¹⁹Dí Èròdè dré móndí kí mùzo lile akódhi ni nda gò, i dré àyikya kisuzóá ko. Dí dré sòdá adrébhá bădzó likí nda kí lizizó tà tändi ró gò, àyi kí 'òzo tupfûlé todrâle.

Èròdè Àgùrípà ni dràma

Àmvolásà dhi, ópí Èròdè dré ngàzo bvò Yùdáyà àdhya lésè lile adrélé Kàyìsàrìyà na lókyá be vwàvvà ro.

²⁰Akódhi ni togó adré tá aswálé móndyá bhàandre Tírè kya Sìdónà be dhi i 'ásè dhi i rú. Dí àyi nda i dré ru yìzo, móndí ki mùzo lile Èródè ni ti lizí, tà kìdríkìdrí kàdréró àyi kòfalé akódhi be be dhi bvó. Àngyá ko, àyi ki mányàngá wäyi dhi adré tá apfòle ópí nda ni bvò lésè. Dí dhya mûle nda i dré ru yìzo Èródè ni dzó likíbhá ki kàdrí rú be Bálástò dhi be gò, kitú tà tazo Èródè be dhi ni bhàzo.

²¹Kítú bhàle nda sè dhi, Èródè dré áyi kítá ópí àdhya ki tosózó i rú, lirízó áyi lirírà òpì àdhya dri gò, kúlí dò tâle móndyá tití i kandrá.

²²Dí i dré ngàzo adrélé loyoá dhi: «Kúlí kònìdhi móndí kya 'i ko! Be ró dhi, giká àlo dhi àdhya 'i! » ²³Gbă kòdhwa, ángéló Míri àdhya dré Èródè ni tswàzo, dré tá lindrí fèle Giká dré ko dhi sè. Gò píróló i dré akódhi ni nyàzo gò, dré dràzo.

²⁴Dí, Giká ni kúlí adré tá ína ayílé lile drìdrì.

²⁵Bàrànbà i Sàwúlò be dhi i kò'o àyi ki àzí akílé Yèrúsalémà na dre dhi, i dré Yòwánì adrélé kpà rú zile Márokò dhi ni drìzo, gòzo akódhi be Atiyòkíyà na.

Tà 'ole dhi i 13

À mù Bàrànbà i Sàwúlò be li`le Giká ni àzí 'o

¹Ekélézyà Atiyòkíyà àdhya lé dhi, pròfétà i tà tadhábhá íbe dhi i tá be. Àyi nda i tá: Bàrànbà, Simèyonà (adrélé kpà rú zile Móndí ni dhi), Lùkíyò (angálépi Kirénè lésè dhi), Mànàyénè (i dré mbàzo ópí Èródè Àtipà be dhi), tsàle Sàwúlò. ²Kítú àlo, i dré tá adrérà'a tâbirí mvo, adrészó lìsàmbò 'o Míri ni rú sè dhi 'á dhi, Tírí Lólo dré tazoá àyi dré dhi: «Mì bhà Bàrànbà i Sàwúlò be twá má dré, i kàdréró àzí má dré àyi ki azizó 'òá dhi ni 'o. »

³Dí i kòmvò tâbirí tà zìzo Giká tí dre dhi, i dré drígá bhàzo àyi rì nda i dri gò, àyi ki mùzo lile Giká ni àzí 'o.

Bàrànbà i Sàwúlò be dhi i`li`tùrù Kipírò àdhya na

⁴À kòmù Bàrànbà i Sàwúlò be Tírí Lólo ni rinyí sè dre dhi, i dré sìzo tsàle bhàandre rú zile Sèlèwùkíyà dhi na, yìandre mìle. Kònàle dhi, i dré mbàzo bwátù na lile tûrù Kipírò àdhya na.

⁵I kòtsa bhàandre rú zile Sàlámì dhi na dre dhi, i dré kidhózó adrélé Giká ni kúlí longó Yúdà ànzì ki lìsàmbò dzó i 'ásè. Yòwánì Márokò tá àyi íbe gò, dré adrészó àyi ki ledé àzí sè.

⁶I dré lavúzó tûrù nda 'ásè tsàle bhàandre rú zile Páfò dhi na. Kònàle dhi, i dré ru kisúzó Yúdà mvá àlo rú be Bàràyésù dhi be. Akódhi nda tá kódzogó 'i, iñdì pròfétà kinzò ro dhi 'i.

⁷Adré tá trôle gùvèrènérè tûrù nda àdhya, rú be Sèrùgíyò Pólò dhi rú. Gùvèrènérè nda tá móndí tà nilepi bï dhi 'i. Dí dré Bàrànbà ki azizó Sàwúlò be, kitswázó Giká ni kúlí yi àyi tí.

⁸Dì, kódzogó Èlúmà (adrélé kódzogó ní rú zi Gírikì ti sè dhi tíni) nda dré ína ngàzo adrélé ligílé àyi íbe, adrészó láti nda gùvèrènérè nda ní litízó, kòka'iró Yésu ko dhi bvó.

⁹Dì Sàwúlò adrélé kpà rú zile Pólò, gàlepi Tírí Lolo sè dhi, dré mì tingbózó Èlúmà dri gò,

¹⁰tàzoá drá dhi: «Mí, Dzáborò ní mvá adrélépi móndí kí lití túrúpfú sè dhi 'í, ìndì tà gyägya tití dhi kí kàribhá 'í! Mí kítswá mína Mírì ní tà gyägya kí ladzama atsálé kinzò ro dhi ní tayí ko.

¹¹Dì mí yi rè ká! Nyànomvá dhi, Mírì bhà áyi drígá mí rú dre. Mí ní atsá mì kùdükùdu ró gò, mí dré kítswázó ngádra kítú àdhya ní no bwà ko lókyá be vwàvvàro. » Gbă kòdhwa, Èlúmà ní mì dré sàzo gò, tímímvá dré gòzo miá. Dré kídhózó adrélé áyi lídzyá, adrélé móndí nda kítswálé áyi tesé drígá sè.

¹²Dì gùvèrènérè nda kònò tà ru 'olepi nda dre dhi, dré Yésu ní ka'izo. Tako ko, akodhi ní líndrí ga tá bhwäbhwa tà tadhálé Mírì ní tà dri dhi ní tà sè.

Pólò i Bárànábà be dhi i` li` Àtiyòkíyà bvò Písídíyà àdhya lé dhi na

¹³Gò Pólò i atsiàmu ni íbe dhi i dré bwátù dòzo ngàzo Páfò lésè, lile tsàle bhàandre rú zile Pérugè bvò Pàfilíyà àdhya lé dhi na. Kònàle dhi, Yòwánì Márokò dré ína àyi kí tayízó gòzo Yérusalémà na.

¹⁴Gò i dré ngàzo Pérugè lésè lile tsàle Àtiyòkíyà bvò Písídíyà àdhya lé dhi na. Sàbátù tú dhi, i dré fízo lirílé Yúdà ànzì kí lísámbò dzó na.

¹⁵À kònà tà àruka tisile Mósè ni tátrítrí kúlí na ìndì pròfétà kí búkù i 'ásè dhi i dre dhi, lísámbò dzó nda ní kàdrì i dré móndí mùzo táká Pólò i dré Bárànábà be dhi: «Àma kí adrúpi i, mì kàdré kúlí íbe tâle móndyá kònì kí tímbaro àyi kí tà ka'ika'i na dhi, mì kòtà wà. »

¹⁶Dì Pólò dré ngàzo áyi drígá bha kuru gò, tàzoá dhi: «Àmi Ìsérélè ànzì ró ní i, ìndì àmi súrú twá ro adrébhá Gíká ní ro ní i, mì yi rè ma ká!

¹⁷Gíká Ìsérélè ànzì kya zì tá àma kí tâbhí i í dré. Dì i dré tá adrérà'a bvò Èzèpétò àdhya na dhi 'á dhi, dré àyi kí 'òzo lizolé atsálé kpà kàdrì gò, dré àyi kí adrìzo apfòle bvò nda lésè áyi rinyí kàdrì sè.

¹⁸Gò dré àyi kí tà kònzi mvòzo duku na ànyíanyí kóná nyadhi-ri.

¹⁹Bvóá dhi, dré súrú nzi-drì-ri bvò Kànánà àdhya na dhi kí tà 'òzo akílé gò, àyi kí bvò fèzo áyi móndyá nda i dré tàyilé ro.

²⁰Tà nda kòdhì i lavú tá tití kóná be ànyíanyí kámá-su-drì-nyadhi-ri-drì-mudri.

Àmvolásà dhi, Gíká dré tâbvó tabhá kí fèzo àyi dré, tsàle pròfétà Sàmùwélè ní lókyá 'á.

²¹Gò móndyá nda i dré ópí zìzo gò, Gíká dré Sàwúlà, Kísà ní mvá angálépi Bènyàmínà ní súrú lésè dhi ní fèzo adrélé ópí ro àyi drile kóná nyadhi-ri.

²²Dì kòtingá Sàwùlà dre dhi, dré Dàwídì ni bhàzo adrélé ópí ro àyi drile. Tà tá akódhi nda ni tà sè dhi: «Má kisú Dàwídì, Yésè ni mvá, dhya adrélépi áma togó nda 'ole kínflé dhi ró dre. A ni tà tití má dré adrélé lèle í kò'o dhi kí 'o. »

²³Dàwídì nda ni súrú lésè dhi, Giká 'o Yésu apfôle adrélé ìsérélè ànzí kí tindrillépi ró, ngóró dré tá lazilé àyi dré dhi tíni.

²⁴Akódhi nda ni atsama kandrá dhi, Yòwánì longó tá Giká ni kúlì ìsérélè ànzí tití i dré, tazoá dhi, i kòladzá àyi kí togó gò, batísímò dòzo.

²⁵Yòwánì nda dré tá adrérà'a 'ole áyi àzí 'o akílé dhi 'á dhi, adré tá ták dhi: «Mí adré kisúà dhi, ma àdhi 'í? Ma mána dhya mì dré adrélé letèle dhi 'í ko. Dì, mì yi rè ká! Akódhi nda adré alíle má bvó. Má kítswá ndìndì akódhi ni kámókà bă tri bwà ko. »

²⁶Áma adrúpi i, àmi Àbàrámà ni ànzí ró ni i, ìndì àmi súrú twá ro adrébhá Giká ni ro ni i, Giká amù kúlì adrészó móndí kí tindrí kòdhi àma kí tändi i dré.

²⁷Móndyá Yérusalémà na dhi i àyi kí kàdrí íbe dhi i nì tá àyikya Yésu nda àdhi 'í ya dhi ko. I nì tá kpà prôfétà kí kúlì i dré adrélé nàlè sàbátù àlo àlo tití dhi i sè dhi kí àndu ko. Dì, i dré tá bhàzo Yésu dri dhi, i 'o tá àyikya kúlì nda i kítswálé tití.

²⁸Tágba i dré tá àlo kítswálépi dràdrà sè dhi ni kisúzó akódhi véna ko dhi, i lizí tá Pilátò, kò'oró akódhi pfule dràle.

²⁹I kò'o tà tití tisile akódhi ni tà dri dhi i dre dhi, i dré akódhi ni rúbhá tirizó fa kípakipa drilésè, bhàle mógo na.

³⁰Dì, Giká dré ína akódhi ni tingázó dràdrà lésè.

³¹Gò akódhi dré agázó vésè be bî ìndì kítú bî móndyá lìbhá túmání í be Gàlliláyà lésè tsàle Yérusalémà na dhi i kandrá. Nyànomvá dhi, àyi nda i dhya adrébhá akódhi ni tà i dré nòle mì sè ìndì i dré yile bíbhálé sè dhi kí longó ìsérélè ànzí i dré dhi 'í.

³²Dì àma, mà adré Rúbí Tani kònìdhì ni longó àmi dré: Tà Giká dré tá lazilé àma kí tábhí i dré dhi,

³³akódhi 'o ándró àma, àyi kí ànzí i dré, dré Yésu ni tingálé dràdrà lésè dhi sè. Ngóró tisile Yúdà ànzí kí Longó ni rì na dhi tíni: «Mí áma Mváagó 'í.

Ándró dhi, má ti mi ma. »

³⁴Giká lazí tá dhi, i ni dra akódhi ni tingá dràdrà lésè gò, rúbhá ni dré kítswázó ñwàle tàdzí ko. Tà tá dhi: «Má ni tà lolo má dré lazilé Dàwídì dré ìndì mì dré kítswálé ka'ile dhi kí fe àmi dré. »

³⁵Giká ni Kúlì adré kpà tàá àrà àzya na dhi: «Mí kítswá ámi Dhya lolo dhi ni tayí ñwàle mógo na ko. »

³⁶Dàwídì ro dhi, kò'o tà tití Giká dré tá lèle i kò'o dhi i áyi lókyá 'á dre dhi, dré dràzo gò, akódhi ni rúbhá sìzo atá ni kya i kòfalé gò, dré ína ñwàzo ñwañwà.

³⁷Dì, kàdré dhya Giká dré tingálé dràdrà lésè nda ni tà sè dhi, ñwa ína àlomvá ko.

³⁸⁻³⁹Dì áma adrúpi i, lè mì kònì tà mà dré adrélé longolé àmì dré kònìdhì doro: Gìká adré móndí ki tàkonzì tri Yésu nda sè. Akódhì léna dhi, Gìká adré móndyá tití adrébhá akódhì ni ka'i dhi ki apá àyi ki tàkonzì tití Mósè ni tátrítrí kúlì dré tá kítswázó àyi ki apá lásà bwà ko dhi i lésè gò, adrészó àyi ki bha gyágya í kandrá.

⁴⁰Dì ásà dhi, mì kònò doro, tà pròfétà i dré tá tâle kònì i kàtsáró àmì rú ko:

⁴¹«Àmì adrébhá tà má dré tâle dhi ni no tà tâko ró ni i, mì yi rè ká!

Àmì ki líndrì kòga bhwäbhwa gò, mì kòtodràró! Tâko ko, má ni dra tà kàdrì 'o àmì ki lókyá 'á. Tágba à kòtití tá tà nda àmì dré yà dhi, mì kítswá tá ka'ìá tâdzí ko. » »

⁴²Dì Pólò i Bârânâbâ be dhi i dré tá adrérà'a apfole lìsâmbò dzó nda lésè dhi 'á dhi, à dré àyi ki ti lizizó, i kàgòrò tà i dré tâle nda ki ta tódhyá sàbâtù adrélépi alile dhi sè.

⁴³Móndyá ru kímóbhá nda i kàpfò dre dhi, Yûdà ànzì bî dhi i ìndì móndí bî súrú twá ro Yûdà ànzì ki Gìká ni ka'ibhá dhi íbe dhi, i dré dhèzo Pólò i bvô Bârânâbâ be. Dì Pólò i dré tà tâzo àyi íbe àyi ki kodzozó, i kògòrò adrélé trôle Gìká ni togó taní rú.

Pólò i Bârânâbâ be dhi i` li` móndyá súrú twá ro dhi i véna

⁴⁴Sàbâtù bvôá dhi tú dhi, ànyiànyi móndyá tití bhàandre nda 'á dhi i dré ru kímózó kítswázó Míri ni kúlì yi.

⁴⁵Dì, Yûdà ànzì i kònò móndyá zyandre nda i dre dhi, i dré lovó kònzi bhàzo Pólò i rú gò, i dré adrészó tà kayí akódhì be, adrészó akódhì ni lodhá.

⁴⁶Dì Pólò i Bârânâbâ be dhi i dré kúlì logozó àyi tí tiri àko, tâzoá dhi: «Adré tá leá dhi, mà kòlongó rè zyà Gìká ni kúlì àmì, Yûdà ànzì i dré 'iká. Dì, mì gâ àmikya kúlì nda rè, adrészó àmì ki no ngóró móndí kítswâbhá lìdrì kónâ vésè kólyá dhi sè ko dhi i ró. Dì mì yi rè ká! Mà adré àmì ki tayí lìzo móndyá súrú twá ro dhi i véna.

⁴⁷Tâko ko, tà Míri dré tâle mà kò'o dhi, kònìdhì i: «Má bhà mi adrélé ngádra ró móndyá súrú twá ro dhi i dré, mí kàdrirò móndí angâbhá bvô wâyi lésè dhi i lìdrì kónâ vésè kólyá dhi ni kisú be dhi bvô. » »

⁴⁸Dì móndyá súrú twá ro nda i koyi tà nda dre dhi, i dré ngàzo adrélé lenzélé, adrészó Míri ni kúlì ni tà bha kuru. Gò àyi tití Gìká dré tá zìle kítswâlé lìdrì kónâ vésè kólyá dhi ni kisú dhi, i dré Yésu ni ka'izo.

⁴⁹Dì Míri ni kúlì adré tá ayílé bvô nda 'ásè wâyi.

⁵⁰Dì, Yûdà ànzì nda i dré àyikya dhya kàdrìkàdrì bhàandre nda 'á dhi ki 'a tifizó, tokó rúku ró adrébhá Gìká ni ro dhi íbe. I dré móndí zyandre dhi ki kodzozó ligilé Pólò i rú Bârânâbâ be, i kòpforó àyi ki mì be dhi bvô. Gò i dré àyi ki dròzo pfòle àyi ki bvô 'ásè.

⁵¹Dì Pólò i Bârânâbâ be dhi i dré àyi ki bhàandre ni tâpfulíndrì trôlepi àyi pá dhi ni towázó, tadházóá dhi, i tayí àyi ki tà tití dre. Gò i dré lìzo bhàandre rú zìle ïkònýò dhi na.

⁵²Dì, kàdré móndyá ka'ibhá Àtiyòkíyà na nda kí tà sè dhi, i ga àyíkya arí sè bí, ìndì Tírì Lólo sè bí.

Tà 'òle dhi i 14

Pólò i Bárànábà be dhi i Ìkòníyò na

¹Ìkòníyò na dhi, Pólò i Bárànábà be dhi i dré kpà fízo Yúdà ànzì kí lísámbò dzó na gò, i dré Gíká ni kúlì longozó rìnyí sè. Dì móndí lìzolìzo Yúdà ànzì ró ìndì súrú twá ro dhi i dré Yésu ni ka'ízo.

²Dì, Yúdà ànzì kúlì nda ni gabhá rè dhi i dré àyíkya móndí àruka súrú twá ro dhi kí 'a tifízó, àyi kí togó 'òzo abílé Yésu ni ka'ibhá i rú.

³Tágba kònìni dhi, Pólò i Bárànábà be dhi i dré gòzo adrélé kònàle lókyá be vwàvvà ro. Ìadré tá Míri ni tà longó tirì àko, adrészó akódhi ni togó taní ni tà ta. Míri adré tá tadhá dhi, tà i dré adrélé longolé nda tá tà báti 'i. Tako ko, adré tá rìnyí fe àyi dré adrészó tà líndríga ró adrébhá áyi rìnyí tadhá dhi kí 'o.

⁴Dì móndyá zyandre bhàandre nda 'á dhi i dré ru lanzízó: Àyi kí àruka i dhe tá Yúdà ànzì i vésè, àruka ni i dhe tá kó àyíkya àpóstolò nda i vésè.

⁵Gò móndí àruka Yúdà ànzì ró ìndì súrú twá ro dhi i túmání àyi kí kàdrì íbe dhi, i dré ru yízo kitswázó Pólò kí 'o kònzi Bárànábà be, àyi kí lebhézó todràle kírà sè dhi bvó.

⁶Dì, àyi nda i kòyi tà nda dre dhi, i dré lapázó lìle bvò Lìkàwòníyà àdhya na. Ìdré tatsízó bhàandre Lísítrà àdhya 'ásè, Dérúbè àdhya 'ásè, ìndì àrà bhàandre nda i làgásè dhi i 'ásè,

⁷adrélé Rúbí Taní longóbe móndí i dré.

Pólò i Bárànábà be dhi i Lísítrà na

⁸Lísítrà na dhi, agó àlo pá be àbvò ro dhi tá be. À ti tá akódhi mèrèkpè ro gò, dré kitswázó atsí to tadtí ko.

⁹Akódhi nda lirí tá adrélé Pólò ni yi adrérà'a Gíká ni kúlì ta móndí i dré. Pólò kònò akódhi dìí dre dhi, dré nòzoá dhi, akódhi tá tà ka'íka'i íbe kitswázó adrílé.

¹⁰Dì dré tazoá drá kúlì 'u'ù sè dhi: «Mí nga ámì totó pá dri! » Dì agó nda dré wàzo áyi totó gò, kidhólé atsí to.

¹¹Móndí zyandre dhi i kònò tà Pólò dré 'òle nda dre dhi, i dré ngàzo kúlì loyó tazoá Lìkàwòníyàbhá kí ti sè dhi: «Gíká i ladzá àyi atsálé móndí i ró gò, i dré asízó àma vélé! »

¹²Gò i dré kidhózó adrélé Bárànábà ni zi gíká Zèwúsì ro, adrészó Pólò ni zi gíká Èrúmè ro, dré tá adrélé kúlì longolépi 'i dhi sè. ¹³Zèwúsì ni tépelò tá ànyí firà bhàandre nda na. Dì Zèwúsì ni kòwánà dré ngàzo tíago kí tesé alízo àyi íbe túmání ngá pfò aveave tifíle dhi íbe atsálé bhàandre ni zéríbà tí. Tako ko, akódhi i móndyá zyandre nda íbe dhi i adré tá ngá nda kí le fèle mòbòmà ro Bárànábà i dré Pólò be, kitswázó àyi kí lindrì bha.

¹⁴Dì, àpóstolò nda i kòyi tà nda dre dhi, i dré àyi kí kítá kí lasízó kízà dré gò, i dré ràzo loyóába móndyá zyandre nda i kòfalésè dhi:

¹⁵«Àma kí arúpi i, mì adré kònini ni àdho tà 'o? Àma, àma kókpà móndí 'i àmi tíni. Mà alì Rúbí Tani longó àmi dré, mì kòtayíró tà tákotàko kóni i, àmi kí togó adzázó Gíká lídrì ro dhi vélé. Akódhi nda bhà tá bhù i, bvò be, yíandré be ìndì ngá tití àyi lé dhi íbe nì.

¹⁶Atú dhi, tayí tá móndyá súrú tití i lésè dhi i adrélé àyi kí tändi kí láti lebè.

¹⁷Dì, tágba kònini dhi, tayí ína áyi tändi ni tadhma tà doro dré adrélé 'ole dhi i se dhi ko: Adré kozya afè àmi dré bhù lésè, adrészó lanyá 'o kèlè àmi dré lókyá ni 'á. Adré mányàngá afè kitswálé àmi dré. Adré kpà arí fe gàle àmi kí togó na bì. »

¹⁸Dì i kòtà kúlí nda i togó wáyi sè dre dhi, i dré móndyá zyandre nda kí kikízó, i kòféró mòbòmà àyi dré ko sè.

¹⁹Àmvolásà dhi, Yúdà ànzì àruka i dré alìzo Àtiyòkíyà lésè ìndì Ìkòníyò lésè gò, i dré móndyá zyandre nda kí 'a tifízó ligílé Pólò i rú. Dì àyi nda i dré Pólò ni lebhézó kírà sè gò, akódhi ni rúbhá sèzo pfòzo ába bhàandre nda 'ásè kívì na. I adré tá àyikya kisùá dhi, akódhi drà dre.

²⁰Dì, móndyá ka'ibhá dhi i kòkímó ru akódhi làgásè kúrú dre dhi, dré ína ngàzo gò, gòle fíle bhàandre na.

Pólò i Bárànábà be dhi i` gò Àtiyòkíyà bvò Síríyà àdhya lé dhi na

Kítú bvóá dhi sè dhi, Pólò i dré ngàzo lìle Bárànábà be Dérúbè na.

²¹Kònàle dhi, i dré Rúbí Tani longózó, móndí zyandre dhi ki 'òzo atsálé Yésu ni ka'ibhá i ró. Gò i dré gòzo tatsílé Lísítrà 'ásè, Ìkòníyò 'ásè, ìndì Àtiyòkíyà Písídíyà le dhi 'ásè,

²²adrélé móndyá ka'ibhá dhi kí timbàbe, adrészó àyi kí kodzó adrélé àyi kí totó tätä àyi kí tà ka'ika'i na. I adré tá tàá dhi: «Adré lèá dhi, mà kàdré kízà ka'i nyàle bí kítswázó fíle Gíká ni Òpì na. »

²³Ekélézyà àlo àlo tití dhi i 'ásè dhi, i tobhà tá bhàgo i adrélé móndyá ka'ibhá nda kí drì ko. Dì i kòmvò tòbirí tà zízo Míri tí bhàgo nda i dré dre dhi, i dré àyi kí tayízó Míri i dré tá ka'ile dhi drígá.

²⁴I kòlavú bvò Písídíyà àdhya 'ásè dre dhi, i dré tsàzo bvò Pàfilíyà àdhya na.

²⁵I dré Gíká ni kúlí longózó Pérugè na gò, i dré sìzo tsàle bhàandre rú zile Àtálíyà dhi na, yíandré mìle.

²⁶Kònàle dhi, i dré bwátù dòzo gòzo Àtiyòkíyà bvò Síríyà àdhya lé dhi na. Àtiyòkíyà nda tá bhàandre àyi kí tayízó Gíká drígá, i kòlìrò àzí 'o akódhi ni togó taní sè dhi 'i. Nyànomvá dhi, i 'o àzí nda akílé dre.

²⁷Dì i kòtsa Àtiyòkíyà na dre dhi, i dré móndyá tití Èkèlézyà le dhi kí kímózó gò, tà tití Giká dré 'ole àyi sè dhi kí titízó àyi dré. I tití tá kpà Giká nzì tá láti móndyá súrú twá ro dhi i dré Yésu ni ka'izo ngíni ya dhi.

²⁸Dì i dré adrészó túmáni móndyá ka'ibhá nda íbe lókyá be vwàvwà ro.

Tà 'ole dhi i 15

Èkèlézyà ni drì kobhá kí ru kimoma Yérusalémà na dhi

¹Àmvolásà dhi, Yúdà ànzì àruka i dré angázó Yùdáyà lésè atsálé Àtiyòkíyà 'a gò, i dré adrészó tadhá móndyá ka'ibhá i dré dhi: «Mì kò'o àmi lwàle ngóró Mósè ni tátrítrí kúlì dré adrélé tâle dhi tíni ko dhi, mì kitswá lídrì kóná vésè kólyá dhi ni kisú bwà ko.

»

²Dì, Pólò i Bárànábà be dhi i dré àyikya tà nda ni gázó gò, i dré tà kayízó àyi íbe rinyí sè. Gò Pólò kí kipèzo Bárànábà be, ìndì móndí ka'ibhá àruka íbe, i kòliró Yérusalémà na kitswálé tà ta tà nda dri àpóstolò íbe, ìndì bhàgo Èkèlézyà àdhya íbe.

³Èkèlézyà Àtiyòkíyà le dhi dré àyi kí ledézó lile àyi kí atsí na. Dì i dré ngázó lavúlé bvò Fòwinikè àdhya 'ásè ìndì Sàmàriyà àdhya 'ásè, adrélé móndyá súrú twá ro dhi i ka'i tá Yésu ngíni ya dhi ni tà titíbe gò, rúbí nda dré adrészó arí fe bī móndyá ka'ibhá i dré.

⁴I kòtsa Yérusalémà na dre dhi, àpóstolò i, bhàgo i ìndì móndyá tití Èkèlézyà le dhi íbe dhi, i dré àyi kí ka'izo dôle togó doro sè. Gò Pólò i dré tà tití Giká dré 'ole àyi sè dhi kí titízó àyi dré.

⁵Dì, Yésu ni ka'ibhá àruka Fàrisáyò ro dhi i dré ngázó tàá dhi: «Adré lèá dhi, à kòlwà móndyá ka'ibhá súrú twá ro dhi i gò, lazízóá àyi dri dhi, i kàdré Mósè ni tátrítrí kúlì likí. »

⁶Dì àpóstolò nda i bhàgo nda íbe dhi i dré ru kímózó kitswázó tà nda ni 'a nya dhi bvó.

⁷I kòtà tà tà nda dri vwàvwà ro dre dhi, Péterò dré ngázó tàá àyi dré dhi: «Áma adrúpi i, mì ni tâle dhi, Giká kipè tá ma àmi kòfalé kínó, móndyá súrú twá ro dhi i koyiró Rúbí Taní má tí, Yésu ni ka'izo dhi be.

⁸Dì Giká móndyá tití dhi kí togó nilepi dhi, dré Tirí Lolo fèzo àyi dré ngóró dré tà afèle àma dré dhi tíni, tadházóá dhi, i ka'i àyi dre dhi. ⁹Dì nò tá ína àyi twá àma rúsè ko. Tako ko, temvé tá àyi kí togó àyi kí tà ka'ika'i sè.

¹⁰Dì nyànomvá dhi, mì adré àmikya Giká ni tabhì àdho tà sè? Tako ko, mì adré ngá lanzi àma kí tábhí i àma kí tändi íbe dhi mà dré kitswálé dôle bwà ko dhi ni bha móndyá ka'ibhá nda i dri.

¹¹Tà nda kitswá ko! Be ró dhi, mà adré àmakya ka'lá dhi, Giká adré àma kí tidrí Míri Yésu ni togó taní sè, ngóró dré adrélé àyi kí tidrí dhi tíni. »

¹²Dì móndyá tití ru kímóbhá nda i kòfalé dhi, ngá dré bhùzo ndiii gò, i dré Bàrànbà ki yìzo Pólò be adrérà'a tà twátwa líndríga ró Gìká dré tá 'ole àyi sè móndyá súrú twá ro dhi i kòfalé dhi ki tití.

¹³I kòtití tà nda i akílé dre dhi, Yàkóbhò dré ngàzo tàá dhi: «Áma adrúpi i, mì yi rè ma ká!

¹⁴Simónà Pétéró tití àma dré, Gìká bhe tá rè zyà mì móndyá súrú twá ro dhi i véna, móndí ki kipèzo àyi kòfalé adrélé móndyá ína i ró ngíni ya dhi dre.

¹⁵Dì kúlí pròfétà i dré tisile dhi i adré ru kisú tà nda be. I tisi tá dhi:

¹⁶«Míri Gìká tà dhi: Àmvolásà dhi, má ni go Dàwídì ni dzó arílépi dre dhi ni 'o áyi totó tódhyá. Má ni go tà ni abíbhá dhi ki ledé, dzó nda ni bhàzo tódhyá àrà ni 'á,

¹⁷kitswálé móndí ki àmbí i kòndaró ma, Míri, túmání móndyá tití súrú twá ro má dré azilé adrélé mána ró dhi íbe. Ma, Míri adrélipi tà kòdhí ki 'o dhi, má adré tà nda ki ta ma.

¹⁸Má 'o tá tà nda i nile kínó lésè. » »

¹⁹Yàkóbhò gò tàá dhi: «Ásà dhi, má mìlésè dhi, dóro ni mà dré tà kòkóròko bhàle móndyá súrú twá ro àyi ki togó adzábhá Gìká vélé dhi i dri ko dhi.

²⁰Be ró dhi, mà kòtisi wárágà tazoá àyi dré dhi, i kònya mányàngá fèle gìká tako i dré dhi ko, i kò'o ndòtò tà ko, i kònya kà'wá 'ole zùle dràle dhi ki zà ko, iñdì i kònya kà'wá kàré ko. ²¹Tako ko, kidhólé kínó lésè dhi, à adré Mósè ni tátrítrí kúlí longó bhàandre àlo àlo tití dhi i 'ásè, adrészó nàá Yúdà ànzì ki lìsámbò dzó i 'ásè sàbátù àlo àlo tití i sè. »

Wárágà tisi le Yésu ni ka'ibhá súrú twá ro dhi i dré dhi

²²Gò àpóstolò nda i, bhàgo nda i iñdì móndyá tití Èkèlézyà le dhi íbe dhi, i dré ru yìzo móndí ki kipèzo àyi kòfalé mûle túmání Pólò íbe iñdì Bàrànbà be, lìle móndyá ka'ibhá Àtiyòkíyà na dhi i véna. I kipè tá Yùdásì adrélé kpà rú zile Bàràsbà dhi i Sílà be kòdhya. Àyi nda i tá móndyá ka'ibhá dhi ki drì kobhá i kòfalé.

²³Dì i dré wárágà tisizo kònini, i kòféró àyi drígá: «Áma, àpóstolò i bhàgo íbe, àmi ki adrúpi ró dhi i, mà adré wárágà kònìdhí ni tisi àma ki adrúpi súrú twá ro Àtiyòkíyà na, bvò Síríyà àdhya na, iñdì bvò Kìlikíyà àdhya na dhi i dré. Mòdo àmi dré!

²⁴Mà yi tâle dhi, móndí àruka i pfò tá àma kòfalésè lìle tà ta àmi dré gò, i dré àmi ki drì kizázó, àmi ki togó 'ozo lanzile. Dì, mà mù tá àyi nda i àma ko.

²⁵Dì tà nda sè dhi, àma tití, mà yi ru móndí àruka ki kipèzo mûle àmi véna, túmání àma ki arúpi Bàrànbà i Pólò be, mà dré lèle tò dhi íbe.

²⁶Àyi nda i móndí àyi ki lídrì febhá adrélé dràdrà mìle àma ki Míri Yésu Krísto ni tà sè dhi 'i.

²⁷Dì mà adré Yùdásì kì mu Sílà be, ì kòtaró kúlí sè tà mà dré adrélé tisile àmì dré kònì i.

²⁸Àma túmání Tírí Lólo be dhi, mà nò dóro ni, mà dré tà àzya lanzì dhi ni bhàle àmì dri ko dhi. Tà kitswábhá mì kò'o dhi i ngbà 'í tà kònì 'i:

²⁹Mì kònìya mányàngá fèle giká tako i dré dhi ko, mì kònìya kà'wá kàrì ko, mì kònìya kà'wá 'ole zùle dràle dhi kì zá ko, ìndì mì kò'o ndòtò tà ko. Mì kàdré 'òá kònìnì dhi, kòdhì mì adré 'òá dóro. Mì kàdré dóro. »

³⁰Gò ì dré dhya kipèle nda kì mùzo lìle Àtiyòkíyà na. Ì kòtsa dre dhi, ì dré móndyá zyandre ka'ibhá dhi kì kímózó gò, wárágà nda ni fèzo àyi dré.

³¹Àyi nda ì kònà wárágà nda dre dhi, ì dré lenzézó kúlí tisile àyi kì togó tindrìzo nda kì tà sè.

³²Gò Yùdásì i Sílà be, adrébhá tá àyikya pròfétà ro dhi i, ì dré tà bǐ dhi kì tázó kitswázó móndyá ka'ibhá nda kì timbà àyi kì tà ka'ika'i na.

³³Dì ì kògò adrélé kònàle lókyá tsà dre dhi, móndyá ka'ibhá nda ì dré tà kìdríkìdrí zìzo Giká tí àyi dré, ì kògoró móndyá àyi kì mubhá dhi i véna dóro. [³⁴] ³⁵Dì, Pólò i Bárànábà be dhi ì dré gòzo àyikya adrélé Àtiyòkíyà na. Àyi túmání móndí àruka bǐ dhi íbe dhi, ì adré tá Mírì ni kúlí longó, adrészó tà ni kì tadhá móndí i dré.

Pólò i` lanzi` ru Bárànábà be

³⁶Lókyá kòlavú tsà dre dhi, Pólò dré tázóá Bárànábà dré dhi: «Mà kògò àma kì adrúpi bhàandre àlo àlo tití mà dré Mírì ni kúlí longozó dhi i 'ásè dhi kì nobe, nòzoá ngalè àyi ngíni ya dhi. »

³⁷Bárànábà dré ka'izoá. Dì adré tá lèá dhi, ì kòdrì Yòwánì Márokò àyi vésè be.

³⁸Dì, Pólò adré tá ína nòá dhi, kitswá ko. Tako ko, Yòwánì Márokò nda tayí tá àyi bvò Pàfilíyà àdhya na gò, dré gòzo lìle àyi íbe àzí na ko.

³⁹Dì ì dré tà nda ni kayízó àyi kòfalésè tà tändi ró gò, ì dré ru lanzízó ásà. Bárànábà dré ína Yòwánì Márokò ni drìzo gò, ì dré mbàzo bwátù na lìle türù Kípírò àdhya na.

⁴⁰Dì, Pólò dré ína Sílà ni kipèzo kòdhya. Dì móndyá ka'ibhá dhi ì kòtayí àyi Mírì drígá, kòlikíró àyi áyi togó taní sè dre dhi, ì dré ngàzo lìle.

⁴¹Gò ì dré lavúzó bvò Síríyà àdhya 'ásè ìndì Kilikíyà àdhya 'ásè, móndyá ka'ibhá Èkélézyà i 'ásè dhi kì timbàbe àyi kì tà ka'ika'i na.

Tà 'òle dhi i 16

Pólò i Sílà be dhi i` drì Tímòtéyò li` zo Giká ni àzí 'o

¹Dì Pólò ì dré tsàzo Dérúbè na gò, lìle tsàle Lísítrà na. Kònàle dhi, Yésu ni ka'ilepi àlo rú be Timòtéyò dhi tá be. Akódhi nda ni andre tá Yúdà mvá Yésu ni ka'ilepi dhi 'i. Dì, akódhi ni atá tá ína Gírikì 'i.

²Móndyá ka'ibhá Lísítrà le ìndì Íkòníyò le dhi ì adré tá akódhi ni rú ta dóro.

³Dì Pólò adré tá akódhi ni le drile àyi vésè atsí na. Ásà dhi, dré akódhi ni 'òzo lwàle, Yúdà ànzì bvò nda lé dhi i kòka'iró akódhi be dhi bvó. Tako ko, i nì tití tâle dhi, akódhi ni atá tá Gírikì i dhi be.

⁴Dì Pólò i adré tá tatsílé bhàandre àlo àlo i 'ásè, adrélér tâ àpóstolò i bhàgo íbe Yèrúsalémà na dhi i dré ru yìzo driá dhi ki longóbe móndyá ka'ibhá dhi i dré adrélér 'ole. ⁵Dì móndyá ka'ibhá Èkèlézyà i 'ásè dhi i adré tá ru timbà àyi ki tâ ka'ika'i na. I adré tá kpà lizolé lile dridri kitú àlo àlo tití i sè.

Màkèdònì́ yà agó àlo dhi zi Pólò li`le áyi bvò na

⁶Gò Pólò i atsiàmu ni íbe dhi i dré lavúzó bvò Fìrigiyà àdhya 'ásè ìndì Gàlàtìyà àdhya 'ásè. Tako ko, Tírí Lolo logá tá àyi dré Gíká ni kúlì longoma bvò Àsìyà àdhya na dhi.

⁷I dré tsàzo ànyi bvò Mìsìyà àdhya làga dhi, i tabhì tâ lile bvò Bítinìyà àdhya na ká. Dì, Yésu ni Tírí dré ína tâ nda ni logázó àyi dré.

⁸Dì i dré lavúzó bvò Mìsìyà àdhya 'ásè, sile bhàandre rú zile Trówà dhi na, yiandre mìle.

⁹Ngátsi sè dhi, ngá dré agázó Pólò mi toróbí tíni. Nò tâ Mákèdònìyà agó àlo dhi adrérà'a áyi totó adrélér Pólò ni ti lizí: «Mí azyá Mákèdònìyà le kitswálé àma ki ledé wà! »

¹⁰Dì Pólò kònò ngá nda dre dhi, mà dré ndiri láti ndàzo lìzo Mákèdònìyà na. Àngyá ko, mà nì tâ tâle dhi, Gíká zi tâ àma lile Rúbí Tani longó móndyá kònàle dhi i dré dhi be.

Lìdíyà ka'i Yésu Filipoyì na

¹¹Dì mà dré bwátù dòzo Trówà na, lavúzó pyà tûrù Sàmòtrákè àdhya na. Kitú bvóá dhi sè dhi, mà dré tsàzo bhàandre rú zile Nèyàpòli dhi na.

¹²Gò mà dré ngàzo kònalsè lile bhàandre Filipoyì àdhya na. Filipoyì nda bhàandre kàdrì bvò Mákèdònìyà àdhya lé dhi ki àlo 'i, ìndì bhàandre móndí bì Rómà ro dhi i dré bhà mòzo lana dhi 'i. Gò mà dré adrészó kònàle lókyá be vwàvwà ro tsà.

¹³Sàbátù tú dhi, mà dré pfòzo bhàandre nda lésè tsale yiandre àlo adrélérpi dile dhi mìle. Mà adré tá kisùá dhi, mà nì àrà adrészó tâ ta Gíká be dhi ni kisú kònàle. Dì mà dré lirizó adrélér tâ ta tòkó ru kimóbhá kònàle dhi íbe.

¹⁴Àyi nda i kòfalé dhi, tòkó àlo rú be Lìdíyà angálérpi bhàandre Tiyatírà àdhya lésè dhi tâ be. Akódhi nda tâ kítá làgí kyàkyà dhi ki lagílépi 'i, ìndì móndí adrélérpi Gíká ni ro dhi 'i. Dì dré tâ adrérà'a Pólò ni yi dhi 'á dhi, Míri dré akódhi ni togó 'òzo atsálé àtsi ró tâ Pólò dré tâle dhi ki ka'i.

¹⁵Dì akódhi i móndyá tití akódhi ni dzó lésè dhi íbe dhi i dré bâtísimò dòzo. Dré àma ki ti lizizó tâzoá dhi: «Mí kàdré áma no Míri Yésu ni ka'ilepi ró bâti dhi, mì kàlì adrélér áma dzó lé wà. » Dì kàsé àma ki togó tâ tândi ró dre dhi, mà dré ka'izoá.

À bhe Pólò i Sílà be bâdzó na

¹⁶Kítú àlo, mà dré tá adrérà'a lìle àrà adrészò tà ta Gìká be dhi na dhi 'á dhi, mà kisú tá ru mvátòkó àlo màrabà ro dhi be. Akódhi nda tá tirí kònzi íbe í léna gò, adrészò tà adrébhá alìle dhi kí longó móndí i dré rìnyí ni sè. Akódhi ni líyí i adré tá làfa kisú bí akódhi sè.

¹⁷Dì akódhi dré ngàzo adrélè àma kí lebè Pólò be, loyóába dhi: «Àgo kònì i màrabà Gìká kurú na bhù na dhi àdhya 'í! I adré láti adrészò adrélè ásà dhi ni tadhá àmì dré! »

¹⁸Adré tá 'òá kònìnì kítú be bí. Dì, kùdù ni na dhi, Pólò ni togó dré aswázó gò, dré áyi alázó tàá tirí kònzi nda dré dhi: «Yésu Krísto ni rú sè dhi, mà adré tàá mí dri dhi, mí pfò mvátòkó kònìdhi lésè! » Gbă lókyá nda sè dhi, tirí nda dré pfòzo lásà.

¹⁹Dì mvátòkó nda ni líyí i kònò tà i dré tá adrészò mí bha làfa kisúzó ásà dhi abí dre dhi dre dhi, i dré Pólò kí rùzo sèle Sílà be, lìzo àyi íbe bhàandre nda ni kàdrì i kandrá ngá lagírà na.

²⁰I kòtsa àyi nda i kandrá dre dhi, i dré tàoza dhi: «Dhya Yúdà ànzì ró kònì i adré àma kí bhàandre ni 'a tífi!

²¹Tako ko, i adré àyikya labhi logálè àma Rómà ro dhi i dré dhi kí tadhá. Kitswá mà dré labhi nda kí ka'izo, adrészò kpà 'òá ko. »

²²Gò móndí zyandre dhi i dré kpà ru amúzó àyi íbe Pólò i rú Sílà be. Dì bhàandre ni kàdrì nda i dré àyi kí kítá 'òzo tuvùle àyi rúsè, gò àyi kí 'òzo bhwàle fa sè.

²³A kòbhwà àyi tà tändi ró dre dhi, àyi kí bhèzo bădzó na. Gò lazízóá bădzó nda ni likílépi dri dhi, kàdré àyi kí likí dóro.

²⁴Akódhi kòyi kúlí nda dre dhi, dré àyi kí bhàzo bădzó nda ni 'a kìle twá dhi na, àyi kí pá 'òzo kitsilé fa kólòngbó sè.

²⁵Anyìanyì ngátsi kítogá sè dhi, Pólò i Sílà be dhi i adré tá tà ta Gìká be, adrészò longó ngo akódhi ni rú bhàzo kùle. Dhya àruka tití 'ile bădzó nda lé dhi i adré tá àyi kí yi.

²⁶Gbă kòdhwa, kàdikàdi kàdrì dhi dré bvò kosézó, bădzó nda ni pá kizízó rìnyí sè. Dì bădzó ni ti i dré tití ru tinzi zo gò, dhya tití 'ile nda kí nyìrì dré tikízó adàle àyi rúsè.

²⁷Dì bădzó likílépi nda kòlaró bădzó ti kí no ngbo dre dhi, dré áyi sápí asézó kitswázó áyi pfu dràle. Àngyá ko, adré tá ína kisùá dhi, dhya 'ile nda i lapá tití dre.

²⁸Dì, Pólò dré kúlí yòzo rìnyí sè, tàoza dhi: «Mí 'o mí kònzi ko! Àma tití be kònìdhi! »

²⁹Dì bădzó likílépi nda dré àtsí zìzo gò, dré arázó afílé bădzó 'a kìle twá nda lé, adhélé lyabe tirí dré Pólò i kandrá Sílà be.

³⁰Dré àyi kí drizo pfòzo àyi íbe kívì na gò, lizízóá àyi tí dhi: «Atálágó i, lè má kò'o àdho tà kòdhya kitswázó adrélè dhi? »

³¹I logó drá dhi: «Àmì móndyá tití ámì dzó lésè dhi íbe dhi i, mí kòka'i Míri Yésu gò, mí kàdríró. »

³²Gò ì dré Míri ní kúlí longózó àyi dré, móndyá tití akódhi ní dzó lésè dhi íbe.

³³Dì ngátsi nda sè dhi, bădzó likílépi nda dré àyi kí drìzo lìzo àyi kí làzí dzi gò, gbă lókyá nda sè dhi, ì dré bătísimò dòzo móndyá tití ní íbe.

³⁴Dré Pólò kí drìzo fízo àyi íbe áyi dzó na, mányàngá fèzo àyi dré nyàle. Dì akódhi i móndyá tití ní íbe dhi, ì dré gàzo arí sè bě, ì dré Giká ní ka'ile dhi sè.

³⁵Ngá kòwa dre dhi, bhàandre ní kàdrì nda ì dré pòlísì kí mùzo tàá bădzó likílépi nda dré dhi: «Mí trì àgo kòdhi i lìle. »

³⁶Dì bădzó likílépi nda dré tázooá Pólò dré dhi: «Bhàandre ní kàdrì ì amù kúlí tàá dhi, à kòtrì àmi lìle. Mì ní dì kitswá pfôle lìle togó be kìdríkìdri. »

³⁷Dì, Pólò dré ína tázooá pòlísì nda ì dré dhi: «Ì 'o tá àma bhwàle móndyá tití i kandrá àma kí tàbvó ta àko ró gò, àma kí 'ozo bhèle bădzó na, tágba má dré adrészó móndí Rómà ro dhi 'i dhi. Dì nyànomvá dhi, ì adré àyikya àma kí le tayílé lùzu ró? Tàdzí ko! Àyi kí tändi ì kàlì àma kí trì dhi àyi! »

³⁸Gò pòlísì nda ì dré gòzo kúlí nda kí longó bhàandre ní kàdrì nda ì dré. Àyi nda i kòyi, Pólò i Sílà be dhi i tá móndí Rómà ro dhi 'i dhi dre dhi, tirì dré àyi kí 'ozo.

³⁹Dì ì dré alìzo Pólò kí togó tìndri, àyi kí drìzo pfòzo àyi íbe kívì na gò, àyi kí ti lizizó ì kòtayíró àyi kí bhàandre lìzo.

⁴⁰Dì Pólò i Sílà be dhi ì kàpfò bădzó lésè dre dhi, ì dré gòzo lìle Lìdíyà bhàna. Kònàle dhi, ì dré ru kímózó móndyá ka'ibhá dhi íbe, àyi kí tìmbàzo àyi kí tà ka'ika'i na gò, ì dré àyi kí tayízó lìzo.

Tà 'ole dhi i 17

Pólò i Sílà be dhi i Tèsàlòníkè na

¹Àmvolásà dhi, ì dré lavúzó bhàandre Áfipólì àdhya 'ásè ìndì Apòlònýà àdhya 'ásè gò, tsàle bhàandre Tèsàlòníkè àdhya na. Yúdà ànzì kí lìsámbò dzó tá kònàle be.

²Dì Pólò dré lìzo lìsámbò dzó nda na, ànzyà gà dré tá adrélé 'ole dhi tíni. Sàbátù na dhi i sè dhi, dré tà tisile Giká ní Kúlí na dhi kí tázoo móndyá kònàle dhi íbe.

³Adré tá tà nda kí àndu ngí àyi dré, adrészó tadhá dhi, lè tá Mèsíyà kònza dràzo gò, kòngaró dràdrà 'ásè. Tà tá àyi dré dhi: «Yésu má dré adrészó tà ní ni longó àmi dré kòdhi, Mèsíyà 'i. »

⁴Dì Yúdà ànzì àruka ì dré kúlí nda ní ka'izo gò, ì dré ru amúzó Pólò íbe Sílà be. Gírikì zyandre adrébhá tá Giká ní ro dhi ì dré kpà ka'izoá, túmání tòkó bě rúku ró dhi íbe.

⁵Dì, Yúdà ànzì àruka ì dré àyikya lovó kònzi bhàzo Pólò i rú. Dì ì dré àgo kònzi àruka kí kímózó ngá lagírà na gò, ì dré móndí zyandre dhi kí 'a tififzó adrélé tà 'o wàyá ro bhàandre na. Gò ì dré ru wùzo tsàle Yàsónà bhàna kitswálé Pólò kí nda Sílà be, ì kàdriró àyi móndyá zyandre i kandrá be dhi bvó.

⁶Dì, ì kòndà àyi tí dre dhi, ì dré Yàsónà kí sèzo móndí ka'ibhá àruka íbe, lìzo àyi íbe bhàandre nda ní kàdrì i kandrá. Gò ì dré yòzoá dhi: «Àgo adrébhá móndí kí drì kizá bvò wáyi 'ásè kòdhì ì atsá kpà kònwa dre.

⁷Yàsónà kònìdhì ka'i àyi dòle í bhàna. Àyi tití nda ì adré ligílé Kàyìsárà ní tolí i rú, adrészò tåá dhi, ópí kàdrì àzya rú be Yésu dhi be. »

⁸Dì kúlì ì dré tåle nda ì dré gòzo móndyá zyandre nda kí 'a tifí, bhàandre ní kàdrì nda íbe.

⁹Dì ì dré Yàsónà kí 'òzo làfa fe arúpi ní íbe gò, ì dré àyi kí tayízó lìle.

Pólò i Sílà be dhi i Béróyà na

¹⁰Ngá kàní dre dhi, móndyá ka'ibhá dhi ì dré Pólò kí 'òzo lìle Sílà be bhàandre Béróyà àdhyá na. Àyi nda ì kòtsa dre dhi, ì dré lìzo Yúdà ànzi kí lísámbò dzó na.

¹¹Móndyá Béróyà le dhi kí togó tá dóro Tèsàloníkèbhá kya kí lavú. Dì ì dré Gíká ní kúlì ka'izo yile lovó sè. Kitú àlo àlo tití i sè dhi, ì adré tá tå tisile Gíká ní Kúlí na dhi kí àndu nda, nizoá ngalè tå Pólò dré tá adrélé tåle dhi i tå báti 'i yà dhi.

¹²Dì móndí bï Yúdà ànzi i kòfalé dhi ì dré Yésu ní ka'izo, túmání Gírikì tòkó rúku ró bï dhi íbe, ìndì Gírikì àgo bï dhi íbe.

¹³Dì, Yúdà ànzi Tèsàloníkè na dhi ì kòyi, Pólò adré tá kpà Gíká ní kúlì longó Béróyà le dhi dre dhi, ì dré àyikya alízo kítswálé móndyá zyandre nda kí 'a tifí ligílé Pólò i rú.

¹⁴Gbă lókyá nda sè dhi, móndyá ka'ibhá dhi ì dré Pólò ní 'òzo lìle àtsí dri yíandre na ro. Dì, Sílà i Tímòtéyò be dhi ì dré àyikya adrészò Béróyà na.

¹⁵Dhya adrébhá Pólò ní dri dhi ì dré lìzo ába tsàle bhàandre Àtènáyì àdhyá na. Dì akódhi dré lazízóá àyi dri dhi, Sílà i Tímòtéyò be dhi ì kàlì i vélé mbèlè. Gò ì dré gòzo gole Béróyà na.

Pólò longó Gíká ní kúlì Àtènáyì` na

¹⁶Pólò dré tá adrérà'a àyi nda kí letè Àtènáyì na dhi 'á dhi, akódhi ní togó adré tá lanzaile lavulé, dré tá adrélé nòá dhi, bhàandre nda ga gíká tåko kí línđrì i sè bï dhi sè.

¹⁷Ásà dhi, adré tá Gíká ní kúlì ta Yúdà ànzi íbe, ìndì móndyá surú twá ro adrébhá tá Gíká ní ro dhi íbe Yúdà ànzi kí lísámbò dzó na. Kitú àlo àlo tití i sè dhi, adré tá kpà Gíká ní kúlì ta móndyá adrébhá tá ru kimó ngá lagírà na dhi íbe.

¹⁸Dì tògyabhá àruka adrélé zile Èpíkùréyò i ró ìndì Sòtòyíkò i ró dhi ì dré dhèzo adrélé tå kayí akódhi be. Àyi kí àruka ì adré tá lizíá dhi: «Dhya kúlì kyàkyà kòdhì adré ína àdho tå le tåle? » Àruka ní ì adré tá tåá dhi: «Sù ngóró adré gíká twá kí tå longó na tíni. » Ì adré tá tåá kònini, Pólò dré tá adrélé Yésu ní Rúbí Tani longó akódhi ní ngàma dràdrà 'ásè dhi ní tå be dhi sè.

¹⁹Gò ì dré akódhì ni drìzo lìzo ába àrà rú zile Àrèyòpágò, tògyabhá ì dré tá adrészó ru kímó lána dhi na. Àyi nda ì dré tàzoá drá dhi: «Mà ni kítswá tà tídhí mí dré adrélé tadhálé kòdhì kí ni bwà?

²⁰Tà mí dré adrélé tâle nda ì adhé àma bílé twá. Di mà lè nile ngalè tà nda ì adré lèá tâle ngíni ya dhi. »

²¹(Ì tâ tá kònìnì tâko ko, Àtènayìbhá tití dhi ì móndí alialì dhi íbe dhi ì adré tá àyi kí lókyá wäyi dhi ni fe adrészó tà tídhí dhi kí yi, adrészó kpà tà nda kí tití àyi kòfalésè.)

²²Di Pólò dré ngàzo áyi totó àyi ru kímóbhá nda ì kòfalé gò, tàá dhi: «Àmi Àtènayìbhá ni i, má adré nòá dhi, tà tití i sè dhi, àmi móndí adrébhá gíká ni tà nda nile dhi 'i.

²³Tâko ko, má dré tá adrérà'a tatsílé àmi kí bhàandre 'ásè dhi 'á dhi, má nò tá àrà mì dré adrészó àmi kí gíká kí lìndrì bha 'ásà dhi i. Má kisú kpà àlètárì mì dré adrészó ngá fe àmi kí gíká dré dhi. À tisì tá rúá dhi: «Gíká nile ko dhi dré. » Di má adré mána Gíká mì dré adrészó lìndrì ni ni bha niá àko ró dhi ni tà longó àmi dré.

²⁴Gíká bvò bhàlepi ngá tití lá dhi íbe dhi, Míri bhù kya bvò be dhi 'i. Di adré ína adrélé tépelò móndí ì dré adrélé sile dhi ì 'ásè ko.

²⁵Móndí ì kítswá kpà tà 'o akódhì dré ngóró akódhì tá lovó ni íbe na tini bwà ko. Tâko ko, akódhì adré lìdrì fe, la'a íbe ìndì ngá àruka tití dhi íbe móndyá tití ì dré dhi ni.

²⁶Akódhì 'o tá súrú tití dhi ì apfòle móndí àlo lésè, ì kàyíró adrélé bhà mo bvò wäyi dhi dríse. Bhà àyi kí lókyá ì ngóró dré tá lèle 'ole dhi tini. Lanzí kpà bvò ì dré adrészó bhà mo 'ásà dhi i.

²⁷Gíká 'o tá kònìnì, móndí ì kàdréró áyi nda gò, kòkítswá dhi, ì kòkisúró i be dhi bvó. Tákò, akódhì ína vwàvvà ro àma àlo àlo tití dhi ì rúsè ko.

²⁸Àngyá ko, akódhì léna dhi, àma lìdrì íbe, adrészó tà 'o, adrészó kpà adrélé be. Ngóró àmi kí tògyabhá àruka ì dré tâle dhi tini: «Àma akódhì ni ànzì 'i. »

²⁹Di mà dré adrélé Gíká ni ànzì 'i dhi sè dhi, adré lèá mà kòkisù ko tâle dhi, Gíká ni lású sù ngóró ngá lìndrì móndí ì dré adrélé ledélé órò sè yà, àrezá sè yà, kó ngalè kírà sè yà, àyi kí tògyá sè ìndì àyi kí tà kisùle dhi sè dhi tini dhi.

³⁰Atú dhi, Gíká tayí tá móndí ì adrélé tà 'o tà nìma ko na. Di, nyànomvá dhi, adré ína móndyá tití àrà tini i 'ásè dhi kí kodzó, ì kòladzáró àyi kí togó.

³¹Tâko ko, bhà kítú ì dré dra móndyá tití bvò àdhya kí tàbvó tàzo gyägya, agó ì dré zìle tà nda sè dhi sè dhi dre. Tadhá kpà móndyá tití ì dré dhi, tà nda tà bàti 'i dhi, dré akódhì nda ni tingálé dràdrà lésè dhi sè. »

³²Ì kòyi tà Pólò dré tâle móndí ni tingama dràdrà lésè dhi ni tà dri nda dre dhi, àyi kí àruka ì dré ngàzo akódhì ni gu. Di àruka ni ì dré kó tàzoá dhi: «Mà ni go tà mí dré adrélé tâle kòdhì kí yi tódhyá kítú àzya sè. »

³³Di Pólò dré pfòzo àyi kòfalésè.

³⁴Àyi kí àruka ì dré ru amúzó akódhi be gò, ì dré Yésu ni ka'izo. Àyi nda i kòfalé dhi tá tògyabhá nda kí àlo, Dìyònùsíyò, tòkó àlo rú be Dàmári dhi, tsàle móndí àruka íbe.

Tà 'ole dhi i 18

Pólò li` Kòrítò na

¹Àmvolásà dhi, Pólò dré ngàzo Àtènáyì lésè lile bhàandre Kòrítò àdhya na.

²Kònàle dhi, ì dré ru kisúzó Yúdà mvá àlo rú be Àkílà angálépi Pótò lésè dhi be. Lavú dre lókyá tsà, ì angá tá bvò Ìtalíyà àdhya lésè tòkó ni rú be Pìrisíkà dhi be, alile Kòrítò le. Tako ko, Rómà kí ópí kàdrì, Kàlàwùdíyò fè tá tòlí tazoá dhi, Yúdà ànzì tití dhi i kòpfò bhàandre Rómà àdhya 'asè. Di Pólò dré tsàzo

³adrélé àyi bhàna, adrélé àzí 'o túmání àyi íbe. Àngyá ko, ì adré tá tití àzí àlo adrészó wémà ledé dhi ni 'o kòdhya.

⁴Sàbátù àlo àlo tití i sè dhi, Pólò adré tá Gíká ni kúlí ta Yúdà ànzì kí lìsámbò dzó na, adrészó Yúdà ànzì kí togó asé Gírikì íbe, ì kòka'iró Yésu be dhi bvó.

⁵Sílà i Tímòtéyò be dhi i kàtsá Mákèdònýà lésè dre dhi, Pólò dré kidhózó adrélé áyi lókyá wáyi dhi ni fe adrészó Gíká ni kúlí longó, adrészó tadhá Yúdà ànzì i dré dhi, Yésu Mèsíyà i káyà dhi.

⁶Di, Yúdà ànzì nda i dré ngàzo adrélé ligílé Pólò be, adrészó akódhi ni lodhá. Di Pólò dré áyi kítá kayázó, tazoá àyi dré dhi: «Àmi kí kàré kàdré ngole àmi kí tändi i dri. Ma tà àko má rú àmi kí tà sè. Kidhólé nyànomvá dhi, má adré mána lile Gíká ni kúlí longó móndyá surú twá ro dhi i véna. »

⁷Di akódhi dré apfòzo lìsámbò dzó nda lésè lile agó àlo rú be Títiyò Yúsitò dhi ni dzó na, ànyi lìsámbò dzó nda làgana. Akódhi nda tá móndí adrélépi Gíká ni ro dhi i.

⁸Kònàle dhi, lìsámbò dzó ni kàdrì rú be Kùrísipò dhi i móndyá tití akódhi ni dzó lésè dhi íbe dhi, ì dré Míri Yésu ni ka'izo. Di Kòrítòbhá àruka bì adrébhá Pólò ni kúlí yi dhi i adré tá kpà Yésu ni ka'i gò, ì dré adrészó bátísimò do.

⁹Ngátsi àlo sè dhi, ngá dré agázó Pólò mi toróbí tíni gò, Míri dré tazoá drá dhi: «Mí ro ngá ko! Mí gò adrélé áma tà longó. Mí tayí kúlí ko.

¹⁰Àngyá ko, ma túmání mí be. Dhya àlo kitswá drígá bha mí rú ámi 'òzo kònzi dhi ko. Tako ko, ma móndí íbe zyandre ró bhàandre kònìdhì 'á. »

¹¹Di Pólò dré gòzo adrélé kònàle, adrélé Gíká ni kúlí tadhá àyi dré kóná àlo tálí sè.

¹²Lókyá Gàlìyò dré tá adrérà'a gùvèrènérè ro bvò Àkáyà àdhya drile dhi 'á dhi, Yúdà ànzì i dré ngàzo ru amú Pólò rú gò, ì dré akódhi ni drizo lìzo ába tòbvó tárà na.

¹³Ì dré tazoá dhi: «Dhya kònìdhì adré ína móndí kí kodzó, ì kàdréró Gíká ni lìndrì bha láti twá àma kí tátrítrí kúlí dré adrélé tadhálé dhi rúsè dhi sè. »

¹⁴Dì Pólò dré tá adrérà'a 'ole kúlí ta dhi 'á dhi, Gàlìyò dré logózóá Yúdà ànzì nda i dré dhi: «Àmì Yúdà ànzì ró ni i, mì kàdré tá móndí asíkì tà kònzi tsà dhi sè yà, kó ngalè tà kònzi kàdrì dhi sè yà dhi, má ni tá àmì kì yi togó vwàvvà sè.

¹⁵Dì, mì dré adrélé tà kayí kúlí kì tà dri, rú kì tà dri, ìndì àmì kì tändi kì tátrítrí kúlí ni tà dri dhi sè dhi, mì nò àmikya tà nda i àmì. Má lè mána tà nda kì bvó tâle ko! »

¹⁶Dì dré àyi kì dròzo pfôle tâbvó târâ nda 'ásè.

¹⁷Gò àyi tití nda i dré àyi kì lísámbò dzó ni kàdrì rú be Sòséténè dhi ni rùzo tswàle tâbvó târâ nda kandrâ. Dì, Gàlìyò dré ína tà nda ni nòzo tà tâko ró.

Pólò gò Àtiyòkíyà na

¹⁸Pólò dré adrészó Kòritò na lókyá be vwàvvà ro. Dì dré lazízó móndyá ka'ibhá i tí gò, i dré mbàzo bwátù na Pìrisíkà íbe ìndì Àkílà be kitswálé lìle bvò Síriyà àdhya na. Drìdrì dré mbàzo bwátù na dhi kandrâ dhi, Pólò 'o tá áyi drìbhí rèle bhàandre rú zile Kékùréyà dhi na, mòndrà dré tá sìle dhi ni tà sè.

¹⁹I dré tsàzo bhàandre Èfésò àdhya na gò, Pólò dré Pìrisíkà kì tayízó Àkílà be. Dré ína lìzo Yúdà ànzì kì lísámbò dzó na Gíká ni kúlí ta àyi íbe.

²⁰Gò i dré akódhi ni ti lizízó, kàdréró dhu rè àyi véna vwàvvà ro tsà. Dì, dré ína ka'izoá ko.

²¹Dì, dré tá adrérà'a 'ole àyi kì tayí dhi 'á dhi, dré tâzoá dhi: «Gíká kòlè dhi, má ni go atsálé àmì ta. » Dré bwátù dòzo ngàzo Èfésò lésè,

²²lìle Kàyisàriyà na. Kòtsa dre dhi, dré rè zyà mbàzo Yèrusalémà na módo fe móndyá ka'ibhá i dré 'íká, gò lìzo Àtiyòkíyà na ndò.

²³Dré adrészó Àtiyòkíyà na lókyá be vwàvvà ro tsà. Gò dré ngàzo tatsílé bvò Gàlâtíyà àdhya 'ásè ìndì Fìrigiyà àdhya 'ásè, móndyá ka'ibhá tití dhi kì tîmbâbe àyi kì tà ka'ika'i na.

Àpólò tadhá Gíká ni kúlí Èfésò na i`ndi` Kòritò na

²⁴Lókyá nda kònàdhi sè dhi, Yúdà mvá àlo rú be Àpólò angálépi Àlìgìzàndrìyà lésè dhi, dré tsàzo Èfésò na. Akódhi nda tá móndí tà nilepi bì, ìndì Gíká ni Kúlí nilepi doro dhi 'ì.

²⁵À tadhá tá kpà drá Mírì ni tà doro. Dì akódhi ni togó tá àtsi ró adrészó Yésu ni tà longó, adrészó akódhi ni tà tadhá kyákyá. Dì, ni tá ína ngbà 'í bâtísímò Yòwánì àdhya ni tà kòdhya. ²⁶Dì dré kidhózó adrélé Gíká ni kúlí ta tirì àko Yúdà ànzì kì lísámbò dzó na. Pìrisíkà i Àkílà be dhi i kòyi akódhi dre dhi, i dré akódhi ni drìzo lìzo ába àyi véna gò, i dré Gíká ni tà àndu ngìzo drá doro kitswálé tití.

²⁷Amvolásà dhi, Àpólò dré lèzoá lìle bvò Àkáyà àdhya na. Dì móndyá ka'ibhá Èfésò le dhi i dré akódhi ni kodzozó lìle gò, i dré wárágà tisìzo àyi kì adrúpi Àkáyà na dhi i dré, i kòka'iró akódhi dòle àyi véna doro. Dì akódhi kòtsa kònàle dre dhi, dré móndyá Yésu ni ka'ibhá Gíká ni togó taní sè dhi kì ledézó tò.

²⁸Tàko ko, adré tá tà kayí Yúdà ànzì íbe rinyí sè móndyá tití i kandrá, adrészó tadhá tà tisile Giká ni Kúlí na dhi i sè dhi, Yésu Mèsiyà 'i káyà dhi.

Tà 'ole dhi i 19

Pólò tsa Èfésò na

¹Àpólò dré tá adrérà'a Kòrítò na dhi 'á dhi, Pólò dré láti dòzo lavúzó bvò kòngo ró Àsíyà àdhya 'ásè, lile tsale Èfésò na. Kònàle dhi, dré Yésu ni ka'ibhá àruka ki kisúzó gò,

²lizízóá àyi tí dhi: «Mì dré Yésu ni ka'izo dhi, mì kisú Tírí Lolo 'í? » Di i logó drá dhi: «Kóko, mà yi tá ko tâle dhi, Tírí Lolo be dhi. »

³Pólò gò lizíá dhi: «Kàdré kònini dhi, mì do di bâtisimò ángùdhi kòdhya? » I logó dhi: «Bâtisimò Yòwánì àdhya 'i. »

⁴Di Pólò tà àyi dré dhi: «Yòwánì fè tá bâtisimò móndí i dré, tadházóá dhi, i ladzá àyi ki togó dre. Di adré tá tâa àyi dré dhi, i kòka'i dhya adrélépi tá adhélé i bvó dhi kòdhya. Dhya nda Yésu 'i. »

⁵I kòyi kúlí nda dre dhi, i dré ngàzo bâtisimò do Míri Yésu ni rú sè.

⁶Di Pólò dré drígá bhàzo àyi dri gò, Tírí Lolo dré asízó àyi ki asó gò, i dré kidhózó adrélé ti twátwa ki ta, adrészó tà longó pròfétà kya tíni.

⁷Àgo nda i tá ànyiànyi mudrí-drì-rì.

⁸Àmvolásà dhi, Pólò dré lìzo Yúdà ànzì ki lísámbò dzó na gò, kidhólé adrélé Giká ni kúlí ta tirì àko. Dré Giká ni Òpì ni tà tadházó móndyá kònàle dhi i dré mbă na, adrészó àyi ki togó asé, i kòka'iró be dhi bvó.

⁹Di, àyi ki àruka i dré àyi ki togó 'òzo tombálé, kúlí nda ki gàzo gò, i dré kidhózó adrélé tà ta kònzi Míri ni láti ni tà rú móndyá tití i kandrá. Di Pólò dré àyi ki tayízó. Dré móndyá ka'ibhá dhi ki drìzo lìzo àyi íbe Tírànò ni dzó adrészó móndí ki tadhá dhi na gò, dré adrészó Giká ni tà ta àyi dré kítú àlo àlo tití i sè.

¹⁰Dré 'òzoá kònini kóná rì gò, móndyá tití Yúdà ànzì ró ìndì surú twá ro bvò Àsíyà àdhya lé dhi i dré Míri ni kúlí yìzo.

¹¹Giká adré tá rinyí fe Pólò dré adrészó tà kàdrì líndriga ró nòle rè ko dhi ki 'o.

¹²À adré tá ndìndì kítá twátwa dré tá tabèle dhi ki do lìzo bhàá dràbhá i rú gò, i dré adrészó adrílé àyi ki drà i lésè. Tírí kònzi i adré tá kpà topfòle àyi ki àruka i lésè.

Sèkévà ni ànzìàgo i` tabhì tiri` kònzi dròle

¹³Yúdà ànzì àruka i adré tá tatsílé àrà twátwa i 'ásè, adrélé tirí kònzi ki drobe topfòle móndí i lésè. Gò i dré kidhózó adrélé tà nda ni tabhì 'ole Míri Yésu ni rú sè, adrészó tâa tirí kònzi i dré dhi: «Má adré tâa àmi dri Yésu Pólò dré adrészó tà ni ni longó dhi ni rú sè dhi, mì pfò! »

¹⁴Dì Yúdà ànzì kí kòwánà kàdrì àlo rú be Sèkévà dhi ní ànzìàgo nzi-drì-rì dhi i adré tá kpà 'òá kònìnì.

¹⁵Kítú àlo dhi, i tà tá kònìnì gò, tirí kònzi nda dré logózó àyi dré dhi: «Má ní Yésu be. Má ní kpà Pólò àdhi i ya dhi be. Dì, àmi àmikya àdhibhbá i? »

¹⁶Dì agó tirí kònzi nda dré tá adrészó lána dhi dré dhèzo àyi dri, àyi tití dhi kí rìnyí lavú gò, àyi kí tswàzo tà tändi ró. Gò i dré lapázó dzó nda lésè bvólfí ro ìndi làzí be bì àyi rúsè.

¹⁷Móndyá tití Yúdà ànzì ró ìndi súrú twá ro Èfésò le dhi i kòyi tà nda dre dhi, tirí dré àyi kí 'òzo gò, i dré adrészó Míri Yésu ní rú ní lindrì bha.

¹⁸Dì móndí bì Yésu ní ka'ibhá dhi i adré tá alile tà kònzi i dré 'ole dhi kí ta ngádra 'á móndyá tití i kandrá.

¹⁹Àyi kí àruka adrébhá tá ländri ndribhá ro dhi i adré tá àyi kí búkù ländri àdhya kí adó alízo zàá móndyá tití i kandrá. Búkù i dré zàle nda kí làgí tá ànyíanyí làfa lò'wa ngùlù-nyadhi-rì-drì-mudré. ²⁰Dì ásà dhi, Míri ní kúlí adré tá la'ulé akódhí ní rìnyí sè, adrélé lile drídri.

²¹Tà nda i kò'o ru tití dre dhi, Pólò dré nòzoá dhi, dóro ní i dré lavulé bvò Mákèdònýà àdhya 'ásè ìndi Àkáyà àdhya 'ásè, lile Yérusalémà na dhi. Tà tá dhi: «Má kòlì tsàle kònàle dre dhi, adré kpà lèá dhi, má kòlì Rómà na. »

²²Dì dré áyi àzíàmu ri, Tímòtéyò i Èrástò be dhi kí mùzo lile i kandrána Mákèdònýà na gò, dré ína adrészó Àsíyà na lókyá tsà sè.

Èfésòbhá kí ligima Pólò i rú dhi

²³Lókyá nda sè dhi, tà dré abízó nyinyí Èfésò na Míri ní láti ní tà sè.

²⁴Agó àlo rú be Dèmètriyò adrélépi tá ngá di àrezá sè dhi tá kònàle be. Akódhí nda i àzízì ní i be dhi i adré tá gíká tòko ró rú be Àrètémì dhi ní dzó nzí tsàtsà dhi kí ledé àrezá sè, adrészó làfa kisú ásà bì. ²⁵Dì akódhí dré ngàzo áyi àzízì nda kí kímó túmání móndí àruka adrébhá tá ngá ledé àyi tití dhi i be gò, tàzoá àyi dré dhi: «Áma arúpi i, mì ní tâle dhi, mà adré làfa kisú bì àzí kòdhí sè dhi be.

²⁶Dì mì nò ìndi mì yi tâle dhi, Pólò kòdhí se móndí zyandre kònwa Èfésò 'a ìndi bvò wáyi Àsíyà àdhya lé dhi kí togó litílé dre. Adré ína tâá dhi, gíká lindrí móndí i dré adrélé ledélé àyi kí drígá sè dhi i, gíká tändi i ko.

²⁷Dì tà nda kitswá ngbà 'í àma kí àzí ní rú kizá kòdhya ko. A ní kókpà kitswá àma kí gíká tòkó gú, Àrètémì ní tépelò ní rú kizá gò, akódhí ní lindrí móndyá tití Àsíyà 'ásè ìndi bvò wáyi 'ásè dhi i dré adrélé bhàle dhi ní tingázó! »

²⁸Dì i kòyi tà nda dre dhi, àyi kí togó dré aswázó tà tändi ró gò, i dré ngàzo adrélé tetrélé adrészó loyóá dhi: «Àrètémì Èfésòbhá kya kàdrì lavulé! »

²⁹Gí ko, tà dré abízó nyinyi bhàandre nda 'á. Di móndí zyandre dhí ì dré Pólò ni atsíamu, Gáyò i Àristàrúkò be angábhá Mákèdònýà lésè dhí kí rùzo gò, ì dré ru wùzo lìle àyi íbe àrà kàdrì adrészó ru kímó dhí na.

³⁰Pólò adré tá ína lèá pfôle móndyá zyandre nda i kandrá. Di, móndyá ka'ibhá dhí ì dré àyikya ka'izoá ko.

³¹Ndìndì dhya kàdríkàdrì Àsíyà drile dhí kí àruka adrébhá tá Pólò ni arúpi ró dhí, ì dré kúlì mùzo akodhí ni ti lizí, kòpfòró móndyá zyandre nda i kandrá ko.

³²Móndyá zyandre ru kimóbhá nda kí drí abí dre nyinyi. Àyi kí àruka ì adré tá tetrélé, adrészó tà àlo ta. Àruka ni ì adré tá kó tà àzya ta. Àyi bí dhí ì ní tá ngalè ì kímó tá ru àdho tà sè ya dhí ko.

³³Yúdà ànzi ì dré agó àlo rú be Àlìgìzángrè dhí ni 'òzo pfôle móndyá zyandre i kandrá, kòngiró tà nda ni àndu be dhi bvó. Di akodhí dré drígá bhàzo kuru àyi kí kúlì kikízó, í kòkitswáró áyi tárà ga àyi kandrá.

³⁴Di, ì kònì akodhí Yúdà mvá 'í dhí dre dhí, ì dré ngàzo adrélé tetrélé kúlì àlo sè ànyìanyi sáà rì, adrészó loyoá dhí: «Àrétémì Èfésòbhá kya kàdrì lavulé! »

³⁵Kùdù ro dhí, dhya bhàle adrélé bhàandre nda ni tà tisì dhí dré ngàzo móndyá zyandre nda kí kúlì kikí gò, tázóá àyi dré dhí: «Àmì Èfésòbhá ni i, móndyá tití dhí ì ní tálé dhí, à bhà bhàandre Èfésò àdhya adrélé gíká gú, Àrétémì ni tépelò likí, akodhí ni líndrí adhélépi bhù lésè dhí íbe dhí be.

³⁶Dhya àlo kitswá tà kòdhí ni kayí bwà ko. Ásà dhí, adré lèá dhí, mì kàdré kíri, ìndì mì kò'o tà wàyá ro ko.

³⁷Mì adri àgo kònì i kònwa, tákò ì lodhá àyikya àma kí gíká tòkó ko, ì topá kpà ngá akodhí ni tépelò i lésè ko.

³⁸Di Démétriyò i àzízì ni íbe dhí ì kàdré tà íbe tálé móndí i rú dhí, àrà adrészó tabvó ta dhí ì be, ìndì tabvó tabhá i be. Adré di lèá dhí, ì kòlì tà ta móndí i rú kònàle.

³⁹Mì kàdré tà àzya íbe lizilé dhí, à ni kpà tà nda kí yi àrà adrészó tà kí bvó lanzí àma kí tolí sè dhí na.

⁴⁰Tako ko, tayí ngbà 'í tsà, à dré àma kí asíkízo móndí kí ligíma ándrò kònìdhí ni tà sè. À kòlizí àma dhí, mà kitswá tà àlo ta tà wàyá 'ole ándrò kònìdhí ni àndu ngìzo dhí bwà ko. » Di kòtà tà nda i dre dhí, dré móndyá zyandre ru kimóbhá nda kí 'òzo ayílé.

Tà 'ole dhí ì 20

Pólò lavú Mákèdònì́ yà 'ásè i` ndì` Gírikì kí bvò 'ásè

¹Tà wàyá nda kákí dre dhí, Pólò dré móndyá ka'ibhá dhí kí azízó gò, àyi kí kodzozó adrélé àyi kí totó tätä àyi kí tà ka'ika'i na. Kòlazí àyi tí dre dhí, dré ngàzo lìle bvò Mákèdònýà àdhya na.

²Dré lavúzó bvò nda 'ásè, tà bí dhí kí tabe móndyá ka'ibhá dhí kí timbàzo àyi kí tà ka'ika'i na. Dré tsàzo Gírikì kí bvò na gò,

³dré adrészó kònàle mbă na. Dré tá adrér'a 'ole bwátù do lìzo bvò Sìrìyà àdhya na dhi 'á dhi, dré yìzoá tâle dhi, Yúdà ànzì i yi tá ru kitswázó áyi 'o kònzi. Dí dré nòzoá dhi, dório ni i dré gòle bvò Mákèdònýà àdhya 'ásè dhi.

⁴Akódhi ni atsíamu i tá: Sòpátrò, Píró ni mvá angálépi Bèrójà lésè dhi, Àristàrükò i Sèkündò be angábhá Tèsàlòníkè lésè dhi i, Gáyò Dérúbè lésè dhi, Tímòtéyò, tsàle Tikikò i Tròfímò be angábhá bvò Àsíyà àdhya lésè dhi i.

⁵Àyì nda i dré lìzo drìdrì àma kandrána, kitswálé àma kí letè Trówà na.

⁶Àma ró dhi, gwányá Mápà tákú àko dhi àdhya àmvolésè dhi, mà dré bwátù dòzo ngàzo Filipoyì lésè gò, kitú nzi àmvolésè dhi, mà dré tsàzo ru kisú àma kí atsíamu nda íbe Trówà na. Gò mà dré adrészó kònàle kitú nzi-drì-rì.

Yùtikò ni tingama dràdrà lésè dhi

⁷Kítú ni àlo pósò àdhya sè dhi, mà kimó tá ru móndyá ka'ibhá dhi íbe, kitswázó mányàngá do nyàle. Pólò adré tá ta móndyá nda i dré. Dí dré tá adrélé 'ole lile drùbhì sè dhi sè dhi, dré gòzo adrélé tà ta tsàle ngátsi kítogá na.

⁸À tobhà tá tálà bǐ dhi i dzó 'a kìle kurú na mà dré ru kimózó lána dhi na.

⁹Kàdhúrà àlo rú be Yùtikò dhi lirí tá mòlísà na gò, ayí dré adrészó akódhi ni 'o, Pólò dré tá adrér'a tà ta vwàvwà ro dhi 'á. Dí ayí kòlavú akódhi dre dhi, dré dhèzo byá kìní na, dzó nda ni ètázì ni na 'ásè. À ni akódhi ni tingá dhi, àkò drà ína dre.

¹⁰Dí Pólò dré sizo, tandile kàdhúrà nda drìle, akódhi ni lomvó i drígá gò, tazoá móndyá tití i dré dhi: «Mì bhà àmi kí togó kuru ko! Akódhi lídrì íbe! »

¹¹I kògò mbàle dzó 'a kìle kurú na nda na dre dhi, i dré mápà tonjòzo nyàle. Dí Pólò dré gòzo tà ta tsàle drùbhì na gò, ngàzo lile.

¹²Gò i dré kàdhúrà nda ni drìzo nzìzo ába rúbhá be líná. Dí tà nda tindrì tá móndyá tití dhi kí togó lavulé.

Pólò nga Trówà lésè li`le Mìlétò na

¹³Gò mà dré bwátù dòzo lìzo drìdrì Pólò kandrána, kitswálé akódhi ni letè bhàandre rú zile Ásò dhi na. Tako ko, akódhi lè tá ína atsí tolé pá sè tsàzo àma kí kisú kònàle.

¹⁴Akódhi kàtsá àma kí kisú Ásò 'a dre dhi, mà dré tombàzo bwátù na lile tsàle bhàandre rú zile Mìtilénè dhi na.

¹⁵Kítú bvóá dhi sè dhi, mà dré gòzo lile bwátù sè, tsàle tûrù Kíyò àdhya kandrá. Kítú bvóá dhi sè dhi, mà dré tsàzo tûrù Sámò àdhya na. Dí kítú bvóá dhi sè dhi, mà dré tsàzo bhàandre rú zile Mìlétò dhi na.

¹⁶Pólò lè tá áyì kikilé Èfésò na ko, kòtigíro tà bvò Àsíyà àdhya na ko dhi sè. Tako ko, adré tá ína lèá lile mbèlè, kòkitswá dhi, kòtsaró Yèrusalémà na drìdrì gwányá Pàtékotè àdhya kandrá.

Pólò tà ta bhàgo Èfésò lésè dhi i dré

¹⁷Dì Milétò na dhi, Pólò dré kúlí mùzo Èfésò na bhàgo Èkèlézyà àdhya kí azí.

¹⁸Ì kàtsá akódhi vélé dre dhi, dré tázoo áyi dré dhi: «Lókyá mà dré tá adrérà'a àmi íbe dhi 'á dhi, mì nì ngalè má 'o tá tà ngíni ya dhi be, kidhólé kítú má dré atsázó bvò Àsíyà àdhya 'á dhi sè.

¹⁹Má 'o tá Mírì nì tà akódhi nì màrabà tíni, togó ànzimvá kya tíni dhi be ìndì mìndra be bǐ, tágba Yúdà ànzi ì dré tá áma tabhìzo tà ì dré tá ru yìzo 'òá má rú dhi i sè dhi.

²⁰Mì nì tâle dhi, má longó tá àmi dré Gìká nì kúlí, tà nì kí tadházó móndyá tití i kandrá, ìndì àmi kí dzó i 'ásè dhi be. Mà zù àmi dré tà àlo kitswálépi àmi kí ledé bwà dhi ko.

²¹Má kodzó tá Yúdà ànzi i móndyá súrú twá ro dhi íbe, i kòladzáró áyi kí togó agòzo Gìká vélé, ìndì i kòka'irò áma kí Mírì Yésu.

²²Dì mì yi rè ká! Nyànomvá dhi, má adré mána lìle Yèrúsalémà na, ngóró Tírí Lólo dré adrélé áma dri dhi tíni. Má nì àdho tà nì atsá má rú kònàle nì ya dhi ko.

²³Má nì ngbà 'í tà Tírí Lólo dré adrélé longolé má dré bhàandre àlo àlo tití i 'ásè kònìdhi be: Bă i kizà íbe dhi i adré áma letè kònàle.

²⁴Dì, má adré mána áma lídrì no tà tâko ró. Má adré ngbà 'í angú kòdhi nì le râle tsâle kùdù nì na, má kò'oró àzí Mírì Yésu dré tayílé má drígá dhi akílé tití, kòdhi adré tâá dhi, má kòlongóró Rúbí Tani Gìká nì togó taní nì tà dri dhi móndí i dré.

²⁵Dì nyànomvá dhi, má nì tâle dhi, àmi má dré tatsízó Gìká nì Òpì nì tà longóbe àmi kòfalésè dhi kí àlo kitswá gòle vélé áma mìbhalé no ko dhi be.

²⁶Ásà dhi, má adré tâá àmi dré ándrò kònìdhi dhi, àmi tití dhi i kòfalé dhi, dhya àlo nì kàrì kitswá ngòle má dri ko.

²⁷Tâko ko, má longó àmi dré tà tití Gìká dré tá lèle má kòlongó dhi i, àlo nì nì zu àko ró.

²⁸Dì mì kàdré àmi kí tândi kí likí, túmání kábilígyà kí pârí wáyi Tírí Lólo dré bhâle àmi drígá, mì kàdréró áyi kí drì ko dhi íbe. Mì kàdré Gìká nì Èkèlézyà dré gile áyi tândi nì kàrì sè dhi kí likí ngóró kábilígyà likíbhá dóro dhi i tíni.

²⁹Má nì tâle dhi, áma lîma àmvolésè dhi, kàlagí àtrá kí tifí àmi kòfalé kitswálé àmi kí 'o kònzi dhi be. Ì kitswá àyikya kábilígyà kí àlo tayí líná ko.

³⁰Ndìndì àmi kí tândi i kòfalé dhi, móndí àruka kí apfò adrélé tà bâti ladzá atsálé kinzò ro, kitswázó móndyá ka'ibhá dhi kí se àyi vésè dhi bvó.

³¹Ásà dhi, mì kàdré tâmiga dri! Mì kòtivì ko tâle dhi, gile kóná na dhi, má tayí tá àmi àlo àlo tití dhi kí kodzoma mìndra be bǐ kítú be ìndì ngátsi be dhi ko dhi.

³²Nyànomvá dhi, má adré àmi kí tayí Gìká drígá, akódhi kàdréró àmi kí timbà kúlí dré afêle áyi togó taní sè dhi sè, mì kòkisûró tà dré lazílé móndyá tití i dré bhâle twá adrélé ína ró dhi i dré tayílé ro dhi be dhi bvó.

³³Má bhà tá dhya àlo ní ngá lovó ko, kàdré akódhì ní àrezá 'i yà, akódhì ní órò 'i yà, kó ngalè akódhì ní kítá 'i yà dhi.

³⁴Àmì kí tändi, mì ní tåle dhi, má 'o tá àzí áma tändi ní drígá sè, kitswázó ngá kisú áma dré, áma bhápi íbe dhi be.

³⁵Tà tití má dré 'ole dhi i sè dhi, má tadhá àmì dré dhi, lè mì kàdré àzí 'o landè àko ró kònìnì, kitswázó móndí yàyà dhi kí ledé. Mì kisù rè kúlí Míri Yésu ní tändi dré tåle kònì i ká: <Dhya adrélépi ngá fe dhi ní kólénzé adré dhya adrélépi ngá kisú dhi àdhyá ní lavú. »»

³⁶Pólò kòtà tà nda i dre dhi, i dré àyi kí kórókó titízo tà zízo Gíká tí.

³⁷Dí àyi tití dhi i dré adrészó Pólò ní kamú, adrészó ngòle rúá, i dré tá adrérà'a lazilé tíá dhi 'á.

³⁸Àyi kí togó tá kizà ro lavúlé, akódhì dré tá tåle dhi, i kitswá góle vélé áyi no ko dhi sè. Gò i dré akódhì ní adzízó yíandre mìle, kòmbàró bwátù na.

Tà 'ole dhi i 21

Pólò li` Yérusalémà na

¹Mà kòlanzí ru bhàgo nda íbe dre dhi, mà dré bwátù dòzo lìzo pyà tûrù Kósà àdhyá na. Kítú bvóá dhi sè dhi, mà dré tsàzo tûrù Ródò àdhyá na. Gò mà dré lìzo tsàle bhàandre Pàtárà àdhyá na.

²Kònàle dhi, mà dré bwátù àzya adrélépi 'ole zyàle bvò Fòwinikè àdhyá na dhi ní kisúzó gò, mà dré tombàzo lánà lìle.

³Mà kòtsa àrà adrészó tûrù Kipírò àdhyá ní drì no dhi na dre dhi, mà dré lavúzó tâbhu ní lésè gò, lìle bvò Siriyà àdhyá na. Dí mà dré tsàzo bhàandre Tírè àdhyá na, à kòtiriró ngá bwátù nda dré adólé dhi i be dhi bvó.

⁴Kònàle dhi, mà dré móndí ka'ibhá àruka kí kisúzó gò, mà dré adrészó àyi íbe kítú nzi-drì-rì. Àyi nda i dré tâzoá Pólò dré Tír Lólo ní rinyí sè dhi, kòlì Yérusalémà na ko.

⁵Dí, àma kí lókyá kòkitswá dre dhi, mà dré àmakya ngàzo kîtswálé lìle. Móndyá ka'ibhá tití nda i, àyi kí tòkó i ìndì àyi kí ànzimvá íbe dhi, i dré àma kí adzízó apfòle bhàandre nda lésè gò, mà dré àma kí kórókó titízo tà zízo Gíká tí yíandre mìle.

⁶Mà kòlazí àyi tí dre dhi, mà dré tombàzo bwátù na lìle gò, i dré àyikya nzízo àyi bhàna.

⁷Mà kònga Tírè lésè dre dhi, mà dré lìzo tsàle bhàandre rú zìle Pòtolémayì dhi na. Kònàle dhi, mà dré módo fèzo àma kí adrúpi Yésu ní ka'ibhá dhi i dré gò, mà dré adrészó àyi íbe kítú àlo.

⁸Kítú bvóá dhi sè dhi, mà dré lìzo tsàle bhàandre Kàyìsàrìyà àdhyá na. Kònàle dhi, mà dré adrészó Filípò, Rúbí Tani longolépi dhi ní dzó na. Akódhì nda tá dhya nzi-drì-rì kipèle Yérusalémà na dhi kí àlo 'i.

⁹ Akódhi tá ànzítòkó su mobhá rè ko, adrébhá tá Gìká ni kúlí longó pròfétà kya tñi dhi íbe.

¹⁰ Mà kàdré kònàle gile kitú àruka i dre dhi, pròfétà àlo rú be Àgábò dhi dré atsázó bvò Yùdáyà àdhya lésè.

¹¹ Akódhi nda dré áyi kisizó ànyi àma làga, Pólò ni káfà adó, áyi pá ki adròzo áyi drigá íbe gò, tazoá dhi: «Tirí Lolo adré tåá dhi: Yúdà ànzì Yérusalémà na dhi ki káfà kònìdhi ni líyí ni adrò kònìnì gò, i dré akódhi ni fèzo móndí súrú twá ro dhi i drigá. »

¹² Mà kòyi tà nda dre dhi, àma móndyá ka'ibhá kònàle dhi íbe dhi i, mà dré Pólò ni ti lizizó, kòlìró Yérusalémà na ko dhi bvó.

¹³ Di, Pólò dré ína logozóá dhi: «Mì adré ngòle, adrészó àma togó 'o njole àdho tà sè? Ma gànzi ró ngbà 'i bă nya kòdhya ko. Ma kókpà gànzi ró lile dràle Yérusalémà na Míri Yésu ni rú ni tà sè. »

¹⁴ Di mà dré kitswálé akódhi ni logá bwà ko dhi sè dhi, mà dré kúlí tayízó, tazoá dhi: «Tà Míri dré adrélé lèle 'ole dhi kò'o ru wà. »

¹⁵ Amvolásà, mà dré tà tití dhi ki ledézó gò, mà dré mbàzo Yérusalémà na.

¹⁶ Mà mbà tá túmání móndí ka'ibhá àruka Kàyisàriyà lésè dhi íbe. Di i dré àma ki drizo lìzo àma íbe agó àlo rú be Mìnàsónà dhi ni dzó na, mà kàyíró kònàle be dhi bvó. Akódhi nda angá tá Kipírò lésè, indi akódhi tá móndí Yésu ni ka'ilépi kínó lésè dhi i.

Pólò i` kimó ru bhàgo Èkélézyà àdhya i` be

¹⁷ Mà kòtsa Yérusalémà na dre dhi, àma ki adrúpi Yésu ni ka'ibhá dhi i dré àma ki ka'izo dòle togó dóro sè.

¹⁸ Kitú bvóá dhi sè dhi, mà dré lìzo Pólò be Yákóbhò bhàna. Kònàle dhi, bhàgo tití Èkélézyà àdhya i` kimó tá kpà ru.

¹⁹ Di Pólò dré mòdo fèzo àyi dré gò, tà tití Gìká dré 'ole áyi àzí sè móndyá súrú twá ro dhi i kòfalé dhi ki titízó àyi dré mìbhalé tí.

²⁰ I kòyi tà nda i dre dhi, i dré ngàzo adrélé Gìká ni rú bha kùle. Gò i dré tazoá Pólò dré dhi: «Àma ki adrúpi, mí nò rè ngalè Yúdà ànzì lìzolìzo dhi i ka'i Yésu ngíni ya dhi ká. Àyi tití nda ki togó kókpà àtsi ró Mósè ni tátrítrí kúlí ni tà sè.

²¹ Di, i yi tâle dhi, mí adré mína Yúdà ànzì tití ayibhá móndyá súrú twá ro dhi i kòfalésè dhi ki tadhá, i kòtayíró Mósè ni tátrítrí kúlí, indi i kògoró vélé adrélé àyi ki ànzì ki lwa ko, adrészó kpà àma ki labhi lebè ko.

²² Mà ni 'òá ngíni? Tako ko, i ni dra ámi atsama ni rúbí yi 'i.

²³ Di mí kò'o tà mà dré adrélé tâle mí dré kònìdhi kòdhya. Ago su móndrà sibhá dhi i kònwa àma kòfalé be.

²⁴ Mí kòdrì àyi nda i lìzo àyi íbe, mí kòtemvéró àmi túmání àyi íbe Gìká kandrá. Mí kòfè kpà làfa i dré kitswázó àyi ki drìbhí 'o rèle dhi mi. Mí kò'o kònìnì dhi, móndyá

títí dhi kí nìá tâle dhi, tà adrélé tâle mí rú kòdhi i kinzò 'í dhi be. Ì ní kpà nìá dhi, mí adré mína tà tátrítrí kúlí dré adrélé tâle dhi kí ka'í 'ole dhi be.

²⁵Kàdré móndyá ka'ibhá súrú twá ro dhi kí tà sè dhi, mà tisì tá wárágà, tà mà dré tá ru yízo i kò'o dhi kí longózó àyi dré. Má tisì tá dhi, i kònya mányàngá fele gíká tâko i dré dhi ko, i kònya kà'wá kàrí ko, i kònya kà'wá 'ole zùle drâle dhi kí zâ ko, ìndì i kò'o ndòtò tà ko. »

²⁶Dì kítú bvóá dhi sè dhi, Pólò dré àgo nda kí drízo lìzo àyi kí temvé túmâní í be. Gò dré fízo tépelò na, kitswálé lókyá àyi kí temvema nda dré kítswázó akílé gò, ngá fèzo Gíká dré àyi àlo àlo tití dhi kí rú sè dhi ní longó.

À ru Pólò tépelò na

²⁷Kítú nzi-drì-rì àyi kí temvema nda àdhya i dré tá adrérà'a 'ole akílé dhi 'á dhi, Yúdà ànzi àruka angábhá bvò Àsíyà àdhya lésè dhi i dré Pólò ni nòzo tépelò na. Dì i dré ngàzo móndyá zyandre tití dhi kí 'a tifí, akódhi ni rùzo gò,

²⁸i dré kúlí yòzo tâzoá dhi: «Ìsérélè ànzi i, mì alì àma kí ledé wà! Kònìdhi agó adrélépi móndyá tití àrà tití i 'ásè dhi kí kodzó ligílé àma kí súrú rú, àma kí tátrítrí kúlí rú, ìndì tépelò kònìdhi rú dhi 'í. Kòdhi íbe dhi, akódhi adrì ndìndì móndí súrú twá ro dhi i afízó àyi íbe tépelò le, àrà lolo kònìdhi ni 'ozo atsálé ndíró! »

²⁹(Ì tà tá kònìnì tâko ko, i nò tá Tròfímò angálépi Èfésò lésè dhi i Pólò be bhàandre 'á. Dì i adré tá àyikya kisùá dhi, Pólò adrì tá akódhi afízó ába tépelò le.)

³⁰Dì tà nda dré móndyá tití bhàandre nda 'á dhi kí 'a tifízó gò, i dré angázó arálé àrà tití i lésè Pólò ni ru, akódhi ni sèzo pfòzo ába tépelò 'ásè gò, tépelò ni dzóti kí tesézó.

³¹Dì i dré tá adrérà'a 'ole Pólò ni pfu drâle dhi 'á dhi, Rómà kí sòdá kí kàdrì dré yìzoá tâle dhi, tà abí dre nyinyí Yèrúsalémà 'a.

³²Gbă kòdhwa, akódhi dré sòdá kí drízo àyi kí drì kobhá íbe ràzo àyi íbe móndyá zyandre nda i véna. Àyi nda i kònò sòdá kí kàdrì nda i sòdá ni íbe dre dhi, i dré Pólò ni pfùma tayízó.

³³Dì sòdá kí kàdrì nda dré áyi kisízó ànyi akódhi làga gò, akódhi ni 'o rûle, adrôle nyìrì rì dhi i sè. Gò dré lizízóá ngalè akódhi àdhi 'í ya dhi, ìndì 'o tá àdho tà 'í ya dhi.

³⁴Móndyá zyandre nda i kòfalé dhi, móndí àruka i adré tá tetrélé, adrészó tà àlo ta. Àruka ni i adré tá kó tà àzya ta. Tà wàyá nda sè dhi, sòdá kí kàdrì nda kítswá tá tà nda ni àndu ni bwà ko. Dì dré Pólò ni 'ozo dríle lìzo ába dzó kàdrì adrészó sòdá kí likí dhi na.

³⁵Sòdá nda i kòtsa Pólò be àrà adrészó mbàle dzó kàdrì nda na dhi na dre dhi, i dré akódhi ni dòzo dòzo móndyá zyandre nda kí ligíma ni tà sè.

³⁶Tâko ko, àyi tití dhi i adré tá lìle tetrébe àyi vésè, adrészó loyóá dhi: «Akódhi kòdràdrà! Kòdràdrà! »

Pólò ga áyi târâ móndyá zyandre i kandrâ

³⁷À dré tá adrérà'a 'ole Pólò nì 'o file dzó kàdrì nda na dhi 'á dhi, dré lizízóá sòdá kì kàdrì tí dhi: «Má nì kitswá tà ta mí dré bwà? » Dì sòdá kì kàdrì nda logó drá dhi: «Mí nì tákò Gírikì ti tâle be? »

³⁸Mi kònìdhì tsì Èzèpétò agó atú móndí kì kodzolépi ligílé gò drìkònzibhá ngùlù-su dhi kì drìzo lapázó àyi íbe duku na dhi 'í ko? »

³⁹Dì, Pólò logó drá dhi: «Ma, ma Yúdà mvá angálépi Tàrúsò bvò Kìlikiyà àdhya lé dhi lésè dhi 'í. Dì ma móndí bhàandre rúku kyàkyà dhi lésè dhi 'í. Má adré ámi ti lizí, mí kòfèrò má dré láti tà tâzo móndyá zyandre kòni i dré. »

⁴⁰Dì sòdá kì kàdrì nda kòka'i dre dhi, Pólò dré ngàzo áyi totó àrà adrészò mbàle dzó kàdrì nda na dhi na gò, drígá bha kuru móndyá zyandre nda kì kúlí kikízó. Dì ngá kòbhù ndiii dre dhi, dré tâzoá àyi dré Èbérè ti sè dhi:

Tà 'ole dhi i 22

¹«Áma adrúpi i, áma atá íbe nì i, mì yi rè tà má dré adrélé tâle àmi dré áma târa gàzo nì i ká! »

²Ì kòyi akódhi adrérà'a tà ta àyi dré Èbérè ti sè dre dhi, i dré gòzo vélé adrélé kíri wáláká nì nì lavú. Gò Pólò dré tâzoá dhi:

³«Ma Yúdà mvá tìle Tàrúsò bvò Kìlikiyà àdhya lé dhi na dhi 'í. Dì, à likí tá ma mbàle kònwa Yèrúsalémà 'a. Gàmàliyélè tadhá tá àma kì tâbhí kì tâtrítrí kúlí má dré nile kyá dhi nì. Áma togó tá atsí ró Gíká nì tà sè, àmi tití ándrò nì kya tíni. »

⁴Kàdré móndyá adrébhá Yésu kòdhì ni láti lebè dhi kì tà sè dhi, má pfo tá àyi kì mì tsàle byá àyi kì dràdrà na. Má turú tá àyi àgo ró ìndì tòko ró nda i lebhélé bădzó na.

⁵Kòwánà kì kàdrì i bhàgo kàdrì tití dhi íbe dhi kì kitswá tadhá dhi, tà má dré adrélé tâle kòdhì i tà bâti 'í dhi. Má kisú tá ndìndì wárágà àyi nda i dré tisìle àyi kì adrúpi Dàmàsékè na dhi i dré dhi i gò, má dré lìzo ába kitswálé móndyá ka'ibhá kònàle dhi kì turú adrìle Yèrúsalémà le, à kònjoró tà àyi dri be dhi bvó. »

Pólò tití', i' ka'ì Yésu ngí' nì ya dhi

(À kònò kpà Tà 'ole dhi i 9:1-19; 26:12-18)

⁶«Lókyá má dré tá adrérà'a tsàle ànyi Dàmàsékè làga ànyiànyi kítú rírí sè dhi 'á dhi, ngádra kàdrì bhù lésè dhi dré kòzo ngbò ró ngá kazá má làgásè kúrú. »

⁷Dì má dré dhèzo kìní mi gò, má dré kúlí yìzo tàá má dré dhi: «Sàwúlò, Sàwúlò, mí adré áma mì pfo àdho tà sè? »⁸Má dré lizízóá dhi: «Míri, mí àdhi 'í? » Dì kúlí nda logó má dré dhi: «Ma, Yésu Nàzàréta lésè, mí dré mína adrélé mì pfòle dhi 'í. »

⁹Áma atsíàmu i nò tá kpà ngádra nda 'í. Dì, i nì tá àyikya tà kúlí nda dré tá adrélé tâle má dré dhi kì àndu ko.

¹⁰Gò má dré lizízóá dhi: «Míri, lè má kò'o ngíni? » Míri logó má dré dhi: «Mí nga lìle Dàmàsékè na. Kònàle dhi, à nì tà tití Gíká dré bhàle mí kò'o dhi kì ta mí dré. »

¹¹Dì má dré kitswálé ngá no ngádra nda ni lagulagu dré bwà ko dhi sè dhi, áma atsíamu i dré áma drígá rùzo, áma sèzo lìzo má be Dàmàsékè na.

¹²Kònàle dhi, agó àlo rú be Ànànýà dhi dré alìzo áma no. Akódhi nda tá móndí adrélépi trôle Mósè ni tátrítrí kúlí rú dhi 'i. Yúdà ànzì tití Dàmàsékè na dhi i adré tá kpà akódhi ni rú ta dóro.

¹³Akódhi kàtsá áyi totó ànyi má làga dre dhi, dré tàzoá má dré dhi: «Áma adrúpi Sàwúlò, ámi mì kògò ngá no! » Gbà lókyá nda sè dhi, má dré gòzo adrélé ngá no gò, má dré akódhi ni nòzo.

¹⁴Akódhi dré tàzoá má dré dhi: «Giká àma kí tábhí kya zì mì kitswálé tà i dré adrélé lèle 'ole dhi kí ni, kitswálé Dhya gyágga dhi ni no, ìndì kitswálé akódhi nda ni kúlí yi tíá dhi bvó. »

¹⁵Tàko ko, mí ni akódhi ni tà mí dré nòle ìndì mí dré yile dhi kí longó móndyá tití i dré.

¹⁶Dì nyànomvá dhi, mí adré àdho tà letè? Mí nga akódhi ni zi adrélé ámi Míri ro, ìndì mí do bátisimò, Giká kòdziró mí ámi tàkonzi i lésè be dhi bvó. »»

Pólò tití', Míri zi i li`le móndyá súrú twá ro dhi i véna ngi' ni ya dhi

¹⁷«Má kàgò Yérusalémà le dre dhi, má dré adrészó tà zi Giká tí tépelò na gò, ngá dré afizó má dri toróbí tíni.

¹⁸Má nò tá Míri adrérà'a tàá má dré dhi: «Mí nga mbèlè pfòle Yérusalémà 'ásè. Tàko ko, móndyá Yérusalémà 'a dhi i kitswá àyikya áma tà mí dré adrélé longolé dhi kí ka'i bwà ko. »

¹⁹Má logó dhi: «Míri, àyi nda i nì doro tâle dhi, má adré tá mána tatsílé lísámbò dzó i 'ásè móndyá adrébhá ámi ka'i dhi kí turúbe lebhélé bădzó na, adrészó kpà àyi kí bhwa.

²⁰Kòdhi i be dhi, lókyá à dré tá adrérà'a Sètèfánò, ámi tà longolépi dhi ni kàrì kutú dhi 'á dhi, ma tá mána kònàle, adrélé tà nda ni ka'i, adrészó kpà dhya adrébhá tá akódhi ni pfu dràle dhi kí kítá likí. »

²¹Dì Míri dré tàzoá má dré dhi: «Mí li, tàko ko, má ni ámi mu lile làwú làvo na, móndyá súrú twá ro dhi i véna. »»

Pólò tadhá dhi, i Rómà agó 'i

²²Móndyá zyandre nda i yi tá Pólò tsàle lókyá dré kúlí nda ni tárà'a. Gò i dré ngàzo kúlí loyó, adrészó tàá dhi: «À kòtingá akódhi móndí i kòfalésè! Kitswá ína lídrì sè ko! »

²³I dré adrészó tetrélé, adrészó àyi kí kítá kí lebhé kìní mi, adrészó tâpfulíndrì lomvó todàle kurú na.

²⁴Dì sòdá kí kàdrì nda dré Pólò ni 'ozo drile fízo ába àyi kí dzó kàdrì na. Dré tàzoá dhi, à kòbhwà akódhi adrészó akódhi ni lizí, kòtaró tà móndyá zyandre nda i dré tá adrészó tetrélé i rú dhi ni àndu.

²⁵Dì, à kàdrò akódhì kïtswálé bhwàle dre dhi, Pólò dré lizízóá sòdá kì drì kobhá kì àlo tí dhi: «Rómà kì tátrítrí kúlí ka'ì, mì kàdré móndí Rómà ro dhi nì bhwa, akódhì nì tábvo ta àko ró dhi 'ì? »

²⁶Dì sòdá kì drì kòlepi nda kòyi kúlí nda dre dhi, dré lìzo longóá sòdá kì kàdrì nda dré, tàzoá dhi: «Mí adré tá 'ole àdho tà 'o? Tàko ko, agó kòdhì ína móndí Rómà ro dhi 'ì! »

²⁷Dì sòdá kì kàdrì nda dré áyì kisízó ànyì Pólò làga, lizíá tíá dhi: «Mí tà rè má dré ká: Mí móndí Rómà ro dhi 'ì báti? » Pólò logó dhi: «Àyíya, kònìnì. »

²⁸Sòdá kì kàdrì tà dhi: «Má fè mána làfa kàdrì, atsázó móndí Rómà ro dhi ró. » Dì Pólò logó dhi: «Mána, à ti ma móndí Rómà ro dhi ró dhi titì. »

²⁹Gbă kòdhwa, sòdá adrébhá tá 'ole Pólò nì lizí dhi ì dré akódhì nì tayízó. Dì tìrì dré sòdá kì kàdrì nda nì 'ozo, dré nìle í 'o tá Pólò adrélépi Rómà ro nì adrôle nyìrì sè dhi sè.

Pólò pfò Yúdà ànzì kì bhàgo kàdrì` i kandrá

³⁰Kítú bvóá dhi sè dhi, sòdá kì kàdrì nda dré kòwánà kàdrì kì 'ozo ru kímó bhàgo kàdrì tití dhi íbe. Dì dré Pólò nì trìzo gò, 'ozoá apfòle àyì nda i kandrá, kïtswázó tà Yúdà ànzì ì dré adrészó akódhì nì asíkì dhi nì àndu ni dhi bvó.

Tà 'ole dhi i 23

¹Dì Pólò dré ngàzo bhàgo kàdrì nda kì no dìií gò, tàzoá dhi: «Áma adrúpi i, áma togó arókì ma ko tà tití má dré 'ole Gíká kandrá atsálé ándrò kònìdhi dhi i sè dhi. »

²Gbă kòdhwa, kòwánà kì kàdrì rú be Ànànýà dhi dré móndyá adrébhá Pólò làga dhi kì 'ozo akódhì nì ti sa.

³Dì Pólò dré tàzoá drá dhi: «Mì, àbè rúbhá tswàle mvèle kemve dhi ró nì, Gíká nì ámì tswa nì! Mí lirí mína kònàle kïtswálé áma tábvo ta àma kì tátrítrí kúlí sè. Dì, mí 'o mína ma tswàle, adrészó tátrítrí kúlí nda nì njø. »

⁴Gò àyì adrébhá Pólò làga nda i dré tàzoá drá dhi: «Mí 'o mi ngíni adrélé Gíká nì kòwánà kì kàdrì ni lodhá kònìnì dhi? »

⁵Dì Pólò logó dhi: «Adrúpi i, má nì tá ko tâle dhi, akódhì kòwánà kì kàdrì 'ì dhi. Àngyá ko, Gíká nì Kúlí adré tâá dhi: «Mí kòtà tà kònzi ámì móndyá kì kàdrì rú ko. » »

⁶Dì Pólò nì tá tâle dhi, bhàgo kàdrì ru kímóbhá nda i kòfalé dhi, móndí àruka i tá Sàdùkáyò 'ì, ìndì àruka nì i tá Fàrisáyò 'ì dhi be. Dì dré kúlí yòzo tàzoá àyì dré dhi: «Áma adrúpi i, ma mána Fàrisáyò 'ì, ìndì Fàrisáyò mvá 'ì. À adré áma tábvo ta ándrò kònìnì, má dré adrélé mì bha Gíká véna adrészó ka'íá dhi, móndyá dràbhá dre dhi kì nga dràdrà 'ásè dhi sè! »

⁷Kòtà tà nda dre dhi, lawà dré kìzo Fàrisáyò i kòfalésè Sàdùkáyò íbe gò, móndyá zyandre nda i dré ru lanzízó.

⁸(Tàko ko, Sàdùkáyò ì adré àyikya tàá dhi, ngangà dràdrà 'ásè dhi yókódhó, ìndì ángéló i tirí íbe dhi i yókódhó. Dì, Fàrìsáyò ì adré àyikya tà nda kí ka'i tití.)

⁹Dì lawà nda dré vélé kízo lavulé gò, tátrítrí kúlí tadhábhá àruka Fàrìsáyò ró dhi ì dré ngàzo adrélé tà kayí rinyí sè, adrészó tàá dhi: «Mà kisú àmakya tà kònzi àlo dhi agó kònìdhí véna ko. Àruka ni, tirí 'í yà, kó ngalé ángéló 'í yà dhi tà drá nì! »

¹⁰Dì lawà nda dré tá adrélé lìle drìdrì dhi sè dhi, sòdá kí kàdrì nda adré tá ngá ro, ì ni dra Pólò ni ru pfûle dràle dhi sè. Dì dré lazizóá áyi sòdá i dri dhi, ì kòsi akódhí ni apá ayi drígásè, drile lìzo ába àyi ki dzó kàdrì na.

¹¹Kítú nda ni ngátsi sè dhi, Míri dré agázó Pólò kandrá tàá drá dhi: «Mí tsí togó! Ngóró mí dré áma tà longolé kònwa Yérúsalémà 'a dhi tíni dhi, adré kpà lèá dhi, mí kòlongó áma tà Rómà na. »

Yúdà ànzì i` yi ru kitswázó Pólò ni pfu dràle

¹²Ngá kòwa dre dhi, Yúdà ànzì àruka ì dré ru yìzo gò, mòndrà sìzo àyi kòfalésè tazoá dhi, ì kitswá ngá nya ko ìndì ngá mvu ko, tsàle ì dré Pólò ni pfurà'a dràle dhi 'á.

¹³Dhya ru yibhá tà nda dri dhi ì lavú tá nyadhi-rì.

¹⁴Dì ì dré lìzo kòwánà kàdrì i véna bhàgo íbe, tàá àyi dré dhi: «Mà sì mòndrà àma kòfalésè tazoá dhi, mà kitswá ngá nya ko ìndì ngá mvu ko, tsàle lókyá mà dré dra Pólò ni pfùzo dràle dhi 'á.

¹⁵Dì nyànomvá dhi, àmi túmání bhàgo kàdrì íbe dhi i, mì kòlizí sòdá kí kàdrì, kògoró Pólò ni 'o apfòle àmi kandrá, ngóró mì lè tá akódhí ni tà ndàle nìle kyá na tíni. Dì àma ró dhi, mà ni adré rìle kitswálé akódhí ni pfu dràle drìdrì dré dra atsázó kònwa dhi kandrá. »

¹⁶Dì, tà ì dré ru yìzo 'òá Pólò rú nda ni rúbí dré dhèzo akódhí ni kòdromvá bína gò, akódhí nda dré lìzo longolé Pólò dré sòdá kí dzó kàdrì na.

¹⁷Gò Pólò dré sòdá kí drì kobhá kí àlo azizó, tazoá drá dhi: «Mí drì kàdhúrà kònìdhí lìzo ába sòdá kí kàdrì véna. Tàko ko, akódhí tà íbe longolé drá. »

¹⁸Dì sòdá kí drì kòlepi nda dré akódhí ni drìzo lìzo ába sòdá kí kàdrì véna, tazoá dhi: «Pólò 'ile bădzó na kòdhí zi tá ma lizilé, má kàdziró kàdhúrà kònìdhí mí vélé. Àngyá ko, akódhí tà íbe longolé mí dré. »

¹⁹Dì sòdá kí kàdrì nda dré kàdhúrà nda ni drígá rùzo, akódhí ni drìzo gàrà dri gò, lizizóá tiá dhi: «Mí adré àdho tà le longolé má dré? »

²⁰Dì kàdhúrà nda logó dhi: «Yúdà ànzì i` yi ru ámi lizizó, mí kò'oró Pólò pfòle kìdrú bhàgo kàdrì i kandrá, ngóró ì lè tá akódhí ni tà ndàle nìle kyá na tíni.

²¹Adré dì lèá dhi, mí kòka'i mína ko. Tàko ko, àyi kí àruka ànyiànyi nyadhi-rì dhi ì adré àyikya rìle akódhí bvó láti 'á. Àyi nda i sì mòndrà tazoá dhi, ì kitswá ngá nya ko ìndì ngá mvu ko tsàle lókyá ì dré dra akódhí ni pfùzo dràle dhi 'á. Nyànomvá kònìdhí, àyi gànzi ró, adrélé ngbà 'í ámi kúlí letè kòdhya. »

²²Dì sòdá kì kàdrì nda dré lazízóá kàdhúrà nda dri dhi: «Mí kòtà tà mí dré longólé má dré kòdhì dhya àlo dré ko. » Gò dré akódhì ni tayízó lìle.

À mù Pólò gùvèrènérè Fèlíkisi véna Kàyìsàríyà na

²³Dì sòdá kì kàdrì nda dré áyi sòdá kì dri kobhá rì dhi kì azízó, tazoá àyi dré dhi: «Mí ledé tà tití dhi i kitswázó sòdá kámá-rì dhi kì dri, túmání sòdá nyadhi-na-dri-mudrí dòngí i dri dhi íbe, ìndì sòdá kámá-rì dìlì íbe àyi drígá dhi íbe, lìzo àyi íbe sáà nzi-drì-su ngátsi àdhya sè Kàyìsàríyà na.

²⁴Mí bhà kpà dòngí i kitswálé Pólò ni do tsàle byá gùvèrènérè Fèlíkisi véna líná dhi bvó. »

²⁵Dì dré wárágà tisìzo gùvèrènérè nda dré kònìnì:

²⁶«Ma, Kàlàwùdíyò Lìsíyà, má adré wárágà kònìdhì ni tisì mi, atálágó, gùvèrènérè Fèlíkisi dré. Mòdo mí dré!

²⁷Yúdà ànzì i ru tá agó má dré adrélé mûle mí véna kònìdhì gò, i dré tá adrész 'ole akódhì ni pfu dràle. Dì má dré yìzoá tâle dhi, akódhì móndí Rómà ro dhi i gò, mà dré lìzo sòdá mána íbe akódhì ni apá àyi drígásè.

²⁸Má lè tá tà i dré adrész akódhì ni asíkì ásà dhi ni àndu nìle gò, má dré akódhì ni 'òzo pfòle àyi kì bhàgo kàdrì i kandrá.

²⁹Má dré kisúzóá dhi, i adré akódhì ni asíkì àyi kì tátrítrí kúlì ni tà sè. Dì, tà tà bhàzo akódhì dri kitswálé dràdrà sè yà, kó ngalè bă sè yà dhi tá yókódhó.

³⁰Má dré yìzoá tâle dhi, i yi tá ru kitswázó akódhì ni pfu dràle dhi, má dré akódhì ni mùzo lìle gbä lókyá nda sè mí véna. Má dré kpà lazízóá akódhì ni asíkibhá i dri dhi, i kòlì tà i dré adrész akódhì ni asíkì ásà dhi kì ta mí kandrá. »

³¹Dì sòdá nda i dré Pólò ni drizo lìzo ába ngátsi sè ngóró tá tâle àyi dré dhi tñi gò, i dré tsàzo bhàandre rú zile Àtipátri dhi na.

³²Kítú bvóá dhi sè dhi, i dré akódhì ni tayízó sòdá dòngí i dri nda i drígá, i kògòrò lìle ába be dhi bvó. Gò àyi lìbhá pá sè dhi i dré àyikya nzìzo àyi kì dzó kàdrì na.

³³Dì sòdá dòngí i dri nda i kòtsa Kàyìsàríyà na dre dhi, i dré wárágà nda ni fèzo gùvèrènérè Fèlíkisi dré gò, Pólò ni tayízó akódhì drígá.

³⁴Dì gùvèrènérè nda dré wárágà nda ni nàzo gò, lizízóá Pólò tí ngalè akódhì angá tá bvò ángùdhi lésè ya dhi. Kòyi tâle dhi, akódhì angá tá Kìlikiyà lésè dhi dre dhi,

³⁵dré tazoá drá dhi: «Má ni ámi yi lókyá ámi asíkibhá i dré dra atsázó dhi tú. » Gò dré Pólò ni 'òzo likilé Èródè ni dzó kàdrì na.

Tà 'ole dhi i 24

Yúdà ànzì i` asíkì Pólò Fèlíkisi kandrá

¹Kítú nzi àmvolésè dhi, kòwánà kí kàdrì Ànànýà ì dré tsàzo bhàgo àruka íbe ìndì dhya adrélépi tá kúlì ta àyi dré, rú be Tèrùtulò dhi be Kàyìsàrýà na. Gò ì dré tà ì dré tákadrézó Pólò ní asíkì ásà dhi kí tázò gùvèrènérè Fèlíkisì kandrá.

²À kází Pólò dre dhi, Tèrùtulò nda dré ngàzo tà ta akódhi rú kònìnì: «Atálágó Fèlíkisì, mà adré lenzélé tà kìdríkìdrì mà dré adrélépi ába lókyá be vwàvwà ro mí zàle dhi ní tà sè, ìndì tà mí dré kisùle ladzálé atsálé doro àma kí bvò kònìdhi lé dhi kí tà sè.

³Mà adré tà nda kí no lókyá wáyi sè ìndì àrà tití i 'ásè gò, mà dré adrélépi áwoyà ta mí dré togó wáyi sè.

⁴Dì, má lè mána ámì lókyá kizálé ko. Má adré dì ámì ti lizí, mí kòyiró àma lókyá tsà sè ámì togó doro sè.

⁵Mà kisú dhi, agó kònìdhi ína drìkònzi líyí 'ì. Adré móndí kí kodzó ligilé Yúdà ànzì bvò wáyi 'ásè dhi i kòfalésè. Akódhi móndyá adrébhá dhya Nàzàrétà lésè dhi ní láti kinzò ro dhi ní lebè dhi kí kàdrì kí àlo 'ì.

⁶Tabhì tá ndìndì àma kí tépelò 'ole atsálé ndí ró gò, mà dré akódhi ni rùzo. ⁸Ámì tändi, mí ni kitswá akódhi ni lizí, kitswázò tà tití mà dré adrélépi akódhi ni asíkì ásà kòdhi kí àndu ni kyá. »

⁹Gò Yúdà ànzì ì dré kpà tázòá dhi, tà tití Tèrùtulò dré tálè Pólò rú nda i tà báti 'ì.

Pólò ga áyi tárà Fèlíkisì kandrá

¹⁰Dì gùvèrènérè nda dré drígá bhèzo Pólò véna kòtarò tà gò, Pólò dré ngàzo tázò dhi: «Má ní tálè dhi, mí dhya adrélépi tábvo ta bvò kònìdhi drìle dhi 'ì kóná be bì dhi be. Ásà dhi, ma arí íbe adrélépi áma tárà ga mí kandrá.

¹¹Ngóró mí dré kitswálé níle be dhi tíni dhi, lavú rè kítú mudrí-drì-rì ko, má mbà tá Yérúsalémà na kitswálé Gíká ní lindrì bha.

¹²Dhya adrébhá áma asíkì kònì i kisú tá ma tépelò na adrérà'a tà kayí móndí íbe yà, kó ngalè adrérà'a móndí kí kodzó ligilé yà dhi ko. I kisú tá kpà ma adrérà'a 'óá kònìnì Yúdà ànzì kí lísámbò dzó i 'ásè yà, kó ngalè àrà àzya bhàandre nda lé dhi na yà dhi ko.

¹³I kitswá kpà tadhá dhi, tà ì dré adrélépi áma asíkì ásà dhi i tà báti 'ì dhi bwà ko.

¹⁴Dì, má adré mána tà kònìdhi ní ka'i kòdhya: Má adré láti ì dré adrélé zile kinzò ro nda ní lebè, adrélépi Gíká àma kí tábhí kya ní lindrì bha ásà. Má adré kpà tà tití tísile Mósè ní tárítrí kúlì na ìndì pròfétà kí búkù i 'ásè dhi kí ka'i.

¹⁵Má adré kpà mí bha Gíká véna, adrélépi ka'ià àyi kònì kya tíni dhi, móndyá tití gyägya ró ìndì kònzi ró dhi kí nga dràdrà 'ásè.

¹⁶Dì ásà dhi, má adré ngbú adrélé áma togó likí, má kàdréró tà àko má rú Gíká kandrá, ìndì móndí i kandrá.

¹⁷Má dré tá tsàle Yérúsalémà na ko kóná bì dhi sè dhi, má gò tsàle kònàle kitswálé ngá fe lemerèbhá áma súrú na dhi i dré, ìndì kitswálé ngá fe Gíká dré.

¹⁸Ì kisú tá ma adrérà'a tà kòdhì kì 'o tépelò na, àkò má temvé tá ma dre dhì 'á. Àma tá túmǎní móndí zyandre dhì íbe ko. Má 'o tá kpà tà àlo wàyá ro ko.

¹⁹Dì, Yúdà ànzì àruka angábhá bvò Àsíyà àdhya lésè dhì i tá àyikya kònàle. Adré tá lèá dhì, àyi nda i kàdré áma asíkì kònwa mí kandrá dhì àyi, i kàdré tà íbe tâle má rú dhì.

²⁰Adré kó lèá dhì, dhya kònì i kòtà tà kònzi i dré tá kisulé má vélé, má dré tá pförà'a Yúdà ànzì kì bhàgo kàdrì i kandrá dhì 'á dhì.

²¹Àruka ni, tà nda tà má dré tá yole àyi kandrá kònìdhì 'i: <À adré áma tâbvó ta àmi kandrá ándrò kònìnì, má dré adrélé ka'ia tâle dhì, móndyá dràbhá dre dhì kì nga dràdrà 'ásè dhì sè! >>

²²Dì Fèlíkisi, Míri ni láti ni tà nilepi dóro nda, dré ru kíomoma nda ni 'òzo akílé gò, tâzoá àyi dré dhì: «Lókyá sòdá kì kàdrì Lísíyà dré dra atsázó dhì tú dhì, má ni àmi kì tà kòdhì ni bvó lanzí. »

²³Gò dré lazizóá sòdá kì drì kòlepi dri dhì, kòbhà sòdá àruka i adrélé Pólò ni likí. Dì, à kòtayí akódhì adrélé tà àruka dré adrélé lèle 'ole dhì kì 'o, ìndì à kòtayí akódhì ni arúpi i adrélé akódhì ni lomí.

Pólò pfò Fèlíkisi i kandrá Drùsílà be

²⁴Kítú àruka i kòlavú dre dhì, Fèlíkisi i dré gózo tsàle tòkó ni rú be Drùsílà adrélépi Yúdà mvá ro dhì be. Dré Pólò ni azizó gò, akódhì ni yìzo adrérà'a tà adrészó Yésu Krísto ni ka'i dhì ni tà ta.

²⁵Dì Pólò dré tá adrérà'a tà ta tà gyägya 'òma ni tà dri, lovó mvòma ni tà dri, ìndì tâbvó tâma adrélépi alile dhì ni tà dri dhì 'á dhì, tirì dré Fèlíkisi ni 'òzo gò, dré tâzoá dhì: «Tà kòdhì kitswá kítú ándrò dhì sè dre. Mí lì. Má kòkisú lókyá àzya dre dhì, má ni go ámi azí. »

²⁶Kòdhì íbe dhì, Fèlíkisi adré tá ína mì bha, Pólò kòfèrò làfa i dré. Ásà dhì, adré tá akódhì ni azí rä, i kàdréró tà tití túmǎní.

²⁷Kónà rì dhì i kòlavú kònìnì dre dhì, Pòrukíyò Féstò dré atsázó gùvèrènérè ro Fèlíkisi ni àrà 'a. Dì Fèlíkisi dré tá adrélé Yúdà ànzì kì togó le 'ole kinílé dhì sè dhì, dré Pólò ni tayízó adrélé bădzó na.

Tà 'ole dhì i 25

Pólò pfò Féstò kandrá

¹Kítú na Féstò ni tsàma bvò Yùdáyà àdhya na dhì àmvolésè dhì i kòlavú dre dhì, akódhì dré ngàzo Kàyisàrýà lésè lìle Yérusalémà na.

²Kònàle dhì, Yúdà ànzì kì kòwánà kàdrì i àyi kì kàdrì àruka íbe dhì, i dré tsàzo tà i dré tá adrészó Pólò ni asíkì ásà dhì kì ta akódhì kandrá. Gò i dré Féstò ni ti lizizó,

³kö'oró Pólò lile tábvo tâle Yérusalémà na, àyi kí togó 'òzo kinilé dhi bvó. Ì lizí tá kònini tâko ko, ì adré tá 'ole móndí kí bha rile akódhi bvó, ì kòpfuró akódhi drâle láti 'á be dhi bvó.

⁴Dì, Féstò dré logózóá àyi dré dhi: «À adré Pólò ni likí bădzó na Kàyisàriyà na. Áma tândi, má adré 'ole lile kònale.

⁵Dì akódhi nda kò'o tà kònzi dhi, lè mà kòlì túmâni àmi kí kâdrì àruka íbe, ì kòtaró tà ì dré adrészó akódhi ni asíkì ásà dhi i kònale. »

⁶Féstò kâdré kònale kitú nzi-drì-na yà, kó ngalè mudrí yà dhi dre dhi, dré gózo lile Kàyisàriyà na. Dì kitú bvóá dhi sè dhi, dré lirizó tábvo târâ na gò, Pólò ni 'òzo apfôle i kandrá.

⁷Pólò kâpfò dre dhi, Yûdà ànzì alibhá Yérusalémà lésè dhi ì dré ngàzo akódhi ni gârà kí kûrú gò, ì dré asíkizoá tà kâdríkâdrì i sè bî. Di, ì kitswá tá àyikya tadhá dhi, tà nda i tà bâti 'i dhi bwâ ko.

⁸Gò Pólò dré ngàzo áyi târâ ga, tâzoá dhi: «Má 'o tà kònzi àlo Yûdà ànzì kí tâtrítrí kúlî rú yà, àyi kí tépelo rú yà, kó ngalè Rómà kí ópí kâdrì rú yà dhi ko. »

⁹Dì Féstò dré tá adrélé Yûdà ànzì kí togó le 'ole kinilé dhi sè dhi, dré lizizóá Pólò tí dhi: «Mí ka'i lile Yérusalémà na, má dré kitswázó ámi tábvo ta kònale dhi 'í? »

¹⁰Dì Pólò logó dhi: «Má adré áma totó kònwa tábvo târâ Kàyisârà àdhya 'á. Adré lèá dhi, à kòtâ áma tábvo kònwa. Má 'o tà kònzi àlo dhi Yûdà ànzì i rú ko, ngóró mí dré nile be dhi tíni.

¹¹Dì, má kò'o mána tà kònzi àlo kitswálépi drâdrâ sè dhi 'i dhi, má kitswá drâma ga ko. Di, tà ì dré adrészó áma asíkì ásà dhi ì kâdré àyikya kinzò 'i dhi, dhya àlo kitswá áma fe àyi drigá bwâ ko. Má adré mána ámi lizí, mí kòmûró ma Kàyisârà dré tábvo tâle nì! »

¹²Dì Féstò dré tà tâzo áyi drì tabhá íbe gò, logózóá dhi: «Mí lizí Kàyisârà ámi tábvo ta ni, mí ni dì tsa Kàyisârà nda kandrá! »

Pólò pfò ópi' Àgùrípà i kandrá Bèrùnîkè be

¹³Kitú àruka i àmvolésè dhi, ópí Àgùrípà i amvúpi ni Bèrùnîkè be dhi ì dré tsàzo mòdo fe Féstò dré Kàyisàriyà na.

¹⁴Dì ì dré tá adrélé gile kònale dhi sè dhi, Féstò dré Pólò ni tà titizó ópí nda dré. Tà tá dhi: «Agó àlo Fèlikisi dré tayilé bădzó na dhi rè dhu kònwaré.

¹⁵Má dré tá lizo Yérusalémà na dhi, Yûdà ànzì kí kowánà kâdrì i àyi kí bhago íbe dhi ì alî tá akódhi nda ni asíkì má kandrá gò, ì dré áma lizizó, má kòjoró tà akódhi dri.

¹⁶Má dré logózóá àyi dré dhi, àma Rómà ro dhi i, mà adré gâ móndí fe à kòjoró tà drâa dhi, tábvo ni ni ta àko ró ko. Be ró dhi, lè akódhi koyi rè zyà tà áyi asíkibhá ì dré adrélé tâle i rú dhi i gò, lókyá fèzo akódhi dré áyi târâ gâzo tà nda i sè 'iká.

¹⁷Dì àyi nda ì dré tá atsázó kònwa dhi, má tigí tá tà nda ko. Be ró dhi, kitú bvóá dhi sè dhi, má dré lirízó tàbvó tárà na gó, agó nda ni 'o apfòle má kandrá.

¹⁸Dì, akódhi ni asíkibhá nda ì kònga tà ta dre dhi, tà ì dré tâle akódhi rú dhi ì tá kònzi ngóró má dré tá adrélé kisùle dhi tíni ko.

¹⁹Be ró dhi, ì adré tá àyikya tà kayí akódhi be àyi kí tändi kí Gíká ni tà dri, ìndi agó àlo dràlepi, rú be Yésu dhi ni tà dri. Dì, Pólò adré tá ína tâá dhi, akódhi nda lídrì íbe.

²⁰Ma ró dhi, má ni tá ngalè má ni tà lású be kònini dhi ni bvó ta ngíni ya dhi ko. Ásà dhi, má dré lizízóá ngalè Pólò ni kitswá ka'íá lile tàbvó tâle Yérusalémà na yà dhi.

²¹Dì, Pólò dré ína áma lizízó, má kòmùró ì àma kí ópí kàdrì Kàyísárà dré tàbvó tâle nì. Dì má dré akódhi ni 'ozo adrélé likílé bădzó na, tsâle lókyá má dré kitswázó akódhi ni mu Kàyísárà véna dhi 'á. »

²²Gò Àgùrípà dré tâzoá Féstò dré dhi: «Má adré mána agó kòdhí ni le yile. » Féstò logó dhi: «Mí ni akódhi ni yi kídrú. »

²³Kitú bvóá dhi sè dhi, Àgùrípà i Bèrùníkè be dhi ì dré atsázó mìlanzìlanzi be bî. Ì dré afízó tàbvó tárà le sòdá kí kàdrì íbe ìndi dhya kàdríkàdrì bhàandre nda àdhya íbe. Gò Féstò dré Pólò ni 'ozo apfòle àyi kandrá,

²⁴tâzoá dhi: «Ópí Àgùrípà, ìndi àmi tití àma íbe ni i, mi nò rè agó kònìdhí ká! Yúdà ànzi tití Yérusalémà na ìndi kònwa Kàyísàriyà 'a dhi ì atsá tà ta akódhi rú má kandrá, yòzoá kúlí 'u'ù sè dhi, akódhi kitswá dràdrà sè.

²⁵Dì ma ró dhi, má kisú mána tà àlo dré 'ole kitswálépi dràdrà sè dhi ko. Dì, akódhi dré áma lizílé áyi mu Kàyísárà dré tàbvó tale nì dhi sè dhi, má nò dôro ni, akódhi ni mûle vélana dhi.

²⁶Dì, ma mána tà pyà má dré kitswálé tisile àma kí ópí kàdrì nda dré akódhi ni tà dri dhi àko. Ásà dhi, má 'o akódhi apfòle àmi kandrá, lavulé dhi, mi, ópí Àgùrípà kandrá, mà kònì akódhi ni lizí dhi, má kòkisúró tà má dré kitswálé tisile akódhi ni tà drí dhi be dhi bvó.

²⁷Tako ko, kitswá má dré móndí 'ile dhi ni mùzo Kàyísárà véna, tà akódhi ni asíkizo ásà dhi kí tadhá àko ró dhi ko. »

Tà 'ole dhi i 26

Pólò ga áyi târâ Àgùrípà kandrá

¹Gò Àgùrípà dré tâzoá Pólò dré dhi: «Mí ni kitswá kúlí ta mí rúsè, ámi târâ gâzo. » Dì Pólò dré drígá bhàzo kuru gó, tà tâzo áyi târâ gâzo kònini:

²«Ópí Àgùrípà, ma mána arí íbe, má dré adrélé áma târâ ga ándrò mí kandrá tà tití Yúdà ànzi ì dré adrészó áma asíkí ásà dhi ì sè dhi sè.

³Tako ko, mí ni mína Yúdà ànzi kí labhí i, tà ì dré adrészó ru kayí àyi kòfalésè ásà dhi íbe tití dhi ì dôro lavulé. Má adré dì ámi ti lizí, mí kòyiró ma togó be vwàvvà.

⁴Yúdà ànzì tití dhi i ni áma tà dóro, kìdhólé áma anzì áma tändi ni bvò na dhi lésè, tsàle lókyá má dré tá adrérà'a Yèrúsalémà na dhi 'á.

⁵I ni ma kínó lésè, ìndì i kòlè dhi, i ni kitswá tadhá, má 'o tá àma kì Gìká ni tà ngóró Fàrisáyò adrébhá 'òá togó be àtsi ró dhi kì àlo ró ngíni ya dhi.

⁶Dì à adré áma tábvó ta ándrò kònìnì, má dré adrélé mì bha tà Gìká dré tá lazilé àma kì tábhí i dré dhi ni tà sè dhi sè.

⁷Tà lazilé nda, tà àma kì súrú mudrí-drì-rì dhi i dré adrészó mì bha kitswázó kisúá, i dré adrérà'a Gìká ni tà 'o togó be àtsi ró kitú be ìndì ngátsi be dhi 'á dhi 'i. Òpí Àgùrípà, má dré kpà adrélé mì bha tà nda sè dhi sè dhi, Yúdà ànzì i adré áma asíkì ándrò.

⁸Àmí adrébhá kònwa ni i, mì kitswá àmikya ka'iá ko tåle dhi, Gìká adré móndyá dràbhá dre dhi kì tingá dràdrà lésè dhi àdho tà sè?

⁹Wáláká dhi, áma tändi má ka'i tá kpà dhi, lè tá má kò'o tà tití dhi i kitswázó ligílé Yésu Nàzàréta lésè dhi ni rú be.

¹⁰Dì kòrìdhì tá tà má dré 'ole Yèrúsalémà na dhi 'i. Kòwánà kàdrì i fè tá rìnyí má dré Yésu ni ka'ibhá bì dhi kì turúzó lebhélé bădzó na. À dré tá adrérà'a 'ole àyi kì tupfú todràle dhi 'á dhi, má adré tá mána ka'iá dhi, tà nda kàdré kònìnì.

¹¹Má adré tá tatsilé lísámbò dzó i 'ásè adrélé tà njobe àyi dri, adrészó àyi kì 'o rìnyí sè, i kògáró àyi kì tà ka'ika'i be dhi bvó. Áma togó dré tá adrélé aswálé àyi rú tà tändi ró dhi sè dhi, má adré tá lìle àyi kì mì pfobe, tsàle byá móndyá súrú twá ro dhi kì bhàandre i 'ásè. »

Pólò tití', i' ka'i Yésu ngí' ni ya dhi

(À kònò kpà Tà 'ole dhi i 9:1-19; 22:6-16)

¹²«Dì tà nda kòdhì sè dhi, má adré tá lìle Dàmàsékè na, kitswálé àzí kòwánà kàdrì i dré tá bhàle má drígá dhi ni 'o rìnyí i dré fèle má dré dhi sè.

¹³Òpí, má dré tá adrérà'a láti 'á kitú rírí sè dhi 'á dhi, má dré ngádra bhù lésè dhi ni nòzo adrérà'a kòle kitú ni lagulagu lavú, adrérà'a ngá kazá àma làgásè kúrú áma atsíàmu íbe.

¹⁴Dì mà dré ledhézó tití kiní mi gó, má dré kúlí yízo tàá má dré Èbérè ti sè dhi: «Sàwúlò, Sàwúlò, mí adré áma mì pfo àdho tà sè? Mí dré adrélé kùtsí to pá sè dhi kòkóròko mí dré. » ¹⁵Dì má dré lizízóá dhi: «Míri, mí àdhi 'i? » Míri dré logózóá má dré dhi: «Ma Yésu mí dré mína adrélé mì pfòle dhi 'i.

¹⁶Dì mí nga ámi totó pá dri! Má agá mí kandrá ámi bha adrélé áma àzí 'olepi ró ìndì áma tà longólépi ró. Mí ni áma tà mí dré nòle dhi i, ìndì tà má dré dra tadhálé mí dré dhi íbe dhi kì longó móndí i dré.

¹⁷Má ni ámi apá ámi tändi ni súrú i drígásè ìndì móndyá súrú twá ro dhi i drígásè. Tàko ko, má adré mána ámi mu àyi nda i véna

¹⁸kitswálé àyi kí mì nzi, ì kàpfòrò tímivá lésè atsálé ngádra 'á, ìndì ì kàpfòrò Sàtánà ní rinyí zàlésè atsálé Gìká vélé, akódhì kòtriró àyi kí tàkonzì i gò, àrà fèzo àyi dré móndyá í dré bhàle twá adrélé ína ró àyi kí tà ka'ika'i sè dhi i kòfalé. »

¹⁹Dì, ópí Àgùripà, má ka'i tá tà Gìká dré tadhálé má dré nda ní 'ole togó wäyi sè.

²⁰Dì má dré rè zyà lìzo Gìká ní kúlì longó móndyá Dàmàsékè na dhi i dré. Gò má dré lìzo longoá móndyá Yérusalémà na dhi i dré, túmäní móndyá bvò wäyi Yùdáyà àdhya 'ásè dhi íbe, ìndì móndyá surú twá ro dhi íbe. Má tà tá àyi tití nda i dré dhi, i kòladzà àyi kí togó agòzo Gìká vélé, ìndì i kàdré tà adrébhá tadhá dhi i ladzà àyi kí togó káyà dhi kí 'o kòdhya.

²¹Tà nda kòdhì sè dhi, Yùdà ànzì i ru tá ma tépelò na gò, i dré láti ndàzo kitswázó áma pfu dràle.

²²Dì, Gìká su ína má rú atsálé ándrò kònìdhì gò, má dré adrészò tà má dré nòle ìndì má dré yile dhi kí longó móndyá tití tákò ìndì kàdrì ro dhi i dré. Má adré ngbà 'í tà pròfétà i Mósè be dhi i dré tá longolé dhi kí longó kòdhya.

²³I longó tá dhi: «Mèsiyà ní kizà nya, dré ngàzo drìdrì dràdrà 'ásè móndyá àruka tití dhi i kandrána gò, dré ngádra lídrì àdhya ní tà longozó áyi tändì ní surú i dré, túmäní móndyá surú twá ro dhi íbe. » »

Pólò azí Àgùripà Yésu ní ka'i

²⁴Pólò dré tá adréra'a áyi tará ga kònìni dhi 'á dhi, Féstò dré kúlì yòzo tazoá dhi: «Pólò, ámi drì abí dre! Tà kàdrì mí dré ndàle níle dhi i adré ámi drì kizá ní! »

²⁵Dì Pólò dré logozóá dhi: «Atálágó Féstò, ngá kizá áma drì ko! Tà má dré adrélé tâle kòdhì i, tà bâti 'i ìndì tògyakúlì 'i.

²⁶Ópí Àgùripà yi ína tà kòdhì i dre. Má adré dì tà nda kí ta akódhì kandrá tirì àko. Má ní tâle dhi, tà nda kí àlo zù i akódhì dré ko dhi be. Tákò ko, tà nda i 'o ru lùzu ró ko.

²⁷Ópí Àgùripà, mí ka'i tà pròfétà i dré longolé dhi i? Má ní, mí ka'i 'í dhi be! »

²⁸Dì Àgùripà tà Pólò dré dhi: «Mí adré tsì kisùá dhi, lókyá tsà kònìdhì sè, mí ní áma 'o atsálé Krísto ní ka'ilépi ró dhi bâti? »

²⁹Dì Pólò logó dhi: «Kàdré lókyá tsà sè yà, kó ngalè lókyá vwàvvà sè yà dhi, má adré Gìká ní ti lizí, mí kàtsáró má tîni túmäní móndyá tití adrébhá áma kúlì yi ándrò ní íbe, mí kàdré ngbà 'í nyìrì kònì íbe àmì rú ko dhi kòdhya. »

³⁰Gò ópí Àgùripà i dré ngàzo túmäní gùvèrénérè Féstò be, Bèrùnìkè be, ìndì móndyá adrébhá tá àyi íbe dhi íbe.

³¹Dì i kàpfò àrà nda lésè dre dhi, i dré adrészò tâá àyi kòfalésè dhi: «Agó kòdhì 'o tà àlo kitswálépi dràdrà sè yà, kó ngalè bă sè yà dhi ko. »

³²Gò Àgùripà dré tazoá Féstò dré dhi: «Agó kòdhì kòlizí tá mí áyi mu Kàyìsárà dré tâbvwò tâle dhi ko dhi, kònò à ní tá kitswá akódhì ní tri bwà. »

Tà 'òle dhì i 27

Pólò ni atsí andre li zo Rómà na dhì

¹À kòka'i lókyá mà dré kitswázó bwátù do lìzo bvò Ìtálíyà àdhya na dhì dre dhì, à dré Pólò kí fèzo móndí àruka 'ile dhì íbe Rómà kí ópí kàdrì ni sòdá kí drì kòlepi, rú be Yùlýò dhì drígá.

²Dì mà dré tombàzo bwátù àlo angálépi Àdràmíténò lésè dhì na gò, mà dré ngàzo lìle. Bwátù nda adré tá lìle bhàandre àruka yiandre mìlésè bvò Àsíyà àdhya lé dhì i 'ásè. Mà lì tá túmání Àristárükò angálépi Tèsàloníkè bvò Mákèdoniyà àdhya lé dhì lésè dhì be.

³Kítú bvóá dhì sè dhì, mà dré tsàzo bhàandre Sìdónà àdhya na. Yùlýò ni togó dóro tadhálé Pólò véna dhì sè dhì, dré akódhì ni tayízó lìle áyi arúpi bhàandre nda lé dhì kí no, à kòkítswáró akódhì ni ledé.

⁴Mà kònga Sìdónà lésè dre dhì, lyă dré adrészó avillé sínyà dri àma rú gò, mà dré lavúzó tûrù Kipírò àdhya làgásè, tûrù nda kòkikírò lyă nda tsà be dhì bvó.

⁵Gò mà dré pfòzo yiandre ni tálí drísè, lavúlé bvò Kilikíyà àdhya làgásè ìndì Pàfilíyà àdhya làgásè, tsàle bhàandre rú zìle Mírà bvò Lìkíyà àdhya lé dhì na.

⁶Kònàle dhì, sòdá kí drì kòlepi nda dré bwátù àzya angálépi Àlìgìzàndríyà lésè, adrélépi lìle Ìtálíyà na dhì ni kisúzó, àma kí bhàzo lána gò, mà dré lìzo.

⁷Kítú bǐ dhì, mà dré lìzo yàyà gò, mà dré tsàzo ànyi bhàandre rú zìle Kìnídò dhì làga kizà be bǐ. Dì lyă dré tá adrélé avillé sínyà dri àma rú dhì sè dhì, mà dré ngá kízo lavúzó tûrù Kùrétè àdhya làgásè, tásoká Sàlòmónè àdhya kandrásè, tûrù nda kòkikírò lyă nda tsà be dhì bvó.

⁸Mà dré lavúzó vwàle tsà tûrù nda làgásè gò, mà dré tsàzo kizà be bǐ bhàandre rú zìle «Àrà avélépi bwátù zùzo dhì» na, ànyi bhàandre rú zìle Làsáyà dhì làgana.

⁹Mà dré lókyá kizálé bǐ dre dhì sè dhì, lyă adré tá vìle kònzi lavúlé. Tako ko, kítú adrészó móndí kí tàkonzi trìma ni tà kisù dhì lavú dre. Dì Pólò dré ngàzo bwátù nda ni dobhá kí kodzó, tàzoá dhì:

¹⁰«Áma arúpi i, mà adré nòá dhì, atsí kònìdhì adré 'òle atsálé kòkóròko. Bwátù kònìdhì túmání ngá lána dhì íbe dhì kí kitswá abilé tití. Ndìndì àma kí tändì, mà ni kpà kitswá todràle. »

¹¹Dì, sòdá kí drì kòlepi nda lè tá Pólò ni kúlí nda kí yìle ko. Be ró dhì, yi ína bwátù dobhá kí kàdrì kí kúlí bwátù líyí be dhì kòdhya.

¹²Àrà mà dré àma kí kikízó lána nda kitswá tá ína adrészó lókyá kidhì àdhya ni letè lavúlé dhì ko. Dì móndí bǐ àma adrébhá tá bwátù nda lé dhì i kòfalé dhì à dré ru yìzo, mà kòngaró àrà nda 'ásè lìle. À adré tá lèá tsàle bhàandre rú zìle Fòwiníkisi tûrù nda lé dhì na, kitswálé lókyá kidhì àdhya ni letè lavúlé kònàle. Fòwiníkisi nda tá àrà adrészó bwátù zu, lyă dré adrészó avillé kítú dré ndirà lésè dhì i.

Kàgùmá vi yiandre mi

¹³Lyă dré kîdhózó adrélé avílé tàbhu lésè yàyà gò, bwátù dobhá nda ì dré kisùzoá dhi, ì ni kitswá lile tsàle Fòwìníkisi na. Di ì dré aya tá tirílé yí na adrészó bwátù kikí dhi ni asézó gò, mà dré ngàzo adrélé lavúlé tûrù Kùréte àdhya nda làgásè.

¹⁴Di, gí ko, lyăandre gú dhi dré ngàzo adrélé avílé tûrù nda drilésè, adrélé bwátù nda ni vi lile yíandre kítogá na ró. (À adré lyăandre lású be kònini nda ni rú zi «lyăandre angálépi kurú lésè ìndì kítú dré apfôrà lésè dhi».)

¹⁵Mà dré tá kitswálé lile sínýà dri lyă rúsè bwà ko dhi sè dhi, mà dré àma kí tayízó lyăandre nda dré adrélé tikpólé lizo àma íbe.

¹⁶Mà dré tá adréra'a lavúlé tûrù mvá àlo rú be Kàwúdà dhi làgásè dhi 'á dhi, mà dré lagùzo kitswálé kòlóngbò 'ile bwátù àndu dhi ni asé bhàle bwátù nda drìna.

¹⁷Bwátù dobhá ì kòlikí kòlóngbò nda dre dhi, ì dré bă kí lebhézó lavúlé bwátù zálésè, kitswálé rùá tätä. Di ì adré tá ngá ro, lyăandre nda ni dra bwátù nda ni vi lile áyi lasí àrà sínýí ro ànyí bvò Libiyà àdhya làga dhi rú dhi sè. Ásà dhi, ì dré fa adrészó bwátù kikí tsà dhi ni tirízó yí na gò, bwátù nda ni tayízó lyăandre nda dré adrélé tikpólé.

¹⁸Kítú bvóá dhi sè, kágumá nda dré tá adrélé àma kí liví tesélé rinyí sè dhi sè dhi, bwátù dobhá ì dré kîdhózó adrélé ngá dòle bwátù nda lé dhi kí lebhé yí na.

¹⁹Kítú ni na sè dhi, ì dré ngá adrészó bwátù do ásà dhi kí lebhézó yí na àyi kí tändi kí drígá sè.

²⁰Kágumá nda dré gózo adrélé vîle rinyí sè kítú bĭ gò, mà dré gózo kítú 'í yà, kó ngalè bhìbhínyà 'í yà dhi kí no ko. Kùdù ro dhi, mà dré àma kí mì bhàma kitswázó adrílé dhi ni tayízó.

²¹Lókyá kòlavú vvàvvà ro mà dré ngá nya àko ró dre dhi, Pólò dré ngàzo áyi totó àyi tití dhi i kandrá tàá dhi: «Áma arúpi i, adré tá lèá dhi, mì koyi tá áma kúlí gò, ngàzo Kùréte lésè ko dhi. Kònò mì kitswá tá kizà kòndi ni nya ko, ìndì ngá kòdhí ì kitswá tá abílé ko.

²²Di, nyànomvá dhi, má adré àmí kí kodzó, mì kàdréró togó tsí! Dhya àlo àmí kofalé dhi kitswá ína dràle ko. Bwátù kòndi ni ngbà 'í abí dhi ni.

²³Tàko ko, ngátsi ándrò kòndi sè dhi, Gíká, áma líyí, má dré adrészó tà ni ni 'o dhi ni ángéló agá tá má kandrá

²⁴tâá dhi: <Pólò, mí ro ngá ko! Adré lèá dhi, mí kòtsa pfòle Kàyìsárà kandrá. Gíká ni togó taní sè dhi, a ni móndyá tití mì dré adrészó lile àyi íbe bwátù kòndi sè dhi kí tiidí ámí tà sè. >

²⁵Di áma arúpi i, mì kàdré togó tsí! Tàko ko, má adré Gíká ni ka'i, adrészó kpà ka'iá dhi, tà nda kí ru 'o ngóró dré tâle má dré dhi tíni.

²⁶Di, adré lèá dhi, àma kí bwátù kòndi kòli áyi lasí tûrù àlo dhi rú. »

Bwátù lasí i tûrù rú

²⁷Kítú ní mudrí-drì-su sè dhi, kàgùmá nda adré tá ngbú àma kí vi lìle yiandre Àdríyà àdhya mísè. Ànyiànyi ngátsi kítogá sè dhi, bwátù dobhá nda ì dré atógyàzoá dhi, mà adré tá tsàle ànyi kíní làgana ró.

²⁸Dì ì dré aya adrészó yí tálí tabhì dhi ní bhèzo yí na, kisúzóá dhi, yí alú tá méterè nyadhi-àlo-drì-mudrí-drì-nzi-drì-ri. Mà kòlì vwàle tsà dre dhi, ì dré gòzo tódyá tabhìá kisúzóá dhi, yí alú tá méterè nyadhi-àlo-drì-nzi-drì-na.

²⁹Dì ì adré tá ngá ro, àma kí bwátù nda ní dra áyi lasí kírà kàdríkàdrí yí gàrà na dhi i rú dhi sè. Dì ì dré aya su dhi kí tirizó yí na bwátù nda àmvolésè kítswálé kíkiá gó, ì dré adrészó ngá letè wàle.

³⁰Dì, bwátù dobhá nda ì dré àyikya kòlóngbò tirizó yí na, ngóró ì adré tá 'ole aya àruka kí tirí bwátù kòmvolésè na tíni, ì kòkítswáró lapálé àma kí bwátù nda lésè.

³¹Dì Pólò dré tázoo sòdá kí drì kòlepi nda i dré sòdá ní íbe dhi: «Dhya kònì ì kòpfò bwátù kòndi 'ásè dhi, mì kítswá àmikya adrílé bwà ko! »

³²Dì sòdá nda ì dré kòlóngbò nda ní bă kí bvvàzo, tayízóá dhèle yí na.

³³Ngá dré tá adrér'a 'ole wàle dhi 'á dhi, Pólò dré móndyá tití dhi kí kodzozó ngá nya, tázoo dhi: «Ándrò kòndi, kítú ní mudrí-drì-su mì dré adrészó támiga dri ngá nya àko ró dhi 'í.

³⁴Má adré dì àmì kí kodzó ngá nya. Àngyá ko, mì adré nyàá adrízó. Dhya àlo àmì kòfalé dhi ní dríbhí àlo dhi kítswá avile ko! »

³⁵Kòtà tà nda i dre dhi, dré mápà adózó, àwoyà tázoo Gíká dré àyí tití nda i kandrá gó, njòzoá nyàle.

³⁶Dì ì dré togó tsìzo tití gó, ì dré kókpà ngá dòzo nyàle.

³⁷Àma tití bwátù nda lé dhi i tá kámá-rì-drì-nyadhi-na-drì-mudrí-drì-nzi-drì-àlo.

³⁸Mà kònya ngá pìzo dre dhi, bwátù dobhá nda ì dré ngánò àmbí bhèzo yí na, bwátù nda kàngáró yí dri be dhi bvó.

³⁹Ngá kòwa dre dhi, ì dré kíní nòzo làwú làvo na. Dì, ì ní tá àyikya kíní nda bvò ángùdhi 'í ya dhi ko. Ì dré àrà yí dré tá adrészó ru lomví dhi ní nòzo sinyí yí mìle dhi be gó, ì dré ru yìzo tázoo dhi, kòkítswáró dhi, ì ni bwátù nda ní dì lìle áyi lasí sinyí nda dri.

⁴⁰Dì ì dré aya adrészó bwátù kíkí dhi kí bă bvvàzo tayízóá yí na gó, kápí kàdrí adrészó bwátù tídì ásà dhi kí bă titrìzo. Dì ì dré kítá kàdrí lyă dré adrészó bwátù vi ásà dhi ní tingázó kuru 'ile bwátù kandrálésè ro gó, ì dré bwátù nda ní tayízó lìle sinyí nda drìna ro.

⁴¹Dì, bwátù nda ní kòmvo dré ína lìzo áyi lasí anzulé sinyí ru lokolépi yí kítogá na dhi dri ngbí. Dì yí adrélépi tá longálé dhi adré tá ru tswa bwátù nda rú gó, bwátù nda ní àndu dré kidhózó tonjole.

⁴²Sòdá nda ì yi tá ru tázoo dhi, ì ni dhya 'ile dhi kí tupfú todràle, àyi kí àlo kòkítswáró yí wa lapázó ko dhi bvó.

⁴³Dí, sòdá kí drì kòlepi nda dré ína Pólò ni lèle tindrillé dhi sè dhi, dré àyi kí logázó. Dré lazizóá móndyá yí nibhá wàle dhi i dri dhi, ì kòlebhé rè zyà àyi yí na lìle pfôle kiní drìna.

⁴⁴Gò dré tázoo móndyá àruka tití dhi i dré dhi, ì kòtombà pálángì i drisè ìndì bwátù kigá i drisè, kítswálé lìle pfôle àyi vésè. Dí ásà dhi, móndyá tití nda ì dré topfòzo kiní drìna adrillé.

Tà 'ole dhi i 28

Pólò tûrù Mèlítè àdhya na

¹Mà kàpfò yíandre lésè líná dre dhi, mà dré yízoá tâle dhi, tûrù nda ni rú tá Mèlítè.

²Móndyá bhà mobhá tûrù nda drile dhi ì dré àma kí ka'izo dòle àyi véna togó dôro lavulé dhi sè. Ì dré àtsí turúzó àma dré yòle, kozya dré tá adrélé dhile dhi sè, ìndì kidhì dré tá adrélé àma kí 'o dhi sè.

³Dí, Pólò dré àtsipá amvózó kitswálé dàle àtsí na dhi, ni àtrá dré ína apfòzo lásà àtsí ni rinyí dré, akódhi ni drígá tsí ngbí.

⁴Móndyá nda ì kònò ni nda adrérà'a livilé akódhi drígá dre dhi, ì dré tázoo àyi kòfalésè dhi: «Kònìdhì agó móndí pfûlepi dràle dhi 'i bâti! Tágba dré adrízó yíandre lésè dhi, giká gyägya dhi kitswá akódhi ni tayí adrillé ko. »

⁵Dí, Pólò dré ína ni nda ni kivízó dhèle àtsí na gó, kàtrá ni dré akódhi ni 'ozo kònzi alomvá ko.

⁶Móndyá nda ì adré tá letéá, nòzoá ngalè akódhi ni drígá ni tipì yà, kó ngalè a ni dhe dràle ngbò ró yà dhi. Dí, ì kòletè vvàvwà ro dre dhi, ì dré nòzoá dhi, tà twá 'o ína akódhi ko. Dí ì dré gózo tà ladzá, tázoo dhi: «Dhya kònìdhì giká kí àlo 'i! »

⁷Móndyá tûrù nda drile dhi kí kàdrì rú be Pòpilíyò dhi ni bhà tá ànyí àrà nda làga. Dí akódhi nda dré àma kí ka'izo dòle í véna togó dôro sè, adrészó àma kí 'o dôro kitú na.

⁸Dí, akódhi ni atá adré tá ína drà ro lángá na, rúbhá ni dré tá adrélé àtsí ró dhi sè, ìndì dré adrélé áyí 'a bhu kàri ró dhi sè. Dí Pólò dré fízo akódhi ni no gó, dré tà zìzo Giká tí, drígá bhàzo akódhi dri gó, akódhi ni tîdrízó.

⁹Tà nda ni rúbí kòla'ú dre dhi, dràbhá àruka tití tûrù nda drile dhi ì dré alìzo Pólò vélé gó, dré kpà àyi kí tîdrízó tití.

¹⁰Gò ì dré àma kí lindrì bhàzo láti twátwa bì dhi i sè. Dí mà dré tá adrérà'a 'ole lìle dhi 'á dhi, ì dré ngá mà dré tá adrészó lovó ni íbe atsí sè dhi kí afèzo àma dré.

Pólò tsa Rómà na

¹¹Mà kàdré kònàle mbă na dre dhi, mà dré tombàzo bwátù àlo lókyá kidhì àdhya ni letèlepi lavulé tûrù nda làga dhi na gó, mà dré ngàzo lìle. Bwátù nda angá tá

Àlìgìzàndrìyà lésè, ìndì rú ni tá «Gìká látí i». ¹²Dì mà dré tsàzo bhàandre rú zile Sìràkúsà dhi na gò, mà dré adrészó kònàle kítú na.

¹³Gò mà dré ngàzo lavulé bvò nda làgásè, tsàle bhàandre rú zile Règíyò dhi na. Kítú bvóá dhi sè dhi, lyă dré kidhózó adrélé avilé tàbhu lésè gò, kítú ni na sè dhi, mà dré tsàzo bhàandre rú zile Pòtiyòli dhi na.

¹⁴Kònàle dhi, mà dré móndí ka'ibhá àruka kí kisúzó gò, i dré àma kí zìzo adrélé àyi véna pósò àlo. Dì àmvolásà dhi, mà dré ngàzo lìle Rómà na.

¹⁵Móndyá ka'ibhá Rómà na dhi i yi tá tâle dhi, àma tá láti 'á. Dì àyi kí àruka i dré alìzo àma kí drì letè ngá lagírà kàdrì Àpíyò àdhyà na. Àruka ni i dré alìzo àma kí kisú bhàandre rú zile «Kùmú kí dzó na dhi i» dhi na. Pólò kònò àyi nda i tití dre dhi, dré awoyà tâzo Gìká dré gò, togó tsìzo.

¹⁶Mà kòtsa Rómà na dre dhi, à dré dzó fèzo Pólò dré adrészó lana kalóma. À bhà tá ngbà 'í sòdá àlo adrélé akódhi ni likí dhi kòdhya.

Pólò longó Gìká ni kúlí Rómà na

¹⁷Kítú na àmvolésè dhi, Pólò dré Yúdà ànzì Rómà le dhi kí drì kobhá kí azízó alìle i vélér. Àyi nda i kòkímó ru dre dhi, akódhi dré ngàzo tâa àyi dré dhi: «Áma adrúpi i, à ru tá ma Yérusalémà na áma fèzo Rómà i drígá, tágba má dré tá tâ àlo 'òzo kònzi àma kí súrú rú yà, kó ngalè àma kí tâbhí kí labhí rú yà dhi ko dhi.

¹⁸Rómà kí kàdrì i kòlizí ma dre dhi, i dré tâ àlo kîtswálépi dràdrà sè dhi ni kisúzó má vélér ko gò, i dré adrészó áma le tayílé.

¹⁹Dì, Yúdà ànzì kònàle dhi i dré tâ tâ nda ni gàzo dhi, lè tá má kòlizí à kòmùrò ma Kàyisárà dré tâbvo tâle be dhi bvó. Tágba dré adrészó kònini dhi, ma mána tâ àlo adrészó áma tândi ni súrú asíkì ásà dhi àko.

²⁰Dì ásà dhi, má azí tá àmi nòle, mà kòtaró tâ àmi íbe. À 'i ma nyìri sè kònini, tâ ïsérélè ànzì i dré adrészó mì bha ásà dhi ni tâ sè. »

²¹Dì Yúdà ànzì nda i dré logózóá drá dhi: «Mà kisú wárágà àlo ámi tâ dri Yùdáyà lésè dhi ko. Kòdhí íbe dhi, àma kí adrúpi angábhá kònalsè dhi kí àlo tâ tâ kònzi àlo mí rú yà, kó ngalè tâ kònzi àlo dhya àzya dré tâle mí rú yà dhi ko.

²²Dì, mà adré àmakya tâ mí dré adrélé kisûle dhi kí le yile mí tí. Tako ko, mà ni tâle dhi, móndyá àrà tití i 'asè dhi i adré tâ ta kònzi Gìká ni láti mí dré adrélé longolé kòdhí rú dhi be. »

²³Dì i dré kítú bhàzo kîtswázó gòle ru kisú Pólò be. Kítú nda kâtsá dre dhi, i dré atsázó vélér zyandre ró wáláká ni ni lavú, àrà Pólò dré tâ adrészó adrélé dhi 'á. Dì kidhólé drùbhí sè tsàle ìndró na dhi, Pólò dré Gìká ni Òpì ni tâ longozó, àndu ni ni ngìzo àyi dré, adrészó àyi kí togó asé Yésu ni ka'i tâ tisile Mósè ni tâtrítrí kúlí na ìndì pròfétà kí búkù i 'asè dhi i sè.

²⁴Gò àyi kí àruka i dré tâ dré tâle nda kí ka'izo. Dì, àruka ni i ka'i tâ àyikya ko.

²⁵Ì dré tá adrérà'a tà kayí àyì kòfalésè, adrészó 'ole ayílé dhi 'á dhi, Pólò dré kúlí kònì kì tázò àyì dré: «Tírí Lólo longó tá tà kyá àmì kì tábhí i dré pròfétà Èsáyà tí,

²⁶tázòá dhi: «Mí lì tàá móndyá kòdhí i dré dhi: Mì ni adré tà yi 'í, dì, mì kitswá tà mì dré adrélé yile nda kì àndu ni tází ko. Mì ni adré ngá no 'í, dì, mì kitswá ngá mì dré adrélé nôle nda kì atógyà tází ko.

²⁷Tako ko, móndyá kòdhí kì togó andíri dre. Ì tabhó àyì kì bíbhálé, àyì kì mì dròzo dròdrò. Ì kò'o tá kònìni ko dhi, kònò i ni tá ngá no àyì kì mì sè, adrészó tà yi àyì kì bíbhálé sè, adrészó tà ni àyì kì togó na, i dré àyì kì togó adzázó má vélé gò, má dré àyì kì tídri zó. > »

²⁸Pólò gò tàá dhi: «Adré dì lèá dhi, mì kònì doro tâle dhi, Gìká mù kúlí adrészó móndí kì tídri dhi móndyá surú twá ro dhi i véna. Ì ni àyikya kúlí nda ni yi! » [²⁹]

³⁰Dì Pólò adré tá adrélé dzó i dré làfa fèzo adrészó lána dhi na kóná rì. Adré tá móndyá tití adrébhá tá alìle i vélé dhi kì ka'ì dòle togó doro sè.

³¹Adré tá Gìká ni Òpì ni tà longó, adrészó Mírì Yésu Krísto ni tà tadhá móndí i dré tirì àko. Dì dhya àlo logá tá akódhi ko.

Rómàbhá †

Rómàbhá † 1

Pólò ni mòdo fèma

¹Ma, Pólò, Yésu Krísto ni màrabà, má adré wárágà kònìdhì ni tisì ma. Gíká azí ma adrélé àpóstolò ro gò, áma bhàzo twá adrélé áyi Rúbí Tani longó dhi bvó.

²Lazí tá Rúbí Tani nda ni tà drìdrì áyi pròfétà i tí gò, i dré tà nda ki tisìzo akódhì ni Kúlì lólo dhi na.

³Rúbí Tani nda adré akódhì ni Mvá, àma ki Míri Yésu Krísto ni tà tadhá kòdhya. À ti tá akódhì nda móndí ro ópí Dàwídì ni súrú na.

⁴Dì, Gíká tadhá ína ngádra 'á dhi, akódhì áyi Mváagó 'i káyà dhi, dré akódhì ni tingálé dràdrà lésè Tírí Lólo ni rinyí sè dhi sè.

⁵Krísto nda sè dhi, Gíká bhà áyi togó taní àma rú, àma ki bhàzo adrélé àpóstolò i ró, mà kàdréró móndí súrú tití i lésè dhi ki azí Krísto ni ka'i, ìndì akódhì ni kúlì ka'i 'ole, à kàdréró akódhì ni rú bha kùle be dhi bvó.

⁶Àmì kókpà móndyá azilé adrélé Yésu Krísto àdhya ró nda i kòfalé be.

⁷Má adré wárágà kònìdhì ni tisì àmì, móndyá tití Rómà na, Gíká dré lèle tò ìndì dré azilé adrélé móndyá lólo ína i ró dhi i dré. Gíká àma ki Atá i Míri Yésu Krísto be dhi i kòbhà àyi ki togó taní àmì rú, ìndì i kòfè tà kídríkìdri àmì dré!

Pólò lè li`le móndyá ka'ibhá Rómà na dhi ki no

⁸Drìdrì dhi, má adré àwoyà fe áma Gíká dré àmì ki tà sè, Yésu Krísto ni rú sè. Tàko ko, à adré àmì ki tà ka'ika'i ni tà tití bvò wáyi 'ásè.

⁹Gíká, má dré adrészò tà ni ni 'o togó wáyi sè, adrészò Mvá ni ni Rúbí Tani longó dhi ni dóro tâle dhi, tà má dré adrélé tâle kònìdhì, tà bâti 'i káyà dhi. Má adré àmì ki tà kisù landè àko ró,

¹⁰vésè wáyi má dré adrérà'a tà zi akódhì tí dhi 'á. Má adré akódhì ni ti lizí, lókyá bî àmvolésè dhi, kàdré tà dré lèle 'ole dhi 'i dhi, kònziò láti má dré tsàzo àmì véna.

¹¹Tàko ko, ma lovó íbe tò àmì ki nòzo, má kòkítswáró tà taní àzya Tírí Lólo àdhya ni fe àmì dré, kítswálé àmì ki timbà àmì ki tà ka'ika'i na.

¹²Má adré kpà lèá dhi, àma túmäní àmì íbe dhi i, mà kòkítswá ru timbà àma ki tà ka'ika'i sè.

¹³Áma adrúpi i, má adré lèá mì kònì dhi, vésè be bî, má ndà tá láti lìzo àmì véna, áma àzí kòkítswáró lò'wa dóro 'a àmì kòfalé, ngóró dré adrélé 'ole móndyá àruka tití súrú twá ro dhi i kòfalé dhi tñi. Dì, atsálé ándrò kònìdhì dhi, tà àruka i kikí láti má dré ni.

¹⁴Tàko ko, adré lèá dhi, má kòlì móndyá twátwa tití dhi i véna: móndí tà ndabhá nile dhi i véna, ìndí móndí tà nibhá ko dhi i véna, móndí tògya ró dhi i véna, ìndí móndí tògya ró ko dhi i véna.

¹⁵Ásà dhi, áma togó kókpà àtsi ró lìzo Rúbí Taní longó àmì adrébhá Rómà na dhi i dré.

Rúbí Taní ni rinyí adrészó móndí ki tidri' dhi

¹⁶Ma kanyò ro Rúbí Taní ni tà sè ko. Tàko ko, Rúbí Taní nda, rinyí Giká dré adrészó móndyá tití adrébhá Rúbí nda ni ka'i dhi ki tidri' ásà dhi li. Akódhi fè rè zyà Rúbí nda Yúdà ànzì i dré gò, adrészó kpà fèá móndyá surú twá ro dhi i dré.

¹⁷Rúbí Taní nda adré tadhá dhi, Giká adré móndí ki bha gyägya i kandrá ngíni ya dhi. Adré ngbà 'í àyi ki bha gyägya àyi ki tà ka'ika'i sè. Lati àzya tà ka'ika'i rúsè dhi yókódhó. Ngóró tisile Giká ni Kúlí na dhi tíni: «Dhya atsálépi gyägya áyi tà ka'ika'i sè dhi ni adrí. »

Giká ni kombà tadhálé móndyá tàkonzi` 'obhá dhi i rú dhi

¹⁸Giká adré áyi kombà tadhá bhù lésè móndyá tití adrébhá áyi tà ga rè, adrébhá tà kònzi 'o, ìndí adrébhá láti tà báti àdhyá ni kikí àyi ki tà kònzi sè dhi i rú.

¹⁹Tàko ko, àyi nda i ni àyikya Giká ni tà kitswálé nile dhi i be, akódhi ni tändi dré tà nda ki tadhálé àyi dré ngádra 'á ni dhi sè.

²⁰Àngyá ko, kidhólé bvò ni bhàma lésè dhi, à adré Giká ni tà kitswálé nòle mì sè bwà ko dhi ki atógyà dóro. Kòdhí adré tåá dhi, à adré akódhi ni rinyí adrélépi kóná vésè kólyá dhi ni atógyà, akódhi ni lídrì Giká àdhyá ró dhi be, ngá tití dré bhàle dhi i sè. Ásà dhi, móndyá nda i tà àlo i dré kitswázó àyi ki tará ga ásà dhi àko.

²¹Tàko ko, tágba i dré Giká ni nízo be dhi, i adré akódhi ni lídrì bha ngóró dré kitswálé akódhi dré dhi tíni ko. I adré kpà àwoyà ta drá ko. Be ró dhi, àyi ki tà kisükisù atsá ína tà tåko ró, ìndí àyi ki tògyá azá atsálé tímivá ro.

²²Tágba i dré adrészó tåá dhi, àyi tògya ró dhi, i atsá àyikya móndí azaaza ró.

²³I tayí Giká kitswálépi dràle bwà ko dhi ni mìlanzìlanzi, adrészó líndrì fe ngá líndrì lású be móndí adrébhá dràle dràdrà dhi i tíni, àrí i tíni, kà'wá i tíni, ìndí kà'wá adrébhá àyi ki se agáti sè dhi i tíni dhi i dré.

²⁴Dì ásà dhi, Giká tayí móndyá nda i adrélé tatsílé swà ro, lovó kònzi àyi ki togó na dhi ki 'obe gò, i dré adrészó kanyò fe àyi ki tändi ki rúbhá i dré àyi kòfalésè.

²⁵I tayí tà báti Giká àdhyá, adrészó tà kinzò ro dhi ni ka'i kòdhya. I adré líndrì fe ngá Giká dré bhàle dhi i dré, adrészó lìsámbò 'o ngá nda ki rú sè. Dì, i adré àyikya líndrì fe Dhya ngá tití nda ki bhàlepi dhi dré ko. Akódhi nda kitswá rúku sè kóná vésè kólyá! Kàdré kònini.

²⁶Tà nda sè dhi, Giká tayí àyi adrélé tatsílé rúbhá lovó kanyò ro dhi ki bhabe. Dì àyi ki tokó i tayí àyikya tà tokó i dré ànzyà adrélé 'ole àgo íbe àyi ki rúbhá sè dhi, adrészó tà swà 'o àyi ki rúbhá sè àyi kòfalésè.

²⁷Kókpà kòdhì tíni, àgo ì tayí àyikya tà àgo ì dré ànzyà adrélé 'ole tokó íbe àyi kí rúbhá sè dhi, adrészó rúbhá lovó àtsi ró dhi kí bha àyi kòfalésè àgo ró. Dí àgo nda ì adré tà kanyò ro dhi kí 'o àyi kòfalésè gò, ì dré adrészó làgí kítswálépi àyi kí tà swà nda sè dhi ní kisú àyi kí tändi ì rú.

²⁸Ì dré Gíká ní níma gàle rè dhi sè dhi, akódhì tayí àyi adrélé tà kisù wàyá ro, adrészó tà kítswábhá 'ole ko dhi kí 'o.

²⁹Dí ì ga àyikya tà kònzi kí kárá tití dhi ì sè bì. Ì ga togó kònzi sè, ngá lovó sè, tà swà sè, lovó kònzi sè, móndí kí tupfuma sè, lawà sè, móndí kí litima sè, ìndì dríkònzi sè bì. Àyi móndí kí asíkìbhá 'ì,

³⁰móndí kí rú tabhá kònzi dhi 'ì, Gíká ní kàribhá 'ì, móndí kí lindrì bhabhá ko dhi 'ì, dríkàdríbhá 'ì, ìndì afàbhá 'ì. Ì adré ngbú adrélé tà kònzi twátwa ì dré kítswálé 'ole dhi kí kisù. Ì adré ligílé àyi kí tibhá ì rú.

³¹Àyi tògyá àko. Ì kítswá adrélé ka'ile ko. Àyi móndí kí lovó àko àyi rú. Ì adré kpà móndí kí kízà bha ko.

³²Ì ní tàbvó Gíká dré tâle gyágya kònìdhì dóro: Móndyá adrébhá tà lású be kònìnì nda kí 'o dhi ì kítswá àyikya dràdrà sè. Dí, tágba kònìnì dhi, ì adré ngbà 'í tà nda kí 'o kòdhya ko, ì adré kókpà móndyá adrébhá tà nda kí 'o dhi kí ka'ì.

Rómàbhá ì 2

Móndi' kí tàbvó Gíká dré adrélé tâle gyágya dhi

¹Dí ásà dhi, mí adrélépi móndí kí tàbvó ta ní, mí tà àlo mí dré kítswázó ámi tárà ga ásà dhi àko, gba mí kàdré àdhi 'ì ya dhi. Tako ko, mí kàdré móndí àruka kí tàbvó ta dhi, mí adré tà bha ámi tändi dri. Àngyá ko, mí adré kókpà tà mí dré adrészó àyi kí tàbvó ta ásà nda kí 'o.

²Mà ní tâle dhi, Gíká adré móndyá adrébhá tà 'o lású be kònìnì dhi kí tàbvó ta gyágya dhi be.

³Dí, mí kàdré mína àyi kí tàbvó ta gò, mí dré adrészó tà nda kí 'o dhi, mí adré tsì kisùá dhi, mí ní lapá Gíká ní tàbvó tâma sílésè bwà?

⁴Kòdhì mí adré tsì Gíká ni togó dóro ìndì vwàvvà ro dré adrélé tadhálé mí dré, dré adrérà'a ámi tà mvo dhi 'á dhi ní ayízè? Mí ní ko tâle dhi, Gíká ni togó dóro nda adré ámi adri' ámi togó ladzà dhi ní dhi?

⁵Dí, mí dré ámi togó 'ole tombálé dhi sè, ìndì mí dré ámi togó ladzama gàle rè dhi sè dhi, mí adré Gíká ní kombà asé ámi tändi dri, tsàle kítú dré dra áyi kombà tadházó gò, móndí kí tàbvó tâzo gyágya dhi tú.

⁶Tako ko, Gíká ní tà logó móndí àlo àlo tití dhi ì dré, tà ì dré 'ole dhi ì tí. ⁷Móndyá tití adrébhá tà dóro 'o landè àko ró, adrészó mìlanzìlanzì nda kisulé lindrì íbe ìndì lídri kóná vésè kólyá dhi be dhi ì dré dhi, a ní lídri kóná vésè kólyá dhi ní fe kòdhya.

⁸Di, móndyá tití adrébhá àyi kí tändi kí tà bha drìdrì, adrébhá tà bàti ga, adrészó tà kònzi ka'ì dhi i dré dhi, a ni áyi kombà tadhá áyi togóaswa be kòdhya.

⁹Kizà i tà kòkóròko be dhi kí adré móndyá tití adrébhá tà kònzi 'o dhi i dré. Tà nda kí adré rè zyà Yúdà ànzì i dré gò, adrélé kókpà móndyá súrú twá ro dhi i dré.

¹⁰Di, mìlanzìlanzì, lìndrì, tà kìdríkìdrì be dhi kí adré móndyá tití adrébhá tà dóro 'o dhi i dré. Tà nda kí adré rè zyà Yúdà ànzì i dré gò, adrélé kókpà móndyá súrú twá ro dhi i dré.

¹¹Tàko ko, Gìká adré ína móndí kí no twátwa ko.

¹²Móndyá tití tátrítrí kúlí Mósè àdhya àko gò i dré adrészó tàkonzi 'o dhi kí kókpà todrà tátrítrí kúlí nda àko. Móndyá tití tátrítrí kúlí nda zàle gò i dré adrészó tàkonzi 'o dhi i, Gìká ni àyi kí tàbvó ta tátrítrí kúlí nda sè.

¹³Tàko ko, móndyá adrébhá ngbà 'í tátrítrí kúlí nda ni yi dhi i kitswá atsálé gyägya Gìká mìlésè ko. Be ró dhi, móndyá adrébhá tátrítrí kúlí nda ni ka'ì 'ole dhi kí atsá gyägya akódhi mìlésè àyi.

¹⁴Àngyá ko, móndyá súrú twá ro tátrítrí kúlí nda àko dhi i kàdré tà tátrítrí kúlí nda dré adrélé tâle dhi kí 'o àyi kí tändi i sè dhi, sù ngóró àyi tátrítrí kúlí nda íbe àyi léna dhi tini, tágba i dré adrészó tátrítrí kúlí nda àko dhi.

¹⁵I adré tadhá dhi, Gìká tisì tà tátrítrí kúlí nda dré adrélé tâle dhi i àyi kí togó na dre. Àyi kí togó adré kpà tadhá dhi, tà nda kònini. Àyi kí tà kisùkisù adré ngalè àyi kí asíki 'í yà, kó ngalè àyi kí tará ga 'í yà dhi.

¹⁶Tà nda kòdhí kí ru 'o kítú Gìká dré dra móndyá tití dhi kí tà lùzu ró dhi kí bvó tazo Yésu Krísto sè dhi tú, ngóró Rúbí Taní má dré adrélé longólé dhi dré adrélé tâle dhi tini.

Yúdà ànzì i tátrí' trí' kúlí be dhi

¹⁷Mí adrélépi ámì zi Yúdà mvá ro ni, mí adré zakó ámì totó tátrítrí kúlí Mósè àdhya dri, adrélé ámì afà Gìká ni tà sè.

¹⁸Mí adré kisùá dhi, mí ni tà Gìká dré adrélé lèle à kò'o dhi i be, ìndì mí ni tà kí kòfalé lanzílé tà dóro ka'izo dhi be, mí dré tátrítrí kúlí nda ni tà àndu ndàle nile be dhi sè.

¹⁹Mí adré kpà kisùá dhi, mí mína mí kùdúkùdu kí drì kòlepi 'í, ngádra móndí tímivá na dhi i dré dhi 'í,

²⁰móndí tà nibhá ko dhi kí tadhálépi 'í, ìndì ànzimvá kí tadhálépi 'í, mí dré tà bàti kisulé tà nini be kitswálé tití tátrítrí kúlí nda na dhi sè.

²¹Di mí adrélépi móndí àruka kí tadhá ni, mí adré mína ámì tändi ni tadhá ko àdho tà sè? Mi adrélépi tadhá dhi, à kòkugù ngá ko dhi, mí adré mína ngá kugù àdho tà sè?

²²Mí adrélépi tàá dhì, à kò'o múná tà ko dhì, mí adré mína múná tà 'o àdho tà sè? Mí adrélépi gíká tako kí líndrí ga ní, mí adré mína ngá gíká tako kí tépelò na dhì kí topá àdho tà sè?

²³Dì mí adrélépi ámi afà tátrítrí kúlí ní tà sè ní, mí adré mína tátrítrí kúlí nda ní ño, adrészó kanyò fe Gíká dré ásà àdho tà sè?

²⁴Ngóró tísile Gíká ní Kúlí na dhì tíni: «Àmi kí tà sè dhì, móndyá súrú twá ro dhì à adré Gíká ní lodhá. »

²⁵Mí dré ámi 'ole lwàle dhì dóro, mí kàdré tà tátrítrí kúlí dré adrélé tâle dhì kí 'o dhì. Dì, mí kàdré mína tátrítrí kúlí nda ní ño dhì, mí atsá ngóró mí 'o tá mí lwàle ko na tíni.

²⁶Dhya àlo Yúdà mvá ro ko áyi 'olepi lwàle ko dhì kàdré tà tátrítrí kúlí dré adrélé tâle dhì kí 'o dhì, Gíká ní zakó tsì akódhì nda ní no ngóró akódhì 'o tá i lwàle dre na tíni.

²⁷Tà bâti ró dhì, dhya áyi 'olepi lwàle ko gò, dré adrészó tátrítrí kúlí 'o dhì ní ína tà bha mí dri. Àngyá ko, tágba mí dré adrészó tátrítrí kúlí tísile nda íbe gò, mí dré ámi 'òzo lwàle dhì, mí adré mína tátrítrí kúlí nda ní ño.

²⁸Tako ko, dhya adrélépi ngbà 'í áyi 'o sùle ngóró Yúdà mvá tíni tà dré adrélé 'ole rúbhá sè dhì i sè dhì, dhya nda Yúdà mvá 'í bâti ko. Kókpà kòdhì tíni, dhyá kí 'òma lwàle ngbà 'í rúbhá na dhì, dhyá kí lwàma 'í bâti ko.

²⁹Be ró dhì, dhya adrélépi Yúdà mvá ro áyi togó na dhì ína Yúdà mvá 'í bâti. Dhyá kí 'òma lwàle togó na dhì ína dhyá kí lwàma 'í bâti. Dhya àlo kítswá ngbà 'í áyi 'o lwàle kònini Tíri Lólo ní rinyí sè, tátrítrí kúlí tísile dhì sè ko. Akódhì nda adré rúku kisú móndí i véna ko. Be ró dhì, adré ína rúku kisú Gíká véna.

Rómàbhá i 3

¹Dì adrema Yúdà mvá ro dhì ní dóro àdho 'í? Dì kó, dhyá kí 'òma lwàle dhì ní dóro àdho 'í?

²Tà nda kòdhì i dóro lavúlé láti tití i sè. Dridrì dhì, Gíká bhà áyi tândi ní kúlí i Yúdà ànzi nda i drígá.

³Dì, àyi kí àruká i likí àyikya kúlí nda i ko, i dré adrélé tà ka'ika'i àko dhì sè. Dì i dré adrélé tà ka'ika'i àko dhì sè dhì, kòdhì adré tsì tàá dhì, Gíká kítswá ína adrélé ka'ile togó wáyi sè ko?

⁴Tàdzí ko! Gíká adré ngbú ína adrélé tà bâti ta, tágba móndyá tití dhì i dré adrészó kinzòbhá 'í dhì. Ngóró tísile Gíká ní Kúlí na dhì tíni: «Adré lèá dhì, móndyá tití dhì i kònì dhì, tà tití mí dré adrélé tâle dhì i gyágya, ìndì tâbvó tití mí dré adrélé tâle dhì i gyágya. »

⁵Dì, àma kí tà kònzi kàdré Gíká ní tà gyágya tadhá ngádra 'á dhì, mà ní go tàá ngíni? Mà ní tsì tàá dhì, Gíká gyágya ko, dré adrélé áyi kombà tadhá móndí i dré dhì sè? (Kòdhì má adré tà ta móndí kya tíni.)

⁶Tàdzí ko! Tàko ko, kàdré tá kònìnì dhì, Gìká ni tá kitswá móndyá tití bvò àdhya kì tàbvó ta ngíni?

⁷Àruka ni, à ni kitswá lizíá dhi: «Áma tà kinzò ro dhì kàdré Gìká ni tà báti tadhá ngádra 'á, adrészó kpà akódhì ni mìlanzìlanzì tadhá lavulé dhì, akódhì adré di tà bha má dri tàkonzì 'olepi tíni àdho tà sè? »

⁸Di, à kàdré tà kisù kònìnì dhì, à ni tá kitswá kpà tàá dhì: «Lè mà kàdré tà kònzi 'o, tà dóro kàtsáró ásà be dhì bvó! » Mónđi àruka ì adré àma kì lodhá adrészó tàá dhì, mà adré tà ta kònìnì. Tà báti ró dhì, tà Gìká dré dra bhàle àyi nda i dri dhì kitswá àyi dré.

Mónđí gyágya dhì yókódhó

⁹Di mà ni go tàá ngíni? Áma Yúdà ànzì ró dhì i, àma tsì dóro móndyá àruka tití dhì kì lavú? Àlomvá ko! Tàko ko, má tadhá ngádra 'á dhì, móndyá tití Yúdà ànzì ró ìndì súrú twá ro dhì i tàkonzì ni rìnyí zàle.

¹⁰Ngóró Gìká ni Kúlí dré adrélé tâle dhì tíni: «Mónđi gyágya dhì yókódhó, ndìndì aló ni yó.

¹¹Dhya tà nilepi báti dhì yókódhó. Dhya adrélépi Gìká ni nda dhì yókódhó.

¹²Mónđyá tití dhì ì alá àyi Gìká rú dre.

Àyi tití dhì ì tayí àyi kì togó abílé dre. Dhya adrélépi tà dóro 'o dhì yókódhó, ndìndì aló ni yó.

¹³Àyi kì awobhálé ngóró mógo ti be ngbo dhì tíni. Ì adré móndi kì lití àyi kì làdra sè. Nì kì kàtrá adré titíle àyi tísè.

¹⁴Tátrítríkúlí i kúlí aswaaswa íbe dhì ì adré apfòle àyi sílésè.

¹⁵Àyi kì pá adré ràle móndi kì kàrì kutúbe.

¹⁶Ì adré tà kízà tayílé kízà be àyi kì láti 'ásè.

¹⁷Ì nì láti tà kìdríkìdrí àdhya ko.

¹⁸Tirì àyi mi Gìká ni tà sè dhì yókódhó. »

¹⁹Mà nì be tâle dhì, tà tití tátrítrí kúlí dré adrélé tâle dhì i, adré tàá móndyá adrébhá tátrítrí kúlí nda zàle dhì i dré, kitswázó móndyá tití bvò àdhya kì kúlí kíkí, àyi kì tadházó tàkonzìbhá i ró Gìká kandrá dhì bvó.

²⁰Di ásà dhì, dhya àlo kitswá atsálé gyágya Gìká kandrá, tátrítrí kúlí 'òma sè ko. Àngyá ko, tátrítrí kúlí nda adré tadhá àma dré dhì, àma tàkonzìbhá i káyà dhì.

Mónđí ki bhàma gyágya Gìká kandrá àyi kì tà ka'ìka'ì sè dhì

²¹Di, nyànomvá dhì, Gìká tadhá láti twá tátrítrí kúlí rúsè i dré adrészó móndi kì bha gyágya i kandrá dhì dre. Tà tísile Mósè ni tátrítrí kúlí na ìndì pròfétà kì búkù i 'ásè dhì ì adré láti nda ni tà longó kòdhya.

²²Láti nda, kònìdhi: Gìká adré móndyá tití adrébhá Yésu Krísto ni ka'ì dhi kí bha gyägya í kandrá, àyi kí tà ka'ika'ì nda sè. Tàko ko, Gìká mìlésè dhi, móndí i twátwa ko:

²³àyi tití dhi i 'o tàkonzi gò, i dré kitswázó akódhi ni mìlanzìlanzi sè ko.

²⁴Dì, Gìká ni togó taní sè dhi, adré àyi kí bha gyägya í kandrá àngyá, Yésu Krísto dré àyi kí apálé tàkonzi lésè dhi sè.

²⁵Gìká afè Krísto nda dràle mòbòmà ro, kitswázó móndyá tití adrébhá akódhi ni ka'ì dhi kí tàkonzi tri akódhi ni kàrì sè dhi bvó. Gìká 'o kònìnì tadházóá dhi, i gyägya káyà dhi. Tàko ko, akódhi ni togó vwàvvà sè dhi, mvò tá móndí kí tàkonzi i dré tá 'ole wáláká dhi i gò, tà ñòzo àyi dri ko.

²⁶O tá kònìnì áyi tà gyägya tadházó nyànomvá, adrészó kpà tadhá dhi, i gyägya, ìndì i dhya adrélépi móndyá tití adrébhá Yésu ni ka'ì dhi kí bha gyägya dhi 'i.

²⁷Kàdré dì kònìnì dhi, tà mà dré kitswázó àma kí afà ásà dhi be? Tà àlomvá yókódhó! Tà nda kònìnì àdho tà sè? Mà dré tátrítrí kúlí 'ole dhi sè? Kóko, be ró dhi, mà dré tà ka'ile dhi sè.

²⁸Tàko ko, mà adré tadhá dhi, Gìká adré móndí kí bha gyägya ngbà 'í àyi kí tà ka'ika'ì sè, tátrítrí kúlí 'ole dhi sè ko.

²⁹Dì Gìká ngbà 'í Gìká Yúdà ànzì kya 'i? Akódhi kókpà Gìká móndyá súrú twá ro dhi kya 'i ko? Àyíya, akódhi kókpà Gìká móndyá súrú twá ro dhi kya 'i.

³⁰Tàko ko, Gìká ngbà 'í àlo kwákwá. Adré móndí kí bha gyägya í mìlésè ngbà 'í àyi kí tà ka'ika'ì sè, i kàdré Yúdà ànzì 'i yà, kó ngalè móndí súrú twá ro dhi 'i yà dhi.

³¹Kòdhí adré tsì tàá dhi, tà ka'ika'ì sè dhi, mà adré tátrítrí kúlí no tà tàko ró? Tàdzí ko! Be ró dhi, mà adré tátrítrí kúlí nda ni 'o áyi totó tätä.

Rómàbhá i 4

Àbàrámà, dhya bhàle gyägya akódhi ni tà ka'ika'ì sè dhi

¹Dì ásà dhi, mà ni tàá àma kí tábhí Àbàrámà ni tà sè ngíni? Akódhi nda kisú tá ína àdho tà dóro áyi tà ka'ika'ì sè?

²Kònò Àbàrámà kàtsá tá gyägya Gìká mìlésè tà dóro i dré 'ole dhi i sè dhi, a ni tá kitswá áyi afà tà nda sè. Dì, Gìká kandrá ko.

³Dì, Gìká ni Kúlí adré ína tàá dhi: «Àbàrámà ka'ì tá Gìká gò, Gìká dré akódhi ni ñòzo gyägya akódhi ni tà ka'ika'ì nda sè. »

⁴Ngóró mà dré nile be dhi tíni dhi, dhya adrélépi àzí 'o dhi adré làgí kisú ngá fèle àngyá dhi ró ko. Be ró dhi, adré ína làgí kisú ngá kitswálépi àzí nda tí dhi ró.

⁵Dì, dhya adrélépi ína àzí 'o ko gò, adrészó Gìká adrélépi tàkonzi bhá kí bha gyägya dhi ni ka'ì dhi, Gìká adré akódhi nda ni no gyägya akódhi ni tà ka'ika'ì sè.

⁶Dàwídì adré kpà tà ta kònìnì móndyá Gìká dré adrélè nòle gyägya dhi kí kólénzé ni tà sè. Dì, Gìká adré àyi nda kí no gyägya àzí ì dré 'ole dhi i sè ko.

⁷«Kólénzé móndyá Gìká dré àyi kí tà kònzi kí trìzo, ìndì àyi kí tàkonzi kí zùzo dhi i dré!

⁸Kólénzé dhya Mírì dré kitswázó tâdzí tà bha drìá tàkonzi ni ni tà sè ko dhi dré! »

⁹Dì kólénzé nda ngbà 'í móndyá àyi kí 'obhá lwàle dhi i dré? Kólénzé nda kókpà móndyá àyi kí 'obhá lwàle ko dhi i dré ko? Ngóró mà dré tâle dre dhi tñi: Gìká nò tá Àbàramà gyägya akódhi ni tà ka'ika'i sè.

¹⁰Dì, Gìká nò tá akódhi kònìnì ángutú? Akódhi ni lwàma àmvolésè, kó ngalè akódhi ni lwàma kandrá? Gìká nò tá akódhi gyägya akódhi ni lwàma kandrá, àmvolásà ko.

¹¹Dì Àbàramà dré gózo tà áyi 'òzo lwàle dhi ni kisú ndò. Tà akódhi ni 'òzo lwàle nda tá ngóró àngì adrélèpi tadhá dhi, Gìká nò tá akódhi gyägya akódhi ni tà ka'ika'i sè, akódhi ni lwàrà ko dhi 'á dhi tñi. Dì ásà dhi, Àbàramà atsá móndyá tití adrébhá Gìká ni ka'ì, dì, àyi kí 'obhá lwàle ko dhi kí atá ro, Gìká kònòró kpà àyi nda i gyägya àyi kí tà ka'ika'i sè.

¹²Àbàramà kókpà móndyá àyi kí 'obhá lwàle gò, i dré adrészó atsílé àyi kí tà ka'ika'i na ngóró àma kí atá Àbàramà dré tá 'ole áyi lwàma kandrá dhi tñi dhi kí atá 'i.

Tà Gìká dré lazílé dhi ni kisuma tà ka'ika'i sè dhi

¹³Gìká lazí tá Àbàramà i dré toyó ni íbe dhi, i ni dra bvò wáyi dhi ni kisú tàyilé ro. Dì Àbàramà kisú tá tà lazílé nda, dré tá tátrítrí kúlí 'ole dhi sè ko. Be ró dhi, kisú tà nda dré tá Gìká ni ka'ile gò, Gìká dré akódhi ni nòzo gyägya ásà dhi sè.

¹⁴Tàko ko, móndyá adrébhá tátrítrí kúlí lebè dhi i kàdré tà lazílé nda ni kisú àyi dhi, kònò tà ka'ika'i ni tá adré tà tåko 'i, ìndì tà Gìká dré lazílé nda ni tá kpà adré tà tåko 'i.

¹⁵Angyá ko, tátrítrí kúlí adré Gìká ni kombà asé móndyá adrébhá tátrítrí kúlí nda ni tabhì lebèle dhi i dri. Dì, àrà tátrítrí kúlí dré adrészó yó dhi 'á dhi, tátrítrí kúlí nda ni jòma kókpà yókódhó.

¹⁶Dì ásà dhi, à adré tà Gìká dré lazílé nda ni kisú tà ka'ika'i sè, ngóró tà Gìká dré afèle àngyá áyi togó taní sè dhi ró, tà lazílé nda kàdréró Àbàramà ni toyó tití dhi i dré, ngbà 'í àyi adrébhá tátrítrí kúlí lebè dhi i dré ko, dì kókpà àyi adrébhá Gìká ni ka'ì Àbàramà àdhya tñi dhi i dré. Akódhi nda àma tití dhi kí atá 'i.

¹⁷Ngóró Gìká ni Kúlí dré adrélè tâle dhi tñi: «Má bhà mì adrélè súrú zyandre dhi kí atá ro. » Dì Àbàramà nda àma kí atá 'i, Gìká akódhi dré ka'ile dhi mìlésè. Tàko ko, Gìká nda adré móndyá dràbhá dre dhi kí 'o adrílé, adrészó kpà ngá adrébhá yó dhi kí 'o adrélè be dhi ni.

¹⁸Àbàramà ka'ì tá tà Gìká dré lazílé nda gò, adrészó mì bha akódhi véna ásà, tágba tà adrészó mì bha ásà dhi dré tá adrészó yó dhi. Dì ásà dhi, atsá súrú zyandre dhi kí atá ro, ngóró tá tâle drá dhi tñi: «Ámì toyó kí adré zyandre ró. » ¹⁹Tayí tá áyi tà ka'ika'i

nda atsálé yàyà ko, tágba dré nòzoá dhi, áyi kóná tá ànyíànyí nyadhi-nzi, áyi rúbhá tá ànyí dràdrà mìle, ìndì áyi tòkó, Sárà tá kondó 'i dhi.

²⁰Tágba kònini dhi, tayí tá áyi tà ka'ika'i nda, adrészò tà kayí í léna tà Gìká dré tá lazilé nda ni tà sè dhi ko. Be ró dhi, atsá tá ína vélé rinyí ró áyi tà ka'ika'i na gò, dré Gìká ni rú bhàzo kùle.

²¹Tàko ko, ka'i tá báti tâle dhi, Gìká tá rinyí íbe kitswázó tà í dré tá lazilé nda ni 'o.

²²Dì akodhí ni tà ka'ika'i nda sè dhi, «Gìká nò akodhí gyägya. »

²³À tisì kúlì «Gìká nò akodhí gyägya» kònì i ngbà 'í Àbàramà ni tà sè ko.

²⁴À tisì kókpà kúlì nda i àma adrébhá Gìká àma kí Míri Yésu ni tingálépi dràdrà lésè dhi ni ka'i gò, Gìká dré adrészò àma kí no gyägya dhi kí tà sè.

²⁵Akodhí fè Yésu nda dràle àma kí takonzì kí tà sè gò, akodhí ni tingázó dràdrà lésè àma kí bhàzo gyägya í kandrá dhi bvó.

Rómàbhá i 5

Àma tà kí `dri` kí `dri i` be àma kòfalé Gìká be

¹Dì Gìká dré àma kí bhàle gyägya í mìlésè àma kí tà ka'ika'i sè dhi sè dhi, àma tà kídríkídrí íbe àma kòfalé akodhí be, àma kí Míri Yésu Krísto sè.

²Àma kí tà ka'ika'i nda sè dhi, Krísto nda nzì láti àma dré Gìká ni togó taní kisúzó gò, mà dré adrészò àma kí totó tätä lána. Dì mà adré lenzélé, adrészò mì bha Gìká véna akodhí ni mìlanzìlanzì mà dré dra kisulé dhi ni tà sè.

³Ngbà 'í kòdhí ko, mà adré kpà lenzélé kizà mà dré adrélé nyàle dhi kí tà sè. Tàko ko, mà ni tâle dhi, àma kí kizà nyàma nda adré àma kí 'o adrélé togó tsì dhi be.

⁴Dì àma kí togó tsìma nda adré tà àma léna dhi kí tabhì atsálé doro. Àma kí tà tabhìma nda adré àma kí 'o adrélé mì bha Gìká véna.

⁵Dì àma kí mì bhàma Gìká véna nda kitswá kanyò fe àma dré ko. Àngyá ko, Gìká kutú áyi lèle gàle àma kí togó na bì, Tirí Lolo dré afèle àma dré dhi sè.

⁶Tàko ko, mà dré tá dhu rè adrérà'a rinyí àko dhi 'á dhi, lókyá kòkítswá dre dhi, Krísto drà àma, takonzìbhá kí tà sè.

⁷Dhyá kí fèle dràle móndí àlo gyägya dhi ni tà sè dhi, tà kòkóròko 'i. Àruka ni, à ni kitswá dhyá kí fe dràle móndí àlo doro dhi ni tà sè.

⁸Dì, Gìká tadhá ína áyi lèle kàdrì àma vélé dhi tà kònìdhi sè: Mà dré tá dhu rè adrérà'a takonzìbhá 'i dhi 'á dhi, Krísto drà àma kí tà sè.

⁹Dì nyànomvá dhi, Gìká bhà àma gyägya í mìlésè Krísto ni kàrì sè. Dì dré 'ole kònini dhi sè dhi, a ni àma kí apá áyi kombà lésè Krísto nda sè báti!

¹⁰Tàko ko, mà dré tá adrérà'a Gìká ni kàribhá 'í dhì 'á dhì, akódhì amú tá àma tódhyá í be áyi Mvá ni dràma sè. Dì dré àma kì amulé í be kònìnì dhì sè dhì, a ni àma kì tìdrì áyi Mvá nda ni lídrì sè báti!

¹¹Dì tà nda sè dhì, mà adré lenzélé Gìká kandrá àma kì Míri Yésu Krísto sè, Gìká dré àma kì amulé tódhyá í be Krísto nda sè dhì sè.

Dràdrà kisuma Àdámà ni tà sè dhì, i`ndì` lí` drì` kisuma Krísto ni tà sè dhì

¹²Tàkonzì afí tá bvò kònìdhì lé móndí àlo, Àdámà sè gò, dràdrà dré kpà afízó tàkonzì nda sè. Ásà dhì, dràdrà nda atsá tá móndyá tití bvò àdhya i rú, i dré tití tàkonzì 'ole dhì sè.

¹³Tàko ko, drìdrì Gìká dré tátrítrí kúlí fèzo dhì kandrá dhì, tàkonzì tá bvò kònìdhì lé be. Dì, tátrítrí kúlí dré tá adrérà'a yó dhì 'á dhì, Gìká adré tá tà bha móndí i dri ngóró dré kitswálé àyi kì tàkonzì sè dhì tíni ko.

¹⁴Tágba kònìnì dhì, kidhólé Àdámà ni lókyá 'á atsálé Mósè ni lókyá 'á dhì, móndyá tití bvò àdhya i tá dràdrà ni rinyí zàle, ndìndì àyi tàkonzì 'obhá Gìká ni tátrítrí kúlí njozo Àdámà àdhya tíni ko dhì i. Àdámà nda ni tà adré tá Krísto adrélipi tá alìle dhì ni tà tadhá kòdhya.

¹⁵Dì, tàkonzì Àdámà dré tá 'ole nda ína ngóró tà taní Gìká dré afèle áyi togó taní sè dhì tíni ko. Tàko ko, móndí àlo nda ni tàkonzì sè dhì, móndí lìzolìzo dhì i todrà dre. Dì, Gìká tadhá vélé áyi togó taní lavúlé, tà taní afèzo gàle móndí lìzolìzo i léna lavúlé, móndí àlo, Yésu Krísto sè.

¹⁶Kòdhì íbe dhì, tàkonzì móndí àlo dré 'ole nda ni kùdù ngóró tà taní Gìká dré afèle nda ni kùdù tíni ko. Tàko ko, tàbvó tama angálépi tàkonzì àlo nda lésè dhì ni tà sè dhì, Gìká adré tá tà bha móndí i dri. Dì, tà taní angálépi tàkonzì zyandre dhì i lésè nda ni tà sè dhì, Gìká adré móndí kì bha gyägya í kandrá.

¹⁷Àngyá ko, tàkonzì móndí àlo dré 'ole nda sè dhì, dràdrà adré tá òpì nya móndyá tití i dri, móndí àlo nda sè. Dì, móndyá tití Gìká ni togó taní kisúbhá gò, dré àyi kì bhàzo gyägya dhì kì adrí gò, i dré vélé adrészò òpì nya lavúlé móndí àlo, Yésu Krísto nda sè.

¹⁸Dì tàkonzì àlo Àdámà dré 'ole nda ni tà sè dhì, Gìká adré tá tà bha móndyá tití i dri. Kókpà kòdhì tíni, tà àlo gyägya Krísto dré 'ole nda ni tà sè dhì, Gìká adré móndyá tití dhì kì bha gyägya í mìlésè, i kòkisúró lídrì ásà be dhì bvó.

¹⁹Tàko ko, móndí àlo nda ni ligima ni tà sè dhì, móndí lìzolìzo dhì i atsá tá tàkonzìbhá ro. Kókpà kòdhì tíni, tà móndí àlo, Krísto dré ka'ile 'ole dhì ni tà sè dhì, móndí lìzolìzo dhì kì atsá gyägya Gìká mìlésè.

²⁰Kàdré dì tátrítrí kúlí ni tà sè dhì, Gìká fè tá tátrítrí kúlí nda móndí i dré, àyi kì tàkonzì i kòlizóró lìle drìdrì. Dì, àrà tàkonzì i dré lìzozó dhì 'á dhì, Gìká tadhá vélé áyi togó taní lavúlé.

²¹Dì ásà dhì, ngóró tàkonzì dré tá adrélé òpì nya móndyá tití i dri, i kòtodrào ásà dhì tíni dhì, nyànomvá dhì, Gìká ni togó taní adré òpì nya àyi dri kònìnì, Gìká kòbhàró

àyi gyägya í mìlésè gò, i kòkisúró lídrì kóná vésè kólyá dhi àma kí Míri Yésu Krísto sè be dhi bvó.

Rómàbhá i 6

Dràma tàkonzi` lésè dhi, i` ndi` adrema li` drì` i` be Krísto na dhi

¹Dì mà ni go tàá ngíni? Mà ni tsì go adrélé tàkonzi' o, Giká kàdréró áyi togó taní bha àma rú lavúlé?

²Tàdzí ko! Mà drà àmakya tàkonzi lésè dre. Dì mà ni go atsílé tàkonzi na ngíningíni ró?

³Mì nì ko tåle dhi, àma tití båtísimò dobhá ru amúzó Yésu Krísto be dhi i, mà do båtísimò nda ru amúzó ába akódhi ni dràma na káyà dhi?

⁴Dì båtísimò dòma nda sè dhi, mà drà túmäní akódhi be gò àma kí sìzo ába, mà kàdréró adrélé lídrì tídhí ro dhi ibe, ngóró Giká Atá dré Krísto ni tingálé dràdrà lésè áyi mìlanzìlanzi sè dhi tíni.

⁵Dì mà dré ru amúlé Krísto be akódhi ni dràma na dhi sè dhi, mà ni kókpà ru amú akódhi be akódhi ni ngangà dràdrà 'ásè dhi na.

⁶Tako ko, mà ni tåle dhi, à tidí tá àma kí lídrì àku túmäní Krísto be fa kipakipa dri dhi be, àma kí rúbhá tàkonzi àdhya kòdraró gò, mà kògòrò vélé adrélé mìrabà tàkonzi àdhya i ró ko dhi bvó.

⁷Àngyá ko, dhya ángùdhi dràlepi dre dhi, à atrì akódhi nda tàkonzi ni rinyí lésè dre.

⁸Dì mà dré dràle túmäní Krísto be kònini dhi sè dhi, mà adré ka'ìá dhi, mà ni kókpà adré lídrì ibe túmäní akódhi be.

⁹Tako ko, mà ni tåle dhi, Krísto nga dràdrà 'ásè, iñdì kitswá gòle vélé dràle ko dhi be, dré adrélé vélé dràdrà ni rinyí zàle ko dhi sè.

¹⁰Akódhi dré dràzo dhi, drà ngbà 'í vésè àlo kitswálé tàkonzi ni rinyí lavú dhi bvó. Dì lídrì dré adrészó ába dhi, adré ába Giká dré.

¹¹Kókpà kòdhí tíni, mì kàdré àmi kí no ngóró móndí dràbhá tàkonzi lésè dre gò, i dré adrészó lídrì ibe Giká dré Yésu Krísto na dhi i ró.

¹²Dì ásà dhi, mì kòtayí tàkonzi adrélé òpì nya àmi kí rúbhá na dhi ko, mì kàdréró lovó kònzi àmi kí rúbhá kya kí ka'ì 'òle ko dhi bvó.

¹³Mì kòfè àmi kí rúbhá kí kìgá i ngóró ngá adrészó tàkonzi 'o ásà dhi i ró ko. Be ró dhi, mì kàdré àmi kí fe Giká dré, ngóró móndyá adríbhá dràdrà lésè dhi i ró. Mì kàdré kpà àmi kí rúbhá kí kìgá kí fe Giká dré, ngóró ngá adrészó tà gyägya 'o ásà dhi i ró.

¹⁴Tako ko, tàkonzi kitswá gòle òpì nya àmi dri ko. Àngyá ko, àmi tåtrítrí kúlí ni rinyí zàle ko. Be ró dhi, àmi àmikya Giká ni togó taní zàle.

Mìrabà tà gyägya àdhya i

¹⁵Kàdré dì kònìnì dhi, mà nì tsì go adrélé tàkonzì 'o, mà dré adrélé vélè tátrítrí kúlí zàle ko dhi sè, ìndì mà dré adrélé Giká nì togó tanì zàle dhi sè? Tàdzí ko!

¹⁶Mì nì ko tâle dhi, mì kàdré àmì kì fe móndí àlo dré ngóró akódhi nì màrábà ro dhi, àmì màrábà móndí mì dré adrészó kúlí nì ka'ì 'ole nda àdhyà 'ì dhi? Dì mì kàdré tàkonzì ka'ì 'ole dhi, mì nì adré màrábà tàkonzì àdhyà 'ì gò, tàkonzì nda dré àmì kì drìzo lìle dràdrà kisú. Dì, mì kàdré àmìkya Giká nì kúlí ka'ì 'ole dhi, mì nì adré akódhi nì màrábà 'ì gò, dré àmì kì bhàzo gyägya í mìlésè.

¹⁷Dì, mà kàdré àwoyà fe Giká dré! Tàko ko, tágba mì dré tá adrészó màrábà tàkonzì àdhyà 'ì dhi, mì ka'ì àmìkya Giká nì tà tadhálé àmì dré dhi 'ole àmì kì togó wäyi sè dre.

¹⁸Dì Giká atrì àmì tàkonzì nì rìnyí lésè gò, mì dré atsázó màrábà tà gyägya àdhyà i ró.

¹⁹Má adré tà ta móndí kya tini kònìnì, àmì móndí ro dhi kì tà yàyà sè. Wáláká dhi, mì fè tá àmì kì rúbhá adrélé màrábà tàkonzì àdhyà i ró gò, mì dré adrészó tatsilé swà ro, adrélé tàkonzì 'o lìzo ába drìdrì. Dì, nyànomvá dhi, mì kòfè àmì kì rúbhá adrélé màrábà tà gyägya àdhyà i ró, mì kàdréró atsílé togó lolo be Giká kandrá be dhi bvó.

²⁰Lókyá mì dré tá adrérà'a màrábà tàkonzì àdhyà 'ì dhi 'á dhi, àmì tá tà gyägya nì rìnyí zàle ko.

²¹Dì, mì kisú tá àmìkya àdho tà dóro 'ì, tàkonzì mì dré tá 'ole, adrébhá kanyò fe àmì dré ándrò dhi i sè dhi? Àngyá ko, tàkonzì nda i adré móndí kì dri lìle dràdrà kisú.

²²Dì, nyànomvá dhi, Giká atrì àmì tàkonzì nì rìnyí lésè gò, mì dré atsázó màrábà Giká àdhyà i ró. Dì tà dóro mì dré adrélé kisulé ásà dhi, kònìdhì 'ì: Àmì móndí àyì kì febhá adrélé lolo Giká dré dhi 'ì, ìndì mì nì lídrì kóná vésè kólyá dhi nì kisú.

²³Tàko ko, làgí tàkonzì àdhyà dràdrà 'ì. Dì, tà tanì Giká dré adrélé afèle áyì togó tanì sè dhi, lídrì kóná vésè kólyá àma kì Míri Yésu Krísto na dhi 'ì.

Rómàbhá i 7

Àma móndí́ atrí́ le tátrí trí́ kúlí nì rìnyí lésè dhi 'ì

¹Áma adrúpi i, mì nì àmìkya tátrítrí kúlí nì tà dóro. Dì mì nì tâle dhi, tátrítrí kúlí nda rìnyí íbe móndí dri, akódhi nda dré adrérà'a lídrì íbe dhi 'á dhi be.

²Tà nda kòdhì nì tadházó dhi, mì kisù rè tòkó mòle dhi nì tà ká. Tátrítrí kúlí adré tâá dhi, tòkó mòle nda akódhi nì agó nì rìnyí zàle, agó nda dré adrérà'a lídrì íbe dhi 'á. Dì, agó nda kòdrà dhi, à adré tòkó nda nì atrì tátrítrí kúlí làmó àdhyà lésè.

³Ásà dhi, akódhi nì agó kàdré dhu rè lídrì íbe gò, dré gòzo agó àzya mo dhi, à adré akódhi nì zi tòkó zàràbhù ro dhi ró. Dì, akódhi nì agó kòdrà dhi, à adré akódhi nì atrì tátrítrí kúlí nda lésè gò, dré kitswázó atsálé agó àzya nì tòko ró. Akódhi kò'o kònìnì dhi, akódhi tòkó zàràbhù ro dhi 'ì ko.

⁴Dì áma adrúpi i, tà nda kókpà kònìnì àmì kì tà sè. Mì drà kókpà tátrítrí kúlì lésè Krísto nì dràma sè dre, mì kàtsáró móndí àzya àdhyá ró, Krísto ngàlepi dràdrà 'ásè nda àdhyá ró, mì kàdréró lò'wa dóro 'a Gìká dré be dhi bvó.

⁵Tàko ko, mà dré tá adrérà'a lovó kònzi rúbhá àdhyá nì rinyí zàle dhi 'á dhi, tátrítrí kúlì nda nzì tá láti lovó kònzi i dré adrészó tà 'o àma kì rúbhá na gò, mà dré adrészó lò'wa kònzi 'a kitswálé dràdrà sè.

⁶Dì, nyànomvá dhi, mà drà àmakya tátrítrí kúlì adrélápi tá àma kì 'i nda lésè gò, àma kì atrìzo tátrítrí kúlì nda nì rinyí lésè, mà kàdréró tà 'o Gìká dré láti tídhí Tírí Lólo àdhyá sè, láti àku tátrítrí kúlì tisile dhi àdhyá sè ko.

Tátrí `trí kúlì i tàkonzí ` be dhi

⁷Dì mà nì go tàá ngíni? Tátrítrí kúlì tàkonzi 'i? Tàdzí ko! Tà báti ró dhi, tátrítrí kúlì nda 'o tá ma niá ngalè tàkonzi àdho 'i ya dhi nì. Tàko ko, tátrítrí kúlì nda kòtà tá dhi «Mí kòbhà móndí kì ngá lovó ko» dhi ko dhi, kònò má kitswá tá niá ngalè lovó kònzi bhàma àdho 'i ya dhi ko.

⁸Dì, tátrítrí kúlì nda kònzi láti dre dhi, tàkonzi 'o tá ína lovó kònzi kí kárá tití dhi i gàle má léna bì. Àngyá ko, tátrítrí kúlì nda kàdré tá yó dhi, kònò tàkonzi nì tá adréninyí àko.

⁹Wáláká dhi, mà adré tá lídrì íbe tátrítrí kúlì àko. Dì, tátrítrí kúlì kàtsá má vélé dre dhi, tàkonzi atsá tá lídrì ro má léna gò,

¹⁰má dré mána dràzo. Dì má dré nòzoá dhi, tátrítrí kúlì fele móndí kì drízo lìle lídrì kisú nda drì ína ma lìle dràdrà kisú kòdhya.

¹¹Tàko ko, tátrítrí kúlì nda sè dhi, tàkonzi kisú tá láti áma litízó gò, dré áma 'òzo dràle.

¹²Tágba kònìnì dhi, tátrítrí kúlì nda ína lólo, ìndì tà tátrítrí kúlì nda dré adrélápi tali à kò'o dhi i lólo, gyägya, ìndì dóro.

¹³Dì tátrítrí kúlì adrélápi dóro nda 'o tsì ma dràle dhi nì? Tàdzí ko! Be ró dhi, tàkonzi 'o ma dràle tà adrélápi dóro nda sè dhi nì, à kòniró ngalè tàkonzi nì tändi àdho 'i ya dhi, ìndì tàkonzi nda kàtsáró kònzi lavulé tátrítrí kúlì sè be dhi bvó.

Ru pfùma tàkonzí ` be dhi

¹⁴Mà nì tali dhi, tátrítrí kúlì tà Tírí Lólo àdhyá 'i dhi be. Dì, ma mána móndí bvò àdhyá 'i, ìndì à lagí ma adrélápi mårábà ro tàkonzi dré.

¹⁵Tàko ko, tà má dré adrélápi 'ole dhi i, mà nì má adré 'òá àdho tà sè ya dhi ko. Àngyá ko, mà adré tà má dré adrélápi 'ole dhi kì 'o kòdhya ko. Be ró dhi, mà adré mána tà má dré gàle gàngà dhi kì 'o kòdhya.

¹⁶Dì má kàdré tà má dré adrélápi 'ole ko dhi kì 'o dhi, mà adré ka'íá tali dhi, tátrítrí kúlì dóro káyà dhi.

¹⁷Dì má adré kisúá dhi, má adré tà nda kí 'o ma ko. Be ró dhi, tàkonzì adrélépi má léna dhi adré 'òá nì.

¹⁸Má nì tâle dhi, tà dôro má léna yókódhó dhi be. Kòdhì adré tâá dhi, tà dôro áma rûbhá tàkonzì àdhyà na dhi yókódhó. Tako ko, ma lovó íbe tò adrészò tâ dôro 'o. Dì, má kitswá mána tâ nda kí 'o bwà ko.

¹⁹Angyá ko, má adré tâ dôro má dré adrélé lèle 'ole dhi kí 'o kòdhya ko. Be ró dhi, má adré mána tâ kònzi má dré adrélé lèle 'ole ko dhi kí 'o kòdhya.

²⁰Dì má kâdré tâ má dré adrélé lèle 'ole ko dhi kí 'o dhi, má adré 'òá ma ko. Be ró dhi, tàkonzì adrélépi má léna dhi adré 'òá nì.

²¹Dì má adré tátrítrí kúlí kònìdhi ni kisú adrérà'a tâ 'o má léna: Tágba má kâdré tâ dôro le 'ole yà dhi, má adré ngbà 'í tâ kònzi 'o kòdhya.

²²Tako ko, áma togó na dhi, má adré lenzélé tátrítrí kúlí Gìká àdhyà ni tâ sè.

²³Dì, má adré mána tátrítrí kúlí àzya kisú adrérà'a tâ 'o áma rûbhá na, adrészò ru pfu tátrítrí kúlí má dré ka'ile áma tâ kisùkisù na dhi be. Tátrítrí kúlí àzya nda adré áma 'í bhàle tátrítrí kúlí tàkonzì àdhyà adrélépi tâ 'o áma rûbhá na dhi ni rìnyí zàle.

²⁴Àdho kizà 'í má dré kònini nì! Àdhi ni kitswá áma apá rûbhá adrélépi áma dri lîle dràdrà kisú kònìdhi lésè dhi nì?

²⁵Má adré àwoyà fe Gìká dré áma kí Míri Yésu Krísto sè! Dì ásà dhi, áma tâ kisùkisù na dhi, ma màrabbà Gìká ni tátrítrí kúlí àdhyà 'í. Dì, áma rûbhá tàkonzì àdhyà na dhi, ma mána màrabbà tàkonzì ni tátrítrí kúlí àdhyà 'í.

Rómàbhá i 8

Atsimà Tiri' Lolo ni rìnyí sè dhi

¹Dì nyànomvá dhi, tâ adrészò tâ bha móndyá adrébhá Yésu Krísto na dhi i dri dhi vélé yókódhó.

²Tako ko, tátrítrí kúlí Tiri' Lolo adrélépi lídrì fe Yésu Krísto na dhi àdhyà atrì áma tátrítrí kúlí tàkonzì àdhyà ìndì dràdrà àdhyà lésè dre.

³Angyá ko, tátrítrí kúlí Mósè àdhyà kitswá tâ áma kí tindrí bwà ko, lovó kònzi rûbhá àdhyà dré tâ tátrítrí kúlí nda ni 'ole atsálé rìnyí àko dhi sè. Dì, Gìká 'o tâ ína tâ áma kí tindrízò dhi nì. Amù áyi tändi ni Mvá alîle rûbhá tàkonzì àdhyà ni do àmakya tíni, kòfèró i dràle tàkonzì ni tâ sè. Dì ásà dhi, Gìká bhà tâ tàkonzì adrélépi tâ tâ 'o móndí kí rûbhá na nda dri, rìnyí ni ni 'òzo akilé.

⁴O tâ nda kònini kitswálé tâ gyägya tátrítrí kúlí dré adrélé tâle dhi i kò'oró ru kitswálé tití áma adrébhá atsílé lovó kònzi rûbhá àdhyà na ko, dì, adrébhá atsílé Tiri' Lolo ni rìnyí sè dhi i léna.

⁵Tako ko, móndyá adrébhá atsílé lovó kònzi rûbhá àdhyà na dhi i adré ngbà 'í tâ lovó kònzi nda dré adrélé lèle dhi kí kisù 'ole kòdhya. Dì, móndyá adrébhá atsílé Tiri' Lolo ni rìnyí sè dhi i adré àyikya tâ Tiri' nda dré adrélé lèle dhi kí kisù 'ole kòdhya.

⁶Àngyá ko, adrélé lovó kònzi rúbhá àdhya ní tà kisù dhi adré dhyá kí dri lile dràdrà kisú. Di, adrélé Tírí ní tà kisù dhi adré ína dhyá kí dri lile lídrì kisú, tà kídríkídrí be kòdhyá.

⁷Móndyá adrébhá lovó kònzi rúbhá àdhya ní tà kisù dhi i, kàribhá Gíká àdhya 'í. Àyi nda i adré àyi kí bha Gíká ní tátrítrí kúlí ní rinyí zàle ko. I kitswá kpà 'òá kònini bwà ko.

⁸Àyi adrébhá lovó kònzi rúbhá àdhya ní rinyí zàle nda i kitswá kpà Gíká ní togó 'o kínile bwà ko.

⁹Di, àmí ró dhi, àmí lovó kònzi rúbhá àdhya ní rinyí zàle ko. Be ró dhi, àmí àmikya Tírí Lolo ní rinyí zàle, Tírí Gíká àdhya nda kàdré adrélé àmí léna báti dhi. Dhya àlo kàdré Tírí Krísto àdhya íbe i léna ko dhi, akódhi nda móndí Krísto àdhya 'í ko.

¹⁰Di Krísto kàdré àmí léna dhi, tágba àmí kí rúbhá dré adrészó lile dràdrà kisú tàkonzi ní tà sè dhi, àmí lídrì íbe Krísto ní Tírí na, Gíká dré àmí kí bhàle gyägya í milésè dhi sè.

¹¹Di Gíká Yésu ní tingálépi dràdrà lésè dhi ní Tírí kàdré adrélé àmí léna dhi, Gíká Krísto ní tingálépi dràdrà lésè nda ní kókpà lídrì fe àmí kí rúbhá adrébhá dràle dràdrà dhi i dré, áyi Tírí adrélépi àmí léna nda ní rinyí sè.

¹²Di áma adrúpi i, àma màri íbe báti. Di, màri nda, tà adrészó atsílé lovó kònzi rúbhá àdhya na dhi 'í ko.

¹³Tàko ko, mì kàdré atsílé lovó kònzi rúbhá àdhya na dhi, mì ní dràdrà. Di, mì kàdré àmikya àmí kí tàkonzi kí 'o dràle Tírí ní rinyí sè dhi, mì ní adré lídrì íbe.

¹⁴Móndyá tití Gíká ní Tírí dré adrélé tidrile dhi i, Gíká ní ànzi 'í.

¹⁵Tàko ko, Tírí mì dré kisúlé nda bhà àmí góle adrélé màrabà ro ko, ìndì adrélé tìri ró ko. Be ró dhi, Tírí mì dré kisúlé nda bhà ína àmí adrélé Gíká ní ànzi i ró. Tírí nda sè dhi, mà adré liyílé Gíká rú adrészó tàá dhi: «Ábbà! Tátá! »

¹⁶Tírí nda ní tändì adré tadhá àma léna dhi, àma Gíká ní ànzi 'í káyà dhi nì.

¹⁷Di mà kàdré Gíká ní ànzi 'í dhi, mà ní tà dré lazílé áyi ànzi i dré dhi ní kisú tàyilé ro. Mà ní tà nda ní kisú túmání Krísto be, mà kàdré kízà ka'í nyàle túmání akódhi be dhi. Tàko ko, mà kàdré kízà ka'í nyàle túmání Krísto be dhi, mà ní kókpà mìlanzìlanzi kisú túmání ába.

Mìlanzìlanzi adrélépi ali`le dhi

¹⁸Di má adré kisùá dhi, kízà mà dré adrélé nyàle nyànomvá dhi i kitswá àyikya mìlanzìlanzi Gíká dré dra tadhálé àma dré dhi sè ko.

¹⁹Tàko ko, ngá tití Gíká dré bhàle dhi i adré lókyá dré dra áyi ànzi kí 'òzo apfòle dhi ni letè lovó sè.

²⁰Àngyá ko, Gìká bhà ngá tití i dré tá bhàle nda i adrélé tà tåko ni rinyí zàle, tágba ngá nda i dré tá lèzoá kàdré kònìnì ko dhi. Di, Gìká lè tá ína tà nda kàdré kònìnì. Tágba kònìnì dhi, à adré mì bha Gìká véna,

²¹akódhì kàtrirò ngá nda i àyi kì njwaŋwà ni rinyí lésè, i kàdréró ngá trile mìlanzilanzì ro Gìká ni ànzi kya tíni dhi i ró.

²²Di mà nì tåle dhi, ngá tití Gìká dré bhàle nda i adré tongólé, adrészó kizà nya ngóró tòkó adrélépi 'ole tile dhi àdhyá tíni, atsálé nyànomvá kònìdhi dhi be.

²³Di, ngbà 'í ngá nda i ko, àma adrébhá Tírí Lólo i be ngóró ngádrì Gìká dré afèle dhi ró dhi i, mà adré kókpà tongólé àma léna, adrészó kítú Gìká dré dra àma kì tadházó áyi ànzi i ró dhi ni letè lovó sè. Kítú nda tú dhi, Gìká ni àma kì apá àma kì rúbhá i be tití.

²⁴Mà dré adrélé mì bha Gìká véna kònìnì dhi sè dhi, akódhì tindrí àma dre. Di, à kàdré mì bha ngá adrélé nôle mì sè dhi ni tà sè dhi, kòdhì mì bhàma 'í báti ko. Àdhi adré mì bha ngá i dré kisulé dre dhi ni tà sè dhi nì?

²⁵Di, mà kàdré mì bha tà mà dré rè kisulé ko dhi sè dhi, mà adré letéa togó vwàvvà sè.

²⁶Kókpà kòdhì tíni, Tírí Lólo adré àma kì ledé àma kì tà yàyà sè. Tåko ko, mà nì tå zile Gìká tí ngóró dré kitswálé dhi tíni ko. Di, Tírí nda ni tåndi adré ína tà zi Gìká tí àma dré, adrészó tongólé tongotongo kitswázó tà ni ni ta kúlí sè bwà ko dhi i sè.

²⁷Di Gìká adrélépi àma kì togó kì tabhì dhi, ni tà Tírí nda dré adrélé lèle zile i tí dhi i be. Tåko ko, Tírí nda adré tà zi Gìká tí akódhì ni móndyá lólo i dré, ngóró Gìká dré adrélé lèle dhi tíni.

²⁸Mà nì kpà tåle dhi, Gìká adré tà tití dhi kì 'o ru amú adrélé dóro móndyá tití adrébhá áyi le, dré azilé ngóró i dré kisulé 'ole drìdrì dhi tíni dhi i dré dhi be.

²⁹Tåko ko, móndyá Gìká dré tá nile drìdrì móndyá ína ró dhi i, akódhì zì tá kpà àyi kitswálé atsálé ngóró áyi Mváagó tíni, akódhì nda kàdréró Mvá kàyo ró áyi adrúpi zyandre dhi i kòfalé be dhi bvó.

³⁰Di àyi Gìká dré tá zile drìdrì nda i, azí kókpà àyi. Àyi akódhì dré tá azilé nda i, bhà kókpà àyi gyägya i milésè. Àyi akódhì dré tá bhàle gyägya i milésè nda i, 'o kókpà áyi mìlanzilanzì kisú.

Gìká ni lèle kàdrì` àma vélé Yésu Krísto na dhi

³¹Di tà nda kòdhì i sè dhi, mà ni go tàá ngíni? Gìká kàdré àma dré dhi, àdhi ni kitswá ru pfu àma i be dhi nì?

³²Tåko ko, akódhì apá áyi tåndi ni Mvá dràdrà lésè ko. Be ró dhi, fè ína akódhì nda dràle àma tití dhi kì tà sè. Kò'o kònìnì 'í dhi, a ni kókpà tà tití dhi kì afè àma dré áyi togó taní sè, ngóró dré áyi Mvá ni afèle àma dré dhi tíni.

³³Àdhi ni kitswá móndyá Gìká dré zile dhi kì asíkì dhi nì? Gìká adré àyi nda kì bha gyägya i milésè dhi nì!

³⁴Àdhi ni dì kitswá tà bha àyi nda i dri dhi nì? Yésu Krísto drà àma kí tà sè nì! Lavúlé dhi, akódhí nga dràdrà 'ásè gò, dré adrészó Gíká ni dríágó lésè, adrélé tà zi tíá àma dré!

³⁵Àdhi ni dì kitswá àma kí kófalé lanzí lèle Krísto àdhya be dhi nì? Kízà 'í yà, tà kòkóròko 'í yà, mì pfopfò 'í yà, tòbirí 'í yà, adrélé bvólílí ro dhi 'í yà, adrélé ànyi dràdrà mìle dhi 'í yà, kó ngalè dràdrà 'í yà dhi ni kitswá tsì 'òá dhi nì?

³⁶Ngóró Gíká ni Kúlí dré adrélé tâle dhi tíni: «Ámi tà sè dhi, àma ànyi dràdrà mìle lókyá tití i sè.

À adré àma kí no ngóró kábilígyà adrélé 'ole tilílé dhi i tíni. »

³⁷Dì, tà nda kòdhí tití dhi i sè dhi, àma àmakya móndí tà lavúbhá lavúlavú Krísto àma kí lèlepi dhi sè dhi 'í.

³⁸Tàko ko, má adré ka'íá bâti tâle dhi, tà àlo kitswá àma kí kófalé lanzí lèle Gíká àdhya be bwà ko, kàdré gba dràdrà 'í yà, lídrí 'í yà, ángéló 'í yà, tirí kònzi ópí kàdrí ro ìndí rinyí ró dhi 'í yà, lókyá áandrò kònídhi 'í yà, lókyá adrélépi alile dhi 'í yà,

³⁹rinyí kurú na dhi 'í yà, kó ngalè rinyí bvò àndúna dhi 'í yà dhi. Bâti, ngá tití Gíká dré bhàle dhi kí àlo kitswá ína àma kí kófalé lanzí lèle Gíká dré tadhálé àma dré àma kí Mírì Yésu Krísto na dhi be bwà ko.

Rómàbhá i 9

Gíká i móndyá dré zì`le dhi i`be dhi

¹Má adré tà bâti ta Krísto na. Má adré kínzò ta ko. Tirí Lólo adrélépi áma togó na dhi adré tadhá dhi, tà má dré adrélé tâle kònídhi, tà bâti 'í:

²⁻³Áma togó adré kízà nya, adrészó kpà lanzílè áma súrú, Yúdà ànzí kí tà sè landè àko ró. Má mìlésè dhi, dóro ni tá áma tândí ni tatrílè gò, àma kí kófalé lanzízó Krísto be dhi, áma súrú nda i kòkitswá tá adrílé ásà dhi.

⁴Àngyá ko, àyi nda i ìsérélè ànzí 'í. Gíká bhà tá àyi adrélé áyi ànzí i ró gò, áyi milanzílanzí tadházó àyi dré. Bhà tá tà twátwa ru yìzo àyi íbe dhi i. Fè tá kpà àyi dré áyi tátrítrí kúlí, túmání tà adrészó áyi lindrí bha dhi íbe, ìndí áyi lazikúlí íbe.

⁵Àyi kí tâbhí i Àbàrámà 'í, ìsákà 'í, ìndí Yàkóbhò 'í. Kòdhí íbe dhi, Krísto ni tândí apfò tá móndí ro àyi kí súrú lésè. Krísto nda, Gíká adrélépi tà tití dhi i drile, ìndí kitswálépi rúku sè kóná vésè kólyá dhi 'í! Kàdré kònini!

⁶Kòdhí adré lèá ko tâle dhi, Gíká 'o tà i dré tá lazílé àyi kí tà sè dhi ko dhi. Tàko ko, móndyá tití angábhá ìsérélè ni súrú lésè dhi i, ìsérélè ànzí 'í bâti ko.

⁷Kókpà kòdhí tití, móndyá tití angábhá Àbàrámà ni súrú lésè dhi i, akódhí ni ànzí 'í bâti ko. Be ró dhi, Gíká tà tá Àbàrámà dré dhi: «À ni ngbà 'í ìsákà ni ànzí kí zi ámi ànzí i ró dhi kòdhya. » ⁸Kòdhí adré tâá dhi, ànzí tîle rúbhá sè dhi i Gíká ni ànzí 'í ko. Be ró dhi, Gíká adré ngbà 'í ànzí tîle áyi lazikúlí sè dhi kí no áyi ànzí i ró dhi kòdhya.

⁹Tàko ko, Gìká lazí tá tà nda kúlí kònì i sè: «Lókyá kòkìtswá dre dhi, má nì agò gò, Sárà dré mváagó tìzo. »

¹⁰Ngbà 'í kòdhi ko, ànziàgo rì Rèbékà dré tìle dhi kì atá tá agó àlo, àma kì tábhí Ìsákà 'í.

¹¹⁻¹²Di, ànzimvá nda kì tirà ko, ìndì ì dré rè tà dóro 'í ya, kó ngalè tà kònzi 'í ya dhi kì 'orà ko dhi 'á dhi, Gìká tà tá ína Rèbékà dré dhi: «Mvá kàyo nì tà 'o mvá tùgu dré akódhi nì màrabà tìni. » Kòdhi adré tadhá dhi, Gìká adré móndí kì zi ngóró dré kisùle 'ole drìdrì dhi tìni. Akódhi nì tändí dhya adrélépi móndí kì azí dhi 'í. Di, adré àyì kì azí tà dóro ì dré adrélé 'ole dhi kì tà sè ko.

¹³Ngóró Gìká nì Kúlí dré adrélé tìle dhi tìni: «Má lè Yàkóbhò kòdhya. Di, má gá mána Èsawù rè. »

¹⁴Di mà nì gó tàá ngíni? Gìká tsì gyágya ko? Tàdzí ko!

¹⁵Tàko ko, akódhi tà Mósè dré dhi: «Má nì dhya ángùdhi má dré adrészó kizà nì nì le bhàle dhi nì kizà bha. Má nì kpà áma togó dóro tadhá dhya ángùdhi má dré adrészó lèá tadhálé drá dhi dré. »

¹⁶Di ásà dhi, tà kàdrì dhi, tà móndí ì dré adrélé lèle 'ole dhi 'í ko, ìndì tà ì dré adrélé 'ole àyì kì rìnyí sè dhi 'í ko. Tà kàdrì lavúlé dhi, ngbà 'í Gìká nì togó dóro dré adrélé tadhálé dhya ángùdhi dré adrészó lèá tadhálé drá dhi dré dhi 'í.

¹⁷Tàko ko, Gìká nì Kúlí adré tàá Fàráwò, ópí kàdrì Èzèpétò àdhya nì tà sè dhi: «Má bhà mi ópí kàdrì ro tà kòdhi sè, má kòtadháró áma rìnyí mí rú, à kòbhàró áma rú kùle bvò wáyi 'ásè be dhi bvó. » ¹⁸Di ásà dhi, Gìká adré dhya ángùdhi dré adrészó kizà nì nì le bhàle dhi nì kizà bha. Adré kpà dhya ángùdhi dré adrészó togó nì nì le 'ole tombálé dhi nì togó 'o tombálé.

Gìká nì kombà i akódhi nì togó tanì be dhi

¹⁹Di àruka nì, àmì kì àlo nì kitswá lizíá má tí dhi: «Kàdré di kònìnì dhi, Gìká adré tà bha móndí ì dri àdho tà sè? Tàko ko, àdhi nì kitswá ligílé tà dré adrélé lèle 'ole dhi 'ibe dhi nì? »

²⁰Di, mi móndí ro nì, mi tá àdhi 'í, adrélé tà kayí Gìká tí nì? Ngá ledélé dhi adré tsì lizíá dhya áyì ledélépi dhi tí dhi: «Mí ledé ma lású be kònìnì àdho tà sè» ya dhi? ²¹Dhya adrélépi lìdrí ru dhi tsì rìnyí 'ibe adrészó lìdrí nda kì ru ngóró dré adrélé lèle dhi tìni ko? Akódhi kitswá tsì kìnì àlo sè lìdrí àlo ru tà kàdrì 'ozo ásà, gòzo lìdrí àzya ru tà tàko 'ozo ásà dhi ko?

²²Kókpà kòdhi tìni, Gìká lè tá áyì kombà tadhálé, áyì rìnyí 'ozo móndyá tití dhi ì dré nòle. Di, mvò tá ína móndyá ì dré tá bhàle kitswálé lìle dràdrà kisú dhi kì tà áyì togó vwàvvà sè,

²³Kitswázó áyì milanzìlanzì kàdrì dhi nì tadhá móndyá ì dré tá bhàle kitswálé áyì milanzìlanzì kisú áyì togó dóro sè dhi ì dré.

²⁴Àma kókpà móndyá dré azílè nda i kòfalé be. Di, akódhì azí àma ngbà 'í Yúdà ànzì i kòfalésè ko. Azí kókpà àma móndyá súrú twá ro dhi i kòfalésè.

²⁵Ngóró dré adrélè tâle búkù Òséyà àdhya na dhi tíni: «Má ni móndyá adrébhá tá mána ró ko dhi kí zi móndyá mána i ró. Má ni súrú má dré tá lèle ko dhi ni zi súrú má dré lèle tò dhi ró.

²⁶Arà tá tâzoá àyi dré dhi <Àmì móndyá mána 'i ko> dhi 'á dhi,
à ni àyi kí zi Gìká lídrì ro dhi ni ànzì i ró. »

²⁷Di, Ìsérélè ànzì kí tà sè dhi, pròfétà Èsáyà yo tá kúlí tâzoá dhi: «Tágba Ìsérélè ànzì i dré lizozó ngóró sínyí yìandre mìle dhi tíni dhi, ngbà 'í àyi kí àmbí kí adrí ni.

²⁸Tako ko, Míri ni kúlí i dré lazilé bvò kònìdhi ni tà dri dhi ni 'o mbèlè kitswálé tití. »

²⁹Ngóró Èsáyà dré tá longolé drìdrì dhi tíni: «Míri rìnyí lìyí ro dhi kòtayí tá ànzì kí àmbí àma dré ko dhi, kònò àma kí tà atsá tá ngóró móndyá Sòdómà i lésè Gòmórà be dhi kya tíni dre. »

I` sèrélè ànzì i` ka'i ko

³⁰Di mà ni go tâá ngíni? Móndyá súrú twá ro adrébhá tá àyi kí nda bhàle gyägya Gìká mìlésè ko dhi, i atsá àyikya gyägya akódhì mìlésè àyi kí tà ka'ika'i sè.

³¹Di, Ìsérélè ànzì adrébhá tá àyi kí nda bhàle gyägya Gìká mìlésè tátrítrí kúlí sè dhi, i atsá àyikya gyägya akódhì mìlésè ko.

³²Àdho tà sè? Tako ko, i ndà láti atsázó gyägya akódhì mìlésè àyi kí tà ka'ika'i sè ko. Be ró dhi, i ndà àyikya láti atsázó gyägya tà dóro i dré 'ole dhi i sè. Di ásà dhi, i tisi àyi kí pá kírà adrélèpi móndí kí tokpó ledhélé dhi rú.

³³Ngóró Gìká ni Kúlí dré adrélè tâle dhi tíni: «Mì nò rè ká! Má bhà Siyónà na kírà adrélèpi móndí kí tokpó dhi, kírà adrélèpi móndí kí 'o ledhélé dhi. Di dhya ángùdhi adrélèpi kírà nda ni ka'i dhi, kitswá tâdzí adrélè kanyò ro ko. »

Rómàbhá i 10

¹Àma adrúpi i, má adré Gìká ni ti lizí togó wáyi sè, adrészó ngòle akódhì rú Ìsérélè ànzì kí tà sè, akódhì kòtidrìró àyi be dhi bvó.

²Tako ko, má kitswá tâá àyi nda kí tà sè dhi, àyi kí togó àtsi ró Gìká ni tà sè bâti. Di, àyi kí togó àtsi ró nda adré ína áyi totó tà bâti nìma dri ko.

³Àngyá ko, i ni láti Gìká dré adrészó móndí kí bha gyägya i kandrá dhi ko. I ka'i kpà Gìká ni láti nda ni lebèle ko. Be ró dhi, i ndà àyikya àyi kí tândí kí láti atsázó gyägya Gìká kandrá dhi kòdhyá.

⁴Di, Krísto 'o ína tà Gìká dré tátrítrí kúlí fèzo ásà dhi kitswálé tití, kitswálé móndyá tití adrébhá áyi ka'i dhi i kàtsáró gyägya Gìká kandrá be dhi bvó.

Tà adrészó móndí' ki tidri' àyi kí tà ka'ika'i sè dhi

⁵Kàdré atsama gyăgya tátrítrí kúlí 'òma sè dhi nì tà sè dhi, Mósè tisì tá kònìnì: «Dhya adrélépi tà tití tátrítrí kúlí dré adrélé tàle dhi kì 'o dhi nì adrí tà nda i sè. » ⁶Dì, kàdré ína atsama gyăgya Gíká kandrá tà ka'ika'i sè dhi nì tà sè dhi, Gíká nì Kúlí adré tàá kònìnì: «Mí kòtà ámi togó na dhi, àdhi nì mba bhù na nì ya dhi ko. »(Kòdhi adré tàá dhi, àdhi nì mba Krísto nì 'o asílé bvò dri dhi nì.)⁷«Mí kòtà kpà dhi, àdhi nì si bvò àndúna nì ya dhi ko. »(Kòdhi adré tàá dhi, àdhi nì si Krísto nì tingá dràdrà lésè dhi nì.)

⁸Dì, Gíká nì Kúlí adré ína tàá dhi: «Kúlí ànyi mí làga. Kúlí nda mí tí ìndì ámi togó na. » Kúlí nda kúlí tà ka'ika'i àdhya mà dré adrélé longólé kònìdhi 'i:

⁹Mí kòtà ámi ti sè dhi, Yésu Mírì 'i gò, mí dré ka'izoá ámi togó na tàle dhi, Gíká tingá akódhi dràdrà lésè dhi, mí nì adrí.

¹⁰Tàko ko, à adré Yésu nì ka'i togó sè gò, Gíká dré adrészó dhyá kì bha gyăgya í kandrá. À adré kpà tàá ti sè dhi, Yésu Mírì 'i gò, Gíká dré adrészó dhyá kì tidrí.

¹¹Ngóró Gíká nì Kúlí dré adrélé tàle dhi tini: «Dhya ángùdhi adrélépi akódhi nì ka'i dhi kitswá tadtzi adrélé kanyò ro ko. » ¹²Àngyá ko, Yúdà ànzì i móndyá surú twá ro dhi íbe dhi i twátwa ko. Mírì àlo kwákwá dhi àyi tití nda kì Mírì 'i. Akódhi nda adré tà taní fe gale móndyá tití adrébhá liyílé i rú dhi i léna.

¹³Tàko ko, Gíká nì Kúlí adré tàá dhi: «Dhya ángùdhi adrélépi liyílé Mírì rú dhi nì adrí. »

¹⁴Dì, i nì kitswá liyílé Mírì rú ngíni, i kòka'i rè akódhi ko dhi? I nì kitswá kpà akódhi nì ka'i ngíni, i kòyi rè akódhi nì tà ko dhi? I nì kitswá kpà akódhi nì tà yi ngíni, móndí àruka i kòlongó rè akódhi nì rúbí àyi dré ko dhi?

¹⁵Àyi nda kì kitswá kpà akódhi nì rúbí longó ngíni, à kòmù rè àyi rúbí nda nì longó ko dhi? Ngóró Gíká nì Kúlí dré adrélé tàle dhi tini: «Mí nò rè ngalè dhya adrébhá alile rúbí taní longó dhi kì pá avé tò ngíni ya dhi ká! »

¹⁶Dì, Isérélè ànzì Rúbí Taní yibhá dhi i kòfalé dhi, àyi tití dhi i ka'i àyikya Rúbí nda ko. Tàko ko, prôfétà Èsáyà tà dhi: «Mírì, àdhi ka'i rúbí mà dré longólé dhi nì? » ¹⁷Dì ásà dhi, à adré rúbí nda nì ka'i, rúbí nda nì yìma sè. À adré kpà rúbí nda nì yi, Krísto nì kúlí longoma sè.

¹⁸Má adré dì lizíá dhi: Isérélè ànzì i yi tsì rúbí nda ko? Kònìnì ko, i yi 'í. Ngóró Gíká nì Kúlí dré adrélé tàle dhi tini: «Móndí kì kúlí la'u bvò wäyí 'ásè.

Àyi kì kúlí tsa byá bvò nì kùdù na. »

¹⁹Dì, má adré góle lizíá dhi: Isérélè ànzì nda i nì tsì rúbí nda nì àndu ko? I nì 'í. Drìdrì dhi, Mósè longó tá Gíká nì kúlí kònìnì: «Má nì àmi kì 'o lovó kònzi bha surú adrébhá bâti ró ko dhi i rú. Má nì àmi kì togó 'o aswálé surú twá adrébhá tà nìnì àko dhi i rú. »

²⁰Kòdhì íbe dhi, Èsáyà longó tá Gìká ni kúlí tirì àko kònìnì: «Má tayí ma móndyá adrébhá tá áma nda ko dhi i dré kisúlé. Má tadhá ma móndyá adrébhá tá tà zi má tí ko dhi i dré. »

²¹Dì, kàdré ína ìsérélè ànzi ki tà sè dhi, Èsáyà tà kpà dhi: «Kìdhólé drùbhì sè tsàle ìndró na dhi, má kidzì áma drígá móndyá adrébhá ligílé má rú, adrészó áma kúlí ga rè dhi i véna. »

Rómàbhá i 11

Gìká gà rè I` sérélè ànzi i ko

¹Má adré dì lizíá dhi: Gìká gà ína áyi móndyá i dre? Tàdzí ko! Tàko ko, áma tändi, ma ìsérélè mvá 'i. Má angá mána Àbárámà ni súrú lésè, ìndì Bènyàmínà ni súrú lésè.

²Gìká gà áyi móndyá i dré tá zile drìdrì dhi i rè ko. Mì nì tà Gìká ni Kúlí dré adrélé tâle pròfétà Èlýà ni tà sè dhi ko? Èlýà nda ngo tá Gìká rú ìsérélè ànzi ki tà sè kònìnì:

³«Mírì, i tupfú ámi pròfétà i todràle dre. Ì awú kpà ámi àlètárì i dre. Dì tayí ngbà 'í ma kalóma. Ì adré kpà láti nda áma pfùzo dràle. »⁴Dì, Gìká logó tá kúlí akódhì dré ngíni? Logó tá kònìnì: «Mì kalóma ko. Tàko ko, má likí má dré àgo ngùlù-nzi-drì-rì àyi ki kórókó titibhá Bálà kandrá ko dhi i kòdhya. »⁵Dì ándrò kònìdhì, tà nda kókpà kònìnì. Tayí rè ìsérélè ànzi ki àmbí Gìká dré zile áyi togó taní sè dhi i.

⁶Dì Gìká kòzì àyi nda i áyi togó taní sè 'í dhi, kòdhì adré tadhá dhi, zì àyi tà dóro i dré 'ole dhi i sè ko. Kàdré tá kònìnì ko dhi, kònò Gìká ni togó taní ni tá adré tà dré adrélé fèle àngyá dhi 'i ko.

⁷Tà nda kòdhì i adré tàá dhi, tà ìsérélè ànzi i dré adrélé ndàle àyi ki togó wáyi sè dhi, i kisú ko. Ngbà 'í àyi Gìká dré zile dhi i kisú tà nda àyi. Dì, àyi ki àruka tití dhi ki togó atsá ína tòmbátòmba.

⁸Ngóró tísile Gìká ni Kúlí na dhi tíni: «Gìká 'o àyi ki tà kisùkisù atsálé tímímvá ro, àyi ki mì dròzo, i kàdréró ngá no ko gó, àyi ki bíbhálé tabházó, i kàdréró tà yi ko atsálé ándrò kònìdhì. »

⁹Dàwídì tà kpà dhi: «Lè àyi ki gwányá i kàtsá tà adrélépi àyi ki 'o la'ile bă sílé dhi ró, tà adrélépi àyi ki 'o ledhélé dhi ró, ìndì tà adrészó tà ño àyi dri àyi ki tàkonzì sè dhi ró.

¹⁰Lè àyi ki mì kàní, i kàdréró ngá no ko, ìndì àyi ki àmvò kàdré atrúlé nyo. »

¹¹Má adré dì lizíá dhi: ìsérélè ànzi i kòdhì kònìnì dhi, i dhe kònìnì nyo? Tàdzí ko! Be ró dhi, àyi ki tàkonzì ki tà sè dhi, Gìká nzì ína láti móndyá súrú twá ro dhi i dré adrízó, kitswázó ìsérélè ànzi nda ki 'o lovó kònzi bha móndyá súrú twá ro nda i rú.

¹²Dì ìsérélè ànzi ki tàkonzì sè dhi, Gìká fè tà taní gàle móndyá tití bvò àdhya i dré. ìsérélè ànzi nda ki dhëma sè dhi, Gìká fè tà taní gàle móndyá súrú twá ro dhi i dré. Kàdré dì kònìnì dhi, ìsérélè ànzi nda ki kònì dra agò Gìká vélé dhi, akódhì ni tà taní fe gàle àyi dré lavúlé!

Móndyá súrú twá ro dhi kí tindríma

¹³Àmì súrú twá ro ní i, má adré nyànomvá tà ta àmì dré. Gìká bhà ma adrélé àpóstolò ro àmì, móndyá súrú twá ro dhi i véna. Má adré dí áma àzí nda ní tà bha kuru.

¹⁴Àruka ní, àzí nda sè dhi, má ní kítswá áma tändi ní súrú kí 'o lovó kònzi bha àmì, móndyá súrú twá ro dhi i rú, kítswázó àyi kí àruka kí tindrí ásà dhi bvó.

¹⁵Tàko ko, Ìsérélè ànzi nda kí gáma sè dhi, Gìká 'o móndyá àruka tití bvò àdhyá i ru amú tódhyá i be. Dí kònì dra go Ìsérélè ànzi nda kí ka'i dhi, a ní lídrì fe àyi adrébhá ngóró móndi dràbhá dre dhi i tíni nda i dré!

¹⁶Ngóró mì dré nile be dhi tíni dhi, mápà ní kígá adrélé fèle drìdrì Gìká dré dhi kàdré lolo dhi, mápà wáyi nda kókpà lolo. Fa kómvó kàdré lolo dhi, fa nda ní kólá i kókpà lolo.

¹⁷Ìsérélè ànzi i ngóró òlívè fa, Gìká dré kólá ní kí àruka kí togázó dhi tíni. Àmì súrú twá ro ní i, àmì ngóró òlívè fa twá apfòlepi mbì na, Gìká dré kólá ní kí adózó 'ole tìle òlívè fa tändi nda rú dhi tíni. Dí nyànomvá dhi, mì adré kpà òlívè fa nda ní sú adrélépi apfòle kómvó ní lésè dhi ní kisú.

¹⁸Dí, lè mì kàdré àmì kí afà, Gìká dré àmì kí 'ole tìle kólá togálé nda kí àrà 'a dhi sè ko. Dí, mì kàdré àmì kí afà dhi, lè mì kònì tâle dhi, mì adré fa kómvó 'o ru totó dhi àmì ko. Be ró dhi, fa kómvó nda adré ína àmì kí 'o ru totó dhi nì.

¹⁹Àruka ní, mì ní tàá dhi: «Gìká togá kólá nda i, àma kí 'ozo tìle àyi kí àrà 'a dhi bvó.
»

²⁰Kòdhi báti. Dí, Gìká togá àyi nda i, i dré tá adrélé tà ka'ika'i àko dhi sè. Àmì ró dhi, mì adré àmikya àmì kí totó àmì kí tà ka'ika'i sè. Mì kàdré dí drìkàdrì ro tà nda sè ko. Be ró dhi, mì kàdré àmikya tìri ró.

²¹Tàko ko, Gìká kòtogá Ìsérélè ànzi adrébhá tá kólá tändi ró nda i kònini dhi, mì kònò doro, kòtogáró kókpà àmì àyi tíni ko dhi bvó.

²²Dí mì kisù rè Gìká ní togó doro ní tà, akódhi ní kombà be dhi ká. Akódhi adré áyi kombà tadhá móndyá ledhébhá dhi i dré. Dí, adré ína áyi togó doro tadhá àmì dré, mì kògò adrélé trôle akódhi ní togó doro nda rú dhi. Dí, mì kò'o kònini ko dhi, akódhi ní kókpà àmì kí togá ngóró kólá àruka nda i tíni.

²³Dí Ìsérélè ànzi nda i kágò Gìká vélé akódhi ní ka'i dhi, a ní go àyi kí 'o tìle tódhyá òlívè fa nda rú. Àngyá ko, akódhi rìnyí i be kítswázó tà nda ní 'o.

²⁴Tàko ko, tágba mì dré angázó òlívè fa gà adrélépi apfòle mbì na dhi lésè dhi, Gìká ga àmì gó, àmì kí 'ozo tìle òlívè fa i dré kidhlé nda rú. Dí a ní kókpà kítswá kólá angábhá òlívè fa nda lésè dhi kí 'o tìle tódhyá àyi kí tändi kí fa nda rú.

I` sérélè ànzi kí tindríma

²⁵Áma adrúpi i, má lè mì kònì Gìká ní tà lùzu ró kònìdhi, mì kàdréró drìkàdrì ro ko dhi bvó: Ìsérélè ànzi kí togó atsá tòmbátòmba, tsàle lókyá móndyá tití Gìká dré zìle súrú twá i kòfalésè dhi i dré dra alìzo akódhi vélé dhi 'á.

²⁶Dì àyi nda ì kàlì dre dhì, Gìká ni Ìsérélè ànzì kì tìdrí tití, ngóró tisile akódhì ni Kúlí na dhì tíni: «Dhya dra móndí kì apálépi dhì ni apfò Siyónà lésè gò, dré Yàkóbhò ni ànzì kì togó adzázó àyi kì ligima ni tà lésè.

²⁷Dì tà má dré dra bhàle ru yìzo àyi íbe dhì, kònìdhì 'ì: Má ni àyi kì tàkonzì kì tingá tití. »

²⁸Kàdré dì Rúbí Tani ni tà sè dhì, Ìsérélè ànzì nda ì atsá nyànomvá Gìká ni kàribhá ro, àmi súrú twá ro dhì kì tà sè. Di, kàdré ína àyi kì zìma ni tà sè dhì, àyi ngbú móndyá Gìká dré lèle tò dhì 'ì, tà dré tá lazílé àyi kì tábhí i dré dhì kì tà sè.

²⁹Tàko ko, kàdré tà taní Gìká dré afèle dhì kì tà sè, ìndì móndyá dré azílé dhì kì tà sè dhì, akódhì kitswá tàdzí tà í dré 'ole nda kì ladzá ko.

³⁰Àmi atú ligíbhá Gìká rú dhì 'ì, mì kisú nyànomvá akódhì ni togó doro Ìsérélè ànzì kì ligima ni tà sè dre.

³¹Kókpà kòdhì tíni, àyi nda ì atsá nyànomvá móndí adrébhá ligílé akódhì rú dhì i ró, i kòkisúró kókpà Gìká ni togó doro, mì dré akódhì ni togó doro nda ni kisúlé dre dhì sè.

³²Tàko ko, Gìká tayí móndyá tití dhì i adrélé 'ile àyi kì ligima ni tà sè, i kòkiswáró àyi togó doro tadhá àyi tití nda i dré be dhì bvó.

Gìká ni rú bhàma kùle dhì

³³Bàti, Gìká ni tà làgí kyàkyà dhì kàdrì lavúlé! Akódhì ni tògyá i tà nìnì ni be dhì i kàdrì lavúlé!

Àdhì ni kitswá tòbvó dré adrélé tòle dhì kì àndu ngi dhì nì?

Àdhì ni kitswá láti dré adrészó tà 'o ásà dhì kì àndu ni dhì nì?

³⁴Ngóró Gìká ni Kúlí dré adrélé tòle dhì tíni: «Àdhì ni tà Mírì dré adrélé kisùle dhì nì?

Àdhì tà akódhì ni drì nì?

³⁵Àdhì fè ngá Gìká dré, kògòrò vúdrì ni ni logó dhì nì? »

³⁶Tàko ko, tà tití dhì i angá akódhì vélésè, i adré kpà adrélé akódhì sè, ìndì akódhì dré. Milanzìlanzi kàdré akódhì dré kóná vésè kólyá! Kàdré kònìni.

Rómàbhá i 12

Àma kì fèma mòbòmà ro Gìká dré dhì

¹Dì ásà dhì, áma adrúpi 'ì, mì adré àmi kì kodzó kònìni: Gìká dré áyi togó doro tadhálé àmi dré dhì sè dhì, mì kàdré àmi kì rúbhá kì fe akódhì dré ngóró mòbòmà lólo lídrì ro kitswábhá akódhì mìlésè dhì i ró. Kòdhì lìsámbò bàti mì dré adrélé 'ole akódhì ni rú sè dhì 'ì.

²Mì kòfè àmi adrélé ru su tà móndyá bvò kònì àdhya i dré adrélé 'ole dhì íbe ko. Be ró dhì, mì kòtayí àmi Gìká dré adrélé ladzálé, dré adrélé àmi kì tà kisùkisù 'o atsálé

tídhí ro dhi sè. Mì kò'o kònìnì dhi, mì ni dì kïtswá tà kì kòfalé ni lanzílé, adrészò tà Gïká dré adrélè lèle mì kò'o dhi kì ka'ì 'ole. Tà dré adrélè lèle mì kò'o nda kòdhi i, tà dôro kïtswâbhá tití akódhì mìlésè dhi i.

³Gïká ni togó taní bhàle má rú dhi sè dhi, má adrë tåá àmì àlo àlo tití dhi i dré dhi: Mì kàdré àmì kì tà kisù tà kàdrì ro ngóró dré kïtswálé àmì sè ko dhi tíni ko. Be ró dhi, mì kàdré àmì kì tà kisù tògyá sè, ngóró Gïká dré tà ka'ika'ì fèle àmì àlo àlo tití dhi i dré dhi tíni.

⁴Àma àlo àlo tití dhi i rûbhá íbe àlo. Dì, rûbhá nda ína kïgá íbe bï, ìndì kïgá nda i adrë àzí twátwa dhi kì 'o.

⁵Kókpà kòdhi tíni, àma zyandre dhi i, mà amú ru atsálé rûbhá àlo ró Krïsto na, ìndì àma tití dhi i rûbhá àlo nda ni kïgá i.

⁶Àma àlo àlo tití dhi i, mà kisú rînyí twátwa dhi i, ngóró Gïká dré áyi togó taní bhàle àma rú dhi tíni. Dì dhya àlo kòkisú rînyí adrészò Gïká ni kúlì longó pròfétà àdhya tíni dhi, kàdré kúlì nda ni longó ngóró Gïká dré tà ka'ika'ì fèle drá dhi tíni.

⁷Dhya àzya kòkisú ína rînyí adrészò tà 'o móndí i dré dhi, kàdré áyi fe adrélè tà nda kì 'o. Dhya àzya kòkisú ína rînyí adrészò móndí kì tadhá dhi, kàdré áyi fe adrélè àyi nda kì tadhá.

⁸Dhya àzya kàdré ína móndí kì kodzó dhi, kàdré áyi fe adrélè àyi nda kì kodzó. Dhya àzya kàdré ína ngá fe móndí i dré dhi, kàdré ngá nda kì fe togó dôro sè. Dhya àzya kàdré ína móndí kì drì ko dhi, kàdré àyi nda kì drì ko togó wâyi sè. Dhya àzya kàdré ína móndí kì kizà bha dhi, kàdré àyi nda kì kizà bha togó kìní sè.

Lèle ni tà

⁹Lè mì kàdré móndí kì le togó wâyi sè, túrúpfú àko. Mì kàdré tà kònzi ga, adrészò trôle tà dôro rú.

¹⁰Mì kàdré ru le àmì kòfalésè ngóró adrúpi i tíni. Mì kàdré láti nda adrészò àmì kì adrúpi kì lindrì bha àmì kòfalésè.

¹¹Mì kàdré tà 'o togó wâyi sè, adrészò tòbvo ró ko. Be ró dhi, àmì kì togó kàdré ína àtsì ró adrészò tà 'o Míri dré akódhì ni mårábà tíni.

¹²Mì kàdré lenzélè, adrészò mì bha Gïká véna. Mì kàdré togó tsì, mì dré adrérà'a kizà nya dhi 'á. Mì kàdré àmì kì fe adrélè tà zi Gïká tí landè àko ró.

¹³Mì kàdré àmì kì ngá lanzí móndyá Gïká àdhya adrébhá lemerè ro dhi i dré. Mì kàdré móndí kì ka'ì dòle àmì véna togó dôro sè.

¹⁴Mì kàdré tà taní zi Gïká tí móndyá adrébhá àmì kì mì pfo dhi i dri. Àyíya, mì kàdré tà taní zi àyí nda i dri, mì kòtatrí àyí ko.

¹⁵Mì kàdré lenzélè túmâni móndyá adrébhá lenzélè dhi íbe. Mì kàdré kpà àwó ngo túmâni móndyá adrébhá àwó ngo dhi íbe.

¹⁶Mì kàdré àmì kì adrúpi kì tà kisù, adrészó ngá àlo ró àmì kòfalésè. Mì kàdré drìkàdrì ro ko. Be ró dhi, mì kàdré àmìkya ru su móndí tåko íbe. Mì kàdré kpà àmì kì no tògyabhá ro ko.

¹⁷Mì kàdré tà kònzi logó tà kònzi 'ole àmì rú dhi tí ko. Mì kàdré tà adrébhá dóro móndyá tití i mìlésè dhi kì nda 'ole.

¹⁸Kòkitswá dhi, tà tití mì dré adrélé 'ole dhi i sè dhi, mì kàdré tà kìdríkìdrí likí àmì kòfalé móndyá tití dhi íbe.

¹⁹Áma arúpi má dré lèle tò nì i, dhya àlo kò'o tà kònzi àmì rú dhi, mì kòlogó tà kònzi nda nì vúdrì drá ko. Be ró dhi, mì kòtayí láti Gìká dré adrészó áyi kombà tadhá. Tåko ko, Mírì adré tåá áyi Kúlí na dhi: «Má nì móndí kì tà kònzi kì vúdrì logó àyi dré dhi ma. Má nì tà logó àyi dré tà i dré 'ole dhi i tí dhi ma. »

²⁰Dì, ngóró Gìká nì Kúlí dré adrélé tåle dhi tíni: «Ámì kàribhá kàdré tåbirí íbe dhi, mí kàdré ngá fe akódhi dré nyàle. Akódhi kàdré yí lovó íbe dhi, mí kàdré yí fe akódhi dré mvùle. Tåko ko, mí kàdré 'oá kònini dhi, mí nì kanyò fe akódhi dré ngóró àtsíkèle dàle akódhi dri dhi tíni. »

²¹Dì mí kòtayí mí tà kònzi dré adrélé lavúlé dhi ko. Be ró dhi, mí kàdré mína tà kònzi lavú tà dóro mí dré adrélé 'ole dhi i sè.

Rómàbhá i 13

Àma kì bhàma móndyá àma drìle dhi kì rìnyí zàle dhi

¹Adré lèá dhi, móndí àlo àlo tití dhi i kàdré àyi kì bha móndyá àyi drìle dhi kì rìnyí zàle. Tåko ko, rìnyí adrészó òpì nya dhi angá ína Gìká vélésè. Akódhi bhà kpà móndyá adrébhá òpì nya nda i adrélé ópí ro dhi nì.

²Ásà dhi, dhya ángùdhi adrélépi ligílé ópí i drìle dhi rú dhi, adré ína ligílé tà Gìká dré bhàle nì dhi rú. Dì dhya adrélépi 'oá kònini dhi adré Gìká nì tåbvó tåma asé áyi tåndi dri.

³Tà båti ró dhi, móndyá adrébhá tà dóro 'o dhi i adré ópí àyi drìle dhi kì ro dhi àyi ko. Be ró dhi, móndyá adrébhá tà kònzi 'o dhi i adré àyikya ópí àyi drìle dhi kì ro dhi àyi. Dì mí kàdré ópí mí drìle dhi nì le rôle ko dhi, mí kàdré tà dóro 'o, akódhi kòbhàró àmì tà kuru be dhi bvó.

⁴Tåko ko, akódhi nda Gìká nì àzí 'olepi 'i, kàdréró ámì 'o dóro be dhi bvó. Dì, mí kàdré mína tà kònzi 'o dhi, lè mí kàdré ngá ro. Àngyá ko, ópí nda rìnyí íbe adrészó tà ño móndí i dri. Akódhi Gìká nì àzí 'olepi 'i, kàdréró tà ño dhya adrélépi tà kònzi 'o dhi dri, adrészó Gìká nì kombà tadhá drá be dhi bvó.

⁵Adré dì lèá dhi, mì kàdré àmì kì bha móndyá àmì drìle dhi kì rìnyí zàle. Dì, mí kàdré ngbà 'i 'oá kònini, à kònjoró tà àmì dri ko dhi sè ko. Mì kàdré kókpà 'oá kònini, àmì kì togó kàrokiró àmì ko dhi sè.

⁶Tà nda sè dhi, lè mì kàdré kpà mèdáyì gi be. Tåko ko, móndyá àmì drìle dhi i Gìká nì àzí 'obhá, adrébhá àyi kì fe adrélé àzí nda nì 'o dhi 'i.

⁷Mì kàdré dì dhya ángùdhi nì mìri mì dré adrészó ába dhì nì logó akódhì dré. Mìri nda kàdré mèdáyì gìma nì tà sè dhì, mì kàdré mèdáyì nda nì gi. Kàdré tákisì àzya gìma nì tà sè dhì, mì kàdré tákisì nda nì gi. Kàdré móndí kì ròma nì tà sè dhì, mì kàdré àyi nda kì ro. Kàdré móndí kì lindrì bhàma nì tà sè dhì, mì kàdré àyi nda kì lindrì bha.

Tà àzya tadhálé lèle nì tà dri dhì

⁸Lè mì kàdré dhya àlo nì mìri íbe àmì rú ko, kàdré ngbà 'í mìri adrészó ru le àmì kòfalésè dhì 'i ko dhì. Tàko ko, dhya ángùdhi adrélépi áyi àzya nì le dhì 'o tà tití tátrítrí kúlì dré adrélé tâle à kò'o dhì i dre.

⁹Tòlì tátrítrí kúlì na dhì i adrè tâa dhì: «Mí kò'o múná tà ko, mí kòpfu móndí dràle ko, mí kòkugù ngá ko, ìndì mí kòbhà móndí kì ngá lovó ko. » Dì tòlì nda i tòlì àruka tití dhì íbe dhì i adrè ru kisú tà tòlì àlo kònìdhì dré adrélé tâle dhì nì ta kòdhya: «Mí kàdré ámì àzya nì le ngóró mí dré adrélé ámì tândì nì le dhì tíni. »

¹⁰Dhya adrélépi áyi àzya nì le dhì kitswá ína tà kònzi 'o akódhì rú bwà ko. Dì ásà dhì, dhya adrélépi áyi àzya nì le dhì adrè tà tití tátrítrí kúlì dré adrélé tâle dhì kì 'o kitswálé tití.

Adrema gànzi ró Krísto nì agòma nì tà sè dhì

¹¹Lè mì kàdré tà nda kòdhì kì 'o togó wáyi sè, mì dré lókyá ándrò kònìdhì nì nìle be dhì sè. Lókyá mì dré ngàzo ayí 'ásè dhì kitswá dre. Tàko ko, lókyá mà dré dra lídrì kóná vésè kólyá dhì nì kisúzó dhì atsá ànyi lavúlé lókyá mà dré kidhózó Yésu nì ka'i dhì rúsè dre.

¹²Ngá adrè 'ole wàle, ìndì kitú adrè 'ole apfòle. Adré dì lèá dhì, mà kòtingá àma rúsè tà adrélé 'ole tímivá na dhì i, àdzú ngá ngádra àdhya kì tosózó àma rú kòdhya.

¹³Mà kàdré atsílé ngádra 'ásè ngóró dré kitswálé dhì tíni. Dì, mà kògò adrélé tatsílé gwányá wàyá kì tà 'obe, wá tsibe, ndòtò tà 'obe, tà swà 'obe, lawàbe, ìndì lovó kònzi bhabe móndí i rú dhì ko.

¹⁴Be ró dhì, mì kàsó àmikya Mírì Yésu Krísto àmì rú. Mì kòtayí kpà àmì adrélé kisùá ngalè mì ni lovó kònzi àmì kì rúbhá kya kì 'o ngínì ya dhì ko.

Rómàbhá i 14

Àma kì adrúpi kì tâbvó tâma ko dhì

¹Mì kàdré móndyá adrébhá tà ka'ika'i íbe yàyà dhì kì ka'i. Dì, mì kàdré àmikya àyi nda kì ndri tà i dré adrélé nòle dóro yà, kó ngalè kònzi yà dhì i sè ko.

²Tàko ko, dhya àlo nì tà ka'ika'i sè dhì, adrè ngá tití dhì kì ka'i nyàle. Dì, dhya àzya tà ka'ika'i íbe yàyà dhì adrè ína ngbà 'í ngábí kì ka'i nyàle dhì kòdhya.

³Adré dì lèá dhì, dhya adrélépi ngá tití dhì kì nya nda kàdré dhya adrélépi ngá àruka kì nya ko nda nì ayízè ko. Kókpà kòdhì tíni, dhya adrélépi ngá àruka kì nya ko nda kàdré tà bha dhya adrélépi ngá tití dhì kì nya nda dri ko. Àngyá ko, Gíká ka'i akódhì nda dre.

⁴Dì, mí tá mína àdhi 'i, adrélé móndí àzya ní màrabà ní tàbvó ta ní? Márabà nda kàdré áyi totó áyi tà ka'ika'i na yà, kó ngalè kàdré dhèle yà dhi, tà nda adré akódhi ní tändi ní míri ní no kòdhya. Tà báti ró dhi, akódhi nda ní áyi totó tätä. Tako ko, Míri rinyí íbe kitswázó akódhi ní 'o adrélé áyi totó tätä.

⁵Àruka ní, dhya àlo adré kítú àlo dhi ní no kàdrì kítú àruka kí lavú. Dì, dhya àzya adré ína kítú tití dhi kí no díri. Adré dì lèá dhi, móndí àlo àlo tití dhi i kàdré tà i dré adrélé nôle tà báti ró dhi kí ka'i togó wáyi sè.

⁶Dhya adrélépi kítú àlo dhi ni no kítú kàdrì ro dhi, adré 'óá kònini kitswázó lindrì fe Míri dré. Dhya adrélépi ngá tití dhi kí ka'i nyàle dhi, adré 'óá kònini kitswázó lindrì fe Míri dré. Angyá ko, adré àwoyà ta Gìká dré ngá nda kí tà sè. Dhya adrélépi ngá àruka kí ka'i nyàle ko dhi, adré kpà 'óá kònini kitswázó lindrì fe Míri dré. Adré kpà àwoyà ta Gìká dré ngá i dré adrélé nyàle dhi kí tà sè.

⁷Tako ko, àma àmaka lídrì íbe àma kí tändi i dré ko. Mà adré kpà dràle àma kí tändi i dré ko.

⁸Mà kàdré lídrì íbe dhi, mà adré ába kitswázó lindrì fe Míri dré. Mà kàdré kó dràle dhi, mà adré dràle kitswálé lindrì fe Míri dré. Dì mà kàdré lídrì íbe yà, kó ngalè mà kàdré dràle yà dhi, àma tití dhi i Míri àdhya 'i.

⁹Tà nda kòdhì sè dhi, Krísto drà gò dré adrízó, i kàdréró móndyá tití lídrì ro ìndì dràbhá dre dhi kí Míri ro be dhi bvó.

¹⁰Dì mí ró dhi, mí adré mína ámi adrúpi ní tàbvó ta àdho tà sè? Kó ngalè, mí adré ámi adrúpi ní ayízè àdho tà sè? Tako ko, àma tití mà ní pfo àma kí totó Gìká kandrá, kòtaró àma kí tàbvó be dhi bvó.

¹¹Tako ko, Gìká ní Kúlí adré tàá dhi: «Ma, Míri lídrì ro ní, má adré tàá tà báti ró dhi: Móndyá tití dhi kí àyi kí kórókó tití má kandrá. Móndyá tití dhi kí tàá àyi kí tändi kí ti sè dhi, ma Gìká 'i. »

¹²Dì ásà dhi, àma àlo àlo tití dhi i, mà ní àma kí tändi kí tà ta Gìká kandrá.

Àma kí adrúpi kí 'òma ledhélé ko dhi

¹³Dì ásà dhi, lè mà kògò vélé àma kí adrúpi kí tàbvó ta àma kòfalésè ko. Be ró dhi, mí kònò dóro, mí kò'oró tà àlo kitswálépi àmi kí adrúpi ní 'o dhèle tàkonzi na dhi ko.

¹⁴Ma adrélépi Míri Yésu na ní, má adré ka'íá tâle dhi, ngá àlo kitswá adrélé ndí ró áyi tändi ní tà sè ko. Dì, dhya àlo kàdré ngá àlo dhi ni no ndí ró dhi, ngá nda ína ndí ró akódhi dré báti.

¹⁵Mí kàdré kizà fe ámi adrúpi dré ngá mí dré adrélé nyàle dhi sè dhi, kòdhì mí adré vélé tà 'o lèle sè ko. Lè mí kòkizá ámi adrúpi Krísto dré dràzo ásà nda ní tà ka'ika'i, ngá mí dré adrélé nyàle dhi sè ko.

¹⁶Mí kòfè kpà láti móndí i dré kitswázó ngá mí dré adrélé nôle dóro dhi ní tà ta kònzi dhi ko.

¹⁷Tàko ko, Gìká ni Òpì, tà adrészó ngá nya ìndì ngá mvu dhi 'i ko. Be ró dhi, Gìká ni Òpì nda ína tà adrészó tà gyägya 'o, adrészó tà kìdríkìdrí íbe, adrészó kpà arí Tírí Lolo dré adrélé fèle dhi íbe dhi 'i.

¹⁸Dhya ángùdhi adrélèpi Krísto ni tà 'o kònìnì dhi ni tà ni adré dório Gìká mìlésè, ìndì móndí i mìlésè.

¹⁹Dì ásà dhi, lè mà kàdré láti nda adrészó tà kìdríkìdrí íbe àma kòfalé, adrészó kpà ru timbà àma kì tà ka'ika'i na.

²⁰Mí kòpfo Gìká ni àzí mányàngá ni tà sè ko. Bàti, mányàngá tití dhi i dório lavulé. Dì, mí kàdré ámi adrúpi ni 'o dhèle ngá mí dré adrélé nyàle dhi sè dhi, ngá nda ni nyàma atsá ína tà kònzi ró mí dré.

²¹Dório ni, mí dré ză nyàle yà, vínò mvùle yà, kó ngalè tà àzya 'ole yà dhi ko dhi, tà nda kàdré ámi adrúpi ni 'o dhèle dhi.

²²Dì tà ángùdhi mí dré adrélé ka'ile dhi, mí kàdré tà nda ni likí àmi kòfalé Gìká be. Kólénzé dyha adrélèpi tà bha áyi tändi dri tà í dré ka'ile dhi ni tà sè ko dhi dré!

²³Dì, dyha àlo kàdré ína tà kayí í léna ngá í dré adrélé 'ole nyàle dhi ni tà sè gò, adrészó ngá nda ni nya dhi, Gìká ni tà bha akódhi nda dri. Tàko ko, akódhi adré tà 'o tà ka'ika'i sè ko. Tà bàti ró dhi, tà ángùdhi adrélé 'ole tà ka'ika'i sè ko dhi, takonzi 'i.

Rómàbhá i 15

Tà adrébhá àma kì adrúpi kì togó 'o kini' lé dhi kì 'òma

¹Lè àma adrébhá rìnyi ró àma kì tà ka'ika'i na dhi i, mà kàdré móndyá tà ka'ika'i íbe yàyà dhi kì tà yàyà do àma kì togó na. Mà kàdré tà adrébhá àma kì togó 'o kìnillé dhi kì 'o kòdhya ko.

²Be ró dhi, àma àlo àlo tití dhi i, mà kàdré tà adrébhá àma kì adrúpi kì togó 'o kìnillé dhi kì 'o kòdhya, mà kàdréró àyi kì 'o dório, adrészó àyi kì timbà àyi kì tà ka'ika'i na be dhi bvó.

³Àngyá ko, Krísto ni tändi 'o tá ína tà adrébhá tá áyi togó 'o kìnillé dhi i ko. Ngóró Gìká ni Kúlí dré adrélé tâle dhi tíni: «Làdhá móndí i dré adrélé dhàle mí rú dhi i adhé má dri dre. »⁴Tàko ko, tà tití atú tisile Gìká ni Kúlí na dhi i, à tisile kítswázó àma kì tadhá, ìndì àma kì timbà àma kì tà ka'ika'i na, mà kàdréró togó tsi, adrészó mì bha Gìká véna be dhi bvó.

⁵Gìká nda adré àma kì 'o togó tsi, adrészó àma kì timbà àma kì tà ka'ika'i na dhi nì. Dì akódhi kòfè kpà àmi adrélé ngá àlo ró àmi kòfalésè, ngóró Yésu Krísto dré tadhálé àmi dré dhi tíni,

⁶mì kòkítswáró Gìká, àma kì Mírì Yésu Krísto ni Atá ni rú bha kùle togó àlo sè ìndì kúlí àlo sè be dhi bvó.

Yésu Krísto atsá mìrábà ro móndyá tití dhi i dré

⁷Dì ásà dhì, mì kàdré ru ka'ì àmì kòfalésè, ngóró Krísto nì tändì dré àmì kì ka'ile dhì tíni, kitswázó mìlanzìlanzì fe Gìká dré dhì bvó.

⁸Tàko ko, má adré tàá àmì dré dhì: Krísto atsá Yúdà ànzì kì màrábà ro Gìká nì tà báti nì tà sè, kitswálé tà Gìká dré tá lazilé àyì kì tábhí i dré dhì kì 'o tití,

⁹móndyá súrú twá ro dhì i kòkitswáró kpà Gìká nì rú bha kùle akódhì nì togó dóro sè be dhì bvó. Ngóró Gìká nì Kúlí dré adrélé tâle dhì tíni: «Ásà dhì, má nì ámì rú bha kùle móndyá súrú twá ro dhì i kòfalé, adrészó longó ngo ámì rú sè. »

¹⁰Kúlí nda adré kpà tàá dhì: «Àmì súrú twá ro nì i, mì kàdré lenzélé túmäní móndyá Gìká àdhya íbe wà! »

¹¹Adré kpà tàá dhì: «Àmì tití súrú twá ro nì i, mì kàdré Míri nì rú bha kùle wà!

Àmì móndyá tití nì i, mì kàdré akódhì nì tà bha kuru! »

¹²Èsáyà adré kpà tàá dhì: «Dhya àlo Yésè nì kómvó lésè dhì nì apfò kitswálé òpì nya súrú tití dhì i dri. Móndyá súrú twá ro dhì kì mì bha akódhì véna. »

¹³Gìká adrészó mì bha ásà dhì kòfè kólénzé i gâle tà kìdríkìdrì be àmì léna bì, mì dré adrélé akódhì nì ka'ì dhì sè, mì kàdréró vélé mì bha akódhì véna lavúlé Tírí Lólo nì rinyí sè be dhì bvó!

Pólò nì àzí móndyá súrú twá ro dhì i véna dhì

¹⁴Áma adrúpi i, áma tändì má adré ka'ìá tâle dhì, mì ga àmikya tà dóro sè bì, tà nìnì sè bì, ìndì mì kitswá ru kodzó àmì kòfalésè bwà.

¹⁵Dì, tágba kònìnì dhì, má tisì tà àruka kòdhì i àmì dré tirì àko, kitswázó tà nda kì 'o agálé àmì léna dhì bvó. Tàko ko, Gìká nì togó tanì bhàle má rú dhì sè dhì,

¹⁶bhà ma adrélé Yésu Krísto nì àzí 'olepi ró móndyá súrú twá ro dhì i véna. Má adré dì tà 'o kòwánà àdhya tíni, adrészó Gìká ni Rúbí Tani longó, móndyá súrú twá ro nda i kàdréró ngá fèle mòbòmà ro kitswálépi Gìká mìlésè, Tírí Lólo dré bhàle adrélé lólo akódhì dré dhì i tíni.

¹⁷Dì ásà dhì, má adré áma drì bha kuru Yésu Krísto na, àzí má dré adrélé 'ole Gìká dré nda nì tà sè.

¹⁸Dì, má kitswá mána tà àzya ta ko, kàdré ngbà 'í tà Krísto dré 'ole má sè móndyá súrú twá ro dhì kì adrìzo Gìká nì kúlí ka'ì 'ole dhì 'i ko dhì. 'O tà nda kònìnì kúlí i dré afèle má dré tâle dhì i sè, tà i dré afèle má dré 'ole dhì i sè,

¹⁹tà twátwa líndríga ró dhì kì rinyí sè, ìndì Tírí Lólo nì rinyí sè. Dì má longó Krísto nì Rúbí Tani nda kidhólé Yèrusalémà na tsàle byá bvò Ìliríkò àdhya na.

²⁰Angyá ko, ma tá ngbú lovó íbe tò lìzo Rúbí Tani nda nì longó àrà Krísto nì tà yìzo rè ko dhì i 'ásè, má kòtobhàró ngá dzópá dhya àzya dré bhàle dhì dri ko.

²¹Ngóró Gìká nì Kúlí dré adrélé tâle dhì tíni: «Móndyá akódhì nì tà longozó àyì dré rè ko dhì kì akódhì nì no. Móndyá akódhì nì tà yibhá rè ko dhì kì akódhì nì tà àndu ni. »

Pólò lè tsàle Rómà na

²²Vésè be bĩ, àzí nda kikí tá láti má dré lìzo àmí kí no ko dhi nì.

²³Dì, nyànomvá dhi, má 'o àzí mána bvò kònì i 'ásè dhi akílé tití dre. Kóná bĩ, ma tá lovó íbe tò lìzo àmí kí no.

²⁴Dì má adré mì bha àmí kí nòzo má dré lavúrà'a lìle bvò Èsèpányà àdhya na dhi 'á, mà kòkítswáró lenzélé túmäní àmí íbe lókyá tsà sè. Àmvolásà dhi, mì ni kitswá áma ledé má dré lìzo Èsèpányà na.

²⁵Dì, nyànomvá dhi, má adré mána lìle Yèrúsalémà na, kitswálé ngá adzí móndyá lolo Gìká àdhya i dré.

²⁶Tàko ko, móndyá ka'ibhá Mákèdònýà na ìndì Àkáyà na dhi i nò tá doro ni, i dré ngá lokolé fèle lemerèbhá móndyá ka'ibhá Yèrúsalémà na dhi i kòfalé dhi i dré dhi.

²⁷Àyi nda i kisù tá tà nda 'ole dhi àyi. Dì, tà batí ró dhi, àyi tá móndyá nda kí mìri íbe. Tàko ko, móndyá súrú twá ro dhi i kòkisú tà taní Tírí Lolo dré fèle Yúdà ànzì i dré dhi túmäní àyi íbe dhi, àyi mìri Yúdà ànzì nda kya íbe. Adré dì lèá dhi, móndyá súrú twá ro nda i kàdré àyi kí ngá lanzí Yúdà ànzì nda i dré.

²⁸Dì má kàdzí ngá fèle nda i àyi dré gò, àzí nda ni 'òzo akílé tití dre dhi, má ni láti do lavúzó àmí tasè gò, lìle Èsèpányà na.

²⁹Má ni tàle dhi, lókyá má dré dra tsàzo àmí véna dhi sè dhi, má ni tsa Krísto ni tà taní íbe bĩ dhi be.

³⁰Áma adrúpi i, má adré àmí ki kodzó àma kí Mírì Yésu Krísto ni rú sè, ìndì lèle Tírí Lolo àdhya sè, mì kàdréró tà zi Gìká tí má dré, adrészó àdzú bhu túmäní má be.

³¹Mì kàdré tà zi tíá, kàpáró ma móndyá ka'ibhá ko Yùdáyà na dhi i drígásè be dhi bvó. Mì kàdré kpà tà zi, móndyá ka'ibhá Yèrúsalémà na dhi i kòka'író tà má dré adrélé 'ole àyi dré dhi be dhi bvó.

³²Dì Gìká kòlè dhi, má ni tsa àmí véna arí be bĩ gò, mà dré kitswázó lovólé tsà túmäní àmí íbe.

³³Gìká adrélépi tà kìdríkìdrí fe dhi kàdré túmäní àmí íbe tití! Kàdré kònìni.

Rómàbhá i 16

Pólò ni módo fèma móndi¹ twátwa i dré dhi

¹Má lè àma ki amvúpi Fòwíbè ni tà tadhálé àmí dré. Akódhi nda mìrábà Èkèlézyà Kèkùréyà na dhi àdhya i.

²Má adré lèá dhi, mì kòka'i akódhi dòle doro Mírì Yésu ni rú sè, ngóró dré kitswálé móndyá lolo Gìká àdhya i sè dhi tini. Mì kòledé kpà akódhi tà ángùdhi dré adrészó lovó ni íbe dhi sè be. Àngyá ko, akódhi ni tändi ledé móndi bĩ dhi i dre. Ledé kókpà ma 'i.

³Mì kòfè módo Pìrisíkà i dré Àkílà be. Àyi nda i áma àzíamu Yésu Krísto na dhi 'i.

⁴Ì ka'ì tá àyi kí tändì kí lídrì fèle adrélé ànyì dràdrà mìle, kítswázó áma tiidri dhi bvó. Dí má adré ngbà 'í àwoyà fe àyi dré ma kalóma ko. Èkélézyà tití móndyá súrú twá ro dhi kya ì adré kókpà àwoyà fe àyi dré.

⁵Mì kòfè kpà mòdo móndyá Èkélézyà àdhya adrébhá ru kímó àyi kí dzó na dhi ì dré be. Mì kòfè mòdo áma arúpi Èpènétò, má dré lèle tò dhi dré be. Akódhi nda tá dhya Krísto ní ka'ilepi drìdrì bvò Àsíyà àdhya na dhi 'í.

⁶Mì kòfè mòdo Màríyà, àzí 'olepi landèzo àmì dré dhi dré be.

⁷Mì kòfè mòdo Àndròníkò ì dré Yùnýà be be. Àyi nda ì áma aró, mà dré tá adrészó túmáni àyi íbe bádzó na dhi 'í. Àyi kpà móndí kàdrì àpóstolò ì kòfalé dhi 'í. Ì ka'ì tá kpà Krísto drìdrì má kandrá.

⁸Mì kòfè mòdo áma arúpi Àpìlìyátò, má dré lèle Míri na dhi dré be.

⁹Mì kòfè mòdo Ùrùbánò, àma kí àzíàmu Krísto na dhi dré be. Mì kòfè mòdo áma arúpi Sàtákísà, má dré lèle tò dhi dré be.

¹⁰Mì kòfè mòdo Àpélè, áyi tà ka'ika'i Krísto na dhi ní tadhálépi ngádra 'á dhi dré be. Mì kòfè mòdo móndyá Àristòbúlò ní dzó na dhi ì dré be.

¹¹Mì kòfè mòdo áma aró Èròdíyò dré be. Mì kòfè mòdo móndyá Míri Yésu ní ka'ibhá Nàrukísò ní dzó na dhi ì dré be.

¹²Mì kòfè mòdo Trifayínà ì dré Trifósà be be. Àyi nda ì tòkó adrébhá Míri ní àzí 'o landèzo dhi 'í. Mì kòfè mòdo áma arúpi Pérusì, má dré lèle tò dhi dré. Akódhi nda tòkó àzya adrélépi Míri ní àzí 'o togó wäyi sè dhi 'í.

¹³Mì kòfè mòdo Rúfù, Míri dré zìle dhi dré, ìndì andre ní adrélépi kókpà áma andre ró dhi dré be.

¹⁴Mì kòfè mòdo Àsikùrítò dré, Fèlègónà dré, Èrúmè dré, Pàtróbà dré, Èrúmà dré, ìndì àma kí adrúpi adrébhá àyi íbe dhi ì dré be.

¹⁵Mì kòfè mòdo Filòlögò dré, Yùlýà dré, Nèréwù dré amvúpi ní be, Òlípà dré, túmáni móndyá tití Gíká àdhya adrébhá àyi íbe dhi íbe.

¹⁶Mì kòfè mòdo adrészó ru kamú àmì kòfalésè lèle sè. Èkélézyà tití Krísto àdhya ì fè kókpà mòdo àmì dré.

Tà tâle kùdù ro móndyá ka'ibhá kí kodzozó dhi ì

¹⁷Áma adrúpi ì, má adré àmì kí kodzó, mì kàdréró àmì kí likí móndyá adrébhá àmì kí 'o ru lanzí àmì kòfalésè dhi kí tà sè. Àyi nda ì adré tà twá tadhá tà mì dré kisulé dhi ì rúsè, adrészó móndí àruka kí 'o ledhélé tàkonzi na. Mì kàdré adrélé twá àyi rúsè.

¹⁸Tako ko, móndyá lású be kònìnì nda ì adré àma kí Míri Yésu Krísto ní tà 'o akódhi ní màrábà ì tini ko. Be ró dhi, àyi àyikya màrábà àyi kí tändì kí lovó kya 'í. Ì adrél kúlì kìníkìnì kí ta túrúpfú kúlì íbe, adrészó móndí tà nibhá ko dhi kí lítí.

¹⁹Dì, kàdré ína àmì kì tà sè dhì, móndyá tití dhì ì yi tàle dhì, mì adré Mírì nì kúlì ka'ì 'ole ngínì ya dhì 'í. Má adré dì lenzélé àmì kì tà sè. Dì, má adré lèá dhì, mì kàdré tògya ró tà dóro kì tà sè, adrélé kpà tà àko àmì rú tà kònzi kì tà sè.

²⁰Tayí ngbà 'í lókyá tsà, Giká adrélépi tà kìdríkìdrí fe dhì dré àmì kì fèzo Sàtánà nì ató àmì kì pá zàle.

Àma kì Mírì Yésu kòbhà áyi togó taní àmì rú!

²¹Áma àzíàmu Tìmòtéyò fè mòdo àmì dré. Lùkíyò, Yàsónà, ìndì Sòsìpátrò adrébhá áma aró ro dhì, ì fè kpà mòdo àmì dré.

²²Ma, Tèrùtíyò wárágà kònìdhì nì tisilepi nì, má adré mòdo fe àmì dré Mírì nì rú sè.

²³Gáyò, àma kì ka'ilepi dòle áyi dzó na móndyá tití Èkèlézyà àdhya íbe dhì, fè mòdo àmì dré. Èrástò bhàandre kònìdhì nì làfa likílépi dhì, túmäní àma kì adrúpi Kùwàrútò be dhì ì fè kpà mòdo àmì dré.

[²⁴]

Giká nì rú bhàma kùle kùdù ro dhì

²⁵Rúku kàdré Giká dré! Akódhì rìnyí íbe kitswázó àmì kì timbà àmì kì tà ka'ika'ì na, Yésu Krísto nì Rúbí Taní má dré adrélé longólé dhì sè, ngóró Giká dré tà nì zùle kínolésè dhì nì tadhálé dhì tíni.

²⁶Nyànomvá dhì, Giká adrélépi kóná vésè kólyá nda 'o tà nda apfòle ngádra 'á tà pròfétà ì dré tisile áyi Kúlì na dhì ì sè, kitswálé móndí súrú tití ì lésè dhì ì kòka'iró akódhì, adrészó kpà akódhì nì kúlì ka'ì 'ole be dhì bvó.

²⁷Mìlanzìlanzì kàdré Giká àlo kwákwá tògya ró nda dré Yésu Krísto sè kóná vésè kólyá! Kàdré kònìnì.

1 Kòrítòbhá i

1 Kòrítòbhá i 1

Pólò ni mòdo fèma

¹Ma, Pólò, Giká dré azilé adrélé Yésu Krísto ni àpóstolò ro ngóró i dré lèle dhi tini dhi, túmání àma ki adrúpi Sosèténè be dhi,

²mà adré wárágà kònìdhi ni tisi Èkèlézyà Giká àdhya Kòrítò na dhi dré, àmi Giká dré bhale twá adrélé móndyá lolo ína i ró Yésu Krísto na dhi i dré. Giká azí àmi adrélé lolo túmání móndyá tití àrà tití i 'ásè adrébhá àma ki Míri Yésu Krísto ni zi àyi ki Míri ro dhi ibe. Bati, akodhi nda Míri àyikya 'i, ìndi àmakya 'i.

³Giká àma ki Atá i Míri Yésu Krísto be dhi i kòbhà àyi ki togó taní àmi rú, ìndi i kofè tà kìdríkìdrí àmi dré!

Tà taní móndyá ka'ibhá dhi i` dré kisúlé Krísto na dhi i

⁴Má adré nbgú adrélé àwoyà ta áma Giká dré àmi ki tà sè, dré áyi togó taní bhale àmi rú Yésu Krísto na dhi sè.

⁵Tako ko, mi dré adrélé Yésu Krísto na dhi sè dhi, Giká 'o àmi gale tà taní tití dhi i sè, àmi ki kúlì tama na ìndi àmi ki tà nima na.

⁶O tà nda àmi léna kònini tadházóá dhi, Krísto ni tà mà dré longolé gò mi dré ka'izoá dhi tà bati 'i dhi.

⁷Ásà dhi, tà taní Giká dré adrélé fèle dhi ki àlo pi àmi ko, mi dré adrérà'a àma ki Míri Yésu Krísto ni agòma letè lovó sè dhi 'á.

⁸Akodhi ni àmi ki timbà àmi ki tà ka'ika'i na tsale lókyá kùdù sè nì, mi kàdréró tà àko àmi rú kítú àma ki Míri Yésu Krísto dré dra agòzo dhi tú.

⁹Giká àmi ki azilépi ru amú áyi Mvá, àma ki Míri Yésu Krísto be nda, kitswá adrélé ka'ile togó wáyi sè.

Tà móndyá ka'ibhá dhi i` dré adrézó ru lanzi` ásà dhi i

¹⁰Áma adrúpi i, má adré àmi ki kodzó àma ki Míri Yésu Krísto ni rú sè: Àmi tití, mi kàdré ru yi àmi kofalésè, mi kàdréró ru lanzi àmi kofalésè ko, be ró dhi, mi kàdréró ngá àlo ró kitswálé tití, tà mi dré adrélé kisule dhi i sè, ìndi tà mi dré adrélé lèle 'ole dhi i sè.

¹¹Áma adrúpi i, má yi móndi àruka Kòlówè ni dzó lésè dhi i tí dhi, lawà àmi kofalé be dhi 'í.

¹²Kòdhi ibe dhi, má adré yià tali dhi, àmi kofalé dhi, dhya àlo adré taa dhi: «Ma Pólò ni lebèleipi 'i. » Dhya àzya adré kó taa dhi: «Ma mána Apólò ni lebèleipi 'i. » Àzya ni: «Ma mána Péteró ni lebèleipi 'i. » Àzya ni: «Ma mána Krísto ni lebèleipi 'i. »

¹³Mi adré kisùá dhi, à ni kitswá tsì Krísto ni lanzi bwà? À tidí tá Pólò dràle fa kipakipa dri àmi ki tà sè dhi kòdhyá? À fè tá batísimò àmi dré Pólò ni rú sè?

¹⁴Má adré mána àwoyà ta Gìká dré, má dré bátísimò fèlè dhya àlo àmì kòfalé dhi dré ko dhi sè. Má fè ngbà 'í Kùrísipò i dré Gáyò be.

¹⁵Dì dhya àlo kitswá tàá dhi, à fè bátísimò àmì dré áma rú sè dhi ko.

¹⁶(Bàti, má fè kpà bátísimò móndyá Sètèfánà ní dzó lésè dhi i dré. Dì, má ní má fè tá bátísimò dhya àzya dré 'í káyà dhi ko.)

¹⁷Tàko ko, Krísto mù ma kitswálé bátísimò fe móndí i dré ko. Be ró dhi, mù ma kitswálé Rúbí Tani longó móndí i dré dhi bvó. Dì, má adré mána Rúbí Tani nda ní longó kúlí angábhá móndí kí tògyá lésè dhi i sè ko, Krísto ní dràma fa kipakipa dri dhi kàtsáró tà rinyí àko dhi ró ko.

Yésu Krísto, rinyí i` ndi` tògyá Gìká àdhyá 'í

¹⁸Tàko ko, Krísto ni fa kipakipa nda ni tà adrélé longolé dhi sù ngóró tà azaaza tíni móndyá adrébhá lile dràdrà kisú dhi i dré. Di, àma adrébhá lile lídrì kisú dhi i dré dhi, tà nda ína rinyí Gìká àdhyá 'í.

¹⁹Tàko ko, Gìká ní Kúlí adré tàá dhi: «Má ní tògyabhá kí tògyá kízá. Má ní móndyá tà nibhá dhi kí tà nínì 'o atsálé tà tàko ró. »

²⁰Dì tògyabhá i ángwà? Móndyá tà ndabhá nile dhi i ángwà? Tògyabhá adrébhá tà kayí àyi kòfalésè lókyá ándró kòndi sè dhi i ángwà? Gìká tadhá ngádra 'á dhi, tògyá bvò kòndi àdhyá tà azaaza 'í dhi!

²¹Tàko ko, akodhi ni tògyá sè dhi, tayí tá i móndyá bvò kòndi àdhyá i dré kitswálé nile àyi kí tändi kí tògyá sè bwà dhi ko. Be ró dhi, nò ína dóro ni, i dré adrélé móndyá adrébhá áyi ka'i dhi kí tindrí, tà sùlepi tà azaaza tíni adrélé longolé dhi sè dhi.

²²Tàko ko, Yúdà ànzi i adré tà líndríga ró dhi kí zi nòle dhi kòdhya. Gírikì i adré àyikya tògyá nda nile dhi kòdhya.

²³Dì, àma ró dhi, mà adré àmakya Krísto tidilé fa kipakipa dri dhi ní tà longó kòdhya. Tà nda kòdhì tà adrélépi Yúdà ànzi kí 'o ledhélé dhi 'í, ìndì tà azaaza móndyá surú twá ro dhi i dré dhi 'í.

²⁴Dì, móndyá Yúdà ànzi ró ìndì surú twá ro Gìká dré azilé dhi i dré dhi, Krísto nda rinyí Gìká àdhyá 'í, ìndì tògyá Gìká àdhyá 'í.

²⁵Tàko ko, Gìká ní tà sùlepi tà azaaza tíni dhi ína tògya ró móndí kí tògyá lavú. Kòdhì i be dhi, Gìká ní tà sùlepi tà yàyà tíni dhi ína rinyi ró móndí kí rinyí lavú.

²⁶Àma adrúpi i, mì kisù rè ngalè àmì tá móndí ngíni ya dhi ká, lókyá Gìká dré tá àmì kí azírà'a dhi. Àmì kòfalé dhi, móndí bì dhi i tá tògyabhá 'í ko móndí i milésè dhi. Ami kí àruka bì dhi i tá móndí kàdrìkàdrì 'í ko. Ami kí àruka bì dhi i tá móndí angábhá ópí kí surú lésè dhi 'í ko.

²⁷Dì, Gìká kipè ína móndyá móndyá bvò àdhyá i dré adrélé nòle azaaza ró dhi i kòdhya, kitswázó kanyò fe tògyabhá i dré dhi bvó. Kipè móndyá móndyá bvò àdhyá i dré adrélé nòle yàyà dhi i kòdhya, kitswázó kanyò fe móndyá rinyi ró dhi i dré dhi bvó.

²⁸Kipè móndyá móndyá bvò àdhya i dré adrélé nôle tà tåko ró, adrélé kpà zèle zèzè dhi i kòdhya, kitswázó tà kàdrì bvò àdhya kí kizá,

²⁹dhya àlo kòkitswáró áyi afà Gìká kandrá ko dhi bvó.

³⁰Dì Gìká 'o àmì ru amú Yésu Krísto be dhi nì. 'O kpà Krísto nda adrélé àma dré tògyá angálépi i vélésè dhi 'i. Tåko ko, akodhì nda dhya àma kí bhàlepi gyägya ìndì lolo Gìká kandrá dhi 'i, ìndì dhya àma kí apálépi tåkonzi lésè dhi 'i.

³¹Ásà dhi, ngóró Gìká ni Kúlí dré adrélé tåle dhi tíni: «Lè dhya adrélépi áyi afà dhi kàdré áyi afà tà Míri dré 'ole dhi kí tà sè. »

1 Kòritòbhá i 2

Krísto tidilé fa kipakipa dri dhi ni tà longoma

¹Áma adrúpi i, lókyá má dré tsàzo Gìká ni tà lùzu ró dhi ni longó àmì dré dhi sè dhi, má longó tá tà nda kúlí kìníkìnì i sè ko, ìndì tògyakúlí i sè ko.

²Tåko ko, má lè tá tà àzya 'ole nile àmì kòfalé ko, kàdré ngbà 'í Yésu Krísto, dhya tidilé fa kipakipa dri dhi ni tà 'i ko dhi.

³Ásà dhi, má dré tá adrérà'a àmì kòfalé dhi 'á dhi, ma tá móndí tà íbe yàyà, adrélépi tiri ró adrélé lyàle lyàlyà dhi 'i.

⁴Tà má dré longolé àmì dré nda, má longó tá tògyakúlí kitswázó àmì kí togó asé dhi i sè ko. Be ró dhi, má longó mána tà nda rinyí Tíri Lólo dré tadhálé dhi sè,

⁵àmì kí tà ka'ika'i kàdréró áyi totó tògyá móndí kya dri ko, be ró dhi, kàdréró áyi totó rinyí Gìká àdhya dri.

Tògyá Gìká àdhya

⁶Dì, tágba dré adrészó kònini dhi, mà adré àmakya tògyá àlo dhi ni tadhá móndyá li'wábhá àyi kí tà ka'ika'i na dhi i kòfalé. Dì, tògyá nda ína tògyá bvò kòndi àdhya 'i ko, ìndì tògyá ópí bvò kòndi àdhya àyi kí tà dré adrészó akilé dhi kya 'i ko.

⁷Be ró dhi, mà adré àmakya Gìká ni tògyá dré zùle zùzù kínó lésè dhi ni tadhá kòdhya. Gìká bhà tá tògyá nda drìdrì bvò ni bhàma kandrá, mà kòkisúró mìlanzìlanzi ásà.

⁸Ópí bvò kòndi àdhya i ni àyikya tògyá nda ko. Kònò i kònì tá be dhi, i kitswá tá àma kí Míri mìlanzìlanzi ro dhi ni tidí dràle fa kipakipa dri dhi ko.

⁹Dì, ngóró tisiile Gìká ni Kúlí na dhi tíni: «Tà móndí kí mì dré nôle rè ko, àyi kí bíbhálé dré yile rè ko, i dré kpà kisùle rè ko dhi, Gìká bhà drìdrì zùle móndyá adrébhá áyi le dhi i dré. »

¹⁰Dì, Gìká tadhá ína tà lùzu ró nda àma dré Tíri Lólo ni rinyí sè dre. Tåko ko, Tíri nda adré tà tití dhi kí tabhì, adrészó ndìndì tà Gìká dré zùle zùzù dhi kí ni.

¹¹Àngyá ko, móndí i kòfalé dhi, àdhi nì tà dhya àlo dré adrélé kisùle i léna dhi nì, kàdré ngbà 'í dhya nda ni togó 'i ko dhi? Kókpà kòdhí tíni, dhya àlo nì tà Giká dré adrélé kisùle dhi i ko. Ngbà 'í Giká ni Tíri nì nì.

¹²Àma ró dhi, mà kisú tíri bvò kòndi àdhya kòdhya ko. Be ró dhi, mà kisú àmakya Tíri angálépi Giká vélésè dhi kòdhya, mà kòkitswáró tà taní Giká dré afèle àma dré áyi togó taní sè dhi kì ni be dhi bvó.

¹³Mà adré tà nda kòdhí kì ta kòdhya. Di, mà adré tàá kúlí móndí kì tògyá dré adrélé tadhálé dhi i sè ko. Be ró dhi, mà adré àmakya tàá kúlí Tíri dré adrélé tadhálé dhi i sè. Mà adré di tà Tíri àdhya kì ta kúlí Tíri àdhya i sè.

¹⁴Dhya Giká ni Tíri àko dhi kitswá ína tà adrébhá angálé Tíri nda vélésè dhi kì ka'i bwà ko. Tako ko, akódhí mìlésè dhi, tà nda i tà azaaza 'i. Kitswá kpà tà nda kì àndu ni bwà ko. Àngyá ko, à kitswá ngbà 'í tà nda kì àndu ni lanzílé Tíri sè bwà.

¹⁵Dhya Giká ni Tíri íbe dhi adré tà tití dhi kì bvó ni lanzílé. Di, dhya àzya kitswá ína akódhí nda ni tàbvó ni tàle bwà ko.

¹⁶Tako ko, «Àdhi nì tà Míri dré adrélé kisùle dhi nì?

Àdhi ni kitswá akódhí ni drì ta nì? » Di, àma ró dhi, àma àmakya Krísto ni tà kisùkisù íbe àma léna.

1 Kòrítòbhá i 3

Màrábà Giká àdhya i

¹Áma adrúpi i, mà dré tá adrérà'a àmì íbe dhi 'á dhi, mà kitswá tá tà ta àmì dré ngóró móndí li'wábhá àyi kì tà ka'ika'i na dhi i dré dhi tíni ko. Má tà tá di tà àmì dré ngóró móndí bvò àdhya i dré dhi tíni, ìndi móndí adrébhá ànzimvá ro Krísto ni ka'ima na dhi i dré dhi tíni.

²Má fè tá àmì dré bàsú kòdhya, mányàngá tòmbátòmba dhi 'i ko. Tako ko, mì kitswá tà àmìkyá ngá nda ni mvo bwà ko. Tà báti ró dhi, mì kitswá dhu rè mvòá bwà ko.

³Àmì dhu rè móndí bvò àdhya i tíni. Tako ko, mì adré àmìkyá lovó kònzi bha, adrészó kpà lawàle àmì kòfalésè. Di àmì tsì móndí bvò àdhya 'i ko? Mì adré tsì tà 'o móndí kya tíni ko?

⁴Àngyá ko, àmì kì àlo kàdré tàá dhi «Ma Pólò ni lebèleipi 'i, » ìndi àzya ni kó «Ma Apólò ni lebèleipi 'i» dhi, kòdhí mì adré tsì tà 'o móndí kya tíni ko?

⁵Apólò ína àdhi 'i? Pólò di kó ína àdhi 'i? Àma ngbà 'í Giká ni màrábà mì dré Yésu ni ka'izo àyi kì kúlí sè dhi 'i. Àma àlo àlo tití dhi i, mà 'o àzí Míri dré bhàle àma drígá dhi kòdhya.

⁶Má rì tá kórì gò, Apólò dré yì dàzo driá. Di, Giká 'o ína kórì nda mbàle dhi nì.

⁷Ásà dhi, dhya adrélépi kórì rì dhi, ìndi dhya adrélépi yì da dhi, móndí kàdrì 'i ko. Dhya kàdrì ngbà 'í Giká adrélépi kórì 'o mbàle dhi 'i.

⁸Dhya adrélépi kórì rì dhi i dhya adrélépi yí da dhi be dhi kí àzí àlo. Di àyi àlo àlo tití dhi kí làgí kisú àyi kí tändi kí àzí i dré 'ole dhi tí.

⁹Tàko ko, àma Giká ni àzíàmu 'i. Àmi àmikya Giká ni amvú 'i. Àmi kókpà Giká ni dzó adrélé sile dhi 'i.

¹⁰Giká ni togó taní bhale má rú dhi sè dhi, má bhà dzó ni pá ngóró dzó silepi tògyá sè dhi tini gó, móndí àruka i dré adrézó ngá tobhà driá. Di, adré lèá dhi, àyi àlo àlo tití dhi i kònò doro ngalè i adré tobhàá ngíni ya dhi.

¹¹Tàko ko, dhya àlo kitswá dzópá àzya bha dzópá bhale dre dhi rúsè bwà ko. Dzópá bhale nda, Yésu Krísto 'i.

¹²Dzópá nda dri dhi, móndí àruka kí ngá tobhà óró sè yà, àrezá sè yà, kírà làgí kyàkyà dhi i sè yà, fa sè yà, kòzó sè yà, kó ngalè kayísá sè yà dhi.

¹³Di à ni àyi àlo àlo tití nda kí àzí i ngíni ya dhi ni no ngádra 'á kítú tàbvó tazo dhi tú. Tàko ko, Giká ni àyi àlo àlo tití dhi kí àzí kí tabhì àtsí sè, tadházóá dhi, àzí nda i ngalè ngíni ya dhi.

¹⁴Dhya àlo ni àzí kàdré áyi totó tätä dhi, akódhi nda ni làgí kisú àzí nda sè.

¹⁵Di, dhya àzya ni àzí kòve àtsí sè vevè dhi, akódhi nda kitswá ína làgí kisú ko. Akódhi ni tändi ni adrí, di kàdrí gba yà dhi, a ni su ngóró móndí akpólépi àtsí misè dhi tini.

¹⁶Mì ni ko tâle dhi, àmi Giká ni tépelò 'i, ìndì Giká ni Tirí adré adrélé àmi léna dhi?

¹⁷Dhya àlo kòpfu Giká ni tépelò dhi, Giká ni kókpà akódhi nda ni pfu dràle. Tàko ko, Giká ni tépelò ína lolo, ìndì àmi akódhi ni tépelò nda 'i.

¹⁸Mì kàdré àmi kí tändi kí lití ko. Dhya àlo àmi kòfalé dhi kàdré kisùá dhi, i tògyá líyí 'i tògyá bvò kòndi àdhya sè dhi, lè akódhi nda kàtsá móndí azaaza ró, kàtsáró tògyá líyí ro bâti.

¹⁹Tàko ko, tògyá bvò kòndi àdhya tà azaaza 'i Giká mìlésè. Ngóró Giká ni Kúlí dré adrélé tâle dhi tini: «Akódhi adré tògyabhá kí 'o la'ile àyi kí tändi kí túrúpfú tà sile.

» ²⁰Adré kpà tàá dhi: «Míri ni tâle dhi, tà tògyabhá i dré adrélé kisùle dhi i tà tâko 'i dhi be. » ²¹Adré di lèá dhi, mì kògò adrélé àmi kí afà móndí kí tà sè ko! Tàko ko, tà tití dhi i àmikya 'i.

²²Kàdré Pólò 'i yà, Ápólò 'i yà, Pétéró 'i yà, bvò kònìdhí 'i yà, lídrì 'i yà, dràdrà 'i yà, lókyá ándrò kònìdhí 'i yà, kó ngalè lókyá adrélépi alìle dhi 'i yà dhi, tà tití dhi i àmikya 'i.

²³Di àmi àmikya Krísto àdhya 'i, ìndì Krísto Giká àdhya 'i.

1 Kòritòbhá i 4

Krísto ni àpóstolò i

¹Ásà dhi, mì kàdré àma kí no ngóró Krísto ní àzí 'obhá i ró, ìndì dhya Gíká ní tà lùzu ró dhi kí bhàzo àyi drígá dhi i ró.

²Dì adré lèá dhi, dhya àzí bhàzo drígá dhi kàdré móndí áyi mírì dré kítswálé ka'ile togó wáyi sè dhi 'i.

³Dì, mì kàdré àmikya áma tábvó ta yà, kó ngalè tábvó tálépi bvò kòndí àdhya kàdré táká ní yà dhi, tà nda tà tákó 'i má mìlésé. Áma tándí má adré ndìndí áma tábvó ta ma ko.

⁴Áma togó adré áma arókì tà àlo sè ko. Dì, kòdhi adré tadhá dhi, ma gyágya Gíká kandrá dhi ko. Dhya adrélépi áma tábvó ta dhi ngbà 'í Mírì 'i kalóma.

⁵Ásà dhi, lè mì kàdré dhya àlo ní tábvó ta drídri lókyá Gíká dré bhàle dhi kandrá ko. Mì kàdré Mírì Yésu ni agòma letè. Akódhi nda ní tà zùle tímivá na dhi kí 'o apfòle ngádra 'á gò, tà móndí i dré lèle 'ole àyi kí togó na dhi kí tadházó. Dì móndí àlo àlo tití dhi kí rúku kítswálépi àyi sè dhi ní kisú Gíká véna.

⁶Áma adrúpi i, má tadhá tà nda kòdhi i àmí dré àma kí tándí i rú Àpólò be, mì kònìró lìle vwàvvà ro tà tísile dhi i rúsè ko, mì kàdréró kpà dríkàdrí ro adrészó móndí kí no twátwá dhi ko.

⁷Mí tá mína àdhi 'i, adrélé ámí tándí ní no twá móndí àruka i rúsè ní? Tà dóro tití mí dré adrészó ába dhi i kòfalé dhi, tà àlo mí dré kisúlé ko dhi be? Dì mí kòkisú tà nda i 'í dhi, mí adré dì ámí afà ngóró mí kisú tá tà nda i ko na tímí àdho tà sè?

⁸Mì adré àmikya kisúá dhi, mì kisú tà tití mì dré tá adrészó lovó ní íbe dhi i dre? Mì adré kisúá dhi, mì atsá ngábhá i ró dre? Mì atsá ópí i ró, adrélé opí nya àma àko dhi dre? Má mìlésé dhi, dóro ní tá mì dré atsálé ópí i ró báti dhi, mà kòkisú tá opí nya túmání àmí íbe ká.

⁹Tákó ko, má mìlésé dhi, sù ngóró Gíká bhà tá àma adrébhá àpóstolò ro dhi i kùdù ro, ngóró móndí rùle àdzú na, tà bhàzo àyi dri kítswálé dràdrà sè gò, adrészó àyi kí dri lìzo àyi kí tupfú todràle móndyá tití i mi dhi i tímí. Áma ngóró móndí wàyá bhàle móndyá tití bvò àdhya i kandrá ángéló íbe, i dré adrélé nòle dhi i tímí.

¹⁰À adré àma kí no móndí azaaza i ró Krísto ní tà sè gò, adrészó àmí kí no tògyabhá i ró Krísto na. Áma móndí tà íbe yàyà dhi 'i, dì, àmí àmikya móndí rinyi ró dhi 'i. À adré àma kí ayízè gò, adrészó àmí kí lindrí bha.

¹¹Atsálé ándrò kònìdhí dhi, àma tábirí íbe, yílovó íbe, ìndì kítá àko. À adré àma kí mì pfo gò, mà dré adrészó tatsílé àrà ndabe.

¹²Mà adré àzí 'o landèzo àma kí tándí kí drígá sè. À kàdré àma kí lodhá dhi, mà adré àmikya tà taní zi Gíká tí móndí i dri. À kàdré àma kí mì pfo dhi, mà adré àmikya tà nda ní mvo.

¹³À kàdré àma kí rú ta kònzi dhi, mà adré àmikya kúlí yàyà logó kòdhya. Atsálé nyànomvá kònìdhí dhi, à adré àma kí no kòròsò tímí, ngá àñwá adrélé bhèle mbì na dhi tímí.

¹⁴Má adré tà nda kòdhì kí tísì kitswázó kanyò fe àmì dré ko. Be ró dhi, má adré mána tisiá kitswázó àmì kí kodzó, ngóró áma ànzì má dré lèle tò dhi i tíni.

¹⁵Tágba mì kàdré àmì kí drì kobhá íbe ngùlù-mudrí Krísto na yà dhi, àmì ngbà 'í atá íbe àlo. Tàko ko, má dré Rúbí Taní longólé àmì dré gò mì dré ka'izoá dhi sè dhi, má atsá mána àmì kí atá ro Yésu Krísto na.

¹⁶Má adré dì àmì kí kodzó, mì kàdréró áma lebè, adrészó tà 'o mána tíni.

¹⁷Tà kòdhì sè dhi, má adré áma mvá Tímötéyò, má dré lèle tò dhi nì mu àmì véna. Akódhì nda móndí kitswálé ka'ile togó wäyi sè Míri nì tà sè dhi 'í. Kòtsa dre dhi, a nì láti má dré adrélé lebèle Yésu Krísto na dhi nì tà 'o agálé àmì léna, ngóró má dré adrélé tadhálé àrà títi i 'ásè ìndì Èkèlézyà títi i 'ásè dhi tíni.

¹⁸Móndí àruka àmì kòfalé dhi iatsá àyikya drìkàdrì ro, adrészó kisùá dhi, má kitswá lìle àmì véna ko.

¹⁹Dì, Míri kòlè dhi, má nì tsa àmì véna mbèlè. Dì má kònì tsa dhi, má nì ngbà 'í drìkàdrìbhá nda kí kúlí yi kòdhyá ko, má nì kókpà nòá ngalè àyì Gìká nì rìnyí íbe báti yà dhi.

²⁰Tàko ko, à adré Gìká nì Òpì nì tà tadhá ngbà 'í kúlí sè ko. Be ró dhi, à adré tà nì nì tadhá rìnyí sè.

²¹Mì adré lèá dhi, má kòtsa àmì véna ngíni? Má kòtsa fímbò be má drígá, kó ngalè togó yàyà gálepi lèle sè dhi be?

1 Kòritòbhá i 5

Ndòtò tà móndyá ka'ibhá i kòfalé dhi

¹Àrà títi i 'ásè dhi, à adré yìá tâle dhi, ndòtò tà àmì kòfalé be. À adré ndìndì ndòtò tà kárá be kònìnì nda nì yi pàgánò i kòfalé ko. Tàko ko, à adré tâá dhi, agó àlo àmì kòfalé dhi adré ayílé áyì atá nì tòkó be.

²Dì mì adré àmìkya avólé drìkàdrì sè! Adré tá be lèá dhi, mì kòtongó tá tà nda sè gò, dhya tà nda nì 'olepi dhi nì tingázó àmì kòfalésè.

³Ma ró dhi, tágba má dré adrészó àmì kòfalé yó dhi, áma togó ína ngbú àmì véna. Dì má tà tá mána dhya tà nda nì 'olepi dhi nì tâbvó dre, ngóró ma tá àmì kòfalé be na tíni.

⁴Dì mì kònì dra ru kimó àma kí Míri Yésu nì rú sè dhi, áma togó ni adré túmáñí àmì íbe, ìndì àma kí Míri Yésu nì rìnyí ni adré àmì íbe.

⁵Dì mì kòfè dhya nda Sàtánà drígá, lovó kònzi akódhì nì rúbhá àdhya kòdraró gò, akódhì nì lídrì kàdríró kítú Míri dré dra agòzo dhi tú.

⁶Tà mì dré kitswázó àmì kí afà ásà dhi yókódhó. Mì nì ko tâle dhi, tàkú mvá tsà dhi adré mápà fóndro títi dhi nì 'o avólé nì dhi?

⁷Dì mì kòtingá tàkú àku kòdhì, àmì kì temvézó, mì kàtsáró mápà tídhí ro tàkú àko. Tà báti ró dhi, mì atsá àmikya mápà tídhí ro dre, à dré Krísto àma kì kábilígyà mvá Pásikà àdhya nì pfûle dràle mòbòmà ro dhi sè.

⁸Ásà dhi, mà kàdré àma kì gwányá Pásikà àdhya nì 'o. Dì, mà kàdré 'òá mápà ladhílé tàkú àku tàkonzì àdhya ìndì togó kònzi àdhya sè dhi sè ko. Be ró dhi, mà kàdré àmakya 'òá mápà tàkú àko togó wäyi àdhya ìndì tà báti àdhya sè.

⁹Áma wárágà tisile drìdrì dhi léna dhi, má tisì tá àmì dré dhi, mì kàdré ru su móndyá adrébhá ndòtò tà 'o dhi íbe ko.

¹⁰Kòdhì má adré tá móndyá bvò kòndì àdhya adrébhá ndòtò tà 'o yà, adrébhá ngá lovó bha yà, adrébhá ngá kisú túrúpfú sè yà, kó ngalè adrébhá gíká tàko kì lindrì bha yà dhi kì tà ta kòdhya ko. Kònò kàdré tá kònìnì ko dhi, a nì tá lèá dhi, mì kònga bvò kònìdhì 'ásè.

¹¹Dì, má adré tá mána lèá tâle dhi: Mì kàdré ru su móndyá adrébhá àyi kì zi Yésu nì ka'ibhá i ró gó, i dré adrészó ndòtò tà 'o yà, adrészó ngá lovó bha yà, adrészó gíká tàko kì lindrì bha yà, adrészó móndí kì rú ta kònzi yà, adrészó wá tsi yà, kó ngalè adrészó ngá kisú túrúpfú sè yà dhi íbe ko. Mì kàdré ndìndì ngá nya móndyá lású be kònìnì nda íbe ko.

¹²⁻¹³Tàko ko, móndyá Yésu nì ka'ibhá ko dhi kì tâbvó tâma nò ma ko. Gíká nì àyi nda kì tâbvó ta nì. Dì, adré zakó tsì lèá dhi, mì kàdré móndyá Èkélézyà le dhi kì tâbvó ta àmì? Ásà dhi, ngóró Gíká ni Kúlí dré adrélé tâle dhi tíni: «Mì kòdro tàkonzì líyí àmì kòfalésè. »

1 Kòritòbhá i 6

Tà adrészó tâbvó ta ásà móndyá ka'ibhá i kòfalé dhi i

¹Mì kàdré tà íbe àmì kòfalé àmì kì adrúpi be dhi, mì adré àmikya lìle tà nda nì bvó 'o pagánò i dré tâle dhi ngíningínì ró? Mì adré àmikya lìle tà nda nì bvó 'o móndyá Gíká àdhya i dré tâle dhi ko àdho tà sè?

²Mì nì ko tâle dhi, móndyá Gíká àdhya kì móndyá bvò kòndì àdhya kì tâbvó ta àyi dhi? Dì mì kònì dra móndyá bvò kòndì àdhya kì tâbvó ta àmì dhi, mì kítswá tsì tà mvá tsà àmì kòfalé dhi kì bvó ta bwà ko?

³Mì nì ko tâle dhi, mà nì dra ángéló kì tâbvó ta dhi? Dì mà kítswá tà lìdrì kòndì àdhya kì bvó ta bwà ko àdho tà sè?

⁴Mì kàdré tà lású be kònìnì dhi íbe àmì kòfalé dhi, mì adré dì lìle tà nda kì bvó 'o tâle móndí Èkélézyà dré adrélé nòle móndí tàko ró dhi i véna ngíni?

⁵Má adré tà kòdhì kì ta kanyò fèzo àmì dré. Àmì kòfalé dhi, dhya àlo adrélépi tògyá íbe kítswázó tà áyi adrúpi i kòfalé dhi nì bvó ta bwà dhi tsì yókódhó?

⁶Dì, móndí ka'ilepi àlo dhi adré ína áyi adrúpi nì dri lìzo ába tà àyi kòfalé dhi nì bvó 'o tâle, ìndì adré 'òá kònìnì móndyá ka'ibhá ko dhi i kandrá!

⁷Tà bâti ró dhi, mì dré adrélér àdrézó tàbvwó ta ásà dhi íbe àmi kòfalé dhi sè dhi, kòdhí adré tadhá dhi, mì adhé dre. Mì kitswá tá tà kònzi 'ole àmi rú dhi kí mvo bwà ko àdho tà sè? Mì kitswá tá àmi kí ngá tayí topálé dhi bwà ko àdho tà sè?

⁸Dì, mì adré àmíkya móndí kí 'o kònzi, adrézó àyi kí ngá topá dhi àmi. Mì adré kpà 'òá kònini àmi kí adrúpi i rú!

⁹Mì nì ko tâle dhi, móndyá adrébhá tà kònzi 'o dhi ì kitswá fîle Giká ni Òpì na ko dhi? Mì kòtayí àmi adrélér lítílér ko: Móndyá adrébhá ndòtò tà 'o dhi i, móndyá adrébhá giká tâko kí lindrì bha dhi i, móndyá adrébhá múná tà 'o dhi i, àgo adrébhá ayilé àgo íbe dhi i,

¹⁰móndyá adrébhá ngá kugù dhi i, móndyá adrébhá ngá lovó bha dhi i, móndyá adrébhá wá tsi dhi i, móndyá adrébhá móndí kí rú ta kònzi dhi i, ìndì móndyá adrébhá ngá kisú túrúpfú sè dhi íbe dhi ì kitswá fîle Giká ni Òpì na ko.

¹¹Wâlaká dhi, móndí àruka àmi kòfalé dhi i tá àyi nda kòdhí i tñi. Dì, Giká dzì àmi àmi kí tâkonzi lésè, àmi kí bhàzo twá adrélér ína ró, àmi kí bhàzo gyägya í kandrá Míri Yésu Krísto ni rú sè, ìndì àma kí Giká ni Tíri ni rinyí sè.

Lindrì` fèma Giká dré àma kí rúbhá sè dhi

¹²Mì adré tâá dhi: «Mà kitswá àmakya tà tití dhi kí 'o bwà. » Bâti, kònini. Dì, tà tití nda ì kitswá àyikya àmi kí ledé ko. Má adré tâá dhi: «Má kitswá tà tití dhi kí 'o bwà. » Dì, má kitswá mána áma tayí tà dré atolé í pálé dhi ko.

¹³Mì adré kpà tâá dhi: «Giká bhà mányàngá 'a dré. Bhà kpà 'a mányàngá dré. » Kòdhí bâti. Dì, Giká ni ngá nda kí tà 'o akilé rìti. Kàdré rúbhá ni tà sè dhi, Míri Giká bhà rúbhá à kàdréró ndòtò tà 'o ásà dhi bvó ko. Be ró dhi, bhà ína rúbhá nda à kàdréró áyi tà 'o ásà be dhi bvó. Míri adré kpà rúbhá nda ni likí nì.

¹⁴Giká tingá tá Míri Yésu ni rúbhá dràdrà lésè áyi rinyí sè. A ni kókpà àma kí rúbhá kí tingá dràdrà lésè kònini.

¹⁵Mì nì ko tâle dhi, àmi kí rúbhá i Krísto ni rúbhá ni kigá 'i dhi? Dì má ni tsì áma rúbhá adrélérpi Krísto àdhya ró dhi ni amú tokó zàràbhù ni rúbhá be bwà? Tâdzí ko!

¹⁶Mì nì ko tâle dhi, dhya adrélérpi ru amú tokó zàràbhù be dhi, ì atsá rúbhá àlo ró akodhí be dre dhi? Tako ko, Giká ni Kúlí adré tâá dhi: «Àyi rìti dhi kí atsá rúbhá àlo ró. » ¹⁷Dì, dhya adrélérpi ru amú Míri be dhi, ì atsá ngá àlo ró akodhí be Tíri na dre.

¹⁸Lè mì kàdré lapálér ndòtò tà sîlesè! Tâkonzi àruka tití móndí dré adrélér 'ole dhi i, adré 'òá áyi rúbhá rú ko. Dì, dhya ángùdhi adrélérpi ndòtò tà 'o dhi, adré tâkonzi nda ni 'o áyi tandí ni rúbhá rú.

¹⁹Mì nì ko tâle dhi, àmi kí rúbhá Tíri Lólo ni tépelò 'i dhi? Tako ko, Giká fè àmi dré Tíri Lólo nda adrélér àmi léna. Àmi kí rúbhá àmi kí tandí kya 'i ko.

²⁰Tako ko, Giká gi àmi làgí kàdrì sè dre. Dì ásà dhi, mì kàdré lindrì fe Giká dré àmi kí rúbhá sè.

1 Kòrítòbhá i 7

Làmó ni tà

¹Kàdré ína tà mì dré lizilé má tí àmi ki wárágà le dhi kí tà sè dhi, dóro ni agó dré tòkó môle ko dhi.

²Di, kítswázó ndòtò tà 'o ko dhi, lè àgo àlo àlo tití dhi i kàdré àyi kí tändi kí tòkó íbe, ìndi tòkó àlo àlo tití dhi i kàdré àyi kí tändi kí àgo íbe.

³Lè agó kàdré áyi rúbhá logá áyi tòkó dré ko. Kókpà kòdhi tíni, lè tòkó kàdré áyi rúbhá logá áyi agó dré ko.

⁴Tòkó ni rúbhá ngbà 'í akódhi ni tändi àdhya 'i ko. Be ró dhi, akódhi ni rúbhá nda kókpà agó ni àdhya 'i. Kókpà kòdhi tíni, agó ni rúbhá ngbà 'í akódhi ni tändi àdhya 'i ko. Be ró dhi, akódhi ni rúbhá nda kókpà tòkó ni àdhya 'i.

⁵Mì kàdré di ru ga àmi kòfalésè rúbhá ni tà sè ko, kàdré ngbà 'í lókyá mì dré ru yìzo àmi kí fèzo adrélé tà ta Gìká be dhi 'á ko dhi. Di lókyá nda kòlavú dre dhi, mì kògò adrélé ru amú, Sàtánà kòkítswáró àmi kí tabhì litílé àmi kí lovó rúbhá àdhya sè ko dhi bvó.

⁶Má adré tà kòdhi ni ta ngóró tolí bhàle àmi dri dhi tíni ko. Be ró dhi, má fè mána láti àmi dré adrészó tà 'o.

⁷Má milésè dhi, dóro ni tá móndyá tití dhi i dré làmò môle ko má tíni dhi. Di, Gìká lanzí tà taní twátwa dhi i móndí àlo àlo tití dhi i dré. Dhya àlo tà taní àlo dhi íbe. Dhya àzya tà taní àzya dhi íbe.

⁸Kàdré móndyá mobhá ko dhi i tàyítòkó íbe dhi kí tà sè dhi, má adré tàá dhi, dóro ni i dré ngbú adrélé kònìní má tíni dhi.

⁹Di, i kòkítswá rúbhá lovó mvo bwà ko dhi, lè i kòmo àyikya làmò. Tàko ko, làmò môle dhi dóro lavulé, rúbhá lovó tayílé adrélé àtsi ró dhi rúsè.

¹⁰Kàdré móndyá mobhá dhi kí tà sè dhi, má adré tàá kònìní (má adré di tàá ma ko, Míri adré tàá ni): Lè tòkó kònga áyi agó kandrásè ko.

¹¹Di, kò'o kònìní dhi, kògò agó àzya mo ko, be swá dhi, kògò ru amú áyi agó be. Adré kpà lèá dhi, agó kòtingá áyi tòkó ko.

¹²Àmi àruka tití dhi i dré dhi, má adré tàá kònìní (má adré tàá ma, Míri adré tàá ni ko): Agó àlo Yésu ni ka'ilepi dhi kàdré tòkó ka'ilepi ko dhi íbe gò, tòkó nda dré adrészó lèá adrélé agó nda be dhi, lè agó nda kòtingá tòkó nda ko.

¹³Kókpà kòdhi tíni, tòkó àlo Yésu ni ka'ilepi dhi kàdré agó ka'ilepi ko dhi íbe gò, agó nda dré adrészó lèá adrélé tòkó nda be dhi, lè tòkó nda kòtayí agó nda ko.

¹⁴Tàko ko, Gìká bhà agó ka'ilepi ko nda twá adrélé ína ró, akódhi ni tòkó Yésu ni ka'ilepi nda ni tà sè. Kókpà kòdhi tíni, Gìká bhà tòkó ka'ilepi ko nda twá adrélé ína ró, akódhi ni agó Yésu ni ka'ilepi nda ni tà sè. Kònò kàdré tá kònìní ko dhi, àyi kí

ànzì ki tá adré móndí bhàle twá Gìká dré dhi i ró ko. Di, tà bati ró dhi, ànzì nda i àyikya móndí lolo Gìká àdhya 'i.

¹⁵Di, dhya ka'ilepi ko dhi kàdré ína lèá ru lanzílé áyi àzya Yésu ni ka'ilepi dhi be dhi, à kòtayí akódhi lile. Akódhi nda kòlì lású be kònini dhi, à atrì àzya ni Yésu ni ka'ilepi dhi tòlì làmò àdhya lésè, kàdré agó 'i yà, kó ngalè tòkó 'i yà dhi. Àngyá ko, Gìká azí àmi adrélé tà kìdríkìdrí ibe.

¹⁶Kòdhi ibe dhi, mi, tòkó Yésu ni ka'ilepi ni, mí ni ngalè mí ni ámi agó ni tindrí yà dhi ko. Kókpà kòdhi tíni, mi, agó Yésu ni ka'ilepi ni, mí ni ngalè mí ni ámi tòkó ni tindrí yà dhi ko.

Adrema ngóró mi` dré tá adrélé Gìká dré àmi ki azírà'a dhi ti` ni dhi

¹⁷Kàdré ngbà 'i tà kòdhi 'i ko dhi, lè àmi àlo àlo tití dhi i mi kàdré adrélé ngóró Míri dré fèle àmi dré dhi tíni, ìndì ngóró mi dré tá adrélé Gìká dré àmi ki azírà'a dhi tíni. Má adré tòlì kòdhi ni fe Èkélézyà tití i dré kòdhyá.

¹⁸Di dhya àlo kàdré móndí lwàle dhi 'i Gìká dré tá akódhi ni azírà'a dhi, akódhi nda kàdré ngbú adrélé kònini. Dhya àlo kàdré móndí lwàle ko dhi 'i Gìká dré tá akódhi ni azírà'a dhi, akódhi nda kò'o i lwàle ko.

¹⁹Dhyá ki lwàma ìndì dhyá ki lwàma ko dhi, tà tako 'i. Tà kàdrì dhi ngbà 'i Gìká ni tòlì ki ka'ima 'ole dhi 'i.

²⁰Lè àmi àlo àlo tití dhi i mi kàdré adrélé ngóró mi dré tá adrélé Gìká dré àmi ki azírà'a dhi tíni.

²¹Di mí kàdré màrábà 'i Gìká dré tá ámi azírà'a dhi, mí kòtayí ámi togó adrélé lanzile tà nda sè ko. Di, mí kòkitswá atsálé móndí trile dhi ró bwà dhi, mí kò'o mína kònini.

²²Tako ko, dhya adrélépi tá màrábà ro Míri dré akódhi ni azírà'a dhi, atsá ína móndí trile Míri àdhya ró. Kókpà kòdhi tíni, dhya adrélépi tá màrábà ro ko Míri dré akódhi ni azírà'a dhi, atsá ína màrábà Krísto àdhya ró.

²³Gìká gi àmi làgí kàdrì sè. Mi kòtayí di àmi atsálé màrábà móndí kya ró dhi ko.

²⁴Di áma adrúpi i, lè àmi àlo àlo tití dhi i mi kàdré adrélé Gìká kandrá ngóró mi dré tá adrélé dré àmi ki azírà'a dhi tíni.

Móndyá mobhá ko dhi ki tà, tàyí` tòkó kya i` be dhi i

²⁵Kàdré móndyá mobhá ko dhi ki tà sè dhi, má kisú tòlì Míri vélésè ko. Di, má adré mána tà kisùle kònìdhi ni fe ngóró móndí kitswálépi adrélé ka'ile, Míri dré áyi togó doro tadhálé drá dhi sè dhi tíni.

²⁶Kizà mà dré adrélé nyale lókyá ándró kònìdhi sè dhi sè dhi, má adré kisùá dhi, doro ni mi dré adrélé dhu rè ngóró mi dré adrélé dhi tíni dhi.

²⁷Mí kàdré tòkó ibe dhi, mí kònà láti tòkó nda ni tingázó dhi ko. Mí kàdré tòkó àko dhi, mí kònà tòkó mòle dhi ko.

²⁸Dì, mí kòmo tòkó dhi, mí 'o mína tàkonzì 'i ko. Kókpà kòdhì tíni, kyánzì mòlepi rè ko dhi kòmo dhi, akódhì 'o tàkonzì 'i ko. Dì, móndyá adrébhá ru mo dhi i, tà ní adré àyi kí drì nya rä. Má adré mána àmì kí le apálé tà nda i sílésè.

²⁹Áma adrúpi i, má adré lèá tâle dhi, tayí ngbà 'í lókyá tsà. Kìdhólé nyànomvá dhi, lè àgo adrébhá tòkó íbe dhi i kàdré Gìká ní tà 'o ngóró àyi tá tòkó àko na tíni.

³⁰Móndyá adrébhá ngôle dhi i kàdré tà 'o ngóró i adré tá ngôle ko na tíni. Móndyá adrébhá lenzélé dhi i kàdré tà 'o ngóró i adré tá lenzélé ko na tíni. Móndyá adrébhá ngá gí dhi i kàdré tà 'o ngóró ngá nda i tá àyikya 'i ko na tíni.

³¹Móndyá adrébhá tà 'o ngá bvò kòndì àdhya i sè dhi i kàdré tà 'o ngóró àyi tá ngá nda kí lovó íbe ko na tíni. Tàko ko, bvò mà dré nile kònìdhi adré akílé akíakí.

³²Má adré lèá dhi, mì kàdré tà adrészó togó bha lanzile dhi íbe ko. Agó mòlepi ko dhi adré áyi togó bha Mírì ní tà dri, adrészó kisùá ngalè i ní kitswá Mírì ní togó 'o kínlé ngíni ya dhi.

³³Dì, agó mòlepi dhi adré ína áyi togó bha tà bvò kòndì àdhya i dri, adrészó kisùá ngalè i ní kitswá áyi tòkó ní togó 'o kínlé ngíni ya dhi.

³⁴Dì tà dré adrélé lèle 'ole dhi i lanzí ru 'a be rì. Kókpà kòdhì tíni, tòkó mòlepi ko dhi ìndì kyánzì mòlepi rè ko dhi, i adré àyi kí togó bha Mírì ní tà dri, i kàdréró lolo rúbhá ní tà sè ìndì togó ní tà sè akódhì kandrá be dhi bvó. Dì, tòkó mòlepi dhi adré ína áyi togó bha tà bvò kòndì àdhya i dri, adrészó kisùá ngalè i ní kitswá áyi agó ní togó 'o kínlé ngíni ya dhi.

³⁵Má adré tà kòdhì kí ta kitswázó tà lanzí bha àmì dri ko, be ró dhi, kitswázó àmì kí ledé, mì kàdréró tà kitswábhá Mírì mìlésè dhi kí 'o, adrészó trôle akódhì ní tà rú togó wáyi sè.

³⁶À kòzì tòkó agó àlo dhi dré gò, agó nda dré adrészó kisùá dhi, i adré tà 'o tòkó nda rú doro ko áyi lovó rúbhá àdhya sè gò, dré adrészó tòkó nda ni le mòle dhi, lè i kòmo ru ngóró dré adrélé lèle dhi tíni. Akódhì kò'o kònìnì dhi, 'o tàkonzì 'i ko.

³⁷Dì, agó nda kònì doro tâle dhi, i lè tòkó nda ní mòle ko, ngóró tà bhàle i dri dhi tíni ko, be ró dhi, ngóró tà i dré lèle 'ole dhi tíni gò, dré kitswázó áyi lovó rúbhá àdhya ní mvo bwà dhi, akódhì 'o doro làmò mòzo ko.

³⁸Dì ásà dhi, agó tòkó zìle drá dhi ní mòlepi dhi, 'o doro. Dì, agó tòkó zìle drá dhi ní mòlepi ko dhi 'o ína doro lavulé.

³⁹Tòkó àlo dhi ní agó kàdré dhu rè lídrì íbe dhi, lè i kàdré ngbú adrélé agó nda be. Dì, akódhì ní agó kòdrà dhi, akódhì ní kitswá ína agó ángùdhi dré lèle dhi ní mo, kàdré móndí Mírì àdhya 'i dhi.

⁴⁰Dì, má adré mána kisùá dhi, akódhì ní adré arí íbe lavulé, kàdré dhu rè ngóró dré adrélé dhi tíni dhi. Má adré kpà kisùá dhi, má adré àmì kí drì ta tògyá Gìká ní Tíri àdhya sè.

1 Kòritòbhá i 8

Mányàngá fèle gìká tåko i dré dhì ni tà

¹Kàdré mányàngá fèle gìká tåko i dré dhì ni tà sè dhì, má adré tàá kònìnì: Må nì tåle dhì, àma tití dhì i tà nìnì íbe dhì be. Tà nìnì adré móndí ki 'o avólé drìkàdrì sè. Di, lèle adré ína móndí ki tiimbà àyì ki tà ka'ika'i na.

²Dhya ángùdhi adrélépi kisùá dhì, i nì tà be dhì, nì ína tà ngóró dré kitswálé i kònì dhì tini rè ko.

³Di, dhya adrélépi Gìká nì le dhì, Gìká nì akódhì nda kòdhya.

⁴Kàdré di mányàngá fèle gìká tåko i dré dhì ni nyàma nì tà sè dhì, mà nì tåle dhì, gìká tåko bvò àdhya i tà tåko 'i dhì be. Må nì kpà, Gìká ngbà 'í àlo kwákwá dhì be.

⁵Bàti, móndí àruka i adré àyikya gìká tåko bhù na ìndì bvò dri dhì ki zi gìká ro. Tåko ko, gìká i bì, ìndì míri i bì.

⁶Di, tágba dré adrészó kònìnì dhì, àma dré dhì, Gìká ngbà 'í àlo kwákwá. Akódhì nda àma ki Atá ngá tití dhì ki bhàlepì, ìndì mà dré adrészó lídrì íbe drá dhì 'i. Míri kókpà 'í àlo kwákwá. Akódhì nda Yésu Krísto ngá tití dhì ki bhàzo ásà, ìndì mà dré adrészó lídrì íbe ásà dhì 'i.

⁷Di, móndí tití dhì i nì àyikya tà nda kòdhì i ko. Móndí àruka i adré rè dhu ru su gìká tåko ki tà íbe. Àyì nda i kàdré mányàngá fèle gìká tåko i dré dhì ni nya dhì, i adré nòá ngóró mányàngá gìká tåko kya ró. Di àyì ki tà ka'ika'i yàyà dhì sè dhì, àyì ki togó adré àyì ki arókì gò, i dré adrészó kisùá dhì, i 'o àyì atsálé ndí ró Gìká kandrá dre.

⁸Tà bàti ró dhì, mányàngá adré ína àma ki 'o atsálé ànyì Gìká làga dhì nì ko. Gba mà kònya yà dhì, kó ngalè mà kònya ko yà dhì, tà nda adré tà dóro 'o àma dré ko.

⁹Di, mì dré nile mì kitswá àmikya ngá tití dhì ki nya bwà dhì sè dhì, mì kònò dóro, tà nda kàtsáró tà mì dré adrészó móndí tà ka'ika'i íbe yàyà dhì ki 'o ledhélé tàkonzì na dhì ró ko.

¹⁰Tåko ko, dhya àlo tà íbe yàyà dhì kònò mì adrélépi tà nìnì íbe dhì adrérà'a ngá nya gìká tåko ni tépelò na dhì, tà nda ni zakó tsì akódhì nda ni togó se adrélé mányàngá fèle gìká tåko i dré dhì ni nya?

¹¹Ásà dhì, mì adré ámì adrúpi tà íbe yàyà ìndì Krísto dré dràzo ásà dhì ni tà ka'ika'i kizá ámì tà nìnì nda sè.

¹²Mì kàdré tàkonzì 'o àmì ki adrúpi i rú, adrészó àyì ki tà ka'ika'i yàyà dhì ki kizá lású be kònìnì dhì, mì adré àmikya tàkonzì 'o Krísto ni tändi rú.

¹³Ásà dhì, ngá má dré adrélé nyàle dhì kàdré áma adrúpi ni 'o dhèle tàkonzì na dhì, má kitswá góle vélé zä nya ko, má kògoró akódhì ni 'o dhèle ko.

1 Kòritòbhá i 9

Pólò gà ngá kisúlé Rúbí Taní nì longoma nì tà sè

¹Má kïtswá mána tà adrébhá dóro má mìlésè dhi kí 'o bwà ko? Ma mána àpóstolò 'í ko? Má nò àma kí Míri Yésu áma mì sè ko? Àmì àzí má dré 'ole Míri ní tà sè dhi ní lò'wa 'í ko?

²Tágba móndí àruka ì kàdré áma no ngóró àpóstolò ro ko yà dhi, ma àpóstolò 'í àmì dré. Tako ko, mì dré adrélé Míri Yésu na dhi sè dhi, mì adré àzí má dré 'ole àpóstolò ro dhi ní tadhá ngádra 'á dhi àmì.

³Tà má dré adrészó áma tará ga ásà móndí adrébhá áma ndri dhi i tí dhi i, tà kònì 'í:

⁴Mà kïtswá tsì adrélé ngá kisú nyàle ìndì mvùle àzí mà dré adrélé 'ole dhi sè bwà ko?

⁵Mà kïtswá tsì tokó Yésu ní ka'ibhá dhi kí do mòle, adrészó tatsílé àyi íbe ngóró àpóstolò àruka kya tíni, Míri ní adrúpi kya tíni, ìndì Pétéró àdhya tíni dhi ko?

⁶Adré tsì lèá dhi, àma Bärànábà be dhi i, mà kàdré ngbà 'í àzí 'o àma kí tändi kí drígá sè làfa kisúzó dhi àma?

⁷Àdhi adré sòdá àzí 'o áyi tändi ní làfa sè dhi nì? Àdhi adré ngá kidhí gò, adrészó lò'wa ní nya ko dhi nì? Àdhi adré kà'wá likí gò, adrészó bàsú ní ni mvu ko dhi nì?

⁸Mì adré kisùá dhi, mà adré tà kòdhi kí ta ngóró móndí ì dré adrélé kisùle dhi tíni? Mósè ní tátrítrí kúlí adré kókpà tàá kònini ko?

⁹Tako ko, Mósè ní tátrítrí kúlí nda adré tàá dhi: «Tí dré adrérà'a lò'wa ató zìle dhi 'á dhi, à kòdrò ti ní ngá nyàle dhi ní logázó drá ko. » Kòdhi Gíká adré ngbà 'í tí kí tà kisù kòdhyá?

¹⁰Adré zakó tsì tà nda ní ta àma kí tà sè? Tà báti ró dhi, à tísì tà nda àma kí tà sè. Tako ko, adré lèá dhi, dhya adrélépi amvú 'a dhi i dhya adrélépi ngánò tswa dhi be dhi, ì kàdré 'òá adrészó mì bha lanyá kisúzó àyikya ró.

¹¹Mà kòri kórì Tirí Lolo àdhya àmì kòfalé 'í dhi, mà kïtswá tsì ngá bvò àdhya kí kisú àmì drígásè ko?

¹²Móndí àruka ì kàdré rinyí íbe kïtswázó ngá kisú àmì drígásè 'í dhi, àma àmakya rinyí íbe àyikya kí lavú ko? Dì, tágba dré adrészó kònini dhi, mà 'o tà àmì kòfalé rinyí nda sè ko. Be ró dhi, mà adré àmakya tà tití dhi kí mvo, mà kòkikíró Rúbí Tani Krísto àdhya ní longoma ko.

¹³Mì ní ko tâle dhi, dhya adrébhá àzí 'o tépelò na dhi ì adré ngá fèle tépelò nda na dhi kí àmbí kisú nyàle dhi? Dhya adrébhá tà 'o àlètárì kandrá dhi ì adré kpà ngá fèle àlètárì nda dri dhi kí àmbí kisú. ¹⁴Kókpà kòdhi tíni, Míri Yésu fè tolí tazoá dhi, móndyá adrébhá Rúbí Tani longó dhi ì kàdré ngá kisú àyi kí lídrì dré Rúbí Tani ní longoma nda sè.

¹⁵Dì, mà 'o mána tà rinyí nda sè àlomvá ko. Má adré kpà tà kòdhi kí tísì, àmì kí togó asézó ngá fe má dré dhi bvó ko. Má mìlésè dhi, dóro ní tá má dré dràle kïtswálé ngá zi àmì tí ko dhi! Dhya àlo kïtswá tà má dré adrészó áma afà ásà kòdhi ní tingá má vélésè ko!

¹⁶Tà báti ró dhi, má kàdré Rúbí Taní longó dhi, má kitswá mána áma afà tà nda sè bwà ko. Tàko ko, Gìká bhà àzí nda má drígá nì, má kàdréró 'òá be dhi bvó. Kònò kizà nì tá adré áma ngá 'i, má kàdré tá Rúbí Taní nda nì longó ko dhi!

¹⁷Kònò má kòkipè tá àzí nda 'ole ma dhi, má nì tá làgí kisú ásà. Dì, Gìká dré àzí nda nì bhàle má drígá nì dhi sè dhi, má adré ngbà 'í àzí bhàle má drígá nda nì 'o kòdhya.

¹⁸Má nì dì àdho làgí kisú àzí nda sè kòdhya? Áma làgí, adrema Rúbí Taní má dré adrélé longolé àngyá dhi nì longó dhi 'i. Ásà dhi, má adré longóá ngá zi àko ró, tágba má dré adrészó rinyí íbe kitswázó ngá kisú àzí nda sè dhi.

¹⁹Gba má dré adrészó dhya àlo nì mårábà 'i ko dhi, má 'o ma adrélé móndyá tití dhi kí mårábà ro, kitswázó móndí bì dhi kí adrì Krísto nì ka'i dhi bvó.

²⁰Dì Yúdà ànzì i kòfalé dhi, má 'o ma adrélé Yúdà ànzì nda i tíni, kitswázó àyi kí adrì Krísto vélé dhi bvó. Móndyá adrébhá Mósè nì tátrítrí kúlí zàle dhi i kòfalé dhi, má 'o ma adrélé àyi tátrítrí kúlí zàle nda i tíni, tágba má dré adrészó tátrítrí kúlí zàle ko dhi, má kòkitswáró àyi kí adrì Krísto vélé be dhi bvó.

²¹Móndyá adrébhá tátrítrí kúlí àko dhi i kòfalé dhi, má 'o ma adrélé àyi tátrítrí kúlí àko nda i tíni, kitswázó àyi kí adrì Krísto vélé dhi bvó. Kòdhì adré tàá dhi, ma Gìká nì tátrítrí kúlí zàle ko dhi ko. Be ró dhi, ma mána Krísto nì tátrítrí kúlí zàle.

²²Móndyá tà ka'ika'i íbe yàyà dhi i kòfalé dhi, má 'o ma adrélé yàyà àyi nda i tíni, kitswázó àyi kí adrì Krísto vélé dhi bvó. Dì móndyá tití dhi i kòfalé dhi, má 'o ma adrélé àyi àlo àlo tití dhi i tíni, adrélé láti tití dhi kí nda kitswázó àyi kí àruka kí tìdrí dhi bvó.

²³Má adré tà tití nda kí 'o Rúbí Taní nì tà sè, mà kòkisúró tà taní ásà túmání móndí àruka bì dhi íbe be dhi bvó.

²⁴Mì nì ko tâle dhi, móndí i kàdré angú ra dhi, àyi tití dhi i adré ràle, dì, ngbà 'í àyi kí àlo adré làgí kisú nì dhi? Dì mì kàdré àmikya angú ra kitswázó làgí kisú dhi bvó.

²⁵Móndyá tití adrébhá ru pfu lavi na dhi i adré tà bì dhi kí mvo, àyi kí rúbhá kí 'òzo atsálé tòmbátòmba. I adré 'òá kitswázó kùlá adrélépi ñwàle ñwajwà dhi nì kisúzó kòdhya. Dì, mà adré àmikya 'òá kitswázó kùlá kitswálépi ñwàle bwà ko dhi nì kisúzó kòdhya.

²⁶Dì ásà dhi, má adré mána angú ra wàyá ro ko. Mà kàdré ru pfu móndí àzya be dhi, má adré akódhi nì tisi wàyá ro ko.

²⁷Dì, má adré mána áma rúbhá 'o atsálé tòmbátòmba, adrészó bhàá áma rinyí zàle, má kònì dra Rúbí Taní longó móndí àruka i dré dhi, à kòkitswáró làgí logá má dré ko.

1 Kòrítòbhá i 10

Tà 'òma I` sèrélè ànzì kya ti' nì ko dhi

¹Áma adrúpi i, má lè mì kòtivì ko tâle dhi, Mósè ni lókyá 'á dhi, àma kí tábhí tití dhi ì atsí tá ndùrùku zàlésè gò, i dré lavúzó yíandre 'ásè dhi. ²Dì ndùrùku nda na ìndì yíandre nda na dhi, i kisú tá bátísimò, ru amúzó Mósè be.

³Àyì tití dhi ì nya tá mányàngá àlo angálépi Gìká vélésè dhi kòdhya.

⁴Ì mvu tá kpà yí àlo angálépi Gìká vélésè dhi kòdhya. Tàko ko, i adré tá yí adrélépi apfòle kírà angálépi Gìká vélésè gò adrélé àyì kí lebè dhi lésè dhi ni mvu. Kírà nda tá Krísto 'i.

⁵Tágba dré tá adrészó kònìnì dhi, móndí bǐ àyì kòfalé dhi kí tà tá dóro Gìká milésè ko gò, i dré todràzo duku na.

⁶Dì tà nda kòdhì ì atsá tá àyì rú kònìnì kitswálé tà tadhá àma dré, mà kàdréró tà kònzi kí lovó bha àyikya tíni ko.

⁷Mì kàdré dì gìká tàko kí lindrì bha àyì kí àruka kya tíni ko. Ngóró tisile Gìká ni Kúlí na dhi tíni: «Móndí ì lirí tá adrélé ngá nya ìndì ngá mvu gò, i dré ngàzo adrélé lärí to gìká tàko i kandrá. » ⁸Mà kàdré ndòtò tà 'o àyì kí àruka kya tíni ko. Tàko ko, àyì ngùlù-nyadhi-àlo-drì-na nda i todrà tá kitú àlo sè. ⁹Mà kàdré Krísto ni tabhì àma kí tàkonzi sè àyì kí àruka kya tíni ko. Tàko ko, ni tisí tá àyì nda i todràle dhi kòdhya. ¹⁰Mì kàdré kpà ngùrungùrù ta àyì kí àruka kya tíni ko. Tàko ko, ángéló adrélépi dràdrà fe dhi tupfú tá àyì nda i todràle dhi kòdhya.

¹¹Tà nda kòdhì ì atsá tá àyì rú kitswázó tà tadhá àma dré. À tisí kpà tà nda i kitswázó àma adrébhá lídrì íbe lókyá kùdù kònìdhì 'á dhi kí kodzó dhi bvó.

¹²Ásà dhi, mì kàdré kisùá dhi mì adré àmi kí totó tâtä dhi, mì kònò dóro, mì kòdheró ko!

¹³Tà twá adré àmi kí tabhì tà adrébhá móndyá tití dhi kí tabhì dhi i rúsè ko. Gìká kitswá kpà adrélé ka'ile togó wáyi sè. Kitswá àmi kí tayí tà dré tabhile àmi kí rinyí lavúzó dhi ko. Dì, tà dré adrérà'a àmi kí tabhì dhi 'á dhi, a ni láti nzi àmi dré kitswázó lapálé tíásà, mì kòkitswáró togó tsí be dhi bvó.

Gìká tàko kí lindrì` bhàma ko dhi

¹⁴Dì áma arúpi má dré lèle tò ni i, mì kàdré lapálé gìká tàko kí lindrì bhàma ni tà sílésè.

¹⁵Má adré tà kòdhì kí ta àmi, móndí tògya ró dhi i dré. Dì àmi kí tändì, mì kòtabhì tà má dré adrélé tâle nda i, nízoá ngalè tà nda i tà bâti 'i yà dhi.

¹⁶Mà dré adrérà'a mányàngá Míri àdhya ni nya dhi 'á dhi, mà kàdré kópò adó, adrészó tà taní zi Gìká tí driá gò, adrészó mvùá dhi, mà adré zakó tsí àma kí amú Krísto ni kàrì be? Mà kàdré kpà mápà tonjò nyàle dhi, mà adré zakó tsí àma kí amú Krísto ni rúbhá be?

¹⁷Mápà nda dré adrélé ngbà 'í àlo dhi sè dhi, àma zyandre dhi i, mà atsá rúbhá àlo ró. Àngyá ko, mà adré tití mápà àlo nda ni nya kòdhya.

¹⁸Mì kisù rè ḥsérélè ànzì kì tà ká. ḥ kàdré ngá fèle mòbòmà ro àlètárì dri dhi kì nya dhi, i adré zakó tsì àyi kì amú Gìká àlètárì nda nì bhàzo drá dhi be?

¹⁹Má adré lèá tâle dhi, ngá fèle gìká tâko i dré dhi, tà kàdrì 'i dhi ko. Gìká tâko i kpà tà kàdrì 'i ko.

²⁰Dì, à kàdré ngá fe mòbòmà ro gìká tâko i dré dhi, à adré fèá tirí kònzi i dré, Gìká dré ko. Má adré dì lèá dhi, mì kàmú ru tirí kònzi íbe àlomvá ko.

²¹Mì kitswá adrélé kópò Mírì àdhya nì mvu, adrészó kókpà kópò tirí kònzi kya nì mvu dhi bwà ko. Mì kitswá adrélé mányàngá Mírì àdhya nì nya, adrészó kókpà mányàngá tirí kònzi kya nì nya dhi bwà ko.

²²Kòdhi mà adré tsì Mírì nì togó le 'ole aswálé? Àma tsì rinyí íbe akódhi àdhya nì lavú?

Tà tití dhi kì 'òma lìndri` fèzo Gìká dré dhi

²³Mì adré tâá dhi: «Mà kitswá tà tití dhi kì 'o bwà. » Bâti, kònìnì. Dì, tà tití nda i kitswá àyikya àmì kì ledé ko. «Mà kitswá tà tití dhi kì 'o bwà. » Dì, tà tití nda i kitswá àyikya móndí kì timbà àyi kì tà ka'ika'i na ko.

²⁴Lè mì kàdré tà dôro nda kisûlé àmì kì tândi i dré ko. Be ró dhi, mì kàdré àmikya tà dôro nda àmì kì àzya i dré.

²⁵Mì kàdré ngá tití adrélé lagílé ngá lagírà na dhi kì ka'i nyàle. Dì, mì kàdré àmikya ngá nda kì tà lizí ko, tà nda kàrókìró àmì kì togó ko dhi bvó.

²⁶Tâko ko, Gìká nì Kúlí adré tâá dhi: «Bvò i ngá tití lá dhi íbe dhi i, Mírì àdhya 'i. »

²⁷Dhya àlo Yésu nì ka'ilepi ko dhi kòzi àmì ngá nya gò, mì dré ka'izoá lîle dhi, mì kònnya ngá tití bhàle àmì kandrá dhi i. Dì, mì kòlizí àmikya ngá nda kì tà ko, tà nda kàrókìró àmì kì togó ko.

²⁸Dì, dhya àlo kòtâ ína àmì dré dhi, «Kònìdhi ngá fèle gìká tâko dré dhi 'i» dhi, mì kònnya ko, dhya tà nda nì tâlepi àmì dré dhi nì tà sè, iñdì tà nda kàrókìró móndí nì togó ko sè.

²⁹Má adré àmì kì togó nì tà ta kòdhya ko. Be ró dhi, má adré mána dhya àzya nda nì togó nì tà ta kòdhya. Dì à nì kitswá lizíá dhi: «À adré tà má dré adrélé nòle dôro dhi kì logá má dré dhya àzya nì togó nì tà sè àdho tà sè? »

³⁰Má kàdré mána àwoyà ta Gìká dré gò adrészó ngá nya dhi, à adré tà ta kònzi má rú ngá má dré àwoyà fèzo ásà nda sè àdho tà sè? »

³¹Dì mì kàdré ngá nya yà, ngá mvu yà, kó ngalè tà ángùdhi nì 'o yà dhi, mì kàdré tà nda kì 'o tití kitswázó lìndri fe Gìká dré dhi bvó.

³²Mì kò'o tà àlo kitswálépi móndí kì 'o ledhélé tâkonzi na dhi ko, àyi nda i kàdré Yúdà ànzì 'i yà, móndí súrú twá ro dhi 'i yà, kó ngalè móndí Èkélézyà Gìká àdhya lé dhi 'i yà dhi.

³³Mì kàdré tà 'o mána tíni. Má adré tà tití dhi kí 'o, áma tà kàdréró dóro móndyá tití dhi i mìlésè. Má adré tà dóro nda kisúlé áma tändi dré ko. Be ró dhi, má adré mána tà dóro nda móndi zyandre dhi i dré, i kòkítswáró lídrì kóná vésè kólyá dhi ni kisú be dhi bvó.

1 Kòritòbhá i 11

¹Mì kàdré tà 'o mána tíni, ngóró áma tändi má dré adrélé tà 'o Krísto àdhya tíni dhi tíni.

Àgo kí tà tòkó i` be li` sámbò na dhi

²Má adré àmí kí tà bha kuru, mì dré adrélé ngbú áma tà kisù dhi sè, ìndì mì dré adrélé trôle tà má dré tadhálé àmí dré dhi i rú dhi sè.

³Di, má adré mána lèá mì kònì dhi, àgo tití dhi kí drì Krísto 'i, tòkó ni drì agó 'i, ìndì Krísto ni drì Gíká 'i.

⁴Dì lìsámbò na dhi, agó àlo dhi kòndrà ngá i dri gò, adrészò tà zi Gíká tí yà, kó ngalè adrészò Gíká ni kúlí longó pròfétà àdhya tíni yà dhi, agó nda adré ína kanyò fe Krísto dré. ⁵Dì tòkó àlo dhi kòndrà ngá i dri ko gò, adrészò tà zi Gíká tí yà, kó ngalè adrészò Gíká ni kúlí longó pròfétà àdhya tíni yà dhi, tòkó nda adré ína kanyò fe áyi agó dré. Tàko ko, sù ngóró tòkó nda rè tá áyi drìbhí rère na tíni.

⁶Tòkó kòndrà ngá i dri ko dhi, dóro ni tá dré áyi drìbhí rèle rère dhi. Di, tòkó ni drìbhí rème yà, kó ngalè akódhi ni drìbhí fàma yà dhi kàdré kanyò fe drá dhi, lè akódhi kàdré áyi drì ndràndrà.

⁷Di, adré lèá dhi, agó kòndrà ína áyi drì ko. Tàko ko, Gíká bhà agó lású be i tíni, ìndì agó adré Gíká ni mìlanzìlanzi tadhá. Di, tòkó adré ína agó ni mìlanzìlanzi tadhá.

⁸Àngyá ko, Gíká 'o tá agó apfòle tòkó lésè ko. Be ró dhi, 'o ína tòkó apfòle agó lésè.

⁹Kòdhi i`be dhi, Gíká bhà tá agó tòkó dré ko. Be ró dhi, bhà ína tòkó agó dré.

¹⁰Tà nda sè dhi, ìndì ángéló kí tà sè dhi, lè tòkó kàdré áyi drì ndra tadházóá dhi, i agó zàle dhi.

¹¹Dì, tágba kònìnì dhi, Mírì na dhi, tòkó ni tà kitswá adrélé be dhi agó ni tà àko ko. Agó ni tà kitswá kpà adrélé be dhi tòkó ni tà àko ko.

¹²Tàko ko, ngóró tòkó dré apfòle agó lésè dhi tíni dhi, à ti kpà agó apfòle tòkó lésè. Di, tà bati ró dhi, ngá tití dhi i apfò Gíká vélésè.

¹³Mì kòlanzí tà kònì kí bvó àmí kí tändi i kòfalé: Tòkó àlo dhi kòndrà áyi drì ko gò adrészò tà zi Gíká tí dhi, kòdhi tsì doro?

¹⁴Ngá wáyi Gíká dré bhàle dhi kí lású adré zakó tsì tadhá àmí dré dhi, agó ni drìbhí kàdré kàtswa dhi, tà nda adré kanyò fe akódhi dré?

¹⁵Di, tòkó ni drìbhí kàdré kàtswa dhi, tà nda adré ína lindrì fe akódhi dré. Tàko ko, Gíká fè drìbhí kàtswa nda akódhi dré ngóró ngá dré adrészò áyi drì ndra ásà dhi tíni.

¹⁶Dhya àlo kàdré tà le kayílé tà nda kòdhì i dri dhi, àma labhi àzya mà dré adrélé lebèle dhi àko. Èkèlézyà Giká àdhya i kókpà labhi àzya àko.

Mányàngá Míri àdhya

(À kònò kpà Mátayò 26:26-29; Márokò 14:22-25; Lükà 22:15-20)

¹⁷Kàdré tà mì dré adrészó ru kímó adrélé 'òá dhi kì tà sè dhi, má kitswá àmi kì tà bha kuru ásà ko. Tàko ko, mì adré àmikya tà kònzi kì 'o, tà dóro kì lavú.

¹⁸Drìdrì dhi, má adré yiá tâle dhi, mì dré adrérà'a ru kímó móndí Èkèlézyà àdhya i ró dhi 'á dhi, mì adré àmikya ru lanzí àmi kòfalésè. Dì má ni kitswá tà nda ni ka'ì tsà.

¹⁹Tà bâti ró dhi, lè tà adrészó ru lanzí dhi i kàdré àmi kòfalé be, à kòkitswáró móndyá Giká dré ka'ile àmi kòfalé dhi kì ni be dhi bvó.

²⁰Mì dré adrérà'a ru kímó dhi 'á dhi, mì adré àmikya mányàngá Míri àdhya ni nya kòdhya ko.

²¹Tàko ko, mì dré adrérà'a ngá nya dhi 'á dhi, àmi àlo àlo tití dhi i mì adré ngá do àmi kì tândi i dré nyâle drìdrì móndí àruka i kandrá. Dì móndí àruka i tâbirí íbe, àruka ni i adré kó wá tsi.

²²Àmi tsì dzó àko kitswázó ngá nya ìndì ngá mvu lána dhi? Kó ngalè, mì adré Èkèlézyà Giká àdhya ni ayízè, adrészó kanyò fe móndí mányàngá àko dhi i dré? Má ni àdho tà ta àmi dré kòdhya? Má ni tsì àmi kì tà bha kuru? Kóko! Má kitswá àmi kì tà bha kuru tà nda sè ko!

²³Tàko ko, má tadhá mána àmi dré tà má dré kisúlé Míri vélésè kònì i kòdhya: Ngátsi Míri Yésu ni lefèzo kàribhá i drígá dhi sè dhi, akódhi adó tá mápà,

²⁴àwoyà fèzo Giká dré gò, ñòzoá tâzoá dhi: «Kònìdhi áma rúbhá má dré adrélé fèle àmi kì tà sè dhi 'i. Mì nya, ìndì mì kàdré 'òá kònìnì adrészó áma tà kisù. »

²⁵Ngá nyàma àmvolésè dhi, dré kókpà 'òzoá kònìnì kópò sè. Adó kópò nda, tâzoá dhi: «Kópò kònìdhi adré tà tîdhí Giká dré bhâle ru yìzo móndí íbe áma kàrì sè dhi ni tà tadhá. Mì mvu, ìndì vésè wâyi mì dré adrérà'a mvùá dhi 'á dhi, mì kàdré 'òá kònìnì adrészó áma tà kisù. »

²⁶Tàko ko, vésè wâyi mì dré adrérà'a mápà kòdhì ni nya, adrészó kpà kópò kòdhì ni mvu dhi 'á dhi, mì adré Míri ni dràdrà ni tà longó, tsâle lókyá dré dra agòzo dhi 'á.

²⁷Ásà dhi, dhya ángùdhì adrélépi Míri ni mápà nya yà, adrélépi kó akódhi ni kópò mvu yà ngóró dré kitswálé Giká mìlissè dhi tîni ko dhi, akódhi nda adré ína tâkonzi 'o Míri ni rúbhá rú ìndì akódhi ni kàrì rú gò, tâkonzi nda dré adrészó akódhi dri.

²⁸Adré dì lèá dhi, móndí àlo àlo tití dhi i kàdré àyi kì tândi kì togó tabhì 'íká gò, i kògòrò adrélé mápà nda ni nya, adrészó kópò nda ni mvu ndò.

²⁹Tàko ko, dhya ángùdhì adrélépi mápà nda ni nya, adrészó kópò nda ni mvu Míri ni rúbhá ni tà kisù àko ró dhi, adré ína Giká ni tâbvó tâma asé áyi tândi dri.

³⁰Tà nda sè dhi, móndí bì àmì kòfalé dhi i rúbhá íbe yàyà ìndì drà ro, ìndì àmì ki àruka bì dhi i todrà dre.

³¹Mà kàdré àma ki tändi ki tàbvó ta dhi, Gìká kitswá àma ki tàbvó ta ko.

³²Dì, Mírì Gìká adré ína àma ki tàbvó ta, adrészó àma ki lotó, í kòbhàró tà àma dri móndyá bvò àdhya kya tíni ko dhi bvó.

³³Ásà dhi, áma adrúpi i, mì dré adrérà'a ru kimó mányàngá Mírì àdhya ni nya dhi 'á dhi, mì kàdré ru letè àmì kòfalésè.

³⁴Àmì ki àruka i kàdré tàbirí íbe dhi, i kònya ngá àyi bhàna 'íká, mì kònì dra ru kimó dhi, mì kò'oró tàkonzi gò àmì ki tàbvó tazo dhi ko. Kàdré tà àruka mì dré lizilé dhi ki tà sè dhi, má ni tà nda ki lotó lókyá má dré adrérà'a àmì véna dhi 'á.

1 Kòritòbhá i 12

Tà taní Tíri¹ Lólo dré adrélé fèle dhi i

¹Áma adrúpi i, kàdré tà taní Tíri Lólo dré adrélé fèle dhi ki tà sè dhi, má adré lèá mì kònì tà báti tà nda i dri be.

²Mì ni tàle dhi, mì dré tá adrérà'a pàgánò i ró dhi 'á dhi, mì tayí tá àmì adrélé tatsilé gìká tàko kitswábhá kúlí ta bwà ko dhi i vésè dhi be.

³Ásà dhi, má adré tà báti ta àmì dré: Dhya àlo adrélépi tà ta Gìká ni Tíri ni rinyí sè dhi kitswá tàá dhi «Tátrítrí kàdré Yésu dri! » dhi bwà ko. Kòdhí íbe dhi, dhya àlo kitswá tàá dhi «Yésu Mírì 'í! » dhi bwà ko, kàdré ngebà 'í Tíri Lólo ni rinyí sè ko dhi.

⁴Tà taní Tíri Lólo dré adrélé fèle dhi i twátwa. Dì, Tíri àlo nda adré ína fèá nì.

⁵Láti adrészó Mírì ni àzí 'o dhi i twátwa. Dì, à adré àzí nda ki 'o Mírì àlo nda dré.

⁶Tà Gìká dré adrélé 'ole móndí i 'ásè dhi i twátwa. Dì, Gìká àlo nda adré tà tití nda ki 'o móndyá tití dhi i 'ásè dhi nì.

⁷Gìká adré áyi Tíri ni rinyí tadhá móndyá ka'ibhá àlo àlo tití dhi i rú, adrészó tà dóro 'o àyi tití nda i dré.

⁸Dhya àlo dré dhi, Tíri nda adré rinyí adrészó kúlí ta tògyá sè dhi ni fe kòdhya. Dhya àzya dré dhi, Tíri àlo nda adré rinyí adrészó kúlí ta tà nini sè dhi ni fe kòdhya.

⁹Àzya ni dré dhi, Tíri àlo nda adré rinyí adrészó Gìká ni ka'i togó wáyi sè dhi ni fe kòdhya. Àzya ni dré dhi, Tíri àlo nda adré rinyí adrészó móndí ki drà tidré dhi ni fe kòdhya.

¹⁰Àzya ni dré dhi, adré rinyí adrészó tà líndriga ró dhi ki 'o dhi ni fe kòdhya. Àzya ni dré dhi, adré rinyí adrészó Gìká ni kúlí longó pròfétà àdhya tíni dhi ni fe kòdhya. Àzya ni dré dhi, adré rinyí adrészó tiri twátwa dhi ki ni lanzilé dhi ni fe kòdhya. Àzya ni dré dhi, adré rinyí adrészó ti twátwa ki ta dhi ni fe kòdhya. Àzya ni dré dhi, adré rinyí adrészó ti twátwa nda ki kúlí àndu ngi dhi ni fe kòdhya.

¹¹Tirí àlo kwákwá nda adré tà tití nda kí 'o nì. Adré rinyí twátwa nda kí lanzí móndí àlo àlo tití i dré, ngóró i dré adrélè lèle 'ole dhi tíni.

Rúbhá àlo kí `gá ni i` be bi` dhi

¹²Dhyá kí rúbhá ngá àlo dhi 'i, gba dré adrészó kígá íbe bí dhi. Krísto ni tà kókpà kòdhí tíni. Gba rúbhá ni ni kígá i dré adrészó bí dhi, rúbhá nda ngbà 'í àlo.

¹³Tàko ko, à fè bàtísímò àma tití dhi i dré Tirí Lolo àlo dhi ni rinyí sè, mà kàdréró rúbhá àlo ró, gba mà kàdré Yúdà ànzí 'i yà, móndí súrú twá ro dhi 'i yà, marrábà 'i yà, kó ngalè móndí marrábà ro ko dhi 'i yà dhi. Gíká bhà Tirí àlo nda adrélè àma tití dhi i léna.

¹⁴Rúbhá nda ni kígá ngbà 'í àlo ko. Be ró dhi, rúbhá nda kígá íbe bí.

¹⁵Tágba rúbhá nda ni pá kòtà tá dhi «Má dré adrélè drígá 'i ko dhi sè dhi, ma rúbhá ni kígá 'i ko» dhi, pá nda ni tá adré ngbú rè rúbhá nda ni kígá ró.

¹⁶Kó ngalè, bí ni kòtà tá dhi «Má dré adrélè mi 'i ko dhi sè dhi, ma rúbhá ni kígá 'i ko» dhi, bí nda ni tá adré ngbú rè rúbhá nda ni kígá ró.

¹⁷Kònò rúbhá wáyi dhi kàdré tá mi 'i yà dhi, a ni tá kitswá tà yi ngíni? Kó ngalè, rúbhá wáyi dhi kàdré tá bí 'i yà dhi, a ni tá kitswá ngá tázdi ngu ngíni?

¹⁸Tà báti ró dhi, Gíká tobhà kígá àlo àlo tití dhi i rúbhá léna ngóró i dré tá lèle 'ole dhi tíni.

¹⁹Kígá nda i kàdré tá ngbà 'í àlo dhi, kònò rúbhá nda kitswá tá adrélè ko.

²⁰Tà báti ró dhi, rúbhá ni kígá i bí. Di, rúbhá nda ína ngbà 'í àlo.

²¹Rúbhá nda ni mi kitswá ína tàá drígá dré dhi «Ámí lovó má rú yó! » dhi bwà ko. Kó ngalè, drì ni kitswá ína tàá pá dré dhi «Ámí lovó má rú yó! » dhi bwà ko.

²²Tàko ko, rúbhá ni kígá adrélè nòle yàyà dhi i kàdré tá yó dhi, kònò rúbhá nda kitswá tá tà 'o bwà ko.

²³Rúbhá ni kígá mà dré adrélè nòle lindrì àko ró dhi i, mà adré àyi nda kí lindrì bha kígá àruka tití dhi kya kí lavú. Rúbhá ni kígá kitswábhá adrélè nòle ko dhi i, mà adré àyi nda kí likí kígá àruka tití dhi kí lavú.

²⁴Di, mà adré 'óá kònìní rúbhá ni kígá kitswábhá adrélè nòle dhi kí tà sè ko. Di, Gíká amú ína rúbhá ni kígá i tití, lindrì fèzo kígá adrébhá tá lindrì àko dhi i dré,

²⁵tà adrészó ru lanzí dhi kàdréró rúbhá nda na yó, be ró dhi, kígá nda i kàdréró àyi kí azya kí tà kisù.

²⁶Ásà dhi, kígá àlo dhi kàdré kizà nya dhi, kígá àruka tití dhi i adré kókpà kizà nya túmání akódhi be. Kígá àlo dhi kàdré rúku kisú dhi, kígá àruka tití dhi i adré lenzélé túmání akódhi be.

²⁷Ámí ró dhi, àmí Krísto ni rúbhá 'i. Ámí àlo àlo tití dhi i rúbhá nda ni kígá i.

²⁸Giká bhà tá rè zyà àpóstolò i adrélé drìdrì Èkèlézyà na gò, pròfétà kí bhàzo àyi àmvolésè gò, dhya adrébhá tà tadhá dhi kí bhàzo àyi àmvolésè. Àmvolásà dhi, bhà tá dhya adrébhá tà línndrígá ró dhi kí 'o dhi i, dhya adrébhá móndí kí drà tìdrí dhi íbe, dhya adrébhá móndí kí ledé dhi íbe, dhya adrébhá móndí kí drì ko dhi íbe, tsàle dhya adrébhá ti twátwa kí ta dhi íbe.

²⁹Dì móndyá tití dhi i àpóstolò 'i ko. Àyi tití dhi i pròfétà 'i ko. Àyi tití dhi i tà tadhábhá 'i ko. Àyi tití dhi i rinyí íbe adrészó tà línndrígá ró dhi kí 'o ko,

³⁰adrészó móndí kí drà tìdrí ko, adrészó ti twátwa kí ta ko, adrészó ti twátwa nda kí kúlí àndu ngi ko.

³¹Dì, àmi kí togó kàdré ína àtsi ró, kítswázó tà taní lavúlé Tirí Lólo dré adrélé fèle dhi kí kisú. Nyànomvá dhi, má ni láti dóro láti àruka tití dhi kí lavúlépi dhi ni tadhá àmi dré kòdhyá.

1 Kòritòbhá i 13

Lèle ni tà

¹Kònò má kàdré tá ti twátwa móndí kya kí ta ángéló kya íbe gò, má dré mána adrészó lèle àko dhi, má ni tá adré ngóró ngílíngílí adrélé tswàle wàyá ro dhi tíni, kó ngalè gòká adrélé vòle wàyá ro dhi tíni.

²Kònò má kàdré tá Giká ni kúlí longó pròfétà àdhya tíni, adrészó tà tití lùzu ró dhi kí ni lanzílé tà nìnì be wâyi, adrészó tà ka'ika'i íbe kàdrì kítswázó kòngó kí 'o àyi kí kisí gò, má dré mána adrészó lèle àko dhi, má ni tá adré ngá tàko 'i.

³Kònò má kòlanzí tá áma ngá tití dhi i lemerèbhá i dré, áma rúbhá fèzo vèle àtsí na gò, má dré mána adrészó lèle àko dhi, má kítswá tá tà dóro àlo kisú ásà ko.

⁴Lèle adré tà letè togó vwàvvà sè, adrészó áyi togó dóro tadhá móndí i dré. Adré lovó kònzi bha móndí i rú ko. Adré áyi afà ko, adrészó drikàdrì ro ko.

⁵Adré kanyò fe móndí i dré ko, adrészó tà dóro nda kisulé áyi tändi dré ko, adrészó áyi togó tayí adrélé aswálé ko. Adré tà kònzi 'ole í rú dhi kí tà kisù vwàvvà ro ko.

⁶Adré lenzélé tà kònzi sè ko. Be ró dhi, adré ína lenzélé tà báti sè.

⁷Lèle adré tà tití dhi kí mvo, adrészó Giká ni ka'i tà tití i sè, adrészó mì bha akódhi véna tà tití i sè, adrészó togó tsì tà tití i sè.

⁸Lèle kítswá tâdzí akílé ko. Dì, à ni Giká ni kúlí longoma pròfétà kya tíni dhi ni tayí. À ni ti twátwa kí tâma kikí. À ni kúlí tâma tà nìnì sè dhi ni tayí.

⁹Tako ko, mà adré àmakya tà ni tsà, adrészó Giká ni kúlí longó pròfétà kya tíni tsà.

¹⁰Dì, lókyá tà tití dhi i dré dra kítswábhá tití dhi tú dhi, tà kítswábhá tsà dhi kí àyikya tavì.

¹¹Má dré tá adrérà'a mvámvá ro dhi 'á dhi, má adré tá tà ta mvámvá àdhya tíni, adrészó tà kisù mvámvá àdhya tíni, adrészó tà ni lanzílé mvámvá àdhya tíni. Di, lókyá má dré atsázó móndí kàdrì ro dhi sè dhi, má tayí tà ànzimvá kya i tití.

¹²Nyànomvá dhi, mà adré ngá no tsà, ngóró ngá líndrí adrélè nôle tálàtálà na dhi tíni. Di, lókyá adrélèpi alìle dhi sè dhi, mà nì ru no Gìká be mì sè. Nyànomvá dhi, mà adré tà ni tsà. Di, lókyá adrélèpi alìle dhi sè dhi, mà nì tà tití dhi kì ni, ngóró Gìká dré áma nile báti dhi tíni.

¹³Nyànomvá dhi, tà na kòni i be: tà ka'ika'i, mì bhàbhà Gìká véna dhi, ìndì lèle. Di, tà kàdrì lavulé tà nda i kòfalé dhi ína lèle 'i.

1 Kòritòbhá i 14

Ti twátwa kí tama, i`ndí` tà longoma pròfétà kya ti` ni dhi

¹Mì kàdré di láti lèle àdhya ni lebè. Àmì kí togó kàdré kpà àtsi ró, kitswázó tà taní Tirí Lólo dré adrélè fèle dhi kí kisú. Lavulé dhi, mì kàdré rinyí adrészó Gìká ni kúlì longó pròfétà kya tíni dhi nì le kisulé dhi kòdhyá.

²Tako ko, dhya adrélèpi ti twá ta dhi adré tà ta móndí i dré ko. Be ró dhi, adré ína tà ta Gìká dré. Àngyá ko, dhya àlo nì tà akodhi dré adrélè tâle dhi ko, dré adrélè tà lùzu ró dhi kí ta Tirí Lólo ni rinyí sè dhi sè.

³Di, dhya adrélèpi Gìká ni kúlì longó pròfétà àdhya tíni dhi adré ína tà ta móndí i dré, kitswázó àyi kí timbà àyi kí tà ka'ika'i na, kitswázó àyi kí kodzó, ìndì kitswázó àyi kí togó kí tindrì.

⁴Dhya adrélèpi ti twá ta dhi adré áyi tändi nì timbà áyi tà ka'ika'i na. Di, dhya adrélèpi Gìká ni kúlì longó pròfétà àdhya tíni dhi adré ína móndyá tití Èkélézyà le dhi kí timbà àyi kí tà ka'ika'i na.

⁵Má adré lèá dhi, mì kàdré tití ti twátwa kí ta. Di, lavulé dhi, má adré lèá mì kàdré Gìká ni kúlì longó pròfétà kya tíni. Tako ko, dhya adrélèpi tà longó pròfétà àdhya tíni dhi lavú dhya adrélèpi ti twátwa kí ta dhi, akodhi nda kàdré ngbà 'í ti twátwa nda kí kúlì andu ngi Èkélézyà ni timbàzo dhi ko dhi.

⁶Áma adrúpi i, kònò má kòtsa tá àmì véna adrélè ti twátwa kí ta dhi, tà nda nì tá kitswá àmì kí ledé ngíni? Di, má kòtsa mána tà lùzu ró tadhálé dhi íbe yà, tà nìnì tâle dhi íbe yà, tà longolé pròfétà àdhya tíni dhi íbe yà, kó ngalè tà tadhálé dhi íbe yà dhi, tà nda nì àmì kí ledé báti.

⁷Kàdré ndìndì ngá ledélé lärí ro ngóró firílí tíni, ìndì kùdhí tíni dhi kí tà sè dhi, à kàdré ngá nda kí tswa wàyá ro dhi, à nì longó adrélè tswàle nda nì ni ngíni?

⁸Kó ngalè, à kàdré gòká vo dóro ko dhi, àdhi nì áyi lotó lìle àdzú bhu dhi nì?

⁹Tà nda kòdhí kókpà kònìnì àmì kí tà sè. Mì kàdré kúlì nile ko dhi kí ta kòdhyá dhi, à nì kúlì mì dré adrélè tâle nda kí andu ni ngíni? Mì nì adré àmìkya kúlì nda kí ta àngyá.

¹⁰Tà bâti ró dhi, ti twátwa adrélé tâle bvò dri dhi i bî. Di, ti adrélépi àndu àko dhi yókódhó.

¹¹Di má kònì kúlí adrélé tâle dhi kî àndu ko dhi, má ni adré móndí twá ro dhya adrélépi kúlí nda kî ta dhi dré, ìndì akódhi nda ni kpà adré móndí twá ro má dré.

¹²Tà nda kókpà kònìnì àmî kî tà sè. Àmî kî togó dré adrélé àtsî ró tà tanî Tîrî Lolo dré adrélé fèle dhi kî kisú dhi sè dhi, mì kâdré tà tanî adrészô Èkèlézyà ni timbà dhi kî nda kòdhya.

¹³Ásà dhi, lè dhya adrélépi ti twá ta dhi kâdré tà zi Gîká tí, kîtswázó kúlí i dré adrélé tâle nda kî àndu ngî dhi bvó.

¹⁴Tâko ko, má kâdré tà ta Gîká be ti twá dhi sè dhi, áma togó adré tà nda kî ta nî. Di, áma tà kisùkisù adré ína tà 'o ko.

¹⁵Di má ni 'òá ngînî? Má ni tà ta Gîká be áma togó sè, adrészô kpà tàá áma tà kisùkisù sè. Má ni longó ngo áma togó sè, adrészô kpà longoá áma tà kisùkisù sè.

¹⁶Tâko ko, mì kâdré Gîká ni rú bha kûle ngbà 'í kúlí angâbhá ámî togó lésè dhi i sè dhi, dhya adrélépi kúlí mì dré adrélé tâle àwoyà fèzo Gîká dré nda kî yi dhi ni kîtswá tàá «Kònìnî! » dhi ngînî? Àngyá ko, akódhi nda nî kúlí mì dré adrélé tâle nda kî àndu ko.

¹⁷Di tâgba mì dré adrészô àwoyà ta Gîká dré dhi, mì adré mína dhya nda ni timbà akódhi ni tà ka'ika'i na ko.

¹⁸Má adré àwoyà ta Gîká dré, má dré adrélé ti twátwa kî ta àmî tití dhi kya kî lavú dhi sè.

¹⁹Di, lîsâmbò na dhi, má dré kúlí nzi móndí i dré nile dhi kî tâle àyî kî tadházó dhi dôro lavûlé, má dré kúlí ngùlù-mudrî dhi kî tâle ti twá sè dhi rûsè.

²⁰Áma adrúpi i, mì kâdré tà kisù ngóró ànzimvá kya tití ko. Mì kâdré tà 'o ànzimvá kya tití ngbà 'í tà kònzi 'òma ni tà sè. Di, tà kisùma ni tà sè dhi, mì kâdré tà 'o ngóró móndí li'wâbhá dre dhi kya tití.

²¹Gîká ni Kúlí adré tàá dhi: «Míri tà dhi: Má ni tà ta móndyá kòdhî i dré móndí adrébhá ti twátwa kî ta dhi i sè, ìndì móndí twá kî kúlí i sè. Di, tâgba dré adrészô kònìnî dhi, i kîtswá àyîkya áma yi ko. »

²²Ásà dhi, Gîká bhâ ti twátwa kî tâma, kîtswázó áyî rînyí tadhá móndyá ka'ibhá dhi i dré ko, be ró dhi, móndyá ka'ibhá ko dhi i dré. Di, bhâ ína tà longoma prôfétâ kya tití dhi, kîtswázó áyî rînyí tadhá móndyá ka'ibhá dhi i dré, móndyá ka'ibhá ko dhi i dré ko.

²³Di àmî móndyá Èkèlézyà le ni i, mì kòkimô ru tití adrélé ti twátwa kî ta gò, móndí ka'ilepi ko dhi 'i yà, kó ngalè móndí tà nda ni nilepi ko dhi 'i yà dhi dré fîzo àmî kî yi dhi, a ni tâá dhi, ngá kizá àmî kî drì dre.

²⁴Dì, mì kàdré àmìkyá tití Gìká nì kúlì longó pròfétà kya tñi gò, móndí ka'ilepi ko dhi 'i yà, kó ngalè móndí tà nda nì nilepi ko dhi 'i yà dhi dré fízo àmì kì yi dhi, a nì áyi tàkonzì ni àmì kì kúlì i sè, adrészó ka'ia i tàkonzì lìyí 'i káyà dhi.

²⁵Dì tà tití dré zùle áyi togó na dhi kì apfò ngádra 'á gò, dré dhèzo áyi mì bha kìní na, Gìká nì lindrì bhàzo, tàzoá dhi: «Gìká àmì kòfalé be báti! »

Tà 'òma mìbhalé tí li` sámbò na dhi

²⁶Áma adrúpi i, à kàdré di 'òá ngíni? Mì kàdré ru kìmó dhi, àmì kì àlo nì kïtswá longó ngo, àzya nì nì kïtswá tà tadhá, àzya nì nì kïtswá tà lùzu ró dhi nì tadhá, àzya nì nì kïtswá ti twá ta, àzya nì nì kïtswá ti twá nda nì kúlì àndu ngi. Dì mì kàdré tà tití nda kì 'o kïtswázó móndyá Èkélézyà le dhi kì tîmbà àyi kì tà ka'ika'i na.

²⁷À kàdré ti twátwa kì ta dhi, adré lèá dhi, ngbà 'í móndí rì yà, kó ngalè na yà dhi i kàdré ti twátwa nda kì ta dhi àyi. Dì i kàdré ti nda kì ta bvóá bvóá. Adré kpà lèá dhi, dhya àzya kàdré kúlì i dré adrélé tâle nda kì àndu ngi.

²⁸Dì, dhya kïtswálépi kúlì nda kì àndu ngi bwà dhi kàdré yó dhi, lè móndyá nda i kàdré àyikya kíri lìsámbò na. I kàdré ti twátwa nda kì ta àyi kì tändi i dré, ìndì Gìká dré.

²⁹Kàdré móndyá adrébhá Gìká nì kúlì longó pròfétà kya tñi dhi kì tà sè dhi, lè àyi rì yà, kó ngalè na yà dhi i kàdré kúlì nda kì longó, móndyá àruka tití dhi i kàdréró tà i dré adrélé tâle nda kì tabhì lanzílé.

³⁰Dhya àzya adrélépi lirílé dhi kòkisú tà lùzu ró tadhálé dhi dhi, lè dhya adrélépi tá tà ta drìdrì nda kòtayí kúlì tâma.

³¹Dì àmì àlo àlo tití dhi i, mì nì kïtswá Gìká nì kúlì longó pròfétà kya tñi, dhya àlo àzya nì bvó, kïtswázó móndyá tití dhi kì tadhá, ìndì àyi kì kodzó dhi bvó.

³²Adré lèá dhi, móndyá adrébhá tà longó pròfétà kya tñi dhi i kàdré àyi kì togó bha àyi kì rinyí zâle.

³³Tàko ko, Gìká adré tà 'o wàyá ro ko. Be ró dhi, adré ína tà 'o tà kìdríkìdrí na. Ngóró dré adrélé Èkélézyà tití i 'ásè dhi tñi dhi,

³⁴lè tòkó i kàdré kíri lìsámbò na. I kòtâ kúlì ko. Be ró dhi, i kàdré àyi kì bha àyi kì drì kobhá i zâle, ngóró Mósè ni tátrítrí kúlì dré adrélé tâle dhi tñi.

³⁵I kàdré tà i dré lèle nile dhi íbe dhi, i kàdré tà nda kì lizí àyi kì àgo i tí bhàna. Tàko ko, tòkó dré adrélé tà ta lìsámbò na dhi kanyò ro akódhi dré.

³⁶Àmì Kòrítòbhá nì i, mì adré vo tsì kisùá dhi, Gìká nì kúlì apfò àmì kì tändi i vélésè? Kó ngalè, Gìká nì kúlì nda tsa ngbà 'í àmì véna?

³⁷Móndí àruka àmì kòfalé dhi i kàdré àyi kì no pròfétà i ró yà, kó ngalè móndí Tirí Lolo nì rinyí íbe dhi i ró yà dhi, lè àyi nda i kòka'i dhi, tà má dré adrélé tisile àmì dré kòdhì i, tolí Mírí àdhya 'i.

³⁸Dì, i kòka'i kònìnì ko dhi, à kïtswá kpà àyi kì tändi kì ka'i ko.

³⁹Di áma adrúpi i, àmì kí togó kàdré àtsi ró, adrészó Gìká ní kúlí longó pròfétà kya tíni. Mì kòlogá kpà ti twátwa kí tama móndí i dré ko.

⁴⁰Di, adré lèá dhi, mì kàdré àmikya tà tití dhi kí 'o mìbhalé tí, ngóró dré kitswálé Gìká mìlésè dhi tíni.

1 Kòritòbhá i 15

Krísto ní ngàma dràdrà 'ásè dhi

¹Áma adrúpi i, má lè Rúbí Tani má dré longolé àmì dré dhi ní tà 'ole agálé àmì léna. Mì ka'i Rúbí Tani nda gò, mì dré adrészó àmì kí totó tätä driá.

²Rúbí Tani nda sè dhi, Gìká adré àmì kí tindrí, mì kàdré trôle gígí ro tà má dré longolé àmì dré nda rú dhi. Di, mì kàdré 'òá kònini ko dhi, mì ka'i àmikya àngyá.

³Má tadhá àmì dré tà kàdrìkàdrì má dré kisulé kònì i kòdhya: Krísto drà àma kí tákonzì kí tà sè, ngóró tísile Gìká ní Kúlí na dhi tíni.

⁴Di akódhi ní rúbhá bhàzo mógo na gò, kitú ní na sè dhi, dré ngàzo dràdrà 'ásè, ngóró tísile Gìká ní Kúlí na dhi tíni.

⁵Di dré agázó Pétéró kandrá gò, dré agázó àpóstolò mudrí-drì-rì dhi i kandrá.

⁶Àmvolásà dhi, dré agázó lókyá àlo sè móndí ka'ibhá kámá-nzi lavú dhi i kandrá. Àyi nda i kòfalé dhi, móndí bì dhi i dhu rè lídrì íbe. Di, àyi kí àruka i todrà dre.

⁷Di akódhi dré agázó Yàkóbhò kandrá gò, dré gózo agálé àpóstolò tití dhi i kandrá.

⁸Àyi tití nda i àmvolésè dhi, dré kpà agázó áma tändí kandrá, tágba má dré tá adrészó ngóró mvámvá tile lókyá dóro sè ko dhi tíni dhi.

⁹Tako ko, ma móndí tako lavulé àpóstolò tití dhi i kòfalé dhi 'i. Má kitswá ndìndì adrélé zile àpóstolò ro dhi ko, má dré tá móndyá Gìká ní Èkélézyà le dhi kí mì pfòle dhi sè.

¹⁰Di, Gìká ní togó taní bhàle má rú dhi sè dhi, ma ngóró má dré adrélé ándrò kònìdhi tíni. Akódhi bhà áyi togó taní nda má rú àngyá ko. Tako ko, má 'o mána àzí àpóstolò àruka tití dhi kya kí lavú. Tà báti ró dhi, má 'o àzí nda ma ko. Be ró dhi, Gìká ní togó taní adrélépi tà 'o má léna dhi 'o ína àzí nda nì.

¹¹Ásà dhi, kàdré ma 'i yà, kó ngalè àyi nda 'i yà dhi, tà nda kòdhì i tà mà dré adrélé longolé ìndì mì dré ka'ile dhi 'i.

Móndyá dràbhá dre dhi kí ngàma dràdrà 'ásè dhi

¹²Di, mà kàdré kó longoá dhi Krísto nga dràdrà 'ásè 'i dhi, móndí àruka àmì kòfalé dhi i adré di àyikya tàá dhi, móndyá dràbhá dre dhi i kitswá ngàle dràdrà 'ásè ko dhi ngíniningíni ró?

¹³Kònò ngangà dràdrà 'ásè dhi kàdré tá yó dhi, Krísto nga tá kpà dràdrà 'ásè ko.

¹⁴Dì Krísto kònga tá dràdrà 'ásè ko dhi, tà mà dré adrélé longólé dhi ní tá adré tà tåko 'i, ìndì àmì kí tà ka'ika'i ní tá adré tà tåko 'i.

¹⁵Kòdhi íbe dhi, mà ní tá adré Gìká ní tà longóbhá kinzò sè dhi 'i. Tåko ko, mà longó àmakya Gìká ni tà tåzoá dhi, akódhi tingá Krísto dràdrà lésè dre dhi 'i. Dì, móndyá dràbhá dre dhi i kòkítswá tá ngàle dràdrà 'ásè ko dhi, Gìká tingá tá kpà Krísto dràdrà lésè ko.

¹⁶Tåko ko, móndí i kòkítswá tá ngàle dràdrà 'ásè ko dhi, Krísto nga tá kpà dràdrà 'ásè ko.

¹⁷Dì Krísto kònga tá dràdrà 'ásè ko dhi, àmì kí tà ka'ika'i ní tá adré àngyá, ìndì mì ní tá adré dhu rè àmì kí tåkonzi na.

¹⁸Kòdhi íbe dhi, móndyá Krísto ni ka'ibhá gò i dré todràzo dhi kí tà akí tá dre.

¹⁹Kònò mà kàdré tá ngbà 'í mì bha Krísto véna lídrì kònìdhi ní tà sè dhi, mà ní tá adré kizàbhá 'i móndyá àruka tití dhi kí lavú.

²⁰Dì, tà båti ró dhi, Krísto nga dràdrà 'ásè, ngóró dhya ngàlepi drìdrì móndyá dràbhá àruka tití dhi i kandrána dhi ró.

²¹Tåko ko, ngóró dràdrà dré atsálé móndí i kòfalé móndí àlo dhi sè dhi tití dhi, ngangà dràdrà 'ásè dhi atsá kókpà móndí àlo dhi sè.

²²Ngóró móndyá tití angábhá Àdámà lésè dhi i dré adrélé dràle dhi tití dhi, móndyá tití ru amúbhá Krísto be dhi kí adrí.

²³Dì, móndí àlo àlo tití dhi kí adrí àyi kí tåndi kí lókyá sè. Krísto adrí ína drìdrì móndyá àruka tití dhi i kandrá nì. Dì lókyá dré dra agòzo dhi tú dhi, móndyá akódhi àdhya kí adrí.

²⁴Àmvolásà dhi, lókyá kùdù ní atsá. Lókyá nda sè dhi, Krísto ni tirí kònzi tití ópí kàdrì ro ìndì rinyi ró dhi kí tà 'o akílé, rinyi tití adrészó òpì nya dhi íbe gò, Òpì logózó Gìká Atá drígá.

²⁵Tåko ko, lè Krísto kàdré òpì nya tsàle lókyá Gìká dré dra akódhi ní kàribhá tití dhi kí bhàzo adrélé akódhi ní pá zàle dhi 'á.

²⁶Kàribhá ní kùdù dré dra tà ní ní 'òzo akílé dhi, dràdrà 'i.

²⁷Àngyá ko, Gìká ni Kúlí adré tåá dhi: «Gìká bhà tà tití dhi i akódhi ní pá zàle. » Dì tà tisile kòdhi kàdré tåá «tà tití dhi 'i» kònini dhi, adré Gìká ni tåndi ní bha lána ko. Tåko ko, Gìká nda dhya adrélépi tà tití nda kí bha Krísto ni pá zàle dhi 'i.

²⁸Dì akódhi kònì dra 'òá kònini dhi, Krísto, Gìká ni Mváagó nda ní áyi tåndi ní bha Gìká tà tití dhi kí bhàlepi áyi pá zàle nda zàle, Gìká kàdréró tà tití dhi i drile.

²⁹Dì, ngangà dràdrà 'ásè dhi kàdré ína yó dhi, móndyá adrébhá båtísimò do móndyá dràbhá kí rú sè dhi i adré 'òá kònini àdho tà sè? Móndyá dràbhá dre dhi i kòkítswá ngàle dràdrà 'ásè ko dhi, à adré båtísimò do àyi kí rú sè àdho 'òzo?

³⁰Àma ró dhi, mà adré kpà àma kí lídrì fe adrélé dràdrà mìle lókyá tití i sè àdho tà sè?

³¹Tàko ko, ma mána dràdrà mìle kítú àlo àlo tití dhì i sè. Tà nda tà báti 'i, ngóró má dré adrélé áma drì bha kuru àmì kì tà sè Yésu Krísto àma kì Mírì na dhì tíni.

³²Kònò má kòpfu tá ru kà'wá àtrá íbe Èfésò na ngbà 'í móndí kì tà sè dhì, má ni tá àdho tà doro kisú ásà kòdhya? Mónyá dràbhá dre dhì i kòkítswá ngàle dràdrà 'ásè ko dhì, «Mà kàdré ngá nya, adrészó ngá mvu! Tàko ko, kìdru, mà ni dra dràdrà. »

³³Mì kòtayí àmì adrélé litílé ko: «Ru sùma móndí kònzi íbe dhì adré dhyá kì tà doro kì kizá. »

³⁴Mì kògò dì adrélé tà kisù doro. Mì kòtayí kpà tàkonzi 'òma. Tàko ko, móndí àruka àmì kòfalé dhì i nì àyikya Gìká ko. Má adré tà kòdhì ni ta kanyò fèzo àmì dré.

Rúbhá móndí dra ngabhá dràdrà 'ásè dhì kya

³⁵Di, à ni kítswá lizíá dhì: «Mónyá dràbhá dre dhì kì nga dràdrà 'ásè ngíni? I ni nga rúbhá ngíni dhì sè? »

³⁶Tà lizílé nda tà azaaza 'i! Lò'wa mí dré adrélé kidhílè dhì kòdrà ko dhì, kítswá ína apfòle lídrì ro ko.

³⁷Mí dré adrérà'a lò'wa kidhí dhì 'á dhì, mí adré ngá dra apfòlepi dhì ni kidhí kòdhya ko. Be ró dhì, mí adré ngbà 'í lò'wa kidhí kòdhya, kàdré ngánò lò'wa 'i yà, kó ngalè ngá àzya ni lò'wa 'i yà dhì.

³⁸Dì Gìká adré rúbhá tídhí dhì ni fe lò'wa nda dré, ngóró i dré adrélé lèle 'ole dhì tíni. Lò'wa àlo àlo tití dhì i dré dhì, adré rúbhá fe adrélé àyi kì tändi kya ró.

³⁹Ngá tití dhì kì zá kandra àlo ko. Móndí kì zá ni kárá twá, kà'wá kì zá ni kárá twá, àrí kya ni kárá twá, ìndì kosyá kya ni kárá twá.

⁴⁰Kòdhì íbe dhì, rúbhá bhù àdhya i be, ìndì rúbhá bvò àdhya i be. Dì rúbhá bhù àdhya kì lagulagu twá rúbhá bvò àdhya kya rúsè.

⁴¹Kítú ni lagulagu twá, mbă ni lagulagu twá, ìndì bhìbhínyà kì lagulagu twá. Ndìndì bhìbhínyà àlo àlo tití dhì kì lagulagu twá àyi kì àzya kya rúsè.

⁴²Tà nda ni adré kókpà kònini móndí dra ngabhá dràdrà 'ásè dhì kì tà sè. Rúbhá adrélé sile kìní na ngá adrélépi ñwàle ñwanjwà dhì ró dhì, ni nga rúbhá kítswálépi ñwàle bwà ko dhì ró.

⁴³Rúbhá adrélé sile lindrì àko dhì, ni nga rúbhá mìlanzìlanzi ro dhì ró. Rúbhá adrélé sile rúbhá yàyà ro dhì, ni nga rúbhá rìnyi ró dhì ró.

⁴⁴Rúbhá adrélé sile rúbhá bvò àdhya ró dhì, ni nga rúbhá adrélépi Tírí Lólo ni lídrì íbe dhì ró. Ngóró rúbhá bvò àdhya dré adrélé be dhì tíni dhì, rúbhá adrélépi Tírí ni lídrì íbe dhì kókpà be.

⁴⁵Ásà dhì, Gìká ni Kúlí adré tàá dhì: «Móndí drìdrì, Àdámà atsá móndí lídrì íbe dhì ró. » Dì, Àdámà kùdù ro dhì atsá ína Tírí adrélépi lídrì fe dhì ró.

⁴⁶Dì, rúbhá Tírí àdhya atsá drìdrì ni ko. Be ró dhì, rúbhá bvò àdhya atsá ína 'íká, gò rúbhá Tírí àdhya dré atsázó ndò.

⁴⁷Móndí drìdrì nda apfò tòpfulíndrí bvò àdhya lésè. Di, móndí kùdù ro nda apfò ína bhù lésè.

⁴⁸Móndyá bvò àdhya i ngóró móndí apfòlepi bvò lésè nda tíni. Di, móndyá bhù àdhya i àyikya ngóró móndí apfòlepi bhù lésè nda tíni.

⁴⁹Ngóró mà dré adrélé lású íbe móndí apfòlepi bvò lésè nda àdhya tíni dhi tíni dhi, mà ní adré kókpà lású íbe móndí apfòlepi bhù lésè nda àdhya tíni.

⁵⁰Áma adrúpi i, tà má dré adrélé tâle dhi i, kònì i: Dhyá kí rúbhá i kàrì ní be dhi i kitswá file Gíká ni Òpì na bwà ko. Ngá adrélépi ñwàle ñwañwà dhi kitswá file ngá kitswábhá ñwàle bwà ko dhi i kòfalé bwà ko.

⁵¹Mì yi rè ká! Má adré tà lùzu ró dhi ní ta àmi dré kòdhya: Áma tití dhi i kòfalé dhi, móndí àruka i kitswá dràle ko. Di, àma tití dhi kí rúbhá kí ru ladzá

⁵²lókyá mvá tsà mì atswàma àdhya tíni dhi sè, gòká kùdù dré ngorà'a. Tàko ko, à ní gòká vo gó, móndyá dràbhá dre dhi i dré ngàzo dràdrà 'ásè rúbhá kitswábhá ñwàle bwà ko dhi íbe. Di àma kí rúbhá kí ru ladzá.

⁵³Tàko ko, lè rúbhá adrélépi ñwàle ñwañwà kònìdhi kòladzá ru atsálé rúbhá kitswálépi ñwàle bwà ko dhi ró. Lè rúbhá adrélépi dràle dràdrà kònìdhi kòladzá ru atsálé rúbhá kitswálépi dràle bwà ko dhi ró.

⁵⁴Di rúbhá adrélépi ñwàle ñwañwà nda kònì ru ladzá atsálé rúbhá kitswálépi ñwàle bwà ko dhi ró dhi, ìndì rúbhá adrélépi dràle dràdrà nda kònì ru ladzá atsálé rúbhá kitswálépi dràle bwà ko dhi ró dhi, tà tisìle Gíká ni Kúlí na kònìdhi ní ru 'o: «À lavú dràdrà ní rìnyí, tà ní ni 'òzo akílé dhi dre!

⁵⁵Dràdrà, ámi rìnyí móndí kí lavúzó dhi ángwà? Dràdrà, ámi rìnyí móndí kí tupfúzó todràle dhi ángwà? »

⁵⁶Dràdrà ní rìnyí adrészó móndí kí tupfú todràle nda, tàkonzì 'i. Di tàkonzì nda ní rìnyí angá tátrítrí kúlí lésè.

⁵⁷Di, mà kàdré àmakya àwoyà fe Gíká dré, dré adrélé àma kí 'o tàkonzì lavú dràdrà be àma kí Míri Yésu Krísto ní rìnyí sè dhi sè!

⁵⁸Ásà dhi, áma adrúpi má dré lèle tò ní i, mì kàdré àmi kí totó tätä. Mì kòtayí àmi tà dré kízílé àlomvá ko. Mì kàdré ngbú àmi kí fe adrélé Míri ní àzí 'o adrészó lìle ába drìdrì. Tàko ko, mì ní tâle dhi, àzí mì dré adrélé 'ole Míri na dhi kitswá dràle àngyá ko dhi be.

1 Kòritòbhá i 16

Làfa lokólé móndyá ka'ibhá Yèrúsalémà na dhi i dré dhi

¹Kàdré làfa mì dré adrélé lokólé móndyá Gíká àdhya Yèrúsalémà na dhi i dré dhi ní tà sè dhi, mì kàdré 'òá ngóró má dré tâle Èkélézyà Galàtíyà na dhi i dré dhi tíni. ²Kítú ní àlo pósò àlo àlo tití dhi kya sè dhi, àmi àlo àlo tití dhi i mì kàdré làfa mì dré kisúlé dhi

ní àruka bha gàrà dri. Mì kàdré 'òá kònìnì kitswálé má kònì dra tsa dhi, mì kòlokóró làfa lókyá nda sè ko.

³Dì má kòtsa dre dhi, má ní wárágà kì fe móndyá mì dré dra kipèle dhi i dré gò, àyi kì mùzo ngá mì dré adrélé fèle nda kì adzí Yérúsalémà na.

⁴Kòkitswá má dré kpà lìzo dhi, mà ní li túmání àyi íbe.

Atsí Pólò dré lèlè tolé dhi

⁵Má kònì dra lavú bvò Mákèdònýà àdhya 'ásè dhi, má ní tsa àmì véna. Tàko ko, má ní lavú Mákèdònýà 'ásè.

⁶Àruka ní, má ní adré àmì véna lókyá be vvàvvà ro tsà. Àruka ní, má ní ndìndì lókyá kidhì àdhya ní letè lavulé àmì véna, mì kògòrò áma ledé má dré lìzo àrà má dré dra lìzo lána dhi na.

⁷Tàko ko, má lè àmì kì nôle ngbà 'í lókyá tsà sè má dré adrérà'a lavulé dhi 'á ko. Be ró dhi, Míri kòlè dhi, má adré lèá gile àmì ta.

⁸Nyànomvá dhi, má ní adré kònwa Èfésò 'a tsàle gwányá Pàtèkótè àdhya na.

⁹Tàko ko, Giká nzì láti má dré adrészó àzí kàdrì dhi ní 'o kònwa, gba móndí bì dhi i kàdré ligílé má rú yà dhi.

¹⁰Tímòtéyò kòtsa àmì véna dhi, mì kò'o akódhì doro, kàdréró àmì kòfalé tirì àko. Tàko ko, akódhì adré Míri ní àzí 'o mána tíni.

¹¹Adré dì lèá dhi, dhya àlo kàyízè akódhì ko. Akódhì dré adrérà'a 'ole agòle dhi 'á dhi, mì kòledé akódhì, kàgòrò má vélé togó be kìdríkìdrì. Àngyá ko, má adré akódhì ní letè adrúpi àruka íbe.

¹²Kàdré àma kì adrúpi Àpólò ní tà sè dhi, má kodzó tá akódhì togó wáyi sè, kòlìrò àmì véna àma kì adrúpi àruka íbe. Dì, akódhì lè tá ína lìle nyànomvá ko. Dì a ní dra lókyá doro nda lìzo ndò.

¹³Lè mì kàdré támìga dri, adrélé àmì kì totó tätä àmì kì tà ka'ika'ì na. Mì kàdré togó tsì, adrészó kpà rìnyi ró.

¹⁴Mì kàdré kpà tà tití dhi kì 'o lèlè sè.

¹⁵Mì ní tâle dhi, Sètèfánà i móndyá akódhì ni dzó lé dhi íbe dhi i tá móndí Yésu ni ka'ibhá drìdrì bvò Àkayà àdhya na dhi 'í dhi be. Dì i fè àyi adrélé tà 'o móndyá lolo Giká àdhya i dré. Áma adrúpi i, má adré àmì kì kodzó,

¹⁶mì kàdréró àmì kì bha móndyá adrébhá tà 'o àyi nda kya tíni dhi i zàle, ìndì móndyá tití adrébhá àzí 'o landèzo túmání àyi íbe dhi i zàle.

¹⁷Má adré lenzélé Sètèfánà kì atsama Fòrùtùnátò íbe Àkayíkò be dhi ní tà sè. Àyi nda i 'o má dré tà tití mì dré kitswálé 'ole bwà ko dhi i dre.

¹⁸I tindrì áma togó ngóró i dré kpà 'ole àmì dré dhi tíni. Mì kàdré dì móndí lású be kònìnì dhi kì tà bha kuru.

Mòdo kùdù

¹⁹Ekèlézyà bvò Àsíyà àdhya lé dhi ì fè mòdo àmì dré. Àkílà i Pìrsíkà be dhi ì fè kpà mòdo àmì dré togó wáyi sè Mírì Yésu na, túmání móndyá Èkèlézyà àdhya adrébhá ru kimó àyì kí dzó lé dhi íbe.

²⁰Àma kí adrúpi tití kònwa dhi ì fè kpà mòdo àmì dré. Àmì ró dhi, mì kòfè mòdo adrézó ru kamú àmì kòfalésè lèle sè.

²¹Ma, Pólò, má adré kúlí kònì kí tísì áma tàndi ní drígá sè, mòdo fèzo àmì dré.

²²Dhya àlo kàdré Mírì Yésu ní le ko dhi, tátrítrí kàdré akódhí dri! Mírì, mí kàlì wà!

²³Mírì Yésu ní togó taní kàdré àmì íbe!

²⁴Má adré àmì kí le tití Yésu Krísto na.

2 Kòrítòbhá †

2 Kòrítòbhá † 1

Pólò ni mòdo fèma

¹Ma, Pólò, bhàle adrélé Yésu Krísto ni àpóstolò ro ngóró Gìká dré lèle dhi tíni dhi, túmání àma kí adrúpi Tímótéyò be dhi, mà adré wárágà kònìdhi ni tisì àmi, Èkélézyà Gìká àdhya Kòrítò na dhi dré, túmání móndyá lolo tití Gìká àdhya bvò Àkáyà àdhya na dhi íbe.

²Gìká àma kí Atá i Míri Yésu Krísto be dhi † kòbhà àyi kí togó taní àmi rú, ìndì † kòfè tà kìdríkìdri àmi dré!

Gìká adré móndí † kí togó tindrí †

³Rúku kàdré Gìká, àma kí Míri Yésu Krísto ni Atá dré! Akódhi nda, àma kí Atá adrélépi áyi togó dóro tadhá àma dré dhi 'í, ìndì Gìká adrélépi àma kí togó tindrí lavúlé dhi 'í.

⁴Adré àma kí togó tindrí àma kí kizà tití dhi i na, mà kòkitswáró kpà móndí àruka kí togó tindrí àyi kí kizà tití dhi i na, ngóró Gìká dré àma kí tändi kí togó tindrile dhi tíni.

⁵Tako ko, ngóró kizà Krísto dré nyàle dhi † dré adrélé gàle àma léna bĩ dhi tíni dhi, Gìká adré kókpà àma kí togó tindrí lavúlé Krísto sè.

⁶Mà kàdré kizà nya dhi, mà adré nyàá mì kòkisúró togó tindrìma túmání lídrì kóná vésè kólyá dhi be be dhi bvó. Gìká kàdré àma kí togó tindrí dhi, adré tindrìá kitswázó kókpà àmi kí togó tindrí, mì kàdréró togó tsì kizà tití mì dré adrélé nyàle àmakya tíni dhi i sè.

⁷Dì mà adré mì bha Gìká véna àmi kí tà sè. Tako ko, mà nì tâle dhi, ngóró mà dré adrélé kizà nya túmání àmi íbe dhi tíni dhi, mà nì kókpà togó tindrìma kisú túmání àmi íbe dhi be.

⁸Àma kí adrúpi i, mà adré lèá mì kònì ngalè mà nya tá kizà bvò Àsíyà àdhya na ngíni ya dhi. Kizà nda ñò tá àma tà tändi ró, àma kí rinyí lavúzó gò, mà dré àma kí mì bhàma kitswázó adrílé dhi ni tayízó.

⁹Àma léna dhi, sù ngóró à ñò tá tà àma dri kítswálé dràdrà sè na tíni. Di, tà nda 'o tá ru kònini, mà kàdréró mì bha àma kí tändi i dri ko, be ró dhi, Gìká adrélépi móndí kí tingá dràdrà lésè dhi dri.

¹⁰Akódhi nda apá àma dràdrà lású be kònini nda lésè nì. A nì go kpà àma kí apá nì. Mà adré dì àma kí mì bha akódhi véna, kògoró adrélé àma kí apá.

¹¹Àmi ró dhi, mì adré kpà àma kí ledé, mì dré adrélé tà zi Gìká tí àma dré dhi sè. Di ásà dhi, móndí zyandre dhi kí tà taní Gìká dré dra 'ole àma dré dhi kí no, i dré tà zile akódhi tí àma dré dhi sè gò, i dré àwoyà fèzo akódhi dré àma kí tà sè.

Pólò ladzá tà i † dré tá kisùle 'ole dhi

¹²Tà mà dré adrészó drì bha kuru ásà dhi, tà kònìdhi 'i: Àma kí togó adré tadhá àma léna dhi, mà 'o tà bvò kònìdhi lé, lavulé dhi, àmì kòfalé, togó lolo wáyi angálépi Gìká vélésè dhi sè dre. Mà 'o kònìnì àma móndí ro dhi kí togyá sè ko. Be ró dhi, mà 'o àmakya kònìnì Gìká ní togó taní bhàle àma rú dhi sè.

¹³Àma kí wárágà i léna dhi, mà adré ngbà 'í tà mì dré kitswálé nàle ìndì nile bwà dhi kí tisì àmì dré kòdhya. Di má adré mì bha, mì kòkitswáró tà kònìdhi ní ni dóro,

¹⁴ngóró mì dré kidhólé nile tsà dhi tíni: Kitú àma kí Mírì Yésu dré dra agòzo dhi tú dhi, mì ní kitswá drì bha kuru àma kí tà sè, ngóró mà dré dra drì bhàle kuru àmì kí tà sè dhi tíni.

¹⁵Má dré tá àmì kí tà ka'ile báti dhi sè dhi, má kisù tá drìdrì dhi, má ní tá tsa àmì véna vésè be rì, mì kòkitswáró tá tà taní kisú vésè be rì ká.

¹⁶Àngyá ko, má lè tá tsàle àmì véna, má dré tá adrérà'a lìle Mákèdònýà na dhi 'á, má kònì agò Mákèdònýà lésè dhi, má kògòró tódyá àmì kí no gò, mì kòkitswáró áma ledé lìle Yùdáyà na.

¹⁷Di mì adré kisùá dhi, má dré tá adrérà'a tà kisù 'ole kònìnì dhi 'á dhi, má kisù tá mána tà nda 'ole togó wáyi sè ko? Kó ngalè, mì adré kisùá dhi, má adré mána tà kisù 'ole ngóró móndyá bvò àdhya kya tíni, adrészó tàá «Àyíya» ìndì «Kóko» lókyá àlo sè dhi 'i?

¹⁸Di, Gìká ní tâle dhi, mà dré adrérà'a áyi kúlí longó àmì dré dhi 'á dhi, mà adré tàá «Àyíya» ìndì «Kóko» lókyá àlo sè ko dhi be.

¹⁹Tàko ko, Yésu Krísto, Gìká ní Mváagó, mà dré tà ní ní longózó túmání Sílà íbe ìndì Tímótéyò be àmì dré dhi, adré ína tàá «Àyíya» ìndì «Kóko» lókyá àlo sè ko. Be ró dhi, Krísto nda léna dhi, tà tití dhi i «Àyíya» 'i.

²⁰Àngyá ko, Gìká adré tà tití i dré lazilé dhi kí 'o kitswálé tití Krísto na. Di Krísto nda sè dhi, mà adré tàá «Kàdré kònìnì», adrészó Gìká ní rú bha kùle.

²¹Gìká nda adré àma kí 'o adrélé àma kí totó tätä túmání àmì íbe Krísto na dhi ní. Tàko ko, akódhi zì tá àma,

²²àngì lwàzo àma rú tadházóá dhi, àma móndyá ína 'i káyà dhi. Dré Tirí Lólo bhàzo àma kí togó na, ngóró ngádrì adrélépi tadhá dhi, i ní tà tití i dré lazilé dhi kí afè àma dré dhi tíni.

²³Gìká ní dóro tâle dhi, tà má dré adrélé tâle kònìdhi tà báti 'i káyà dhi. Má kàdré kinzò ta dhi, akódhi kòbhà tà má dri. Má gò tá tsàle tódyá àmì véna Kòritò na ko, má kàpáró àmì kúlí má dré tá adrélé 'ole tâle àmì dri dhi i lésè.

²⁴Mà adré opì le nyàle àmì dri àmì kí tà ka'ika'i ní tà sè ko. Be ró dhi, mà adré àmakya àzí 'o túmání àmì íbe, mì kàdréró gàle arí sè bì. Tàko ko, mì adré àmì kí totó tätä àmì kí tändi kí tà ka'ika'i sè.

2 Kòritòbhá i 2

¹Dì má nò tá dório ni, má dré gòle tsàle àmì véna ko dhi, má kògòró kizà fe àmì dré ko.

²Tàko ko, má kàdré kizà fe àmì dré dhi, àdhi ni go arí fe má dré dhi ni, kàdré àmì má dré kizà fèzo àmì dré dhi 'í ko dhi?

³Dì má tisì tá wárágà àmì dré ngóró má dré tá tisile dhi tíni, má kònì dra tsa àmì véna dhi, má kòkisúró kizà móndyá tá kïtswábhá arí fe má dré dhi i véna ko. Má ka'í tá dhi, má kàdré arí ibe dhi, àmì tití mì ni kókpà adré arí ibe.

⁴Dì má tisì tá wárágà nda àmì dré togó lanzi gàlepi kizà sè bì dhi be, ìndì mìndra ibe bì. Má tisì tá kònìnì kïtswázó kizà fe àmì dré dhi bvó ko, be ró dhi, mì kòniró áma lèle kàdrì àmì véna dhi be dhi bvó.

Dhya tàkonzi` 'olepi dhi ni tàkonzi` trìma

⁵Dhya àlo kòfè kizà dhi, akódhi nda fè kizà ngbà 'í má dré ko. Be ró dhi, fè kizà nda àmì tití dhi i dré, kó ngalè móndí bì àmì kòfalé dhi i dré. (Má lè tà nda ni kitélé ko.)

⁶Tà móndí bì àmì kòfalé dhi i dré ñòle dyha nda dri dhi kïtswá akódhi dré dre.

⁷Dì nyànomvá dhi, adré lèá dhi, mì kòtri akódhi ni tàkonzi, akódhi ni togó tindrìzo, akódhi ni togó nda kòniró kizà dré ñòñò ko.

⁸Má adré dì àmì kí kodzó, mì kògòró tòdhyá àmì kí lèle tadhá akódhi dré.

⁹Má tisì tá wárágà nda àmì kí tabhìzo, nìzoá ngalè mì adré áma kúlí ka'í 'ole tà tití i sè 'í yà dhi.

¹⁰Mì kàdré dyha àlo ni tàkonzi tri dhi, má adré kókpà akódhi nda ni tàkonzi tri. Má kàdré tàkonzi tri dhi, tàkonzi kïtswálé trile dhi kàdré be dhi, má adré triá Krísto kandrá àmì kí tà sè,

¹¹Sàtánà kòkisúró láti àma kí litízó dhi ko dhi bvó. Tàko ko, mà nì tà akódhi nda dré adrélé 'ole àma kí tabhìzo litílé dhi i be.

Pólò ni togó lanzi Trówà na

¹²Má dré tá lìzo Krísto ni Rúbí Taní longó Trówà na dhi, Míri nzì tá láti dra má dré àzì nda ni 'òzo.

¹³Di, tágba kònìnì dhi, áma togó lanzi tá ína, má dré áma adrúpi Títò ni kisúlé kònàle ko dhi sè. Ásà dhi, má dré lazízó móndyá kònàle dhi i tí gò, lìzo bvò Mákèdònýà àdhyà na.

Àma ngóró tàdzí dório Krísto àdhyà ti` ni

¹⁴Dì, mà kàdré àwoyà fe Gíká dré! Tàko ko, akódhi adré ngbú adrélé àma kí tidri, ngóró móndí i dré 'ole lavúlé Krísto na dhi i tíni. Àma sè dhi, adré kpà Krísto ni 'o móndí i dré nile àrà tití i 'ásè, ngóró tàdzí dório adrélépi ngùle móndí i kòfalé dhi tíni.

¹⁵Àngyá ko, àma ngóró tàdzí dóro Krísto dré fèle Gíká dré, adrélépi ngùle móndyá adrébhá lìle lídrì kisú dhi i kòfalé, túmäní móndyá adrébhá lìle dràdrà kisú dhi íbe dhi tíni.

¹⁶Àyi adrébhá lìle dràdrà kisú nda i dré dhi, àma tàdzí dràdrà àdhya tíni. Di, àyi adrébhá lìle lídrì kisú nda i dré dhi, àma àmakya tàdzí lídrì àdhya tíni. Di àdhi ni kitswá tà nda sè nì?

¹⁷Àma ró dhi, mà adré Gíká ni kúlì lagí làfa sè ngóró móndí àruka bĩ dhi kya tíni ko. Be ró dhi, Krísto na dhi, mà adré àmakya kúlì nda ni longó togó wáyi sè Gíká kandrá, Gíká dré àma kí mûle tà nda ni 'o nì dhi sè.

2 Kòritòbhá i 3

Àma ngóró wárágà Krísto dré tisi` le móndi` kí togó na dhi ti` ni

¹Mà adré gòlé vélé àma kí tändi kí tà dóro ta kòdhya? Adré tsì lèá dhi, mà kàdré àma kí tà dóro ki tisì wárágà na fèle àmì dré yà, kó ngalè mà kàdré àmì kí lizí àma kí tà dóro ki tisì wárágà na yà dhi, ngóró móndí àruka i dré adrélé 'ole dhi tíni?

²Àmì kí tändi i wárágà àmakya tisile àma kí togó na, móndyá tití dhi i dré adrélé nàle ìndì nile dhi 'i.

³Bàti, mì adré tadhá ngádra 'á dhi, àmì wárágà Krísto dré tisile àma kí àzí sè dhi 'i. Akódhì tisì wárágà nda wárágà sú sè ko. Be ró dhi, tisì Tírí Gíká lídrì ro dhi àdhya sè. Tisì kpà wárágà nda kírà dri ko. Be ró dhi, tisì móndí kí togó na.

Àma Gíká ni àzí 'obhá tà ti` dhi` dré bhàle ru yìzo móndi` i` be dhi ni tà sè dhi 'i

⁴Mà adré tà nda kòdhì kí ka'i bàti Krísto sè Gíká kandrá.

⁵Di, mà adré àma kí no ngóró móndí kitswábhá tà 'o àyi kí tändi kí rinyí sè bwà dhi i ró ko. Be ró dhi, Gíká adré ína àma kí 'o kitswálé tití dhi nì.

⁶Akódhì 'o àma kitswálé tití, adrélé áyi àzí 'obhá tà tídhì i dré bhàle ru yìzo móndí íbe dhi ni tà sè dhi i ró. Tà tídhì dré bhàle nda angá tátrítrí kúlì tisile dhi lésè ko. Be ró dhi, angá ína Tírí Lólo vélésè. Tako ko, tátrítrí kúlì tisile nda adré móndí kí 'o todràle. Di, Tírí nda adré ína móndí kí 'o adrílé.

⁷Tágba tátrítrí kúlì tisile wárágà pá sè kírà i dri dhi dré tá adrészó dràdrà fe dhi, Gíká 'o tá tátrítrí kúlì nda adrélé mìlanzìlanzì ro, Isérélè ànzì i kòkitswáró Mósè ni mìbhalé no bwà ko lagulagu ni ni tà sè, tágba lagulagu nda dré tá adrészó akílé akíakí dhi.

⁸Kàdré kònini dhi, tà tídhì angálépi Tírí Lólo vélésè nda ni adré di vélé mìlanzìlanzì ro lavulé!

⁹Tà àku adrélépi tá tà bha móndí i dri nda kàdré tá mìlanzìlanzì ro dhi, tà tídhì adrélépi móndí kí bha gyägya Gíká kandrá nda vélé mìlanzìlanzì ro lavulé!

¹⁰Tako ko, tà àku adrélépi tá mìlanzìlanzì ro nda gò vélé adrélé mìlanzìlanzì ro ko, tà tídhì nda ni mìlanzìlanzì dré àku ni ni lavulé dhi sè.

¹¹Tà àku adrélépi tá akílé nda kàdré tá mìlanzìlanzi ro dhi, tà tídhí adrélépi kóná vésè kólyá nda vélé mìlanzìlanzi ro lavulé!

¹²Dì mà dré adrélé mi bha tà nda kòdhi dri dhi sè dhi, mà adré tà tití dhi ki 'o tawà sè.

¹³Àma ngóró Mósè adrélépi tá áyi mìbhalé zu kítá sè, Ìsérélè ànzì i kònòró lagulagu ni adrélépi tá akílé dhi ko dhi tini ko.

¹⁴Dì, Ìsérélè ànzì nda ki tà kisùkisù tá ína tímivá na. Tako ko, atsálé ándrò kònìdhí dhi, i dré adréra'a tà àku Giká dré tá bhale ru yìzo móndí ibe dhi ni kúlì na dhi 'á dhi, kítá àlo nda adré rè dhu àyi ki tà kisùkisù zu. À kitswá ngbà 'í kítá nda ni tingá Krísto ni ka'ima sè.

¹⁵Bàti, atsálé ándrò kònìdhí dhi, i kàdré Mósè ni tárítrí kúlì na dhi, kítá nda adré rè dhu àyi ki tà kisùkisù zu.

¹⁶Dì, dhya àlo kàdré áyi togó adzá Míri vélé dhi, à adré kítá nda ni tingá.

¹⁷Míri nda Tíri 'i. Àrà Míri ni Tíri dré adrészó dhi 'á dhi, tà adrészó móndí ki tri dhi be.

¹⁸Àma tití kítá nda ni tingázó àma ki mìbhalé 'ásè dhi i, mà adré Míri ni mìlanzìlanzi tadhá, ngóró tálàtálà dré adrélé ngá lìndrí tadhá dhi tini. Dì Míri adré àma ki ladzá atsálé áyi tändi tini gó, mà dré adrészó akodhí ni mìlanzìlanzi tadhá adrészó lìle ába dridri. Kòdhi tà Míri adrélépi Tíri 'i nda dré adrélé 'ole ni dhi 'i.

2 Kòritòbhá i 4

Ngá làgí kyàkyà li`drí rùle kìní sè dhi i léna dhi

¹Dì ásà dhi, Giká dré àzí nda ni bhale àma drígá áyi togó dóro sè dhi sè dhi, mà adré àma ki togó tayí adrélé lanzile ko.

²Be ró dhi, mà gá àmakya tà lùzu ró iñdi kanyò ro dhi ki 'oma rè. Mà adré tà 'o túrúpfú sè ko, adrészó kpà Giká ni kúlì ladzá atsálé kinzò ro ko. Be ró dhi, mà adré àmakya tà bàti tadhá ngádra 'á, adrészó àma ki tändi ki tà tadhá móndyá tití dhi i dré kitswálé tabhile àyi ki togó na Giká kandrá.

³Dì, Rúbí Taní mà dré adrélé longolé dhi kàdré ína lùzu ró dhi, adré ngbà 'í lùzu ró móndyá adrébhá lìle dràdrà kisú dhi i dré.

⁴Àngyá ko, giká bvò kòndi àdhya 'o móndyá ka'ibhá ko dhi ki tà kisùkisù atsálé tímivá ro, i kòkitswáró ngádra Rúbí Taní àdhya ni no bwà ko. Rúbí Taní nda adré Krísto, adrélépi Giká ni lìndrí 'i dhi ni milanzìlanzi tadhá kòdhyá.

⁵Tako ko, mà adré àma ki tändi ki tà longó kòdhyá ko. Be ró dhi, mà adré Yésu Krísto ni tà longó kòdhyá, adrészó tadhá dhi, akodhí Míri 'i, iñdi àma, àmi ki marrábà Yésu ni tà sè dhi 'i.

⁶Tako ko, Giká tà tá dhi: «Ngádra kàdré kòle tímivá na! » Dì Giká nda 'o áyi ngádra kòle ngá kazá àma ki togó na dhi ni, mà kònìró áyi mìlanzìlanzi adrélépi lagulé Krísto ni mìbhalé 'á dhi be dhi bvó.

⁷Dì, àma àmakya ngá làgí kyàkyà nda íbe àma léna, tágba mà kàdré ngóró lìdrí rûle kìní sè dhi i tñi yà dhi, tadházóá dhi, rinyí kàdrì lavúlé nda angá ína Gìká vélésè, àma vélésè ko.

⁸Mà adré kizà nya láti tití i sè, dì, kizà nda lavú ína àma ko. Àma kì drì adré abílé, dì, tà nda kizá ína àma kì tà ka'ika'i ko.

⁹À adré àma kì mì pfo, dì, Gìká tayí ína àma ko. À adré àma kì abhé kìní mi, dì, mà drà àmakya ko.

¹⁰Mà adré ngbú adrélé Yésu ni dràdrà todó àma rú, à kàdréró kókpà Yésu ni lídrì no àma rú be dhi bvó.

¹¹Tako ko, à adré ngbú àma adrébhá lídrì ro dhi kì lefè adrélé dràdrà mìle Yésu ni tà sè, à kàdréró kókpà Yésu ni lídrì no àma kì rúbhá adrélépi dràdrà dhi rú.

¹²Dì ásà dhi, àma ngbú ànyi dràdrà mìle, mì kàdréró lídrì íbe be dhi bvó.

¹³Gìká ni Kúlí adré tàá dhi: «Má ka'i dre. Ásà dhi, má dré tà tazo. » Tà ka'ika'i lású be kònini nda sè dhi, mà adré kpà Gìká ni ka'i gò, adrészò tà ta.

¹⁴Tako ko, mà nì tâle dhi, Gìká Míri Yésu ni tingálépi dràdrà lésè dhi ni kókpà àma kì tingá dràdrà lésè túmání Yésu be gò, àma kì 'ozo pfôle àmi íbe í kandrá dhi be.

¹⁵Tà tití mà dré adrélé mvòle dhi i, mà adré mvòá àmi kì tà sè, Gìká ni togó taní kòtsaró móndí zyandre lavúlé dhi i véna gò, àyi kì 'o adrélé àwoyà ta akódhi dré, adrészò akódhi ni rú bha kùle.

¹⁶Ásà dhi, mà adré àma kì togó tayí adrélépi lanzile ko. Tágba àma kì rúbhá dré adrészò ñwàle ñwañwà dhi, Gìká adré àma kì togó 'o atsálé tídhí ro kitú àlo àlo tití i sè.

¹⁷Tako ko, kizà tsàtsà mà dré adrélé nyàle lókyá tsà sè kòdhi i adré àma kì 'o kïtswálé milanzìlanzi kàdrì kizà nda kì lavúlépi ìndì adrélépi kóná vésè kólyá dhi ni kisú.

¹⁸Dì mà adré mì bha ngá kïtswálé nòle mì sè dhi i dri ko. Be ró dhi, mà adré àmakya mì bha tà kïtswálé nòle mì sè bwà ko dhi i dri. Àngyá ko, ngá kïtswálé nòle mì sè dhi i adré ngbà 'í gile lókyá tsà sè. Dì, tà kïtswálé nòle mì sè bwà ko dhi i adré àyikya gile kóná vésè kólyá.

2 Kòritòbhá i 5

Àma kì rúbhá bhù àdhya ni asoma

¹Mà nì tâle dhi, àma kì rúbhá bvò àdhya adrélépi ngóró wémà tñi kònìdhi kòdrà dhi, mà nì dzó àzya dra adrélépi kóná vésè kólyá dhi ni kisú Gìká véna bhù na dhi be. Dzó nda dzó móndí i dré sile nì dhi 'i ko. Be ró dhi, dzó nda dzó Gìká dré sile nì dhi 'i.

²Nyànomvá dhi, mà adré tongólé lovó sè, adrészò àma kì rúbhá bhù àdhya nda ni le asólé àma rú.

³Àngyá ko, mà kònì dra rúbhá nda ni asó dhi, mà kïtswá adrélé bvólílí ro ko.

⁴Bàti, mà dré adrérà'a rúbhá bvò àdhya kònìdhì na dhi, mà adré tongolé, adrészó ngá lanzì todó. Kòdhì adré lèá ko tâle dhi, mà adré rúbhá bvò àdhya kònìdhì ni le tayílé dhi. Dì, mà adré àmakya rúbhá bhù àdhya nda ni le asólé kòdhya, kitswálé rúbhá dràdrà àdhya kònìdhì kòladzáró ru atsálé rúbhá lídrì àdhya ró be dhi bvó.

⁵Giká zì àma tà nda kòdhì ni kisú dhi nì gò, dré Tirí Lolo afèzo àma dré, ngóró ngádrì adrélépi tadhá dhi, í ni tà tití í dré lazilé dhi kì afè àma dré dhi tíni.

⁶Dì ásà dhi, àma kì togó adré ngbú gàle àma kì tà ka'ile dhi sè bì. Mà nì kpà tâle dhi, mà dré adrérà'a rúbhá kònìdhì na dhi 'á dhi, àma vwàvwà ro Míri ni bhà rúsè dhi be.

⁷Tàko ko, mà adré atsílé àma kì tà ka'ika'i sè. Mà adré atsílé ngá mà dré kitswálé nòle mì sè dhi í sè ko.

⁸Bàti, mà adré gàle àma kì tà ka'ile dhi sè bì. Dì àma milésè dhi, dóro ni tá mà dré rúbhá kònìdhì ni tayílé gò, lìzo adrélé Míri bhàna dhi.

⁹Dì, mà adré tà tití dhi kì 'o adrészó Giká ni togó 'o kinílé, gba mà kàdré rúbhá kònìdhì na yà, kó ngalè mà kòtayí rúbhá nda yà dhi.

¹⁰Tàko ko, adré lèá dhi, àma tití mà kòpfò Krísto kandrá, kòtaró àma kì tàbvó, mà kòkisúró tà kitswálépi tà mà dré 'ole rúbhá na dhi i sè dhi, gba tà nda i kàdré tà dóro 'í yà, kó ngalè tà kònzi 'í yà dhi.

Giká amú àma tódhyá ī be Krísto sè

¹¹Dì mà dré Míri ni ròma nile be dhi sè dhi, mà adré móndí kì togó asé akódhì ni ka'i. Giká ni ína àma kì tà dóro. Má adré kisùá dhi, mì nì kókpà àma kì tà dóro.

¹²Mà lè gòle àma kì tändì kì tà dóro ta àmì dré ko. Be ró dhi, mà adré àmakya láti fe àmì dré adrészó drì bha kuru àma kì tà sè, mì kòkitswáró kúlì logó móndyá adrébhá drì bha kuru ngá adrélé nòle mì sè dhi kì tà sè dhi i tí. Bàti, àyì nda i adré drì bha kuru tà móndí kì togó na dhi kì tà sè ko.

¹³Mà kàdré tà 'o ngóró móndí azaaza kya tíni dhi, mà adré 'òá Giká dré. Mà kàdré kó tà 'o tà kisükisù be dóro dhi, mà adré 'òá àmì dré.

¹⁴Tàko ko, Krísto ni lèle adré àma kì fe adrélé tà 'o dhi nì. Àngyá ko, mà dré ka'ile Krísto drà móndyá tití dhi kì tà sè dre dhi sè dhi, mà ka'i kókpà tâle dhi, móndyá tití dhi i todrà túmání akódhì be dre.

¹⁵Dì akódhì drà móndyá tití dhi kì tà sè, kitswálé móndyá adrébhá lídrì ro dhi i kògoró adrélé tà 'o àyì kì tändì i dré ko, be ró dhi, i kàdréró tà 'o akódhì dràlepi gó ngàle dràdrà 'ásè àyì dré nda dré.

¹⁶Dì kidhólé nyànomvá dhi, mà adré dhya àlo no, ngóró móndyá bvò àdhya i dré adrélé nòle dhi tíni ko. Tágba atú dhi, mà dré tá Krísto ni nòzo kònìnì dhi, mà adré gòle vélé akódhì ni no kònìnì ko.

¹⁷Dì dhya àlo kàdré Krísto na dhi, akódhì nda móndí Giká dré bhàle tódhyá adrélé móndí tídhì ro dhi 'í. Tà àku i akí dre. Mì nò rè ká! Tà tití dhi i atsá tà tídhì ro dre!

¹⁸Tà tití nda kòdhì ì angá Gìká vélésè. Akódhì nda amú àma tódhyá í be Krísto sè gò, àzí adrészó móndí kí adrì ru amú tódhyá í be dhì ni bhàzo àma drígá.

¹⁹Tàko ko, Gìká adré móndyá tití bvò àdhya kí amú tódhyá í be Krísto na gò, adrészó vélé àyi kí tàkonzì kí tà bha àyi dri ko. Di fè rúbí ru amuma tódhyá nda àdhya àma dré, mà kàdréró longóá móndí i dré be dhì bvó.

²⁰Di ásà dhì, àma dhya adrébhá Krísto ni tà longó akódhì ni rú sè dhì 'í. Gìká ni tändi adré móndí kí azí àma tí dhì nì. Mà adré di àmì kí ti lizí Krísto ni rú sè: Mì kòtayí àmì Gìká dré amulé tódhyá í be dhì wà!

²¹Tàko ko, Gìká bhà Krísto adrélépi tá tàkonzì àko nda atsálé tàkonzì ro àma kí tà sè, mà kàtsáró móndyá í dré bhàle gyágya Krísto na dhì i ró be dhì bvó.

2 Kòrítòbhá i 6

¹Àma Gìká ni àzíàmu ró dhì i, mà adré àmì kí kodzó, mì kònòró Gìká ni togó taní mì dré kisulé dhì tà tako ró ko.

²Tàko ko, Gìká adré tàá dhì: «Lókyá áma togó taní tadházó dhì sè dhì, má yi tá mi. Kitú móndí kí tìdrízó dhì sè dhì, má ledé tá mi. » Di mì yi rè ká! Nyànomvá kònìdhì, lókyá Gìká dré adrészó áyì togó taní tadhá dhì 'í. Ándrò kònìdhì, kitú Gìká dré adrészó móndí kí tìdrí dhì 'í.

Kizà Pólò dré nyàle, i`ndì` tà dré 'ole Gìká ni àzí sè dhì i

³Mà adré tà kítswábhá móndí kí 'o ledhélé tàkonzì na dhì kí 'o ko, à kòkítswáró tà ta kònzi àzí Gìká dré bhàle àma drígá dhì rú ko.

⁴Be ró dhì, mà adré àma kí tadhá Gìká ni marrábà i ró tà tití i sè: Mà adré àma kí togó tsì kizà tití mà dré adrélé nyàle dhì i na, ìndì tà kòkóròko adrébhá atsálé àma rú dhì i na.

⁵Lókyá àruka i sè dhì, à tswà àma, àma kí lebhézó bădzó na. À kodzó móndí i ligílé àma rú. Mà 'o àzí kòkóròko landèzo. Mà ko ayí ko, kó ngalè mà ayí tâbirí sè.

⁶Mà adré àmakya tà 'o togó lolo sè, tà nìnì sè, togó vwàvvà sè, togó doro sè, Tíri Lolo ni rinyí sè, ìndì lèle túrúpfú àko dhì sè.

⁷Mà adré tà bâti ta, adrészó tà 'o Gìká ni rinyí sè. Mà adré àdzú ngá kí ru àma kí dríágó lésè ìndì àma kí lìdzí lésè, adrészó tà gyágya 'o ásà. ⁸Mà adré Gìká ni tà 'o, gba à kàdré àma kí lìndrì bha yà, kó ngalè à kàdré kanyò fe àma dré yà dhì, gba à kàdré àma kí rú ta doro yà, kó ngalè à kàdré àma kí rú ta kònzi yà dhì. À adré àma kí zi móndí kí litíbhá i ró, tákò mà adré àmakya tà bâti ta.

⁹À adré àma kí no ngóró móndí nile ko dhì i ró, tákò móndí bǐ dhì i nì àma be. À adré àma kí no ngóró móndí dràdrà mìle dhì i ró, tákò àma rè dhu lídrì íbe. À adré tà jo àma dri, di, à pfu ína àma dràle ko.

¹⁰À adré kizà fe àma dré, di, mà adré àmakya lenzélé. À adré àma ki no lemerèbhá ro, di, mà adré àmakya móndí bì dhi ki 'o atsálé ngábhá ro. À adré àma ki no ngá àko na tíni, di, àma àmakya ngá tití dhi íbe.

¹¹Ami Kòritòbhá ni i, mà tà tà àmi dré ngádra 'á. Mà tadhá àma ki togó dóro àmi dré dre.

¹²Mà gá àma ki lèle tadhama àmi dré ko. Di, mì gá àmikya àmi ki lèle tadhama àma dré dre.

¹³Má adré tà kònìdhí ni ta àmi dré ngóró áma ànzí i dré dhi tíni: Mì kàdré àmi ki togó dóro tadhá àma dré wà, ngóró mà dré adrélé àmakya ni tadhá àmi dré dhi tíni!

Ru amuma móndyá ka'ibhá ko dhi i' be ko dhi

¹⁴Lè mì kàdré ru amú móndyá ka'ibhá ko dhi íbe ko. Tako ko, tà gyägya ni kitswá tsì ru su tà kònzi be bwà? Ngádra ni kitswá tsì ru amú tímivá be bwà?

¹⁵Krísto ni kitswá tsì ru yi Dzáborò be bwà? Di móndí Yésu ni ka'ilepi dhi ni kitswá ru su móndí ka'ilepi ko dhi be ngíningíni ró?

¹⁶Gíká ni tépelò ni kitswá tsì ru yi gíká tako íbe bwà? Tako ko, àma Gíká lídrì ro dhi ni tépelò 'i. Ngóró Gíká ni tändi dré tâle dhi tíni: «Má ni adré àyi kòfalé, adrélé atsílé túmání àyi íbe. Má ni adré àyi ki Gíká ro, i ni àyikya adré áma móndyá i ró.

¹⁷Di Míri adré tàá dhi: Mì kàpfò àyi kòfalésè,

àmi ki bha adrélé twá àyi rúsè. Mì kòtabè ngá àlo ndí ró dhi ko gó, mà kòka'iró àmi.

¹⁸Míri rinyí líyí ro dhi adré tàá dhi: Má ni adré àmi ki Atá ro, mì ni àmikya adré áma ànziàgo i ró, ìndi áma ànzítökó i ró. »

2 Kòritòbhá i 7

¹Áma arúpi má dré lèle tò ni i, mà dré adrélé tà Gíká dré lazílé nda íbe dhi sè dhi, lè mà kòtemvé àma tà tití kitswábhá àma ki 'o atsálé ndí ró rúbhá na, ìndi togó na dhi i sè. Mà kàdré kpà àma ki fe adrélé lolo kitswálé tití Gíká mìlésè, akódhi ni ròma na.

Pólò ni ari' Kòritòbhá ki tà sè dhi

²Mì kòka'i àma dòle àmi ki togó na wà! Mà 'o àmakya dhya àlo kònzi ko. Mà kizá dhya àlo ni tà ka'ika'i ko. Mà lití dhya àlo ngá kisúzó drígásà dhi ko.

³Má adré tà kòdhí ki ta kitswázó tà bha àmi dri ko. Tako ko, ngóró má dré tâle àmi dré dre dhi tíni dhi, àmi ki tà àma ki togó na. Mà ka'i kpà adrélé túmání àmi íbe, kàdré lídrì na yà, kó ngalè dràdrà na yà dhi.

⁴Má adré àmi ki tà ka'i tà bâti ró, adrészó drì bha kuru àmi ki tà sè. Di áma togó andrà gó, mà dré adrészó gâle arí sè bì, tágba mà dré adrészó kizà nya lavulé dhi.

⁵Tako ko, mà dré tá atsázó Mákèdònýà 'a dhi, mà kisú tá lókyá lovózó dhi àlomvá ko. À fè tá kizà àma dré láti tití i sè. Áma tá lawà íbe àma rú, adrészó kpà tirí íbe àma léna.

⁶Dì, Gìká adrélépi móndí kizà ro dhi kì togó tindrì dhi, tindrì ína àma kì togó Títò nì atsama sè.

⁷Dì, ngbà 'í akódhi nì atsama sè ko, tindrì kpà àma kì togó, àmì kì tändì mì dré tá kpà akódhi nì togó tindrìle dhi sè. Tàko ko, akódhi tití tá àma dré, àmì kì lovó áma nòzo dhi nì tà, àmì kì kizà tà ru 'olepi dhi sè dhi nì tà, ìndì àmì kì togó àtsi ró áma tà sè dhi nì tà. Dì áma togó dré gòzo vélé gàle arí sè wáláká nì ni lavú.

⁸Tágba má dré tá kizà fèzo àmì dré áma wárágà sè dhi, áma togó ína kizà ro tà nda sè ko. Tà báti ró dhi, áma togó tá kizà ro, lókyá má dré yìzoá tâle dhi, wárágà nda fè tá kizà àmì dré, tágba dré tá adrészó ngbà 'í lókyá tsà sè dhi.

⁹Dì, nyànomvá dhi, má adré mána lenzélé. Má adré lenzélé àmì kì kizà nda sè ko, be ró dhi, àmì kì kizà nda dré àmì kì 'ole togó ladzá dhi sè. Tàko ko, mì atsá tá àmikya kizà ro ngóró Gìká dré tá lèle dhi tíni. Ásà dhi, mà 'o àmì kònzi àlomvá ko.

¹⁰Angyá ko, à kàdré kizà ro ngóró Gìká dré adrélé lèle dhi tíni dhi, kizà nda adré dhyá kì 'o togó ladzá, à kàdríró be dhi bvó. Dì kizà lású be kònini nda kitswá gile dhyá léna bwà ko. Dì, kizà bvò kòndì àdhyà adré ína dhyá kì dri lìle dràdrà na.

¹¹Mì nò rè ngalè kizà mì dré nyàle ngóró Gìká dré tá lèle dhi tíni nda 'o tà dóro àmì léna ngíni ya dhi ká! Kizà nda 'o àmì kì togó atsálé àtsi ró adrélé tà 'o lovó sè, adrélé àmì kì tárà ga, adrélé tákonzì ga, adrélé ngá ro, adrélé lovó íbe áma nòzo, ìndì adrélé gànzi ró tà ño gyägya dhya tákonzì 'olepi dhi dri. Dì láti tití nda i sè dhi, mì tadhá ngádra 'á dhi, àmì tà àko àmì rú tà nda sè dhi dre.

¹²Má tisì tá wárágà nda àmì dré, dhya tà kònzi 'olepi nda nì tà sè ko, ìndì dhya tà kònzi nda nì 'ozo rúá dhi nì tà sè ko. Be ró dhi, má tisì mána wárágà nda, mì kònòrò ngádra 'á Gìká kandrá dhi, àmì àtsi ró áma kì tà sè ngíni ya dhi.

¹³Tà nda kòdhì i sè dhi, Gìká tindrì àma kì togó dre. Túmání àma kì togó tindrìma nda be dhi, mà lenzé tá lavulé, mà dré nòle ngalè mì fè tá arí Títò dré ngíni ya dhi sè. Tàko ko, mì 'o akódhi nì togó atsálé kìdríkìdrí dre.

¹⁴Atú dhi, má tà tá akódhi dré àmì kì tà, áma drì bhàzo kuru ásà gò, mì dré kanyò fèzo má dré ko. Ngóró tà tití má dré tâle àmì dré dhi i dré adrélé tà báti 'í dhi tíni dhi, àmì kì tà tití má dré tâle drì be kuru Títò kandrá dhi i tá kókpà tà báti 'í.

¹⁵Nyànomvá dhi, akódhi nì lèle àmì véna dhi atsá vélé kàdrì wáláká nì ni lavú, dré adrérà'a kisùá dhi, mì ka'ì tá àma kì kúlí 'ole, ìndì mì ka'ì tá i dòle àmì véna ngá ròma sè ìndì togó yàyà sè ngíni ya dhi 'á.

¹⁶Má adré dì lenzélé, má dré kitswálé àmì kì ka'ì tà tití i sè dhi sè.

2 Kòrítòbhá i 8

Pólò kodzó Kòrítòbhá i ngá lokó fèle móndí¹ ka'ibhá àruka i dré

¹Áma adrúpi i, má adré lèá dhi, mì kònì tà Gìká dré 'ole áyi togó taní sè Èkèlézyà Mákèdònýà le dhi i 'ásè dhi be.

²Tágba kizà kàdrì dré tá adrészó móndyá ka'ibhá nda kí tabhì lavulé dhi, àyi kí arí kàdrì túmání àyi kí lemerè be dhi ì 'o tá àyi kí togó atsálé àtsi ró ngá fe móndí àruka i dré.

³Má adré tà báti ta àmi dré: Ì fè ngá i dré kitswálé fèle bwà dhi i tití. Báti, i fè ngá nda i àyi kí rinyí lavú byá. Àyi kí tändi i kisù tá tà nda 'ole drìdrì gò,

⁴i dré àma kí ti lizízó tà tändi ró, mà kòféró láti àyi dré drígá bhàzo túmání móndí àruka íbe, ngá fe móndyá ka'ibhá Yérúsalémà na dhi i dré. ⁵Dí tà i dré 'ole nda lavú tà mà dré tá kisùle dhi byá. Tako ko, i fè tá rè zyà àyi kí tändi i Míri dré 'iká gò, i dré àyi kí fèzo àma dré ndò, ngóró Giká dré tá lèle dhi tíni.

⁶Dí ásà dhi, mà lizí Títò ni ti, kògòrò àmi véna àmi kí kodzó tà dóro mì dré tá kídhólé 'ole dhi ni 'o kitswálé tití be dhi bvó. Tako ko, akódhi nda kídhó tá àmi kí kodzolé drìdrì, mì kòlokóró ngá fèle móndí àruka i dré dhi nì.

⁷Ngóró mì dré adrélé tà dóro 'o lavulé àmi kí tà ka'ika'i sè, àmi kí kúlí i sè, àmi kí tà nini sè, àmi kí togó àtsi ró dhi sè, ìndi àmi kí lèle àma vélé dhi sè dhi tíni dhi, mì k'o kókpà tà dóro nda kòdhi, ngá fèzo móndí àruka i dré àmi kí togó wáyi sè.

⁸Kòdhi má adré tolí bha àmi dri ko. Be ró dhi, mà adré mána àmi kí lèle tabhì móndí àruka togó íbe àtsi ró dhi kya rú, nizoá ngalè àmi kí lèle nda lèle báti i yà dhi.

⁹Tako ko, mì ni tà àma kí Míri Yésu Krísto dré 'ole áyi togó taní sè dhi be. Tágba dré tá adrészó ngá líyí ro dhi, 'o i atsálé lemerè ro àmi kí tà sè, mì kàtsáró ngábhá i ró akódhi ni lemerè sè.

¹⁰Dí má adré àmi kí drì ta àmi kí ledézó kònini: Kóná lavulépi dhi sè dhi, àmi tá móndyá tà nda ni lebhá 'ole drìdrì dhi i. Àmi tá kókpà móndyá kídhóbhá ngá lokó kitswálé fèle móndí àruka i dré drìdrì dhi i.

¹¹Dí nyànomvá dhi, mì k'o tà nda kitswálé tití, ngóró mì dré tá tà nda ni lèle 'ole togó wáyi sè dhi tíni. Mì kòfè ngá nda i ngóró mì dré kitswálé fèle bwà dhi tíni.

¹²Tako ko, dhya àlo kàdré ngá le fèle togó wáyi sè gò, dré adrészó fèá ngóró dré kitswálé fèle bwà dhi tíni dhi, Giká adré ngá nda ni ka'i. Àngyá ko, Giká adré ngá dhya nda dré adrészó ába dhi ni no kòdhyá. Adré ngá akódhi dré adrészó ába ko dhi ni no kòdhyá ko.

¹³Má adré lèá ko, mì kàdré ngá fe móndí àruka i dré atsázó ngábhá ro gò, mì dré àmikya atsázó lemerèbhá ro dhi. Be ró dhi, mà adré lèá dhi, àmi tití mì kàdré tà 'o àmi kòfalésè adrészó díri.

¹⁴Dí àmi adrébhá ngá íbe bì nyànomvá dhi i, mì ni kitswá móndyá adrébhá lemerè ro dhi kí ledé. Dí lókyá mì dré dra adrészó lemerè ro gò i dré adrészó ngá íbe bì dhi sè dhi, i ni kitswá àyikya àmi kí ledé. Kònini dhi, mì ni adré díri.

¹⁵Ngóró tisile Giká ni Kúlí na dhi tíni: «Dhya ngá lokolépi bì dhi tá ngá íbe bì lavulé ko, ìndi dhya ngá lokolépi tsà dhi, ngá pi akódhi ko na. »

Pólò mù Títò i àziàmu ni i 'be Kòritò na

¹⁶Mà adré àwoyà fe Gíká dré, dré Títò ni togó 'ole atsálé àtsi ró àmì kí tà sè àmakya tíni dhi sè.

¹⁷Àngyá ko, Títò ka'i tà mà dré zile i tí nda 'ole gò, adrészó lile àmì véna lovó sè, ngóró dré lèle 'ole ní dhi tíni.

¹⁸Mà adré kpà àma kí adrúpi àlo dhi ní mu lile túmání Títò be. À adré akódhi nda ní tà bha kuru Èkélézyà tití i 'ásè, àzí dré adrélé 'ole Rúbí Taní ni tà sè dhi sè.

¹⁹Ngbà 'í kòdhi ko, Èkélézyà i kipè tá akódhi lile túmání àma íbe, mà kàdzíró ngá fèle nda i móndyá ka'ibhá Yérúsalémà na dhi i dré, kitswázó Míri ní tändi ní lindrì bha, ìndì àma kí togó àtsi ró móndí kí ledézó dhi ní tadhá.

²⁰Mà adré lèá dhi, tà kitswázó àma kí asíkì ngá bī bhàle àma drígá nda kí tà sè dhi kàdré yókódhó.

²¹Tako ko, mà adré tà tití dhi kí nda 'ole dóro Míri mìlésè, ìndì móndí i mìlésè.

²²Kòdhi íbe dhi, mà adré kpà àma kí adrúpi àzya mu lile àyi nda íbe àmì véna. Mà tabhì akódhi nda vésè be bī ìndì láti twátwa i sè bī gò, dré áyi togó tadházó àtsi ró. Nyànomvá dhi, akódhi ní togó vélé àtsi ró lavulé, dré àmì kí tà ka'ile báti dhi sè.

²³Kàdré Títò ni tà sè dhi, akódhi áma arúpi 'í, ìndì áma àzíàmu àmì kòfalé dhi 'í. Kàdré àma kí adrúpi àruka nda kí tà sè dhi, àyi dhya Èkélézyà i dré mûle kitswálé lindrì fe Krísto dré dhi 'í.

²⁴Dí ásà dhi, mì kòtadhá àyi dré àmì kí lèle báti, Èkélézyà tití dhi i kònìró tà mà dré adrészó dri bha kuru àmì kí tà sè dhi be dhi bvó.

2 Kòrítòbhá i 9

Ngá lokólé móndyá ka'ibhá Yérúsalémà na dhi i dré dhi kí tà

¹Kàdré dí ngá mì dré adrélé lokólé fèle móndyá ka'ibhá Yérúsalémà na dhi i dré nda kí tà sè dhi, lè tá má kòtisì tà tà nda dri àmì dré ko.

²Tako ko, má ní tâle dhi, àmì kí togó àtsi ró àyi nda kí ledézó dhi be. Má adré dri bha kuru tà nda sè, adrészó tàá móndyá Mákèdònýà le dhi i dré dhi, kidhólé kóná lavulépi dhi sè dhi, àmì adrébhá Àkáyà na dhi i gànzi ró adrélé ngá fe. Dí àmì kí togó àtsi ró nda 'o móndí bī àyi kòfalé dhi kí togó atsálé kókpà àtsi ró ngá fe dhi ní.

³Dí, tágba kònìnì dhi, má adré àma kí adrúpi kòdhi kí mu lile àmì véna, kitswálé àmì kí tà mà dré adrészó dri bha kuru ásà nda kàtsáró tà tako ró ko. Be ró dhi, má adré lèá dhi, mì kàdré àmikya gànzi ró ngá fe, ngóró má dré tâle àmì kí tà sè dhi tíni.

⁴Tako ko, mà kòtsa tá àmì véna túmání móndí àruka Mákèdònýà lésè dhi íbe gò, mà dré àmì kí kisúzó gànzi ró ko dhi, kònò mà ní tá adré kanyò ro túmání àmì íbe, mà dré tâ àmì kí tà ka'ile tò dhi sè.

⁵Dí ásà dhi, má nò tá dóro ní, má dré adrúpi nda kí mûle lile dridrì má kandrána, àmì kí kodzó ngá mì dré lazilé togó dóro sè nda kí lokó adrélé gànzi ró dhi. Mì kò'o

kònìnì dhì, mì ni kitswá ngá nda kì fe togó dório sè. Mì kitswá fèá ngóró à ru tá àmì rinyí sè fèá na tñi ko.

⁶Ngóró mì dré nile be dhì tñi dhì, dhya ángùdhi adrélépi kórì rì tsà dhì, adré kókpà ngá akónà tsà. Dì, dhya ángùdhi adrélépi kórì rì bì dhì, adré kókpà ngá akónà bì.

⁷Lè àmì àlo àlo tití dhì i mì kàdré ngá fe ngóró mì dré kisùle drìdrì àmì léna dhì tñi. Dì, mì kàdré àmikya ngá fe togó kizà ro dhì sè ko, ìndì ngóró tolí bhàle àmì dri dhì tñi ko. Tako ko, Gìká adré dhya adrélépi ngá fe arí sè dhì ni ka'ì kòdhya.

⁸Dì Gìká rinyí íbe kitswázó ngá fe gàle àmì drígá bì áyi togó taní sè, kitswálé tà tití i sè dhì, mì kàdréró ngbú adrélé ngá tití mì dré adrészó lovó ni íbe dhì íbe, adrészó kpà tà dório tití mì dré adrélé lèle 'ole dhì kì 'o be dhì bvó.

⁹Ngóró tisile Gìká ni Kúlí na dhì tñi: «Akódhì lanzí áyi ngá i lemerèbhá i dré. Akódhì ni tà gyägya ni adré kóná vésè kólyá. »

¹⁰Dì Gìká adrélépi kórì fe móndí i dré rìle, ìndì adrélépi mápà fe àyi dré nyàle dhì ni kórì tití mì dré adrészó lovó ni íbe dhì kì fe àmì dré, adrészó 'òá mbàle, mì kòkitswáró tà dório 'o togó dório sè, adrészó lò'wa dório 'a lavulé.

¹¹A ni ngá fe gàle àmì drígá bì láti tití i sè, mì kòkitswáró ngbú adrélé ngá fe móndí i dré gò, i kàdréró àwoyà fe Gìká dré ngá mì dré adrélé fèle àyi dré àma drígá dhì kì tà sè.

¹²Tako ko, ngá mì dré adrélé fèle kòdhì kì ngbà 'í móndyá ka'ibhá Yèrúsalémà na dhì kì ledé kòdhya ko. Ngá nda kì kókpà móndí bì dhì kì 'o àwoyà fe Gìká dré.

¹³Tà dório mì dré adrélé 'ole, adrélépi àmì kì tà dório tadhá nda sè dhì, móndí bì dhì kì Gìká ni rú bha kùle, mì dré tà Krísto ni Rúbí Taní dré adrélé tâle dhì kì ka'ile 'ole dhì sè, ìndì mì dré adrélé ngá fe àyi dré ìndì móndí àruka i dré togó dório sè dhì sè.

¹⁴I ni kpà tà zi Gìká tí àmì dré togó wáyi sè, dré áyi togó taní bhàle àmì rú lavulé dhì sè.

¹⁵Mà kàdré àwoyà fe Gìká dré, tà taní dré afèle, kitswázó àndu ni ni ngi bwà ko nda ni tà sè!

2 Kòritòbhá i 10

Pólò ga áyi tárà àzí Gìká dré bhàle i' drí' gá dhì ni tà sè

¹Ma, Pólò, má adré àmì kì kodzó togó dório ìndì yàyà angálépi Krísto vélésè dhì sè. Má ni dório tâle dhì, móndí àruka i adré tâá dhì, má kàdré àmì kòfalé dhì, ma móndí yàyà i dhì. Dì, áma wárágà i 'ásè dhì, má adré mána tà ta rinyí sè.

²Dì má adré àmì kì ti lizí, má kònì dra tsa àmì véna dhì, mì kò'oró ma àmì kì àruka kì lotó rinyí sè ko. Tako ko, kòkitswá dhì, má ni tà ta rinyí sè móndí àruka adrébhá kisùá dhì, mà adré tà 'o móndyá bvò àdhya kya tñi dhì i dré.

³Àngyá ko, tágba mà dré adrészó bvò kònìdhì lé dhì, mà adré àmakya àdzú bhu móndyá bvò àdhya kya tñi ko.

⁴Àdzú ngá mà dré adrészó àdzú bhu ásà dhi i, àdzú ngá bvò kòndi àdhya 'i ko. Be ró dhi, àyi àyikya àdzú ngá rìnyi ró Gìká àdhya, mà dré adrészó àma kí kàribhá kí rìnyí adrészó àdzú bhu 'ásà dhi ni pfu dhi 'i. Mà adré dí tà kayikayi tití kinzò ro dhi kí pfu,

⁵tumáni tà tití drìkàdrì ro adrébhá ru pfu Gìká ni tà nìnì rú dhi íbe. Mà adré kpà tà kisùle tití dhi kí turú tobhàle Krísto ni rìnyí zàle.

⁶Dí mì kòbhà àmí kí tändi i Krísto ni rìnyí zàle kitswálé tití dre dhi, mà ni adré gànzi ró tà ño móndyá àruka tití adrébhá dhu rè ligilé dhi i dri.

⁷Mì adré àmikya ngbà 'í ngá no àyi kí lású sè. Lè dhya ángùdhi adrélépi ka'íá dhi, i móndí Krísto àdhya 'i dhi, kònì tâle dhi, àma kókpà móndí Krísto àdhya 'i í tíni dhi.

⁸Tágba má kàdré áma afà rìnyí Míri dré afèle àma dré dhi ni tà sè lavulé yà dhi, ma kanyò ro rìnyí nda sè ko. Tako ko, Míri afè rìnyí nda àma dré kitswázó àmí kí tà ka'ika'i kizá ko, be ró dhi, kitswázó àmí kí timbà àmí kí tà ka'ika'i na dhi bvó.

⁹Dí má lè mì kàdré kisùá ko tâle dhi, mà adré àmí kí líndrí le tigálé áma wárágà i sè dhi.

¹⁰Àngyá ko, móndí àruka i adré tâá dhi: «Akódhì ni wárágà i 'ásè dhi, adré tà ta kúlì lanzilanzì i sè ìndì rìnyí sè. Dí, kàdré àma kòfalé dhi, akódhì ína móndí yàyà 'i, ìndì akódhì ni kúlì i kúlì tako 'i. »

¹¹Lè móndyá adrébhá tà ta lású be kònini nda i kònì dhi, mà ni tà 'o rìnyí sè àmí kòfalé, ngóró mà dré adrélé tà ta rìnyí sè àma kí wárágà i 'ásè dhi tíni.

¹²Mà kitswá àma kí amú móndí àruka adrébhá àyi kí tändi kí tà doro tadhá dhi íbe bwà ko. Mà kitswá kpà àma kí tabhì àyi nda i rú ko. Àyi nda i kàdré àyi kí tabhì àyi kí tändi i kòfalésè, ìndì àyi kí tändi i rú dhi, àyi togyá àko.

¹³Dí, àma ró dhi, mà kitswá àmakya àma kí afà àma kí tändi kí bvó lavú dhi ko. Be ró dhi, mà ni ngbà 'í àma kí afà tsale byá azí Gìká dré bhàle àma drígá dhi ni bvó na. Azí nda ni bvó tsa byá àmí véna.

¹⁴Mà adré di àma kí afà lavulé ko, ngóró mà tsa tá àmí véna ko na tíni. Tako ko, mà tsa byá àmí véna Krísto ni Rúbí Tani be dhi 'i.

¹⁵Mà kitswá kpà àma kí afà àma kí bvó lavú, azí móndí àruka i dré 'ole dhi kí tà sè ko. Dí, mà adré àmakya mì bha, mì kàdréró lìle àmí kí tà ka'ika'i be drìdrì, àma kí azí àmí kòfalé dhi kàdréró kpà lìle drìdrì,

¹⁶mà kòkitswáró lìle Rúbí Tani longóbe bvò vwàvwà ro àmikya rúsè dhi i 'ásè. Tako ko, mà lè àma kí afàle azí móndí àruka i dré 'ole àyi kí àrà i 'ásè dhi kí tà sè ko.

¹⁷Dí, ngóró Gìká ni Kúlì dré adrélé tâle dhi tíni: «Lè dhya adrélépi áyi afà dhi kàdré áyi afà tà Míri dré 'ole dhi kí tà sè. » ¹⁸Tako ko, Míri adré dhya adrélépi áyi tändi ni tà doro tadhá dhi ni ka'i kòdhya ko. Be ró dhi, adré ína dhya i dré adrészó tà doro ni ni ka'i dhi ni ka'i kòdhya.

2 Kòritòbhá i 11

Pólò kodzó Kòrítòbhá i àpóstolò kinzò ro dhi kí tà sè

¹Má adré lèá dhi, mì kòtayí ma tà ta tsà ngóró móndí azaaza àdhya tñi, ngóró mì dré adrélé 'ole dhi tñi.

²Ma lovó íbe àmí kí tà sè tò, ngóró Gíká nì tändí dré kpà adrélé lovó íbe àmí kí tà sè tò dhi tñi. Tako ko, má zì àmí adrélé agó àlo kwákwa, Krísto dré, má kòféró àmí akódhí dré ngóró tòkó lolo àgo tà nilepi rè ko dhi tñi.

³Dì, má adré mána ngá ro àmí kí tà sè. Ngóró nì dré tá Évà nì litílé áyi túrúpfú tà sè dhi tñi dhi, à nì kitswá kpà àmí kí tà kisùkisù lití, mì kòtayíró tròma Krísto rú togó lolo sè dhi be dhi bvó.

⁴Tako ko, à kòtsa adrélé Yésu twá dhi nì tà longó Yésu mà dré tà nì nì longózó dhi rúsè dhi, mì adré àmikya tà nda nì ka'í mbèlè. À kàdré kó àmí kí kodzó tñí twá kisú Tñí Lolo mì dré kisulé dhi rúsè dhi, mì adré kpà ka'íá mbèlè. À kàdré kó àmí kí kodzó rúbí taní twá ka'í Rúbí Taní mì dré ka'le dhi rúsè dhi, mì adré kókpà ka'íá mbèlè.

⁵Má mìlésè dhi, dhya àmí kòfalé adrébhá àyi kí no àpóstolò kàdrì i ró dhi i lavú ma alomvá ko.

⁶Tágba má kòkisú tògyá adrészó kúlí ta dóro dhi ko yà dhi, ma mána tà nìnì íbe. Má tadhá tà nda àmí dré ngádra 'á tà tití i sè ìndì láti tití i sè dre.

⁷Lókyá má dré Rúbí Taní Gíká àdhya nì longózó àmí dré làfa sè ko dhi sè dhi, má 'o tà tsì tàkonzi, má dré tá áma tà tñílé kitswázó àmí kí tà tingá kuru dhi sè dhi 'í?

⁸Má ka'í tá làfa kisulé Èkélézyà àruka i drígásè, kitswázó azí 'o àmí kòfalé dhi bvó.

⁹Dì má dré tá adréra'a àmí véna, adrélé ngá lovó íbe dhi 'á dhi, má zi tá ngá àlo àmí kí àlo tí ko. Tako ko, áma kí adrúpi atsábhá Mákèdònìyà lésè dhi i afè tá ngá má dré tá adrészó lovó nì íbe dhi i àyi. Tà tití i sè dhi, má tayí tá áma tà lanzìle àmí dri dhi ko. Dì má nì go adrélé 'óá kònìnì.

¹⁰Má adré tàá tà báti Krísto àdhya adrélépi má léna dhi sè dhi: Dhya àlo bvò wäyi Àkáyà àdhya na dhi kitswá áma afàma tà nda sè dhi nì kikí bwà ko.

¹¹Má adré tàá kònìnì àdho tà sè? Má dré àmí kí lèle ko dhi sè? Gíká nì tändí nì dóro, má lè àmí 'í káyà dhi!

¹²Dì, má nì go adrélé tà 'o ngóró má dré adrélé 'ole dhi tñi, kitswázó láti kikí dhya adrébhá àyi kí 'o nôle ngóró áma tñi gò, i dré adrészó àyi kí afà tà nda sè dhi i dré.

¹³Dhya nda i àpóstolò kinzò ro dhi 'í, ìndì azí 'obhá túrúpfú sè dhi 'í. I adré àyi kí ladzá atsálé ngóró Krísto nì àpóstolò i tñi.

¹⁴Dì, áma líndrí adré ína gàle tà nda sè ko. Tako ko, Sàtánà nì tändí adré áyi ladzá atsálé ngóró ángéló ngádra àdhya tñi.

¹⁵Dì akódhì ni màrabà i kàdré àyi ki ladzá atsálé ngóró móndí adrébhá tà gyágga 'o dhì i tíni dhì, tà nda adré áma líndrí tígá ko. Dì, lókyá kùdù sè dhì, i ni àyikya tà kitswálépi tà i dré 'ole dhì i sè dhì ni kisú kòdhya.

Kizà Pólò dré nyàle Gìká ni àzí sè dhì i

¹⁶Má adré gòle tàá dhì: Lè mì kònò ma ngóró móndí azaaza tíni, má dré adrélé tà ta kònìnì dhì sè ko. Dì, mì kàdré àmikya áma no kònìnì dhì, mì kòka'i ma ngóró móndí azaaza tíni, má kòkitswáró áma afà tsà be dhì bvó.

¹⁷Bàti, má kàdré áma afà kònìnì dhì, má adré tà ta ngóró Míri dré adrélé lèle dhì tíni ko, be ró dhì, ngóró móndí azaaza dré adrélé tâle dhì tíni.

¹⁸Dì, móndí bì dhì i dré adrélé àyi ki afà móndyá bvò àdhya kya tíni dhì sè dhì, má ni kókpà áma afà kònìnì.

¹⁹Àmi adrébhá àmi ki no tògyabhá ro ni i, àmi gànzi ró adrélé móndí azaaza ki ka'i togó wáyi sè!

²⁰Tà bâti ró dhì, mì adré móndí ki ka'i, gba i kàdré àmi ki bha àyi ki màrabà i ró yà, i kàdré àmi ki lití yà, i kàdré àmi ki ngá topá yà, i kàdré àmi ki no móndí tâko i ró yà, kó ngalè i kàdré àmi ki mì sa yà dhì.

²¹Má adré tàá kanyò sè dhì, mà 'o tá tà àmi kòfalé rinyí sè móndyá nda kya tíni ko! Dì, tà ángùdhi móndí àruka i dré kitswázó àyi ki afà ásà dhì, má ni kókpà kitswá 'òá kònìnì. (Kòdhì má adré tà ta móndí azaaza àdhya tíni.)

²²Àyi nda i Èbérè 'i? Ma kókpà kònìnì. Àyi ìsérélè ànzì 'i? Ma kókpà kònìnì. Àyi Àbàramà ni toyó 'i? Ma kókpà kònìnì.

²³Àyi Krísto ni màrabà 'i? (Kòdhì má adré tà ta tîrì kiza líyí àdhya tíni.) Ma kókpà kònìnì àyi ki lavú. Má 'o mána àzí kòkóròko àyikya ki lavú. À lebhé ma bâdzó na vésè be bî àyi ki lavú. À tswà ma vésè be bî àyi ki lavú. Ma tá ànyí dràdrà mìle vésè be bî.

²⁴Vésè be nzi, Yúdà ànzì i bhwà ma fímbò sè vésè be nyadhi-àlo-drì-mudrì-drì-nzi-drì-su.

²⁵Vésè be na, à tswà ma fa sè. Vésè be àlo, à lebhé ma kírà sè. Vésè be na, bwátù arí áma tayí yí mi. Ma tá yíandre mi ngátsi àlo ìndì kítú àlo.

²⁶Vésè be bî, má to atsí lìzo vwàvwà ro. Má nya kizà yí lìti i sè, kùgú i drígá, áma súrú i drígá, móndí súrú twá ro dhì i drígá, ìndì adrúpi kinzò ro dhì i drígá. Má nya kpà kizà bhàandre i 'ásè, duku i 'ásè, ìndì yíandre i mísè.

²⁷Má 'o àzí kòkóròko landèzo lavúlè. Vésè be bî, má ko ayí ko. Tàbirí ndè ma, yí lovó be. Vésè be bî, ngá nyàle dhì pi ma. Kídhì ndè ma, ìndì ma tá kítá àko.

²⁸Má kitswá tà àruka tití dhì ki ta ko. Dì, kítú àlo àlo tití i sè dhì, má adré mána áma togó bha lanzìle Èkèlézyà tití dhì ki tà sè.

²⁹Dhya àlo kàdré yàyà dhi, ma kókpà yàyà. À kò'o dhya àlo dhèle tàkonzì na dhi, áma togó adré aswálé tà nda sè.

³⁰Dì kòkitswá má dré adrészó áma afà dhi, má nì áma afà tà adrébhá áma tà yàyà kì tadhá dhi i sè.

³¹Gìká àma kì Míri Yésu nì Atá, kitswálépi rúku sè kóná vésè kólyá dhi, nì dóro tâle dhi, má adré kinzò ta ko dhi.

³²Lókyá má dré tá adrérà'a Dàmàsékè na dhi 'á dhi, gùvèrènérè adrélépi tá ópí Àréta zâle dhi bhà tá sòdá i adrélé bhàandre nda nì zèribàti kì likí, i kòkitswáró áma ru be dhi bvó.

³³Dì, à bhà ma kánzì na, áma 'òzo pfôle mòlísà àlo zèribà na dhi 'ásè, áma tirizó gò, má dré lapázó gùvèrènérè nda drígásè.

2 Kòritòbhá i 12

Tà lùzu ró Gìká dré tadhálé Pólò dré dhi i

¹Adré lèá dhi, má kògò adrélé áma afà, tágba kàdré tà dóro 'i ko yà dhi. Dì má nì ngá agábhá má mi toróbí tíni dhi kì tà ta, túmání tà lùzu ró Míri dré tadhálé má dré dhi íbe.

²Má nì agó àlo Yésu Krísto nì ka'ilépi dhi be. Lavú dre kóná mudrí-drì-su, Gìká do tá akódhi kurú na, bhù kurú na àzya nì kì lavúlépi dhi na. Dì má nì ko ngalè Gìká do tá akódhi rúbhá na yà, kó ngalè rúbhá na ko yà dhi. Gìká nì ngbà 'í nì.

³⁻⁴Dì má nì, Gìká do tá akódhi nda pàràdísò na dhi be. Kàdré tá rúbhá na yà, kó ngalè rúbhá na ko yà dhi, má nì ko. Gìká nì nì. Dì kònàle dhi, akódhi yi tá tà kitswázó tà nì ni ta kúlí sè bwà ko, à dré logálé móndí dré tâle dhi i kòdhya.

⁵Má nì áma afà dhya lású be kònìnì nda nì tà sè. Dì, má kitswá mána áma afà áma tândi nì tà sè ko, kàdré ngbà 'í áma tà yàyà kì tà sè ko dhi.

⁶Kònò má kàdré tá áma le afàle áma tândi nì tà sè dhi, má nì tá adré móndí azaaza 'i ko. Tako ko, má nì tá adré tà bâti ta kòdhya. Dì, má adré mána tà nda nì le 'ole ko, dhya àlo kònòró ma kàdrì ngóró dré kitswálé tà má dré adrélé 'ole ìndì tâle dhi i sè ko dhi tíni ko.

⁷Dì, kitswázó áma kikí, má kàtsáró drìkàdrì ro tà kàdrì lùzu ró tadhálé má dré nda kì tà sè ko dhi, à bhà ngá kùtsí tíni dhi áma rúbhá na. Ngá nda ngá Sàtánà dré amùle kitswálé kizà fe má dré dhi 'i, má kàdréró drìkàdrì ro ko dhi bvó.

⁸Vésè be na, má lizí tá Míri ti, kòtingáró tá ngá nda má rúsè ká.

⁹Dì, akódhi logó má dré dhi: «Áma togó taní kitswá mí dré dre. Tako ko, má adré áma rinyí 'o kitswálé tití ámi tà yàyà na. » Dì ásà dhi, má nì mána áma afà áma tà yàyà kì tà sè, Krísto nì rinyí kàdréró tà 'o má léna be dhi bvó.

¹⁰Má adré dì lenzélé áma tà yàyà kì tà sè, làdhá adrélé dhàle má rú dhi kì tà sè, tà kòkóròko kì tà sè, áma mì pfòma nì tà sè, ìndì kizà má dré adrélé nyàle Krísto nì tà sè dhi kì tà sè. Tàko ko, má dré adrérà'a yàyà dhi 'á dhi, ma rìnyi ró.

Pólò nì togó lanzì Kòrítòbhá kì tà sè

¹¹Má kòtà tà ngóró móndí azaaza àdhyá tñi dhi, mì 'o ma adrélé tà ta kònìnì dhi àmì. Adré tá be lèá dhi, mì kàdré áma tà doro kì tadhá dhi àmì. Tàko ko, dhya àmì kòfalé adrébhá àyi kì no àpóstolò kàdrì i ró dhi i lavú ma àlomvá ko, tágba má kàdré mána móndí tàko 'i yà dhi.

¹²Lókyá má dré tá adrérà'a àmì kòfalé dhi 'á dhi, má 'o tá tà líndríga ró adrébhá tá Gìká nì rinyí tadhá dhi i landè àko ró, tadházóá dhi, ma àpóstolò 'i káyà dhi.

¹³Tà doro tití má dré tá 'ole Èkélézyà àruka i 'ásè dhi i, má 'o kókpà àmì kòfalé 'í. Dì, má tayí mána áma tà lanzile àmì dri dhi ko. Mì kòtrì dì tà kònzi má dré 'ole àmì rú nda kòdhi!

¹⁴Kòdhi vésè nì na má dré adrészó 'ole lile àmì véna dhi 'i. Dì má kitswá áma tà tayí lanzile àmì dri dhi ko. Tàko ko, má adré àmì kì ngá nda kisulé kòdhyá ko. Be ró dhi, má adré mána àmì kì tändi kì nda kisulé kòdhyá. Adré lèá dhi, ànzimvá i kàdré ngá lokó fèle àyi kì tibhá i dré dhi àyi ko. Adré dì be lèá dhi, ànzì kì tibhá i kàdré ngá lokó fele àyi kì ànzì i dré dhi àyi.

¹⁵Ma ró dhi, ma gànzi ró áma ngá fe akílé tití àmì dré, ìndì áma tändi nì fe wáyi àmì dré. Dì, má kàdré àmì kì le lavulé dhi, mì ni go adrélé áma le tsà?

¹⁶Dì mì nì ka'íá tåle dhi, má tayí áma tà lanzile àmì dri dhi ko dhi. Dì, tágba kònìnì dhi, móndí àruka àmì kòfalé dhi kì tåá dhi, ma túrúpfú lìyí ro nì, má lití àyi túrúpfú sè.

¹⁷Má lití tsì àmì, àmì kì ngá kisúzó dhya má dré mùle àmì véna dhi i sè?

¹⁸Bàti, má kodzó tá Títò lile àmì véna gò, má dré àma kì adrúpi àlo dhi nì mùzo lile túmäní akódhi be. Dì Títò nda lití tsì àmì, ngá kisúzó àmì drígásè dhi 'í? Áma rìti dhi i, mà 'o tà àmì kòfalé togó àlo sè, láti àlo dhi nì lebèzo.

¹⁹Mì adré àmikya kisùá dhi, mà tà tà nda kòdhi i tití kitswázó àma kì tará ga àmì kandrá? Kóko! Be ró dhi, mà adré àmikya tà ta Gìká kandrá ngóró móndí adrébhá Krísto na dhi i tñi. Áma arúpi mà dré lèle tò nì i, tà tití mà dré adrélé 'ole dhi i, mà adré 'òá kitswázó àmì kì timbà àmì kì tà ka'íka'i na.

²⁰Má adré mána ngá ro, má nì dra tsa àmì véna àmì kì kisú ngóró má dré lèle ko dhi tñi dhi sè, ìndì mì nì dra áma kisú ngóró mì dré lèle ko dhi tñi dhi sè. Má adré kpà ngá ro, má nì dra lawà kisú àmì kòfalé, lovó kònzi ibe, togóaswa be, dhyá kì tà bhàma drìdrì dhi be, làdhá be, móndí kì rú tama kònzi dhi be, drìkàdrì be, ìndì tà wàyá be dhi sè.

²¹Má adré kpà ngá ro, má kònì dra tsa dhi, áma Gìká nì dra áma tà tirí àmì kandrá dhi sè, ìndì má nì dra ngo móndí bì tàkonzi 'obhá drìdrì gò, i dré àyi kì togó ladzázó ko

dhi ki tà sè dhi sè. Tàko ko, ì ladzá àyi ki togó àyi ki tà ndí ró dhi ki tà sè, àyi ki ndòtò tà sè, ìndì àyi ki tà swà ì dré 'ole dhi ki tà sè ko.

2 Kòritòbhá i 13

Tà tâle kùdù ro Kòritòbhá ki kodzozó dhi i

¹Kòdhí vésè ni na má dré adrészó lile àmi véna dhi 'i. Ngóró tisile Giká ni Kúlí na dhi tini: «À kàdré tà tití dhi ki bvó lanzí, móndí rì yà kó ngalè na yà tà nda ki nobhá mì sè dhi ki kúlí sè. » ²Má longó tá tà àmi dri má dré tá adrérà'a àmi véna vésè ni rì sè dhi 'á, dì má adré góle longoá má dré adrérà'a vwàvvà ro dhi 'á: Má kònì dra tsa àmi véna dhi, má kitswá móndyá takonzì 'obhá dridrì dhi ki tayí móndí àruka íbe tà njoma àyi dri dhi sè ko.

³Mì adré tá lèá nile dhi, Krísto adré tà ta má tí nì káyà dhi, dì mì nì niá. Tàko ko, Krísto dré adrérà'a tà 'o àmi kòfalé dhi 'á dhi, akódhi yàyà ko. Be ró dhi, adré ína tà 'o rinyí sè.

⁴Tà bâti ró dhi, akódhi tá yàyà akódhi ni tidírà'a fa kipakipa dri dhi 'á. Di, nyànomvá dhi, akódhi ína lídrì íbe Giká ni rinyí sè. Àma ró dhi, àma kókpà yàyà Krísto na. Di, àma àmakya lídrì íbe túmání akódhi be Giká ni rinyí sè, ìndì mà nì rinyí nda nì tadhá àmi dré.

⁵Lè mì kàdré àmi ki togó ki tabhì, nìzoá ngalè mì ka'i Krísto bâti gò, mì dré adrészó tà 'o àmi ki tà ka'ika'i nda sè yà dhi. Mì kàdré àmi ki tandì ki tabhì. Mì nì, Yésu Krísto àmi léna be dhi ko? Àruka nì, mì nì àmi ki tabhì kisúzóá dhi, àmi ki tà kitswá ko.

⁶Dì má adré mì bha, mì kòniró tâle dhi, Giká ka'i àma adrélè àpóstolò i ró nì káyà dhi.

⁷Má adré tà zi Giká tí, mì kò'oró tà kònzi àlomvá ko. Má adré ziá kònìnì, à kònòró àma ngóró móndí Giká dré ka'ile dhi i tini ko. Be ró dhi, má adré mána ziá kònìnì, mì kàdréró tà dôro 'o, tágba mà kàdré sùle ngóró móndí Giká dré ka'ile ko dhi i tini yà dhi.

⁸Tàko ko, mà kitswá tà àlo 'o kònzi tà bâti rú bwà ko. Be ró dhi, mà kitswá ngbà 'í tà 'o tà bâti nda dré.

⁹Mà kàdré yàyà gò, mì dré àmikya adrészó rinyi ró dhi, mà adré lenzélé tà nda sè. Mà adré kpà tà zi Giká tí, kò'oró àmi kitswálé tití be dhi bvó.

¹⁰Ásà dhi, má adré tà kòdhí ki tisì àmi dré, má dré adrérà'a vwàvvà ro dhi 'á, má kònì dra tsa àmi véna dhi, má kòlotóró àmi rinyí Míri dré afèle má dré dhi sè ko. Tàko ko, akódhi afè rinyí nda má dré kitswázó àmi ki tà ka'ika'i kizá ko, be ró dhi, kitswázó àmi ki timbà àmi ki tà ka'ika'i na dhi bvó.

¹¹Kùdù ro dhi, áma adrúpi i, mì kàdré lenzélé. Mì kàdré àmi ki fe Giká dré adrélè 'ole kitswálé tití. Mì kàdré ru timbà, adrészó kpà ru yi àmi kòfalésè. Mì kàdré tà kîdríkîdrí íbe àmi kòfalé be. Dì Giká adrélèpi lèle fe tà kîdríkîdrí be dhi, ni adré túmání àmi íbe.

¹²Mì kòfè mòdo adrészó ru kamú àmì kòfalésè lèle sè. Móndyá tití Gìká àdhya kònwa dhì ì fè mòdo àmì dré.

¹³Mírì Yésu Krísto ní togó taní, Gìká ní lèle, ìndì ru amuma Tirí Lólo be dhì ì kàdré àmì íbe tití!

Gàlàtýàbhá †

Gàlàtýàbhá † 1

Pólò ni mòdo fèma

¹Ma, Pólò, Yésu Krísto ni àpóstolò, má adré wárágà kònìdhì ni tisì ma. À mù ma móndí i vélésè ko. Móndí i mù kpà ma nì ko. Be ró dhi, Yésu Krísto i Gìká Atá akódhi ni tingálépi dràdrà lésè dhi be dhi, i mù ma adrélé àpóstolò ro dhi àyi.

²Àma túmání áma adrúpi tití mà dré adrészò àyi íbe dhi i, mà adré wárágà kònìdhì ni tisì Èkélézyà bvò Gàlàtýà àdhyà na dhi i dré.

³Gìká àma kí Atá i Míri Yésu Krísto be dhi i kòbhà àyi kí togó taní àmí rú, ìndì i kofè tà kìdríkìdrí àmí dré!

⁴Krísto nda fè i dràle àma kí tàkonzi kí tà sè, kitswálé àma kí apá bvò kònzi ándrò kònìdhì lésè, ngóró Gìká àma kí Atá dré tá lèle dhi tíni.

⁵Milanžilanzì kàdré Gìká dré kóná vésè kólyá! Kàdré kònini.

Rúbí Taní ngbà 'í àlo kwákwá

⁶Àma líndrí adré gàle àmí kí tà sè. Tàko ko, mì adré àmíkyà Gìká àmí kí azílépi Krísto ni togó taní sè dhi ni tayí mbèlè gò, adrészò àmí kí adzá rúbí taní twá dhi véna.

⁷Tà báti ró dhi, rúbí taní twá Rúbí Taní báti dhi rúsè dhi yókódhé. Di, móndí àruka i adré àyíkyà àmí kí dri kizá, adrészò Rúbí Taní Krísto àdhyà ni le ladzálé atsálé tà gòdhogòdho ró.

⁸Di, dhya àlo kàdré rúbí taní twá dhi ni longó Rúbí Taní mà dré longolé àmí dré dhi rúsè dhi, Gìká ni tátrítrí kàdré akódhi nda dri, gba kàdré àma 'í yà, kó ngalè ángéló apfòlepi bhù lésè dhi 'í yà dhi!

⁹Ngóró mà dré tâle dre dhi tíni dhi, má adré góle tâá dhi: Dhya àlo kàdré rúbí taní twá dhi ni longó àmí dré Rúbí Taní mì dré ka'ile dhi rúsè dhi, Gìká ni tátrítrí kàdré akódhi dri!

¹⁰Kòdhì má adré tsì móndí kí togó tabhì asélé, i kòka'iró áma tà be dhi bvó? Kóko! Má adré mána lèá dhi, Gìká kòka'i áma tà nì. Kó ngalè, má adré tà 'o kitswázó móndí kí togó 'o kinilé dhi bvó? Kóko! Kònò má kàdré tá 'òá kònini dhi, má ni tá adré Krísto ni màrabà 'í ko.

Pólò ni azima adrélé àpóstolò ro dhi

¹¹Àma adrúpi i, má lè mì kònì tâle dhi, Rúbí Taní má dré adrélé longolé dhi angá móndí i drilésè ko.

¹²Má kisú Rúbí Taní nda móndí i vélésè ko. Móndí i tadhá kpà Rúbí nda má dré nì ko. Be ró dhi, Yésu Krísto ni tändi tadhá Rúbí nda má dré nì.

¹³Tàko ko, mì yi tâle dhi, wáláká dhi, má adré tá Yúdà ànzì kí Gíká nì tà lebè ngíni ya dhi 'í. Mì yi kpà má adré tá móndyá Èkélézyà Gíká àdhya lé dhi kí mì pfo lavué, adrészó àyi kí tà tabhì pfûle ngíni ya dhi 'í.

¹⁴Má adré tá mána Yúdà ànzì kí Gíká nì tà 'o, adrészó lîle ába drìdrì áma mbàamu bî Yúdà ànzì rô dhi kya ki lavú. Áma togó tá àtsi rô lavúlé áma kí tâbhí kí labhí kí tà sè.

¹⁵⁻¹⁶Dì, Gíká zì tá ína ma áma tirà ko dhi 'á gò, áma azízo áyi togó taní sè. Dì kisù tá dôro nì, í dré áyi Mvá nì tadhálé má dré dhi, má kàdréró akódhi nì Rúbí Taní longó móndyá surú twá ro dhi i véna. Dì dré áyi Mvá nda nì tadházó má dré dhi, má zi tá móndí àlo kitswálé áma drì ta dhi ko.

¹⁷Má lì tá kpà Yèrúsalémà na dhya bhâle adrélé àpóstolò i rô drìdrì má kandrá dhi kí no ko. Dì, gbă lókyá nda sè dhi, má lì tá mána bvò Àràbíyà àdhya na gò, má dré gózo lîle Dàmàsékè na.

¹⁸Kóná na àmvolésè dhi, má dré lîzo Yèrúsalémà na, mà kòkitswáró ru ni Pétéró be be dhi bvó. Gò mà dré adrészó akódhi be kítú mudrí-drì-nzi.

¹⁹Má nò tá àpóstolò kí àruka i ko, ngbà 'í Yàkóbhò, Míri nì adrúpi 'í kalóma.

²⁰Má adré tâá Gíká kandrá dhi, tà má dré adrélé tísile kòdhì i tà bâti 'í, kinzò 'í ko.

²¹Àmvolásà dhi, má dré lîzo bvò Síriyà àdhya na ìndì Kílîkíyà àdhya na.

²²Lókyá nda sè dhi, móndyá Krísto nì ka'ibhá Èkélézyà Yùdáyà na dhi i 'ásè dhi i nì tá rè dhu ma ko.

²³I yi tá ngbà 'í tà adrélé tâle áma tà sè dhi kòdhya: «Dhya atú adrélépi àma kí mì pfo dhi, adré nyànomvá tà adrészó Krísto nì ka'í dhi nì longó, tágba dré tá adrészó tà nda nì tabhì pfûle dhi. »

²⁴Dì i adré tá Gíká nì rú bha kùle áma tà sè.

Gàlâtíyàbhá i 2

Àpóstolò i` ka'í Pólò

¹Kóná mudrí-drì-su àmvolésè dhi, má dré gózo lîle tódhyá Yèrúsalémà na. Mà lì tá túmâni Bârànábà be. Má drì tá kpà Títò má vésè be.

²Má lì tá kònâle, Gíká dré tá tadhálé má dré dhi má kòlì dhi sè. Dì mà kòkisú ru àma páti dhya adrélé nôle móndí kàdrì Èkélézyà àdhya rô dhi i be dre dhi, má dré Rúbí Taní má dré adrélé longolé móndyá surú twá ro dhi i dré dhi nì àndu ngízo àyi dré. Tàko ko, má lè tá àzí má dré tá 'ole ìndì má dré tá adrélé 'ole dhi kàtsá tà tâko ró ko.

³Dì i dré áma kúlí yízo dhi, i lè tá ndìndì áma atsíamu Títò nì 'ole lwâle dhi ko, tágba akódhi dré tá adrészó Gíríkì mvá 'í dhi.

⁴Tà nda kòdhì apfò tá àma kandrá tâko ko, adrúpi àruka kinzò ro dhi i afí tá lùzu ró àma kòfalé, tà àma kí trízo Yésu Krísto na dhi nì nda nile túrúpfú sè, i kòbhàró àma góle adrélé tódhyá mårábà tátrítrí kúlí àdhya i rô be dhi bvó.

⁵Dì, mà ka'ì tá àmakya tà ì dré lèle 'òle nda àlomvá ko, mà kòsuró tà báti Rúbí Taní àdhya mà dré adrélé longolé àmì dré dhi rú.

⁶Kàdré dì dhya adrélé nôle móndí kàdrì i ró nda kí tà sè dhi, ì lè tá àyikya tà àzya bhàle tà má dré adrélé longolé dhi dri ko. (Àyi nda ì kàdré tá móndí kàdrì 'í báti dhi, tà nda tà kàdrì 'í má milésè ko. Tàko ko, Giká adré móndí kí lású no kòdhya ko.)

⁷Be ró dhi, ì nò àyikya ngádra 'á dhi, Giká bhà tá má drígá àzí adrészó Rúbí Taní longó móndyá surú twá ro dhi i véna dhi, ngóró i dré tá àzí adrészó Rúbí nda ni longó Yúdà ànzì i véna dhi ni bhàle Pétéró drígá dhi tíni.

⁸Tàko ko, Giká tá Pétéró ni bhàlepi adrélé àpóstolò ro Yúdà ànzì i véna dhi, bhà tá kpà ma adrélé àpóstolò ro móndyá surú twá ro dhi i véna dhi ni.

⁹Dì Yákóbhò, Pétéró, tsàle Yòwánì, adrélé nôle móndí kàdrì Èkélézyà àdhya ró dhi, ì nò dhi, Giká afè tá àzí nda má dré áyi togó taní sè ni. Dì ì dré àma kí drígá rùzo túmání Bárànábà be, tadházóá dhi, mà amú ru àyi íbe dre. Dì mà dré ru yizo àyi íbe, mà kòliró àmakya móndyá surú twá ro dhi i véna, ìndì i kòliró àyikya Yúdà ànzì i véna.

¹⁰Ì zi tá ngbà 'í tà àlo àma tí kòdhya, mà kògòrò adrélé móndí lemerè ro dhi kí tà kisù. Dì tà nda kòdhì tá tà áma togó dré adrészó àtsi ró 'òá dhi 'í.

Pólò ligí́ Pétéró be Àtiyòkíyà na

¹¹Dì, àmvolásà, lókyá Pétéró dré atsázó Àtiyòkíyà 'a dhi sè dhi, mà ligí tá akódhi be móndyá tití i kandrá, tà kònzi dré tá adrélé 'òle dhi sè.

¹²Tàko ko, akódhi dré atsázó dhi, kídholo tá adrélé ngá nya túmání móndí ka'ibhá surú twá ro dhi íbe. Dì, móndí àruka Yákóbhò dré amùle dhi i dré atsázó dhi, Pétéró dré ína apfòzo móndyá surú twá ro nda i kòfalésè gò, adrélé àyi rúsè gàrà dri. 'O tá kònini dré tá adrélé Yúdà ànzì amùle nda kí ro dhi sè. Tàko ko, àyi nda i adré tá lèá dhi, móndyá ka'ibhá tití dhi i kàdré àyi kí 'o lwale.

¹³Dì móndyá ka'ibhá àruka tití Yúdà ànzì ró dhi i kònò tà nda dre dhi, i dré kpà kihózó adrélé tûrúpfú tà nda ni 'o túmání Pétéró be. Ì se tá ndìndì Bárànábà ni togó adrélé tûrúpfú tà nda ni 'o àyikya tíni.

¹⁴Dì má kònò, i adré tá tà báti Rúbí Taní àdhya ni lebè ko dhi dre dhi, mà dré tâzoá Pétéró dré móndyá tití i kandrá dhi: «Mì, Yúdà mvá ro ni, mí adré mína tà 'o ngóró móndyá surú twá ro dhi kya tíni, Yúdà ànzì kya tíni ko? Dì mí 'o mí ngíni adrélé móndyá surú twá ro nda kí kodzó adrélé tà 'o Yúdà ànzì kya tíni dhi? »

Móndyá Yúdà ànzì ró i` ndi` surú twá ro dhi kí bhàma gyägya àyi kí tà ka'ika'ì sè dhi

¹⁵Àma ró dhi, àma móndí tile Yúdà ànzì ró dhi 'í. Àma móndí surú twá ro Giká ni tâtrítrí kúlì nibhá ko dhi 'í ko. ¹⁶Dì, mà ni tâle dhi, Giká adré móndí kí bha gyägya i kandrá tâtrítrí kúlì 'òma sè ko dhi be. Be ró dhi, adré ngbà 'í àyi kí bha gyägya i dré Yésu Krísto ni ka'ile dhi sè. Dì àma, mà ka'ì kókpà Yésu Krísto nda, Giká kòbhàró

àma gyägya í kandrá Krísto ni ka'ìma sè, tátrítrí kúlí 'òma sè ko. Tàko ko, dhya àlo kitswá atsálé gyägya Gìká kandrá tátrítrí kúlí 'òma sè bwà ko.

¹⁷Dì, mà kàdré ndàá atsálé gyägya Gìká kandrá mà dré Krísto ni ka'ile dhì sè gò, àma kí kisúzó tàkonzìbhá ro dhì, kòdhì adré tsì tàá dhì, Krísto adré àma kí 'o fíle tàkonzì na dhì nì? Tàdzí ko!

¹⁸Má kògò áma bha tátrítrí kúlí má dré tayílé dhì ni rinyí zàle dhì, má adré tadhá dhì, ma tátrítrí kúlí nda ni ọjolepi 'i bàti.

¹⁹Tàko ko, tátrítrí kúlí nda sè dhì, má drà mána tátrítrí kúlí nda lésè dre, má kàdréró lídrì íbe Gìká dré be dhì bvó. Bàti, à tidí ma dràle túmäní Krísto be fa kipakipa dri dre.

²⁰Dì má kàdré lídrì íbe dhì, kòdhì vélé ma 'i ko, be ró dhì, Krísto ína lídrì íbe má léna nì. Dì lídrì má dré adrészó ába rúbhá na kònìdhì, má adré ába, má dré adrélé Krísto, Gìká ni Mváagó ni ka'ì dhì sè. Akódhì nda lè tá ma tò gò, áyi tändi ni lídrì fèzo áma tà sè dhì nì.

²¹Dì má adré mána Gìká ni togó taní ga ko. Àngyá ko, móndí ì kòkitswá tá atsálé gyägya Gìká kandrá tátrítrí kúlí 'òma sè dhì, kònò Krísto drà tá ína àngyá.

Gàlàtìyàbhá i 3

Tátri' tri' kúlí 'òma, kó ngalè Krísto ni ka'ìma

¹Àmi Galàtìyàbhá ni i, àmi móndí azaaza 'i! Àdhi lifí àmi kólé sè dhì nì? Tàko ko, à tadhá tá àmi dré ngádra 'á dhì, Yésu Krísto drà fa kipakipa dri àmi kí tà sè ngíni ya dhì 'i.

²Dì má lè ngbà 'í tà àlo kònìdhì ni lizilé àmi tí kòdhya: Mì kisú Tirí Gìká àdhya mì dré tátrítrí kúlí 'ole dhì sè? Kó ngalè, mì dré Krísto ni rúbí mì dré yile dhì ni ka'ile dhì sè?

³Mì tayí àmi azálé kònìnì ngíningíni ró? Mì kídhó kó Gìká ni ka'ì akódhì ni Tirí ni rinyí sè dre dhì, mì ni go tsì tà mì dré kídhólé nda ni 'o akílé àmi kí tändi kí rinyí sè bwà?

⁴Mì nya tsì kizà bì dhì i àngyá? Kóko, kàdré kònìnì ko!

⁵Mì tà rè má dré ká: Gìká adré áyi Tirí fe àmi dré, adrészó kpà tà líndríga ró dhì ki 'o àmi kófalé, mì dré adrélé tátrítrí kúlí 'o dhì sè? Kó ngalè, mì dré adrélé Krísto ni rúbí mì dré yile dhì ni ka'ì dhì sè?

⁶Mì kisù rè Àbàrámà ni tà ká. Gìká ni Kúlí adré tàá dhì: «Akódhì ka'ì tá Gìká gò, Gìká dré akódhì ni nòzo gyägya akódhì ni tà ka'ika'ì nda sè. »⁷Ásà dhì, lè mì kònì dhì, móndyá adrébhá Gìká ni ka'ì dhì i Àbàrámà ni ànzì 'i bàti.

⁸Gìká ni Kúlí tadhá tá drìdrì dhì, Gìká ni móndyá surú twá ro dhì kí bha gyägya í kandrá àyì kí tà ka'ika'ì sè gò, Kúlí nda dré Rúbí Tani longozó Àbàrámà dré, tázoo dhì: «Má ni tà taní bha surú tití bvò àdhya i dri mí sè. »⁹Dì ásà dhì, móndyá tití

adrébhá Gìká ní ka'i dhi i adré tà taní kisú, ngóró Àbàrámà dré tá kisúlé áyi tà ka'ika'i sè dhi tíni.

¹⁰Dì, móndyá tití adrébhá láti nda atsázó gyägya Gìká kandrá tátrítrí kúlí 'òma sè dhi i àyikya tátrítrí íbe àyi dri. Tako ko, Gìká ní Kúlí adré tàá dhi: «Dhya ángùdhi adrélépi ngbú tà tití tisile búkù tátrítrí kúlí àdhyá na dhi ki 'o ko dhi, Gìká ní tátrítrí akódhi nda dri. » ¹¹Dì mà adré nòá ngádra 'á dhi, dhya àlo kitswá atsálé gyägya Gìká kandrá tátrítrí kúlí 'òma sè bwà ko. Tako ko, Gìká ní Kúlí adré tàá dhi: «Dhya atsálépi gyägya áyi tà ka'ika'i sè dhi ní adrí. » ¹²Dì, tátrítrí kúlí adré ína áyi totó tà ka'ika'i dri ko. Be ró dhi, ngóró tisile dhi tíni: «Dhya adrélépi tà tití tátrítrí kúlí dré adrélé tâle dhi ki 'o dhi ní adrí tà nda i sè. »

¹³Krísto apá àma tátrítrí angálépi tátrítrí kúlí lésè dhi lésè, dré atsálé dhya tatrílé dhi ró àma ki tà sè dhi sè. Tako ko, Gìká ní Kúlí adré tàá dhi: «Dhya ángùdhi tidílé fa kipakipa dri dhi tátrítrí íbe i dri. » ¹⁴Krísto 'o tà nda kònini, kitswále tà taní Gìká dré lazílé Àbàrámà dré dhi kòtsaró kpà móndyá surú twá ro dhi i véna Yésu Krísto sè, mà kòkisúró Tíri Lólo Gìká dré lazílé dhi àma ki tà ka'ika'i sè be dhi bvó.

Tátri' tri' kúlí i lazikúlí be dhi

¹⁵Áma adrúpi i, má ní tà nda kòdhí ní tadhá tà móndí i dré adrélé 'ole àyi kòfalésè dhi rú: Móndí i kòbhà tà ru yìzo àyi kòfalésè dhi, à kitswá gòle tà nda ní bhe bwà ko. À kitswá kpà tà àzya bha tà nda dri bwà ko.

¹⁶Dì tà Gìká dré tá lazílé Àbàrámà dré dhi i kókpà kònini. Gìká ní Kúlí adré tàá dhi, Gìká lazí tá tà nda i Àbàrámà dré, toyó ni be. Kúlí nda adré tàá «toyó ni i dré» ngóró móndí bì dhi i dré dhi tíni ko. Be ró dhi, adré tàá «toyó ni dré» ngóró móndí àlo dré dhi tíni. Móndí àlo nda Krísto i.

¹⁷Tà má dré adrélé lèle tâle dhi, tà kònídhi i: Gìká bhà tá tà ru yìzo Àbàrámà be dhi gò, áyi lazikúlí fèzo drá. Dì tátrítrí kúlí atsálépi kóná kámá-su-drì-nyadhi-àlo-drì-mudrì àmvolésè dhi kitswá ína tà bhale ru yìzo nda ní bhe bwà ko. Tátrítrí kúlí nda kitswá kpà lazikúlí nda ní pfu ko.

¹⁸Tako ko, tà Gìká dré lazílé áyi móndyá i dré tâyilé ro dhi kàdré tá áyi totó tátrítrí kúlí dri dhi, kònò tâyilé nda kitswá tá áyi totó lazikúlí dri ko. Dì, tà bâti ró dhi, Gìká fè tâyilé nda Àbàrámà dré áyi lazikúlí sè.

Tà Gìká dré tátri' tri' kúlí fèzo ásà dhi

¹⁹Kàdré dì kònini dhi, tà Gìká dré tátrítrí kúlí fèzo ásà dhi àdho tà i? Gìká fè tá tátrítrí kúlí nda kitswále móndí ki tàkonzì tadhá àyi dré, tsàle lókyá Àbàrámà ni toyó tà ní ni lazizó nda dré atsárà'a. Gìká fè tá tátrítrí kúlí nda ángéló i sè, ìndì móndí àlo adrélépi tá áyi totó móndí ki kòfalé 'á Gìká be dhi sè. ²⁰Dì Gìká dré tá áyi lazikúlí nda ní fèzo Àbàrámà dré dhi, dhya àzya adrélépi tá áyi totó àyi ki kòfalé 'á dhi tá yókódhó. Tako ko, Gìká ngbà i àlo kwákwa.

²¹Kòdhì adré tsì tàá dhi, tátrítrí kúlí adré ru pfu lazikúlì Gìká àdhya ìbe? Tàdzí ko! Tàko ko, tátrítrí kúlí kòkítswá tá lídrì fe móndí i dré bwà dhi, kònò móndí kì tá atsá gyágya tátrítrí kúlí nda sè.

²²Dì, Gìká ni Kúlí adré ína tàá dhi, móndyá tití bvò àdhya i tàkonzì ni rinyí zàle, Gìká kòfèrò áyi lazikúlì nda móndyá adrébhá Yésu Krísto ni ka'i dhi i dré àyi kì tà ka'ika'i sè.

²³Drìdrì lókyá adrészó Krísto ni ka'i nda dré atsázó dhi kandrá dhi, àma tá móndí 'ile tátrítrí kúlí ni rinyí zàle, tsàle lókyá nda ni tadhárà'a.

²⁴Dì ásà dhi, Gìká bhà tá tátrítrí kúlí nda adrélé àma kì drì kòlepi ró, tsàle lókyá Krísto dré atsárà'a, Gìká kòbhàrò àma gyágya i kandrá àma kì tà ka'ika'i sè.

²⁵Dì lókyá adrészó Krísto ni ka'i nda dré atsálé dre dhi sè dhi, àma vélé tátrítrí kúlí adrélépi tá àma kì drì ko nda ni rinyí zàle ko.

Àma Gìká ni ànzi 'i bàti

²⁶Dì àmi tití dhi i Gìká ni ànzi 'i, mì dré Yésu Krísto ni ka'ile dhi sè.

²⁷Tàko ko, àmi tití bàtisimò dobhá ru amúzó Krísto be dhi i, mì asó Krísto àmi rú dre.

²⁸Dì àmi vélé twátwa ko, gba mì kàdré Yúdà ànzi 'i yà, kó ngalè móndí Yúdà ànzi ró ko dhi 'i yà, màrábà 'i yà, kó ngalè móndí màrábà ro ko dhi 'i yà, àgo 'i yà, kó ngalè tòkó 'i yà dhi. Tàko ko, àmi tití mì atsá ngá àlo ró Yésu Krísto na.

²⁹Dì mì kàdré móndyá Krísto àdhya 'i dhi, àmi Àbàramà ni ànzi 'i bàti. Mì ni kpà tà Gìká dré lazilé áyi ànzi i dré tàyilé ro dhi ni kisú.

Gàlàtìyàbhá i 4

¹Tà má dré adrélé tâle dhi, tà kònìdhi 'i: Dhya dra áyi atá ni ngá kisulépi tàyilé ro dhi kàdré dhu rè mvámvá ro dhi, akódhi ngóró màrábà tñi, gba áyi atá ni ngá tití dhi dré adrészó ína ró dhi.

²À adré akódhi ni bha akódhi ni likíbhá i drígá ìndì akódhi ni ngá likíbhá i drígá, tsàle lókyá atá ni dré bhàle dhi dré atsárà'a.

³Dì àma, àma tá kókpà ànzimvá i tñi, adrélé kpà màrábà i ró tà bvò kòndì àdhya kì rinyí zàle.

⁴Dì lókyá kòkítswá dre dhi, Gìká dré áyi Mváagó ni amùzo, tòkó dré tìle tátrítrí kúlí zàle,

⁵kàpáró móndyá adrébhá tá tátrítrí kúlí nda zàle dhi i, mà kàtsáró Gìká ni ànzi i ró be dhi bvó.

⁶Dì mà dré adrélé akódhi ni ànzi 'i bàti dhi sè dhi, Gìká amù áyi Mvá ni Tírí adrélé àma kì togó na. Tírí nda adré loyóá àma léna dhi: «Ábbà! Tátá! »

⁷Dì ásà dhi, mí vélé màrábà 'í ko. Be ró dhi, mí mína Gìká ní mvá 'í báti. Dì mí dré adrélé akódhi ní mvá 'í dhi sè dhi, mí ní kpà tà dré lazílé áyi ànzì i dré tàyilé ro dhi ní kisú.

Pólò ni togó lanzì Gàlàtì` yàbhá kí tà sè

⁸Wáláká dhi, mí dré tá Gìká ní nírà ko dhi 'á dhi, àmí tá màrábà gìká tàko kya 'í, tágba gìká nda i dré adrészó gìká báti 'í ko dhi.

⁹Dì, nyànomvá dhi, mí ní vélé Gìká dre. Tà báti ró dhi, Gìká ní àmí nì. Dì mí 'o àmí ngíni góle àmí kí adzá tà rìnyí àko ìndì kizà ro bvò kònđi àdhya nda i véna dhi? Mì adré tsì lèá góle adrélé tà nda kí màrábà i ró?

¹⁰Tàko ko, mí adré àmíkya kítú àruka kí tà lebè, mbă àruka kya íbe, lókyá àruka kya íbe, ìndì kóná àruka kya íbe.

¹¹Má adré ngá ro àmí kí tà sè, àzí má dré 'ole àmí kòfalé dhi ní dra atsá tà tàko ró dhi sè.

¹²Áma adrúpi i, má adré àmí kí ti lizí, mí kàtsáró má tíni, ngóró má dré tá atsálé àmí tíni dhi tíni. Wáláká dhi, mí 'o tá ma kònzi ko.

¹³Ngóró mí dré nile be dhi tíni dhi, lókyá má dré Rúbí Taní longózó àmí dré vésè ní aло sè dhi sè dhi, má longó tá, áma rúbhá dré tá adrélé drà ro dhi sè.

¹⁴Dì tágba áma rúbhá yàyà nda dré tá adrészó tà lanzì ro àmí dri dhi, mí ayízè tá ma ko, mí gá tá kpà ma ko. Be ró dhi, mí ka'i àmíkya ma dòle ngóró ángéló Gìká àdhya tíni, kó ngalè Yésu Krísto ní tändi tíni.

¹⁵Dì àmí kí arí mí dré tá adrészó ába dhi vélé ángwà? Má kítswá tàá àmí kí tà sè dhi, kòkítswá tá dhi, mí ní tá àmí kí mí angí afèle má dré. ¹⁶Dì, nyànomvá dhi, má atsá vo vélé àmí kí kàribhá ro, má dré adrélé tà báti ta àmí dré dhi sè?

¹⁷Mónđí àruka àmí kòfalé dhi kí togó àtsi ró kítswázó àmí kí se àyi vésè. Dì, tà i dré adrélé lèle 'ole nda dóro ko. I adré àyíkya àma kí kòfalé le lanzílé àmí íbe, àmí kí togó kàtsáró àtsi ró àyi kí tà sè be dhi bvó.

¹⁸Adré togó íbe àtsi ró dhi dóro, tà adrészó togó íbe kònñi dhi kàdré dóro dhi. Adré kpà lèá dhi, mí kàdré togó íbe àtsi ró lókyá wáyi sè, ngbà 'í lókyá mà dré adrérà'a àmí íbe dhi 'á ko.

¹⁹Áma ànzì i, má adré góle kizà nya àmí kí tà sè, ngóró tòkó adrélépi 'ole tìle dhi dré adrélé kizà nya dhi tíni, tsàle lókyá mí dré dra àmí kí tayízó Krísto dré ladzálé atsálé i tíni dhi 'á.

²⁰Má lè tá adrélé túmání àmí íbe nyànomvá, má kòkítswáró tà ta àmí dré lású be twá. Àngyá ko, áma drì adré abílé àmí kí tà sè!

Tà tadhálé Àgárà ni tà rú, i` ndí` Sárà ni tà rú dhi

²¹Àmí adrébhá lèá adrélé tátrítrí kúlí zàle ní i, mí tà rè má dré ká: Mì ní tà tátrítrí kúlí nda dré adrélé tâle dhi i ko?

²²Tàko ko, à tisì tá dhi, Àbàramà tá ànziàgo íbe rì. Àlo ni tá mvámvá tòkó màrábà ro, rú be Àgárà dhi dré tile dhi 'i. Àzya ni tá mvámvá tòkó màrábà ro ko, rú be Sára dhi dré tile dhi 'i.

²³À ti mvámvá tòkó màrábà ro dhi àdhya nda rinyí rúbhá àdhya sè. Di, à ti mvámvá tòkó màrábà ro ko dhi àdhya nda lazikúlí Gìká àdhya sè.

²⁴À ni kitswá tà nda kòdhì kí àndu ngí kònìnì: Tòkó rì nda i adré tà rì Gìká dré bhàle ru yìzo móndí íbe dhi kí tà tadhá kòdhya. Àgárà nda adré tà Gìká dré bhàle ru yìzo móndí íbe kòngó Sìnayì drìna dhi ni tà tadhá. Akódhi adré ànzi kí ti adrélé màrábà i ró.

²⁵Àgárà adré kòngó Sìnayì bvò Àràbìyà àdhya na dhi ni tà tadhá, adrészó kpà Yérusalémà ándrò kòndí ni tà tadhá. Àngyá ko, Yérusalémà nda ànzi ni íbe dhi i màrábà 'i.

²⁶Di, Yérusalémà bhù na dhi ína màrábà 'i ko. Yérusalémà nda àma kí andre 'i.

²⁷Tàko ko, Gìká ni Kúlí adré tàá dhi: «Mi, tòkó kóngó ro tìlepi ko ni, mí kòlenzé wà! Mi mváaswa yìlepi ko ni, mí kòga lúlúgyá wà! Tàko ko, tòkó tayílé dhi ni ànzi kí lizó bí, tòkó adrélépi agó be dhi àdhya kí lavú. »

²⁸Àma adrúpi i, àmí àmikya ànzi tìle Gìká ni lazikúlí sè dhi 'i, ngóró Ísákà tñi.

²⁹Lókyá nda kònàdhì sè dhi, mvámvá tìle rinyí rúbhá àdhya sè nda adré tá mvámvá tìle Tirí Lólo ni rinyí sè nda ni mì pfo. Nyànomvá dhi, tà nda kòdhì kókpà kònìnì.

³⁰Di, Gìká ni Kúlí adré tàá ngínì? «Mí dro tòkó màrábà ro nda i mvá ni be mí kandrásè. Tàko ko, tòkó màrábà ro nda ni mvá kitswá ína tà lazílé tayílé ro dhi ni kisú túmání tòkó màrábà ro ko dhi ni mvá be tadtí ko. » ³¹Di ásà dhi, àma adrúpi i, àma tòkó màrábà ro dhi ni ànzi 'i ko. Be ró dhi, àma àmakya tòkó màrábà ro ko dhi ni ànzi 'i.

Gàlàtìyàbhá i 5

Àma móndyá Krísto dré tri` le dhi 'i

¹Krísto trì àma, mà kàdréró móndí trìle báti dhi i ró. Adré di lèá dhi, mì kàdré àmí kí totó tätä tà nda sè. Mì kòtayí kpà àmí góle adrélé tódhya màrábà tátrítrí kúlí àdhya i ró ko.

²Mì yi rè ká! Ma, Pólò, má adré tàá àmí dré dhi: Mì kò'o àmí lwàle kitswálé atsálé gyágya Gìká kandrá dhi, tà Krísto dré 'ole àmí dré dhi kitswá vélé àmí kí ledé ko.

³Má adré góle tàá dhi: Lè dhya ángùdhi áyi 'olepi lwàle dhi kàdré tà tití tátrítrí kúlí dré adrélé tâle dhi kí 'o.

⁴Àmí adrébhá láti nda atsázó gyágya Gìká kandrá tátrítrí kúlí 'òma sè ni i, mì lanzí ru Krísto be dre. Mì vwà kpà Gìká ni togó taní rúsè vwàvwà.

⁵Di, àma ró dhi, àma kí tà ka'ika'i sè dhi, mà adré mì bha Gìká véna àma kí bhàma gyágya akódhi kandrá dhi ni tà sè, adrészó tà nda ni letè lovó sè Tirí Lólo ni rinyí sè.

⁶Tàko ko, àma adrébhá Yésu Krísto na dhi i dré dhi, dhyá kí lwàma ìndì dhyá kí lwàma ko dhi, tà tàko 'i. Tà kàdrì lavúlé dhi ngbà 'í Krísto ni ka'ima gò adrézó tà ka'ika'i nda ni tadhá lèle sè dhi 'i.

⁷Mì adré kó tá angú ra dóro dhi, àdhi kikí dì àmì tà báti ka'ima 'ole dhi ni tayí dhi ni?

⁸Tà adrézó àmì kí togó se kònìnì nda angá ína Gìká adrélépi àmì kí azí dhi vélésè ko.

⁹Mì ni ko tâle dhi, tákú mvá tsà dhi adré mápà fóndro tití dhi ni 'o avólé nì dhi? ¹⁰Dì, má adré mána ka'ia Mírì na tâle dhi, mì kitswá tà twá kisù tà má dré adrélé tâle kòdhì rúsè ko. Kàdré ína dhya adrélépi àmì kí drì kizá dhi ni tà sè dhi, Gìká ni tà bha akódhi nda dri, kàdré gba àdhi 'i ya dhi.

¹¹Áma adrúpi i, kònò má kàdré tá tadhá dhi, lè móndí i kàdré àyi kí 'o lwàle dhi 'i dhi, à ni tá go adrélé áma mì pfo àdho tà sè? Tàko ko, tà má dré adrélé longólé Krísto ni dràma fa kipakipa dri dhi ni tà dri dhi kitswá tá vélé móndí kí 'o ledhélé dhi ko.

¹²Kàdré dhya adrébhá àmì kí drì kizá nda kí tà sè dhi, má mìlésè dhi, dóro ni tá i dré àyi kí rúbhá kí tolwàle tití dhi!

¹³Àmì, áma adrúpi ró ni i, Gìká azí àmì adrélé móndí trìle báti dhi i ró. Dì, mì kàdré àmì kí trìma nda ni no ngóró tà adrélépi láti fe àmì dré adrézó lovó kònzi àmì kí rúbhá kya kí 'o dhi ró ko. Be ró dhi, mì kàdré àmikya tà 'o àmì kí adrúpi i dré àyi kí màrábà i tíni lèle sè.

¹⁴Tàko ko, tà tití tátrítrí kúlí dré adrélé tâle dhi i adré àyi kí totó tolí àlo kònìdhi dri: «Mí kàdré ámi àzya ni le ngóró mí dré adrélé ámi tändi ni le dhi tíni. » ¹⁵Dì, mì kàdré àmikya ru titsí, adrézó ru nya àmì kòfalésè kà'wá àtrá kya tíni dhi, mì kònò dì dóro, mì kòpfuró ru todràle ko.

Atsima Tíri' Lólo ni rìnyí sè dhi

¹⁶Má adré dì tàá dhi: Mì kàdré atsílé Tíri' Lólo ni rìnyí sè gò, mì kòkítswáró lovó kònzi àmì kí rúbhá kya kí 'o ko.

¹⁷Tàko ko, tà lovó kònzi rúbhá àdhya dré adrélé lèle 'ole dhi i twá Tíri' Lólo àdhya i rúsè. Tà Tíri' Lólo dré adrélé lèle 'ole dhi i kókpà twá tà lovó kònzi rúbhá àdhya dré adrélé lèle 'ole dhi i rúsè. Di tà rì nda kòdhì i adré ru pfu àyi kòfalésè gò, mì dré kitswázó tà mì dré adrélé lèle 'ole dhi kí 'o bwà ko.

¹⁸Dì, mì kàdré àmì kí tayí Tíri' Lólo dré adrélé tidrìle dhi, àmì vélé tátrítrí kúlí ni rìnyí zàle ko.

¹⁹À ni kitswá tà lovó kònzi rúbhá àdhya dré adrélé lèle 'ole dhi kí no ngádra 'á: ndòtò tà, tà ndí ró dhi, tà swà,

²⁰Gìká tàko kí lindrì bhàma, kólé tà, togó kònzi bhàma, lawà, lovó kònzi bhàma móndí i rú dhi, togóaswa, dhyá kí tà bhàma drìdrì dhi, ru lanzima, ru kayima,

²¹dirèma, wá tsìma, gwányá wàyá kí tà, tsàle tà àruka lású be kònìnì dhi i. Má adré tà longó àmì dri ngóró má dré tá longolé àmì dri drìdrì dhi tíni: Móndyá adrébhá tà 'o lású be kònìnì dhi i kítswá àyikya file Gíká ni Òpì na ko.

²²Dì, lò'wa dóro Tírí Lólo dré adrélé 'ole 'ale móndí i léna dhi i, kònì 'i: lèle, arí, tà kídríkídrí, togó vwàvvà, togó dóro, tà dóro 'oma, tà ka'ika'i,

²³togó yàyà, ìndì dhyá kí lovó mvòma. Tátrítrí kúlí adré tà ta kònzi tà nda kòdhí i rú àlomvá ko.

²⁴Móndyá Yésu Krísto àdhya i tidí fa kípakipa dri lovó kònzi rúbhá àdhya, túmání tà tití lovó kònzi nda dré adrélé lèle 'ole dhi i be todràle dre.

²⁵Mà dré adrélé lídrí i be Tírí Lólo ni rinyí sè dhi sè dhi, lè mà kàdré kpà atsílé Tírí nda ni rinyí sè.

²⁶Lè mà kàdré drìkàdrí ro ko. Mà kàdré àma kí adrúpi kí togó 'o aswálé ko, adrézó lovó kònzi bha àma kí adrúpi i rú ko.

Gàlàtíyàbhá i 6

Àma kí adrúpi kí tà lanzì dòma

¹Áma adrúpi i, mì kòkisú àmì kí adrúpi àlo dhi adrérà'a tàkonzi 'o dhi, àmì lì'wábhá àmì kí tà ka'ika'i na dre ni i, mì kòlotó akódhi nda togó yàyà sè. Dì, mì kòsu àmì kí tändi i rú, tà nda kòtabhiró kókpà àmì gò, àmì kí 'ozo dhèle tàkonzi na dhi ko.

²Mì kàdré ru ledé àmì kòfalésè, adrézó àmì kí adrúpi kí tà lanzì do. Mì kàdré 'oá kònìnì dhi, mì ni tolí Krísto dré fèle dhi ni 'o kítswálé tití.

³Dhya àlo kàdré áyi no móndí kàdrí ro dhi, tágba dré adrézó móndí tàko i dhi, akódhi nda adré áyi tändi ni lití.

⁴Lè àmì àlo àlo tití dhi i mì kàdré tà mì dré adrélé 'ole dhi kí tabhì, mì kòkitswáró àmì kí drì bha kuru àmì kí tändi kí tà sè be dhi bvó. Dì, mì kòtabhì àmì kí tà móndí àruka kya rú ko.

⁵Tàko ko, lè àmì àlo àlo tití dhi i mì kàdré tà bhàle àmì kí tändi i drígá dhi kí 'o kòdhya.

⁶Lè dhya ángùdhi adrézó Gíká ni kúlí tadhá drá dhi kàdré áyi ngá dóro tití dhi kí lanzí dhya adrélépi áyi tadhá dhi dré.

⁷Mì kòtayí àmì adrélé litílé ko: À kítswá Gíká ni gu bwà ko. Mì ni ngá mì dré adrélé kidhílé dhi ni akónà kòdhya.

⁸Mì kàdré ngá kidhí lovó kònzi rúbhá àdhya dré dhi, mì ni dràdrà akónà lovó kònzi nda lésè kòdhya. Dì, mì kàdré ngá kidhí Tírí Lólo dré dhi, mì ni lídrí kónà vésè kólyá dhi ni akónà Tírí nda vélésè kòdhya.

⁹Mà kòtayí àma adrélé landèle tà dóro 'oma sè ko. Tàko ko, lókyá kòkitswá dre dhi, mà ni lanyá dóro akónà, mà kòtayí àma landèle ko dhi.

¹⁰Di ásà dhi, mà kàdré láti nda adrészó tà dóro 'o móndyá tití i dré. Lavúlé dhi, mà kàdré 'òá kònìnì àma kí adrúpi Yésu ni ka'ibhá dhi i dré.

Pólò ní kúlí kùdù

¹¹Mì nò rè wárágà pá kàdrì má dré adrészó wárágà kònìdhi ni tisì àmì dré áma tändi ni drígá sè dhi i ká.

¹²Dhya adrébhá àmì kí le 'ole lwàle nda i adré àyíkya tà 'o rúbhá sè, à kàdréró àyí kí no dóro be dhi bvó. Di, i adré ngbà 'í tà nda kí 'o, à kàdréró àyí kí mì pfo Krísto ni fa kipakipa ni tà sè ko dhi sè.

¹³Tà báti ró dhi, ndìndì àyí àyí kí 'obhá lwàle nda i adré àyíkya tátrítrí kúlí likí ko. Tágba kònìnì dhi, i adré àmì kí le 'ole lwàle, i kòkitswáró àyí kí afà tà i dré àmì kí 'òzo 'òá àmì kí rúbhá sè dhi ni tà sè.

¹⁴Di, ma ró dhi, mà kítswá mána áma afà tà àzya sè ko, kàdré ngbà 'í fa kipakipa àma kí Mírì Yésu Krísto àdhya ni tà sè ko dhi. Tako ko, fa kipakipa nda sè dhi, à tidí tà bvò kòndì àdhya má dré tá adrészó mì bha driá dhi i todràle dre. À tidí kpà ma dràle tà bvò kòndì àdhya i lésè dre.

¹⁵Tà báti ró dhi, dhyá kí lwàma ìndì dhyá kí lwàma ko dhi, tà kàdrì 'í ko. À kàdré lavúlé dhi ngbà 'í dhyá kí tayíma Gíká dré bhàle tódhyá adrélé móndí tídhí ro dhi 'í.

¹⁶Tà kídríkìdrí i Gíká ni togó dóro be dhi i kàdré móndyá tití adrébhá 'òá kònìnì dhi i dré. Àyí nda i Ísérélè ànzì báti Gíká àdhya 'í.

¹⁷Kùdù ro dhi, lè dhya àlo kògò adrélé áma lagù ko. Àngyá ko, ma àngì Yésu àdhya íbe má rú.

¹⁸Áma adrúpi i, àma kí Mírì Yésu Krísto ni togó taní kàdré àmì íbe! Kàdré kònìnì.

Èfésòbhá i

Èfésòbhá i 1

Pólò ni mòdo fèma

¹Ma, Pólò, bhàle adrélé Yésu Krísto ni àpóstolò ro ngóró Gíká dré lèle dhi tíni dhi, má adré wárágà kònìdhi ni tisì àmi, móndyá lolo Gíká àdhya Èfésò na dhi i dré, àmi adrébhá Yésu Krísto ni ka'ì tà tití i sè dhi i dré.

²Gíká àma ki Atá i Míri Yésu Krísto be dhi i kòbhà àyi ki togó taní àmi rú, ìndì i kòfè tà kìdríkìdri àmi dré!

Tà taní Gíká dré afèlè àma dré Krísto na dhi i

³Rúku kàdré Gíká, àma ki Míri Yésu Krísto ni Atá dré! Tàko ko, akódhi afè àma dré tà taní tití angábhá i vélésè bhù lésè dhi i, mà dré adrélé Krísto na dhi sè.

⁴Drìdrì bvò ni bhàma kandrá dhi, zì tá àma adrélé Krísto na, mà kàdréró lolo ìndì tà kònzi àko àma rú i mìlésè be dhi bvó. Akódhi ni lèle sè dhi,

⁵bhà tá àma twá drìdrì, mà kàtsáró áyi ànzì i ró Yésu Krísto sè, ngóró dré tá lèle 'ole dhi tíni, ìndì ngóró tà nda dré tá adrélé doro akódhi mìlésè dhi tíni.

⁶O tá kònìnì, mà kàdréró áyi rú bha kùle, áyi togó taní mìlanzìlanzì ro i dré bhàle àma rú áyi Mvá i dré lèle tò dhi na dhi ni tà sè.

⁷Tàko ko, akódhi ni togó taní kàdrì lavúlé nda sè dhi, amù áyi Mvá nda dràle àma ki tàkonzi trìzo ìndì àma ki apázó tàkonzi lésè akódhi ni kàrì sè.

⁸Tà bâti ró dhi, fè áyi togó taní gâle àma léna bî, túmání tògyá wâyi tà tití dhi ki àndu nìzo dhi be.

⁹Tadhá kpà àma dré tà lùzu ró i dré kisùle 'ole ìndì i dré lèle 'ole kínó lésè Krísto na dhi, ngóró dré tá adrélé doro akódhi mìlésè dhi tíni.

¹⁰Tà dré lèle 'ole nda, tà kònìdhi i: Lókyá kòkìtswá tití dre dhi, a ni tà tití bhù na ìndì bvò dri dhi ki amú bhàle adrélé ópí kàdrì àlo, Krísto zàle.

¹¹Dì Gíká bhà àma twá, àma ki zìzo adrélé móndyá ína i ró Krísto na, ngóró i dré kisùle 'ole kínó lésè dhi tíni. Tàko ko, akódhi adré tà tití dhi ki 'o ngóró i dré kisùle 'ole, ìndì i dré lèle 'ole dhi tíni.

¹²Dì Gíká 'o tà nda kònìnì, kitswálé àma àma ki mi bhabhá Krísto véna drìdrì dhi i, mà kàdréró Gíká ni rú bha kùle akódhi ni mìlanzìlanzì sè be dhi bvó.

¹³Àmi ró dhi, mi yi kókpà tà bâti Rúbí Tani àdhya Gíká dré adrészò àmi ki tìdrí ásà dhi gò, mi dré Krísto ni ka'izo. Dì Gíká dré áyi àngì lwàzo àmi rú, tadházóá dhi, àmi móndyá ína 'i káyà dhi. Àngì nda, Tirí Lólo Gíká dré lazilé dhi i.

¹⁴Tirí Lólo nda ngádrì Gíká dré afèlè àma dré drìdrì, tadházóá dhi, i ni dra tà i dré lazilé tàyilé ro dhi ni afè àma dré dhi i, tsàle lókyá i dré dra àma, móndyá ína ró dhi

kì apázó kitswálé tití dhi 'á. Dì ásà dhi, mà kàdré akódhi nì rú bha kùle akódhi nì mìlanzìlanzi sè wà!

Pólò zi tà Gìká tí Èfésòbhá i dré

¹⁵Dì ásà dhi, kidhólé lókyá má dré yìzoá tâle dhi, mì adré Míri Yésu nì ka'ì, adrészó móndyá lolo Gìká àdhya kì le ngíni ya dhi sè dhi,

¹⁶má adré àwoyà ta Gìká dré àmi ki tà sè landè àko ró. Má adré kpà àmi ki tà kisù, má dré adrérà'a tà zi Gìká tí dhi 'á.

¹⁷Má adré Gìká, àma kì Míri Yésu Krísto nì Atá mìlanzìlanzi ro dhi nì ti lizí, kòfèrò tògyá Tírí Lolo àdhya àmi dré kitswázó áyi tà lùzu ró dhi kì ni, mì kòkìtswáró kpà áyi tändi nì ni dóro lavulé be dhi bvó.

¹⁸Má adré kpà tà zi akódhi tí, kò'oró áyi ngádra ngá kazá àmi kì togó na, mì kònìró tà dré àmi kì azízó adrélè mì bha í véna ásà dhi i, túmání tà kàdrì mìlanzìlanzi ro dré lazilé áyi móndyá i dré tàyilé ro dhi be.

¹⁹Kò'o kpà àmi áyi rinyí kàdrì lavulé adrélèpi tà 'o àma adrébhá áyi ka'ì dhi i léna dhi nì ni. Akódhi nì rinyí kàdrì lavulé nda,

²⁰rinyí dré tadhálé Krísto rú, dré akódhi nì tingárà'a dràdrà lésè, ìndì akódhi nì 'orà'a lirilé áyi dríágó lésè bhù na dhi 'á dhi 'i.

²¹Gìká bhà Krísto nda adrélè ópí kàdrì tití dhi i drile, rinyí tití adrészó òpì nya dhi i drile, rinyí àruka tití dhi i drile, òpì tití dhi i drile, ìndì rú tití kitswálé fèle lókyá kònìdhì sè ìndì lókyá adrélèpi alile dhi sè dhi i drile.

²²Bhà kpà tà tití dhi i adrélè Krísto ni pá zàle gò, akódhi nì bhàzo adrélè Èkèlézyà ni drì kòlepi ró tà tití i sè.

²³Èkèlézyà nda Krísto nì rúbhá 'i. Akódhi adré Èkèlézyà nda nì 'o gàle áyi tändi nì lídrì sè bì, ngóró i dré adrélè tà tití dhi kì 'o gàle áyi tändi sè bì dhi tíni.

Èfésòbhá i 2

Gìká 'o àma adri' lé túmä' ní Krísto be

¹Wáláká dhi, àmi tá àmikya móndí dràbhá dre dhi 'i, àmi kì ligima nì tà sè ìndì àmi kì tàkonzi kì tà sè.

²Lókyá nda sè dhi, mì adré tá tatsílé tàkonzi 'obe, ìndì tà bvò kòndi àdhya kì lebèbe. Mì adré tá kpà tirí kònzi kì kàdrì adrélèpi òpì kitswálé nòle bwà ko dhi drile dhi nì lebè. Tirí nda tirí adrélèpi tà 'o nyànomvá móndyá adrébhá ligilé Gìká rú dhi i léna dhi 'i.

³Àma tití, àma tá kókpà àyi nda i kòfalé, adrélè tà 'o àyikya tíni. Mà adré tá tatsílé lovó kònzi àma kì rúbhá kya kì 'obe, ìndì tà mà dré tá adrélè kisùle lovó kònzi nda sè dhi kì 'obe. Àma kì tà lású kònzi sè dhi, mà adré tá lìle Gìká nì kombà kisú àyi nda kya tíni.

⁴Dì, Gìká nì togó dóro lavulé dhi sè, ìndì akódhi nì lèle kàdrì àma vélé dhi sè dhi,

⁵'o àma adrílé túmāní Krísto be, tágba mà dré tá adrészó móndí dràbhá dre dhi 'i àma kí tàkonzì kí tà sè dhi. Tà báti ró dhi, Gíká tídri àmí áyi togó taní sè.

⁶Dí mà dré ru amúlé Yésu Krísto be dhi sè dhi, Gíká tingá àma kurú na túmāní akódhi be, àma kí 'òzo lirilé bhù na túmāní akódhi be.

⁷Gíká 'o tà nda kònìnì, kítswálé lókyá tití adrébhá alile dhi i sè dhi, í kòtadháró áyi togó taní kádrí lavulé, í dré bhàle àma rú Yésu Krísto na dhi be dhi bvó.

⁸Tako ko, Gíká tídri àmí áyi togó taní sè, àmí kí tà ka'ika'i sè. Tà nda kòdhí angá àmí kí tändi i vélésè ko. Be ró dhi, tà nda ína tà Gíká dré fèle àmí dré àngyá dhi 'i.

⁹Dí akódhi tídri àmí tà dóro mì dré 'ole dhi i sè ko, dhya àlo kòkítswáró áyi afà áyi tändi ni tà sè bwà ko.

¹⁰Àngyá ko, àma ngá Gíká dré ledélé áyi tändi ni drígá sè dhi 'i. Akódhi bhà àma tódyá Yésu Krísto na, mà kàdréró tà dóro í dré bhàle drídri àma dré 'ole dhi kí 'o be dhi bvó.

Àma súrú àlo Yésu Krísto na dhi 'i

¹¹Dí ásà dhi, mì kisù rè ngalè wáláká dhi, àmí tá móndí ngíni ró dhi 'i ya dhi ká. Tako ko, àmí tá móndí tìle súrú twá ro dhi 'i. Yúdà ànzì adrébhá àyi kí zi móndí lwàle dhi i ró dhi, í adré tá àmí kí zi móndí lwàle ko dhi i ró. (Tákò, àyi kí lwàma nda ngbà 'í tà í dré 'ole àyi kí rúbhá na dhi 'i.)

¹²Wáláká dhi, àmí tá vwàvwà ro Krísto rúsè. Àmí tá twá Gíká ni súrú, ìsérélè ànzì i rúsè. Àmí tá kpà twá tà Gíká dré bhàle ru yìzo móndyá ína íbe dhi rúsè, ìndì áyi lazikúlí rúsè. Bvò kònìdhí lé dhi, àmí tá Gíká àko, ìndì tà mì dré tá kítswázó mì bha ásà dhi tá kpà yókódhó.

¹³Dí, nyànomvá dhi, mì dré ru amúlé Yésu Krísto be dhi sè dhi, Gíká 'o àmí adrébhá tá vwàvwà ro dhi i atsálé ànyi í làga Krísto ni kàrì sè dre.

¹⁴Tako ko, Krísto ni tändi bhà tà kídríkìdrí àma kòfalé nì. Àngyá ko, 'o Yúdà ànzì i móndyá súrú twá ro dhi íbe dhi i atsálé súrú àlo ró, dré áyi rúbhá fèle dhi sè. 'O kpà zèribà adrélépi tá àma kí kòfalé lanzí, adrészó àma kí 'o adrélé kàrìbhá i ró dhi arílé.

¹⁵O kpà tátrítrí kúlì i tà tití tátrítrí kúlì nda dré adrélé tâle à kò'o dhi íbe dhi kí tà akílé. 'O tà nda kòdhí i kítswázó súrú rì nda kí bha adrélé súrú àlo tídhi ro dhi ró í léna, adrélé kpà tà kídríkìdrí íbe.

¹⁶O kpà kònìnì, kítswálé áyi dràma fa kípakipa dri dhi sè dhi, í kàmúró àyi rì nda i tódyá Gíká be, í kàtsáró rúbhá àlo ró. Dí pfu tà adrélépi tá àyi kí 'o adrélé kàrìbhá i ró nda dràle kònìnì.

¹⁷Dí Krísto nda alì Rúbí Tani tà kídríkìdrí àdhya ni longó àmí súrú twá ro adrébhá tá vwàvwà ro Gíká rúsè dhi i dré, ìndì àma Yúdà ànzì adrébhá tá ànyi akódhi làga dhi i dré.

¹⁸Tako ko, nzi láti àma dré adrészó àma kí kisí àmí íbe ànyi Gíká Atá làga Tirí Lólo àlo sè dhi nì.

¹⁹Dì ásà dhi, àmì súrú twá ro nì i, àmì vélé móndí twá i ko, ìndì móndí angábhá súrú twá i lésè dhi i ko. Be ró dhi, àmì àmíkya bhàànzi i túmání móndyá lolo Gìká àdhya íbe. Àmì kpà Gìká nì súrú akódhi nì dzó lé dhi i.

²⁰Akódhi adó kpà àmì dzó nda nì sìzo, àmì kì tobhàzo dzópá i dré bhàle àpóstolò i sè ìndì pròfétà i sè dhi dri. Yésu Krísto nì tändi, kírà agógó dzó nda dré adrészó áyi totó drià dhi i.

²¹Akódhi adré dzó wáyi nda nì 'o adrélé kitsílé, adrélé mbàle atsálé tépelò lolo Míri dré dhi ró dhi nì.

²²Dì mì dré adrélé Krísto na dhi sè dhi, Gìká adré kpà àmì kì tobhà dzó nda nì sìzo, dzó nda kàtsáró àrà i dré adrészó lána áyi Tírí sè dhi ró be dhi bvó.

Èfésòbhá i 3

Àzí Gìká dré bhàle Pólò dri' gá móndyá súrú twá ro dhi i dré dhi

¹Dì ásà dhi, ma, Pólò, ma Yésu Krísto nì móndí 'ile bădzó lé àmì súrú twá ro dhi kì tà sè dhi i.

²Mì yi tâle dhi, Gìká bhà àzí má drígá áyi togó tanì sè, má kàdréró 'òá àmì dré dhi i.

³Tako ko, akódhi tadhá má dré tà lùzu ró i dré kisùle 'ole kínó lésè dhi, ngóró má dré adrélé tà nì ni tisì tsà dhi tíni.

⁴Mì kònà tà má dré adrélé tisile kòdhì i dhi, mì nì kitswá tògyá Gìká dré afèle má dré Krísto nì tà lùzu ró nda nì àndu nìzo dhi nì atógyà.

⁵Wáláká dhi, Gìká 'o tá tà lùzu ró nda móndí lókyá àruka i sè dhi i dré nile ko. Dì, nyànomvá dhi, tadhá tà nda áyi Tírí nì rìnyí sè áyi àpóstolò lolo i dré, ìndì áyi pròfétà lolo i dré dre.

⁶Dì tà lùzu ró nda, tà kònìdhì i: Rúbí Tani nì ka'ima sè dhi, móndyá súrú twá ro dhi i kisú tà Gìká dré lazílé áyi ànzi i dré tàyilé ro dhi túmání Yúdà ànzi íbe dre. Iì atsá kpà rúbhá àlo ró túmání Yúdà ànzi nda íbe dre. Iì kisú kpà tà Gìká dré lazílé dhi túmání Yúdà ànzi nda íbe Yésu Krísto na dre.

⁷Gìká fè ma adrélé Rúbí Tani nda nì màrabà ro áyi togó tanì i dré bhàle má rú dhi sè, ìndì áyi rìnyí adrélépi tà 'o má léna dhi sè.

⁸Tágba má dré tá adrészó móndí tâko ró lavúlé móndyá tití Gìká àdhya i kòfalé dhi, akódhi bhà àzí nda má drígá áyi togó tanì sè, má kàdréró Krísto nì tà kàdrì, kitswázó àndu nì ni bwà ko dhi nì longó móndyá súrú twá ro nda i dré.

⁹Lè kpà má kàdré tadhá móndyá tití i dré ngádra 'á dhi, Gìká adré tà lùzu ró nda nì 'o ngíni ya dhi. Gìká ngá tití dhi kì bhàlepi dhi zù tá tà lùzu ró nda kínó lésè.

¹⁰O tá kònìni, kitswálé nyànomvá dhi, i kòtadháró Èkèlézyà rú áyi tògyá kàdrì i dré adrészó tà tití dhi kì 'o ásà dhi, tírí ópí kàdrì ro ìndì rìnyí ró kurú na bhù i 'ásè dhi i dré be dhi bvó.

¹¹Dì Gìká 'o tà í dré kisùle 'òle kínó lésè nda kítswálé tití àma kí Mírì Yésu Krísto sè, kàdréró kóná vésè kólyá.

¹²Dì mà dré adrélé Krísto na dhi sè dhi, ìndì mà dré adrélé akódhì ni ka'i dhi sè dhi, mà kítswá àma kí kisí ànyì Gìká làga tiri àko, ìndì tà ka'ika'i be bì.

¹³Dì ásà dhi, má adré àmi kí ti lizí, mì kòtayíró àmi kí togó adrélé lanzìle, má dré adrélé kízà nya àmi kí tà sè dhi sè ko. Tako ko, má adré kízà nya kònìnì, mì kòkítswáró Gìká ni mìlanzìlanzì kisú be dhi bvó.

Krísto ni lèle ni tà nìma

¹⁴Dì ásà dhi, má adré áma kórókó tití Gìká, àma kí Atá kandrá.

¹⁵Súrú tití bhù na ìndì bvò dri dhi i adré adrélé be akódhì sè.

¹⁶Má adré tà zi akódhì tí, kítswálé akódhì ni mìlanzìlanzì kàdrì lavúlé dhi sè dhi, kòtimbàró àmi kí togó áyì Tirí ni rinyí sè.

¹⁷Má adré zìá kònìnì, Krísto kàdréró adrélé àmi kí togó na àmi kí tà ka'ika'i sè. Má adré kpà tà zi Gìká tí, mì kàdréró trôle lèle rú, adrészó àmi kí totó tätä lána,

¹⁸kítswálé àmi túmání móndyá lólo tití Gìká àdhyá íbe dhi i, mì kòkítswáró Krísto ni lèle ni tálí ángopí ya, kàtswa ni ángopí ya, mvumvù ni ángopí ya, ìndì tálí ni ángopí ya dhi ni ni.

¹⁹Àyíya, mì kàdré akódhì ni lèle tà nìnì wäyi dhi ni lavúlépi nda ni ni, mì kàdréró gàle Gìká ni tändì ni lídrì sè kítswálé tití be dhi bvó.

²⁰Gìká rinyí íbe kítswázó tà 'o, tà mà dré adrélé zìle akódhì tí dhi kí lavú, ìndì tà mà dré adrélé kisùle dhi kí lavú byá, akódhì ni rinyí adrélépi tà 'o àma léna dhi sè.

²¹Mìlanzìlanzì kàdré akódhì dré Èkèlézyà na ìndì Yésu Krísto na, lókyá tití i sè ìndì kóná vésè kólyá! Kàdré kònìnì.

Èfésòbhá i 4

Adrema ngá àlo ró Krísto ni rúbhá na dhi

¹Dì ásà dhi, ma 'ile bădzó kònìd 'á Mírì ni tà sè ni, má adré àmi kí kodzó, mì kàdréró atsílè ngóró dré kítswálé tà Gìká dré àmi kí azízó ásà dhi sè dhi tíni.

²Mì kàdré àmi kí tà bha kíní mi tà tití i sè, adrészó tà 'o togó yàyà sè, adrészó tà letè togó vwàvwà sè. Mì kàdré àmi kí adrúpi kí tà yàyà mvo àmi kòfalésè lèle sè.

³Mì kàdré tà tití dhi kí 'o, adrészó àmi kí likí adrélé ngá àlo ró àmi kòfalésè Tirí Lólo na, tà kídríkídri adrélépi àmi kí fe ru amú dhi sè.

⁴Krísto ni rúbhá ngbà 'í àlo kwákawá. Tirí Lólo kpà ngbà 'í àlo kwákawá, ngóró tà Gìká dré àmi kí azízó adrélé mì bha í véna ásà dhi dré adrélé àlo kwákawá dhi tíni.

⁵Mírì ngbà 'í àlo kwákawá, tà ka'ika'i ngbà 'í àlo kwákawá, ìndì bátlisimò ngbà 'í àlo kwákawá.

⁶Giká kókpà ngbà 'í àlo kwákwa. Akódhi nda móndyá tití dhi kí Atá 'í. Adré òpì nya àyi tití dhi i dri, adrészó tà 'o àyi tití dhi i sè, adrészó adrélé àyi tití dhi i léna dhi nì.

⁷Dì, àma àlo àlo tití dhi i, mà kisú tà taní twátwa dhi i, ngóró Krísto dré tà nda kí lanzílé àma dré áyi togó taní sè dhi tíni.

⁸Ásà dhi, Giká ni Kúlí adré tàá dhi: «Akódhi dré tá mbärà'a kurú na dhi 'á dhi, drì tá dhya i dré rùle dhi i i vésè gò, tà taní lanzízó móndí i dré. »

⁹Kúlí «akódhi mbà kurú na» kòdhi i adré lèá tâle dhi, akódhi si tá kpà bvò àndúna.

¹⁰Dì akódhi silepi nda tá dhya àlo mbàlepi kurú na bhù kí lavú nda 'í, kò'oró bvò wáyi dhi gâle áyi tândi ni lídrì sè bï be dhi bvó.

¹¹Dì Krísto nda bhà móndí àruka Èkélézyà le dhi i adrélé àpóstolò i ró dhi nì. Bhà àruka ni i adrélé prôfétà i ró, àruka ni kí bhàzo adrélé Rúbí Tani longóbhá i ró, àruka ni kí bhàzo adrélé Èkélézyà ni likébhá i ró, àruka ni kí bhàzo adrélé tà tadhábhá i ró.

¹²Bhà àyi nda i adrélé kònìnì, i kàdréró móndyá Giká àdhya kí ledé kîtswálé tití, i kàdréró àzí bhâle àyi drîgá dhi kí 'o, adrészó Krísto ni rûbhá timbà be dhi bvó.

¹³A ni adré kònìnì, tsâle lókyá àma tití mà dré dra atsázó ngá àlo ró àma kí tà ka'ika'ì na, ìndì Giká ni Mvágó ni nîma na gò, mà dré li'wázó atsálé Krísto ni tândi tíni, kîtswálé akódhi ni tà sè tití dhi 'á.

¹⁴Lókyá nda sè dhi, mà kîtswá gòle vélé adrélé ànzimvá i tíni ko. À kîtswá gòle adrélé àma kí tesé tà tadhálé twátwa dhi i sè, ngóró lyâandre dré adrélé bwâtù liví, ìndì yí dré adrélé bwâtù kägbâ dhi tíni ko. À kîtswá kpà gòle adrélé àma kí tesé móndí adrébhá láti nda àma kí litízó àyi kí túrúpfú tà sè dhi i sè ko.

¹⁵Be ró dhi, mà ni àmakya adré tà bâti ta lèle sè, adrészó mbâle tà tití i sè, atsálé ngóró Krísto adrélépi rûbhá ni drì 'i dhi tíni.

¹⁶Akódhi nda adré rûbhá ni kîgá tití dhi kí 'o ru amú ìndì ru kisú kídri tití adrébhá àyi kí ti'ì dhi i sè, atsálé rûbhá àlo ró dhi nì. Dì rûbhá ni kîgá àlo àlo tití dhi i kàdré àyi kí àzí 'o dhi, rûbhá wáyi nda adré mbâle atsálé riñyi ró lèle na.

Li' dri` ti' dhi` ro Krísto na dhi

¹⁷Dì ásà dhi, mà adré àmì kí kodzó tà tândi ró Míri ni rû sè, mì kògoró vélé adrélé atsílé ngóró pàgánò i dré adrélé atsílé àyi kí tà kisùkisù àngyá na dhi tíni ko.

¹⁸Àyi kí tà kisùkisù nda atsá tînmvá ro gò, i dré adrészó vwàvvà ro lídrì Giká àdhya rûsè, i dré àyi kí togó 'ole tombálé gò adrészó tà nînì àko dhi sè.

¹⁹Àyi kí togó andíri gò, i dré àyi kí fèzo adrélé tà swà 'o, adrészó kpà tà ndì ró dhi kí kárá tití dhi kí 'o lovó sè.

²⁰Dì, àmì ró dhi, mì kisú àmìkya Krísto ni tà nîle dhi kònìnì ko.

²¹Tako ko, mì yi tá akódhi ni tà gò, à dré tà bâti adrélépi akódhi léna dhi ni tadházó àmì dré dhi 'í.

²²Kàdré dì àmí kí atsima wáláká dhi ní tà sè dhi, lè mì kòtingá àmí kí lídrì àku àmí rúsè. Àngyá ko, lídrì àku nda adré dràle dràdrà lovó kònzi adrébhá akódhi ní lití dhi i sè.

²³Kòdhi íbe dhi, mì kòtayí àmí kí tà kisùkisù Tírí Lólo dré adrélé ladzálé atsálé tídhí ro.

²⁴Mì kásó kpà àmí rú lídrì tídhí Gíká dré bhàle adrélé ína tñi dhi, mì kòkítswáró atsílé tà gyägya na, tà báti na, ìndì tà lólo na be dhi bvó.

²⁵Dì àmí àlo àlo tití dhi i, mì kòtayí kinzò tama, adrészó tà báti ta àmí kí adrúpi i dré. Àngyá ko, àma tití dhi i rúbhá àlo ní kìgá 'i.

²⁶Àmí kí togó kàdré aswálé dhi, mì kòtayí àmí adrélé tàkonzi 'o ásà ko. Mì kòtayí kpà kítú ndile àmí kí togóaswa nda dri ko.

²⁷Mì kòfè láti Dzáborò dré kitswázó tà 'o àmí kí togó na dhi ko.

²⁸Lè dhya ángùdhi adrélépi ngá kugù dhi, kògò adrélé ngá kugù ko. Be ró dhi, akódhi nda kàdré àzí 'o áyi tändi ní drígá sè adrészó adrílé ásà, kòkítswáró kpà ngá lanzí lemerèbhá i dré be dhi bvó.

²⁹Mì kòtayí kúlí kònzi àlo dhi apfòle àmí sílésè ko. Be ró dhi, mì kàdré ngbà 'í kúlí dóro kitswábhá àmí kí adrúpi kí timbà àyi kí tà ka'ika'i na dhi kí ta kòdhyá, kitswázó ayi adrébhá àmí kí yi dhi kí ledé ásà.

³⁰Mì kòfè kizà Tírí Lólo Gíká àdhyá dré ko. Tàko ko, Gíká afè Tírí nda àmí dré ngóró àngì lwàle àmí rú dhi tñi, tadházóá dhi, i ní àmí kí apá kitswálé tití kítú i dré bhàle dhi tú.

³¹Mì kòtingá àmí rúsè togó kùdzí, togóaswa, kombà, kótrétré, làdhá i, ìndì tà kònzi kí kárá tití dhi íbe.

³²Dì, mì kàdré àmikya dóro, adrélé àmí kí togó dóro tadhá àmí kòfalésè. Mì kàdré kpà àmí kí adrúpi kí tàkonzi tri àmí kòfalésè, ngóró Gíká dré àmí kí tàkonzi trile Krísto na dhi tñi.

Èfésòbhá i 5

Atsima ngádra 'ásè dhi

¹Dì àmí, Gíká ní ànzì dré lèle tò ní i, mì kàdré tà 'o akódhi àdhyá tñi.

²Mì kàdré kpà atsílé lèle na Krísto àdhyá tñi. Tàko ko, akódhi nda lè àma tò gò, áyi lídrì fèzo àma kí tà sè, ngóró mòbòmà tädzí be dóro fèle Gíká dré dhi tñi.

³Adré lèá dhi, ndòtò tà, tà ndí ró dhi i, ngá lovó be dhi i kàdré àmí kòfalé àlomvá ko. Àngyá ko, tà nda kòdhi i kitswá móndyá lólo Gíká àdhyá i sè ko.

⁴Adré kpà lèá dhi, ndòtò kúlí i, kúlí azaaza i, ìndì kúlí wàyá adrészó lenzélé ásà dhi íbe dhi i kàdré àmí kòfalé yókódhó. Kúlí lású be kònini nda i kitswá kpà àmí sè ko. Be ró dhi, mì kàdré àmikya kúlí adrészó àwoyà fe Gíká dré dhi kí ta kòdhyá.

⁵Tàko ko, mì nì dòro tâle dhi, móndyá adrébhá ndòtò tà 'o dhi i, móndyá adrébhá tà ndí ró dhi kí 'o dhi i, ìndì móndyá adrébhá ngá lovó bha dhi íbe dhi kí àlo kitswá fîle Òpì Krísto kya Gíká be dhi na ko dhi. (Dhya ángùdhi adrélèpi ngá lovó bha dhi ína gíká tàko kí lindrì bhàlepi 'i.)

⁶Mì kòtayí àmì dhya àlo dré litílé kúlì tàko i sè ko. Tàko ko, tà kònzi làsú be kònini dhi i adrè Giká ni kombà asé móndyá adrébhá ligílé akódhi rú dhi i dri.

⁷Ásà dhi, lè mì kòsù ru àyi nda íbe ko, adrészó kpà tà 'o àyi íbe ko.

⁸Tàko ko, wáláká dhi, àmì tá tímímvá 'i. Di, nyànomvá dhi, àmì àmikya ngádra 'i Míri Yésu na. Mì kàdré di atsílé ngóró ànzì ngádra àdhya i tñi.

⁹Àngyá ko, lò'wa dòro móndyá ngádra 'á dhi i dré adrélè 'ale dhi i, kònì 'i: tà dòro tití dhi kí 'oma, tà gyägya 'oma, ìndì tà bâti tâma.

¹⁰Mì kàdré tà Míri ni togó dré adrészó kinílé ásà dhi kí nda nile kòdhya.

¹¹Mì kòsù ru tà takotàko móndyá tímímvá na dhi i dré adrélè 'ole dhi íbe ko. Be ró dhi, mì kàdré àmikya tà nda kí tadhá ngádra 'á.

¹²Tàko ko, ndìndì tà móndyá nda i dré adrélè 'ole lùzu ró dhi kí tâma adrè kanyò fe.

¹³À adrè ngá tití adrélè tadhálè ngádra 'á dhi kí no dòro.

¹⁴Kòdhi íbe dhi, ngá tití ngádra dré adrélè tadhálè dhi i adrè kpà atsálè ngádra ró. Ásà dhi, à adrè tâa dhi: «Mì adrélèpi ayí ko ni, mí kòlaró ayí lésè, ìndì mí kàngá dràdrà lésè gò, Krísto kò'oró áyí ngádra kòle ámì kazá. »

¹⁵Di ásà dhi, mì kònò dòro ngalè mì adrè atsílé ngíni ya dhi. Mì kàdré atsílé ngóró móndí azaaza i tñi ko. Be ró dhi, mì kàdré àmikya atsílé ngóró tògyabhá i tñi.

¹⁶Mì kàdré lókyá wâyi mì dré adrészó ába dhi kí likí, adrészó tà dòro 'o ásà. Àngyá ko, kitú kònì i kònzi lavûlé.

¹⁷Mì kàdré di móndí azaaza i ró ko. Be ró dhi, mì kàdré àmikya tà Míri dré adrélè lèle mì kò'o dhi kí nda nile kòdhya.

¹⁸Mì kòtayí àmì wá dré adrélè tsile ko. Tàko ko, wá nda adrè móndí kí tidrì adrélè tà swà 'o dhi ni. Be ró dhi, mì kàdré àmì kí tayí adrélè gâle Tirí Lolo sè.

¹⁹Mì kàdré longó Gíká ni Kúlì na dhi kí ngo, túmâní longó adrészó Gíká ni rú bha kùle dhi íbe, ìndì longó adrébhá angálé Tirí Lolo vélésè dhi íbe, adrészó ru tiimbà àmì kòfalésè. Ayíya, mì kàdré longó ngo Míri dré, adrészó lenzélé akódhi ni rú sè togó wâyi sè.

²⁰Kòdhi íbe dhi, mì kàdré ngbú àwoyà ta Gíká àma kí Atá dré tà tití i sè, àma kí Míri Yésu Krísto ni rú sè.

Àgo kí tà àyi kí tòkó i' be dhi

²¹Lè mì kàdré àmì kí bha àmì kí àzya i zâle àmì kòfalésè, Krísto ni lindrì bhàma sè.

²²Àmì tòkó i, mì kàdré àmì kì drì asó àmì kì àgo i kandrá, ngóró mì dré adrélé 'ole Míri kandrá dhi tíni.

²³Tàko ko, agó ína tòkó drile, ngóró Krísto dré adrélé Èkèlézyà drile dhi tíni. Krísto nda, Èkèlézyà adrélépi akódhi ni rúbhá ro dhi ni tindrillépi 'i.

²⁴Dì ngóró Èkèlézyà dré adrélé áyi bha Krísto zàle dhi tíni dhi, lè tòkó i kàdré kókpà áyi kì bha àyi kì àgo i zàle tà tití i sè.

²⁵Àmì àgo i, lè mì kàdré àmì kì tòkó kì le, ngóró Krísto dré Èkèlézyà ni lèle tò gò, áyi lídrì fèzo akódhi ni tà sè dhi tíni.

²⁶Akódhi 'o kònini, Èkèlézyà nda ni temvézó yì akódhi ni dzìzo ásà dhi sè ìndì Gìká ni Kúlì sè, akódhi ni 'ozo atsálé lolo Gìká dré,

²⁷i kò'oró akódhi apfòle i kandrá Èkèlézyà mìlanzìlanzi ro dhi ró, ndì àko, rúbhá àdé àko, ìndì tà àzya kìtswálépi ko dhi àko, akódhi kàdréró lolo ìndì tà kònzi àko i rú be dhi bvó.

²⁸Kókpà kòdhì tíni, lè àgo i kàdré àyi kì tòkó kì le, ngóró i dré adrélé àyi kì tändì kì rúbhá kì le dhi tíni. Agó adrélépi áyi tòkó ni le dhi adré áyi tändì ni le kòdhyá.

²⁹Àngyá ko, dhya àlo gà áyi tändì ni rúbhá tàdzí rè ko. Be ró dhi, adré ína ngá fe áyi rúbhá dré nyàle, adrészó rúbhá nda ni likí doro, ngóró Krísto dré adrélé 'ole Èkèlézyà dré dhi tíni.

³⁰Tàko ko, àma akódhi ni rúbhá ni kìgá 'i.

³¹Ngóró Gìká ni Kúlì dré adrélé tâle dhi tíni: «Ásà dhi, agó ni áyi atá ni tayí áyi andre be, ru amúzó áyi tòkó be gò, àyi rìti nda i dré atsázó rúbhá àlo ró. » ³²Tà nda kòdhì, tà kàdrì lùzu ró dhi 'i. Dì, má adré mána tà nda ni ta Krísto ni tà dri, ìndì Èkèlézyà ni tà dri.

³³Tágba kònini dhi, lè àmì àlo àlo tití dhi i mì kàdré àmì kì tòkó kì le, ngóró mì dré adrélé àmì kì tändì kì le dhi tíni. Adré kpà lèá dhi, tòkó i kàdré àyi kì àgo kì lindrì bha.

Èfésòbhá i 6

Ànzimvá kì tà àyi kì tibhá i' be dhi

¹Àmì ànzimvá i, lè mì kàdré àmì kì tibhá kì kúlì ka'i 'ole, mì dré adrélé Míri na dhi sè. Tàko ko, tà nda kòdhì tà gyägya 'i.

²«Mí kàdré ámì atá ni lindrì bha ámì andre be. » Tòlí nda kòdhì tòlí Gìká dré fèle dridrì túmäní lazikúlì be dhi 'i.

³Lazikúlì nda, kònìdhì 'i: «Mí kàdré ámì atá ni lindrì bha ámì andre be, mí kàdréró arí ibe, adrészó kpà lídrì ibe bvò kònìdhì dri lókyá be vwàvwà ro be dhi bvó. »

⁴Àmì, ànzi kì atá i, mì kàdré àmì kì ànzimvá kì togó 'o aswálé àngyá ko. Be ró dhi, mì kàdré àmìkya àyi kì likí, adrészó àyi kì tadhá ìndì àyi kì lotó Míri ni tà sè.

Màrábà kí tà àyí kí mírì i' be dhi

⁵Àmì màrábà ró ní i, mì kàdré àmì kí mírì bvò kòndì àdhya kí kúlì ka'i 'ole togó dórò sè, àyí kí lindrì bhàma sè, ìndì àyí kí ròma sè, ngóró mì dré adrélé 'ole Krísto dré dhi tíni.

⁶Dì, mì kàdré ngbà 'í àyí kí kúlì ka'i 'ole àyí mi, àmì kí tà kàdréró dórò àyí mìlésè dhi bvó ko. Be ró dhi, mì kàdré àmikya àyí kí kúlì ka'i 'ole togó wáyi sè ngóró màrábà Krísto àdhya i tíni, adrészò tà Gíká dré adrélé lèle mì kò'o dhi kí 'o tà nda sè.

⁷Mì kàdré àmì kí azí 'o màrábà i ró togó wáyi sè, adrészò 'òá ngóró móndí i dré dhi tíni ko, be ró dhi, ngóró Mírì ní tändì dré dhi tíni.

⁸Tàko ko, mì ní tâle dhi, Mírì ní làgí fe móndí àlo àlo tití i dré tà dórò i dré 'ole dhi i tí, i kàdré gba màrábà 'í yà, kó ngalè móndí màrábà ro ko dhi 'í yà dhi be.

⁹Àmì mírì ro ní i, mì kàdré kókpà 'òá kònìnì àmì kí màrábà i véna. Mì kògò vélé adrélé kúlì aswaaswa ta àyí dri ko. Tàko ko, mì ní tâle dhi, àmì kí Mírì bhù na dhi kókpà àyí kí Mírì 'í dhi be. Akódhi nda adré kpà móndí kí no twátwa ko.

Àdzú ngá Gíká àdhya kí tosoma

¹⁰Kùdù ro dhi, mì kàdré rìnyi ró Mírì na, ìndì akódhi ní rìnyi kàdrì lavulé dhi na.

¹¹Mì kàdré àdzú ngá tití Gíká dré adrélé aféle dhi kí tosó àmì rú, mì kòkitswáró àmì kí totó tätä tà Dzáborò dré adrészò àmì kí tabhì litílé ásà dhi i kandrá be dhi bvó.

¹²Tàko ko, mà adré ru pfu móndí rúbhá be ìndì karí be dhi íbe ko. Be ró dhi, mà adré àmakya ru pfu tirí kònzi kí kàdrì adrébhá kurú na bhù i 'ásè dhi íbe, àyí adrébhá ópí kàdrì i ró ìndì rìnyi ró, adrébhá ópí nya bvò tímivá ro kòndì drile dhi íbe.

¹³Dì ásà dhi, mì kàdré àdzú ngá tití Gíká àdhya kí tosó àmì rú, kítú kònzi kònì dra atsá dhi, mì kòkitswáró pá sì àmì kí kàribhá i kandrá gó, àdzú nda àmvolésè dhi, mì kàdréró dhu rè àmì kí totó tätä be dhi bvó.

¹⁴Mì kàdré dì àmì kí totó adrélé gànzi ró. Mì kò'í àmì kí kípílé 'á káfà tà bàti àdhya kòdhya. Mì kàsó àmì agá aya tà gyágya àdhya kitswázó àmì kí likí dhi kòdhya.

¹⁵Mì kòtosó àmì pá kámókà adrészò gànzi ró lìle Rúbí Taní tà kìdríkìdrí àdhya ní longó ásà dhi i kòdhya.

¹⁶Tà tití dhi i sè dhi, mì kòru àmì drígá àgbawù àmì kí tà ka'ika'i àdhya kòdhya, mì kòkitswáró kíyá tití àtsí ró Dhya kònzi dré adrészò àmì kí bhu ásà dhi kí àtsí kidrá be dhi bvó.

¹⁷Mì kàsó àmì dri kátabhúlà aya ró tà àmì kí tìdrízó dhi àdhya kòdhya. Mì kòru àmì drígá sápí Tirí Lólo àdhya kòdhya. Sápí nda Gíká ní Kúlì 'í.

¹⁸Kòdhí íbe tití dhi, mì kàdré ngbú tà zi Gíká tí, adrészò tongólé akódhi rú Tirí Lólo ní rìnyi sè. Mì kàdré 'òá kònìnì adrészò kpà támìga dri. Mì kàdré kpà tà zi Gíká tí móndyá lólo tití akódhi àdhya i dré landè àko ró.

¹⁹Mì kàdré kpà tà zi Gìká tí má dré, má kònì dra tà ta dhì, kafèrò kúlí má dré kitswázó tà lùzu ró Rúbí Tanì àdhya nì longó tirì àko be dhì bvó.

²⁰Rúbí Tanì nda nì tà sè dhì, ma móndí 'ile bădzó lé adrélépi Krísto ni tà longó akodhì nì rú sè dhì 'i. Mì kàdré dì tà zi Gìká tí, má kàdrérò Rúbí Tanì nda nì longó tirì àko, ngóró dré kitswálé má kòlongó dhì tíni.

Pólò nì kúlí kùdù

²¹Àma kì adrúpi Tìkíkò mà dré lèle tò dhì, nì tà tití dhì kì longó àmì dré, mì kòyirò áma rúbí, túmání tà má dré adrélé 'ole dhì íbe. Akodhì nda Mírì nì àzí 'olepi, kitswálé ka'ile togó wáyi sè dhì 'i.

²²Má adré dì akodhì nì mu àmì véna tà nda sè, mì kònìró ngalè àma ngíni ya dhì, ìndì akodhì kòtìmbàró àmì àmì kì tà ka'ika'ì na.

²³Gìká àma kì Atá túmání Mírì Yésu Krísto be dhì i kòfè tà kìdríkìdri, lèle, ìndì tà ka'ika'ì íbe àmì, àma kì adrúpi i dré!

²⁴Gìká nì togó tanì kàdré móndyá tití adrébhá àma kì Mírì Yésu Krísto nì le lèle kitswálépi akílé bwà ko dhì sè dhì i dré!

Fìlìpoyìbhá †

Fìlìpoyìbhá † 1

Pólò ni mòdo fèma

¹Ma, Pólò, túmání Tímòtéyò be, adrébhá Yésu Krísto ni màrabà ro dhi i, mà adré wárágà kònìdhi ni tisì àmi, móndyá lolo tití Yésu Krísto ni ka'ibhá Fìlìpoyì na dhi i dré, túmání Èkélézyà ni drì kobhá íbe, ìndì Èkélézyà ni tà likíbhá íbe.

²Giká àma ki Atá i Míri Yésu Krísto be dhi i kòbhà àyi ki togó taní àmi rú, ìndì i kofè tà kìdríkìdrí àmi dré!

Pólò zi tà Giká tí Fìlìpoyìbhá i dré

³Má adré àwoyà ta áma Giká dré, vésè wáyi má dré adrérà'a àmi ki tà kisù dhi 'á.

⁴Má dré adrérà'a tà zi Giká tí àmi tití dhi ki tà sè dhi 'á dhi, mà adré 'òá arí sè bì,

⁵mì dré ru amulé túmání má be Rúbí Taní ni longoma ni tà sè dhi sè. Mì 'o kònìnì kìdhólé kitú mì dré tá Rúbí nda ni ka'izo dhi sè, atsálé áandrò kònìdhi.

⁶Má adré dì ka'iá tâle dhi, Giká àzí dóro nda ni kìdhólépi 'ole àmi léna dhi ni go lìle ába drìdrì gò, 'òá akílé tití kitú Yésu Krísto dré dra agòzo dhi tú.

⁷Má kàdré àmi tití dhi ki tà kisù kònìnì dhi, kòdhì gyägya, mà dré adrélè àmi ki tà íbe áma togó na dhi sè. Gba má kàdré bă nya yà, kó ngalè má kàdré Rúbí Taní longó adrészò târâ ni ni ga yà dhi, àma túmání àmi íbe tití dhi i Giká ni togó taní íbe àma rú.

⁸Giká ni dóro tâle dhi, mà adré àmi ki le togó wáyi sè, Yésu Krísto ni tândì ni lèle sè káyà dhi.

⁹Má adré dì tà zi Giká tí, mì kàdréró ru le àmi kòfalésè, adrészò tà nìni kisù tògyá be adrészò lìle ába drìdrì,

¹⁰mì kòkìtswáró tà ki kòfalé ni lanzílé, tà dóro lavulé dhi ki ka'izo, mì kàdréró togó íbe lolo ìndì tà àko àmi rú, tsàle kitú Krísto dré dra agòzo dhi tú.

¹¹Mì ni kpà ga lò'wa tà gyägya àdhya Yésu Krísto dré adrélè 'ole 'ale àmi léna dhi i sè bì, Giká kòkisúró mìlanzìlanzi i rúku be ásà be dhi bvó.

Rúbí Taní ni li` ma drìdrì Pólò ni bă nyàma sè dhi

¹²Áma adrúpi i, mà adré lèá mì kònì dhi, tà atsálépi má rú kòdhì nzì vélé láti Rúbí Taní dré adrészò lìle drìdrì lavulé.

¹³Ásà dhi, sòdá tití adrébhá Rómà ki ópí ni dzó kàdrì likí kònwa dhi i túmání móndyá àruka tití dhi íbe dhi, i ni dóro tâle dhi, mà adré bă nya Yésu Krísto ni tà sè káyà dhi.

¹⁴Dì áma bă nyàma nda ni tà sè dhi, Giká fè àma ki adrúpi bì dhi i gàle tawà sè bì Míri Yésu na gò, i dré adrészò vélé Giká ni kúlì longó tirì àko wáláká ni ni lavú.

¹⁵Tà báti ró dhi, àyi ki àruka i adré Krísto ni tà longó àyi ki lovó kònzi sè, ìndì dirèma sè. Di, àruka ni i adré kó àyikya longóá togó dóro sè.

¹⁶Àyì nda kònì ì adré 'òá kònìnì lèle sè. Tàko ko, ì nì tâle dhi, Gìká bhà ma kònwa adrélé Rúbí Tanì ni tará ga dhi be.

¹⁷Dì, móndyá àruka kòna ì adré àyikya Krísto ni tà longó togó kònzi sè, adrészó àyì kì tändì ki tà bha drìdrì. Ì adré kisùá dhi, ì nì go vélé áma kizà tìmbà kònwa bădzó 'á.

¹⁸Tà yókódhó! À kàdré Krísto ni tà longó láti twátwa i sè, gba kàdré togó kònzi sè yà, kó ngalè togó dóro sè yà dhi, má adré lenzélé tà nda sè.

Àyíya, má nì kpà go adrélé lenzélé.

¹⁹Tàko ko, má nì tâle dhi, Gìká nì dra tà atsálépi má rú kòdhì nì ladzá atsálé tà áma apázó dhi ró dhi be, tà mì dré adrélé zile akódhì tí dhi i sè, ìndì tà Yésu Krísto ni Tíri dré adrélé 'ole áma ledézó dhi sè.

²⁰Má adré mì bha Gìká véna lovó sè, má kòkitswáró adrélé kanyò ro tà àlo sè ko, be ró dhi, má kàdréró gàle tawà sè bì nyànomvá ngóró lókyá wáyi sè dhi tíni, adrészó Krísto ni tà bha kuru áma rúbhá sè, gba kàdré áma lídrì sè yà, kó ngalè áma dràdrà sè yà dhi.

²¹Tàko ko, má kàdré lídrì íbe dhi, má adré ába Krísto ni tà sè. Má kàdré kó dràle dràdrà dhi, kòdhì dóro lavúlé má milésè.

²²Dì, má kàdré dhu rè lídrì íbe dhi, má nì go adrélé Krísto ni àzí 'o, adrészó lò'wa dóro 'a bì. Dì má nì má nì àdho kipè kòdhya ya dhi ko.

²³Tà rì nda kòdhì ì adré áma togó tesé. Ma lovó íbe tò lìzo adrélé túmání Krísto be. Tà nda tà dóro lavúlé dhi 'í.

²⁴Dì, àmì kì tà sè dhi, lè má kògò mána adrélé lídrì íbe.

²⁵Má adré dì tà nda nì ka'i, adrészó niá tâle dhi, má nì go adrélé lídrì íbe, adrészó túmání àmì íbe tití, mì kòkitswáró lìle drìdrì àmì kì tà ka'ika'i na kólénzé be bì.

²⁶Dì má kònì dra go tsàle àmì véna dhi, mì nì vélé àmì kì drì bha kuru Yésu Krísto na lavúlé, tà dré 'ole má dré dhi sè.

Atsima ngóró dré kitswálé Rúbí Tanì sè dhi ti' nì dhi

²⁷Tà kàdrì lavúlé dhi, lè mì kàdré atsílé ngóró dré kitswálé Rúbí Tanì Krísto àdhya sè dhi tíni. Dì gba má kòtsa àmì kì no yà, kó ngalè má kòyi ngbà 'í àmì kì tà yiyì yà dhi, má nì niá tâle dhi, mì adré àmì kì totó tätä, adrélé àdzú bhu togó àlo sè, Rúbí Tanì mì dré ka'ile dhi nì tà sè dhi be.

²⁸Ásà dhi, mì kitswá ngá ro àmì kì kàribhá adrébhá ru pfu àmì íbe dhi kì tà sè àlomvá ko. Kòdhì ni tadhá àyì dré dhi, ì adré lìle dràdrà kisú, dì mì adré àmikya lìle lídrì kóná vésè kólyá dhi nì kisú, ngóró Gìká dré adrélé tà nda nì 'o nì dhi tíni.

²⁹Tàko ko, Krísto ni tà sè dhi, Gìká fè àmì adrélé ngbà 'í akódhì ni ka'i ko, fè kókpà àmì adrélé kizà nya akódhì ni tà sè.

³⁰Nyànomvá dhi, mì adré àdzú àlo mì dré tá nòle má rú dhi nì bhu kòdhya. Ngóró mì dré yile dhi tíni dhi, má adré kpà dhu rè àdzú nda nì bhu.

Fìlìpoyìbhá i 2

Àma kí tà bhàma kìní mi Yésu Krísto àdhya ti' ni dhi

¹Má nì tâle dhi, Gìká adré àmí kí timbà Krísto na, adrészó àmí kí togó tindrì áyi lèle sè dhi be. Mì amú ru Tírí Lolo be, adréléró ngá àlo ró akódhi léna. Mì adré àmí kí togó dóro tadhá, adrészó àmí kí adrúpi kí kizà bha àmí kòfalésè.

²Ásà dhi, má adré àmí kí kodzó, mì kàdréró ru yi àmí kòfalésè, adrészó ru le lèle àlo sè, adrészó kpà tà 'o togó àlo sè, ìndì tà kisùle àlo dhi sè. Mì kàdré 'òá kònini dhi, mì ni áma togó 'o gàle arí sè bì.

³Àmí kòfalé dhi, mì kò'o tà àlo kitswázó àmí kí tà bha drìdrì dhi bvó yà, kó ngalè kitswázó àmí kí afà dhi bvó yà dhi ko. Be ró dhi, mì kàdré àmíkya àmí kí tà bha kìní mi, adrészó àmí kí adrúpi kí tà no kàdrì àmíkya kí lavú.

⁴Mì kàdré ngbà 'í àmí kí tändi kí tà kisù kòdhya ko. Be ró dhi, àmí àlo àlo tití dhi i, mì kàdré àmí kí adrúpi kí tà kisù kòdhya.

⁵Mì kàdré tà kisù ngóró Yésu Krísto àdhya tíni:

⁶Tágba akódhi dré tá adrészó Gìká nì tändi nì lású íbe dhi, lè tá trôle adrema díri Gìká be dhi rú ko.

⁷Be ró dhi, tayí tá ína i atsálé ngá tákó ró, lású màrabà àdhya nì ka'ízo dòle gò, ka'ízoá atsálé móndí ro. Di kàtsá lású be móndí tíni dre dhi,

⁸dré áyi tà bhàzo kìní mi gò, tà Gìká dré tá lèle í kò'o dhi kí ka'ízo 'ole tsàle byá dràdrà na, ndìndì dràdrà fa kípakipa dri dhi na.

⁹Di ásà dhi, Gìká dré akódhi nì tingázó bhàle kuru lavúlé, rú kàdrì rú àruka tití dhi kí lavúlépi dhi nì fèzo akódhi dré.

¹⁰Di Yésu nì rú nda sè dhi, móndyá tití ìndì tirí tití bhù na, bvò dri, ìndì bvò àndúna dhi kí àyí kí kórókó tití akódhi kandrá, akódhi nì lindrì bhàzo.

¹¹I nì kpà tâá àyí kí tändi kí ti sè dhi, Yésu Krísto Mírì 'í, Gìká Atá nì rú bhàzo kùle ásà.

Àma kí laguma bhìbhínyà i ti' ni móndi' i kòfalé dhi

¹²Áma arúpi má dré lèle tò nì i, ngóró mì dré adréléró ngbú áma kúlí ka'í 'ole má mi dhi tíni dhi, mì kàdré kókpà 'òá kònini má dré adrérà'a àmí kòfalé yó dhi 'á. Mì kàdré tà 'o Gìká nì ròma sè ìndì akódhi nì lindrì bhàma sè, kitswázó tà àmí kí tìdrízó ásà dhi nì 'o kitswálé tití dhi bvó.

¹³Tákó ko, Gìká adré ína tà 'o àmí léna nì, mì kàdréró tà í dré adréléró lèle mì kò'o dhi kí le 'ole, adrészó kpà tà nda kí 'o be dhi bvó.

¹⁴Mì kàdré tà tití dhi kí 'o ngùrungùrù sè ko ìndì káyi sè ko,

¹⁵mì kàdréró Gìká nì ànzì lólo i ró tà àlo àko àmì rú, ìndì tà kònzi àko àmì rú, móndyá ándrò gòdhögòdho àyi kí tayíbhá lítílé dhi i kòfalé be dhi bvó. Mì kàdré lagulé àyi nda i kòfalé ngóró bhìbhínyà bhù mìbhalé 'á dhi i tíni,

¹⁶mì dré adrérà'a kúlí lídrì àdhya nì tadhá àyi dré dhi 'á. Mì kàdré 'òá kònini dhi, má nì áma drì bha kuru àmì kí tà sè kítú Krísto dré dra agòzo dhi tú. Tàko ko, à nì nòá ngádra 'á dhi, má ra angú, ìndì má 'o àzí landèzo àngyá ko.

¹⁷Dì tágba kòkítswá má dré áma lídrì fèzo wáyi àmì kí tà sè yà dhi, má adré mána lenzélé ásà. Tàko ko, áma lídrì nda sù ngóró vínò dàle tà mì dré adrélé 'ole ìndì fèle Gìká dré mòbòmà ro àmì kí tà ka'ika'i sè dhi dri dhi tíni. Má adré dì lenzélé ásà túmǎní àmì íbe tití.

¹⁸Adré kpà lèá dhi, mì kàdré lenzélé túmǎní má be.

Àzí Tìmòtéyò kya Èpàfùròdítò be dhi

¹⁹Má adré mì bha Míri Yésu véna kitswázó Tìmòtéyò nì mu lìle àmì véna mbèlè, má kòkítswáró àmì kí rúbí yi gó, áma togó kàndrìró be dhi bvó.

²⁰Dhya àzya Tìmòtéyò rúsè adrélépi tà kisù mána tíni dhi yókódhé. Akódhi adré áyi togó bha wáyi àmì kí tà dri.

²¹Móndyá àruka tití dhi i adré ngbà 'í àyi kí tändi kí tà kisù kòdhya. I adré Yésu Krísto nì tà kisù kòdhya ko.

²²Dì, mì nì tâle dhi, Tìmòtéyò 'o tà tití dhi i áyi tà ka'ika'i tadházó dhi be. 'O Rúbí Tani nì àzí màrabà tíni túmǎní má be, ngóró mvámavá dré adrélé àzí 'o áyi atá be dhi tíni.

²³Má adré dì mì bha akódhi nì mùzo lìle àmì véna mbèlè, lókyá má dré dra nìzoá ngalè áma tà nì adré ngíni ya dhi sè.

²⁴Má adré kpà ka'ia Míri na tâle dhi, áma tändi má nì kókpà tsa àmì kí no mbèlè.

²⁵Má nò dóro nì, áma adrúpi Èpàfùròdítò nì mùle nzìle àmì véna dhi. Akódhi mì dré tá amùle ngá adzí áma lemerè nì tà sè nda atsá ína áma àziamu ró, ìndì áma àdzú bhuàmu ró.

²⁶Dì, nyànomvá dhi, akódhi ína lovó íbe tò àmì kí nòzo. Akódhi nì togó adré kpà lanzile, mì dré tá yìle tâle dhi, akódhi tá drà ro dhi sè.

²⁷Tà bâti ró dhi, akódhi tá ína drà ro ànyiànyi dràdrà mìle. Dì, Gìká bhà akódhi nì kizà dre. Ngbà 'í akódhi 'í ko, bhà kókpà áma kizà, má kònyaró vélé kizà lavúlé akódhi nì tà sè ko dhi bvó.

²⁸Dì ásà dhi, áma togó àtsi ró akódhi nì mùzo nzìle àmì véna, mì kògoró lenzélé akódhi nì nòma sè gó, áma togó kàndrìró ásà.

²⁹Dì akódhi kònì dra tsa dhi, mì kòka'i akódhi dòle àmì véna Míri nì lèle sè, ìndì kólénzé wáyi sè. Mì kàdré kpà móndí lású be kònini dhi kí lindrì bha be.

³⁰Tàko ko, akódhì tá ína ànyíànyì dràdrà mìle Krísto nì àzí nì tà sè. Ka'ì tá kpà áyi lídrì fèle, kitswázó tà mì dré kitswálé 'ole bwà ko dhi kì 'o má dré.

Fìlìpójìbhá † 3

Àma kì atsama gyägya Gìká kandrá Krísto nì ka'ìma sè dhi

¹Kùdù ro dhi, áma adrúpi i, mì kàdré lenzélé Mírì Yésu na! Má kògò tà má dré tá tisìle àmì dré dhi kì tisì tódhyá dhi, kòdhì kitswá áma lagù ko. Tà tisìle nda kì kpà kitswá àmì kì likí.

²Lè mì kàdré sùle àmì rú kòkí kì tà sè. Àyì nda i Yúdà ànzì adrébhá tà kònzi 'o, adrébhá móndí kì le 'ole lwàle dhi 'i.

³Giká mìlésè dhi, àma kì tändì i móndyá lwàle báti dhi 'i. Tàko ko, mà adré Giká ni lindrì bha akódhì nì Tírí ni rìnyí sè dhi àma. Mà adré àma kì drì bha kuru mà dré ru amulé Yésu Krísto be dhi sè. Mà adré kpà mì bha tà adrélé 'ole rúbhá sè dhi i dri ko.

⁴Kònò áma tändì má nì tá adré tà íbe bì kitswázó áma mì bha drìá dhi ma. Móndí àruka † kàdré kisùá dhi, † 'o tà bì rúbhá sè kitswázó mì bha drìá dhi, má 'o mána tà bì àyíkyá kì lavú dhi ma.

⁵Tàko ko, à ti tá ma ìsérélè mvá ro, Bènyàmínà nì súrú na. Ma Èbérè tändì angálépi Èbérè kì súrú lésè dhi 'i. À lwà tá ma kítú nì nzi-drì-na áma tìzo dhi àmvolésè. Kàdré Yúdà ànzì kì tátrítrí kúlí nì tà sè dhi, má lebè tá tátrítrí kúlí nda Fàrisáyò ro.

⁶Kàdré adrema togó íbe àtsì ró dhi nì tà sè dhi, mà pfo tá móndyá ka'ibhá Èkèlézyà na dhi kì mì tà tändì ró. Kàdré adrema gyägya tátrítrí kúlí 'oma sè dhi nì tà sè dhi, à kitswá tá tà àlo bha má rú bwà ko.

⁷Di, tà ángùdhi má dré tá kitswálé kisúlé tà nda kòdhì i sè bwà dhi, mà adré nyànomvá nòá tà tàko ró Yésu Krísto nì tà sè.

⁸Ngbà 'í kòdhì ko, mà adré tà tití dhi kì no tà tàko ró, mà dré adrélé áma Mírì Yésu Krísto nì nìma nì tà no kàdrì lavúlé dhi sè. Akódhì nì tà sè dhi, mà gá tà tití dhi i gágà, adrézó tà nda kì no kànyànyà ro, mà kòkisúró Krísto,

⁹ru amúzó akódhì be be dhi bvó. Má kitswá tá áma tändì nì 'o atsálé gyägya Giká kandrá tátrítrí kúlí 'oma sè bwà ko. Di, Giká bhà ína ma adrélé gyägya í kandrá, mà dré Krísto nì ka'ile dhi sè dhi nì. Tàko ko, à kitswá ngbà 'í atsálé gyägya akódhì kandrá tà ka'ika'i sè.

¹⁰Nyànomvá dhi, mà adré ngbà 'í Krísto nì le nìle, túmäní rìnyí dré ngàzo dràdrà 'ásè dhi be kòdhya. Má adré kpà kizà dré nyàle dhi kì le nyàle, mà kòdraró ngóró dré dràle dhi tini,

¹¹má kòkitswáró kpà ngàle dràdrà 'ásè be dhi bvó.

Angú ràma kitswázó làgi' kisú dhi

¹²Má adré kisùá ko tâle dhì, má kisú tà nda kòdhì i tití dre dhì. Má atsá kpà dhu rè dóro kïtswálé tití ko. Di, má adré mána lìle drìdrì kïtswálé tà nda kì ru, ngóró Yésu Krísto dré kpà áma rùle i dré dhì tíni.

¹³Áma adrúpi i, má adré kisùá ko tâle dhì, má ru tà nda i dre dhì. Di, tà má dré adrélè 'ole dhì, kònìdhì 'i: Má adré tà má àmvolé dhì kì tivì, adrészó áma fe adrélè lìle drìdrì.

¹⁴Má adré angú ra tsàle byá kùdù nì na, kïtswázó làgí Gìká dré áma zìzo kisùá bhù na Yésu Krísto na dhì nì kisú dhì bvó.

¹⁵Lè àma tití lì'wábhá àma kì tà ka'ika'i na dre dhì i, mà kàdré tà kisù kònìnì. Di, móndí àruka àmì kòfalé dhì i kàdré tà kisù twá dhì, Gìká nì tà nda nì tadhá àmì dré.

¹⁶Tà kàdrì lavúlé dhì, lè mà kàdré lìle drìdrì, adrélè trôle tà mà dré kisúlé dre dhì i rú.

¹⁷Áma adrúpi i, mì kàdré áma lebè adrészó tà 'o mána tíni. Mì kàdré kpà móndyá adrébhá tà mà dré tadhálé àmì dré dhì kì lebè dhì kì no be.

¹⁸Tàko ko, má adré góle tà má dré tá tâle àmì dré vésè be bì kònìdhì nì ta mìndra sè: Móndí bì dhì i adré tà 'o ngóró kàrìbhá Krísto nì fa kipakipa àdhya i tíni.

¹⁹Àyi nda i adré lìle dràdrà kisú. Àyi kì gìká, àyi kì rúbhá kì lovó 'i. I adré àyi kì drì bha kuru tà adrébhá kanyò fe àyi dré dhì kì tà sè. I adré ngbà 'í tà bvò kònì àdhya kì kisù kòdhya.

²⁰Di, àma ró dhì, àma kì bhà ína bhù na. Mà adré àma kì tiidrlépi, Míri Yésu Krísto nì agòma kònalésè dhì nì letè lovó sè.

²¹Akódhì nì àma kì rúbhá yàyà dhì kì ladzá atsálé áyi rúbhá mìlanzìlanzì ro dhì tíni, áyi rìnyí i dré adrészó tà tití dhì kì bha áyi pá zàle dhì sè.

Fìlìpójìbhá i 4

¹Di áma adrúpi má dré lèle tò nì i, mì kàdré àmì kì totó tätä Míri Yésu na! Áma arúpi i, ma lovó íbe tò àmì kì nòzo. Má adré kpà lenzélé àmì kì tà sè tò. Àmì áma kùlá má dré adrészó drì bha kuru ásà dhì 'i.

Tà tâle kùdù ro Fìlìpójìbhá kì kodzozó dhì i

²Má adré Yùwòdíyà kì ti lizí Sítikè be, i kàdréró ru yi togó àlo sè Míri Yésu na.

³Mì, áma àzìàmu má dré kïtswálé ka'ile ni, má adré kpà ámì ti lizí tòkó nda kì ledé. Tàko ko, i bhu tá àdzú túmäní má be Rúbí Taní nì tà sè, túmäní Kèlémè be, ìndì áma àzìàmu àruka àyi kì rú dré adrészó búkù lídrì àdhya léna dhì íbe.

⁴Mì kàdré ngbú adrélè lenzélé Míri Yésu na. Má adré góle tâá dhì, mì kàdré lenzélé!

⁵Mì kàdré àmì kì togó yàyà tadhá móndyá tití i véna. Míri Yésu adré alìle mbèlè.

⁶Mì kòbhà àmì kì togó adrélè lanzile tà àlo sè ko. Be ró dhì, tà tití i sè dhì, mì kàdré tà mì dré adrélè lèle kisúlé dhì kì zi Gìká tí, adrészó tongolé akódhì rú, adrészó kpà àwoyà ta akódhì dré.

⁷Dì Gìká nì tà kìdríkìdri adrélépi móndyá tití dhi kì tà nìnì lavú dhi nì àmì kì togó likí, àmì kì tà kisùkisù be Yésu Krísto na.

⁸Kùdù ro dhi, áma adrúpi i, mì kàdré tà tití adrébhá báti dhi kì kisù, túmání tà tití kitswábhá lìndrì sè dhi íbe, tà tití adrébhá gyägya dhi íbe, tà tití adrébhá lolo dhi íbe, tà tití adrébhá aveave ró dhi íbe, tà tití kitswábhá adrélé ka'ile dhi íbe, tà tití adrébhá dóro kitswálé tití dhi íbe, ìndì tà tití kitswábhá rúku sè dhi íbe kòdhya.

⁹Mì kàdré tà tití mì dré ndàle kisúlé má vélé dhi kì 'o, túmání tà tití mì dré yìle má tí dhi íbe, ìndì tà tití mì dré nòle má rú dhi íbe. Dì Gìká adrélépi tà kìdríkìdri fe dhi nì adré túmání àmì íbe.

Pólò tà àwoyà ngá fèlé i` dré dhi sè

¹⁰Má adré lenzélé Míri Yésu na, mì dré gòle áma tà kisù lókyá vwàvwà àmvolésè dhi sè. Má nì, mì adré tá áma tà kisù drídrì dhi be. Dì, láti mì dré tá kitswázó àmì kì togó dóro tadhá má vélé dhi tá yó.

¹¹Má adré tàá kònìnì, má dré adrélé ngá lovó íbe dhi sè ko. Tàko ko, má nì mána adrélé togó kìdríkìdri íbe ngá má dré adrészó ába dhi kì tà sè dhi be.

¹²Má sù ru adrema lemerè ro dhi be, ìndì adrema ngá íbe bì dhi be. Tà tití i sè dhi, má nì adrélé togó kìdríkìdri íbe dhi be, gba má kàdré ngá nyàle dhi íbe yà, kó ngalè tòbirí íbe yà, má kàdré ngá íbe bì yà, kó ngalè ngá àko yà dhi.

¹³Má kitswá tà tití dhi kì 'o Krísto adrélépi rìnyí afè má dré dhi sè.

¹⁴Dì, mì 'o àmikya dóro áma kizà dòzo túmání má be.

¹⁵Àmì Filipoyìbhá ni i, mì nì dóro tâle dhi, lókyá má dré tá Rúbí Taní longózó àmì kòfalé gòzo adrélé 'ole ngàle Mákèdònýà 'ásè dhi sè dhi, àmì tá Èkélézyà àlo ru amúlépi má be adrélé ngá fe má dré dhi 'i kalóma dhi. Èkélézyà àzya adrélépi 'òá kònìnì dhi tá yókódhó.

¹⁶Tàko ko, má dré tá adrérà'a Tèsàloníkè na dhi 'á dhi, mì adzí tá ngá má dré tá adrészó lovó nì íbe dhi i vésè be bì.

¹⁷Má adré tàá kònìnì, má dré adrélé ngá le kisúlé àmì drígásè dhi sè ko. Be ró dhi, má adré mána lèá dhi, Gìká kòfè tà taní àmì dré ngá mì dré afèle má dré dhi i sè.

¹⁸Má kisú ngá tití mì dré adzílé Èpàfùròdítò drígá dhi i dre. Nyànomvá dhi, ma ngá íbe bì kitswálé má sè. Ngá àlo áma pìlepi dhi vélé yókódhó. Ngá mì dré afèle nda i ngóró ngá tâdzí be dóro fèlé mòbòmà ro Gìká dré dhi i tíni. Ngá nda i kitswá akódhí milésè gò, dré ka'izoá.

¹⁹Dì áma Gìká nì ngá tití mì dré adrészó lovó nì íbe dhi kì fe gàle àmì drígá bì, ngóró dré adrélé tà làgí kyàkyà mìlanzìlanzì ro dhi kì fe Yésu Krísto na dhi tíni.

²⁰Mìlanzìlanzì kàdré Gìká àma kì Atá dré kóná vésè kólyá! Kàdré kònìnì.

Mòdo kùdù

²¹Mì kòfè mòdo móndyá lolo tití Yésu Krísto ni ka'ibhá dhi i dré. Adrúpi mà dré adrészó àyi íbe kònwa dhi i fè mòdo àmì dré.

²²Móndyá lolo tití Gìká àdhya i fè kpà mòdo àmì dré, lavúlé dhi, àyi adrébhá Kàyísárà ni dzó na dhi 'i.

²³Mírì Yésu Krísto ni togó taní kàdré àmì íbe!

Kòlòsáyìbhá †

Kòlòsáyìbhá † 1

Pólò ni mòdo fèma

¹Ma, Pólò, bhàle adrélé Yésu Krísto ni àpóstolò ro ngóró Gíká dré lèle dhi tíni dhi, túmání àma kí adrúpi Tímótéyò be dhi, mà adré wárágà kònìdhi ni tisì,

²àmi, àma kí adrúpi lolo adrébhá Yésu Krísto ni ka'i tà tití i sè Kòlòsáyì na dhi i dré. Gíká àma kí Atá kòbhà áyi togó taní àmi rú, ìndì kofè tà kìdríkìdri àmi dré!

Rúbí Taní tsa Kòlòsáyì `bhá i véna

³Mà adré ngbú adrélé àwoyà fe Gíká, àma kí Míri Yésu Krísto ni Atá dré àmi kí tà sè, adrészó kpà tà zi akódhi tí àmi dré.

⁴Tako ko, mà yi tâle dhi, mì adré Yésu Krísto ni ka'i, adrészó móndyá lolo Gíká àdhya kí le ngíni ya dhi 'í.

⁵Àngyá ko, mì yi tá tà bâti Rúbí Taní àdhya tsàlepi àmi véna dhi gò, mì dré adrészó mì bha tà Gíká dré zùle àmi dré bhù na dhi ni tà sè.

⁶Rúbí Taní nda adré ayílé lò'wa dóro 'abe bvò wäyi 'ásè, adrészó lile drìdrì. Adré kókpà 'óà kònìnì àmi kòfalé, kîdhólé kítú mì dré tá Rúbí nda ni yìzo gò, Gíká ni togó taní ni tà nìzo bâti dhi sè, atsálé ándrò kònìdhi.

⁷Mì yi tá Rúbí nda àma kí àzíamu, Èpafürà mà dré lèle tò dhi tí. Akódhi nda Krísto ni àzí 'olepi àmi kí tà sè, kitswálé ka'ilé togó wäyi sè dhi 'í.

⁸Dì akódhi tà àma dré àmi kí lèle angálépi Tírí Lólo vélésè dhi ni tà nì.

Pólò zi tà Gíká tí Kòlòsáyì `bhá i dré

⁹Tà nda sè dhi, kîdhólé kítú mà dré àmi kí tà yìzo dhi sè dhi, mà adré tà zi Gíká tí àmi dré landè àko ró. Mà adré akódhi ni ti lizí, kò'oró àmi gâle tògyá wäyi ìndì tà nìni Tírí Lólo dré adrélé fèle dhi i sè bì, mì kòkitswáró tà Gíká dré adrélé lèle mì kò'o dhi kí ni dóro lavulé be dhi bvó.

¹⁰Mà adré ziá kònìnì, mì kàdréró atsílé ngóró dré kitswálé Míri mìlésè dhi tíni, adrélé tâ akódhi ni togó dré adrészó kinílé ásà dhi kí 'o kòdhya. Mì kàdré 'óà kònìnì dhi, mì ni adré lò'wa dóro 'a bì, adrészó kpà Gíká ni ni dóro adrészó lile ába drìdrì.

¹¹Mà adré kpà tà zi akódhi tí, kàdréró àmi kí timbà áyi rìnyí kàdrì mìlanzìlanzì ro dhi sè, mì kàdréró togó tsì tà tití i sè, adrészó kpà tà letè togó vwàvwà sè.

¹²Mì kàdré kpà àwoyà fe Gíká Atá dré kòlénzé sè be. Àngyá ko, akódhi 'o àmi kitswálé tití, mì kòkisúró tà dré lazílé áyi móndyá lolo i dré tàyilé ro dhi áyi Òpì ngádra àdhya na be dhi bvó.

¹³Tako ko, akódhi apá àma òpì tñimvá àdhya lésè gò, àma kí 'ozo afílé Òpì áyi Mvá i dré lèle tò dhi àdhya lé.

¹⁴ Akódhi ni Mvá nda sè dhi, trì àma kí tàkonzi, àma kí apázó tàkonzi ni rinyí lésè.

Krísto dhya adrélépi ngá tití i drile dhi 'i, i `ndi` Èkélézyà ni drì 'i

¹⁵ Krísto nda, Gíká kitswálé nôle mì sè bwà ko dhi ni líndrí 'i. Akódhi Gíká ni Mváagó kàyo adrélépi ngá tití bhàle dhi i drile dhi 'i.

¹⁶ Tàko ko, Gíká 'o tá akódhi ngá tití dhi kí bha dhi kòdhya, gba kàdré ngá bhù na dhi 'i yà, ngá bvò dri dhi 'i yà, ngá kitswálé nôle mì sè dhi 'i yà, ngá kitswálé nôle mì sè ko dhi 'i yà, opì 'i yà, rinyí 'i yà, opí kàdrì 'i yà, kó ngalè rinyí adrészó opì nya dhi 'i yà dhi. Bati, Gíká bhà tá ngá tití nda i akódhi sè, ìndì akódhi dré.

¹⁷ Akódhi tá kínó ngá tití dhi i kandrá. Adré kpà ngá tití dhi kí 'o adrélé ru totó àyi kí àrà i 'ásè dhi nì.

¹⁸ Akódhi rúbhá ni drì 'i, kòdhí adré tàá dhi, Èkélézyà ni drì 'i. Akódhi ngá tití dhi kí kídhoma 'i, ìndì Mvá kàyo ngàlepi drídrì dràdrà 'ásè dhi 'i, kàdréró ngá tití dhi i drile be dhi bvó.

¹⁹ Tàko ko, Gíká nò tá dóro ni, i dré áyi tändi ni lídrì 'ole gàle áyi Mvá nda léna bǐ gó,

²⁰ akódhi ni 'ozo ngá tití dhi kí amú tódyá i be dhi, gba kàdré ngá bvò dri dhi 'i yà, kó ngalè ngá bhù na dhi 'i yà dhi. Dì Gíká bhà tá kídríkídrì àyi kòfalé ngá tití nda íbe, áyi Mvá nda ni kárí kutúlépi fa kípakipa dri dhi sè.

²¹ Àmi ró dhi, àmi tá wáláká dhi vwàvwà ro Gíká rúsè, adrélé akódhi ni kàribhá i ró, tà kònzi tití mì dré tá adrélé kisùle adrészó kpà 'óá dhi kí tà sè.

²² Dì, nyànomvá dhi, Gíká amú àmi tódyá i be Krísto ni rúbhá fèle dràle àmi kí tà sè dhi sè dre, i kò'oró àmi apfòle i kandrá móndí lolo i ró, tà kònzi àko ìndì tà àko àmi rú.

²³ Dì, adré lèá dhi, mì kàdré tròle àmi kí tà ka'ika'i rú, adrészó àmi kí totó tätä Rúbí Taní mì dré ka'ile gó adrészó mì bha ásà dhi dri. Rúbí Taní nda, Rúbí adrélé longólé móndyá tití bvò dri dhi i dré dhi 'i. Gíká bhà ma, Pólò, adrélé Rúbí nda ni àzí 'olepi ró.

Àzí Gíká dré bhàle Pólò drì` gá Èkélézyà ni tà sè dhi

²⁴ Nyànomvá dhi, má adré lenzélé kizà má dré adrélé nyàle àmi kí tà sè dhi i sè. Tàko ko, áma rúbhá na dhi, má adré kizà Krísto dré kídhólé nyàle dhi kí ka'i nyàle kitswálé tití akódhi ni rúbhá ni tà sè, kòdhí adré tàá dhi, Èkélézyà ni tà sè.

²⁵ Má atsá Èkélézyà nda ni àzí 'olepi ró, ngóró Gíká dré àzí nda ni bhàle má drígá dhi tíni, má kòlongóró àmi dré Gíká ni kúlí kitswálé tití be dhi bvó.

²⁶ Gíká zù tá tà lùzu ró nda zùzù kínó lésè móndyá lókyá tití i sè dhi i dré. Dì, nyànomvá dhi, tadhá tà lùzu ró nda áyi móndyá lólo i dré dre.

²⁷ Tàko ko, Gíká nò dóro ni, i dré tà kàdrì lùzu ró ìndì mìlanzilanzì ro i dré lèle 'ole móndyá surú twá ro dhi i kòfalé nda ni 'ole àyi dré nile dhi. Tà kàdrì nda, Krísto adrélépi àmi léna, mì dré adrészó mì bha vélána kitswázó mìlanzilanzì kisú dhi 'i.

²⁸Dì mà adré Krísto nda nì tà longó móndyá tití i dré. Mà adré àyi kì kodzó adrészó àyi kì tadhá tògyá wáyi sè, mà kòkítswáró àyi àlo àlo tití dhi kì 'o apfôle Gíká kandrá, móndí li'wábhá Krísto na kitswálé tití dhi i ró.

²⁹Tà nda sè dhi, mà adré àzí 'o, adrészó kpà àdzú bhu akódhi nì rìnyí kàdrì adrélipi tà 'o má léna dhi sè.

Kòlòsáyibhá i 2

¹Má adré lèá mì kònì ngalè má adré àdzú bhu àmì kì tà sè, móndyá ka'ibhá Láwòdikiyà na dhi kì tà sè, ìndì móndyá àruka tití áma nobhá rè ko dhi kì tà sè ngíni ya dhi.

²Má adré 'óá kònìnì kitswázó àyi kì togó timbà, i kàmúró ru atsálé ngá àlo ró lèle na be dhi bvó. Má adré kpà lèá dhi, i kòkisú tògyá gàle àyi léna bì, i kòkítswáró Gíká nì tà lùzu ró dhi nì ni dóro lavúlé, adrészó tà nda nì ka'i kitswálé tití. Tà lùzu ró nda, Krísto nì tändi 'i.

³Dhya ángùdhi ru amúlépi akódhi nda be dhi adré tògyá làgí kyàkyà zùle akódhi léna dhi nì kisú, tà nìnì be.

⁴Má adré tà kòdhì nì ta àmì dré, dhya àlo kòkítswáró àmì kì lití kúlí kìnì i sè ko.

⁵Gba má dré adrészó àmì kòfalé yó dhi, áma togó ína ngbú àmì véna. Má adré lenzélé mì dré adrélé tà tití dhi kì 'o mibhalé tí dhi sè, ìndì mì dré adrélé àmì kì totó tätä àmì kì tà ka'ika'i Krísto na dhi léna dhi sè.

Àma kì li' dri` Krísto na dhi

⁶Dì ásà dhi, ngóró mì dré Yésu Krísto nì ka'ile adrélé àmì kì Míri ro dre dhi tini dhi, mì kàdré atsílé akódhi léna,

⁷adrélé trôle akódhi rú, adrészó àmì kì timbà akódhi léna, mì kàtsáró rìnyi ró àmì kì tà ka'ika'i na, ngóró tadhálé àmì dré dhi tini. Mì kàdré kpà àwoyà fe Gíká dré tà tití i sè.

⁸Mì kònò dóro, dhya àlo kòlitírò àmì tògyá tako adrélipi angálé móndí i drilésè dhi sè ko. Àngyá ko, tògyá nda adré áyi totó labhi móndí kya i dri, ìndì tà bvò kòndi àdhyá i dri. Adré áyi totó Krísto nì tà dri ko.

⁹Tako ko, Krísto nda nì rúbhá na dhi, Gíká 'o tá áyi tändi nì lídrì gàle gagà.

¹⁰O kpà lídrì nda gàle àmì léna gagà Krísto na. Akódhi tirí tití ópí kàdrì ro ìndì rìnyi ró dhi i drile.

¹¹Akódhi léna dhi, Gíká 'o kpà àmì lwàle dre. Dì, àmì kì lwàma nda, lwàma 'ole móndí kì drígá sè dhi 'i ko. Be ró dhi, Krísto 'o àmì lwàle, lovó kònzi rúbhá àdhyá nì tingázó dhi nì.

¹²Tako ko, à sì tá àmì túmäní akódhi be bátísímò na gó, àmì kì tingázó túmäní akódhi be, mì dré Gíká nì rìnyí akódhi nì tingázó dràdrà lésè dhi nì ka'ile dhi sè.

¹³Wáláká dhì, àmì tá móndí dràbhá dre dhì 'i àmì kì tàkonzì kì tà sè. À lwà tá kpà àmì, lovó kònzi rúbhá àdhya ní tingázó dhì ko. Di, nyànomvá dhì, Gìká 'o àmì adrílé túmání Krísto be dre. Tàko ko, trì àma kì tàkonzì i tití gó,

¹⁴tà tisile tátrítrí kúlí na adrébhá tá tà bha àma dri dhì kì pfúzo. Bati, tingá tà nda i àma rúsè, tidílé fa kípakipa dri.

¹⁵Lavú kpà tirí kònzi ópí kàdrì ro ìndì rinyi ró dhì i, àyì kì rinyi tingázó àyì drígásè, àyì kì tà yàyà tadházó móndyá tití dhì i dré nòle.

¹⁶Di ásà dhì, mì kòtayí àmì dhya àlo dré tàbvó tâle, ngá mì dré adrélé nyàle dhì kì tà sè yà, kó ngalè ngá mì dré adrélé mvùle dhì kì tà sè yà dhì ko. Mì kòtayí kpà àmì tàbvó tâle gwányá adrészó Gìká ní lindrì bha dhì ní tà sè yà, gwányá mbă sí àdhya ní tà sè yà, kó ngalè kítú sàbátù àdhya ní tà sè yà dhì ko.

¹⁷Tà nda kòdhì i ngbà 'í tà adrébhá alile dhì kì lindrì i. Di, tà tändi ína Krísto 'i.

¹⁸Mì kòtayí kpà móndyá adrébhá àyì kì tà bha kìní mi túrúpfú sè ìndì adrébhá ángéló kì lindrì bha dhì i adrélé tà bha àmì dri ko. Móndyá lású be kònini nda i adré ngá i dré nòle toróbí tíni dhì kì tà tití, adrészó àyì kì afà àyì kì tà kisule àngyá dhì i sè.

¹⁹Di, i lanzí ru Krísto, adrélépi rúbhá ní drì 'i dhì be dre. Tákò akódhì nda adré rúbhá ní kìgá tití dhì kì 'o ru amú kídrì tití ìndì bă tití adrébhá àyì kì ti'ì dhì i sè gò, rúbhá nda dré adrészó mbàle ngóró Gìká dré adrélé lèle dhì tíni.

²⁰Mì drà kó túmání Krísto be tà bvò kòndi àdhya i lésè dre dhì, mì adré di àmikya tà 'o ngóró móndyá bvò kòndi àdhya kya tíni àdho tà sè? Àngyá ko, mì adré tolí lású be kònini dhì kì lebè kòdhya:

²¹«Mí kòdo ngá kòndi mí drígá ko! Mí kòtabhì ngá kòndi ní tadtzí ko! Mí kòtabè ngá kòndi ko! »

²²Ngá tití adrészó tà 'o ásà nda kòdhì i adré ñwàle ñwajwà. Kòdhì ibe dhì, tolí nda i tà tadhálé nda ibe dhì i adré ngbà 'í angálé móndyá bvò kòndi àdhya i drilésè.

²³Tà bati ró dhì, tolí lású be kònini nda i sù ngóró tolí tògya ró dhì i tíni. Tàko ko, à adré tâa dhì, lè à kàdré trôle Gìká ní tà rú, à kàdré dhyá kì tà bha kìní mi, ìndì à kàdré dhyá kì rúbhá 'o adrélé kizà nya. Di, tolí nda i kitswá àyikya àma kì ledé lovó kònzi àma kì rúbhá kya kì ató àma pálé dhì bwà ko.

Kòlòsáyìbhá i 3

¹Di ásà dhì, Gìká dré àmì kì tingálé dràdrà lésè túmání Krísto be dhì sè dhì, mì kàdré àmì kì togó bha tà kurú na bhù na dhì i dri. Kònale dhì, Krísto adré lirílé Gìká ní dríágó lésè.

²Mì kàdré tà bvò kòndi àdhya kì kisù kòdhya ko. Be ró dhì, mì kàdré àmikya tà kurú na bhù na dhì kì kisù kòdhya.

³Tàko ko, mì drà dre, ìndì Gìká zù àmì kì lindrì tídhi ro dhì Krísto be í léna dre.

⁴Bàti, àmì kí lídrì nda Krísto 'í. Dí lókyá akódhì nda dré dra apfòzo dhì tú dhì, mì ni kókpà apfò túmǎní akódhì be akódhì ni mìlanzìlanzì na.

Li' dri` àku, i` ndi` li' dri` ti' dhi'

⁵Dí ásà dhì, lè mì kò'o àmì kí lídrì àku bvò kòndì àdhya ni tà i todràle. Tà nda i tà kònì 'í: ndòtò tà, tà ndì ró dhì, rúbhá lovó bhàma, lovó kònzi kí bhàma, ìndì ngá lovó bhàma. Tàko ko, ngá lovó bhàma, giká tàko kí lindrì bhàma 'í.

⁶Tà nda kòdhì i sè dhì, Giká ni kombà adré alìle móndyá adrébhá ligilé akódhì rú dhì i dri.

⁷Wáláká dhì, mì fè tá àmì adrélé tatsílé tà nda kí 'obe.

⁸Dí, nyànomvá dhì, lè mì kòtingá àmì rúsè tà lású be kònìnì dhì i tití: togóaswa, kombà, tà kònzi, móndí kí rú tama kònzi dhì, ìndì kúlì swà adrébhá apfòle àmì sílésè dhì i.

⁹Mì kòtà kpà kinzò àmì kófalésè ko. Tàko ko, mì tingá àmì rúsè àmì kí lídrì àku túmǎní tà kònzi tití mì dré tá adrélé 'ole dhì íbe dre gó,

¹⁰mì dré lídrì tídhì ro dhì ni asózó àmì rú. Giká àmì kí bhàlepi dhì adré àmì kí lídrì nda ni ladzá atsálé tídhì ro lású be ína tíni, mì kòkitswáró akódhì ni ni dóro lavúlé be dhì bvó.

¹¹Dí ásà dhì, móndí i vélé twátwa ko, gba i kàdré Yúdà ànzì 'í yà, kó ngalè móndí Yúdà ànzì ró ko dhì 'í yà, móndí lwàle dhì 'í yà, kó ngalè móndí lwàle ko dhì 'í yà, móndí súrú twá ro dhì 'í yà, móndí tà nibhá ko dhì 'í yà, màrabà 'í yà, kó ngalè móndí màrabà ro ko dhì 'í yà dhì. Tà kàdrì lavúlé dhì ngbà 'í Krísto adrélépi àyì tití nda i léna, ìndì adrélépi tà tití dhì 'í dhì 'í.

¹²Dí àmì Giká dré lèle tò ìndì dré zìle adrélé móndyá lolo ína i ró ni i, mì kòtosó àmì tà dóro mì dré adrélé 'ole àmì kí togó dóro sè dhì i sè, àmì kí tà mì dré adrélé bhàle kínì mi dhì sè, àmì kí togó yàyà sè, ìndì àmì kí togó vwàvvà sè.

¹³Mì kàdré àmì kí adrúpi kí tà yàyà mvo, adrészó àmì kí tàkonzì tri àmì kófalésè, gba tàkonzì 'ole àmì rú nda kàdré àdho tà 'í ya dhì. Mì kàdré àmì kí adrúpi kí tàkonzì tri, ngóró Míri dré àmì kí tàkonzì trile dhì tíni.

¹⁴Tà kàdrì tà tití nda kí lavúlépi dhì, tà kònìdhì 'í: Mì kòtosó àmì lèle sè. Tàko ko, lèle nda adré àmì kí amú adrélé ngá àlo ró kitswálé tití dhì nì.

¹⁵Mì kàdré Krísto ni tà kìdríkìdrì tayí adrélé òpì nya àmì kí togó na. Àngyá ko, Giká azí àmì adrélé rúbhá àlo ró tà kìdríkìdrì na. Mì kàdré kpà àwoyà fe Giká dré.

¹⁶Mì kàdré Krísto ni kúlì tayí adrélé gàle àmì léna bì, mì kàdréró tà tadhá ìndì ru kodzó àmì kófalésè togyá wáyi sè. Mì kàdré longó Giká ni Kúlì na dhì kí ngo, túmǎní longó adrészó Giká ni rú bha kùle dhì íbe, ìndì longó adrébhá angálé Tírí Lólo vélésè dhì íbe, adrészó àwoyà ta Giká dré.

¹⁷Kúlì tití mì dré adrélé tâle ìndì tà tití mì dré adrélé 'ole dhì i, mì kàdré 'òá Míri Yésu ni rú sè, adrészó àwoyà fe Giká Atá dré akódhì sè.

Àgo kí tà àyí kí tòkó i` be dhi, i` ndí` ànzimvá kí tà àyí kí tibhá i` be dhi

¹⁸Àmí tòkó i, mì kàdré àmí kí drì asó àmí kí àgo i kandrá, ngóró dré kitswálé móndyá adrébhá Míri na dhi i sè dhi tíni.

¹⁹Àmí àgo i, mì kàdré àmí kí tòkó kí le. Mì kòbhà kpà togó kùdzí àyí rú ko.

²⁰Àmí ànzimvá i, mì kàdré àmí kí tibhá kí kúlí ka'ì 'ole tà tití i sè. Tàko ko, Míri ní togó adré kinílé tà nda sè.

²¹Àmí, ànzí kí atá i, mì kàdré àmí kí ànzimvá kí togó 'o aswálé àngyá ko, àyí kí togó kòlanziró ko.

Màrábà kí tà àyí kí míri i` be dhi

²²Àmí màrábà ro ní i, mì kàdré àmí kí míri bvò kòndí àdhya kí kúlí ka'ì 'ole tà tití i sè. Dí, mì kàdré ngbà 'í 'óá kònini àyí nda i mi, àmí kí tà kàdréró dório àyí mìlésè dhi bvó ko. Be ró dhi, mì kàdré 'óá kònini àmí kí togó wáyi sè, ìndí mì dré adrélé Míri ní ro dhi sè.

²³Tà tití ángùdhi mì dré adrélé 'ole dhi i, mì kàdré 'óá àmí kí togó wáyi sè, ngóró mì dré adrélé 'óá Míri dré dhi tíni, móndí i dré dhi tíni ko.

²⁴Tàko ko, mì ní tâle dhi, mì ní làgí mûrungú Míri dré lazílé áyi ànzí i dré tâyilé ro dhi ní kisú dhi be. Míri mì dré adrészó tà ní ní 'o màrábà ní tíni dhi, Míri Yésu Krísto 'i.

²⁵Dí, dhya adrélépi tà kònzi 'o dhi ní tà kònzi kisú tà kònzi i dré 'ole dhi i tí. Tàko ko, Gíká adré móndí kí no twátwa ko.

Kòlòsáyìbhá i 4

¹Àmí míri ro ní i, mì kàdré àmí kí màrábà ki 'o dório ìndí gyägya. Mì kòtivì ko tâle dhi, àmí kókpà Míri íbe bhù na dhi.

Tà àruka tâle Kòlòsáyi`bhá kí kodzozó dhi i

²Mì kàdré àmí kí fe adrélé tà zi Gíká tí landè àko ró, adrészó tâmìga dri, adrélé kpà àwoyà fe akódhi dré.

³Mì kàdré kpà tà zi Gíká tí àma dré, kònziro láti àma dré kitswázó Krísto ní tà lùzu ró dhi ní longó be dhi bvó. Tàko ko, tà nda tà má dré adrészó bă nya ásà dhi 'i.

⁴Dí mì kàdré tà zi akódhi tí, má kòkítswáró tà nda ní longó ngádra 'á, ngóró dré kitswálé má dré 'ole dhi tíni.

⁵Mì kàdré tà 'o tògyá sè móndyá Yésu ní ka'ibhá ko dhi i kòfalé. Mì kàdré lókyá wáyi mì dré adrészó ába dhi kí likí, adrészó tà dório 'o ásà.

⁶Mì kàdré ngbú kúlí ta àmí kí togó dório sè, kúlí nda i kàdréró kìníkini ngóró tà'í dàle mányàngá na dhi tíni, mì kòniró kpà adrélé tà logó móndí àlo àlo tití adrébhá tà lizí àmí tí dhi i dré dhi be.

Mòdo kùdù

⁷Àma kí adrúpi Tìkíkò mà dré lèle tò dhi ni áma rúbí tití dhi kí longó àmí dré. Akódhi nda àma kí àzíàmu 'í, ìndì Míri ni àzí 'olepi, kitswálé ka'ile togó wäyi sè dhi 'í.

⁸Dí má adré akódhi ni dzo àmí véna, mì kòniró àma kí tà tití dhi i, ìndì kòtimbàró àmí àmí kí tà ka'ika'i na.

⁹Ì adré lìle àmí véna, túmání àma kí adrúpi Ònèsímò mà dré lèle tò dhi be. Akódhi nda angá àmí kí tändi i kòfalsè, ìndì kitswá adrélé ka'ile togó wäyi sè. Àyí nda i kònì dra tsa dhi, i ni tà tití adrébhá lavúlé kònwa dhi kí tití àmí dré.

¹⁰Àristárúkò mà dré adrészó bădzó 'á akódhi be dhi, fè mòdo àmí dré. Márokò, Bárànábà ni kòdromvá fè kpà mòdo àmí dré. Mì yi tá akódhi nda ni tà drìdrì dre. Kòtsa àmí véna dhi, mì kòka'i akódhi dòle àmí véna togó dóro sè.

¹¹Yésu, adrélé kpà rú zile Yúsitò dhi, fè kpà mòdo àmí dré. Àyí nda kòdhí i Yúdà ànzi adrébhá àma kí àzíàmu Gíká ni Òpì ni tà sè dhi i kòfalé dhi 'í àyí pátí. È adré kpà áma togó tindrì tò.

¹²Èpafúrà angálépi àmí kòfalsè, adrélépi kpà Yésu Krísto ni mårábà ro dhi, fè mòdo àmí dré. Akódhi nda adré ngbú tà zi Gíká tí àmí dré togó be àtsi ró, mì kàdréró àmí kí totó tätä, adrélé li'wálé àmí kí tà ka'ika'i na, adrélé tà Gíká dré adrélé lèle mì kò'o dhi kí ka'i 'ole tití.

¹³Má ni kitswá tàá akódhi nda ni tà sè dhi, adré áyí fe adrélé àzí 'o àmí kí tà sè, ìndì móndyá ka'ibhá Làwòdikíyà na ìndì Yèrápóli na dhi kí tà sè.

¹⁴Àma kí adrúpi Lúkà mà dré lèle tò, adrélépi kódzó ro dhi, i fè mòdo àmí dré túmání Démà be.

¹⁵Mì kòfè mòdo àma kí adrúpi adrébhá Làwòdikíyà na dhi i dré, Nífà dré, ìndì móndyá Èkélézyà àdhyá adrébhá ru kímó akódhi ni dzó na dhi i dré.

¹⁶À kònà wárágà kònìdhí àmí kòfalé dre dhi, mì kòmù wárágà nda Èkélézyà Låwòdikíyà na dhi dré kpà nàle be. Má adré kpà lèá dhi, mì kòdo wárágà má dré tá mùle àyí nda i dré dhi nàle àmí kòfalé be.

¹⁷Mì kòtà Àrùkípò dré dhi: «Mí kònò dóro, mí kò'oró àzí Míri dré bhàle mí drígá dhi akílé tití. »

¹⁸Ma, Pólò, má adré kúlí kònì kí tisì áma tändi ni drígá sè, mòdo fèzo àmí dré. Mì kòtivì áma nyìrì kí tà ko. Gíká ni togó tanì kàdré àmí íbe!

1 Tèsàlòníkèbhá i

1 Tèsàlòníkèbhá i 1

Mòdo fèma

¹Ma, Pólò, túmání Sílà íbe ìndì Timòtéyò be dhi i, mà adré wárágà kònìdhì ni tisì Èkélézyà Tèsàlòníkè na dhi dré, àmi adrébhá Giká Atá àdhya ró ìndì Míri Yésu Krísto àdhya ró dhi i dré. Giká kòbhà áyi togó taní àmi rú, ìndì kofè tà kìdríkìdrí àmi dré!

Pólò fè àwoyà Tèsàlòníkèbhá ki tà ka'ika'i ni tà sè

²Lókyá mà dré adrérà'a tà zi Giká tí dhi 'á dhi, mà adré ngbú adrélé àwoyà ta akódhi dré àmi tití dhi ki tà sè, adrészó tà zi akódhi tí àmi dré.

³Vésè wäyi, mà adré àmi ki tà kònì ki kisù Giká àma ki Atá kandrá kòdhya: Mì adré azí 'o àmi ki tà ka'ika'i sè, adrészó tà 'o àmi ki lèle sè, adrészó mì bha àma ki Míri Yésu Krísto véna landè àko ró.

⁴Àma ki adrúpi Giká dré lèle tò ni i, mà nì tâle dhi, akódhi zì àmi adrélé móndyá ína i ró dhi be.

⁵Tako ko, lókyá mà dré Rúbí Taní longózó àmi dré dhi sè dhi, mà longó tá Rúbí Taní nda ngbà 'í kúlí sè ko. Be ró dhi, mà longó àmakya Rúbí nda rinyí sè, Tírí Lolo sè, ìndì mà dré tá nile, tà mà dré tá adrélé longolé nda i tà bati 'í dhi be dhi sè. Mà dré tá adrérà'a àmi kòfalé dhi 'á dhi, mì nì mà 'o tá tà àmi ki tà sè ngíni ya dhi be.

⁶Àmi ró dhi, mì lebè tá àma, adrészó tà 'o àmakya tíni ìndì Míri Yésu àdhya tíni. Tágba mì dré tá adrészó kizà nya lavulé dhi, mì ka'lí tá kúlí mà dré longolé nda arí Tírí Lolo dré fèle gâle àmi léna dhi sè.

⁷Ásà dhi, móndyá ka'ibhá tití bvò Mákèdònìyà àdhya na ìndì Àkáyà àdhya na dhi i nò Míri ni tà àmi rú gò, i dré kpà adrészó tà 'o àmikya tíni.

⁸Tako ko, àmi ki tà sè dhi, Míri 'o áyi kúlí la'ulé ngbà 'í Mákèdònìyà 'ásè, ìndì Àkáyà 'ásè ko. Móndyá àrà tití i 'ásè dhi i yi tâle dhi, mì ka'lí Giká ngíni ya dhi 'í. Ásà dhi, lè mà kògò adrélé àmi ki tà tití àyi dré ko.

⁹Àngyá ko, àyi ki tändi i adré mì ka'lí tá àma dôle àmi véna togó dóro sè ngíni ya dhi ni tà tití àyi. I adré kpà mì tayí giká tako i, àmi ki togó adzázó Giká bati lídrì ro dhi vélé, adrészó akódhi ni tà 'o mårábà ni i tíni ngíni ya dhi ni tà tití.

¹⁰Nyànomvá dhi, mì adré akódhi ni Mváagó Yésu, dré tingálé dràdrà lésè dhi ni agòma bhù lésè dhi ni letè. Yésu nda apá àma Giká ni kombà adrélépi alìle dhi lésè ni.

1 Tèsàlòníkèbhá i 2

Àzí Pólò dré 'ole Tèsàlòníkèbhá i kòfalé dhi

¹Àma kí adrúpi i, àmí kí tändi mì nì tåle dhí, àma kí tsàma àmí véna dhí tá tà tåko 'i ko dhí be.

²Ngóró mì dré nile be dhí tíni dhí, drìdrì mà dré tsàzo àmí véna dhí kandrá dhí, à pfo tá àma kí mì, àma kí 'òzo kònzi lavulé Filipoyì na. Di, Gìká dré tawà afèzo àma dré lìzo áyi Rúbí Tani longó àmí dré tirì àko, tágba à dré tá adrész ligilé àma íbe tà tändi ró dhí.

³Tåko ko, mà dré adrérà'a móndí kí kodzó Rúbí Tani nda ní ka'i dhí 'á dhí, mà adré ayí kí kodzó kinzò sè yà, tà kònzi mà dré lèle 'ole dhí sè yà, kó ngalè túrúpfú sè yà dhí ko.

⁴Be ró dhí, mà adré àmakya Rúbí Tani nda ní longó ngóró móndí Gìká dré ka'ile gò, Rúbí nda ní bhàzo àyí drígá dhí i ró. Di mà adré longóá kitswázó móndí kí togó 'o kinlé dhí bvó ko. Be ró dhí, mà adré àmakya longóá kitswázó Gìká adrélépi àma kí togó tabhì dhí ni togó 'òzo kinlé dhí bvó.

⁵Lókyá mà dré tá adrérà'a àmí kòfalé dhí 'á dhí, mà tà tá tà àlo kúlí kìní i sè kitswázó àmí kí tà bha kuru àngyá dhí ko. Mà 'o tá kpà tà àlo àmí kí ngá kisúzó túrúpfú sè dhí ko, ngóró Gìká ní tändi dré nile be dhí tíni.

⁶Mà ndà tá kpà rúku kisúlé móndí i mìlésè ko, kàdré tá àmí mìlésè yà, kó ngalè móndí àruka i mìlésè yà dhí.

⁷Àma Yésu Krísto ní àpóstolò ro dhí i, mà ní tá kitswá àma kí 'o adrélé móndí kàdrì ro àmí drile dhí bwà. Di, àma tá àmakya àmí kòfalé dhí togó íbe ànzimvá kya tíni, ngóró ànzí kí andre dré adrélé áyi tändi ní ànzimvá kí likí dhí tíni.

⁸Mà dré àmí kí lèle tò dhí sè dhí, àma kí lovó tá ngbà 'í Gìká ní Rúbí Tani longozó àmí dré dhí kòdhya ko. Àma kí lovó tá kpà àma kí tändi kí lídrì fèzo àmí dré, àma kí lèle àmí véna nda sè.

⁹Àma kí adrúpi i, mì kisù rè ngalè mà 'o tá àzí kòkóròko landèzo àmí kòfalé ngíni ya dhí ká. Mà dré tá adrérà'a Gìká ní Rúbí Tani longó àmí dré dhí 'á dhí, mà 'o tá àzí kítú be ìndì ngátsi be, àma kí tà kòlanziró àmí kí àlo dri ko.

¹⁰Àmí tà nda kí nobhá mì sè túmání Gìká be dhí i, mì ní kitswá tàá àma kí tà sè, ngalè mà 'o tá tà àmí Yésu ní ka'ibhá i kòfalé gyägya, togó lolo se, ìndì tà àko àma rú ngíni ya dhí.

¹¹Mì ní kpà tåle dhí, mà 'o tá tà àmí àlo àlo tití dhí i véna dóro, ngóró ànzí kí atá dré adrélé 'ole áyi ànzí i dré dhí tíni dhí be.

¹²Mà timbà tá àmí àmí kí tà ka'ika'i na, àmí kí togó tindrìzo, àmí kí kodzozó, mì kàdréró atsílé ngóró dré kitswálé Gìká mìlésè dhí tíni. Tåko ko, akódhí nda adré àmí kí zi file áyi Òpì na, ìndì áyi mìlanzìlanzì na dhí nì.

¹³Ásà dhí, mà adré kpà àwoyà ta Gìká dré tà kònìdhí sè: Lókyá mì dré Gìká ní kúlí yizo àma tí dhí sè dhí, mì ka'i tá kúlí nda ngóró kúlí móndí kya ró ko. Be ró dhí, mì ka'i àmikya kúlí nda ngóró kúlí Gìká àdhya ró, ngóró dré adrélé bati dhí tíni. Di nyànomvá dhí, kúlí nda adré tà 'o àmí adrébhá ka'ia dhí i léna dhí nì.

¹⁴Àma kí adrúpi i, àmí kí tà atsá ngóró Gìká ni Èkèlézyà Yùdáyà na adrébhá Yésu Krísto na dhi kya tíni. Tako ko, mì nya kizà àmí kí tändi kí móndí i drígá, ngóró i dré kizà nyàle Yùdà ànzì i drígá dhi tíni.

¹⁵Yùdà ànzì nda i pfu tá Mírì Yésu dràle ngóró i dré tá pròfétà kí tupfûlé todràle dhi tíni gó, i dré àma kí mì pfòzo tà tändi ró dhi àyi. Àyi kí tà kîtswá Gìká milésè àlomvá ko. I adré ru pfu móndyá tití dhi íbe.

¹⁶I adré kpà àma kí le kikílé, mà kòlongóró Gìká ni kúlí móndyá súrú twá ro dhi i dré ko, i kàdríró ko dhi bvó. Ásà dhi, i adré àyi kí tâkonzì kí 'o gâle àyi léna gagà. Dí, kùdù ro dhi, Gìká tadhá áyi kombà àyi dré dre.

Pólò lè gòle Tèsàlòníkèbhá kí no

¹⁷Àma kí adrúpi i, lókyá mà dré ru lanzízó àmí íbe lókyá tsà sè dhi sè dhi, àma kí ru lanzíma nda tá ngbà 'í rúbhá na, togó na ko. Dí àma kí togó tá àtsí ró àmí kí tà sè gó, mà dré láti ndàzo kîtswázó gòle àmí kí no.

¹⁸Vésè be bí, mà lè tá gòle àmí véna. Lavúlé dhi, ma, Pólò, má lè tá tò, dí, Sàtánà kikí tá ína láti àma dré.

¹⁹Tako ko, àmí kí tändi i tà mà dré adrészó mì bha ásà, adrészó kpà lenzélé ásà dhi i. Àmí kpà àma kí kùlá mà dré dra àma kí drì bhàzo ásà kuru àma kí Mírì Yésu kandrá, akódhi dré agòrà'a dhi i.

²⁰Àyíya! Àmí móndí mà dré adrészó àma kí drì bha kuru, adrészó kpà lenzélé àyi sè dhi i.

1 Tèsàlòníkèbhá i 3

¹Dí mà dré tá kîtswálé gòle àmí kí nòma ko dhi ni mvo bwà ko dhi sè dhi, mà nò tá dóro ni, mà dré adrélé àma pátí Àtènayì na dhi.

²Dí mà dré àma kí adrúpi Tímòtéyò ni mùzo àmí véna kîtswálé àmí kí kodzó, ìndí àmí kí tîmbà àmí kí tà ka'ika'i na. Akódhi nda Gìká ni àzíàmu mà dré adrészó Krísto ni Rúbí Tani 'o ayílé túmâni akódhi be dhi i.

³Mà adré lèá dhi, dhya àlo àmí kòfalé dhi kòtayí i kizà mà dré adrélé nyàle dhi dré kizílé ko. Àmí kí tändi mì ni tâle dhi, Gìká tayí àma adrélé kizà lású be kònìnì dhi ki nya dhi be.

⁴Tako ko, mà dré tá adrérà'a àmí íbe dhi 'á dhi, mà adré tá ngbú tâá dhi, à adré tá 'ole àma kí mì pfo. Dí tà nda atsá kònìnì bàti, ngóró mì dré nile be dhi tíni.

⁵Ásà dhi, lókyá mà dré kîtswázó gòle àmí kí nòma ko dhi ni mvo bwà ko dhi sè dhi, mà mù tá Tímòtéyò àmí véna, nîzoá ngalè mì adré trôle àmí kí tà ka'ika'i rú ngíni ya dhi. Má adré tá ngá ro, dhya adrélépi móndí kí tabhì litílé dhi ni dra àmí kí lití gó, àzí mà dré tá 'ole àmí kòfalé dhi dré atsázó tà tako ró dhi sè.

Rúbí Tímòtéyò dré longolé dhi tindri` Pólò ni togó

⁶Dì, nyànomvá dhi, Tìmòtéyò agò àmì vélésè, àmì kì tà ka'ika'i ni rúbí dóro longó àma dré àmì kì lèle ni tà be dre. Akódhi tà àma dré dhi, mì adré ngbú adrélé àma kì tà kisù, adrészó lovó íbe àma kì nòzo, ngóró mà dré kpà adrélé lovó íbe àmì kì nòzo dhi tíni.

⁷Dì àma kì adrúpi i, àma kì togó andrà àmì kì tà ka'ika'i ni tà sè dre, tágba mà dré adrészó kizà nya lavúlé dhi.

⁸Nyànomvá dhi, àma kì lídrì agò dre, mà dré yile tâle dhi, mì adré àmì kì totó tätä Mírì Yésu na dhi sè.

⁹Dì mà nì, mà nì àwoyà ta Gìká dré tà dré 'ole àmì dré dhi sè ngíni ya dhi ko. Tàko ko, àmì kì tà sè dhi, mà adré lenzélé àma kì Gìká kandrá lavúlé.

¹⁰Kítú be ìndì ngátsi be dhi, mà adré akódhi ni ti lizí togó wáyi sè, kòtayíró àma gòle àmì kì no, mà kòkitswáró tà àmì kì píbhá àmì kì tà ka'ika'i na dhi kì tiimbà be dhi bvó.

¹¹Dì Gìká àma kì Atá ni tändi, àma kì Mírì Yésu be dhi i kònzi láti àma dré kítswázó lìle àmì véna.

¹²Mírì kò'o kpà àmì kì lèle gâle àmì léna gagà, mì kàdréró ru le àmì kòfalésè, adrészó kpà móndyá àruka tití dhi kì le, ngóró mà dré adrélé àmì kì le dhi tíni.

¹³Kòtiimbà kpà àmì kì togó, mì kàdréró lólo, ìndì tà àko àmì rú Gìká àma kì Atá kandrá, lókyá àma kì Mírì Yésu dré dra agòzo áyi móndyá lólo tití dhi íbe dhi tú. Kàdré kònini!

1 Tèsàlòníkèbhá i 4

Atsima ngóró dré kítswálé Gìká mìlésè dhi ti' ni dhi

¹Kùdù ro dhi, àma kì adrúpi i, mà adré àmì kì ti lizí, adrészó àmì kì kodzó Mírì Yésu ni rú sè: Ngóró mà dré tadhálé àmì dré dre dhi tíni dhi, mì kàdré atsílé ngóró dré kítswálé Gìká mìlésè dhi tíni. Tà bâti ró dhi, mì adré atsílé lású be kònini. Dì nyànomvá dhi, mì kògò adrélé 'òá lìzo ába drìdrì.

²Tàko ko, mì nì tà mà dré lazílé àmì dri Mírì Yésu ni rú sè dhi i be.

³Gìká adré lèá dhi, mì kàdré àmì kì fe adrélé lólo i dré. Mì kàdré dì àmì kì likí ndòtò tà sè.

⁴Lè àmì àlo àlo tití dhi i, mì kònì adrélé àmì kì tändi kì rúbhá likí dhi be, ngóró dré adrélé lólo Gìká mìlésè dhi tíni, ìndì dré kítswálé lìndrì sè dhi tíni. ⁵Mì kòtayí àmì adrélé rúbhá lovó bha àmì kòfalésè ngóró pàgánò Gìká ni nibhá ko dhi kya tíni ko.

⁶Tà kòdhi sè dhi, lè dhya àlo àmì kòfalé dhi kò'o áyi adrúpi kònzi ko, ìndì kòlití akódhi àlomvá ko. Àngyá ko, Mírì ni tà ọo móndyá tití adrébhá tàkonzì lású be kònini dhi kì 'o dhi i dri, ngóró mà dré longólé àmì dri drìdrì dhi tíni.

⁷Tàko ko, Gìká azí àma adrélé ndòtò tà 'o dhi ko. Be ró dhi, azí ína àma adrélé lólo i dré.

⁸Dì ásà dhi, dhya ángùdhi adrélépi tà lazilé i dri kòdhì ni ga rè dhi, adré móndí ki kúlì ga kòdhya ko. Be ró dhi, adré ína Gìká adrélépi áyi Tíri Lolo fe àmì dré dhi ni kúlì ga kòdhya.

⁹Kàdré ru lèma ngóró adrúpi i tíni dhi ni tà sè dhi, lè mà kòtisì tà nda àmì dré wárágà sè ko. Tàko ko, Gìká ni tändi tadhá àmì adrélé ru le àmì kòfalésè dhi ni.

¹⁰Tà báti ró dhi, mì adré ru le àmì kòfalésè àmì ki adrúpi tití Makèdònìyà na dhi ibe. Dì, àma ki adrúpi i, mà adré àmì ki kodzó, mì kògoró adrélé 'òá lìzo ába drìdrì.

¹¹Mì kàdré àmì ki fe adrélé tà kìdríkìdrì ibe àmì kòfalé, adrészò àmì ki tändi ki tà no, adrészò kpà àzí 'o àmì ki tändi ki drígá sè, ngóró mà dré lazilé àmì dri dhi tíni.

¹²Mì kàdré 'òá kònini dhi, àmì ki tà ni adré dóro móndyá ka'ibhá ko dhi i mìlésè, ìndì mì kitswá adrélé ngá zi móndí i tí ko.

Yésu ni agòma, i`ndi` móndyá ka'ibhá dhi ki ngàma dràdrà 'ásè dhi

¹³Àma ki adrúpi i, kàdré móndyá dràbhá dre dhi ki tà sè dhi, mà lè mì kàdré tà nìma ko na ko, adrélé kpà kizà ro ngóró móndyá tà mì bhàzo dhi àko dhi i tíni ko.

¹⁴Tàko ko, mà ka'i tale dhi, Yésu drà gò, dré ngàzo dràdrà 'ásè dhi 'í. Dì mà adré kpà ka'íá tale dhi, Gìká ni móndyá tití Yésu ni ka'ibhá gò i dré todràzo dhi ki tingá dràdrà lésè, ngóró dré Yésu ni tingálé dràdrà lésè dhi tíni.

¹⁵Mà adré tà Míri dré tadhálé àma dré dhi ki ta àmì dré kòdhya: Àma dra adrébhá dhu rè lídrì ibe kítú Míri dré dra agòzo dhi tú dhi i, mà kitswá lile drìdrì móndyá dràbhá dre dhi i kandrána ko.

¹⁶Tàko ko, à ni lúlúgyá ga, ángéló ki kàdrì dré kúlì yòzo gò, Gìká ni gòká vòzo gò, Míri ni tändi dré asízó bhù lésè. Dì móndyá Krísto ni ka'ibhá gò i dré todràzo dhi i dré ngàzo dràdrà 'ásè 'íká.

¹⁷Amvolásà dhi, Gìká dré àma dra adrébhá dhu rè lídrì ibe dhi ki tingázó kimólé àyi ibe ndùrùku na, àma tití mà kòkisúró ru Míri be kurú na. Dì mà ni adré túmání Míri be kóná vésè kólyá.

¹⁸Dì ásà dhi, mì kàdré ru kodzó àmì kòfalésè kúlì kòdhì i sè.

1 Tèsàloníkèbhá i 5

Kitú Míri Yésu dré dra agòzo dhi

¹Àma ki adrúpi i, kàdré lókyá ki tà sè kítú ibe dhi, lè mà kòtisì tà nda àmì dré wárágà sè ko.

²Tàko ko, àmì ki tändi mì ni dóro tale dhi, kítú Míri dré dra agòzo dhi ni atsá ngóró kùgú dré adrélé atsálé ngátsi sè dhi tíni dhi.

³Lókyá móndí i dré adrérà'a tàá dhi «Tà tití dhi i kìdríkìdrì, ìndì kíri! » dhi 'á dhi, tà dra àyi ki tà pfùlepi dhi ni atsá àyi rú Ngbò ró, ngóró mváaswa dré adrélé atsálé tòkó 'a be dhi rú Ngbò ró dhi tíni. Dì àyi ki àlo kitswá ína lapálé tà nda sílésè ko.

⁴Di, àmì, àma kì adrúpi i, àmì àmìkyá tímímvá na ko, kítú nda kòkíró àmì kùgú àdhya tíni ko.

⁵Tàko ko, àmì tití dhi i ànzì ngádra àdhya 'i, ìndì ànzì kítú àdhya 'i. Àma ànzì tímímvá àdhya 'i ko, ìndì ngátsi àdhya 'i ko.

⁶Ásà dhi, mà kàdré adrélè ayí na móndí àruka i tíni ko. Be ró dhi, mà kàdré àmakya támiga dri, adrélè àma kì tà kisùle dhi kì likí.

⁷Àngyá ko, móndyá adrébhá ayí ko dhi i adrè ayí ko ngátsi sè. Móndyá adrébhá wá tsi dhi i adrè kpà wá tsi ngátsi sè.

⁸Di, mà dré adrélè móndyá kítú àdhya 'i dhi sè dhi, lè mà kàdré àma kì tà kisùle dhi kì likí. Lè mà kàsó àma rú àma kì tà ka'ika'i lèle be, ngóró aya asólé àma agá kitswázó àma kì likí dhi tíni. Mà kàsó kpà àma dri tà mà dré adrézó mì bha adrízó ásà dhi, ngóró kátabhùlà aya ró asólé àma dri dhi tíni.

⁹Tàko ko, Gíká zì àma kitswálé áyi kombà kisú kòdhya ko. Be ró dhi, zì àma kitswálé lídrì kóná vésè kólyá dhi ni kisú àma kì Míri Yésu Krísto sè kòdhya.

¹⁰Krísto nda drà àma kì tà sè, kitswálé mà kàdré gba lídrì ro yà, kó ngalè mà kòdrà yà dhi, mà kàdréró lídrì íbe túmání akódhì be be dhi bvó.

¹¹Di ásà dhi, mì kàdré ru kodzó, adrélè kpà ru tìmbà àmì kòfalésè àmì kì tà ka'ika'i na, ngóró mì dré adrélè 'ole dhi tíni.

Tà tâle kùdù ro Tèsàlòníkèbhá kì kodzozó dhi i

¹²Àma kì adrúpi i, mà adrè àmì kì ti lizí, mì kàdréró àmì kì drì kobhá Míri ni àzí na dhi kì lindrì bha. Tàko ko, àyi nda i adrè àzí 'o landèzo àmì kòfalé, adrézó kpà àmì kì kodzó.

¹³Mì kàdré àyi kì tà bha kuru lèle na, àzí i dré adrélè 'ole nda ni tà sè. Mì kàdré kpà tà kìdríkìdrì íbe àmì kòfalé.

¹⁴Àma kì adrúpi i, mà adrè àmì kì kodzó, mì kàdréró móndí tòbvo ró dhi kì bí se, adrézó móndí tìri ró dhi kì kodzó, adrézó kpà móndí tà íbe yayà dhi kì ledé. Mì kàdré àmì kì togó vwàvvà tadhá móndyá tití dhi i véna.

¹⁵Mì kònò dóro, dhya àlo àmì kòfalé dhi kòlogóró tà kònzi tà kònzi 'ole i rú dhi tí ko. Be ró dhi, mì kàdré ngbú tà dóro nda 'ole àmì kòfalésè, ìndì móndyá àruka tití dhi i véna.

¹⁶Mì kàdré ngbú adrélè lenzélé,

¹⁷adrézó tà zi Gíká tí landè àko ró,

¹⁸adrézó àwoyà ta akódhì dré tà tití i sè. Tàko ko, tà nda kòdhì i tà Gíká dré adrélè lèle mì kò'o Yésu Krísto na dhi 'i.

¹⁹Mì kòkidrá àtsí Tíri Lólo àdhya ko.

²⁰Mì kàyízè kpà tà móndí i dré adrélè longolé pròfétà kya tíni dhi i ko.

²¹Mì kàdré tà tití dhì kì tabhì, adrészò trôle tà dóro i rú.

²²Mì kàdré àmi kì likí tà kònzi kì kárá tití dhì kì tà sè.

²³Nyànomvá dhì, Gìká adrélépi tà kìdríkìdrí fe dhì ni tändì kò'o àmi atsálé lolo kitswálé tití i mìlésè. Kàdré kpà àmi kì lídrì likí wäyi, àmi kì togó ibe ìndì àmi kì rúbhá ibe, mì kàdréró tà àko àmi rú kítú àma kì Míri Yésu Krísto dré dra agòzo dhì tú.

²⁴Gìká adrélépi àmi kì azí dhì kitswá adrélé ka'ile togó wäyi sè, ìndì a ni tà nda kì 'o ni.

²⁵Àma kì adrúpi i, mì kàdré kpà tà zi Gìká tí àma dré be.

²⁶Mì kòfè mòdo àma kì adrúpi tití dhì i dré, adrészò ru kamú àmi kòfalésè àyi ibe lèle sè.

²⁷Má adré àmi kì kodzó Míri ni rú sè, mì kònàrò wárágà kònìdhì àma kì adrúpi tití dhì i dré.

²⁸Àma kì Míri Yésu Krísto ni togó taní kàdré àmi ibe!

2 Tèsàlòníkèbhá †

2 Tèsàlòníkèbhá † 1

Mòdo fèma

¹Ma, Pólò, túmání Sílà íbe ìndì Timòtéyò be dhi i, mà adré wárágà kònìdhì ni tisì Èkélézyà Tèsàlòníkè na dhi dré, àmi adrébhá Giká àma kí Atá àdhya ró ìndì Míri Yésu Krísto àdhya ró dhi i dré.

²Giká àma kí Atá i Míri Yésu Krísto be dhi i kòbhà àyi kí togó taní àmi rú, ìndì i kòfè tà kìdríkìdrí àmi dré!

Tèsàlòníkèbhá kí tà ka'ika'i, i`ndi` tàbvó Giká dré dra tâle gya`gya lókyá kùdù sè dhi

³Àma kí adrúpi i, lè mà kàdré ngebú àwoyà ta Giká dré àmi kí tà sè. Tà nda kòdhì gyägya, tako ko, mì adré Giká ni ka'i togó wäyi sè adrészó lìle ába drìdrì. Àmi tití, mì adré kpà ru le àmi kòfalésè adrészó lìle ába drìdrì.

⁴Tà nda sè dhi, mà adré àmi kí tà ta drì be kuru Èkélézyà Giká àdhya i kòfalésè. Mà adré tâá àyi dré dhi, mì adré Giká ni ka'i, adrészó togó tsì, tágba à dré adrészó àmi kí mì pfo lavulé gó, mì dré adrészó kizà nya dhi.

⁵Tà nda kòdhì i adré tadhá dhi, Giká adré tàbvó ta gyägya. Tako ko, kizà mì dré adrélé nyàle kòdhì i sè dhi, Giká ni àmi kí 'o kitswálé áyi Òpì mì dré adrészó kizà nya ásà dhi sè.

⁶Tà bâti ró dhi, Giká gyägya. A ni kizà logó móndyá adrébhá kizà fe àmi dré dhi i dré gó,

⁷tà kìdríkìdrí afèzo àma adrébhá kizà nya túmání àmi íbe dhi i dré. A ni 'òá kònìnì lókyá Míri Yésu dré dra agázó bhù lésè áyi ángéló rìnyi ró dhi íbe dhi tú.

⁸Akódhì nda ni alì àtsí adrélépi kòle dhi na, kitswálé tà ño móndyá Giká ni nibhá ko dhi i dri, ìndì móndyá àma kí Míri Yésu ni Rúbí Taní gabhá 'ole dhi i dri.

⁹À ni tà ño àyi nda i dri gyägya, àyi kí tupfúzó todràle kóná vésè kólyá, i kàdréró vwàvvà ro Míri rúsè, ìndì akódhì ni rìnyí mìlanzìlanzì ro dhi rúsè.

¹⁰Tà nda ni ru 'o kitú Míri dré dra agòzo kitswálé mìlanzìlanzì kisú lìndrì be móndyá lolo tití áyi ka'ibhá dhi i vélésè dhi tú. Àmi ró dhi, mì ni adré kókpà àyi nda i kòfalé, mì dré kúlí mà dré longolé àmi dré dhi kí ka'ile dhi sè.

¹¹Tà nda sè dhi, mà adré tà zi àma kí Giká tí àmi dré landè àko ró, kò'oró àmi kitswálé tà i dré àmi kí azízó ásà dhi sè, ìndì kò'oró tà dóro tití mì dré adrélé lèle 'ole àmi kí tà ka'ika'i sè dhi i kitswálé tití áyi rìnyí sè.

¹²Mà adré zìá kònìnì, àma kí Míri Yésu kòkisúró mìlanzìlanzì àmi kí tà sè, ìndì mì kòkisúró kpà mìlanzìlanzì akódhì léna, àma kí Giká i Míri Yésu Krísto be dhi kí togó taní bhàle àmi rú dhi sè.

2 Tèsàlòníkèbhá i 2

Tà dra ru 'obhá drìdrì Míri ni agòma kandrá dhi i

¹Àma ki adrúpi i, kàdré àma ki Míri Yésu Krísto ni agòma, ìndì àma ki ru kimoma akódhi be dhi ki tà sè dhi, mà adré àmi ki kodzó kònini:

²À kàdré tàá dhi, Míri Yésu ni kítú atsá dre dhi, mì kòtayí tà nda àmi ki drì kizá yà, kó ngalè àmi ki líndrí tigá yà dhi mbèlè ko. Gba à kàdré tàá dhi, tà nda apfò Tírí Lolo vélésè yà, móndí ki kúlí lésè yà, kó ngalè àma ki tändi ki wárágà lésè yà dhi, mì kòka'i ko.

³Mì kòtayí àmi dhya àlo dré litílé ndìndì tà àlo sè ko. Tako ko, kítú nda kítswá atsálé drìdrì móndí zyandre dhi ki ligíma Gíká rú dhi kandrá ko, ìndì dhya drìkònzi líyí ro dhi ni apfòma kandrá ko. Drìkònzi líyí nda, dhya adrélépi lìle dràdrà kisú dhi 'i.

⁴Akódhi nda ni ligí gíká tití móndí i dré adrészó àyi ki líndrí bha dhi íbe, ìndì ngá tití i dré adrészó gíká nda ki líndrí bha ásà dhi íbe gò, dré áyi bhàzo gíká nda i drile tití. A ni ndìndì fí lirílé Gíká ni tépelò na gò, adrélé tàá ngádra 'á dhi, áyi tändi ína Gíká 'i.

⁵Lókyá má dré tá adrérà'a àmi kófalé dhi 'á dhi, má tà zakó tsì tà nda àmi dré dhi 'i?

⁶Dí nyànomvá dhi, mì ni tà adrélépi drìkònzi líyí nda ni apfòma kíkí dhi àdho 'i ya dhi be. Akódhi kítswá apfòle ko, tsàle lókyá ni dré dra kítswázó dhi 'á.

⁷Tako ko, rìnyí lùzu ró tàkonzi àdhya kídhó adrélé tà 'o dre. Dí, dhya adrélépi rìnyí nda ni kíkí dhi ni go adrélé kíkíá, tsàle lókyá dra akódhi ni tingázó dhi 'á.

⁸Lókyá nda sè dhi, drìkònzi líyí nda ni apfò. Dí, Míri Yésu ni akódhi ni pfu dràle áyi la'a sè, akódhi ni tà 'òzo akílé áyi atsama lagulagu ró dhi sè.

⁹Drìkònzi líyí nda ni atsá Sàtánà ni rìnyí be, adrélé tà twátwa líndríga ró ìndì kínzò ro dhi ki 'obe.

¹⁰A ni móndyá adrébhá lìle dràdrà kisú dhi ki lití tà kònzi ki kárá tití dhi i sè. Áyi nda ki todrà akílé tití, i dré tà bàti lèle ka'ile adrízó ásà ko dhi sè.

¹¹Ásà dhi, Gíká ni tà rìnyi ró dhi ni amù àyi ki lití, i kòka'iró tà kínzò ro dhi,

¹²i kòbhàró tà móndyá tití tà bàti gabhá gò, i dré lenzézó tàkonzi sè dhi i dri.

Mì` kàdré àmi ki totó tätä!

¹³Dí, àma ki adrúpi Míri dré lèle ni i, lè mà kàdré ngbú àwoyà ta Gíká dré àmi ki tà sè. Tako ko, Gíká kipè tá àmi kítswálé adrílé drìdrì móndí àruka i kandrá, Tírí Lolo dré àmi ki bhàle lólo Gíká kandrá dhi sè, ìndì mì dré tà bàti ka'ile dhi sè.

¹⁴Akódhi azí àmi lídrí tídhí ro nda ni kisú Rúbí Tani mà dré longolé àmi dré dhi sè, mì kòkisúrò àma ki Míri Yésu Krísto ni mìlanzìlanzi be dhi bvó.

¹⁵Dí ásà dhi, àma ki adrúpi i, mì kàdré àmi ki totó tätä, adrélé tròle tà mà dré tadhálé àmi dré dhi i rú, kàdré kúlí sè yà, kó ngalè wárágà sè yà dhi.

¹⁶⁻¹⁷Àma kí Mírì Yésu Krísto ní tändi i Gíká àma kí Atá be dhí i kòtimbà àmi kí togó, rinyí fèzo àmi dré, mì kòkitswáró ngbú adrélé tà doro 'o, adrészó kpà kúlí doro ta. Tàko ko, Gíká nda lè àma tò gò, tà adrészó àma kí tìmbà nyó dhí ní afèzo àma dré túmání tà mà dré adrészó mì bha ásà dhí be áyi togó taní sè dhí nì.

2 Tèsàlòníkèbhá i 3

Pólò lizí Tèsàlòníkèbhá kí ti, i` kàdréró tà zi Gíká tí i` dré

¹Kùdù ro dhí, àma kí adrúpi i, mì kàdré tà zi Gíká tí àma dré, Mírì ní kúlí kàdréró la'úlé lile drídri, ìndì móndí i kàdréró kúlí nda ní no lindrì ro, ngóró tà nda dré adrélé àmi véna dhí tini.

²Mì kàdré kpà tà zi Gíká tí, kàpáró àma móndí kònzi adrébhá liglé í rú dhí i drígásè. Àngyá ko, móndyá tití dhí i kitswá Gíká ní ka'i ko.

³Di, Mírì kitswá ína adrélé ka'ilé togó wáyi sè. A ní àmi kí timbà àmi kí tà ka'ika'i na, adrészó àmi kí likí Dhya kònzi ní tà sè.

⁴Mà adré ka'ia Mírì na tâle dhí, mì adré tà mà dré adrélé tâle mì kò'o dhí kí 'o, ìndì mì ní go adrélé 'òá.

⁵Mírì kàsé àmi kí togó í vélé, mì kòniró Gíká ní lèle bâti, adrészó kpà togó tsí, ngóró Krísto dré adrélé àmi kí fe 'òá dhí tini.

Àzí 'òma Pólò àdhya ti` ni dhí

⁶Àma kí adrúpi i, mà adré àmi kí kodzó Mírì Yésu Krísto ní rú sè: Mì kàdré ru su àmi kí adrúpi adrébhá tòbvo ró, adrébhá kpà tà mà dré tadhálé àmi dré dhí kí lebè ko dhí íbe ko.

⁷Àmi kí tändi mì ní tâle dhí, lè mì kàdré tà 'o àmakya tini dhí be. Àngyá ko, àma tá àmakya tòbvo ró àmi kòfalé ko.

⁸Mà nya tá kpà dhya àlo ní ngá àngyá ko. Be ró dhí, mà 'o àmakya àzí kòkóròko landèzo kítú be ìndì ngátsi be, àma kí tà kòlanziró àmi kí àlo dri ko.

⁹Tágba mà dré tá adrészó rinyí íbe kitswázó ngá zi àmi tí bwà dhí, mà zi tá ngá àlo àmi tí ko, mì kàdréró tà no àma rú gò, adrészó 'òá àmakya tini.

¹⁰Tàko ko, mà dré tá adrérà'a àmi kòfalé dhí 'á dhí, mà lazí tá tà àmi dri kònini: «Lè dhya adrélépi àzí le 'ole ko dhí kónya ngá ko. »

¹¹Mà adré tâá kònini tâko ko, mà adré yìá tâle dhí, móndí àruka àmi kòfalé dhí i tayí àyi adrélé tòbvo ró. Àyi nda i adré àzí 'o ko. Be ró dhí, i adré àyi tifilé móndí kí tà i 'ásè.

¹²Mà adré dì tà lazí móndyá lású be kònini dhí i dri, adrészó àyi kí kodzó Mírì Yésu Krísto ní rú sè: i kàdré àzí 'o togó be lìri, adrészó àyi kí tändi kí ngá nya kòdhya.

¹³Di, àmi, àma kí adrúpi i, mì kòtayí àmi adrélé landèle tà doro 'òma sè ko.

¹⁴Dhya àlo àmì kòfalé dhi kàdré kúlí mà dré tísile wárágà kònìdhi léna dhi kí ka'ì 'ole ko dhi, mì kònò akódhi nda dóro, adrész ru su akódhi be ko, kanyò kò'oró akódhi be dhi bvó.

¹⁵Dì tágba kàdré kònìnì yà dhi, mì kònò akódhi àmì kí kàribhá ro ko. Be ró dhi, mì kàdré àmikya akódhi ni kodzó àmì kí adrúpi tíni.

Mòdo kùdù

¹⁶Nyànomvá dhi, Míri tà kìdríkìdrí líyí ro dhi ni tändi kòfè tà kìdríkìdrí àmì dré lókyá wáyi i sè, ìndì láti wáyi i sè. Míri kàdré túmání àmì íbe tití.

¹⁷Ma, Pólò, má adré kúlí kònì kí tísí áma tändi ni drígá sè, mòdo fèzo àmì dré. Má adré kúlí tísí kònìnì áma wárágà tití i 'ásè, tadházóá dhi, má tísí ma.

¹⁸Àma kí Míri Yésu Krísto ni togó taní kàdré àmì íbe tití!

1 Tìmòtéyò

1 Tìmòtéyò 1

Pólò ni mòdo fèma

¹Ma, Pólò, Yésu Krísto ni àpóstolò, má adré wárágà kònìdhi ni tisì ma. Gìká àma kí tidrílépi dhi túmāní Yésu Krísto mà dré adrészó mi bha vélána dhi be dhi, è bhà ma adrélé àzí nda ni 'o dhi àyi.

²Má adré tisìá mi, Tìmòtéyò, áma mvá bàti tà ka'ika'i na dhi dré. Gìká àma kí Atá i áma kí Mírí Yésu Krísto be dhi è kòbhà àyi ki togó taní mí rú, è kòbhà ámi kizà, ìndì è kòfè tà kìdríkìdri mí dré!

Pólò kodzó Tìmòtéyò Gìká ni tà tadhábhá kinzò sè dhi kí tà sè

³Ngóró má dré tá ámi kodzolé má dré tá adrérà'a lìle Mákèdònìyà na dhi 'á dhi tíni dhi, mí kògò adrélé Èfésò na, mí kòtaró móndí àruka adrébhá Gìká ni tà tadhá kinzò sè dhi è dri dhi, è kòtayí tà nda kí tadhama.

⁴Mí kòtà kpà àyi dré dhi, è kòtayí adrema trôle tití tákò i rú, ìndì tábhí kí rú kí atíma rú dhi. Àngyá ko, tà nda kòdhí è adré káyi 'o apfòle móndí i kòfalé. È adré àyikya móndí kí ledé Gìká ni àzí bhàle àyi drígá dhi kí 'o tà ka'ika'i sè dhi ko.

⁵Má adré tolí kòdhí ni fe, móndí è kàdréró ru le àyi kòfalésè be dhi bvó. Lèle nda adré angálé togó lolo ìndì doro, adrélépi tà ka'i túrúpfú sè ko dhi lésè.

⁶Móndí àruka è ku láti doro nda 'ásè gò, è dré àyi kí fèzo adrélé tà tákò kí tití àyi kòfalésè.

⁷Àyi nda è lè adrélé tátrítrí kúlí tadhábhá è ró. Di, è nì àyikya tà è dré adrélé tadhálé dhi kí àndu ko, tágba è dré adrészó tà nda kí tadhá rìnyí sè dhi.

⁸Mà nì tâle dhi, tátrítrí kúlí doro dhi be, à kàdré tà 'o ngóró tátrítrí kúlí nda dré adrélé tâle dhi tíni dhi.

⁹Mà nì kpà tâle dhi, Gìká bhà tátrítrí kúlí móndyá gyägya dhi è dré ko dhi be. Be ró dhi, bhà ína tátrítrí kúlí nda móndyá adrébhá tátrítrí kúlí nda nì ño dhi è dré, túmāní móndyá adrébhá ligilé è rú dhi íbe, móndyá adrébhá áyi tà ga dhi íbe, móndyá adrébhá tàkonzi 'o dhi íbe, móndyá adrébhá tà lolo ató àyi pálé dhi íbe, móndyá adrébhá áyi lindrì bha ko dhi íbe, móndyá adrébhá àyi kí tibhá kí tupfú dhi íbe, móndyá adrébhá móndí kí tupfú todràle dhi íbe,

¹⁰móndyá adrébhá ndòtò tà 'o dhi íbe, àgo adrébhá ayílé àgo íbe dhi íbe, móndyá adrébhá móndí kí lagí màrabà ro dhi íbe, móndyá adrébhá kinzò ta dhi íbe, móndyá adrébhá tà ta móndí è rú kinzò sè dhi íbe, ìndì móndyá adrébhá tà twá tadhálé tà gyägya rúsè dhi kí 'o dhi íbe.

¹¹Tà tadhálé gyägya nda adré angálé Rúbí Taní mìlanzìlanzì ro Gìká rúku ró dhi dré bhàle má drígá dhi lésè.

Gìká ni togó taní bhàle Pólò rú dhi

¹²Má adré àwoyà ta àma kí Míri Yésu Krísto dré, dré rinyí afèle má dré adrészó áyi àzí 'o dhi sè. Akódhi nò tá ma ngóró móndí í dré kitswálé ka'ile dhi ró gò, áma bhàzo adrélé áyi àzí 'o,

¹³tágba atú dhi, má dré tá adrészó akódhi ni lodhá, adrészó akódhi ni móndyá kí mi pfo, adrészó áyi kí 'o kònzi lavulé dhi. Di, Gìká gò ína áyi togó doro tadhá má dré, má dré tá adrélé tà nda kí 'o tà níma ko ìndì tà ka'ima ko na dhi sè.

¹⁴Di àma kí Míri bhà áyi togó taní kàdrì má rú gò, áma 'òzo gàle tà ka'ika'ì sè bǐ, ìndì lèlè sè bǐ Yésu Krísto na.

¹⁵Kúlí kònì i, kúlí bàti kitswálé ka'ile togó wáyi sè dhi 'i: Yésu Krísto alì bvò kònìdhì lé kitswálé tàkonzibhá kí tiidri dhi bvó. Áyi nda i kòfalé dhi, ma tàkonzi líyí áyi tití dhi kí lavulépi dhi 'i.

¹⁶Di, tà nda sè dhi, Gìká bhà áma kizà, Yésu Krísto kòtadháró áyi togó vwàvwà ma tàkonzi 'olepi lavulé nda rú, móndí tà nda ni nobhá dhi i kòka'iró akódhi gò, lídrì kóná vésè kólyá dhi ni kisúzó.

¹⁷Lindri i mìlanzìlanzi be dhi i kàdré Gìká dré kóná vésè kólyá! Akódhi nda Ópí kàdrì adrélépi kóná vésè kólyá, kitswálépi dràle bwà ko, ìndì kitswálé nòle bwà ko dhi 'i. Akódhi Gìká 'i kalóma. Kàdré kònini!

¹⁸Áma mvá Tímòtéyò, má adré ámi kodzó ngóró atú pròfétà i dré tà longolé ámi tà dri dhi tíni, mí kàdréró tròle tà longolé nda i rú, adrészó àdzú tà ka'ika'ì àdhyá ni bhu doro.

¹⁹Mí kàdré kpà tròle ámi tà ka'ika'ì rú, adrészó ámi togó likí adrélé doro. Móndí àruka i bhe àyikya tà nda i riti gò, i dré àyi kí tà ka'ika'ì tayízó arílé, ngóró bwatù àruka i dré adrélé arílé yiandre na dhi tíni.

²⁰Àyi nda i kòfalé dhi, ìmènayò i Àlìgìzandrè be. Má tayí àyi nda i Sàtánà drígá, i kòniró àyi kí tàkonzi gò, Gìká ni lodhama tayízó be dhi bvó.

1 Tímòtéyò 2

Tà zìma Gìká tí móndyá tití i dré dhi

¹Drìdrì dhi, má adré àma kí adrúpi kí kodzó, i kàdréró tà zi Gìká tí móndyá tití i dré, adrészó tongolé akódhi rú, adrészó kpà àwoyà ta akódhi dré àyi kí tà sè.

²I kàdré kpà tà zi Gìká tí ópí i dré, ìndì móndyá bhàle àyi drile dhi i dré, mà kàdréró tà 'o togó be lìrì ìndì kìdríkìdrì, adrészó tròle Gìká ni tà rú, àma kí tà kàdréró lìndri be móndí i mìlésè.

³Tà nda kòdhì, tà doro kitswálépi Gìká àma kí tiidrilépi dhi mìlésè dhi 'i.

⁴Akódhi adré lèá dhi, móndyá tití dhi i kòkisúró lídrì kóná vésè kólyá dhi, adrészó kpà tà bàti ni.

⁵Tako ko, Gìká ngbà 'í àlo kwákwá. Dhya adrélépi áyi totó tà 'o móndí kí kòfalé 'á Gìká be dhi kókpà àlo kwákwá. Akódhi nda Yésu Krísto atsálépi móndí ro dhi 'i.

⁶Akódhi fè tá áyi tändi ngóró làgí kàdrì fèle móndyá tití dhì kì apázó tàkonzì lésè dhì tíni. 'O tá tà nda lókyá kitswálépi dhì sè, tadházóá dhì, Gíká adré lèá dhì, móndyá tití dhì ì kàdrí.

⁷Tà nda sè dhì, Gíká bhà ma adrélé áyi tà longólépi ró ìndì àpóstolò ro, má kàdréró tà báti adrészó Krísto ni ka'ì dhì ni tadhá móndyá surú twá ro dhì ì dré. Kòdhì má adré tà báti ta kòdhya, má tà kinzò ko.

Àgo kì tà tòkó i`be Èkèlézyà na dhì

⁸Má adré dì lèá dhì, àgo tití àrà tití i'ásè dhì ì kàdré tà zi Gíká tí, adrészó drígá da kurú na akódhi véna togó lolo sè, togóaswa àko, ìndì káyi àko.

⁹Má adré kpà lèá dhì, tòkó ì kàdré kítá asó àyì rú tògyá sè, àyì kì lású kàdréró dóro móndí i mìlésè, ngóró dré kitswálé àyì kì lindrì sè dhì tíni. Ì kàdré àyì kì 'o avélé drìbhí titì sè yà, órò sè yà, màyìkà i sè yà, kó ngalè kítá làgi ró dhì ì sè yà dhì ko.

¹⁰Be ró dhì, ì kàdré àyì kì 'o avélé tà dóro ì dré adrélé 'ole dhì ì sè, ngóró dré kitswálé tòkó adrébhá tàá dhì ì adré trôle Gíká ni tà rú dhì ì sè dhì tíni.

¹¹Lè tòkó ì kàdré tà nda nile togó be lìri ìndì ànzimvá kya tíni.

¹²Má ka'ì tòkó ì kàdré tà tadhá dhì ko, ìndì ì kàdré àgo i drìle dhì ko. Dì ì kàdré tà yi kíri.

¹³Tako ko, Gíká bhà tá Àdámà 'íká, gò dré gózo Évà ni bha ndò.

¹⁴Sàtánà lití tá kpà Àdámà kòdhya ko. Be ró dhì, tòkó tayí ína ì Sàtánà dré litílé dhì ni gò, dré Gíká ni tolí ñòzo.

¹⁵Dì, tágba dré adrészó kònini dhì, tòkó kì adrí ànzì kì tima sè, ì kàdré trôle àyì kì tà ka'ika'i rú, lèle rú, tà lolo rú, ìndì tà 'oma tògyá sè dhì rú dhì.

1 Tìmòtéyò 3

Èkèlézyà ni drì kobhá kì tà

¹Kúlì kònì i, kúlì kitswálé ka'ile dhì 'i: Dhya ángùdhì adrélépi lovó i be adrészó Èkèlézyà ni drì kòlepi ró dhì, adré àzí dóro le 'ole dhì kòdhya.

²Dì adré lèá dhì, Èkèlézyà ni drì kòlepi kàdré móndí adrélépi tà àko i rú dhì 'i. Akódhi kàdré agó tòkó i be àlo kwákwa dhì 'i. Kàdré móndí adrélépi áyì tà kisùle dhì kì likí, adrélépi tà 'o tògyá sè, ìndì kitswálépi lindrì sè dhì 'i. Kàdré móndí adrélépi móndí kì ka'ì dòle i véna togó dóro sè dhì 'i, ìndì móndí tà nilepi tadhálé dóro dhì 'i.

³Kàdré wá tsilepi ró ko, làpfubhá ro ko, ìndì lawàbhá ro ko. Be ró dhì, kàdré ína móndí adrélépi togó i be yàyà dhì 'i. Kàdré kpà làfa lovó bhàlepi ró ko.

⁴Kònì adrélé móndyá áyì tändi ni dzó lé dhì kì drì ko dóro dhì be. Kònì kpà adrélé áyì ànzimvá kì likí dóro, ì kàdréró áyì kúlì yi lindrì sè.

⁵Àngyá ko, dhya àlo kònì móndyá áyì tändi ni dzó lé dhì kì drì kòle dóro ko dhì, a ni kitswá Èkèlézyà Gíká àdhya ni likí ngíni?

⁶Lè akódhì kàdré móndí Yésu nì ka'ilepi tídhì ro dhi 'i ko, kàtsáró drìkàdrì ro gò, akódhì nì tábvó tázò Dzáborò àdhya tñi ko.

⁷Lè akódhì nì tà kàdré dóro móndyá ka'ibhá ko dhi i mìlésè, à kòkitswáró tà kanyò ro dhi nì bha akódhì rú ko, kòla'ró kpà bă Dzáborò dré tapélé dhi sílé ko.

Èkèlézyà nì tà likí **'bhá** kí tà

⁸Kàdré Èkèlézyà nì tà likíbhá kí tà sè dhi, adré kpà lèá dhi, àyi nda i kàdré móndí kitswábhá lìndrì sè dhi 'i. Ì kàdré túrúpfúbhá i ró ko, wá tsibhá i ró ko, ìndì làfa ndabhá túrúpfú sè dhi i ró ko.

⁹Be ró dhi, i kàdré àyikya trôle tà báti lùzu ró i dré ka'ile dhi rú togó lolo sè.

¹⁰Lè à kàdré rè zyà àyi kí tabhì 'iká, di à kòkisú tà àlo àyi rú ko dhi, à kògòrò àyi kí bha adrélé àzí 'o Èkèlézyà nì tà likíbhá i ró ndò.

¹¹Kàdré àyi kí tòkó kí tà sè dhi, adré kpà lèá dhi, àyi nda i kàdré móndí kitswábhá lìndrì sè dhi 'i. Ì kàdré móndí kí rú tabhá kònzi dhi i ró ko. Be ró dhi, i kàdré àyikya móndí adrébhá àyi kí tà kisùle dhi kí likí dhi 'i, ìndì móndí kitswálé ka'ile tà tití i sè dhi 'i.

¹²Lè Èkèlézyà nì tà likílépi kàdré agó tòkó ibe àlo kwákwá dhi 'i. Kònì adrélé áyi ànzimvá kí drì ko dóro, móndyá tití áyi tändi nì dzó lé dhi ibe dhi be.

¹³Èkèlézyà nì tà likíbhá i kàdré àyi kí àzí 'o dóro dhi, i nì lìndrì kisú móndí i mìlésè ìndì Gìká mìlésè. Ì nì kpà adré àyi kí totó tätä àyi kí tà ka'ika'i dri Yésu Krísto na.

Tà lùzu ró mà dré ka'ile dhi

¹⁴Má adré tà kòdhì kí tísì mí dré, gba má dré adrészó mì bha tsàzo mí véna mbèlè dhi.

¹⁵Di, má kòtigí tà dhi, mí nì niá dhi, móndyá Gìká nì súrú ro dhi i kàdré tà 'o àyi kòfalésè ngíni ya dhi be. Súrú nda, Èkèlézyà Gìká lìndrì ro dhi àdhya 'i, ìndì dzópá tà báti dré adrészó áyi totó drìá dhi 'i.

¹⁶Lè móndyá tití dhi i kònì tâle dhi, tà lùzu ró mà dré ka'ile dhi tà kàdrì lavúlé dhi 'i dhi be: Krísto apfò tá móndí ro gò, Tírí Lólo dré akódhì nì tadházó móndí gyägya ró. Dré agázó ángéló i mi gò,

à dré akódhì nì tà longózó súrú tití i 'ásè. Móndí bvò dri dhi i dré akódhì nì ka'izo gò, Gìká dré akódhì nì dòzo mbàle mìlanzìlanzì na.

1 Tímòtéyò 4

Tà tadhálé kinzò sè dhi i

¹Tírí Lólo adré taá ngádra 'á dhi, lókyá kùdù sè dhi, móndí àruka kí àyi kí tà ka'ika'i tayí, adrészó tatsílé tírí adrébhá móndí kí lití dhi i vésè, adrélé trôle tà tírí kònzi i dré adrélé tadhálé dhi i rú.

²Tà adrélé tadhálé lású be kònini dhi i adré apfòle kinzòbhá adrébhá tà 'o túrúpfú sè dhi i vélésè. Àyi nda i tayí àyi kí togó abílé ngóró aya bhale kèlè atsí na dhi tini gò, i dré gozo vélé àyi kí tändi kí tàkonzì ni ko.

³I adré làmò logá móndí i dré, adrészó kpà mánnyangá àruka kí nyàma logá àyi dré. Tákò Giká bhà tá mánnyangá nda móndyá adrébhá áyi ka'i, adrébhá kpà tà báti ni dhi i dré nyàle àwoyà tama sè.

⁴Tako ko, ngá tití Giká dré bhale dhi i dóro. Adré di lèá dhi, à kògà ngá nda kí àlo ko. À kàdré di be ngá tití dhi kí ka'i nyàle àwoyà sè.

⁵Àngyá ko, à adré ngá nda kí bha lolo Giká kandrá akódhi ni kúlí sè, ìndì tà zìma akódhi tí dhi sè.

Yésu Krísto ni àzí 'olepi dóro dhi

⁶Mí kòtadhá tà nda kòdhi i àma kí adrúpi i dré dhi, mí ni adré Yésu Krísto ni àzí 'olepi dóro dhi ró. Mí ni kpà tadhá dhi, mí li'wá tà báti mí dré ka'ile dhi na, ìndì tà dóro tadhálé mí dré lebèle dhi na dre.

⁷Mí kàdré tití tako adrébhá lindrì fe Giká dré ko dhi kí ga rè. Mí kàdré mína ámi fe atsálé rìnyi ró adrema trôle Giká ni tà rú dhi sè.

⁸Dhyá kí rúbhá fèma atsálé rìnyi ró dhi dóro tsà. Di, adrema trôle Giká ni tà rú dhi ína dóro lavulé tà tití dhi i sè. Tako ko, dhya adrélépi trôle Giká ni tà rú dhi kisú ína tà Giká dré lazilé lídrì ándró kònìdhi ni tà sè dhi i dre. A ni kókpà tà lazilé lídrì adrélépi alile dhi ni tà sè dhi kí kisú.

⁹Kúlí kòdhi i, kúlí báti kitswálé ka'ile togó wáyi sè dhi i.

¹⁰Di ásà dhi, mà adré àzí kòkòròko 'o adrészó landèle, mà dré adrélé mì bha Giká lídrì ro dhi véna dhi sè. Akódhi nda dhya adrélépi móndyá tití dhi kí tìdrí dhi i, lavulé dhi, dhya adrélépi móndyá adrébhá áyi ka'i dhi kí tìdrí dhi i.

¹¹Lè mí kàdré tà nda kòdhi kí tadhá móndí i dré, adrészó àyi kí kodzó adrélé tà nda kí 'o.

¹²Mí kòtayí mi dhya àlo dré nòle móndí tako ró ámi kàdhúrà ni tà sè dhi ko. Di, mí kàdré mína tà dóro 'o, móndyá ka'ibhá dhi i kàdréró tà no mí rú, adrészó 'òá mína tini kúlí tama na, atsima na, lèle na, tà ka'ika'i na, ìndì tà lolo 'òma na.

¹³Mí kàdré ámi fe adrélé Giká ni Kúlí na àyi kandrá, adrészó àyi kí kodzó, adrészó kpà àyi kí tadhá, tsàle lókyá má dré dra tsàzo dhi i.

¹⁴Mí kòbhe tà taní Tíri Lolo dré fèle mí dré pròfétà kí kúlí sè, bhàgo Èkèlézyà àdhya i dré drígá bhárà'a mí dri dhi i dhi ko.

¹⁵Mí kàdré ámi fe adrélé tà nda kòdhi kí 'o togó wáyi sè, móndyá tití dhi i kàdréró nòá dhi, mí adré lile drìdrì ámi tà ka'ika'i na dhi.

¹⁶Mí kàdré sùle ámi tändi rú, ìndì tà mí dré adrélé tadhálé dhi i rú landè àko ró. Tàko ko, mí kàdré 'òá kònìnì dhi, mí ni ámi tändi ni tidrí, adrészó kpà móndyá adrébhá ámi yi dhi ki tidrí.

1 TÌMÒTÉYÒ 5

TÌMÒTÉYÒ NI DRÌ TÀMA MÓNDYÁ KA'IBHÁ DHÌ KÌ TÀ SÈ DHÌ

¹Mí kòtà tà màiiga i dri kúlì aswaaswa sè ko. Be ró dhi, mí kàdré mína àyi ki kodzó ngóró ámi atá i tíni. Mí kàdré kàdhúrà ki 'o ngóró ámi adrúpi i tíni.

²Mí kàdré kpà tòkó màiiga ki 'o ngóró ámi andre i tíni, adrészó kyánzi ki 'o togó be lólo ngóró ámi amvúpi i tíni.

TÀYÍTÒKÓ KÌ TÀ

³Lè mí kàdré tàyítòkó adrébhá móndí àko dhi ki líndri bha, adrészó àyi ki likí.

⁴Dì, tàyítòkó àlo dhi kàdré ína ànzì íbe yà, kó ngalè toyó íbe yà dhi, lè àyi nda i kònì rè zyà adrélé tà 'o àyi ki tà ka'ika'i sè, adrészó àyi ki tändi ki surú ki likí, adrészó tà logó àyi ki tibhá i dré àyi ki tábhí íbe, ngóró àyi nda i dré tá 'ole àyi dré dhi tíni. Tàko ko, tà nda tà doro kítswálépi Gíká mìlésè dhi 'i.

⁵Tàyítòkó adrélépi kalóma báti dhi adré áyi mi bha Gíká véna, adrészó tà zi akódhi tí, adrészó tongólé rúá kitú be ìndì ngátsi be landè àko ró.

⁶Dì, tàyítòkó adrélépi tatsílé áyi tändi ni lovó 'obe dhi drà ína dre, tágba dré adrészó líndri íbe dhi.

⁷Mí kòlazí tà nda kòdhi i móndyá ka'ibhá i dri, à kòkítswáró tà kònzi ta àmì ki àlo rú ko.

⁸Dhya àlo kàdré sùle áyi surú i rú ko, lavúlé dhi, móndyá áyi tändi ni dzó lé dhi i rú ko dhi, akódhi nda gá áyi tà ka'ika'i dre. Akódhi kònzi móndyá ka'ibhá ko dhi ki lavú.

⁹Kítswázó tàyítòkó àlo dhi ni rú bha tàyítòkó àruka adrélé ledélé dhi kya i kòfalé dhi bvó dhi, lè akódhi nda ni kóná kòlavú nyadhi-na, ìndì kàdré tòkó adrélépi tá agó àlo kwákwá dhi àdhyá 'i.

¹⁰Adré kpà lèá dhi, tà akódhi dré 'ole dhi i kàdré doro móndí i mìlésè. Kòdhi adré tàá dhi, akódhi tòkó adrélépi tá áyi ànzimvá ki likí doro, adrélépi móndí ki ka'i dòle i véna togó doro sè, adrélépi tà 'o móndyá ka'ibhá i dré àyi ki màrabà tíni, adrélépi móndí kizà ro dhi ki ledé, adrélépi kpà áyi fe tà doro ki kárá tití dhi ki 'o dhi 'i.

¹¹Dì, kàdré ína tàyítòkó kyánzi ró dhi ki tà sè dhi, mí kòbhà àyi nda ki rú tàyítòkó àruka kya i kòfalé ko. Tàko ko, àyi ki lovó rúbhá àdhyá kòlavú àyi ki lovó adrészó trôle Krísto rú dhi dre dhi, i ni lèá gòle làmó na.

¹²Dì i ni àyi ki tändi ki 'o tábvo tâle, i dré mònindrà i dré tá sile drìdrì dhi ni ñole dhi sè.

¹³Kòdhì íbe dhi, ì ní ru su adrélé tòbvo ró, adrélé tatsílé móndí kí dzó i 'ásè. Ngbà 'í kòdhì ko, ì ní kpà atsá tòkó adrébhá tà tåko kí ta, adrészó tififlé móndí kí tà i 'ásè, adrészó kúlí kitswábhá tåle ko dhi kí ta dhi i ró.

¹⁴Dì ásà dhi, má adré tåyítòkó kyánzi ró dhi kí drì ta, ì kògòrò mòle, adrélé ànzì ti, adrészó àyi kí dzó kí tà likí, ì kòféró láti àyi kí kàribhá dré àyi kí rú tåzo kònzi dhi ko.

¹⁵Tåko ko, àyi kí àruka ì ku láti dôro 'ásè gò, ì dré dhèzo Sàtánà bvó.

¹⁶Dì tòkó àlo Yésu ní ka'ilepi dhi kàdré tåyítòkó íbe áyi surú lé dhi, kàdré àyi kí ledé. Kòtayí àyi kí tà lanzaile Èkélézyà dri ko, Èkélézyà kòkitswáró tåyítòkó adrébhá kalóma bâti dhi kí ledé kòdhya be dhi bvó.

Bhàgo kí tà

¹⁷Kàdré bhàgo adrébhá Èkélézyà ní drì ko dôro dhi kí tà sè dhi, à kàdré àyi nda kí lindrì bha vésè be ri. Lavûlé dhi, à kàdré 'òá kònini àyi adrébhá àyi kí fe adrélé Giká ní kúlí longó, adrészó kpà akódhì ní tà tadhá dhi i dré.

¹⁸Tåko ko, Giká ní Kúlí adré tåá dhi: «Tí dré adrérà'a lò'wa ató zile dhi 'á dhi, à kòdrò ti ní ngá nyàle dhi ní logázó drá ko, » ìndì «Lè dhya àzí 'olepi dhi konya áyi landè. »

¹⁹Mí kòyi tà adrélé tåle bhàgo àlo rú dhi ko, móndí rì yà kó ngalè na yà tà nda ní nobhá mì sè dhi ì kàdré tåá àyi ko dhi.

²⁰Dhya àlo kàdré tåkonzi 'o dhi, mí kòtadhá tåkonzi nda drá móndyá ka'ibhá tití dhi i kandrá, móndyá àruka tití dhi ì kàdréró ngá ro tåkonzi 'oma sè.

²¹Má adré ámi kodzó Giká i kandrá, Yésu Krísto be, ìndì ángéló Giká dré kipèle dhi íbe: Mí kàdré tà nda kòdhì kí 'o, adrészó móndí kí no twátwa ko. Mí kàdré kpà móndí kipèkipè ko.

²²Mí kòbhà drígá móndí dri, akódhì ní bhàzo twá Míri ní àzí 'o dhi mbèlè ko. Mí kòfí kpà móndí kí tåkonzi na ko. Dì, mí kàdré mína ámi tåndí ní likí adrélé lolo.

²³Ámi 'a ní tà sè, ìndì ámi rúbhá dré adrélé drà ro rä dhi sè dhi, mí kàdré ngbà 'í yí mvu kòdhya ko. Mí kàdré kpà vínò mvu tsà be.

²⁴À kitswá móndí àruka kí tåkonzi no ngádra 'á, àkò à tà rë àyi kí tåkonzi nda kí tåbyó ko dhi 'á. Dì, à ní kó móndí àruka kí tåkonzi no àmvolásà.

²⁵Kókpà kòdhì tñi, à kitswá tà dôro móndí ì dré adrélé 'ole dhi kí no ngádra 'á. Ndìndì tà dôro adrélé nôle ngádra 'á ko dhi ì kitswá àyi kí zu bwà ko.

1 Tìmòtéyò 6

Màrábà kí tà

¹Kàdré móndyá ka'ibhá adrébhá màrábà ro dhi kí tà sè dhi, ì kàdré àyi kí míri kí no ngóró móndí kitswábhá lindrì wáyi sè dhi i ró, à kòkitswáró tà ta kònzi Giká rú ko, ìndì tà mà dré adrélé tadhálé dhi i rú ko.

²Àyi kí míri à kàdré móndí ka'ibhá dhi 'i dhi, à kòtayí àyi nda kí lindrì bhàma, à dré adrélé àyi kí adrúpi 'i Krísto na dhi sè ko. Be ró dhi, à kàdré àyikya àzí 'o àyi dré dóró lavúlé. Tako ko, míri à dré adrészó àzí 'o àyi dré nda i, móndyá ka'ibhá à dré adrélé lèle tò dhi 'i. Mí kàdré tà nda kòdhi kí tadhá móndí à dré kòdhya, adrészó àyi kí kodzó adrélé tà nda kí 'o.

Gíká ní tà tadhama kinzò sè dhi, i`ndi` làfa lovó bhàma

³Dhya àlo kàdré Gíká ní tà tadhá kinzò sè, adrészó trôle àma kí Míri Yésu Krísto ní kúlì báti dhi i rú ko, adrészó kpà trôle tà tadhálé lindrì fèzo Gíká dré dhi i rú ko dhi,

⁴dhya nda móndí drìkàdrì ro, tà nilepi àlomvá ko dhi 'i. Akódhi lovó kònzi íbe adrészó tà kayí móndí íbe kúlì kí tà dri. Tà nda kòdhi adré móndí kí 'o adrélé lovó kònzi bha àyi kófalsè, adrészó lawàle, adrészó ru lodhá, adrészó ru no mì kònzi sè,

⁵adrészó kpà tà kayí àyi kófalsè landè àko ró. Móndyá lású be kònini nda kí tà kisùkisù abíabí gò, à dré tà báti tayízó. Ì adré kisùá dhi, adrema trôle Gíká ní tà rú dhi láti adrészó ngá kisú ásà dhi 'i.

⁶Tà báti ró dhi, mà kàdré trôle Gíká ní tà rú, adrészó lenzélé ngá mà dré adrészó ába dhi kí sè dhi, mà kisú àmakya ngá làgí be kàdrì dhi dre.

⁷Tako ko, mà atsá bvò kònìdhi 'á drígálé sè. Mà ni kpà go pfòle 'ásà drígálé sè.

⁸Dì mà kàdré ngá nyàle dhi íbe, adrészó kpà kítá asólé àma rú dhi íbe dhi, mà ni lenzé ásà.

⁹Dì, móndyá adrébhá láti nda atsázó ngábhá i ró dhi à adré àyikya dhèle tà adrélépi móndí kí tabhì dhi na. Ì adré kpà àyi kí 'o la'ile àyi ki lovó kònzi azaaza ró dhi i síle gò, lovó nda à dré adrészó àyi kí dri lile àyi kí abiabi kisú dràdrà be.

¹⁰Tako ko, làfa lovó ína tà kònzi kí kárá tití dhi kí kómvo 'i. Móndí àruka adrébhá làfa lovó bha dhi à tayí àyi lile vwàvwà ro àyi kí tà ka'ika'i rúsè gò, à dré adrészó kizà nya lavúlé.

Tímòtéyò ní drì tama

¹¹Dì, mì móndí Gíká àdhya ró ní, mí kàdré mína lapálé tà nda kòdhi i sílesè tití. Mí kàdré láti nda adrészó tà gyágya 'o, adrészó trôle Gíká ní tà rú, adrészó Gíká ní ka'i togó wáyi sè, adrészó ámi lèle tadhá, adrészó ámi togó tsí, adrészó kpà ámi togó yàyà tadhá.

¹²Mí kàdré àdzú tà ka'ika'i àdhya ní bhu dóró. Mí kòru lídrì kóná vésè kólyá Gíká dré ámi azizó kisúá dhi ngbí, ngóró mí dré tà mí dré ka'ile dhi ní longolé móndí bì dhi i kandrá dóró dhi tíni.

¹³Má adré ámi kodzó Gíká adrélépi lídrì fe ngá tití à dré dhi mìlésè, ìndì Yésu Krísto tà à dré ka'ile dhi ní longolépi Pòtýò Pilátò kandrá dóró dhi mìlésè, tazoá dhi:

¹⁴Mí kàdré tòlì fèle mí dré kòdhi kí 'o togó lolo sè ìndì tà àko mí rú, tsale kítú àma kí Míri Yésu Krísto dré dra agòzo dhi tú.

¹⁵Gíká ní Yésu Krísto nda ní 'o agòle lókyá í dré bhàle dhí sè dhí ní. Akódhí nda Gíká rúku ró dhí 'í, Ópí kàdrì àlo kwákawá dhí 'í, ópí tití dhí kí Ópí 'í, ìndì mírì tití dhí kí Mírì 'í.

¹⁶Akódhí dhya àlo kwákawá kitswálépi dràle ko, ìndì adrélépi adrélé ngádra kitswázó tsàle ànyi làgá bwà ko dhí na dhí 'í. Akódhí dhya móndí àlo dré nôle rè ko, ìndì kitswálé nôle bwà ko dhí 'í. Lindri i rinyí be dhí i kàdré akódhí dré kóná vésè kólyá! Kàdré kònìnì.

Ngábhá kí tà

¹⁷Kàdré móndyá ka'ibhá ngábhá ro bvò kònídhi lé dhí kí tà sè dhí, mí kàdré àyi nda kí kodzó, i kàdréró drìkàdrì ro ko. I kàdré kpà àyi kí mì bha ngá adrébhá gile ko dhí i dri ko. Be ró dhí, i kàdré àyi kí mì bha Gíká adrélépi ngá tití kí afè àma dré adrészó lenzélé ásà dhí véna.

¹⁸Mí kàdré tàá àyi dré dhí, i kàdré tà doro 'o, adrészó ngábhá i ró tà doro nda kí 'òma sè. I kàdré kpà gànzi ró adrélé àyi kí ngá lanzí móndí i dré togó doro sè.

¹⁹I kàdré 'òá kònìnì dhí, i ni ngá làgí be kàdrì kitswábhá akílé bwà ko dhí kí lokó àyi dré lókyá adrélépi alile dhí sè, i kòkisúró lídrì báti dhí be dhí bvó.

Pólò ní kúlí kùdù

²⁰Tímòtéyò, mí kàdré tà Gíká dré bhàle mí drígá dhí kí likí doro. Mí kògà kúlí tåko adrébhá lindrì fe Gíká dré ko dhí i, túmäní tà kinzò ro adrébhá ligílé tà báti rú dhí ibe. Àadré tà nda kí zi «tà nínì», di, tà nda i àyikya kinzò tà 'í.

²¹Móndí àruka tàbhá dhí i kísú tà nínì nda dre dhí, i tayí àyi vwàle àyi kí tà ka'ika'i rúsè vwàvwà. Gíká ní togó taní kàdré àmi ibe!

2 Tìmòtéyò

2 Tìmòtéyò 1

Pólò ni mòdo fèma

¹Ma, Pólò, Yésu Krísto ni àpóstolò, má adré wárágà kònìdhì ni tisì ma. Gìká bhà ma adrélè àpóstolò ro ngóró í dré lèle dhi tíni, má kàdréró lídrì dré lazilé Yésu Krísto na dhi ni tà longó móndí i dré be dhi bvó.

²Má adré tisiá mi, Tìmòtéyò, áma mvá má dré lèle tò dhi dré. Gìká àma ki Atá i àma ki Míri Yésu Krísto be dhi i kòbhà àyi ki togó taní mí rú, i kòbhà ámi kizà, ìndì i kòfè tà kìdríkìdrì mí dré!

Pólò kodzó Tìmòtéyò àzí bhàle akódhi drí' gá dhi ni 'o togó wáyi sè

³Má adré àwoyà ta Gìká dré ámi tà sè. Gìká nda Gìká má dré adrészò tò ní ni 'o togó lolo sè ngóró áma tábhí i dré tò 'ole dhi tíni dhi 'i. Má dré adrérà'a tò zi akódhi tí dhi 'á dhi, má adré ámi tà kisù kítú be ìndì ngátsi be landè àko ró.

⁴Má kàdré ámi mìndra ni tà kisù dhi, ma lovó íbe tò ámi nòzo, áma togó kògaró arí sè bĩ be dhi bvó.

⁵Má ní tali dhi, mí adré Gìká ni ka'i togó wáyi sè dhi be, ngóró ámi dèdè Lòwísì dré tò ka'ile drìdrì dhi tíni, ìndì ámi andre Yùníkè dré kpà ka'ile dhi tíni. Má adré ka'ia dhi, mí kpà mína tò ka'ika'i lású be àyikya tíni dhi íbe mí léna.

⁶Tà nda sè dhi, má adré ámi kodzó, mí kògoró tò Gìká dré bhàle mí léna áyi togó taní sè, má dré drígá bhärà'a mí dri dhi 'á dhi ni 'o atsálé àtsi ró.

⁷Tako ko, Tírí Gìká dré bhàle àma léna dhi adrélè tìri ró ko. Be ró dhi, Tírí nda adré ína àma ki togó 'o gàle rìnyí sè bĩ ìndì lèle sè bĩ. Adré kpà àma ki 'o adrélè tò 'o tògyá sè.

⁸Adré dì lèá dhi, mí kàdré kanyò ro àma ki Míri ni tà longoma sè ko. Mí kàdré kpà kanyò ro ma, akódhi ni móndí 'ile bădzó lé dhi ni tà sè ko. Be ró dhi, mí kàdré mína kizà ka'i nyàle túmäní má be Rúbí Taní ni tà sè, rìnyí Gìká dré adrélè fèle dhi sè.

⁹Gìká nda tìdrí àma, àma ki azízó adrélè móndyá lolo ína i ró dhi nì. 'O tò tò nda kònìni tà doro mà dré 'ole dhi i sè ko. Be ró dhi, 'o tò kònìni ngóró í dré kisùle 'ole kínó lésè áyi togó taní sè dhi tíni. Bvò ni bhàma kandrá dhi, kisù tò áyi togó taní tadhálé àma dré Yésu Krísto na.

¹⁰Dì nyànomvá dhi, tadhá áyi togó taní nda àma dré Yésu Krísto àma ki tìdrílépi dhi ni atsama sè dre. Akódhi nda 'o dràdrà ni rìnyí akílé gò, láti adrészò lídrì kóná vésè kólyá dhi ni kisù ásà dhi ni tadházó ngádra 'á Rúbí Taní sè.

¹¹Rúbí Taní nda ni tà sè dhi, Gìká bhà ma adrélè áyi tà longólépi ró, àpóstolò ro, ìndì áyi tà tadhálépi ró.

¹²Tà nda sè dhi, má adré kizà nya kòdhi tíni. Di, ma mána kanyò àko, má dré nile má ka'ì àdhi 'i ya dhi be dhi sè. Má adré kpà ka'ìá dhi, akódhì nda rinyí íbe kitswázó tà í dré bhàle má drígá dhi ni likí tsàle kítú tàbvó tazo dhi tú.

¹³Mí kàdré tà má dré tadhálé gyágya mí dré yile dhi kí lebè kòdhya, adrészò trôle ámi tà ka'ìka'ì rú, ìndì lèle Yésu Krísto na dhi rú.

¹⁴Mí kàdré tà dóro bhàle mí drígá dhi ni likí, Tírí Lolo adrélépi adrélé mí léna dhi ni rinyí sè.

¹⁵Ngóró mí dré nile be dhi tíni dhi, móndyá ka'ìbhá tití angábhá bvò Àsíyà àdhya lésè dhi ì tayí ma adrélé kalóma. Àyí nda i kòfalé dhi, Figélò i Èrèmògénè be.

¹⁶Di, Míri kòtadhá áyi togó dóro móndyá tití Ònèsifórò ni dzó na dhi i dré, dré áma togó tindrile rä dhi sè, ìndì dré tá adrélé kanyò ro áma nyìrì kí tà sè ko dhi sè.

¹⁷Lókyá akódhì nda dré atsázó Rómà 'a dhi sè dhi, ndà tá ma lovó sè gò áma kisúzó.

¹⁸Di Míri kòtadhá áyi togó dóro akódhì dré kítú tàbvó tazo dhi tú. Mí ni akódhì ndà tá láti áma ledézó má dré tá adrérà'a Èfésò na dhi 'á ngíni ya dhi be.

2 Tímotéyò 2

Sòdá dóro Yésu Krísto àdhya

¹Di áma mvá, mí kàdré rinyi ró Gíká ni togó taní bhàle mí rú Yésu Krísto na dhi sè.

²Tà mí dré yile má tí móndí bì dhi i kandrá dhi i, mí kàdré tà nda kí tadhá tayílé móndí mí dré kitswálé ka'ile dhi i dré, àyí nda i kòkitswáró kpà tà nda kí tadhá móndí àruka i dré be dhi bvó.

³Mí kàdré kizà ka'ì nyàle túmání má be, ngóró sòdá dóro Yésu Krísto àdhya tíni.

⁴Dhya adrélépi sòdá àzí 'o dhi adré ína mì bhe tà bvò kòndí àdhya i dri ko, i kòkitswáró áyi kàdrì áyi bhàlepi àzí nda mi dhi ni togó 'o kinílé be dhi bvó.

⁵Kòdhì íbe dhi, dhya adrélépi angú ra dhi kitswá ína làgí kisú ko, kàdré angú nda ni ra ngóró angú ni tòlì dré adrélé tâle dhi tíni ko dhi.

⁶Adré kpà lèá dhi, dhya áyi fèlepi amvú 'a dhi kòkisú rè zyà lànyá lokólé drìdrì dhi ni.

⁷Lè mí kàdré tà má dré adrélé tâle kòdhì kí kisù dóro gò, Míri kòfèró mí dré tògyá tà nda kí àndu nízo tití.

⁸Mí kàdré Yésu Krísto angálépi Dàwídì ni súrú lésè, ngàlepi kpà dràdrà 'ásè dhi ni tà kisù kòdhya, ngóró Rúbí Taní má dré adrélé longolé dhi dré adrélé tâle dhi tíni.

⁹Rúbí Taní nda ni tà sè dhi, má adré kizà nya, tsàle byá áma ńrà'a nyìrì sè drìkònzi líyí tíni dhi 'á. Di, à kitswá Gíká ni kúlí 'i nyìrì sè bwà ko.

¹⁰Ásà dhi, má adré tà tití dhi kí mvo móndyá Gíká dré zìle dhi kí tà sè, i kòkisúró kpà lídrì kóná vésè kólyá dhi mìlanzìlanzì be Yésu Krísto na be dhi bvó.

¹¹Kúlí kònì i, kúlí kitswálé ka'ile dhi 'i: Mà kòdrà túmání Yésu be dhi, mà ni kókpà adré lídrì íbe túmání akódhi be.

¹²Mà kàdré togó tsì kizà na dhi, mà ni kókpà òpì nya túmání akódhi be. Mà kògà akódhi dhi, akódhi ni kókpà àma kì ga.

¹³Mà kàdré móndí kitswábhá adrélé ka'ile dhi 'i ko dhi, akódhi ngbú dhya kitswálépi adrélé ka'ile togó wäyi sè dhi 'i, tåko ko, akódhi kitswá ína áyi tändi ni ga ko.

Gìká ni àzí 'olepi dré kitswálé ka'ile dhi

¹⁴Lè mí kàdré tà nda kòdhì kì 'o agálé móndyá ka'ibhá dhi i léna. Mí kàdré kpà àyi kì kodzó Gìká kandrá, i kàdréró tà kayí àyi kòfalésè kúlí kì tà dri ko. Tà kayikayi lású be kònìnì dhi kitswá tà dóro 'o àlomvá ko. Be ró dhi, adré ína móndyá adrébhá tà nda kì yi dhi kì dri kizá.

¹⁵Mí kàdré tà tití dhi kì 'o kitswázó ámi fe Gìká dré ngóró móndí dré kitswálé ka'ile dhi ró. Mí kàdré kpà akódhi ni àzí 'o kanyò àko, adrészó akódhi ni kúlí tà báti àdhyá ni tadhá gyägya.

¹⁶Mí kàdré kúlí tåko adrébhá lindrì fe Gìká dré ko dhi kì ga. Tåko ko, móndyá adrébhá kúlí ta kònìnì dhi i adré àyikya vwàle Gìká ni tà rúsè vwàvvà.

¹⁷Àyi kì tà tadhálé dhi i adré móndí ki 'o kònzi, ngóró làzí dré adrélé atsílé rúbhá nya dhi tini. Àyi nda i kòfalé dhi, ìmènayò i Filétò be.

¹⁸Àyi nda i ku láti tà báti àdhyá 'ásè dre. I adré tàá dhi, ngangà dràdrà 'ásè dhi ni tà lavú dre. I adré dì móndí àruka kì tà ka'ika'i kizá ásà.

¹⁹Tágba kònìnì dhi, dzópá Gìká dré bhàle dhi adré ína áyi totó tätä. À tisì kúlí kònì i dzópá nda rú kòdhya: «Míri ni móndyá adrébhá ína ró dhi i be, » ìndì «Lè móndyá tití adrébhá tàá dhi, àyi móndí Míri àdhyá 'i dhi, i kòtayí tà kònzi 'oma. »

²⁰Dzó kàdrì dhi léna dhi, ngá ledélé órò sè ìndì àrezá sè dhi i be, túmání ngá ledélé fa sè ìndì kìnì sè dhi íbe. Ngá ledélé órò sè ìndì àrezá sè nda i ngá adrészó tà 'o ásà lindrì sè dhi 'i. Ngá àruka nda i kó ngá adrészó tà 'o ásà lindrì àko dhi 'i.

²¹Dhya ángùdhi áyi temvélépi tàkonzi tití i lésè dhi ni adré ngá adrészó tà 'o ásà lindrì sè dhi 'i. Akódhi nda fè i adrélé lólo Míri dré kitswázó tà dóro 'o í sè. Akódhi gànzi ró tà dóro tití dhi kì 'o.

²²Lè mí kàdré lapálé lovó kònzi kàdhúrà kya i sílésè. Mí kàdré láti nda adrészó tà gyägya 'o, adrészó Gìká ni ka'i togó wäyi sè, adrészó ámi lèle tadhá, adrészó tà kídríkídrì bha móndí i kòfalé. Mí kàdré tà nda kì 'o túmání móndyá tití adrébhá liyílé Míri rú togó lólo sè dhi íbe.

²³Mí kàdré káyi azaaza ró ìndì togyá àko dhi kì ga. Tåko ko, mí ni tåle dhi, tà nda i adré móndí kì 'o lawàle àyi kòfalésè dhi be.

²⁴Adré lèá dhi, mårábà Míri àdhyá kàdré lawàle móndí íbe ko. Be ró dhi, kàdré ína áyi togó dóro tadhá móndyá tití i véna. Kònì adrélé tà tadhá dóro dhi be. Kàdré kpà tà mvo togó vwàvvà sè.

²⁵Kàdré móndyá adrébhá liglé í rú dhi kí lotó togó yàyà sè. Àdhì nì nì, Gìká ni láti fe àyi dré àyi kí togó ladzázó gò, tà bàti nìzo dhi.

²⁶Ì kò'o kònini dhi, ì nì go tà ni kisùle dóro gò, ì dré lapázó bă Dzáborò dré tapélé àyi dré dhi sílésè. Àngyá ko, akódhi nda ru tá àyi, àyi kí 'òzo tà í dré lèle ì kò'o dhi kí 'o.

2 Tìmòtéyò 3

Tà lókyá kùdù àdhyá i

¹Lè mí kònì tà kònìdhi dóro: Lókyá kùdù sè dhi, tà kòkóròko lavulé dhi kí dra atsá.

²Tako ko, móndí kí adré àyi kí tändi kí le kòdhyá. Ì nì adré làfa lovó bha, adrészó àyi kí afà, adrélé drìkàdrì ro. Ì nì adré Gìká ni lodhá, adrészó liglé àyi kí tibhá i rú, adrészó àwoyà ni tâle ko, adrészó tà lólo ató àyi pálé.

³Ì nì adré lèle àko, adrészó móndí ki tàkonzi tri ko, adrészó móndí kí rú ta kònzi. Ì kitswá àyi kí tändi kí lovó mvo ko, adrészó tà 'o kà'wá àtrá kya tíni, adrészó tà dóro ga.

⁴Ì nì adré móndí kí lefè kàribhá i drígá, adrészó tà 'o swà ro, adrészó àyi kí tà bha kuru, adrészó àyi kí tändi kí lovó le Gìká ni lavú.

⁵Ì nì su ngóró móndí adrébhá trôle Gìká ni tà rú dhi i tíni. Di, ì nì àyikya Gìká ni rinyí gágà. Mí kàdré di ru su móndyá lású be kònini dhi íbe ko.

⁶Àyi nda kí àruka ì adré tifilé dzó i 'ásè túrúpfú sè, adrélé tòkó kitswálé litílé mbèlè dhi kí lití. Tako ko, tòkó nda ì ga àyikya tàkonzi sè bǐ gò, ì dré adrészó tatsilé lovó kònzi twátwa dhi kí 'obe.

⁷Ì adré ngbú tà nda nile, di, ì kitswá àyikya tà bàti ni ka'ile bwà ko.

⁸Móndyá nda ì adré liglé tà bàti rú, ngóró Yánè i Yàmbérè be dhi ì dré tá liglé Mósè rú dhi tíni. Àyi kí tà kisükisù abíabí gò, àyi kí tà ka'ika'i dré atsázó tà tako ro.

⁹Di, ì kitswá àyikya góle lile drìdrì ko. Tako ko, à nì àyi kí azaaza no ngádra 'á, ngóró Yánè kya Yàmbérè be dhi tíni.

Tìmòtéyò ni drì tâma

¹⁰Di, mí ró dhi, mí lebè mína ma, tà má dré tadhálé dhi kí nìzo dóro dre. Mí nì kpà áma atsimá, tà má dré lèle 'ole dhi, áma tà ka'ika'i, áma togó vwàvwà, áma lèle, áma togó tsìma,

¹¹áma mí pfòma, ìndì kizà tití má dré nyàle dhi i be. Mí nì kpà tà atsábhá má rú gò áma mí pfòzo Àtiyòkíyà na, Ìkònìyò na, ìndì Lìsítrà na dhi i be. Di, Míri apá ína ma tà tití nda i lésè. ¹²Tà bàti ró dhi, à nì móndyá tití adrébhá lèá trôle Gìká ni tà rú Yésu Krísto na dhi kí mí pfo.

¹³Di, móndyá kònzi adrébhá móndí kí lití dhi kí adré vélé tàkonzi 'o lìzo ába drìdrì. Ì nì adré móndí kí lití, adrészó kpà àyi kí tayí adrélé litílé.

¹⁴Di, mí ró dhi, mí kàdré mína trôle tà mí dré yile gò ka'izoá bàti dhi i rú. Tako ko, mí nì, mí yi tá tà nda i àdhíbhá i tí ya dhi be.

¹⁵Kòdhì íbe dhi, kídhólé ámi anzì lésè dhi, mí nì Gíká nì Kúlí lólo dhi dóro. Kúlí nda nì kitswá tògyá fe mí dré adrízó ásà, mí dré Yésu Krísto nì ka'ile dhi sè.

¹⁶Tàko ko, tà tití tisile Gíká nì Kúlí na dhi ì apfò akódhì nì tändi sílésè. Tà tisile nda i dóro adrészó móndí ki tadhá, adrészó àyi ki tákonzì tadhá àyi dré, adrészó àyi ki lotó, adrészó àyi ki kodzó adrélé atsílé tà gyägya na,

¹⁷móndyá Gíká àdhya ì kòkitswáró tití, adrélé kpà gànzi ró tà dóro tití dhi ki 'o.

2 Tímötéyò 4

¹Má adré ámi kodzó Gíká mìlésè ìndì Yésu Krísto mìlésè. Yésu nda dhya dra móndyá tití lídrì ro ìndì dràbhá dre dhi ki tàbvó tålepi, í dré dra agörà àyi Òpì na dhi 'á dhi 'i.

²Mí kàdré Gíká nì kúlí longó móndí i dré, kàdré gba lókyá dóro sè yà, kó ngalè lókyá kònzi sè yà dhi. Mí kàdré móndí ki tákonzì tadhá àyi dré, adrészó àyi ki lotó, adrészó àyi ki kodzó togó vwàvvà sè ìndì tà tadhálé gyägya dhi i sè.

³Tàko ko, lókyá adrélépi alìle dhi sè dhi, móndí ki Gíká nì tà tadhálé gyägya dhi ki ga. Ì nì tà tadhábhá bì dhi ki kimó àyi làgásè, adrélé tà i dré adrélé lèle yile dhi ki tadhá, ì kòkitswáró àyi ki tändi ki lovó 'o be dhi bvó.

⁴Ì kitswá àyi ki bíbhálé ga tà bàti véna ko. Be ró dhi, i ni àyikya àyi ki bíbhálé ga tití tàko i véna.

⁵Dì, mí ró dhi, mí kàdré mína ámi tà kisùle dhi ki likí tà tití i sè. Mí kàdré kizà ka'i nyale, adrészó Rúbí Taní longó, adrészó àzí Gíká dré bhàle mí drígá dhi nì 'o kitswálé tití.

⁶Tàko ko, ma ró dhi, má fè áma lídrì wäyi Gíká dré mòbòmà ro dre. Lókyá má dré dra lìzo dhi atsá kpà ànyi dre.

⁷Má bhu mána àdzú dóro, angú ràzo tsale kùdù nì na dre. Má su áma tà ka'ika'i rú.

⁸Dì nyànomvá dhi, à zù kùlá tà gyägya àdhya adrélé áma letè. Dì Mírì dra móndí ki tàbvó tålepi gyägya dhi nì kùlá nda nì afè má dré, kitú tàbvó tåzo dhi tú dhi nì. A kitswá fèá ngbà 'í má dré kalóma ko. A nì kókpà fèá móndyá tití adrébhá àyi agòma letè lovó sè dhi i dré.

Pólò nì kúlí kùdù

⁹Mí kò'o tà tití dhi i alìzo má vélé mbèlè.

¹⁰Tàko ko, Démà lè tá ína tà bvò kòndi àdhya i tò gò, áma tayízó adrélé kalóma, lìzo Tèsàloníkè na. Kùrèsekè lì ína Gàlàtíyà na, ìndì Títò lì ína Dàlàmàtíyà na.

¹¹Tayí ngbà 'í Lükà kònwa má làga kòdhya. Dì mí kàdrì Márokò alìzo akódhì be. Tàko ko, akódhì nda nì kitswá drígá bha má vélé àzí sè.

¹²Má mù Tikíkò Èfésò na.

¹³Mí dré adrérà'a 'ole alìle dhi 'á dhi, mí kàdó kótì má dré tayílé Kàrúpò véna Trówà na dhi alìzo ába be. Mí kàlì kpà áma búkù íbe, lavúlé dhi, búkù kíní sè dhi i.

¹⁴Àlìgìzandrè adrélépi tóká líyí ro dhi 'o ma kònzi lavulé. Mírì nì tà logó akódhi dré tà dré 'ole dhi i tí dhi nì.

¹⁵Mí kòlikí mína mí akódhi sè. Àngyá ko, akódhi ligí àma íbe kúlí mà dré adrélé longolé dhi kí tà sè tà tändi ró.

¹⁶À dré tá adrérà'a áma tàbvó ta vésè nì àlo sè dhi 'á dhi, dhya àlo alìlepi áyi totó má làga dhi tá yókodhó. Móndyá tití dhi i tayí ma adrélé kalóma. Gíká kòbhà tà nda àyi rú ko!

¹⁷Dì, Mírì totó tá ína i má làga rinyí afè má dré áyi kúlí longozó ngádra 'á dhi nì, móndyá tití surú twá ro dhi i koyiró be dhi bvó. Dì Gíká apá ma kàmì sílésè nì.

¹⁸Bàti, Mírì nì áma apá tà kònzi tití 'ole má rú dhi i lésè gò, áma 'òzo file líná áyi Òpì bhù àdhya léna. Rúku kàdré akódhi dré kóná vésè kólyá! Kàdré kònini.

Mòdo kùdù

¹⁹Mí fè mòdo Pìrsíkà i dré Àkílà be, ìndì móndyá tití Ònèsifórò nì dzó na dhi íbe.

²⁰Erástò gò adrélé Kòritò na. Má tayí Tròfímò drà ro Mìlétò na.

²¹Mí 'o tà tití dhi i alìzo kònwa lókyá kidhì àdhya kandrá. Yùbúlò i fè mòdo mí dré túmäní Púdè, Línò, Kàlàwùdýà, ìndì àma kí adrúpi tití dhi íbe.

²²Mírì kàdré túmäní mí be! Akódhi nì togó taní kàdré àmì íbe tití!

Títò

Títò 1

Pólò ni mòdo fèma

¹Ma, Pólò, Gíká ni màrabà, ìndì Yésu Krísto ni àpóstolò, má adré wárágà kònìdhì ni tisì ma. Gíká bhà ma adrélé àzí nda ni 'o, móndyá í dré zile dhi ì kòka'iró Yésu Krísto, tà báti nízo gò, adrészò trôle Gíká ni tà rú,

²ì kàdréró mì bha lídrì kóná vésè kólyá dhi ni kisúzó. Gíká kitswálépi kinzò ta ko dhi lazí tá lídrì nda ni tà drídrì bvò ni bhàma kandrá.

³Dì lókyá dré tá bhàle dhì kòkitswá dre dhì, Gíká àma kì tindrílépi nda dré áyi kúlí 'òzo apfòle ngádra 'á. Tako ko, bhà áyi kúlí nda ni longoma ni tà má drígá, má kòlongóró ngóró dré tá tâle má kò'o dhì tñi.

⁴Má adré wárágà kònìdhì ni tisì mi, Títò, áma mvá báti àma kì tà ka'ika'i na dhì dré. Gíká àma kì Atá i Yésu Krísto àma kì tindrílépi dhì be dhì ì kòbhà àyi kì togó taní mí rú, ìndì ì kòfè tà kídríkìdrì mí dré!

Àzí fèle Títò dré 'ole túrù Kùréte àdhya na dhì

⁵Má tayí tá mi adrélé Kùréte na, mí kòledéró tà kitswábhá rè ko dhi ì tití, bhàgo kì tobhàzo Èkélézyà bhàandre àlo àlo tití dhì ì 'ásè dhì ì drile, ngóró má dré tá lazílé mí dri dhì tñi.

⁶Adré lèá dhì, bhàgo kàdré móndí adrélépi tà àko í rú dhì 'i. Kàdré agó tokó íbe àlo kwákwa dhì 'i. Akódhì ni ànzì ì kàdré móndí Yésu ni ka'ibhá dhì 'i. Ì kàdré kpà tà kitswázó àyi kì asíkì ásà dhì àko àyi rú, kàdré tà swà 'òma ni tà sè yà, kó ngalè móndí kì kúlí gàma ni tà sè yà dhì.

⁷Adré lèá dhì, Èkélézyà ni drì kòlepi kàdré móndí adrélépi tà àko í rú dhì 'i. Tako ko, à adré Gíká ni àzí bha akódhì drígá kòdhya. Akódhì kàdré dríkàdrì ro ko, kombà ro ko, wá tsilepi ró ko, làpfubhá ro ko, ìndì làfa ndàlepi túrúpfú sè dhì ró ko.

⁸Be ró dhì, kàdré ína móndí adrélépi móndí kì ka'i dôle í véna togó doro sè, adrélépi tà doro le, adrélépi tà 'o tògyá sè, adrélépi gyägya ìndì lolo, ìndì adrélépi áyi tändi ni lovó mvo dhì 'i.

⁹Kàdré trôle gígí ro kúlí báti tadhálé í dré dhì ì rú, í kòkitswáró móndí kì kodzó tà adrélé tadhálé gyägya dhì ì sè, kitswázó kpà móndí adrébhá ligilé tà nda ì rú dhì kì tákonzì tadhá àyi dré.

¹⁰Tako ko, móndí adrébhá ligilé, adrébhá tà tako kì ta, adrébhá kpà móndí kì lití dhì ì bì. Lavulé dhì, àyi Yúdà ànzì ì kòfalé.

¹¹Adré lèá dhì, à kàtsú àyi kì ti. Àngyá ko, ì adré àyikya tà kitswábhá tadhálé ko dhì kì tadhá kòdhya, kitswázó làfa kisú túrúpfú sè dhì bvò. Ì adré dì móndí dzó àruka i 'ásè dhì kì drì kizá tití.

¹²Àyi kí tändí kí pròfétà kí àlo tà dhi: «Kùrétèbhá i ngbú àyikya kinzòbhá 'í, kà'wá àtrá kònzi dhi 'í, ìndì kòvongbolobhá tòbvo ró dhi 'í. »

¹³Tà tâle àyi rú nda kòdhí tà bâti 'í. Ásà dhi, mí kàdré àyi kí tâkonzì tadhá àyi dré ngádra 'á, ì kàdréró àyi kí totó tâtä àyi kí tà ka'ika'i na be dhi bvó.

¹⁴Lè ì kògò adrélé trôle tití tâko Yûdà ànzi kya i rú ko, ìndì tolí móndyá tà bâti gabhá rè dhi kya i rú ko.

¹⁵Móndyá adrébhá togó íbe lolo dhi i dré dhi, ngá tití dhi i lolo. Di, móndyá tà ka'ika'i àko adrébhá togó íbe ndí ró dhi i dré dhi, ngá tití dhi i ndí ró. Àngyá ko, ì tayí àyikya àyi kí togó atsálé ndí ró àyi kí tà kisükisù be.

¹⁶Móndyá lású be kònini nda ì adré tâá dhi, ì ní Gíká be. Di, ì adré àyikya akódhi ni ga tà tití ì dré adrélé 'ole dhi i sè. Àyi nda i móndyá adrélé gâle gâgâ dhi 'í. Àyi móndyá adrébhá ligilé, ìndì kitswâbhá tà dóro 'o bwà ko dhi 'í.

Títò 2

Tà kitswâbhá tadhálé móndí' twátwa Èkèlézyà na dhi i dré dhi i

¹Di, mí ró dhi, mí kàdré mína tà tadhá ngóró dré kitswâlé Gíká ni tà adrélé tadhálé gyâgya dhi sè dhi tíni.

²Mí kàdré àgo mâtiga kí tadhá, ì kàdréró àyi kí tà kisûle dhi kí likí, adrészó tà 'o tògyá sè, ì kòkitswáró lindrì sè. Ì kàdré àyi kí totó tâtä àyi kí tà ka'ika'i na, àyi kí lèle na, ìndì àyi kí togó tsîma na.

³Kàdré tòkó mâtiga kí tà sè dhi, mí kàdré kpà àyi kí tadhá, ì kàdréró atsîlé ngóró móndí àyi kí febhá adrélé lolo Gíká dré dhi i tíni. Ì kàdré móndí kí rú ta kònzi ko. Ì kótayí kpà àyi atsálé wá ni mâtâbâ i ró ko. Be ró dhi, ì kàdré àyikya tà dóro tadhá kòdhya.

⁴Ásà dhi, ì ní kitswâ kyânzi kí tadhá, ì kàdréró àyi kí àgo kí le àyi kí ànzimvá íbe,

⁵adrészó tà 'o tògyá sè, adrészó togó íbe lolo ìndì dóro, adrészó àyi kí dzó kí tà likí, adrészó drì asó àyi kí àgo i kandrâ, à kòkitswáró tà ta kònzi Gíká ni kúlî rú àyi kí tà sè ko.

⁶Kàdré kâdhûrà kí tà sè dhi, mí kàdré kpà àyi kí kodzó, ì kàdréró tà 'o tògyá sè.

⁷Mí ró dhi, mí kàdré tà dóro 'o tà tití i sè, ì kàdréró tà nda kí no mí rú, adrészó 'oá mína tíni. Mí kàdré tà mí dré adrélé tadhálé dhi kí likí, kàdréró tà bâti ró kitswâlé lindrì sè.

⁸Mí kàdré kpà kúlî ta gyâgya, à kòkitswáró kúlî nda kí kayí ko, ámi kâribhá ì kàdréró kanyò ro, ì dré adrélé tà kònzi àko tâle àma rú dhi sè.

⁹Kàdré mâtâbâ kí tà sè dhi, mí kàdré àyi kí kodzó, ì kàdréró drì asó àyi kí míri i kandrâ tà tití i sè, àyi kí tà kàdréró dóro àyi kí míri nda i mîlésè. Ì kàdré kúlî tokó àyi tí ko.

¹⁰Ì kàdré kpà àyi kí ngá kugù àlomvá ko. Be ró dhi, ì kàdré àyi kí tändi kí tadhá ngóró móndí kitswálé ka'ile togó wáyi sè dhi i ró, ì kàdréró Gíká àma kí tìdrílépi dhi ni tà adrélé tadhálé dhi kí 'o adrélé lìndri ro tà tití i sè.

¹¹Tàko ko, Gíká tadhá áyi togó taní kitswázó móndyá tití dhi kí tìdrí dhi dre.

¹²Akódhi ni togó taní nda sè dhi, adré àma kí tadhá atsima twá áyi tà rúsè dhi ni ga, lovó kònzi bvò kònzi àdhya kí 'oma be, mà kàdréró atsílé tògyá sè, adrélé tà gyágya 'o, adrészó trôle Gíká ni tà rú lókyá ándrò kònìdhi sè.

¹³Mà adré 'òá kònini, adrészó mì bha arí be, adrészó Yésu Krísto, àma kí Gíká kàdrì ìndi àma kí tìdrílépi dhi ni agòma mìlanzilanzì ro dhi ni letè.

¹⁴Akódhi nda fè áyi tändi àma kí tà sè, kitswálé àma kí apá tákonzì tití i lésè, ìndi kitswálé àma kí temvé adrélé móndyá lolo ína i ró, mà kàdréró àtsi ró adrélé tà dóro 'o.

¹⁵Mí kàdré tà nda kòdhí kí tadhá móndí i dré kòdhya, adrészó àyi kí kodzó, adrészó àyi kí lotó rinyí wáyi fèle mí dré dhi sè. Mí kòtayí mi dhya àlo dré ayízèle ko.

Títò 3

Móndyá ka'ibhá dhi kí atsima

¹Lè mí kògò adrélé tàá móndyá ka'ibhá i dré dhi, ì kàdré àyi kí bha àyi kí ópí i zàle, ìndi dhya bhàle àyi drile dhi i zàle. Ì kàdré àyi nda kí kúlí yi, adrészó gànzi ró tà dóro tití dhi kí 'o.

²Ì kòtà dhya àlo ni rú kònzi ko. Ì kòlawà kpà móndí íbe ko. Be ró dhi, ì kàdré àyi kí togó dóro ìndi yàyà tadhá móndyá tití i véna.

³Tàko ko, wáláká dhi, àma tá kókpà móndí azaaza ligíbhá Gíká rú, àyi kí tayíbhá litílé dhi 'i. Àma tá màrabà àma kí lovó kònzi kya, ìndi lovó twátwa bvò àdhya kya 'i. Mà adré tá tatsílé tà kònzi 'obe, lovó kònzi bhabe, ìndi togó kònzi bhabe àma kòfalésè. Móndí àruka ì adré tá kpà togó kònzi bha àma rú.

⁴Dì, Gíká àma kí tìdrílépi dhi tadhá tá ína áyi togó dóro áyi lèle be àma dré gò,

⁵àma kí tìdrízó. Tìdrí tá àma tà gyágya mà dré 'ole dhi i sè ko. Be ró dhi, tìdrí ína àma i dré àma kí kizà lèle bhàle dhi sè. Tàko ko, dzì tá àma àma kí tákonzì lésè, àma kí tìzo tòdhyá, lídrì tìdhí ro dhi ni afèzo àma dré Tírí Lólo ni rinyí sè.

⁶Dré Tírí Lólo nda ni kutúzó gàle àma léna bǐ Yésu Krísto àma kí tìdrílépi dhi sè,

⁷kitswálé àma i dré bhàle gyágya áyi togó taní sè dhi i, mà kòkisúró lídrì kóná vésè kólyá dhi tàyilé ro, adrészó àma kí mì bha ásà.

⁸Kúlí kòdhí i, kúlí kitswálé ka'ile dhi 'i. Má adré dì lèá dhi, mí kàdré tà kòdhí kí tadhá ngádra 'á, móndyá Gíká ni ka'ibhá dhi ì kàdréró àyi kí fe adrélé tà dóro 'o. Tà nda i tà dóro lavúlé kitswábhá móndyá tití dhi kí ledé dhi 'i.

⁹Dì, mí kàdré mína káyi azaaza dhì kí ga, tábhí kí rú kí atíma íbe, lawà íbe, ìndì tà kayima tátrítrí kúlí ní tà dri dhì be. Tàko ko, tà nda kòdhì i tà tàko kitswábhá móndí kí ledé bwà ko dhì 'í.

¹⁰Dhya àlo kàdré móndí kí 'o ru lanzí dhì, lè mí kòkodzó akódhì nda vésè àlo tsàle vésè rì. Kòyi ko dhì, mí kòtayí akódhì.

¹¹Mí ní tâle dhì, dhya lású be kònìnì dhì tayí áyì tà kisùkisù abílé dre dhì be. Tàkonzì dré adrélé 'ole dhì i sè dhì, adré tà bhà áyì tândì dri.

Pólò ní kúlí kùdù

¹²Má ní Àrètémà 'í yà kó ngalè Tikíkò 'í yà dhì ní mu mí véna. Áyì nda kí àlo kòtsa dre dhì, mí kò'o tà tití dhì i lìzo áma kisú Nikòpòlì na. Tàko ko, má nò doro ní, má dré lókyá kídhì àdhya ní letèle lavúlé kònàle dhì.

¹³Mí kò'o tà tití dhì i Zénà tòlì tà 'olepi dhì kí ledézó Àpólò be lìle àyì ki atsí na, ngá àlo kòpiró àyì láti na ko.

¹⁴Lè àma kí móndyá i kònì àyì kí fèle adrélé tà doro 'o, i kòkitswáró ngá fe móndyá adrébhá lovó ní íbe dhì i dré, adrézó kpà lò'wa doro 'a bǐ.

¹⁵Móndyá tití mà dré adrézó àyì íbe kònwa dhì i fè mòdo mí dré. Mí kòfè kpà mòdo móndyá ka'ibhá tití adrébhá àma kí le dhì i dré. Gìká ní togó taní kàdré àmí íbe tití!

Filèmónà

Filèmónà 1

Pólò ni mòdo fèma

¹Ma, Pólò 'ile bădzó kondi 'á Yésu Krísto ni tà sè dhì, túmání àma kí adrúpi Timotéyò be dhì, mà adré wárágà kònìdhì ni tisì mi, àma kí àzíamu Filèmónà mà dré lèle tò dhì dré.

²Mà adré kpà tisiá àma kí amvúpi Àpíyà dré, àma kí àdzú bhuàmu Àrùkípò dré, ìndì móndyá Èkélézyà àdhya adrébhá ru kímó ámi dzó na dhì i dré.

³Giká àma kí Atá i Míri Yésu Krísto be dhì tò kòbhà àyi kí togó taní àmi rú, ìndì tò kòfè tà kìdríkìdrí àmi dré!

Pólò fè àwoyà Filèmónà ni tà sè

⁴Lókyá má dré adrérà'a tà zi Giká tí dhì 'á dhì, mà adré ngbú adrélé àwoyà ta akódhì dré ámi tà sè, adrészó kpà tà zi akódhì tí mí dré.

⁵Tako ko, mà adré ámi tà ka'ika'i Míri Yésu na dhì ni tà yi, túmání ámi lèle mí dré adrélé tadhálé móndyá lolo tití Giká àdhya i véna dhì ni tà be.

⁶Má adré dì tà zi Giká tí, ámi tà ka'ika'i nda kàdréró lò'wa 'a bì, mí kòniró tà taní tití mà dré adrészó ába Yésu Krísto na dhì i be dhì bvó.

⁷Áma adrúpi, ámi lèle timbà áma togó gàle arí sè bì, mí dré móndyá Giká àdhya kí togó tindrile dhì sè.

Pólò lizí Filèmónà ni ti Ònèsímò ni tà sè

⁸Ásà dhì, tágba má dré tá kítswázó tolí fe mí dré Krísto na tà kítswálépi mí dré 'ole dhì sè dhì,

⁹má adré mána ámi ti lizí lèle sè. Di, ma, Pólò málìga ró 'ile nyànomvá bădzó 'á Yésu Krísto ni tà sè dhì,

¹⁰má adré ámi ti lizí áma mvá Ònèsímò ni tà sè. Tako ko, akódhì nda atsá áma mvá ro Krísto na kònwa bădzó 'á.

¹¹Wáláká dhì, akódhì tá móndí tako 'i mí mìlésè. Di, nyànomvá dhì, akódhì ína móndí kítswálépi àma kí ledé túmání mí be dhì 'i. ¹²Má adré akódhì ni logó mí véna, tágba akódhì dré adrészó áma tändi ni togó 'i dhì.

¹³Má lè tá tò akódhì ni kikílé ànyi má làga kònwa, kòledéró ma ámi àrà 'a, mà dré adrérà'a bă nya Rúbí Tani ni tà sè dhì 'á.

¹⁴Di, má kítswá tá 'òá kònìní mí dré ka'ia àko ró ko. Be ró dhì, mà adré lèá dhì, mí kò'o tò dòro ngóró mí dré lèle 'ole dhì tini, ngóró tolí bhàle mí dri dhì tini ko.

¹⁵Àruka ni, mí lanzí tá ru Ònèsímò be lókyá tsà sè, mí kògòrò akódhì ni kisú adrészó ába nyo be dhì bvó.

¹⁶Nyànomvá dhi, akódhi vélé ngbà 'í màrabà 'i ko. Akódhi lavú vélé màrabà byá. Akódhi adrúpi má dré mána lèle tò dhi 'i. Dì, lavulé dhi, akódhi ní adré móndí mí dré dra lèle tò dhi 'i, ìndì adrúpi mí dré dra lèle tò Mírì na dhi 'i.

¹⁷Dì ásà dhi, mí kàdré áma no ámi arúpi ró dhi, mí kòka'ì akódhi ngóró mí ní tá áma tändi ni ka'ì kòdhya na tíni.

¹⁸Akódhi kò'o mí kònzi yà, kó ngalè kàdré ámi mìri íbe í rú yà dhi, mí kòbhà mìri nda áma rú tí.

¹⁹Ma, Pólò, má adré kúlí kònì kí tisì áma tändi ní drígá sè: Má ní mìri nda ní logó mí dré. Kònò má ní tá kitswá tàá dhi, mí mína áma mìri íbe mí rú, ìndì mìri nda ámi tändi ní lídrì 'i.

²⁰Dì áma adrúpi, má adré lèá mí kò'o tà nda kòdhì má dré Mírì ní rú sè. Mí kòtindrì áma togó Krísto na.

²¹Má adré wárágà kònìdhì ní tisì mí dré, adrészó ka'íá dhi, mí ní áma kúlí ka'ì 'ole. Má nì, mí ní vélé tà 'o tà má dré adrélé zile kòdhì ní lavú byá dhi be.

²²Kòdhì íbe dhi, mí kòledé àrà má dré kitswázó ayílé mí véna dhi be. Tàko ko, má adré mì bha Gìká véna, kònziró láti má dré gòzo tsàle àmì véna, ngóró mì dré adrélé zile akódhi tí dhi tíni.

Pólò ní kúlí kùdù

²³Èpafurà mà dré adrészó bă nya ába Yésu Krísto ní tà sè dhi, fè mòdo mí dré.

²⁴Márokò, Àristàrükò, Démà, tsàle Lúkà be, áma àzíàmu ró dhi, ì fè kpà mòdo mí dré.

²⁵Mírì Yésu Krísto ní togó taní kàdré àmì íbe!

Èbérè †

Èbérè † 1

Gìká longó áyi kúlí áyi Mváagó tí

¹ Atú dhi, Gìká longó tá áyi kúlí àma kí tábhí i dré áyi pròfétà i tí, lókyá twátwa i sè ìndì láti twátwa i sè.

² Di, lókyá kùdù kònìdhí sè dhi, longó áyi kúlí àma dré áyi tändi ni Mváagó tí. Akódhi nda dhya Gìká dré tá 'ole ngá tití dhi kí bha dhi 'i, ìndì dhya dré bhàle kitswálé tà tití i dré lazilé tàyilé ro dhi kí kisú dhi 'i.

³ Akódhi nda adré lagúlé Gìká ni tändi ni mìlanzìlanzì sè. Adré kpà Gìká ni tändi ni lídrì 'o adrélè nòle kyá i rú. Adré ngá tití dhi kí 'o adrélè ru totó àyi kí àrà i 'ásè áyi kúlí rinyi ró dhi sè. Akódhi dré móndyá bvò dri dhi kí temvézó àyi kí tàkonzì lésè dhi àmvolésè dhi, dré mbàzo lirilé Gìká mûrungú dhi ni dríágó lésè bhù na.

Gìká ni Mváagó kàdrì ` ángéló kí lavú

⁴ Di Gìká ni Mváagó nda atsá kàdrì ángéló tití dhi kí lavú byá, ngóró rú Gìká dré fèle drá dhi dré kpà adrélè kàdrì ángéló kya kí lavú byá dhi tíni.

⁵ Tako ko, Gìká tà tá tàdzí tà ángéló dré ngóró dré tâle áyi Mvá dré dhi tíni ko. Tà tá áyi Mvá nda dré dhi: «Mí áma Mváagó 'i.

Áandrò dhi, má ti mí ma. » Tà kpà dhi: «Má ni mána adré akódhi ni Atá ro. Akódhi ni ína adré áma Mvá ro. »

⁶ Kòdhí íbe dhi, lókyá Gìká dré tá adrérà'a áyi Mvá kàyo nda ni amù bvò dri dhi 'á dhi, tà dhi: «Lè ángéló tití Gìká àdhya i kòbhà akódhi ni lindrì. »

⁷ Kàdré ángéló kí tà sè dhi, Gìká tà dhi: «Akódhi adré áyi ángéló kí amù lyă tíni. Adré áyi màrabà nda kí amù àtsí làdra tíni. »

⁸ Di, kàdré ína akódhi ni Mvá ni tà sè dhi, tà dhi: «Á! Gìká, ámi lirirà adrészò opì nya dhi ni adré kóná vésè kólyá. Mí ni adré opì nya kùtù fa adrélèpi ámi tà gyägya tadhá dhi sè.

⁹ Mí lè mína tà gyägya kòdhya gò, tà kònzi gàzo gàngà. Di ásà dhi, Gìká, ámi Gìká zì mí adrélè kàdrì ámi arúpi kí lavú gò, dò kólénzé àdhya ni dàzo mí dri. »

¹⁰ Akódhi tà kpà áyi Mvá nda ni tà sè dhi: «Míri, ngá tití dhi kí kidhoma 'á dhi, mí bhà tá bvò ni pá mí. Mí bhà tá kpà bhù i ámi tändi ni drígá sè.

¹¹ Ngá nda kí dra akílé tití, di, mí ni mína ngbú adré be. Ì ni akù kítá i tíni.

¹² Mí ni àyi kí kopá kánzò tíni. Ì ni ru ladzá kítá àku dhi i tíni. Di, mí ni mína ngbú adré ngóró mí dré adrélè dhi tíni.

Ámi kóná kitswá kpà tâdzí akílé ko. »

¹³ Gìká tà kpà tâdzí tà ángéló àlo dré kònini ko: «Mí alì lirilé áma dríágó lésè, tsàle lókyá má dré dra ámi kàribhá kí bhàzo adrélè ámi pá zàle dhi 'á. »

¹⁴Ángéló tití dhi i ngbà 'í tirí adrébhá Giká ni àzí 'o dhi 'i. Akódhi adré àyi kí amù móndyá dra lídrì kóná vésè kólyá dhi ni kisúbhá dhi kí ledé.

Èbérè † 2

Tà kàdri` adrészó móndi` ki tidri` dhi

¹Dí ásà dhi, lè mà kàdré vélé trôle tà mà dré yile dhi i rú wáláká ni ni lavú, mà kòkítswáró vwàle tà nda i rúsè ko dhi bvó.

²Tako ko, Giká 'o tá kúlí atú i dré tá longolé ángéló i tí dhi i adrélé ru totó tätä. Dí dhya ángùdhi kúlí nda kí gálepi 'ole dhi kisú tá ína tà ñole i dri kitswálépi áyi tàkonzì sè dhi.

³Kàdré kònini dhi, mà ni dí àmakya lapá tábvo tama sílésè ngíningíni ró, mà kàdré tà kàdrì adrészó móndi kí tidri ándrò kòdhí ni no tà tako ró dhi? Míri Yésu ni tändi longó tá rè zyà tà nda ni gó, móndyá akódhi ni yibhá dhi i dré tadházóá àma dré dhi, tà nda tà báti 'i káyà dhi.

⁴Giká tadhá kpà ngádra 'á dhi, tà nda tà báti 'i, tà twátwa líndríga ró dré 'ole móndi i kòfalé dhi i sè, ìndì rinyí twátwa Tíri Lolo àdhya dré lanzílé móndi i dré ngóró dré lèle 'ole dhi tíni dhi i sè.

Yésu atsá móndi` ro áyi adrúpi ki tidri`

⁵Dí, kàdré ángéló kí tà sè dhi, Giká bhà bvò adrélépi alile mà dré adrészó tà ni ni ta dhi adrélé àyi kí pá zàle ko.

⁶Be ró dhi, à tisi tà Giká ni Kúlí na kònini: «Á! Giká, móndi tá ína àdhí 'i, mí dré adrészó akódhi ni tà kisú dhi? Móndi ni mvá tá ína àdhí 'i, mí dré adrészó akódhi ni tà no dhi?

⁷Mí bhà akódhi adrélé lókyá tsà sè ángéló i zàle. Mí bhà kpà akódhi ni mì lanzíle, lindrì fèzo drá.

⁸Mí bhà kpà tà tití dhi i adrélé akódhi ni pá zàle. » Giká kòbhà tà tití dhi i móndi ni pá zàle kònini dhi, tayí tà àlo dré bhàle akódhi ni pá zàle ko dhi ko. Dí, nyànomvá dhi, mà nò rè tà tití dhi i adrérà'a akódhi ni pá zàle dhi ko.

⁹Dí, mà adré Yésu ni no kòdhya. Tako ko, Giká bhà tá akódhi nda adrélé lókyá tsà sè ángéló i zàle, kitswálé Giká ni togó taní sè dhi, kòdraró móndyá tití dhi kí tà sè be dhi bvó. Dí nyànomvá dhi, Giká bhà akódhi ni mì lanzíle, lindrì fèzo drá, dré tá kizà ka'ile nyàle gó dràzo dhi sè.

¹⁰Tako ko, adré tá lèá dhi, Giká ngá tití dhi i dré adrészó ásà adrélé kpà drá dhi, kò'o Yésu ni tà kitswálé tití kizà dré nyàle dhi sè, kitswázó ànzì zyandre dhi kí adrì áyi milanzilanzì kisú dhi bvó. Ángyá ko, Yésu nda dhya láti nzilepi àyi dré lídrì kisúzó dhi 'i.

¹¹Dí Yésu adrélépi móndi kí 'o atsálé lólo nda, túmání móndyá dré 'ole atsálé lólo dhi i be dhi kí Atá àlo kwákawá. Ásà dhi, akódhi adré àyi kí zi áyi adrúpi i ró kanyò àko.

¹²Tàko ko, tà dhi: «Á! Gìká, má ní ámi tà longó áma adrúpi i dré. Má ní ámi rú bha kùle àyi ru kìmóbhá nda i kòfalé. »

¹³Tà kpà dhi: «Má ní áma tà ka'ika'i bha Gìká léna. » Tà kókpà dhi: «Ma kònìdhi, túmǎní ànzì Gìká dré afèle má dré dhi íbe. »

¹⁴Dì ànzì nda i dré adrélé rúbhá íbe ìndì kàrì íbe dhi sè dhi, Yésu ní tändì atsá tá kpà móndì ro àyi tíni. 'O tá kònìni, kìtswálé áyi dràma sè dhi, i kòpfuró Dzáborò adrélépi tá rìnyí dràdrà àdhya íbe dhi ní tà,

¹⁵ìndì i kòtriró móndyá tití adrébhá tá àyi kí lókyá wäyi sè mårábà i ró dràdrà ròma sè dhi i be dhi bvó.

¹⁶Tà báti ró dhi, akódhi atsá ángéló kí ledé kòdhya ko. Be ró dhi, atsá ína Àbàramà ní ànzì kí ledé kòdhya.

¹⁷Ásà dhi, adré tá lèá dhi, akódhi kàtsá áyi adrúpi i tíni tà tití i sè, kàtsáró àyi kí kòwánà kàdrì kìtswálépi àyi kí kizà bha ìndì kìtswálépi adrélé ka'ile dhi ró Gìká kandrá, kò'oró tà tití dhi i móndì kí tàkonzi trìzo be dhi bvó.

¹⁸Tàko ko, akódhi ní tändì nya tá kizà, tà dré tá adrér'a áyi tabhì dhi 'á. Ásà dhi, a ní kìtswá móndyá tà dré adrélé tabhile dhi kí ledé bwà.

Èbérè i 3

Yésu kàdrì` Mósè ní lavú

¹Dì áma adrúpi Gìká dré azilé adrélé móndyá lolo ína i ró ní i, mì kisù rè Yésu nda ní tà ká. Akódhi, àpóstolò ìndì kòwánà kàdrì mà dré ka'ile báti gó, adrészò tà ní ní longó dhi 'i.

²Akódhi 'o tá tà tití Gìká áyi zìlepi dhi dré bhàle i drígá dhi i, ngóró Mósè dré kpà tà tití Gìká ní dzó na bhàle i drígá dhi kí 'ole dhi tíni.

³Dì, Yésu kìtswá ína lìndrì kàdrì sè Mósè ní lavú, ngóró dhya adrélépi dzó si dhi dré adrélé lìndrì íbe kàdrì, dzó sìle nda àdhya ní lavú dhi tíni.

⁴Tàko ko, dzó tití dhi i dré dhi, dhya àyi kí sibhá dhi i be. Dì, dhya ngá tití dhi kí silepi dhi, Gìká 'i.

⁵Mósè àdhya ró dhi, kìtswá tá Gìká dré ka'ile ngóró mårábà i dré bhàle áyi dzó na dhi ró gó, dré tà Gìká dré lèlè tâle lókyá adrélépi alile dhi sè dhi kí longozó.

⁶Dì, Krísto àdhya ró dhi, kìtswá ína Gìká dré ka'ile ngóró áyi Mváagó i dré bhàle áyi dzó drile dhi ró. Àma Gìká ní dzó nda 'i, mà kàdré trôle tà mà dré ka'ile báti gó, adrészò mì bha ásà, ìndì adrészò drì bha kuru ásà dhi rú dhi.

Àma kí togó 'òma tombálé ko dhi

⁷Dì ásà dhi, ngóró Tírí Lólo dré adrélé tâle Gìká ní Kúlí na dhi tíni: «Ándrò dhi, mì kòyi Gìká ní kúlí dhi,

⁸mì kò'o àmi ki togó tombálé ko. Mì kò'o ngóró àmi ki tábhí kya tíní ko, lókyá ì dré tágírà'a má rú, ìndì ì dré tá áma tabhírà'a duku na dhi 'á.

⁹Kònàle dhi, ì tabhí tá ma, áma togó vwàvwà tabhízo, tágba ì dré tá tà tití má dré 'ole dhi ki nòzo kóná nyadhi-rì dhi.

¹⁰Ásà dhi, áma togó dré aswázó móndyá lókyá nda 'á dhi ì rú. Dì má dré tàzoá dhi: «Ì adré ngbú àyi ki togó tayí adrélé vwale má rúsè vwàvwà. Ì nì kpà áma láti lebèle ko. »

¹¹Dì má dré mòndrà sìzo togóaswa dré, tàzoá dhi: «Àyi nda ì kítswá tàdzí file àrà adrészó lovólé má be dhi léna ko! »»

¹²Dì áma adrúpi i, mì kònò dóro, dhya àlo àmi kòfalé dhi kàdréró togó kònzi, adrélépi Gìká lídrì ro dhi ni ka'i ko gò, adrészó áyi alá akódhi rú dhi íbe ko.

¹³Be ró dhi, mì kàdré ru timbà àmi kòfalésè àmi ki tà ka'ika'i na kítú àlo àlo tití i sè, àmi ki àlo kòtayíró i tákonzì dré litílé gò, áyi togó 'ozo tombálé Gìká rú dhi ko. Lè mì kàdré 'óá kònini, à dré rè dhu adréra'a kítú nda ni zi «Áandrò» dhi 'á.

¹⁴Tàko ko, àma Krísto ni arúpi i báti, mà kàdré trôle gígí ro tà mà dré ka'ile drìdrì dhi rú, tsàle byá àma ki lókyá ni kùdù na dhi.

¹⁵Ngóró Gìká ni Kúlí dré adrélé tâle dhi tíní: «Áandrò dhi, mì kòyi Gìká ni kúlí dhi, mì kò'o àmi ki togó tombálé, ngóró àmi ki tábhí ì dré tá 'ole ì dré ligírà'a Gìká rú dhi tíní ko. »

¹⁶Dì àyi Gìká ni kúlí yibhá gò, ì dré ligízó akódhi rú nda i tá àdhibhá i? Àyi nda i tá zakó móndyá tití Mósè dré tá adrile apfòzo àyi íbe Èzèpétò lésè dhi i?

¹⁷Dì Gìká ni togó aswá tá kóná nyadhi-rì dhi àdhibhá i rú? Àyi nda i tá zakó móndyá tákonzì 'obhá gò, ì dré ledhézó todràle duku na dhi i?

¹⁸Dì Gìká sì tá mòndrà àdhibhá i dré tàzoá dhi, ì kítswá tàdzí file àrà adrészó lovólé i be dhi léna ko dhi? Àyi nda i tá zakó móndyá akódhi ni kúlí gabhá 'ole dhi i?

¹⁹Dì mà adré nòá dhi, àyi nda i kítswá tá file àrà adrészó lovólé nda léna ko, ì dré Gìká ni ka'ile ko dhi sè.

Èbérè i 4

Àrà adrészó lovólé Gìká be dhi

¹Dì Gìká lazí tà tayílé àma dré, tàzoá dhi, mà ni kítswá file àrà adrészó lovólé i be dhi léna. Ásà dhi, mì kònò dóro, dhya àlo àmi kòfalé dhi kòtayíró lókyá fízo àrà nda léna dhi lapálé ko.

²Tàko ko, à longó Rúbí Taní àma dré yile, ngóró Isérélè ànzí nda kya tíní. Dì, rúbí i dré yile nda ledé tá ína àyi ko. Àngyá ko, i yi tá rúbí nda kisulé tà ka'ika'i sè ko.

³Dì, àma rúbí nda ni ka'ibhá dhi i, mà adré àmakya file àrà adrészó lovólé nda léna. Kàdré àrà nda ni tà sè dhi, Gìká tà dhi: «Dì má sì tá mòndrà togóaswa dré, tàzoá dhi:

«È kïtswá tâdzí fîle àrà adrészô lovólé má be dhi léna ko! »» Gïká tà tá tà nda kònïni, tágba dré tá áyi azí 'òzo akílé kïdhólé í dré bvò bhärà lésè dhi.

⁴Tako ko, à tisì tà kïtú ni nzi-drì-rì ni tà dri, Gïká ni Kûlî na dhi kònïni: «Kïtú ni nzi-drì-rì sè dhi, Gïká dré lovózô azí tití í dré tá 'ole dhi i sè. » ⁵Dì akódhi ni Kûlî nda adrë kpà tâa dhi: «È kïtswá tâdzí fîle àrà adrészô lovólé má be dhi léna ko. »

⁶Dì tayí dhu rè lókyá móndí àruka i dré kïtswázô fîle àrà adrészô lovólé nda léna dhi. Àngyá ko, móndyá atú Rûbí Tanî yibhá nda i fî tá àyïkya àrà nda léna ko, i dré kûlî nda ni ka'ile 'ole ko dhi sè.

⁷Dì kóná bî lókyá nda àmvolésè dhi, Gïká dré gòzo tódyá kïtú àzya bha, kïtú nda ni zizo «Ándrò» gò, dré longózôá Dàwídì tí ngóró tisile kònwa dre dhi tini: «Ándrò dhi, mì kòyi Gïká ni kûlî dhi, mì kò'o àmì kî togó tombálé ko. »

⁸Tako ko, Yòsûwà kò'o tá kó rè móndyá nda i fîle àrà adrészô lovólé nda léna 'i dhi, kònò Gïká gò tá kïtú àzya adrészô fîle lâna dhi ni tà ta ko.

⁹Dì ásà dhi, tayí dhu rè àrà móndyá Gïká àdhyá i dré kïtswázô lovólé lâna sàbâtù ni tà àdhyá tini dhi.

¹⁰Àngyá ko, dhya ángùdhi fîlepi àrà adrészô lovólé Gïká be nda léna dhi, adrë kpà lovólé áyi tândi ni azí sè, ngóró Gïká dré lovólé áyi azí sè dhi tini.

¹¹Adré dì lèá dhi, mà kò'o tà tití dhi i kïtswázô fîle àrà adrészô lovólé nda léna, dhya àlo àma kòfalé dhi kògåró Gïká ni kûlî gò dhèzo ïsérélè àanzi nda kya tini ko.

¹²Tako ko, Gïká ni kûlî lîdrì ro, ìndì adrë tà 'o rînyí sè. Kûlî nda tsi, sápí sí lîtsi be rì dhi ni lavú byá. Adré fîle móndí léna tsâle byá àrà akódhi ni tà kisükisù lanzizó togó ni be dhi na. Adré fîle tsâle byá àrà akódhi ni fà kî lanzizó fà ni ni dò be dhi na. Adré tà akódhi dré adrélé kisûle dhi kî bvô lanzí, tà dré adrélé lèle 'ole dhi i be.

¹³Ngá àlo ngá tití Gïká dré bhâle dhi i kòfalé dhi kïtswá áyi zu akódhi milésè bwà ko. Ngá tití dhi i ngâdra 'á, dhya mà dré dra àma kî tà tití dhi kî tazo akódhi kandrâ nda mi.

Yésu, àma kî kòwánà kâdrì ` lavûlé dhi 'i

¹⁴Dì ásà dhi, mà kâdré trôle gîgî ro tà mà dré ka'ile bâti gò, adrészô longóá dhi rû. Tako ko, àma kòwánà kâdrì lavûlé, fîlepi bhù na tsâle byá Gïká ni tândi véna dhi i be. Akódhi nda, Yésu, Gïká ni Mvâagó 'i.

¹⁵Àma kî kòwánà kâdrì nda, móndí kïtswâlépi kîzâ do áyi togó na àma kî tà yàyâ kî tà sè bwà ko dhi 'i ko. Be ró dhi, àma kî kòwánà kâdrì nda ína dhya tà tití dhi i dré tabhile àma tini gò, dré ína takonzì 'òzo ko dhi 'i.

¹⁶Dì tà mà dré ka'ile bâti nda sè dhi, mà kâdré àma kî kisí ànyi Gïká ni lîfrà adrészô òpì nya áyi togó tanî sè dhi làga, kâdrérô àma kî kîzâ bha, adrészô áyi togó tanî bha àma rû, kïtswázô àma kî ledé lókyá kïtswâlépi àma sè dhi sè be dhi bvô.

Èbérè i 5

¹Kòwánà kàdrì ángùdhi móndí i dré adrélé kipèle dhi, i adré kipèá kitswálé áyi totó àyi kí kòfalé 'á Gíká be, adrélé ngá fe ìndì mòbòmà fe akódhi dré àyi kí tàkonzì kí tà sè.

²Kòwánà kàdrì nda ni kitswá tà 'o togó yàyà sè móndyá tà nibhá ko, àyi kí tayíbhá litilé dhi i dré, áyi tändi ni tà dré kpà adrélé yàyà dhi sè.

³Dí akódhi ni tà yàyà nda sè dhi, lè kàdré ngá fe mòbòmà ro áyi tändi ni tàkonzì kí tà sè, adrészó kókpà fèá móndí kí tàkonzì kí tà sè.

⁴Dhya àlo kitswá áyi tändi ni bha adrélé kòwánà ro lindrì kisúzó ásà dhi ko. Gíká kitswá ngbà 'í móndí kí zi adrélé àzí nda ni 'o dhi nì, ngóró dré Àrónà ni zile dhi tíni.

⁵Kókpà kòdhí tíni, Krísto bhà tá áyi tändi adrélé kòwánà kàdrì ro mìlanzìlanzi kisúzó ásà dhi ko. Be ró dhi, Gíká zì tá akódhi nì gò, tazoá drá dhi: «Mí áma Mváagó 'i. Áandrò dhi, má ti mi ma. »

⁶Tà kpà áyi Kúlí na dhi: «Mí kòwánà kàdrì 'í kóná vésè kólyá, ngóró Mèlikisèdékè tíni. »

⁷Lókyá Yésu nda dré tá adrérà'a bvò dri dhi 'á dhi, zi tá tà Gíká tí, adrészó ngôle kúlí 'u'ù sè àwó íbe dhya kitswálépi tá akódhi ni apá dràdrà lésè nda rú. Dí Gíká dré akódhi ni yìzo, dré áyi bhàle Gíká ni rinyí zàle dhi sè.

⁸Tágba akódhi dré tá adrészó Gíká ni Mvá 'i dhi, lè tá kònì Gíká ni kúlí ka'ile 'ole dhi be, kizà i dré nyàle dhi sè.

⁹Dí Gíká kò'o akódhi ni tà kítswálé tití dre dhi, akódhi dré atsázó dhya adrélépi lídrì kóná vésè kólyá dhi ni fe móndyá tití adrébhá áyi kúlí ka'i 'ole dhi i dré dhi ró.

¹⁰Angyá ko, Gíká bhà akódhi adrélé kòwánà kàdrì ro ngóró Mèlikisèdékè tíni.

Àma kí tà ka'ika'i tayima ko dhi

¹¹Àma tà íbe bǐ tâle tà nda i dri. Di, tà nda kí àndu ngìma àmì dré dhi kòkóròko. Tako ko, mì adré tà yi nile mbèlè ko.

¹²Lókyá lavú dre tò kidhólé kitú mì dré Yésu ni ka'izo dhi sè, atsálé nyànomvá kònìdhí. Lè tá dhi, mì kàtsá tà tadhábhá i ró dre. Di, adré lèá dhi, à kògò Gíká ni kúlí ni tà adrélé tadhálé drìdrì dhi kí tadhá tódyá àmì dré. Lè à kàdré bàsú fe àmì dré kòdhya, mányàngá tòmbátòmba 'i ko.

¹³Dhya ángùdhi adrélépi ngbà 'í bàsú mvu dhi dhu rè mvámvá 'i. Akódhi nì rè tà adrélé tadhálé tà gyägya dri dhi i ko.

¹⁴Di, mányàngá tòmbátòmba dhi ína móndí li'wábhá dre dhi i dré. Àyi nda i adréngbú adrélé nyàá atsázó tògyabhá ro, i kòkítswáró tà dóro kí ni lanzílé tà kònzi íbe.

Èbérè i 6

¹Di ásà dhi, lè mà kòtayí tà adrélé tadhálé drìdrì Krísto ni tà sè dhi i gò, adrészó tà adrébhá móndí kí 'o li'wálé àyi kí tà ka'ika'i na dhi kí tadhá kòdhya. Lè mà kògò

tódyá dzó ni pá bha, adrészó tà adrélé tadhálé drìdrì kònì kí tadhá ko: dhyá kí togó ladzama tà adrébhá dhyá kí dri lìle dràdrà kisú dhi kí tà sè dhi, Gìká ni ka'ima,

²tà tadhálé bátísimò twátwa dhi kí tà dri dhi i, drígá bhàma móndí i dri dhi, móndyá dràbhá dre dhi kí ngàma dràdrà 'ásè dhi, ìndì móndí kí tàbvó Gìká dré dra tâle kitswálé kóná vésè kólyá dhi.

³Gìká kòlè dhi, mà ni 'òá kònìnì.

⁴Kàdré dí móndyá dhebhá àyi kí tà ka'ika'i tayí dhi kí tà sè dhi, à ni kítswá àyi kí adrì agòle àyi kí togó ladzá tódyá dhi ngíningíni ró? Tàko ko, àyi nda i kisú tá Gìká ni ngádra ngá kazá àyi kí togó na dhi 'í. Ì tabhì tá tà taní dré afèle àyi dré bhù lésè dhi 'í. Ì kídhó tá adrélé Tírí Lólo ni tà ni 'í.

⁵Ì tabhì tá Gìká ni kúlí gò, i dré nízoá tâle dhi, kúlí nda dóro dhi 'í. Ì kídhó tá kpà adrélé rìnyí lókyá adrélépi alìle dhi àdhyá kí ni dhi 'í.

⁶Dí tà nda kòdhí i àmvolésè dhi, i kòdhe àyi kí tà ka'ika'i tayí dhi, à kítswá àyi kí adrì agòle àyi kí togó ladzá tódyá dhi bwà ko. Tàko ko, i adré àyikya góle Gìká ni Mváagó ni tidí tódyá fa kípakipa dri, adrészó kanyò fe akódhi dré móndyá tití i mi.

⁷Bvò adrélépi kozya adrélépi dhile i dri rä dhi ni se gò, adrészó ngá 'o kàle bì dhyá bvò nda ni 'azo àyi dré dhi i dré dhi, adré tà taní kisú Gìká vélésè.

⁸Dí, bvò adrélépi kùtsí kí 'o apfòle mbì wàyá íbe dhi, atsá ína ngá àngyá ro gò, Gìká dré adrészó 'ole bvò nda ni tatrí. Kùdù ro dhi, a ni zàá vèle àtsí sè.

⁹Dí, áma arúpi má dré lèle tò ni i, tágba mà dré adrészó tà ta kònìnì dhi, mà adré ka'ia dhi, mì ni àmikya tà taní lavúlé dhi kí kisú, túmání lídrì kóná vésè kólyá dhi be.

¹⁰Tàko ko, Gìká ngbú gyágya. Kítswá àzí dóro mì dré 'ole dhi kí tà tìvì ko. Kítswá kpà lèle mì dré tadhálé i dré, tà mì dré 'ole ìndì mì dré adrélé 'ole áyi móndyá lolo i dré dhi i sè dhi ni tà tìvì ko.

¹¹Dí mà adré lèá dhi, àmì àlo àlo tití dhi i mì kàdré dhu rè tà 'o togó be àtsí ró kònìnì tsàle kùdù na, mì kòkisúró tà mì dré adrészó mì bha ásà dhi i kítswálé tití be dhi bvó.

¹²Mà adré lèá dhi, mì kàtsá tòbvo ró ko, be ró dhi, mì kàdré àmikya tà 'o ngóró móndyá adrébhá tà Gìká dré lazílé dhi kí kisú àyi kí tà ka'ika'i sè ìndì àyi kí togó vwàvvà sè dhi kya tíni.

Tà Gìká dré lazílé dhi kítswá tâdzí ru ladzá ko

¹³Lókyá Gìká dré tá adrérà'a tà lazí Àbàramà dré dhi 'á dhi, sì tá mòn-drà tadházóá dhi, i ni tà i dré lazílé nda ni 'o báti. Dhyá kàdrì akódhi ni lavúlépi, dré tá kítswázó mòn-drà nda ni si rú ni sè dhi tá yókódhó. Dí Gìká sì tá mòn-drà nda áyi tândi ni rú sè,

¹⁴tàzoá dhi: «Tà báti ró dhi, má ni tà taní bha mí dri. Má ni kpà ámì súrú 'o lizólé zyandre ró. »

¹⁵Dí Àbàramà kòletè tà nda togó vwàvvà sè dre dhi, dré tà Gìká dré lazílé nda ni kisúzó.

¹⁶Móndí i kàdré mòndrà sì dhi, i adré sìá móndí kàdrì àyi ki lavúlépi dhi ni rú sè. Di mòndrà nda adré tà i dré tâle dhi ni 'o adrélé ru totó tätä, adrészó káyi tití dhi ki 'o akílé.

¹⁷Di Gíká sì tá kpà mòndrà tà i dré lazilé nda ni 'ozo adrélé ru totó tätä, ìndì tadházóá móndyá adrébhá tá 'ole tà lazilé nda ni kisú dhi i dré dhi, tà i dré kisùle 'ole nda kitswá tâdzí ru ladzá ko.

¹⁸Di Gíká 'o tá tà rì kítswábhá ru ladzá ko dhi i. Kítswá kpà ína kinzò ta tâdzí ko. 'O tá kònini, kítswázó àma àma ki zubhá i léna dhi ki timbà àma ki tà ka'ika'i na, mà kàdréró trôle gígí ro tà mà dré adrészó mi bha ásà dhi rú.

¹⁹Tà mà dré adrészó mi bha ásà nda adré àma ki 'o adrélé àma ki totó tätä, tà àlo kòkítswáró àma ki tà ka'ika'i kizí ko dhi bvó. Àlò kòkítswáró àma ki 'o adrélé àma ki totó tätä, tà mà dré adrészó mi bha ásà nda adré kpà àma ki 'o lavulé kítá 'ile tépelò bhù àdhya ni 'a lakízó dhi 'ásè, adrélé file Àrà lolo lavulé dhi na.

²⁰Yésu ni tändi fì àrà nda na àma kandrána àma ki tà sè dre. Tako ko, akódhì atsá kòwánà kàdrì ro kóná vésè kólyá Mèlikisèdékè tíni.

Èbérè i 7

Mèlikisèdékè kòwánà kàdrì` 'i

¹Mèlikisèdékè nda tá ópí kàdrì bhàandre Sàlémà àdhya drile dhi 'i, ìndì kòwánà Gíká kurú na bhù na dhi àdhya 'i. Àbàrámà dré tá adrérà'a agòle àdzú dré tá ópí ki lavúzó dhi lésè dhi 'á dhi, Mèlikisèdékè nda li tá ru kisú akódhì be gó, dré tà taní bhàzo drià.

²Di Àbàrámà dré ngá tití i dré tá adólé àdzú nda lésè dhi ki dímè fèzo akódhì dré. Rú Mèlikisèdékè kòdhì adré zyà lèá tâle dhi «ópí tà gyägya àdhya». Kòdhì íbe dhi, akódhì ni rú «ópí Sàlémà àdhya» nda adré lèá tâle dhi «ópí tà kídríkìdrì àdhya». ³Akódhì atá àko, andre àko, ìndì surú kómvó àko. Akódhì ni kídhoma yókódhó, akódhì ni lídrì ni kùdù kpà yókódhó. Akódhì Gíká ni Mvá tíni, ìndì adrélè kòwánà kàdrì ro kóná vésè kólyá.

⁴Mi kisù rè ngalè Mèlikisèdékè nda ni tà tá kàdrì ngíni ya dhi ká! Ndìndì àma ki tâbhí Àbàrámà ni tändi fè tá ngá tití i dré tá adólé àdzú lésè dhi ki dímè akódhì dré.

⁵Mósè ni tátrítrí kúlí adré lèá dhi, Lévi ànzi bhàle adrélè kòwánà i ró dhi i kàdré àyi ki adrúpi ìsérélè ànzi ró dhi ki ngá tití dhi ki dímè lokó àyi drígásè, tágba àyi nda i dré kpà adrészó Àbàrámà ni ànzi 'i dhi.

⁶Di, tágba Mèlikisèdékè nda dré angázó Lévi ni surú lésè ko dhi, kisú tá ína Àbàrámà ni dímè akódhì drígásè. Gò dré tà taní bhàzo dhya Gíká ni lazikúlì ki kisulépi nda dri.

⁷Ngóró mà dré nile be dhi tíni dhi, dhya adrélèpi tà taní bha dhi kàdrì, dhya adrészó tà taní bha driá dhi ni lavú.

⁸Lévi ànzi adrébhá dímè kisú nda i àyikya móndí adrébhá dràle dràdrà dhi 'i. Di, Mèlikisèdékè dímè kisulépi nda ína dhya Gíká ni Kúlí dré adrészó tàá dhi, akódhì lídrì íbe kóná vésè kólyá dhi 'i.

⁹À ní kítswá ndìndì tàá dhi, Lévi ànzì adrébhá dímè kisú nda ì fè tá àyi kí tändi kí dímè Mèlikìsèdékè dré àyi kí tábhí Àbàrámà ní láti 'ásè.

¹⁰Tàko ko, lókyá Mèlikìsèdékè dré tá Àbàrámà ní dímè kisúzó dhi sè dhi, Lévi tá rè dhu áyi tábhí Àbàrámà ní rúbhá na be.

Yésu kòwánà kàdri` 'i Mèlikìsèdékè ti` ni

¹¹Tátrítrí kúlí Gíká dré tá fèle Ìsérélè ànzì i dré dhi adré áyi totó, tà Lévi ànzì adrébhá kòwánà i ró dhi i dré adrélé 'ole dhi i dri. Di kòwánà nda i kòkítswá tá tà 'o kítswálé tití Gíká mìlésè 'í dhi, lè tá akódhí kògò dhya àzya bha adrélé kòwánà ro ngóró Mèlikìsèdékè tíni, di ngóró kòwánà angábhá Àrónà ní súrú lésè dhi i tíni ko dhi àdho tà sè?

¹²Tàko ko, à kòladzá kòwánà kí tà dhi, adré kpà lèá dhi, à kòladzá tátrítrí kúlí.

¹³Àma kí Mírì mà dré adrészó tà kòdhí kí ta dhi angá tá ína súrú twá lésè. Dhya àlo súrú nda lésè dhi 'o tá àzí àlètárì làga kòwánà ro tàdzí ko.

¹⁴Àngyá ko, mà ní tâle dhi, àma kí Mírì nda angá tá Yúdà ní súrú lésè dhi be. Mósè tà tá àlo súrú nda ní tà dri ko, dré tá adrérà'a kòwánà kí tà ta dhi 'á.

¹⁵Tà mà dré adrélé tâle kòdhí i atsá vélé ngádra 'á tà kònìdhí sè: Kòwánà àzya lású be Mèlikìsèdékè tíni dhi apfò dre.

¹⁶Akódhí nda atsá kòwánà ro, ngóró tolí dré adrélé tâle móndí kí súrú kómvó kí tà sè dhi tíni ko. Be ró dhi, atsá ína kòwánà ro, dré adrélé rìnyí íbe adrészó lídrì ro kóná vésè kólyá dhi sè.

¹⁷Tàko ko, Gíká ní Kúlí adré tâá dhi: «Mí kòwánà 'i kóná vésè kólyá, ngóró Mèlikìsèdékè tíni. »

¹⁸Di Gíká bhà tá tolí àku dhi gàrà dri, tolí nda dré tá adrélé rìnyí àko ìndì tà àko dhi sè.

¹⁹Àngyá ko, Mósè ní tátrítrí kúlí kítswá tá ína tà àlo 'o kítswálé tití bwà ko. Di, nyànomvá dhi, Gíká bhà tá doro tà àku nda ní lavúlépi, mà dré adrészó mì bha ásà dhi dre gò, mà dré adrészó àma kí kisí ànyi akódhí làga tà nda sè.

²⁰Kòdhí íbe dhi, Gíká sì kpà móndrà tà nda ní bhàzo. Móndí àruka i atsá tá kòwánà i ró móndrà àko.

²¹Di, Gíká bhà ína Yésu atsálé kòwánà ro móndrà sè, tâzoá drá dhi: «Mírì sì tá móndrà, ìndì kítswá áyi kúlí ladzá ko: <Mí, kòwánà 'i kóná vésè kólyá. >>

²²Di ásà dhi, Yésu atsá ína dhya adrélépi tà doro lavúlé Gíká dré bhàle ru yìzo móndí íbe dhi ní 'o adrélé ru totó tätä dhi ró.

²³Tátrítrí kúlí zàle dhi, móndí bì dhi i atsá tá kòwánà i ró, dràdrà dré tá adrélé àyi kí àzí kikí dhi sè.

²⁴Di, Yésu adré ína àzí 'o kòwánà ro kóná vésè kólyá, dré adrélé lídrì íbe kóná vésè kólyá dhi sè.

²⁵Dì ásà dhi, akódhi ni kítswá móndyá adrébhá alíle Gíká vélé í sè dhi kí tídri kítswálé tití, í dré adrélé ngbú lídrì íbe adrészó tà zi Gíká tí àyi dré dhi sè.

²⁶Dì Yésu nda, kòwánà kàdrì kítswálépi tití àma sè dhi 'í. Àngyá ko, akódhi lolo, tà àko í rú, ìndì tàkonzì àko. Gíká bhà kpà akódhi twá tàkonzìbhá i rúsè gò, akódhi ni tingázó zá kuru bhù kí lavú.

²⁷Dì, akódhi adré ína tà 'o ngóró kòwánà kàdrì àruka kya tímí ko. Tàko ko, kítú àlo àlo tití i sè dhi, àyi nda i adré mòbòmà fe àyi kí tändi kí tàkonzì kí tà sè 'íká, gò i dré kpà adrészó fèá móndí kí tàkonzì kí tà sè ndò. Dì, akódhi fè ína i mòbòmà ro ngbà 'í vésè àlo móndí kí tàkonzì kí tà sè dre.

²⁸Tátrítrí kúlí adré móndí adrébhá tà íbe yàyà dhi kí bha adrélé kòwánà kàdrì i ró. Dì, móndrà Gíká dré sile tátrítrí kúlí nda ni fèma àmvolésè dhi, bhà ína Gíká ni Mváagó adrélé kòwánà kàdrì kítswálépi tití dhi ró, adrélé kóná vésè kólyá.

Èbérè i 8

Yésu, kòwánà kàdrì` tà ti` dhi` Gíká dré bhàle ru yìzo móndí` i` be dhi ni tà sè dhi 'í

¹Tà kàdrì mà dré adrélé tâle dhi, tà kònìdhì 'í: Àma kòwánà kàdrì lású be kònìni nda íbe. Akódhi nda lirí adrélé Gíká mûrungú dhi ni lirírà opì àdhya ni driágó lésè bhù na.

²Kònàle dhi, adré Gíká ni tà 'o àrà lolo adrészó akódhi ni líndrì bha lána dhi na. Àrà nda, tàbèrènákolò tändi Mírì dré ledélé nì, móndí i dré ledélé ko dhi 'í.

³Kòwánà kàdrì tití adrélé bhàle dhi i, à adré àyi kí bha adrélé ngá fe ìndì mòbòmà fe Gíká dré. Adré dì lèá dhi, àma kí kòwánà kàdrì kàdré kpà ngá íbe fèle Gíká dré.

⁴Kònò akódhi nda kàdré tá kònwa bvò dri dhi, kítswá tá ndìndì adrélé kòwánà ro ko. Tàko ko, kòwánà adrébhá ngá fe Gíká dré ngóró tátrítrí kúlí dré adrélé tâle dhi tímí dhi i be.

⁵Àyi nda i adré àyi kí àzí 'o kòwánà i ró ngá líndrì adrébhá ngá tändi bhù na dhi kí tadhá dhi i sè. Ásà dhi, lókyá Mósè dré tá adrérà'a 'ole tàbèrènákolò ledé dhi 'á dhi, Gíká lazí tá tà akódhi dri, tâzoá dhi: «Mí kònò dóro, mí kòledéró ngá tití dhi i lású be ngóró má dré tadhálé mí dré kòngó drìna dhi tímí. » ⁶Dì, nyànomvá dhi, àzí Yésu dré kisúlè kòwánà àdhya ró dhi ína kàdrì àyikya kí lavú byá. Tàko ko, akódhi adré àyi totó tà 'o móndí kí kòfalé 'á Gíká be, tà tídhí Gíká dré bhàle ru yìzo àyi íbe dhi ni tà sè. Tà tídhí ru yìzo nda kpà kàdrì, tà àku ru yìzo dhi ni lavú. Kòdhi íbe dhi, lazikúlì tà tídhí ru yìzo nda dré adrészó àyi totó driá dhi i kókpà kàdrì, lazikúlì àku dhi kí lavú.

⁷Kònò tà àku Gíká dré tá bhàle ru yìzo móndí íbe nda kàdré tá dóro kítswálé tití dhi, tà adrészó àzya ni ni bha àrà ni 'á dhi ni tá adré yókódhó.

⁸Dì, Gíká kisú tá ína tà kònzi áyi móndyá i véna gò, tâzoá dhi: «Mírì tà dhi: Mí yi rè ká! Lókyá adrélépi alíle dhi sè dhi, má ni tà tídhí ru yìzo tódyá ìsérélè ànzì íbe, ìndì Yúdà ànzì íbe dhi ni bha.

⁹Tà tídhí ru yìzo nda kitswá adrélé ngóró tà àku má dré tá bhàle ru yìzo àyi kí tábhí íbe dhi tíni ko. Lókyá nda kònàdhí sè dhi, má ru tá àyi kí drígá gò, àyi kí adrìzo apfòle Èzèpétò lésè. Dì, ì ka'ì tá àyikya tà má dré bhàle ru yìzo àyi íbe nda ni lebèle ko. Gò má dré gòzo vélé àyi kí tà kisù ko.

¹⁰Dì, Míri tà dhi: Lókyá adrélépi alìle dhi sè dhi, tà tídhí má dré dra bhàle ru yìzo tódyá ìsérélè ànzì íbe nda, tà kònìdhí 'í: Má ni áma tátrítrí kúlì bha àyi drìna, kúlì nda kí tísìzo àyi kí togó na. Má ni mána adré àyi kí Gìká ro, ìndì ì ni àyikya adré áma móndyá i ró.

¹¹Dhya àlo kitswá góle áyi àzya 'í yà, kó ngalè áyi adrúpi 'í yà dhi ni tadhá, tazoá dhi «Mí kònì Míri» dhi ko. Tako ko, àyi nda kí tití áma ni, kídholé móndí tako lavulé àyi kòfalé dhi rú, tsale móndí kàdrì lavulé dhi rú.

¹²Àngyá ko, má ni àyi kí tà kònzi kí tri. Má kitswá góle vélé àyi kí tàkonzi kí tà kisù ko. »

¹³Dì Gìká dré tà ru yìzo nda kòdhí ni zile «tídhí ro» dhi sè dhi, kòdhí adré tadhá dhi, akódhí bhà tà àku ru yìzo nda gára dri dre. Tà bhàle gára dri adrélépi kpà agàle dhi, adré 'ole tavìle.

Èbérè i 9

Tòli` àku adrészó Gìká ni lindrì` bha ásà dhi`

¹Tà àku Gìká dré tá bhàle ru yìzo ìsérélè ànzì íbe nda tá tòli adrészó Gìká ni lindrì bha ásà dhi íbe, túmání àrà lólo bvò dri adrészó akódhí ni lindrì bha lána dhi be.

²Dì à ledé tá tòbèrénákolò, 'a ni ni lakízó 'a be rì. À zi tá 'a ni ni àlo kíle nda ni rú «Àrà lólo dhi». Àrà nda léna dhi, à bhà tá ngá adrészó àtsí tosó sítá dhi, mísá àlo dhi, ìndì mápà fèle Gìká dré dhi íbe.

³Kítá 'ile tòbèrénákolò nda ni 'a lakízó dhi àmvolésè dhi, 'a ni ni rì rú zile «Àrà lólo lavulé dhi» tá be.

⁴Àrà nda léna dhi, à bhà tá àlètárì ledélé órò sè adrészó bénédéle za Gìká dré driá dhi, ìndì kpukúbhú rúbhá ni ni ndryàzo tití órò sè, tà Gìká dré tá bhàle ru yìzo móndí íbe nda àdhya be. Kpukúbhú nda léna dhi, à bhà tá lìdrì ledélé órò sè mánna íbe í léna dhi, kùtù fa Àróna àdhya bí àlú i dré topfòzo driá dhi, ìndì kírà tátrítrí kúlì tísìzo àyi dri, adrébhá tà Gìká dré tá bhàle ru yìzo móndí íbe nda ni tà tadhá dhi íbe.

⁵Kpukúbhú nda drile dhi, à bhà tá kérubímà adrébhá Gìká ni adrema milanzilanzì ro dhi ni tadhá dhi i. Kérubímà nda kí kupfú i zàle dhi, àrà adrészó móndí kí tàkonzi tri dhi tá be. Dì, nyànomvá dhi, mà kitswá tà nda kòdhí kí àndu ngí mìbhalé tí bwà ko.

⁶À kòtobhà ngá tití nda i tòbèrénákolò nda léna kònini dre dhi, kòwánà i adré tá fíle kítú àlo àlo tití i sè 'a ni ni àlo kíle nda léna, adrélé àyi kí àzí 'o.

⁷Dì, kàdré ína 'a ni ni rì kíle nda ni tà sè dhi, kòwánà kí kàdrì adré tá ngbà 'í fíle lána dhi ni. Adré tá ngbà 'í fíle lána vésè àlo kóná àlo sè. Adré tá ngbú fíle kàrì be, adrélé

fèá Gìká dré áyi tändi ni tàkonzì kí tà sè, ìndi móndí kí tàkonzì i dré tá 'ole tà nìma ko na dhi kí tà sè.

⁸Kòdhí Tírí Lólo adré tá tadhá dhi, à nzì tá láti adrészó fíle Àrà lólo lavúlé nda léna dhi rè ko, tábèrènákolò ni àlo nda dré tá rè dhu adrérà'a be dhi 'á.

⁹Kòdhí adré lókyá ándrò kònìdhí ni tà tadhá. Adré tadhá dhi, ngá kòwánà i dré adrélé fèle mòbòmà íbe Giká dré dhi i kitswá móndyá adrébhá lìsámbò nda kí 'o dhi kí togó temvé kitswálé tití dhi bwà ko.

¹⁰Àngyá ko, ngá i dré adrélé fèle Giká dré nda i ngbà 'í mányàngá i ngá mvùle dhi íbe dhi 'i. Tà i dré adrélé 'ole nda i ngbà 'í tà twátwa adrészó móndí kí rúbhá kí temvé dhi 'i. À adré tòlì nda kí 'o kònìnì, tsàle lókyá Giká dré tà tídhí dhi ni bhärà'a dhi 'á.

Krísto ni kàrí' kitswá móndí́' kí togó kí temvé kitswálé tití

¹¹Dì, nyànomvá dhi, Krísto apfò kòwánà kàdrì ro tà dóro atsábhá dhi kí tà sè dre. Fí kpà tábèrènákolò kàdrì kitswálépi tití àlo ni ni lavú dhi léna dre. Tábèrènákolò nda, tábèrènákolò bvò kòndí àdhyá móndí i dré ledélé àyi kí drígá sè dhi 'i ko. Be ró dhi, tábèrènákolò nda, tábèrènákolò bhù àdhyá 'i.

¹²Akódhí fí lána ndriàgo kí kàri tíàgo kya be fèle dhi sè ko. Be ró dhi, fí ína ngbà 'í vésè àlo Àrà lólo lavúlé dhi léna áyi tändi ni kàri sè, kitswálé àma kí apá tàkonzì ni rinyí lésè kóná vésè kólyá.

¹³Tátrítrí kúlí zàle dhi, à adré ndriàgo kí kàri tíàgo kya be dhi ni adó tíkàrá zàle dhi ni tópfó be, ligile móndyá adrébhá ndí ró àyi kí tàkonzì sè dhi i drísè, kitswázó àyi kí rúbhá kí temvé, àyi kí 'ozo atsálé lólo Giká dré.

¹⁴Kàdré kònìnì dhi, Krísto ni kàri adré di vélé àma kí togó kí temvé tà mà dré 'ole adrébhá tá àma kí dri lìle dràdrà kisú dhi i lésè, mà kàdréró Giká adrélépi lídrì ro dhi ni tà 'o be dhi bvó! Tàko ko, Tírí Lólo adrélépi kóná vésè kólyá dhi ni rinyí sè dhi, Krísto fè áyi tändi mòbòmà kitswálépi tití dhi ró Giká dré àma kí tàkonzì kí tà sè.

¹⁵Ásà dhi, Krísto nda dhya adrélépi áyi totó tà 'o móndí kí kòfalé 'á Giká be, tà tídhí Giká dré bhàle ru yìzo àyi íbe dhi ni tà sè dhi 'i, móndyá Giká dré azílé dhi i kòkisúró tà dré lazílé àyi dré tàyilé ro dhi, adrészó ába kóná vésè kólyá. Tàko ko, Krísto drà àyi kí apá àyi kí tàkonzì i dré tá 'ole tà àku ru yìzo dhi zàle dhi i lésè dre.

¹⁶Kàdré wárágà tisile tàyilé ngá kí tà sè dhi ni tà sè dhi, adré lèá dhi, à kòtadhá rè zyà dhya wárágà nda ni tisilepi dhi drà dre káyà dhi 'íká.

¹⁷Tàko ko, à kitswá tà 'o wárágà nda sè bwà ko, dhya nda dré rè dhu adrérà'a lídrì íbe dhi 'á. À ni ngbà 'í kitswá tà 'o ásà dhya nda ni dràma àmvolésè.

¹⁸Tà nda sè dhi, Giká bhà tá ndìndì tà àku ru yìzo móndí íbe dhi kàri sè.

¹⁹Àngyá ko, Mósè kòlongó tà tití tátrítrí kúlí dré tá adrélé tâle à kò'o dhi i móndyá tití i dré dre dhi, dré tíàgo kí kàri ndriàgo kya be dhi ni adózó amúlé yì be gò, ligízoá búkù tátrítrí kúlí nda àdhyá dri, ìndi móndyá tití nda i drísè, fanzì rú zìle ìsópè dhi sè, ìndi kítá kà dhi sè.

²⁰Gò dré tazoá dhi: «Kònìdhì, kàrì tà Gìká dré bhàle ru yìzo àmì íbe dhi àdhya 'i. »

²¹Dì dré kpà kàrì nda ní adózó ligile tábèrènákolò dri, ìndì ngá tití adrészó Gìká ní lindrì bha ásà dhi i drisè.

²²Tà bati ró dhi, tátrítrí kúlí adré lèá dhi, à kàdré ànyíanyí ngá tití dhi kí temvé kàrì sè. Àngyá ko, kàrì kòkutú ko dhi, Gìká kitswá móndí kí tàkonzi tri ko.

²³Dì adré tá lèá dhi, à kàdré ngá lindrì adrébhá ngá tändi bhù na dhi kí tadhá nda kòdhì kí temvé kònini. Adré dì lèá dhi, à kàdré ngá tändi bhù àdhya kí temvé móbòmà doro móbòmà nda kí lavúbhá dhi i sè.

²⁴Tako ko, Krísto fí tá àrà lolo ledélé móndí kí drígá sè, adrélépi tá ngá lindrì ngá tändi bhù na dhi àdhya ró dhi léna ko. Be ró dhi, fí ína bhù ní tändi na gò, pfole adrélé Gìká kandrá àma kí tà sè.

²⁵Fí tá kpà bhù na kitswálé áyi fe móbòmà ro vésè be bì, ngóró kòwánà kí kàdrì dré adrélé file Àrà lolo lavulé dhi léna kóná àlo àlo tití i sè kà'wá kí kàrì sè dhi tíni ko.

²⁶Kònò Krísto kàdré tá 'òá kònini dhi, a ní tá lèá dhi, kàdré kizà nya vésè be bì kídhólé bvò ní bhàma lésè. Dì, nyànomvá, lókyá kùdù kònìdhì sè dhi, Krísto apfò ngbà 'í vésè àlo áyi fe móbòmà ro, kitswálé tàkonzi kí tà 'o akilé dhi dre.

²⁷Adré lèá dhi, móndí àlo àlo tití dhi i kòdrà vésè àlo gò, àmvolásà dhi, Gìká kòtaró áyi kí tàbvó.

²⁸Kókpà kòdhì tíni, Krísto fè i dràle móbòmà ro vésè àlo, kitswálé móndí zyandre dhi kí tàkonzi kí tingá. A ní kpà go apfole vésè ní ri sè. Dì, a ní go apfole kitswálé tàkonzi tingá dhi bvó ko. Be ró dhi, a ní go apfole kitswálé lídrì kóná vésè kólyá dhi ní fe móndyá adrébhá áyi letè dhi i dré.

Èbérè i 10

Krísto fè i dràle móbòmà ro ngbà 'í vésè àlo

¹Tà Mósè ní tátrítrí kúlí dré adrélé tali dhi i ngbà 'í tà doro adrébhá alìle dhi kí lindrì 'i, tà doro tändi nda 'i ko. Ásà dhi, tágba à kàdré móbòmà fe Gìká dré kóná àlo àlo tití i sè landè àko ró yà dhi, tátrítrí kúlí nda kitswá tädzí móndyá adrébhá àyi kí kisí Gìká kandrá dhi kí 'o kitswálé tití ko.

²Kònò kòkitswá tá móndyá adrébhá lìsámbò 'o nda kí togó temvé kitswálé tití 'í dhi, i kitswá tá góle vélé àyi kí tàkonzi kisù ko gò, à dré móbòmà fèma àyi kí tà sè dhi ní tayízó.

³Tà bati ró dhi, móbòmà adrélé fèle kóná àlo àlo tití i sè nda i adré móndyá nda kí tàkonzi 'o agálé àyi léna dhi nì.

⁴Àngyá ko, tíago kí kàrì ndriàgo kya be dhi kitswá tädzí tàkonzi tingá ko.

⁵Dì ásà dhi, Krísto dré tá adrérà'a 'ole alìle bvò kònìdhì lé dhi 'á dhi, tà tá Gìká dré dhi: «Mí lè tá móbòmà i ìndì ngá adrélé fèle móbòmà ro mí dré dhi íbe kòdhya ko. Dì, mí ledé mína rúbhá má dré kitswálé fèle dhi kòdhya.

⁶Mí ka'ì tá kà'wá adrélé zàle dhì i, ìndì mòbòmà adrélé fèlè tàkonzì kì tà sè dhì íbe kòdhya ko.

⁷Dì má dré tázoo dhi: «Á! Gìká, ma kònìdhi. Má alì tà mí dré adrélé lèle má kò'o dhì nì 'o, ngóró tisile áma tà sè ámi búkù pàle dhì léna dhi tíni. »»

⁸Dì Krísto nda tà tá rè zyà dhi: «Mí lè tá mòbòmà i, ngá adrélé fèlè dhì i, kà'wá adrélé zàle dhì i, ìndì mòbòmà adrélé fèlè tàkonzì kì tà sè dhì íbe kòdhya ko. Mí ka'ì tá kpà ngá nda i ko. » Ta tá kònìni, tágba tátrítrí kúlí dré adrészó lèá dhi, à kàdré ngá nda kì fe Gìká dré dhi.

⁹Gò dré tázoo dhi: «Ma kònìdhi. Má alì tà mí dré adrélé lèle má kò'o dhì nì 'o. » Ásà dhì, bhà tá tà àku nda gàrà dri, tà tídhí nda nì bhàzo àrà nì 'á.

¹⁰Dì Yésu Krísto dré tà Gìká dré tá lèle í kò'o dhì nì 'ole dhi sè dhi, Gìká 'o àma atsálé lolo í kandrá, Krísto nì rúbhá fèlè ngbà 'í vésè àlo mòbòmà ro àma kì tà sè dhi sè.

¹¹Tátrítrí kúlí zàle dhì, kòwánà tití dhì i adrén ngbú adrélé àyi kì àzí 'o kítú àlo àlo tití i sè, adrészó mòbòmà fe landè àko ró, tágba mòbòmà nda i dré kítswázó tàdzí móndí kì tàkonzì tingá ko dhi.

¹²Dì, Krísto fè ína i ngóró mòbòmà àlo kwákwá fèlè tàkonzì kì tà sè kítswálépi lókyá tití i sè dhì ró gó, dré lirízó Gìká nì dríágó lésè.

¹³Kidholé lókyá nda sè dhi, adrén lókyá Gìká dré dra áyi kàribhá kì bhàzo adrélé áyi pá zàle dhì nì letè.

¹⁴Tàko ko, mòbòmà àlo kwákwá nda sè dhi, 'o móndyá Gìká dré bhàle twá adrélé ína ró dhì i kítswálé tití kóná vésè kólyá.

¹⁵Tirí Lolo adrén kpà tà nda kì longó kòdhya. Àngyá ko, tà tá rè zyà dhi:

¹⁶«Míri tà dhi: Lókyá adrélápi alìle dhì sè dhi, tà tídhí má dré dra bhàle ru yìzo tódyá àyi íbe dhi, tà kònìdhi 'i: Má nì áma tátrítrí kúlí bha àyi kì togó na, kúlí nda kì tisìzo àyi drìna. »

¹⁷Gò tàá dhi: «Má kítswá góle vélé àyi kì tàkonzì kì tà kisù, tà kònzi i dré 'ole dhi íbe ko. »

¹⁸Dì Gìká kòtri móndí kì tàkonzì i kònìni dhi, adrén dì lèá dhi, à kògò vélé mòbòmà fe tàkonzì nda kì tà sè ko.

Àma kì kisima ànyi Gìká làga dhi

¹⁹Dì áma adrúpi i, mà dré adrélé Yésu nì tà ka'ì báti dhi sè dhi, mà kítswá adrélé fíle Àrà lolo lavúlé dhi léna akódhi nì kàrì sè.

²⁰Mà adrén fíle lána láti tídhí lídrì ro dré nzìle àma dré kítswázó lavúlé kítá 'ile dhi 'ásè dhi 'ásè. Kítá 'ile nda, akódhi nì rúbhá 'i.

²¹Dì ásà dhi, mà dré adrélé kòwánà kàdrì adrélápi Gìká nì dzó drìle dhi íbe dhi sè dhi,

²²mà kàdré àma kí kisí ànyi Gìká làga togó dório adrélépi akódhí ni ka'i báti dhi sè. Tàko ko, akódhí temvé àma kí togó, àma kí tàkonzi nini tingázó dre. Dzì kpà àma kí rúbhá yí tsérèle dhi sè dre.

²³Mà kàdré kpà trôle gígí ro tà mà dré adrészó mì bha ásà, adrészó kpà longoá dhi rú. Tàko ko, Gìká tà nda ni lazilépi dhi kitswá adrélé ka'ile togó wáyi sè.

²⁴Mà kàdré kpà àma kí adrúpi kí tà kisù, adrészó ru kodzó àma kòfalésè, mà kàdréró tà dório 'o lèle sè.

²⁵Mà kòtayí adrema ru kimó àma kí adrúpi íbe dhi ngóró móndí àruka kya tíní ko. Be ró dhi, mà kàdré ru tímbarà àma kòfalésè àma kí tà ka'ika'i na. Mà kàdré vélé 'oá adrészó lile ába dridri, mà dré adrérà'a kítú Mírì dré dra agòzo dhi ni no atsárà'a ànyi dhi 'á.

²⁶Dì, mà kògò adrélé tàkonzi 'o ìze sè mà dré tà báti kisúzó nile dhi àmvolésè dhi, mòbòmà kitswálépi tàkonzi nda kí tingá dhi ni adré vélé yókódhó.

²⁷Mà kàdré 'oá kònini dhi, tayí ngbà 'í tirì àma dré, mà dré adrérà'a Gìká ni tàbvó tama letè, túmání àtsí kàdrì dra akódhí ni kàribhá kí zálepi vèle dhi be dhi 'á.

²⁸Tàko ko, dhya àlo kògà Mósè ni tátrítrí kúlì 'ole gó, móndí rì yà, kó ngalè na yà tà nda ni nobhá mì sè dhi ì dré akódhí ni asikizo dhi, à adré akódhí nda ni 'o dràle, kizà ni ni bha àko ró.

²⁹Kàdré kònini dhi, mì adré kisúá dhi, à ni di vélé tà ño dhya adrélépi Gìká ni Mvá ni ayízé, adrélépi kàrì tà Gìká dré bhàle ru yìzo dhi àdhyá áyí 'olepi atsálé lolo dhi ni no ngá tàko ró, ìndì adrélépi Tirí Gìká dré fèlé áyí togó taní sè dhi ni lodhá dhi dri ngíni?

³⁰Àngyá ko, mà ni dhya tà kònì kí taledi dhi be: «Má ni móndí kí tà kònzi kí vúdrì logó àyí dré dhi ma. Má ni tà logó àyí dré tà ì dré 'ole dhi ì tí dhi ma. » Akódhí nda tà kpà dhi: «Mírì ni áyí móndyá kí tàbvó ta. » ³¹Dhèle Gìká lídrì ro dhi drigá dhi, tà adrélépi tirì fe gàle dhyá léna dhi '!

³²Mì kisù rè lókyá mì dré tá Gìká ni ngádra kisúzó ngá kazá àmì kí togó na dhi ká! Lókyá nda sè dhi, tágba mì dré tá adrészó kizà nya dhi, mì adré tá àmì kí togó tsí àdzú kàdrì dhi na.

³³Lókyá àruka i sè dhi, à adré tá àmì kí lodhá, adrészó àmì kí mì pfo móndyá tití i kandrá. Lókyá àruka i sè dhi, mì adré tá àmì kí totó tätä móndí adrébhá kizà nya kònini dhi làga.

³⁴Mì adré tá kizà do àmì kí togó na móndí 'ile bádzó na dhi kí tà sè. À kàdré àmì kí ngá topá dhi, mì adré tá tà nda ni ka'i dório, adrészó lenzélé ásà. Tàko ko, mì ni tá taledi dhi, àmì tá àmikya tà dório ngá nda kí lavúbhá dhi íbe, ìndì tà nda ì kitswá akílé bwà ko dhi be.

³⁵Dì ásà dhi, mì kòbhe tà mì dré ka'ile báti dhi ko. Àngyá ko, mì ni làgí mûrungú kisú ásà.

³⁶Adré dì lèá dhì, mì kàdré togó tsì, adrészò tà Gìká dré adrélér lèle mì kò'o dhì kì 'o, mì kòkisúró tà dré lazilé dhì be dhì bvó.

³⁷Tàko ko, ngóró Giká ni Kúlí dré adrélér tâle dhì tíni: «Tayí ngebà í lókyá tsà, dhya adrélérpi alìle dhì dré alìzo. Kitswá ìna gile ko.

³⁸Dhya adrélérpi gyägya má mìlésè dhì ni adré lídrì íbe áyi tà ka'ika'ì sè. Di, kògò ìna bvólé ro dhì, àma togó kitswá kinilé akodhì ni tà sè ko. »

³⁹Àma ró dhì, àma móndí adrébhá gòle bvólé ro kitswálé dràdrà kisú dhì 'i ko. Be ró dhì, àma àmaka móndí adrébhá Giká ni ka'ì gò adrészò adrélér dhì 'i.

Èbérè i 11

Tà ka'ika'ì

¹Dhya adrélérpi tà ka'ika'ì íbe bâti dhì adré ka'ia tâle dhì, í ni dra tà í dré adrészò mì bha ásà dhì kì kisú káyà dhì. Adré kpà niá tâle dhì, tà í dré kitswálé nôle mì sè ko dhì kì dra ru 'o káyà dhì be.

²Atú dhì, àma kì tâbhí ì ka'ì tá Giká kònini gò, akodhì dré àyi kì tà bhàzo kuru ásà.

³Tà ka'ika'ì sè dhì, mà ni tâle dhì, Giká bhà bhù i bvò be áyi kúlí sè dhì be. Di ngá adrélér nôle mì sè dhì i apfò ngá adrélér nôle mì sè ko dhì i lésè.

⁴Tà ka'ika'ì sè dhì, Àbélè fè tá Giká dré mòbòmà dóro dhì Kàyínà àdhya ni lavú. Akodhì ni tà ka'ika'ì nda sè dhì, Giká ka'ì ngá dré fèlè nda i gò, akodhì ni tà bhàzo kuru, akodhì ni zìzo móndí gyägya dhì ró. Di tà ka'ika'ì nda sè dhì, Àbélè adré rè dhu tà ta àma dré, tágba dré dràzo dhì.

⁵Tà ka'ika'ì sè dhì, Giká do tá Ènókà í véna, kòdraró ko dhì bvó. Di à dré gózo vélé akodhì ni kisú ko, Giká dré tá akodhì ni dòle í véna dhì sè. Àngyá ko, Giká ni Kúlí adré tâá dhì, drìdrì Ènókà nda ni dòzo dhì kandrá dhì, akodhì ni tà 'o tá Giká ni togó kinilé.

⁶Di, tà ka'ika'ì àko dhì, dhya àlo kitswá ìna Giká ni togó 'o kinilé bwà ko. Tàko ko, lè dhya ángùdhi adrélérpi áyi kisí ànyi Giká làga dhì kàdré ka'ia dhì, akodhì be, ìndì adré làgí mûrungú fe móndyá tití adrébhá áyi nda togó wáyi sè dhì i dré káyà dhì.

⁷Tà ka'ika'ì sè dhì, Giká dré tá tâ lazizó Nówè dri tà kitswálé nôle rè ko dhì kì tà sè dhì, Nówè ka'ì tá Giká ni kúlí nda 'ole gò, bwátù kàdrì dhì ni ledézó kitswázó áyi súrú tìdrí. Di ásà dhì, bhà tá tâ móndyá bvò àdhya i dri gò, dré atsázó gyägya Giká mìlésè áyi tà ka'ika'ì nda sè.

⁸Tà ka'ika'ì sè dhì, Giká dré tá Àbàramà ni zìzo lìle bvò dré kitswálé kisulé tâyilé ro dhì na dhì, Àbàramà ka'ì tá Giká ni kúlí nda 'ole gò, dré lìzo, tágba dré tá nìzoá ngalè i adré tâ lìle ángolé ya dhì ko dhì.

⁹Akodhì ni tà ka'ika'ì nda sè dhì, dré bhà mòzo adrészò móndí twá ro bvò Giká dré tâ lazilé i dré nda na. Gò dré adrészò wémà i zâle, ngóró Isákà i Yàkóbhò be tâ lazilé nda ni kisúbhá tâyilé ro dhì i dré kpà 'ole dhì tíni.

¹⁰Tàko ko, adré tá bhàandre Gìká dré tá tà ni ni kisùzo drìdrì gò, sìzoá pá ìbe tätä dhi ni letè.

¹¹Tà ka'ika'i sè dhi, Àbàramà nda kisú tá rìnyí mvá tìzo, tágba akódhi ni kóná dré tá lavúzó, ìndì Sárà ni tändi dré tá adrészó kóngdó ro dhi. Àngyá ko, nò tá Gìká tà nda ni lazilépi í dré dhi ngóró dhya í dré kitswálé ka'ile togó wáyi sè dhi ró.

¹²Dì ásà dhi, agó àlo adrélépi tá ànyí dràdrà mìle nda lésè dhi, ànzì ì dré topfòzo lizolé zyandre ró, ngóró bhibhinyà bhù mìbhalé 'á dhi i tíni, ìndì sìnyí yìandré mìle kitswálé nàle bwà ko dhi tíni.

¹³Móndyá tití nda kòdhi ì adré tá atsílé tà ka'ika'i na, tsàle lókyá ì dré todràr'a. Ì kisú tá tà Gìká dré lazilé dhi i ko. Dì, ì nò tá àyikya tà lazilé nda i vwàvwà ro, tà nda kí ka'izo dóro. Ì ka'i tá kpà tâle dhi, àyí tá ngóró móndí twá bvò àyikya ró dhi àko dhi i tíni.

¹⁴Móndyá adrébhá tà ta lású be kònini dhi ì adré tadhá ngádra 'á dhi, ì adré bvò àzya nda adrélé àyikya ró.

¹⁵Kònò ì kàdré tá bvò ì dré tá tayilé dhi ni tà kisù dhi, ì ni tá kitswá láti kisú nzìzo bvò nda na.

¹⁶Dì, ì adré tá àyikya bvò dóro lavulé dhi ni nda kisulé kòdhya. Kòdhi adré tâá dhi, ì adré tá bvò bhù na dhi ni nda kòdhya. Dì ásà dhi, Gìká kanyò àko ì dré adrélé áyí zi àyí kí Gìká ro dhi sè. Tàko ko, akódhi ledé bhàandre àyí dré dre.

¹⁷Tà ka'ika'i sè dhi, Gìká dré tá Àbàramà ni tabhìzo dhi, Àbàramà fè tá ìsákà mòbòmà ro akódhi dré. Dì akódhi tà Gìká dré tá lazilé dhi kí kisulépi nda adré tá 'ole áyí mváagó àlo kwákawá dhi ni fe dràle,

¹⁸tágba Gìká dré tá tâzoá drá dhi «À ni ngbà 'í ìsákà ni ànzì kí zi ámi ànzì i ró dhi kòdhya» dhi. ¹⁹Àbàramà adré tá ína kisùá dhi, tágba ìsákà kòdrà yà dhi, Gìká rìnyí ìbe kitswázó akódhi ni tingá dràdrà lésè. Dì à ni kitswá tâá kúlì alaala sè dhi, Àbàramà gò áyí mváagó nda ni kisú ngóró móndí tingálé dràdrà lésè dhi tíni.

²⁰Tà ka'ika'i sè dhi, ìsákà zi tá tà taní Gìká tí Yàkóbhò i dri Èsawù be tà adrébhá tá alìle dhi kí tà sè.

²¹Tà ka'ika'i sè dhi, Yàkóbhò dré tá adrér'a 'ole dràle dhi 'á dhi, zi tá tà taní Gìká tí Yòséfà ni ànzì àlo àlo tití dhi i dri. Gò dré Gìká ni lindrì bhàzo, í dré tá adrér'a áyí agò áyí kùtù fa dri dhi 'á.

²²Tà ka'ika'i sè dhi, Yòséfà dré tá adrér'a ànyí dràdrà mìle dhi 'á dhi, longó tá ìsérélè ànzì kí apfòma Èzèpétò lésè dhi ni tà gò, dré tà i dré tá lèle à kò'o áyí fà ni tà sè áyí dràma àmvolésè dhi ni tà lazizó.

²³Tà ka'ika'i sè dhi, Mósè ni tibhá ì zù tá akódhi mbă na akódhi ni tìma àmvolésè. Tàko ko, ì nò tá dhi, mvámvá nda ni tà avé tò. Ì ro tá kpà ngá, ì dré tá ópí kàdrì ni kúlì gàle 'ole dhi sè ko.

²⁴Tà ka'ika'ì sè dhi, Mósè nda dré tá mbàzo atsálé kàdrì dhi, gà tá à kàdré áyi zi ópí kàdrì, Fàrawò ni zapi ni mvá ro dhi rè.

²⁵Dì kipè tá kizà nyàma túmání móndyá Giká àdhya íbe dhi kòdhya, lenzema tàkonzi ni tà sè lókyá tsà sè dhi ni àrà 'a.

²⁶Akódhì mìlésè dhi, kanyò mvòle Krísto ni tà sè dhi tá dóro lavúlé, ngá làgí be kàdrì Èzèpétò na dhi kí kisúlé dhi rúsè. Àngyá ko, adré tá mì bha làgí mûrúngú í dré kitswálé kisúlé dhi dri.

²⁷Akódhì ni tà ka'ika'ì nda sè dhi, apfò tá Èzèpétò lésè ópí kàdrì ni togóaswa ni ro àko ró gó, dré áyi togó tsìzo lìzo ába drìdrì, dré tá adrélé Giká kitswálé nòle mì sè bwà ko dhi ni no dhi sè.

²⁸Tà ka'ika'ì nda sè dhi, tà tá ìsérélè ànzi i dré dhi, i kò'o gwányá Pásikà àdhya, kàrì ligìzo dzóti fa i rúsè, kitswálé ángéló adrélépi dràdrà fe dhi kòtupfúró àyi kí ànziàgo kàyo ró dhi i todràle ko dhi bvó.

²⁹Tà ka'ika'ì sè dhi, ìsérélè ànzi i zya tá yìandre Kika, ngóró à dré adrélé atsílé àrà fà ro dhi 'ásè dhi tini. Dì, Èzèpétò i kòtabhì tà nda 'ole dre dhi, yìandre nda dré anzízó àyi drísè rùkù àyi kí tupfú todràle.

³⁰Tà ka'ika'ì sè dhi, ìsérélè ànzi i tatsí tá Yéríkò làgásè kúrúkúrú kítú nzi-drì-rì gó, bhàandre nda ni zéríbà dré adàzo kìní mi.

³¹Tà ka'ika'ì sè dhi, Rábà, tòkó zàràbhù ro dhi ka'ì tá ìsérélè ànzi mûle lùzu ró dhi i dòle i véna gó, à dré akódhì ni pfùzo dràle túmání móndyá ligíbhá Giká rú dhi íbe ko.

³²Dì má ni go vélé tàá ngíni? Lókyá má dré kitswázó tà ta Gèdèyónà ni tà dri, Bárakà ni tà dri, Sàmösónà ni tà dri, Yefétà ni tà dri, Dàwídì ni tà dri, Sàmùwélè ni tà dri, ìndì pròfétà kí tà dri dhi yó.

³³Àyi nda kí tà ka'ika'ì sè dhi, i bhu tá àdzú òpí kí lavúzó, i 'o tá tà gyágya i, i kisú tá Giká dré tá lazílé dhi i, i tabhó tá kàmì kí sibhálé i,

³⁴i kidrá tá àtsí adrélépi kòle rìnyi ró dhi, i lapá tá móndí kí sápí i sîlésè. Àyi tà íbe yàyà dhi i atsá tá rìnyi ró. I atsá tá àgo tòmbátòmba i ró àdzú na, àyi kí kàribhá angábhá bvò twá i lésè dhi kí ladró.

³⁵Tòkó i gò tá àyi kí móndí tá dràbhá dhi kí kisú ngóró móndí tingálé dràdrà lésè dhi i tini. Móndí àruka i tayí tá àyi adrélé rúbhá 'ole aswálé gó, i dré todràzo. I gà tá à kàpá àyi dhi rè, i kòngaró dràdrà 'ásè lídrì dóro lavúlé dhi ni kisú be dhi bvó.

³⁶Àrukabhá ni i tayí tá àyi adrélé gùle, adrélé tswàle, adrélé 'ile nyìrì sè, adrélé bhèle bâdzó na.

³⁷À lebhé tá àruka ni i todràle kírà sè. À tisì tá àruka ni i 'a be rì. À tupfú tá àruka ni i todràle sápí sè. Àruka ni i tatsí tá lemerèbhá i ró kíní kábilígyà kya ndri íbe asólé àyi rú dhi íbe. I tayí tá àyi adrélé mì pfòle, adrélé 'ole kònzi.

³⁸Ì tatsí tá duku i 'ásè ìndì kòngó i drísè, adrélé àyi kí tuzù kírà gõ i 'ásè, ìndì bhú kìní zàle dhi i 'ásè. Tágba dré tá adrészó kònìní dhi, móndyá bvò kòndì àdhyá i kítswá tá àyi nda kí lindrì sè ko!

³⁹Móndyá tití nda kòdhí kí tà ka'ika'i sè dhi, Gíká bhà tá àyi kí tà kuru. Dí, i kisú tá àyikya tà dré tá lazilé dhi ko.

⁴⁰Tako ko, Gíká bhà tá tà dóro lavulé dhi zùle àma dré, kítswázó àma kí 'o kítswálé tití túmání àyi íbe dhi bvó.

Èbérè i 12

Gíká ní ànzí kí lotoma

¹Dí àma ró dhi, àma móndyá zyandre àyi kí tà ka'ika'i tadhábhá nda íbe kimólé àma làgásè kúrú. Dí ásà dhi, lè mà kòbhe àma rúsè ngá lanzì tití adrébhá àma kí kíkí dhi i, túmání tàkonzì adrébhá àma kí ti'i dhi íbe, mà kàdréró angú Gíká dré bhàlé àma kandrá dhi ni ra landè àko ró.

²Mà kàdré kpà àma kí mì bha Yésu dri. Tako ko, akódhí nda dhya láti nzilepi àma dré adrészó Gíká ní ka'i dhi 'i, ìndì dhya adrélèpi àma kí 'o kítswálé tití àma kí tà ka'ika'i na dhi 'i. Akódhí dré tá kólénzé Gíká dré bhàlé i kandrá dhi ni nôle dhi sè dhi, ka'i tá kizà nyàle fa kípakipa dri, kanyò ni ni nòzo tà tako ró gó, dré lirízó Gíká ní lirírà opì àdhyá ni dríágó lésè.

³Mì kisù rè ngalè akódhí mvò tá tàkonzìbhá ligibhá í rú kònìní dhi kí tà ngíni ya dhi ká, mì kòkítswáró landèle àmi kí togó tayízó lanzile ko dhi bvó.

⁴Tako ko, àdzú mì dré adrélé bhùle tàkonzì íbe kòdhí léna dhi, mì bhu rè tsàlé àmi kí kàrì dré kutúrà dhi na ko.

⁵Mì tivì kúlí Gíká dré tâle àmi kí kodzozó áyi ànzí i ró dhi dre? Akódhí tà dhi: «Áma mvá, Míri kàdré ámi lotó dhi, mí kònò tà nda tà tako ró ko. Kàdré ámi tàkonzì tadhá mí dré dhi, mí kòtayí ámi togó lanzile ásà ko.

⁶Tako ko, Míri adré móndyá tití í dré adrélé lèle dhi kí lotó kòdhya. Adré kpà tà ño móndyá tití í dré adrélé ka'ile áyi ànzí i ró dhi i dri. »

⁷Gíká kàdré di àmi kí lotó dhi, mì kàdré togó tsì, adrészó kizà mì dré adrélé nyàle nda kí mvo. Gíká adré àmi kí 'o ngóró áyi tändi ni ànzí i tíni. Tako ko, mvámavá àlo atá ni dré adrészó lotóá ko dhi tsì be?

⁸Dí, Gíká kàdré àmi kí lotó ngóró dré adrélé 'ole áyi ànzí tití dhi kí tà sè dhi tíni ko dhi, kòdhí adré tadhá dhi, àmi akódhí ni ànzí 'i báti ko. Be ró dhi, àmi àmikya bákólyá ànzí 'i.

⁹Àma tití dhi i tá atá bvò dri adrébhá tá àma kí lotó dhi íbe gó, mà dré adrészó àyi kí lindrì bha. Kàdré kònìní dhi, lè mà kàdré di vélé àma kí bha àma kí Atá bhù na dhi ni rinyí zàle, mà kàdríró be dhi bvó!

¹⁰Àma kí atá bvò dri nda i adré tá àma kí lotó lókyá tsà sè, ngóró dré tá adrélé doro àyi mìlésè dhí tíni. Di, Gìká adré ína àma kí lotó ngóró dré adrélé doro àma dré dhí tíni, mà kàtsáró lolo ngóró i dré adrélé lolo dhí tíni.

¹¹Dhya ángùdhí adrélé lotolé dhí adré tà nda ní no lókyá nda sè dhí ngóró tà adrélépi arí fe dhí ró ko. Be ró dhí, adré ína tà nda ni no ngóró tà adrélépi kizà fe dhí ró. Di, àmvolásà, à kòlotó akódhí nda kitswálé tití dre dhí, a ní lò'wa doro 'a bí, adrészò tà gyágya 'o tà kìdríkìdrí na.

¹²Di ásà dhí, lè mì kògò rìnyí fe àmí ki drígá toròbhá dhí i dré, ìndì àmí ki pá landèbhá dhí i dré.

¹³Mì kàdré kpà láti lotó àmí kí pá i dré, móndí pá íbe yàyà dhí i kàtsáró mèrèkpè i ró ko, be ró dhí, i kàdríró be dhí bvó.

Gìká ní gàma ko dhí

¹⁴Lè mì kàdré láti nda adrészò tà kìdríkìdrí íbe àmí kòfalé móndyá tití dhí íbe. Mì kàdré kpà àmí ki fe adrélé lolo Gìká dré be. Tàko ko, dhya áyi fèlepi adrélé lolo Míri dré ko dhí, kitswá ína akódhí ní no ko.

¹⁵Mì kònò doro, dhya àlo àmí kòfalé dhí kòtayíró i vwàle Gìká ní togó taní rúsè ko. Dhya àlo kòtayí kpà áyi togó atsálé kùdzíkùdzi ko, tà kùdzí nda kàtsáró kpà móndí áruka bí dhí i rú, àyi ki 'o atsálé ndí ró ko.

¹⁶Mì kònò kpà doro, dhya àlo àmí kòfalé dhí kò'oró ndòtò tà ko, ìndì kògàró Gìká ní tà Èsawù àdhya tíni ko. Tàko ko, Èsawù nda lagí tá ína tà i dré tá kitswálé kisúlé tàyilé mvá kàyo àdhya ró dhí ngbà 'í mányàngá mvá tsà dhí sè.

¹⁷Ngóró mì dré nile be dhí tíni dhí, àmvolásà dhí, dré gózo tódhyá tà taní nda ní le kisúlé gò, à dré gàzoá rè. Ndà tá láti tà nda ní ladzázó, di, kitswá tá ína ko, tágba dré tà nda ní ndàzo mìndra sè bí dhí.

¹⁸Áma adrúpi i, mì kisí tá àmí ànyí kòngó kitswálé tabèle bwà, ìndì adrélépi kòle àtsí ró dhí làga ko. Mì kisí kpà àmí ànyí àrà adrélépi tínimvá ro ìndì ngátsi ró, kàgùmá dré adrészò vile lána dhí làga, ngóró Íserélè ànzí i dré tá 'ole kòngó Sìnayì àdhya na dhí tíni ko.

¹⁹Mì kisí kpà àmí ànyí àrà gòká vòzo gò, kúlí tirí fèlepi dhí ní yòzo lána dhí làga ko. Tàko ko, Íserélè ànzí i dré tá kúlí nda ní yòzo dhí, i lizí tá Gìká ní ti, kòkikíró kúlí nda, kògòrò tà ta ko dhí bvó.

²⁰Angyá ko, i kitswá tá tà kúlí nda dré tá adrélé tâle i kò'o dhí ní mvo bwà ko. Kúlí nda tà tá dhí: «Dhya àlo kòtabè kòngó kònìdhí dhí, kàdré gba kà'wá 'i yà dhí, lè à kòlebhé akódhí nda drâle kírà sè. » ²¹Tà i dré tá nòle nda dré tirí fèle àyi dré tò dhí sè dhí, Mósè ní tändi tà tá dhí: «Má adré lyale tirí dré. »

²²Di, mì kisí àmikya àmí ànyí kòngó Sìyónà àdhya làga, ìndì Yérúsalémà, bhàandré Gìká lídrí ro dhí àdhya bhù na dhí làga. Mì kisí àmí ànyí ángéló lìzolìzo ru kímóbhá adrélé lenzélé dhí i làga.

²³Mì kisí àmì ànyi Gìká nì ànzì kàyo ró ru kìmóbhá, àyi kì rú tísìzo bhù na dhi i làga. Mì kisí àmì ànyi Gìká, móndyá tití dhi kì tàbvó tàlepi dhi làga, ìndì móndyá atsábhá gyágya kitswálé tití dhi kì lìndrì i làga.

²⁴Mì kisí kpà àmì ànyi Yésu adrélépi áyi totó tà 'o móndí kì kòfalé 'á Gìká be, tà tídhí Gìká dré bhàle ru yìzo àyi íbe dhi nì tà sè dhi làga, ìndì akódhi nì kàrì kutulépi, adrélépi tà ta dóro lavulé Ábélè nì kàrì àdhyá rúsè dhi làga.

²⁵Mì kònò dì dóro, mì kògàró dhya adrélépi tà ta àmì dré dhi ko. Tàko ko, móndyá dhya adrélépi tá tà longó àyi dri bvò dri dhi ni gabhá rè dhi i kòlapá Gìká nì tàbvó tama sílésè ko dhi, mà nì dì àmakya lapá ngíningíni ró, mà kàdré àma kì alá dhya adrélépi tà longó àma dri bhù lésè dhi rú dhi?

²⁶Lókyá nda kònàdhì sè dhi, Gìká nì kúlí kízí tá bvò tà tändi ró. Dì, nyànomvá dhi, akódhi lazí kúlí tázooá dhi: «Má kitswá ngbà 'í góle bvò kízí kòdhya ko. Be ró dhi, má nì go tódhyá bvò kì kízí bhù íbe vésè àlo. »

²⁷Kúlí «tódhyá» ìndì «vésè àlo» kòdhì i adré lèá tâle dhi, Gìká nì ngá tití i dré tá bhàle dhi kì kízí tingálé, ngá kitswálé kízílé bwà ko dhi i kàdréró rè dhu be dhi bvó.

²⁸Dì ásà dhi, mà dré adrélé òpì kitswálé kízílé bwà ko dhi nì kisú dhi sè dhi, mà kàdré àwoyà fe Gìká dré, adrészó akódhi ni lìndrì bha akódhi nì ròma sè, ngóró dré kitswálé akódhi mìlésè dhi tíni.

²⁹Tàko ko, àma kì Gìká ína àtsí adrélépi ngá za vèle dhi 'i.

Èbérè i 13

Tà tâle kùdù ro móndyá ka'ibhá kì kodzozó dhi i

¹Lè mì kàdré ru le àmì kòfalésè ngóró adrúpi i tíni.

²Mì kòtivì adrema móndí twá kì ka'i dòle àmì kì dzó na kùmú i ró dhi ko. Tàko ko, móndí àruka adrébhá 'òá kònìnì dhi i ka'i tá ángéló i dòle àyi kì dzó na nìá àko ró.

³Mì kàdré móndí 'ile bădzó na dhi kì tà kisù, ngóró mì adré tá bă nya túmání àyi íbe na tíni. Mì kàdré kpà móndí adrélé mì pfòle dhi kì tà kisù, ngóró mì adré tá kízà nya ayikya tíni na tíni.

⁴Lè móndyá tití dhi i kàdré làmó nì tà bha kuru. Làmó na dhi, mì kàdré àmì kì rúbhá likí adrélé ngbà 'í móndí mì dré mòle dhi i dré. Tàko ko, Gìká nì móndyá adrébhá múná tà 'o dhi kì tàbvó ta, túmání móndyá adrébhá ndòtò tà 'o dhi íbe.

⁵Lè mì kòtayí àmì làfa lovó dré adrélé tindrile dhi ko. Be ró dhi, mì kàdré àmikya lenzélé ngá mì dré adrészó ába dhi kì tà sè. Àngyá ko, Gìká tà dhi: «Má kitswá tâdzí ámì tâ tivì ko. Má kitswá tâdzí ámì tâ tivì ko. »

⁶Dì ásà dhi, mà adré ka'iá bâti tâle dhi: «Míri dhya adrélépi áma ledé dhi 'i. Má kitswá ngá ro àlomvá ko. Móndí kì kitswá àdho tà 'o má rú kòdhya? »

⁷Mì kàdré àmì kì drì kobhá Gìká ni kúlì longóbhá àmì dré dhi kì tà kisù. Mì kàdré lò'wa dóro ì dré adrélé 'ale àyi kì lídrì na dhi kì no, adrészò tà 'o tà ka'ika'i sè àyíkyá tñi.

⁸Yésu Krísto ngóró dré tá adrélé agyá dhi tñi, dré adrélé ándrò dhi tñi, ìndì dré dra adrélé kóná vésè kólyá dhi tñi.

⁹Mì kòtayí àmì kì togó tà adrélé tadhálé twá dhi ì dré adrélé sèle dhi ko. Dóro ni, àma kì togó tayílé adrélé timbale Gìká ni togó taní sè dhi. Di, tolí móndí ì dré adrélé lebèle mányàngá ni tà sè dhi ì kitswá àyi kì togó timbà ko, kitswá kpà àyi kì ledé ko.

¹⁰Àma àlètárì íbe, ìndì kòwánà adrébhá tà 'o Yúdà ànzì kì tábérénákolò na dhi ì kitswá ngá adrélé fèle mòbòmà ro àlètárì nda dri dhi kì nya bwà ko.

¹¹Tàko ko, kòwánà kì kàdrì adré kà'wá kì kàrì do, adrészò file Àrà lolo lavúlé dhi léna fèá tàkonzì kì tà sè gò, à dré adrészò kà'wá nda kì rúbhá za káà ni kivì na.

¹²Di ásà dhi, Yésu nya tá kpà kizà dràzo bhàandre ni kivì na, kitswázó móndí kì temvé atsálé lolo áyi tändi ni kàrì sè. ¹³Mà kàdré di pfòle akódhì véna káà ni kivì na, adrélé kanyò dré mvòle dhi ni mvo.

¹⁴Tàko ko, bvò kònìdhi dri dhi, àma bhàandre adrélépi gile nyo dhi àko. Di, mà adré àmakya bhàandre adrélépi alìle dhi ni letè kòdhya.

¹⁵Di Yésu sè dhi, mà kàdré ngóró lindrì fe Gìká dré, ngóró mòbòmà mà dré adrélé fèle drá dhi tñi. Mòbòmà nda kúlì adrébhá apfòle àma tísè, adrélé akódhì ni rú bha kùle dhi 'i.

¹⁶Di mì kòtivì adrema tà dóro 'o, adrészò kpà àmì kì ngá lanzí móndí ì dré dhi ko. Tàko ko, mòbòmà adrélé fèle lású be kònìni dhi kì tà sè dhi, Gìká ni togó adré kinílé tò.

¹⁷Mì kàdré àmì kì drì kobhá kì kúlì ka'i 'ole, adrészò àmì kì bha àyi kì rinyí zàle. Àngyá ko, ì adré àmì kì likí landè àko ró. Ì ni kpà àzì ì dré adrélé 'ole àmì kì tà sè dhi kì ta Gìká kandrá. Mì kàdré di àyi kì kúlì ka'i 'ole, ì kàdréró àyi kì àzì nda ni 'o arí sè, kizà sè ko. Tàko ko, ì kàdré 'óá kizà sè dhi, tà nda kitswá àmì kì ledé àlomvá ko.

¹⁸Mì kàdré tà zi Gìká tí àma dré. Tàko ko, mà nì dóro tâle dhi, àma kì togó adré àma kì arókì àlomvá ko dhi. Má adré kpà lèá atsílé dóro tà tití ì sè.

¹⁹Lavúlé dhi, mà adré àmì kì kodzó, mì kàdréró tà zi Gìká tí, mà kòkitswáró gòle mbèlè àmì véna.

Kúlì kùdù

²⁰⁻²¹Gìká tingá àma kì Míri Yésu dràdrà lésè gò, akódhì ni 'òzo atsálé kábilígyà likílépi kàdrì dhi ró akódhì ni kàrì kutulépi dhi sè. Kàrì nda sè dhi, 'o tà í dré bhàle ru yìzo móndí íbe dhi kitswálé kóná vésè kólyá. Di Gìká adrélépi tà kìdríkìdrì fe nda kò'o àmì kitswálé tití tà tití ì sè, mì kòkitswáró tà dré adrélé lèle mì kò'o dhi kì 'o. Kàdré kpà tà adrélépi dóro í mìlésè dhi ni 'o àma léna Yésu Krísto sè. Mìlanzilanzì kàdré akódhì dré kóná vésè kólyá! Kàdré kònìni.

²²Áma adrúpi i, má adré àmí kí ti lizí, mì kòka'iró kúlí má dré tísile àmí kí kodzozó kòdhí i dóro. Àngyá ko, má tísì àmí dré ngbà 'í wárágà tsà dhí kòdhya.

²³Má adré lèá mì kònì dhí, à atrì àma kí adrúpi Tímòtéyò bădzó lésè dre. Akódhí kàtsá má vélé mbèlè dhí, mà ní li túmäní akódhí be àmí kí no.

²⁴Mì kofè mòdo àmí kí drì kobhá tití dhí i dré, túmäní móndyá lolo tití Gíká àdhyá ìbe. Áma kí adrúpi angábhá Ìtálíyà lésè dhí ì fè kpà mòdo àmí dré.

²⁵Gíká ní togó taní kàdré àmí ìbe tití!

Yàkóbhò

Yàkóbhò 1

Yàkóbhò nì mòdo fèma

¹Ma, Yàkóbhò, màraba Giká àdhya ìndì Míri Yésu Krísto àdhya ró dhì, má adré wárágà kònìdhì nì tisì súrú mudrí-drì-rì ayibhá bvò wáyi 'ásè dhì i dré. Mòdo àmì dré!

Tà ka'ika'i i tògyá be dhì

²Áma adrúpi i, tà twátwa dhì i kàdré àmì kì tabhì dhì, mì kàdré tà nda kì no ngóró tà adrészó lenzélé ásà dhì i ró.

³Tako ko, mì nì tâle dhì, tà adrébhá àmì kì tà ka'ika'i tabhì dhì i adré àmì kì 'o adrélé togó tsì nì dhì be.

⁴Dì adré lèá dhì, àmì kì togó tsìma nda kàdré tà 'o àmì léna kitswálé tití, mì kòli'wáró àmì kì tà ka'ika'i na kitswálé tití, ìndì tà doro kòpiró àmì àlomvá ko.

⁵Dì, dhya àlo àmì kòfalé dhì kàdré tògyá le kisúlé dhì, lè akódhì nda kàdré tògyá zi Giká tí gò, Giká kòféró drá. Tako ko, Giká adré tà doro fe móndyá tití i dré áyi togó doro sè, tà bha àko ró àyì dri.

⁶Dì, dhya nda dré adrérà'a tà zi Giká tí dhì 'á dhì, lè kàdré zìá tà ka'ika'i sè, tà kayí àko ró í léna. Àngyá ko, dhya ángùdhì adrélépi tà kayí í léna dhì, sù ngóró yìandre nì mì lyà dré adrélé livilé longálé gò, dré adrészó lìle swà ro dhì tini.

⁷Lè dhya lású be kònìnì nda kòkisù ko tâle dhì, í nì ngá kisú Míri vélésè dhì.

⁸Tako ko, akódhì nì ína tà áyi togó lé dhì kì kipèle bwà ko. Nì kpà ngalè í nì 'òá ngíni ya dhì ko.

Móndyá ka'ibhá lemerè ro i`ndì` ngábhá ro dhì kì tà

⁹Lè móndyá ka'ibhá lemerè ro dhì i kàdré àyì kì drì bha kuru, Giká dré àyì kì tà tingálé kuru dhì sè.

¹⁰Dì, móndyá ka'ibhá ngábhá ro dhì i kàdré àyì kì drì bha kuru, Giká dré àyì kì tà tirilé kìnì mi dhì sè. Tako ko, ngábhá kì tà nì akí ngóró mbì pfò àdhya tini.

¹¹Àngyá ko, kitú adré apfòle kèlè, àtsí nì dré adrészó mbì za 'yòle, pfò nì dré adrészó dhèle gò, aveave nì dré adrészó akílé. Dì ngábhá kì tà nì kókpà akí kònìnì, i dré adrérà'a àyì kì làfa tà 'o dhì 'á.

Móndyá ka'ibhá dhì kì tabhìma

¹²Kolénzé dhya adrélépi áyi togó tsì tà dré adrérà'a áyi tabhì dhì 'á dhì dré! Tako ko, Giká kòka'i akódhì nda nì tà dre dhì, akódhì nì kùlá lídrì àdhya nì kisú, ngóró Giká dré lazilé móndyá adrébhá áyi le dhì i dré dhì tini.

¹³Adré lèá dhì, dhya tà dré adrélé tabhile dhì kòtà dhì, «Giká adré áma tabhì nì» dhì ko. Àngyá ko, tà kònzi kitswá ína Giká nì tabhì bwà ko. Akódhì nì tändì adré kpà dhya àlo nì tabhì litilé dhì ko.

¹⁴Dì, tà kàdré dhya àlo ni tabhì dhi, tà nda adré akódhì ni lití, dré áyi taylé áyi tändì ni lovó kònzi dré sèle litlé dhi sè.

¹⁵Dì lovó kònzi nda kòkisú 'a dre dhi, adré tákonzì ti. Dì tákonzì nda kòli'wá kitswálé tití dre dhi, adré dràdrà ti.

¹⁶Áma adrúpi má dré lèle tò ni i, mì kòtayí àmì adrélé litlé ko:

¹⁷Tà dóro tití kitswábhá tití dhi i adré apfòle bhù lésè, adrélé asilé Gìká Atá ngádra tití dhi kì bhàlepi bhù mìbhalé 'á dhi vélésè. Akódhì nda kitswá ru ladzá ko. Tínimvá kpà akódhì mìle dhi yókódhó.

¹⁸Akódhì ti àma tódhyá áyi kúlì tà báti àdhya sè, ngóró i dré tá lèle 'ole dhi tíni, mà kàdréró ngádrì i ró ngá tití dré bhàle dhi i kòfalé be dhi bvó.

Gìká ni kúlì yìma, i`ndì` kúlì nda ni 'òma

¹⁹Áma adrúpi má dré lèle tò ni i, mì kònì tà kònìdhì dóro: Lè àmì àlo àlo tití dhi i mì kàdré gànzi ró adrélé tà yi mbèlè. Dì, mì kàdré àmikya kúlì ta mbèlè ko. Mì kàdré kpà àmì kì togó tayí aswálé mbèlè ko.

²⁰Tàko ko, dhya adrélépi áyi togó tayí aswálé dhi adré tà gyägya Gìká àdhya ni 'o kòdhya ko.

²¹Ásà dhi, mì kòtingá àmì rúsè tà wáyi adrébhá àmì kì 'o atsálé ndí ró dhi i, tà kònzi wáyi mì dré adrélé 'ole dhi íbe. Dì togó yàyà sè dhi, mì kàdré kúlì Gìká dré adrélé kidhílè àmì kì togó na dhi ni ka'i. Àngyá ko, kúlì nda rinyí íbe kitswázó àmì kì tindrí.

²²Mì kàdré ngbà 'í Gìká ni kúlì yiyì ko. Mì kàdré kókpà tà kúlì nda dré adrélé tâle dhi ki 'o be. Mì kàdré 'òá kònìnì ko dhi, mì adré àmì kì tändì kì lití.

²³Tàko ko, dhya adrélépi Gìká ni kúlì yi gò adrészó ka'iá 'ole ko dhi, sù ngóró móndí áyi mìbhalé nòlepi tâlâtálà na gò,

²⁴kònò áyi mìbhalé nda dre dhi, dré lìzo tivìá mbèlè ngalè áyi làsú tá ngíni ya dhi tíni.

²⁵Dì, dhya adrélépi tátrítrí kúlì kitswálépi tití, adrélépi móndí kì trì dhi ni yi gò, adrészó trôle rúá, adrészó tà i dré yile dhi kì tivì ko, dì, adrészó ína tà nda kì 'o dhi, Gìká ni tà taní bha akódhì dri, tà dré adrélé 'ole dhi i sè.

²⁶Dhya ángùdhì adrélépi áyi no ngóró móndí adrélépi Gìká ni tà 'o dhi ró gò, adrészó ína áyi kúlì likí ko dhi, adré áyi tändì ni lití. Tà dré adrélé 'ole Gìká ni lindrì bhàzo nda tà tåko 'i.

²⁷Dì, tà à dré kitswálé 'ole Gìká Atá ni lindrì bhàzo, dré adrélé nòle lolo ìndì tà kònzi àko dhi ró dhi, tà kònìdhì 'i: adrélé kìmvoanzì kì likí tàyítòkó íbe àyi kì kizà na dhi, ìndì adrélé dhyá kì tändì ni likí adrélé lolo tà kònzi bvò àdhya kì tà sè dhi.

Yàkóbhò 2

Móndì` kì nòma twátwa ko dhi

¹Áma adrúpi i, mì dré adrélé àma kí Míri Yésu Krísto mìlanzìlanzì ro dhi ni ka'i dhi sè dhi, mì kàdré móndí kí no twátwa ko.

²Agó àlo kítá aveave asólépi í rú trónó órò sè dhi be dhi kàtsá àrà mì dré ru kimázó dhi 'á gò, agó àzya lemerè ro kítá lirí asólépi í rú dhi dré kpà atsázó àrà nda 'á dhi, mì adré 'òá ngíni?

³Mì kàdré agó kítá aveave asólépi nda ni lindrì bha, adrészó tåá akódhi dré dhi «Mí kòlirí kònwa àrà doro 'á» gò, mì dré adrészó tåá agó lemerè ro nda dré dhi, «Mí totó mi kònàle», kó ngalè «Mí lirí áma pá làga kìní mi kònwa» dhi,

⁴kòdhì mì adré tsì móndí kí no twátwa àmì kòfalésè ko? Mì adré tsì móndí kí tåbvó ta àmì kí tå kisùle kònzi dhi i sè ko?

⁵Áma adrúpi má dré lèle tò ni i, mì yi rè ká! Gìká kipè tsì móndyá móndyá bvò àdhya i dré adrélé nôle lemerèbhá ro dhi i atsálé ngábhá i ró àyi kí tå ka'ika'i sè dhi kòdhya ko? Kipè tsì àyi nda i kitswálé file áyi Òpì i dré tå ni ni lazizó móndyá adrébhá áyi le dhi i dré dhi na dhi kòdhya ko?

⁶Dì, àmì, mì adré àmikya lemerèbhá nda kí ayízè! Ngábhá i adré zakó tsì àmì kí ató àyi pálé, adrészó kpà àmì kí tidrì tåbvó tabhá i kandrá dhi àyi?

⁷Àyi nda i adré zakó tsì dhya àmì kí azilépi dhi ni rú doro dhi ni lodhá dhi àyi?

⁸Mì ni tolí tísile Gìká ni Kúlí na kònìdhì doro: «Mí kàdré àmì àzya ni le ngóró mí dré adrélé àmì tändí ni le dhi tíni. » Dì mì kàdré tolí Gìká ni Òpì àdhya nda ni ka'i 'ole batí dhi, kòdhì mì adré tå doro 'o.

⁹Dì, mì kàdré àmikya móndí kí no twátwa dhi, mì adré tåkonzi 'o gò, tátrítrí kúlí dré adrészó tadhá dhi, àmì tátrítrí kúlí nda ni ñobhá 'i.

¹⁰Tàko ko, dhya àlo kàdré tátrítrí kúlí likí wáyi gò, dré ndìndì tå àlo tátrítrí kúlí nda dré adrélé tåle dhi ni ñòzo dhi, akódhi nda ñò tátrítrí kúlí wáyi nda dre.

¹¹Àngyá ko, Gìká tålepi dhi «Mí kò'o múná tå ko» dhi, tå kókpà dhi: «Mí kòpfu móndí dràle ko. »Dì mí kò'o múná tå ko gò, mí dré mína móndí pfùzo dràle dhi, mí atsá tátrítrí kúlí ñolepi ró dre.

¹²Ásà dhi, lè mì kàdré kúlí ta adrészó kpà tå 'o, ngóró móndí dra àyi kí tåbvó tåzo tátrítrí kúlí adrélépi móndí kí tri dhi sè dhi kya tíni.

¹³Tàko ko, kítú dra móndí kí tåbvó tåzo dhi tú dhi, Gìká ni dhya ángùdhi áyi àzya ni kizà bhàlepi ko dhi ni tåbvó ta, akódhi ni kizà bha àko ró. Gìká mìlésè dhi, móndí kí kizà bhàle dhi kàdrì lavúlé, móndí kí tåbvó tåle dhi rúsè.

Tå ka'ima i `ndi` tå doro 'òma

¹⁴Áma adrúpi i, dhya àlo kàdré tåá dhi, i tå ka'ika'i fbe gò, dré adrészó tå adrébhá áyi tå ka'ika'i nda ni tadhá dhi kí 'o ko dhi, akódhi nda ni àdho tå doro kisú ásà? Tå ka'ika'i lású be kònini nda ni kitswá tsì akódhi ni tidrì?

¹⁵Àmì kí adrúpi àlo 'í yà, kó ngalè àmì kí amvúpi àlo 'í yà dhi kàdré kítá asólé í rú dhi àko, ìndì ngá kitswálé nyàle kítú àlo àlo sè dhi àko gò,

¹⁶àmì kí àlo dré tázoo akódhi dré dhi: «Mí kòlì togó be kìdríkìdri! Mí kòlikí mì kidhì sè doro, ìndì mí konya ngá pízo pípì! » gò, mì dré àmikya ngá kitswábhá akódhi ní rúbhá ledé dhi kí fèzo drá ko dhi, mì adré àdho tà doro 'o kòdhya?

¹⁷Kókpà kòdhì tíni, dhya àlo kàdré ngbà 'í tà ka'ika'ì íbe gò, adrészò tà doro 'o tà ka'ika'ì nda sè ko dhi, tà ka'ika'ì nda drà dre.

¹⁸À ní kitswá tàá dhi: «Mí mína tà ka'ika'ì íbe. Ma mána tà doro má dré adrélé 'ole dhi íbe. Mí tadhá rè má dré ámì tà ka'ika'ì tà doro 'ole dhi àko nda ká. Dì má ní mí dré áma tà ka'ika'ì tadhá tà doro má dré adrélé 'ole dhi i sè. »

¹⁹Mí adré mína ka'ia dhi, Gíká àlo kwákwá. Kòdhì doro. Tírì kònzi i adré kókpà ka'ia kònini gò, i dré adrészò lyàle tirì dré.

²⁰Mí móndí azaaza ró ní, mí adré lèá má kòtadhá mí dré dhi, tà ka'ika'ì tà doro 'ole dhi àko dhi, tà tako 'í káyà dhi?

²¹Mí kisù rè àma kí tábhí Àbàramà ní tà ká. Gíká nò tá tsì akódhi nda gyägya tà dré tá 'ole dhi i sè ko? Tako ko, akódhi bhà tá áyi mvá Ísákà àlétarì dri, kitswázó fèá mòbòmà ro Gíká dré.

²²Mí nò rè ngalè akódhi ní tà ka'ika'ì adré tá tà 'o túmání tà doro dré tá adrélé 'ole dhi íbe ngíni ya dhi ká. Dì Gíká 'o tá akódhi ní tà ka'ika'ì nda kitswálé tití tà doro dré 'ole nda i sè.

²³Dì tà tísile Gíká ní Kúlí na kònìdhì 'o ru kònini: «Àbàramà ka'ì tá Gíká gò, Gíká dré akódhi ní nòzo gyägya akódhi ní tà ka'ika'ì nda sè. » Kòdhì íbe dhi, Gíká zi tá kpà akódhi áyi arúpi ró.

²⁴Mí nò rè ká! Gíká adré móndí kí bha gyägya í kandrá ngbà 'í áyi kí tà ka'ika'ì sè ko. Adré kókpà áyi kí bha gyägya tà i dré adrélé 'ole dhi i sè.

²⁵Kókpà kòdhì tíni, Gíká bhà tá Rábà, tokó zàràbhù ro dhi gyägya í kandrá tà dré tá 'ole dhi i sè. Tako ko, akódhi nda ka'lí tá Ísérélè ànzi mûle lùzu ró dhi i dôle í véna gò, áyi kí mùzo nzìle láti twá 'ásè. ²⁶Dì ngóró rúbhá la'a lídrì àdhya àko dhi dré adrélé dràle dràdrà dhi tíni dhi, tà ka'ika'ì tà doro 'ole dhi àko dhi adré kókpà dràle dràdrà.

Yàkóbhò 3

Àma kí làdra likima

¹Áma adrúpi i, lè móndí bř àmì kòfalé dhi i kàdré láti nda atsázó tà tadhábhá i ró ko. Tako ko, mì ní tâle dhi, Gíká ní àma adrébhá áyi tà tadhá dhi kí tâbvó ta tà tândi ró, móndí àruka kya kí lavú dhi be.

²Àma tití dhì i, mà adré ledhélé tàkonzi na láti twátwa i sè. Di, dhya àlo kàdré ína dhèle tàkonzi na kúlí i dré adrélé tâle dhì i sè ko dhì, akódhì nda móndí doro kitswálépi dhì 'i. Kitswá áyi rúbhá wáyi dhì ni bha áyi rinyí zàle.

³Mà kàdré aya mvá tsà dhì ni 'i dòngí i tí kitswázó àyi kí bha àma kí rinyí zàle dhì, mà kitswá àyi kí dri lìle àrà ángùdhi mà dré adrészó lèle lìle lana dhì na bwà.

⁴Kàdré kó bwátù kàdrì kí tâ sè dhì, tágba i kàdré kàdrì gú ya, ìndì lyäandre dré adrészó àyi kí liví ya dhì, aya mvá tsà dhì kitswá àyi kí tidi lìle àrà ángùdhi bwátù dòlepi dré adrészó lèle lìle lana dhì na bwà.

⁵Dhyá kí làdra ni tâ kókpà kòdhì tíni. Tágba làdra nda dré adrészó rúbhá ni kìgá mvá tsà dhì 'i dhì, adré áyi afà tâ kàdrìkàdrì i dré 'ole dhì kí tâ sè. Mì nò rë ngalè àtsí mvá tsà dhì dré adrélé duku andre za vèle ngíni ya dhì ká!

⁶Àma kí làdra kókpà àtsí 'i. Rúbhá ni kìgá tití dhì i kófalé dhì, adré tâ kònzi 'o lavulé. Adré àma kí rúbhá wáyi dhì ni 'o atsálé ndí ró. Adré kpà àma kí lídrì wáyi dhì ni za vèle àtsí adrélépi angálé líferò lésè dhì sè.

⁷Móndí i adré kà'wá mbì àdhya kí kárá tití dhì kí turú adrészó àyi kí likí bhà 'a, túmání àrì twátwa dhì íbe, kà'wá twátwa adrébhá àyi kí se agáti sè dhì íbe, ìndì kosyá twátwa dhì íbe. Bâti, i likí kà'wá nda i tití atsálé bhà àdhya ró.

⁸Di, dhya àlo kitswá ína áyi tândi ni làdra likí kitswálé tití ko. Làdra nda, ngá kònzi kitswálé likílé bwà ko dhì 'i. Akódhì ga kâtrá adrélépi móndí kí tupfú todràle dhì sè bî.

⁹Àma kí làdra sè dhì, mà adré Míri àma kí Atá ni rú bha kûle, adrészó kókpà móndí Giká dré bhâle lású be i tíni dhì kí tatrí ásà.

¹⁰Di kúlí adrészó tâ taní bha móndí i dri dhì i túmání kúlí adrészó móndí kí tatrí dhì íbe dhì, i adré apfôle ti àlo nda lésè. Áma adrúpi i, lè tâ tâ nda kàdré kònini ko.

¹¹Yí kìnì ni kitswá tsì apfôle túmání yí kùdzí be kidrì àlo lésè bwà?

¹²Áma adrúpi i, fígi fa kitswá tsì olívè lò'wa 'a bwà? Vínò fa kitswá tsì fígi lò'wa 'a bwà? Di kidrì tâ'lí ró dhì kitswá kpà yí kìnì 'o apfôle bwà ko.

Tògyá adrélépi apfôle bhù lésè dhì

¹³Dhya àmi kófalé adrélépi tâ nini íbe ìndì tògyá íbe dhì àdhi 'i? Lè dhya nda kàdré tâ nda kí tadhá áyi atsima doro dhì sè, ìndì tâ doro i dré adrélé 'ole togó yàyà sè ìndì tògyá sè dhì i sè.

¹⁴Di, mì kàdré àmikya lovó kònzi bha àmì kófalésè, adrészó àmì kí tândi kí tâ bha drìdrì dhì, lè mì kàdré àmì kí afà tâ nda sè ko. Mì kàdré kpà tâ bâti ga ko.

¹⁵Tògyá lású be kònini nda adré apfôle bhù lésè ko. Be ró dhì, tògyá nda ína tògyá bvò kòndi àdhya 'i. Adré angálé Dzáborò vélésè.

¹⁶Tako ko, àrà ángùdhi móndí i dré adrészó lovó kònzi bha àyi kófalésè, adrészó àyi kí tândi kí tâ bha drìdrì dhì 'a dhì, à adré tâ wàyá kisú, tâ kònzi kí kárá tití dhì íbe.

¹⁷Dì, tògyá adrélépi apfòle bhù lésè dhi ína lólo. Adré tà kìdríkìdrí bha móndí i kòfalé, adrészó togó yàyà tadhá, adrészó móndí kí yi dóro, adrészó móndí kí kizà bha, adrészó tà dóro 'o, adrészó móndí kí no twátwa ko, adrészó kpà tà 'o túrúpfú àko.

¹⁸Móndyá adrébhá tà kìdríkìdrí bha móndí i kòfalé dhi i adré ngá kidhí tà kìdríkìdrí na gò, i dré adrészó lanyá tà gyägya àdhya ni akónà bì.

Yàkóbhò 4

Àma kí bhàma Gìká ni rinyí zàle dhi

¹Tà adrészó ru pfu, adrészó lawàle àmí kòfalésè dhi adré angálé ángolésè? Tà nda i adré zakó tsì angálé àmí kí lovó kònzi adrébhá àdzú bhu àmí léna dhi i lésè?

²Mì adré ngá lovó bha gò, mì dré adrészó ngá nda ni kisú ko. Dì mì adré lovó kònzi bha móndí i rú, adrészó àyi kí le tupfûlé ngá nda ni kisúzó. Mì adré lawàle, adrészó ru pfu móndí ibe ngá nda ni tà sè. Dì, mì adré àmikya ngá mì dré adrélé lèle nda ni kisú ko, mì dré adrélé ziá Gìká tí ko dhi sè.

³Dì, tágba mì kàdré ngá nda ni zi Gìká tí yà dhi, mì adré kisúá ko. Tàko ko, mì adré ngá nda ni zi togó kònzi sè, mì kò'oró àmí kí tändí kí lovó kònzi ásà be dhi bvó.

⁴Àmí móndí zàràbhù ro ni i, mì ni ko tâle dhi, ru sùma tà bvò kòndí àdhya ibe dhi adré dhyá kí 'o atsálé Gìká ni kàribhá ro dhi? Dì dhyá ángùdhi adrélépi lèá adrélé arúpi bvò kòndí àdhya ró dhi, adré áyi 'o atsálé Gìká ni kàribhá ro.

⁵Gìká ni Kúlí adré tâá dhi: «Gìká adré togó i dré bhàle àma léna dhi ni lovó bha tò. » Mì adré kisúá dhi, Gìká ni Kúlí adré tà kòdhi ni ta àngyá?

⁶Dì, Gìká ni togó taní bhàle àma rú dhi kàdrì lavûlé. Tàko ko, akodhi ni Kúlí adré tâá dhi: «Gìká adré ru pfu móndyá drìkàdrì ro dhi ibe. Dì, adré ína áyi togó taní bha móndyá adrébhá àyi kí tà bha kìní mi dhi i rú. »

⁷Dì ásà dhi, mì kàdré àmí kí bha Gìká ni rinyí zàle. Mì kàdré ligílé Dzáborò be gò, kòlapáró àmí rúsè vwàvwà ro.

⁸Mì kàdré àmí kí kisí ànyi Gìká làga gò, kòkisíró kpà i ànyi àmí làga. Àmí tákonzibhá ni i, mì kòdzì àmí kí drígá àmí kí tákonzì lésè! Àmí túrúpfúbhá ni i, mì kòtemvé àmí kí togó!

⁹Mì kàdré kizà ro, adrélé àwó ngo, adrészó tongólé! Àmí kí arí kòladzá ru atsálé àwo ró. Àmí kí kólénzé kòladzá ru atsálé kizà ro.

¹⁰Mì kàdré àmí kí tà bha kìní mi Míri kandrá gò, kòtingáró àmí kí tà kuru.

Mondi' kí tàbvó tâma ko dhi

¹¹Áma adrúpi i, lè mì kàdré tà ta kònzi àmí kí adrúpi i rú ko. Dhya ángùdhi adrélépi tà ta kònzi áyi adrúpi rú yà, kó ngalè adrélépi akodhi ni tàbvó ta yà dhi, adré tà ta kònzi Gìká ni tátrítrí kúlí rú, adrészó kpà tátrítrí kúlí nda ni tàbvó ta. Mì kàdré tátrítrí kúlí ni tàbvó ta dhi, kòdhi mí adré tátrítrí kúlí nda ni 'o ko. Be ró dhi, mí atsá mína tátrítrí kúlí nda ni tàbvó tâlepi ró.

¹²Tákò dhya tátrítrí kúlí fèlepi ìndì móndí ki tàbvó tàlepi dhi ngbà 'í àlo kwákwá. Gíká 'í kalóma. Akódhi nda rinyí íbe kítswázó móndí tídri, kítswázó kpà móndí pfu dràle. Di, mì tá mína àdhi 'í, adrélé ámi àzya ní tàbvó ta ní?

Àma kí afàma ko dhi

¹³Mì yi rè ma, àmi adrébhá tàá dhi «Ándrò yà, kó ngalè kídrú yà dhi, mà ní li bhàandre àlo na, àzí 'o kóná àlo làfa kisúzó» ní i.

¹⁴Àmi, mì ní ngalè kídrú dhi, àmi kí lídrì ní adré ngíni ya dhi ko. Tako ko, àmi kí lídrì nda sù ngóró sàsàlì adrélépi sàle lókyá tsà sè gò, dré adrészó akílé dhi tíni.

¹⁵Adré di be lèá dhi, mì kàdré tàá kònini: «Míri kòlè dhi, mà ní adré lídrì íbe gò, mà dré tà kònì kí 'òzo tà kóna íbe. »

¹⁶Di, nyànomvá dhi, mì adré àmi kí afà adrélé dríkàdrì 'o. Dhyá kí afàma lású be kònini nda kònzi.

¹⁷Di ásà dhi, dhya ángùdhi adrélépi tà dóro ni 'òle gò, adrészó tà nda kí 'o ko dhi, adré ína tàkonzi 'o.

Yàkóbhò 5

Tà tâle ngábhá kí kodzozó dhi

¹Àmi ngábhá ro ní i, mì yi rè ká! Lè mì kàdré àwó ngo adrészó lúlú ga, kízà adrébhá alìle àmi dri dhi kí tà sè!

²Àmi kí ngá ñwa dre. Kidzú mbe àmi kí kítá i dre.

³Kíndri mbe àmi kí óró i, àmi kí àrezá be dre. Di kíndri nda ní àmi kí tàkonzi tadhá ngádra 'á kítú tàbvó tázó dhi tú dhi ní. A ní kpà àmi kí ză nya, ngóró àtsí dré adrélé ză za vèle dhi tíni. Tako ko, mì lokó àmikya ngá làgí be kàdrì dhi i àmi dré lókyá kùdù sè dre.

⁴Mì yi rè ká! Làfa mì dré gâle fèle dhya àzí 'obhá àmi kí amvú na dhi i dré dhi adré ngôle àmi dri. Kótrétré dhya lànyá lokóbhá àmi kí amvú na dhi kya dhe Míri rinyí lîyí bîna dre.

⁵Bvò kònìdhí lé dhi, àmi tá ngbú adrélé trú kólányá na, adrélé àmi kí tändi kí lovó 'o. Mì nya àmi sile ngbóngbo kà'wá tíni, adrélé kítú dra àmi kí tilízó dhi ní letè.

⁶Mì bhà tà móndí adrébhá tá tà àko àyi rú dhi i dri, àyi kí tupfúzó todràle, tágba i dré tà adrészó ligílé àmi rú ko dhi.

Tà letèma togó vwàvvà sè dhi

⁷Di áma adrúpi i, mì kàdré tà letè togó vwàvvà sè, tsàle kítú Míri dré dra agòzo dhi tú. Mì nò rè ngalè dhya ngá kidhílépi dhi adré ngá nda kí letè akónale togó vwàvvà sè ngíni ya dhi ká. Adré letèá kidhólé lókyá kozya dré adrészó anzílé dhi sè, tsàle lókyá kozya nda dré adrérà'a akílé dhi 'á.

⁸Àmì ró dhi, mì kàdré kókpà tà letè togó vwàvwà sè, adrészó togó tsì. Tàko ko, kítú Mírì dré dra agòzo dhi atsá ànyì dre.

⁹Áma adrúpi i, mì kàdré ru ndri àmì kòfalésè ko, à kòtaró àmì kì tàbvó ko dhi bvó. Mì nò rè ká! Dhya dra móndí kì tàbvó tâlepi dhi dzó tí!

¹⁰Áma adrúpi i, mì kisù rè ngalè pròfétà atú tà longóbhá Mírì ni rú sè dhi, i tsì tá àyì kì togó àyì kì kizà na ngíni ya dhi ká. Mì kàdré dì togó tsì àyìkya tíni.

¹¹Mà adré zakó tsì àyì nda kì zi kólénzébhá ro, i dré tá àyì kì togó tsìle dhi sè? Mì yi zakó ngalè Yóbò tsì tá áyi togó ngíni ya dhi 'í. Mì nò kpà tà Mírì dré 'ole akódhi dré kùdù na dhi 'í. Tàko ko, Mírì adré kizà do áyi togó na móndí kì tà sè, adrészó àyì kì kizà bha tà tändi ró.

¹²Áma adrúpi i, tà kàdrì lavulé dhi, lè mì kòsì móndrà bhù ni rú sè yà, bvò ni rú sè yà, kó ngalè ngá àzya ni rú sè yà dhi ko. Be ró dhi, mì kàdré ngbà 'í tàá «Àyíya», kó «Kóko», Giká kòbhàró tà àmì dri ko.

Tà zìma Giká tí tà ka'ika'i sè dhi

¹³Dhya àlo àmì kòfalé dhi kàdré kizà nya dhi, kàdré tà zi Giká tí. Dhya àlo kàdré arí iбе dhi, kàdré longó ngo Giká ni rú bhàzo kùle.

¹⁴Dhya àlo àmì kòfalé dhi kàdré drà ro dhi, kàzí bhàgo Èkélézyà àdhya i, i kòziró tà Mírì tí akódhi dré, dò dàzo akódhi dri Mírì ni rú sè.

¹⁵Dì tà zile Mírì tí tà ka'ika'i sè dhi ni dhya drà ro nda ni tìdrí gò, Mírì dré akódhi ni tingázó kuru. Dhya nda kò'o tàkonzi dhi, Giká ni kpà akódhi ni tàkonzi tri.

¹⁶Dì ásà dhi, lè mì kàdré àmì kì tàkonzi kì ta ngádra 'á àmì kòfalésè, adrészó kpà tà zi Giká tí àmì kì adrúpi i dré, mì kàdriró àmì kì drà i lésè be dhi bvó. Tà bàti ró dhi, tà móndí gyägya dré adrélé zile Giká tí dhi, rinyi iбе adrészó tà kàdrì 'o.

¹⁷Mì kisù rè Èlìyà ni tà ká. Akódhi nda tá móndí 'i àma tíni. Akódhi zi tá tà Giká tí togó wáyi sè, kozya kòdhiró ko dhi bvó. Dì kozya dré dhìzo bvò dri ko kóná na, mbă nzi-drì-alo.

¹⁸Àmvolásà dhi, dré gòzo tódyá tà zi Giká tí gò, kozya dré gòzo adrélé dhile gò, bvò dré gòzo adrélé ngá 'o kèlè.

¹⁹Áma adrúpi i, dhya àlo àmì kòfalé dhi kòku láti tà bàti àdhya 'ásè gò, dhya àzya dré akódhi ni adrìzo agòle láti tà bàti àdhya nda 'á dhi,

²⁰lè mì kònì tà kònìdhì: Dhya ángùdhì adrélépi móndí tàkonzi 'olepi dhi ni adrì agòle láti kinzò ro dhi lésè dhi, ni akódhi nda ni tìdrí dràdrà lésè gò, akódhi ni tàkonzi zyandre dhi kì zuzo.

1 Pétèrò

1 Pétèrò 1

Pétèrò ni módo fèma

¹Ma, Pétèrò, Yésu Krísto ni àpóstolò, má adré wárágà kònìdhì ni tisì àmi, móndyá Giká dré zile, ayíbhá ngóró móndí twá i ró bvò Pótò àdhya 'ásè, Gàlàtìyà àdhya 'ásè, Kàpàdòkìyà àdhya 'ásè, Àsìyà àdhya 'ásè, ìndì Bítiniyà àdhya 'ásè dhi i dré.

²Giká Atá nda zì àmi ngóró i dré tá kisùle 'ole kínó lésè dhi tíni, àmi ki bhàzo twá adrélé móndyá lolo ína i ró Tirí Lólo ni rinyí sè, mì kòka'iró Yésu Krísto ni kúlí 'ole, àmi ki tayízó dré temvélé áyi kàré sè. Giká kòbhà áyi togó taní àmi rú, tà kìdríkìdrí fèzo gàle àmi léna b!

Àma ki tidrima, i` ndi` àma ki mì bhàma Giká véna dhi

³Rúku kàdré Giká, àma ki Míri Yésu Krísto ni Atá dré! Akódhì ni togó dóro lavúlé dhi sè dhi, ti àma tódyá lídrì tídhí ro dhi ni afèzo àma dré, Yésu Krísto ni ngàma dràdrà 'ásè dhi sè. 'O kònini, mà kàdréró mì bha i véna lovó sè,

⁴adrézó tà i dré lazilé àma dré tàyilé ro, i dré zùle bhù na dhi ni letè. Tà lazilé tàyilé ro nda kitswá ñwàle bwà ko, kitswá atsálé ndí ró bwà ko, ìndì lagulagu ni kitswá kpà akílé bwà ko.

⁵Dì àmi ki tà ka'ika'i sè dhi, Giká adré àmi ki likí áyi rinyí sè, tsàle lókyá mì dré dra lídrì kóná vésè kólyá dhi ni kisúzó dhi 'á. Giká gànzi ró lídrì nda ni tadhá lókyá kùdù sè.

⁶Tà nda kòdhì i sè dhi, mì adré lenzélé lavúlé, tágba kòkitswá mì dré adrézó kizà nya tà twátwa adrébhá àmi ki tabhì dhi i sè lókyá tsà sè yà dhi.

⁷Tà nda i atsá àmi rú kònini kitswálé àmi ki tà ka'ika'i tabhì, ngóró à dré adrélé órò tabhì àtsí sè dhi tíni. Giká mìlésè dhi, àmi ki tà ka'ika'i nda lavú órò, ngá adrélépi akílé tágba tabhizoá àtsí sè dhi byá. Dì à kòtabhì àmi ki tà ka'ika'i nda gò ka'izoá dre dhi, mì ni rúku kisú mìlanzìlanzì íbe ìndì lindrì be kitú Yésu Krísto dré dra apfòzo dhi tú.

⁸Tágba mì dré akódhì nda ni nòzo rè mì sè ko dhi, mì adré akódhì ni le. Gba mì dré adrézó akódhì ni no nyànomvá ko dhi, mì adré akódhì ni ka'i gò, mì dré adrézó lenzélé lavúlé, kólénzé mìlanzìlanzì ro kitswázó tà ni ni ta bwà ko dhi sè.

⁹Tako ko, mì adré tà mì dré Yésu Krísto ni ka'izo ásà dhi ni kisú. Tà nda, àmi ki tidrima 'i.

¹⁰Kàdré tà adrézó móndí ki tidrì nda ni tà sè dhi, pròfétà atú dhi i ndà tá tà nda ni àndu nile kyá gò, i dré tà taní Giká dré lèle fèle àmi dré áyi togó taní sè dhi ni tà longozó.

¹¹Tàko ko, Krísto ni Tírí àyi léna dhi adré tá tadhá àyi dré dhi, Krísto ni kizà nya gò, mìlanzilanzì kisúzó àmvolásà. Ásà dhi, i adré tá lókyá tà nda dré kitswázó ru 'o dhi ni nda nile, túmání tà kitswábhá atsálé drìdrì tà nda ni tadhá dhi i be.

¹²Dì Gíká tadhá tá pròfétà nda i dré dhi, tà i dré tá adrélé longolé nda i kitswá adrélé àyi dré ko. Be ró dhi, i adré tá tà nda kí longó àmi dré. Dì nyànomvá dhi, mì yi tà nda i dhya Rúbí Taní longóbhá àmi dré Tírí Lólo amùle bhù lésè dhi ni rinyí sè dhi i tí dre. Ndìndì ángéló i lovó i be tò kitswázó tà nda kí ni.

Adrema lólo tà tití mà dré adrélé 'ole dhi i sè dhi

¹³Dì ásà dhi, mì kàdré támiga dri, adrélé àmi kí tà kisùle dhi kí likí. Mì kàdré mì bha Gíká véna, tà taní mì dré dra kisulé akódhí ni togó taní sè lókyá Yésu Krísto dré dra apfozo dhi tú dhi ni tà sè.

¹⁴Àmi, Gíká ni ànzì i, mì kàdré akódhí ni kúlí ka'i 'ole. Mì kògò adrélé tatsílé lovó kònzi kí 'obe, ngóró mì dré tá adrélé 'ole mì dré tà nírà ko dhi 'á dhi tíni ko.

¹⁵Dì, ngóró Gíká àmi kí azílépi dhi dré adrélé lólo dhi tíni dhi, mì kàdré kókpà lólo tà tití mì dré adrélé 'ole dhi i sè.

¹⁶Tàko ko, Gíká ni Kúlí adré tàá dhi: «Mì kàdré lólo. Àngyá ko, áma tändi, ma lólo. »

¹⁷Mì ni tâle dhi, Gíká mì dré adrélé zile àmi kí Atá ro dhi, adré móndí àlo àlo tití dhi kí tâbvó ta ngóró àyi kí tà 'ole dhi i dré adrélé dhi tíni dhi be. Adré àyi kí no twátwa ko. Dì mì dré adrérà'a bvò kònìdhí dri kùmú i tíni dhi 'á dhi, mì kàdré tà 'o akódhí ni ròma sè.

¹⁸Tàko ko, mì ni làgí Gíká dré àmi kí gízo láti tàko àmi kí tâbhí i dré tá lebèle dhi lésè dhi ángopí ya dhi be. Làgí nda tá ngá adrélépi ñwàle ñwañwà ngóró àrezá tíni yà, kó ngalè óró tíni yà dhi i ko.

¹⁹Be ró dhi, Gíká gi àmi Krísto ni kàrì làgí kyàkyà dhi sè. Akódhí nda tá kábilígyà mvá tà kònzi àko iñdì ndì àko i rú dhi i.

²⁰Gíká zì tá akódhí drìdrì bvò ni bhàma kandrá gò, akódhí ni 'òzo apfôle lókyá kùdù kònìdhí sè àmi kí tà sè.

²¹Dì akódhí nda sè dhi, mì adré Gíká ni ka'i. Gíká tingá akódhí dràdrà lésè gò, akódhí ni mì bhàzo lanzile, mì kàdréró àmi kí tà ka'ika'i bha Gíká léna, adrészó mì bha akódhí véna.

²²Nyànomvá dhi, mì temvé àmi mì dré tà báti ka'ile 'ole dhi sè dre, mì kàdréró àmi kí adrúpi kí le togó wáyi sè. Adré dì lèá dhi, mì kàdré ru le àmi kófalésè togó lólo àtsi ró dhi sè.

²³Tàko ko, à gó àmi kí ti tódhyá dre. Dì, lídrì tídhi mì dré kisulé nda angá móndí kí kórì adrélépi ñwàle ñwañwà dhi lésè ko. Be ró dhi, angá ína kórì kitswálépi ñwàle bwà ko dhi lésè. Báti, à ti àmi Gíká ni kúlí lídrì ro, adrélépi kóná vésè kólyá dhi sè.

²⁴Tàko ko, ngóró Gìká ni Kúlí dré adrélér àmà dhí tíni: «Móndyá tití dhí i ngóró mbì tíni.

Àyì kí rúku kpà ngóró mbì pfò kya tíni. Mbì adrè 'yòle gò, pfò ni dré adrészò zile.

²⁵Dì, Mírì ni kúlí adrè ína adrélér kóná vésè kólyá. » Kúlí nda kòdhí Rúbí Tani longolé àmi dré dhí 'i.

1 Pétéró 2

¹Dì ásà dhí, mì kòtingá àmì rúsè tà kònzi kí kárá tití dhí i, kinzò tití dhí i, túrúpfú tà, lovó kònzi bhàma móndí i rú dhí, ìndì móndí kí rú tama kònzi dhí.

²Ngóró ànzì kùrì i tíni dhí, mì kàdré bàsú tändi Tírì Lólo àdhya ni le mvùle kòdhya, mì kàdréró mbàle àmì kí lídrì tídhi ro dhí na.

³Tàko ko, mì tabhí Mírì dre gò, mì dré atógyàzoá dhí, akódhi dóro lavulé.

Kí' rà li' drí` ro dhí i` ndí` móndyá Gìká dré zi` le dhí i

⁴Mì kàdré àmì kí kisí ànyì Mírì Yésu làga. Akódhi nda kírà lídrì ro móndí i dré gàle gágà, dì Gìká dré ína kipèle adrélér làgí ró i mìlésè dhí 'i.

⁵Àmì adrébhá kókpà ngóró kírà lídrì ro dhí i tíni ni i, mì kòtayí àmì Gìká dré tobhàle atsálé dzó Tírì Lólo àdhya ró, mì kàdréró kòwánà lólo i ró, adrélér móbòmà Tírì àdhya kitswábhá Gìká mìlésè dhí kí fe akódhi dré Yésu Krísto sè.

⁶Tàko ko, Gìká ni Kúlí adrè tàá dhí: «Mì nò rè ká! Má ni kírà bha Sìyónà na. Kírà nda kírà làgí kyàkyà má dré kipèle adrélér kírà agógó dzó ni pá bhàzo dríá dhí ró dhí 'i. Dhya ángùdhi adrélérpi kírà nda ni ka'i dhí, kitswá tädzí adrélér kanyò ro ko. »

⁷Àmì adrébhá akódhi ni ka'i dhí i dré dhí, kírà nda kírà làgí kyàkyà dhí 'i. Dì, móndyá akódhi ni ka'ibhá ko dhí i dré dhí: «Kírà dzó sibhá i dré gàle gágà dhí, gò atsálé kírà agógó dzó nda dré adrészò áyì totó dríá dhí ró. »

⁸Gìká ni Kúlí adrè kpà tàá dhí: «Kírà nda kírà adrélérpi móndí kí tokpó dhí 'i, ìndì kírà adrélérpi móndí kí 'o ledhélér dhí 'i. »

Àyì nda i adrè ledhélér, i dré adrélér Gìká ni kúlí ga 'ole dhí sè. Tàko ko, Gìká bhà tá àyì adrélér tà 'o kònini.

⁹Dì, àmì ró dhí, àmì móndyá Gìká dré zile adrélér súrú ína ró dhí 'i. Àmì kpà kòwánà Ópí àdhya 'i, súrú lólo dhí 'i, ìndì móndyá Gìká ni tändi àdhya 'i, mì kàdréró tà kàdrìkàdrì dré 'ole dhí kí longó móndí i dré be dhí bvó. Tàko ko, akódhi azí àmì apfòle tímivá lésè, afilé áyì ngádra líndríga ró dhí 'á dhí nì.

¹⁰Wáláká dhí, àmì tá móndyá Gìká àdhya 'i ko. Dì, nyànomvá dhí, àmì móndyá Gìká àdhya 'i báti. Wáláká dhí, à bhà tá àmì kí kizà ko. Dì, nyànomvá dhí, Gìká bhà àmì kí kizà dre.

¹¹Áma arúpi má dré lèle tò ni i, àmì ngóró móndí twá adrébhá bvò àyíkyà ró dhí àko dhí i tíni. Má adrè dì àmì kí kodzó, mì kàdréró àmì kí likí lovó kònzi àmì kí rúbhá kya adrébhá ru pfu àmì íbe dhí kí tà sè.

¹²Mì kàdré kpà atsílé dóro pàgánò i kòfalésè. Di tágba i kàdré àmì kì asíkì tà kònzi 'òma sè yà dhi, i ni tà dóro mì dré adrélé 'ole dhi kì no gò, i dré Gìká ni rú bhàzo kùle tà nda i sè kítú dré dra atsázó dhi tú.

Àma kì bhàma àma kì kàdrì` i zàle, àma kì mírì i` be dhi

¹³Mírì ni tà sè dhi, mì kàdré àmì kì bha móndyá tití bhàle àmì drile dhi kì rinyí zàle, kàdré ópí kàdrì adrélépi òpì nya àmì dri dhi 'i yà,

¹⁴kó ngalè gùvèrènérè 'i yà dhi. Àngyá ko, gùvèrènérè nda i dhya ópí nda dré bhàle dhi 'i, i kàdréró tà njó móndyá adrébhá tà kònzi 'o dhi i dri, adrészó kpà móndyá adrébhá tà dóro 'o dhi kì tà bha kuru.

¹⁵Tàko ko, Gìká adré lèá dhi, mì kàdré tà dóro 'o, kîtswázó móndí azaaza tà nibhá ko dhi kì kúlí kikí dhi bvó.

¹⁶Mì kàdré atsílé ngóró móndí Gìká dré trile dhi i tíni. Di, mì kàdré àmì kì trìma nda ni no ngóró tà adrélépi láti fe àmì dré adrészó tà kònzi 'o dhi ró ko. Be ró dhi, mì kàdré àmikya tà 'o ngóró màrabà Gìká àdhya i tíni.

¹⁷Mì kàdré móndyá tití dhi kì lindrì bha, adrészó àmì kì adrúpi kì le. Mì kàdré Gìká ni ro, adrészó ópí kàdrì ni lindrì bha.

¹⁸Àmì màrabà ro ni i, mì kàdré àmì kì bha àmì kì mírì kì rinyí zàle lindrì sè wäyi. Mì kàdré 'òá kònini ngbà 'i àyi adrébhá togó íbe dóro ìndì yàyà dhi i véna ko. Mì kàdré kókpà 'òá kònini àyi adrébhá togó íbe tòmbátòmba dhi i véna.

¹⁹Tàko ko, mì kàdré kizà nya tà gyägya sè ko gò, adrészó mvòá Gìká ni tà sè dhi, kòdhi dóro Gìká mìlésè.

²⁰Di, à kàdré àmì kì tswa mì dré tà kònzi 'ole dhi sè gò, mì dré adrészó mvòá dhi, mì ni àdho tà dóro kisú ássà? Di, mì kàdré àmikya kizà nya mì dré tà dóro 'ole dhi sè gò, mì dré adrészó mvòá dhi, kòdhi dóro Gìká mìlésè.

²¹Gìká azí àmì adrélé tà 'o kònini. Tàko ko, Krísto ni tändi nya tá kizà àmì kì tà sè, mì kàdréró akódhì ni lebè, adrészó tà 'o akódhì àdhya tíni.

²²Akódhì 'o tá ína tàkonzì ko. Kúlí móndí ki litízó dhi apfò tá kpà akódhì sílésè àlomvá ko. ²³Móndí i dré tà adrérà'a akódhì ni lodhá dhi 'á dhi, akódhì logó tá làdhá àyi tí ko. I dré tà adrérà'a akódhì ni rúbhá 'o aswálé dhi 'á dhi, logó tá kúlí aswaaswa àyi tí ko. Be ró dhi, bhà tá i Gìká adrélépi tàbvó ta gyägya dhi drígá.

²⁴Akódhì ni tändi do tá àma kì tàkonzì i í rú fa kípaki pa dri, mà kòdrarò tàkonzì lésè gò, mà kàdréró lídrì íbe adrészó tà gyägya 'o. Lázì akódhì ni tswàzo dhi àdhya sè dhi, mì adrí dre.

²⁵Tàko ko, àmì tá ngóró kábilígyà avìbhá dhi i tíni. Di, nyànomvá dhi, mì agò kábilígyà likílépi, adrélépi kpà àmì kì lídrì likí dhi vélé dre.

1 Pétéró 3

Tòkó kì tà àyi kì àgo i` be dhi

¹Àmì tòkó i, mì kàdré kókpà àmì kì bha àmì kì àgo i zàle. Dì àmì kì àgo kì àruka i kàdré Gìká ni kúlì ga rè dhi, mì ni kitswá àyi kì adrì Yésu ni ka'i àmì kì atsima doro dhi sè, àmì kì kúlì sè ko.

²Tàko ko, i ni nòá ngalè mì adré atsílé togó lolo sè, adrélè Gìká ni lindrì bha ngíni ya dhi.

³Lè àmì kì aveave kàdré tà mì dré adrélè 'ole àmì kì rúbhá sè dhi i sè ko, kàdré àmì kì drìbhí tìma 'i yà, màyìkà ledélé órò sè dhi kì tosoma àmì rú dhi 'i yà, kó ngalè kítá aveave dhi kì tosoma àmì rú dhi 'i yà dhi.

⁴Be ró dhi, àmì kì aveave kàdré ína tà doro mì dré adrélè zùle àmì kì togó na dhi i sè. Aveave nda aveave àmì kì togó yàyà ìndì lìrì àdhya, kitswálépi dràle bwà ko, ìndì adrélépi làgì ró Gìká mìlésè dhi 'i.

⁵Tàko ko, tòkó lolo atú adrébhá tá mì bha Gìká véna dhi i adré tá àyi kì 'o avélé kònìnì. I adré tá kpà drì asó àyi kì àgo i kandrá.

⁶Sárà adré tá 'òá kònìnì. Adré tá Àbàramà ni kúlì yi, adrészó akódhi ni zi áyi mírì ro. Àmì Sárà nda ni ànzitòkó 'i, mì kàdré tà doro 'o, adrészó àmì kì tayí adrélè ngá ro tà àlo sè ko dhi.

⁷Àmì àgo i, mì kàdré kókpà 'òá kònìnì, adrészó àmì kì tòkó íbe doro. Mì kàdré àyi kì tà yàyà tòkó kya ró dhi kì kisù, adrészó àyi kì lindrì bha. Tàko ko, mì ni lídrì Gìká dré lazílé áyi togó taní sè dhi ni kisú tàyilé ro túmání àyi íbe. Mì kàdré 'òá kònìnì, tà àlo kòkitswáró tà mì dré adrélè zile Gìká tí dhi kì kikí ko.

Kizà nyàma tà doro 'òma sè dhi

⁸Kùdù ro dhi, àmì tití mì kàdré ngá àlo ró àmì kòfalésè, adrélè àmì kì adrúpi kì kizà do. Mì kàdré ru le àmì kòfalésè adrúpi i tini, adrélè àmì kì togó doro tadhá, adrészó àmì kì tà bha kìní mi.

⁹Mì kàdré tà kònzi logó tà kònzi 'ole àmì rú dhi tí ko, adrészó kpà làdhá logó làdhá dhàle àmì rú dhi tí ko. Be ró dhi, mì kàdré àmìkya tà taní zi Gìká tí móndí tà kònzi 'obhá àmì rú dhi i dri. Tàko ko, Gìká azí àmì adrélè tà 'o kònìnì, mì kòkisúró tà taní dré lazílé àmì dré tàyilé ro dhi be dhi bvó.

¹⁰Àngyá ko, Gìká ni Kúlì adré tåá dhi: «Lè dhya ángùdhi adrélépi lèá lenzélé áyi lídrì sè, adrélépi kpà kítú doro dhi kì le nòle dhi, kàdré áyi ti likí kúlì kònzi i sè, ìndì kinzò i sè.

¹¹Lè akódhi kàdzá áyi togó tà kònzi lésè adrészó tà doro 'o. Kàdré tà kìdríkìdrí nda bhàle móndí i kòfalé togó wáyi sè.

¹²Tàko ko, Mírì ni mì móndyá adrébhá tà gyägya 'o dhi i dri. Adré kpà bíbhálé ga tà i dré adrélè zile i tí dhi kì yìzo. Dì, adré ína àmvò alá móndyá adrébhá tà kònzi 'o dhi i rú. »

¹³Àmì kì togó kàdré àtsi ró adrélè tà doro 'o dhi, àdhi ni àmì kì 'o kònzi dhi ni?

¹⁴Dì, tágba mì kàdré kizà nya mì dré adrélé tà gyägya 'o dhi sè yà dhi, Gìká nì tà taní bha àmì dri. Mì kàdré ngá ro tà móndí ì dré adrészò ngá ro ásà dhi i sè ko. Mì kòtayí kpà àmì kì togó adrélé lanzile ko. ¹⁵Be ró dhi, àmì kì togó na dhi, mì kòbhà Krísto twá adrélé àmì kì Mírì ro. Mì kàdré ngbú adrélé gànzi ró tà mì dré adrészò mì bha ásà dhi nì àndu ngi, dhya ángùdhi adrélépi tà nda nì lizí àmì tí dhi dré.

¹⁶Dì, mì kàdré 'òá togó yàyà sè, ìndì lindrì sè. Mì kàdré àmì kì togó likí adrélé lolo, kitswálé móndyá adrébhá àmì kì rú ta kònzi tà doro mì dré adrélé 'ole Krísto nì tà sè dhi i sè dhi, ì kàdréró kanyò ro kúlì kònzi ì dré adrélé tâle àmì rú dhi i sè.

¹⁷Àngyá ko, mì kàdré kizà nya mì dré adrélé tà doro 'o dhi sè gò, Gìká dré lèzoá kàdré kònìnì dhi, kòdhì doro lavúlé mì dré adrélé kizà nya mì dré adrélé tà kònzi 'o dhi sè dhi rúsè.

¹⁸Tàko ko, Krísto nì tändí nya tá kizà ngbà 'í vésè àlo móndí kì tàkonzi kì tà sè. Akódhì gyägya ró nda drà móndyá gyägya ko dhi kì tà sè, kitswálé àmì kì adrì Gìká vélé dhi bvó. À pfu tá akódhì nì rúbhá dràle gò, dré gòzo adrílé Tírí Lólo nì rinyí sè.

¹⁹Dì Tírí Lólo nda sè dhi, akódhì dré kpà lìzo Gìká nì kúlì longó tirí 'ile bădzó na dhi i dré.

²⁰Àyì nda i tá móndí atú ligíbhá Gìká rú lókyá Nówè dré tá adréra'a bwátù kàdrì dhi nì ledé, ìndì Gìká dré adréra'a tà letè togó vwàvwà sè dhi 'á dhi 'í. Bwátù kàdrì nda na dhi, móndí bì ko, ngbà 'í móndí nzi-drì-na dhi ì adrí tá yí liti sè dhi àyì.

²¹Yí nda adré bátísímò nì tà tadhá kòdhya. Dì nyànomvá dhi, bátísímò nda adré àmì kì tídri nì. Adré àmì kì tídri, àmì kì rúbhá dzìma sè ko, be ró dhi, mì dré adrélé longóá dhi, mì adzá àmì kì togó Gìká vélé dre dhi sè. Adré àmì kì tídri, Yésu Krísto nì ngàma dràdrà 'ásè dhi sè.

²²Akódhì nda mbà bhù na gò, adrélé Gìká nì dríágó lésè. Kònàle dhi, ángéló i, ópí kàdrì i, tsàle rinyí ìbe dhi i akódhì nì rinyí zàle.

1 Pétéró 4

Atsima ngóró Gìká dré adrélé lèle dhi ti' nì dhi

¹Dì Krísto dré kizà nyàle rúbhá na dhi sè dhi, mì kàdré kókpà tà kisù akódhì àdhya tini, adrészò gànzi ró adrélé kizà nya kònìnì. Tàko ko, dhya ángùdhi kizà nyàlepi rúbhá na dhi tayí tàkonzi 'òma dre.

²Ásà dhi, dhya nda kitswá góle áyì lókyá àmbí bvò kònìdhi dri dhi nì fe, adrészò lovó kònzi áyì rúbhá àdhya kì 'o dhi ko. Be ró dhi, adré áyì fe adrélé tà Gìká dré adrélé lèle i kò'o dhi kì 'o kòdhya.

³Tàko ko, wáláká dhi, mì kizá tá àmì kì lókyá bì, adrészò tà pàgánò ì dré adrélé lèle 'ole dhi kì 'o. Mì adré tá tatsílé tà swà 'obe, lovó kònzi kì bhabe, wá tsibe, gwányá wàyá kì tà 'obe, ìndì gìká tako kì lindrì bhabe, tágba tà nda ì dré tá adrészò kònzi lavúlé Gìká milésè dhi.

⁴Dì nyànomvá dhi, pàgánò nda kí líndrí adré gàle, mì dré adrélé tatsílé àyi íbe tà swà nda kí 'obe ko dhi sè gó, ì dré adrészó àmí kí lodhá.

⁵Dì, ì ní àyíkya tà ì dré adrélé 'ole nda kí ta Gíká adrélépi gànzi ró móndyá tití lídrì ro ìndí dràbhá dre dhi kí tàbvó ta dhi kandrá.

⁶Tà nda sè dhi, à longó tá ndìndí Rúbí Tani móndyá dràbhá dre dhi ì dré. Dì tágba Gíká dré àyi nda kí tàbvó tázó tà ì dré 'ole rúbhá na dhi ì sè móndyá tití dhi kya tíni dhi, ì ní kitswá lídrì Gíká àdhya ní kisú Tírí Lólo na.

⁷Tà tití dhi kí kùdù atsá ànyí dre. Dì ásà dhi, mì kàdré tà 'o tògyá sè, adrészó àmí kí tà kisùle dhi kí likí, mì kàdréró tà zi Gíká tí be dhi bvó.

⁸Lavúlé dhi, mì kàdré ru le àmí kòfalésè togó wáyi sè. Tàko ko, lèle adré ína tàkonzì zyandre dhi kí zu.

⁹Mì kàdré àmí kí adrúpi kí ka'ì dòle àmí véna togó dóro sè, ngùrùngùrù sè ko.

¹⁰Àmí àlo àlo tití dhi ì, mì kàdré tà 'o àmí kí adrúpi ì dré, tà taní mì dré kisúlé Gíká ní togó taní sè dhi sè. Mì kàdré 'òá ngóró móndí Gíká dré tà taní twátwa dhi kí bhàzo àyi drígá dhi ì tíni.

¹¹Dhya àlo kàdré kúlí longó dhi, kàdré kúlí adrébhá angálé Gíká vélésè dhi kí longó kòdhya. Dhya àlo kàdré tà 'o móndí ì dré dhi, kàdré 'òá rinyí Gíká dré adrélé fèle drá dhi sè. Mì kàdré dì tà tití dhi kí 'o, móndí ì kàdréró Gíká ni rú bha kùle Yésu Krísto sè be dhi bvó. Mìlanzìlanzì ì rinyí be dhi ì kàdré akódhi dré kóná vésè kólyá! Kàdré kònìnì.

Kizà nyàma Krísto ni tà sè dhi

¹²Áma arúpi má dré lèle tò ní ì, lè àmí kí líndrí kàdré gàle, tà kizà ro adrébhá àmí kí tabhì dhi kí tà sè ko. Mì kàdré kpà tà nda kí no ngóró tà twá atsábhá àmí rú dhi ì ró ko.

¹³Be ró dhi, mì kàdré àmíkya lenzélé mì dré adrélé kizà nya Krísto àdhya tití dhi sè, akódhi kònì dra apfò áyí mìlanzìlanzì na dhi, mì kòkitswáró vélé lenzélé lavúlé arí be bì be dhi bvó.

¹⁴À kàdré àmí kí lodhá Krísto ní rú ní tà sè dhi, Gíká ní tà taní bha àmí dri. Tàko ko, Gíká ní Tírí mìlanzìlanzì ró dhi adrélé àmí léna.

¹⁵Dì, mì kàdré kizà nya dhi, lè mì kàdré nyàá mì dré adrélé móndí tupfúbhá ì ró yà, kùgubhá ì ró yà, tà kònzi 'obhá ì ró yà, kó ngalè móndí tifibhá móndí kí tà ì 'ásè dhi ì ró yà dhi sè ko.

¹⁶Dì, mì kàdré kizà nya mì dré adrélé Krísto ní ka'lbhá ì ró dhi sè dhi, mì kàdré àmíkya kanyò ro tà nda sè ko. Be ró dhi, mì kàdré Gíká ní rú bha kùle, mì dré Krísto ní rú nda ní ka'ile dòle dhi sè.

¹⁷Tàko ko, lókyá tàbvó tázó dhi kitswá dre. À ní rè zyà móndyá Gíká àdhya ki tàbvó ta drìdrì. Dì tàbvó támá nda kòkídholo àma rú dhi, móndyá Gíká ní Rúbí Tani gabhá rè dhi kya ní dì vélé adré ngíni?

¹⁸Ngóró tisile Giká ni Kúlí na dhi tíni: «Móndí àlo gyágya dhi ni adríma kàdré kòkóròko dhi, móndyá Giká ni tà gabhá rè dhi kí tà tàkonzibhá íbe dhi ni di vélé adréní? »

¹⁹Ásà dhi, lè móndyá adrébhá kizà nya ngóró Giká dré adrélè lèle dhi tíni dhi, i kàdré àyi kí bha Giká àyi kí bhàlepi dhi drígá, adrélè tà doro 'o. Tako ko, Giká nda kitswá adrélè ka'ile togó wáyi sè.

1 Pétéró 5

Bhàgo kí tà kàdhúrà í be dhi

¹Bhàgo Èkélézyà àdhyà àmí kòfalé dhi i dré dhi, má adré tà ta kònini. Ma kókpà bhàgo i amí tíni. Ma dhya Krísto ni kizà nyale dhi kí nobhá mì sè dhi kí àlo 'i, ìndi móndyá dra Giká ni mìlanzìlanzì dré dra tadhálé dhi ni kisúbhá dhi kí àlo 'i. Di má adré àmí kí kodzó,

²mì kàdréró kábilígyà kí pàrí Giká dré bhàle àmí drígá dhi kí likí, ngóró kábilígyà likíbhá doro dhi i tíni. Mì kàdré àyi kí dri ko doro. Di, mì kàdré 'òá kònini ngóró tolí bhàle àmí dri dhi tíni ko. Be ró dhi, mì kàdré 'òá togó doro sè, ngóró Giká dré adrélè lèle dhi tíni. Mì kàdré 'òá làfa lovó sè ko, be ró dhi, àmí kí togó dré adrélè àtsi ró tà nda sè dhi sè.

³Mì kàdré òpì nya kábilígyà bhàle àmí drígá nda i dri rìnyí sè ko. Be ró dhi, mì kàdré àmikya tà doro 'o àyi kòfalé, i kàdréró tà no àmí rú, adrészó 'òá àmikya tíni.

⁴Di lókyá kábilígyà likíbhá kí kàdrì dré dra apfòzo dhi tú dhi, mì ni kùlá mìlanzìlanzì ro, lagulagu ni dré kitswázó akílé bwà ko dhi ni kisú.

⁵Àmí kàdhúrà i, mì kàdré kpà àmí kí bha màlìga i zàle. Àmí tití, mì kàdré àmí kí tà bha kìní mi. Tako ko, Giká ni Kúlí adré tàá dhi: «Giká adré ru pfu móndyá drìkàdrì ro dhi íbe. Di, adré ína áyi togó taní bha móndyá adrébhá àyi kí tà bha kìní mi dhi i rú. »

⁶Di ásà dhi, mì kàdré àmí kí bha Giká ni drígá rìnyi ró dhi zàle, kòtingáró àmí kuru lókyá kitswálépi dhi sè be dhi bvó.

⁷Mì kàdré tà tití adrébhá àmí kí togó 'o lanzile dhi kí bha Giká drígá. Tako ko, akódhi adré àmí kí tà kisù nì.

⁸Mì kàdré àmí kí tà kisùle dhi kí likí, adrészó támìga dri. Tako ko, àmí kí kàribhá, Dzáborò adré tatsilé kàndríbe kàmí tíni, adrélè móndí nda nyale.

⁹Mì kàdré di pá si akódhi kandrá, adrészó àmí kí totó tätä àmí kí tà ka'ika'i na. Tako ko, mì ni tâle dhi, àmí kí adrúpi bvò wáyi 'ásè dhi i adré kpà kizà nya lású be àmikya tíni dhi be.

¹⁰Di mì konya kizà lókyá tsà sè dre dhi, Giká ni tändi adrélépi áyi togó taní tadhá tà tití i sè dhi ni àmí kí 'o kitswálé tití, àmí kí timbàzo, àmí kí 'òzo àmí kí totó tätä àmí kí tà ka'ika'i na. Tako ko, akódhi nda azí àmí kitswálé áyi mìlanzìlanzì adrélépi kóná vésè kólyá dhi ni kisú Yésu Krísto na.

¹¹Rinyí kàdré akódhì dré kóná vésè kólyá! Kàdré kònìnì.

Mòdo kùdù

¹²Áma adrúpi Sílà má dré adrélé ka'ile togó wäyi sè dhì, bhà drígá má vélé wárágà kònìdhì ni tisìzo. Dì má tisì wárágà mvá kònìdhì àmì kì kodzozó, ìndì tadházóá àmì dré dhì, mì adré trôle Gìká ni togó taní rú báti dhì.

¹³Èkèlézyà Bàbìlónà le Gìká dré zìle àmì tñi dhì fè mòdo àmì dré. Áma mvá, Márokò fè kpà mòdo àmì dré.

¹⁴Àmì ró dhì, mì kòfè mòdo adrészó ru kamú àmì kòfalésè lèle sè. Tà kìdríkìdrí kàdré àmì tití adrébhá Krísto na dhì i dré!

2 Pétéró

2 Pétéró 1

Pétéró ni mòdo fèma

¹Ma, Sìmónà Pétéró, màrabà ìndì àpóstolò Yésu Krísto àdhya ró dhi, má adré wárágà kònìdhi ni tisì àmi tà ka'ika'ì làgí kyàkyà dhi ni kisúbhá àmakya tíni dhi i dré. Mì kisú tà ka'ika'ì nda, Yésu Krísto, àma kì Gìká ìndì àma kì tidrílépi dhi ni tà gyägya sè.

²Giká ni togó taní i tà kìdríkìdrí be dhi i kàdré gàle àmi léna bǐ, mì dré Giká ni nile túmání àma kì Míri Yésu be dhi sè!

Tà Gìká dré àma kì azízó ásà dhi

³Míri ni rinyí Giká àdhya ró dhi sè dhi, afè àma dré tà tití dhi i, mà kàdréró atsílé ngóró Giká dré adrélé lèle dhi tíni, adrélé kpà trôle akódhì ni tà rú. Akódhì 'o àma Giká àma kì azílépi akódhì ni mìlanzìlanzì sè ìndì akódhì ni rinyí sè dhi ni ni dhi nì.

⁴Tà nda kòdhì i sè dhi, Giká nda afè àma dré áyi lazikúlí kàdrì làgí ró dhi i, kitswálé lazikúlí nda i sè dhi, mì kàdréró áyi tändì ni lídrì íbe àmi léna, ìndì mì kòkitswáró lapálé lovó kònzi adrébhá móndyá bvò àdhya kì kizá dhi i sílésè.

⁵Ásà dhi, mì kàdré àmi kì fe wáyi adrélé tà dóro bha àmi kì tà ka'ika'ì dri. Mì kàdré kpà tà nìnì bha tà dóro 'o'o nda dri,

⁶adrézó lovó mvomvò bha tà nìnì nda dri, adrézó togó tsitsì bha lovó mvomvò nda dri, adrézó trotrò Giká ni tà rú dhi ni bha togó tsitsì nda dri,

⁷adrézó togó dóro tadhataadha àmi kì adrúpi i dré dhi ni bha trotrò Giká ni tà rú nda dri, adrézó lèle bha togó dóro tadhataadha nda dri.

⁸Tako ko, mì kàdré tà nda kòdhì íbe àmi léna adrézó lìle ába drìdrì dhi, mì ni tà dóro 'o bǐ adrézó kpà lò'wa dóro 'a bǐ, mì dré àma kì Míri Yésu Krísto ni nile be dhi sè.

⁹Dì, dhya àlo kàdré tà nda i àko dhi, akódhì ína mì kùdükùdu 'i. Akódhì tivì kpà tâle dhi, Giká temvé i tàkonzi í dré tá 'ole wáláká dhi i lésè dre dhi.

¹⁰Dì ásà dhi, áma adrúpi i, àmi kì togó kàdré àtsì ró adrézó tadhá dhi, Giká zì àmi, àmi kì azízó adrélé móndyá ína i ró káyà dhi. Tako ko, mì kàdré 'oá kònini dhi, mì kitswá tâdzí dhèle ko.

¹¹Kòdhì íbe dhi, à ni àmi kì ka'ì file àma kì Míri Yésu Krísto àma kì tidrílépi dhi ni Òpì na, adrélé kònàle kóná vésè kólyá.

¹²Má ni ngbú adré tà nda kòdhì kì 'o agálé àmi léna, tágba mì dré tà nda kì nìzo dóro, adrézó kpà àmi kì totó tätä tà bâti mì dré kisúlé dhi dri dhi.

¹³Dì má dré rè dhu adrérà'a lídrì íbe dhi 'á dhi, má mìlésè dhi, dóro ni adrélé tà nda kì 'o agálé àmi léna dhi.

¹⁴Tàko ko, má nì tâle dhi, má adré 'ole áma rúbhá kònìdhì nì tayí dhi be, ngóró àma kì Míri Yésu Krísto nì tândi dré tadhálé má dré dhi tíni.

¹⁵Dì má nì tà tití dhi kì 'o, kitswálé áma lìma àmvolésè dhi, mì kòkitswáró ngbú adrélé tà nda kì kisù be dhi bvó.

Móndyá Krísto nì mìlanzìlanzì nobhá mì sè dhi i

¹⁶Tàko ko, mà dré tá adrérà'a àma kì Míri Yésu Krísto nì atsama rìnyí be dhi nì tà longó àmì dré dhi 'á dhi, mà totó tá àma tití tâko apfòbhá móndí kì tògyá lésè dhi i dri ko. Dì, mà nò tá àmakya akódhi nì tà kàdrì àma kì tândi kì mì sè.

¹⁷Àngyá ko, akódhi kisú tá lindrì i mìlanzìlanzì be Gìká Atá vélésè, Gìká nì kúlí dré apfòr'a áyi mìlanzìlanzì kàdrì dhi lésè dhi 'á. Kúlí nda tà drá dhi: «Kònìdhì áma Mváagó má dré lèle tò dhi 'i. Áma togó adré kínílé akódhi nì tà sè tò. » ¹⁸Áma kì tândi mà yi kúlí apfòlepi bhù lésè nda àma kì bíbhálé sè, mà dré tá adrérà'a akódhi be kòngó lólo drìna dhi 'á.

¹⁹Tà nda sè dhi, mà nì vélé dóro tâle dhi, kúlí pròfétà i dré longolé dhi i tà bâti 'i káyà dhi. Àmì ró dhi, mì kàdré trôle kúlí nda i rú dhi, mì nì adré 'òá dóro. Tàko ko, kúlí nda i ngóró àtsí adrélépi kòle ngá kazá tímivá na dhi tíni. Dì mì kàdré trôle kúlí nda i rú, tsâle lókyá kítú dré dra apfòzo, ìndì nzágó dré dra ngá kazá àmì kì togó na dhi 'á.

²⁰Tà kàdrì lavúlé dhi, lè mì kònì tâle dhi, dhya àlo kítswá tà àlo pròfétà i dré tísile Gìká nì Kúlí na dhi nì àndu ngi áyi drì sè bwà ko.

²¹Tàko ko, kúlí pròfétà i dré longolé nda kì àlo angá tâdzí tà móndí i dré tá lèle tâle dhi lésè ko. Be ró dhi, pròfétà nda i longó tá kúlí angábhá Gìká vélésè dhi i kòdhyá, ngóró Tírí Lólo dré tá àyi kì tidrile dhi tíni.

2 Pétéró 2

Gìká nì tà tadhábhá kinzò sè dhi i

(À kònò kpà Yúdà 1:4-13)

¹Atú dhi, pròfétà kinzò ro dhi i apfò tá ìsérélè ànzì i kòfalé. Dì Gìká nì tà tadhábhá kinzò sè dhi kì kókpà apfò àmì kòfalé kònìni. I ni Gìká nì tà i dré dra tadhálé gòdhóghòdho dhi kì tosó àmì kòfalé lùzu ró, adrészó móndí kì tà ka'ika'i kízá. I ni ndìndì Míri Yésu àyi kì apálépi tâkonzì lésè dhi nì ga, adrészó dràdrà asé àyi kì tândi i dri ngbó ró.

²Móndí zyandre dhi kì dhe àyi vésè, adrélé tà swà 'o àyikya tíni. Tà nda sè dhi, à ni tà ta kònzi láti tà bâti àdhyá rú.

³Ngá lovó sè dhi, tà tadhábhá kinzò sè nda kì àmì kì lití kúlí tâko angábhá àyi drilésè dhi i sè, kitswázó ngá kisú àmì drígásè dhi bvó. Dì, kídhólé kínó lésè dhi, dhya dra àyi kì tâbvó tâlepi dhi ína gànzi ró kítswálé tà bha àyi dri. Akódhi dra àyi kì tà pfùlepi pfupfù nda adré ayí ko ko.

⁴Tàko ko, Gìká tayí tá ángéló tàkonzi 'obhá dhi i tà ñòma àyi dri dhi sè ko. Be ró dhi, bhe tá ína àyi líferò na, àyi kí 'ìzo nyìri sè àrà tímivá ro dhi na, adrészó àyi kí likí kònàle adrélé kítú àyi kí tàbvó tázó dhi ni letè.

⁵Tayí tá kpà móndyá adrébhá tá bvò dri Nówè ni lókyá 'á dhi i ko. Be ró dhi, 'o tá ína yí tile bvò drísè wáyi, móndyá áyi tà gabhá rè nda kí tupfuzó todràle. Tídrí tá ngbà 'í Nówè áyi tà gyägya longolépi dhi, túmání móndí àruka nzi-drì-rì dhi íbe kòdhya.

⁶Gìká bhà tá kpà tà bhàandre Sòdómà àdhya dri Gòmórà àdhya be gò, bhàandre nda kí zàzo vèle, tadházóá dhi, í ni móndyá áyi tà gabhá àyikya tíni dhi kí 'o kònìnì.

⁷Apá tá Lótò, dhya gyägya ro dhi kòdhya. Akódhi nda nya tá kizà lavulé tà swà dríkonzibhá i dré tá adrélé 'ole dhi kí tà sè.

⁸Tàko ko, dhya gyägya nda adré tá adrélé àyi kòfalé gò, akódhi ni togó dré adrészó kizà nya àyi kí tà kònzi dré adrélé nôle, ìndì yile kítú àlo àlo tití i sè dhi kí tà sè.

⁹Dì tà tití nda kòdhì i adré tadhá dhi, Míri Gìká ni adrélé móndyá adrébhá tròle áyi tà rú dhi kí apá tà adrébhá àyi kí tabhì dhi i lésè dhi be. Ni kpà adrélé móndyá adrébhá tà kònzi 'o dhi kí likí tsàle kítú àyi kí tàbvó tázó, gò tà ñozo àyi dri dhi tú dhi be.

¹⁰Lavulé dhi, a ni tà ño móndyá adrébhá tatsilé lovó kònzi àyi kí rúbhá kya kí 'obe, ìndì adrébhá àyi rinyí adrészó opì nya dhi ni ayizé dhi i dri. Tà tadhábhá kinzò sè nda i móndí dríkàdrì ro, adrébhá tà 'o tirì àko dhi i. I adré àyikya tirí milanzìlanzi ro bhù na dhi kí lodhá tirì àko.

¹¹Dì, ndìndì ángéló adrébhá rinyi ró ìndì kòmba ró dhi i adré àyikya tirí nda kí lodhá, adrészó àyi kí asíkì Míri kandrá dhi ko.

¹²Dì, móndyá nda i adré tà i dré nile ko dhi kí lodhá kòdhya. Àyi ngóró ka'wá mbì àdhya tà nibhá ko, à dré tile kítswázó àyi kí turú, tupfulé todràle dhi i tíni. Dì i ni kókpà todrà akílé tití ka'wá nda i tíni.

¹³À ni tà kònzi logó àyi dré tà kònzi i dré 'ole dhi i tí. I adré tatsilé àyi kí lovó kònzi kí 'obe ngádra 'ásè, adrészó lenzélé ásà. Àmì kí gwányá i 'ásè dhi, àyi ngóró ngá ndí ró adrélépi kanyò fe àmì dré dhi tíni, i dré adrérà'a lenzélé àyi kí túrúpfú tà sè dhi 'á.

¹⁴Àyi kí mi ga múná tà sè bì. I kítswá tadtzi tàkonzi 'oma tayí ko. I adré móndí tà ka'ika'i íbe yàyà dhi kí lití ledhélé tàkonzi na. Àyi kí togó ga làfa lovó sè bì. Gìká ni tátrítrí àyi dri!

¹⁵I ku láti tà gyägya àdhya 'ásè, adrészó láti Bálámà, Bòsorò ni mvá àdhya ni lebè kòdhya. Bálámà nda lè tá ína làfa kisulé tà kònzi 'oma sè tò.

¹⁶Dì, pròfétà nda ni púndà, ka'wá kítswálépi kúlì tà bwà ko dhi tà kúlì móndí tíni, kítswázó akódhi ni azaaza kikí.

¹⁷Tà tadhábhá kinzò sè nda i sù ngóró yí kidri sèbhá dre dhi i tíni, ìndì ndùrùku lyàandre dré adrélé livilé dhi i tíni. Gìká zù tímivá anilépi tsitsì dhi àyi dré.

¹⁸Ì adré àyi kí afà kúlí tàko i sè, adrélé móndí lapábhá tídhí ro móndí lítílé dhi i kòfalésè dhi kí togó se, i kàdréró tatsílé swà ro lovó kònzi àyi kí rúbhá kya kí 'obe be dhi bvó.

¹⁹Ì adré lazíá àyi nda i dré dhi, i ní àyi kí tri, tágba àyi kí tändí i dré adrészó mårábà àyi kí tà swà àdhya 'i dhi. Tàko ko, dhya ángùdhi tà àlo dré adrélé atólé i pálé dhi ína mårábà tà nda àdhya 'i.

²⁰Móndí i kòlapá tà kònzi bvò kòndí àdhya i sílésè àma kí Míri Yésu Krísto àma kí tindrílépi dhi ni níma sè gò, i dré gózo tódhyá àyi kí tayí tà kònzi nda i dré atólé àyi pálé dhi, àyi kí kùdù ni vélé atsá kònzi wáláká ni ní lavú.

²¹Kònò i kònì tá láti tà gyägya àdhya ko dhi, kòdhí ni tá adré dóro lavúlé, i dré láti nda ní níle be gò, àmvò alázó tòlí lolo fèle àyi dré dhi vélé dhi rúsè.

²²Ì 'o àyikya tà ngóró tògyakúlí i dré adrélé tåle dhi tíni: «Kòkí adré góle tódhyá ngá i dré adhílé dhi ni nya. » À adré kpà tàá dhi: «Tigá dzile dhi adré góle file tódhyá kùrú na. »

2 Pétéró 3

Kítú Míri dré dra agòzo dhi

¹Áma arúpi má dré lèle tò ní i, kònìdhí wárágà má dré tísile àmí dré dhi ní rì 'i. Wárágà rì nda i léna dhi, má 'o tà agálé àmí léna, mì kàdréró tà adrébhá báti dhi kí kisù kòdhya.

²Má adré lèá dhi, mì kòkisù kúlí pròfétà lolo atú dhi i dré longolé dhi i, túmání tòlí àma kí Míri àma kí tindrílépi dhi dré tåle àmí kí àpóstolò i tí dhi be kòdhya.

³Drìdrì dhi, lè mì kònì tåle dhi, lókyá kùdù sè dhi, móndí dra àmí kí gubhá dhi kí apfò adrélé àmí kí gu, adrészó tatsílé àyi kí tändí kí lovó kònzi kí 'obe.

⁴Ì ní lizíá dhi: «Akódhi lazí tá ko tåle dhi, i ní dra agò dhi? Di akódhi nda ángwà? Tàko ko, kidhólé àma kí tåbhí kí dràma lésè atsálé ándrò kònìdhí dhi, tà tití dhi i ngbú ngóró dré tá adrélé bvò bhära'a dhi tíni. »

⁵Di, àyi nda i adré tà kònì kí tivì ize sè: Wáláká dhi, Gíká tà tá kúlí gò, bhù kí bhàzo bvò be. Lanzí tá bvò kí kòfalé yí be, bvò nda ní 'òzo apfòle yí nda lésè. ⁶Àmvolásà dhi, 'o tá yí tile bvò wáláká dhi drísè, bvò nda ní pfùzo tití. ⁷Di Gíká ní kúlí àlo nda sè dhi, adré bhù ándrò kònì kí likí bvò ándrò kònìdhí be, adrélé àyi kí pfùma àtsí sè dhi ní letè, tsàle kítú i dré dra móndyá áyi tà gabhá dhi kí tåbvó tåzo gò, àyi kí tà 'òzo akílé dhi tú.

⁸Di, áma arúpi má dré lèle tò ní i, mì kòtivì ko tåle dhi, Míri milésè dhi, kítú àlo dhi ngóró kóná ngùlù-àlo dhi tíni, iñdi kóná ngùlù-àlo dhi ngóró kítú àlo dhi tíni dhi. ⁹Míri adré tà tigí tà i dré lazílé dhi ki 'òma sè ngóró móndí àruka i dré adrélé kisùle dhi tíni ko. Be ró dhi, adré ína áyi togó vwàvvà tadhá àmí véna. Tàko ko, adré lèá dhi, dhya àlo kòdrà nyó ko, be ró dhi, móndyá tití dhi i kòladzá àyi kí togó agòzo i vélé.

¹⁰Dì, kítú Míri dré dra agòzo dhì ni atsá ngóró kùgú dré adrélé atsálé ngbō ró dhì tíni. Kítú nda tú dhì, bhù kì akí kpòrò 'u'ù be, ìndì ngá tití bhù mìbhalé 'á dhì kì ve àtsí sè. Dì bvò i ngá tití lá dhì íbe dhì kì akí.

¹¹Dì à kàdré ngá tití dhì kì 'o akílé kònìnì dhì, lè mì kàdré dì vélé móndí ngíni dhì i ró? Adré lèá dhì, mì kàdré atsílé ngóró móndí lolo i tíni, adrélé trôle Gìká ni tà rú!

¹²Mì kàdré kpà kítú Gìká àdhyà nda ni letè lovó sè, adrészò tà tití dhì kì 'o kítú nda ni 'òzo atsálé mbèlè. Kítú nda tú dhì, bhù kì ve akílé àtsí sè, ìndì ngá tití bhù mìbhalé 'á dhì kì agá dile àtsí sè.

¹³Dì, mà adré àmakya bhù tídhi ro dhì kì letè bvò tídhi ro dhì be, ngóró Gìká dré lazilé dhì tíni. Àrà nda i 'ásè dhì, tà gyágya ni ga bì.

¹⁴Dì áma arúpi má dré lèle tò ni i, mì dré adrérà'a kítú nda ni letè dhì 'á dhì, mì kàdré àmi kì fe wáyi adrélé ndí àko, tà kònzi àko àmi rú, ìndì tà kìdríkìdrí íbe àmi kòfalé Gìká be.

¹⁵Mì kàdré àma kì Míri ni togó vwàvvà dré adrélé tadhálé àmi véna dhì ni no ngóró láti dré adrélé fèle àmi dré adrízó ásà dhì ró. Àma kì adrúpi Pólò mà dré lèle tò dhì, tisì kpà tà nda kòdhì àmi dré tògyá Gìká dré fèle i dré dhì sè dre.

¹⁶Adré tà tisì kònìnì áyi wárágà tití dhì i léna, dré adrérà'a tà ta tà nda i dri dhì 'á. Tà àruka dré tisile wárágà nda i léna dhì kì àndu nìma kòkóròko. Móndí àruka tà nibhá ko, adrébhá tà ka'ika'i íbe yàyà dhì i adré àyíkyà tà nda kì ladzá atsálé kinzò ro, ngóró i dré kpà adrélé 'ole tà àruka tisile Gìká ni Kúlí na dhì i sè dhì tíni. Ásà dhì, i adré àyí kì tändì kì dràdrà asé àyí dri.

Pétéró ni kúlí kùdù

¹⁷Áma arúpi má dré lèle tò ni i, nyànomvá dhì, má lazí tà nda kòdhì i àmi dri dre. Mì kàdré dì àmi kì likí, mì kòtayíró àmi móndí kònzi i dré litílé ko, i dré kpà àmi kì tà ka'ika'i kizízó ko.

¹⁸Be ró dhì, mì kàdré àmi kì fe adrélé li'wálé àma kì Míri Yésu Krísto àma kì tìdrílépi dhì ni togó taní na, ìndì akódhì ni nìma na. Mìlanzìlanzì kàdré akódhì dré nyànomvá, tsàle kóná vésè kólyá! Kàdré kònìnì.

1 Yòwánì

1 Yòwánì 1

Kúlí adrélépi lí drí ` fe dhi

¹Mà adré dhya adrélépi tá be kínó tà tití dhi kí kidhoma lésè, mà dré yile, mà dré nôle mì sè, mà dré tabèle, ìndì mà dré tà ni ni kisùzo dhi ni tà longó kòdhyá. Akódhi nda Kúlí adrélépi lídrì fe dhi 'i.

²Lídrì nda apfò tá àma kòfalé gò, mà dré nòzoá. Di mà adré tà mà dré nôle mì sè nda ni tà ta, adrészó lídrì kóná vésè kólyá adrélépi tá Gíká Atá véna gò, dré apfòzo àma kòfalé nda ni tà longó kòdhyá.

³Mà adré tà mà dré nôle ìndì mà dré yile nda ni longó àmì dré, mì kàmúró kpà ru àma íbe adrélé túmání be dhi bvó. Àma, mà amú ru Gíká Atá be, ìndì akódhi ni Mváagó, Yésu Krísto be dre.

⁴Mà adré tà kòdhí kí tisì, mà kàdréró lenzélé túmání àmì íbe kitswálé tití.

Atsima ngádra 'ásè dhi

⁵Tà mà dré yile Yésu Krísto nda tí gò, mà dré adrészó longoá àmì dré dhi, tà kònìdhí 'i: Gíká ngádra 'i, ìndì akódhi léna dhi, tínimvá àlomvá yókódhó.

⁶Mà kàdré tàá dhi, mà amú ru Gíká be dre gò, mà dré adrészó atsílé tínimvá na dhi, kòdhí mà adré kinzò ta, ìndì mà adré atsílé tà báti na ko.

⁷Di, mà kàdré àmakya atsílé ngádra 'ásè ngóró Gíká ni tändi dré adrélé ngádra 'á dhi tini dhi, mà amú ru àma kòfalésè gò, akódhi ni Mvá, Yésu ni kárí dré adrészó àma kí temvé tàkonzi wáyi dhi i lésè.

⁸Mà kàdré tàá dhi, àma tàkonzi àko dhi, kòdhí mà adré àma kí tändi kí lití, ìndì tà báti àma léna yókódhó.

⁹Di, mà kàdré àma kí tàkonzi kí ta ngádra 'á Gíká kandrá dhi, akódhi ni àma kí tàkonzi nda kí tri gò, àma kí temvézó àma kí tà kònzi wáyi dhi i lésè. Tako ko, akódhi gyágga, ìndì kitswá adrélé ka'ile togó wáyi sè.

¹⁰Mà kàdré tàá dhi, mà 'o tàkonzi ko dhi, mà adré Gíká ni bha kinzò líyí ro, adrészó kpà tadhá dhi, akódhi ni kúlí àma léna yókódhó.

1 Yòwánì 2

Krísto, dhya adrélépi àma kí tará ga dhi 'i

¹Áma ànzi i, má adré tà kòdhí kí tisì àmì dré, mì kò'oró tàkonzi ko dhi bvó. Di, dhya àlo kò'o tàkonzi dhi, àma dhya adrélépi àma kí tará ga Gíká kandrá dhi íbe. Akódhi nda Yésu Krísto, dhya adrélépi gyágga dhi 'i.

²Gíká afè akódhi dràle móbòmà ro, àma kí tàkonzi kí trizo ásà. Ngbà 'í tàkonzi àmakya 'i ko, afè akódhi dràle móndyá tití bvò àdhyá kí tàkonzi kí trizo.

³Mà kàdré Gìká ni tolí kí ka'ì 'ole dhí, mà nì tâle dhí, mà nì akódhí bâti dhí be.

⁴Dhya adrélépi tàá dhí «Má nì akódhí be» gò, dré adrészó akódhí ni tolí kí ka'ì 'ole ko dhí, dhya nda kinzò lîyí 'í, ìndì tâ bâti akódhí léna yókódhó.

⁵Dì, dhya adrélépi ína akódhí ni kúlí ka'ì 'ole dhí adré tadhá dhí, Gìká ni lèle ga akódhí léna kîtswálé tití. Tâ kòdhí sè dhí, mà nì tâle dhí, àma akódhí léna dhí be.

⁶Lè dhya ángùdhi adrélépi tàá dhí, i adré adrélé akódhí léna dhí, kàdré atsílé ngóró Yésu ni tândi dré atsílé dhí tíni.

Tòlì́ tí́ dhí́ ro dhí

⁷Áma arúpi má dré lèle tò ni i, má adré tolí tídhí ro dhí ni tisì àmì dré kòdhya ko. Be ró dhí, tolí má dré adrélé tisile kòdhí, tolí àku mì dré kisúlé adrészó ába kîdhólé kîdhoma lésè dhí 'í. Tolí àku nda kúlí mì dré yìle dre dhí 'í.

⁸Tágba kònìnì dhí, má adré kpà tolí tídhí ro dhí ni tisì àmì dré kòdhya. À ni kîtswá tâ bâti tolí nda àdhya ni no Krísto na, ìndì àmì léna. Tâko ko, tînímvá adré akílé, ìndì ngádra bâti dhí kîdhó adrélé nga kazá dre.

⁹Dhya adrélépi tàá dhí, i ngádra 'á gò, dré adrészó togó kònzi bha áyi adrúpi rú dhí, dhya nda dhu rë tînímvá na.

¹⁰Dhya adrélépi áyi adrúpi ni le dhí adré atsílé ngádra 'ásè, ìndì tâ àlo kîtswálépi akódhí ni 'o dhèle dhí akódhí léna yókódhó.

¹¹Dì, dhya adrélépi ína togó kònzi bha áyi adrúpi rú dhí, dhu rë tînímvá na, ìndì adré atsílé tînímvá na. Akódhí nda ni ngalè i adré lîle ángolé ya dhí ko. Tâko ko, tînímvá nda 'o akódhí ni mì adûle dre.

¹²Àmì, áma ànzì i, má adré tâ tisì àmì dré, Gìká dré àmì kí tâkonzi trile Krísto ni rú sè dhí sè.

¹³Àmì, ànzì kí atá i, má adré tâ tisì àmì dré, mì dré dhya adrélépi be tâ tití dhí kí kîdhoma lésè dhí ni nîle be dhí sè.

Àmì, tódhíbhá i, má adré tâ tisì àmì dré, mì dré Dhya kònzi ni lavûlé dre dhí sè.

¹⁴Àmì, áma ànzì i, má tisì tâ àmì dré, mì dré Gìká Atá ni nîle be dhí sè.

Àmì, ànzì kí atá i, má tisì tâ àmì dré, mì dré dhya adrélépi be tâ tití dhí kí kîdhoma lésè dhí ni nîle be dhí sè.

Àmì tódhíbhá i, má tisì tâ àmì dré, mì dré adrélé rînyi ró dhí sè, Gìká ni kúlí dré adrélé àmì léna dhí sè, ìndì mì dré Dhya kònzi ni lavûlé dre dhí sè.

Bvò kònì́ dhí ni tâ lèma ko dhí

¹⁵Lè mì kàdré bvò kònìdhí 'í yà, kó ngalè tâ bvò kònì àdhya 'í yà dhí kí le ko. Dhya àlo kàdré tâ bvò kònì àdhya kí le dhí, Gìká Atá ni lèle akódhí léna yókódhó.

¹⁶Tâko ko, tâ bvò kònì àdhya i, tâ kònì 'í: lovó kònzi rûbhá àdhya i, lovó kònzi ngá adrélé nôle mì sè dhí i sè dhí i, ìndì dhyá kí afâma ngá adrészó ába dhí kí tâ sè dhí. Tâ

nda kòdhì i adrè angálé Gìká Atá vélésè ko. Be ró dhi, i adrè àyikya angálé bvò kònìdhì lésè.

¹⁷Bvò kònìdhì i lovó kònzi bvò kònđi àdhya íbe dhi i adrè akílé akíakí. Di, dhya adrélépi tà Gìká dré adrélé lèle i kò'o dhi kí 'o dhi, ni ína adrè lídrì íbe kóná vésè kólyá.

Krísto ni kàribhá ni atsama

¹⁸Áma ànzì i, lókyá ándrò kònìdhì lókyá kùdù 'i. Mì yi tâle dhi, Krísto ni kàribhá ni dra atsá dhi 'i. Di ndìndì nyànomvá dhi, Krísto ni kàribhá bì dhi i apfò dre. Tà nda sè dhi, mà nì tâle dhi, kònìdhì lókyá kùdù 'i dhi be.

¹⁹Móndyá nda i pfò àma kí tändi i kòfalésè. Di, àyi tá àyikya móndyá àmakya 'i ko. Tàko ko, i kàdré tá móndyá àmakya 'i dhi, kònò i nì tá adrè ngbú túmání àma íbe. Di, àyi kí pfòma nda adrè ína tadhá dhi, àyi kí àlo tá àmakya 'i ko.

²⁰Di, àmì ró dhi, àmì àmikya Tírí Lólo Krísto dré kutulé àmì dri dhi íbe gò, àmì tití mì dré tà bâti nìzo.

²¹Má adrè tà tisì àmì dré, mì dré tà bâti nile ko dhi sè ko. Be ró dhi, má adrè tà tisì àmì dré, mì dré tà bâti nile be dhi sè, ìndì tà àlo kinzò ro dhi dré adrélé angálé tà bâti nda lésè ko dhi sè.

²²Di kinzò líyí ína àdhi 'i? Akódhì dhya adrélépi tàá dhi, Yésu Mèsíyà 'i ko dhi 'i. Dhya nda Krísto ni kàribhá 'i. Adré Gìká Atá ni ga, akódhì ni Mvá be.

²³Tàko ko, dhya ángùdhì adrélépi Gìká ni Mvá ni ga dhi, akódhì Gìká Atá íbe i léna ko. Dhya ángùdhì adrélépi Gìká ni Mvá ni ka'i dhi, akódhì kókpà Gìká Atá íbe i léna.

²⁴Àmì ró dhi, lè mì kàdré tà mì dré tá yile kidhólé kidhoma lésè dhi kí likí adrélé àmì léna. Tàko ko, tà mì dré yile nda i kàdré àmì léna dhi, àmì kí tändi mì ni kpà adrè Gìká ni Mvá na, ìndì Gìká Atá na.

²⁵Tà Krísto dré lazilé àma dré dhi, tà kònìdhì 'i: lídrì kóná vésè kólyá dhi.

²⁶Má adrè tà kòdhì kí tisì àmì dré móndí adrébhá láti nda kitswázó àmì kí lití dhi kí tà sè.

²⁷Di, àmì ró dhi, mì kisú Krísto ni Tírí dré kutulé àmì dri dhi gò, Tírí nda dré adrészò àmì léna. Ásà dhi, lè dhya àlo kògò adrélé tà tadhá àmì dré ko. Tàko ko, Krísto ni Tírí nda adrè tà tití dhi kí tadhá àmì dré nì. Tà dré adrélé tadhálé nda i tà bâti 'i, kinzò 'i ko. Di ngóró Tírí nda dré tadhálé àmì dré dre dhi tíni dhi, mì kàdré adrélé Krísto na.

Gìká ni ànzì i

²⁸Di nyànomvá dhi, áma ànzì i, lè mì kàdré adrélé Krísto na, akódhì kònì dra apfò dhi, mà kògaró tà mà dré ka'ile bâti dhi sè bì, adrélé kanyò àko akódhì kandrá kitú dré dra agòzo dhi tú.

²⁹Mì nì tâle dhi, akódhî gyägya dhi be. Ásà dhi, mì nì kpà tâle dhi, dhya ángùdhi adrélépi tà gyägya 'o dhi, móndí akódhî dré tîle dhi 'i dhi be.

1 Yòwánì 3

¹Mì kisù rè lèle kàdrì Gìká Atá dré tadhálé àma vélé, à kàdréró àma kì zi akódhî nì ànzi i ró dhi ká! Dì àma akódhî nì ànzi 'i báti. Mónyá bvò kòndí àdhya i nì àma àdhíbhá 'i ya dhi ko, i dré kpà Gìká Atá nì nile ko dhi sè.

²Áma arúpi má dré lèle tò nì i, nyànomvá dhi, àma Gìká nì ànzi 'i. À tadhá dhu rè mà nì adré ngíni ya dhi ko. Dì, mà nì àmakya tà kònìdhî kòdhya: Krísto kònì dra apfò dhi, mà nì adré akódhî tíni. Tako ko, mà nì akódhî nì no ngóró dré adrélé dhi tíni.

³Dhya ángùdhi adrélépi mì bha Gìká véna tà nda kòdhî sè dhi, adré áyi tândi nì temvé, ngóró Krísto nì tândi dré adrélé lolo dhi tíni.

⁴Dhya ángùdhi adrélépi tàkonzì 'o dhi adré Gìká nì tátrítrí kúlí ño. Tako ko, tàkonzì 'oma ína ligíma Gìká nì tátrítrí kúlí rú dhi 'i.

⁵Dì, mì nì tâle dhi, Krísto apfò kítswálé àma kì tàkonzì tingá dhi be. Mì nì kpà tâle dhi, tàkonzì akódhî léna yókódhó dhi be.

⁶Dhya ángùdhi adrélépi adrélé akódhî léna dhi kítswá gòle adrélé tàkonzì 'o ko. Dhya ángùdhi adrélépi tàkonzì 'o dhi nò akódhî rè ko, ìndì nì kpà akódhî ko.

⁷Áma ànzi i, mì kòtayí àmí dhya àlo dré litílé ko. Dhya ángùdhi adrélépi tà gyägya 'o dhi gyägya, ngóró Krísto nì tândi dré adrélé gyägya dhi tíni.

⁸Dì, dhya adrélépi tàkonzì 'o dhi ína móndí Dzáborò àdhya 'i. Ángyá ko, Dzáborò nda adré tàkonzì 'o kidhólé kidhoma lésè. Tà nda sè dhi, Gìká nì Mváagó apfò kítswálé tà Dzáborò dré adrélé 'ole dhi kì pfu akílé dhi bvó.

⁹Dhya ángùdhi Gìká dré tîle atsálé áyi mvá ro dhi kítswá gòle adrélé tàkonzì 'o ko, Gìká nì tândi nì lídrì dré adrélé akódhî nda léna dhi sè. Dhya nda kítswá gòle adrélé tàkonzì 'o bwà ko, Gìká dré akódhî nì tîle nì dhi sè.

¹⁰Mà nì kítswá Gìká nì ànzi kì ni lanzílé Dzáborò nì ànzi ìbe, tà kònìdhî sè: Dhya ángùdhi adrélépi tà gyägya 'o ko dhi, Gìká nì mvá 'i ko. Dhya adrélépi áyi adrúpi nì le ko dhi kókpà Gìká nì mvá 'i ko.

Ru lèma àma kòfalésè dhi

¹¹Tà mì dré yìle kidhólé kidhoma lésè dhi, tà kònìdhî 'i: Lè mà kàdré ru le àma kòfalésè.

¹²Lè mà kàdré tà 'o Kàyínà àdhya tíni ko. Akódhî nda tá móndí Dhya kònzi àdhya 'i gò, dré áyi adrúpi nì pfùzo dràle. Dì, pfu tá áyi adrúpi nda dràle àdho tà sè? Pfú akódhî dràle, áyi tà 'ole dhi i dré tá adrélé kònzi dhi sè, ìndì áyi adrúpi nì tà 'ole dhi i dré tá adrélé gyägya dhi sè.

¹³Áma adrúpi i, móndyá bvò kòndi àdhya i kàdré togó kònzi bha àmì rú dhi, lè àmì ki líndrí kàdré gàle ásà ko.

¹⁴Mà nì tâle dhi, mà apfò dràdrà lésè afílé lídrì le dre dhi be, mà dré adrélé àma ki adrúpi ki le dhi sè. Dhya adrélépi móndí ki le ko dhi dhu rè rinyí dràdrà àdhya zàle.

¹⁵Dhya ángùdhi adrélépi togó kònzi bha áyi adrúpi rú dhi, móndí pfùlepi dràle dhi 'i. Dì mì nì tâle dhi, móndyá adrébhá móndí pfu dràle dhi ki àlo lídrì kóná vésè kólyá dhi íbe i léna ko dhi be.

¹⁶Mà nì kitswá niá ngalè lèle àdho 'i ya dhi, tà kònìdhi sè: Yésu Krísto fè tá áyi tändi nì lídrì àma ki tà sè. Adré di lèá dhi, mà kàdré kókpà àma ki lídrì fe àma ki adrúpi ki tà sè.

¹⁷Dhya àlo adrélépi ngá íbe dhi kàdré áyi adrúpi ni no adrérà'a lemerè ro gó, dré adrészó kízà ni ni bha ko dhi, Gíká ni lèle ni kitswá adrélé akódhi nda léna ngíningíni ró?

¹⁸Áma ànzi i, lè mà kàdré móndí ki le ngbà 'í kúlí i sè ko, ìndì ti sè ko. Be ró dhi, mà kàdré àmakya móndí ki le tà mà dré adrélé 'ole dhi i sè ìndì tà báti sè.

¹⁹Mà kàdré 'òá kònini dhi, mà nì niá dhi, àma móndí tà báti àdhya 'i dhi be. Mà nì kitswá kpà àma ki togó bha adrélé kídríkídrí Gíká kandrá.

²⁰Dì, àma ki togó kàdré àma ki arókì, adrészó tà bha àma dri dhi, mà nì tâle dhi, Gíká kàdrì àma ki togó lavú, ìndì akódhi nì tà tití dhi be.

²¹Áma arúpi má dré lèle tò ni i, àma ki togó kàdré tà bha àma dri ko dhi, mà nì adré gàle tà mà dré ka'ile báti dhi sè bí Gíká kandrá.

²²Mà adré kpà tà ángùdhi mà dré adrélé zile akódhi tí dhi nì kisú, mà dré adrélé akódhi nì tolí ki ka'i 'ole dhi sè, ìndì mà dré adrélé tà akódhi nì togó dré adrészó kinílé ásà dhi ki 'o dhi sè.

²³Dì tolí Gíká dré afèle àma dré dhi, kònìdhi 'i: Mà kòka'i akódhi nì Mváagó Yésu Krísto, adrészó kpà ru le àma kòfalésè, ngóró dré tá tâle mà kò'o dhi tíni.

²⁴Dhya ángùdhi adrélépi Gíká nì tolí ki ka'i 'ole dhi adré adrélé akódhi léna. Gíká adré kpà adrélé dhya nda léna. Mà nì kitswá niá dhi, Gíká adré adrélé àma léna dhi, tà kònìdhi sè: Mà nì niá Tíri Lólo Gíká dré afèle àma dré dhi sè.

1 Yòwánì 4

Tíri' móndí' i lé dhi ki tabhìma

¹Áma arúpi má dré lèle tò ni i, lè mì kàdré móndyá tití adrébhá tâá dhi, àyi Gíká nì Tíri íbe àyi léna dhi ki ka'i ko. Be ró dhi, mì kàdré àyi nda ki tabhì, nízoá ngalè tìri àyi lé dhi i angá Gíká vélésè báti yà dhi. Tàko ko, profétà kínzò ro bí dhi i apfò ayílé bvò wäyi 'ásè dre.

²Mì ni dì kïtswá niá ngalè tirí àyi lé nda i Tirí Gïká àdhya 'i yà dhi, tà kònìdhì sè: Dhya ángùdhi adrélépi ka'ia tale dhi, Yésu Krísto atsá bvò kònìdhì 'á móndí ro káyà dhi, dhya nda Tirí Gïká àdhya íbe í léna.

³Dì, dhya ángùdhi adrélépi Yésu ni tà ga rè dhi, dhya nda Tirí Gïká àdhya àko í léna. Tirí akódhi nda léna dhi, tirí Krísto ni kàribhá àdhya 'i. Mì yi tale dhi, Krísto ni kàribhá nda adré alìle. Dì akódhi nda atsá adrélé bvò kònìdhì lé dre.

⁴Dì, áma ànzì i, àmì àmikya móndí Gïká àdhya 'i. Mì lavú kpà pròfétà kinzò ro nda i dre. Tako ko, Tirí adrélépi àmì lé dhi kàdrì, tirí adrélépi bvò kònìdhì lé dhi ni lavú.

⁵Àyi nda i móndyá bvò kònìdhì àdhya 'i. Ásà dhi, i adré tà ta ngóró móndyá bvò kònìdhì àdhya kya tñi gò, móndyá bvò àdhya i dré adrészó àyi kí kúlì yi.

⁶Dì, àma àmakya móndí Gïká àdhya 'i. Dhya ángùdhi Gïká ni nilepi be dhi adré àma kí kúlì yi. Dì, dhya ángùdhi adrélépi Gïká àdhya ró ko dhi adré ína àma kí kúlì yi ko. Tà nda kòdhì sè dhi, mà ni kïtswá Tirí tà bâti àdhya ni ni lanzilé tirí kinzò àdhya be.

Gïká lèle 'i

⁷Áma arúpi má dré lèle tò ni i, mà kàdré ru le àma kòfalésè. Tako ko, lèle adré angálé Gïká vélésè. Dhya ángùdhi adrélépi móndí kí le dhi, akódhi nda Gïká ni mvá 'i. Akódhi ni kpà Gïká be.

⁸Dhya ángùdhi adrélépi móndí kí le ko dhi ni ína Gïká ko. Tako ko, Gïká lèle 'i.

⁹Gïká tadhá áyi lèle àma vélé dhi tà kònìdhì sè: Amù áyi Mváagó àlo kwákwá dhi alìle bvò kònìdhì lé, mà kòkitswáró lídrì kisú akódhi sè be dhi bvó.

¹⁰À adré lèle nda ni no tà kònìdhì sè: Mà lè tá Gïká àma ko. Be ró dhi, akódhi lè ína àma nì gò, áyi Mváagó ni amùzo kïtswálé dràle móbòmà ro, àma kí tàkonzì kí trìzo ásà.

¹¹Áma arúpi má dré lèle tò ni i, Gïká kòlè àma tò kònìni dhi, lè mà kàdré kókpà ru le àma kòfalésè.

¹²Dhya àlo nò rè tâdzí Gïká ko. Dì, mà kàdré ru le àma kòfalésè dhi, kòdhì adré tadhá dhi, Gïká adré adrélé àma léna, ìndì akódhi 'o áyi lèle gàle àma léna kïtswálé tití.

¹³Mà ni kïtswá niá dhi, mà adré adrélé Gïká léna, ìndì akódhi adré adrélé àma léna dhi, tà kònìdhì sè: Dré áyi Tirí afèle àma dré dhi sè.

¹⁴Mà nò tà kòdhì mi sè gò, mà dré adrészó longóá dhi, Gïká Atá amù áyi Mváagó adrélé móndyá bvò àdhya kí tîdrílépi ró.

¹⁵Dhya àlo kàdré ka'ia tale dhi, Yésu Gïká ni Mváagó 'i káyà dhi, Gïká adré adrélé dhya nda léna, ìndì akódhi nda adré adrélé Gïká léna.

¹⁶Dì àma, mà nì lèle Gïká dré tadhálé àma vélé dhi be gò, mà dré adrészó ka'ia. Gïká lèle 'i. Dhya ángùdhi adrélépi atsílé lèle na dhi, adré adrélé Gïká léna, ìndì Gïká adré adrélé akódhi nda léna.

¹⁷Tà nda sè dhi, lèle nda adré tà 'o àma kòfalé kitswálé tití, mà kògaró tà mà dré ka'ile bàti dhi sè bì Gìká kandrá, kítú dré dra tòbvó tazo dhi tú. Tàko ko, àma kí lídrì bvò kònìdhi lé dhi ngóró Krísto àdhya tíni.

¹⁸Lèle na dhi, tirì yókodhó. Be ró dhi, lèle kitswálépi tití dhi adré ína tirì dro. Dhya ángùdhi adrélépi ngá ro dhi, lèle ga rè akódhi nda léna kitswálé tití ko. Tàko ko, akódhi adré ngá ro, à ní dra tà ño í dri dhi sè.

¹⁹Àma ró dhi, mà adré móndí kí le, Gìká dré zyà àma kí lèle drìdrì nì dhi sè.

²⁰Dhya àlo kàdré tåá dhi «Má adré Gìká ni le» gó, dré adrélépi togó kònzi bha áyi adrúpi rú dhi, akódhi nda kinzò lìyí 'í. Tàko ko, dhya adrélépi áyi adrúpi í dré adrélé nòle mì sè dhi nì le ko dhi, kitswá ína Gìká í dré adrélé nòle mì sè ko dhi nì le bwà ko.

²¹Dì tolí Gìká dré afèle àma dré dhi, kònìdhi 'í: Lè dhya adrélépi Gìká ni le dhi kàdré kókpà áyi adrúpi ni le.

1 Yòwánì 5

Gìká ni Mváagó ni ka'íma

¹Dhya ángùdhi adrélépi ka'íá dhi Yésu Mèsiyà 'í káyà dhi, akódhi nda Gìká ni mvá 'í. Dhya ángùdhi adrélépi ànzì kí atá nì le dhi, adré kókpà akódhi ni ànzì kí le.

²Mà ni kitswá nìá dhi, mà adré Gìká ni ànzì kí le dhi, tà kònìdhi sè: Mà dré adrélé Gìká ni le dhi sè, ìndì mà dré adrélé akódhi ni tolí kí 'o dhi sè.

³Tàko ko, mà kàdré Gìká ni le bàti dhi, mà ni akódhi ni tolí kí ka'í 'ole. Akódhi ni tolí nda kí 'òma kòkóròko àma dré ko.

⁴Àngyá ko, dhya adrélépi Gìká ni mvá ro dhi lavú bvò kònìdhi dre. Tà mà dré adréló bvò kònìdhi ni lavú ásà dhi, àma kí tà ka'ika'í 'í.

⁵Dì àdhi ni kitswá bvò kònìdhi ni lavú dhi nì? Ngbà 'í dhya adrélépi ka'íá tåle dhi, Yésu Gìká ni Mváagó 'í dhi 'í.

Tà longólé Yésu Krísto ni tà dri dhi

⁶Yésu Krísto, dhya atsálépi bvò kònìdhi 'á kitswálé bátisimò do, ìndì kitswálé kàrì kutú dhi 'í. Akódhi atsá tá ngbà 'í bátisimò do ko. Be ró dhi, atsá ína kitswálé bátisimò do yí sè, ìndì kitswálé áyi kàrì kutú. Dì Tirí Lólo adré tadhá àma dré dhi, tà nda tà bàti 'í dhi nì. Tàko ko, Tirí nda tà bàti 'í.

⁷Tà adrébhá tadhá dhi, tà nda tà bàti 'í dhi na:

⁸Tirí Lólo, yí ìndì kàrì. Dì tà na nda ì adré ru kisú adréló tà àlo ta kòdhya.

⁹Mà adré gá tà móndí ì dré adrélé longólé dhi kí ka'í. Dì, tà Gìká dré longólé dhi ína kàdrì tà nda kí lavú. Àngyá ko, Gìká longó tà nda áyi tändì ni Mváagó ni tà dri.

¹⁰Dhya ángùdhi adrélépi Gìká nì Mváagó nì ka'ì dhì, dhya nda tà Gìká dré longólé nda íbe í léna. Di, dhya adrélépi Gìká nì ka'ì ko dhì adré ína akódhi nì bha kinzò líyí ro, dré tà Gìká dré longólé áyi Mváagó nì tà dri dhì nì ka'ile ko dhì sè.

¹¹Di tà longólé nda, tà kònìdhì 'i: Gìká afè àma dré lídrì kóná vésè kólyá dhì, ìndì mà adré lídrì nda nì kisú akódhi nì Mváagó na.

¹²Dhya ángùdhi adrélépi Gìká nì Mváagó nda íbe dhì kókpà lídrì nda íbe í léna. Di, dhya adrélépi Gìká nì Mváagó nda àko í léna dhì kókpà lídrì nda àko.

Yòwáni` nì kúlì kùdù

¹³Má adré tà kòdhì kì tísì àmì adrébhá Gìká nì Mváagó nì ka'ì dhì i dré, mì kòkitswáró nìá dhì, àmì lídrì kóná vésè kólyá dhì íbe dhì be.

¹⁴Tà mà dré adrélé ka'ile báti Gìká kandrá dhì, tà kònìdhì 'i: Mà kàdré tà zi akódhi tí ngóró dré adrélé lèle dhì tini dhì, akódhi adré àma kì yi.

¹⁵Di mà dré nile, akódhi adré àma kì yi dhì sè dhì, mà nì kpà tali dhì, mà adré tà ángùdhi mà dré adrélé zile akódhi tí dhì nì kisú dhì be.

¹⁶Dhya àlo kàdré áyi adrúpi nì no adrér'a tàkonzi 'o gò, tàkonzi nda dré adrészó dhyá kì dri lile dràdrà kisú ko dhì, lè dhya nda kòzi tà Gìká tí akódhi nda dré gò, Gìká kòféró lídrì akódhi dré. Má adré ngbà 'í móndyá áyi kì tàkonzi dré adrészó áyi kì dri lile dràdrà kisú ko dhì kì tà ta kòdhya. Tàkonzi adrélépi dhyá kì dri lile dràdrà kisú dhì be. Má adré taa dhì, à kàdré tà zi Gìká tí móndyá tàkonzi lású be kònini dhì kì 'obhá dhì i dré dhì ko.

¹⁷Tà kònzi tití adrélé 'ole dhì i, tàkonzi 'i. Di, tàkonzi adrélépi dhyá kì dri lile dràdrà kisú ko dhì be.

¹⁸Má nì tali dhì, dhya adrélépi Gìká nì mvá ro dhì kítswá góle adrélé tàkonzi 'o ko dhì be. Tako ko, Gìká nì Mváagó adré akódhi nda nì likí gò, Dhya kònzi dré kítswázó akódhi nì 'o kònzi ko.

¹⁹Má nì tali dhì, àma móndí Gìká àdhya 'i dhì be. Má nì kpà, móndyá tití bvò kònidi àdhya i Dhya kònzi nì rinyí zale dhì be.

²⁰Má nì kpà tali dhì, Gìká nì Mváagó atsá bvò kònìdhì 'á gò, dré tògyá afèzo àma dré, mà kòkitswáró Gìká adrélépi báti dhì ni ni be dhì bvó. Di mà adré adrélé Gìká báti nda léna, adrélé kókpà akódhi nì Mvá, Yésu Krísto léna. Akódhi nda Gìká báti dhì 'i, ìndì lídrì kóná vésè kólyá dhì 'i.

²¹Áma ànzi i, mì kàdré àmì kì likí gìká tako kì tà sè.

2 Yòwánì

2 Yòwánì 1

Yòwáni` ni mòdo fèma

¹Ma, bhàgo, má adré wárágà kònìdhì ni tisì àmi, Tòkó Gìká dré zìle dhi dré ámi ànzì íbe. Má adré àmi kí le tà báti na. Ngbà 'í ma 'í ko, móndyá tití tà báti nibhá dhi ì adré kókpà àmi kí le tò.

²Tako ko, tà báti nda adré adrélé àma léna, ìndì a ni adré àma íbe kóná vésè kólyá.

³Gìká àma kí Atá ì akódhì ni Mvá Yésu Krísto be dhi ì kòbhà àyi kí togó taní àma rú, ì kòbhà àma kí kízà, ìndì ì kàfè tà kìdríkìdri àma dré tà báti na ìndì lèle na!

Atsima tà báti na i` ndì` lèle na dhi

⁴Má lenzé tá lavúlé, má dré ámi ànzì àruka kí kisúlé adrérà'a atsílé tà báti na, ngóró Gìká Atá dré tá tâle mà kò'o dhi tíni dhi sè.

⁵Dì nyànomvá dhi, mi, Tòkó má dré lèle tò ni, má adré tòlì tídhì ro dhi ni tisì mí dré ko. Be ró dhi, má adré tòlì mà dré adrészó ába kídhólé kídhoma lésè dhi ni tisì kòdhya. Má adré ámi ti lizí, mà kàdréró ru le àma kòfalésè.

⁶À adré lèle nda ni no tà kònìdhì sè: Mà kàdré atsílé ngóró Gìká ni tòlì dré adrélé tâle dhi tíni. Ngóró mí dré yile kídhólé kídhoma lésè dhi tíni dhi, tòlì nda kònìdhì 'í: Mì kàdré atsílé lèle na.

Tà tadhábhá kinzò sè dhi i

⁷Mondí bì adrébhá móndí kí lití dhi ì apfò ayílé bvò wáyi 'ásè. Àyi nda ì adré ka'íá ko tâle dhi, Yésu Krísto atsá bvò kònìdhì 'á móndí ro dhi. Dhya ángùdhi adrélépi tà ta lású be kònini dhi, móndí kí litílépi 'í, ìndì Krísto ni kàribhá 'í.

⁸Mì kàdré dì àmi kí likí, mí kòtayíró tà mà dré àzí 'òzo ásà dhi lapálé ko, be ró dhi, mí kòkisúró làgí mûrúngú kítswálépi àmi dré dhi be dhi bvó.

⁹Dhya ángùdhi adrélépi ràle drídri gò adrélé trôle tà Krísto dré tadhálé dhi ì rú ko dhi, akódhì nda Gìká àko í léna. Dì, dhya ángùdhi adrélépi trôle tà Krísto dré tadhálé nda ì rú dhi, akódhì nda Gìká Atá íbe, ìndì Gìká ni Mváagó íbe í léna.

¹⁰Dhya àlo kòtsa àmi véna adrélé tà twá tadhá tà kòdhì ì rúsè dhi, mí kòka'í akódhì nda dòle àmi kí dzó na ko. Mì kòfè ndindì mòdo akódhì dré ko.

¹¹Tako ko, dhya ángùdhi adrélépi mòdo fe drá dhi, ì adré ru amú akódhì be tà kònzi dré adrélé 'ole nda i na.

Yòwáni` ni kúlí kùdù

¹²Ma dhu rè tà íbe bì tâle àmi dré. Di, má lè mána tà nda kí tisile wárágà sè ìndì wárágà sú sè ko. Be ró dhi, má adré mí bha tsàzo àmi véna, mà kòkiswáró tà ta ti sè, mà kòlenzéró túmání àmi íbe kítswálé tití.

¹³Ámi Amvúpi Gìká dré zìle dhi ni ànzì ì fè mòdo mí dré.

3 Yòwánì

3 Yòwánì 1

Yòwáni` ni mòdo fèma

¹Ma, bhàgo, má adré wárágà kònìdhì nì tìsì mi, áma arúpi Gáyò, má dré lèle tà báti na dhi dré.

²Áma arúpi má dré lèle tò ni, má adré tà zi Gíká tí, mí kàdréró doro tà tití i sè, ìndì ámi rúbhá kàdréró doro, ngóró ámi tà ka'ika'i dré kpà adrélé doro dhi tíni.

³Má lenzé tá lavúlé, àma ki adrúpi àruka i dré atsálé ámi tà ta má dré dhi sè. Tàko ko, i tití tá, mí adré trôle tà báti rú, adrészó kpà atsílé tà báti na ngíni ya dhi.

⁴Má kàdré yìá tâle dhi, áma ànzi i adré atsílé tà báti na dhi, tà nda adré áma fe lenzélé lavúlé.

Gáyò ni tà doro dhi

⁵Áma arúpi má dré lèle tò ni, mí adré ámi tà ka'ika'i tadhá, tà doro mí dré adrélé 'ole àma ki adrúpi i dré dhi i sè. Mí adré 'òá kònìnì, tágba i dré adrészó móndí twá mí dré nile ko dhi 'i dhi.

⁶Àyì nda i tà ámi lèle ni tà Èkèlézyà kònwa dhi kandrá. Dì mí ni 'òá doro, mí kògò adrélé móndí lású be kònìnì dhi ki ledé lìle àyì ki atsí na, ngóró dré kitswálé Gíká mìlésè dhi tíni.

⁷Tàko ko, àyì nda i adré lìle atsí na Krísto ni tà sè, ìndì i adré ngá kisú pàgánò i drígásè àlomvá ko.

⁸Adré dì lèá dhi, mà kàdré móndyá lású be kònìnì dhi ki ledé, mà kàdréró àzí 'o túmǎní àyì ibe tà báti ni tà sè.

Dì` yòtréfè ni tà, Démètri` yò àdhya be dhi

⁹Má tìsì tá wárágà tsà Èkèlézyà mí véna dhi dré dre. Dì, Dìyòtréfè, adrélépi lèá adrélé drídri àmì kòfalé dhi, lè ína àma ki kúlí yile ko.

¹⁰Tà nda sè dhi, má kòtsa àmì véna dre dhi, má ni tà kònzi dré adrélé 'ole dhi ki ta móndyá tití i kandrá, túmǎní kúlí kònzi dré adrélé tâle àma rú dhi ibe. Dì, tà dré adrélé 'ole nda i kitswá dhu rè akódhi dré ko. Adré kpà àma ki adrúpi ki ka'i dòle i véna ko. Adré kpà móndyá adrébhá àyì nda ki le ka'ile dhi ki logá, adrészó àyì ki dro pfòle Èkèlézyà 'ásè.

¹¹Áma arúpi má dré lèle tò ni, mí kàdré tà 'o ngóró móndyá adrébhá tà kònzi 'o dhi kya tíni ko. Be ró dhi, mí kàdré mína tà 'o ngóró móndyá adrébhá tà doro 'o dhi kya tíni. Tàko ko, dhya ángùdhi adrélépi tà doro 'o dhi, móndí Gíká àdhya 'i. Dì, dhya adrélépi tà kònzi 'o dhi ni ína Gíká ko.

¹²Dì, kàdré ína Dèmètriyò ní tà sè dhì, móndyá tití dhì i adré akódhì ní tà ta dóro. Ndìndì tà báti ní tändì adré akódhì ní tà ta dóro. Mà adré kpà akódhì ní tà ta dóro. Mí ní tâle dhì, tà mà dré adrélé tâle nda tà báti 'i dhì be.

Yòwáni` ní kúlí kùdù

¹³Ma dhu rè tà íbe bǐ tâle mí dré. Dì, má lè mána tà nda kí tísile wárágà fa sè ìndì wárágà sú sè ko.

¹⁴Má adré mì bha tsàzo ámì no mbèlè, mà kòkítswáró tà ta ti sè.

¹⁵Tà kìdríkìdrí kàdré túmání mí be. Àma kí arúpi kònwa dhì i fè mòdo mí dré. Mí kòfè kpà mòdo àma kí arúpi àlo àlo tití dhì i dré, adrészó àyì kí zi rú sè.

Yúdà

Yúdà 1

Yúdà ní mòdo fèma

¹Ma, Yúdà, Yésu Krísto ni màrabà ro, ìndì Yàkóbhò ni adrúpi ró dhi, má adré wárágà kònìdhì ni tisì àmi, móndyá Gíká Atá dré lèle tò, dré azilé, ìndì Yésu Krísto dré adrélé likílé dhi i dré.

²Gíká kòbhà àmi ki kizà, ìndì kofè tà kìdríkìdri i lèle be gàle àmi léna b!

Gíká ní tà tadhábhá kinzò sè dhi i

(À kònò kpà 2 Pétéró 2:1-17)

³Áma arúpi má dré lèle tò ni i, áma togó tá àtsi ró wárágà tisìzo àmi dré, lídrì tídhí ro mà dré kisúlémání àmi íbe dhi ni tà sè. Di, má nò mána dóro ni, má dré wárágà kònìdhì ni tisile àmi ki kodzozó adrélé àdzú bhu àmi ki tà ka'ika'i ni tà sè dhi. Gíká bhà tà ka'ika'i nda móndyá lolo ína i léna, i kàdréró adrélé ába nyo.

⁴Di, móndí àruka Gíká ni tà gabhá rè dhi i luvù tá àyi tifilé lùzu ró àmi kòfalé gò, i dré adrészò àma ki Gíká ni togó taní ni tà ladzà, atsálé àyi dré láti adrészò tà swà 'o dhi ró. I adré kpà àma ki Mírì, àma ki Ópí àlo kwákwá, Yésu Krísto ni ga rè. À tisì tá móndyá nda ki tà kínó lésè Gíká ni Kúlí na, tázoo dhi, Gíká ni tà bha àyi dri.

⁵Má adré di leá dhi, mì kòkisù tà kònì i, tágba mì dré tà nda ki nízo dóro dhi: Mírì Gíká apá tá ìsérélè ànzi i, àyi ki 'òzo apfòle Èzépétò lésè 'íká, gò dré àyi ki àruka ka'ibhá ko dhi ki 'òzo todràle ndò.

⁶Mì kòkisù kpà ángéló tá ligíbhá Gíká rú dhi ki tà. Àyi nda i lè tá rinyí bhàle àyi drígá dhi likílé ko gò, i dré àyi ki tändi ki bhà bhù na dhi ni tayízó. Di Gíká dré àyi ki 'ízo nyírì sè kóná vésè kólyá àrà tímivá ro dhi na, adrészò àyi ki likí kònàle adrélé kítú kàdrì àyi ki tábvo tázoo dhi ni letè.

⁷Kókpà kòdhì tini, mì kòkisù móndyá Sòdómà àdhya, ìndì bhàandre àyi làgásè dhi kya ki tà. Àyi nda i fè tá àyi adrélé ndòtò tà 'o, adrészò rúbhá twá dhi ni lovó bha. Di Gíká dré tà ñòzo àyi dri, tadházóá dhi, móndyá tà 'obhá àyikya tini dhi ki kizà nya àtsí na kóná vésè kólyá.

⁸Di móndyá àmi kòfalé nda i adré kókpà tà 'o kònìni. I adré toróbí i dré adrélé abile dhi ki lebè, adrészò àyi ki tändi ki rúbhá ki kizá tákonzì 'òma sè. I adré Gíká ni rinyí adrészò òpì nya dhi ni ayízè, adrészò tirí mìlanzìlanzì ro bhù na dhi ki lodhá.

⁹Di, ndìndì ángéló ki kàdrì, Mìkàyélè dha tá ína Dzáborò asíkile Gíká kandrá ko, i dré tá adrérà'a tà kayí akódhì nda be Mósè ni rúbhá ni tà sè dhi 'á. Be ró dhi, tà tá ína dhi: «Mírì kòligí mí be! »

¹⁰Di, móndyá nda i adré àyikya tà i dré nile ko dhi ki lodhá kòdhya. Di, tà i dré nile àyi ki rúbhá sè kà'wá tà nibhá ko dhi kya tini dhi i adré àyi ki kizá ni.

¹¹Kizà àyi ki ngá 'i! Tako ko, i lebè àyikya láti kònzi Kàyínà àdhya tini. I tayí àyi litilé lafa lovó sè Bálámà tini. I ligí Gíká rú Kórè tini gò, dràdrà dré atsázó àyi rú.

¹²Àmì kí gwányá adrészó lèle tadhá dhi i 'ásè dhi, àyi ngóró ngá adrélépi kanyò fe àmì dré dhi tíni. Tágba i dré adrészó gwányá 'o túmání àmì íbe dhi, i adré àyi kí 'a nya gàle ngá sè kanyò àko. Àyi ngóró ndùrùku yí àko, lyă dré adrélé livilé dhi i tíni. Àyi ngóró fa lò'wa 'abhä ko, lókyá lò'wa kìzo dhi 'á dhi i tíni. À tingí fa nda kí kómvó kíní lésè gò, i dré dràzo dràdrà.

¹³Àyi ngóró yiandre ni mì lyă dré adrélé livilé longálé gò, dré adrészó lìle swà ro dhi tíni. Yí nda adré àyi kí tà kanyò ro dhi kí 'o topfôle tósá tíni. Àyi ngóró bhìbhínyà adrébhá tatsílé wàyá ro dhi i tíni. Giká zù tímivá anílépi tsitsì dhi àyi dré adrészó lána kóná vésè kólyá.

¹⁴Àyi nda kí tà sè dhi, Ènókà, móndí ni nzi-drì-rì Àdámà àmvolésè dhi, longó tá tà pròfétà àdhya tíni, tazoá dhi: «Mì yi rè ká! Míri adré alìle áyi ángéló lolo lizolìzo dhi íbe,

¹⁵móndyá tití dhi kí tàbvó ta. A ni tà bha móndyá kònzi tití áyi tà gabhá dhi i dri, tà kònzi tití i dré 'ole ligízó i rú dhi i sè, ìndì kúlí kònzi tití i dré tâle i rú dhi i sè. »

¹⁶Móndyá nda i adré ngbú ngùrungùrù ta, adrészó làndré ndri, adrészó tatsílé àyi kí tändi kí lovó kònzi kí 'obe, adrészó àyi kí afà, adrészó móndí kí tà bha kuru kitswázó ngá kisú ásà dhi bvó.

Tà tâle kùdù ro móndyá ka'ibhá kí kodzozó dhi i

¹⁷Di, àmì, áma arúpi má dré lèle tò ni i, mì kòkisù tà àma kí Míri Yésu Krísto ni àpóstolò i dré longólé drìdrì dhi i kòdhya.

¹⁸I tà tá àmì dré dhi: «Lókyá kùdù sè dhi, móndí kí apfò adrélé àmì kí gu, adrészó tatsílé àyi kí tändi kí lovó kònzi kí 'obe. »

¹⁹Móndyá nda i adré àmì kí 'o ru lanzí àmì kòfalésè dhi àyi. I adré àyi kí tändi kí rúbhá lovó kí lebè. Àyi Giká ni Tírí àko àyi léna.

²⁰Di, àmì, áma arúpi má dré lèle tò ni i, lè mì kàdré àmì kí timbà àmì kí tà ka'ika'i lolo dhi na. Mì kàdré tà zi Giká tí Tírí Lolo ni rinyí sè.

²¹Mì kàdré àmì kí likí adrélé Giká ni lèle na, mì dré adrérà'a àma kí Míri Yésu Krísto ni letè lídrì kóná vésè kólyá dhi ni fe àmì dré akódhi ni togó doro sè dhi 'á.

²²Mì kàdré àmì kí togó doro tadhá móndyá adrébhá tà ka'ika'i íbe yàyà dhi i véna.

²³Mì kàdré móndí àruka kí apá tìdrílè àtsí sílésè. Mónndí àruka kí tà sè dhi, mì kàdré àyi kí kizà bha, adrészó kpà tirì íbe, adrészó ndìndì àyi kí kítá atsábhá ndí ró àyi kí tákonzì sè dhi kí tabè ko.

Giká ni rú bhàma kùle kùdù ro dhi

²⁴Giká rinyí íbe kitswázó àmì kí likí mì kòdheró ko, ìndì kitswázó àmì kí 'o pfôle áyi adrérà milanzìlanzì ro dhi kandrà tà kònzi àko àmì rú ìndì arí be bī.

²⁵Àma kí Mírì Yésu Krísto sè dhí, mìlanzìlanzi, rúku, rìnyí, ìndì rìnyí adrézó òpì nya dhí be dhí ì kàdré Gíká àlo kwákwá àma kí tiidrépi dhí dré, kidhólé kínó lésè, atsálé nyànomvá kònìdhí, tsàle kóná vésè kólyá! Kàdré kònìnì.

Tà tadhálé dhi i

Tà tadhálé dhi i 1

Búkù kònì` dhi ni tà àndu ngi` le drìdrì dhi

¹Tà búkù kònìdhi léna dhi i, tà lùzu ró Yésu Krísto dré tadhálé dhi 'i. Gíká fè tá tà nda i Yésu dré tadhálé áyi màrabà i dré dhi ni, i kòniró tà dra ru 'obhá lókyá tsà àmvolésè dhi i be dhi bvó. Di Yésu amù tá áyi ángéló tà nda kí tadhá ma, Yòwánì, áyi màrabà ro dhi dré.

²Di má adré tà tití má dré nôle nda kí longó. Kòdhí adré tàá dhi, má adré Gíká ni kúlí longó tà báti Yésu Krísto dré tadhálé dhi íbe.

³Kólénzé ni adré dhya dra kúlí pròfétà àdhya kònì kí nàlepi móndí i dré dhi dré! Kólénzé ni kpà adré móndyá dra kúlí nda kí yibhá gò, i dré adrészò támiga dri kúlí nda i sè dhi i dré! Tako ko, lókyá atsá ànyi dre.

Mòdo fèma Èkélézyà nzi-drì-rì dhi i dré dhi

⁴Ma, Yòwánì, má adré tà kònì kí tisì Èkélézyà nzi-drì-rì bvò Àsíyà àdhya na dhi i dré. Gíká adrélépi be, adrélépi tá be kínó lésè, ìndì adrélépi alìle dhi kòbhà áyi togó taní àmí rú, ìndì kòfè tà kìdríkìdrí àmí dré! Kò'o kònìnì túmání tirí nzi-drì-rì adrébhá áyi lirírà opì àdhya kandrá dhi íbe,

⁵Ìndì Yésu Krísto be. Yésu Krísto nda, dhya adrélépi tà tití i dré yile Gíká vélésè dhi kí longó gyägya dhi 'i. Akódhí kókpà dhya ngalepi dràdrà 'ásè drìdrì móndyá àruka tití dhi i kandrána dhi 'i, ìndì ópí kàdrì ópí tití bvò àdhya i drile dhi 'i. Milanzilanzì kàdré akódhí adrélépi àma kí le tò, àma kí apálépi àma kí tákonzì lésè áyi kàrì sè nda dré!

⁶Akódhí bhà àma adrélé opì ro, ìndì kòwánà i ró, mà kàdréró tà 'o áyi Atá Gíká dré. Milanzilanzì i rinyí be dhi i kàdré akódhí dré kóná vésè kólyá! Kònìnì.

⁷Mì nò rè ká! Akódhí adré alìle ndùrùku 'ásè! Móndyá tití dhi kí akódhí ni no mì sè, ndìndì àyi akódhí ni sobhá dìlì sè dhi i. Súrú tití bvò dri dhi kí tongó akódhí ni tà sè.

Àyíya, kàdré kònìnì!

⁸Míri Gíká tà dhi: «Ma Álefà 'i, ìndì Òmégà 'i. Ma Gíká rinyí líyí ro adrélépi be, adrélépi tá be kínó lésè, ìndì adrélépi alìle dhi 'i. »

Yòwánì` nò Krísto mìlanzilanzì ro

⁹Ma, Yòwánì, ma àmí kí adrúpi adrélépi Gíká ni Òpì 'a, adrélépi kizà nya, ìndì adrélépi togó tsì túmání àmí íbe Yésu na dhi 'i. À ru tá ma bhàle tûrù Pátomò àdhya na Gíká ni kúlí ni tà sè, ìndì tà báti Yésu dré tadhálé dhi ni tà sè.

¹⁰Kítú Míri àdhya sè dhi, Tirí Lólo asó tá ma gò, má dré kúlí 'u'ù gòká ni 'u'ù tini dhi ni yìzo má àmvolésè,

¹¹táá dhi: «Mí tisì tà mí dré dra nôle dhi i búkù na, mûle Èkèlézyà nzi-drì-rì dhi i dré: Èkèlézyà Èfésò àdhyà dré, Sìmirúnà àdhyà dré, Pèrùgámò àdhyà dré, Tiyatírà àdhyà dré, Sàrúdì àdhyà dré, Filàdèlèfíyà àdhyà dré, ìndì Lèwòdikiyà àdhyà dré. »

¹²Dì má dré áma alázó kitswálé kúlí adrélépi tà ta má dré nda ni no. Má kàlá ma dre dhi, má dré ngá nzi-drì-rì ledélé órò sè adrészó àtsí tosó sítá dhi ki nòzo.

¹³Ngá nda ki kító 'á dhi, dhya lású be móndí ni mvá tíni dhi totó tá i. Asó tá kánzò kàtswa tsàlepi í pána dhi, áyi agá dròzo bă ledélé órò sè dhi sè. ¹⁴Akódhi ni drì drìbhí ni íbe dhi i tá kemve lavúlé ngóró kábilígyà bhí mvé tíni, ìndì pfúrí kemve dhi tíni. Akódhi ni mi adré tá kòle rinyi ró àtsí tíni.

¹⁵Akódhi ni pá adré tá lagúlé ngóró bòrónzè kobvólé àtsí sè dhi tíni. Akódhi ni kúlí adré tá ndrôle ngóró kòlyá kàdrì dhi ni ndròma tíni.

¹⁶Akódhi ni dríágó lésè dhi, ru tá bhìbhínyà nzi-drì-rì dhi i. Akódhi sílésè dhi, sápi tîle sí litsi be rì dhi adré tá apfòle. Akódhi ni mìbhalé adré tá lagúlé ngóró kítú dré adrélé lagúlé áyi rinyi sè wäyi dhi tíni.

¹⁷Má kònò akódhi dre dhi, má dré dhèzo akódhi pá àbvò tíni. Dì, akódhi dré áyi dríágó bhàzo má dri, tàzoá dhi: «Mí ro ngá ko! Ma dhya drìdrì dhi 'i, ìndì dhya kùdù dhi 'i.

¹⁸Ma dhya adrélépi lídrì ro dhi 'i. Má drà tá dràdrà. Dì, mí nò rë ká, ma mána lídrì ro kóná vésè kòlyá! Ma lìfungúlà ànzì dràdrà àdhyà íbe, ìndì móndyá dràbhá dre dhi ki àrà àdhyà be má drígá.

¹⁹Mí tisì dì tà mí dré nôle dhi i: tà adrébhá ru 'o nyànomvá dhi i, túmäní tà dra ru 'obhá àmvolásà dhi íbe.

²⁰Tà lùzu ró mí dré nôle dhi ki àndu kònì 'i: Bhìbhínyà nzi-drì-rì mí dré nôle áma dríágó lésè dhi i, Èkèlézyà nzi-drì-rì dhi ki ángéló 'i. Ngá nzi-drì-rì adrészó àtsí tosó sítá dhi i, Èkèlézyà nzi-drì-rì dhi 'i. »

Tà tadhálé dhi i 2

Tà tisile Èkèlézyà Èfésò na dhi dré dhi

¹«Mí kòtisì tà ángéló adrélépi Èkèlézyà Èfésò na dhi ni likí dhi dré kònini: Dhya adrélépi bhìbhínyà nzi-drì-rì dhi ki ru áyi dríágó lésè, ìndì adrélépi tatsílé ngá nzi-drì-rì ledélé órò sè adrészó àtsí tosó sítá dhi i kòfalésè dhi, adré kúlí kònì ki ta kòdhyá:

²Má ni tà mí dré adrélé 'ole dhi i be. Má ni, mí adré àzí 'o landèzo, adrészó togó tsì ngíni ya dhi be. Má ni, mí kitswá móndí kònzi ki tà mvo ko dhi be. Mí tabhì dhya adrébhá tàá kinzò sè dhi, àyi àpóstolò 'i dhi i gò, mí dré àyi ki kinzò 'ozo apfòle ngádra 'á.

³Mí nya kizà áma rú ni tà sè gò, mí dré ámi togó tsìzo landè àko ró.

⁴Dì, ma tà íbe tâle mí dri: Mí tayí mína adrema áma le wáláká ni tíni dhi dre.

⁵Mí kisù rè ngalè mí dhe ngíni ya dhi ká! Di mí kòladzá ámi togó, gózo adrélé tà mí dré 'ole wáláká dhi kí 'o. Mí kòladzá ámi togó ko dhi, má ni tsa mí véna, ámi ngá adrészó àtsí tosó sílá dhi ni tingá àrà ni 'ásè.

⁶Di, tà dóro mí dré adrélé 'ole dhi, kònìdhi 'i: Mí adré tà Nikòlá ni lebèbhá ì dré adrélé 'ole dhi kí ga, ngóró má dré kpà adrélé tà nda kí ga dhi tíni.

⁷Dhya bïbhálé íbe tà yìzo dhi kòyi tà Tírí Lolo dré adrélé tâle Èkèlézyà ì dré dhi! Dhya ángùdhi dra tà lavúlépi dhi dré dhi, má ni fa lídrì àdhya Gìká ni pàràdísò le dhi ni lò'wa fe dré nyàle. »

Tà tisi`le Èkèlézyà Sìmìrúnà na dhi dré dhi

⁸«Mí kòtisì tà ángéló adrélépi Èkèlézyà Sìmìrúnà na dhi ni likí dhi dré kònìnì: Dhya adrélépi drìdrì, adrélépi kùdù, ìndì dràlepi gò gòle adrélé lídrì íbe dhi, adré kúlì kònì kí ta kòdhya:

⁹Má ni kizà mí dré adrélé nyàle dhi i, ámi lemerè tà be dhi be. Di, tágba dré adrészó kònìnì dhi, mí mína ngá líyí 'i! Má ni làdhá móndyá adrébhá tâá kinzò sè dhi, àyi Yúdà ànzi 'i dhi ì dré adrélé dhàle mí rú dhi i be. Àyi nda i Yúdà ànzi 'i bâti ko. Be ró dhi, àyi lìsámbò dzó Sàtánà àdhya 'i.

¹⁰Di mí kòro ngá kizà mí dré adrélé 'ole nyàle dhi kí tà sè àlomvá ko. Mí yi rè ká! Dzáborò ni móndí àruka àmì kòfalé dhi kí bhe bădzó na, àyi kí tabhìzo, àyi kí 'ozo kizà nya kítú mudrí. Mí kàdré di trôle ámi tà ka'ika'i rú tsàle byá dràdrà na. Di má ni kùlá lídrì àdhya ni fe mí dré.

¹¹Dhya bïbhálé íbe tà yìzo dhi kòyi tà Tírí Lolo dré adrélé tâle Èkèlézyà ì dré dhi! Dhya ángùdhi dra tà lavúlépi dhi, dràdrà ni rì kitswá akódhi nda ni 'o kònzi àlomvá ko. »

Tà tisi`le Èkèlézyà Pèrùgámò na dhi dré dhi

¹²«Mí kòtisì tà ángéló adrélépi Èkèlézyà Pèrùgámò na dhi ni likí dhi dré kònìnì: Dhya adrélépi sápí tìle sí lìtsi be rì dhi íbe dhi, adré kúlì kònì kí ta kòdhya:

¹³Má ni àrà mí dré adrészó adrélé lána dhi be. Àrà nda Sàtánà ni lirírà adrészó òpì nya dhi 'i. Di, tágba dré adrészó kònìnì dhi, mí adré mína trôle áma rú rú. Mí gà áma ka'ima ko, tágba à dré tá Àtipà, áma tà longólépi gyägya dhi ni pfùzo dràle ámi véna, Sàtánà ni adrérà na dhi.

¹⁴Di, ma tà àruka íbe tâle mí dri: Móndí àruka àmì kòfalé dhi ì adré àyikya trôle tà Bàlámà dré tá tadhálé dhi i rú. Akódhi nda tadhá tá Bàlákà dré dhi, kò'o lsérélè ànzi i ledhélé tàkonzì na ngíni ya dhi. Bàlákà nda se tá àyi kí togó lítílé, ì kàdréró mányàngá fèle giká tâko i dré dhi ni nya, adrészó kpà ndòtò tà 'o be dhi bvó. ¹⁵Kòdhì íbe dhi, àmì kí àruka ì adré trôle tà Nikòlá ni lebèbhá ì dré adrélé tadhálé dhi i rú.

¹⁶Mí kòladzá di ámi togó! Mí kò'o kònìnì ko dhi, má ni tsa mí véna mbèlè, kitswálé àdzú bhu móndyá nda íbe sápí adrélépi apfòle má sílésè dhi sè.

¹⁷Dhya bïbhâlé ïbe tà yïzo dhi kòyi tà Tïrï Lolo dré adrélé tâle Èkèlézyà i dré dhi! Dhya ángùdhi dra tà lavûlépi dhi dré dhi, má ni mánna zùle zùzù dhi ni fe dré nyâle. Má ni kpà kírà mvá kemve, rú tïdhí dhi ni tisïzo driá dhi ni fe drá. Dhya àlo rú nda ni àndu nilepi dhi yókôdhó. Ngbà 'í dhya dra kírà nda ni kisûlépi dhi ni nia ni. »

Tà tisi`le Èkèlézyà Tìyatírà na dhi dré dhi

¹⁸«Mí kòtisi tà ángéló adrélépi Èkèlézyà Tìyatírà na dhi ni likí dhi dré kònini: Gïká ni Mváagó, mì ni dré adrészó kòle àtsí tíni, ìndì pá ni dré adrészó lagûlé bòrónzè kobvólé àtsí sè dhi tíni dhi, adré kúlì kònì kí ta kòdhya:

¹⁹Má ni tà mí dré adrélé 'ole dhi i, ámi lèle, ámi tà ka'ika'i, tà mí dré adrélé 'ole má dré dhi i, ìndì ámi togó tsîma dhi be. Má ni kpà tâle dhi, mí adré tà dôro 'o wáláká ni ni lavú dhi be.

²⁰Dì, ma tà ïbe tâle mí dri: Mí adré Yèzàbélè, tòkó adrélépi áyi zi pròfétâ ro kinzò sè dhi ni tayí adrélé tà tadhá áma mårábâ i dré. Akódhi nda adré àyi kí lití adrélé ndòtò tà 'o, ìndì adrélé móndyàngá fèle gïká tâko i dré dhi ni nya.

²¹Má fè tá lókyá akódhi dré áyi togó ladzázó áyi ndòtò tà sè ká, dì, lè tá ína ko.

²²Dì ásà dhi, má ni akódhi ni bhe lángá dri kïtswâlé kizà nya lavûlé. Má ni kpà móndyá adrébhá múnâ tà 'o akódhi be dhi kí 'o kizà nya lavûlé, i kòladzâ àyi ki togó tà i dré adrélé 'ole akódhi be nda kí tà sè ko dhi.

²³Kòdhí ïbe dhi, má ni akódhi ni ànzí kí tupfú todrâle. Dì Èkèlézyà tití dhi kí nia tâle dhi, ma dhya móndyá tití dhi kí togó nilepi àyi kí tà kisùkisù be dhi 'i dhi be. Má ni tà logó àmi àlo àlo tití dhi i dré tà mì dré 'ole dhi i tí.

²⁴Dì àmi, móndyá Tìyatírà le dhi kí àmbí adrébhá trôle tà tòkó nda dré adrélé tadhâlé dhi i rú ko, adrészó kpà tà adrélé zile «Sàtânà ni tà lùzu ró» dhi kí nda nile ko dhi i dré dhi, má adré tâá kònini: Má bhà ngá lanzi àzya àmi dri ko.

²⁵Mì kâdré ngbà 'í trôle gígí ro tà mì dré adrészó ába dhi rú, tsâle lókyá má dré dra agòzo dhi 'a.

²⁶Dhya ángùdhi dra tà lavûlépi, ìndì tà má dré lèle dhi kí 'olepi tsâle kùdù na dhi dré dhi, má ni rinyí fe dré adrészó òpì nya surú tití i dri.

²⁷Akódhi ni òpì nya àyi dri kùtù aya ró adrélépi áyi rinyí tadhá dhi sè. A ni àyi kí tonjò ngóró lìdrí rûle kìnì sè dhi i tíni.

²⁸Má ni rinyí nda ni fe drá, ngóró áma Atá dré afèle má dré dhi tíni. Má ni kpà nzágó adrélépi kòle drùbhì sè dhi ni fe drá.

²⁹Dhya bïbhâlé ïbe tà yïzo dhi kòyi tà Tïrï Lolo dré adrélé tâle Èkèlézyà i dré dhi!
»

Tà tadhâlé dhi i 3

Tà tisi`le Èkèlézyà Sàrûdì na dhi dré dhi

¹«Mí kòtisì tà ángéló adrélépi Èkèlézyà Sàrúdì na dhi nì likí dhi dré kònìnì: Dhya adrélépi tirí nzi-drì-rì Gìká àdhya íbe, ìndì bhìbhínyà nzi-drì-rì dhi íbe dhi, adré kúlì kònì kí ta kòdhya: Má nì tà mí dré adrélé 'ole dhi i be. Má nì, móndí i adré kisùá dhi, mí lídri ro, tákò mí drà mína dràdrà dhi be.

²Mí kònga dì ayí 'ásè! Mí kòtiimbà tà dóro nì àmbí mí dré adrészó ába dhi, tà nda kòdraró dràdrà ko. Tako ko, má nò dhi, tà mí dré adrélé 'ole dhi i kitswá áma Gìká mìlésè ko.

³Ásà dhi, lè mí kòkisù tà mí dré tá yile gò ka'izoá dhi i kòdhya. Mí kòladzá ámi togó, gòzo adrélé tà nda kí 'o. Di, mí kònga ayí 'ásè ko dhi, má nì tsa ámi kitó kùgú tíni, ìndì mí kitswá lókyá má dré dra tsàzo dhi nì ni bwà ko.

⁴Di, tágba dré adrészó kònìnì dhi, móndí àruka àmí kòfalé Sàrúdì le dhi i lopfó àyi kí kítá i tàkonzi 'òma sè ko. Di à nì àyi nda kí tosó kítá kemvekemve dhi i sè, i kàdréró lile túmání má be, i dré kitswálé má sè dhi sè.

⁵Dhya ángùdhi dra tà lavúlépi dhi, à nì kpà akódhi nda nì tosó kítá kemve sè àyi nda i tíni. Má kitswá tàdzí akódhi nì rú búkù lídri àdhya lé dhi nì kizá ko. Be ró dhi, má nì tàá áma Atá kandrá ángéló nì íbe dhi, akódhi nda móndí mána 'i káyà dhi.

⁶Dhya bíbhálé íbe tà yìzo dhi kòyi tà Tirí Lolo dré adrélé tâle Èkèlézyà i dré dhi! »

Tà tisi`le Èkèlézyà Filàdèlèfíyà na dhi dré dhi

⁷«Mí kòtisì tà ángéló adrélépi Èkèlézyà Filàdèlèfíyà na dhi nì likí dhi dré kònìnì: Dhya adrélépi lolo ìndì báti, adrélépi lifungúlà mvá ópí Dàwídì àdhya íbe i drígá dhi, adré kúlì kònì kí ta. Dhya nda kàdré dzóti nzi dhi, móndí àlo kitswá atsúá bwà ko. Kàdré kó dzóti atsú dhi, móndí àlo kitswá nziá bwà ko.

⁸Dhya nda adré tàá dhi: Má nì tà mí dré adrélé 'ole dhi i be. Má nì, mí rìnyí íbe tsà dhi be. Di, mí likí mína áma kúlì 'í. Mí gá kpà áma rú móndí i kandrá ko. Di mí nò rè ká! Má nzì dzóti mí kandrá, ìndì dhyá àlo kitswá atsúá bwà ko.

⁹Má nì móndyá adrébhá tàá kinzò sè dhi, àyi Yúdà ànzi 'i dhi kí 'o alile kórókó titì mí kandrá. Àyi nda i Yúdà ànzi 'i báti ko. Be ró dhi, i angá àyikya Sàtánà nì lísambò dzó lésè. Di má nì àyi kí 'o nìá dhi, má lè mí tò dhi be.

¹⁰Mí dré ámi togó tsìle ngóró má dré tá tâle mí kò'o dhi tíni dhi sè dhi, má nì ámi likí, kitswálé lókyá kizà ro dra móndyá tití bvò dri dhi kí tabhìzo dhi kàtsáró mí rú ko.

¹¹Má adré alile mbèlè! Mí kàdré trôle tà mí dré adrészó ába dhi rú, dhyá àlo kòdoró ámi kùlá ko dhi bvó.

¹²Dhya ángùdhi dra tà lavúlépi dhi, má nì akódhi nda nì 'o adrélé dzópá áma Gìká nì tépelò na dhi kí àlo ró. Akódhi nda nì adré kònale kóná vésè kólyá. Má nì áma Gìká nì rú tisi akódhi dri, túmání bhàandre áma Gìká àdhya nì rú be. Bhàandre nda, Yérusalémà tiddí dra asilépi bhù lésè, áma Gìká vélésè dhi 'i. Kòdhì íbe dhi, má nì kpà áma rú tiddí ro dhi nì tisi akódhi dri.

¹³Dhya bïbhâlé ïbe tà yïzo dhi kòyi tà Tïrï Lolo dré adrélé tâle Èkèlézyà i dré dhi!
»

Tà tisi` le Èkèlézyà Làwòdikiyà na dhi dré dhi

¹⁴«Mí kòtisì tà ángéló adrélépi Èkèlézyà Làwòdikiyà na dhi ni likí dhi dré kònini: Dhya adrélépi tàá dhi <Kàdré kònini!>, adrélépi tà tití i dré yile dhi ki longó gyâgya, ìndì Giká dré 'ole ngá tití dhi ki bha dhi, adré kúlí kònì ki ta kòdhya: ¹⁵Má ni tà mí dré adrélé 'ole dhi i be. Má ni, mi kìdríkìdrí ko, ìndì mi àtsi ró ko dhi be. Dóro ni tá mí dré adrélé tá kìdríkìdrí yà, kó ngalè àtsi ró yà dhi.

¹⁶Dì, mí dré adrélé kàlwákàlwa, adrélé àtsi ró ko, adrélé kpà kìdríkìdrí ko dhi sè dhi, má adré 'ole ámi adhí má sîlésè!

¹⁷Mí adré tàá dhi: <Ma ngá lîyí 'i. Ma ngá tití má dré adrészó lovó ni ïbe dhi ïbe. Ngá àlo pi ma ko. > Dì, mí ni ko tâle dhi, mi mína kizà lîyí 'i, ìndì móndí adrészó kizà do ásà dhi 'i dhi. Mi mína lemerè ro, mi kùdükùdu ró, ìndì bvôlîlî ro.

¹⁸Má adré di ámi drì ta: Mí kògi má drígásè órò zâle àtsi sè atsálé kpírkípíri dhi, mí kàdréró ngá lîyí ro bâti. Mí kògi má drígásè kítâ kemvekemve dhi i asólé mí rú, à kònòró ámi kanyò ámi bvôlîlî tà sè dhi ko. Mí kògi kpà má drígásè àlókò tîle mí mína, mí kàdréró ngá no drâdra.

¹⁹Má adré móndyá tití má dré adrélé lèle dhi ki tàkonzì tadhá àyì dré, adrészó àyì ki lotó. Mí kàdré di àtsi ró, ìndì mí kòladzâ ámi togó!

²⁰Mí nò rè kâ! Má adré áma totó dzó tí, adrélé dzóti ga. Dhya àlo kàdré áma kúlî yi gó adrészó dzóti nzi dhi, má ni fi akódhi nda véna, adrélé ngá nya túmâni akódhi be, kàdréró kpà ngá nya túmâni má be.

²¹Dhya ángùdhi dra tà lavûlépi dhi, má ni akódhi nda ni bha adrélé lîrîlé túmâni má be áma lîrîrà adrészó òpì nya dhi dri, ngóró áma tândi má dré tà lavûlé gó adrészó lîrîlé áma Atá be akódhi ni lîrîrà adrészó òpì nya dhi dri dhi tíni.

²²Dhya bïbhâlé ïbe tà yïzo dhi kòyi tà Tïrï Lolo dré adrélé tâle Èkèlézyà i dré dhi!
»

Tà tadhálé dhi i 4

Gìká ni mí bhàma lanzìle bhù na dhi

¹Àmvolásà dhi, má dré dzóti àlo nzìle nzìnzì dhi ni nòzo bhù na. Gò má dré kúlî 'u'ù má dré tá yile drîdrì gòká ni 'u'ù tîni dhi ni yïzo tàá má dré dhi: «Mí ambà kònwa má vélé, má kòtadháró mí dré tà dra ru 'obhá tà kòdhí i àmvolésè dhi i. »

²Gbâ kòdhwa, Tïrï Lolo dré áma asózó gó, má dré lîrîrà adrészó òpì nya dhi ni nòzo bhù na gó, má dré dhya adrélépi lîrîlé driâ dhi ni nòzo.

³Dhya adrélépi lîrîlé driâ nda ni lâsú tá lagulagu ró kírà làgí kyâkyà rú be dzâspè ìndì sàrùdùwánè dhi i tíni. Lîrîrà nda ni gârà 'ásè kûrû dhi, gârî adré tá lagûlé kírà rú be èmèròdè dhi tíni. ⁴Lîrîrà nda làgásè kûrû dhi, lîrîrà àruka nyadhi-àlo-drì-su adrészó

òpì nya dhi i tá be. Di bhàgo nyadhi-àlo-drì-su dhi i adré tá lirílé lirírà nda i dríse. Ayì àlo àlo tití nda i asó tá kítá kemve àyi rú, kùlá óró sè dhi ni asózó àyi dri.

⁵Lirírà nda lésè dhi, bhù lagulagu adré tá topfòle, kpòrò adré tá ndròle, ìndì bhù adré tá tadilé. Lirírà nda kandrá dhi, àtsí nzi-drì-rì adrébhá kòle dhi i tá be. Àtsí nda i tirí nzi-drì-rì Gìká àdhya i.

⁶Lirírà nda kandrá dhi, yiandre adrélépi lagúlé tálàtálà tini ìndì kristálè tini dhi tá kpà be. Lirírà kító 'á nda làgásè kúrú dhi, ngá su lídrì ro dhi i tá be. Àyi nda i tá mi ibe bì àyi rúsè, àyi kandrálésè ìndì àyi àmvolésè.

⁷Ngá lídrì ro nda ni àlo ni lású tá kàmì àdhya tini. Rì ni ni lású tá tágó àdhya tini. Na ni ni mìbhalé tá móndí àdhya tini. Su ni ni lású tá giri adrélépi ngàle kuru sè dhi àdhya tini.

⁸Ngá su lídrì ro àlo àlo tití nda i tá kupfú ibe nzi-drì-àlo. Àyi rúsè dhi, mi i ga bì, ndìndì àyi ki kupfú i zàle. Kitú sè ìndì ngátsi sè dhi, i adré tá kúlí loyó landè àko ró adrészó tàá dhi: «Míri Gìká rinyí líyí ro, adrélépi tá be kínó lésè, adrélépi be, ìndì adrélépi alile dhi, lólo, lólo, lólo! »

⁹Di vésè wáyi ngá lídrì ro nda i dré adrérà'a mìlanzìlanzi, líndrì, àwoyà be dhi ki fe dhya adrélépi lirílé lirírà opì àdhya dri, adrélépi lídrì ibe kóná vésè kólyá dhi dré dhi 'á dhi,

¹⁰bhàgo nyadhi-àlo-drì-su dhi i adré ledhélé àyi ki kórókó titi dhya adrélépi lirílé lirírà opì àdhya dri nda kandrá, adrészó akodhi adrélépi lídrì ibe kóná vésè kólyá nda ni líndrì bha. I adré àyi ki kùlá ki lebhé akodhi ni lirírà kandrá, adrészó tàá dhi:

¹¹«Míri àma ki Gìká, mí kitswá adrélé mìlanzìlanzi kisú, líndrì ibe ìndì rinyí be dhi mi. Tako ko, mí bhà tá ngá tití dhi i mi. Mí bhà ngá nda i ngóró mí dré tá lèle 'ole dhi tini, i kàdréró adrélé be dhi bvó. »

Tà tadhálé dhi i 5

Kábilígyà Mvá kitswá Gìká mìlésè búkù kinzi` dhi ni`

¹Àmvolásà dhi, má dré búkù pàle papà dhi ni nòzo dhya adrélépi lirílé lirírà opì àdhya dri nda ni dríagó lésè. À tisi tá tà búkù nda léna ìndì àmvò ni dri gò, búkù nda ni pàzo kibèlé kídhá nzi-drì-rì dhi i se.

²Gò má dré ángéló àlo rinyi ró dhi ni nòzo, adrérà'a lizíá kúlí 'u'ù sè dhi: «Àdhi kitswá Gìká mìlésè kídhá kòdhi ki kunzi, búkù kòdhi ni kinzízó dhi ni? »

³Di, dhya àlo bhù na yà, bvò dri yà, kó ngalè bvò àndúna yà, kitswálépi búkù nda ni kinzi, 'a ni ni nòzo bwà dhi tá yókódho.

⁴Gò má dré dhèzo adrélé ngòle tà tändi ró, à dré tá dhya àlo kitswálépi Gìká mìlésè búkù nda ni kinzi, 'a ni ni nòzo dhi ni kisulé ko dhi se.

⁵Di, bhàgo ki àlo dré tazoá má dré dhi: «Mí ngo ko! Mí nò rè ká! Kàmì angálépi Yúdà ni surú lésè dhi, dhya angálépi ópí Dàwídì ni kómvó lésè dhi lavú tà dre.

Akódhi nda kïtswá Gïká mïlésè kïdhá nzi-drì-rì nda kï kunzì, búkù nda ni kinzizó dhi nì! »

⁶Gò má dré Kâbilígyà Mvá ni nòzo adrérà'a áyi totó lirírà òpì àdhya ni kító 'á, ngá su lídrì ro dhi kï kító 'á, ìndì bhàgo kï kító 'á. Akódhi sù ngóró à pfu tá akódhi dràle dràdrà na tíni. Akódhi tá ko'yá íbe nzi-drì-rì, ìndì mì íbe nzi-drì-rì. Mì nda i tirí nzi-drì-rì Gïká àdhya dré mûle lîle bvò wáyi 'ásè dhi 'i.

⁷Dì Kâbilígyà Mvá nda dré lìzo búkù do dhya adrélépi lirílé lirírà òpì àdhya dri nda ni dríágó lésè.

⁸Kodo búkù nda dre dhi, ngá su lídrì ro dhi i bhàgo nyadhi-àlo-drì-su dhi íbe dhi i dré ledhézo àyi kï kórökó titi Kâbilígyà Mvá nda kandrá. Àyi àlo àlo tití nda i tá kùdhí íbe. Ì ru tá kpà àyi drígá kópò ledélé órò sè gabhá bêndélé sè bïbi dhi i. Bêndélé nda, tà móndyá lolo tití Gïká àdhya i dré tá zile akódhi tí dhi 'i.

⁹Dì i dré ngàzo adrélé longó tídhí dhi ni ngo, adrészó tåá dhi: «Mí kïtswá Gïká mïlésè búkù do, kïdhá ni kï kunzizo dhi mi. Tako ko, à pfu tá mi dràle, ìndì ámi kàrì sè dhi, mi gi Gïká dré móndí angábhá surú tití i lésè, ti tití i lésè, móndyá tití i lésè, ìndì bvò tití i lésè dhi i.

¹⁰Mí bhà àyi adrélé òpì ro, ìndì kòwánà i ró, i kàdréró tà 'o àma kï Gïká dré. Dì i ni òpì nya bvò dri. »

¹¹Má dré mi bhèzo gò, ángéló lìzolìzo dhi kï kúlí yìzo. Àyi nda i lizó tá tsàle ngùlù vésè be ngùlù, ìndì ngùlù-mudrí vésè be ngùlù-mudrí. Ì kimó tá àyi lirírà òpì àdhya làgásè kúrú, ngá lídrì ro dhi i làgásè kúrú, ìndì bhàgo i làgásè kúrú.

¹²Dì i adrë tá longó ngo kúlí 'u'ù sè, adrészó tåá dhi: «Kâbilígyà Mvá tá pfùle dràle dhi kïtswá Gïká mïlésè rìnyí kisú, ngá làgí kyàkyà dhi íbe, togyá be, lindrì be, milanzilanzì be, ìndì rúku be! »

¹³Gò má dré móndyá tití ìndì ngá tití Gïká dré bhàle adrélé bhù na, bvò dri, bvò ànduna, ìndì yìandre na dhi kï yìzo, adrérà'a longó ngo adrészó tåá dhi: «Rúku, lindrì, milanzilanzì, rìnyí be dhi i kàdré dhya adrélépi lirílé lirírà òpì àdhya dri dhi dré, ìndì Kâbilígyà Mvá dré kóná vésè kólyá! »

¹⁴Ngá su lídrì ro dhi i adrë tá logóá dhi: «Kàdré kònìnì! » Dì bhàgo i dré ledhézo àyi kï kórökó titi Gïká kandrá Kâbilígyà Mvá be, àyi kï lindrì bhàzo.

Tà tadhálé dhi i 6

Kâbilígyà Mvá kunzì rè zyà kí' dhá nzi-drì-àlo dhi i

¹Má dré tá adrérà'a nòá dhi 'á dhi, Kâbilígyà Mvá dré kïdhá nzi-drì-rì nda ni àlo kunzizo. Gò má dré ngá su lídrì ro nda kï àlo yìzo tärà'a kúlí sè bhù ni tadima tíni dhi: «Mí kàlì! »

²Dì má dré nòzoá dhi, dòngí àlo kemve dhi agá má kandrá. Dhya adrélépi lirílé drià dhi ru tá kísu i drígá gò, kùlá fèzo drá. Dì akódhi nda dré lìzo àdzú bhu kàribhá lavúlépi ró, kïtswázó kàribhá kï lavú dhi bvó.

³Kábilígyà Mvá kòkunzì kídhá ní rì dre dhi, má dré ngá lídrì ro ní rì yìzo tárà'a dhi: «Mí kàlì! »

⁴Gò dòngí àzya kika ryarya dhi dré apfòzo má kandrá. Dhya adrélépi lirílé drià dhi dré dhi, à dré rinyí fèzo dré tà kídríkídrí tingázó bvò drisè, móndí i kòtupfúró ru todràle be dhi bvó. Gò sápí kàdrì fèzo akódhi dré.

⁵Kábilígyà Mvá kòkunzì kídhá ní na dre dhi, má dré ngá lídrì ro ní na yìzo tárà'a dhi: «Mí kàlì! » Gò má dré nòzoá dhi, dòngí kini dhi agá má kandrá. Dhya adrélépi lirílé drià dhi ru tá ngá adrészó ngá ki lanzílanzì tabhì ásà dhi i drígá.

⁶Gò má dré ngá kúlí tíni apfòlepi ngá su lídrì ro dhi i kòfalésè dhi ní yìzo tàá dhi: «À ní ngbà 'í ngánò fóndro fe kíló àlo àzí 'ole kítú àlo sè dhi tí. À ní kó órezè fóndro fe kíló na àzí 'ole kítú àlo sè dhi tí. Adré kpà lèá dhi, à kòkizá dò i vínò be dhi ko. »

⁷Kábilígyà Mvá kòkunzì kídhá ní su dre dhi, má dré ngá lídrì ro ní su yìzo tárà'a dhi: «Mí kàlì! »

⁸Gò má dré nòzoá dhi, dòngí mänimänì dhi agá má kandrá. Dhya adrélépi lirílé drià dhi ní rú tá Dràdrà. Akódhi nda vésè dhi, móndyá dràbhá dre dhi kí àrà adré tá lile. Gò rinyí fèzo àyi nda i dré adrészó bvò wäyi lanzílé 'a be su dhi ní àlo drile, i kòtupfúró móndí i todràle sápí sè, kàrábhò sè, drà kònzi sè, ìndì kà'wá àtrá i sè.

⁹Kábilígyà Mvá kòkunzì kídhá ní nzi dre dhi, má dré móndyá tupfúlé todràle dhi kí líndrì kí nòzo àlètárì zàle. À tupfú tá àyi nda i todràle, i dré tá Giká ní kúlí longolé, ìndì akódhi ní tà tadhálé landè àko ró dhi sè.

¹⁰Dì i dré liyízó kúlí 'u'ù sè tázóá dhi: «Míri rúku ró adrélépi lolo ìndì báti ní, mí ní gi tsàle ángutú móndyá bvò àdhya kí tábvo tâma sè, ìndì àma kí kàrì ní tà zîma àma kí tupfúbhá i tí dhi sè dhi? »

¹¹Gò kánzò kemve dhi ni fèzo àyi àlo àlo tití dhi i dré gò, tázóá àyi dré dhi, i kòlovó rè lókyá tsà sè, tsàle lókyá àyi kí adrúpi màrabà ro dhi kí tupfúrì'a todràle àyi tíni kitswálé tití dhi 'á.

¹²Má dré tá adrérà'a nòá dhi 'á dhi, Kábilígyà Mvá dré kídhá ní nzi-dri-àlo kunzìzo. Dì kàdikàdi kàdrì dhi dré bvò kosézó rinyí sè. Kítú dré anízó atsálé kítá lirí kini dhi tíni. Mbà dré likázó tití atsálé kàrì tíni.

¹³Bhìbhínyà bhù mìbhalé 'á dhi i dré ledhézó bvò dri, ngóró fígi lò'wa i dré adrélé azìle lyǎandre sè dhi tíni.

¹⁴Bhù dré ru kopázó tavìle búkù pàle dhi tíni gò, kòngó tití dhi kí tingázó tûrù íbe àyi kí àrà i 'ásè.

¹⁵Dì ópí kàdrì bvò àdhya i, móndyá kàdrì dhi i, sòdá kí kàdrì i, ngábhá i, kòmbá i, tsàle móndyá àruka tití màrabà ro, ìndì màrabà ro ko dhi i dré àyi kí tuzùzo gò i 'ásè, ìndì kírà kòngó drìna dhi i 'ásè.

¹⁶Gò ì dré adrészó liyílé kòngó i rú kírá íbe, adrészó tàá dhi: «Mì kàdhé àma dri, àma kí zu dhya adrélépi lirílé lirírà òpì àdhya dri dhi mìlésè, ìndì kombà Kábilígyà Mvá àdhya kandrásè wà!

¹⁷Tàko ko, kítú kàdrì àyi kí kombà tadházó dhi atsá dre. Àdhi ní kitswá áyi totó bwà dhi nì? »

Tà tadhálé dhi i 7

À lwà àngi` móndyá Gìká àdhya kí kándrágá i 'ásè

¹Àmvolásà dhi, má dré ángéló su dhi kí nòzo, adrérà'a àyi kí totó bvò ní pá su dhi i 'ásè. Ì adré tá lyāandre su bvò àdhya kí kikí, ì kòviró bvò mi yà, yiandre mi yà, kó ngalè fa àlo rú yà dhi ko.

²Gò má dré ángéló àzya nòzo adrérà'a angálé kítú dré apfòrà lésè. Akódhi nda tá ngá adrészó Gìká lídrì ro dhi ni àngì lwa móndí kí kándrágá i 'ásè dhi íbe í drígá. Di dré yòzoá kúlí 'u'ù sè ángéló su rinyí fèzo àyi dré bvò kí 'òzo kònzi yiandre be dhi i dré dhi:

³«Mì kò'o bvò 'i yà, yiandre 'i yà, kó ngalè fa 'i yà dhi i kònzi ko, tsàle lókyá mà dré dra àngì lwàzo àma kí Gìká ni màrabà kí kándrágá i 'ásè dhi 'á. »

⁴Gò má dré móndyá àngì nda kí lwàzo àyi kí kándrágá i 'ásè dhi i tá ángopí ya dhi ni yìzo: Àyi nda i tá móndí ngùlù-kámá-àlo-dri-nyadhi-ri-drì-su, angábhá Isérélè ànzi kí súrú tití i lésè dhi 'i.

⁵Móndyá angábhá Yúdà ni súrú lésè, àngì lwàzo àyi kí kándrágá i 'ásè dhi i tá ngùlù-mudrì-drì-ri, móndyá Rùbénà ni súrú lésè dhi i tá ngùlù-mudrì-drì-ri, móndyá Gádà ni súrú lésè dhi i tá ngùlù-mudrì-drì-ri,

⁶móndyá Àsérà ni súrú lésè dhi i tá ngùlù-mudrì-drì-ri, móndyá Nèfàtálì ni súrú lésè dhi i tá ngùlù-mudrì-drì-ri, móndyá Mànásè ni súrú lésè dhi i tá ngùlù-mudrì-drì-ri,

⁷móndyá Sìmèyonà ni súrú lésè dhi i tá ngùlù-mudrì-drì-ri, móndyá Lévi ni súrú lésè dhi i tá ngùlù-mudrì-drì-ri, móndyá Isákárà ni súrú lésè dhi i tá ngùlù-mudrì-drì-ri,

⁸móndyá Zàbùlónà ni súrú lésè dhi i tá ngùlù-mudrì-drì-ri, móndyá Yòséfà ni súrú lésè dhi i tá ngùlù-mudrì-drì-ri, móndyá Bènyàmínà ni súrú lésè dhi i tá ngùlù-mudrì-drì-ri.

Móndi` li`zóli`zo dhi i` bhà Gìká ni lindrì`

⁹Àmvolásà dhi, má dré móndí lìzólìzo kítswálé nàle bwà ko, angábhá bvò tití i lésè, súrú tití i lésè, móndyá tití i lésè, ìndì ti tití i lésè dhi kí nòzo, adrérà'a àyi kí totó lirírà òpì àdhya kandrá, ìndì Kábilígyà Mvá kandrá. À tosó tá àyi kánzò kemvekemve dhi i sè, ìndì i ru tá mbíra bí àyi drígá.

¹⁰Ì adré tá loyóá kúlí 'u'ù sè dhi: Rinyí adrészó móndí kí tìdrí dhi adré angálé àma kí Gìká adrélépi lirílé lirírà òpì àdhya dri dhi vélésè, ìndì Kábilígyà Mvá vélésè!

¹¹Ángéló tití dhi i totó tá àyi adrélé lirírà opì àdhya làgásè kúrú, bhàgo i làgásè kúrú, ìndì ngá su lídrì ro dhi i làgásè kúrú. Di i dré ledhézo àyi ki mi bha kíní mi lirírà opì àdhya kandrá, adrészó Giká ni líndrì bha,

¹²adrészó tàá dhi: «Kàdré kònini! Rúku, mìlanzìlanzi, tògyá, àwoyà, líndrì, tsàle rinyí be dhi i kàdré àma ki Giká dré kóná vésè kólyá! Kònini! »

¹³Gò bhàgo ki àlo dré áma lizízó tazoá dhi: «Àyi tosólé kánzò kemvekemve dhi i sè kònì i, àdhibhbá 'i? I angá ángolésè? »

¹⁴Má logó drá dhi: «Atálágó, mí ni be mi. » Di akodhi tà dhi: «Àyi nda i móndyá afòbhá kizà kàdrì lésè dhi 'i. I dzì àyi ki kánzò i temvélé Kábilígyà Mvá ni kàrì na dre.

¹⁵Di ásà dhi, i totó àyi Giká ni lirírà opì àdhya kandrá, adrélé lìsámbò 'o akodhi dré kitú be ìndì ngátsi be akodhi ni tépelò na. Di dhya adrélépi lirílé lirírà opì àdhya dri nda ni bhà mo adrészó túmání àyi íbe.

¹⁶Tàbirí kitswá gòle vélé àyi ki 'o ko, yì lovó kitswá kpà gòle àyi ki nde ko. Kitú àtsí 'i yà, kó ngalè àtsí àzya 'i yà dhi kitswá kpà gòle vèle àyi rú ko.

¹⁷Tako ko, Kábilígyà Mvá adrélépi lirírà opì àdhya ni kító 'á dhi ni àyi ki likí, ngóró kábilígyà likílépi dré adrélé 'ole dhi tíni. A ni àyi ki dri lìzo àyi íbe yì kidri adrébhá lídrì fe dhi i 'ásè. Di Giká ni mìndra atrì àyi misè tití. »

Tà tadhálé dhi i 8

Kábilígyà Mvá kunzì ki' dhá ni nzi-drì-rì

¹Kábilígyà Mvá kòkunzì kídhá ni nzi-drì-rì dre dhi, ngá dré bhùzo bhù na ndii anyìanyi saà ni tálí sè.

²Bvóá dhi, má dré ángéló nzi-drì-rì adrébhá àyi ki totó Giká kandrá dhi ki nòzo. Gò gòká nzi-drì-rì dhi ki fèzo àyi dré àlo àlo.

³Gò ángéló àzya dré alìzo áyi totó anyì àlètárì làga. Ru tá i drígá ngá ledélé órò sè adrészó bénédélé za lána dhi. Gò bénédélé bì dhi ni fèzo akodhi dré, túmání tà móndyá lolo tití Giká àdhya i dré tá zile tí dhi íbe, kòzáró ngá nda i tití Giká dré àlètárì órò sè dhi dri, Giká ni lirírà opì àdhya kandrá.

⁴Di bénédélé ni àtsíkà dré ngàzo ángéló nda drígásè túmání tà móndyá lolo dhi i dré tá zile Giká tí dhi íbe mbàle Giká véna.

⁵Gò ángéló nda dré ngá adrészó bénédélé za lána nda ni dòzo, àtsí àlètárì dri dhi ni dàzo gàle lána bì gò, bhèzoá bvò dri. Di bhù dré ngàzo adrélé tadilé, kpòrò dré adrészó ndròle, bhù dré adrészó lagulé gò, bvò dré ru kosézó.

Gòká nzi-drì-rì dhi i

⁶Gò ángéló nzi-drì-rì adrébhá tá gòká nzi-drì-rì dhi íbe àlo àlo nda i dré pá sìzo kitswázó gòká vo dhi bvó.

⁷Dì ángéló nì àlo dré ngàzo gòká vo. Dì fí i àtsí be amúlé kàrì be dhi kí bhèzo bvò dri. Gò bvò wäyi lanzílé 'a be na dhi nì àlo dré vèzo, túmání fa tití lanzílé 'a be na dhi kí àlo íbe, ìndì mbìlídri tití dhi íbe.

⁸Gò ángéló nì rì dré gòká vòzo. Dì ngá ngóró kòngó kàdrì adrélépi kòle àtsí ró dhi tñi dhi nì bhèzo ndile yïandre na. Gò yïandre wäyi lanzílé 'a be na dhi nì àlo dré ru ladzázó atsálé kàrì ró.

⁹Dì ngá tití lídrì ro yïandre na lanzílé 'a be na dhi kí àlo dré dràzo. Kòdhi íbe dhi, bwátù tití lanzílé 'a be na dhi kí àlo dré abízó.

¹⁰Gò ángéló nì na dré gòká vòzo. Dì bhìbhínyà gú adrélépi kòle àtsí ró dhi dré apfòzo bhù lésè, dhèle yïandre tití adrébhá dile lanzílé 'a be na dhi kí àlo dri, ìndì yí kidrì i drísè.

¹¹Bhìbhínyà nda nì rú tá «Ngá kùdzí». Dì yïandre tití lanzílé 'a be na dhi kí àlo dré atsázó kùdzíkùdzí. Móndí zyandre yí nda nì mvubhá dhi i dré todràzo, yí nda dré tá atsálé kùdzíkùdzí dhi sè.

¹²Gò ángéló nì su dré gòká vòzo. Dì kítú lanzílé 'a be na dhi nì àlo tswàzo, túmání mbă lanzílé 'a be na dhi nì àlo be, ìndì bhìbhínyà tití lanzílé 'a be na dhi kí àlo be. Gò ngá tití nda ki 'a àlo dhi dré atsázó tñimvá ro. Dì kítú lanzílé 'a be na dhi nì àlo, ngátsi àdhya be dhi i tá vélé ngádra àko.

¹³Má dré tá adrérà'a nòá dhi 'á dhi, má dré gíri adrélépi ngàle kuru sè dhi nì yìzo, adrérà'a loyóá kúlí 'u'ù sè dhi: «Kizà! Kizà! Kizà nì adré móndyá tití adrébhá bvò dri dhi i dré, gòká ángéló na àruka i dré adrélé 'ole vòle 'ùle dhi i sè! »

Tà tadhálé dhi i 9

Gòká nì nzi vòma

¹Gò ángéló nì nzi dré gòká vòzo. Dì má dré bhìbhínyà àlo adhélépi bhù lésè bvò dri dhi nì nòzo. À fè tá bhìbhínyà nda dré lifungúlà mvá bhú kùdù àko dhi nì ti nzìzo.

²Dì kònzi bhú nda nì ti dre dhi, àtsíkà dré apfòzo lásà mbàle kurú na, ngóró àtsíkà dré adrélé mbàle àtsí kàdrì lésè dhi tñi. Dì àtsíkà nda dré kítú nì mì 'òzo anilé bhù mìbhalé be.

³Àtsíkà nda lésè dhi, kísa i dré topfòzo asílé bvò dri. Gò rìnyí fèzo kísa nda i dré adrészó móndí kí tozà ngóró dàpáyà kya tñi.

⁴À lazí tá àyì dri dhi, i kò'o mbì 'i yà, kó ngalè fa 'i yà dhi kònzi ko. Be ró dhi, i kò'o ngbà 'í móndyá Giká nì àngì lwàzo àyì kí kandrágá i 'ásè ko dhi i kònzi kòdhya.

⁵À fè tá àyì dré rìnyí kitswázó móndí kí tupfú todràle dhi ko. Be ró dhi, à fè àyì dré rìnyí adrészó ngbà 'í móndí kí rúbhá 'o aswálé mbă nzi. Dì àyì kí rúbháaswa nda tá ngóró ngáaswa dàpáyà dré adrélé fèle dhi tñi.

⁶Kítú nda i tú dhi, móndí kí dràdrà nda, di, i kitswá àyikya kisúá ko. I ni adré lovó íbe tò kitswázó dràle, di, dràdrà nì lapá àyì kandrásè.

⁷Kísa nda kí lású tá ngóró dòngí adrébhá 'ole lile àdzú na dhi kya tíni. Àyi tá ngá ngóró kùlá ledélé órò sè dhi tíni dhi íbe àyi dri. Àyi kí mìbhalé tá móndí kya tíni.

⁸Àyi kí drìbhí tá tòkó kya tíni. Àyi kí sí tá kàmì kya tíni.

⁹Àyi tá ngá aya ró adrélépi àyi kí likí dhi íbe àyi agá. Àyi kí kupfú kí kpòrò tá ngóró támàmbíri bì dòngí ì dré adrélé sèle ràzo ába àdzú na dhi kya tíni.

¹⁰Àyi tá tòví adrélépi móndí kí tozà dàpáyà kya tíni dhi íbe. Dì àyi kí tòví nda i tá rìnyí íbe adrészó móndí kí rúbhá 'o aswálé mbă nzi.

¹¹Àyi kí ópí kàdrì tá ángéló bhú kùdù àko dhi àdhya 'í. Akódhí nda ni rú Èbérè ti sè dhi Àbàdónà, ìndì Gírikì ti sè dhi Àpoliyónà. (Rú nda kòdhí ì adré lèá tâle dhi «Ngá kizálépi».)

¹²Kízà ni àlo lavú tá kònini. Dì, mì yi rè ká! Kízà rì àruka ì adré alile.

Gòká ni nzi-drì-àlo vòma

¹³Gò ángéló ni nzi-drì-àlo dré gòká vòzo. Dì má dré kúlí apfòlepi ko'yá su àlètárì órò sè Gíká kandrá dhi àdhya i lésè dhi ni yízo.

¹⁴Kúlí nda dré tàzoá ángéló ni nzi-drì-àlo adrélépi tá gòká íbe nda dré dhi: «Mí lì ángéló su 'ile yíandre gú adrélépi dile rú be Yùfurátè dhi làga dhi kí tri. »

¹⁵Gò ángéló su tá adrélé likílé sáà nda sè, kítú nda sè, mbă nda sè ìndì kóná nda sè nda kí trízo, ì kòtupfúró móndyá tití bvò dri lanzílé 'a be na dhi kí àlo todràle be dhi bvó.

¹⁶Má yi tá sòdá adrébhá àdzú bhu dòngí sè dhi i tá ángopí ya dhi 'í. Àyi nda i tá miliyó-kámá-ri.

¹⁷Dì ngá agálépi má mi toróbí tíni nda na dhi, dòngí i sòdá liríbhá àyi drísè dhi íbe nda kí lású tá kònini: Àyi tá ngá aya ró adrélépi àyi kí likí dhi íbe àyi agá. Ngá nda i tá kíka àtsí tíni, mänimänì ro bhù ni mìbhalé tíni, ìndì wàyìwàyì ro kítú tíni. Dòngí nda kí drì sù tá kàmì kya tíni. Àyi sílésè dhi, àtsí adré tá apfòle, àtsíkà íbe ìndì bàrúti be.

¹⁸Dì móndyá tití bvò dri lanzílé 'a be na dhi kí àlo ì dré todràzo kízà kàdrì na nda i sè: àtsí, àtsíkà, ìndì bàrúti adrébhá tá apfòle dòngí i sílésè dhi i.

¹⁹Dòngí nda kí rìnyí tá àyi kí ti na, ìndì àyi kí tòví na. Àngyá ko, àyi kí tòví nda tá ngóró ni adrélépi drì íbe dhi tíni. Àyi kí tòví kí drì nda i sè dhi, ì adré tá móndí kí 'o kònzi.

²⁰Dì, tágba móndí zyandre dhi ì dré todràzo kízà kàdrì nda i sè dhi, móndí kí àmbí ì ladzá tá àyíkya àyi kí togó tà ì dré tá adrélé 'ole dhi kí tà sè ko. Ì tayí tá tìrí kònzi kí lìndrì bhàma ko. Ì tayí tá kpà gíká tákó kí lìndrì bhàma ko, tágba gíká nda ì dré tá adrészó ngá ledélé órò sè, àrezá sè, bòrónzè sè, kírà sè, ìndì fa sè, kitswábhá ngá no bwà ko, tà yi bwà ko, ìndì atsí to bwà ko dhi 'í dhi.

²¹Ì ladzá tá kpà àyi kí togó, móndí kí tupfuma ni tà sè, kólé tà 'òma ni tà sè, ndòtò tà 'òma ni tà sè, ìndì ngá kugùma ni tà sè ko.

Tà tadhálé dhi i 10

Ángéló búkù tsà dhi be dhi

¹Gò má dré ángéló àzya rìnyi ró dhi ni nòzo adrérà'a asilé bhù lésè. Akódhi nda asó tá ndùrùku í rú. Akódhi drile dhi, gárí tá be. Akódhi ni mìbhalé adré tá lagulé kítú tíni. Akódhi ni pá tá ngóró àtsisí adrélépi kòle dhi tíni.

²Ru tá búkù tsà nzile nzinzì dhi í drígá. Dré áyi pá dríágó lésè dhi ni bhàzo yìandre dri, áyi pá lìdzí lésè dhi ni bhàzo bvò dri.

³Gò dré ngàzo trèle ngóró kàmì dré adrélé kändrillé dhi tíni. Kòtre dre dhi, bhù dré tadízó vésè be nzi-drì-rì kúlí tazo.

⁴Kòtadí kúlí ta dre dhi, má adré tá 'ole kúlí nda kí tisì ká. Dì, má dré kúlí àzya apfòlepi bhù lésè dhi ni yìzo tåá dhi: «Mí kòzù kúlí bhù ni tadima nzi-drì-rì kòdhì i dré tåle dhi i. Mí kòtisì tà nda i ko. »

⁵Gò ángéló má dré nòle adrérà'a áyi totó yìandre dri ìndì bvò dri nda dré áyi dríágó bhàzo kuru bhù na ró.

⁶Dré mòndrà sìzo Gìká adrélépi lídrì ro kóná vésè kólyá, bhù kí bhàlepi bvò be, yìandre be, ìndì ngá tití àyi lé dhi íbe dhi ni rú sè, tazoá dhi: «À kitswá góle vélé tà tigí ko!

⁷Dì, lókyá ángéló ni nzi-drì-rì dré adrérà'a 'ole gòká vo dhi 'á dhi, tà lùzu ró Gìká dré kisùle 'ole kínó lésè dhi ni ru 'o kitswálé tití, ngóró dré tá longolé áyi màrabà, pròfétà i dré dhi tíni. »

⁸Gò kúlí má dré tá yile bhù lésè nda dré gózo tåá má dré dhi: «Mí lì búkù tsà nzile nzinzì dhi ni do ángéló adrélépi áyi totó yìandre dri ìndì bvò dri dhi drígásè. »

⁹Dì má dré áma kisizó ànyi ángéló nda làga gò tåá drá dhi, kafè búkù tsà nda má dré. Dì dré tazoá má dré dhi: «Mí kòdo nyàle. Mí sile dhi, a ni kadí apé tíni. Dì, a ni go ámi 'a 'o atsálé kùdzíkùdzi. »

¹⁰Gò má dré búkù tsà nda ni adózó ángéló drígásè nyàle. Má sile dhi, búkù nda kadí tá apé tíni. Dì, má konya dre dhi, dré áma 'a 'ozo atsálé kùdzíkùdzi.

¹¹Dì à gò tåá má dré dhi: «Adré lèá dhi, mí kògò tà longó pròfétà àdhya tíni móndí twátwa bï dhi kí tà dri, surú twátwa bï dhi kí tà dri, ti twátwa bï dhi kí tà dri, ìndì ópí twátwa bï dhi kí tà dri. »

Tà tadhálé dhi i 11

Pròfétà rì Gìká ni tà longóbhá dhi i

¹Àmvolásà dhi, à dré kòzó adrészó ngá kí kàdrì tabhì ásà dhi ni afèzo má dré gò, tazoá má dré dhi: «Mí lì tépelò ni kàdrì tabhì, àlètárì àdhya be. Mí kònà kpà móndyá adrébhá Giká ni lindrì bha tépelò nda na dhi i be.

²Dì, kàdré ína tépelò ni bhà'lé kivì na dhi ni tà sè dhi, mí kòtabhì àrà nda ko. Tako ko, à tayí àrà nda pàgánò i dré dre. Àyi nda kí bhàandre lolo dhi ni ató àyi pálé mbă nyadhi-rì-drì-rì. ³Dì má ni rinyí fe áma màrabà rì dhi i dré, kitswázó tà i dré dra yile má vélésè dhi kí longó pròfétà kya tñi móndí i dré. Àyi nda kí kítá lirí asó àyi rú, adrészó áma tà longó kítú ngùlù-àlo-drì-kámá-rì-drì-nyadhi-na. » ⁴Pròfétà rì nda i òlívè fa rì, ìndì ngá rì adrészó àtsí tosó silá, adrébhá àyi kí totó Míri adrélépi bvò wáyi drile dhi kandrá dhi i.

⁵Dhya àlo kàdré ína àyi kí le 'ole kònzi dhi, àtsí adré apfòle àyi sîlésè àyi kí kàribhá kí tupfú todràle. Dì dhya ángùdhi adrélépi àyi kí le 'ole kònzi dhi ni dra lású be kònini.

⁶Àyi rì nda i rinyí íbe kitswázó bhù kikí, kozya kòdhiró lókyá i dré adrérà'a tà longó pròfétà kya tñi dhi 'á ko. Àyi kpà rinyí íbe kitswázó yí ladzá atsálé kàri ró, ìndì kitswázó kizà twátwa dhi kí 'o atsálé bvò dri, vésè be ángopí i dré adrészó lèá 'ole kònini dhi.

⁷Ì kòlongó tà i dré yile Giká vélésè dhi i akílé tití dre dhi, kà'wá àtrá dra apfòlepi bhú kùdù àko dhi lésè dhi ni apfò àdzú bhu àyi íbe, àyi kí lavúzó gò, àyi kí tupfúzó todràle.

⁸Dì àyi kí àbvò kí ayí bhàandre kàdrì ni láti andre na. Bhàandre nda, bhàandre àyi kí Míri ni tidízó fa kipaki pa dri lana dhi i. À adré bhàandre nda ni rú zi kúlì alaala sè dhi Sòdómà, ìndì Èzèpétò. ⁹Kítú na tálí sè dhi, móndí zyandre angábhá móndyá tití i lésè, surú tití i lésè, ti tití i lésè, ìndì bvò tití i lésè dhi kí àyi kí àbvò nda kí no, adrészó àyi kí sima logá.

¹⁰Dì móndyá tití bvò dri dhi kí lenzé àyi kí dràma sè. Ì ni gwányá 'o, adrészó ngá tefè àyi kòfalésè. Tako ko, pròfétà rì nda i fè tá kizà móndyá tití bvò dri dhi i dré nyàle.

¹¹Dì, kítú na tálí sè nda àmvolésè dhi, la'a lídrì àdhya angálépi Giká vélésè dhi dré fízo àyi léna gò, i dré ngàzo àyi kí totó pá dri. Dì tirì dré gàzo móndyá tití àyi kí nobhá dhi i léna bì.

¹²Gò àyi rì nda i dré kúlì 'u'ù apfòlepi bhù lésè dhi ni yìzo tàá àyi dré dhi: «Mì ambà kònwa má vélé! » Dì i dré mbàzo bhù na àyi kí kàribhá i misè gò, ndùrùku dré àyi kí kimozó.

¹³Gbà lókyá nda sè dhi, kàdikàdi kàdrì dhi dré bvò kosézó rinyí sè gò, bhàandre nda lanzílé 'a be mudrí dhi ni àlo dré arízó. Móndí ngùlù-nzi-drì-rì dhi i dré todràzo kàdikàdi nda sè. Dì tirì dré àyi kí àmbí kí 'ozo lavúlé gò, i dré Giká bhù na dhi ni rú bhàzo kùle.

¹⁴Kizà ni rì lavú tá kònini. Dì, mì yi rè ká! Kizà ni na adré alile mbèlè.

Gòká ni nzi-drì-rì vòma

¹⁵Àmvolásà dhì, ángéló nì nzi-drì-rì dré gòká vòzo. Di kúlì 'u'ù dhì ì dré ndròzo bhù na tàá dhì: «Òpì bvò àdhya atsá òpì àma kì Míri Gìká àdhya ró, ìndì akódhì nì Mèsiyà àdhya ró. Di akódhì nì òpì nya kóná vésè kólyá! »

¹⁶Gò bhàgo nyadhi-àlo-drì-su adrébhá lirílé àyi kì lirírà i drísè Gìká kandrá dhì, ì dré ledhézó àyi kì mì bha kìní mi, adrészó Gìká nì lindrì bha,

¹⁷adrészó tàá dhì: «Míri Gìká rìnyí lìyí ro, adrélépi be ìndì adrélépi tá be kínó lésè nì, mà adré àwoyà ta mí dré. Tako ko, mí tadhá ámi rìnyí kàdrì dhì gò, kidhözó adrélé òpì nya móndí i dri.

¹⁸Súrú tití bvò dri dhì kì togó aswá tá mí rú, di, nyànomvá dhì, mí adré mína ámi kombà tadhá. Lókyá móndyá dràbhá dre dhì kì tàbvó tázò dhì kitswá dre. Mí ni làgí mûrungú tefè ámi màrabà, pròfétà i dré, ìndì ámi móndyá lolo tití adrébhá ámi ro dhì i dré, gba i kàdré móndí tako 'i yà, kó ngalè móndí kàdrì 'i yà dhì. Di, kàdré móndyá bvò kizábhá dhì kì tà sè dhì, mí ni àyi kì kizá kòdhyá. »

¹⁹Di à dré Gìká nì tépelò bhù na dhì nì láti nzìzo gò, kpukúbhú tà Gìká dré bhàle ru yìzo móndí ìbe dhì àdhya nì nòzo tépelò nda léna. Di bhù dré ngàzo adrélé lagulé, kpòrò dré adrészó ndròle, bhù dré adrészó tadilé, bvò dré ru kosézó gò, fí andre dré adàzo tà tändì ró.

Tà tadhálé dhì i 12

Tòkó i nì málawú gú dhì be dhì

¹Àmvolásà dhì, tà kàdrì lindríga ró dhì dré agázó bhù na. Má dré tòkó àlo kitú asólépi i rú kítá tíni, ìndì pá tobhàlepi mbă dri dhì nì nòzo. Akódhì nda asó tá bhìbhínyà mudrí-drì-rì dhì i i dri kùlá tíni.

²Akódhì tá kpà 'a be. Di dré tá adrérà'a 'ole tìle dhì 'á dhì, adré tá tetrélé mváaswa dré.

³Gò tà àzya lindríga ró dhì dré agázó bhù na. Má dré nì málawú gú kika ryarya adrélépi drì ìbe nzi-drì-rì, ìndì ko'yá ìbe mudrí dhì nì nòzo. Akódhì nda nì drì àlo àlo tití i dri dhì, kùlá tá be.

⁴Di akódhì nì taví sè dhì, dré bhìbhínyà tití bhù mìbhalé 'á lanzílé 'a be na dhì kì àlo akúzó bhèle bvò dri. Gò dré áyi totozó tòkó adrélépi tá 'ole tìle nda kandrá, kònì dra ti dhì, i konyaró mvámvá nda be dhì bvó.

⁵Di tòkó nda dré mvá tizo. Mvámvá nda tá mváagó 'i, ìndì dhya adrélépi tá 'ole òpì nya súrú tití i dri kùtù aya ró adrélépi áyi rìnyí tadhá dhì sè dhì 'i. Gò mváagó nda nì dòzo nì málawú gú nda kandrásè, mbàzo ába Gìká véna, akódhì nì lirírà òpì àdhya kandrá.

⁶Di tòkó nda dré lapázó lìle duku na, àrà Gìká dré tá ledélé drá dhì na, à kòsuró akódhì rú kònàle kitú ngùlù-àlo-drì-kámá-rì-drì-nyadhi-na be dhì bvó.

⁷Gò àdzú dré ngàzo lapfûlé bhù na. Mìkàyélè i ángéló nì ìbe dhì i dré àdzú bhùzo nì málawú gú dhì be. Nì málawú gú nda i ángéló nì ìbe dhì i dré kpà ru pfûzo àyi ìbe.

⁸Dì, akódhì ni rinyí kïtswá tá ína bwà ko. Àrà bhù na akódhì dré, ángéló ni íbe dhi tá vélé yókódhó.

⁹Dì nì málawú gú nda ni bhèzo bvò dri. Akódhì nda, ni àku adrélépi tá be kínó lésè, adrélé zile Dzáborò ìndì Sàtánà, adrélépi móndyá tití bvò dri dhi ki lití dhi 'i. À bhe tá akódhì i ángéló ni íbe bvò dri.

¹⁰Gò má dré kúlí 'u'ù yìzo bhù na tàá dhi: «Nyànomvá dhi, lókyá àma kí Gìká dré dra áyi móndyá kí tidrítzó, áyi rinyí tadházó, ìndì áyi òpì nyàzo dhi atsá dre! Nyànomvá dhi, akódhì ni Mèsiyà ni áyi rinyí tadhá adrészó òpì nya! Tako ko, à bhe dhya adrélépi àma kí adrúpi kí asíkì àma kí Gìká kandrá kítú be ìndì ngátsi be dhi bvò dri dre.

¹¹Àyi nda i lavú akódhì Kábilígyà Mvá ni kàré sè, ìndì kúlí i dré Gìká ni tà longózó ásà dhi i sè dre. Tágba i dré tá adrészó dràdrà mìle dhi, i lè tá trôle àyi kí lídrì rú ko.

¹²Dì ásà dhi, àmì, bhù i dhya adrébhá adrélé àmì lé dhi íbe ni i, mì kàdré lenzélé wà! Dì, àmì, bvò i yiandre be ni i, kizà àmì kí ngá 'i, Dzáborò dré sile àmì véna dhi sè! Akódhì ga kombà sè bì, dré nìle tale dhi, áyi lókyá tsà dhi be dhi sè. »

¹³Nì málawú gú nda kònò, à abhé tá i bvò dri dre dhi, dré ngàzo adrélé tòkó mváagó tìlepi nda ni ladró.

¹⁴Dì, kupfú rì gíri kàdrì àdhya kí fèzo tòkó nda dré, kòngaró kuru sè lìle duku na, àrà ledélé i dré dhi na, à kòsuró akódhì rú vwàvvà ro nì málawú gú dhi rúsè kóná na tálí sè. ¹⁵Gò nì málawú gú nda dré yí adhízó i sílésè atsálé yiandre adrélépi dile dhi ró, yiandre nda kòdoró tòkó nda pfùle dràle be dhi bvó.

¹⁶Dì, bvò dré ína tòkó nda ni ledézó gó, ru lanzízó yiandre nì málawú gú dhi dré tá adhílé i sílésè nda ni mvu.

¹⁷Dì nì málawú gú nda ni togó dré aswázó lavúlé tòkó nda rú gó, dré lìzo àdzú bhu tòkó nda ni ànzì àruka tití dhi íbe. Àyi nda i móndyá adrébhá Gìká ni tòlì kí ka'i 'ole, adrébhá kpà trôle tà báti Yésu dré tadhálé dhi rú dhi 'i.

¹⁸Dì nì málawú gú nda dré áyi totózó adrélé yiandre mìle.

Tà tadhálé dhi i 13

Kà'wá àtrá apfòlepi yiandre lésè dhi

¹Àmvolásà dhi, má dré kà'wá àtrá àlo dhi ni nòzo adréra'a apfòle yiandre lésè. Akódhì nda tá ko'yá íbe mudrí, ìndì drì íbe nzi-drì-rì. Akódhì ni ko'yá àlo àlo tití nda i dri dhi, kùlá tá be. Akódhì ni drì àlo àlo tití nda i drísè dhi, à tisì tá rú adrészó Gìká ni lodhá dhi.

²Kà'wá àtrá má dré nòle nda sù tá kàlagí tíni. Dì, akódhì ni pá tá ína ùrúsè àdhya tíni, ìndì akódhì ni ti tá kàmì àdhya tíni. Dì nì málawú gú dhi dré áyi rinyí fèzo akódhì dré, áyi lirírà adrészó òpì nya dhi be, ìndì rinyí kàdrì adrészó òpì nya dhi be.

³Sù tá ngóró à abágì tá kà'wá àtrá nda nì drì kì àlo kitswázó tá akódhì nì pfu dràle dhi tíni ká. Di, làzí nda dré ína dzàzo. Móndyá tití bvò dri dhi kì lìndrì dré gàzo tà nda sè gò, ì dré ngàzo adrélé kà'wá àtrá nda nì lebè.

⁴Ì adré tá nì málawú gú dhi nì lìndrì bha, dré rìnyí fèle kà'wá àtrá nda dré dhi sè. Ì adré tá kpà kà'wá àtrá nda nì lìndrì bha, adrészó lizíá dhi: «Àdhi sù ngóró kà'wá àtrá kòdhì tíni nì? Àdhi ni kitswá àdzú bhu akódhì be bwà dhi nì? »

⁵Gò láti fèzo kà'wá àtrá nda dré adrészó áyi afà, adrészó kpà Gìká nì lodhá. Rìnyí fèzo kpà akódhì dré adrészó tà 'o mbă nyadhi-ri-dri-ri.

⁶Di dré ti nzìzo adrészó Gìká nì lodhá, adrészó akódhì nì rú ta kònzi, akódhì nì adrérà íbe, ìndì dhya adrébhá adrélé bhù na dhi íbe.

⁷Di rìnyí fèzo akódhì dré àdzú bhùzo móndyá lólo Gìká àdhya íbe gò, àyi kì lavúzó. Rìnyí fèzo kpà akódhì dré adrészó súrú tití i drile, móndyá tití i drile, ti tití i drile, ìndì bvò tití i drile.

⁸Di móndyá tití bvò àdhya kì kà'wá àtrá nda nì lìndrì bha. Àyi nda i, móndyá tití àyi kì rú tisìzo búkù lìdrì àdhya na ko kìdhólé bvò nì bhàma lésè dhi 'i. Búkù nda, Kábilígyà Mvá pfùle dràle dhi àdhya 'i.

⁹Dhya bìbhálé íbe tà yìzo dhi kòyi.

¹⁰Dhya ángùdhi zìle bhèle bădzó na dhi, a nì li bădzó na. Dhya ángùdhi zìle pfùle dràle sápí sè dhi, a nì dra sápí sè. Adré di lèá dhi, móndyá lólo Gìká àdhya i kàdré togó tsì, adrészó tròle àyi kì tà ka'ika'i rú.

Kà'wá àtrá apfòlepi bvò lésè dhi

¹¹Gò má dré kà'wá àtrá àzya nòzo adrérà'a apfòle bvò lésè. Akódhì nda tá ko'yá íbe ri kábilígyà ànzì kya tíni. Di, akódhì nì kúlì tá ngóró nì málawú gú àdhya tíni.

¹²Akódhì tá rìnyí wáyi kà'wá àtrá nì àlo àdhya íbe, adrészó tà 'o akódhì kandrá. Adré tá móndyá tití bvò dri dhi kì 'o ledhélé kà'wá àtrá nì àlo làzí dzàlepi nda kandrá, adrélé akódhì nì lìndrì bha.

¹³Adré tá kpà tà kàdrì lìndrígá ró dhi kì 'o, adrészó ndìndì àtsí 'o adhélé bhù lésè bvò dri móndyá tití dhi i mi.

¹⁴Tà lìndrígá ró fèle dré adrélé 'ole kà'wá àtrá nì àlo kandrá nda i sè dhi, adré tá móndyá tití bvò àdhya kì lití. Dré tàozaá àyi dré dhi, i kòledé kà'wá àtrá abágìle sápí sè gò gòle adrílé nda nì lìndrì, à kàdréró lìndrì fe drá be dhi bvó.

¹⁵Gò dré rìnyí kisúzó lìdrì fèzo kà'wá àtrá nì àlo nì lìndrì nda dré, kòkitswáró kúlì ta, ìndì kò'oró móndyá tití lìndrì febhá kà'wá lìndrì nda dré ko dhi i todràle.

¹⁶Kà'wá àtrá nì rì nda dré kpà móndyá tití dhi kì 'ozo àngì lwa àyi kì dríágó i 'ásè, kó ngalè àyi kì kándrágá i 'ásè, tágba i kàdré tá móndí tákó 'i yà, móndí kàdrì 'i yà, móndí lemerè ro dhi 'i yà, móndí ngábhá ro dhi 'i yà, màrabà 'i yà, kó ngalè móndí màrabà ro ko dhi 'i yà dhi.

¹⁷Dì dhya àlo kitswá tá ngá gi ìndì ngá lagí bwà ko, kàdré àngì nda íbe í rú ko dhi. Àngì nda tá kà'wá àtrá nda ni rú 'i, ìndì akódhi ni rú ni nòmbisà 'i.

¹⁸Kòdhi tògyá 'i. Lè dhya adrélépi tògyá íbe dhi kònđà kà'wá àtrá nda ni nòmbisà ni àndu nile. Tàko ko, nòmbisà nda móndí kya 'i. Akódhi ni nòmbisà nda, kámá-nzi-drì-àlo-drì-nyadhi-na-drì-nzi-drì-àlo.

Tà tadhálé dhi i 14

Kábilígyà Mvá i móndyá li`zóli`zo Gìká dré apálé dhi i` be dhi

¹Àmvolásà dhi, má dré Kábilígyà Mvá ni nòzo adrérà'a áyi totó kòngó Siyónà àdhyà drìna. Túmání akódhi be dhi, móndyá ngùlù-kámá-àlo-drì-nyadhi-ri-drì-su, akódhi ni rú tìsìzo Atá ni àdhyà be àyi kí kándrágá i 'ásè dhi i tá be. ²Gò má dré kpòrò adrélépi apfòle bhù lésè dhi ni yìzo adrérà'a ndrôle ngóró kòlyá kàdrì dhi ni ndròma tíni, ìndì bhù ni tadima tíni. Kpòrò má dré yìle nda tá kpà ngóró kùdhí bì adrélé tswàle dhi i tíni.

³Dì móndyá lìzolìzo nda i adré tá longó tídhí dhi ni ngo Gìká ni lirírà òpì àdhyà kandrá, ngá su lídrì ro dhi i kandrá, ìndì bhàgo i kandrá. Dhya àlo kitswá tá longó nda ni ni ngòle bwà ko, kàdré ngbà 'í móndyá ngùlù-kámá-àlo-drì-nyadhi-ri-drì-su Gìká dré apálé bvò lésè nda 'i ko dhi.

⁴Àyi nda i, móndyá àyi kí kizábhá tòkó íbe ko, dì àyi kí likíbhá adrélé lolo Gìká dré dhi 'i. I adré Kábilígyà Mvá ni lebè àrà tití dré adrészó lìle dhi i 'ásè. À apá àyi móndyá tití dhi i kòfalésè, fèle ngádrì ro Gìká dré ìndì Kábilígyà Mvá dré.

⁵Àyi kinzò àko àyi tí, ìndì tà kònzi àko àyi rú.

Ángéló na dhi i

⁶Gò má dré ángéló àzya nòzo adrérà'a ngàle kuru sè. Akódhi nda tá Rúbí Taní adrélépi kóná vésè kòlyá dhi íbe, kitswálé longolé móndyá tití bvò dri dhi i dré, àyi angábhá bvò tití i lésè, surú tití i lésè, ti tití i lésè, ìndì móndyá tití i lésè dhi i dré.

⁷Adré tá loyóá kúlí 'u'u sè dhi: «Mì kòro Gìká, akódhi ni rú bhàzo kùle wà! Tàko ko, lókyá dré dra móndyá tití dhi kí tòbvó tào dhi kitswá dre. Mì kòtitì àmì kí kórókó dhya bhù kí bhàlepi, bvò be, yìandre be, ìndì yì kidrì íbe dhi kandrá, akódhi ni lìndrì bhàzo! »

⁸Gò ángéló ni rì dré lìzo àlo ni vésè, adrélé loyóába dhi: «Akódhi dhe dre! Bàbìlónà, bhàandre kàdrì dhe dre! Akódhi fè vínò áyi ndòtò tà àdhyà surú tití bvò dri dhi i dré mvùle gò, vínò nda dré àyi kí tsìzo! »

⁹Gò ángéló ni na dré lìzo àyi rì nda i vésè, adrélé loyóába kúlí 'u'u sè dhi: «Móndyá tití adrébhá lìndrì fe kà'wá àtrá dré ìndì lìndrì ni dré, ìndì àngì ni ni 'obhá lwàle àyi kí kándrágá i 'ásè yà, kó ngalè àyi drígá yà dhi,

¹⁰àyi nda kí vínò Gìká ni kombà àdhyà ni mvu! Gìká dà vínò nda tsèrèlè kópò áyi kombà àdhyà na. À ni àyi kí rúbhá kí 'o aswálé àtsí na ìndì bàrúti na, ángéló lolo dhi i kandrá ìndì Kábilígyà Mvá kandrá.

¹¹Dì àtsíkà àyi kí rúbháaswa nda àdhya ní mba kurú na kóná vésè kólyá. Ì kítswá lovólé kítú sè yà, kó ngalè ngátsi sè yà dhì ko. Tàko ko, ì fè líndrì kà'wá àtrá dré ìndì líndrì ní dré, rú ní ní àngì 'òzo lwàle àyi rú. »

¹²Adré dì lèá dhì, móndyá lolo Gíká àdhya ì kàdré togó tsì. Àyi nda i móndyá adrébhá Gíká ní tolí kí ka'l 'ole, adrébhá kpà trôle Yésu ní ka'ima rú dhì 'i.

¹³Gò má dré kúlí apfólepi bhù lésè dhì ní yízo táká dhì: «Mí tisì kònìnì: Kídhólé nyànomvá dhì, kólénzé ní adré móndyá tití Míri Yésu ní ka'ibhá gò ì dré todràzo dhì i dré! » Dì Tirí Lólo dré tázao dhì: «Àyíya, kònìnì! Ì ní lovó àzí ì dré 'ole landèzo dhì i sè. Tàko ko, tà dóro ì dré 'ole dhì kí li àyi vésè. »

À akónà lanyá bvò àdhya

¹⁴Àmvolásà dhì, má dré ndùrùku àlo kemve dhì ní nòzo. Dì dhya lású be móndí ní mvá tíni dhì lirí tá ndùrùku nda dri. Akódhì nda tá kùlá óró sè dhì íbe i dri, ìndì méngerè litsi íbe i drígá.

¹⁵Gò ángéló àzya dré apfòzo tépelò lésè, yoá kúlí 'u'u sè dhya adrélépi lirílé ndùrùku dri nda dré dhì: «Mí do méngerè mína ngá lwàzo. Tàko ko, lanyá bvò àdhya ka dre, ìndì lókyá lanyá akónàzo dhì kítswá dre. »

¹⁶Dì dhya adrélépi lirílé ndùrùku dri nda dré ngàzo áyi méngerè do, ngá wáyi bvò àdhya kí lwàzo vésè àlo gò, lanyá nda ní akónàzo.

¹⁷Gò ángéló àzya dré kpà apfòzo tépelò bhù na dhì lésè. Akódhì nda tá kókpà méngerè litsi íbe i drígá.

¹⁸Gò ángéló àzya dré apfòzo àlétarì làgásè. Akódhì nda tá rinyí íbe adrészó àlétarì ní àtsí likí. Dì dré yòzoá kúlí 'u'u sè ángéló adrélépi méngerè litsi íbe i drígá nda dré dhì: «Mí do méngerè litsi mína, vínò lò'wa bvò àdhya kí lokozó. Tàko ko, vínò lò'wa nda i ka dre. »

¹⁹Dì ángéló nda dré ngàzo áyi méngerè do, vínò lò'wa wáyi bvò àdhya kí lwàzo vésè àlo gò, lokozóá dàle àrà kàdrì vínò lò'wa kí zwàzo dhì na, àrà Gíká ní kombà àdhya na.

²⁰Dì à dré vínò lò'wa nda kí atozó zwàle àrà nda na, bhàandre ní kívì na. Gò kàrì dré apfòzo adile àrà nda lésè lìle tsàle ànyíanyí kílòmèterè kámá-na gò, tálí ní dré alúzó tsàle byá dòngí kí ti na.

Tà tadhálé dhì i 15

Ángéló nzi-drì-rì kizà kàdrì` nzi-drì-rì dhì i` be dhì i

¹Àmvolásà dhì, má dré tà àzya kàdrì líndrígá ró dhì ní nòzo bhù na. Má nò ángéló nzi-drì-rì adrébhá kizà kàdrì nzi-drì-rì dhì íbe dhì i. Kizà nda i tá kizà kàdrì kùdù dhì 'i. Tàko ko, Gíká ní kombà ní akí àyi sè.

²Gò má dré yiandre amúlé àtsí be adrélépi lagúlé tálàtálà tíni dhì ní nòzo. Dì yiandre nda dri dhì, móndyá tití kà'wá àtrá ní lavúbhá, líndrì ní be, ìndì rú ní ní nombisà be dhì i totó tá àyi. Àyi nda i tá kùdhí Gíká dré tá fèle àyi dré dhì íbe àyi drígá.

³Ì adré tá longó Gìká ni màrábà Mósè àdhya ni ngo, Kábilígyà Mvá àdhya be, adrészò tåá dhi: «Míri Gìká rìnyí lìyí ro ni, tà tití mí dré 'ole dhi i kàdrì ìndì líndríga ró.

Ópí kàdrì súrú tití dhi i drile ni,
ámí láti tití dhi i gyägya ìndì báti.

⁴Míri, àdhí ni kitswá ámí ro ko dhi ni?

Àdhí ni kitswá ámí rú bha kùle ko dhi ni? Tako ko, mi lolo kalóma. Súrú tití dhi ki alì àyi ki kórókó tití mí kandrá, ámí líndrì bhàzo.

Àngyá ko, mí tadhá tà gyägya tití mí dré 'ole dhi i àyi dré nòle dre. »

⁵Àmvolásà dhi, má dré nòzoá dhi, à nzì láti tépelò bhù na dhi àdhya. Tépelò nda na dhi, tábèrènákolò adrélépi Gìká ni adrema ni tà tadhá dhi tá be.

⁶Dí ángéló nzi-drì-rì kizà kàdrì nzi-drì-rì dhi íbe nda i dré apfòzo tépelò nda lésè. Ì asó tá àyi rú kítá ledélé lénè sè kemve lagulagu ró dhi i. Ì drò tá àyi ki agá i bă ledélé óró sè dhi i sè.

⁷Gò ngá su lídrì ro dhi ki àlo dré kópò nzi-drì-rì ledélé óró sè dhi ki tefèzo ángéló nda i dré àlo àlo. Kópò nda i ga tá kombà Gìká adrélépi lídrì íbe kóná vésè kólyá dhi àdhya sè bíbi.

⁸Gò àtsíkà Gìká ni mìlanzìlanzi àdhya rìnyí ni àdhya be dhi dré sàzo tépelò nda léna. Dí dhya àlo kitswá tá file tépelò nda na bwà ko, tsàle lókyá ángéló nzi-drì-rì nda i dré kizà kàdrì nzi-drì-rì dhi ki kutúr'a bvò dri akílé tití dhi 'á.

Tà tadhálé dhi i 16

Kópò nzi-drì-rì gabhá kombà Gìká àdhya sè bíbi dhi i

¹Gò má dré kúlì 'u'ù apfòlepi tépelò lésè dhi ni yìzo tàá ángéló nzi-drì-rì nda i dré dhi: «Mì lì kombà Gìká àdhya kópò nzi-drì-rì dhi i lé dhi ki kutú bvò dri! »

²Dí ángéló ni àlo dré lìzo ngá áyi kópò le dhi ni kutú bvò dri. Dí làzí kònzi aswá kyàkyà dhi i dré móndyá tití adrébhá tá àngì kà'wá àtrá àdhya íbe àyi rú, adrébhá kpà líndrì fe akodhi ni líndrì dré dhi ki 'ozo lavulé.

³Gò ángéló ni ri dré lìzo ngá áyi kópò le dhi ni kutú yìandre na. Dí yìandre nda dré ru ladzázó atsálé kàri ró, ngóró móndí dràlepi dhi ni kàri tíni. Dí ngá tití lídrì ro yìandre nda lé dhi i dré todràzo.

⁴Gò ángéló ni na dré lìzo ngá áyi kópò le dhi ni kutú yìandre adrébhá dìle dhi i 'ásè, ìndì yì kidrì i 'ásè. Dí yì tití nda i dré ru ladzázó atsálé kàri ró.

⁵Gò má dré ángéló adrélépi rìnyí íbe yìandre tití i drile dhi ni yìzo adrérà'a tàá dhi: «Mì, Dhya lolo adrélépi be ìndì adrélépi tá be kínó lésè ni, tábvo mí dré tåle kòdhi i gyägya.

⁶Tàko ko, móndyá bvò àdhya ì kutú tá ámi móndyá lolo dhi kí kàrì, pròfétà kya be. Dí nyànomvá dhi, mí fè àyi dré kàrì mvùle dhi kòdhya, ngóró dré kïtswálé àyi sè dhi tñi. »

⁷Gò má dré kúlí apfòlepi àlètárì lésè dhi ni yìzo tàá dhi: «Àyíya, Míri Giká rinyí liyí ro ni, tàbvó mí dré tâle dhi i bâti ìndì gyägya! »

⁸Gò ángéló ni su dré lìzo ngá áyi kópò le dhi ni kutú kítú mi. Dí kítú nda dré rinyí kisúzó kïtswázó móndí kí ndri áyi àtsí sè.

⁹Dí àtsí kàdrì kítú àdhya nda dré móndyá tití dhi kí ndrìzo gò, ì dré Giká adrélépi rinyí íbe kizà nda i drile dhi ni rú lodházó. Dí, ì ladzá tá àyikya àyi kí togó Giká ni lindrì bhàzo dhi ko.

¹⁰Gò ángéló ni nzi dré lìzo ngá áyi kópò le dhi ni kutú kà'wá àtrá ni lirírà òpì àdhya dri. Dí akódhi ni òpì dré atsázó tñimvá ro. Gò móndyá bvò àdhya ì dré adrészó àyi kí làdra titsí ngáaswa dré.

¹¹Gò ì dré Giká bhù na dhi ni lodházó àyi kí ngáaswa dré ìndì làzí àyi rú dhi i dré. Dí, ì ladzá tá àyikya àyi kí togó tà kònzi ì dré tá 'ole dhi kí tà sè ko.

¹²Gò ángéló ni nzi-drì-àlo dré lìzo ngá áyi kópò le dhi ni kutú yìandre gú adrélépi dìle rú be Yùfurátè dhi na. Dí yìandre nda dré sèzo akílé tití, láti kàdréró ngbo ópí kàdrì adrébhá tá 'ole angálé kítú dré apfòrà lésè dhi i dré be dhi bvó.

¹³Gò má dré tirí kònzi na lású be kòtrátrá tñi dhi kí nòzo apfòrà'a ni málawú gú dhi sîlesè, kà'wá àtrá sîlesè, ìndì pròfétà kinzò ro dhi sîlesè. ¹⁴Àyi nda i, tirí kònzi adrébhá tà lindríga ró dhi kí 'o dhi 'i. Ì adré lìle ópí kàdrì bvò wäyi 'ásè dhi kí kimó kïtswálé àdzú bhu kítú kàdrì Giká rinyí liyí àdhya tú.

¹⁵«Mì yi rè ká! Má ni atsá ngbò ró kùgú tñi! Kólénzé ni adré dhya dra adrélépi tâmìga dri, adrélépi áyi kítá kí likí, kòlìrò bvólílí ro ko, à kònòró akódhi ni kanyò ko dhi dré. »

¹⁶Gò tirí kònzi nda ì dré ópí kàdrì bvò àdhya kí kimózó àyi kí sòdá íbe, àrà rú zìle Èbérè ti sè Àràmàgédò dhi na.

¹⁷Gò ángéló ni nzi-drì-rì dré lìzo ngá áyi kópò le dhi ni kutú lyă na. Dí kúlí 'u'u dhi dré apfòzo tépelò lésè, ìndì lirírà òpì àdhya lésè, tàá dhi: «Tà tití dhi i 'o ru kïtswálé dre! »

¹⁸Dí bhù dré ngàzo adrélé lagûlé, kpòrò dré adrészó ndròle, bhù dré adrészó tadílé gò, kàdikàdi kàdrì dhi dré bvò kosézó rinyí sè. Kàdikàdi kàdrì lású be kònini dhi atsá tá bvò dri tâdzí rè ko, kîdhólé lókyá móndí kí bhàzo dhi sè, atsálé lókyá nda 'á.

¹⁹Dí bhàandre kàdrì dhi dré lajòzo ru lanza 'a be na gò, bhàandre súrú tití bvò dri dhi kya ì dré arízó nyïnyi. Dí Giká tití tá tàkonzì Bâbilónà kàdrì àdhya i ko. Fè bhàandre nda dré kópò gâlepi vínò áyi kombà kàdrì àdhya sè dhi mvùle.

²⁰Kàdikàdi nda sè dhi, tûrù tití dhi ì dré lapázó gò, à dré gòzo vélé kòngó kí no ko.

²¹Gò fí andre dré adàzo bhù lésè móndí i dri. Lò'wa àlo àlo tití nda i lanzì tá ànyíanyí kíló nyadhi-rì-drì-nzi. Dí móndyá bvò àdhya i dré Gìká ni lodházó, kizà i dré tá adrélé nyàle fí nda sè dhi sè. Tàko ko, kizà nda tá kàdrì lavulé.

Tà tadhálé dhi i 17

Tòkó zàràbhù i kà'wá àtrá be dhi

¹Gò ángéló nzi-drì-rì adrébhá tá kópò nzi-drì-rì dhi íbe nda kí àlo dré alìzo tàá má dré dhi: «Mí alì, má kòtadháró mí dré ngalè à ni tà ño tòkó zàràbhù kàdrì adrélépi lirilé yíandre bí dhi i drisè dhi dri ngíni ya dhi.

²Ópí kàdrì bvò àdhya i fè tá àyi adrélé ndòtò tà 'o tòkó nda be. Móndyá bvò àdhya i mvu tá vínò akódhí ni ndòtò tà àdhya gò, vínò nda dré àyi kí tsìzo. »

³Gò ángéló nda dré áma dòzo Tírí Lólo ni rinyí sè lìzo má be duku na. Kònàle dhi, má dré tòkó àlo dhi ni nòzo adrérà'a lirilé kà'wá àtrá kika dhi dri. Kà'wá àtrá nda tá drì íbe nzi-drì-rì, ìndì ko'yá íbe mudrí. Akódhí rúsè wäyi dhi, à tisì tá rú adrészó Gìká ni lodhá dhi i.

⁴Tòkó nda asó tá i rú kítá làgí kyàkyà kika ryarya dhi i, áyi 'òzo avélé órò sè, kírá làgí kyàkyà dhi i sè, ìndì màyikà rú be pérelè dhi i sè. Ru tá i drígá kópò ledélé órò sè, gàlepi tà wàyá adrélé gàle gàgà dhi i sè bí, ìndì áyi ndòtò tà sè bí dhi.

⁵Akódhí ni kandrágá 'á dhi, à tisì tá rú àndu ni ni zùzo dhi. Rú nda tá rú kònìdhi i: «Bàbìlonà kàdrì, tòkó zàràbhù kí andre, ìndì tà wàyá bvò àdhya adrélé gàle gàgà dhi kí andre. »

⁶Dí má dré nòzoá dhi, tòkó nda mvu tá móndyá lólo Gìká àdhya kí kàré gò, kàré nda dré akódhí ni tsìzo. Àyi nda i tá móndyá Yésu ni tà longóbhá gò àyi kí tupfúzó todràle dhi 'í. Má kònò tòkó nda dre dhi, áma líndri dré gàzo bhwäbhwa.

⁷Gò ángéló nda dré tazoá má dré dhi: «Ámi líndri ga àdho tà sè? Má ni tòkó kòdhi ni tà lùzu ró dhi ni àndu ngí mí dré, túmání kà'wá àtrá adrélépi akódhí ni todó, adrélépi dhi íbe nzi-drì-rì ìndì ko'yá íbe mudrí dhi àdhya be.

⁸Kà'wá àtrá mí dré nòle nda tá kínó be, dí nyànomvá dhi, akódhí yókódhó. Dí, a ni dra go apfòle bhú kùdù àko dhi lésè gò, lìle dràdrà kisú. Móndyá tití bvò àdhya, àyi kí rú tisìzo búkù lídrì àdhya na ko kídhólé bvò ni bhàma lésè dhi kí líndri kí ga bhwäbhwa, lókyá i dré dra kà'wá àtrá nda ni nòzo dhi 'á. Tàko ko, akódhí nda tá kínó be gò, adrélé nyànomvá yókódhó. Dí a ni dra go apfòle.

⁹Lè à kàdré tògyá íbe kitswázó tà kònì kí àndu ni. Kà'wá àtrá ni drì nzi-drì-rì nda i, kòngó nzi-drì-rì tòkó nda dré adrészó lirilé drìásà dhi 'í. Drì nda i kókpà ópí kàdrì nzi-drì-rì dhi 'í.

¹⁰Àyi nda i kòfalé dhi, ópí nzi dhi kí tà akí dre. Ópí ni nzi-drì-àlo adré ína òpì nya nyànomvá. Ópí ni nzi-drì-rì atsá rè ko. Dí, lókyá dré dra atsázó dhi sè dhi, a ni ngbà 'í òpì nya lókyá tsà sè.

¹¹Kà'wá àtrá adrélépi tá kínó be gò, adrélé nyànomvá yó nda ína ópí ni nzi-drì-na 'i. Akódhi àyi nzi-drì-rì nda kí àlo 'i. Di a ni li dràdrà kisú.

¹²Ko'yá mudrí mí dré nôle nda i, ópí kàdrì mudrí kidhóbhá rè opì nya ko dhi 'i. Di, i ni àyikya rinyí kisú kitswázó opì nya kà'wá àtrá nda be ngbà 'í sáà àlo.

¹³I ni ru yi togó àlo sè, àyi kí rinyí adrészó opì nya dhi ni fèzo wäyi kà'wá àtrá nda drigá.

¹⁴Dì i ni àdzú bhu Kábilígyà Mvá be gò, Kábilígyà Mvá nda dré àyi kí lavúzó. Tako ko, akódhi míri kí Míri 'i, ìndì opí kí Opí 'i. Akódhi nda túmání akódhi ni lebèbhá dré zile, dré azilé, ìndì dré kitswálé ka'ile dhi íbe dhi kí àyi nda kí lavú. »

¹⁵Ángéló nda gò tàá má dré dhi: «Yiandre bě mí dré tokó zàràbhù ni nòzo adrérà'a lirílé driásà nda i, móndí lizolízo angábhá móndyá tití i lésè, surú tití i lésè, ìndì ti tití i lésè dhi 'i.

¹⁶Kà'wá àtrá i ko'yá mudrí ni íbe mí dré nôle dhi kí togó kònzi bha tokó zàràbhù nda rú. I ni akódhi ni ngá topá drigásà tití, akódhi ni tayízó bvólílí ro. I ni akódhi ni zá nya gò, akódhi ni zázo vèle atsí sè.

¹⁷Tako ko, Giká ni lovó bha àyi kí togó na, i kò'oró tà dré kisùle 'ole kínó lésè dhi be dhi bvó. I ni ru yi togó àlo sè, àyi kí rinyí adrészó opì nya dhi ni fèzo kà'wá àtrá nda drigá, tsale lókyá tà Giká dré tâle dhi i dré dra ru 'òzo kitswálé tití dhi 'á.

¹⁸Tokó zàràbhù mí dré nôle nda, bhàandre kàdrì adrélépi opì nya ópí kàdrì bvò àdhya i dri dhi 'i. »

Tà tadhálé dhi i 18

Bhàandre Bâbîlónà àdhya ni dhèma

¹Àmvolásà dhi, má dré ángéló àzya nòzo adrérà'a asilé bhù lésè. Akódhi nda tá rinyí íbe kàdrì. Lagulagu ni adré tá ngá kazá bvò drisè tití.

²Gò dré yòzoá kúlí 'u'u sè dhi: «Dhe dre! Bâbîlónà kàdrì dhe dre! Bhàandre nda atsá vélé bhà tirí kònzi kya ró. Atsá kpà arà tirí kònzi i dré adrészó àyi kí zu lána dhi ró, ìndì arà arí tití ìndì kà'wá tití ndí ró adrélé gâle gâgâ dhi i dré adrészó àyi kí zu lána dhi ró.

³Tako ko, surú tití bvò dri dhi i mvu tá vínò akódhi ni ndòtò tà àdhya gò, vínò nda dré àyi kí tsizo.

Ópí kàdrì bvò àdhya i fè tá àyi ndòtò tà 'o túmání akódhi be. Ngá lagibhá bvò àdhya i atsá tá ngábhá kàdrì i ró akódhi ni ngá làgí kyàkyà zyandre ró dhi i sè. »

⁴Gò má dré kúlí àzya apfòlepi bhù lésè dhi ni yìzo tàá dhi: «Áma móndyá i, mì kàpfò bhàandre nda lésè, mì kò'oró tàkonzì túmání akódhi be ko, mì konyaró kpà kizà kàdrì dré dra nyâle dhi i ko.

⁵Tako ko, akódhi ni tàkonzì i ga bvò na bě atsálé byá bhù 'a gò, tà kònzi dré 'ole dhi i dré agázó Giká léna.

⁶Dì mì kòlogó tà akódhi dré tà dré 'òle dhi i tí. Mì kòlogó drá tà dré 'òle dhi kí vúdrì vésè be rì. Mì kòdà akódhi ni kópò na ngá kònzi dré dàle móndí àruka i dré dhi vésè be rì.

⁷Mì kòfè akódhi dré ngáaswa i kizà be, ngóró dré rúku fèle ngá làgí kyàkyà dhi be áyi tändi dré dhi tíni. Akódhi adré kisùá áyi togó na dhi: «Má adré lirilé kònwa ópí kàdrì tòko ró. Ma tàyítokó i ko. Má kitswá mána àwó ngo tàdzí ko. »

⁸Dì ásà dhi, kizà kàdrì kònì kí atsá akódhi dri kítú àlo sè: dràdrà, tongotongo ìndì kàràbhò.

À ni akódhi ni za vèle àtsí sè,

àngyá ko, Míri Gíká adrélépi akódhi ni tàbvó ta rìnyi ró. »

⁹Ópí kàdrì bvò àdhya àyi kí febhá ndòtò tà 'o akódhi be ìndì ngá làgí kyàkyà kí kisú akódhi be dhi i kònò akódhi ni vevè ni àtsíkà dre dhi, i ni àwó ngo, adrészó tongolé akódhi ni tà sè.

¹⁰I ni àyi ki totó lárá ro tirì dré, ìndì akódhi ni ngáaswa dré, adrélé tàá dhi: «Kizà! Kizà ámì ngá 'i, mi Bàbilónà, bhàandre kàdrì ìndì rìnyi ró ni! Tàko ko, à ñò tà mí dri, àkò sáà àlo akí rè ko dhi 'á! »

¹¹Ngá lagíbhá bvò àdhya kí kpà àwó ngo, adrészó tongolé akódhi ni tà sè. Tàko ko, dhya kitswálépi gòle àyi kí ngá gi dhi vélé yókódhó.

¹²À gi tá àyi nda i drígásè: órò, àrezá, kírà làgí kyàkyà dhi i, màyìkà rú be pérelè dhi i, kítá ledélé lénè sè ìndì sòwá sè dhi i, kítá làgí kyàkyà kíka ìndì kíka ryarya dhi i, fa twátwa tàdzí be dóro dhi i, ngá twátwa ledélé lìwá sí sè dhi i, fa làgí kyàkyà dhi i, ngá ledélé bòrónzè sè, aya sè, ìndì kírà rú be märeberè dhi sè dhi i,

¹³kànélè, málásì twátwa tàdzí be dóro dhi i, málásì ledélé mírè sè dhi, béndélé, víno, olívè dò, ngánò fóndro, ngánò lò'wa, tí i, kábilígyà i, dòngí i, tàmàmbíri dòngí i dré adrélé sèle dhi i, tsàle ndìndì mårábà i, àyi kí lídrì íbe.

¹⁴Àyi nda ki tàá dhi: «Ngá tití mí dré tá lovó ni kí bhàzo dhi i lapá mí drígásè dre. Ámì ngá tití làgí kyàkyà avébhá tò dhi i akí mí rúsè dre. Mí kitswá tàdzí gòle àyi kí kisú ko. »

¹⁵Ngá lagíbhá atsábhá ngábhá kàdrì i ró bhàandre nda sè dhi kí àyi kí totó lárá ro tirì dré, ìndì akódhi ni ngáaswa dré. I ni àwó ngo, adrészó tongolé akódhi ni tà sè,

¹⁶adrészó tàá dhi: «Kizà! Kizà bhàandre kàdrì ni ngá 'i! Akódhi tosó tá i rú kítá lénè sè dhi i kítá làgí kyàkyà kíka ìndì kíka ryarya dhi íbe, àyi 'òzo avélé órò sè, kírà làgí kyàkyà dhi i sè, ìndì pérelè i sè.

¹⁷Dì akódhi ni ngá tití zyandre ró nda i akí drígásà, àkò sáà àlo akí rè ko dhi 'á! » Bwátù todóbhá i, àyi kí kàdrì tití dhi i, móndyá tití bwátù i dré adrélé dòle yíandre misè dhi i, ìndì móndyá tití adrébhá ngá kisú yíandre ni tà sè dhi íbe dhi kí àyi kí totó lárá ro bhàandre nda rúsè.

¹⁸Ì kònò akódhi ni vevè ni àtsíkà dre dhi, i ni yòá dhi: «Bhàandre àzya kàdrì akódhi tini dhi tàdzí yókódhó! »

¹⁹Ì ni tâpfulíndrí lomvó todàle àyi drìna, adrészó àwó ngo, adrészó tongolé, adrészó yòá dhi: «Kizà! Kizà bhàandre kàdrì ni ngá 'i! Mónyá tití bwátù todóbhá yìandré mísè dhi iatsá tá ngábhá kàdrì i ró akódhi ni ngá zyandre ró dhi i sè. Di akódhi ni ngá akí tití, àkò sáà àlo akí rè ko dhi 'á!

²⁰Àmì bhù na ni i, mì kòlenzé tà atsálépi akódhi rú dhi sè wà!

Àmì, móndyá lolo Giká àdhya i, àpóstolò i pròfétà íbe ni i, mì kòlenzé wà! Tako ko, Giká tà akódhi ni tàbvó, tà kònzi dré 'ole àmì rú dhi kì tà sè dre! »

²¹Gò ángéló àlo rìnyi ró dhi dré kírà gú lanzilepi kírà kàdrì adrészó ngá 'i dhi pí dhi ni dòzo bhèle yìandré na gó, tazoá dhi: «Giká ni kókpà Babilónà, bhàandre kàdrì ni bhe rìnyi sè kònìnì gó, gózo vélé akódhi ni kisú tàdzí ko.

²²À kítswá gòle vélé longó yi mí léna tàdzí ko, gba kàdré kùdhí sè yà, kúlì sè yà, fírlí sè yà, kó ngalè góká sè yà dhi.

À kítswá gòle vélé àzí 'obhá twátwá dhi kì àlo kisú mí léna tàdzí ko.

À kítswá gòle vélé kírà adrészó ngá 'i dhi ni kpòrò yi mí léna tàdzí ko.

²³Tálà ni ngádra kítswá gòle vélé ngá kazá mí léna tàdzí ko.

À kítswá gòle vélé tòkó líyí ni kúlì yi tòkó àdhya be mí léna tàdzí ko. Mónyá adrébhá tá ngá lagí mí léna dhi i tá móndyá kàdrìkàdrì bvò àdhya 'i.

Àmì kólé tà sè dhi, mí lití tá mína súrú tití bvò dri dhi i.

²⁴À kisú tá kpà mí léna pròfétà kì kàrì móndyá lolo kya be, ìndì móndyá tití tupfûlé todràle bvò dri dhi kya be. »

Tà tadhálé dhi i 19

Àlèlúyà!

¹Àmvolásà dhi, má dré kúlì 'u'ù móndí lìzolìzo dhi kya tini dhi ni yìzo bhù na adrérà'a loyóá dhi: «Àlèlúyà! Tà adrészó móndí kì tìdrí dhi, mìlanzilanzì, rìnyi be dhi i àma kì Giká àdhya 'i!

²Tako ko, tàbvó dré adrélè tali dhi i bâti ìndì gyägya! Akódhi tà tòkó zàràbhù kàdrì móndyá bvò àdhya kì kízálépi áyi ndòtò tà sè dhi ni tàbvó dre. Zi kpà akódhi tí áyi màrabà kì kàrì dré kutulé dhi ni tà dre. »

³Gò i dré gózo yòá dhi: «Àlèlúyà!

Àtsíkà adrélèpi apfòle akódhi vélésè dhi adré mbàle kurú na kóná vésè kólyá! »

⁴Gò bhàgo nyadhi-àlo-drì-su dhi i ngá su lídrì ro dhi íbe dhi, i dré ledhézó àyi kí kórökó tití Giká adrélèpi lirílé lirírà òpì àdhya dri dhi kandrá, akódhi ni lindrì bhàzo, tazoá dhi: «Kàdré kònìnì! Àlèlúyà! »

⁵Gò kúlí dré apfòzo lirirà òpì àdhya lésè tàá dhi: «Mì kàdré àma kí Giká ní rú bha kùle,

àmì, màrabà tití akódhì àdhya ró adrébhá akódhì ní ro ní i, gba mì kàdré móndí tako 'i ya, kó ngalè móndí kàdrì 'i ya dhi! »

⁶Gò má dré gózo kúlí móndí lizolizo dhi kya tíni dhi ní yi, ngóró kòlyá kàdrì dhi ní kpòrò dré adrélé ndrôle dhi tíni, ìndì bhù dré adrélé tadilé dhi tíni. Kúlí nda adré tá tàá dhi: «Àlèlúyà! Tako ko, Míri àma kí Giká rinyí liyí ro dhi adré áyi òpì nya!

⁷Mà kàdré lenzélé lavulé, adrészó arí íbe wà! Mà kàdré mìlanzìlanzi fe akódhì dré wà! Àngyá ko, lókyá Kabilígyà Mvá dré dra làmó mòzo dhi kítswá dre. Akódhì ní tòkó ledé kpà i adrélé gànzi ró dhi dre.

⁸À fè kpà drá kítá ledélé lénè sè kemve kpírkípíri dhi dré asólé í rú dre. »

(Kítá ledélé lénè sè nda kòdhi adré tà gyágya móndyá lolo Giká àdhya i dré 'ole dhi kí tà tadhá.)

⁹Gò ángéló nda dré tazoá má dré dhi: «Mí kòtisì kònini: Kólénzé móndyá tití azilé gwányá Kabilígyà Mvá ní làmó àdhya lé dhi i dré! » Gò tàá má dré dhi: «Kòdhi i kúlí báti Giká àdhya 'i. »

¹⁰Dì má dré dhèzo akódhì pá, kitswálé akódhì ní lindrì bha. Dì, dré ína tazoá má dré dhi: «Mí 'o kònini ko! Ma màrabà 'i ngóró mí tíni, ìndì ámì adrúpi adrébhá trôle tà báti Yésu dré tadhálé dhi rú dhi i tíni. Be ró dhi, mí kòbhà Giká ní lindrì kòdhya! Tako ko, tà báti Yésu dré tadhálé dhi adré pròfétà kí kodzó Giká ní kúlí longó dhi nì. »

Dhya adrélépi lirí 'lé dòngí' kemve dhi dri dhi

¹¹Gò má dré nòzoá dhi, bhù lanzí ru dre gò, dòngi kemve dhi dré apfòzo má kandrá. Dhya adrélépi lirilé driá dhi ní rú «Dhya kitswálépi adrélé ka'ile togó wáyi sè dhi» ìndì «Dhya báti». Adré tábvo ta, adrészó kpà àdzú bhu tà gyágya sè.

¹²Akódhì ni mì adré tá kòle rinyi ró àtsí tíni. Akódhì tá kùlá íbe bì i dri. À tisi tá akódhì rú, rú àndu ní ní nízo ko dhi. Ngbà 'í akódhì ni tändi nì nì.

¹³Akódhì asó tá í rú kánzò kárí dré kutúzó rúá dhi. Akódhì ni rú «Giká ní Kúlí».

¹⁴Sòdá zyandre bhù àdhya i lirí tá dòngi kemve dhi i drisè gò, i dré adrészó lile akódhì vésè. I tosó tá àyì rú kítá ledélé lénè sè kemve kpírkípíri dhi i.

¹⁵Akódhì sílesè dhi, sápí litsì dhi adré tá apfòle, kòkitswáró surú tití bvò dri dhi kí togá ásà be dhi bvó. Akódhì ni òpì nya àyì dri kùtù aya ró adrélépi áyi rinyí tadhá dhi sè. A ní vínò lò'wa kí ató zwàle, àrà vínò lò'wa zwàzo, Giká rinyí liyí ro dhi ní kombà tadházó dhi na.

¹⁶Akódhì ni kánzò nda rú, ìndì akódhì ni pàandre rú dhi, à tisi tá akódhì ni rú kònì i: «Ópí kí Ópí, ìndì Míri kí Míri. »

¹⁷Gò má dré ángéló àlo dhi ni nòzo adrérà'a áyi totó kítú mi. Akódhi nda dré yòzoá kúlì 'u'u sè àrí tití adrébhá ngàle kuru sè dhi i dré dhi: «Mì alì ru kímó gwányá kàdrì Giká àdhya lé,

¹⁸kitswálé ópí kàdrì ki ză te, sòdá ki kàdrì kya íbe, sòdá kòmbá kya íbe, dòngí kya íbe, móndyá liríbhá àyi drisè dhi kya íbe, ìndì móndyá àruka tití màrabà ro, màrabà ro ko, móndí tåko ró, ìndì kàdrì ro dhi íbe. »

¹⁹Gò má dré kà'wá àtrá nòzo, ópí kàdrì bvò àdhya íbe ìndì àyi ki sòdá zyandre íbe, adrérà'a ru kímó kitswálé àdzú bhu dhya adrélépi lirílé dòngí dri nda be, ìndì akódhi ni sòdá zyandre íbe.

²⁰Dì, à dré kà'wá àtrá nda ni rùzo, túmání pròfétà kinzò ro tà líndríga ró dhi ki 'olepi kà'wá nda kandrá dhi be. Tà líndríga ró nda i sè dhi, pròfétà nda lití tá móndyá tití kà'wá àtrá ni àngì 'obhá lwàle àyi rú, adrébhá kpà lindrì fe akódhi ni líndrí dré dhi ni. Gò kà'wá àtrá nda ni bhèzo lídrì ro pròfétà kinzò ro nda be, àtsí andre adrélépi kòle bàrúti be dhi na.

²¹Dì dhya adrélépi lirílé dòngí dri nda dré sòdá zyandre tití nda ki togázó todràle sápí adrélépi tá apfòle i sîlésè dhi sè. Gò àrí tití dhi i dré àyi ki ză tèzo pìzo.

Tà tadhálé dhi i 20

Kóná ngùlù-àlo dhi i

¹Gò má dré ángéló àlo dhi ni nòzo adrérà'a asilé bhù lésè. Akódhi ru tá i drígá lifungúlì mvá bhú kùdù àko dhi àdhya, nyìri kàdrì dhi be.

²Gò dré ngàzo ni málawú gú dhi ni ru 'ile nyìri sè, kàdréró bă na kóná ngùlù-àlo be dhi bvó. Akódhi nda, ni àku adrélépi tá be kínó lésè, adrélé rú zile Dzáborò ìndì Sàtánà dhi i.

³Dì ángéló nda dré akódhi ni bhèzo bhú kùdù àko dhi na, bhú nda ni ti atsúzó gágä lifungúlì mvá sè gò, kikpàzoá, akódhi kòkitswáró góle surú tití bvò dri dhi ki lití ko, tsàle kóná ngùlù-àlo nda dré akírà'a. Àmvolásà dhi, adré lèá dhi, à kògò akódhi ni tri lókyá tsà sè.

⁴Gò má dré lirírà adrészó òpí nya dhi ki nòzo. Móndyá adrébhá lirílé driásà dhi i kisú tá rinyí kitswázó tâbvó ta. Má dré kpà móndyá tililé sápí sè, i dré tá Yésu ni tà longolé, ìndì Giká ni kúlì longolé dhi sè dhi ki líndrí nòzo. Àyi nda i fè tá àyikya lindrì kà'wá àtrá dré ìndì líndrí ni dré ko. I'o tá kpà akódhi ni àngì lwàle àyi ki kandrágá i 'ásè yà, kó ngalè àyi drígá yà dhi ko. Dì i dré ngàzo dràdrà 'ásè gò, i dré òpí nyàzo túmání Krísto be kóná ngùlù-àlo.

⁵(Móndyá àruka tití dràbhá dre dhi i nga rè dràdrà 'ásè ko, tsàle kóná ngùlù-àlo nda dré akírà'a.) Kòdhi vésè ni àlo móndí i dré ngàzo dràdrà 'ásè dhi i.

⁶Kolénzé ni adré móndyá dra ngabhá dràdrà 'ásè lókyá nda sè dhi i dré! Àyi nda i lolo Giká kandrá. Dràdrà ni rì ni rinyí kitswá tsàle àyi rú ko. Dì, i ni adré kòwánà Giká àdhya ìndì Krísto àdhya i ró, adrélé òpí nya túmání akódhi be kóná ngùlù-àlo.

Sàtánà ni tà ni akima

⁷Kóná ngùlù-àlo nda kàkí dre dhi, à ni Sàtánà ni atrì akódhi ni bă lésè.

⁸Akódhi dré apfòzo lile súrú tití ayíbhá bvò ni pá su dhi i 'ásè dhi ki lití gò, àyi ki kimózó kítswálé àdzú bhu dhi bvó. À adré súrú nda ki rú zi Gógà, ìndì Mágogà. È lizó ngóró sínýí yíandre mìle dhi tíni.

⁹Dì àyi nda è dré ngàzo lavúlé bvò drísè wäyi, lile àrà móndyá Gíká àdhya è dré adrészó lána dhi ni gärà ki kúrú. Àrà nda bhàandre Gíká dré lèle tò dhi 'i. Dì, àtsí dré ína asízó bhù lésè àyi ki za vèle tití.

¹⁰Gò Dzáborò àyi ki litílépi nda ni bhèzo àtsí andre adrélisépi kòle bàrútì be dhi na, àrà tá kà'wá àtrá ki bhèzo pròfétà kinzò ro dhi be lána dhi na. Kònàle dhi, àyi ki rúbhá ni adré aswálé kítú be ìndì ngátsi be kóná vésè kólyá.

Móndyá dràbhá dre dhi ki tàbvó tàma kùdù ro dhi

¹¹Àmvolásà dhi, má dré lirírà kàdrì kemve òpì àdhya ni nòzo, dhya adrélisépi lirílfé driá dhi be. Dì bvò i bhù be dhi è dré lapázó dhya nda mìlésè gò, gózo vélé àyi ki no ko.

¹²Gò má dré móndyá tití kàdrì ìndì tåko ró dràbhá dre dhi ki nòzo, adrérà'a àyi ki totó lirírà òpì àdhya nda kandrá. Dì à dré búkù ki tinzi zo gò, búkù àzya lídrì àdhya ni nzìzo. Gò móndyá dràbhá nda ki tàbvó tåzo, ngóró àyi ki tà 'ole gò tisìzoá búkù nda i léna dhi è dré tá adrélé dhi tíni.

¹³Yíandre 'o tá móndyá tá dràbhá è lé dhi è topfòle. Dràdrà i àrà dràbhá kya be dhi è 'o tá kpà móndyá tá dràbhá àyi lé dhi è topfòle gò, àyi àlo àlo tití dhi ki tàbvó tåzo ngóró àyi ki tà 'ole dhi è dré tá adrélé dhi tíni.

¹⁴Gò dràdrà ki bhèzo àrà dràbhá kya be àtsí andre adrélisépi kòle dhi na. Àtsí andre nda dràdrà ni rì 'i.

¹⁵Dì móndyá tití àyi ki rú tisìzo búkù lídrì àdhya na ko dhi ki bhèzo àtsí andre nda na.

Tà tadhálé dhi è 21

Bhù ti' dhi' ro dhi i` ndi` bvò ti' dhi' ro dhi

¹Àmvolásà dhi, má dré bhù tídhi ro dhi ni nòzo bvò tídhi ro dhi be. Tåko ko, bhù àku i bvò àku be dhi è akí dre. Yíandre tá kpà vélé yókódhó.

²Gò má dré bhàandre lolo, Yèrúsalémà tídhi ro dhi ni nòzo adrérà'a asilé Gíká vélésè bhù lésè. À ledé tá bhàandre nda adrélé gànzi ró, ngóró tòkó áyi tosólépi aveave ró adrélé áyi agó ni letè làmó sè dhi tíni.

³Gò má dré kúlí 'u'ù apfòlepi lirírà òpì àdhya lésè dhi ni yìzo tàá dhi: «Mì yi rè ká! Nyànomvá dhi, àrà Gíká dré adrészó lána dhi móndí i kòfalé. Akódhi mo bhà adrészó túmání àyi íbe. È ni adré akódhi ni móndyá i ró. Dì Gíká ni tändì adrélisépi túmání àyi íbe nda ni adré àyi ki Gíká ro.

⁴A ni mìndra tití dhi kí atrí àyi mìlésè. Dràdrà ni adré vélé yókódhó. Kizà, tongotongo, rúbháaswa be dhi kí kókpà adré vélé yókódhó. Tako ko, tà àku akí dre. »

⁵Dì dhya adrélipi lirílé lirírà òpì àdhyà dri dhi dré tazoá dhi: «Mì nò rè ká! Má adré tà tití dhi kí 'o atsálé tídhí ro! » Dré gòzo tàá má dré dhi: «Mí tisì tà kòdhí i. Tako ko, kúlì kòdhí i kúlì báti kitswálé ka'ile togó wáyi sè dhi 'i. »

⁶Gò tàá dhi: «Tà tití dhi i kitswá dre! Ma Álefà 'i, ìndì Òmégà 'i. Ma tà tití dhi kí wáláká 'i, ìndì tà tití dhi kí kùdù 'i. Dhya adrélipi yí lovó íbe dhi dré dhi, má ni yí adrélipi angálé kidrì lídrì àdhyà lésè dhi ni fe dré mvùle àngyá.

⁷Dì dhya ángùdhí dra tà lavúlépi dhi ni tà tití kòdhí kí kisú tayilé ro. Má ni adré akódhí ni Giká ro. Akódhí ni ína adré áma mvá ro.

⁸Dì, kàdré ína móndyá tiri ró dhi kí tà sè, móndyá adrébhá áma ka'i ko dhi íbe, móndyá adrébhá tà gále gágà dhi kí 'o dhi íbe, móndyá adrébhá móndí pfu dràle dhi íbe, móndyá adrébhá ndòtò tà 'o dhi íbe, móndyá adrébhá kólé tà 'o dhi íbe, móndyá adrébhá giká tako kí lindrì bha dhi íbe, ìndì móndyá tití adrébhá kinzò ta dhi íbe dhi, àyi nda kí àrà ni adré àtsí andre adrélipi kòle bàrútì be dhi na. Kòdhí dràdrà ni rì 'i. »

Yérusalémà ti' dhi' ro dhi'

⁹Gò ángéló nzi-drì-rì adrébhá tá kópò nzi-drì-rì gabhá kizà kùdù nzi-drì-rì dhi i sè bïbi dhi íbe nda kí àlo dré alizo tàá má dré dhi: «Mí alì, má kòtadháró mí dré tòkó Kábilígyà Mvá dré mòle áyi tokó ro dhi. »

¹⁰Dì dré áma dòzo Tíri Lólo ni rinyí sè bhàle kòngó àlo kàdrì mvumvù ro dhi drìna. Dré má dré Yérusalémà, bhàandre lólo dhi ni tadházó adrérà'a asilé Giká vélésè bhù lésè.

¹¹Bhàandre nda ga tá Giká ni mìlanzìlanzi sè bï gò, adrélé lagúlé ngóró kírà làgí kyàkyà dhi dré adrélé lagúlé dhi tíni. Adré tá lagúlé ngóró kírà rú be dzáspè dhi tíni, adrélé tàratára ngóró krìstálè tíni.

¹²Bhàandre nda ni zéríbà nzì tá nzinzì ìndì mvu tá mvumvù, adrélé ti íbe mudrí-drì-rì. Ángéló mudrí-drì-rì dhi i adré tá zéríbàti nda kí likí. Zéríbàti nda i rúsè dhi, à tisì tá ìsérélè ànzì kí súrú mudrí-drì-rì dhi kí rú.

¹³Zéríbàti nda i kòfalé dhi, à tobhà tá na dhi i kítú dré apfòrà lésè, na dhi i kítú dré ndírà lésè, na dhi i kurú lésè, ìndì na dhi i tàbhu lésè.

¹⁴Bhàandre ni zéríbà nda totó tá i pá mudrí-drì-rì kírà sè dhi i dri. Kírà nda i rúsè dhi, à tisì tá Kábilígyà Mvá ni àpóstolò mudrí-drì-rì dhi kí rú.

¹⁵Ángéló adrélipi tá tà ta má be nda ru tá i drígá kòzó órò sè dhi, kitswázó bhàandre nda ni kàdrì tabhì, zéríbà ni àdhyà be, ìndì zéríbàti ni kya be.

¹⁶Bhàandre nda ni gàrà su dhi kí kàtswa tá tití kandra àlo, kàtswa ni tali ni pí. Gò ángéló nda dré bhàandre nda ni tabhìzo kòzó sè, kisúzóá dhi: kàtswa ni tá kílométerè ngùlù-rì-drì-kámá-su, ìndì kàdrì ni i mvumvù ni be dhi i tá kpà kandra àlo.

¹⁷Dì dré kpà zèribà nda ní tabhìzo: mvumvù ní tá méterè nyadhi-na-drì-nzi-drì-àlo. Kòdhì ángéló adré tá ngá tabhì méterè móndí i dré adrészó ngá tabhì ásà dhì sè.

¹⁸À tobhà tá zèribà nda kírà rú be dzáspè dhì sè, bhàandre nda ní tobhàzo órò tsèrèlè adrélépi tàratára krìstálè tñi dhì sè.

¹⁹À ledé tá bhàandre nda ní zèribà ní pá i kírà twátwa làgí kyàkyà dhì i sè. À ledé tá pá ní ní àlo dzáspè sè, rì ní sàfírè sè, na ní àgátè sè, su ní èmèròdè sè,

²⁰nzi ní sàrùdònìkisì sè, nzi-drì-àlo ní sàrùdùwánè sè, nzi-drì-rì ní krìsòlítè sè, nzi-drì-na ní bérilè sè, nzi-drì-su ní tòpázè sè, mudrí ní krìsòpùrázè sè, mudrí-drì-àlo ní türükwázè sè, ìndì mudrí-drì-rì ní àmètistè sè.

²¹À ledé tá zèribàti mudrí-drì-rì nda i pérelè i sè: àyi àlo àlo tití dhì i pérelè àlo sè. À ledé tá bhàandre ní láti andre órò tsèrèlè adrélépi tàratára krìstálè tñi dhì sè.

²²Má nò tá tépelò bhàandre nda na ko. Tako ko, Mírì Gìká rìnyí lìyí ro dhì túmání Kábilígyà Mvá be dhì i, bhàandre nda ní tépelò 'i.

²³À kítswá ngádra kítú àdhya yà, kó ngalè mbă àdhya yà dhì ní lovó bha ngá kazá bhàandre nda léna dhì ko. Tako ko, Gìká ní lagulagu adré ína ngá kazá lána dhì nì, ìndì Kábilígyà Mvá akódhì ní tálà 'i.

²⁴Súrú tití dhì kí atsí ngádra bhàandre nda àdhya 'ásè. Ópí kàdrì bvò àdhya kí kpà fí lána àyi kí mìlanzìlanzì be.

²⁵À kítswá tàdzí bhàandre nda ní zèribàti kí asé ìndró sè ko. Àngyá ko, ngátsi ní adré kònàle yókódhó.

²⁶Súrú tití dhì kí fí bhàandre nda léna àyi kí mìlanzìlanzì be, ìndì àyi kí lìndrì be.

²⁷Dì, ngá àlo ndí ró dhì kítswá tàdzí fíle lána ko. Dhya adrélépi tà gàle gàgà dhì ní 'o yà, kó ngalè adrélépi tà 'o kinzò sè yà dhì kítswá kpà tàdzí fíle lána ko. Ngbà 'í móndyá àyi kí rú tísìzo Kábilígyà Mvá ní búkù lìdrì àdhya léna dhì kí fí lána dhì àyi.

Tà tadhálé dhì i 22

Yìandré adrélépi lí́ drí́ fe dhì

¹Gò ángéló nda dré má dré yìandré tàratára krìstálè tñi adrélépi díle, adrélépi lìdrì fe dhì ní tadházó. Yìandré nda adré tá apfòle Gìká ní lìrìrà adrészó òpì nya Kábilígyà Mvá be dhì lésè,

²adrélé díle bhàandre ní láti andre 'ásè. Yìandré nda ní gàrà rì dhì i 'ásè dhì, fa adrélépi lìdrì fe dhì totó tá i adrélé lò'wa 'a vésè be mudrí-drì-rì kóná àlo sè, vésè àlo mbă àlo sè. Fa nda ní bí i tá àlókò adrészó súrú tití dhì kí tìdrí ásà dhì 'i.

³Tátrítrí àlo dhì ní adré vélé yókódhó. Gìká ní lìrìrà adrészó òpì nya Kábilígyà Mvá be dhì ní adré bhàandre nda 'á gó, akódhì ní màrabà i dré adrészó lìsàmbò 'o akódhì kandrá.

⁴I ní akódhì ní mìbhalé no mì sè. Akódhì ní rú ní kpà adré àyi kí kándrágá i 'ásè.

⁵Ngátsi ní adré vélé yókódhó. Ì kitswá kpà ngádra tálà àdhya yà, kó ngalè kítú àdhya yà dhì ní lovó bha ko. Tàko ko, Míri Gíká ní ngádra fe ngá kazá àyi dré dhì nì. Di ì ní adré òpì nya kóná vésè kólyá.

⁶Gò ángéló nda dré tázoo má dré dhì: «Kúlí kòdhì i kúlí báti kitswálé ka'ile togó wáyi sè dhì 'i. Míri Gíká adrélépi pròfétà kí kodzó áyi kúlí longó dhì mù áyi ángéló, tà dra atsábhá mbèlè dhì kí longó áyi màrabà i dré. »

Yésu adré alì `le mbèlè

⁷Yésu adré tázoo dhì: «Mì yi rè ká! Má adré alìle mbèlè! Kólénzé dhya adrélépi kúlí pròfétà àdhya búkù kònìdhì lé dhì kí likí dhì dré! »

⁸Ma, Yòwánì, ma dhya tà kòdhì kí yilepi, ìndì tà nda kí nòlepi mì sè dhì 'i. Má kòyi tà nda i nòzoá dre dhì, má dhe tá ángéló tà nda kí tadhálépi má dré dhì pá, kitswálé akódhì ní lindrì bha.

⁹Di, dré ína tázoo má dré dhì: «Mí 'o kònìni ko! Ma màrabà 'i ngóró mí tíni, ámi adrúpi pròfétà ro dhì i tíni, ìndì móndyá tití adrébhá kúlí búkù kònìdhì lé dhì kí likí dhì i tíni. Be ró dhì, mí kòbhà Gíká ní lindrì kòdhya! »

¹⁰Gò tázoo má dré dhì: «Mí kòlosó kúlí pròfétà àdhya tisile búkù kònìdhì lé dhì i móndí i dré ko. Tàko ko, lókyá atsá ànyi dre.

¹¹Lè dhya ángùdhì adrélépi tà kònzi 'o dhì, kògò ína adrélé tà kònzi 'o. Dhya adrélépi ndòtò tà 'o dhì, kògò ína adrélé ndòtò tà 'o. Dhya adrélépi tà gyägya 'o dhì, kògò ína adrélé tà gyägya 'o. Dhya adrélépi lólo dhì, kògò ína áyi fe adrélé lólo. »

¹²Yésu adré tázoo dhì: «Mì yi rè ká! Má adré alìle mbèlè! Má ní alì áma làgí mûrúngú be, kitswálé tà logó móndí àlo àlo tití dhì i dré tà i dré 'ole dhì i tí.

¹³Ma Álefà 'i, ìndì Òmégà 'i. Ma dhya drìdrì dhì 'i, ìndì dhya kùdù dhì 'i. Ma tà tití dhì kí wáláká 'i, ìndì tà tití dhì kí kùdù 'i. »

¹⁴Kólénzé ní adré móndyá adrébhá àyi kí kánzò kí dzi dhì i dré! Àyi nda kí kitswá file bhàandre nda na zéríbàti i 'ásè, adrélé fa adrélépi lídrì fe dhì ní lò'wa nya dhì àyi.

¹⁵Di, kàdré ína móndyá kònzi kí tà sè, móndyá adrébhá kólé tà 'o dhì íbe, móndyá adrébhá ndòtò tà 'o dhì íbe, móndyá adrébhá móndí pfu dràle dhì íbe, móndyá adrébhá gíká tàko kí lindrì bha dhì íbe, ìndì móndyá tití adrébhá kínzò tà le 'ole dhì íbe dhì, àyi nda kí adré bhàandre nda ní kivì na.

¹⁶«Ma, Yésu, má mù áma ángéló kitswálé tà kòdhì kí longó tití àmí adrébhá Èkèlezyà i 'ásè dhì i dré. Ma dhya angálépi Dàwídì ní kómvo lésè dhì 'i, ìndì akódhì ni toyó 'i. Ma kpà nzàgó adrélépi kòle drùbhì sè dhì 'i. »

¹⁷Tirí Lolo i tokó adrélépi 'ole mòle dhì be dhì, i adré tázoo dhì: «Mí kàlì wà! » Dhya ángùdhì adrélépi tà kòdhì kí yi dhì kòtà kpà dhì: «Mí kàlì wà! » Lè dhya ángùdhì adrélépi yí lovó íbe dhì kàlì. Dhya adrélépi yí le mvùle dhì kòdo yí adrélépi lídrì fe dhì mvùle àngyá.

¹⁸Ma, Yòwánì, má adré móndyá tití adrébhá kúlí pròfétà àdhya búkù kònìdhì lé dhi kí yi dhi kí kodzó, adrészó tàá dhi: Dhya àlo kògò tà àzya bha kúlí búkù kònìdhì lé dhi i dri dhi, Gíká ní kókpà kízà kàdrì tà ní kí tísìzo búkù kònìdhì lé dhi kí bha akódhì nda dri.

¹⁹Dhya àlo kòtingá tà àlo kúlí pròfétà àdhya búkù kònìdhì lé dhi i drísè dhi, Gíká ní kókpà tà taní tà ní kí tísìzo búkù kònìdhì lé dhi kí tingá akódhì nda drísè. Akódhì kitswá ína file bhàandre lólo dhi na ko. Kitswá kpà fa adrélépi lídrì fe dhi ní lò'wa nya àlomvá ko.

²⁰Dhya adrélépi tà kòdhì kí longó dhi adré tàá dhi: «Àyíya, má adré alile mbèlè! » Kàdré kònìni! Míri Yésu, mí kàlì wà!

²¹Míri Yésu ní togó taní kàdré àmí íbe tití!

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil